


El Nuevo Testamento
en mixe de
Guichicovi



New Testament in Mixe, Isthmus (MX:mir:Mixe, Isthmus)

El Nuevo Testamento en mixe de Guichicovi
New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

4e564219-157f-5807-b810-47a15308b8b8

Contents

San Mateo	1
San Marcos	58
San Lucas	99
San Juan	158
Hechos	208
Romanos	277
1 Corintios	312
2 Corintios	339
Gálatas	358
Efesios	366
Filipenses	376
Colosenses	382
1 Tesalonicenses	388
2 Tesalonicenses	394
1 Timoteo	397
2 Timoteo	405
Tito	411
Filemón	415
Hebreos	417
Santiago	435
1 Pedro	441
2 Pedro	451
1 Juan	456
2 Juan	462
3 Juan	463
Judas	464
Apocalipsis	466

San Mateo

¹ Yaa jaduhñ myiñ cujaay nebiaty ja'a Jesús yhap tieedyhajxy jecy xiøhajty. Abraham xiøhajty ja'a jawyiinhájtábä. David xiøhajty ja'a cujegy jaac miiñábä.

² Ja'a Abraham yhuung, Isaac je'e xiøhajty. Ja'a Isaac yhuung, Jacob je'e xiøhajty. Ja'a Jacob yhuung tu'ug, Judá je'e xiøhajty. May ja'a Judá ja'a piuhya'ay hñajty miøødä.

³ Ja'a Judá yhuunghajxy, Fares hajxy xiøhajty møødä Zara. Ja'a Fares tiajhajxy, Tamar je'e xiøhajty. Ja'a Fares yhuung, Esrom je'e xiøhajty. Ja'a Esrom yhuung, Aram je'e xiøhajty.

⁴ Ja'a Aram yhuung, Aminadab je'e xiøhajty. Ja'a Aminadab yhuung, Naasón je'e xiøhajty. Ja'a Naasón yhuung, Salmón je'e xiøhajty.

⁵ Ja'a Salmón yhuung, Booz je'e xiøhajty. Ja'a Booz tiaj, Rahab je'e xiøhajty. Ja'a Booz yhuung, Obed je'e xiøhajty. Ja'a Obed tiaj, Rut je'e xiøhajty. Ja'a Obed yhuung, Isaí je'e xiøhajty.

⁶ Ja'a Isaí yhuung, David je'e xiøhajty. Mänitä David tiägøøyy gobiernähajpä. Mänitä Urías yajyagho'cä mänaa ja'a tsip jiadyiiñän. Coo ja'a Urías yho'cy, mänitä David ja'a Urías tio'oxiøjc wyiingpøjcä. Mänitä David yaghuungpaaty. Salomón ja'a yhuung hajxy yajxøhajty.

⁷ Ja'a Salomón yhuung, Roboam je'e xiøhajty. Ja'a Roboam yhuung, Abías je'e xiøhajty. Ja'a Abías yhuung, Asa je'e xiøhajty.

⁸ Ja'a Asa yhuung, Josafat je'e xiøhajty. Ja'a Josafat yhuung, Joram je'e xiøhajty. Ja'a Joram yhuung, Uzías je'e xiøhajty.

⁹ Ja'a Uzías yhuung, Jotam je'e xiøhajty. Ja'a Jotam yhuung, Acáz je'e xiøhajty. Ja'a Acáz yhuung, Ezequías je'e xiøhajty.

¹⁰ Ja'a Ezequías yhuung, Manasés je'e xiøhajty. Ja'a Manasés yhuung, Amón je'e xiøhajty. Ja'a Amón yhuung, Josías je'e xiøhajty.

¹¹ Ja'a Josías yhuung tu'ug, Jeconías je'e xiøhajty. Jimä Jeconías ja'a piuhya'ay hñajty miøødä. Mänitä judíoshajxy hadsip yajnøcxä jäguem Babilonia-naaxooty.

¹² Jim hajxy chánaadiaacpøjcy Babilonia. Jimä Jeconías ja'a yhuung yajxøhajty Salatiel. Ja'a Salatiel yhuung, Zorobabel je'e xiøhajty.

¹³ Ja'a Zorobabel yhuung, Abiud je'e xiøhajty. Ja'a Abiud yhuung, Eliaquim je'e xiøhajty. Ja'a Eliaquim yhuung, Azor je'e xiøhajty.

¹⁴ Ja'a Azor yhuung, Sadoc je'e xiøhajty. Ja'a Sadoc yhuung, Aquim je'e xiøhajty. Ja'a Aquim yhuung, Eliud je'e xiøhajty.

¹⁵ Ja'a Eliud yhuung, Eleazar je'e xiøhajty. Ja'a Eleazar yhuung, Matán je'e xiøhajty. Ja'a Matán yhuung, Jacob je'e xiøhajty.

¹⁶ Ja'a Jacob yhuung, José je'e xiøhajty. Coo ja'a María yhuung hñajty tøø myiñ tøø quia'ay, ja'a Jesúshajpä, mänitä José ja'a María wyiingpøjcy. Ja'a Jesús, Cristo je'e xiøhajty; paady yaa quiejxä hädaa yaabä naaxwiin maa højtscøxpän.

¹⁷ Nämajmacts ja'a Jesús ja'a yhap ja'a tieedy hñajty miøødä, møødä Abraham møødä David. Y jaac nämajmacts ja'a yhap ja'a tieedy hñajty miøødä, møødä Salomón møødä Jeconías. Mänitä judíoshajxy yajnøcxä Babilonia-naaxooty. Y jaac nämajmacts ja'a Jesús ja'a yhap ja'a tieedy hñajty miøødä, møødä Salatiel møødä José. Mänitä Cristo myiiñguiahy.

¹⁸ Yaa jaduhñ myiñ cujaay nebiä Jesucristo myiiñguiahyän. Ja'a Jesucristo tiaj, María hñajty je'e xiøhaty. Tøø hñajty tiødiägø'øy coo ja'a Maríahajxy hñajty piøga'añ møødä José. Pero cajnä hajxy hñajty piøcyñä, mänitä María quiahxø'cy coo hñajty yhuungmøødä. Ja'a Dioshespírituham hñajty tøø yhuungpaady.

19 Jaduhñ ja'a judíoshajxy hánajty quiuhdujthaty, coo ja'a to'oxiøjc yhuungpáadät jabiøcy, mänit jaduhñ yhøxmájtšänät. Pero miøød ja'a José hojioot hánajty; cabä María hánajty ñäxø'øwø'øwa'añ. Mänitä José wyiinmahñdyhajty coo ja'a María yhøxmádsät hamee'ch, nebiä María jaduhñ quia'a yajtsähdiúnät.

20 Yhuuc wiinmahñdyhajpy ja'a José hánajty, mänit miaaho'cy. Mänitä Diosmoonsä wyiinhijxy cuma'ayhaam. Tsajpootyp hánajty chooñ. Mänitä José ñämaayyá:

—José, David miüch hijty mhaphajpy mdeedyhajpy. Ca'a mdajy ca'a mmay. Hoy jaduhñ coo ja'a María mwiingpógät. Dioshespírituhaam jaduhñ tøø yhuungpaady.

21 Ya'ayhána'c jaduhñ yhuunghadaamby, ja'a Jesúsajpá. Coo ja'a quiu'ug ja'a piojpa quiädieey yajnáhwa'adsaanä, paady jaduhñ xiøhata'añ Jesús.

22-25 Coo ja'a José mia'abiädø'cy, mänit quiudiuuñ neby hánajty tøø ñäma'ayíjäm ja'a Diosmóonsäm. Mänitä María wyiingpøjcy. Pero cab hajxy ñimiøødmaawä høxtä coonä ja'a María ja'a Jesús yajmiññä. Ja'a coobhuung, je'eds jaduhñ miingahw. Jesús jaduhñ xiøhajty. Coo ja'a Jesús jaduhñ myiñguiahy, tøjiajt ja'a Diosmädia'agy jaduhñ nebiä Diosmädia'agy-yajwa'xpähajxy jecy quiujahyyän:

Huungpaadaamb ja'a cäxyihána'c tu'ug.

Ya'ayhána'c yhuunghadaamby.

Jue'e xiøhata'añ, Emanuel.

Je'eduhñ ñänøømby coo ja'a Dios hajxy xmiøødhájtäm.

2

1 Ja'a Jesús, jim jaduhñ myiñguiahy maa ja'a cajpt jaduhñ xiøhatiän Belén, jim Judeanaaxooty. Ja'a Herodes, je'e hánajty tuumb gobiernä. Jim je'e hánajty chána'ay maa ja'a møjcajptän Jerusalén. Mänitä jäya'ayhajxy jim näje'e miejch maa ja'a Heródesän. Jäguem hajxy hánajty tøø chooñ maa ja'a xøø piädsømiän. Madsa'ahøxtaabiä hajxy hánajty wiädity.

2 Mänit hajxy yajtøøyy:

—Maa ja'a judíos guobiernähajxy, ja'a tøø myiñ tøø quiá'ayäbä. Jäguem højts ja'a miadsa'a tøø nnäheebøøyyä, jim maa ja'a xøø piädsømiän. Paady højts yaa tøø nmiñ tøø nmech neby højts jaduhñ nwiingudsähgø'øwät.

3 Coo ja'a gobiernä Herodes jaduhñ miädoyhajty møødä Jerusalénpä-jäya'ayhajxy nägøxiä, mänit hajxy tiägøøyy tajpä maabiä.

4 Mänitä Herodes miøjyaaxy ja'a teedywiindsønñhajxy møødä ley-yajnahixøøbiähajxy. Mänitä Herodes yajtøøyy:

—Maa ja'a Cristo myina'añ quia'awa'añ, ja'a Dios quiexaambiä.

5 Mänit hajxy yhadsooyy:

—Beléncajptóotiäc jaduhñ myina'añ quia'awa'añ yaa Judeanaaxooty. Ja'a Diosmädia'agy-yajwa'xpä jecy cujahy nebiä Dios miänaañän:

6 Ja'a cajpt jaduhñ xøhajpä Belén, jim Judeanaaxooty,

jimä wiindsønñ tu'ug myina'añ quia'awa'añ;

je'eçh ja'a ngu'ug xyhane'emáañäp, ja'a judíoshajxy; paadiä Beléncajpt jaduhñ yajmäbaada'añii nebiä møjcajptän.

7 Mänitä Herodes miøjyaaxy hamee'ch ja'a madsa'ahøxtaabiähajxy. Mänitä Herodes yajtøøyy:

—Mäduhnajtä ja'a madsa'a quiähxø'tsohñ.

8 Coo ja'a Herodes tøyhajt miooyyä, mänitä miänaangumbä:

—Nøcx ja'a pigána'c hajxy jim yajtøw Belén. Naxy hajxy hoy mdehm yajtøwät. Coo mbáadät, mänitøch hajxy min xyhawaañä, nébiøch jim nøcxy nwiingudsähgøøbiä.

9-10 Mänitä madsa'ahøxtaabiähajxy tiu'ubøjcy. Jim hajxy ñøcxy Belén nebiä Herodes hánajty tøø miänaañän. Mänitä madsa'a hajxy jadähooc yhjxcumbä, ja'a hajxy hánajty

tøø yhuug hijxpä jäguem maa ja'a xøø piädsømiän. Mänit hajxy jiaanč tehñ xioonndaacy. Mänitä madsa'a hajxy piadu'ubøjcy. Mänitä madsa'a jim tøyyä tiänaaxiøjpy maa ja'a pigäna'c-huung hänajty yhitiän naaxyp. Tøyyä ja'a madsa'a hänajty quiuhjajnaxy maa hänajty quio'na'ayän.

11 Mänitä madsa'ahøxtaabiähajxy tiøjtägøøyy. Jimä regalo hajxy hänajty miøødä caajäjooty. Mänitä pigäna'c-huung hajxy yhiijxy møødä tiaj María. Mänitä pigäna'c hajxy wyiinjiicädaacy; wyiingudsähgøøyy hajxy jaduñ. Mänitä quiaajä hajxy yaghawaach. Mänitä oro hajxy yajpädsømy møødä poom møødä mirraperfume. Pa'agxuu'p je'e; tsow ñøcxy. Mänitä pigäna'c hajxy jaduñ ñä'ä mooyy.

12 Mänit hajxy wyiimbijnä. Mänit hajxy ñøcxy maa ja'a quiajphajxiän. Wiingtuum hajxy ñøcxøñä; cab hajxy jim ñaxøñä maa ja'a Heródesän. Hix, tøø hajxy hänajty yhawáañäxä cuma'ayhaam coo hajxy jim quia'a naxøñät.

13 Coo ja'a madsa'ahøxtaabiähajxy hänajty tøø wyiimbijnä, mänitä José ja'a Diosmoonsä tu'ug wyiinhijxy cuma'ayhaam, ja'a tsajpootypä. Mänitä José ñämaayyä:

—José, pädø'og. Nøcx hajxy jim Egiptonaaxooty møødä mhuung møødä mdo'oxy. Jim hajxy mmähmø'owät høxtä coonä nhawáañämät coo hajxy mwiimbídät. Paady hajxy mbäyø'ogät neby yø'ø mhuung xquia'a yaghó'cät. Ja'a Herodes, xyhøxta'awáañäp yø'ø mhuung jaduñ; xyajyagho'ogáañäp jaduñ.

14 Mänitä José piädø'cy. Mänitä Joséhajxy jim jiaanč nøcxy Egipto møødä yhuung møødä tio'oxy. Mänitcoods hajxy tiehñ tiu'ubøjcy.

15 Jim hajxy hänajty miähmø'owa'añ Egipto. Høxtä ja'a Herodes hó'ogäp, mänit hajxy hänajty wyiimbijtagatsa'añ. Jequiän ja'a Diosmädia'agy-yajwa'xpä hänajty tu'ug tøø quiujaay nebiä Dios miänaañän: “Nhøxyaaxpädsømämbiøch ja'a nhuung jiiby Egipton-aaxooty.” Y coo ja'a Joséhajxy jim jiaanč nøcxy Egipto, tøjjajt ja'a Diosmädia'agy jaduñ.

16 Coo ja'a Herodes ñajuøøyy coo hänajty tøø wyiinhøñii ja'a madsa'ahøxtaabiädøjc, mänitä Herodes jiootma'ty. Mänitä Herodes ja'a pigäna'c yajyagho'cä nägøxiä, pønjaty ja'a mejtsjumøjtpä hänajty ca'a yaghabejpnä, ja'a hajxy hänajty tsänaabiä Belén møødä Belén mäwiingón. Hix, tøø hänajty mejtsjumøjt yhiñä coo ja'a madsa'a quiahxø'tsoñ, ja'a madsa'ahøxtaabiädøjc-hajxy hänajty tøø yhíxiäbä.

17-18 Jaduñ ja'a Diosmädia'agy tiøjjajcumbä nebiä Jeremías hänajty jecy tøø quiujaayän: Jim maa xiøhatiän Ramá, jimä Raquel ja'a yhuung ñäjøøyy ñaxuu'ch.

Coo ja'a yhuung yaghó'cäxä, paady quia'a jootcapxmøcpøgaanä.

Ja'a Jeremías, je'e ja'a Diosmädia'agy jecy yajwa'x.

19 Coo ja'a Herodes yho'nä, jimnä ja'a Joséhajxy hänajty Egiptonaaxooty. Mänitä José ja'a Diosmoonsä tu'ug wyiinhíxcumbä cuma'ayhaam, ja'a tsajpootypä. Mänitä José ñämaayyä:

20 —Pädø'og, wiimbit hajxy møødä mhuung møødä mdo'oxy. Nøcx hajxy Israelnaaxooty. Tøø jäya'ayhajxy yho'nä, ja'a mhuung hajxy hijty xyagho'ogáañäbä.

21 Mänitä Joséhajxy piädø'cy møødä yhuung møødä tio'oxy. Mänit hajxy jim jiaanč nøcxy Israelnaaxooty.

22 Mänitä José miädoyhajty coo Arquelao hänajty guiobiernähajnä jim Judeanaaxooty maa ja'a tieedy Herodes hänajty tøø guiobiernähatiän. Mänitä José chähgøøyy. Cab hänajty jim ñøcxaannä Judeanaaxooty. Wiingtuum hajxy ñøcxy Galileanaaxooty, nebiä José hänajty tøø yhawáañäxän cuma'ayhaam.

23 Coo hajxy jim miehch Galileanaaxooty, mänit hajxy jim chänaadiaacpøjcy maa ja'a cajpt xiøhatiän Nazaret. Coo hajxy jim chänaadiaacpøjcy, tøjjajt ja'a Diosmädia'agy jaduñ maa jaduñ myiñän cujaay coo ja'a Jesús hänajty ñäma'awa'añii coo jim choon Nazaret. Ja'a Diosmädia'agy-yajwa'xpähajxy jaduñ jecy cujahy.

3

¹ Cujecy ja'a Juan ja'a mäyajnäbejpä jim miejch Judeanaaxooty pactuum. Ja'a Diosmädia'agy hänajty yajwa'xyp.

² Mänitä Juan tiägøøyy mädiaacpä. Mänit miänaañ:

—Najtshixø'ow ja'a mhaxøøgcuhdujt hajxy; habaadáannäp jaduhñ coo ja'a Dios ja'a miäjaa yajcähxø'oga'añ.

³ Ja'a Isaías, ja'a Diosmädia'agy jecy yajwá'xäbä, je'e hänajty jaduhñ jecy tøø quiujaay: Jimä jäya'ay tu'ug yaaxwädity pactuum:

“Najtshixø'ow ja'a mhaxøøgcuhdujt hajxy, nebiä mwiindsón hajxy hoy mjøbhíxät; hoy hajxy jaduhñ mwiingudsähgø'owät.”

Ja'a Juan jaduhñ nänøømä.

⁴ Ja'a Juan, camellopøjt hänajty wyithajpy; wajhac hänajty wiøønhajpy. Chu'chp mu'u hänajty je'e; yhuucypy cunaaxmøjtsiinnøø hänajty.

⁵ Majiäya'ay ja'a Juan hänajty ñämechii. Jerusalén hajxy hänajty näje'e chooñ. Näje'e hajxy hänajty chohmbä Judeanaaxooty møødä Jordánmøjnøøbaha. Yhamädoowhidáanäp ja'a Juan miädia'agy hajxy hänajty.

⁶ Mänitä piojpa quiädieey hajxy ñägapxy. Mänitä hajxy jim yajnäbejtä ja'a Juángäm maa ja'a Jordánmøjnøøjän.

⁷ Mänitä Juan yhiixy coo hänajty ñämechii ja'a fariseoshajxy nämay møødä saduceoshajxy. Ja wi'i ñäbetaamb hajxy hänajty je'ebä. Ja'a fariseoshajxy, hoy hajxy hänajty jiaanç tehñ quiudiuñ ja'a Moisés miädia'agy. Ja'a saduceoshajxy, wiingä cuhdujt hajxy hänajty miøødä; cab hajxy hänajty miäna'añ coo hajxy jiuypjøjtägatsa'añ. Mänitä Juan miänaañ:

—Hay, møjcu'u, caj mijts hoguiuhdujt mnä'ägädä møødä. Paady hajxy mja wi'i ñäbetaambä nebiä Dios hajxy jaduhñ xquia'a yajcumädowät, túhmäts.

⁸ Hoy hajxy mwädítät neby hajxy jaduhñ myajcähxø'ogät coo ja'a mhaxøøgcuhdujt hajxy hänajty tøø mjaanç najtshixø'øy.

⁹ Cab hajxy jaduhñ mmáná'anät: “Abrahámhøch hijty nhaphajpy ndeedyhajpy, páadyhøch ja'a Dios jaduhñ xquia'a yajcumädowa'añ.” Mänitä Dios jaduhñ xya-jnähwá'adsät coo ja'a mhaxøøgcuhdujt hajxy mnajtshixø'owät, ca'a jie'eguiøxpä coo ja'a Abraham hajxy hijty mhaphaty mdeedyhaty.

¹⁰ Pøñ hoy ca'a wädijp, jaduhñ mäwínäts je'e nebiä quepychaajän, ja'a ca'a tøømhajpä. Piuxaamby hajxy je'e; mänit hajxy ño'oga'añ. Paady hajxy hoy mwädítät nebiä Dios hajxy jaduhñ xquia'a yajcumädowät.

¹¹ Tøyhajt mijts nyajnäbety nøøhaam neby hajxy jaduhñ myajcähxø'ogät coo ja'a mhaxøøgcuhdujt hajxy tøø mnajtshixø'øy. Pero xii jäya'ay tu'ug jiaac miñ høxhaam; je'eds mæbøjnäbä ja'a Dioshèspiritu hajxy xmio'owaamb. Xyajnähwa'ads xyajcuhwa'adsaamb hajxy jaduhñ. Maas møcä cuhdujt je'e miøødä quejeech høøch. Cábøch cuhdujt nnä'ägä møødä ni weeñtiä maa jaaya'aguiøxpän.

¹² Ja'a jäya'ayhajxy, coo ja'a trigo hajxy hänajty tøø tiexy, tøgooty hajxy nøcxy piäda'agy. Pero ja'a trigohac, naaxwiin je'e quia'ay. Jaduhñ mäwínäts jäya'ayhajxy quia'awa'añ haxøøgtuum, ja'a yhaxøøgcuhdujt hajxy ca'a najtshixø'owaambä. Cøjxta'axiøø hajxy jiiiby chaachpøga'añ.

¹³ Mänitä Jesús miejch maa ja'a Juan hänajty miäyajnäbetiän jim maa ja'a Jordánmøjnøøjän. Galilea ja'a Jesús hänajty tøø chooñ. Näbetaamb hänajty je'ebä.

¹⁴ Mänitä Juan ja'a Jesús ñämaayy:

—Cab jaduhñ yhahixø'øy cooç miich nyajnäbétät; maas hoy hijty jaduhñ cooç miich cu xyajnäbejty.

¹⁵ Mänitä Jesús miänaañ:

—Høøch yajnäbéjtäc neby jaduhñ ngudiúunämät nebiaty ja'a Dios xyhanéhmäm.

Mänitä Juan jaduhñ miänaañ:

—Ween nyajnbétät.

¹⁶ Mänitá Jesús ñábejty. Mänit je'e tiø'ødspädsøømy. Mänitá tsajt yhawaach. Mänitá Jesús ja'a Dioshespíritu yhijsy coo hánajty miánacy nebiä palomán, coo hoy yháñaaguiäda'agy ja'a Jesús quiuhduum.

¹⁷ Mänitá Dios jim quiapxy tsajpootyp:

—Høøch nHuung yø'ø. Njaanč tehñ chójpiøch jaduhñ. Jaanč tehñ jiootcújc-høch nnijiäwø'øyii ja'a nHuungcøxpøch.

4

¹ Mänitá Dioshespíritu ja'a Jesús wioonøcxy pactuum. Jimä Jesús hánajty jia wi'i ñäma'awa'añii ja'a møjcu'ugóngäm coo haxøøg jiatcø'owät.

² Juxychägui'xxøø ja'a Jesús hánajty jim tøø yhity jaguiay. Ni xøøm ni coods hánajty tøø quia'a cay. Mänit yäho'pøjcä.

³ Mänitá Jesús ñämejsä ja'a møjcu'ugóngäm. Ja wi'i yagjatcø'owáanäp ja'a Jesús hánajty haxøøg. Mänitá møjcu'ugong miänaañ:

—Pø miich ja'a Dios tøyhajt xyHuunghajp, näma'aw yø'ø tsaä coo ween chaj-caagyquiojy.

⁴ Mänitá Jesús yhadsooyy:

—Jaduhñ ja'a Diosmädia'agy miäna'añ: “Ca'a quiaaguiähajtiä ja'a jäya'ayhajxy miädsänaaby hädaa yaabä naaxwiin; møødä Diosmädia'agy hajxy miädsäna'ay.”

⁵ Mänitá møjcu'ugong ja'a Jesús wioonøcxy jim Jerusalén. Ja'a Dioscajpt je'e jim. Mänitá Jesús miøødwiimbejtä ja'a møjtsajtpøjcuhduum.

⁶ Mänit ñämaayyä:

—Pø miich ja'a Dios tøyhajt xyHuunghajp, cuhdøpxnax jii. Caj miich nej mjädät. Jaduhñ ja'a Diosmädia'agy miäna'añ:

Ja'a Dios ja'a mioonsä hane'emaamb, ja'a hajxy jim tsajpootypä coo miich xcwieendähädät.

Xchehnñhidaamb miich hajxy nej miich tsaajooty jaduhñ mga'a cuhnébät.

⁷ Mänitá Jesús yhadsooyy:

—Pero nøm ja'a Diosmädia'agy miänaambä: “Cabä Dios ja'a mWiindsøn mjøjcaxø'owät.”

⁸ Mänitá møjcu'ugong ja'a Jesús wioonøcxcumbä maa ja'a tunän, ja'a jaanč tehñ quiøxpä. Mänitá Jesús yajñähixøøyyä ja'a naax ja'a cajpt cøxiä hädaa yaabä naaxwiin, coo ja'a jäya'ayhajxy miøjjä jiaančhä.

⁹ Mänitá Jesús ñämaayyä:

—Høøch nje'e yø'øduhñ cøxiä mäduhñtiä jii quiahxø'øgy. Cooch miich jijna'a xwyiin-gudsähgø'owät, mänitäts yø'ø ngøxy mó'owät.

¹⁰ Mänitá Jesús yhadsooyy:

—Jäwa'ads miich jim, møjcu'u. Jaduhñ ja'a Diosmädia'agy miäna'añ: “Dios hajxy mwiingudsähgø'owäp, ja'a hajxy mWiindsønñhajpiä. Cab jaduhñ wiingpä mwiingudsähgø'owät.”

¹¹ Mänitá møjcu'ugong wyiimbijnä; nidiuhñ ja'a Jesús miähmøøyy. Mänitá Jesús ñägädaacä ja'a Dios mióonsäm ja'a tsajpootypä. Mänit je'e piuhbejtä.

¹² Coö ja'a Jesús miädoyhajty coö ja'a Juan hánajty tøø chumyii, mänit jim ñøcxy Galileanaaxooty.

¹³ Mänitá Jesús jim ñaxøøyy maa ja'a Nazaretcajptän, pero cab jim miähmøøyy. Mänit jim chänaadiaacpøjcy maa ja'a cajpt jaduhñ xiøhatiän Capernaum. Jimäts je'e Galileamejypia'a maa ja'a Zabulón yhap yhoc-hajxy chäna'ayän. Jimä Neftalí ja'a yhap yhoc-hajxy chänaabiä.

14 Coo ja'a Jesús jim chánaadiaacpøjcy Capernaum, tøjajt ja'a Diosmädia'agy jaduhñ nebiä Isaiás hñajty jecy tøø quiujaayän, ja'a Diosmädia'agy jecy yajwá'xäbä:

15 Ja'a naax maa ja'a Zabulón yhap yhoc-hajxy chána'ayän, maa ja'a Nefalí yhap yhoc-hajxy chánaabiän,

jimä tu'u ñaxø'øy mejypia'a, jim Galilea, jim maa ja'a ca'a judíos hajxy chána'ayän.

16 Ja'a jäya'ayhajxy hijty haxøøgwädijpä, tøø ja'a piojpä quiädieey hajxy yajñahwáatsäxä. Ja'a jäya'ayhajxy hijty hagogdstuum ca'awaambä, nõcxaamb hajxy je'e jim tsajpootyp, coo ja'a piojpä quiädieey hajxy tøø yajñahwáatsäxäbä.

17 Mänitä Jesús tiägøøyy yajwiingapxøøbiä ja'a Diosmädia'agy. Mänit miänaañ:

—Najtshixø'øw ja'a mhaxøøgcuhdujt hajxy. Habaadäänäp jaduhñ coo ja'a Dios ja'a miäjaa yajcähxø'øga'añ.

18 Jimä Jesús hñajty miejypia'ayo'oy maa ja'a Galileamejjiän. Mänitä jäya'ay metsc yhijxy, ja'a Simón, ja'a xøhajpä Pedro, møødä piuhya'ay Andrés. Hacxmats hajxy hñajty tiuunghajpy. Jimä yhacxjohmd hajxy hñajty miejypiäda'aga'añ.

19 Mänitä Simónhajxy ñämaayyä ja'a Jesúsäm:

—Jam hajxy wädijtäm. Jue'e mijts mduunghajpy, hacxmats; wiingtuunğ mijts nmo'owaamby. Nyajñahixø'øwaamby mijts nebiä jäya'ay hajxy myajwiingapxø'øwät ja'a Diosmädia'agy.

20 Tuunä je'eduhñ ñä'ä mänaañ, mänitiä ja'a yhacxjohmd hajxy ñajtswidsoøyy; mänit ja'a Jesús hajxy piadu'ubøjcy.

21 Mänitä Jesús jiaag hädaacy mejypia'a. Mänitä Zebedeo yhijxy møødä yhuunghajxy, ja'a Jacobo møødä Juan. Jiiby hajxy hñajty yhäña'ay barcojooty. Yhacxjohmd hajxy hñajty yhaxodsøøby. Mänitä Jesús ja'a Jacobo miøjyaaxy møødä Juan.

22 Tuunä hajxy jaduhñ ñä'ä mädooyy, mänitiä hajxy piädsøømy barcojooty; mänit ja'a Jesús hajxy piadu'ubøjcy; yajmähmøøyy ja'a tieedy hajxy jiiby barcojooty.

23 Mänitä Jesús tiägøøyy wädijpä cajpt-cajpt jim Galilea. Mädia'agy-yajwa'xpä jaduhñ wiädijty coo ja'a Dios ja'a miäjaa yajcähxø'øga'añ. Homiädyyii cajptä hñajty ñøcxy, jiiby hñajty yajñahixø'øy maa ja'a judíos chajtøjc-hajxiän. May ja'a jäya'ay yajmøcpøjcy. Homiädyyii pa'amä jaduhñ yajnajxy.

24 Mänitä mädia'agy jaduhñ wiädijty ja'a Jesúsøxpä jim maa jaduhñ xiøhatiän Siria. Mänitä pa'amjäya'ayhajxy yajmejtsä maa ja'a Jesúsän, pønjaty ja'a møjcu'u møød, møød pønjaty ja'a pojpa'am møød. Mänitä Jesús ja'a pa'amjäya'ay quiøxy yajmøcpøjcy.

25 Mänitä Jesús piadu'ubøjca ja'a majiäya'ay. Jim Galilea hajxy hñajty näje'e chooñ. Näje'e hajxy hñajty chooñ maa ja'a majc-hagajptän, näje'e Jerusalén, møødä Judea møødä Jordánmøjnøø'awiimb.

5

1 Coo ja'a Jesús ja'a majiäya'ay yhijxy, mänit ñøcxy tunghduum. Mänit yhøxtaacy naaxwiin. Mänit ñämejtsä ja'a jiamiøødhajxy.

2 Mänit tiägøøyy yajñahixøøbiä. Mänit miänaañ:

3 —Jootcujc hajxy jaduhñ yhida'añ pønjaty jaduhñ yajpejxp. Paady hajxy jootcujc yhida'añ, coo hajxy jim ñøcxa'añ maa ja'a Diosän.

4 Jootcujc hajxy jaduhñ yhida'añ pønjaty jootmayhajp. Paady hajxy jootcujc yhida'añ, coo ja'a Dios hajxy quiapxmøcpøga'añijäm.

5 Jootcujc hajxy jaduhñ yhida'añ pønjaty mee'xxieemyhidaamb. Paady hajxy jootcujc yhida'añ, coo ja'a Dios hajxy mio'owa'añijäm nebiaty ja'a Dios tøø yajwiinwaanø'øy.

6 Jootcujc hajxy jaduhñ yhida'añ pønjaty ja'a jioot tsojp coo hajxy hoy quiudiünät. Puhbedäänäp hajxy jaduhñ Diósäm.

7 Jootcujc hajxy jaduhñ yhida'añ pønjaty hojioot møød. Paady hajxy jootcujc yhida'añ, coo ja'a Dios hajxy ñäxuuds'añijäm.

⁸ Jootcuyc hajxy jaduhñ yhida'añ pønjaty haxøøgwiinmahñdy ca'a møød. Paady hajxy jootcuyc yhida'añ, coo ja'a Dios hajxy yhixa'añ.

⁹ Jootcuyc hajxy jaduhñ yhida'añ pønjaty capxcuhgädaacp maa ja'a tsip piädø'øguiän. Paady hajxy jootcuyc yhida'añ, coo ja'a Dios hajxy yhuunghada'añijäm.

¹⁰ Tsaachpøjp ja'a jäya'ayhajxy näje'e coo hoguiuhdujt hajxy miøødä; pero jootcuyc hajxy jaduhñ yhida'añ. Paady hajxy jootcuyc yhida'añ, coo hajxy jim ñøcxa'añ maa ja'a Diosän.

¹¹ Jootcuyc hajxy mhida'añ, hoy ja'a jäya'ayhajxy hänajty xjia näma'ay haxøøg, hoy ja'a jäya'ayhajxy hänajty xjia tuna'añ haxøøg, hoy ja'a jäya'ayhajxy hänajty xjia nähøønø'øwa'añ hoñejpiä ja'a høøchcøxpä.

¹² Jaanä jaduhñ hajxy jecy tøø chaachpøjpa, ja'a Diosmädia'agy hajxy jecy yajwá'xäbä. Pero xoonä'ag hajxy, jootcugø'øw hajxy; jimä hoybä weenbä hajxy mjaanç tehñ piaada'añ jim tsajpootyp.

¹³ Ja'a caan, coo ja'a tiaamdspä tiägöyyät, cab jaduhñ mänaa tiaamdsøñät. Tøø jaduhñ mia'ady. Mänitä jäya'ayhajxy yhøxwøjy, mänit hajxy yajteenñ. Jaduhñ mäwíináts mijts nebiä caanän hädaa yaabä naaxwiin; coo ja'a Diosmädia'agy hajxy mnajtshixø'øwät, mmá'adäp hajxy jaduhñ.

¹⁴⁻¹⁶ Ja'a cajpt, ja'a tunguhduum hijpä, caj mänaa yhijtägöyyii. Y coo ja'a cera hajxy ño'ogy, cab hajxy jaduhñ ñähjupety cachpa'c. Caj pues. Jiiby hajxy jaduhñ piäda'agy cøxp maa ja'a ceratoyøhñdiän, nebiä jäya'ayhajxy nägøxiä quiudøø'xøjät jiiby tøgooty. Jaduhñ mäwíináts mijts, hoy hajxy mwädítät nebiä jäya'ay hajxy jaduhñ xyhíxät coo hajxy hänajty hoy mwädity. Mänitä jäya'ayhajxy wyiingudsähgø'øwät ja'a nDeedyhajtäm jim tsajpootyp.

¹⁷ Páadyhøch yaa tøø nmiñ tøø nmech hädaa yaabä naaxwiin nébiøch mijts jaduhñ nya-jnähixø'øwät nebiä Diosmädia'agy hajxy hamuumdu'joot mgudiúnät, ja'a Moisés jecy quiujáhyyäbä, ja'a Diosmoonsähajxy yajwá'xäbä, ja'a hajxy hädaa yaabä naaxwiimbä. Cábøçhä Diosmädia'agy nyajcuhdägoyya'añ. Cab hajxy jaduhñ mmáná'anät cooçh nya-jcuhdägoyya'añ.

¹⁸ Tøyháthøch mijts nnäma'ay, mäduhñtiä ja'a tsajtwiing miähmø'øwa'añ, mäduhñtiä hädaa yaabä naaxwiin miähmø'øwa'añ, cabä Diosmädia'agy quiuhdägoyya'añ, ni weeñtiä, ni tu'lí'xytiädä, høxtä coonä hänajty tøø quiøxy habejnä.

¹⁹ Pønjaty ja'a Diosmädia'agy jaduhñ cudiumb, pønjaty ja'a wiinghäna'c jaduhñ yaj-nähixøøby coo hajxy quiudiúumbät, je'eds hajxy møj jaanç päda'agáanäp coo ja'a Dios ja'a miäjaa yajcähxø'øga'añ. Pero pønjaty ja'a Diosmädia'agy ni weeñtiä ca'a cudiumb, pønjaty ja'a wiinghäna'c yaj-nähixøøby coo hajxy quia'a cudiúnät, cab hajxy je'e møj jaanç piäda'aga'añii coo ja'a Dios ja'a miäjaa yajcähxø'øga'añ.

²⁰ Míjtshøch jaduhñ nnämaaby, cabä ley-yaj-nähixøøbiädøjc-hajxy hoy wiädity ni ja'a fariseodøjc-hajxy. Coo mijts maas hoy mwädítät, mänit hajxy jim mnøcxät cøxp maa ja'a Diosän. Pø cab hajxy hoy mwädita'añ, cab hajxy jim mnøcxät.

²¹ Tøø hajxy mmädoyhaty nebiä mhap mdeedyhajxy hijty jecy miäna'añän: "Ca'a hajxy mjäya'ay-yagho'ogy coo ja'a cuduung hajxy xyajcumädówät."

²² Pero høøch mijts nnämaaby, pøn ja'a miäjøøn miädøjc mäjootma'p, je'eds cumädowaamb maa ja'a cuduungän. Pøn ja'a miäjøøn miädøjc nähwaambejp, je'eds cumädowaamb maa ja'a gobiernän. Pøn ja'a miäjøøn miädøjc nämaaby coo je'e quiuhmañø'øy, je'eds jiiby ca'awaamb haxøøgtuum, maa ja'a jøøn mänaa quia'a pi'ichän.

²³ Entonces, coo hajxy hänajty tii mänaa myoxa'añ jiiby tsajtøgooty maa ja'a altarän, y coo hajxy mänit mjahmiédsät coo ja'a mmäjøøn mmädøjc hajxy hänajty tøø xmiädsibø'øy hotyiiguiøxpä,

²⁴ jim hajxy mnajtsconø'øwät altarwiinduum, tijaty hajxy hänajty myoxaamby. Mänit hajxy jim mnøcxät maa ja'a mmäjøønän maa ja'a mmädøjcän, neby hajxy jaduhñ

myajtødiägø'owät. Mänit hajxy mwiimbídät. Mänit hajxy mnøcxtägátsät maa ja'a altarän. Mänit hajxy myójxnät.

²⁵ 'Coo pøn hánajty mänaa xñäxø'owø'owa'añ maa ja'a cuduungän, jayøjp myajtødiägø'owät tu'haamnøcxpä. Coo jim mga'a yajtødiägø'owät tu'haamnøcxpä, mänit hajxy xyajmédsät cuduungwiinduum. Mänitä cuduung xyajcø'ødägø'owät ja'a policíahajxy. Mänit hajxy xchúmat.

²⁶ Jiiby jaduñ mmähmø'owät pujxtøgooty. Cab jaduñ mdsoj pädsómät. Mänit jaduñ mbädsómät coo hánajty pedyii tøø mnihøxjuubiädsømyii. Tøyhajt jaduñ.

²⁷ 'Tøø hajxy mmädoyhaty coo jäya'ayhajxy hijty jegyhajty miäna'añ coo hajxy mga'a tu'udägóyyät.

²⁸ Pero høøch mijts jaduñ nnämaaby, coo pøn wiingto'oxiøjc mänaa yhadsocy, nä'ägädä tu'udägooby je'eduhñ.

²⁹⁻³⁰ 'Coo tii hoyhadsojnä mhíxät, cab jim mmøjhéé'pnät ni mga'a nähdónät. Jaduñ mnibiäda'agøøjät nebiä wiindspän nebiä cø'øducpan. Pø caj, jiiby hajxy mga'awa'añ haxøøgtuum.

³¹ 'Jaduñnä jäya'ayhajxy hijty jegyhajty miänaambä: "Coo pøn ja'a tio'oxiøjc mänaa yhøxmádsät, mänitä haguypøjnocy quiøø'tsnät."

³² Pero høøch mijts jaduñ nnämaaby, coo pøn tio'oxiøjc mänaa yhøxmádsät, y cabä tio'oxiøjc hánajty nej tøø jiatcø'øy, coo ja'a to'oxiøjc wiingya'adiøjc jøjpøgø'owät, pues tu'udägóyyäp ja'a to'oxiøjc jaduñ. Ja'a ya'adiøjc, ja'a hánajty jawyiin tøøbä yhøxmáchäbä, je'edsä pojpä møød. Y ja'a ya'adiøjc tøø jiaac jøjpøgø'øyäbä, jaanä tu'udägooby je'ebä.

³³ 'Jaduñnä jecyjäya'ayhajxy hijty ñäma'ayii: "Pø tøø ja'a Dios hajxy mnäma'ay hamuumdu'joot coo hajxy hotyijä mgudiuna'añ, tsipcøxp hajxy jaduñ mgudiúnät."

³⁴⁻³⁶ Pero høøch mijts nnämaaby coo hajxy tii mga'a yajwiinwaanø'owät nä'ä nägoobä. Coo hajxy hánajty tii myajwiinwaanø'owa'añ, cabä tsajpootypä hajxy mgapxpáadät, ni ja'a naaxwiimbä, ni ja'a Jerusalén, ni ja'a mgopc-hajxy. Hix, paadiä tsajpootypä hajxy mga'a capxpáadät je'eguiøxpä coo ja'a Dios jim yhäña'ay. Møød hädaa yaabä naaxwiin hajxy mga'a capxpáatpät je'eguiøxpä coo ja'a Dios yajtánaabiety. Møødä Jerusalén hajxy mga'a capxpáatpät je'eguiøxpä coo je'e Dyioscajptä. Møødä mhamdsoo copc hajxy mga'a capxpáatpät je'eguiøxpä coo ja'a mguhwaay hajxy hoy mga'a yajpó'owät, ni hajxy hoy mga'a yagjiñø'owät.

³⁷ Jadhyyä hajxy mmäná'anät pø tøyhajt, pø caj. Coo hajxy waamb mjaac mäná'anät, ja'a møjcu'ugong hajxy jaduñ xyajmänaamb.

³⁸ 'Tøø hajxy hijty mmädoyhaty nebiä jäya'ayhajxy hijty jegyhajty miäna'añ: "Coo pøn cøxypänejiä xñä'ä túnät, myaghawiimbídäp jaduñ."

³⁹ Pero høøch mijts nnämaaby: cab jaduñ myaghawiimbídät; coo pøn xyhala'pø'ogät tu'nax, mjaac yégäp jaduñ ja'a tu'naxpä, ween xjiaac hala'pø'øgy.

⁴⁰ Coo pøn mänaa xñäxø'owø'owät, coo ja'a mgamiixy hánajty xpiøgaanä, myégäp jaduñ møødä mnähgäjén.

⁴¹ Coo pøn hánajty tii xyajtsømnøcx'añ tu'kilómetro hadsip, mejtskilómetro mnä'ägä tsømnøcxät.

⁴² Coo pøn hánajty tii xmiäyujwa'ana'añ, mmó'owäp jaduñ. Tsipcøxp jaduñ hotyijä mmó'owät.

⁴³ 'Tøø hajxy hijty mmädoyhajpä nebiä jäya'ayhajxy hijty jegyhajty miänaambä: "Hoy ja'a mmägu'ughajpä mdsoc mba'häyówät; pero ja'a mmädsip, mmähahádäp je'e."

⁴⁴ Pero høøch mijts nnämaaby: ca'a mmähahaty pønjaty jaduñ xmiädsiphajp. Hoy hajxy mnänómät pønjaty haxøøg xñänøømb. Mnäxúudsäp hajxy pønjaty xmiähahajp. Mänuu'xta'ag ja'a Dios hajxy coo ween mio'oy ja'a hoyhajt ja'a weenhajt pønjaty xwyi-inwohm xyhawohm, pønjaty xyhäyoowhijxp.

⁴⁵ Jaduhñä Dios hajxy hoy xyhuunghádät, ja'a jim hijpä tsajpootyp. Jaayá'ayäts jaduhñ yajxøøhaamb maa ja'a jäya'ay hoybän chaads jim maa ja'a jäya'ay ca'awiindøybän. Jaayá'ayäts jaduhñ yajtuub maa ja'a jäya'ay hoybän chaads jim maa ja'a jäya'ay ca'awiindøybän.

⁴⁶ Cab hajxy tii mbáadät nä'ä tægø'øbä coo ja'a mmägu'ughajpähajtiä mmøødnijootpaadøøjät. Høxtä ja'a yajnähuuduutpædøjc-hajxy niçhojc nibia'häyóowäp. Pero coo ja'a mmädsip hajxy mmée'xät, mänitä Dios hajxy xyhuunghádät.

⁴⁷ Cab jaduhñ ñejpiä coo ja'a mmägu'ughajpä hajxy mmøødnijootpaadyii. Hopiønä ñijootpaadyii, hoy ja'a Diosmädia'agy hajxy quia'a ja mæbøcy. Pero coo ja'a mmädsip hajxy mmée'xät, hoy hajxy mgudiuñ.

⁴⁸ Ja'a nDeedyhátäm, ja'a jim tsajpootypä, jaançh tehñ ñä'ägä hoy je'eduhñ yhity. Hoy hajxy jaduhñ mbahíxpät.

6

¹ 'Näje'e ja'a jäya'ayhajxy jia wi'i yajcumaya'añ, paady hajxy jaduhñ ñibiäda'agyii nebiä hojiäya'ayän. Pero cab jaduhñ yhooyä coo hajxy jaduhñ yajcumáyät. Cab hajxy jaduhñ mbahix mbadúnät. Coo hajxy jaduhñ mbahix mbadúnät, cabä Dios hajxy xyhuunghádät, ja'a jim tsajpootypä.

² Jii jäya'ayhajxy näje'ebä, coo ja'a häyoobäya'ay ja'a xädø'øñ hajxy hänäjty tøø mio'oy, mänit hajxy tiægø'øy mädiaacpä jiiby tsajtøgooty møød jim tu'haam. Paady hajxy jaduhñ miädia'agy, yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumayíijäm, je'eguiøxpä coo hajxy hänäjty jim tøø yajcumay maa ja'a cu'ugän.

³ Pero mijts, coo ja'a häyoobäya'ay xädø'øñ hajxy hänäjty tøø mmo'oy, cab hajxy waamb mmáná'anät. Ni pøn hajxy mga'a hawáanät, ni ja'a mmägu'ughajpähajxy.

⁴ Hamee'ch ja'a xädø'øñ hajxy jaduhñ myégät. Dios hajxy jaduhñ xyhíxäp; mänit hajxy jaduhñ xyhuunghádät.

⁵⁻⁶ 'Jii jäya'ayhajxy näje'ebä, täna'a ja'a Dios hajxy naxy pia'ya'axy jiiby tsajtøgooty møød jim maa ja'a tu'uxeñän. Pero cabä Dios hajxy tu'joot pia'ya'axy. Nä'ä yajcumayaamb hajxy jaduhñ maa ja'a cu'ugän. Pero cabä Dios hajxy jaduhñ quiumaya'añíijäm. Tøyhajt jaduhñ. Pero mijts, hamee'ch ja'a Dios hajxy mba'yá'axät. Xyhíxäp xmiädówäp hajxy je'eduhñ; mänit hajxy xyhuunghádät.

⁷⁻⁸ 'Ja'a jäya'ay ja'a Diosmädia'agy hajxy ca'a mæbøjpä, cab hajxy ñajuø'øy waambaty ja'a Dios hajxy jia pa'ya'axy. Ja capxp hajxy jaduhñ ja naañ ja tsojc. Paady hajxy jaduhñ jia capxy cooc tyijy ja'a Dios hajxy jaduhñ miädowna'añíijäm. Pero mijts, cab hajxy jaduhñ mbahix mbadúnät. Hix, jäguemiä ja'a Dios ñajuø'øy tijaty hajxy hänäjty myajmaajiajpy.

⁹ Jaduhñä Dios hajxy mba'yá'axät:

Teedy, jim miich mdsäna'ay tsajpootyp;
ween miich ja'a cu'ughajxy xwyiingudsähgø'øy.

¹⁰ Ween ja'a mmäjaa min yaa myajcähxø'øgy hädaa yaabä naaxwiin.

Ween ja'a jäya'ay ja'a mmädia'agy hajxy yaa xquiudiuunä hädaa yaabä naaxwiin,
neby jim xquiudiuunän tsajpootyp.

¹¹ Højts ja'a caayyøøc huucøøc móoyyác jabom-jabom.

¹² Højts ja'a nbojpä ngädieey mée'xác neby højts tøø nmämee'xiän ja'a højts tøø xñägädieeyø'øyabä.

¹³ Ca'a højts xyajcädieey; pero pädáacác højts hodiium neby højts jaduhñ nga'a cädiéeyät. Miich hanehmb; miich ja'a mäjaa mmøød; miich møj jaançh homiänaajä. Amén.

¹⁴ 'Coo mijts jaduhñ mmämée'xät ja'a hajxy tøø xñägädieeyø'øyabä, mänitä Dios hajxy jaduhñ xmiée'xpät, ja'a nDeedyhátäm ja'a jim tsänaabiä tsajpootyp.

¹⁵ Pero coo wiinghäna'c hajxy jaduhñ mga'a mämée'xät, cabä Dios ja'a mbojpä mgädieey hajxy jaduhñ xmiée'xät.

16 'Jii jäya'ayhajxy näje'e, coo hajxy hänajty yhayuuhada'añ, jaduhñ hajxy ñibiäda'agyii nebiä jootmayhajpän. Paady hajxy jaduhñ ñibiäda'agyii, jaduhñ hajxy quiähxø'øga'añ jäya'awyiinduum coo hajxy hänajty yhayuuhaty. Tøyhájthøch mijts nnäma'ay, cab hajxy jaduhñ tii piaada'añ.

17 Pero mijts, cab hajxy jaduhñ mnibiäda'agóøjät nebiä jootmayhajpän. Coo hajxy hänajty mhayuuhada'añ, yajxón hajxy mniyhonóøjät mniwiyiimbujóøjät.

18 Jaduhñ hajxy mga'a yajcähxø'øgät maa ja'a cu'ugän pø mhayuuhajp hajxy hänajty. Hamee'ch ja'a Dios hajxy jaduhñ yxhíxät, ja'a ca'a cähxø'pä. Jaaya'ay hajxy jaduhñ xmio'owaamb ja'a hoyhajt ja'a weenhajt.

19 'Cabä mjoot hajxy yaa mbädá'agät tijaty yaabä naaxwiin. Haagä ma'adaamb jaduhñ cøxiä mäduhñtiä hädaa yaabä naaxwiin. Y jaanç tehñ wiädijp ja'a mee'tspähajxy.

20 Pero jaduhñ hajxy mwiiinmahñdyhädät neby hajxy hoy mwädítät. Jaduhñ hajxy jootcuç mhídät jim tsajpootyp; caj pøn jim xyagjootmayhädät.

21 Pøn jaduhñ ja wi'i miäyøøhadaamb hädaa yaabä naaxwiin, jimä jioot hajxy jaduhñ piäda'agy maa ja'a xädø'øñän. Pero pøn hoy wäditaamb, jimä jioot jaduhñ piäda'agy maa ja'a Diosän.

22 'Pø mmøødä howyiinmahñdy hajxy, mänit hajxy hoy mwädítät nebiä Dios choquiän.

23 Pero pø cabä mwiiinmahñdyhajxy yhooyä, cab hajxy hoy mwädítät nebiä Dios jia tsoquiän.

24 'Cabä wiindsón hoy metsc mmøødtúnät. Mxøøghadaamb tu'ug; jatu'ugpä jaduhñ mdsogaamb. Hoy ja'a miädia'agy jaduhñ mgudiunaanä. Jaanä jaduhñduhmbä, coo ja'a mjoot mbädá'agät maa ja'a xädø'øñän, cabä Dios jaduhñ hoy mwiingudsähgø'øwät.

25 'Jadúhñäts mijts nnäma'ay, ca'a hajxy mwi'i tiajy mwi'i miay tijaty hajxy mnäjyghädäp, tii hajxy mwithädäp. Maas tsoobaatp ja'a jugyhajt jaduhñ quejee ja'a cay, y maas tsoobaatp ja'a ni'x jaduhñ quejee ja'a wit.

26 Høxtahñdsä muuxyhajxy, cab hajxy ñi'iby tiuñ, cab hajxy tii piäda'agy tsehñjooty. Pero ja'a nDeedyhájäm ja'a jim tsajpootypä, je'eds jaduhñ yagjøø'xp yajpøjp. Y mmaas tsoobaatp mijts quejee ja'a muuxyhajxy.

27 Ni pøn jaduhñ hamdsoo quia'a yajnijiugyhádóøjät.

28 'Cabä wit hajxy mnädaj mnämáyät. Høxtahñdsä pøjy hujts, cab tii tiuñ.

29 Pero maas yajxón je'e quejee ja'a rey Salomón hijty; jaanç tehñ yajxón ja'a Salomón hijty jegyhajty ñibiäda'agyii.

30 Ja'a pøjy hujts, yajxón ja'a Dios jaduhñ tøø quiunuu'xy. Y häyaa jaboom hajxy jaduhñ ño'oga'añ. Y mijts, xmiaas cunuu'xaamb mijts ja'a Dios, hoy hajxy mga'a ja mähøcy.

31 Ca'ads hajxy mdajy mmay; ca'a hajxy mwi'i miäna'añ: "Tii ngáayyamb, tii mwithájäm."

32 Yø'øduhmbä hajxy yhøxtaaby ja'a Dios hajxy ca'a wiingudsähgøøbiä. Pero ja'a nDeedyhájäm jim tsajpootypä, ñajuøøby je'eduhñ coo mijts myajmaajiaty.

33 Mhøxtá'awäp hajxy jayøjp neby hajxy hoy mwädítät, neby hajxy jaduhñ jim mnøcxät maa ja'a Diosän. Jaduhñä Dios chocy. Mänit hajxy jaduhñ cøxiä xmio'owät.

34 Ca'a hajxy mwi'i tiajy mwi'i miay ja'a jaboomgøxpä; ween hamdsoo yhuuc habaady. Mädyä ja'a tsaächpä hajxy xpiaada'añ ja'a jäda'agøxpä.

7

1 'Cabä wiinghäna'c hajxy mnähójät, coo ja'a Dios hajxy jaduhñ xñä'a yajcumädówät.

2 Jaduhñ hajxy xyajcumädówät nej mijts wiinghäna'c hänajty tøø mnähójiän.

3-4 Coo ja'a mmägu'ughajpä weñtiä quiädiéyät, y coo miich hänajty maas hanaxiä tøø mgädieey, cab jaduhñ yhawiiinmatsä coo ja'a mmägu'ughajpä waamb mnämä'awät.

⁵ Mänitá mmägu'ughajpä jaduhñ hawiinmats mwiingapx mjøjcapxó'owät, coo miich hänajty tøø myajniñähwa'achii.

⁶ 'Cabä jäya'ay hajxy hadsip mnämä'awät coo ja'a Diosmädia'agy hajxy miäböğät. Pø cab hajxy jaduhñ miädowa'añ, ca'a hajxy hadsijpc mduñ, coo hajxy jaduhñ ñä'ä jootmä'adät.

⁷⁻⁸ 'Coo ja'a Dios hajxy tii mmäyujwá'anät, mänit hajxy jaduhñ xmió'owät; coo hajxy mmänuu'xtá'agät, mänit hajxy jaduhñ xpiuhbédät.

⁹ 'Coo ja'a mhuung ja'a tsajcaagy xmiäyujwa'añ, je'eds jaduhñ mmooby, túhmäts. Cabä tsaa mmo'oy.

¹⁰ Y coo hacx jaduhñ xmiäyujwa'añ, je'eds jaduhñ mmooby, túhmäts. Cabä tsahñdy mmo'oy.

¹¹ Hoorä, je'edsä mhuung hajxy mmooby ja'a hoybä, hoy mijts mja haxøøgjäya'ayä. Pero ja'a nDeedyhajtäm jim tsajpootypä, hojiäya'ay je'e. Xmio'owaamb ja'a hoyhajt hajxy jaduhñ coo hajxy mmäyujwá'anät.

¹² 'Jaduhñäts mijts ja'a jäya'ayhajxy mnäxúu'tspät nej mijts myajnäxuudsa'añän. Jaduhñä Moisés jecy miänaañ coo hajxy ngudiúunämät. Jaduhñ hajxy jecy miänaambä, ja'a Diosmädia'agy hajxy jecy yajwá'xäbä.

¹³⁻¹⁴ 'Hamäjaa jim mnøcxät Dioswiinduum. Jaduhñ mäwínäts jim nebiä xu'udstu'ujän; cab hajxy jaduhñ nämay piaady. Pero coo jiiby mhädá'agät haxøøgtuum, cab jaduhñ yhamäjaajä. Jaduhñ mäwínäts je'e nebiä møjtu'ujän; nämay hajxy jiiby yhäda'agy.

¹⁵ 'Mnigwieendähadøøjäp hajxy maa ja'a jäya'ayhajxy tyijy Diosquexypän. Nä'ä høhñdaacp hajxy jaduhñ. Jaduhñ hajxy ñibiäda'agyii nebiä mäßbjpän, pero cab hajxy tiehm miäböcy; jaanç tehñ quia'awiindøy hajxy jaduhñ.

¹⁶ Haxøøg hajxy jiatcø'oy; jaduhñ hajxy mhøxcábät coo haxøøgwiinmahñdy hajxy miøødä. Jaduhñ mäwínäts hajxy je'e nebiä hujts nebiä haptiän. Ja'a wädsats, cab jaduhñ tiøømhaty nebiä tsaatypän. Ja'a hapy, cab jaduhñ tiøømhaty nebiä piidsän.

¹⁷⁻¹⁸ Mädyii quepychaa hoy, hoy tiøømhaty; mädyii ca'a hoy, cab hoy tiøømhaty.

¹⁹ Mädyii quepychaa jaduhñ hoy ca'a tøømhajp, piujxyp hajxy jaduhñ; mänit hajxy ño'ogy.

²⁰ Ja'a jäya'ayhajxy haxøøg jatcøøbiä, jaduhñ mäwínäts hajxy je'e nebiä quepychaa hoy ca'a tøømhajpän. Jaduhñ hajxy mhøxcábät coo haxøøgwiinmahñdy hajxy miøødä.

²¹ 'Nämäyhøch ja'a jäya'ayhajxy xjia nämä'ay: "Wiindsøn." Pero cab hajxy nägøxiä jim tiägø'owa'añ Dioswiinduum jim tsajpootyp. Pønjätyhøch ja'a nDeedy ja'a miädia'agy xquiudiúunäp, je'eds jim tägø'owaamb.

²² Coo ja'a naaxwiimbä hänajty wyiimbida'añ, mänitøch hajxy nämay xjia nämä'awa'añ: "Wiindsøn, tøø højts ja'a Diosmädia'agy nyajwa'xy ja'a miich mmäjaagøxpä; tøø højts ja'a møjcu'u ngøxy yajpäyø'øgy ja'a miich mmäjaagøxpä; tøø højts ja'a hoy-yagjuøøñäjatypä may nyajcähxø'øgy ja'a miich mmäjaagøxpä."

²³ Mänitøch hajxy nnäma'awa'añ: "Cábøch mijts mänaa tøø nhixyhaty. Jua'ads hajxy jim; haxøøg ja'a mwiinmahñdyhajxy jaduhñ."

²⁴ 'Pønñhøch nmädia'agy xmiädóowäp, coo jaduhñ quiudiúnät nébiøch nhane'emiän, jaduhñ mäwínäts je'e nebiä jäya'ay ja'a tiøjc tøø quiojjiän tsaawiing.

²⁵ Mänit com tiuuyy. Mänitä møjnøø quiomgädaacy. Mänitä tøjc møc miøjpojpejty. Pero cabä tøjc ñä'ä jijty, je'eguiøxpä coo tsaawiing quiojjiä.

²⁶ Pero pønñhøch nmädia'agy tøø xquia'a cudiuunä nébiøch nhane'emiän, jaduhñ mäwínäts je'e nebiä jäya'ay ca'a jajpän. Jiibiä tiøjc quiojy tsabiu'ujooty.

²⁷ Mänit com tiuuyy. Mänitä møjnøø quiomgädaacy. Mänitä tøjc miøjpojpejty møc. Mänit piuumy.

²⁸ Mänitä Jesús miädiaacpädøøyy. Mänitä jäya'ayhajxy yagjuøøyy nebiaty ja'a Jesús hänajty tøø yajñähixø'oy.

²⁹ Jaduhñ hánajty yajnáhixø'øy nebiä møjcuħdujtmøødpän. Ja'a cu'ug wyiindsønħajxy, cab hajxy hánajty jiaty jaty.

8

¹ Tunghuduum ja'a Jesús hánajty tøø yajnáhixø'øy. Mänit miänajnä. Mänit majiäya'ay piadu'ubøjcä.

² Mänit pa'amjäya'ay Jesús ñämejch. Haxøøgpa'am hánajty miøød. Mänitä Jesús wyiinjiçädaacä, wyiingudsähgøøyyä. Mänit ñämaayyä:

—Wiindsøn, pø chojpy ja'a mjoot jaduhñ, hóyhøch jaduhñ xyajnáhwa'ads xya-jcuħwá'adsät.

³ Mänitä Jesús ja'a mäħdiøjc ñähdoøn. Mänit ñämaayy:

—Chójpjøch ja'a njoot jaduhñ; tøø jaduhñ mnähwa'açh mguhwa'açh.

Mänitiä ja'a mäħdiøjc jiaançh nähwaach jiaançh cuħwaach.

⁴ Mänitä Jesús miänaañ:

—Huuc mäadow, ca'a pøn mnä'ägädä hawaanä. Nøcx jim Jerusalén maa ja'a teediän. Jim myajcähxø'øgät coo tøø mnähwa'açh coo tøø mguhwa'açh. Jimä xädø'øn mguyoxø'øwät nebiä Moisés jecy yhanehmiän. Jaduhñä hijxtahñd myajcähxø'øgät coo tøø mnähwa'açh coo tøø mguhwa'açh.

⁵ Mänitä Jesús miejch maa ja'a cajpt hánajty xiøhatiän Capernaum. Coo quiajptägøøyy, mänit ja'a Jesús ja'a soldadowiindsøn ñämejch.

⁶ Mänit Jesús ñämaayyä:

—Jímhøch ja'a nmoonsä tu'ug quio'na'ay tøgooty. Tøø ja'a tiecy miucy. Hanaxiä jaduhñ chaächpøcy tehngajnä.

⁷ Mänitä Jesús miänaañ:

—Nøcxy nhuuc yaghoyø'øy.

⁸ Mänitä soldadowiindsøn yhadsooyy:

—Pero Wiindsøn, cab jaduhñ yhähixø'øy coo miich jiiy mdägø'øwät maäch ndøgootiän, je'eguiøxpä coo miich mmøjjä mjaançhä. Nägooyyä miich jaduhñ mmäná'anät cooçh nmoonsä yhöyø'øwät, pues hoyø'øwäp.

⁹ Hané'emyhøch nhity; jímhøch nwiindsønbä, y jímhøch nsoldado. Cooçhä nsoldado tu'ug nnämä'awät coo homiaajä ñøcxät, nõcxäp jaduhñ; y cooçh nnämä'awät coo myínät, mínäp jaduhñ. Y cooçhä nmoonsä waamb nnämä'awät, quiudiúnäp jaduhñ.

¹⁰ Mänitä Jesús jiaançh tehñ yagjuøøyy. Mänit ñämaayy ja'a hajxy hánajty pawädiçpä:

—Cábøçhä nmägunaaxhajxy jaduhñ miäbøcy neby yø'ø craa miäbøquiän, y jäguem yø'ø choøn. Tøyhajt jaduhñ.

¹¹ Coo ja'a Dios ja'a miäjaa hánajty yajcähxø'øga'añ, mänit hajxy hánajty nämay miedsa'añ, ja'a hajxy hánajty mäbøjpä. Wiinduhmyhagajpt hajxy hánajty choona'añ. Mänit hajxy hánajty miøødhida'añijäm ja'a Abraham møødä Isaac møødä Jacob.

¹² Pero ja'a judiøshajxy ca'a mäbøjpä, cab hajxy hánajty jim quiooda'añ Dioswiinduum. Jiiy hajxy jaduhñ quihjujpnaxa'añii møjcu'uhaam maa yhagoodsän. Jiiy hajxy jaduhñ chaächpøga'añ tehngajnä.

¹³ Mänitä Jesús ja'a soldadowiindsøn ñämaayy:

—Nøcx maa ja'a mdøjcän. Tøø jaduhñ mmäbøcy, tøø ja'a mmoonsä jaduhñ yhöyø'øy.

Mänitä ja'a mioonsä jiaançh hoyøøyy.

¹⁴ Mänitä Jesús ñøcxy maa ja'a Pedro tiøjcän. Jiibiä Pedro miø'ødhoc hánajty quio'na'ay tomiøød.

¹⁵ Mänitä Jesús ja'a tajiäya'ay ja'a quiø'ø ñahdoonä. Mänitä tiøy tiøjch. Mänitä tajiäya'ay piädø'cy. Mänit tiägøøyy mayhajtuumbä ja'a Jesúsçøxpä.

¹⁶ Coo quioodsøøyy, mänitä pa'amjäya'ayhajxy may yajmejtsä maa ja'a Jesúsän. Tøø hajxy hánajty näje'e miächii ja'a møjcü'ujäm. Mänitä Jesús quiapxy. Manityä hajxy

yhøxmajtsä ja'a møjcü'ujäm. Jaduhnä pa'amjäya'ayhajxy quiøxy yajmøcpøjcä; ja'a Jesús jaduhn yajmøcpøjc.

¹⁷ Tøjiajt ja'a Diosmädia'agy jaduhn maa jaduhn myiñän cujaay, mänaa ja'a Isaías jecy miäna'añän: “Jaaya'ay ja'a nba'amhájtäm tøø xyajnhwáatsäm tøø xyajcuhwáatsäm.” Ja'a Isaías, je'eds ja'a Diosmädia'agy jaduhn jecy yajwa'x.

¹⁸ Coø ja'a Jesús yhijsy coø hänäjty cujc tøø piäda'agyii ja'a majiäya'ay, mänit miänaañ coø hajxy ñáxät mejyhawiimb møødä jiamiøødhajxy.

¹⁹ Cajnä hajxy hänäjty tiu'ubøcyñä, mänitä Jesús jäya'ay tu'ug ñämejtsä. Yajnahixøøby hänäjty je'ebä maa ja'a tsajtøjcän. Mänitä Jesús ñämaayyä:

—Wiindsøn, miñ nhuuc jamiøødhaty. Homiaajä mnøcxät, quipxy nbawädítät.

²⁰ Mänitä Jesús yhadsooyy:

—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch, ja'a Diosquexypä, cábøch ndøjc maačh nboo'x nhäñá'awät.

²¹ Mänitä Jesús ja'a jiamiøød tu'ug miänaañ:

—Wiindsøn, mänitøch miich nbadu'ubøga'añ coöchä ndeedy hänäjty tøø yho'nä, coöch hänäjty tøø nyajnaaxtägøøñä.

²² Mänitä Jesús yhadsooyy:

—Ween ja'a mjujy ja'a mmägu'ughajxy yajnaaxtägø'øy. Cábøch ja'a nmädia'agy hajxy xpianøcxaanä. Pero miich, ween quipxy nwädíjtäm.

²³ Mänitä Jesús hajxy tiägøøyy barcojooty møødä jiamiøødhajxy. Tiu'ubøjnä hajxy barcojooty.

²⁴ Mänitä poj møc piädø'cy, høxtä cugujjøøyy ja'a nøø jiiby barcojooty. Pero tøø ja'a Jesús hänäjty miaaho'nä.

²⁵ Mänit hoy yuxyíjäm ja'a miägu'ughajpä tu'ug. Mänit ñämaayyä:

—Wiindsøn, højts yajnahwáatsäc. Cham højts nnøøho'ogø'øwa'añ.

²⁶ Mänitä Jesús yhadsooyy:

—Tii hajxy coø mwi'i chähgø'øy. Cábøch mijts ja'a nmädia'agy hajxy jaduhn xñä'ä mäbøjcä, paady hajxy mdsähgø'øy.

Mänit piädø'cy. Mänitä poj jiojcunäma'awøøyy møødä mejy coø quia'a míññät. Mänit jaduhn yuungøøyy. Caj ñä'ägädä pojnä.

²⁷ Mänitä miägu'ughajpähajxy yagjuøøyy. Mänit hajxy ñiñämaayyä:

—Nebiäda'a jaduhn coø miädia'agy miäbøjcäxä høxtä ja'a poj møødä mejy.

²⁸ Mänitä Jesús hajxy jim miejch mejyhawiimb maa ja'a naax hänäjty xiøhatiän Gadara. Jimä cabäsantä hänäjty tu'ug. Mänitä Jesús jäya'ay nämetsc ñämejtsä. Jim hajxy hänäjty tøø choon maa ja'a cabäsantän. Tøø hajxy hänäjty miächii ja'a møjcü'ujäm. Jaančh tehñ quia'awiindøyy hajxy hänäjty ñibiäda'agyii. Ni pøn hajxy hänäjty quia'a yajnaxa'añ maa ja'a tu'ujän.

²⁹ Mänitä Jesús tiägøøyy wiinguyaaxøøyyäbä:

—Jesús, tii højts xwia'ana'añ, miich Dioshuung. Cajnä yhabaady coø højts xya-jcumädówät.

Ja'a møjcu'uhajxy jaduhn mänaañ, ca'a jiäya'ayä.

³⁰ Jim mayhädsøm hänäjty wiädity tunwiinmänac jäguemjuøøby.

³¹ Mänitä Jesús miänuu'xtaacä ja'a møjcu'uhajxy:

—Pø xyajpädsømammb højts yaa maa hädaa jäya'ayän nämetscä, na'añ højts jiiby nhuuc tægø'øy maa yø'ø hädsøm jioodootyhajxiän.

³² Mänitä Jesús miänaañ:

—Nøcx hajxy jiiby tægø'øw.

Mänitä møjcu'uhajxy ñähwaach ja'a jäya'ay nämetspä. Mänitä hädsøm hajxy ñämejch. Cøjx ja'a hädsøm hajxy wyiinmänacpäyø'øgy. Cøjx hajxy quihcahnaxy naaxøjpcøxp. Mejjiooty hajxy hoy quiuga'awø'øy. Cøjx hajxy jiiby yho'ogy mejjiooty.

³³ Mänitä hädsømgüeendähajpähajxy chähgø'øbäyø'cy. Coø hajxy jim miejch maa ja'a cajptän, mänit hajxy miädiaacy nebiaty hajxy hänajty tøø yhixy, coø ja'a møjcu'uhajxy hänajty tøø ñähwa'açh ja'a jäya'ay nämetspä.

³⁴ Cøjx ja'a cu'ughajxy ñøcxy päyø'øguiä maa ja'a Jesúsän. Coø ja'a Jesús hajxy piaaty, mänit hajxy miänuu'xtaacy coø ja'a Jesús jim chóonät maa ja'a ñaaxhajxiän.

9

¹ Mänitä Jesús hajxy tiägøøguiumbä barcojooty, ñajxtägajch hajxy jadähooc mejyhawiimb maa ja'a quiajpthajxiän.

² Mänitä tecymiucypiä tu'ug quiøømiejtsä tsaajiooty maa ja'a Jesúsän. Ja'a mähdiøjc ja'a miägu'ughajpähajxy jaduhñ cøømiejtsä. Coø ja'a Jesús yhixy coø hajxy hänajty miäbøcy, mänitä Jesús ja'a mähdiøjc ñämaayy:

—Huung, jootcugø'øw; tøø ja'a mbojpa mgädieey xñähwa'açh.

³ Jimä ley-yajñähixøøbiädøjc hänajty näje'e tiäna'ay ja'a Jesús ñähmøjc. Coø hajxy jaduhñ miädooyy nebiä Jesús miänaañän, mänit hajxy näje'e quiopcooty tiägøøyy mädiaacpä: “Capxtägooby hädaa craa jaduhñ maa ja'a Dioscøxpän.”

⁴ Ñajuøøby ja'a Jesús hänajty neby hajxy hänajty miädia'aguiän quiopcooty. Mänit miänaañ:

—Tii haxøøgwiinmahñdy hajxy coø mmøødhaty mgopcooty.

⁵ Mädyii mädia'agy maas tsip, coöch hädaa mähdiøjc nnämä'awät: “Tøø ja'a mbojpa mgädieey xñähwa'açh”, tögä maas tsip jaduhñ coöch nnämä'awät: “Tänaayyø'øg, yo'oyø'øg.”

⁶ Nyajcähxø'øgáambiøch coöchä cuhdujt jaduhñ nmøødä hädaa yaabä naaxwiin coöchä pojpa cädieey nyajñähwá'adsät, høøch ja'a Diosquexypä.

Mänitä Jesús ja'a tecymiucypiä ñämaayy:

—Tänaayyø'øg, widsø'øg yø'ø mdsaa, nøcxnä maa ja'a mdøjcän.

⁷ Mänitä tecymiucypiä tiänaayyø'cy. Mänit ñøcxnä maa ja'a tiøjcän.

⁸ Coø ja'a cu'ughajxy jaduhñ yhixy coø ja'a tecymiucypiä tøø yhojø'øy, mänit hajxy chähgøøbiøjcy. Mänitä Dios hajxy wyiingudsähgøøyy, je'eguiøxpä coø ja'a Jesús ja'a mäjaa hänajty tøø mio'oyii, ja'a Diosquexypä. Cab hajxy hänajty ñajuø'øy pø Dioshuung hänajty je'e, ja'a Jesús.

⁹ Mänitä Jesús jim chohñ. Mänitä jäya'ay tu'ug yhixy, ja'a xøhajpä Mateo. Jimä Mateo hänajty yhäña'ay maa hänajty yajñähjuudiu'udiän. Mänitä Mateo ñämaayyä:

—Jam quipxy wädjätäm.

Mänitä Mateo tiänaayyø'cy. Mänit ja'a Jesús piadu'ubøjcy.

¹⁰ Jimä Jesús hänajty quiay tøgooty møødä miägu'ughajpähajxy. Mänitä yajñähjuudiuutpähajxy may miejch mägaabiä, møødä jäya'ayhajxy ca'a panøcxpä ja'a judíos quiuhdujt. Mänitä Jesús hajxy tiägøøyy møødcaabiä.

¹¹ Jimä fariseoshajxy hänajtypä, ja'a hajxy hänajty hoy jaançh tehñ pianøcxpä ja'a Moisés miädia'agy. Mänitä fariseoshajxy miänaañ:

—Tii yø'ø mwiindsøn coø miøødcay ja'a yajñähjuudiuutpähajxy møødä cubojpa cugädieeyhajxy —nømä Jesús miägu'ughajpähajxy ñämaayyä.

¹²⁻¹³ Miädoow ja'a Jesús jaduhñ. Mänit miänaañ:

—Pøn jaduhñ møc, caj yajtsooyø'øy; pøn jaduhñ pa'ammøød, je'eds jaduhñ yajtsooyøøby. Jaduhñ mäwíinøch høøch nebiä mädsøoyøøbiän. Páadyhøch yaa tøø nmiñ tøø nmech, nébiøch ja'a cubojpa cugädieeybähajxy nnämä'awät coø ja'a yhaxøøgwiinmahñdy hajxy ween ñajtshixø'øy. Ja'a hojiäya'ayhajxy, cábøch hajxy je'e waamb nnäma'awa'añ. Nøcx hajxy habøc tii ja'a Diosmädia'agy jaduhñ ñänøømby: “Chójpíøch ja'a njoot jaduhñ coø hojiøot hajxy mmøødhädät; cábøch jaduhñ nmänaañnä coø animal hajxy myóxät maa ja'a høøchcøxpän.”

14 Mänitá Jesús ñámejtsá ja'a Juan mäyajnábejpá miägu'ughajpähajxy. Mänitá Jesús miäyajtøwá:

—Tii miičh mmägu'ughajpähajxy jaguiay quia'a nä'ägädä hida'añ. Naxy højts jaguiay tu'xøøjaty nhity tähoocjaty; jaduñ højts ja'a Dios nwiingudsähgø'øy. Jaaná jaduñä fariseoshajxy yhijpä jaguiay.

15 Mänitá Jesús yhadsooyy:

—Coo ja'a jäya'ayhajxy mänaa piøcy yhu'ugy, cabä woyba wichpä hajxy jiø'øy xiuučh. Xoondaacp hajxy jaduñ, je'eguiøxpä coo ja'a jamiø'ød jyijä. Jaduñ mäwíinøch høøch nebiä jamiø'ødän. Páadyhøch nmägu'ughajpähajxy jaguiay quia'a hity. Habaadaam̄b jaduñ cooçh yaa ndsoonaan̄nä; mänit hajxy mäbøcypiä jaguiay yhida'añ.

16 'Cab jaduñ pøn tuçwit yhagø'yø'øy jem̄ywyithaam. Múgäp ja'a jem̄ywyit jaduñ y maas hanaxiä ja'a tuçwit jaduñ quiøødsät.

17 Jaaná jaduñduhmbä, cabä pøn jem̄yvyino quiudemø'øy tuçwajhacxujiooty. Cøødsäp ja'a wajhacxuy jaduñ y høxyógäp ja'a vino jaduñ. Haagä tägøyyäp ja'a wajhacxuy jaduñ møødä vino. Pero jiibiä jem̄yvyino hajxy quiudemø'øy maa ja'a wajhacxuy jem̄ybiän. Jaduñ ni mädyii quia'a tägøyyät.

18 Cajnä ja'a Jesús hänajty miädiaacpädø'øy, mänitá tsajtøjcwindsøn tu'ug miehch. Mänitá Jesús wyiingo'naaguiädaacä. Mänit ñämaayyá:

—Naamhó'ogyhøçhä nhuung ja'a to'oxypä. Coo miičh nøcxy mnähdoñ, mänit jiu-yypiøjtägätsät.

19 Mänitá Jesús piädø'cy. Mänit jaaya'ay miøødtu'ubøjcy møødä Jesús miägu'ughajpähajxy.

20-21 Jimä tajiäya'ay hänajty tu'ug høxhaam pianøcxy. Pa'ammøød hänajty je'e. Majmetscjumøjt ja'a ñø'ty hänajty tøø wyli xiee'xy, weenjaty weenjaty. Jaduñä tajiäya'ay hänajty miädia'agy quiopcooty: “Nägøoyyøch ja'a wyitpa'a nnähdoonät, mänitøch nmøcpøgät.” Coo ja'a Jesús ja'a tajiäya'ay jäguyohdiägøøyyä, mänitá wyitpa'a ñähdoonäxä.

22 Mänitá Jesús yhee'pwiimbijty, Mänit ja'a tajiäya'ay yhiixy. Mänit miänaañ:

—Huung, jootcugø'øw; tøø jaduñ mmøcpøcy, je'eguiøxpä coo tøø mmäbøcy.

Mänitiä ja'a tajiäya'ay miøcpøjcy.

23 Mänitá Jesús hajxy jim̄ miehch maa ja'a tsajtøjcwindsøn tiøjcän. Jiibiä xuuxpädøjc-hajxy hänajty yho'ogyjäya'awyiinxu'uxy. Jiibiä jäya'ayhajxy hänajty wyli' yhaamhaty.

24 Mänitá Jesús miänaañ:

—Pädsøm̄ hajxy jiiby. Cab yø'ø tøø yho'ogy, nä'ä maab yø'øduhñ.

Mänitá Jesús ñäxiicä.

25 Cøjx hajxy jaduñ piädsømy. Mänitá Jesús tiøjtägøøyy. Mänitá to'oxyhäna'c quiøømajch. Mänitá to'oxyhäna'c yhäñaayyø'cy.

26 Mänitá mädia'agy wiädipty wiinduhm̄yhagajpt coo ja'a to'oxyhäna'c tøø yagju-jypiøgyii.

27 Coo ja'a Jesús hajxy jim̄ choñ, mänitá wiindshajxy nämetsc piadu'ubøjcy yáaxäp:

—Højts näxú'utsäc. David miičh hijty mhaphajpy mdeedyhajpy.

28 Coo ja'a Jesús tiøjtägøøyy, mänitá wiindshajxy miäwiingooñ. Mänitá Jesús miänaañ:

—Nej, mmäbøjpy hajxy jaduñä cooçhä mäjaa nmøødä coo hajxy nyaghijxø'øgädä.

Mänit hajxy miänaañ:

—Wiindsøn, nmäbøjpy højts.

29 Mänitá Jesús ja'a wiinds wyiinhajxy ñähdoonä. Mänitá Jesús miänaañ:

—Ween hajxy mhijxø'øgy coo hajxy tøø mmäbøcy.

30 Mänit hajxy yhiixø'cy. Mänitá Jesús miänaañ:

—Ca'a pøn hajxy mnä'ägädä hawaanä.

31 Coo ja'a wiindshajxy jim̄ chohñ, mänit hajxy tiägøøyy mädia'agy-yajwädijpä coo hajxy tøø yaghijxø'ogyii ja'a Jesúsäm.

32 Mänitä huum tu'ug yajmejtsä maa ja'a Jesúsän. Tøø hänajty miačhii ja'a møjcu'ujäm.

33 Mänitä Jesús ja'a møjcu'u jiiiby yajpäyø'cy. Mänitiä ja'a huum quiapxø'cy. Yagjuøøyy ja'a jäya'ayhajxy jaduhñ. Mänit hajxy miänaañ:

—Ni mänaa jaduhñ pøñ tii quia'a yagjadyii nebiä hädaajän yaa Israelnaaxooty.

34 Mänitä fariseoshajxy miänaañ:

—Paady yø'øya'ay ja'a møjcu'u yajpäyø'ogy, coo ja'a møjcu'ugong miäjaa miøødhajtä.

35 Cøjx ja'a Jesús wiädity wiinduhmyhagajpt. Homiaajä hänajty wiädity, jiiiby hänajty yajnähihixø'oy tsajtøgooty coo ja'a Dios ja'a miäjaa mobädajp yajcähxø'øga'añ. Yajnajxyp hänajty homiädyii pa'amä.

36 Näxuu'chp ja'a Jesús ja'a majiäya'ay hänajty. Jaduhñ mäwínäts hajxy hänajty nebiä meegän, ja'a cajpä wyiindsøn. Nebiä tägowiädijpä hajxy hänajty je'e. Nebiä jootmayhappän hajxy hänajty je'e.

37 Mänitä Jesús ñämaayy ja'a miägu'ughajpähajxy:

—Yø'ø majiäya'ayhajxy, hoy jaduhñ coočhä nmädia'agy hajxy xmiäböjcat. Pero cab hõjts nnämäyyäm, hõjts ja'a mädia'agy nyajwá'xämbä.

38 Mänuu'xta'ag ja'a Dios hajxy coo ween ja'a mägu'ughajpä hajxy xjiaac móoyyämät, neby hõjts ja'a mädia'agy hajxy xmiøødyajwá'xämät.

10

1 Mänitä Jesús ja'a miägu'ughajpä miøjyaaxy ja'a nämajmetspä. Mänitä cuhdujt miooyy coo ja'a møjcu'u hajxy yajpäyø'øgät, coo homiädyii pa'amä hajxy yajnáxät.

2 Jaduhñä nämajmetspähajxy hänajty xiøhaty: Simón Pedro møødä piuhya'ay Andrés; ja'a Zebedeo yhuunghajxy, Jacobo møødä Juan;

3 Felipe; Bartolomé; Tomás; Mateo ja'a yajnähuudiutpä; Jacobo, ja'a Alfeo yhuung; Lebeo Tadeo;

4 Simón ja'a cananista; Judas Iscariote, ja'a Jesús hänajty yajyagho'ogáañäbä.

5 Mänitä Jesús ja'a nämajmetspähajxy quiejxy mädia'agy-yajwa'xpä. Mänit ñämaayy:

—Ca'a hajxy jim̄ mnøcxy maa ja'a ca'a judíoshajxy chána'ayän, y ca'a hajxy jim̄ mnøcxy Samarianaaxooty. Yaayyä hajxy jaduhñ mwädítät, yaa Israelnaaxooty.

6 Ja'a jäya'ayhajxy yaabä, jaduhñ mäwínäts hajxy je'e nebiä meeg tägowiädijpä.

7 Mnägápxäp hajxy jaduhñ coo ja'a Dios ja'a miäjaa mobädajpä yajcähxø'øga'añ.

8 Myajnáxäp hajxy homiädyii pa'amä møødä haxøøgpa'am. Myagjujyppiögäp ja'a ho'ogyjiäya'ay hajxy. Myajpäyø'øgäp ja'a møjcu'u hajxy. Nnä'ä móobiøch mijts hädaa cuhdujt; cábøch mijts nyagjuya'añ; jaduhñ mijtspä, cab hajxy myagjúubiät.

9 Cabä xädø'øñ hajxy mgónät ni weentiä.

10 Cabä morral hajxy mwídsät. Tu'uquiä camiixy hajxy mwídsät. Cabä cø'øg hajxy mejtstehñg mmänøcxät. Cabä cuhdajt hajxy mgábät. Jim̄ hajxy mmägaya'añ mmähu'uga'añ maa hajxy hänajty mhamejtsta'aga'añän.

11 Coo hajxy maa mgajptägø'øwät, jim̄ä jäya'ay hajxy mhøxtá'awät ja'a hojiootmøødpä; jim̄ hajxy mhamejtstá'agät. Jiiiby hajxy mhídät høxtä coonä hajxy hänajty mdu'ubøga'añ.

12 Coo hajxy mdøjtägø'øwät, mänit hajxy myajpóo'xät.

13 Coo hajxy jaduhñ xyajtøjtägø'øwät hamuumdu'joot, mänit hajxy jaduhñ quiunuu'xøøjät ja'a Diósäm; pø caj, cab hajxy jaduhñ quiunuu'xøøjät.

14 Coo hajxy jaduhñ xquia'a nä'ägä jøjpøgø'øwät, coo ja'a mmädia'agyhajxy xquia'a nä'ägä mädóowät, mänit hajxy jim̄ mdsóonät. Mänitä mdecy hajxy mwiinwop mwiinxídät, nebiä hijxtahñd jaduhñ miähmø'øwät coo mijts jaduhñ tøø xquia'a yajtøjtägø'øy.

15 Tøyhájtäts mijts nnäma'ay, coo yhabáadät coo ja'a jäya'ayhajxy quiumädowa'añ, maas hanaxiä yø'ø cajpt jaduñ quiumädowa'añ quejee ja'a Sodomacajpt møødä Gommorrajpt.

16 'Maačh mijts nwiinguexiän, haxøøgwiinmahñdy ja'a jäya'ayhajxy jim miøød. Paady hajxy nähix hahixø'ø mnibiäda'agóøjät. Mee'xxieemy hajxy jaduñ mwädítät.

17 Mniyajcopcø'øwøøjap mijts. Xyajcø'ødägó'øwäp mijts maa ja'a tuungmøødpän. Mänítäts hajxy xwyiinwop xjiøjwóbät maa ja'a chajtøgootyhajxiän.

18 Høxtä jim hajxy xyajmedsa'añ maa ja'a gobiernä wyiinduumhajxiän, møød jim maa ja'a ca'a judíos wyiinduumhajxiän.

19 Pero coo hajxy jaduñ xyajmédsät maa ja'a wyiinduumhajxiän, cab hajxy mdaj mmáyät waambaty hajxy hánajty mmädia'aga'añ. Coo jaduñ yhabáadät, mänitä Dios jaduñ xyhawáanät waambaty hajxy jaduñ mmáná'anät.

20 Cab hajxy hamdsoo mmädia'aga'añ. Dioshespírituhaam hajxy jaduñ mmädia'aga'añ.

21 'Haxøøg jaduñ jiada'añii. Hamdsoo hajxy ñiñahanuu'xø'øwa'añii ja'a tu'que'expä-jäya'ay. Jaduñ ja'a tieedyhajxy jiatcø'øwaambä møødä yhuunghajxy.

22 Ja'a høøchcøxpä mijts ja'a jäya'ayhajxy nägøxiä xmiähanhada'añ. Pøn jaduñ mee'xtujp cøjxta'axiøø, je'eds jaduñ mähmø'øwaamb hodiium.

23 Coo mijts hajxy xchaačhtiúnät mädu'ughagajpt, mänit hajxy mbäyø'øgät, mänit hajxy mnøcxät wiingtuum. Tøyhájtäts mijts nnäma'ay, coo hánajty ngäda'aga'añ, høøch ja'a Diosquexypä, cahnä cajpt hajxy hánajty mwiinwädityñä maa ja'a judíoshajxy chána'ayän.

24 'Cabä pøn jaduñ jiaty nebiä wyiindsøn jiatian.

25 Coo hajxy jaduñ mjádät nebiä mwiindsøn hajxy jiatian, jootcuyc hajxy jaduñ mhídät. Coochä jäya'ayhajxy jaduñ tøø xñäma'ay: "Møjcu'u", jaduñ mijts hajxy xñäma'awaambä.

26 'Cabä cu'ug hajxy mdsähgø'øwät. Nebiaty hajxy jaduñ jiatcø'øy hamee'ch, cähxø'øgaamb jaduñ.

27 Waambátyhøch mijts hamee'chhaam nnaajtscapxøøyyäm, majiäya'ayhagujc hajxy myajcapxø'øwät.

28 Cab hajxy mdsähgø'øwät pøn ja'a mnaaxni'x hajxy xyaghó'cäp; cabä mháañämä hajxy jaduñ xyaghó'cät. Ja'a Dios hajxy mdsähgø'øwäp; je'edsä cuhdujt jaduñ møød coo hajxy jiiby xquiéxät haxøøgtuum. Jiiby ja'a mnaaxni'xhajxy quiuhdägóyyät møødä mháañämähajxy.

29 'Ja'a muuxyhuunghajxy, coo hajxy quia'ay, yhiyxyp ja'a nDeedyhájtämhajxy jaduñ, hoy hajxy quia'a ja tsowä.

30 Jaaná jaduñ mijts xyhiixpä, høxtä xñajuøøyyäp mijts naag mijts mguhwaay.

31 Cabä jäya'ay hajxy mdsähgø'øwät; hix, mmaas tsoobaatp mijts quejee ja'a muuxy-hajxy.

32 'Pønjátyhøch ja'a nmädia'agy xmiøødyajtu'ugøøby maa ja'a cu'ugwiinduumän, mänitøch ja'a miädia'agyhajxy nmøødyajtu'ugø'øwaambä maačhä nDeedy wyiinduumän jim tsajpootyp.

33 Pero pønjátyhøch jaduñ tu'ugmädia'agy tøø xquia'a møødhity maa ja'a cu'ugwiinduumän, ni høøch jaduñ tu'ugmädia'agy nga'a møødhidaambä maačhä nDeedy wyiinduumän jim tsajpootyp.

34 'Cooch yaa tøø ngäda'agy, paadiä jäya'ayhajxy jaduñ ñimiädsibø'øwa'añii ja'a høøch nmädia'agyquiøxpä. Cab hajxy jootcuyc yhida'añ.

35-36 Tu'tøjc hajxy jaduñ ñimiädsibø'øwa'añii, møødä tiaj møødä tieedy, møødä ñøøx møødä miajc, møødä jiaxie'eb møødä xiocy.

³⁷ Põnā tiaj põnā tieedy maas tsojp quejeech hõõch jaduhñ xchocy, cábõch ja'a nmädia'agy hoy xpianõcxät. Y põnā ñõõx põnā miajc maas tsojp quejeech hõõch jaduhñ xchocy, ni je'eçh ja'a nmädia'agy hoy xquia'a panõcxäbät.

³⁸ Põnā jioot tsojp cooçh hõõch xpianõcxät, pero cabä jioot jaduhñ chocy coo chaachpõgät nébiõch jaduhñ ndsaachpõga'añän, cábõch nmädia'agy jaduhñ hoy xpi-anõcxät.

³⁹ Põnā jiugyhajt jaduhñ ja wi'i yaghoyõ'õwaamb, tägõyyäp ja'a jiugyhajt jaduhñ. Pero põnā jiugyhajt najtshixõ'õwaamb ja'a hõõchcõxpä, je'eds hodium nõcxaamb.

⁴⁰ Põn mijts jaduhñ xchojp, jaduhñ mäwínõch hõõch xchojpä. Y põnhõch hõõch jaduhñ xchojp, jaduhñ mäwínädsä Dios jaduhñ chojpä, ja'açh tõõ xquiéxiäbä.

⁴¹ Ja'a Diosquexyhajxy, hodium hajxy ñõcxa'añ. Jaanä jim hajxy ñõcxaambä põn jaduhñ tsojp ja'a Diosquexy. Paady hajxy chogyii coo hajxy jaduhñ Dyiosquexiä. Jaanä jim hajxy ñõcxaambä hodium põn jaduhñ tsojp ja'a hojiäya'ay.

⁴² Coo hädaa häyoobäya'ay tõchñõõ ñä'ä mo'owõõjät je'eguiõxpä cooçh jaduhñ xpi-anõcxy, mänit jaaya'ay piäda'agõõjät hodium, ja'a nõõ tõõ yéquiäbä. Tehñ tiõyhajt jaduhñ.

11

¹ Coo ja'a Jesús ja'a jiamiõõdhajxy yajwiingapxõõbiädõõyy, mänit jim chohñ. Mänit tiägõõyy yajnáhixõõbiä maa ja'a cajpt mäwiingonän.

² Ja'a Juan, tsumyhäñaaby hänajty je'e. Coo miädoyhajty coo ja'a Cristo hänajty wiädity yajnáhixõõbiä, mänitä miägu'ughajpä metsc quiejxy maa ja'a Jesúsän.

³ Mänitä Jesús hajxy miäyajtõõyy:

—Nej, miiçh ja'a Crístojä, ja'a Dios jaduhñ quiexaambiä, tõgä wiinghäna'c je'ejä.

⁴ Mänitä Jesús yhadsooyy:

—Nõcx ja'a Juan hajxy hawaanä neby hajxy xii mhix mmädooyy.

⁵ Nõcx hajxy yajmõõdmädia'ag coo ja'a wiindshajxy tõõ yhiyxõ'õgy, coo ja'a tecymia'adpähajxy tõõ yo'oyõ'õgy, coo ja'a haxõõgpa'ammõõdpähajxy tõõ ñähwa'açh, coo ja'a cuhnatpähajxy tõõ miädoowõ'õgy, coo ja'a ho'ogyjiäya'ayhajxy tõõ jiuypiyõcy, coo ja'a häyoobäya'ayhajxy tõõ yajmõõdmädia'agyii ja'a Diosmädia'agy.

⁶ Jootcujc hajxy jaduhñ yhity ja'açh nmädia'agy hajxy hamuumdu'joot tõõ xmiäbõjcäbä.

⁷ Coo ja'a Juan miägu'ughajpähajxy wyiimbijty, mänitä Jesús ja'a cu'ug tiägõõyy mõõdmädiaacpä ja'a Juancõxpä.

—Coo hajxy tõõ mhoy pactuum, ja'a Juan miädia'agy hajxy hänajty mmädowáanäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tõõ mhoy coo ja'a Juan ja'a miädia'agy hajxy hänajty mmädowaanä.

⁸⁻⁹ Diosquexy je'e, paadiä miädia'agy hajxy hoy tõõ mmädoowä, hoy ja'a howyit hänajty quia'a ja mõõdä nebiä mäyõõjäya'ayhajxy miõõdän. Tõyhajt jaduhñ coo ja'a Juan ja'a Diosmädia'agy yajwiingapxõ'õy. Pero ja'a Diosmädia'agy hajxy nä'ä jaac yajnáhixõõbiä, je'edsä cuhdujt hajxy maas may tõõ mio'oyii ja'a Diósäm.

¹⁰ Ja'a Diosmädia'agy jecy mädiäacäbä, Juan je'e. Nõmä Dios jecy miänaañ coo ja'a quiuguexy hänajty jayõjp quiexa'añ maa ja'a cu'ugän, ween yajwiinxiic yajwiingapxõ'õy coo ja'a yhaxõõgcuhdujt hajxy ñajtshixõ'õwät. Hõxháamhõch hänajty ngäda'aga'añ. Jayõjp ja'a Juan jiaançh quejxä; hõxháamhõch njaançh cädaacy.

¹¹ Ni põn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnäbejpä ja'a cuhdujt miõõdän. Tõyhajt jaduhñ. Pero cooçh hänajty tõõ nho'nä, cooçh hänajty tõõ nnõcxtägach maaçh nhuuc tsohmän, põnjaty ja'a Diosmädia'agy mäbõgaamb ja'a hõõchcõxpä, maas mayyä cuhdujt hajxy hänajty miõõdhada'añ quejee ja'a Juan miõõdä, hoy ja'a mõjcuhdujt hajxy hänajty quia'a ja mõõdä.

12 'Coo ja'a Juan tiägøøyy mäyajnäbejpä, høxtä je'enä jäda'anäbaadyñä, nägø'ø nädecypia ja'a jäya'ayhajxy jia wi'i tiägø'øwa'añ maa ja'a Dios wyiinduumän.

13-14 Ja'a Diosquexyhajxy jecypia, jaduñ hajxy jecy miänaañ coo ja'a Dios ja'a miäjaa yajcähxø'øga'añ. Jaduñä Moisés miädia'agy miänaambä. Pero jayøjpäc ja'a Elías hijty myina'añ. Y coo ja'a Juan tøø miech, Elías je'e, pø mwiinjuø'øwaamby hajxy jaduñ.

15 Pøñ mädohnd møød, ween miädooy.

16 Pänébiøch jäya'ayhajxy nyajmäbáadät ja'a jäda'ahatypä. Cab hajxy tii yho-jiäwø'øwa'añ. Jaduñ mäwlinäts hajxy je'e nebiä pigäna'c wiinhecpän. Coo hajxy naxy miech häyø'pä tøjpa'c, mänitä miäbigäna'c hajxy ñäma'ay:

17 "Tøø højts nja xu'uxy, pero cab hajxy tøø mhech. Tøø højts hojiøñä nja høy, pero cab hajxy tøø mjø'øy."

18 Coo ja'a Juan miejch, cab hänajty quiaya'añ yhu'uga'añ. Mänit mijts mnänøømy coo je'e quiu'umañøöbiä.

19 Mänitøch nnamejtspä, høøch ja'a Diosquexypä. Mänitøch ndägøøyy caabiä huucpä. Jadúñhöch mijts xñänøømbä coöch nwi'i quiaya'añ coöch nwi'i yhu'uga'añ, coöchä cubojpä cugädieeybä nmägu'ughaty møødä yajnähjuudiutpädøjc. Pero yajcähxø'øgaamby ja'a Dios jaduñ ja'a wyiinmahñdyhaam coöch ja'a tøyhajt jaduñ nmøødä.

20 Mänitä Jesús tiägøøyy hamänajpä. Ja'a cajptjäya'ayhajxy jaduñ hojjä, ja'a hajxy hänajty tsänaabiä maa ja'a Jesús ja'a hoy-yagjuøøñäjatypä hänajty tøø jia yajcähxø'øguiän. Paadyjaduñ yhamänajty, coo yhaxøøgwiinmahñdy hajxy hänajty tøø quia'a najtshixø'øy. Mänitä Jesús miänaañ:

21 —Haxøøg mijts mjada'añ mhabeta'añ, mijts yaa tsänaabiä Corazín møødä Betsaida. Ja'a jecyjiäya'ayhajxy hijty jim tsänaabiä Tiro møødä Sidón, coo hajxy häxøpy tøø yhixy ja'a hoy-yagjuøøñäjatypä nej mijts tøø mja hixiän, tøø ja'a yhaxøøgwiinmahñdy hajxy häxøpy ñajtshixø'øy.

22 Tøyhajt jaduñ, coo ja'a Dios yaghabáadät, maas haxøøgtuum mijts jaduñ xpiäda'aga'añ quejee ja'a jäya'ayhajxy jim jecy tsänäaaybä Tiro møødä Sidón.

23 Y mijts jim tsänaabiä Capernaum, mja wi'i yajcumayaamb hajxy jaduñ. Pero cabä Dios hajxy jaduñ xquiumaya'añ. Ja'a jecyjiäya'ayhajxy hijty jim tsänaabiä Sodoma, coo ja'a hoy-yagjuøøñäjatypä hajxy häxøpy tøø yhixy nej mijts tøø mja hixiän, cab hajxy häxøpy tøø quiuhdägoy.

24 Tøyhajt jaduñ, coo ja'a Dios yaghabáadät, maas haxøøgtuum mijts xpiäda'aga'añ quejee ja'a jäya'ayhajxy jim jecy tsänäaaybä Sodoma.

25 Mänitxøø ja'a Jesús miänaañ:

—Teedy, miich nba'yaaxyp. Miiçh jim häñaaby tsajpootyp; miich yaa Dioshajp maa hädaa yaabä naaxwiinän. Dioscujú'uyäp coo ja'a tøyhajt tøø myajnähixø'øy ja'a hajxy tii ca'a jajpä. Caj tøø myajnähixø'øy ja'a hajxy tyijy jajpä.

26 Tøyhajt jaduñ, Teedy, je'eguiøxpä coo miich mjoot jaduñ chocy.

27 Mänitä Jesús miänáangumbä:

—Tøøchä nDeedy ja'a tøyhajt xquiøxy yajcø'ødägø'øy. Cábøch pøñ xyhixyhaty, høøch ja'a Dioshuung. Tøyhajt jaduñ. Jagóoyyøch nDeedy xyhixiä. Y cábøch ja'a nDeedy pøñ xyhixyhajtä. Jagóoyyøch jaduñ nhixiä, høøch ja'a Dioshuung. Nyajnähdiäbøch pøñjátyhøch nDeedy hixyhädäp.

28-30 Mijts, pøñ jaduñ ca'a mee'xtugaamb neby hajxy hijty mguhdujthatiän, høøch nguhdujt habøjcäc. Hojióthøch nmøød; cábøch nyajcumaya'añ. Mänitäts ja'a hoybä weenbä hajxy mbáadät. Cábøch ja'a jemçpä mapxypä jaduñ nbäda'aga'añ.

12

1 Mänitxøø ja'a Jesús hajxy hänajty wiädity trigoni'ibyquiujc poo'xxiøøjooty. Yähó'cäp ja'a Jesús jiamioødhajxy hänajty. Mänit hajxy tiägøøyy trigotøjpä.

² Coo ja'a fariseoshajxy jaduhñ yhiijxy, mänitä Jesús hajxy ñämaayy:

—Huug hix, xiidsä mmägu'ughajpä trigo hajxy wyi'i tiøjy. Cabä cuhdujt jaduhñ myiñ coo hajxy tii ndúunämät ja'a poo'xxiøøjooty.

³ Mänitä Jesús miänaañ:

—Nej, cahnä ja'a Diosmädia'agy hajxy mgapxiä. Jim jaduhñ myiñ cujaay coo ja'a Davidhajxy yäho'pøjcä.

⁴ Mänit hajxy tiägøøyy Diostøgooty. Mänitä Diostajcaagy hajxy quiaaayy, ja'a teedyhajxy hänajty tøø quiuyoxó'øyäbä. Cabä cuhdujt hänajty pøn miøødä coo hajxy quiáyät ni ja'a Davidhajxy. Jagooyyä teedy ja'a cuhdujt hajxy hänajty miøødä coo hajxy quiáyät.

⁵ Jaduhñ cujaay myiimbä maa ja'a Moisés miädia'aguiän coo ja'a teedyhajxy tsajtøgootypä quia'a nä'ägädä poo'xy ja'a poo'xxiøøjooty; y cab jaduhñ ñeipiä.

⁶ Y høøch, maas møc-høch ja'a cuhdujt jaduhñ nmøødä quejee ja'a tsajtøjc.

⁷ Caj mijts mwiinjuø'øy waamb ja'a Diosmädia'agy jaduhñ miäna'añ: “Mänáambøch jaduhñ coo hojiot hajxy mmøødhädät; cábøch jaduhñ nmäna'añ coo animal hajxy myóxät ja'a høøchcøxpä.” Coo hajxy jaduhñ mwiinjuø'øwät, cabä jäya'ay hajxy nä'ä nägoodä mwiingapxpädät.

⁸ Høøch ja'a Diosquexypä, nmøødhøch cuhdujt jaduhñ høxtä maa ja'a poo'xxiøøbaadiän.

⁹ Mänitä Jesús jim chohñ. Mänit tiägøøyy tsajtøgooty.

¹⁰ Jiibiä mähdiøjc hänajty tu'ug; cø'ødø'øds hänajty tu'nax. Jiibiä fariseoshajxy hänajty näje'e tiänaabiä. Mänitä Jesús miäyajtøøwä:

—Nej, hoy jaduhñ coo ja'a pa'amjäya'ay myajmøcpøgät ja'a poo'xxiøøjootiä.

Paadiä fariseoshajxy jaduhñ miänaañ, yhöxtaaby ja'a wiinmahñdy hajxy hänajty nebiä Jesús hajxy yajtsumøøjät. Coo ja'a Jesús ja'a pa'amjäya'ay yajmøcpøgät ja'a poo'xxiøøjooty, mänitä Jesús hajxy hänajty yajtsuma'añii.

¹¹ Mänitä Jesús yhadsooyy:

—Hoy pues. Coo pøn mieeg quiuga'awø'øy nøøjutjooty ja'a poo'xxiøøjooty, mänit hajxy nøcxy yajpædsømy, túhmäts.

¹² Y maas tsoobaatp ja'a jäya'ay quejee ja'a meeg. Hoy jaduhñ coo jäya'ay mnäxúudsät ja'a poo'xxiøøjooty.

¹³ Mänitä Jesús ja'a mähdiøjc ñämaayy:

—Xajtøw yø'ø mgø'ø.

Mänit xiajtøøyy. Mänit miäbaaty nebiä tu'ugpän.

¹⁴ Mänitä fariseoshajxy tiøjpædsømy. Mänit hajxy quiojyquiapxyhajty nebiä Jesús hajxy yaghó'ogät.

¹⁵ Coo ja'a Jesús jaduhñ miädoyhajty, mänit jim chohñ. Mänitä jäya'ay may piadu'ubøjcy. Mänitä Jesús ja'a pa'amjäya'ay yajmøcpøjcy nägøxiä.

¹⁶ Mänit jaduhñ miänaañ coo hajxy quia'a nägápxät pøn je'e.

¹⁷ Jaduhñsä tiøjiajty nebiä Isaías jecy miänaañän, ja'a Diosquexypä. Dios jaduhñ mänaamb:

¹⁸ Høøchä nmoonsä hädaa, ja'açh tøø nwiimbíyyäbä.

Ndsójpøch jaduhñ. Jootcújc-høch nnijiäwø'øyii yø'øgøxpä.

Nbäda'agáambiøch ja'a nhEspíritu maa yø'øjän.

Høøch nguhtdujt jaduhñ xyajwiingapxø'øwáañäp maa ja'a jäya'ayhajxy nägøxiän.

¹⁹ Caj chiptuna'añ; caj ya'axa'añ caj jioga'añ.

Hahuum jaduhñ wiädita'añ cajptooty.

²⁰⁻²¹ Jiootcapxmøcpøgaamby pøn hobiä nejpiä mæbøjp.

Mæbøgáañäxäp ja'a miädia'agy ja'a jäya'ayhajxy nägøxiä.

Mänit jaduhñ tiägø'øwa'añ hoyhanehmbä.

22 Mänitä mähdiojc tu'ug yajmejtsä maa Jesúsän. Wiindsä mähdiojc hänajty, mөөд hänajty yhuumä, mөөд ja'a mөjcu'uba'am hänajty miөөдä. Mänitä Jesús jaduhñ ya-jnähwaach, yaghijxө'cy, yajcapxө'cy.

23 Mänitä jäya'ayhajxy nägөxiä yagjuөөyy. Mänit hajxy ñiñämaayyä:

—Nej, David yhap yhocäda'a yө'өduhñä.

24 Coo ja'a fariseoshajxy jaduhñ miädooyy, mänit hajxy miänaañ:

—Coo yө'ө craa ja'a mөjcu'uwiiinmahñdy jaduhñ miөөдä, paadiä mөjcu'uba'am jaduhñ yajnähwa'aäch.

25 Ñajuөөbiä Jesús hänajty nebiä fariseoshajxy hänajty wyiinmahñdyhaty. Mänit miänaañ:

—Coo ja'a tu'hagajtpä jäya'ayhajxy ñimiädsibө'өwөjät, cuhdägöyyäp ja'a quiajpthajxy jaduhñ. Y coo ja'a tu'ugtөгootypä jäya'ayhajxy ñimiädsibө'өwөjät, cab hajxy hoy yhijnät tu'ugtөгooty.

26 Jaanä jaduhñduhmbä, coo ja'a mөjcu'uhajxy ñimiädsibө'өwөjät, tägöyyäp ja'a wyiinmahñdyhajxy jaduhñ.

27 Hoorä, mijts jaduhñ mänaamb cooch ja'a mөjcu'uba'am nyajnähwa'aäch ja'a mөjcu'uwiiinmahñdyhaam. Coo häxөpy jiaduhñä, maa mijts ja'a mjamiөөд ja'a wiinmahñdy hajxy piaady coo ja'a mөjcu'uba'am hajxy yajnähwa'aäch. Hamdsoo hajxy myajcähxө'ogy coo ja'a төyhajt hajxy mга'a mөөдä.

28 Pero hөөч, Dioshеспirituháamhөch ja'a mөjcu'uba'am nyajnähwa'aäch. Cähxө'p jaduhñ coo төө yhabaatnä coo ja'a Dios ja'a miäjaa yajcähxө'өga'añ.

29 'Coo ja'a mөjcu'u xquia'a yajmäjädá'agät, cabä miäjaa jaduhñ mbөjcät.

30 'Pөñhөch jaduhñ xquia'a mөөdpädө'p, hөөч nmädsip je'e. Y pөñhөch jaduhñ xquia'a mөөdtuumb, xmiähahñhápөch je'e.

31-32 'Je'eguiөxpөch mijts jaduhñ nnäma'ay, coo pөñ jaduhñ tiu'udägöyyät, hoy jaduhñ ñähwá'adsät, hөyhөch jaduhñ xjia nänөmy, hөөч ja'a Diosquexypä. Pero coo pөñ jaduhñ ñänömät ja'a Dioshеспiritu, cab jaduhñ mänaa ñähwa'adsa'añ.

33 'Mhөxcábäp hajxy jaduhñ pөñ ja'a howyiinmahñdy mөөд; je'eds hoy wädijp. Pөñ ja'a howyiinmahñdy ca'a mөөд, cab hoy wiädity.

34 Jaduhñ mäwíinäts mijts hajxy mjatcө'өy nebiä tsahñdiän. Paadiä hoybä hajxy mга'a mädia'aga'añ, coo ja'a haxөөгwiinmahñdy hajxy mmөөдä. Haagä mgopcooty ja'a mmädia'agyhajxy jaduhñ chohñda'agy.

35 Jaaya'ay hojiäya'aybä, hoy jaduhñ quiapxy miädia'agy je'eguiөxpä coo ja'a howyiinmahñdy miөөдä quiopcooty. Pero jaaya'ay ca'a hoybä, haxөөг jaduhñ quiapxy miädia'agy je'eguiөxpä coo ja'a haxөөгwiinmahñdy miөөдä quiopcooty.

36 Chaäch mijts nnäma'ay, coo jaduhñ yhabáadät coo ja'a Dios hänajty yajnähdiä'añ, mänitä Dios hajxy xmiäyajtөwa'añ waambaty hajxy hänajty төө mgapxtägoy, hoy hajxy jaduhñ төө mja nä'ä wiingapxnaxy.

37 Pө haxөөг hajxy hänajty төө mmädia'agy, mänit Dios hajxy xpiäda'aga'añ haxөөгtuum. Pө hoy hajxy hänajty төө mmädia'agy, mänitä Dios hajxy xpiäda'aga'añ hodium.

38 Mänitä Jesús ñämaayyä ja'a fariseoshajxy näje'e mөөдä ley-yajnähixөөbiähajxy:

—Wiindsөñ, hөjts ja'a hijxtahñd huuc yaghíxác ja'a hoy-yagjuөөñbä.

39 Mänitä Jesús yhadsooyy:

—Ja'a jäya'ayhajxy jäda'ahatypä, haxөөг hajxy jiatcө'өy; cabä Dios hajxy chocy. Ja'a hijxtahñd hajxy mja wi'i yhixaamby. Jagooyyä hajxy jaduhñ mhixa'añ nebiä hijxtahñd jecy quiähxө'quiän ja'a Jonáscөxpä, ja'a Dios jecy quiéjxäbä.

40 Ja'a ballenajoodooty ja'a Jonás yhiyty tägөөгxөө tägөөгtsuhm. Jaduhñäts hөөч nhidaambä naaxjutjooty tägөөгxөө tägөөгtsuhm, hөөч ja'a Diosquexypä.

⁴¹ Coo ja'a Jonás jaduhñ piädsøømy ballenajoodooty, mäniä Diosmädia'agy hoy ya-jwa'xy maa ja'a cajpt hänajty xiøhatiän Nínive. Coo hajxy jim miädooyy, mäniä hajxy miäbøjcy. Mäniä yhaxøøgwiinmahñdy hajxy ñajtshixøøyy. Y cabä Jonás møjtuunng hijty jaduhñ jiaty møødä. Maas møjtuunghøch nmøødä høøch. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä. Coo jaduhñ yhabáadät coo hajxy hänajty yajñähdiä'añii, mäniä hajxy ñäma'awa'añii coo hajxy jaduhñ piäda'agóøjät haxøøgtuum. Ja'a jecyjiäya'ayhajxy jaduhñ mäna'anaamb, ja'a hajxy hijty jegyhajty tsänaabiä Nínive.

⁴² Jaduhñdsä to'oxiøjc miäna'anaambä, ja'a jecy gobiernähajtäbä jäguemnaax ja'a jøømbojmänajpä. Mäniä Salomón hoy miämädoowhity, je'eguiøxpä coo ja'a Salomón hänajty jiaanç tehñ quiuhwijjiä. Y cabä Salomón ja'a møjtuunng hijty jiaty møødä. Maas møjtuunghøch nmøødä høøch. Pero cábøch nmädia'agy hajxy xmiädowaanä, ja'a jäya'ayhajxy jäda'ahatypä.

⁴³⁻⁴⁵ 'Ja'a jäya'ayhajxy jäda'ahatypä, haxøøgwiinmahñdy hajxy miøød. Y cooçh nmädia'agy hajxy xquia'a mäbøjcät, maas haxøøg hajxy jaduhñ jiädät. Jaduhñ mäwíinäts hajxy jiädät nebiä jäya'ay møjcu'umøødpän. Coo ja'a møjcu'u jii by piädsøømät maa jaaya'ay quiopcän, mäniä poo'xtaact nøcxy jäguemduum yhöxta'ay maa ja'a tø'ødsnähgäpän. Coo ja'a poo'xtaact jim quia'a páadät, mäniä miäna'ana'añ: “Mejor nnä'ägä nøcxtägächhøch maaçh nhuuc tsohmän.” Coo jaduhñ wyiimbidät, mäniä jäya'ay quiopc jaduhñ piäatät nebiä yajwa'adstøjcän, ja'a yajxon tøø pie'edyijäbä. Mäniä jiamiøød nøcxy juxtujc jiaac woy, ja'a maas haxøøgpä. Mäniä hajxy nägøxiä tiägøøy maa jaaya'ay quiopcootiän. Y maas haxøøg jaaya'ay jaduhñ jiada'añ quejee hijty yhity.

⁴⁶ Jimnä ja'a Jesús ja'a cu'ug hänajty miøødmädia'agyñä, mäniä tiajhajxy miejch møødä piuhya'ayhajxy. Jim hajxy miähmøøyy tøba'am. Ja'a Jesús hajxy hänajty miøødmädia'agaamby.

⁴⁷ Mäniä Jesús hoy ñäma'ayii:

—Xiidsä mdaj xmiøødmädia'aga'añ tøba'am møødä mbuhya'ayhajxy.

⁴⁸ Mäniä Jesús yhadsooyy:

—Pønhøch ndajhajpy; pønhøch nbuhya'ayhajpy.

⁴⁹ Mäniä jiamiøød ñädsiiwøøyy. Mäniä miänaañ:

—Høøch ndaj yøø; høøch nbuhya'ay yøø.

⁵⁰ Pønhøch ja'a nDeedy miädia'agy xquiudiúunäp ja'a tsajpootypä, jaduhñ mäwíinäts hajxy je'e nébiøch nbuhya'ayän, nébiøch nbuhdo'oxiän, nébiøch ndajjän.

13

¹ Mäniäxøø ja'a Jesús jim chohñ tøgooty. Mäniä jim miejch mejypia'a. Hoy jim yhäñaaguiäda'agy.

² Mäniä jäya'ay may miejch maa ja'a Jesús hänajtiän. Mäniä Jesús tiägøøyy barcojooty. Hoy jii by yhöxta'agy. Cøjxä jäya'ayhajxy jim miähmøøy pu'uwiing.

³ Mäniä Jesús tiägøøyy yajñähixøøbiä madiu'u. Mäbaadyhaam jaduhñ yajñähixøøyy. Mäniä miänaañ:

—Mäniä jäya'ay tu'ug tiu'ubøjcy niippä.

⁴⁻⁸ Coo ja'a tøømd tiägøøyy wøjpä, näje'e ja'a tøømd quiahy tu'haam, näje'e quiahy tsaanähgøxp, näje'e quiahy haptiooty, näje'e quiahy maa ja'a hoñaaxän. Ja'a jim cáhwäbä tu'haam, yajpädø'c ja'a muuxy hajxy je'e. Ja'a jim cáhwäbä tsaanähgøxp, paquiä jaduhñ jia mujxy, je'eguiøxpä coo ja'a naax quia'a jaty cøøcä. Coo quiøxxøøjøøyy, mäniä tiøøch, coo ja'a tyicts hänajty quia'a møødä. Ja'a cáhwäbä haptiooty, ja mujx jaduhñ. Ja yee'c jaduhñ, pero cabä ñä'a tøømbejty. Hix, ja'a hapy je'e xam. Y ja'a cáhwäbä maa ja'a hoñaaxän, may jaduhñ tiøømhaajty, näje'e mägo'xhaam, näje'e tägøøghii'xhaam, näje'e hii'xmajc-haam.

⁹ Pøñ jadhun wiinjuøøby, weenčh hädaa nmädia'agy xmiäbøjcä.

¹⁰ Mänitä Jesús ñámejtsä ja'a jiamiøødhajxy. Mänit miäyajtøøwä:

—Tii ja'a cu'ug coo myajñähixø'øby yajmäbaadyhaam.

¹¹ Mänitä Jesús yhadsooyy:

—Tøø mijts ja'a Dios xyajwiinjuø'øby nebiaty yhane'emy. Cab hijty yajwiinjuø'øby. Y yø'ø cu'ughajxy, cab hajxy hoy wyiinjuø'øwa'añ.

¹² Pøñ madiu'u jadhun møød, maas may jadhun mio'owa'añii. Pero pøñ weeñtiä møød, pøgáañäxäp je'e mäduhñtiä jim miøødä.

¹³ Páadyhøch jadhun nmädia'agy yajmäbaadyhaam. Jia wi'i yhee'py hajxy, cab hajxy tii yhixy. Jia wi'i miämädoowhijpy hajxy, cab hajxy wyiinjuø'øby, neby hajxy tii quia'a mädoybän.

¹⁴ 'Tøjiajp jadhun yø'øya'aguiøxphajxy nebiä Isaías jecy miänaañän, ja'a hijty jegyhajty wädijpä Diosquexy:

Mmädowaamby hajxy jadhun, cab hajxy mwiinjuø'øwa'añ;

Mheebaamby hajxy, cab hajxy mhixa'añ.

¹⁵ Tøø hädaa jäya'ayhajxy quiuhxexy;

nebiä cuhnatpän, nebiä wiimbi'idspän hajxy jadhun ñibiäda'agyii neby hajxy jadhun quia'a wiinjuø'øwät,

nébiøch nmädia'agy hajxy xquia'a mäbøjcät.

Cooch nmädia'agy hajxy xmiäbøjcät,

mänitøch hajxy jadhun nyajñähwá'adsät.

¹⁶ 'Jootcuyc jadhun mhity je'eguiøxpä coo hajxy jadhun mhixy, coo hajxy jadhun mmädoy.

¹⁷ Tøyhájthøch mijts nnäma'ay, may ja'a Diosquexyypähajxy, may ja'a hojiäya'aybähajxy jia hixaañ nej mijts cham mhixiän. Jia mädownaan hajxy nej mijts cham mmädoyän.

¹⁸ 'Huuc mädown hajxy waamb ja'a niippä cwieento miädia'agytiägø'øby.

¹⁹ Näje'e ja'a jäya'ayhajxy, coo ja'a Diosmädia'agy hajxy miädoy nebiä Dios yhane'emiän, cab hajxy wyiinjuø'øby. Mänitä Diosmädia'agy hajxy piøjcäxä ja'a möjcu'ugong. Jadhun mäwíinäts hajxy je'e nebiä tøømd quiahyyän tu'haam.

²⁰⁻²¹ Näje'e ja'a Diosmädia'agy hajxy hamuumdu'joot yhuuc ja mäböcy. Pero coo hajxy chaachtüñii ja'a Diosmädia'agyquiøxpä, mänit hajxy piädsøømnä. Jadhun mäwíinäts hajxy je'e nebiä tøømd quiahyyän tsaanähgøxp. Paquia jadhun tiø'øch je'eguiøxpä coo ja'a tyicts quia'a hity.

²² Näje'e ja'a Diosmädia'agy hajxy yhuuc ja mädooy. Pero jiaančh tehñ jiahmiejchp hajxy jadhun hädaa yaabä naaxwiimbä. Jiaančh tehñ yhadsojpy ja'a xädø'øñ hajxy, paadiä Diosmädia'agy hajxy hoy quia'a panøcxa'añ. Jadhun mäwíinäts hajxy je'e nebiä tøømd quiahyyän haptiooty.

²³ Näje'e ja'a Diosmädia'agy hajxy hoy wyiinjuø'øby. Hoy hajxy jadhun pianøcxy hamuumdu'joot. Jadhun mäwíinäts hajxy je'e nebiä tøømd quiahyyän hoñaxooty.

²⁴ Mänitä Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jaduhñhøch nyajmäbaada'añ nebiä tu'jäya'ay hodiøømd tøø wiøjjiäbän maa ja'a ñaaxän.

²⁵ Mänitcoods hajxy quiøxy maaho'cy. Mänitä miädsip ja'a cizañatøømd hoy wiøjy maa ja'a trigotøømd hänajty tøø wiøjjiän.

²⁶ Tu'cuhdujt ja'a trigo miujxy møødä cizaña. Coo ja'a trigo xiäbaajøøyy, mänitä cizaña quiahxø'pä.

²⁷ Mänitä jäya'ay hoy ñäma'ayijäm ja'a mioonsähajxy: “Wiindsøn, hodiøømd miich mwøj, túhmäts. Pämaadä yø'ø cizañahujts tøø chooñ.”

²⁸ Mänitä wyiindsøn miänaañ: “Nmädsiphøchäda'a jadhun tøø jiatcø'øby.” Mänitä mioonsä miänaañ: “Nej, nõcxäp højts yø'ø cizañahujts nwixiä.”

²⁹ Mänitá wyiindsón miánaañ: “Caj, cab hajxy mwíxät coo ja'a trigo jaduhñ ñä'ä mábädø'øgø'owät.

³⁰ Ween yhity; ween tu'cuhdujt yeegy. Coo ja'a trigopux jaduhñ yhabáadät, mänitøch nmoonsä nguexa'añ, weenä cizañahujts hajxy jayøjp quiøxy yajpädø'ogy. Ween hajxy quiøxy haxoch. Mänit hajxy jaduhñ ñó'ogät. Mänitá trigo hajxy ñähmádsät. Mänit hajxy piädá'agät tsehꝑjooty.”

³¹ Mänitá Jesús tiägøøguiumbä mädiaacpä yajmäbaadyhaam:

—Coo ja'a Dios yhane'emy, jadúhñhøch nyajmäbaada'añ nebiä mostazapajcän. Jim tul'jäya'ay tøø ñi'iby maa ja'a ñaaxän.

³² Tøyhajt jaduhñ coo ja'a mostazapajc jiaanç tehñ chayyá. Pero coo yeegy, cruty jaduhñ jiaty nebiä quepychaajän. Mäðøyyä ja'a muuxyhajxy nõcxy jim mia'ay yhaa-jiooty.

³³ Mänitá Jesús miánaangumbä yajmäbaadyhaam:

—Coo ja'a Dios yhane'emy, jadúhñhøch nyajmäbaada'añ nebiä to'oxiøjc ja'a tsaj-caagyochooy yajmädijø'øyäbän harinajooty tägøøgquixøhñdy. Mänit jaduhñ cøxiä yajmäyäbicø'øy.

³⁴ Jaduhñä Jesús ja'a cu'ug yajnähxøøyy haagä yajmäbaadyhaam.

³⁵ Jaduhñds tiøjiajty nebiä Diosquexypä jecy quiujahyyän:

Mäbaadyháamhøch nmädia'aga'añ.

Nyajcähxø'øgåambiøch mädyijaty hänäjty yu'uçhtium hijp mänaa hädaa yaabä naaxwiin yhawijy tiøø'xta'aguiän; cahnä quiähxø'øgyñä.

³⁶ Mänitá Jesús ja'a cu'ughajxy quiejxwiimbijty. Mänit tiøjtägøøyy. Mänit ja'a jiamiøødhajxy miejch. Mänitá Jesús hajxy ñämaayy:

—Højts capxwíjjäc ja'a cizañahujtsøxpä.

³⁷ Mänitá Jesús miánaañ:

—Høøch ja'a Diosquexypä, jaduhñ mäwínhøch høøch nebiä jaaya'ay hodiøømd tøø wiøjjiäbän.

³⁸ Y hädaa yaabä naaxwiin, jaduhñ mäwíináts hädaa nebiä naaxän maa ja'a hodiøømd wiøjjiän. Jaaya'ayhajxy hanéhmäbä ja'a Diósäm, jaduhñ mäwíináts hajxy je'e nebiä hodiøømdän. Jaaya'ayhajxy hanéhmäbä ja'a mõjcu'ugong, jaduhñ mäwíináts hajxy je'ebä nebiä cizañahujtsän.

³⁹ Y ja'a mõjcu'ugong, jaduhñ mäwíináts je'e nebiä jaaya'ay ja'a cizañahujts tøø wiøjjiäbän. Coo ja'a naaxwiimbä wyiimbida'añ, jaduhñ mäwíináts je'e nebiä trigo hajxy yajpädø'quiän mõødä cizañahujts. Y ja'a Dios ja'a mioonsähajxy tsajpootypä, jaduhñ mäwíináts hajxy je'e nebiä jaaya'ay ja'a trigo hajxy yajpädø'quiän.

⁴⁰ Coo ja'a naaxwiimbä jaduhñ wyiimbida'añ, jaduhñ mäwíináts je'e nebiä cizañahujts hajxy ño'quiän.

⁴¹ Mänitøch nmoonsä nhane'ema'añ coo hajxy ween nõcxy yajpädsømy pønjaty ja'a haxøøgwíinmahñdy mõød, mõødä pønjaty jaduhñ ja wi'i yhadugaamb ja'a Diosmädia'agy. Jim hajxy yajpädsøma'añii maach hänäjty nhane'ema'añän, høøch ja'a Diosquexypä.

⁴² Mänit hajxy hänäjty quiujuipø'øwa'añii jøønjooty. Jiiby hajxy jiø'øwa'añ xiuudsä'añ.

⁴³ Ja'a hajxy jaduhñ howiädijpä, jaanç tehñ miøj jaanç tehñ jiaanç hajxy yhida'añ maa ja'a Tieedyhajxy yhane'ema'añän. Pø jii mmädohndhajxy, mmädówäp hajxy jaduhñ.

⁴⁴ 'Coo ja'a Dios ja'a miäjaa yajcähxø'øga'añ, jaduhñ mäwíináts je'e nebiä jäya'ay maxiädø'øñ tiajø'øyäbän naaxpa'c. Coo pøn piáadät, mänitá tiajøødiägatsä'añ. Xoonda'agaamb jaduhñ. Mänit nõcxy tioogy tijaty jim miøød. Mänitá naax nõcxy jiuy maa ja'a maxiädø'øñ tøø piaadiän.

⁴⁵ 'Coo ja'a Dios ja'a miäjaa yajcähxø'øga'añ, jaduhñ mäwíináts je'e nebiä perlatsaaha-juubiän, ja'a jaanç tehñ yajxonbä. Ja'a perlatsaa, pic je'e mõød pioobä.

⁴⁶ Coo jaduhñ tu'ug piáadät jaanč tehñ chowbä, mänit nõcxy tioogy tijaty jim miøød. Mänitä perlatsaa nõcxy jiuy.

⁴⁷ 'Coo ja'a Dios ja'a miájaa yajcähxø'øga'añ, jaduhñ mäwínäts je'e nebiä hacxjohmñd hajxy piädá'aguiábän mejjiooty coo hacx hajxy hánajty jiooma'añ madiu'u.

⁴⁸ Coo ja'a hacxjohmñd jaduhñ yhúdsät, mänit hajxy yhøxwohmbädsømy. Mänitä hacx hajxy wyiimbiy ja'a hojiatypä. Mänit hajxy piäda'agy cachjooty. Mänitä ca'a hojiatypä hajxy ñøøga'adsø'øy.

⁴⁹ Jaduhñ mäwínäts jiada'añ coo ja'a naaxwiimbä wyiimbida'añ. Mänitä Dios ja'a mioonsähajxy wyiimbiwa'añ ja'a hojiäya'aybä.

⁵⁰ Pøñ ca'a hojiäya'ay, je'e hajxy cujuipø'øwáanäp jøønjooty. Jiiby hajxy jiø'øwa'añ xiuudsä'añ.

⁵¹ Mänitä Jesús miänaañ:

—Nej, mwiinjuøøby hajxy jaduhñä.

Mänit hajxy yhadsooy:

—Wiindsøñ, nwiinjuøøby højts jaduhñ.

⁵² Mänitä Jesús miänáangumbä:

—Coo ja'a ley-yajñähixøøbiähajxy tiägó'owät habøjpä nebiä Dios yhane'emiän, mejtstu'u ja'a mädia'agy jaduhñ jiada'añ møødä jecypiä møødä jemybiä. Jaduhñ mäwínäts je'e nebiä cudøjc madiu'u miøødhátiábän, møødä jemybiä møødä jecypiä.

⁵³ Coo ja'a Jesús jaduhñ miädiaacpädøoyy, mänit jim chohñ.

⁵⁴ Mänit miehch maa ja'a yhamdsoo cajptän. Mänit tiägøoyy yajñähixøøbiä tsajtøgooty. Mänitä jäya'ayhajxy jiaanč tehñ yagjuøøyy. Mänit hajxy miänaañ:

—Maa yø'ø wiinmahñdiäda'a tøø yhabøcy. Nebiä hoy-yagjuøøñäjatypä jaduhñ yajcähxø'øgy.

⁵⁵ José yhuung yø'ø, yø'ø tsejtspä pujxpä. María ja'a tiaj xiøhaty. Jue'e piuhya'ayhajxy xiøhaty, Jacobo, José, Simón, møødä Judas.

⁵⁶ Yaa hajxy chäna'ay maa højts ngajptän møødä piuhdo'oxyhajxy. Pämaadä yø'ø wiinmahñdy yø'øduhmbä tøø yajtsooñ.

⁵⁷ Mänitä Jesús miädia'agy quia'a mábøjcäxa. Mänitä Jesús miänaañ:

—Homiaajä ja'a Diosquexy wiädity, cumáayyap jaduhñ. Pero cab jim quiumayii maa yhamdsoo naax maa yhamdsoo tøjcän.

⁵⁸ Cabä Jesús ja'a hoy-yagjuøøñäjatypä jim jiaty yajcähxø'øcy, je'eguiøxpä coo ja'a miädia'agy hánajty quia'a mábøjcäxa.

14

¹ Mänitä Herodes miädoyhajty coo ja'a Jesús hánajty jim wiädity. Ja'a Herodes, jim hánajty je'e guobernadorhaty Galileanaaxooty.

² Mänitä Herodes ja'a mioonsä ñämaayy:

—Juan mäyajnäbejpäda'a je'e. Tøøda'a jiuypioøcy. Paadiä møcmájaa jiaanč tehñ miøødä.

³⁻⁴ Tøø ja'a Herodes ja'a Juan hánajty yajtsumyii. Tøø ja'a Juan hánajty quiø'øxoçhii cadenahaam. Paadiä Juan jaduhñ chuumä coo ja'a Herodes hánajty tøø ñäma'ay coo jaduhñ quia'a hoyyä coo ja'a Herodes ja'a piuhya'ay tio'oxiøjc miøødtsänáayyät. Jue'e ja'a Herodes piuhya'ay hánajty xiøhaty, Felipe. Jue'e ja'a Felipe tio'oxiøjc hánajty xiøhaty, Herodías.

⁵ Jaduhñä Herodes hánajty tiajy miay coo ja'a Juan hánajty yagho'oga'añ. Pero jaanč tehñ chähgøøby ja'a Herodes hánajty. Ja'a cu'ug hánajty chähgøøby je'eguiøxpä coo ja'a cu'ughajxy hánajty miäna'añ coogä Juan ja'a Diosmädia'agy hánajty yajwa'xy.

⁶ Mänitä Herodes jiumøjt jaduhñ piejtä. Jimä Herodes hánajty yhäña'ay møødä pawoy pawichpähajxy. Mänit hajxy tiägøoyy wiinhéjtsäbä. Ja'a Herodías yhuung jaduhñ tägøoyy hejtspä. Mänitä Herodes xioondaacy nägø'ø nädecypiä.

⁷ Mänitā Herodes ja'a quixy yajwiinwaanøøyy:

—Hotyijjā miich xmiäyujwá'anät, nmó'owäbøch miich jaduñ.

⁸ Mänitā quixy ja'a tiaj hoy yhawaañä. Mänitā tiaj jaduñ miänaañ coo ja'a Juan mäyajnäbejpä quiopc jaduñ miäyujwá'anät. Mänitā quixy ja'a Herodes hoy ñäma'ay:

—Høøchä Juan mäyajnäbejpä quiopc móoyäc texyjooty.

⁹⁻¹⁰ Mänitā Herodes jiootmadiägøøyy nägø'ø nädecypiä. Pero tøø hänäjty miäna'añ jäya'awyiinduum coog hänäjty yega'añ hotyijatiä. Mänit yhanehmy coo ja'a Juan quiopc yhøxpúxäxät jilby pujxtøgooty.

¹¹ Mänitā Juan quiopc yajnøcxäxä texyjooty maa ja'a Herodeshajxiän. Mänitā quixy miooyä. Mänitā quixy ja'a tiaj hoy mio'oy.

¹² Mänitā Juan ñäxäwa'ay yo'tuc hoy quiøøyyäxä; ja'a Juan miägu'ughajpähajxy jaduñ hoy quiø'øy. Mänitā Juan hajxy hoy yajnaaxtägø'øy. Mänitā Jesús hajxy hoy yhawaañä cooc ja'a Juan hänäjty tøø yagho'ogyii.

¹³ Coo ja'a Jesús jaduñ miädoyhajty cooc ja'a Juan tøø yagho'ogyii, mänit jim chohñ barcojooty nidiuhm. Mänit ñøcxy hanidiuhmduum. Mänitā cu'ughajxy miädoyhajty cooc ja'a Jesús hänäjty jim tøø choon. Mänitā Jesús hajxy piadu'ubøjcy cajptooty. Tegy-yo'oy hajxy pianøcxy. Jayøjp hajxy jim miehch maa ja'a Jesús hänäjty ñøcxiän. Mänitā Jesús piamejch høxhaam.

¹⁴ Coo ja'a Jesús piädsøømy barcojooty, mänitā majiäya'ay yhijxy. Mänit ñäxuu'ch. Mänitā pa'amjäya'ay yajmøcpøjcy.

¹⁵ Mänittsuu ja'a Jesús miägu'ughajpähajxy piamejch. Mänitā Jesús hajxy ñämaayy:

—Tøø chuujø'øy y cabä tøjc yaa. Quejxwiimbit yø'ø jäya'ayhajxy; weenä caagy hajxy nøcxy jiuy cajptooty.

¹⁶ Mänitā Jesús miänaañ:

—Caj, ween hajxy yhity. Mijts jaduñ ween myajcáyät.

¹⁷ Mänit hajxy yhadsooyy:

—Cab højts tii nmøødä. Jagooyyä højts ja'a tsajcaagy mägooxyä nmøødä chaadsä hacx metscä.

¹⁸ Mänitā Jesús miänaañ:

—Mäminxä yø'ø.

¹⁹ Mänitā Jesús ja'a majiäya'ay ñämaayy coo hajxy ween yhøxta'agy møøwyiing. Mänitā tsajcaagy quiøøchooyy møødä hacx. Mänit yuughee'py cøxp. Mänit miänaañ:

—Dioscujú'uyäp.

Mänitā Jesús ja'a tsajcaagy yhaguidøøyy. Mänitā miägu'ughajpähajxy miooyy. Mänit hajxy hoy yajwa'xy majiäya'ayhagujc.

²⁰ Nägøxiä hajxy jaduñ quiaaay cu'uxiä. Mänitā Jesús miägu'ughajpähajxy tsajcaagyh-aguijc hajxy yajpädø'cy majmejtscach.

²¹ Nämägooxmil hajxy quiaaay haagä ya'adiøjc. Hawiingä to'oxiøjc-hajxy møødä pigäna'c-hajxy.

²² Mänitā Jesús ja'a miägu'ughajpähajxy ñämaayy coo hajxy ween tiägø'øy barcojooty, coo hajxy ween ñøønajxø'øgy. Mänitā Jesús ja'a majiäya'ayhajxy quiejxwiimbijty.

²³ Mänitā Jesús ñøcxy nidiuhm tunñähgøxp Diospa'yaaxpä. Coo quioodsøøyy, jimnä Jesús hänäjty nidiuhm tunñähgøxp.

²⁴ Ja'a Jesús ja'a miägu'ughajpähajxy, mejyquuijc hajxy hänäjty tøø miech barcojooty. Møc hajxy hänäjty jløjcubojo'øy; paadiä nøø hänäjty miøjjädseembejty barcomøjc.

²⁵ Coodsnä Jesús tiu'ubøjcy tegy-yo'oy. Mejywyiing jaduñ yohy. Mänit miehch maa ja'a miägu'ughajpähajxiän.

²⁶ Coo ja'a Jesús hajxy yhijxy coo hänäjty yo'oy mejywyiing, mänit hajxy chähgøøbiøjcy. Mänit hajxy chähgø'øyaaxy:

—Haañämäda'a yø'ø.

²⁷ Mänitä Jesús miänaañ:

—Ca'a hajxy mdsähgø'oy. Høøch ja'a Jesús.

²⁸ Mänitä Pedro miänaañ:

—Wiindsón, pø miich ja'a Jesús, høøch huuc hanéhmäc cooch jim mnócaxät yo'oy maa miičhän.

²⁹ Mänitä Jesús yhadsooyy:

—Minxä.

Mänitä Pedro piädsøomy barcojooty. Mänit tiägøoyy yohbiä mejywyiing. Jim hänajty ñøcxa'añ maa ja'a Jesúsän.

³⁰ Coo jiäwøoyy coo møc piojy, mänit chähgøøbiøjcy. Mänit tiägøoyy quiimbä. Mänit yaaxy:

—Wiindsón, høøch yajpädsómäc.

³¹ Mänitä ja'a Jesús ja'a Pedro quiø'ø miajtsä. Mänit miänaañ:

—Caj miich mhuuc mäbøjpä. Tiich nmädia'agy coo xquia'a mäbøjcä.

³² Coo ja'a Jesús tiägøoyy barcojooty møødä Pedro, mänitä poj yuungøoyy.

³³ Mänitä Jesús hajxy wyiinjiçädaacy. Mänitä Jesús hajxy ñämaayy:

—Tøyhajt miich mDioshuungä.

³⁴ Mänit hajxy miehch mejyhawiimb maa hänajty xiøhatiän Genesaret.

³⁵ Coo ja'a Jesús yhøxcajpä ja'a jäya'ayhajxy jimä, mänitä mädia'agy tiägøoyy wädijpä coo ja'a Jesús jim tøø miehch Genesaret. Mänitä pa'amjäya'ayhajxy may yajmejtsä maa ja'a Jesúsän.

³⁶ Mänitä Jesús hajxy miänuu'xtaacy coo ja'a wyitpa'a hajxy ween ñähdoonä. Coo hajxy jaduhñ ñähdoon, mänit hajxy miøcpøjcy.

15

¹ Mänitä Jesús ñämejtsä ja'a fariseoshajxy näje'e møødä ley-yajnähixøøbiähajxy näje'e. Jerusalén hajxy hänajty choon. Mänitä Jesús hajxy miäyajtøoyy:

² —Yø'ø mmägu'ughajpähajxy, tii ja'a cuhdujt hajxy coo quia'a cudiuñ nebiä jecyjiäya'ayhajxy xyajmämähmøoyyäm. Ja'a jecyjiäya'ayhajxy, cø'øbujp hajxy hijty coo hajxy hänajty quiaya'añ. Jaduhñ hajxy hijty quiuhdujthaty. Pero yø'ø mmägu'ughajpähajxy, cab hajxy jaduhñ quiuhdujthaty.

³ Mänitä Jesús yhadsooyy:

—Pero mijts, cabä Dios miädia'agy hajxy myajtuunä. Ja'a mhamdsoo cuhdujt hajxy myajtuumby.

⁴ Ja'a Dios jaduhñ mänaañ coo ja'a ndaj ndeedy hajxy nwiingudsähgøoyyämät. Jaduhñ miänaambä, coo pøn ja'a tiaj ja'a tieedy haxøøg ñänómät, tsipcøxp jaduhñ yho'oga'añ.

⁵⁻⁶ Pero wiing mijts mmänaambä. Mijts jaduhñ mänaamb coo jaduhñ yhooyä coo ja'a mdaj ja'a mdeedy jaduhñ mnämä'awät: “Cábøchä xädø'øn nmøødä cooch mijts nbuhbédät. Tøøchä Dios ngøxy mo'oy mäduhñtiä mijts hijty nmo'owa'añ.” Coo hajxy jaduhñ mmäna'añ, cabä Diosmädia'agy hajxy hänajty myajtuñ. Ja'a mhamdsoo cuhdujt hajxy hänajty myajtuumby.

⁷ Jaduhñ mäwínäts mijts mnibiäda'agyii nebiä hoyhäna'cän. Pero cab hajxy mhoyhäna'cä. Mijtsøxpä ja'a Isaías Diosquexypä jecy miänaañ:

⁸ Nä'ä mänaamb hajxy jaduhñ cooc tyijy hajxy xwyiingudsähgø'oy hamuumdu'joot.

⁹ Xiøøbä hajxy jaduhñ ñä'ä mäna'añ;

cábøch nmädia'agy hajxy xñä'ä panøcxä.

Yhamdsoo wiinmahñdy hajxy yajwiinhixøøby,

nømä Dios miäna'añ.

¹⁰ Mänitä Jesús jäya'ay may miøjyaaxy. Mänit miänaañ:

—Huuc mädown hajxy, huuc wiinjuø'ow hajxy.

11 Mädyijaty tägøøby mhaawjooty, cab jaduñ xyajtägóyyät. Je'eduhñ xyajtägóyyäp mädyijaty pädsøømb mhaawjooty.

12 Mänitä Jesús ñämaayä ja'a miägu'ughajpähajxy:

—Cabä fariseoshajxy yhojiäwø'ø y coo jaduñ tøø mmäna'añ.

13 Mänitä Jesús yhadsooyy:

—Mädyijátyhøch nDeedy tsajpootypä tøø quia'a päda'agy, cab jaduñ yhojø'øwa'añ.

14 Weends yø'ø fariseoshajxy yhity. Jaduhñds hajxy wiädity nebiä Haagä wiindspän coo hajxy ñibiawoyii. Nämetsc hajxy nøcxy wiocca'ay.

15 Mänitä Pedro ja'a Jesús ñämaayy:

—Cab højts ndu'jootwiinjuø'ø y. Højts capxwíjjäc.

16 Mänitä Jesús miänaañ:

—Nej, ni mijts tii mga'a wiinjuø'øyñä.

17 Jaduhñds je'e, mädyijaty tägøøby mhaawjooty, jiiby jaduñ yhäda'agy mjoodooty. Mänitä jaduñ piädsøømdägach.

18 Pero mädyijaty jaduñ pädsøømb mhaawjooty, jiiby jaduñ chohñda'agy mgopcooty. Je'eduhñ xyajtägóyyäp.

19 Haagä jiibiä haxøøgwiinmahñdy chohñda'agy mgopcooty hoñä'ä mädyiibä. Je'eduhñ xøhajn ja'a haxøøgwiinmahñdy, ja'a jäya'ay-yagho'ogyiibä, møødä meeçhiibä, møød coo wiingjäya'ay tio'oxiøjc mmøødsänäayyät, møød coo mhøhñdá'agät, møød coo häna'c haxøøg mnänómät.

20 Je'eds jaduñ xyajtägóyyäp. Pero coo mgáyät jaguiø'øbuju, cab jaduñ ñejpiä; cab jaduñ xyajtägóyyät.

21 Mänitä Jesús jim chohñnä. Mänit ñøcxnä Canaán maa ja'a cajpt hänajty xiøhatiän Tiro møødä Sidón.

22 Mänitä Jesús tadjäya'ay tu'ug ñämejtsä. Jim hänajty chäna'ay Canaán. Mänitä Jesús ñämaayyä:

—Wiindsøn, miich ja'a David hijty mhaphajpy mdeedyhajpy. Høøch näxúu'tsäc. Tøøch ndo'oxyhuung miächii ja'a mõjcu'u. Hanaxiä jaduñ chaaçhtiuñii —nømj je'e yaaxy.

23 Cabä Jesús yhadsooyy. Mänitä ñämaayyä ja'a miägu'ughajpähajxy:

—Huuc quejxwiimbit yø'ø tadjäya'ay. Tsaächyáaxäp jaduñ xpiawädíjtäm.

24 Mänitä Jesús yhadsooyy:

—Yáayyøchä Dios tøø xquiexy maa hädaa judíoshajxiän. Cábøch wiingtuum tøø xquiexy.

25 Mänitä tadjäya'ay ja'a Jesús wyiinjiicädaacy. Mänit ñämaayy:

—Wiindsøn, tunä mayhajt. Høøch puhbéjtäc.

26 Mänitä Jesús yhadsooyy:

—Cab jaduñ yhoyyä coöchä huc tsajcaagy nmó'owät mädyii ja'a pigäna'c-hajxy quiayaamby.

Ja'a judíos Jesús yajmäbaat nebiä pigäna'cän. Ja'a ca'a judíoshajxy, je'eduhñ yajmäbaat nebiä hucän.

27 Mänitä tadjäya'ay miänaañ:

—Tøyhajt jaduñ. Pero quiaaby ja'a huc ja'a tsajcaagyhawaagy coo jim quia'ay maa ja'a wyiindsøn ja'a mieexän.

28 Mänitä Jesús miänaañ:

—Tøyhájthøch miich nmädia'agy xmiäbøjcä. Weenä mhuung miøcpøcy.

Mänitiä ja'a yhuung jiaanç møcpøjcy.

29 Mänitä Jesús jim chohñnä. Mänit ñøcxnä maa ja'a mejypia'ajän, ja'a xøhajpä Galilea. Mänit hoy piety tunñähgøxp. Mänit yhøxtaacy.

30 Mänitä jäya'ay may miejch maa ja'a Jesúsän, møødä pa'amjäya'ay, møødä cø'ømucypiä tecymiucypiä, møødä wiindspä, møødä huumbä. Mänitä Jesús yajmäbaadøøyy.

³¹ Mänitä jäya'ayhajxy yagjuøøyy coo hajxy jaduhñ yhihxy coo ja'a huumbähajxy tøø quiapxø'øgy, coo ja'a cø'ømucypiähajxy tøø yhojyø'øy, coo ja'a tecymiucypiähajxy tøø yo'oyø'øgy, coo ja'a wiindspähajxy tøø yhihxø'øgy. Mänit hajxy miänaañ coogä Dios miøjjä jiaančhä.

³² Mänitä Jesús miøjyaaxy ja'a miägu'ughajpä. Mänit miänaañ:

—Nnäxúu'chpøch yø'øya'ayhajxy. Tägøøgxø'øjoch hajxy tøø xpiawädity, y cabä caayyøøc hajxy miøødä. Cábøch hajxy nguejxwiimbida'añ jaguiay maa tiøjcän coo hajxy maa tiu'ugädäwät.

³³ Mänitä Jesús ja'a miägu'ughajpähajxy miänaañ:

—Pero maadsä cay hajxy jaduhñ nnä'a páatämät maa yø'øya'aguiøxphajxiän. Pactu-umäda'a yaa.

³⁴ Mänitä Jesús miäyajtøøyy ja'a miägu'ughajpähajxy:

—Naag tsajcaagy hajxy jii mmøødä.

Mänit hajxy yhadsooyy:

—Juxtujc, chaadsä hacxhuung mejtstägøøg.

³⁵ Mänitä Jesús miänaañ coo ja'a jäya'ayhajxy yhöxtá'agät naaxwiin.

³⁶ Mänitä tsajcaagy quiooñdsooyy møødä hacxhuung. Mänitä Dios ñämaayy:

—Dioscujú'uyäp.

Mänitä Jesús ja'a miägu'ughajpä ja'a tsajcaagy hajxy yajnäguidøøyy møødä hacxhuung. Mänit hajxy yajwa'xtägajch maa ja'a jäya'ayhajxiän.

³⁷ Mänit hajxy quiaayy cu'uxiä nägøxiä. Mänitä Jesús miägu'ughajpä ja'a tsajcaagyh-aguijc hajxy yajpädø'cy juxtujcach.

³⁸ Nämädaaxmil ja'a ya'adiøjc-hajxy quiaayy. Pagaayy ja'a to'oxiøjc-hajxypä møødä pigäna'c-hajxy. Pero cab jaduhñ yajnajuø'øy nänaagä hajxy hänajty je'ebä.

³⁹ Mänitä Jesús ja'a jäya'ayhajxy quiejxwiimbijty. Mänit tiägøøyy barcojooty. Mänit ñøcxy Magadánnaaxooty.

16

¹ Mänitä Jesús ñämejtsä ja'a fariseoshajxy näje'e møødä saduceoshajxy. Mänitä Jesús ñämaayy coo hijxtahñd ween yajcähxø'øgy jim tsajpootyp. Paady hajxy jaduhñ miänaañ coo ja'a Jesús hajxy hänajty jia wi'i jiøjcaxø'øwa'añ.

² Mänitä Jesús yhadsooyy:

—Coo hänajty chuujø'øy, mänit hajxy naxy mmäna'añ: “Wa'ads ja'a tsajt; wa'ads jaboom yhida'añ.”

³ Y coo hänajty jiojø'øy, mänit hajxy naxy mmäna'añ: “Tøø wyiimbøcy; tu'uwaamb.” Mnajuøøby hajxy jaduhñ nebiä tsajt yhida'añ, pero cabä hijxtahñd hajxy mwiinjuø'øy ja'ačh chaa nyajcäxø'piä. Ja'a jäya'ayhajxy jäda'ahatypä, haxøøg hajxy jiäya'ayhajnä; cabä Dios hajxy chocy.

⁴ Hijxtahñd hajxy jaduhñ yujwaamby, pero cab hajxy mio'owa'añii. Jagooyyä hajxy jaduhñ yaghixa'añii nebiä Jonás jecy jiajty yhabejtiän.

Mänitä Jesús jim jiäwaach. Mänit jim tiu'ubøjcy.

⁵ Mänitä Jesús hajxy miejyñajxy. Pero jiahdiägooyy ja'a quiaayyøøc hajxy, ja'a Jesús miägu'ughajpähajxy.

⁶ Mänitä Jesús miänaañ:

—Huuc mädown hajxy. Cabä fariseos chajcaagychooyhajxy yhooyä, ni ja'a saduceos chajcaagychooyhajxy quia'a hoyyä.

⁷ Mänitä miägu'ughajpähajxy tiägøøyy mädiaacpä:

—Paady jaduhñ miäna'añ, coo ja'a caayyøøc hajxy nga'a jahmiéjtsäm.

⁸ Najuøøby ja'a Jesús hänajty nebiaty hajxy hänajty miädia'agy. Mänit miänaañ:

—Tii hajxy jaduhñ coo mwili miädia'agy coo ja'a caayyøøc hajxy mga'a møødä. Cábøchä nmädia'agy hajxy jaduhñ xñä'ägädä mábøjcä.

⁹ Cáhnoch nmädia'agy hajxy xwyiinjuøøyyä. Cab hajxy jaduhñ mjahmiejtsnä nébiøch ja'a mägooxpä tsajcaagy nyajnäwa'xøøyyän ja'a nämägooxmilpä jäya'ay, y coo hajxy maguiach myajpädø'cy.

¹⁰ Ni jaduhñ hajxy mga'a jahmiejtsnä nébiøch ja'a juxtujpä tsajcaagy nyajnäwa'xøøyyän ja'a nämädaaxmilpä jäya'ay, y coo hajxy maguiach myajpädø'cumbä.

¹¹ Cooch jaduhñ nmänaañ coo ja'a fariseos chajcaagychooyhajxy quia'a hoyyä, coo ja'a saduceos chajcaagychooyhajxy quia'a hoyyä, cábøch tsajcaagychooy hänäjty ndehmñänøømy. Pero caj mijts mwiinjuøøyy.

¹² Mänit hajxy wyiinjuøøñä tii Jesús hänäjty miädiaacy. Ca'a chajcaagychooyä hänäjty tiehmñ miädiaacy, ja'a hajxy yajtsajcaagyquiojpiä. Jaduhñ hänäjty miädia'agy cooc ja'a fariseos miädia'agyhajxy quia'a hoyyä, cooc ja'a saduceos miädia'agyhajxy quia'a hoyyä.

¹³ Mänitä Jesúshajxy jimñ miejch maa ja'a cajpt hänäjty xiøhatiän Cesarea de Filipo. Mänitä Jesús miäyajtøøyy ja'a miägu'ughajpähajxy:

—Waambátyhøch ja'a cu'ughajxy xñänøømy pøñhøch høøch ja'a Diosquexypä.

¹⁴ Mänit hajxy yhadsooyy:

—Näje'e ja'a cu'ughajxy miäna'añ cooc miich mJuan mäyajnäbejpä; näje'e hajxy miänaambä cooc miich mElíasä; näje'e hajxy miänaambä cooc miich mJeremíasä, ja'a Diosmädia'agy jecy yajwá'xäbä; näje'e hajxy miänaambä cooc miich mDiosquexiä.

¹⁵ Mänitä Jesús miänaañ:

—Mijtsäts, wáambøch mijts xñänøømbä.

¹⁶ Mänitä Simón Pedro miänaañ:

—Miiçh je'e ja'a Cristo. Miiçh ja'a Dios tøø xquiexy, ja'a jimñ tsajpootypä. MDioshuung miiçh.

¹⁷ Mänitä Jesús yhadsooyy:

—Miiçh Simón, Jonás miiçh xyhuunghajp. Caj miiçh pøñ tøø xyhawaanä cooch nDioshuungä. Ja'a nDéedyhøch tøø xyhawaanä, ja'a jimñ tsajpootypä. Paady miiçh hoyhajt weenhajt mbaada'añ.

¹⁸ Miiçh jaduhñ nnämaaby coo miiçh mxøhata'añ Pedro; je'edu'unñ ñänøømby “tsaa.” Miiçhcøxpøch ja'a jäya'ay ja'a nmädia'agy hajxy may xmiäbøgaanä. Hoy hajxy cu jia ho'og, cab hajxy jaduhñ quiuhdägoyya'añ. Cøjxta'axiøø hajxy jimñ yhida'añ tsajpootyp.

¹⁹ Nmo'owáambiøch miiçh cuhdujt cooch miiçh nmädia'agy xyajwá'xät nébiøch ja'a jäya'ay ja'a nmädia'agy hajxy jaduhñ xmiäbøjcät. Dios jaduhñ xñajtsapxø'owáanäp nebiaty ja'a jäya'ayhajxy mhané'emät coo hajxy jaduhñ ween quiudiuñ, coo ja'a yhaxøøgwiinmahñdy hajxy ñajtshixø'owät.

²⁰ Mänitä Jesús ja'a miägu'ughajpä yhanehmy coo hajxy ween quia'a mädia'agy coo je'e Cristo.

²¹ Mänitxøø ja'a Jesús tiägøøyy hawáanäbä ja'a miägu'ughajpähajxy cooc hänäjty jimñ ñøcxa'añ Jerusalén, cooc hänäjty jimñ yajtsaächpøga'añijäm ja'a martuumädøjc møødä teedywiindsønñhajxy møødä ley-yajnahixøøbiädøjc. Mänit miänaambä cooc hänäjty yagho'oga'añii, pero cumáaxcäc hänäjty jiuypio'oga'añ.

²² Mänitä Pedro ja'a Jesús yajwooduuty. Mänitä Jesús wyiingugapxøøyyä:

—Wiindsønñ, cab jaduhñ yhooyä miäbaadä coo jaduhñ mjädät mhabétät.

²³ Mänitä Jesús wia'wiimbijty. Mänitä Pedro yhojjä:

—Jua'ads jimñ, møjcu'u. Náxyhøch miiçh xjiøjcapxø'øy. Jaduhñ miiçh mwiinmahñdy nebiä jäya'ayhajxy wyiinmahñdyhatiän. Caj miiçh mwiinmahñdy tiuhñä nebiä Dios wyiinmahñdiän.

²⁴ Mänitä Jesús ñämaayy ja'a miägu'ughajpä:

—Pónhøch nmädia'agy jaduhñ xpiadu'ubøgáañäp, weenä yhamdsoo cuhdujt ñajtshixø'ø; ween jaduhñ chaachpøjpät nébiøch ndsaaçhpøga'añän; weençh nmädia'agy xjiøjtägøøyyä.

²⁵ Pøn yhamdsoo wiinmahñdy ja wi'i yaghidaamb, cuhdägoyyaamb je'e. Pero coo pøn jaduhñ yho'ogät ja'a høøchcøxpä, nä'ägä hodium je'e nøcxy miähmø'owa'añ.

²⁶ Coo pøn jaduhñ quiuhdägóyyät, hoy jaduhñ yaa tøø jia mäyøøhaty hädaa yaabä naaxwiin, caj tii piaada'añ. Cabä jiugyhajt jaduhñ piaadaañä, homiäduhñtiä xädø'øñ cu jia yec.

²⁷⁻²⁸ Cädaactägatsáambøch yaa, høøch ja'a Diosquexypä. Ja'a Diosmóonsøch nmøødcäda'agaamb, ja'a hajxy jim tsajpootypä. Møødhøch nDeedy quiuhdujt jaduhñ ngädaactägatsa'añ. Mänitøch ja'a jugyhajt hänäjty njaac mo'owa'añ pønjaty hänäjty hoy tøø wiädity. Pero pønjaty hänäjty hoy tøø quia'a wädity, je'eds hajxy hänäjty yajcumädowáañäp. Mänitøch ndägø'owa'añ hanehmbä. Tøyhajt mijts nnäma'ay, coøch hänäjty ngädaactägatsa'añ, mänitøch hajxy näjë'eyyäm xyhixa'añ, ja'a hajxy yaa tänaabiä. Cajnä hajxy hänäjty yho'ogyñä.

17

¹ Cudädujxøø ja'a Jesús ja'a Pedro wioonøcxy tunñähgøxp møødä Jacobo møødä Jacobo yhuch Juan. Nämädaaxc hajxy jaduhñ ñøcxy møødä Jesús.

² Mänitä Jesús wiing jiajty maa ja'a Pedro wyiinduumhajxiän. Jaduhñdsä wyiin jiojpcøjx jiaty nebiä haambän. Mänitä wyit hobioob jiajty.

³ Mänitä Moisés hajxy ñäguehxtøø'xy møødä Elías. Mänitä Jesús hajxy tiägøøyy møødmädiaacpä. Coo hajxy yhiixä,

⁴ mänitä Pedro ja'a Jesús ñämaayy:

—Wiindsón, hoyøøyy jaduhñ coo højts yaa tøø nbéjtäm. Pø chojpiä mjoot jaduhñ, ween højts tøjquemyhuung tægøøg nhuuc hädiuñ ja'a mijtscøxpä cøjtu'ug; tu'ug miiçh mje'e, tu'ug ja'a Moisés jie'e, tu'ug ja'a Elías jie'e.

⁵ Mädiaaccujc ja'a Pedro hajxy ñähgädaacpejtä ja'a näma'a. Hajajp ja'a näma'a hänäjty. Mänit hajxy miädooyy quiapxy näma'ajooty:

—Høøch nHuung hädaa; njaançh tehñ chójpiøch. Xyagjootcugóøbiøch. Huuc mädoowä ja'a miädia'agy hajxy.

⁶ Coo ja'a Pedro hajxy jaduhñ miädooyy, mänit hajxy miägutscädaacy naaxwiin.

⁷ Mänit hajxy ñähdoonä ja'a Jesús. Mänit hajxy ñämaayyä:

—Pädø'øg hajxy; ca'a hajxy mdsähgø'ø.

⁸ Mänit hajxy piädø'cy. Mänit hajxy yhiixwädiyty. Cab hajxy pøn yhiixy; jagooyyä ja'a Jesús hajxy nidiuhñ yhiixy.

⁹ Mänit hajxy miänajcy tunñähgøxp. Mänitä Jesús ja'a Pedro ñämaayy:

—Cab hajxy pøn mhawáañät nebiaty hajxy jim tøø mhixy tunñähgøxp, høxtä cóonøch hänäjty tøø njujypiojtagach, høøch ja'a Diosquexypä.

¹⁰ Mänitä Jesús hajxy miäyajtøøyy:

—Yø'ø ley-yajñähixøøbiädøjc, tii hajxy coo miäna'añ cooc ja'a Elías miejtsø'oga'añ.

¹¹ Mänitä Jesús yhadsooyy:

—Tøyhajt jaduhñ coo ja'a Elías hijty miejtsø'oga'añ. Mänit hijty cøxiä wiinä yaghoyø'owa'añ.

¹² Pero mijts jaduhñ nnämaaby coo ja'a Elías tøø jia hoy; pero caj yhøxcajpä. Jaduhñ tiuunä nebiä jäya'ay jioothajxy chojquiän. Jaduhñçh hajxy xhaaçhtiunaambä, høøch ja'a Diosquexypä.

¹³ Mänitä Pedro hajxy wyiinjuøøñä coo ja'a Jesús ja'a Juan mäyajnäbejpä hänäjty miädia'agy.

14 Mänitā Jesúshajxy miejch maa ja'a jäya'ayhajxy miayyän. Mänitā tu'jäya'ay ja'a Jesús wyiinjiicädaacy. Mänitā Jesús ñämaayyā:

15 —Wiindsón, hөөч nhuung näxúu'tsác. Mayhooc jaduñ tөө quiäday pojmoöd. Hanaxiä jaduñ chaačhpöcy. Naxy jiöongädawø'öy; naxy ñөөgädawø'öy.

16 Yaač tөө nja yajmech maa miič mmägu'ughajpädöjcän, pero cab hajxy hijty yajñähwa'adsa'añ.

17 Mänitā Jesús miänaañ:

—Caj mijts mnä'ägä mäßöcy. Cáböch nmee'xtugaañnä coöch mijts njaac möödhídät. Mämín ja'a pigäna'c yaa.

18 Mänitā Jesús ja'a möjcu'u yhojy. Mänitiä ja'a pigäna'c ñähwaach.

19 Mänitā Jesús hawiing ñämaayyā ja'a miägu'ughajpädöjc.

—Tii höjts ja'a möjcu'u hijty coo nga'a yajpädsöma'añ.

20 Mänitā Jesús yhadsooyy:

—Caj mijts hijty mnä'ägädä mäßöcy. Tøyhajt mijts nnäma'ay, coo hajxy jaduñ mmäböät howieeñtiä, mänit hajxy hotyijä mjádät. Hөxtáhmäts yøø tun, coo yøø tun hajxy mnämä'awät: “Jua'ads jim, nøcx wiingtuum”; mänitäts yøø tun jiaanč jäwá'adsät. Hotyijä hajxy jaduñ mjádät coo hajxy tøyhajt mmäböät.

21 Mänitā möjcu'u hajxy myajpädsömat coo ja'a Dios hajxy mba'yá'axät, coo hajxy mhamajtschádät.

22 Jimä Jesús hajxy hänajty wiädity Galileanaaxooty. Mänitā Jesús miänaañ:

—Xyajcø'ödägø'öwáamböch ja'a cu'ughajxy, hөөч ja'a Diosquexypä.

23 Mänitöch hajxy xyagho'oga'añ. Pero cudägøøgxөөч njujypiöjtägatsa'añ.

Mänitā miägu'ughajpädöjc-hajxy jiootmadiägøøyy.

24 Mänitā Jesúshajxy miejch Capernaum. Mänitā Pedro miäyajtөөwä ja'a yajñähjuudiuutpädöjc:

—Nej, cabä mwiindsönhajxy ñähjuudiu'udy maa ja'a tsajtöjcänä.

25 Mänitā Pedro yhadsooyy:

—Ñähjuudiuutyp pues.

Mänitā Pedro tiöjtägøøyy maa ja'a Jesús hänajty yhäña'ayän. Mänitā Jesús ja'a Pedro ñämaayy:

—Simón, nej miič mmäna'añ, ja'a gobiernähajxy, pøn hajxy yajñähjuudiuutyp, yhamdsoo cu'ug, tögä wiingjäya'ay.

26 Mänitā Pedro yhadsooyy:

—Wiingjäya'ay hajxy yajñähjuudiuutyp.

Mänitā Jesús miänaañ:

—Entonces, cabä yhamdsoo cu'ug hajxy yajñähjuudiu'udy.

27 Pero cáböch pøn nyagjootma'ada'añ. Nөcx mejypia'a. Jiibiä xuhñdy mnөөwobø'öwät. Coö hacx mxúyät, mänit myajpädsömat. Jiibiä xädø'өн mbaada'añ hacxhaawjooty. Mädøyhadaamb jaduñ coo nämetsc nyajniñähjuudiuutämät. Mänitäts nøcxy mnähjuudiu'udy.

18

1 Mänitā Jesús miägu'ughajpädöjc-hajxy miejch maa ja'a Jesús wyiinduumän. Mänitā Jesús miäyajtөөwä:

—Pønjaty ja'a möjtuung mööd maa ja'a Dios yhane'emiän.

2 Mänitā Jesús ja'a pigäna'c tu'ug miöjyaaxy. Mänitā pigäna'c cujc piädaacä.

3-4 Mänitā Jesús miänaañ:

—Ja'a pigäna'c-hajxy, cabä möjtuung hajxy ñiyhöxtáayyächä. Pøn ja'a möjtuung yaa niyhöxtáayyächäp hädaa yaabä naaxwiin, cab jim tiägø'öwa'añ maa ja'a Dios wyiinduumän. Pero pøn ja'a möjtuung jaduñ ca'a höxtaaby, nebiä hädaa pigäna'c jaduñ quia'a

høxta'ayän, je'eds ja'a mõjtuung jaduhñ jim paadaamb maa ja'a Dios yhane'emiän. Tøyhajt jaduhñ.

⁵ Pøñ jaduhñ mägu'ugpögäp hädaa pigäna'c jaduhmbä maa ja'a hөөчhөxpän, jaduhñ mäwínhөch hөөчh xmiägu'ughaty.

⁶ 'Hädaa pigäna'c-hөch nmädia'agy hajxy xmiäbөjcäbä, coo hajxy pønjaty jìjcapxø'øwøjät, maas hoy hit jaduhñ coo ja'a mäjjcapxøøbiä paan yajyo'xodsø'øwøjät y coo miejjiäwipø'øwøjät hagamduum.

⁷ Hanaxiä hajxy yaa chaächpөcy ja'a hajxy hädaa yaabä naaxwiin tsänaabiä. Paady hajxy chaächpөcy coo ja'a jìjcapxøøbiä hajxy piaady. Pero Dios jaduhñ yajcumädowaamb ja'a mäjjcapxøøbiä.

⁸⁻⁹ 'Coo tii hoyhadsojnä mhíxät, cab jim mmөjhée'pnät ni mga'a nähdönät. Jaduhñ mnibiäda'agøjät nebiä wiindspän, nebiä cøøducpä. Pø caj, jim haxøøgtuum mga'awa'añ.

¹⁰ 'Ca'a yø'ø pigäna'c hajxy mxøøghaty. Cueendähájtäp hajxy jaduhñ. Ja'a Dios-moonsähajxy ja'a Dioswiinduumbä, je'edsä pigäna'c hajxy cueendähajp.

¹¹ Hөөчh mõjhajp. Yaäch tøø ngäda'agy hädaa yaabä naaxwiin nébiөch ja'a jäya'ayhajxy nyajnähwá'adsät coo hajxy hijty quiuhdägoyya'añ.

¹² 'Tsөc mädiäacäm. Jii tu'jäya'ay meeg mägo'x miøødä. Coo tu'ug tiägöyyät, mänit nөcxy yhøxta'ay. Jimä meeghajxy miähmø'øy tunhөjx, ja'a hajxy tøø quia'a tägöyyäbä.

¹³ Y coo piäadät, mänit xioonda'aga'añ nägø'ø nädecypiä. Tøyhajt jaduhñ.

¹⁴ Jaduhñ mäwíniäts je'e neby hөjts nDeedyhájtäm ja'a jim tsajpootypä; cabä jioot chocy coo ni mädyii pigäna'c quia'a cuhdägöyyät.

¹⁵ 'Coo ja'a mmäjøøn coo ja'a mmädøjc jaduhñ xmiägädiéeyät, mänit hamee'ch mmägäp mhané'emät. Coo jaduhñ xmiäbөjcät, mänit jaduhñ yhoyø'owät.

¹⁶ Pero coo jaduhñ xquia'a mäbөjcät, mänitä jäya'ay mmөjyá'axät mejtstägøøg neby hajxy jaduhñ tiestigohädät waambaty hajxy hänajty nmädia'agy.

¹⁷ Y coo ni jaduhñ quia'a mäbөgät, mänitäts ja'a hermanodøjc mhawáañät. Y coo ni jaduhñ quia'a mäbөgät, mänit hajxy mbuhwá'adsät.

¹⁸ 'Tøyhajt mijts nnäma'ay coo ja'a Diosmädia'agy hajxy yaa myajwá'xät hädaa yaabä naaxwiin nebiä jäya'ayhajxy jaduhñ hoy yhídat. Dios hajxy jaduhñ xyhané'emäp nebiaty hajxy nmädiä'agät.

¹⁹ 'Jaduhñ mijts nnämaabiä, coo hajxy nämetsc mnөcxät tu'ugmädia'agy hädaa yaabä naaxwiin, y coöch nDeedy hajxy homiädyiibä xmiäyujwáañät ja'a jim tsajpootypä, mänit jaduhñ xmió'owät.

²⁰ Coo hajxy nämetsc nädägøøg tiu'ugmügät maa ja'a hөөчhөxpän, jímhөch jaduhñ nhidaambä cujc.

²¹ Mänitä Pedro ja'a Jesús ñämaayy:

—Wiindsøn, coöch nmäjøøn coöch nmädøjc jaduhñ xmiägädiéeyät, naaghöoc-hөch jaduhñ nmämée'xät. Nej, mädyä jaduhñ coöch juxtujc-hooc nmämée'xädä.

²² Mänitä Jesús yhadsooyy:

—Cab jaduhñ miädyä. Cunaaghooc hänajty xmiägädieey, mänit mmämée'xät.

²³ 'Neby hajxy hoy mwiinjuø'owät nebiä Dios yhane'emiän. Tsөc yajmäbáatäm nebiä rey tu'ugän. Mänitä rey wyiinmahñdyhajty coo ja'a mioonsähajxy ñuu'xycäpxät.

²⁴ Naamñä hänajty ñuu'xycäpxtsoñ coo ja'a mioonsä tu'ug miejch. Mamyillón hänajty miänuu'xyhadyii.

²⁵ Pero cabä mioonsä xädø'øn hänajty miøødä neby jaduhñ yajnähwá'adsät. Mänitä rey miänaañ coo ween tioogøjät møødä yhuung møødä tio'oxy, møødä chөmy møødä tiajy, cөxiä nebiä ñuu'xy jaduhñ ñähwá'adsät.

²⁶ Mänitä rey wyiinjjicädaacä ja'a miöonsäm. Mänit miänuu'xtaacä: “Wiindsøn, mee'x. Cөxáambөch nyega'añ.”

²⁷ Mänitä wyiindsón hojioot ñä'a møødhajty. Mänit miänaañ coo tøø ñähwa'ačh, coo ween yhawa'adspädsømy.

²⁸ Coo ja'a moonsä jim chohñ, mänitiä miämoonsä tu'ug piaaty. Mejtsmil tägøøgmil hänajty miänuu'xyhadyi. Mänitä miämoonsä yo'mämadsøyy. Mänit miänaañ: “Høøch móoyyác mädúhñtiøch miich xmiänuu'xyhaty.”

²⁹ Mänit wyiinjjicädaacä. Mänit miänuu'xtaacä: “Mee'x, cøxáambøch nyega'añ.”

³⁰ Pero cabä craa hojioot ñä'a møødhajty. Mänitä mähdiøjc yajtsuumä. Jiiby jaduñ yhida'añ pujxtøgooty høxtä coonä quiøxy yégät.

³¹ Coo ja'a moonsädøjc-hajxy yhijsy, ja'a hajxy hänajty jaac jimhä, mänit hajxy jiootmabiøjcy. Mänitä wyiindsón hajxy hoy yhawaañä nebiaty hänajty tøø jiaty tøø yhabety.

³² Mänitä rey ja'a mioonsä miøjyaaxy, ja'a hänajty tøø ñähwá'ačhäbä. Mänit miänaañ: “Haxøøghäna'c miich. Tøøch miich cøxiä nyajñähwa'ačh mädúhñtiøch miich hijty xmiänuu'xyhaty. Páadyhöch miich tøø nyajñähwa'ačh, coöch miich tøø xmiänuu'xta'agy.

³³ Jaduñ miich mmämoonsä cu mnäxuu'ch nébiøch miich tøø nnäxuuchän.”

³⁴ Hoyhoy ja'a rey jaduñ yhawa'andaacy. Mänit miänaañ coo ja'a mioonsä quiumädówät høxtä coonä hänajty tøø yajñähwa'ačh mäduhñtiä hänajty miänuu'xyhadyi.

³⁵ Jaduñch nDeedy mijts xyajcumädowaambä, ja'a jim tsajpootypä, coo ja'a mmäjøøn coo ja'a mmädøjc hajxy mga'a mämée'xät hamuumdu'joot.

Mänitä Jesús jaduñ miädiaacmaayy.

19

¹ Mänitä Jesús jim chohñ Galilea. Mänit jim ñøcxy Judeanaaxooty. Jimäts je'e Jordánmøjnøøhawiimb maa ja'a xøø piädsømiän.

² Mänitä jäya'ayhajxy may piadu'ubøjcy. Mänit hajxy yajmøcpøjcä ja'a Jesúsäm.

³ Mänitä Jesús ñámejtsä ja'a fariseoshajxy näje'ebä. Mänitä Jesús hajxy miäyajtøoyy:

—Nej, hoy jaduñ coo jäya'ay ja'a tio'oxiøjc nä'ä nägoobä yhöxmádsädä.

Paady hajxy jaduñ miänaañ, jia jøjcapxø'øwaan ja'a Jesús hajxy jaduñ.

⁴ Mänitä Jesús yhadsooyy:

—Nej, cajnä ja'a Diosmädia'agy hajxy mgapxyñä. Jiiby jaduñ myiñ coo ja'a Dios jäya'ay jecy quiunuu'xy ya'adio'oxy.

⁵ Paadiä ya'adiøjc ja'a tiaj ja'a tieedy hajxy ñähguecnä, coo ja'a to'oxiøjc hajxy wyiingpøjnä. Nämetsc hajxy jaduñ ñimiøødtsäna'awáañänä.

⁶ Jaduñ hajxy yhidaañä nebiä tu'que'expän. Cab jaduñ yhooyä coo hajxy myajniyhøxmadsøjät pønjaty ja'a Dios jaduñ tøø quiunuu'xy coo hajxy ñimiøødtsäna'awøjät —nømä Jesús miänaañ.

⁷ Mänitä Jesús hajxy miäyajtøøgumbä:

—Tii ja'a Moisés jaduñ coo miänaañ coo ja'a to'oxiøjc yhöxmadsøjät cuhdujthaam.

⁸ Mänitä Jesús miänaañ:

—Coo ja'a mgopc-hajxy jaduñ wyi'i xiexä, paadiä Moisés hajxy jaduñ xquihdujt-mooyy coo ja'a mdo'oxiøjc hajxy mhøxmádsät. Pero cabä Dios jaduñ quiunuu'xy.

⁹ Cab jaduñ yhooyä coo wiingto'oxiøjc mwiingpøjtägátsät, pø nä'ä nägoobä ja'a mdo'oxiøjc hänajty tøø mhøxmach. Ni jaduñ quia'a hoyyä coo høxmachtio'oxiøjc mwiingpøgät.

¹⁰ Mänitä Jesús ñämaayyä ja'a miägu'ughajpähajxy:

—Maas hoyyäda'a jaduñ coo mga'a nä'ägädä pøgät.

¹¹ Mänitä Jesús miänaañ:

—Cab hajxy nägøxiä wyiinjuø'øwa'añ hädaaduhmbä. Jayooyyä hajxy jaduñ wyiinjuø'øwa'añ pønjaty ja'a Dios jaduñ tøø yajwiinjuø'øy.

12 Näje'e ja'a ya'adiøjc-hajxy ma'ad myiñguia'ay; paady hajxy quia'a ñibiøgyii. Näje'e hajxy yajtsucy. Coø ja'a Dios hajxy wyiingudsähgø'øwa'añ, paady hajxy näje'e quia'a nibiøgyii. Pøñ jaduñ mee'xtugaamb, ween miee'xtucy.

13 Mänitã pigãna'c-hajxy näje'e wiomejtsã maa ja'a Jesús wyiinduumãn nebiã Jesús ja'a hoyhajt jaduñ mió'owät. Pero cabã Jesús ja'a miãgu'ughajpãhajxy jaduñ yhojiãwøøyy. Mänit hajxy yhojjã, ja'a pigãna'c hajxy hãnajty tøø wioméchãbã.

14 Mänitã Jesús miãnaañ:

—Caj, wéenhøch ja'a pigãna'c-hajxy xñãmech. Ca'a hajxy mhojy. Coø ja'a Diosmädia'agy hajxy jaduñ mmãbøgãt nebiã pigãna'c-hajxy miãbøquiãn, mänitã Dios hajxy jaduñ xyhuunghãdãt.

15 Coø ja'a Jesús ja'a pigãna'c-hajxy hãnajty tøø mio'oy ja'a hoyhajt, mänit jim chohñ.

16 Mänitã Jesús jäya'ay tu'ug ñãmejtsã. Mänit miãyajtøøwã:

—Wiindsøn, tii hõybøch ndúnãp nébiøch njugyhãdat cøjxta'axiøø nebiã Dios jiugyhãtian.

17 Mänitã Jesús yhadsooyy:

—Tiiçh ja'a hoybã coø xmiãyajtøy. Caj pøñ jaduñ yhooyã; jagooyyã Dios jaduñ yhooyã. Pø chojpy ja'a mjoot jaduñ coø mjugyhãdat cøjxta'axiøø nebiã Dios jiugyhãtian, mgudiúnãp ja'a Diosmädia'agy jaduñ.

18 Mänitã craa miãnaañ:

—Mãdyiibã.

Mänitã Jesús yhadsooyy:

—Caj mjãya'ay-yaghó'ogãt; caj mméedsãt; caj pøñ mnãhøøñó'owät;

19 mwiingudsähgø'øwãp ja'a mdaj ja'a mdeedy; mmøødnijootpaadøøjãp ja'a mmãjøøñ ja'a mmãdøjc hamuumdu'joot.

20 Mänitã craa miãnaañ:

—Tøøch jaduñ ngøxy cudiuñ. Múutsnøch hãnajty coøch jaduñ ngudiuundsøhñ. Tijãtyhøch jaduñ nga'a cudiumyñã.

21 Mänitã Jesús miãnaañ:

—Pø mjaançh cudiunaamby hoy yajxón, nõcx yø'ø mje'e cøxy toog. Mänitã hãyoobãdøjc mnã'ã mó'owät cøxiã. Jaduñ jim mdãgø'owät tsajpootyp. Mänitøch jaduñ xpiadu'ubøgãt.

22 Coø ja'a craa jaduñ miãdooyy, mänit jaduñ jiootmãdiãgøøyy. Hix, mãyøø ja'a craa hãnajty. Mänit wyiimbijnã.

23 Mänitã Jesús ñãmaayy ja'a miãgu'ughajpãhajxy:

—Nã'ãgã tøyhajt mijts nnãma'ay, tsip jaduñ coø mãyøøhãna'c jim ñøcxãt tsajpootyp.

24 Tøyhajt jaduñ, cab jaduñ jiãty tsipã coø ja'a camello ñãxãt xuhñdyjutjooty. Maas tsip coø mãyøøhãna'c jim ñøcxãt tsajpootyp.

25 Coø hajxy jaduñ miãdooyy, mänit hajxy yagjuøøyy. Mänit hajxy ñimiãyajtøøwã:

—Pøñds jaduñ nãhwã'adsãp.

26 Mänit hajxy wyiinhee'ppejtã ja'a Jesúsãm. Mänitã Jesús miãnaañ:

—Cabã jäya'ayhajxy jaduñ ñã'ã jájpãt; pero hotyiijã ja'a Dios jaduñ jiãty.

27 Mänitã Pedro miãnaañ:

—Wiindsøn, tøø højts cøxiã nnãhgue'egy nhøxyo'oy. Tøø højts miich nbadu'ubøjnã. Tii højts jaduñ nbaadaamby.

28 Mänitã Jesús yhadsooyy:

—Nã'ãgã tøyhajt mijts nnãma'ay, coø ja'a xøøwiimbã naaxwiimbã cøxiã jieemdagãtsãt, mänitøch jim nõcxy nhøxta'aga'añ maa ja'a Dios wyiinduumãn, høøch ja'a Diosquexypã. Jimhøch nhane'ema'añ. Y mijts, jim hajxy jaduñ nõcxy mhøxta'agaambã pøñjãtyhøch yaa tøø xpiawãdity. Cødu'ug hãñaabiejt hajxy jim mbaada'añ, majmetspã. Jim mijts ja'a judiøshajxy mhane'ema'añ, ja'a majmetsc-hagajtpã.

29 Pønjaty ja'a tiøjc jaduhñ tøø ñähgue'egy ja'a høøchcøxpä, o ja'a piuhya'ay ja'a piuhdo'oxy, o ja'a tiaj ja'a tieedy, o ja'a yhuung ja'a tio'oxy, o ja'a ñaax, majiäduhñtiä piaattägatsa'añ, y cøjxta'axiøø jiugyhada'añ nebiä Dios jiugyhatian.

30 Ja'a hajxy møjtuungmøødpä jäda'ahaty, nämay ja'a tiuunng hajxy yajtägoyya'añ; y ja'a møjtuunng hajxy jäda'ahaty ca'a møødpä, nämay hajxy miøjtuunngpaada'añ.

20

1 'Maa ja'a Dios yhane'emiän, tsøc yajmäbáatäm nebiä cudsatypcamän tu'ug. Jopy jaduhñ tiu'ubøjcy moonsähøxtaabiä, pøn jaduhñ miøødtúnäp ja'a chaatypcamjooty.

2 Coø piaaty, mänit hajxy quiojyquiapxtiuunñ coø ja'a xiøøhajxy jiuyáañäxä mägooxmiljaty. Mänit hajxy quiejxä tuumbä maa ja'a tsaatypcamän.

3 Møjpetyxiøø ja'a cudsatypcamñ tiu'ubøjcumbä moonsähøxtaabiä. Mänitä jäya'ay jim yhjy maa halaplaazän. Nämetsc nädägøøghajxy hänajty jim tiäna'ay. Cabä tuunng hajxy hänajty miøødä.

4 Mänit hajxy ñämaayyá: “Jam hajxy cudún maaçh ndsatypcamän. Nä'ä mäðyyäjuøøbyhøch jaduhñ njuya'añ.” Mänit hajxy ñøcxy cuduumbä.

5 Mänitä cudsatypcamñ yhöoguiumbä moonsähøxtaabiä cujyxiøøho'ogy. Mänit yhöoguiumbä mänacyxiøø.

6 Møjmänacyxiøø tiu'ubøjcumbä. Jimä jäya'ay yhjy halaplaaz. Cabä tuunng hajxy hänajty miøødä. Mänit hajxy ñämaayyá: “Tii mijts coø myaajä. Tii hajxy yaa coø mwi'i xiunaxy.”

7 Mänit hajxy miänaañ: “Cab højts pøn waamb tøø xñäma'ay.” Mänit hajxy ñämaayyá: “Jam hajxy cudún maaçh nnaaxootiän. Nä'ä mäðyyäjuøøbyhøch jaduhñ njuya'añ.”

8 Coø chuujøøyy, mänitä cudsatypcamñ ja'a moonsäwiindsøn møjhjäpä ñämaayy: “Mmøjyá'axäp yø'ø moonsähajxy. Mänit hajxy mmäjúyät. Pønjaty høxhaam tøø jiaac tägø'øy cuduumbä, je'eds hajxy jawyiin mmäjuuchóonäp. Y pønjaty jawyiin tägøøyy cuduumbä, je'eds hajxy høxhaam mmäjúyäp.”

9 Mänit hajxy yajmäjuuyy. Jawyiin hajxy yajmäjuuyy ja'a hajxy hänajty tøø tiägø'øyäbä mänacyxiøø. Pedyii hajxy jaduhñ miooyyä mägooxmiljaty.

10 Ja'a hajxy hänajty tøø tiägø'øyäbä jayøjp, jaduhñ hajxy hänajty tiajy miay coø hajxy maas majiaty mio'owa'añii. Pero jaduhñ hajxy mióoyyäbä mägooxmiljaty.

11 Coø hajxy jaduhñ yajmäjuuyy tu'cuhtujtä, paadiä cudsatypcamñ hajxy miäjootma'ty.

12 Mänit hajxy miänaañ: “Yø'ø häna'c-hajxy høxhaam tøø jiaac tehñ tiägø'øyäbä, tu'hóráyyä hajxy jaduhñ ñä'ä tuunñ. Pero jaduhñ miich tøø mmäjuy neby højts tøø xmiäjúyyän. Cab jaduhñ yhooyä. Tøø højts tu'xøø nmee'xtucy. Jaanç tehñ yhan jaduhñ. Hamäjaa højts jaduhñ tøø nmänaxy.”

13 Mänitä cudsatypcamñ yhadsooyy: “Mägu'ughjäpä, cábøch miich tøø nyajniwyiin-doyii. Jaduhñ ngojyquiapxtiunäm coøch miich mägooxmil nmo'owa'añ.

14 Chaadsä mmäjuhñdy. Nøcxnä. Chójpiøch njoot jaduhñ coøch yø'ø craa nmó'owät nébiøch miich tøø nmo'oyän, yø'ø craa høxhaam tøø jiaac tägø'øyäbä.

15 Nej, cábøch ja'a cuhtujtä jaduhñ nmøødä coøch nxädø'øñ jaduhñ nyajwá'xät nébiøch njoot choquiän. Tøgä paady jaduhñ mjootma'adiä, coøch hojiot nmøødä.”

16 Pønjaty høxhaam tägøøby, copc-hadaamb je'e. Pønjaty jawyiin tägøøby, høxhaamø'owaamb je'ebä. Nämay hajxy jaduhñ tøø jia møjya'axyii, pero näweeñtiä hajxy tøø wyiimbii.

17 Mänitä Jesúshajxy jim chohñ, ñøcxy hajxy Jerusalén. Nämay ja'a cu'ughajxy hänajty ñøcxy. Tu'haamnøcxpä ja'a Jesúshajxy yohwia'xy møødä miägu'ughajpäðjc-hajxy nämajmetspä. Mänitä Jesús miänaañ:

18 —Yam hajxy nnócxäm Jerusalén. Høøch ja'a Diosquexypä, jímhøch häna'c xya-jcø'ødägø'øwa'añ maa ja'a teedywiindsøn hajxiän, maa ja'a ley-yajnahixøøbiädøjc-hajxiän. Jímhøch hajxy xyajyagho'oga'añii.

19 Mänitøch hajxy xyajcø'ødägø'øwa'añ maa ja'a jäya'ayhajxiän, ja'a jäguemnaaxtsohm̄bä. Mänitøch hajxy xwyiinwoona'añ. Mänitøch hajxy xwiobho'oga'añ. Mänitøch hajxy xmiøjpahbeda'añ cruzcøxp. Pero cudägøøgxøøch jaduhñ njujyipiøga'añ cooch hānajt̄y tøø nho'ogy.

20 Jaduhñä Jesús miägu'ughajpähajxy hānajt̄y xiøhaty metscä, Jacobo møødä Juan. Zebedeo ja'a tieedyhajxy hānajt̄y xiøhaty. Coø ja'a Jesús hajxy hānajt̄y ñøcxy Jerusalén, jimä Jacobo tiajhajxy hānajt̄y piawädijpā. Mänit̄ miehch maa ja'a Jesús wyiinduumän. Mänit̄ä Jesús wyiinjicādaacä, miäyujwaanä ja'a mayhajt̄.

21 Mänit̄ä Jesús miānaañ:

—Tii mayhājthøch jaduhñ ndúnäp.

Mänit̄ä tajjäya'ay yhadsooyy:

—Coo miich hānajt̄y tøø mgoody maa mhane'ema'añän, mänit̄ mhané'emät cooch nhuunghajxy yaghøxta'agøøjät hahooyhaampiä møødä hanajt̄yhaampiä maa miich mwiinduumän.

22 Mänit̄ä Jesús ja'a nämajmetspä ñāmaayy:

—Cab hajxy jaduhñ mnajuø'øy tii hajxy jaduhñ myujwaamby. Nej, hoy hajxy jaduhñ mjada'añ mhabeta'añä nébiøch jaduhñ njada'añ nhabeta'añän.

Mänit̄ hajxy yhadsooyy:

—Hoy pues.

23 Mänit̄ä Jesús miānaañ:

—Nä'ägä tøyhajt̄ jaduhñ coo mijts jaduhñ mjadaambä mhabetaambä nébiøch njada'añ nhabeta'añän. Pero cábøch cuhdujt̄ jaduhñ nmøødä coo hajxy jim̄ mhøxtá'agät maach nwiinduumän, hahooyhaampiä møødä hanajt̄yhaampiä. Pønját̄yhøch ja'a nDeedy jaduhñ tøø yajnahdijy, je'eds jaduhñ jim̄ høxta'agaamb maach nwiinduumän.

24 Coø ja'a Jesús miägu'ughajpädøjc-hajxy jiaac mädooyy ja'a jaac nämajcpä, mänit̄ä Jacobo hajxy miäjootma'ty møødä Juan.

25 Mänit̄ä Jesús jämiøød quiøxy møyjaaxy. Mänit̄ miānaañ:

—Mnajuøøby hajxy coø ja'a gobiernahajxy yhane'emy maa hajxy tiuñän. Ja'a hajxy møjtuungmøødpä, je'eds hajxy maas hanehm̄b.

26 Pero mijts, cab hajxy jaduhñ mhane'ema'añ. Pøn ja'a møjtuung jaduhñ tsojp maa mijtsän, tsipcøxp ja'a miägu'ughajpā piuhbédät.

27 Y jaanä jaduhñduhm̄bä, pøn jaduhñ yajcumayaamb maa mijtsän, tsipcøxp ja'a miägu'ughajpā yajtunøøjät.

28 Høøch ja'a Diosquexypä, puhbéjpøch jaduhñ tøø ngäda'agy. Cáboch jaduhñ nyajpuhbeda'añ. Páadyhøch yaa tøø ngäda'agy nébiøch ja'a jäya'ay jaduhñ may nnähho'tú'udät.

29 Tøø hajxy hānajt̄y quiøody maa ja'a cajpt̄ hānajt̄y xiøhatiän Jericó. Coø hajxy quiajpt̄padsøømy, mänit̄ä jäya'ayhajxy may piadu'ubøjcy.

30 Jimä wiindspähajxy hānajt̄y quiuhxna'ay tu'uba'a nämetscä. Coø ja'a Jesús hajxy miädooyy ñajxy, mänit̄ hajxy yaaxy:

—Wiindsøn, miich ja'a David jecy mhaphajt̄ mdeedyhajt̄. Højts näxúu'tsäc.

31 Mänit̄ hajxy yhojjä ja'a cú'ugäm, ween hajxy jaduhñ yhamoñ. Pero cab hajxy miabøjcy. Mänit̄ hajxy tehngajnä yáaxy:

—Wiindsøn, miich ja'a David jecy mhaphajt̄ mdeedyhajt̄. Højts näxúu'tsäc.

32 Mänit̄ä Jesús tiānaaxiøjpy. Mänit̄ä wiindspähajxy miøjyaaxy:

—Tii mayhajt̄ hajxy jaduhñ mdsojpy.

33 Mänit̄ hajxy yhadsooyy:

—Højts yaghjxó'cäc.

³⁴ Mänit hajxy ñaxuu'tsä. Mänit hajxy wyiingudsiiwøøyyä. Mänit hajxy jiaançh hijxø'cy. Mänitä Jesús hajxy piadu'ubøjcy.

21

¹ Mäwiingoomb ja'a Jesúshajxy hänajty jim Jerusalén. Mänit hajxy miehch maa ja'a cajpt hänajty xiøhatiän Betfagé, jim mädøyyä maa ja'a Olivostunän.

² Mänitä Jesús ja'a miägu'ughajpä nämetsc ñämaayy:

—Nøcx hajxy maa yøø cajpt ximhaampiän. Jimä burrataj hajxy mbaada'añ cuxoch møødá yhuung. Mmäguejø'øwäp hajxy jaduuh. Mänit hajxy yaa mwitsminät.

³ Coø hajxy pøn waamb xñámá'awät, jaduuh hajxy mnámá'awät coø ja'a wiindsøn jaduuh yajmaajiaty, coø hajxy mänit mmoodiägatsa'añ.

⁴ Jaduhnds tiøjiajty nebiä Diosmädia'agy-yajwa'xpä jecy quiujahyyän:

⁵ Jaduhndsä cu'ug hajxy mhawáanät ja'a hajxy jim tsánaabiä Jerusalén:

“Huuc heeb hajxy, xiidsä mgobiernä hajxy jaduuh xñägoody burrohuungnähgøxp møødá burrataj.

Cab jaduuh yajcumaya'añ.”

⁶⁻⁷ Mänitä burrataj hajxy hoy wyich møødá burrohuung, neby hajxy hänajty tøø ñäma'ayijän. Mänitä Jesús miägu'ughajpä wyithajxy yagjäbe'enøøyy ja'a burrohuung. Mänitä Jesús yajpejty.

⁸ Jimä cu'ughajxy hänajty may tøø yhamugø'øy. Mänitä wyit hajxy ye'py tu'haam maa ja'a Jesús hänajty ñaxø'øwa'añän. Ja'a jäya'ayhajxy näje'ebä, mänitä hujtshaa'x hajxy hoy ñäbuxy. Mänitä hujtshaa'x hajxy hoy ñajtswidso'øy tu'haam.

⁹ Mänit hajxy nägøxiä tiägøøyy hayaaxpä:

—¡Viva ja'a rey David yhap yhoc! Tsog hajxy wiingudsähgøøyyäm, ja'a Dios tøø quiéxiabä. Weenä Dios jim wyiingudsähgø'øyii tsajpootyp.

¹⁰ Mänitä Jesúshajxy quioo'ty Jerusalén. Coø hajxy tiägøøyy cajptooty, mänitä cu'ughajxy tiägøøyy haamhajpä. Mänit hajxy nämay ñimiäyajtøøwä:

—Pøn jäya'ay yø'øduh.

¹¹ Mänit hajxy yhadsooyy:

—Jesús yø'ø. Nazaret choøn Galileanaaxooty. Ja'a Diosmädia'agy jaduuh yajwa'xyp.

¹² Mänitä Jesús tiägøøyy Diostsajtøgooty. Jiibiä jäya'ayhajxy hänajty may jiuudioogy. Mänit hajxy yhøxquejxpädsøømä. Mänitä xädø'øñguiuwijtspädøjc ja'a mieexä hajxy yajtsitø'cäxä møødá palomatoopädøjc ja'a yhäñaabiejthajxy.

¹³ Mänitä Jesús miänaañ:

—Jaduuh myiñ cujaay maa ja'a Diosmädia'aguiän: “Jue'eçh ndøjc hajxy xwiáanät cooçh hajxy jaduuh jii by xpia'yá'axät.” Dios jaduuh mänaañ; pero mijts jaduuh mwa'añ meedsøhñdy podøhñdy.

¹⁴ Mänitä Jesús ñämejtsä ja'a wiindspä møødá tecymia'adpä. Jiiby hajxy hänajty ñä'ägä hity tsajtøgooty. Mänit hajxy yajmøcpøjcä yajmäbaadøøyyä.

¹⁵ Jiibiä pigäna'c-hajxy hänajty wyi'i ya'axy tsajtøgooty: “¡Viva ja'a rey David yhap yhoc!” Ja'a teedywiindsøn hajxy møødá ley-yajnähixøøbiädøjc-hajxy, coø hajxy yhijxy nebiä Jesús ja'a hoy-yagjuøøñäjatypä hänajty yajcähxø'øguiän, coø hajxy miädooyy coø pigäna'c-hajxy hänajty wyi'i ya'axy, mänit hajxy yhawa'andaacy.

¹⁶ Mänitä Jesús ñämaayyä:

—Nej, mmädooby jaduuh waambaty hajxy ya'axiä.

Mänitä Jesús yhadsooyy:

—Jexio'ch, nmädóobiøch jaduuh. Pero mijts, nej, cajnä hajxy jaduuh mmädoyhatyñä nebiä Diosmädia'agy myiñän cooc ja'a Dios jaduuh tøø miäna'añ coø ja'a pigäna'c-hajxy ween yhøy maa ja'a Diosøxpän.

17 Mänitá Jesúsajxy jim chohñ. Mänit hajxy ñøcxy maa ja'a cajpt hánajty xiøhatiän Betania. Jim hajxy jaduhñ chuunajxy.

18 Coø jio**øøyy**, mänitá Jesúsajxy wyiimbijty. Yáhó'cáp hajxy hánajty.

19 Tu'haamnøc**xpá** piids hajxy jaduhñ piaaty. Pero cabä tii tøm hánajty miøødä. Haagä haay hánajty je'e. Mänitá Jesús ja'a piids ñämaayy:

—Ni mänaa miich mga'a tømbejtägatsaanä.

Mänitiä ja'a piids jaduhñ jiaanç tømch.

20 Coø ja'a Jesús miägu'ughajpähajxy jaduhñ yhijxy, mänit hajxy jiaanç tehñ yagjuøøyy. Mänitá Jesús miäyajtøøwä:

—Neby yø'ø piids jaduhñ paquiä jiaanç tømch.

21 Mänitá Jesús yhadsooyy:

—Nä'ägä tøyhájthøch mijts nnäma'ay, coø hajxy hamuumdu'joot mjaanç mábøgät, hotyijä hajxy jaduhñ mjádät, nébiøch yø'ø piids jaduhñ tøm nyajtø'øchän. Coø yø'ø tun hajxy jaduhñ mnämä'awät: “Jua'ads jim, nøcx mejjiooty tægø'øw”, mänit jaduhñ jiaanç tægø'øwät.

22 Pø mjaanç mábøjp hajxy jaduhñ, coø ja'a Dios hajxy tijaty mmäyujwá'anät, mänit hajxy jaduhñ xmió'owät.

23 Mänitá Jesús tiägøøyy tsajtøgooty. Mänit tiägøøyy yajnáhixøøbiä. Mänitá teedywi-indsøn**hajxy** miejch møødä martuumädøjc. Mänitá Jesús miäyajtøøwä:

—Pøn miich cuhdujt tøm xmió'oy coø miich yaa mhané'emät.

24 Mänitá Jesús yhadsooyy:

—Cooch mijts ja'a tøyhajt xmió'owät nébiøch mijts chamñ nmäyajtøwa'añän, mänitøch mijts ja'a tøyhajt nmoodiägätsät pøn**høch** ja'a cuhdujt tøm xmió'oy cooch yaa nhané'emät.

25 Pønä Juan jaduhñ quejx mäyajnäbejpä, Dios tøgä jäya'ayä.

Cab hajxy ñä'a hadsooyy. Mänit hajxy tiägøøyy yajcapxiøøbiä:

—Coo hajxy nhadsóowämät coø ja'a Dios quiejxy, mänit hajxy xmiäyajtøwáañäm tii ja'a Juan miädia'agy hajxy coø tøm nga'a mábøjcäm.

26 Ni jaduhñ quia'a hoyyä coø hajxy nhadsóowämät coø jäya'ay jaduhñ quiejxy; cabä cu'ughajxy jaduhñ yhojiäwó'øwät. Jaduhñ hajxy miäna'añ cooc ja'a Juan Dyiosquexiä.

27 Mänitá Jesús ñämaayyä:

—Cab højts nnajuø'øy.

Mänitá Jesús miänaañ:

—Cábøch nnägäpaxambä pøn**høch** ja'a cuhdujt tøm xmió'oy cooch yaa nhané'emät.

28 Mänitá Jesús miänaañ:

—Chaads mijts cuento tu'ug nyajmøødmädia'aga'añ. Jii jäya'ay hijty tu'ug; metscä yhuung hánajty. Mänitá yhuung ñämaayy tu'ug: “Huung, nøcx jim huuc tun maach ndsaatypcamän.”

29 Mänitá yhuung yhadsooyy: “Cábøch nnøcxa'añ.” Pero mänit wyiinmahñdyhajty jadähooc coø jaduhñ ñøcxáangumbä.

30 Mänitá yhuung tu'ug ñämáaguumbä coø ñøcxät tuumbä. Mänit yhadsooyy coø ñøcxa'añ. Pero cab jaduhñ ñä'a nøcxy.

31 Mädyii craa jaduhñ cudiuun nebiä tieedy hánajty tøm miäna'añ.

Mänit hajxy yhadsooyy:

—Ja'a jawyiinhajpä.

Mänitá Jesús miänaañ:

—Nä'ägä tøyhájthøch mijts nnäma'ay, jawyiin ja'a yajnáhjuudiuutpäðøjc-hajxy tiägø'øwa'añ Dioswiinduum møødä cuhñdo'oxiøjc-hajxy. Pero mijts, høxhaam mijts mdägø'øwa'añ.

32 Ja'a Juan mäyajnäbejpä, hoy mijts xjia yajnáhixøøyy neby hajxy hoy mwädítät, cab hajxy mmábøjcy. Ja'a yajnáhjuudiuutpäðøjc-hajxy møødä cuhñdo'oxiøjc-hajxy,

je'eds hajxy jaduhñ mǎbøjc. Hoy mijts mja hijxy coo hajxy miǎbøjcy, caj mijts mwiiin-mahñdyhajty jadǎhooc coo hajxy mmǎbøjpǎt.

33 'Chaads mijts cuento tu'ug nyajmøødmǎdia'agǎangumbǎ. Jii jǎya'ay hijty tu'ug naaxmøød. Mǎnitǎ tsaatypcam quiojy. Mǎnit curaa piǎdaacy. Mǎnitǎ tsaatyñøøxee'xøhñdy ñǎdajøøyy tsaajooty. Mǎnitǎ hǎña'awøhñdy cøxp quiojy.

'Mǎnitǎ wiingjǎya'ay ja'a tsaatypcam hajxy yaghajoodiujcǎ. Mǎnita cudsaatypcam jim choññ, ñøcxy jǎguem.

34 Coo ja'a tsaatyptuc yhabaaty, mǎnitǎ cudsaatypcam miejtstǎgajch. Mǎnitǎ mioonsǎ quiejxy coo ja'a tsaatyp hajxy yajmǎdsǎt mǎduhñtiǎ hajxy hǎnajty mio'owa'añii.

35 Mǎnitǎ mioonsǎhajxy miǎjtsǎxǎ; ja'a naaxhajoodiujpǎhajxy jaduhñ mǎmajts. Wojpǎ mǎhdiøjc tu'ug; yagho'cǎ tu'ugpǎ; ca'tsǎ tu'ugpǎ.

36 Mǎnitǎ cudsaatypcam ja'a mioonsǎ quiejxy maas may. Jaanǎ jaduhñ hajxy yhay-oowhíjxǎbǎ.

37 'Mǎnitǎ yhamdsoo huung jaduhñ quiejxy coo tyijy jaduhñ wyiingudsǎhgøøyyǎxǎt.

38 Pero coo yhuung jaduhñ yhíjxǎxǎ, mǎnitǎ naaxhajoodiujpǎhajxy ñiñǎmaayyǎ: "Coo yø'ø craa ja'a tieedy yhó'ogǎt, mǎnit yø'ø craa ja'a tsaatypcam miǎmǎhmø'øwa'añ. Tsøg hajxy yaghó'cǎm. Mǎnit højts ja'a tsaatypcam jaduhñ nmǎmǎhmøøyyǎmǎt."

39 Mǎnit hajxy jiaanç majch. Mǎnit hajxy yhøxjujipǎdsøømy. Mǎnit hajxy yagho'cy.

40 Hoorǎ, coo ja'a cudsaatypcam jaduhñ miǎdsǎt, nebiǎ naaxhajoodiujpǎhajxy tiuna'añii.

41 Mǎnit hajxy yhadsooyy:

—Yagho'tǎgǎtsǎanǎp hajxy jaduhñ je'eguiøxpǎ coo hajxy quia'awiindøyyǎ. Mǎnitǎ wiingjǎya'ay ja'a naax yaghajoodiuga'añ, pøñǎ tsaatyp jaduhñ yegaamb coo ja'a tsaatyptuc yhabǎadǎt.

42 Mǎnitǎ Jesús miǎnaañ:

—Nej, cajnǎ ja'a Diosmǎdia'agy hajxy mgapxyñǎ maa jaduhñ myiñǎn cujaayy: Ja'a tsa mǎdyii ja'a tøjcojpǎhajxy quia'a nǎ'ǎgǎ cumaayy, je'e nǎ'ǎgǎ tuunðsohn.

Dios jaduhñ pǎdaac, paady højts njaanç tehñ yagjuø'øy.

(Jesús jaduhñ hamdsoo niyajmǎbaatǎ nebiǎ tsaajǎn je'eguiøxpǎ coo hǎnajty quia'a tsooy quia'a mee'xyíjǎm ja'a cu'ug. Pero mo'owǎanǎp ja'a Jesús ja'a møjtuunñ ja'a hodiunñ hǎnajty.)

43 Paady, xpiøgǎanǎp ja'a mguhdujt hajxy coo hajxy jim mdǎgø'øwǎt Dioswiinduum. Wiingjǎyǎ'ayǎts jaduhñ tǎgø'øwaamb pøñjaty jaduhñ howiǎdijp.

44 Pøñ jaduhñ cá'awǎp yø'ø tsaanǎhgøxp, tǎgøyyǎp jaduhñ. Y coo pøñ jaduhñ ñǎhgahbedøøjǎt yø'ø tsǎajǎm, jaanǎ tǎgøyyǎp je'ebǎ.

45 Coo ja'a teedywiindsøñhajxy jaduhñ miǎdooyy møødǎ fariseodøjc-hajxy, mǎnit hajxy ñajuøøyy coo hajxy hǎnajty tøø miǎdia'agyii ja'a Jesúsǎm.

46 Mǎnitǎ teedywiindsøñ ja'a Jesús hajxy jia madsaañ; cab hajxy ñǎ'ǎ majch je'eguiøxpǎ coo ja'a cu'ug hajxy hǎnajty chǎhgø'øy; hiñ, jaduhñǎ cu'ughajxy hǎnajty miǎna'añ cooc ja'a Jesús ja'a Diosmǎdia'agy hǎnajty yajwa'xy.

22

1 Mǎnitǎ Jesús tiǎgøøguiumbǎ mǎdiaacpǎ. Mǎnit miǎnaañ:

2 —Maa ja'a Dios yhane'emiǎn, jaduhñ mǎwíñǎts je'e nebiǎ rey tu'ugǎn. Yajpøgaamby ja'a yhuung hǎnajty je'e. Yagjadǎanǎp ja'a cay ja'a hu'ug hǎnajty je'e.

3 Mǎnitǎ mioonsǎhajxy quiejxy woobǎ wijtspǎ; pero cabǎ jǎya'ayhajxy hǎnajty ñøcxa'añ mǎgaabiǎ.

4 Mänitā rey ja'a mioonsä quiéjxcumbä. Mänit miänaañ: “Nøcx hajxy näma'aw coo ja'a cay ja'a hu'ugy tøø quiøønä, coochä waj tøø nyajyagho'ogyii ja'a ni'xpä. Tøø ja'a cayiübä yhabaady; weends hajxy min quiaiy.”

5 Pero cabä jäya'ayhajxy ñä'ägädä mæbøjcy. Tu'jäya'ay ñøcxy maa ja'a quiamän; tu'jäya'ay ñøcxy too'pä.

6 Mänitā rey mioonsähajxy miájtsäxä ja'a jäya'ayhajxy hänäjty jaac jimbä. Mänit hajxy yaghäyoowhijxy; yagho'cä hajxy jaduhñ.

7 Mänitā rey yhawa'andaacy. Mänitā soldadohajxy quiejxä mäyagho'pä. Ja'a hajxy hänäjty tøø mioonsäyagho'oguiübä, je'e hajxy nøcxy yagho'ogyii; møødä quiajpthajxy nøcxy ñó'cäxä.

8 Mänitā rey ja'a mioonsähajxy ñämaayy: “Tøø jaduhñ yhabaady coochä nhuung jaduhñ piøga'añ. Pero ja'a jäya'ayhajxy tøø nja woy tøø nja wíchäbøch, cab hajxy hawiinmats myñät.

9 Nøcx hajxy wow wits pønjaty hajxy mbaatyp jim tu'haam.”

10 Mänitā mioonsähajxy hoy wioy wyich nägøxiä, pønjaty hajxy jaduhñ piaatyp, møødä hojiäya'ay møødä haxøøgjäya'ay. Mänitädsä tøjc jaduhñ yhujch.

11 Mänitā rey tiøjtägøøyy woybä wichpä hijxpä. Mänitā craa tu'ug yhijxä, cabä wyit hänäjty yhooyä.

12 Mänit ñämaayy: “Mägu'ughajpä, cab yø'ø mwit yaa hawiinmats mmädägó'øwät maa ja'a pøc jaduhñ jiadyiijän.” Pero cabä craa ñä'ä hadsoowiimbijty.

13 Mänitā rey ja'a mioonsä ñämaayy, ja'a hajxy hänäjty texycøøbiä: “Cø'øxots tecyxiots yø'ø craa. Mänit hajxy mhøxjuijpædsómät maa wyiingoodsän. Jim jaduhñ jiø'øwa'añ xiuudsä'añ.”

14 Nämay hajxy jia møjya'axa'añii, pero näweeñtiä hajxy jaduhñ wyiimbiwa'añii.

15 Mänitā fariseoshajxy jim chohñ. Mänit hajxy quiojyquiapxytiuuñ coo ja'a Jesús hajxy jøjcaxø'øwa'añ neby hajxy jaduhñ yajnähdsómät.

16 Mänitā miägu'ughajpähajxy quiejxy møødä Herodes miägu'ughajpähajxy. Mänitā Jesús hajxy ñämaayy:

—Wiindsøn, nnajuøøby højts coo miich ja'a tøyhajt myecy, coo ja'a Diostu'u mya-jnähixø'øy. Caj miich mmøjpdä'agy nebiaty ja'a cu'ughajxy miädia'agy; caj miich mmøjpdä'agy pøn tyijy møjcuhdujtmøød.

17 Højts capxwíjjäc. Nej, hahixøøby jaduhñ coo ja'a gobiernä xädø'øñ mmó'owädä, ja'a jim tsänaabiä Roma.

18 Najuøøbiä Jesús hänäjty coo hänäjty jia jøjcaxø'øwa'añii. Mänit miänaañ:

—Haxøøg mijts mwiiinmahñdyhajxy, hoy hajxy mja nibiäda'agyii nebiä hojiäya'ayän. Tiich hajxy coo xjia jøjcaxø'øwa'añ.

19 Tsøgä xädø'øñ tu'ug huuc híxäm.

Mänitā Jesús wa'xxiädø'øñ miooyyä.

20 Mänit miänaañ:

—Pøn yhädiuunnaxy hädaaduhñ; pøn xiøø hädaaduhñ.

21 Mänit hajxy yhadsooyy:

—Ja'a gobiernä.

Mänitā Jesús miänaañ:

—Mmó'owäbä gobiernä hajxy mädyii je'e jie'e; y mmó'owäbä Dios hajxy mädyii je'e jie'e.

22 Coo hajxy jaduhñ miädooyy, mänit hajxy yagjuøøyy. Mänit hajxy wyiimbijnä.

23 Mänitxøø ja'a saduceodøjc-hajxy näje'e miejch maa ja'a Jesúsän. Jaduhñ hajxy hänäjty miäna'añ cooc tyijy hajxy nga'a jujypijtgatsáañäm. Mänitā Jesús hajxy ñämaayy:

24 —Wiindsón, ja'a Moisés jecy mänaa, coo ja'a pøcy-ya'adiøjc yhó'ogät, ja'a cajpä yhuung, mänitätsä piuhya'ay ja'a yaamgto'oxy wyiingpøgät, nebiä yaamgto'oxy jaduhñ yhuungpáadät ja'a ya'adiøjcøxpä, ja'a tøø yhó'oguiäbä.

25-26 Bueno, näjuxtujc hajxy hijty tu'que'ex, haagä ya'adiøjc. Ja'a coobhuung, jayøjp jaduhñ piøjcy; mänit yho'cy. Cabä yhuung hänajty. Mänitätsä jiädsømy ja'a yaamgto'oxy wyiingpøjcy. Mänitäts je'e yhó'cumbä. Mänitätsä miädägøøgpä jaduhñ jiájçumbä. Jaduhñ hajxy nägøxiä jiajty møødä miäjuxtujcpä.

27 Mänitä to'oxiøjc yho'pä høxhaam.

28 Bueno, coo hajxy jaduhñ jiuypipiøgät, mädyii tehñ tiøybä hänajty to'oxiøjc-hadaamb, ja'a näjuxtujcpä puhya'ayhajxy, ja'a hajxy hänajty tøø jia pøquiäbä.

29 Mänitä Jesús yhadsooyy:

—Caj mijts ja'a tøyhajt mnä'ägädä møødä. Cabä Diosmädia'agy hajxy mhixiä ni ja'a Diosmäjaa.

30 Coo ja'a jäya'ayhajxy jiuypipiøga'añ, cab hajxy hänajty piøga'añ, ni cabä yhuung hajxy hänajty yajpøga'añ. Jaduhñ hajxy yhida'añ nebiä Diosmoonsähajxiän, ja'a hajxy jim tsajpootypä.

31 Hamdsoo ja'a Dios hajxy jaduhñ tøø xñäma'ay cujaayhaam coo ja'a jäya'ayhajxy jiuypipiøga'añ:

32 “Xwyiingudsähgøøbiøch ja'a Abraham møødä Isaac møødä Jacob.” Hoorä, wiingudsähgøøyap ja'a Dios ja'a jujcyjiäya'ayháxiäm. Cab jaduhñ wyiingudsähgøøyii ja'a ho'ogyjiäya'ayháxiäm.

33 Coo ja'a cu'ughajxy jaduhñ miädooyy nebiä Jesús hänajty yajnähixø'øy, mänit hajxy yagjuøoyy.

34 Coo ja'a fariseoshajxy jaduhñ miädoyhajty coo ja'a Jesús quia'a yajmäjädaacy ja'a saduceos, mänitä fariseoshajxy yhamugøøoyy.

35 Jimä fariseo hänajty tu'ug; ley-yajnähixøøby hänajty je'e. Ja'a Jesús hänajty jøjcapxø'øwáañäp. Mänitä Jesús miäyajtøøwä:

36 —Wiindsón, mädyii cuhdujt maas møy maa ja'a ley myiñän.

37 Mänitä Jesús yhadsooyy:

—“Wiingudsähgøøw ja'a nDioshájtäm hamuumdu'joot; mæbøjcä ja'a miädia'agy; mjahmiédsäp cøjxta'axiøø.”

38 Hädaa cuhdujt, jawyiin jaduhñ myiñ maa ja'a leyän y maas møy jaduhñ.

39 Jaaná jaduhñ ja'a miämetspä miänaambä: “Møødnijootpaadøø ja'a mmäjøøñ ja'a mmädøjc hamuumdu'joot.”

40 Hädaa cuhdujt metspä, ja'a ley yhøjx tiecy jaduhñ møødä cøxiä mäduhñtiä ja'a Diosmädia'agy-yajwa'xpähajxy tøø miädia'agy.

41 Jimnä ja'a fariseoshajxy hänajty tiäna'ayñä.

42 Mänitä Jesús miäyajtøøoyy:

—Waamb mijts mmäna'añ ja'a Cristocøxpä. Pøñ je'e yhaphajpy tieedyhajpy.

Mänit hajxy yhadsooyy:

—David yhap yhoc je'eduhñ.

43 Mänitä Jesús miänaañ:

—Pero ja'a Dioshëpíritucøxpä ja'a David ja'a Cristo ñämaayy: “Wiindsón.” Jaduhñä David miänaañ:

44 Tøøchä Dios ja'a nWiindsón xñämaayyä:

“Häña'aw yaa hahooyhaamby høxtä coonä ja'a mmädsip jaduhñ quia'a mäjädá'agät”, nõmä Dios miänaañ.

45 Bueno, pø tøø ja'a David ja'a Cristo ñäma'ay: “Wiindsón”, nébiäts jaduhñ yhaphat yhoc-hádät.

⁴⁶ Caj pøn waamb ñä'ägädä hadsooy. Y cabä Jesús waamb miäyajtówänä høxtä coonä hñajty yho'oga'añ.

23

¹ Mänitä Jesús ja'a cu'ug ñämaay møødä jiamiøødhajxy:

² —Ja'a ley-yajnahixøøbiädøjc møødä fariseoshajxy, cuhdujtmø'oy hajxy jaduhñ coo ja'a Moisés miädia'agy hajxy yajnahixøøyyä.

³ Mgudiúnäp hajxy jaduhñ waambaty hajxy xñäma'ay. Pero cab hajxy mbahixät nebiaty hajxy jiatcø'oy. Cabä yhamdsoo mädia'agy hajxy quiudiuñ.

⁴ Hanaxiä hajxy tsipjaty yajnahixø'oy; y mänaamb hajxy jaduhñ coo ja'a cu'ug tsipcøxp quiudiúnät. Pero cab hajxy hamdsoo quiudiuñ.

⁵ Jaanç tehñ yajcumayaamb hajxy maa ja'a cu'ugwiinduumän. Paadiä nocyquiu-jaaybä hajxy yajxonñ yajniwyiinnähgøpodsø'yii; paady hajxy yajniGUIø'øxodsø'yii. Paadiä wit hajxy piägø'oy ja'a høxyoñbä.

⁶ Coo hajxy maa miägay, hñä'awaamb hajxy hñajty maa ja'a meexäteecän. Y coo hajxy ñøcxy tsajtøgooty, hñä'awaamb hajxy hñajty maa ja'a hñäabiejt yajxonñbän.

⁷ Coo hajxy maa wiädity cajptooty, yajwiingudsähgø'øwaamb hajxy hñajty maa ja'a cu'ugän. Yajnäma'awaamb hajxy hñajty: “Wiindsøn.”

⁸ 'Pero mijts, cab hajxy mmäná'anät coo ja'a cu'ug hajxy xñämä'awät: “Wiindsøn.” Tu'ugä mWiindsønñhajxy jaduhñ; ja'a Cristo je'e. Jaduhñ hajxy mnijiäwø'øwøøjat nebiä tu'que'expän.

⁹ Cab hajxy pøn mnämä'awät: “Teedy”, hädaa yaabä naaxwiimbä. Tu'ugä mDeedyhajxy jim cøxp.

¹⁰ Cab hajxy mmäná'anät coo pøn xñämä'awät coo hajxy xquiopc-hädät. Tu'jaya'ay hajxy jaduhñ xyhané'emät; ja'a Cristo je'e.

¹¹ Pøn jaduhñ puhbejp ja'a jiamiøødhajxy, je'edsä møjtuung jaduhñ paadaamb maa mijtsän.

¹² Hix, pøn jaduhñ yajcumayaamb, cabä møjtuung jaduhñ piaada'añ. Pero pøn jaduhñ ca'a yajcumayaamb, je'edsä møjtuung jaduhñ paadaamb.

¹³ Mänitä ley-yajnahixøøbiädøjc-hajxy ñämaayyä møødä fariseoshajxy:

—Jaduhñ mijts mnibiäda'agyii nebiä hoyhäna'cän; pero cab hajxy mhoyhäna'cä. Haxøøg hajxy mjada'añ mhabeta'añ. Cab hajxy jim mdägø'øwa'añ maa ja'a Dioswiinduumän, y cab hajxy jaduhñ mmäna'añ coo wiinghäna'c jim tiägø'øwät, hoy hajxy hñajty hamdsoo jia mäna'añ coo hajxy jim tiägø'øwa'añ.

¹⁴ 'Xiøøbä ja'a Dios hajxy jejcy tøø mnä'ä pa'ya'axy. Mänitä yaamgto'oxy ja'a tiøjc hajxy mbøjcä. Paady hajxy hoyhoy mdsaaçhpøga'añ.

¹⁵ 'Wiinduhmyhagajpt jamiøød hajxy naxy mhøxta'ay pøn jaduhñ xmiøødtúnäp maa ja'a mguhdujthajxiän. Y coo hajxy hñajty tøø mbaady, mänitä haxøøgcuhdujt hajxy myajnahixø'oy. Maas haxøøg hajxy jaduhñ jiatcø'øwa'añ quejee mijts.

¹⁶ 'Cab hajxy hoy mnä'ägä yajnahixø'oy. Jaduhñ hajxy mmäna'añ; coo hajxy hñajty tii myajwiinwaanø'øwa'añ, coo ja'a tsajtøjc mgapxpáadät, cab tyijy jaduhñ ñejpiä coo hajxy mga'a cudiúnät neby hajxy hñajty tøø myajwiinwaanø'øyän. Pero jaduhñ hajxy mmänaambä, coo ja'a oro hajxy mgapxpáadät, ja'a jiiby tsajtøgootypä, tsipcøxp hajxy tyijy mgudiúnät.

¹⁷ Mguhmäñøøby hajxy jaduhñ; cab hajxy tii mwijnjuø'oy. Haa ca'a, maas tsoobaatp ja'a tsajtøjc quejee ja'a oro. Hix, Dios ja'a tsajtøjc jaduhñ cunuu'x. Ja'a oro, ñä'ä yajmägunuu'xøøyy je'eduhñ.

¹⁸ Jaanä jaduhñ hajxy mmänaambä, coo mgapxpáadät ja'a cuyoxøhñdy, cábac tyijy jaduhñ ñejpiä coo mga'a cudiúnät. Pero jaduhñ hajxy mmänaambä, coo hajxy mgapxpáadät tijaty tøø mguyoxø'oy, tsipcøxpäc tyijy jaduhñ mgudiúnät.

19 Nej, cab hajxy mnajuø'øyä coo ja'a cuyoxøhñdy miaas tsoobaady quejee tijaty hajxy mguyoxøøby.

20 Pøñ jaduñ capxpaatp ja'a cuyoxøhñdy, jaanä jaduñ quiapxpaatpä tijatycøxpä ja'a jäya'ayhajxy jiiby tøø quiuyoxø'øy.

21 Pøñ jaduñ capxpaatp ja'a tsajtøjcøxpa, jaanä Dios quiapxpaatpä, ja'a jiiby tsänaabiä tsajtøgooty.

22 Pøñ jaduñ capxpaatp ja'a tsajpootyp, jaanä Dios yhäñaabiejt quiapxpaatpä, møødä Dios ja'a jim häñaabiä.

23 'Mijts myajcopcøøby mädyii ca'a tsoobaatp coo hajxy hänajty tii mguyoxø'øwa'añ maa ja'a tsajtøjcän. Pero cabä Diosmädia'agy hajxy myajcopcø'øy coo jaduñ miäna'añ coo mhojiäya'ayhädät, coo hojioot mmøødhädät, coo ja'a Diosmädia'agy mmäbögät. Maas hoy jaduñ coo hajxy mgudiünät ca'xy pedyii.

24 Jaduñ mäwínäts hajxy myajwiinhixø'øy nebiä wiindspän; cab hajxy myajcopcø'øy mädyii tsoobaatp.

25-28 'Jaduñ mijts mja wi'i quiähxø'øga'añ nebiä hoyhäna'cän maa ja'a cu'ugwiinduumän. Pero haxøøgwiinmahñdy hajxy mmøød. Tsipcøxp ja'a mhaxøøgwiinmahñdy hajxy mnajtsnixø'øwät, jaduñ hajxy tøyhajt hoy mhädät.

29 'Naxy hajxy yajxón mguhmuuch maa ja'a Diosquexypähajxy jecy ñaaxtägøøyyän. Hojiäya'ayhajxy hijty.

30 Mänit hajxy mmäna'añ: “Coo højts häxøpy jecy tøø njugyhajtäm, cabä nhap ndeedy hajxy häxøpy tøø nbuhbéjtäm coo ja'a Diosquexypä hajxy yagho'cy.”

31 Cab jaduñ tiøyyä. Tøø ja'a mhap mdeedy hajxy häxøpy mbajatcøøbiä;

32 y jaduñ hajxy mjaançh pajatcø'øwaambä.

33 'Jaduñ mäwínäts hajxy mga'awiindøyyä nebiä tsahñdiän. Hoyhoy hajxy jaduñ jiiby mdsaaçhpøga'añ møjcu'uhaam.

34 Nguexáambiøch ja'a Diosquexypä maa mijtsän, møødä cuhwijypiä, møødä yajñähixøøbiä. Näje'e hajxy myagho'øga'añ; näje'e hajxy mmøjpahbeda'añ cruzcøxp; näje'e hajxy mwobho'øga'añ tsajtøgooty. Näje'e hajxy mbäbo'owa'añ cajpt-cajpt.

35 Mijts jaduñ mmøødhadaamby ja'a pojpa coo ja'a hojiäya'ayhajxy nägøxiä yagho'cä møødä Abel møødä Zacarías, ja'a Berequíás yhuung. Tsajtøgooty ja'a Zacarías yagho'cä; ja'a mhap ja'a mdeedyhajxy jaduñ jecy jatcøøyy.

36 Tehm tiøyhajt jaduñ, mijts ja'a pojpa mmøødhadaamby.

37 'Mijts Jerusalénpäjäya'ay, tøø ja'a Diosquexypä hajxy mguhga'açh. Jaduñ mäwínhöch mijts mayhooc tøø nja näwa'añ nebiä tseey ja'a yhuung ñähmuhxtägøøyyän; pero caj mijts myajnäwa'ana'añ.

38 Mobädájpøch mijts nnähgue'ega'añ,

39 y cáboch jaduñ xyhixaannä høxtä cóonøch hänajty ngädaactägatsa'añ. Mänit hajxy mmäna'ana'añ: “Tsøc yø'øya'ay wiingudsähgøøyyäm, yø'øya'ay Diosquexypä.”

24

1 Mänitä Jesúshajxy piädsøømy tsajtøgooty. Mänitä Jesús ñämaayyä ja'a miägu'ughajpähajxy:

—Huug hix yø'ø møj tsajtøjc.

2 Mänitä Jesús yhadsooyy:

—Tehm tiøyhajtøch mijts nnäma'ay, yø'ø møj tsajtøjcä, cøxaamb jaduñ piuma'añ; cøxaamb jaduñ quiuhdägøyya'añ.

3 Mänit hajxy ñøcxy maa ja'a Olivostunän. Mänitä Jesús yhöxtaacy naaxwiin. Mänitä Jesús hamee'ch ñämaayyä ja'a miägu'ughajpähajxy:

—Højts hawáanäc mänaa yø'ø tsajtøjc jaduñ piuma'añ. Mädyii hijxtahnd jaduñ cähxø'øgaamb coo hänajty mgädaactägatsa'añ, coo ja'a naaxwiimbä hänajty wyiimbida'añ.

⁴ Mänitá Jesús miänaañ:

—Ca'a hajxy myajwiinhøøñ.

⁵ Minaamb hajxy nämay. Jaduhñ hajxy ñibiäda'aga'añii nébiøch høøchän. Jaduhñ hajxy miäna'ana'añ: “Høøch je'e Cristo.” Nämayyá jäya'ay yajwiinhøøna'añ.

⁶ Mänit hajxy mmädoyhada'añ coo ja'a tsip jaduhñ tøø piädø'øgy. Pero cab hajxy mdsähgø'øwät. Tsipcøxpä häyohn jaduhñ jiada'añii. Pero cajnä hänäjty yhabaady coo ja'a naaxwiimbä hänäjty wyiimbida'añ.

⁷ Cajpthaam hajxy jaduhñ ñimiädsibø'øwa'añii. Naxaambä yuuba'am wiinduhmyhagajpt møødä hujx.

⁸ Pero nä'ä tsohndaacnä ja'a tsø'ty hänäjty jaduhñ.

⁹ Mänit mijts myaghäyoowhixa'añ myajyagho'oga'añ. Mänit mijts myajmähanhada'añ maa ja'a høøhcøxpän wiinduhmyhagajpt.

¹⁰ Mänitá Dios hajxy ñajtshixø'øwa'añ nämay. Mänit hajxy ñimiähanhada'añii hamiñ haxøpy møødä hajxy tijaty yajniñähdsøma'añii.

¹¹ Wäditaambä høhndaacpähajxy hänäjty may. Mäna'anaamb hajxy hänäjty cooc tyijy hajxy wiädity ja'a Dioscøxpä. Nämayyá cu'ughajxy yajwiinhøøna'añ.

¹² Cab hajxy ñimiägu'ughadäänänä je'eguiøxpä coo ja'a haxøøgpä hänäjty jiaançh tehñ wiädity.

¹³ Pero pønjaty jaduhñ ca'a jøjwa'adsaamb, je'eds ja'a hoybä paadaamb.

¹⁴ Wiinduhmyhagajpt ja'a mädia'agy wiädita'añ mädyii jaduhñ mänaamb coo ja'a Dios ja'a miäjaa yajcähxø'øga'añ. Cøxaambä cu'ughajxy miädoyhada'añ; mänitäs ja'a naaxwiimbä wyiimbida'añ.

¹⁵ '(Pøn hädaa nocy capxp, ween jaduhñ wyiinjuø'øy.) Ja'a Daniel, Dios jaduhñ jecy quejx. Je'eduhñ cujahy coo ja'a haxøøgpä miedsa'añ maa ja'a Diostøjcän, y coo mänit jaduhñ yajma'ada'añ. Coo ja'a haxøøgpä hajxy mhíxät,

¹⁶ mänit hajxy päyø'øguiä mnócxät maa ja'a tunän, mijts yaa tsänaabiä Judeanaaxooty.

¹⁷ Y ja'a hajxy hijpä tøjwiing, jaduhyä hajxy piäyø'tówät, cab hajxy jaduhñ tii ya-jpädsómät tøgooty.

¹⁸ Y ja'a hajxy jim hijpä camjooty, jaduhyä hajxy piäyø'tóøbät, cab hajxy jaduhñ nøcxy tii wyich maa ja'a tiøjcän.

¹⁹ Pobre ja'a to'oxiøjc-hajxy hänäjty maaxhuungmøødpä, møød hajxy hänäjty huungya-tsi'tspä.

²⁰ Mmänuu'xtá'agäp ja'a Dios hajxy coo hajxy ween mga'a päyø'øgy coo hänäjty tiøøhcä, ni ja'a poo'xxiøjooty.

²¹ Porque jaançh tehñ miøc ja'a tsaachpä ñaxa'añ. Ni mänaa jaduhñ tøø quia'a jadyii nebiä jaduhñ jiada'añiijän. Y caj mänaa jiajtägatsa'añii jadähoocän.

²² Pero Dios jaduhñ tøø yajnähdiy coo ja'a tsaachpä jecy quia'a jadøøjät, je'eguiøxpä coo chocy ja'a tøøbä wyiimbíyyäbä. Coo häxøpy jaduhñ tøø quia'a yajnähdiy, caj pøn häxøpy cho'oga'añ.

²³ 'Coo mijts pøn xñámá'awät: “Huug hix, chaadsä Cristo”, o “Huug hix, xiids je'e”, cab hajxy mmäbøgät.

²⁴ Hix, minaambä wiinhøhmbähajxy; jaduhñ mäwiin hajxy ñibiäda'aga'añii nebiä Criston; jaduhñ mäwíinäs hajxy ñibiäda'aga'añii nebiä Diosquexypän. Yajcähxø'øgaamby hajxy ja'a hoy-yagjuøøñäjatypä nebiä cu'ug hajxy jaduhñ wyiinhøønät; høxtä ja wiinhøønäänäp hajxy je'ebä, ja'a Dios tøø wyiimbíyyäbä.

²⁵ Chaads mijts nnäma'ay jäguemiä.

²⁶ Coo pøn xñámá'awät: “Huug hix, jim wiädity pactuum”, cab hajxy jim mnócxät; o coo hajxy xñámá'awät: “Huug hix, jiiby je'e yu'uçhtium”, cab hajxy mmäbøgät.

²⁷ Cooch hänäjty nwiimbida'añ, høøch ja'a Diosquexypä, jaduhñ mäwiin quiähxø'øga'añ nebiä wädsucän. Wiinduhmyhagajpthøch ja'a jäya'ayhajxy xyhixa'añ.

²⁸ Tsipcøxp jaduhñ jiada'añii nébiøch chaa nmäna'añ.

²⁹ 'Coo ja'a tsaächpä hñajty tøø ñajxnä, mänitiä hñajty wyiingoodsø'øwa'añ; cabä po'o hñajty yhana'añ. Chaadsä madsa'a may quia'awa'añ; chaadsä tsajt chäyuyya'añ.

³⁰ Mänitøch ja'a nhijxtahñd jim quiähxø'øga'añ tsajpootyp cooçh hñajty nwiimbida'añ, høøch ja'a Diosquexypä. Mänitä jäya'ayhajxy wiinduhmyhagajpt jiø'øwa'añ xiuudsa'añ. Mänitøch hajxy xyhixa'añ cooçh hñajty ngäda'aga'añ jocjooty. Diosmäjaahámhøch jaduhñ ngäda'aga'añ hajájjöp.

³¹ Mänitøch ja'a nmoonsä tsajpootypä nhane'ema'añ coo ween hajxy møc xiu'uxy xuuxthaam. Mänitøch ja'a nwiimbiybähajxy xyajtu'ugmugaanä wiinduhmyhagajptpä.

³² 'Tsøg ja'a tsø'ty jaduhñ yajmäbáatäm nebiä piidsquepiän. Coø yaabiädsømy, mänit hajxy mnajuø'øy coo pioodtägøøñä.

³³ Jaduhñ mäwíinäts je'e, coo ja'a tsø'ty hajxy jaduhñ mhíxät, mänit hajxy mnajuø'øwät cooçh hñajty mobädajpä nwiimbida'añ.

³⁴ Tøyhájtäts mijts nnäma'ay, cooçh hñajty nwiimbida'añ, cajnä jäya'ayhajxy hñajty quiøxy ho'ogy, ja'a hajxy jäda'ahaty jugyhajpä.

³⁵ Ja'a tsajtwiing jaduhñ tägoyyaamb møødä naaxwiimbä. Tøjiadaamb jaduhñ nébiøch chamñ nmädia'aguian.

³⁶ 'Pero ni pøn jaduhñ quia'a najuø'øy mänaaxøø jiada'añii ni mäduhnajtä. Ni ja'a Diosmoonsä tsajpootypä hajxy quia'a najuø'øy. Ni høøch nga'a najuø'øy, høøch ja'a Dioshuung. Jagooyyä Dios jaduhñ ñajuø'øy, ja'a nDeedyhájtäm.

³⁷ 'Cooçh jaduhñ nwiimbida'añ, høøch ja'a Diosquexypä, jaduhñ mäwíinäts hñajty jiada'añii nebiä Noé jecy jiajtiän.

³⁸ Cajnä Dios ja'a nøøgomdägoy hñajty quiexyñä. Jimä jäya'ayhajxy hñajty quiaay yhu'ugy, piøcy yhu'ugy, høxtä coo ja'a Noé hñajty tøø tiägø'øy barcojooty.

³⁹ Ni mänit hajxy hñajty quia'a najuø'øyñä høxtä coonä ja'a nøøgomdägoy miejch. Mänit hajxy cøjx chømdu'ubøgyii. Jaduhñ mäwíinäts jiadáañäbä cooçh hñajty nwiimbida'añ, høøch ja'a Diosquexypä.

⁴⁰ Mänitxøø ja'a ya'adiøjc-hajxy hñajty nämetsc yhida'añ camjooty. Tu'ug hñajty yajnøcxa'añii; tu'ug hñajty yajmähmø'øwa'añii.

⁴¹ Metscä to'oxiøjc-hajxy hñajty jiøch. Tu'ug hñajty yajnøcxa'añii; tu'ug hñajty yajmähmø'øwa'añii.

⁴² 'Nähix hahixø'ø hajxy mhídät; cab hajxy mnajuø'øy mänaa ja'a mWiindsønñhajxy quiäda'aga'añ.

⁴³ Jaduhñ mäwíinäts ja'a cudøjc-hajxy, coo hajxy jaduhñ ñajuø'øwät mäduhnajtä ja'a mee'tspä miedsa'añ coods, jujcy hajxy jaduhñ yhídät, y cabä mee'tspä hajxy jaduhñ yajtøjtägø'øwät.

⁴⁴ Jaduhñ mäwíinäts mijtspä, nähix hahixø'ø hajxy mhídät. Cábøch mijts xñä'ägä najuø'øwät mänääjøch jaduhñ ngäda'aga'añ, høøch ja'a Diosquexypä.

⁴⁵ 'Ja'a moonsäwiindsøn, je'edsä miämoonsä yajcaaby maa ja'a wyiindsønñ tiøjcän. Hoy jaduhñ coo ja'a wyiindsønñ miädia'agy miäbøjcät, coo cuhwijy tiúnät.

⁴⁶ Coø ja'a wyiindsønñ miédsät, jootcuyc ja'a moonsä ñijiäwø'øwa'añii mädyii jaduhñ cudiuumb.

⁴⁷ Tøyhájtäts mijts nnäma'ay, jaduhñä moonsä piäda'aga'añii nebiä wyiindsønñän jim maa ja'a wyiindsønñ tiøjcän, mäduhñtiä ja'a wyiindsønñ hñajty miøødä.

⁴⁸ Pero ja'a moonsä ca'a hoybä, je'eds jaduhñ mäna'anaamb cooc tyijy ja'a wyiindsønñ quia'a tsoj medsa'añ.

⁴⁹ Mänitä miämoonsä tiägø'øwa'añ häyoowhijxpä. Mänitä mu'ugyjiäya'ay miøødtägø'øwa'añ caabiä huucpä.

⁵⁰ Cabä wyiindsønñ jaduhñ yhuuc jahmiedsaanä coo wyiimbida'añ. Coø ja'a wyiindsønñ jaduhñ jiaançh médsät,

⁵¹ mänitäts ja'a craa hoyhoy quiumädowa'añ mөөдä miäga'awiindöybä. Mänit hajxy jiö'owa'añ xiuudsa'añ.

25

¹ 'Coo ja'a Dios ja'a miäjaa jaduñ yajcähxø'øga'añ, jaduñ mäwínäts je'e nebiä pøc hu'ug tøø jiadyiijän. Jimä cäxyiidøjc ja'a jamiø'ød hajxy hänajty yhähixy. Nämajc hajxy hänajty. Candilcón hajxy hänajty yhähixy.

²⁻⁴ Nämägooxc-hajxy, cab hajxy hänajty nähix hähixø'ø tøø tiu'ubøcy. Cabä guiaastä hajxy hänajty nä'a tægø'øbä tøø jiuy. Pero ja'a jiamiøødhajxy ja'a jaac nämägooxpä, nähix hähixø'ø hajxy hänajty tøø tiu'ubøcy mäßøjpä. Nä'a tægø'øbä ja'a guiaastä hajxy hänajty tøø jiuy.

⁵ Coo ja'a jamiø'ød jaduñ quia'a tsoj mejch, mänitä cäxyiidøjc-hajxy cøjx miaaho'ogy.

⁶ Coo quiuptsuhmdäjøøyy, mänitä jäya'ay tu'ug yaaxy: “Xiidsä jamiø'ød miech; nøcx hajxy jøjcubaadø'ow.”

⁷ Mänitä cäxyiidøjc-hajxy cøjx piädø'øgy. Mänitä quiandilhajxy quiuhdøø'xøøyy.

⁸ Mänit hajxy miänaañ, ja'a hajxy hänajty nähix hähixø'ø tøø quia'a tu'ubøquiäbä: “Højtsä gaastä weñtiä móoyyäc; pi'idsaamb højtsä ngandil jaduñ.”

⁹ Mänit hajxy yhadsooyy, ja'a hajxy hänajty nähix hähixø'ø tøø tiu'ubøquiäbä: “Caj, ni jaduñ quia'a mädøyhada'añ maa ja'a højtscøxpän. Nøcx hajxy jaduñ ñijiúuyyaxä maa tioogyiijän.”

¹⁰ Mänit hajxy ñøcxy juubiä. Mänitä jamiø'ød jaduñ miejch. Ja'a cäxyiidøjc-hajxy gaastämøødpä, mänitä jamiø'ød hajxy miøødtägøøyy tøgooty. Mänitä tøjc hajxy yhägøøñä.

¹¹ Mänitä cäxyiidøjc-hajxy jia mejtsnä, ja'a gaastä hajxy hoy tøø jiúyyäbä. Mänitä hajxy jia cugapxøøyy: “Wiindsón, huuc yaghawa'ads hädaa tøjc.”

¹² Mänit hajxy ñämaayyä: “Cábøch mijts jaduñ nhixiä. Tøyhajt jaduñ.”

¹³ Coo ja'a Jesús jaduñ miädiaacpädøøyy, mänit miänaañ:

—Jaduñ hajxy mnibiäda'agøøjät nähix hähixø'ø. Caj mijts mnajuø'øyy mänájøch nwiimbida'añ, høøch ja'a Diosquexypä.

¹⁴ 'Coo ja'a Dios ja'a miäjaa jaduñ yajcähxø'øga'añ, jaduñ mäwínäts je'e nebiä jäya'ay tu'ugpä. Nøcxaamb hänajty je'e wiingnaaxooty. Mänitä mioonsähajxy miøjyaaxy. Mänitä xiädø'øn yajmämähmøøyy.

¹⁵ 'Tu'ug jaduñ yajmämähmøøyyä mägooxmillón. Paady may miooyyä coo hänajty jiaty xädø'øn yajmayø'ow. Tu'ug jaduñ yajmämähmøøyyä mejtsmillón. Tu'ug jaduñ yajmämähmøøyyä tu'millón. Mänitä wiindsón tiu'ubøjcy.

¹⁶ Jaaya'ay ja'a mägooxmillón wiingpøjcäbä, yajtagøøyy jaduñ niyhajjtäbä. Yajmayøøyy ja'a xädø'øn jaduñ; mägooxmillón jaduñ jiaac paaty.

¹⁷ Jaanä jaduñduhmbä, jaaya'ay ja'a mejtsmillón wiingpøjcäbä, mejtsmillón jaduñ jiaac paaty.

¹⁸ Pero jaaya'ay ja'a tu'millón wiingpøjcäbä, hoy ja'a jut jaduñ tiajy. Mänitä wyiindsón xiädø'øn hoy yú'tsänä jutjooty.

¹⁹ 'Cujecy ja'a wyiindsøn hajxy miejtstägajch. Mänit hajxy tiägøøyy cueentäyajpädsøømbä.

²⁰ Jayøjp jaaya'ay miejch ja'a mägooxmillón hänajty tøø wyiingpøquiäbä. Mänitä wyiindsón miooyy cøxiä mөөдä mägooxmillón tøø jiaac páadiäbä. Mänit miänaañ: “Wiindsón, mägooxmillónhöch jaduñ xmiooyy; chaads je'e mөөдä mägooxmillónhöch tøø njaac yajmayø'oyäbä.”

²¹ Mänitä wyiindsón miänaañ: “Hoy miich jaduñ tøø mgudiuñ. Wéñtiøch miich nyajmämähmøøyy. Maas máyhøch miich ja'a xädø'øn jaduñ njaac mo'owa'añ neby jaduñ mjaac yajmayø'owät. Tøjtägø'ow tøgooty, ween nxoondáacäm.”

22 Mänitā craa jiaac mejch ja'a mejtsmillón hānajtj t̄ø wyiingp̄oquiäbä. Mänit miānaañ: “Wiindsón, mejtsmillónhøch jaduhñ xmiiooyy; chaads je'e m̄øødä mejtsmillónhøch t̄ø njaac yajmayó'oyäbä.”

23 Mänitā wyiindsón miānaangumbä: “Hoy miich jaduhñ t̄ø mgudiuñ. Wéeñtiøch miich jaduhñ nyajmämähmøøyy. Maas máyhøch miich ja'a xädø'øñ jaduhñ njaac mo'owa'añ neby jaduhñ mjaac yajmayó'owät. T̄øjtägø'øw t̄øgooty, ween nxoondáacäm.”

24 Mänitā craa jiaac tehñ miejch ja'a tu'millón hānajtj t̄ø wyiingp̄oquiäbä. Mänit miānaañ: “Wiindsón, nnajuøøbiøch coo miich hojioot mga'a m̄øødä. Miich ja'a xädø'øñ jaduhñ mbaadaamby maa t̄ø mga'a tuñän.

25 Páadyhøch hijty ndsähgø'oy. Páadyhøch ja'a xädø'øñ hoy nyu'uçh naaxjutjooty. Huug hix, chaads je'e.”

26 Mänitā wyiindsón yhadsooyy: “Caj miich hoy mgudiuñ. Mjaançh tehñ ñuux miich. Mnajuøøby miich jaduhñ cooçh hojioot nga'a m̄øødä, cooçhä xädø'øñ nbaada'añ maach t̄ø nga'a tuñän.

27 Páadyhøch nxädø'øñ jaduhñ cu xpiadaacä bancojooty. Jiiby cu miayøøyy. Mänitøch nxädø'øñ cu xmiiooyy m̄øødä xädø'øñhuung.”

28 Mänitā hajxy ñāmaayyā, ja'a hajxy jim̄ tanaabiä: “P̄øjcä yø'ø craa xädø'øñ hajxy tu'millón; mo'ow yø'ø craa hajxy ja'a majcmillónm̄øødpä.

29 P̄øn may nä'ägä m̄øød, maas may jaduhñ mio'owa'añii. Hanaxiä jaduhñ miøødhada'añ. Pero p̄øn jaduhñ weeñtiä m̄øød, p̄øgáanäxäp je'e mäduhñtiä miøødä.

30 Yø'ø craa jaançh tehñ ñuuxpä, h̄øxwiijtspädsøm hajxy hagoostuum. Jiiby jaduhñ jiø'øwa'añ xiuudsa'añ.”

31 'Cooçh jaduhñ ngädá'agät hanehmbä, h̄øøch ja'a Diosquexypä, jim̄høch jaduhñ nhāna'awa'añ maa ja'a hoyhāñaabiejtän ja'a yajxonbä. Quipxyhøch nmoonsä tsajpootypähajxy xmiøødcäda'aga'añ nägøxiä.

32 Mänitøch ja'a jäya'ayhajxy xwyiingumedsø'owa'añ ja'a wiinduhmyhagajtpä. Mänitøch hajxy jaduhñ nyajwa'xa'añ nebiä meegän nebiä chiibän.

33 Nbäda'agäämbiøch näje'e maach nhahooguiø'øjän, näje'e maach nhanajtycø'øjän.

34 Ja'a hajxy hijpä hahooguiø'ø, mänitøch hajxy nnäma'awa'añ: “Min̄ hajxy yam; t̄øøch mijts nDeedy xwyiimbiy coo hajxy mhané'emät. Jequiän hajxy jaduhñ xwyiimbiyy, cajnä ja'a naaxwiin hānajtj yhädiuñ.

35 Mänáajøch hijty nyäho'ogyiijän, mänitøch hajxy xyajcaayy. Mänáajøch hijty ndødsø'oyiijän, mänitøch hajxy xyajnoøhuucy. Mänáajøch hijty nwäditiän nebiä jäguembäya'ayän, mänitøch hajxy xyaghamejtstaacy.

36 Mänáajøch wit hijty nga'a m̄øødän, mänitøch hajxy xñähxoxy. Mänáajøch hijty mba'amgo'na'ayän, ndsumyhāna'ayän, mänitøch hajxy hoy xquiuhixy.”

37 Ja'a hajxy hijpä hahooguiø'ø, mänit hajxy yhadsowa'añ: “Wiindsón, mänaa højts miich t̄ø nyajcay; mänaa højts miich t̄ø nyajnoøhu'ugy;

38 mänaa højts miich t̄ø nyaghamejtsta'agy; mänaa højts miich t̄ø nnähxoxy;

39 mänaa højts miich hoy t̄ø nguhixy.”

40 Mänitøch nhadsowa'añ: “T̄øyhajt mijts nnäma'ay, cooçh mijts ja'a njamiøødhajxy t̄ø xñäxuu'tsä, hoy hajxy quia'a ja m̄øjtøjcä, jaduhñ mäwínhøch t̄ø xñäxuu'tspä.”

41 'Mänitøch hajxy nnäma'awa'añ ja'a hajxy hanajtycø'øbä: “Jua'ads hajxy jim̄, mijts haxøøgtuum hijpä. Häda'ag hajxy jiiby maa ja'a jøøn mänaa quia'a pi'ichän. Paadiä jøøn t̄ø piäda'agyii, jiibiä m̄øjcu'uhajxy chaachpøga'añ.

42 Mänáajøch hijty nyäho'ogyiijän, cábøch hajxy xyajcaayy; mänáajøch hijty ndødsø'oyiijän, cábøch hajxy xyajnoøhuucy;

43 mänáajøch hijty nwäditiän nebiä jäguembäya'ayän, cábøch hajxy xyaghamejtstaacy; mänáajøch wit hijty nga'a m̄øødän, cábøch wit hajxy xmiiooyy; mänáajøch hijty nba'amgo'na'ayän, ndsumyhāna'ayän, cábøch hajxy hoy xquiuhixy.”

⁴⁴ Mänit hajxy miäna'ana'añ: “Wiindsón, mänaa højts miich nga'a puhbejty; mänaa højts miich nhijxy coo hänajty myäho'ogyii, coo hänajty mdødsø'oyii, coo hänajty mwädity nebiä jäguembäya'ayän, coo wit hänajty mga'a møødä, coo hänajty mba'amgo'na'ay, coo hänajty mdsumyhäña'ay.”

⁴⁵ Mänitøch nhadsowa'añ: “Tøyhajt mijts nnäma'ay, cooch mijts ja'a njamiøødhajxy tøø xquia'a näxuu'tsä, hoy hajxy quia'a ja møjtøjcä, jadhun mäwíinhøch tøø xquia'a näxuu'tspä.”

⁴⁶ Yø'øds hajxy jiiby häda'agaamb maa hajxy chaachpøga'añän cøjxta'axiøø. Pero pønjätyhøch tøø nwiimbiy, je'eds hajxy cøjxta'axiøø jugyhadaamb nebiä Dios jiuqyhätian.

26

¹ Coo ja'a Jesús jadhun miädiacpädøøyy, mänit ñämaayy ja'a jiamiøødhajxy:

² —Mnajuøøby hajxy jadhun coo ja'a pascuaxøø cumaaxc yhadsuujø'øwa'añ. Mänitøch hajxy xyajcø'ødägø'øwa'añ, høøch ja'a Diosquexypä. Mänitøch hajxy xmiøjpahbeda'añ cruzcøxp.

³ Mänitä teedywiindsønhaajxy yhamugøøyy møødä ley-yajnahixøøbiähajxy møødä jäya'ayhajxy martuumähajpä maa ja'a judiøshajxiän. Jim hajxy yhamugøøyy maa ja'a Caifás tiøjcän, ja'a hänajty møjcuhtuhtmøødpä maa ja'a teedyhajxiän.

⁴ Mänit hajxy quiojyquiapxyhajty nebiä Jesús hajxy miädsät, neby hajxy jadhun yaghó'ogät.

⁵ Mänit hajxy ñiñämaayyä:

—Cab jadhun yhooyä coo hajxy nmájtsämät ja'a xøøjooty coo ja'a cu'ughajxy ñä'ä haamhadät.

⁶ Jimä Jesús hänajty maa ja'a cajpt jadhun xiøhatiän Betania, maa ja'a Simón tiøgootiän, ja'a hänajty tøø ñähwa'açhíjábä ja'a haxøøgpa'am.

⁷ Jimä Jesús hänajty quiay, mänitä to'oxiøjc tu'ug miejch, perfumecón, ja'a jaanç tehñ chowbä. Mänitä Jesús ja'a perfume yajcuhta'xøøyyä.

⁸ Coo ja'a Jesús jiamiøødhajxy jadhun yhijxy, cab hajxy jadhun yhojiäwøøyy. Mänit hajxy miänaañ:

—Tii yø'ø perfume jadhun coo yaghäyooyy.

⁹ Coo jadhun cu tío'cy, mänitä häyoobäya'ay jadhun cu ñä'ägä puhbejty.

¹⁰ Coo ja'a Jesús jadhun miädooyy, mänit miänaañ:

—Ca'a yø'ø to'oxiøjc hajxy mhadsipy. Ca'a yhaxøøgpä jadhun tøø tiuñ maa ja'a høøhcøxpän.

¹¹ Ja'a häyoobädøjc, homiänaajä mijts jadhun xmiøødhida'añ; pero høøch, cáboch mijts jeicy nmøødhida'añ.

¹² Páadyhøch yø'ø to'oxiøjc perfume xyajcuhta'xøøyy, cooch mobädajpä nho'oga'añ.

¹³ Tøyhajtäts mijts nnäma'ay, homiaajä hädaa hoguiapxy hädaa homiädia'agy hajxy yaghawa'xø'øwät maa hädaa yaabä naaxwiinän, mänit hajxy jadhun miädia'aga'añ nébiøch yø'ø to'oxiøjc perfume tøø xyajcuhta'xø'øy. Jadhunds yø'ø to'oxiøjc jiahmiedsa'añii.

¹⁴⁻¹⁵ Ja'a Jesús jiamiøødhajxy ja'a nämajmetspä, tu'ug hänajty xiøhaty Judas Iscariote. Mänitä Judas ja'a teedywiindsønhaajxy hoy ñäma'ay:

—Mädühñtiøch hajxy xmiäjúyät cooch ja'a Jesús hajxy nyajcø'ødägø'øwät.

Mänitä Judas miooyyä hii'xmajc plataxädø'øñ.

¹⁶ Mänit wyiinmahñdyhajty nebiä Jesús yajcø'ødägø'øwät.

¹⁷ Ja'a tehñ xiøøhadsuujø'ø hajxy hänajty quihdujthaty coo ja'a tsajcaagy hajxy hänajty quiay ja'a ca'a tsoomiøødpä. Mänitä Jesús ja'a jiamiøød ñämejtsä. Mänit miäyajtøøwä:

—Maa hajxy ndsuugáayyämät ja'a pascuaxøøjooty.

18 Mänitä Jesús yhadsooy:

—Nøcx hajxy cajptooty maačh nmägu'ughajpä tiøjcän. Mänit hajxy mnämä'awät: “Nøm højts nWiindsøn miäna'añ cooc tøø yhabáatäxä, y cooc højts yaa ndsuugaya'añ ja'a pascuaxøøjooty maa miich mdøgootiän.”

19 Mänit hajxy jiaanč cudiuuñ neby hajxy ñämaayän. Mänitä jøø'xy hajxy yhädiuuñ.

20 Coo quioodsøøyy, jimä Jesúshajxy hänäjty quiay møødä nämajmetspä.

21 Mänitä Jesús miänaañ caaguiujc:

—Tøyhájtäts mijts nnäma'ay cooçh mijts mjamiøød tu'jäya'ay xyajcø'ødägø'øwa'añ maačh nmädsipän.

22 Mänit hajxy jiootmadiägøøyy. Mänit hajxy tiägøøyy yajtøøbä:

—Wiindsøn, nej, høøch je'ejä.

23 Mänitä Jesús yhadsooy:

—Ja'ačh tu'ugtey xmiøødcaamiujpä, jé'ečhäts jaduñ xyajcø'ødägø'øwaamb.

24 Jadúhñhöch njada'añ nhabeta'añ, høøch ja'a Diosqueypä, nebiä Diosmädia'agy jaduñ miäna'añän. Pero jaanč tehñ chaachpøgaamb jaaya'ay häyoobä ja'ačh tøø yxhawaanø'øyäbä. Mejor häxøpy tøø quia'a miñ tøø quia'a ca'ay.

25 Mänitä Judas miänaañ, ja'a hänäjty tøø yxhawaanø'øyäbä:

—Wiindsøn, nej, høøch je'ejä.

Mänitä Jesús yhadsooy:

—Miičh je'e.

26 Jimnä hajxy hänäjty quiayñä, mänitä Jesús tsajcaagy quionø'cy. Mänitä Dioscujú'uyäp yejcy. Mänitä tsajcaagy qyjwa'xy. Mänitä jiamiøød miooyy. Mänit miänaañ:

—Cay hajxy; jaduñ mäwiin hädaa tsajcaagy nébiøchä nni'x nébiøchä ngopcän.

27 Mänitä Jesús taza quionø'cy. Mänitä Dioscujú'uyäp yéjcumbä. Mänitä jiamiøød ja'a taza miooyy. Mänitä Jesús miänaañ:

—Hu'ug hädaa vino hajxy nägøxiä.

Mänitä vino hajxy yhuucmujcy tu'ugtaza.

28 Mänitä Jesús miänaangumbä:

—Jaduñ mäwiin hädaa vino nébiøchä nnø'tiän. Hijxtahñd jaduñ cooçhä jemyguiuhdujt nyajwiimbädsøma'añ cooçhä jäya'ayhajxy may nnähho'tu'uda'añ, cooçh jaduñ nyajnähwa'adsaanä ja'a piojpä quiädiey.

29 Pero nnämäabiøch mijts cooçh hädaa vino nga'a huuctägatsa'añ høxtä cóonøch hänäjty tøø nho'ogy. Mänitøch mijts jaduñ nmøødhuucmujtägatsa'añ jim maaçhä nDeedy jaduñ yhane'emiän.

30 Mänitä Dioshöy hajxy yhöøyy. Mänit hajxy ñøcxy maa ja'a Olivostuñän.

31 Mänitä Jesús miänaañ:

—Hädaa coods, cáboch mijts ja'a nmädia'agy hajxy hoy xmiäbøgåanänä. Mänitøch hajxy jaduñ xñähgue'ega'añ. Jaduhñä Diosmädia'agy miäna'añ: “Nyagho'ogáambiøch ja'a meegcueendähajpä. Mänitä meeghajxy xii yaa ñøcxø'øwa'añ.”

32 Pero cooçh hänäjty tøø njujypioçy, mänitøch nnøcxø'øga'añ jim Galilea; mänit mijts høxhaam mnøcxa'añ.

33 Mänitä Pedro miänaañ:

—Hoy miičh hajxy nägøxiä xjia nähgué'egät, cáboch miičh nnähgué'egät.

34 Mänitä Jesús miänaañ:

—Tøyhájtøch miičh nnäma'ay, coo ja'a tseey hänäjty quia'a ya'axyñä hädaa coods, tøø miičh hänäjty tægøøghooc mnijjogapxyii cóogøch tyijy jaduñ xquia'a hixiä.

35 Mänitä Pedro miänaañ:

—Høyhøch miičh näguipxy nja møødhó'ogät, cáboch jaduñ nnijjogapxøøjät.

Jaduñ hajxy nägøxiä piamänaambä.

³⁶ Mänitá Jesús hajxy miejch maa hánajty xiøhatiän Getsemaní. Mänitá Jesús miänaañ:
—Yaa hajxy høxta'ag naaxwiin; nõcxyhøch jimhaamby nhuuc Diospa'ya'axy.

³⁷ Mänitá Jesús ja'a Pedro wioonøcxy hawiing møødä Zebedeo yhuunghajxy nämetscä.
Mänitá Jesús tiägøøyy jootmayhajpä hoyhoy.

³⁸ Mänit miänaañ:

—Jaanč tehñ jiootmayhájpøch jaduñ. Jadúñhøch nnijiäwø'øyii nebiä ho'ogaambän. Yaa hajxy mmähmø'owät. Tsøg hajxy jujcy hjítäm.

³⁹ Mänitá Jesús weeñtiä jiaac nõcxy. Mänit miägutscädaacy. Mänit Dyiospa'yaaxy:

—Teedy, miich mee'x, ca'a yhndijy jaduñ cu ndsaachpøjcy. Pero ca'a yhøøchä nguhdujt jaduñ nyajtunaamby; miichä mguhdujt nyajtunáañäm.

⁴⁰ Mänitá Jesús wyiimbijty maa ja'a nädägøøgpä hánajty tøø ñähgue'eguiän. Jim hajxy hánajty mia'ay coo ja'a Jesús jim miejch. Mänitá Pedro ñämaayyä:

—Nej, ni tu'horä hajxy jujcy mga'a hida'añä.

⁴¹ Jujcy hajxy mhídät. MDiospa'yá'axäp hajxy jaduñ nebiä mõjcu'u hajxy jaduñ xquia'a jøjcapxø'owät. Jia tsojpiä mjoothajxy jaduñ coo hajxy jujcy mhídät, pero ja'a mni'x ja'a mgopc-hajxy jaduñ ca'a mee'xtugaamb.

⁴² Ja'a miämetsc-hoocpä Jesús ñøcxy Diospa'yaaxpä:

—Teedy, miich mee'x, cábøch ndijy jaduñ cu ndsaachpøjcy. Pero ween miichä mguhdujt nyajtunäm.

⁴³ Mänit wyiimbijcumbä maa ja'a Pedrohajxiän. Tøø hajxy hánajty miaahó'cumbä. Jaanč tehñ mia'awaamb hajxy hánajty hanaxiä.

⁴⁴ Mänitá Jesús ñähguéecumbä. Mänit ñøcxcumbä miädägøøghoocpä Diospa'yaaxpä. Mänit jaduhyä miänáangumbä.

⁴⁵ Mänit miéjtscumbä maa ja'a Pedrohajxiän. Mänit miänaañ:

—Ma'awxä hajxy, poo'xxä hajxy. Tøøds je'e yhabaady cooçh hajxy xya-jcø'ødägø'owa'añ maa ja'a cubojpä cugädieejäya'ayän, høøch ja'a Diosquexypä.

⁴⁶ Pädø'øg hajxy, jamds hajxy. Xiids je'e myiñ ja'a høøch jaduñ xyegaambä.

⁴⁷ Mädiaacnä ja'a Jesús hánajty coo ja'a Judas miejch, ja'a Jesús hánajty tøø miøødwädítiäbä ja'a miämajmetspä. Jaanč tehñ miay ja'a jäya'ay hánajty miøødä, pujxtmøødpä, paxycappä. Ja'a teedywiindsøn hajxy jaduñ quejx møødä martuumädøjc.

⁴⁸ Ja'a Judas ja'a Jesús hánajty yegaamb. Tøø ja'a Judas ja'a jäya'ay hánajty ñäma'ay:

—Ja'a høøch hánajty ndsu'xaambiä, je'eds hajxy mmádsäp.

⁴⁹ Mänitá Judas ja'a Jesús ñämejch. Mänitá yajpoo'xy. Mänit chu'xy.

⁵⁰ Mänitá Jesús miänaañ:

—Mägu'ughajpä, tiich xwia'ana'añ.

Mänitá Jesús hajxy miajch.

⁵¹ Mänitá Jesús jiamioød ja'a piujxt jiuu'ty. Mänitá teedywiindsøn mioonsä tu'ug tiaatspujxtúutäxä.

⁵² Mänitá Jesús miänaañ:

—Cuyuugø'ow yø'ø mbujxt. Pønjaty jaduñ pädø'p pujxthaam, jaanä pujxthaam yho'ogaambä.

⁵³ Nej, caj miich mnajuø'oyä, cooçhä nDeedy jaduñ nnämä'awät cooçh ween xpiuh-bety, mänitøch ja'a mioonsä tsajpootypä milhaam xyajnäguéxät.

⁵⁴ Pero cooçh jaduñ nnämä'awät, cabä Diosmädia'agy jaduñ tiøjiädät maa jaduñ myiñän cujaay cooçh jaduñ tsipcøxp njada'añ nhabeta'añ.

⁵⁵ Mänitá Jesús ja'a majiäya'ay ñämaayy:

—Pujxtmøød paxycap hajxy tøø mbädø'øgy. Jadúñhøch hajxy tøø xmiach nebiä mee'tspän. Jabom-jabómhøch mijts hijty nyajnähixø'oy tsajtøgooty, y cábøch hajxy mänaa tøø xmiach.

56 Pero páadyhøch jaduhñ njaty nhabety, jaduhñä Diosmädia'agy jaduhñ tiøjiádät, nebiä Diosquexypähajxy jecy quiujahyyän.

Mänitä Jesús jiamiøødhajxy quiøxy päyø'cy. Nidiuhmä Jesús jaduhñ ñähgueecä.

57 Mänitä Jesús yajmejtsä maa ja'a Caifás tiøjcän, ja'a mõjcuhtuøødpä maa ja'a teedyhajxiän. Jimä ley-yajnahixøøbiähajxy hänajty tøø yhamugø'øy møødä martu-umädøjc-hajxy.

58 Ja'a Pedro, jäguemjuøøby hänajty pianøcxy. Mänit jii by tiägøøyy maa ja'a Caifás tiøjwiingän. Mänitiä yhøxtaacy maa ja'a policíahajxiän. Yhixaamby hänajty je'e nebiä Jesús hänajty tiuna'añii.

59 Ja'a Jesús, tøø hänajty yajtøjtägø'øyii maa ja'a teedywiindsønñhajxy hänajty tøø yhamugø'øyän møødä ley-yajnahixøøbiähajxy møødä mõjtøjc-hajxy. Jii by hajxy hänajty wyiinmahñdyhaty nebiä Jesús hajxy jaduhñ ñähøønø'øwät, hoy jaduhñ quia'a ja tøyyä, nebiä Jesús hajxy jaduhñ yajyagho'ogøøjät.

60 Pero cabä tøyhajt hajxy piaaty, hoy jäya'ay may jia wi'i ñähøønøøyy. Mänitä hønñdaacpä metsc piädsøømy.

61 Mänit hajxy miänaañ:

—Nøñ yø'ø craa miänaañ coogä Diostøjc jaduhñ yajma'ada'añ; mänitac cumaaxc wiingpä yajpädø'ogáangumbä.

62 Mänitä teedywiindsønñ tiänaayyø'cy. Mänitä Jesús ñämaayyä:

—Nej, caj mhadsowa'añä. Tii hajxy jaduhñ coo xñäxø'øwø'øy.

63 Pero cabä Jesús waamñ ñä'ä mänaañ. Mänitä teedywiindsønñ miänáangumbä:

—Ja'a Dioscøxpä miich ja'a tøyhajt myégät; højts hawáañac pø tøyhajt jaduhñ coo miich ja'a Dios tøø xquiexy, coo ja'a Dios xyHuunghaty.

64 Mänitä Jesús miänaañ:

—Tøyhajt jaduhñ nej miich mmäna'añän. Jadúhñhøch mijts nnämaabiä, høøch ja'a Diosquexypä, cooçh hajxy xyhixa'añ häña'a maa ja'a Dios yhahooyhaampiän, ja'a mäjaamøødpä; y cooçh jaduhñ nmänajtägatsa'añ jocjooty.

65 Mänitä teedywiindsønñ ja'a wyit quiøø'ch. Paady quiøø'ch coo hänajty yhawa'anda'agy. Mänit miänaañ:

—Tøø hädaa craa quiapxtägoy ja'a Dioscøxpä. Tii testigo hajxy njaac wáañämät. Hamdsoo hajxy tøø mmädoy nej tøø quiapxtägoyyän.

66 Neby hajxy mmäna'añ.

Mänit hajxy yhadsooyy:

—Tøø jaduhñ quiapxtägoy ja'a Dioscøxpä; ween yho'ogy.

67 Mänitä Jesús wyiingudsujøøyyä. Mänit wiojpä. Mänit wyiingugoxøøyyä.

68 Mänit ñämaayyä:

—Pø tøyhajt jaduhñ coo Dios tøø xquiexy, najuø'øw pøn tøø xquioxy.

69 Jimnä ja'a Pedro hänajty yhäña'ay tøjwiing. Mänitä Pedro ñämejtsä to'oxymoonsä tu'ug. Mänit ñämaayyä:

—Miich ja'a Jesús hijty mmøødwädiipy, túhmäts, ja'a Galileatsohmñbä.

70 Mänitä Pedro ñijiøgapxä maa ja'a jäya'ayhajxiän:

—Pätiidä jaduhñ mnä'ä mädiaacyy.

71 Tøjpädsømáañpä ja'a Pedro hänajty, mänit yhiçxägumbä ja'a to'oxymoonsä tu'ug. Mänitä moonsä ñämaayy ja'a hajxy hänajty jimñbä:

—Yø'ø mixy ja'a Jesús hijty møødwädiipy ja'a Nazarettsohmñbä.

72 Jadähooc ja'a Pedro ñijiøgapxä:

—Tøyhajt, cáboch ja'a craa nhixiä.

73 Mänitjuøøby ja'a Pedro ñämáayyägumbä, ja'a hajxy hänajty jimñbä:

—Tøyhajt jaduhñ coo miich ja'a Jesús hijty mmøødwädity; jaduhñ miich mmädiaacpä nebiä Galileatsohmñbän.

⁷⁴ Mänitä Pedro miänaañ:

—Pø cábøch tøyhajt nmädia'agy, wéenhøch ja'a Dios jaduhñ xyajcumädoy. Cáboch ja'a craa nhixiä.

Tuunä ja'a Pedro jaduhñ ñä'ä mänaañ, mänitiä tseey yaaxy.

⁷⁵ Mänitä Pedro quiøxy jahmiejch nebiaty ja'a Jesús hänajty tøø miäna'añän: “Cajnä ja'a tseey hänajty ya'axy, tøø miich hänajty tägøøghooc mnijjogapxyii cóogøch tyijy xquia'a hixiä.” Mänitä Pedro jim chohñ. Mänit tägøøyy jøøbiä hoyhoy.

27

¹ Coø jiojøøyy, mänitä teedywiindsønñhajxy quiojyquiapxytiuuñ møødä martuumädøjc-hajxy nebiä Jesús hajxy yaghó'ogät.

² Mänitä Jesús hajxy cø'øxoch hoy yajcø'ødägø'øy maa ja'a Poncio Pilatän, ja'a hänajty tuumbä gobernador.

³ Ja'a Judas ja'a Jesús hänajty tøø yhawaanø'øy. Coø ja'a Judas yhiijy coø ja'a Jesús hänajty yagho'oga'añii, cabä jioot jaduhñ ñä'ä møc-hajty. Mänitä hii'xmajcpä plataxädø'ønñ hoy yajwiimbity maa ja'a teedywiindsønñhajxiän, maa ja'a martuumädøjc-hajxiän.

⁴ Mänit miänaañ:

—Tøøch jaduhñ ngädieey coöchä craa ho'cøøc tøø nhawaanø'øy, ja'a cajpä pojpä cädieemiøødpä.

Mänit hajxy yhadsooyy:

—Ca'a yhöjts ngüeendä yø'øduhñ. Miich mgüeendä yø'øduhñ.

⁵ Mänitä Judas ja'a xädø'ønñ ñajtsxäbapøøyy jiiby tsajtøgooty. Mänit hoy ñiyo'tøøyyänä.

⁶ Mänitä teedywiindsønñ ja'a xädø'ønñ hajxy pyiwø'cy. Mänit hajxy miänaañ:

—Cab hädaa xädø'ønñ hajxy hawiinmats nbädäacämät maa ja'a xädø'ønñ hajxy quiuy-oxø'øyän, je'eguiøxpä coø jäya'ay jaduhñ tøø tiogyii ho'cøøc.

⁷ Mänit hajxy quiojyquiapxytiuuñ coø ja'a naax hajxy hänajty jiuya'añ, ja'a xøhajpä Tu'tspojtstaact, ja'a xädø'ønñhaam ja'a Judas hänajty hoy tøø ñajtsxäbapø'øyäbä. Je'e hajxy hänajty wia'ana'añ cabäsantä maa ja'a jäguembäjäya'ayhajxy ñaaxtägø'owät.

⁸ Coø ja'a naax hajxy jaduhñ jiuuuy ja'a xädø'ønñhaam ja'a Judas hänajty hoy tøø ñajtsxäbapø'øyäbä, paady jaduhñ xiøhaty Nø'ñaax høxtä jäda'anäbaadyñä.

⁹ Jaduhñdsä tiøjiajty nebiä Jeremías jecy miänaañän, ja'a Diosquexypä: “Mänitä plataxädø'ønñ hajxy miooyyä hii'xmajc (nebiä judiøshajxy tøø ñägapxiän).

¹⁰ Mänitä tu'tspojtstaact hajxy hoy jiuuy nébiøch ja'a Dios tøø xyhane'emiän.”

¹¹ Mänitä Jesús yajmejtsä maa ja'a gobernadorän. Mänit miäyajtøøwä:

—Nej, miich ja'a judiøshajxy xguiobiernähajpä.

Mänitä Jesús yhadsooyy:

—Tøyhajt jaduhñ nej miich mmäna'añän.

¹² Mänitä Jesús ñähwaambejtä ja'a teedywiindsønñhajxy møødä martuumädøjc-hajxy. Pero cabä Jesús waamb ñä'ägä mänaañ.

¹³ Mänitä Pilato miänaañ:

—Nej, caj miich jaduhñ mmädoyyä nebiaty hajxy jaduhñ xñänómiänä.

¹⁴ Pero cabä Jesús ñä'ä hadsooyy; paadiä gobernador jiaanç tehñ yagjuøøyy. Cab hänajty ñajuø'øy nebiaty jaduhñ wyiinmahñdyhädät.

¹⁵ Jaduhñdsä gobernador hänajty quiuhdujthaty coø ja'a tsumyjiäya'ay hänajty tu'ug yhøxmach xøøjooty pønñ ja'a cu'ug jaduhñ ñänómäp coø yhøxmadsøøjät.

¹⁶ Jiibiä craa hänajty tu'ug chumyçhäna'ay ja'a xøhajpä Barrabás. Tøø ja'a Barrabás xiøø hänajty wyi'i wia'xy.

¹⁷ Coø ja'a cu'ughajxy hänajty tøø quiøxy hamugø'øy, mänitä Pilato yajtøøyy:

—Pøn mijts jaduñ mnänøømby cooçh nhøxmádsät, Barrabás tögä ja'a Jesús ja'a Cristohajpä.

18 Ñajuøøbiä Pilato hänajty coo ja'a Jesús jaduñ yajcø'ødägøøyyä je'eguiøxpä coo ja'a quiuhdujt hänajty quia'a yajmädsójcäxä.

19 Jimnä ja'a Pilato hänajty yhäña'ayñä maa hänajty tiuñän, mänitä Pilato quiapxyñäguejxä ja'a tio'oxiójcäm: “Cab jaduñ cu mdsaaçhtiuuñ; hoyhäna'c yø'øduñ. Tøøch haamyquioods haxøøg nguma'ay yø'øgøxpä.”

20 Mänitä teedywiindsøn ja'a cu'ug hajxy jiojcapxøøyy coo ween hajxy miäna'añ coo ja'a Barrabás yhøxmadsoøjät, y coo ja'a Jesús yagho'ogóøjät.

21 Mänitä gobernador ja'a cu'ug miäyajtøøgumbä:

—Mädyii häna'c mijts mnänøømby cooçh nhøxmádsät.

Mänit hajxy yhadsooyy:

—Barrabás.

22 Mänitä Pilato yajtøøyy:

—Ja'a Jesúsäts, ja'a xøhajpä ja'a Cristo, nébiøch je'e ndúnät.

Mänit hajxy nägøxiä yhadsooyy:

—Møjpahbet cruzcøxp.

23 Mänitä Pilato miänaañ:

—Tii haxøøgpä jaduñ tøø tiuñ coo jaduñ yagho'ogóøjät.

Mänit hajxy jaduñ yáaxcumbä:

—Møjpahbet cruzcøxp.

24 Coo ja'a Pilato jaduñ yhiyxy coo ja'a cu'ughajxy hänajty quia'a mädoḡa'añ, coo hajxy maas hanaxiä yhaamhada'añ, mänitä nøø yujwaañ. Mänit quiø'øbujiy cu'ugwiinduum. Mänit miänaañ:

—Ca'a yhøøch jaduñ mänaamb coo yø'ø hoyhäna'c jaduñ yagho'ogóøjät; mijts jaduñ mänaamb.

25 Mänitä cu'ughajxy nägøxiä miänaañ:

—Tøyhajt jaduñ. Højts jaduñ mänaamb møød højts nnøøx møød højts nmajc.

26 Mänitä Pilato ja'a Barrabás yhøxmajch. Mänitä Jesús yajwojpä. Mänit yajcø'ødägøøyy coo nøcxy miøjpahbedyii.

27 Mänitä Jesús yajnøcxä ja'a gobernador soldadohajxy. Mänitä Jesús jiuhibigøøyyä ja'a soldadohajxy nägøxiä.

28 Mänitä wyit yajtsíjjaxä. Mänitä tsaptswit yajpägøøyyä.

29 Mänitä haptycoronä piädaacä maa ja'a quiuhduumän. Mänitä paxy yajcø'øgabøøyyä yhahooyhaampiäcø'ø. Mänit wyiinjiicädaacä. Mänit wyiingapxpejtä:

—¡Viva ja'a judíos ja'a guiobiernähajxy, viva!

30 Mänitä Jesús wyiingutsujøøyyä. Mänitä paxy piójcäxä. Mänit wiojpä quiuhduum.

31 Coo yhuuc wiingapxpejtäbä, mänit tsaptswit yajtsíjägumbä. Mänit yhamdsoo wit yajpägøøyyägumbä. Mänit yajnøcxänä maa hänajty miøjpahbeda'añiijän.

32 Tu'haamnøcxpä jäya'ay hajxy tu'ug jiojcubaadøøyy ja'a Cirenetsohmä. Simón hänajty xiøhaty. Mänitä Simón ja'a cruz hadsip yajcajtsoowä.

33 Mänit hajxy miejch maa jaduñ xiøhatiän Gólgota. Je'eduhñ ñänøømby: “Maa ja'a ho'ogyjiäya'aguiopc ñähgäda'aguiän.”

34 Mänitä Jesús tsaatyñøø jia yaghuucä ja'a jaançh tehñ tiahmbä. Coo jaduñ yhuucmajch, cab jaduñ chojcy.

35 Mänitä Jesús miøjpahbéjtänä cruzcøxp. Mänitä soldadohajxy yhäyø'cy dadoshaam nebiä Jesús ja'a wyit hajxy yajwá'xät. Jaduñdsä tiøjiajty nebiä Diosquexypä jecy miänaañän: “Dadoshaam hajxy yhäyø'cy nébiøch nwit hajxy jaduñ xyajwá'xät.”

36 Mänitä soldadohajxy jim yhøxtacy nebiä Jesús hajxy jaduñ wyiinhäñá'awät.

³⁷ Mänit hajxy jim̄ yuugjahy cruzcuhduum tiiguiøxp ja'a Jesús coo tøø miøjpahbedyii: “Jesús hädaa, ja'a judíos guiobiernohajxy.”

³⁸ Jim̄ä mee'tspä metsc miøjpahbéjtäbä. Cujc ja'a Jesús miähmøøyy, tu'ug hanajty-haamby, tu'ug hahooyhaamby.

³⁹ Ja'a jäya'ayhajxy hänajty najxpä, wyl'i wyiingapxpejpy hajxy hänajty møød hajxy hänajty wyl'i quiuhjägøñ.

⁴⁰ Jaduhñ hajxy hänajty ñiñäma'ayii:

—Ja'a, miich jaduhñ mänaañ coo mahñdy ja'a tsajtøjc myagjida'añ, y cumaaxc mahñdy mhädiuna'añ wiingpä. Niyajmänacøjätš hamdsoo pø tøyhajt jaduhñ coo miich Dios xyHuunghaty.

⁴¹ Jaduhñ ja'a teedywiindsøn̄hajxy piamänaambä møødä ley-yajnähihøøbiähajxy, møødä fariseoshajxy, møødä martuumädøjc-hajxy.

⁴² —Tøø jaduhñ yhuuc wi'i miäyajnähoa'açh, y caj hamdsoo ñiyajnähoa'adsa'añii. Pø tøyhajt jaduhñ coo jaduhñ guiobiernähaty maa ja'a judíoshajxiän, ween jaduhñ hamdsoo ñiyajmänaqyii cruzcøxp neby højts jaduhñ nmäbøjcämät.

⁴³ Jaduhñ tøø xnämäayyäm coo yHuunghadyii ja'a Diósäm y coo ja'a Dios jaduhñ cwieendähada'añ. Pø tøyhajt jaduhñ coo ja'a Dios jaduhñ jiaançh tsocy, ween jaduhñ yajnähoa'açh.

⁴⁴ Jaduhñdsä mee'tspähajxy piamänaambä, ja'a hajxy jim̄ møjpahbetypä cruzcøxp.

⁴⁵ Mänitcujyxiøø ja'a naaxwiimbä wyiingoodsøøyy. Tägøøghorä jaduhñ yhijty wiin-goods.

⁴⁶ Mänitmänacyxiøø ja'a Jesús møc yaaxy: “Elí, Elí, lama sabactani”, je'eduhñ ñänøømby: Dios mee'x, Dios mee'x, tiich jaduhñ coo tøø xñajtshixø'øyy.

⁴⁷ Ja'a hajxy hänajty jim̄ wi'i tiänaabiä, coo hajxy jaduhñ miädooyy, mänit hajxy näje'e miänaañ:

—Elías yø'ø craa jaduhñ jia wi'i miøjyaaxyp.

⁴⁸ Mänit tu'jäya'ay xo'od hoy quioñ päyø'øguiä. Mänit quiumadsøøyy ja'a tsaatyñøøxunjooty. Cøjx je'e chomø'øyy. Mänit paxy yagjøjwøøonøøyy ja'a xo'od. Mänitä Jesús yaghaguubøøyyä neby jaduhñ miüügät.

⁴⁹ Mänitä häna'c-hajxy wiingpä miänaañ:

—Huug hahijxnä, ween yhuuc cähxø'øgy pø minaañbä Elías yajnähoa'adsa'añ.

⁵⁰ Mänitä Jesús jadähooc møc yáaxcumbä. Mänit yho'nä.

⁵¹ Mänitä tsajtøjc-hadøødiuc quiøø'tswa'xy cujjiä. Cøxp jaduhñ quiøø'tsohñ. Mänitä hujx ñajxy. Mänitä tsaa jaduhñ wia'xy.

⁵² Mänitä ho'ogyjiäya'ajiut may yhawaach. Mänitä ho'ogyjiäya'ayhajxy may jiu-jypiojcy, ja'a Diosmädia'agy hajxy hänajty tøø miäbøquiäbä.

⁵³ Coo ja'a Jesús hänajty tøø jiu-jypiojcy, mänitä ho'ogyjiäya'ayhajxy yhawa'adspädsøømy, ja'a hajxy hänajty tøø jiu-jypiojcy. Mänit hajxy quiajptägøøyy Jerusalén. Jim̄ hajxy jaduhñ yhiixä nämay.

⁵⁴ Jim̄ä soldadowiindsøn̄ ja'a Jesús hänajty cwieendähaty møødä soldadohajxy. Coo ja'a tsø'ty hajxy jaduhñ yhiixy, mänit hajxy jiaançh tehñ chähgøøyy. Mänit hajxy miänaañ:

—Tøyhajtäm hijty coo hädaa craa hijty Dyioshuungä.

⁵⁵ Jim̄ä tajiäya'ay ja'a Jesús hajxy hänajty wyl'i ñäheebø'øyy jäguemduum. Jim̄ä Jesús hajxy hänajty tøø piadsooñ Galilea. Tøø hajxy hänajty piuhbety.

⁵⁶ Jim̄ä María hänajtypä ja'a Magdalatsohmbä, møødä María ja'a Jacobo tiajhajxy, møødä Zebedeo tio'oxiojcy.

⁵⁷ Coo quioodsøøyy, mänitä mäyøøjäya'ay tu'ug miehch, ja'a xøhajpä José. Jim̄ hänajty chooñ Arimatea. Pianøcxäbä ja'a Jesús miädia'agy hänajty je'e.

⁵⁸ Mänitä José ja'a Pilato cuhdujt hoy miäyujwa'añ coo ja'a ho'ogyjiäya'ay yajmänácät cruzcøxp. Mänitä José ja'a cuhdujt miooyyä.

⁵⁹ Mänit jaduhñ yajmäñajcy. Mänitä poobwit yajnähbijty.

⁶⁰ Mänit jaduhñ jiiby piädaacy tsaajutjooty ja'a naamñdajypä. Paadiä José ja'a tsaajut hänajty tøø yajtajyii, jiiby hänajty piäda'aga'añii coo hänajty tøø yho'ogy. Mänitä tsaajut yhahämoomtägöoyy tsaahaam maa ja'a Jesús hänajty tøø ñaaxtägø'öyän. Mänitä José wyiimbijty.

⁶¹ Jimä María Magdalatsohmñbähajxy miähmøøyy møødä María tu'ugpä. Jim hajxy hänajty yhäña'ay maa ja'a Jesús hänajty tøø ñaaxtägø'öyän.

⁶² Viernes ja'a Jesús jaduhñ yho'cy. Cujaboom ja'a teedywiindsønñhajxy miejch maa ja'a Pilatän møødä fariseoshajxy.

⁶³ Mänitä Pilato ñämaayyä:

—Miičh møjteedy, ja'a craa häxøøy hó'cäbä, tøø hijty miäna'añ cooc tyijy cumaaxc hijty jiuypioçga'añ. Pero nä'ä hønñdaac jaduhñ.

⁶⁴ Entonces, quex ja'a soldado jim maa tøø ñaaxtägø'öyän, jaduhñ hajxy jaduhñ jim yhadänä'awät jadu'tsuhm. Jaduhñsä Jesús miägu'ughajpä ja'a ñaaxni'x hajxy nøcxy quia'a yajpädsøømä. Jaduhñsä cu'ug hajxy quia'a nämá'awät cooc tyijy tøø jiuypioçcy. Maas hanaxiä hajxy jaduhñ cu yhønñdaacy quejee ja'a Jesús hijty yhønñda'aguiän.

⁶⁵ Mänitä Pilato miänaañ:

—Xiidsä soldadohajxy. Ween hajxy jim nøcxy yhadäna'ay neby jaduhñ quia'a pädsøømät.

⁶⁶ Mänit soldadohajxy jim quiejxä hadänaabiä. Mänitä tsaa hajxy xiøøjøøyy ja'a jim hämoomnaabiä maa ja'a tsaajuthaawän. Mänit hajxy jim miähmøøyy.

28

¹ Cujaboom näxøø jopyñä, mänitä María Magdalatsohmñbä jim miejch maa ja'a Jesús hänajty tøø ñaaxtägø'öyän møødä María tu'ugpä.

² Mänitiä hujx møc ñajxy. Jimä Dios ja'a mioonsä hänajty tu'ug tiäna'ay. Tsajpootyp hänajty tøø chooñ. Mänitä tsaa jiøhämoomy ja'a hijty hijpä juthaguum. Mänitä yhøxtaacy tsaanähgøxp.

³ Jaančh tehñ yaamñb hänajty je'e. Jaančh tehñ pioob ja'a wyit hänajty.

⁴ Coo ja'a soldado ja'a Diosmoonsä hajxy yhijxy, mänit hajxy tiägøøyy tsäyuubiä. Jaančh tehñ chähgøøby hajxy hänajty. Mänit hajxy quiädaayy. Jaduhñ hajxy miähmøøyy nebiä ho'ogypiän.

⁵ Mänitä Maríahajxy ñämaayyä ja'a Diosmóonsäm:

—Ca'a hajxy mdsähgø'øy. Nnajuøøbiøch jaduhñ coo ja'a Jesús hajxy mhøxta'ay, ja'a hijty tøø miøjpahbedyíjábä.

⁶ Cabä jii; tøø jiuypioçcy neby hijty tøø miäna'añän. Min hajxy huug hiç maa tøø ñaaxtägø'öyän.

⁷ Coo hajxy jaduhñ mhíxät, mänitä miägu'ughajpä hajxy nøcxy paquiä mhawaanä coo jaduhñ tøø jiuypioçcy, coo jaduhñ ñøcxø'øga'añ Galilea. Jim hajxy jaduhñ mbaada'añ. Jaduhñhøch mijts nhawáañäm.

⁸ Mänitä Maríahajxy hoy yhixy paquiä maa ja'a Jesús hänajty tøø ñaaxtägø'öyän. Jíibädä hajxy chähgø'øy, jíibädä hajxy xioonda'agy. Mänitä miägu'ughajpä hajxy hoy yhawaañä päyø'øguiä.

⁹ Tu'haamnøcxpä ja'a Jesús ñäguehxtøø'xy. Mänitä Maríahajxy yajpoo'xä. Mänitä Jesús hajxy wyiingumedsøøyy. Mänit hajxy tiecymiämänenøøyy. Jaduhñ hajxy wyiingudsähgøøyy.

¹⁰ Mänit hajxy ñämaayyä:

—Ca'a hajxy mdsähgø'øy. Nøcxhøch ja'a nmägu'ughajpä hajxy hawáañäc coo hajxy jim ñøcxät Galilea, cooçh hajxy jim xpiaada'añ.

¹¹ Coo ja'a Maríahajxy hánajty tøø wyiimbity maa ja'a Jesús hánajty tøø jiuypioquiän, mänitä soldadohajxy näje'e ñøcxy cajptooty, ja'a hajxy hánajty tøø yhadáná'ayäbä. Mänitä teedywiindsøñ hajxy hoy yhawaanä nebiaty hajxy hánajty tøø yhixy.

¹² Mänitä teedywiindsøñhajxy hoy miøødmädia'agy ja'a martuumädøjc-hajxy neby hajxy jaduhñ quiojyquiapxytiúnät. Mänitä soldado xädø'øñ hajxy may miooyyä.

¹³ Mänitä soldadohajxy ñämaayyä:

—Jaduhñ hajxy mmáná'anät coo hajxy coods mmaaho'cy, y coo ja'a Jesús ja'a miägu'ughajpähajxy hoy yajpädsømyii.

¹⁴ Y coodsä gobernador jaduhñ miädoyhádät, højts jaduhñ nyajmäbøgäp. Jaduhñ hajxy xquia'a capxpáadät.

¹⁵ Mänitä soldado ja'a xädø'øñ hajxy wyiingpøjcy. Mänit hajxy hoy jiatcø'øy neby hajxy hánajty tøø ñäma'ayiiän. Jaduhñsä judíoshajxy miädia'agyñä høxtä jäda'anäbaadyñä.

¹⁶ Mänitä Jesús miägu'ughajpähajxy jim ñøcxy Galilea, ja'a nämajtu'ugpä. Mänit hajxy jim miejch maa ja'a tunän maa ja'a Jesús hánajty tøø ñägaxiän.

¹⁷ Coo ja'a Jesús hajxy yhijxy, mänit hajxy wyiingudsähgøøyy, hoy hajxy hánajty näje'e quia'a ja mäbøcy hamuumdu'joot.

¹⁸ Mänit hajxy wyiingumedsøøyyä. Mänit hajxy ñämaayyä:

—Tøøchä Dios cuhdujt cøxiä xmio'oy jim tsajpootyp, møød hädaa yaabä naaxwiin.

¹⁹ Nøcx hajxy wiinduhmyhagajpt. Yajwiingapxø'øw hajxy nébiøch nmädia'agy hajxy xmiäbøjcät. Jaduhñ hajxy myajnäbétät ja'a Diosteedycøxpä, møødä høøchcøxpä, møødä Dioshespíritucøxpä. Høøch ja'a Dios xyHuunghajp.

²⁰ Jaduhñ hajxy myajnähixø'øwät coo hajxy jaduhñ miäbøgät nebiátyhøch mijts tøø nhane'emiän. Mjahmiédsäp hajxy jaduhñ coøch mijts nmøødhida'añ cøjxta'axiøø høxtä coonä naaxwiimbä wyiimbídät.

San Marcos

¹ Jaduhnä Diosmädia'agy chohnäda'agy ja'a Jesucristocøxpä, neby jiajty, neby yhabejty. Dioshuungä Jesucristo je'eduhn.

² Jaduhn jim cujaay myiñ nocyjiooty, ja'a Isaías jecy quiujáhyyäbä. Ja'a Isaías, je'e ja'a Diosmädia'agy jecy yajwa'x. Jaduhnä Dios ja'a yHuung jecy ñämaayy: Huuc mäadow, chámhøchä nguguexy nguejxø'øga'añ maa miich mnøcxø'øwa'añän. Je'e ja'a mädia'agy nøcxy yajwa'xa'añ coo miich jim nøcxy mwäditaambä.

³ Mänitä Dios jiaac mänaañ:

“Pactúmhøchä nguguexy nøcxy wiädita'añ. Coo ja'a cu'ughajxy jaduhn miädoyhada'añ coo ja'a wiingapx jøjcapxøøbiä jim tøø quiäda'agy pactuum, mänit hajxy nøcxy wyiingapx jøjcapxø'øwa'añii coo ja'a haxøøgwiinmahñdy hajxy ñajtshixø'ød,

coo ja'a Jesús ja'a miädia'agy hajxy miäbøjcät, ja'a hajxy mWiindsønähadaambiä.”

Ja'a Juan jaduhn nänøømä, ja'a hänäjty mäyajnäbetaambä.

⁴⁻⁵ Mänitä Juan je'e jiaanč tægøøyy mäyajnäbejpä jim jäguemduum, maa ja'a møjnøø hänäjty xiøhatiän Jordán. Mänitä jäya'ayhajxy may miejch maa ja'a Juan hänäjtian. Jim hajxy hänäjty choon maa ja'a naax hänäjty xiøhatiän Judea, møød jim maa ja'a cajpt hänäjty xiøhatiän Jerusalén. Mänitä Juan ja'a cu'ug tiægøøyy yajwiingapxøøbiä coo hajxy ñäbétät, weenä jiootä wyiinmahñdy hajxy yajtägach. Jaduhnä Dios ja'a piojpa quiädieey hajxy yajnähwaatsät. Mänitä cu'ugä piojpa quiädieey hajxy ñägapxy. Jaduhn hajxy hänäjty miäna'añ cooc ja'a yhaxøøgwiinmahñdy hajxy hänäjty ñajtshixø'øwa'añ. Mänit hajxy ñäbejnä.

⁶ Ja'a Juan, camelloøjt hänäjty wyithajpy. Wajhac hänäjty wiøønhajpy. Mu'u hänäjty chu'učhhajpy. Møjtsiinnøø hänäjty yhu'ugyhajpy.

⁷ Mänitä Juan ja'a cu'ug yajwiingapxøøyy: “Jimhøchä njamiøød tu'ug jiaac medsa'añ yajwiingapxøøbiä. Maas mäjaamøød je'e miedsa'añ quejeech høøch. Cábøch cuhdujt jaduhn njaty møødä nebiä cuhdujt je'e miøødän, ja'a jaac medsaambä.

⁸ Coo mijts nyajnäbejty, nøøhaam mijts nyajnäbejty. Pero ja'a jaac minaambä, Diosh-espírituhaam hajxy jadähooç xyajnäbejtägatsa'añ.” Jaduhnä Juan miänaañ.

⁹ Cujequiä Jesús jim miejch maa ja'a Juan hänäjty miäyajnäbetiän, jim maa ja'a møjnøø hänäjty xiøhatiän Jordán. Jimä Jesús hänäjty tøø choon maa ja'a cajpt xiøhatiän Nazaret, jim maa ja'a naax hänäjty xiøhatiän Galilea. Mänitä Juan ja'a Jesús yajnäbejty.

¹⁰ Tuunä Jesús ñä'a tø'ødspädsøømy, mänit yhiijxy coo ja'a tsajt yhawaach. Mänitä Jesús ja'a Dioshespíritu yhiijxy coo hänäjty ñägäda'agyii nebiä paloman.

¹¹ Mänitä Dios jim quiuhgapxnajxy tsajpootyp. “Høøch miich tu'uquiä nHuunghajpy. Miich njaanč tehñ chojpy. Miich njaanč tehñ quiumaaby.” Jaduhnä Jesús ñämaayyä.

¹² Mänitä Jesús miødhajtä pactuum ja'a Dioshespíritu.

¹³ Mänitä Jesús jim piuhwaatsä. Nidiuhñ jim miähmøøyy. Jagooyyä animalhajxy hänäjty jim wiädity. Mänitä Jesús ñämejtsä ja'a møjcu'ugong. Mänitä Jesús jia tægøøyyä jøjcapxøøyyäbä. Juxychägui'xxøø ja'a Jesús jim yhiijty jäguemduum. Mänitä Jesús ñämejtsä ja'a Diosmoonsähajxy ja'a jim tsajpootypä. Mänitä Jesús piuhbejtä.

¹⁴ Ja'a Juan, cujegy je'e chuumä. Coo je'e jaduhn chuumä, mänitä Jesús jim ñøcxtägajch Galilea. Mänitä Jesús ja'a cu'ug tiægøøyy yajwiingapxøøbiä ja'a Diosmädia'agy cooc hänäjty yhabaatañä coo ja'a Dios ja'a miøcmäjaa hänäjty yajcähxø'øga'añ.

¹⁵ “Habäatnäp jaduhn coo ja'a Dios ja'a miøcmäjaa yajcähxø'øga'añ. Paadiä Dios ja'a miädia'agy hajxy mmäbøjcät. Weenä mjootä mwiinmahñdy hajxy myajtägach. Weenä mhaxøøgwiinmahñdy hajxy mnajtshixø'øy.” Jaduhnä Jesús miänaañ.

16 Cujequiä Jesús tiägøøyy wädijpä maa ja'a mejy hänajty xiøhatiän Galilea. Jim hänajty wiädity mejypia'a, mänitä jäya'ay metsc yhijsy, ja'a Simón møødä piuhya'ay Andrés. Hacxmats ja'a Simónghajxy hänajty tiuunghajpy. Jiibiä yhacxjohmd hajxy hänajty piäda'agy mejjiooty.

17 Mänitä Simónghajxy ñämaayyä:

—Jam hajxy wädijtam. Je'e mijts hijty mduunghajpy, hacxmats. Wiingtuunghøøch mijts nmo'owaamby. Nyajnahixø'øwáambiøch mijts nebiä cu'ugä Diosmädia'agy hajxy myajwiingapxø'øwät —nømä Jesús miänaañ.

18 Tuunä jaduhñ ñä'a mänaañ, mänitä Simón ja'a yhacxjohmd hajxy hoy ñajtswidso'øyy mejypia'a. Mänitä Jesús hajxy piadu'ubøjcy.

19 Weeñtiä ja'a Jesúshajxy hänajty tøø miejypia'ayo'oy, mänitä Jesús ja'a Zebedeo yhijsy møødä yhuunghajxy, ja'a Santiago møødä Juan. Barcohuungooty ja'a Zebedeohajxy hänajty yhäña'ay. Jiibiä yhacxjohmd hajxy hänajty yhaxodsø'øyy.

20 Mänitä Jesús ja'a Santiago miøjyaaxy møødä Juan. Mänitä Santiago ja'a Jesús hajxy piadu'ubøjpä. Ñähgueec ja'a tieedy hajxy jiiby barcohuungooty møødä mioonsähajxy.

21 Mänitä Jesúshajxy jim miejch maa ja'a cajpt hänajty xiøhatiän Capernaum. Coø ja'a poo'xxiøø yhabaaty, mänit hajxy jiiby tiägøøyy tsajtøgooty. Mänitä Jesús ja'a cu'ug tiägøøyy yajwiingapxøøbiä.

22 Mänitä cu'ughajxy yagjuøøyy coogä Jesús hänajty hoy yajnahixø'øyy nebiä mõjcuhdujtmøødpän. Maas hóyyäc hänajty yajnahixø'øyy quejee ja'a häna'c-hajxy, ja'a Diosmädia'agy hajxy hänajty naxy yajnahixøøbiä tsajtøgooty.

23 Jiibiä mähdiøjc hänajty tu'ug tsajtøgooty, tøø hänajty yajtägø'øyyii ja'a mõjcu'u. Mänitä mõjcu'u tiägøøyy yaaxpä møc:

24 —Miič Jesús, Nazaret miič mdsooñ. Tii højts coø xmiädsibø'øyy. Højts jaduhñ xjia wi'i yajcuhdägoyyaamb, túhmäts. Nnajuøøbiøch pøn miič. Miičhä Dios xyHuunghajp —nømä mähdiøjcä mõjcu'u yajmänaañä.

25 Mänitä Jesús ja'a mõjcu'u yhojy:

—Hamón, jua'ads jim maa yø'ø mähdiøjcän —nømä Jesús miänaañ.

26 Mänitä mõjcu'u ja'a mähdiøjc je'e yajpojpaaty. Yáaxäbä mähdiøjc ñähwaatsä. Ja'a mõjcu'u jaduhñ yajyaax.

27 Coø ja'a Jesús ja'a mähdiøjc jaduhñ yajnahwaach, jiaanč tehñ yagjuøøyy ja'a cu'ughajxy jaduhñ nägøxiä. Mänit hajxy tiägøøyy niñamáayyäbä:

—Maa yø'ø craa cuhdajt jaduhñ tøø ñä'a mahñ piøcy coø yø'ø mähdiøjcä mõjcu'u jaduhñ yajnahwaatsä. Nej, hawiinjemyguiuhdujtäda'a miøødäjä —nømä Jesús ñänøømä.

28 Paquiä mädia'agy jim wia'xy Galileanaaxooty wiinduhm_yhagajpt coø ja'a Jesús ja'a miøcmäjaa hänajty tøø yajcähxø'øgy.

29 Coø ja'a Jesúshajxy jiiby chajtøjpdsoømy møødä jiamioødtøjc, mänit hajxy jim ñøcxy maa ja'a Simónghajxy hänajty chäna'ayän møødä Andrés. Quipxiä Santiagohajxy hänajty choonä møødä Juan.

30 Ja'a Simón ja'a miøødhoc, pa'amgo'naaby hänajty je'e. Tobia'am hänajty miøød. Coø ja'a Jesús jim miejch maa ja'a Simón tiøjcän, mänitä Jesús yhawáañäxä coø ja'a pa'amjäya'ay hänajty jiiby tøgooty.

31 Coø ja'a Jesús tiøjtägøøyy, mänitä pa'amjäya'ay wyidsø'cy. Mänitiä ja'a tiøy tiøjch. Mänitä Jesús yajcaayyä yaghuucä ja'a Simón ja'a miøødhoc.

32 Mänittsuu, coø ja'a xøø hänajty tøø quiuhnaxy, mänitä Jesús pa'amjäya'ay may yajnämejtsä, jim maa ja'a Simón tiøjcän, møødä mõjcu'umøødpähajxy.

33 Jimä cu'ughajxy hänajty may tiäna'ay tøghaawjooty.

34 Mänitä Jesús jäya'ay may yajpa'amnajxy. Madiu'ujä pa'am hajxy hänajty miøødä. Møødä mõjcu'umøødpähajxy, yajnahwaatsä hajxy je'ebä. Mänitä Jesús ja'a mõjcu'u yhanehmy coø hajxy quia'a cápxät, je'eguiøxpä coø ja'a Jesús hänajty ñajuø'øyyii pøn je'e.

³⁵ Cujaboom, je'enä hänajty wyiingoodsä, mänitä Jesús piädø'cy. Mänit tiøjpadsoomy. Mänit jim ñøcxy jäguemduum. Mänitä Tieedy hoy pia'ya'axy.

³⁶ Coo jobooyy, mänitä Simónghajxy yhjy coo Jesús hänajty tøø tiu'ubøcy. Mänit hajxy tiu'ubøjcy høxtaabiä.

³⁷ Coo ja'a Jesús piaatä, mänit ñämaayyä:

—Jim miichä cu'ug xjia wi'i yajtøy maačhä ndøjcän.

³⁸ Mänitä Jesús yhadsooyy:

—Jam hajxy wiingtuum wädjätäm maa ja'a cajpt wiingonbän. Jadúhnhøchä cu'ugä Diosmädia'agy jim nyajwiingapxøøbiät. Jadúhnhøch nwiinguexiä coochä Diosmädia'agy wiinduhmyhagajpt nmäwädítät.

³⁹ Mänitä Jesús tiägøoyy wädijpä tsajtøjc-tsjtøjc wiinduhmyhagajpt jim Galileanaaxooty. Ja'a Diosmädia'agy hänajty yajwiingapxøøby, møødä pa'amjäya'ay hänajty yajnahwaatspä, ja'a hajxy mõjcu'umøødpä.

⁴⁰ Mänitä Jesús pa'amjäya'ay ñämejtsä tu'ug, ja'a leprapa'ammøødpä. Mänitä Jesús wyiinjiicädaacä, miänuu'xtaacä:

—Pø chojpy miichä mjoot jaduhñ, høøch hädaa nba'am yajnahwáatsäc —nømä Jesús ñämaayyä.

⁴¹ Mänitä mähdiøjc ñäxuu'tsä. Mänit ñähdoonä. Mänit ñämaayyä:

—Tii coo quia'a cabä. Tøø jaduhñ mnähwa'ačh.

⁴² Tuunä ja'a Jesús jaduhñ ñä'ä mänaañ, mänitä mähdiøjcä pia'am ñähwaatsä.

⁴³⁻⁴⁴ Mänit miägäp xhanehmä:

—Huuc mäadow, cab jaduhñ pøn mhawáanät coo tøø mba'amnähwa'ačh. Tu'uda'aquiä jim mnøcxät maa ja'a teediän, ween jaduhñ xyhixy coo tøø mjaančh pa'amnähwa'ačh. Mänit mguyoxø'øwät nebiä Moisés jecy yhanehmiän, jaduhñä cu'ughajxy ñajuø'øwät coo tøyhajtä mba'am tøø jiaančh naxy —nømä Jesús miänaañ.

⁴⁵ Pero cabä craa ñä'ä mädia'agymiäbøjcy, ja'a pia'am hänajty tøø yajnahwa'ačhíjábä. Coo tiu'ubøjcy, mänit tiägøoyy mädiaacpä nebiaty hänajty tøø jiaty. Wiinduhmyhagajptä mädia'agy jaduhñ wia'xy. Coo ja'a pa'amjäya'ayhajxy jaduhñ miädoyhajty coo ja'a Jesús hänajty miäyajpa'amnaxy, mänitä Jesús hajxy tiägøoyy høxtaabiä coo ja'a pia'amhajxy yajnáxäxät. Paadiä Jesús hänajty quia'a cajptägø'øwaañnä coo ja'a pa'amjäya'ayhajxy hänajty jia wi'i ñämech. Paadiä Jesús miähmøøñä jäguemduum maa jäya'ay quia'a hitiän. Mänitä Jesús ja'a pa'amjäya'ay may ñämejtsä. Wiinduhmyhagajptjaty hajxy hänajty choon.

2

¹ Cujequiä Jesús jadähooc quiajptägøoyy Capernaum. Mänitä mädia'agy wia'xy coo hänajty jim tøø miéjtscombä.

² Mänitä jäya'ayhajxy may miejch maa ja'a Jesús hänajty miejtsta'aguiän. Paquiä ja'a tøjc jaduhñ yhujch. Høxtä tøguubiaady hajxy miejch. Mänitä Jesús ja'a cu'ugä Diosmädia'agy tiägøoyy yajwiingapxøøbiä.

³ Mänitä pa'amjäya'ay tu'ug quiøømiejtsä cøømucy tecymiucy. Nämädaaxcä jäya'ayhajxy hänajty quiø'øy tsaajiooty.

⁴ Cabä pa'amjäya'ay hänajty hoy yajmedsa'añii maa ja'a Jesúsän, coo ja'a jäya'ayhajxy hänajty jiaančh tehñ miayyä. Mänitä mähdiøjc miäbejtä cuhjodiøjnähgøxp. Mänitä tøjc hajxy weeñtiä yajcuhwaach, jim mädooyyä maa ja'a Jesús hänajty pia'täna'ayän, mäduhñtiä pa'amjäya'ay hoy ñänaxy. Mänit jaduhñ quiuhdøøñajxä tsaajiooty. Jiiby hoy quiäda'agy maa ja'a Jesús wyiinduumän.

⁵ Paadiä pa'amjäya'ay yajmejtsä maa ja'a Jesúsän, ñajuøøby hajxy hänajty coo ja'a pia'am hänajty yajnaäänäxä. Coo ja'a Jesús jaduhñ yhjy coo ja'a miädia'agy hänajty miäbøgäänäxä coo hänajty miäyajtso'oga'añ, mänitä pa'amjäya'ay ñämaayyä:

—Mägu'ughajpä, tøø ja'a mboj tøø ja'a mgädieey xñähwa'açh —nømä Jesús miänaañ.

⁶ Jiibiä häna'c-hajxy hänajty näje'e piahäña'ay, ja'a Diosmädia'agy hajxy naxy yajnähiçøøbiä tsajtøgooty. Jiiby hajxy hänajty miämädoonaabiä. Mänit hajxy näje'e miänaañ quiopcooty:

⁷ “Tii yø'ø craa jaduhñ coo miäna'añ cooc tyijy yø'ø pa'amjäya'ay piojpä quiädieey tøø yajnähwáatsäxä. Cap pøn cuhdujt miøødä coo jäya'ayä piojpä quiädieey yajnähwáatsät; jagooyä Dios tu'uquiä miøødä.”

⁸ Näjuøøyy ja'a Jesús jaduhñ waambaty hajxy hänajty miädia'agy quiopcooty. Mänit hajxy ñämaayyä:

—Tii hajxy jaduhñ coo mwi'i miädia'agy mgopcooty.

⁹⁻¹¹ Høøch, Diosquëxyhøch høøch, páadyhøch cuhdujt nmøødä coochä jäya'ayä piojpä quiädieeyhajxy yaa nyajnähwáatsät hädaa yaabä naaxwiin. Hädaa mähdiøjc, nyajp'aamnaxáambiøch hädaa. Jaduhñhøch nyajcähxø'øga'añ cooch njaançh Diosquëxiä. Jaduhñä tøyhajt hajxy mmøødhájpät cooch cuhdujt njaançh møødä coochä jäya'ayä piojpä quiädieeyhajxy nyajnähwáatsät —nømä Jesús miänaañ.

Mänitä pa'amjäya'ay ñämaayyä:

—Tänaayyø'øg. Widsø'øg yø'ø mdsaa. Nøcxnä maa ja'a mdøjcän.

¹² Tuunä ja'a Jesús jaduhñ ñä'a mänaañ, mänitä pa'amjäya'ay jiaançh møcpøjcy. Mänit tiänaayyø'cy. Mänitä chaay wyidsø'cy. Mänit tiu'ubøjñä. Coo ja'a cu'ughajxy jaduhñ yhiçy, mänit hajxy nägøxiä jiaançh tehñ yagjuøøyy. Mänit hajxy miänaañ:

—Ni mänaa højts jaduhñ nga'a híxäm.

Mänitä Dios hajxy wyiingudsähgøøyy.

¹³ Mänitä Jesús ñøcxtägajch maa ja'a mejjiän. Mänitä jäya'ay jim may ñäméjtsägumbä. Mänitä Diosmädia'agy hajxy yajwiingapxøøyyä.

¹⁴ Jimä Jesús hänajty miejypia'ayo'oy, mänitä Leví yhiçy, ja'a Alfeo yhuung. Jim hänajty yhäña'ay meexäpa'a maa hajxy hänajty yajnähuudiu'udiän. Mänitä Leví ñämaayyä:

—Jam wädíjtäm —nømä Jesús miänaañ.

Mänitä Leví tiänaayyø'cy. Mänit piadu'ubøjcy.

¹⁵ Mänitä Jesúshajxy wioowä mägaabiä maa ja'a Leví ja'a tiøjcän, møødä jiamiøødtøjc. Nämayyä jäya'ayhajxy jim piamejch, ja'a Jesús hajxy hänajty pawädiçpä. Jiibiä yajnähuudiuutpädøjcä Jesús hajxy hänajty may miøødcaamiucy miøødhucmucy, møødä cuboj cugädieediøjc.

¹⁶ Jiibiä fariseoshajxy hänajty näje'e miähee'pna'ay, møødä häna'c-hajxy, ja'a Diosmädia'agy hajxy hänajty naxy yajnähiçøøbiä tsajtøgooty. Coo ja'a Jesús hajxy jaduhñ yhiçy coo ja'a yajnähuudiuutpädøjc-hajxy hänajty miøødcaamiugyii møødä cuboj cugädieejiäya'ayhajxy, mänitä Jesús ja'a jiamiøødhajxy ñämaayyä:

—Yø'ø mwiindsón, tii yø'ø yajnähuudiuutpädøjc coo miøødcaamiucy, møød yø'ø cuboj cugädieejiäya'ay —nømä fariseoshajxy miänaañ.

¹⁷ Miädoow ja'a Jesús jaduhñ coo hajxy jaduhñ miänaañ. Mänit hajxy ñämaayyä:

—Pøn jaduhñ møc, cab hajxy yajtsooyø'øy. Pøn jaduhñ pa'ammøød, je'eds hajxy jaduhñ yajtsooyøøby. Páadyhøch yaa tøø ngäda'agy hädaa yaabä naaxwiin coochä cuboj cugädieebiähajxy nnämä'awät coo ja'a yhäxøøgwiinmahñdy hajxy ween ñajtshixø'øy. Pønäc tyijy pojpä cädieey ca'a møød, cábøch hajxy je'e waamb nnäma'awa'añ —nømä Jesús miänaañ.

¹⁸ Cujecy, jimä Juan ja'a jiamiøødhajxy hänajty jaguiay yhity, møødä fariseoshajxy näje'e. Mänitä jäya'ayä Jesús hajxy hoy näje'e miäyajtøy:

—Yø'ø Juan ja'a jiamiøødhajxy, jaguiay hajxy yø'ø yhity, møød yø'ø fariseoshajxy. Pero miiçhä mjiamiøødhajxy, cab hajxy jaduhñ yhiçpä. Tisän —nømä Jesús ñämaayyä.

¹⁹ Mänitä Jesús yhadsooyy:

—Coo ja'a pøc ja'a hu'ug naxy jiadyii, cabä jäya'ayhajxy yhity jaguiay, ja'a hajxy woybä wichpä, coo ja'a jamiø'ød hajxy hänajty wyiingay wyiinhu'ugy. Cab hajxy hänajty jiootmayhaty.

²⁰ Pero habaadáannäp jaduñ cooçh yaa ndsoonaannä. Mänitøch mæbøjnbä ja'a njamiøødhajxy yhida'añ jaguiay. Jootmayhadaamb hajxy hänajtiän.

²¹ 'Ni pønä tuçwit quia'a hagø'yø'y jemýwyithaam. Ja'a jemýwyit, múgäp je'e. Ja'a tuçwit, cøødsäp je'ebä. Maas hanaxiä jiaac pagøødsät.

²² Jaanä jaduñduhmbä, ni pønä jemývyino quia'a cudemø'yø'y tuçwajhacxujiooty. Jaac xúnäp ja'a jemývyino jaduñ. Mägøødsø'øb ja'a tuçwajhacxuy jaduñ. Cøxäp ja'a jemývyino yhøxyocy. Nä'ägä tægóyyäp jaduñ nämetsc. Tægóyyäp ja'a tuçwajhacxuy. Jaanä tægóyyäbä jemývyinäbä. Páadiädsä jemývyino hajxy quiudemø'yø'y jemýwajhacxujiooty —nømä Jesús miänaañ.

²³ Poo'xxiøøjooty hänajty je'e, jimä Jesúshajxy hänajty wiädity trigocamjooty, møødá jiamiøødtøjc. Mänitä jiamiøødhajxy yohguiujc tiägøøyy trigowiingädsujtspä. Je'e hajxy hänajty jiøø'xaamby.

²⁴ Jimä Fariseoshajxy hänajty näje'e piawädijpä. Mänitä Jesús ñämaayyä:

—Tii yø'ø mjamiøødhajxy coo trigowiingädsuch poo'xxiøøjooty. Nej, cab hajxiäda'a ñajuø'yä coo ja'a cuhdujt jaduñ myiñä coo hajxy jaduñ mga'a tünät poo'xxiøøjootiä —nømä fariseoshajxy miänaañ.

²⁵ Mänitä Jesús miänaañ:

—Nej, cahnä Diosmädia'agy hajxy mgapxiä coo ja'a Davidhajxy jecy yäho'pøjcä møødá jiamiøødtøjc.

²⁶ Ja'a Abiatar hänajty tuumb teedywiindsøn. Mänitä David jiiby tiägøøyy Diostøgooty. Mänitä tsajcaagy quiaayy, ja'a teedyhajxy hänajty tøø quiuyoxø'yäbä Dioswiinduum. Mänitä David ja'a jiamiøødtøjc piuhmooyy. Hoorä, cabä cuhdujt hänajty myiñ coo ja'a David ja'a tsajcaagy hajxy jaduñ quiáyät. Jagooyyä teedy cuhdujt hajxy hänajty miøødá coo hajxy quiáyät.

²⁷ Mänitä Jesús miänáangumbä:

—Paadiä Dios ja'a poo'xxiøø quiunuu'xy, weenä jäya'ayhajxy mänit pioo'xy. Mijts jaduñ ja mänaamb, paadiä Dios ja'a jäya'ay piäda'agy cooc tyijy ja'a poo'xxiøø hajxy wyiingudsähgø'øwät. Cab jaduñ ñä'a tøyyä.

²⁸ Cooçh jaduñ nDiosquexiä, páadyhöch cuhdujt nmøødá cooçh nmähané'emät høxtä poo'xxiøøjootypaady —nømä fariseoshajxy ñämaayyä.

3

¹ Mänitä Jesús jadähooc tiøjtägøøyy tsajtøgooty. Jimä jäya'ay hänajty tu'ug cø'øma'ad.

² Jimä fariseos ja'a Jesús hajxy hänajty miähee'pna'ay pø jaançh mäyajpa'amnaxaamb hänajty je'e poo'xxiøøjooty. Wiinmahñdy hajxy hänajty yhøxtaaby nebiä Jesús hajxy yajtsumøøjät.

³ Mänitä cø'øma'adpä ñämaayyä:

—Tänaayyø'øg. Min yam cujc täna'aw —nømä Jesús miänaañ.

Mänitä mähdiojc jaduñ quiudiuuñ.

⁴ Mänitä fariseoshajxy ñämaayyä:

—Nebiä cuhdujt myiñ coo hajxy ndúunämät poo'xxiøøjooty, hoy tøgä haxøøgä. Nej, jaduñä cuhdujt myiñ coo jäya'ay hajxy nyajtsóocämät poo'xxiøøjootiä, tøgä jaduñ myiñ coo jäya'ay hajxy nyaghó'cämädä —nømä Jesús miänáangumbä.

Pero cabä fariseoshajxy waamb ñä'ägä hadsooyy.

⁵ Mänit hajxy wyiinhee'ppejtä, mäduhñtiä Jesús hajxy hänajty jiuhdánaawiädity. Jootmayhappä Jesús hänajty coo ja'a fariseos ja'a cø'øma'adpä hajxy hänajty quia'a näxuuch. Cabä Jesús hänajty jiootcuçjä. Mänitä mähdiojc ñämaayyä:

—Xajtøw yø'ø mgø'ø.

Mänitä quiø'ø jiaanč xajtøøyy. Tuunä jaduħn ñä'ä xajtøøyy, mänitiä quiø'ø yhojøøyy.

⁶ Mänitä fariseoshajxy wyiimbijty. Mänit hajxy ñøcxy maa ja'a Herodes jiamioødhajxiän. Ja'a Herodes, gobiernä hänajty tiuumby. Mänitä fariseoshajxy nägøxiä quiojyquiapxyhajty nebiä Jesús hajxy yajyagho'ogøøjät.

⁷ Coø ja'a Jesús hajxy jiiby chohñ tsajtøgooty møødä jiamioødtøjc, mänit hajxy jim ñøcxtägajch maa ja'a mejypia'ajän. Jimä jäya'ayhajxy hänajty may piawädity. Galilea hajxy hänajty chooñ.

⁸ Tøø ja'a mädia'agy hänajty wia'xy wiinduhmyhagajpt coø ja'a Jesús madiu'u hoy-yagjuøøñäjatypä hänajty yajcähxø'øgy. Coø ja'a jäya'ay ja'a mädia'agy hajxy jaduħn miädooyy wiinduhmyhagajpt, mänitä Jesús jäya'ay may ñämejtsä. Wiinduhmyhagajpt hajxy hänajty chooñ, møød jim Judeanaaxooty, møød jim Jerusalén, møød jim Idumea, møød jim Jordánmøjnøøhawiiimb, møød jim Tiro, møød jim Sidón.

⁹⁻¹⁰ Coø ja'a pa'amjäya'ayhajxy hänajty may tøø yajmøcpøgyii, paadiä Jesús hänajty jia wi'i ñähdonañii ja'a jäya'ayhajxy jaac pa'ammøødpä, ween hajxy jaduħn ñähwaatspä. Høxtä niyhanø'tsmüjcäp hajxy hänajty. Mänitä Jesús ja'a jiamioødtøjc ñämaayy coø barcohuung hajxy jim nähix hahixø'ø miähäñá'awät, jaduħnä Jesús jiiby paquiä piédät coø hänajty pianø'ødsa'añii ja'a cu'ug.

¹¹ Jimä jäya'ayhajxy hänajty wiädijpä ja'a møjcu'umøødpä. Homiaajä Jesús hajxy hänajty yhixy, mänitä Jesús hajxy hänajty wyiinjjicäda'agy, mänitä Jesús hajxy hänajty ñäma'ay:

—Dios miich xyHuunghajp —jaduħnä møjcu'umøødpähajxy hänajty wyi'i ya'axy.

¹² Mänit hajxy yhanehmä coø ja'a Jesús hajxy quia'a nägäpxät majiäya'ayhagujc. Ja'a Jesús jaduħn hanehm.

¹³ Mänitä Jesús jim ñøcxy tunguhduum. Mänitä Jesús ja'a jiamioød miøjyaaxy, pøn hänajty hoy quipxy miøødwäditaamby. Coø hajxy jim quioo'ty maa Jesús hänajtiän,

¹⁴ mänit hajxy nämajmetsc wyiinguejxä coø ja'a Jesús hajxy quipxy miøødwädität, møød coø ja'a Diosmädia'agy hajxy nøcxy yajwa'xy.

¹⁵ Mänitä cuhdujt hajxy miooyyä coø jäya'ay hajxy yajñähwá'adsät, ja'a hajxy møjcu'umøødpä.

¹⁶ Jaduħnä Jesús ja'a jiamioødhajxy hänajty xiøhaty, ja'a hajxy nämajmetspä. Tu'ug hänajty xiøhaty Simón. Je'e ja'a Jesús yajxøbejt Pedro.

¹⁷ Jimä Zebedeo yhuunghajxy hänajtypä, ja'a Santiago møødä Juan. Jue'e hajxy yajxødägøøyyä Boanerges. Jaduħn hänajty miädia'agytiägø'øy coø hajxy hänajty paquiä jiaanč tehñ yhawa'anda'agy nebiä häneejän.

¹⁸ Ja'a hajxy hänajty jaac jimhä, jaduħn hajxy hänajty xiøhaty Andrés, møødä Felipe, møødä Bartolomé, møødä Mateo, møødä Tomás, møød Santiago, ja'a Alfeo yhuung, møødä Tadeo, møødä Simón, ja'a hänajty xøhajp ja'a celote.

¹⁹ Ja'a miämajmetspä hänajty xøhajp Judas Iscariote. Je'e ja'a Jesús cujegy too'c; ja'a Jesús miädsiphajxy cø'ødägøøyyä.

²⁰ Mänitä Jesús hajxy ñøcxy maa tiøjcän møødä jiamioødhajxy.

Mänitä jäya'ayhajxy may miéjtscumbä maa ja'a Jesús hajxy hänajtiän. Paadiä Jesús hajxy hänajty quia'a näbaadøøyyäxä mänaa hajxy jaduħn quiáyät møødä jiamioød, coø ja'a pa'amjäya'ayhajxy hänajty wyi'i yhadsipy coø ja'a pia'amhajxy yajñäxäxät.

²¹ Coø ja'a Jesús ja'a jiuju miägu'ughajxy jaduħn miädoyhajty coø ja'a Jesús hänajty jiaanč tehñ yhadsibyyii, mänitä Jesús hajxy ñämejch. Mänitä Jesús hajxy jia yajñøcxaañ hadsip. Jaduħn hajxy hänajty miäna'añ cooc tyijy ja'a Jesús hänajty tøø quiuhhiñ.

²² Mänitä häna'c-hajxy näje'e quiädaacy, ja'a Diosmädia'agy hajxy hänajty naxy yajñähixøøbiä tsajtøgooty. Jerusalén hajxy hänajty tøø chohñda'agy. Mänit hajxy miänaañ:

—Yø'ø Jesús, puhbéjtäp yø'ø ja'a mõjcu'ugong, paadiä mäjaa miøødä coo jäya'ay yajnahwa'ačh, ja'a hajxy mõjcu'umøødpä. Haa ca'a, ja'a mõjcu'ugong ja'a mõjcu'u hajxy wyiindsønħajpiä —nømä Jesús wyiingapxpejtä.

²³⁻²⁶ Mänitä yajnahixøøbiädøjc-hajxy miøjyaaxä. Mänitä Jesús tiägøøyy yajnahixøøbiä cuento yajmäbaadyhaam.

—Coo jäya'ayhajxy ñimiädsibø'øwøøjät quipxyjiaty tu'cajpt, cab hajxy hoy ñimiøødtunáañänä. Jaanä jaduhñduhmbä, coo jäya'ayhajxy ñimiädsibø'øwøøjät quipxyjiaty tu'que'ex, cab hajxy hoy tøgooty ñimiøødhidáañänä. Jaanä jaduhñduhmbä, coo ja'a mõjcu'uhajxy ñimiädsibø'øwøøjät quipxyjiaty mõjcu'u, cab hajxy jaduhñ hoy wiäditaañnä. Cøxäp hajxy jaduhñ quiuhdägoyy. Jaduhñä tøyhajt hajxy mmøødhádät coočhä mõjcu'ugong xquia'a puhbety.

²⁷ Jaanä jaduhñduhmbä, ni pønä mõcjäya'ay hoy mga'a mäméedsät tijaty jiihy miøød tiøgooty. Mänit mäsøcypiä coo jawyiin mgø'øxots mdecyxiódsät, mänitäs hoy mmäméedsät.

²⁸ Tøyhajt jaduhñ coo ja'a Dios jäya'ay miämee'xa'añ nebiatiä pojpä cädieey hajxy miøødä, waambatiä Dios hajxy tøø miägaptägoy.

²⁹ Pero pønä Dioshespíritu tøø miägaptägoy, je'e mäsøcypiä, cab hajxy mänaa miämee'xáañänä. Homiánaaxøø ja'a piojpä quiädieey hajxy miäwädita'añ —nømä Jesús miánaañ.

³⁰ Paadiä Jesús jaduhñ miánaañ, coo hänajty tøø ñänømyii cooc tyijy ja'a mõjcu'ugong hänajty miøødwädity.

³¹⁻³² Jimä Jesús hänajty miädia'agyñä, mänitä tiajhajxy miejch møødä piuhya'ayhajxy. Coo jäya'ayhajxy hänajty jiaančh tehñ miayyä tøgooty, paadiä tiajhajxy tøguum miähmøøyy. Mänitä capxy hajxy quiejxy tøgooty coo ja'a Jesús ween yhuuc pädsømy. Jiibiä Jesús jäya'ay hänajty may jiuhhäñaawiädityii tøgooty. Mänit hajxy miánaañ:

—Ximä mdaj xwyi'i yajtøy møødä mbuhya'ayhajxy møødä mbuhdo'oxyhajxy.

³³ Mänitä Jesús yhadsooyy:

—Pønħøch ndajhajpy; pønħøch nbuhya'ayhajpy.

³⁴⁻³⁵ Mänitä Jesús jäya'ay wyiinhee'ppejty mäduhñtiä hänajty jiuhhäñaawiädityii. Mänit miánaañ:

—Pønjätyhøch nDeedy miädia'agy cudiúunäp, je'ečh ndajhajpy, je'ečh nbuhya'ayhajpy —nømä Jesús miánaañ.

4

¹ Mänitä Jesús jadähooc yhädáaccumbä mejypia'a Diosmädia'agy-yajwiingapxøøbiä. Mänitä jäya'ayhajxy may miejch maa je'e hänajtiän. Coo hawa'adspä hänajty jim quia'a hity pu'uwiing, paadiä Jesús barcohuungooty tiägøøyy mejywyiing. Mänit jiihy yhäñaaguiädaacy. Jimä jäya'ayhajxy miähmøøyy pu'uwiing hamädoowhijpä waambatiä Jesús hänajty miädia'agy.

² Mänitä Jesús tiägøøyy yajnahixøøbiä cuento-yajmäbaadyhaam.

³ —Huuc mädoow hajxy, mänitä jäya'ay tu'ug tiu'ubøjcy trigowøjpä.

⁴ Näje'e trigotøømd quiahy tu'haam. Mänitä muuxyhajxy hoy pyiwø'øgy.

⁵ Wiingtuumä trigotøømd hoy quiáhgumbä tsaajoot maa naax hänajty quia'a møødän. Paquiä trigotøømd miujxy coo naax hänajty quia'a cøøcä.

⁶ Pero nägooyyä xøø piädsøømy, cøjxä trigohuung tiø'øch coo tyicts hänajty cøøc tøø quia'a häda'agy.

⁷ Wiingtuum hoy quiáhgumbä maa hapyt hänajty jiaančh tehñ miayyän. Coo hapyt jaduhñ yee'cy, cøjx jaduhñ ñähdäna'ayii. Ni tiøøm ja'a trigo quia'a pejty.

⁸ Wiingtuum hoy quiáhgumbä maa ja'a naax hänajty jiaanč tehñ tío'quiän. Jaanč tehñ yhojoojy ja'a trigo jim. Näje'e hii'xmajcpajc miøødä tu'wipä; näje'e tågøøghii'xpajc miøødä; näje'e mägo'xpajc miøødä tu'wipä.

⁹ Mänitä Jesús jiaac mänaañ:

—Pøn hädaaduhñ wiinjuøby, wéenhøch nmädia'agy xmiäbøjcä.

¹⁰ Coö majiäya'ayhajxy wyiimbijty, jimä Jesús ja'a jiamiøød miøødmähmøoyy, ja'a hajxy hänajty nämajmetspä, møødä wiingjäya'ay ja'a näwéeñtiäbä. Mänitä Jesús ñämaayyä coö quiapxtówät waambaty hänajty tøø miädia'agy.

¹¹ Mänitä Jesús yhadsooyy:

—Jaduhñä Dios jioot chocy coö mijts mwiinjuø'owät nebiä miäjaa yajcähxø'øga'añ. Hijty, cap pøn hijty wyiinjuø'oy. Yøø wiinghäna'c-hajxy, ni yøøhajxy quia'a wiinjuø'oy. Páadyhøch yøø häna'c-hajxy nyajñähixø'oy cuento-yajmäbaadyhaam.

¹² Hoy hajxy jia mädoj, cab hajxy wyiinjuø'oy; jaduhñä Dios hajxy quia'a jøjpøgø'owät; jaduhñä piojpä quiädieey hajxy quia'a yajñähwáatsäxät.

¹³ Mänitä Jesús jiaac mänaañ:

—Mijts, pø cab hajxy jaduhñ hoy mwiinjuø'owa'añ waambátyhøch naamñä tøø ngapxy cuento-yajmäbaadyhaamä, ni jaduhñ hajxy hoy mga'a wiinjuø'owa'añ waambátyhøch njaac yajmøødmädia'aga'añ cuento-yajmäbaadyhaam.

¹⁴ Ja'a jäya'ay trigowøjpä, jaduhñ mäwiinäts miäbaady nebiä Diosmädia'agy-yajwa'xpän.

¹⁵ Ja'a trigotøømd cáhwäbä tu'haam, jaduhñ mäwiin miäbaady nebiä jäya'ay ja'a Diosmädia'agy hajxy näje'e jia mädojyän. Pero nägooyyä ja'a møjcu'u ñämech, mänitiä hajxy yagjahdiägóoyyaxä waambaty hajxy tøø yajwiingapxø'oyii.

¹⁶ Ja'a tøømd cáhwäbä tsaajoot, jaduhñ mäwiin miäbaady nebiä jäya'ay ja'a Diosmädia'agy hajxy näje'e paquiä miäbøquiän, Jaanč tehñ xioondaacp hajxy jaduhñ.

¹⁷ Pero cab hajxy jejcy miäbøcy. Nägooyyä hajxy jaduhñ chaaçhtiuñii ja'a Diosmädia'agyquiøxpä, mänit hajxy ñajtshixøøñä.

¹⁸ Ja'a tøømd cáhwäbä maa hapy jiaanč tehñ miayyän, jaduhñ mäwiin miäbaady nebiä jäya'ay ja'a Diosmädia'agy hajxy näje'e jia mäbøquiän.

¹⁹ Pero jiaanč tehñ jiahmiejchp hajxy jaduhñ ja'a hädaa yaabä naaxwiimbä. Je'e hajxy jaduhñ wyl'i ñädajpy wyl'i ñämaaby neby hajxy hoy chänä'awät, neby hajxy hoy yhäyówät, møød maa mäyøøhadyiibän. Yajtägoobiä Diosmädia'agy hajxy jaduhñ.

²⁰ Ja'a tøømd cáhwäbä maa naax jiaanč tehñ tío'quiän, jaduhñ mäwiin miäbaady nebiä jäya'ay ja'a Diosmädia'agy hajxy näje'e hamuumdu'joot miäbøquiän. Hoy hajxy jiaanč tehñ quiuidiuñ. Jaduhñ hajxy miäbaady nebiä trigo hii'xmajcpajc miøødän tu'wipä, møød nebiä tågøøghii'xpajc miøødän, møød nebiä mägo'xpajc miøødän tu'wipä.

²¹ Mänitä Jesús jiaac mänaañ:

—Coö jäya'ay jøøn hajxy quiudøø'xø'oy, cøxp hajxy yujcoñ. Cab hajxy jiiby quiuhjupy cubetapa'c. Ni jiiby hajxy quia'a päda'agy maabejtpa'c.

²² Jaanä jaduhñduhmbä, tijaty jaduhñ hijp yu'učh, tsipcøxp jaduhñ quiøxy cähxø'øga'añ.

²³ Pøn jaduhñ wiinjuøby, wéenhøch nmädia'agy xmiäbøjcä.

²⁴ Mänitä Jesús jiaac mänaañ:

—Huuc wiinjuø'ow hajxy nébiøch cham nyajmøødmädia'aga'añ; pøn hädaa mädia'agy hoy wiinjuøby, maas hoy jaduhñ jiaac yajwiinjuø'owa'añii.

²⁵ Pønøch nmädia'agy tøø xmiäbøjcä, je'ečh njaac yajñähixø'owaamby. Pero pønøch nmädia'agy tøø xquia'a mäbøjcä, cábøch je'e tii nyajñähixø'owaañnä. Høxtä ji-ahdiägoyyaamby je'e mädyii tyijy tøø jia wiinjuø'oy.

²⁶ Mänitä Jesús jiaac mänaañ:

—Coö ja'a Dios ja'a miøcmäjaa yajcähxø'øga'añ, jaduhñ mäwiin miäbaady nebiä jäya'ay ñi'ibiän.

²⁷ Coo ñiippädø'øy, mänit nõcxy miaanä coo tøø quioodsø'øy. Cujaboom, coo jioobø'øy, mänit piädø'cumbä. Pero cab jaduññ ñajuø'øy nebiä tøømd miuxy. Hix, hamdsoo ja'a tøømd miuxy yeegy.

²⁸ Ja'a tøømd, jiibiä miäjaa piaady naaxooty. Coo miuxy, mänit yeegy. Coo yeegy, mänit piøjy. Coo piøjy, mänit tiøømbety. Coo tiøømbety, mänit miäjay.

²⁹ Coo miäjay, mänit hajxy chucy. Tøø jaduññ yhabaatnä coo hajxy yajpädø'ögät.

³⁰ Mänitä Jesús jiaac mänaañ:

—Nebiaduññ njaac yajmäbaatämät coo ja'a Dios ja'a miøcmäjaa jaduññ yajcähxø'øga'añ.

³¹⁻³² Coo ja'a Dios ja'a miøcmäjaa yajcähxø'øga'añ, jaduññ mäwiin miäbaady nebiä mostazapajcän. Jaanč tehñ chay ja'abi' mostazapajc jaduññ. Ni mädyii hujts piäjc jaduññ quia'a tsayyä nebiä habi' mostazapajc chayyän. Pero coo mni'ibät, jaanč tehñ piaquiä jaduññ yeegy cøxp. Mäjatyjaty yhaa'x yeegy. Høxtä hoyyä muuxyhajxy jim pie'eñ yhaa'xjooty.

³³⁻³⁴ Haagä hädaaduhmbä cuento-yajmäbaadyhaamä Jesús ja'a cu'ug hänajty yajwiin-gapxø'øy, mäduññtiä hajxy hänajty hoy wyiinjuø'owa'añ. Pero coo ja'a cu'ug hänajty tøø wyiimbijnä, mänitä Jesús ja'a jiamiøød hawiing ca'xy quiapxtøønä, ja'a hajxy hänajty nämajmetspä.

³⁵ Coo chuujøøyy, mänitä Jesús ja'a jiamiøød ñämaayy:

—Tsøc hajxy jáamäm barcojooty; jam hajxy jimhaamby mejyhawiimb.

³⁶ Jiibiä Jesús hajxy hänajty yhäña'ay barcojooty møødä jiamiøødhajxy. Mänit hajxy tiu'ubøjcy. Jiibiä jäya'ayhajxy näje'e piadu'ubøjpä wiingbarcojooty. Pero ja'a majiäya'ay, jim hajxy miähmøøyy mejypia'a.

³⁷ Mänit møc tiägøøyy pojpä. Mänitä mejy tiägøøyy ja'tspä. Mänitä barco ñähja'tspejtä. Mänitä nøø com tiägøøyy barcojooty. Høxtä hujts ja'a barco jaduññ. Quinaammbä barco hänajty.

³⁸ Pero ja'a Jesús, maab hänajty je'e jiiby barcohøjxhaam. Cuhnø'øxø'øy hänajty jiiby mia'ay. Jaanč tehñ chähgøøbiä Jesús ja'a jiamiøødhajxy hänajty. Mänitä Jesús hajxy hoy yuxy. Mänitä Jesús ñämaayyä:

—Wiindsøn, nej, caj mdajy mmayyä coo hajxy nguhdägoyyáañämä.

³⁹ Coo ja'a Jesús mia'abiädø'cy, mänitä poj yhojy møødä mejy coo yuungø'øwät. Mänitä poj jiaanč mooñ; møødä mejy, yuungøøyy je'ebä.

⁴⁰ Mänitä Jesús ja'a jiamiøød ñämaayy:

—Tii hajxy hijty coo mwili chähgø'øy. Nej, cab hajxy mmäbøquiä coo ch møcmäjaa nmøødä.

⁴¹ Jaanč tehñ chähgøøby hajxy hänajty. Mänit hajxy hamee'ch ñiñämaayyä:

—Pønäda'a yøø; høxtä poj møødä mejy, cudiúunäxäbä miädia'agy yøø.

5

¹ Mänitä Jesús hajxy jim miehch mejyhawiimb, maa ja'a naax hänajty xiøhatiän Gerasa.

² Coo hajxy miänajcy barcojooty, jimä jäya'ay hänajty tu'ug tiäna'ay jäguemjuøøby. Møjcu'u hänajty tøø yajtägø'øyii.

³ Jutjooty hänajty chäna'ay maa ja'a ho'ogyjiäya'ay hajxy hänajty ñaaxtägø'øyän. Jaanč tehñ miøcä craa hänajty. Ni cadenahaamä jäya'ayhajxy hänajty hoy quia'a cø'øxots quia'a tecyxiodsa'añ.

⁴ Mayhooc hajxy hänajty tøø jia cø'øxoch tøø jia tecyxioch cadenahaam. Pero wyl'i yaghapodøøbiä cadena hänajty. Ni pøn hänajty quia'a mäjäda'aga'añ.

⁵ Xøømdsuhm hänajty jim ya'axy jiocy cabäsantäjooty møød tunjooty. Naxy hänajty tsaahaam hamdsoo ñiçhugyii.

⁶ Coo ja'a Jesús jaduhñ yhijsä jäguem, mänit päyø'øguiä ñänøcxä. Mänit hoy wyiinji-jcäda'agyii.

⁷⁻⁸ Mänitä Jesús ja'a møjcu'u ñämaayy:

—Jua'ads miičh jii by maa yø'ø craajän.

Mänitä møjcu'u møc yaaxy:

—Miičh Jesús, miičhä Dios xyHuunghajp, ja'a jim tsajpootypä. Nej mnijjäwø'øyii møød høøhcøxpä. Tuñä mayhajt, ca'ačh xchaačhtiuñ. Dios, cøxp je'e.

⁹ Mänitä Jesús ja'a møjcu'u miäyajtøøyy:

—Tii mxøhaty.

Mänitä møjcu'u yhadsooyy:

—Legiõnghøch nxøhaty. Páadyhøch jaduhñ nxøhaty coo højts jaduhñ njaančh tehñ ñämayyä.

¹⁰ Mänitä Jesús miänuu'xtaacä coo ja'a møjcu'uhajxy quia'a høxquexøøjät jäguem.

¹¹⁻¹³ Jim wiingón maa ja'a Jesús hajxy hänajtiän, jim mejypia'a, jimä hädsømhajxy hänajty may yuumydiajy tuñmøjc. Nämejtsmil hajxy hänajty wiädity. Mänitä Jesús jadähooc miänuu'xtaacä coo ja'a møjcu'uhajxy ween jim quiexyii maa ja'a mayhädsømän, weenä hädsømhajxy nøcxy yajtägø'øyii. Mänitä møjcu'uhajxy jiaančh quejxä maa ja'a hädsømän. Mänitä craa ñähwaach, ja'a hänajty tøø miøjcu'uyajtägø'øyijäbä. Mänitä hädsømhajxy cøjx yajtägø'øyii. Mänit hajxy päyø'øguiä yhädaacy mejjiooty. Cøjx hajxy jii by ñøøji'xø'øy.

¹⁴ Ja'a häna'c-hajxy hänajty jim hädsømgüeendähajpä, cøjx hajxy piäyø'øgy. Hoyyä mädia'agy hajxy jim yajwa'xy cajptooty møød cajtpa'a neby hänajty tøø jiadyii tøø tiuñii. Coo ja'a cu'ughajxy jaduhñ miädooyy, mänit hajxy hoy yhijsy.

¹⁵ Coo hajxy jim miejch maa ja'a Jesús hänajtiän, mänitä craa hajxy yhijsy, ja'a hijty pa'ammøødpä, coo hänajty tøø ñähwáatsänä ja'a møjcu'u. Jim je'e hänajty witmøød yhäñaañä. Coo hijty pia'ammøøpä, nähwa'ads høxwa'ads hijty wiädity. Tøø hänajty wyiinmahñmejtsnä. Jaančh tehñ yagjuøøyy ja'a cu'ughajxy jaduhñ coo ja'a craa hajxy yhijsy coo ja'a pia'am hänajty tøø ñähwáatsänä. Høxtä tsähgøøyy hajxy jaduhñ.

¹⁶ Mänit hajxy cøjx yajmøødmädia'agyii neby hänajty tøø jiadyii tøø tiuñii. Ja'a jäya'ayhajxy jaduhñ hijxäbä coo ja'a hädsøm ja'a møjcu'u hajxy yajtägøøyyä, je'edshajxy jaduhñ mädiaac.

¹⁷ Mänitä cu'ug ja'a Jesús hajxy miänuu'xtaacy coo jim chónät maa ja'a quiajpthajxiän.

¹⁸ Coo ja'a Jesús hänajty wyiimbidaannä barcojooty, mänit jaduhñ ñämaayyä coo ween piadu'ubøgyii. Ja'a craa jaduhñ mänaañ, ja'a pia'am hänajty tøø yajnájxäxäbä.

¹⁹ Mänitä Jesús ja'a craa ñämaayy:

—Caj, ca'ačh xpianøcxy. Nøcx jim maa ja'a mdøjcän, maa ja'a mjujy maa ja'a mmägu'ugän. Nøcxä mädia'agy yajwa'x coo miičhä Dios tøø xñäxuučh, coo miičhä Dios ja'a møjcu'u tøø xyajnähwa'ačh.

²⁰ Mänitä craa jiaančh nøcxy maa ja'a tiøjcän. Mänitä mädia'agy jim tiägøøyy yajwa'xpä maa naax hänajty xiøhatiän Decápolis. Jaduhñ je'e mädia'agytiägø'øy majc-cajpt. Jaduhñä miädia'agy hänajty yajwa'xy coo ja'a Jesús ja'a mähdijc møjcu'umøødpä hänajty tøø yajnähwa'ačh. Coo ja'a cu'ughajxy jaduhñ miädooyy, mänit hajxy jiaančh tehñ yagjuøøyy.

²¹ Mänitä Jesús hajxy wyiimbijnä barcojooty møøpä jiamiøødhajxy. Coo hajxy jim miéjtscombä mejyhawiimb maa hajxy hänajty tøø chohnda'aguiän, mänit hajxy jim biarcomänajcy mejypia'a. Mänitä Jesús jäya'ay may ñämejtsä.

²² Mänitä Jesús jäya'ay tu'ug wyiinjiicädaacä. Jairo hänajty xiøhaty. Je'e hänajty jim tuumb wiindsón maa ja'a tsajtøjcän.

²³ Mänitä Jesús miänuu'xtaacä:

—Wiindsón, mōjtá'agyhøch nhuung. To'oxiäna'c je'e. Majmetscjumøjt miøødä. Jámhøch nhuung cø'ønähgájpäc, ween jaduhñ miøcpøcy —nømä Jairo miänaañ.

²⁴ Mänitä Jairo ja'a Jesús miødhajty. Jimä jäya'ay ja'a Jesús hajxy hänajty may pianø'øch piabooñ.

²⁵ Jimä tajjäya'ay hänajty tu'ug pa'ammøød majiäya'ayhagujc. Majmetscjumøjtä ñø'ty hänajty tøø xiee'xy jabom-jabom.

²⁶ Tøø ja'a mähdiøjc hänajty jejcy jia yajtsooyø'øy maa ja'a doctorhajxiän. Pero cábädsä pia'am hänajty ñä'ägä yajnájxäxä. Tøø ja'a xiädø'øñ hänajty quiøjxnä tii jaduhñ ñä'ä jaac yajniñämäjuyø'øwøøjäp. Coø hänajty jaduhñ ñä'ägä yajtsooyø'øy tehngajnä, maas hanaxiä pia'am hänajty jaduhñ jiaac tehñ miøjta'agy.

²⁷⁻²⁸ Coø ja'a mähdiøjc jaduhñ miädoyhajty coø ja'a Jesús hänajty wiädity mäba'amyajnajxpä, mänit jaduhñ wyiinmaayy quiopcooty: “Cooch yø'ø wyit häyaa nnä'ä nähdoonät, náxäbøch nba'amäda'a häyaajä.” Mänitä Jesús jiøguyohdiägøøyyä. Mänitä wyit jiaanč nähdoonäxä.

²⁹ Mänitiä tajjäya'ay ñø'ty jiaanč hadujcy. Mänit ñijiäwøøyyä coø ja'a pia'am hänajty tøø ñaxy.

³⁰ Mänitä Jesús ñijiäwøøyyä coø tu'jäya'ay hänajty tøø miøcpøcy ja'a miäjaahaam. Mänitä Jesús ja'a jäya'ay cøjx wyiinhee'ppety. Mänit miänaañ:

—Pønhøch nwit tøø xñähdoonä.

³¹ Mänitä jiamiøødhajxy yhadsooyy:

—Tii jaduhñ coø myajtøy pø tøø miič jäya'ay mwit xñähdoonä. Haa ca'a, majiäya'ay hajxy jaduhñ xwyi'i pianø'tsäma —nømä Jesús ñämaayyä.

³² Pero jimä Jesús hänajty yhøxta'ayñä pønä wyit hänajty tøø ñähdoonäxä.

³³ Ja'a tajjäya'ayä, jaanč tehñ chähgøøby hänajty je'e. Paady hänajty chähgø'øy coø hänajty ñajuø'øy neby hänajty tøø miøcpøcy. Mänitä Jesús hoy wyiinjiicäda'agyii tsäyúuyyap. Mänitä tajjäya'ay ñägäpax neby hänajty tøø miøcpøcy.

³⁴ Mänitä Jesús miänaañ:

—Huong, paady miič mba'am tøø ñaxy coø tøø mmäbøcy cooçh mäjaa nmøødä cooçhä jäya'ay tøy njaanč yajpa'amnaxy. Nøcxnä jootcuyc.

³⁵ Jimä Jesús hänajty miädia'agyñä, mänitä jäya'ayhajxy näje'e miehch. Jim hajxy hänajty tøø choñda'agy maa ja'a Jairo tiøjcän. Mänitä Jairo ñämaayyä:

—Tøø ja'a mhuung yho'nä. Ca'a Jesús mhadsijpnä. Tii jaduhñ jim ñä'ä jaac túnäp. Tøø ja'a mhuung yho'nä.

³⁶ Coø ja'a Jesús jaduhñ yhamädoonajxy, mänitä Jairo ñämaayyä:

—Ca'a mga'a mäbøcy. Ca'a mjootmayhaty —nømä Jesús miänaañ.

³⁷ Mänitä Jesús miänaañ coø pøn jim quia'a panøcxät maa ja'a Jairo tiøjcän. Jagóoyyägä Pedrohajxy jim ñøcxät møødä Santiago møødä Juan, ja'a Santiago piuhya'ay.

³⁸ Coø hajxy jim miehch maa ja'a Jairo tiøjcän, jaanč tehñ jiøøby jaanč tehñ yaaxpä jäya'ayhajxy hänajty jim.

³⁹ Mänitä Jesús hajxy tiøjtägøøyy. Mänitä Jesús miänaañ:

—Cajxä yø'ø to'oxiäna'c ñä'ä hó'oguiäbä. Tii hajxy coø mwi'i jiø'øy coø mwi'i ya'axy. Nä'ä maab yø'øduhñ.

⁴⁰ Coø ja'a Jesús jaduhñ miänaañ, mänit ñäxiicä. Mänitä Jesús ja'a jäya'ay cøjx yhøxquejxpädsømy tøghaguuy. Mänitä Jesús ja'a to'oxiäna'c hajxy ñänøcxy maa to'oxiäna'c hänajty quio'na'ayän, møødä Jesús ja'a jiamiøødhajxy, møødä to'oxiäna'cä tiaj tieedyhajxy.

⁴¹ Mänitä Jesús ja'a to'oxiäna'c wyidsø'cy. Mänit ñämaayy:

—Quixyhuung, pädø'øg.

⁴² Tuunä ja'a Jesús jaduhñ ñä'ä mänaañ, mänitiä to'oxiäna'c jiaanč pädø'cy. Mänit yo'oyø'cy. Jiaanč tehñ yagjuøøyy ja'a Jairohajxy jaduhñ møødä Jesús ja'a jiamiøødhajxy.

⁴³ Mänitä Jairohajxy yhanehmä coo hajxy jaduhñ quia'a mädiá'agät coogä yhuung hänajty tøø jiuypioøcy. Mänit hajxy ñämáayyábä coo yhuung hajxy yajcáyät. Ja'a Jesús jaduhñ mänaañ.

6

¹ Coo ja'a Jesús hajxy jim chónhngumbä møødä jiamiøødhajxy, mänit hajxy jim ñøcxy maa ja'a cajpt hänajty xiøhatiän Nazaret. Jimä Jesús hänajty ñä'ägädä tsooñ.

² Coo ja'a poo'xxiøø yhabaaty, mänitä Jesús jim ñøcxy maa ja'a tsajtøjcän. Mänit tiägøøyy yajñähixøøbiä. Coo ja'a cu'ughajxy jaduhñ miädooyy, mänit hajxy jiaançh tehñ yagjuøøyy. Mänit hajxy tiägøøyy niñämáayyábä:

—Maa yø'ø craa mädia'agy jaduhñbä tøø ñä'ä maañ yhabøcy coo jaduhñ jiaançh tehñ jiaty jiaançh tehñ ñajuø'øy, coo jaduhñ hoy-yagjuøøñäjaty yajcähxø'øgy. Haa ca'a, højts nmägunaaxhájtam yø'øjä.

³ Je'e yø'ø, ja'a hijty tsejtspä pujxpä. Ja'a María yhuung yø'ø. Hajchhájtaep yø'ø, ja'a Santiago, møødä José, møødä Judas, møødä Simón. Yaa ja'a piuhdo'oxyhajxy chäna'ay maa højts ngajptän.

Coo ja'a Jesús hänajty jim chooñ Nazaret, paady hänajty jim quia'a mämøjø'øy quia'a mämayø'øyii.

⁴ Coo ja'a Jesús jaduhñ miädooyy, mänit miänaañ:

—Homiaaja ja'a Dioswiingueypähajxy wyiingudsähgø'øyii. Jagooyyä hajxy jim quia'a wiingudsähgø'øyii maa yhamdsoo cajpthajxiän, maa yhamdsoo tøjc-hajxiän.

⁵ Coo ja'a Jesús hänajty jim quia'a mämøjø'øy quia'a mämayø'øyii, paady hänajty jim madiu'u hoy quia'a yajcähxø'øga'añ. Nämets nädägøøquia pa'amjäya'ayhajxy jim ñä'ä maañ yajpa'amnajxä cø'ønähgapyhaam.

⁶ Jiaançh tehñ yagjuøøbiä Jesús hänajty jaduhñ coo ja'a miädia'agy jim quia'a jøjpøgøøyyäxä.

Mänitä Jesús ja'a mädia'agy jim tiägøøyy yajwa'xpä mäduhñjatiä cajpthuung wiin-gonbä.

⁷ Mänitä Jesús ja'a jiamiøød wyiinguejxy, ja'a hajxy hänajty nämajmetspä, coo hajxy wiädítät cajpt-cajpt, coo ja'a pa'amjäya'ay hajxy yajñähwá'adsät, ja'a hajxy hänajty mõjcu'umøødpä. Nämetscjaty hajxy hänajty wiädita'añ.

⁸ Mänitä Jesús ja'a jiamiøød jiaac nämáayy coo hajxy tii quia'a mänøcxät, ni tsajcaagy, ni morral, ni xädø'øñ. Jagooyyä yomybiaxy hajxy quiábät tu'uquia.

⁹ Tu'tehñquia cø'øg hajxy miänøcxät møød tu'xojxyä wit.

¹⁰ Mänitä Jesús jiaac mänaañ:

—Coo hajxy jim mmédsät homiädyii cajptä, jimä tøjc hajxy tu'ug myujwá'anät maa hajxy hänajty mmejtsta'aga'añän. Jimiä hajxy jaduhñ mhídät. Cabä tøjc hajxy myajtägátsät.

¹¹ Majaty mijtsä cu'ugä mmädia'agy hänajty xquia'a jøjpøgø'øwaanä, mänitä mdecy hajxy mwiinxit mwiinwóbät, weenä naaxoc jaduhñ quiøxy ca'ay. Jaduhñä hijxtahñd miähmø'øwät coo ja'a cu'ugä Diosmädia'agy hajxy hänajty tøø quia'a jøjhadsowø'øy. Mänit hajxy jim mdsóonät.

¹² Mänitä Jesús ja'a jiamiøødhajxy tiu'ubøjnä mädia'agy-yajwa'xpä. Jaduhñä cu'ug hajxy hänajty yajwiingapxø'øy coo ja'a Diosmädia'agy hajxy piadu'ubøjnät, møød coo ja'a yhaxøøgwiinmahñdy hajxy ñajtshixøøñät.

¹³ Mayyä jäya'ayhajxy hänajty yajñähwa'açhii, ja'a hajxy hänajty mõjcu'umøødpä. Mayyä pa'amjäya'ayhajxy hänajty yajmøcpøgyii coo hon hajxy hänajty yajñähjaaxyii.

¹⁴ Jimä Herodes hänajty guiobiernähaty maa ja'a naax hänajty xiøhatiän Galilea. Mänitä Herodes miädoyhajty coo ja'a Jesús ja'a hoy-yagjuøøñäjatypä hänajty yajcähxø'øgy. Mänitä Herodes miänaañ cooc tyijy ja'a Juan mäyajnäbejpä tøø jiuypioøjtägach. Ja'a Juan, je'e

ja'a Herodes yhajodhajt cooc tyijy hānajtj je'e Jiesúsä; páadiägä hoy-yagjuoõñājatypä yajcāhxø'øgy ja'a wyiinmahñdycøxpä, cooc tyijy hānajtj tøø jiuypiojtägach.

¹⁵ Wiingatiä jäya'ayhajxy hānajtj miānaambä. Nāje'e hajxy hānajtj miāna'añ cooc tyijy Jesús hānajtj je'e yhElíasä. Nāje'e hajxy hānajtj miānaambä cooc tyijy ja'a Jesús hānajtj wiädity nebiä jecyjiäya'ayhajxy hānajtj tøø Dyiosmädia'agy-yajwa'xiän jegyhajtj.

¹⁶ Pero ja'a Herodes, tehñgajnä je'e hānajtj miāna'añ cooc tyijy je'e Jwiangä, ja'a hānajtj tøø yajyo'puxyíijäbä. Je'eg tyijy jaduhñ tøø jiuypiojtägach.

¹⁷⁻¹⁸ Hix, haxøøgä Herodes hānajtj jiäya'ayhaty; ja'a yhamdsoo puhya'ay tio'oxiøjc hānajtj miøødtsānaayyāp. Felipe ja'a Herodes piuhya'ay hānajtj xiøhaty. Herodías ja'a Felipe tio'oxiøjc hānajtj xiøhājpä, ja'a Herodes hānajtj miøødtsānaabiä. Mānitä Juan ja'a Herodes yhojy: “Cab jaduhñ yhooyä coo ja'a mhamdsoo puhya'ay tio'oxiøjc jaduhñ mmøødtsānaayyät.” Coo ja'a Herodes jaduhñ yhojjä, paadiä Juan yajmajtsä. Mānitä Juan chuumā.

¹⁹ Cabä Herodías hānajtj yhojwiø'oy coo ja'a Herodes jaduhñ yhojjä, paadiä Herodías ja'a Juan hānajtj jia wi'i yajyagho'oga'añii.

²⁰ Pero cabä Herodes hānajtj jaduhñ miāna'añ coo ja'a Juan yagho'ogóøjät. Hix, wyiingudsāhgøøbiä Herodes ja'a Juan hānajtj. Ñajuøøbiä Herodes hānajtj coo ja'a Juan hānajtj jiaanč tehñ yhojhāna'cä. Jaanč tehñ yhomiädoonä ja'a Herodes ja'a Juan miädia'agy hānajtj miädoowä. Pero cabä Herodes hānajtj ñajuø'oy neby jiatcø'øwät.

²¹ Cabä Herodías wiinmahñdy hānajtj ñä'ägädä paady nebiä Juan yajyagho'ogóøjät. Mānit yhabaaty coo ja'a Herodes xiøø hānajtj jiada'añii. Mānitä Herodes ja'a jiamioødtøjc miøødcaayy miøødhuucy, møødä mioonsāhajxy, møødä generalhajxy, møødä mäyøødøjc-hajxy, ja'a hajxy hānajtj jim tsānaabiä Galilea.

²²⁻²³ Jim hajxy hānajtj quiay yhu'ugy, mānitä Herodías yhuung jiiby tiojtägøøyy. Mānitä quixy tiägøøyy hejtspä pujpä. Jaanč tehñ yajxón yhejch piujty. Jaanč tehñ xioondaac ja'a Herodeshajxy jaduhñ møødä wioybä wyichpä. Mānitä Herodes ja'a quixy ñāmaayy: —Tehñ tiøyy nnāmá'awät, høøčh yajmäyujwāañäc tii mdsogaamby, nmó'owäbøch miich je'e, hotyijä, høxtä nmó'owäbøch miich naax cupc maačh yaa ngobiernāhatiän.

Paadiä Herodes jaduhñ miānaañ, jaanč tehñ xioondaacp hānajtj jaduhñ coo ja'a quixy hānajtj yajxón yhech.

²⁴ Mānitä quixy piädsøømy. Mānitä tiaj hoy miäyajtøyy tiig jaduhñ yujwá'anäp. Mānitä Herodías wiinmahñdy piaaty nebiä Juan mäyajnäbejpä yajyagho'ogóøjät. Mānitä yhuung ñāmaayy coo ja'a Juan ja'a quiopc yujwāañäxät.

²⁵ Mānitiä quixy ja'a Herodes hoy ñāma'ay:

—Høøčhā Juan quiopc móoyyāc texyjooty.

²⁶ Coo ja'a Herodes jaduhñ ñāmaayyā, mānit jiaanč tehñ jiootmadiägøøyy. Mānit jaduhñ ñāhadsooyy. Hix, tøø hānajtj jaduhñ miāna'añ cooc hānajtj hoy ñä'a tiijä yega'añ. Hix, tøø ja'a wioybä wyichpä hānajtj jaduhñ yajmädoy.

²⁷ Mānitä Herodes ja'a mioonsä jiiby quiejxy pujxtøgooty coo ja'a Juan nøcxy yo'puxyii.

²⁸ Mānit hoy jiaanč yo'puxyii. Mānitä quixy ja'a Juan quiopc hoy yajcø'ødägø'oyii texyjooty. Mānitä tiaj hoy miøødiägach.

²⁹ Coo ja'a Juan jiamioødhajxy jaduhñ miädoyhajty coo ja'a Juan hānajtj tøø yagho'ogyii, mānitä Juan ñi'x hajxy hoy yajpādø'cä. Mānit hajxy hoy yajnaaxtägø'oy.

³⁰ Mānitä Jesús ñāmejtstägajtsä ja'a jiamioød, ja'a hajxy nāmajmetspä. Cøjxä Jesús yhawāañäxä, nebiaty hajxy hānajtj tøø miäba'amyajnaxy, møød waambaty hajxy hānajtj tøø yajnāhixø'oy.

³¹ Jaanč tehñ miayyā Jesús jäya'ay hajxy hānajtj ñāmečhii. Wiimbijp hadøjpä majiäya'ayhajxy hānajtj. Coo ja'a jäya'ayhajxy may wyi'i miech, paadiä Jesúshajxy hānajtj quia'a nābaadøøyyäxä mäduhnajtä hajxy quiay yhú'ugät. Mānitä Jesús miānaañ:

—Jam hajxy paquiä póo'xām wiingtuum maa majiäya'ay hajxy xquia'a paadāañäm.

³² Mänitä Jesús hajxy tiägøøyy barcojooty. Tsohn hajxy jimän. Mänit hajxy jim ñøcxy maa ja'a majiäya'ayhajxy hänajty quia'a jadyhitiän.

³³ Coo ja'a Jesús hajxy jaduhñ yhiixtu'ubøjcä, mänitä majiäya'ayhajxy wyi'i piadu'ubøjpä. Najuøøby hajxy hänajty jaduhñ maa ja'a Jesús hajxy hänajty ñøcxa'añ. Päyø'øguiä hajxy jaduhñ ñä'ägä nøcxy. Jawyiin hajxy jim ñä'ägä mejch maa ja'a Jesús hajxy hänajty ñøcxiän. Wiinduhmyguiajpt hajxy hänajty chooñ.

³⁴ Coo ja'a Jesús jii by piädsøømy barcojooty, mänitä jäya'ay yaghixøøyy may. Mänit näxuu'tscapxy miøødhajty. Jaduhñ yhiixy nej coo meeg wyiindsøn ca'a hijpän, coo ja'a Diosmädia'agy hajxy hänajty quia'a yajnähixø'øyii. Mänitä Jesús madiu'u tiägøøyy yajnähixøøbiä.

³⁵ Tøø hänajty chuujøøñä. Mänitä Jesús ja'a jiamiøød ñämejtsä. Mänitä Jesús ñämaayyä: —Jue'e jaduhñ yaa, pactuum. Cabä cajpt yaa maa ja'a cu'ug quiaayyøøc hajxy häyaa jiiyät. Tøø jaduhñ hoyhoy jiaanç tehñ chuujø'øy.

³⁶ Nämä'aw yø'ø cu'ug, ween hajxy nøcxy quiahyøxta'ay maa ja'a cajpt yaa wiingonñän —nømä Jesús ñämaayyä.

³⁷ Mänitä Jesús yhadsooyy:

—Tsøg hajxy nä'ägä yajcäayyäm højtshájtäm.

Mänit hajxy yhadsoogumbä:

—Haa tii hajxy jaduhñ nhuuc nä'ä yajcäayyämbäp. Cajx nä'ä caayyøøcpä nä'ä huucøøcpä. Nej, jaduhñ miich mmäna'añä coo højts tsajcaagy nøcxy njuy mejtsmägo'x denario —nømä Jesús jiamiøød ñämáayyägumbä.

³⁸ Mänitä Jesús miänáangumbä:

—Huuc mäyajtøw yø'ø cu'ug pøn caayyøøc møød. Pønjaty jaduhñ møød, ween hajxy yajmucy.

Coo hajxy hänajty tøø yajmujnä, mänitä Jesús ñämaayyä:

—Jagooyyä højts tsajcaagy mägooyyä tøø nbaady møødä hacx metsyä.

³⁹⁻⁴⁰ Mänitä Jesús miänaañ coo ja'a cu'ughajxy yhøxtä'agät necchooty tu'hagøøbiäjaty, nämägo'xhaam møød näjuxychägui'xmajc-haam. Mänit hajxy jaduhñ jiaanç yhøxtaacy.

⁴¹ Mänitä Jesús ja'a tsajcaagy mägooxpä quioondsooyy møødä hacx metspä. Coo chajhee'py, mänitä Dioscujú'uyäp yejcy ja'a tsajcaagy quiøxpä møødä hacx quiøxpä. Mänitä tsajcaagy tiägøøyy haguiddøøbiä. Mänitä jiamiøød tiägøøyy moobiä ja'a tsajcaagy møødä hacx, ween hajxy jaduhñ yajwa'xy maa ja'a cu'ugän. Tehngajnä Jesús ja'a tsajcaagy hänajty yajwa'añguiojy møødä hacx. Jiaac tehñ yajmayøøby hänajty jaduhñ.

⁴² Cu'uxiä jäya'ayhajxy jaduhñ jiaanç tehñ quiaayy.

⁴³⁻⁴⁴ Hoyyä jäya'ayhajxy hänajty jaduhñ jia mayyä, majmetscachä tsajcaagy quiunajxy møødä hacx. Ja'a Jesús jaduhñ yajwa'añguioj. Nämägooxmil ja'a ya'adiøjc-hajxy jaduhñ quiaayy yhuucy.

⁴⁵ Mänitiä Jesús ja'a jiamiøød ñämaayy coo hajxy tiägø'øwät jii by barcojooty, wéenäc hajxy jim ñøcxø'øgät mejyhawiimb maa ja'a cajpt jaduhñ xiøhatiän Betsaida. Coogä Jesús ja'a majiäya'ay jaduhñ ñähguéecnät, mänitäc hajxy jim ñibiaadóøjät.

⁴⁶ Coo ja'a Jesús ja'a majiäya'ay ñähgueecy, mänit jim ñøcxy tungøxp Diospa'yaaxpä.

⁴⁷⁻⁴⁸ Coo quioodsøøyy, jimä Jesús hänajty tøø miähmø'øy mejypia'a nidiuhñ. Ja'a barco, jagooyyä hänajty mejyquiujc tøø ñä'ä mahñ miech. Jaanç tehñ miøcä barco hänajty jiiøjcubøjø'øyii. Tøø ja'a Jesús jiamiøødhajxy hänajty jiaanç tehñ yhanuu'xøøñä coo ja'a barco hajxy hänajty jia wi'i quiaaby. Coo ja'a Jesús jaduhñ yhiixy coo hajxy hänajty tøø yhanuu'xøøñä, mänit yo'oyhaam tiu'ubøjcy nøøwiing. Mobädajpä hänajty jioøø'øwaañnä, tøø ja'a Jesús ja'a jiamiøød hänajty ñajtspaadóøñä. Wyiinnaxáañnäbä Jesús ja'a jiamiøød hänajty jaduhñ.

⁴⁹ Coo ja'a Jesús yhiixä coo hänajty yo'oy nøøwiing, mänitä jiamiøødhajxy miänaañ cooc tyijy hänajty je'e yháañmä. Mänit hajxy møc chaaçhyaaxy.

⁵⁰ Nägøxiä hajxy hänajty chähgø'ø y coo ja'a Jesús hajxy jaduhñ y hijxy coo hänajty yo'oy nõøwiing. Cab hajxy choj høxcajpy. Mänitä Jesús miänaañ:

—Møcä mjoot hajxy päda'ag; høøch hädaa; ca'açh hajxy xchähgø'ø y.

⁵¹ Coo ja'a Jesús tiägøøyy barcojooty, mänitä poj miooñ. Jiaançh tehñ yagjuøøyy ja'a Jesús jiamiøødhajxy jaduhñ coo poj miooñ.

⁵² Hoy hajxy hänajty tøø jia hixy coo ja'a Jesús ja'a tsajcaagy yajwa'añguiojy møødä hacx, cab hajxy hänajty ñajuø'ø y coo ja'a Jesús møcmäjaa miøødä ja'a Dioscøxpä. Jaançh tehñ quiuhxex hajxy hänajty.

⁵³ Coo ja'a Jesús hajxy jim miejch mejyhawiimb maa ja'a naax hänajty xiøhatiän Gene-saret, mänitä barco hajxy jim quiuxojch mejypia'a.

⁵⁴ Tuunä hajxy jaduhñ ñä'ä barcopädsøømy, mänitä Jesús yhøxcajpä ja'a cu'ug.

⁵⁵⁻⁵⁶ Paquiä mädia'agy jim wia'xy coo ja'a Jesús hänajty jim tøø miech. Mänit tiägøøyy wädijpä cajpt-cajpt. Mänitä pa'amjäya'ayhajxy tiägøøyy cøømiejtsäbä tsaajiooty maa ja'a Jesús hänajty wiäditiän. Jimä pa'amjäya'ayhajxy hänajty tøø ñajtsø y ø'ø yii møjtu'uba'a maa ja'a Jesús hänajty ñaxø'ø wa'añän. Mänitä Jesús hajxy miänuu'xtaacy coo ja'a pa'amjäya'ayhajxy yajpa'amnaxøjät. Pønjatiä Jesús wyitpa'a hänajty nä'ä nähdøonäxäp, tehñ ñajxpä pia'amhajxy hänajty mänitä.

7

¹ Mänitä fariseos ja'a Jesús hajxy ñämejch, møødä häna'c ja'a Diosmädia'agy hajxy yajnä hixøøbiä. Jim hajxy hänajty chooñ Jerusalén.

² Mänitä fariseoshajxy y hijxy coo ja'a Jesús jiamiøød ja'a cuhdujt hajxy hänajty näje'le quia'a yajtuñ, coo hajxy quia'a cø'ø bujy coo hajxy hänajty tiägø'ø wa'añ caabiä huucpä. Ja'a fariseoshajxy, jaançh tehñ yhojyä judíocuhdujt hajxy hänajty quiudiuñ.

³ Hix, jaduhñä judíoshajxy hänajty nägøxiä quiuhdujthatyñä nebiä yhapä tieedyhajxy hänajty jegyhajty tøø yajnä hixø'ø yii. Naaghooc hajxy hänajty quiaya'añ, tsipcøxpä quiø'ø hajxy hänajty hoyhoy ñä'ägä pujy wa'ads.

⁴ Møød coo hajxy hänajty tøø yhojy halaplaaztøjpa'c, cab hajxy hänajty quiaya'añ jaguiø'ø bujy. Madiu'u cuhdujt hajxy hänajty miøødä coo hajxy cøxiä wiinä ñähbujy ñähje'eçh, møødä cayøhñdy hu'ugøhñdy, møødä tu'ts, møødä pujxtu'ts.

⁵ Mänitä fariseos ja'a Jesús hajxy miäyajtøøyy:

—Tii yø'ø mjamiøødhajxy jaguiø'ø bujy coo quiay. Cabä jecyquiuhdujt hajxy yajtuñ neby jäya'ayhajxy hijty jegyhajty quiuhdujthatiän.

⁶ Mänitä Jesús yhadsooyy:

—Jue'e mijts, mjaançh tehñ miähane'emaamb mijts, pero cab hajxy mnä'ä cudiuñ waambaty hajxy hamdsoo mja hane'emy. Mijtsøxpä ja'a Isaías jecy quiujahy, mänitä Dios miänaañ:

Hädaa jäya'ayhajxy, ja mänaamb hajxy jaduhñ cóogøch tyijy hajxy xwyiingudsähgø'ø y, pero cábøch hajxy hamuumdu'joot xñä'ä tsoy.

⁷ Xiøøbøch hajxy xjia wi'i pia'häyoy.

Jaduhñ hajxy jia mäna'añ cóogøch tyijy nmädia'agy hajxy xjia yajnä hixøøyyä, pero yhamdsoo mädia'agy hajxy ñä'ä wi'i miädiaacy, nõmä Isaías jecy quiujahy.

⁸ Mijts, tøø ja'a Diosmädia'agy hajxy mnajtshixøøñä. Ja'a mhamdsoo cuhdujt hajxy jaduhñ myaghijnäp —nõmä Jesús ja'a fariseos ñämaayy.

⁹⁻¹⁰ Mänitä Jesús ñämáaguumbä:

—Paadiä Diosmädia'agy hajxy tøø mnajtshixø'ø y, jaduhñä mhamdsoo cuhdujt hajxy hoy myaghida'añ. Jaduhñä Moisés jecy miänaañ coo ja'a mdaj coo ja'a mdeedy hajxy mwiingudsähgø'ø wät. Pero pønägä tiaj ja'a tieedy haxøøg nänøømb, yajcuyagho'ogø'ø wáanäbäc jaduhñ.

11-12 Pero wiing mijts mja mäna'añ cooc tyijy jaduñ yhawiinmatsä cooc pønä tiajjä tieedy haxøøg ñámá'awät: “Cábøch mijts nbuhbedaanä. Hix, tøøchä Dios nnäma'ay cooch je'e cøxiä nmo'owa'añ ja'açh mijts hijty nmo'owaambiä.”

13 Cooc hajxy jaduñ mmäna'añ, myajcähxø'py hajxy jaduñ coo ja'a Diosmädia'agy hajxy mga'a yajtuunnä, møød coo ja'a mhamdsoo cuhdujt hajxy myajnahixøøñä. Madiu'u hajxy jaduñ myajcähxø'ogy coo ja'a Diosmädia'agy hajxy tøø mnajtshixøøñä, møød coo ja'a mhamdsoo cuhdujt hajxy myajtuunnä —nømä fariseoshajxy ñämaayyä.

14 Mänitä Jesús ja'a cu'ug yajwiingapxøøguiumbä:

—Høøch nmädia'agy hajxy hamädoowhíjtäc.

15 Tijaty hajxy mgaaby mhuucypy, cab hajxy xyajcädieey. Pero ja'a haxøøgwiinmahñdy, je'eds hajxy mæbøcy xyajcädieeyäp.

16 Pøn jaduñ wiinjuøøby, wéenhøch nmädia'agy xmiäbøjcä.

17 Coo ja'a Jesús ja'a quiapxy miädia'agy jaduñ yajmaayy, mänitä cu'ughajxy quiøxy wiimbijnä. Mänitä Jesús hajxy tiøjtägøøñä møødä jiamiøødtøjc, ja'a hajxy hånajty ja'a nämajmetspä. Mänitä Jesús miäyajtøøwä neby hånajty jaduñ miädia'agytiägø'oy ja'a hånajty jaduñ jim tøø miädiä'aguiäbä majiäya'ayhagujc. Ja'a Jesús jiamiøødhajxy jaduñ yajtøøw yajtøø'x.

18 Mänitä Jesús yhadsooyy:

—Nej, ni mijtshajxy jaduñ tøø mga'a wiinjuø'oyä waambátyhøch tøø nja mädia'aguiä. Jaduñds je'e, tijaty hajxy mgaaby mhuucypy, cab hajxy xyajcädieey.

19 Hix, ja'a jøø'xy ja'a pøcy, jiiby jaduñ yhäda'agø'oy maa ja'a mjøø'xytiøjc-hajxiän. Jadähooc nøcxy piädsømy. Cab jaduñ jiiby tiehm tiägø'oy maa ja'a mjuøhñdyhajxiän —nømä Jesús miänaañ.

Jaduñ hädaaduhñ miädia'agytiägø'oy coo ni mädyii jøø'xy pøcy quia'a hamajtsäcä.

20 Mänitä Jesús miänäänḡumbä:

—Pero ja'a haxøøgwiinmahñdy, je'eds hajxy mæbøjnäbä xyajcädieeyäp.

21-22 Coo ja'a jäya'ay haxøøgwiinmahñdy hajxy jiaançh tehñ miøødä, paady hajxy haxøøgjaty jiaançh tehñ jiatcø'oy; paady hajxy miämeech, paady hajxy ñiyagho'ogyii, paadiä jäya'adio'oxiøjc hajxy miøødtsäna'ay, paadiä jäya'ajie'e hajxy yhadsoy, paady hajxy miäwiinhøøñ, paady hajxy ñiñähoyii, paady hajxy jiaançh tehñ yajcumaya'añ, paady hajxy quia'a näägädä wiinmahñmech. Cooc hajxy naxy miu'ugyii, paadiä hadsojwiinmahñdy hajxy miøødä.

23 Jaduñds je'e, jaançh tehñ miadiu'u ja'a haxøøgwiinmahñdy jii. Je'eds hajxy jaduñ mæbøcy xyajcädiehby.

Mänitä Jesús miädiaacpädøøñä.

24 Coo ja'a Jesús jim chohñ, mänit jim ñøcxy maa ja'a naax jaduñ xiøhatiän Tiro møød Sidón. Mänitä tøjc tu'ug piaaty maa hånajty miejtsta'aga'añän. Hamee'ch jim jia hidaañ. Pero miädoow ja'a cu'ughajxy jaduñ coo ja'a Jesús hånajty jim tøø miech.

25-26 Jimä tajjäya'ay hånajty tu'ug chäna'ay. Hagriego hånajty miädia'agy. Ca'a hånajty je'e jiidiosä. Jimä yhuung hånajty tu'ug, to'oxiäna'c. Tøø ja'a to'oxiäna'c hånajty pia'ambety. Møjcu'u hånajty tøø yajtägø'oyii. Cooc ja'a quixiä tiaj jaduñ miädoyhajty coo ja'a Jesús hånajty jim tøø miech, mänitä Jesús hoy wyiinjjicäda'agyii. Mänitä Jesús miänuu'xtaacä coo ja'a to'oxiäna'c nøcxy yajpa'amnáxäxä.

27 Mänitä Jesús miänaañ:

—Cab jaduñ yahixø'oy coochä huc-huung tsajcaagy nmó'owät, ja'a pigäna'c-hajxy hijty quiayaambiä.

Coo ja'a Jesús jaduñ miänaañ, ja'a judiøshajxy jaduñ yajmäbaatä nebiä pigäna'cän. Ja'a ca'a judiøshajxy jaduñ yajmäbaatä nebiä hucän.

28 Mänitä tajjäya'ay yhadsooyy:

—Wiindsón, tøyhajt jadhun. Pero jüibiä huc-huunghajxy pia'piy pia'coñ meexäpa'c tijaty ja'a pigäna'c-hajxy yajwiinga'awøøby.

²⁹ Mänitä Jesús miänaañ:

—Coo jadhun tøø mmäna'añ, cähxø'p jadhun cooçh nmädia'agy xmiäbøjcä. Tøø ja'a mhuungä møjcu'u ñähwáatsänä. Nøcxnä jootcuyc maa ja'a mdøjcän.

³⁰ Mänitä tajjäya'ay wyiimbijty. Coo jim miejch maa ja'a tiøjcän, tøø ja'a yhuungä møjcu'u hänajty jiaançh nähwáatsänä. Jimä yhuung hänajty quio'na'ay maabejtcøxp hoy weenän.

³¹ Mänitä Jesús jim wyiimbijtägajch maa ja'a naax xiøhatiän Tiro. Mänit jim ñaxøøyy maa ja'a cajpt hänajty xiøhatiän Sidón. Mänit jim ñøcxøøyy maa ja'a naax hänajty xiøhatiän Decápolis. Mänit jim miedsøøyy maa ja'a mejy hänajty xiøhatiän Galilea.

³² Mänitä mähdiøjc tu'ug yajmejtsä maa ja'a Jesús ja'a wyiinduumän. Cabä mähdiøjcä mädia'agy hänajty hoy yhabädsømy, møød hänajty quiuhnata. Mänitä Jesús miänuu'xtaacä coo ja'a quio'ø yajnähgábät maa ja'a mähdiøjc cuhnatpän. Ja'a mähdiøjcä jiamiøødhajxy jadhun mänaañ.

³³ Mänitä Jesús ja'a mähdiøjc jäguemjuøøby miødhajty nidiuhm. Mänitä Jesús ja'a mähdiøjcä tiaatsc piadsihwä. Mänitä Jesús ja'a quio'øwahxc chujyñähbo'ty. Mänitä mähdiøjc tiaatsc chujyhabo'odøøyyäxä.

³⁴ Mänitä Jesús chajhee'py. Mänit miänaañ: “Efata.” Jadhun hädaa miädia'agytiägø'øy: “Hawa'ads.”

³⁵ Tuunä ja'a Jesús jadhun ñä'ä mänaañ, mänitiä mähdiøjc quiapxø'cy miädoowø'cy. Jaançh tehñ yhoy jadhun miädiaacnä.

³⁶ Mänitä Jesús miänaañ coo hajxy quia'a mädiä'agät coo ja'a mähdiøjc jadhun tøø yhoøøy. Pero cab hajxy jadhun jioodhajty. Mänitiä hajxy jadhun hoy yhamädiaagø'øy. Hoyyä Jesús mayhooc jia hanehmy coo hajxy quia'a hamädiaagø'øwät, maas hanaxiä ja'a mähdiøjc hajxy yhamädiaagøøyy. Cabä Jesús miädia'agy jadhun ñä'ä yajtúunäxä.

³⁷ Jiaançh tehñ yagjuøøbiä cu'ughajxy hänajty jadhun. Mänit hajxy tiägøøyy mänaambä: “Jaançh tehñ miøjmayhajt jadhun tiuumby coo ja'a cuhnatpä yajmädoowø'øgy, møød coo ja'a huumbä yajcapxø'øgy.”

8

¹ Cujaboom cumaaxc, mänitiä jäya'ayhajxy nämay yhamugóøguiumbä maa ja'a Jesús hänajtiän. Ja yähó'cäp hajxy hänajty, cabä caayyøøc hajxy hänajty ñä'ägädä møødä. Mänitä Jesús ja'a jiamiøødtøjc yaaxmujcy, ja'a hajxy hänajty nämajmetspä. Mänitä Jesús miänaañ:

² —Nnäxúu'chpøch hädaa jäya'ayhajxy. Tägøøgxøøjøch hajxy tøø xpiawädijnä. Tøø ja'a quia'y tøø ja'a yhu'ugyhajxy quiojxnä. Tii hajxy jadhun ñä'ä jaac cáyöp.

³ Cooçh hajxy jaguiay nguejxwiimbídät, wehñdä hajxy jim tiu'uyuugädawät. Hiç, näje'e hajxy jäguem tøø chohñda'agy.

⁴ Mänitä Jesús yhadsoowä ja'a jiamiøødtøjc:

—Tii hädaa jäya'ay hajxy häyaa nnä'ä yajcáayyamb. Cabä cajpt yaa. Maa tsajcaagy hajxy häyaa nnä'ä páatämät —nømä Jesús jiamiøødhajxy miänaañ.

⁵ Mänitä Jesús ja'a jiamiøødtøjc miäyajtøøyy:

—Naag tsajcaagy hajxy jii mmøødä.

—Juxtujc —nøm hajxy yhadsooyy.

⁶ Mänitä Jesús miänaañ coo ja'a majiäya'ayhajxy yhøxtä'agät naaxwiin. Mänitä Jesús ja'a tsajcaagy quiooñdsooyy. Mänitä Dioscujú'uyöp yejcy. Mänitä tsajcaagy tiägøøyy haguidøøbiä. Mänitä jiamiøødtøjc miooyy. Mänitä majiäya'ayhajxy miooyy. Coo ja'a Jesús ja'a tsajcaagy hänajty yhaguidø'øy, yajwa'añguiojpy hänajty tehñgajnä.

⁷ Jimä hacxhuung hajxy hänajty miøødäbä mejtstägøøg. Mänitä Jesús quiunuu'xy. Mänit miänaañ coo ja'a majiäya'ayhajxy mio'owøøjät. Jadhun je'e may yajwa'añguiojpy.

⁸ Mänitä jäya'ayhajxy tiägøøyy caabiä. Høxtä cuuxä hajxy hoyhoy. Høxtä jiaac piwø'c hajxy juxtujcach, ja'a hänajty tøø quiunáxiäbä.

⁹ Nämädaaxmil jäya'ayhajxy jaduhñ quiaaay yhuucy. Mänitä Jesús miänaañ coo hajxy wyiimbijnät.

¹⁰ Mänitä Jesúshajxy jadähooc biarcopéjcumbä møødä jiamiøødtøjc. Mänit hajxy jim ñøcxy maa ja'a cajpt hänajty xiøhatiän Dalmanuta.

¹¹ Mänitä Jesús ja'a fariseos näje'e ñämejtsä. Mänitä fariseos ja'a Jesús ja'a Diosmädia'agy hajxy miøødyajtsibøøyy. Mänitä Jesús jia nämaayyä:

—Huuc yajcähxø'ögä hijxtahñd hoy-yagjuøñäbä ja'a tsajpootypä. Jaduhñ højtsä tøyhajt nmøødhädät coo miichä Diosmäjaa mjaançh møødä —nømä fariseoshajxy miänaañ.

¹² Mänitä Jesús jiootmaxiey. Jootmadiägøøyy jaduhñ. Mänit miänaañ:

—Tii ja'a Diosmäjaa hajxy coo mwi'i yhixa'añ. Tøyhajt mijts nnämä'awät coo hajxy mga'a hixa'añ —nømä fariseoshajxy ñämaayyä.

¹³ Mänitä Jesúshajxy wyiimbijnä møødä jiamiøødtøjc. Mänit hajxy tiägøøyy barcojooty. Mänit hajxy tiu'ubøjcy. Mejyhawiimb hajxy hänajty ñøcxa'añ.

¹⁴⁻¹⁵ Mänitä Jesús ja'a jiamiøødtøjc ñämaayy:

—Mnigwieendähadøøjap hajxy. Ca'a ja'a Herodes chajcaagychooy hajxy mmäwädijtä, ni ja'a fariseos jie'ehajxy.

Mänitä Jesús jiamiøødhajxy yhijxy coo ja'a tsajcaagy hajxy hänajty tøø quia'a jaac juy. Jagooyyä tsajcaagy hajxy hänajty tu'uquiä miøødä barcojooty.

¹⁶ Mänit hajxy tiägøøyy niñämäayyäbä:

—Paady hajxy jaduhñ xñämäayyäm, coo tsajcaagy hajxy tøø njahdiägóoyyäm.

¹⁷ Coo ja'a Jesús jaduhñ yhamädoonajxy waambatiä jiamiøødhajxy hänajty ñiñäma'ayii, mänit hajxy ñämaayyä:

—Nej, jaduhñ hajxy mwiinjuø'øyä coochä tsajcaagy tøø nmädia'aguiä, ja'a hajxy tøø njahdiägóoyyäbä. Cab hajxy tøø mnä'ägädä wiinjuø'øy tijátyhøch tøø nmädia'agy. Mjaançh tehñ quiuhxex mijts jaduhñ.

¹⁸ Xiidsä mwiin hajxy mja møødä, cab hajxy tii mhijxmähmø'øy. Xiidsä mmädohnd hajxy mja møødä, cab hajxy tii mmädoomähmø'øy.

¹⁹ Mänäajøchä nämägooxmilpä jäya'ay nyajcayyän ja'a mägooxtsajcaagy, naac cachä caadiuc hajxy mbiwø'cy.

Mänit hajxy yhadsooyy:

—Majmetsc.

²⁰ Mänitä Jesús miänáangumbä:

—Jaanä mänäajøchä nämädaaxmilpä jäya'ay nyajcayyän ja'a juxtujtsajcaagy, naag cach hajxy mbiwø'pä.

Mänit hajxy yhadsoogumbä:

—Juxtujc.

²¹ Mänit hajxy ñämäayyägumbä:

—Caj mijts tøø mnä'ägä wiinjuø'øy tijátyhøch tøø nmädia'agy —nømä Jesús miänaañ.

²² Mänitä Jesúshajxy jim miejtstägajch maa ja'a cajpt hänajty xiøhatiän Betsaida. Mänitä wiinds tu'ug wyitsmejtsä maa ja'a Jesúsän. Mänitä Jesús miänuu'xtaacä coo ja'a wiinds ween ñähdoñii, ween jaduhñ yhijxø'øgy.

²³ Mänitä Jesús ja'a wiinds wyijtstsooyy. Mänitä wiinds cajtpa'a quipxy miødhajtä. Mänitä wiinds wyiingutsujøøyyä. Mänit wyiingumø'xøøyyä. Mänit miäyajtøøwä pø tøø hänajty yhijxø'øgy.

²⁴ Mänit tiägøøyy hijxø'pä weenjaty. Mänit miänaañ:

—Tøøch weenjaty nhijxø'øgy. Cábøchä jäya'ay hoy nhøxcaba'añ. Nnajuøøbiøch jaduhñ coo jiäya'ayä, pero jaduhñhøch nhixy nebiä quepychaajän.

²⁵ Mänitá Jesús ja'a wiinds jadähooc wyiingumo'xóøguiumbä. Mänitá wiinds hoy tiägøøñä hijxpä. Hotyijä hänajty jäguemjaty yhiixnä.

²⁶ Mänitá Jesús miänaañ:

—Tu'uda'aquiä mnócxät maa ja'a mdøjcän. Ca'a cajptooty mguyo'oy mgubøgø'øy —nømä craa ñämaayyä, ja'a hänajty tøø yhiixó'øguiäbä.

²⁷ Mänitá Jesús hajxy jim tiu'ubøjcy møødä jiamiøødtøjc. Jim hajxy hänajty ñøcxa'añ maa ja'a naax hänajty xiøhatiän Cesarea de Filipino. Cajpt-cajpt hajxy hänajty wiädita'añ. Tu'haamnøcxpä, jimä Jesús ja'a jiamiøødtøjc miäyajtøøyy:

—Høøch, põnhøchä cu'ugäda'a xtyijp.

²⁸ Mänitá Jesús yhadsoowä:

—Näje'e hajxy miäna'añ cooc tyijy miich mJuan mäyajnäbejpä. Näje'e hajxy miänaambä cooc tyijy miich mhElíasä. Näje'e hajxy jiaac mänaambä cooc tyijy miich mDiosquexiä, cooc tyijy miichä Diosmädia'agy jecy myajwa'xy.

²⁹ Mänitá Jesús yajtøøgumbä:

—Míjtsäts, põnhøch mijtshajxy jaduhñ xtyijp.

Mänitá Pedro yhadsooyy:

—Jue'e miich, Cristo. Dios miich tøø xwyiinguexy.

³⁰ Mänitá Jesús ja'a jiamiøødtøjc ñämaayy coo ja'a Jesús hajxy quia'a mädiä'agät põñ hänajty je'e.

³¹ Mänitá Jesús ja'a jiamiøødtøjc tiägøøyy yajwiingapxøøbiä:

—Høøch, Diosquexyhøch høøch. Madiú'ujøchä tsaächpä nøcxy nhabaada'añ. Xmiähanhadäämbøchä jäya'ayhajxy, ja'a hajxy jii by wiindsøn hajpä maa ja'a tsajtøjcän, møødä teedywiindsøn hajxy, møødä häna'c-hajxy jii by Diosmädia'agy-yajnahixøøbiä maa ja'a tsajtøjcän. Mänithøch hajxy jaduhñ xjia yajyagho'oga'añii. Pero cooch hajxy hänajty tøø xyajyagho'ogyii, cudägøøgxøøyyä, mänithøch njujypiøjtägatsa'añ.

³² Howyiinjuøøñä ja'a Jesús jaduhñ miädiaacy. Mänitá Pedro ja'a Jesús hawiingtuum wioonøcxy. Mänitá Pedro miänaañ:

—Wiindsøn, ca'ads jaduhñ mwi'i miäna'añ. Caj miich nej mjada'añ mhabeta'añ —nømä Jesús ñämaayyä.

³³ Mänitá Jesús wia'wiimbijty. Mänitá jiamiøødtøjc wyiinhee'ppejty. Mänitá Pedro yhojjä:

—Møjcu'u, jua'ads yaa maaç nwiinduumän. Jaduhñ miich mwiinmahñdyhaty nebiä jäya'ayhajxy wyiinmahñdyhajpä. Caj miich jaduhñ mwiinmahñdyhaty nebiä Dios wyiinmahñdyhatiän —nømä Jesús miänaañ.

³⁴ Mänitá Jesús ja'a cu'ug miøjyaaxy møødä jiamiøødtøjc. Mänitá Jesús miänaañ:

—Pøn jioot tsojp cooch xjamiøødhädät, weenä yhamdsoo cuhdujt hajxy ñajtshixø'øy, weenä jioot hajxy piäda'agy coo hajxy chaächpøjpät nébiøch ndsaächpøga'añän. Wéenhøchä nmädia'agy hajxy tehngajnä xmiäbøjcä.

³⁵ Pønä jioot ja pädaacp coo hajxy hoy jiugyhädät, cab hajxy øjxta'axiøø jiugyhada'añ nebiä Dios jiugyhatiän. Pero põñä jioot pädaacp coo hajxy yhó'ogät ja'a høøchcøxpä møødä Diosmädia'agyquiøxpä, je'edshajxy homiänaajä jugyhadaamb nebiä Dios jiugyhatiän.

³⁶ Coo hajxy hodium mga'a mähmø'øwät coo hajxy hänajty tøø mho'ogy, cab hajxy jaduhñ mniyaghoyø'øwøjät, hoy hajxy hänajty yaa tøø mja mäyøøhaty hädaa yaabä naaxwiin.

³⁷ Ni tii yaa quia'a nä'ägädä tsoobaady hädaa yaabä naaxwiin nebiä mjugyhajthajxy choobaada'añän, coo hajxy homiänaajä mjugyhädät nebiä Dios jiugyhatiän.

³⁸ Pønhøch xmiädsähdiuumb møødhøchä nmädia'agyquiøxpä maa hädaa jäya'ay wyiinduumhajxiän, hädaa pojmoødpä cädieemioødpähajxy, hädaahajxy ca'a Diosmädia'agymiäbøjpä, cooch yaa ngädaactägätsät hädaa yaabä naaxwiin, mänitøch

hajxy jadähooc nmädsähdiuundägatsa'añ, pønjätyhøch hänajty yaa tøø xmiädsähdiuñ. Diosquéxyhøch høøch. Diosmøcmäjaamøødhøch hänajty yaa ngäda'aga'añ, näguipxy møødä Diosmoonsähajxy, ja'a hajxy jim hijpä Dioswiinduum —nømä Jesús miänaañ.

9

¹ Mänitä Jesús miänáangumbä:

—Chaads mijts tøyhajt ndehm ñämá'awät, mijts xii tänaabiä, näje'e hajxy hänajty mga'a ho'ogyñä coo hänajty quiähxø'øga'añ coo ja'a Dios hänajty yhane'ema'añ ja'a miøcmäjaahaam.

² Cudädujxøø, mänitä Jesús ja'a Pedro wioonøcxy maa ja'a tun jaanč tehñ quiøxpän, näguipxy møødä Santiago møødä Juan. Nämädaaxyä hajxy hänajty jim. Mänitä Jesús wyiin jiojp wiing jiajty maa ja'a Pedro wyiinduumhajxiän.

³ Høxtä haamb høxtä tsämaambä Jesús hänajty møødä wyit møødä tiucxy. Jaanč tehñ pioobä wyit hänajty nägø'ø nädecypiä.

⁴ Mänitä Elíashajxy jim näguehxtøø'xy møødä Moisés. Jimä Jesús hajxy hänajty wyi'i miøødmädia'agy. Nägoojä Pedrohajxy hänajty ñä'a hijxcäda'agy ñä'a hee'pcäda'agy.

⁵⁻⁶ Jaanč tehñ chähgøøbiä Pedrohajxy hänajty. Cab hajxy hänajty ñajuø'øy waamb hajxy jaduhñ ñä'a mäná'anät. Mänitä Pedro nä'a nägoobä miänaañ:

—Wiindsøn, hoyøøyy jaduhñ coo hajxy yaa tøø nbéjtäm. Nhuuc hädiuñ højts tøjquemyhuung tägøøg maa mijtshajxy häyaa cødu'ug myaghäña'awø'øwät, møød miič, møødä Moisés, møødä Elías —nømä Jesús ñämaayyä.

⁷ Tuunä ja'a Pedro jaduhñ ñä'a mänaañ, mänit hajxy ñäma'anähbejty. Mänitä Dios jii by quiapxy näma'ajooty: “Høøch nHuung hädaa. Njaanč tehñ chójpiøch hädaa. Mäbøjcä miädia'agy hajxy.”

⁸ Coo ja'a näma'a chajpejty, tøø ja'a Moiséshajxy hänajty yhadägoyyø'øy møødä Elías. Coo ja'a Pedrohajxy jia hijxwädi jty, cabä Moisés hajxy yhi jxnä ni ja'a Elías; jagooyyä ja'a Jesús hajxy jiaag hijxy nidiuhñ.

⁹ Jimä Jesús hajxy hänajty wyiinmänacy tunnähgøxp møødä jiamiøød nädägøøgpä, mänitä Jesús miänaañ:

—Ca'a hajxy pøn mnä'ägädä hawaanä tijaty hajxy yaa tøø mhixy tøø mmädoy høxtä cóonøch hänajty tøø njujyipiøjtägach cooçh hänajty tøø nho'ogy. Diosquéxyhøch høøch —nømä Pedrohajxy ñämaayyä.

¹⁰ Coo ja'a Pedrohajxy jaduhñ ñämaayyä, paadiä mädia'agy hajxy jaduhñ miäbøjcy. Jioodhajt hajxy jaduhñ nebiaty hajxy hänajty tøø yhi xy tøø miädoy. Hamiñ haxøpy hajxy hänajty jia ñimiäyajtøyyi waambä Jesús hänajty jaduhñ jia mäna'ana'añ coo jaduhñ miänaañ cooc hänajty jiu jyipiøjtägatsa'añ.

¹¹ Mänitä Jesús hajxy miäyajtøøyy:

—Ja'a häna'c hajxy jii by yajnä hixøøbiä maa ja'a tsajtøjcän, jaduhñ hajxy miäna'añ coogä Elías tsipcøxp jawyiin quiädá'agät. Mänitägä Cristo høxhaam jiaac tehñ quiäda'aga'añ. Tii hajxy jaduhñ coo miäna'añ. Nej, tøyhajt jaduhñä.

¹²⁻¹³ Mänitä Jesús yhadsooyy:

—Jaduhñä Diosmädia'agy jiaanč mäna'añ coogä Elías jawyiin quiäda'aga'añ. Tøyhajt jaduhñ. Mänitägä cøxiä wiinä yagjema'añ yajtägatsa'añ. Tøø ja'a Elías jia cäda'agy. Pero tøø jaduhñ jiaanč tehñ chaächtiuñii nebiatiä jäya'ay jioothajxy chocy. Tøjiajt jaduhñ nebiä Diosquexyhajxy jecy quiujahyyän. Nej, mnajuøøby hajxy jaduhñä waambátyhøchä Diosmädia'agy xmiädiaacpä, høøch ja'a Diosquexypä, cooçhä jäya'ayhajxy xhaächtiunaambä, møød cooçh hajxy xquia'a jaac hixaañnä.

¹⁴ Coo ja'a Jesús hajxy jii by quiädaacy maa ja'a jiamiøødhajxy hänajty tøø miähmø'øyän, ja'a hajxy hänajty jii by nädaaxtupä, mänitä Jesús yhi jxy coo ja'a jiamiøødhajxy hänajty

piquiä tøø piäda'agyii ja'a majiäya'ay. Jimä häna'c hajxy hänajty miøødniyhojyii, ja'a häna'c-hajxy jim yajnähiçøøbiä maa ja'a tsajtøjcän.

15 Nägoo ja'a cu'ugä Jesús hajxy jiojchuhixøøyy, mänit hajxy jiaançh tehñ xiooñdaacy. Mänitä Jesús jiojçubäyø'øgøøyyä. Mänit yajpoo'xä.

16 Mänitä Jesús miänaañ:

—Tii hajxy mwi'i yajniçuiuhøjøøyyäp.

17 Mänit tu'jäya'ay yhadsooyy:

—Wiindsøn, chaächä nhuung tøø nja møødmech. Møjcu'u jaduñ miøød. Ja'a møjcu'u wi'i yaghuñb.

18 Naxy jaduñ yajcädayyii. Mänit tiägø'øy hahoo'pä. Mänitä tiøøts tiägø'øy yajcädajpä. Mänit møc-häwøönä jiaty. Tøøchä mjamiøødtøjc nja mänuu'xta'agy cooçh nhuung hajxy cu xyajpa'amnähwaatsä. Pero cab hajxy tøø miäjäda'agy —nømä Jesús ñämaayyä.

19 Mänitä Jesús ja'a jiamiøødtøjc ñämaayy:

—Ja'a! Cábøch mijtsä nmädia'agy xñä'ä mabøjcä cooçh nDiosquexiä. Tøøch mijts jejcy nja møødwädity, y cahnä hajxy tii mnä'ägädä habøcyñä. Jaançh tehñ yhanaxiä mijts jaduñ mguhxexä. Nébiøch mijts nnä'ä túnät. Hoorä, witsmiñxä ja'a pa'amjäya'ay yaa —nømä Jesús miänaañ.

20 Mänitä Jesús miädia'agy quiudiúunäxä. Coö ja'a Jesús yhiçxä ja'a møjcu'u, mänitä mähdiøjcä pia'am tiehñ ñämejtsä. Mänitä mähdiøjc quiädaayy naaxwiin. Mänit piayajch piadøø'py. Mänit tiägøøyy hahoo'pä.

21 Mänitä craa tieedy miäyajtøøwäxä:

—Mänaa hädaa mhuung tøø pia'ambety.

Ja'a Jesús jaduñ yajtøøw.

—Muutsnä hänajyñä —nømä craa tieedy yhadsooyy.

22 Mänitä tieedy miänáangumbä:

—Náxyhøch hädaa nhuung jioøngädaw jioømbøgø'øy coö pia'am jaduñ naxy ñähbaadyii. Naxy ñøøgädaw ñøøbøgøøbiä. Ja weenjaty jaduñ quiaa yagho'ogyii. Tunä mayhajt. Pø jii miiçh møcmäjaa mmøødä, højts näxúu'tsäc, højts puhbéjtäc —nømä Jesús ñämaayyä.

23 Mänitä Jesús miänaañ:

—Nej, jadúñhøch miiçh xmiøyajtøyyä pø nmøødhøch møcmäjaajä. Pøn jaduñ mabøjp, hotyijä jaduñ yhojyø'øwáanäxä.

24 Mänitä pa'amjäya'ay tieedy yaaxy:

—Nmabøjpiøch. Høøch puhbéjtäc, jadúñhøch maas hoy njaac mabøgät.

25 Jimä jäya'ayhajxy hänajty may wyl'i miamiucy. Coö ja'a Jesús ja'a majiäya'ay jaduñ yhiçxy, mänitä Jesús ja'a møjcu'u ñämaayy:

—Høøch miiçh nhanehmby coö hädaa craa mhøxmájtsnät. Cab jaduñ mänaa mnämejtstägájtsnät. Naxy miiçh hädaa mähdiøjc myaghuumy myajnaty —nømä møjcu'u yhojjä.

26 Mänitä mähdiøjc møc yajtsaaçhyaaxä. Mänit jiäwippø'cy xiäyaayyø'cy. Mänit ñähwaatsä quiuhwaatsä. Nebiä ho'ogypiän jiajty. Coö jaduñ yhiçxä, mänitä jäya'ayhajxy may miänaañ cooc tyijy hänajty tøø yho'ogy.

27 Mänitä Jesús ja'a craa wyidsø'cy. Mänitä craa hoy tiänaayyø'nø.

28 Mänitä Jesús hajxy tiøjtägøøyy møødä jiamiøødtøjc. Mänitä Jesús hamee'ch miäyajtøøwä ja'a jiamiøød:

—Tii højts jaduñ coö tøø nga'a mäjädaacpä.

29 Mänitä Jesús yhadsooyy:

—Coö Dios hajxy mjaançh tehñ miänuu'xtä'agät, mänit yø'øduhmbä pa'am hajxy hoy myajnáxät. Pero pø caj, cab hajxy myajnáxät.

³⁰ Coo ja'a Jesúshajxy jim chohñ, mänit hajxy ñøcxy Galilea. Cabä Jesús hänajty yajnajuø'øwa'añii maa hänajty nøcxy wiädita'añ.

³¹ Mänitä Jesús ja'a jiamiøødtøjc tiägøøyy yajwiingapxøøbiä:

—Høøch ja'a Diosqueypä, nøcxáambøch nniñähduga'añii coochä jäya'ayhajxy xyaghó'ogät. Y cooch hänajty tøø nho'ogy, cumáaxc-høch hänajty njujypiøjtägatsa'añ —nømä Jesús miänaañ.

³² Cabä Jesús ja'a jiamiøødhajxy ñä'ägädä wiinjuøøyy waambatiä Jesús hänajty tøø miädia'agy. Cab hajxy hänajty jia nä'a wi'i miäyajtøwaambä. Hix, tsähgøøby hajxy hänajty.

³³ Mänit hajxy jim miejch Capernaum maa hajxy hänajty chäna'ayän. Coo hajxy hänajty tøø tiøjtägø'oy, mänitä Jesús ja'a jiamiøødtøjc miäyajtøøyy:

—Tii hajxy hijty mwi'i yajcapxiøøby jim tu'haam-miimbä.

³⁴ Pero cab hajxy waamb ñä'ägädä hadsooyy. Hix, jue'e hajxy hänajty tøø yajtsibø'oy tu'haam-miimbä, pønä cuhdujt hänajty maas møc møød. Tsähdiuumb hajxy hänajty, paady hajxy quia'a nä'ägädä hadsooyy.

³⁵ Mänitä Jesús yhäñaaguiädaacy, Mänitä jiamiøødtøjc ñämaayy, ja'a hajxy hänajty nämajmetspä:

—Yam hajxy weeñtiä huuc møjwa'ag. Pøn jaduhñ pøc-juøøby coo møjcuhdujt miøødhädät, cabä cuhdujt jaduhñ ñä'ägädä møødhada'añ. Moonsä jaduhñ ñä'ägä tunaamby.

³⁶ Mänitä Jesús pigäna'c-huung tu'ug miøjyaaxy. Mänit piädaacy cujc maa ja'a jiamiøødhajxy hänajtiän. Mänit chehñø'cy. Mänitä jiamiøødtøjc ñämaayy:

³⁷ —Pøn hädaa pigäna'c hädaaduhmbä tsojp ja'a høøchcøxpä, jaduhñ mäwíinhøch xchojpa. Jaanä jaduhñhøchä nDeedy hajxy xchójcäbä —nømä Jesús miänaañ.

³⁸ Mänitä Juan ja'a Jesús ñämaayy:

—Wiindsøn, tøø højts jäya'ay tu'ug nbaady. Jimä pa'amjäya'ay hänajty yajpa'amnaxy, ja'a hajxy møjcu'umøødpä. Miičhä mxøø hänajty xquiapxpáatäp. Mänit højts nnämaayy coo quia'a yajpa'amnájxnät. Paady højts jaduhñ nnämaayy, coo højts näguipxy xquia'a møødwädíjtäm.

³⁹ Mänitä Jesús miänaañ:

—Cábäts hajxy waamb cu mnämaayy. Pønñhøchä nxøø xquiapxpáatäp coo ja'a hoy-yagjuøøñäbä hänajty yajcähxø'ogy, cábøch jaduhñ xchoj mägapxtägoyya'añ.

⁴⁰ Pøn højts jaduhñ xquia'a mädsiphájtäm, je'eds hajxy jaduhñ xmiägu'ughájtäm.

⁴¹ Coo mijts pøn xyajnoøhú'ugät je'eguiøxpä cooch mijts xpiawädity, høøch ja'a Cristo, jimä hoyhajtä weenhajt piaada'añ Dioswiinduum.

⁴² Pønjátyhøchä nmädia'agy xmiäbójcäp, hoy hajxy quia'a jagä høxpøquiä, coo hajxy jiojcapxø'øwøøjät, ja'a häna'c-hajxy jaduhñ mäjøjcapxøøbiä, mejor paandsaa hajxy häxøpy tøø yajyo'xodsø'øyii, jaduhñds hajxy häxøpy tøø miejjiäwipø'øyii.

⁴³⁻⁴⁴ Pø jimä mgø'ø hänajty xyajcädieey, maas hoy jaduhñ coo mnä'ägädä høxpúxät, jaduhñ tehngajnä xquia'a yajcädiéhñät. Jaduhñäts homiänaajä mjugyhädät nebiä Dios jjugyhatiän, hoyyä mgø'ø hänajty metsc mga'a jagä møødä. Hix, coo tehngajnä mjaac cädieeyät, jii by mhädá'agät haxøøgtuum maa ja'a jøøn mänaa quia'a nä'ägädä pi'ichän, hoyyä mgø'ø hänajty jia ca'xiä.

⁴⁵⁻⁴⁶ Jaanä jaduhñduhmbä, pø jimä mdecy hänajty xyajcädieey, maas hoy jaduhñ coo mnä'ägädä høxpúxät, jaduhñ tehngajnä xquia'a yajcädiéhñät. Jaduhñäts homiänaajä mjugyhädät nebiä Dios jjugyhatiän, hoyyä mdecy hänajty metsc mga'a jagä møødä. Hix, coo tehngajnä mjaac cädieeyät, jii by mhädá'agät haxøøgtuum, hoyyä mdecy hänajty jia ca'xiä.

⁴⁷ Jaanä jaduhñduhmbä, pø jimä mwiin hänajty xyajcädieey, maas hoy jaduhñ coo mnä'ägädä yajpädsømät, jaduhñ tehngajnä xquia'a yajcädiéhñät. Jaduhñäts homiänaajä mjugyhädät nebiä Dios jjugyhatiän, hoyyä mwiin hänajty metsc mga'a jagä møødä. Hix,

coo tehngajnä mjaac cädiéeyät, jiiby mhädá'agät haxøøgtuum, hoyyá mwiin hánajty jia ca'xiä.

⁴⁸ Jiiby haxøøgtuum, cabä tøønghajxy jiiby mänaa ñä'ägä ho'ogy, møød cabä jøøn jiiby mänaa ñä'ägä pi'tspä.

⁴⁹ 'Pøñ jiiby hijp haxøøgtuum, cab hajxy jaduhñ jiiby mänaa quiøxy toya'añ. Jaduhñ mäwíinäts je'e nebiä tsu'u'uch caanø'øybän, cabä jøøn jaduhñ jiiby mänaa pyi'ich.

⁵⁰ Ja'a caan, tuungpaatp je'e. Pero coo ja'a tiaamdspä quióxät, cab jaduhñ mänaa tiuungpáatnät. Jaduhñ mäwíinäts mijtspä, hoy yajxon hajxy mnimiøødhidøøjtät. Cab hajxy jaduhñ mänaa myajniguiudsip myajniguiuma'adø'øwøøjtät.

10

¹ Mänitá Jesús jim chónngumbä Capernaum. Mänit ñøcxy Judea-naaxooty, ja'a xøøbädsømyhaampiä, jim Jordán-møjnøøhawiimb. Mänitá jäya'ay may ñäméjtsägumbä. Mänitá Jesús tiägøøguiumbä yajnähixøøbiä, neby hánajty naxy yajnähixø'øyhatiän.

² Mänitá fariseodøjc-hajxy näje'e miejch. Mänitá Jesús hajxy miäyajtøøyy:

—Nej, miimbä cuhdujt jaduhñä coo jäya'ayhajxy ñiyhøxmadsøøjtädä.

Paadiä Jesús jaduhñ miäyajtøøwä, hijxmadsaanäp hánajty jaduhñ waamb hánajty yhadsowa'añ.

³ Mänitá Jesús yajtøødagajch:

—Nej, jaduhñä Moisés jecy quiujahyyä coo hajxy mniyhøxmadsøøjtädä.

⁴ Mänitá fariseoshajxy yhadsooyy:

—Jaduhñä Moisés jecy quiujahy coogä cuhdujt jaduhñ myiñ coo jäya'ayhajxy ñiyhøxmadsøøjtät.

⁵ Mänitá Jesús miänáangumbä:

—Coo mijts mjaan'ch tehñ quiuhxexä, paadiä Moisés ja'a cuhdujt jaduhñ jecy yecy coo mdo'oxiøjc hajxy mhøxmádsät.

⁶ Mänaa ja'a naaxwiimbä jecy yhawijy tiøø'xta'aguiän, mänitá Dios jäya'ay metsc quiunuu'xy ya'adio'oxy.

⁷⁻⁸ Coo ja'a Dios ja'a jäya'ay jaduhñ jecy quiunuu'xy ya'adio'oxy, paadiä ya'adiøjc jaduhñ tio'oxiøjwiingpøgät. Jaduhñ hajxy jaduhñ yhíjnät nebiä tu'que'expän. Hawiingøøby hajxy jaduhñ. Cab hajxy wioowhíjtänä ja'a tiaj ja'a tiéediäm.

⁹ Pønatiä Dios jaduhñ tøø quiunuu'xy coo hajxy ñimiøødtsäna'awøød nämetsc, cab hajxy jaduhñ ñiyhøxmadsøøjtät —nømä Jesús miänaañ.

¹⁰ Mänitá Jesús hajxy tiøjtägøøyy møødä jiamiøødtøjc. Mänitá Jesús jadähooc miäyajtøøwä ja'a jiamiøød waambatiä Jesús ja'a fariseodøjc hánajty tøø miøødmädia'agy.

¹¹ Mänitá Jesús yhadsooyy:

—Pønä tio'oxiøjc høxmajtsp, y mänitá wiingto'oxiøjc wyiingpøcy, miägädiehbiä tio'oxiøjc jaduhñ. Haxøøg jaduhñ jiatcø'øy.

¹² Jaanä jaduhñduhmbä, coo ja'a to'oxiøjc ñihyhap yhøxmádsät, y coo wiingya'adiøjc wyiingpøgät, jaduhñä ñihyhap miägädiehbiä. Jaanä haxøøg je'eduhñ jiatcøøbiä —nømä Jesús miänaañ.

¹³ Mänitá Jesús pigäna'c mejtstägøøg yajnämejtsä, coo hajxy ween quiunuu'xyii. Coo ja'a Jesús jiamiøød hajxy jaduhñ yhiixy cooc tyijy ja'a Jesús hánajty yhadsowa'añii, mänitá pigäna'cä tiajhajxy yhadújcäxä coo ja'a Jesús hajxy jaduhñ quia'a nänócxät.

¹⁴ Coo ja'a Jesús jaduhñ yhiixy coo ja'a pigäna'c-hajxy hánajty wyi'i yhadugyii, mänitá Jesús ja'a jiamiøød yhojy:

—Ca'a yø'ø pigäna'c hajxy mwi'i yhaducy. Wéenhøch hajxy jaduhñ xñämiñ. Coo mijtsä Diosmädia'agy jaduhñ mmäbøgät neby hädaa pigäna'c-hajxy miäbøquiän, mänit mijtsä Dios jaduhñ xyhuunghädät.

¹⁵ Hix, ja'a pigäna'c-hajxy, cab hajxy tii quia'a nä'ä mäbøcy. Tsipcøxp hajxy jaduhñ ñä'ägä mäbøcy. Jaduhñds je'e, coo mijts mmäbøgät nebiä pigäna'c-hajxy miäbøquiän, mänit hajxy jaduhñ mjugyhádät cøjxta'axiøø nebiä Dios jiugyhatiän. Tøyhajt jaduhñ —nømä Jesús miänaañ.

¹⁶ Mänitä Jesús ja'a pigäna'c tiägøøyy cunuuxpä tu'ugjaty-tu'ugjaty. Cø'ønähgájpäp hajxy hänäjty.

¹⁷ Mänitä Jesús jim chohñ. Jim hänäjty tiu'uyo'oyñä, mänitä Jesús jäya'ay tu'ug päyø'øguiä ñajtspaadøøyyä. Mänit wyiinjiçädaacä. Mänit ñämaayyä:

—Wiindsøn, mjaanç tehñ yhoyhäna'c miich. Nébiøch ngudiúnät cooçh cøjxta'axiøø njugyhádät nebiä Dios jiugyhatiän —nømä Jesús miäyajtøøwä.

¹⁸ Mänitä Jesús yhadsooyy:

—Tiiçh miich jaduhñ coo xñäma'ay cooçh nhoyhäna'cä. Ni pøn jaduhñ quia'a hoyhäna'cä. Jagooyyä Dios tu'uquiä yhoyhäna'cä.

¹⁹ Mnajuøøby miich jaduhñ nebiatiä Moisés cuhdujt jecy yejcy, túhmäts. “Cab hajxy mniyagho'ogøøjät. Cabä wiingto'oxiøjc hajxy mmøødtsänä'awät. Cab hajxy mméedsät. Cab hajxy mhøhñdá'agät. Cab hajxy mmäméedsät høhñda'agymiädia'agyhaam. Mwiin-gudsähgø'øwäbä mdajjä mdeedy hajxy” —nømä Jesús miänaañ.

²⁰ Mänitä Jesús ñämaayyägumbä:

—Pero Wiindsøn, homiänáajøch jaduhñ ngudiuñ. Múutsnøçhä hoguiuhdujt nmädsohñdaacy —nømä Jesús ñämaayyä.

²¹ Mänitä Jesús ja'a craa wyiinhee'ppejty. Jiaanç tehñ chójcäbä craa hänäjty je'e. Mänitä Jesús miänaañ:

—Tu'tu'uyyä mga'a cøxy cudiuñ. Nøcx cøxy toog tijaty jim mmøød, jaduhñds mmó'owät pønjaty hajxy häyoob. Coo jaduhñ mgudiúnät, mänit jim mnøcxät Dioswiinduum. Jim miichä hoybä weenbä mbáadät tsajpootyp. Hoorä, høøçh padu'ubøjçäc.

²² Coo ja'a craa jaduhñ ñämaayyä, mänit jiootmadiägøøyy. Mänit wyiimbijnä tájjäp máayyap. Hix, jaanç tehñ miäyøø hänäjty je'e.

²³ Jimä Jesús ja'a jiamiøødhajxy hänäjty piadäna'ay. Mänitä Jesús wyiinhee'ppejty. Mänit miänaañ:

—Jaanç tehñ chip jaduhñ coo yø'ø mäyøødøjc-hajxy jim ñøcxät Dioswiinduum. Tehñ tiøyhajt jaduhñ.

²⁴ Coo ja'a Jesús jaduhñ miänaañ, jiaanç tehñ yagjuøøyy ja'a jiamiøødhajxy jaduhñ. Mänitä Jesús miänáangumbä:

—Mägu'ughajpádøjc, pønjatiä xiädø'øñ hajxy hajoodhajp, jaanç tehñ chip jaduhñ coo hajxy jim ñøcxät Dioswiinduum.

²⁵ Maas paquiä camello tu'ug jiiby ñaxó'owät xuhñdyjutooty quejee ja'a mäyøøhäna'c-hajxy jim tiägø'owät Dioswiinduum.

²⁶ Coo ja'a Jesús jaduhñ miänáangumbä, mänitä jiamiøødhajxy maas hanaxiä yagjuøøguiumbä. Mänitä Jesús miäyajtøøwä:

—Pønçäda'aduhñ jaanç tøy nähwa'adsaamb.

²⁷ Mänitä Jesús wyiinhee'ppéçcumbä. Mänit miänaañ:

—Ja'a jäya'ayhajxy, cab hajxy hamdsoojoot hoy yajniñähwa'adsøøjät. Pero Dios, je'eds mäyajnähwaatp. Hotyijä Dios jaduhñ jiaty.

²⁸ Mänitä Pedro ja'a Jesús ñämaayy:

—Huuc mädown, coo højts miich nbadu'ubøjcy, cøjx højts nnähgue'egy tijaty højts hijty nmøød.

²⁹⁻³⁰ Mänitä Jesús yhadsooyy:

—Pønjaty cøxiä tøø ñähgue'egy ja'a høøçhcøxpä møødä Diosmädia'agyquiøxpä, maas may hajxy jaduhñ jiaac paada'añ hädaa yaabä naaxwiin tijaty hajxy hänäjty tøø ñähgue'egy tøø yhøxyo'oy, tiøjc, piuhya'ay, piuhdo'oxy, tiaj tieedy, yhuung, ñaax. Møød

jim hajxy ñøcxa'añ tsajpootyp. Jim hajxy jaduhñ homiänaajä yhida'añ, hoy hajxy hänajty yaa tøø jia tsaachpøcy ja'a høøchcøxpä hädaa yaabä naaxwiin. Tøyhajt jaduhñ.

³¹ Pønjatiä møjtuunḡ jäda'ahaty ca'a møød, nämay hajxy miøjtägø'owa'añ. Pero pønjatiä møjtuunḡ jäda'ahaty ja møød, nämayyä tiuunghajxy piøgäänäxä —nømä Jesús miänaañ.

³² Mänitä Jesúshajxy jim tiu'ubøjcy møødä jiamiøødtøjc. Jerusalén hajxy hänajty ñøcxa'añ. Jawyiinä Jesús hänajty yo'oy. Mayyä jäya'ayhajxy hänajty pianøcxy møødä Jesús jiamiøødhajxy, ja'a hajxy hänajty nämajmetspä. Jaanč tehñ yagjuøøby hajxy hänajty. Høxtä tsähgøøby hajxy hänajty. Mänitä Jesús ja'a jiamiøød hawiing wioonøcxy. Mänitä Jesús tiägøøyy mädiaacpä nebiaty hänajty jiada'añ yhabeta'añ:

³³ —Huuc mäadow hajxy, yam hajxy nnøcxäm Jerusalén. Coø hajxy jim ngoodáanäm, mänitøchä teedywiindsønñhajxy xyajcø'ødägø'owa'añ, møødä häna'cä Diosmädia'agy hajxy jim yajnähixøøbiä tsajtøgooty, høøch ja'a Diosquexypä. Mänitøch hajxy jaduhñ xyajndija'añ coøch hajxy xyagho'oga'añ. Mänitøch hajxy xyajcø'ødägø'owa'añ ja'a häna'c-hajxy jim tsohm̄bä Roma.

³⁴ Madiú'ujøch hajxy xchaačtiuna'añ. Xñäxi'igáambøch hajxy. Xwyiinwoonáambøch hajxy. Xwyiingutsujø'owáambøch hajxy. Xwiobho'ogáambøch hajxy. Mänitøch hajxy xjia yagho'oga'añ. Pero cudägøøgxøøyyøch njujypiøjtägatsa'añ, —nømä Jesús miänaañ.

³⁵ Mänitä Jesús wyiinguwa'agøøyyä ja'a Santiago møødä Juan. Ja'a Zebedeo yhuunghajxy hänajty je'e. Mänit hajxy miänaañ:

—Wiindsøn, huuc tunä mayhajt ja'a højtsøxpä.

³⁶ Mänitä Jesús yhadsooyy:

—Tii mayháthøch ndúnäp.

³⁷ Mänitä Santiagohajxy miänáaḡumbä:

—Coo miich hänajty tøø mmøjtägø'øyy, coø hänajty tøø mdägø'øyy hanehm̄bä, mänit højts cuhdujt xmió'owät coø højts jim nhäñá'awät miichä mnähmøjc, hahooyhaampiä møød hanajtyhaampiä.

³⁸ Mänitä Jesús yhadsóogumbä:

—Mijts, cab hajxy mnajuø'øyy tii hajxy jaduhñ mnänøøm̄by. Nej, mmee'xtúgäp hajxy jaduhñbä nébiøch ndsaačhpøgá'añänä.

³⁹ Mänitä Santiagohajxy yhadsooyy:

—Nmee'xtúgäp højts jaduhñ.

Mänitä Jesús miänáaḡumbä:

—Jaduhñ mijts mjaanč tsaachpøgaambä nébiøch ndsaačhpøga'añän. Tøyhajt jaduhñ.

⁴⁰ Pero cábøchä cuhdujt jaduhñ nmøødä coø mijtsä cuhdujt nmó'owät coø hajxy jim mhäñá'awät høøchä nnähmøjc mänáajøch hänajty tøø ndägø'øyyän hanehm̄bä. Dios ja'a cuhdujt møød pøn yajnähdiijaam̄by coø hajxy jim yhäñá'awät. Je'edshajxy jaduhñ jim häñá'awaamb —nømä Jesús miänaañ.

⁴¹ Coø Jaha Jesús jiamiøødhajxy jaduhñ miädooyy, ja'a hajxy hänajty jaac nämajcpä, mänitä Santiagohajxy miäjootma'tä møødä Juan.

⁴² Mänitä Jesús miøjyaaxy ja'a hajxy hänajty jaac nämajcpä. Mänitä Jesús miänaañ:

—Ja'a gobiernähajxy, møødä häna'c-hajxy yaa møjtuunḡmøødpä hädaa yaabä naaxwiin, ja'a häna'cätshajxy jaduhñ yaa hanehm̄b. Mnajuøøby hajxy jaduhñ, túhm̄äts.

⁴³⁻⁴⁴ Pero mijts, cab hajxy mbøc-juó'owät coø møjtuunḡ hajxy mmøødhädät. Pønä jioot tsojp coø wyiingudsähgø'owøøjät, weenä jioot piäda'agy coø jiamiøød piuhbédät.

⁴⁵ Høøchpaady, høøch ja'a Diosquexypä, mäbuhbéjpøch jaduhñ yaa tøø ngäda'agy. Høxtä nnähho'tu'udáambiøchä jäya'ayhajxy nägøxiä. Cáboch jaduhñ nmäna'añ coøchä jäya'ayhajxy xpiuhbédät.

⁴⁶ Mänitä Jesúshajxy quioo'ty maa ja'a cajpt hänajty xiøhatiän Jericó. Coø hajxy jim chóhḡumbä, mayyä jäya'ay hajxy piadu'ubøjcä. Jimä wiinds hänajty tu'ug yhäñá'ay

tu'haam. Bartimeo hänajty xiøhaty. Timeo ja'a tieedy hänajty xiøhaty. Xädø'øñyujwaambä Bartimeo hänajty.

⁴⁷ Coo ja'a Bartimeo jaduñ miädooyy coo hänajty je'e Jiesúsä, ja'a hänajty tsohm̄bä Nazaret, mänit̄ä Bartimeo m̄oc yaaxy:

—Jesús, David miich jecy mhaphajt mdeedyhajt. Høøch näxúu'tsäc.

⁴⁸ Mänit̄ä Bartimeo yhojmujcä nämay coo cu yhamooñ. Pero cab jaduñ ñä'ä hamooñ. Tehngajnä maas m̄oc tiägøoyy yaaxpä:

—Jesús, miichä David jecy mhaphajt mdeedyhajt. Høøch näxúu'tsäc.

⁴⁹ Mänit̄ä Jesús tiänaaxiøjpy. Mänit̄ miänaañ coo ja'a Bartimeo miøjya'axøjät. Mänit̄ä Bartimeo tu'jäya'ay ñämaayyä:

—Xooñda'ag, tänaayyø'og. Xim̄ä Jesús xmiøjya'axy.

⁵⁰ Mänit̄ä Bartimeo paquiä tiänaayyø'cy. Mänit̄ä yoñwit yajniñähnaiptuutä. Mänit̄ä Jesús päyø'oguiä hoy wyiingumedsø'oy.

⁵¹ Mänit̄ä Jesús ja'a Bartimeo miäyajtøoyy:

—Tii mayhajt jaduñ myajtunáañp.

Mänit̄ä Bartimeo yhadsooyy:

—Wiindsøn, høøch yaghixø'cäc.

⁵² Mänit̄ä Jesús miänaañ:

—Ja'a hoy, tisän coo quia'a cabä. Coochä nmädia'agy tøø xmiäbøjcä, paady tøø mhijxø'nø.

Tuunä Jesús jaduñ ñä'ä mänaañ, mänitiä Bartimeo jiaanč hijxø'cy. Mänit̄ä Jesús piadu'ubøjnä.

11

¹ Jim̄ä Jesúshajxy hänajty quioodaannä maa ja'a cajpt hänajty xiøhatiän Betfagé møød Betania, jim̄ mädooyyä maa ja'a tuñ hänajty xiøhatiän Olivos. Jim̄ hänajty miäwiingón Jerusalén. Mänit̄ä Jesús ja'a jiamiøød metsc

² ñämaayy:

—Nøcx hajxy jim̄haamby maa yø'ø cajpthuungän. Coo hajxy jim̄ mmedsa'añ, jim̄ä burro hajxy tu'ug mbaada'añ cuxoch. Cahnä pøn yajpejmachñä. Mmäguejø'owäp hajxy. Jaduhñds hajxy yaa mwitsmínät.

³ Y pø jim̄ä jäya'ay hajxy xmiäyajtøy tii hajxy jaduñ coo mmäguejø'oy, mänit̄ hajxy mnämä'awät: “Ja'a nwiindsøn højts cham yajmaajajp. Paquiä højts nnä'ä yajtuna'añ. Mänit̄ højts min̄ nnajtswidso'oy.” Jaduhñ hajxy mmäná'anät —nømä Jesús ñajtscapxøoyy.

⁴⁻⁵ Mänit̄ä burro hajxy hoy jiaanč paady cuxoch jim̄ møjtu'haam, jim̄ tøjñähmøjc mädooyyä. Jim̄ä jäya'ayhajxy hänajty näje'e tiäna'ay. Coo ja'a Jesús jiamiøødhajxy tiägøoyy burromäguejøøbiä, mänit̄ hajxy ñämaayyä:

—Tii yø'ø burro hajxy jaduñ coo mmäguejø'oy.

⁶ Mänit̄ hajxy jaduñ yhadsooyy waambaty hajxy hänajty tøø yhane'emyii coo hajxy jaduñ yhadsówät.

⁷ Mänit̄ä Jesús ja'a burro yajnäméjtsäxä. Mänit̄ä jiamiøødä wyit hajxy jim̄ piädaacy burronähgøxp. Mänit̄ä Jesús jim̄ piejty.

⁸ Jaanč tehñ miayyä jäya'ayhajxy hänajty pianøcxy. Mänit̄ä wyit hajxy näje'e chijy. Jaduhñds hajxy tu'haam ñajtsye'ebøoyy maa ja'a Jesús hänajty burronähgøxp ñaxø'owa'añän. Näje'e hujtsaay hajxy hänajty piujxpä. Jim̄ hajxy hänajty piädaacpä tu'haam.

⁹ Cu'ughagujcä Jesús hänajty ñøcxy. Mänit̄ä cu'ughajxy nägøxiä tiägøoyy yaaxpä jojpä:

—¡Viva Jesús, viva! ¡Gloria a Dios! Diosquexy hädaa Jesús jaduñ.

¹⁰ ¡Gloria a Dios tsajpootypä! Jaduhñ hädaa Jesús yhane'emaambä nebiä David jecy yhanehmian, ja'a hajxy jecy nhaphajt ndeedyhajtäm.

11 Mänitä Jesúshajxy jim̄ quioo'nä Jerusalén, møødä jiamiøød ja'a nämajmetspähajxy. Mänit hajxy jim̄ ñøcxøøyy maa ja'a tsajtøjcän. Coø hajxy jiiby chajtøjtägøøyy, mänit hajxy yhiixwädiyty tijaty hänäjty jiiby. Mänit hajxy wyiimbíjcumbä. Mänit hajxy jiiby yhädáaccumbä Betania. Hiix, tøø hänäjty chuujø'øy, y jiiby hajxy hänäjty miejtsta'aga'añ Betania.

12 Cujaboom, mänitä Jesúshajxy jim̄ tiu'ubójcumbä. Mänitä Jesús yäho'pøjcä.

13 Mänitä piids tu'ug ñäheebøøyy coø hänäjty jim̄ tiäna'ay picxumnä. Coø wiingón ñämejch, mänit yhiixy coø tiøøm hänäjty quia'a nä'ägädä hity. Haagä haay hänäjty je'e. Cahnä yhiits hänäjty yhabaadyñä mänaabä hänäjty naxy tiøømbetiän.

14 Mänitä Jesús piids ñämaayy:

—Ni mänaa miich mga'a tøømbejtägatsaanä.

Coo ja'a Jesús jaduñ miänaañ, miädoow ja'a jiamiøødhajxy jaduñ.

15 Coø ja'a Jesúshajxy jim̄ miejtstägajch Jerusalén, mänitä Jesús jiiby chajtøjtägøøguiumbä. Mänitä Jesús ja'a too'pädøjc juubiädøjc tiägøøyy høxpäboobiädsøømbä jiiby tsajtøgooty. Mänitä meexä tiägøøyy høxjuipä maa xädø'øñ hajxy hänäjty quiuwichän, møødä häñaabiejt maa hajxy hänäjty yhäña'ayän coø hajxy hänäjty pialomatoogy.

16 Mänitä Jesús tiägøøyy hadujpä coø ja'a jäya'ayä tioogy hajxy jiiby quia'a mädägøøñät tsajtøgooty.

17 Mänitä Jesús tiägøøyy yajwiingapxøøbiä:

—Jaduñ jim̄ myiñ cujaay maa ja'a Diosmädia'aguiän: “Pa'yaaxtäacthøchä ndøjc hajxy nägøxiä xwiäänät, ja'a jäya'ayhajxy wiinduhmyhagajtpä.” Jaduñä Dios jecy miänaañ. Pero mijts, wiing mijtsä tsajtøjc mwa'añ. Jaduñ hajxy mwa'añ nebiä mee'tstaactän —nømä Jesús miänaañ.

18 Coø ja'a teedywiindsøñhajxy jaduñ miädooyy, møødä häna'cä Diosmädia'agy hajxy hänäjty jiiby yajnahixøøbiä tsajtøgooty, mänit hajxy tiägøøyy cojyquiapxytiuumbä nebiä Jesús hajxy yaghó'ogät. Hiix, chähgøøbiä Jesús hajxy hänäjty je'eguiøxpä coø ja'a Jesús ja'a miädia'agy hänäjty jiaanç tehñ yhamädoowhíjtäxä ja'a cu'ug.

19 Pero coø quioodsøøñä, mänitä Jesúshajxy jiiby yhädáaccumbä Betania.

20 Cujaboomä Jesúshajxy ñøcxtägajch Jerusalén. Coø hajxy jim̄ ñaxøøguiumbä maa ja'a Jesús ja'a piids hänäjty tøø ñäbogø'øyän, mänitä piids hajxy yhiixy coø hänäjty tøø quiøxy tø'øch.

21 Coø ja'a Pedro jaduñ jiahmiejtstaacy, mänitä Jesús ñämaayyä:

—Wiindsøn, huug hiix yø'ø piids. Häxøøy miich yø'ø mnäbogøøyy coø ni mänaa quia'a tøømhánät. Tøø yø'ø quiøxy tøøtsnä —nømä Pedro miänaañ.

22 Mänitä Jesús yhadsooyy:

—Mäbøjcä ja'a Dios miädia'agy coø jiaanç tehñ tiømiädia'aguiä.

23 Coø hajxy hamuumdu'joot mmäbøgät, høxtä yø'ø tun ja'a mmädia'agyhajxy xquiudiúunäp coø hajxy mnämä'awät coø ween nøcxy miejyquia'awø'øy. Mänitä mmädia'agyhajxy jaduñ xquiudiúunät coø ja'a Dios ja'a miädia'agy hajxy hamuumdu'joot mmäbøjcät coø tiømiädia'aguiä. Tøyhajt jaduñ.

24 Coø mijtsä Dios tijaty mmäyujwá'anät, xmió'owäp hajxy jaduñ, coø ja'a miädia'agy hajxy hamuumdu'joot mmäbøjcät coø tiømiädia'aguiä.

25 Coø mijtsä Dios hänäjty mba'ya'axa'añ, tsipcøxpä häna'c hajxy jayøjp mmämée'xät, ja'a mijts hänäjty tøø xñägädieeyø'øyäbä, jaduñä Dios hajxy jaduñ xmiämée'xpät tijaty hajxy hänäjty mgädieeyhajpy.

26 Pero pø cab hajxy mmämée'xa'añ, ni mijtsä mDeedy tsajpootypä xquia'a mämée'xtägatsa'añ —nømä Jesús miänaañ.

²⁷ Coo ja'a Jesúshajxy jim quioo'tägajch Jerusalén, mänitá Jesús jadähooc tiägøøyy tsajtøgooty. Jiibiä Jesús hänajty wiädity, mänit ñámejtsä ja'a teedywiindsón, møødä häna'c-hajxy jiiby yajnahixøøbiä tsajtøgooty, møødä majjaya'adiøjc.

²⁸ Mänitá Jesús hajxy miäyajtøøyy:

—Pøn miich cuhdujt tøø xmio'oy coo miich häxøøy yaa tsajtøgooty tøø mdsiptuñ.

²⁹⁻³⁰ Mänitá Jesús yhadsooyy:

—Nhadsóowäbøch häyaa jaduhñ cooch mijts häyaa jayøjp xyhadsóowät. Pønä Juan mäyajnäbejpä quejx, Diosä tögä jäya'ayä. Hadsóowägøch hajxy. Cooch hajxy häyaa xyhadsóowät, mänitøch mijts häyaa nhadsoodägájtspät —nømä Jesús miánaañ.

³¹ Cabä teedywiindsønñhajxy hänajty ñajuø'oy waambä Jesús hajxy yhadsóowät. Mänit hajxy tiägøøyy niñámáyyäbä: “Coo hajxy häyaa nmánáañämät coo ja'a Dios ja'a Juan quiejxy, jaduhñ jadähooc xyhadsowáañäm: Aa, pø tøyhajt jaduhñ coo ja'a Dios ja'a Juan jiaanç quejxy, tii ja'a Juan miädia'agy hajxy coo tøø mga'a mäbøjcä.

³² Y coo hajxy häyaa nmánáañämät coo ja'a Dios ja'a Juan quia'a quejxy, mänitá cu'ug hajxy häyaa xmiädsibøøyyämät.” Hix, jaduhñä cu'ughajxy hänajty miána'añ coogä Juan hänajty Dyiosquexiä.

³³ Mänitá Jesús hajxy ñämaayy coo hajxy hänajty quia'a najuø'oy. Mänitá Jesús yhadsooyy:

—Pues, ni høøch jaduhñ nga'a nägapxaambä pønñhøchä cuhdujt tøø xmio'oy.

12

¹ Mänitá Jesús tiägøøyy yajnahixøøbiä cuentäyajmäbaadyhaam:

—Mänitá jäya'ay tsaatypcam tu'ug piädaacy. Mänit jiuhguraajøøyy. Mänitá tsaatyñøøxee'xøhñdy ñädajøøyy. Mänitá nähbettøjc tu'ug yhädiuun coo hajxy jim yhäñá'awät coo ja'a tsaatypcam hajxy hänajty cwieendähada'añ. Mänitá wiingjäya'ay ja'a tsaatypcam hajxy yajcø'ødägøøyyäxä coo hajxy cøguipxyjiaty cwieendähädät. Mänitá cudsatyp jäguemnaax ñøcxy.

² Coo ja'a tsaatyptuc yhabaaty, mänitá cudsatyp ja'a mioonsä quiejxy coo hajxy cøgужиä ween yajwa'xy.

³ Coo ja'a craa jim miejch, mänit hoyhoy quioxho'cä. Mänit piäboowyimbijtä cø'øwa'ads.

⁴ Mänitá cudsatyp ja'a mioonsä mäwiingpä jia quéjxcumbä. Maas hanaxiä craa je'e wiobhó'cäbä. Høxtä yajtsäbítäxä ja'a quiopc jaduhñ. Hoyhoy jaduhñ chaächtuuñä.

⁵ Mänitá cudsatyp ja'a mioonsä mäwiingpä jia quéjxcumbä. Mänit hajxy je'e yagho'cy. Maas mayyä mioonsä jia jaac tehñ quiejxy. Näje'e hajxy wiobho'cä; näje'e hajxy yagho'cä.

⁶ Jimä cudsatyp ja'a yhuung hänajty tu'ug. Jiaanç tehñ chojpiä yhuung hänajty. Mänit ñämaayy: “Nhuuc quéxyhøch miich jim. Wehñdä miich hajxy häyaa xñä'a wiingudsähgø'øwät.”

⁷ Coo ja'a cudsatyp yhuung jim miejch, mänit hajxy tiägøøyy niñámáyyäbä, ja'a tsaatypcam hajxy hänajty tøø miämähmø'øyyäbä: “Coo hädaa craa tieedy häyaa ñä'a hó'ogät, hädaa craa jaduhñ cøxiä mämähmø'øwaamb mäduhñtiä hädaa tsaatypcam. Tsøc hädaa craa hajxy jaduhñ nä'ägä yaghó'cäm, jaduhñ højts hädaa tsaatypcam nje'ehájtämät.”

⁸ Mänitá cudsatyp yhuung miájtäxä. Mänit yagho'cä. Mänit hajxy hoy yhøxchømy jäguemjuøøby.

⁹ Haa, nebiä cudsatypäda'a hänajty jiatcø'øwa'añ. Nøcxaambäda'a hajxy yagho'tägatsa'añii, ja'a hajxy hänajty tøø miäyaghó'oguiäbä. Mänitá wiinghäna'cä tsaatypcam hajxy hänajty yajcø'ødägø'øwa'añii.

¹⁰ Jaduhñ jim myiñ cujaay maa ja'a Diosmädia'aguiän:

Ja'a tsaä mädyii ja'a tøjmuu'tspädøjc-hajxy quia'a nä'ägä cumaayy, je'e nä'ägä tuundsöhñ maa ja'a tøjteecän.

11 Ja'a Dios jaduhñ mänañ coo ja'a tsaä jaduhñ jim̄ tiuundsóonät.

Paady hajxy jaduhñ jaanč tehñ yajxón nhíxäm —nømä Jesús miädiaacy.

12 Ja'a teedywiindsønñhajxy, ñajuøøby hajxy hänäjty jaduhñ coo hajxy hänäjty tøø yajmäbaadyii nebiä cahwiindøyhäna'cän, ja'a hajxy hänäjty tsaatypcueendähajpä. Coo hajxy jaduhñ ñajuøøyy, paadiä Jesús hajxy hänäjty jia wi'i miadsa'añ. Pero cab hajxy jaduhñ ñä'ä majch, je'eguiøxpä coo ja'a cu'ug hajxy hänäjty chähgø'øy. Mänitä Jesús hajxy ñähgüecnä. Mänit hajxy wyiimbijnä.

13 Mänitä fariseoshajxy näje'e wyiinguejxä, møødä Herodes quiu'ughajxy näje'ebä, coo ja'a Jesús hajxy yajcapxtägóyyät, jaduhñ hajxy hoy ñäxø'øwø'øwät.

14 Mänitä Jesús ñämejtsä. Mänit ñämaayyä:

—Nñajuøøby højts coo miich tøy mjaanč tehñ miädia'agy. Caj miich jaduhñ mnä'ägä mõjpäda'agy waambatiä cu'ug xjia näma'ay. Tu'cuhdujt miichä jäya'ay mhixy, pønjaty hajxy mäyøø, pønjaty hajxy häyoob. Tøyhajt højts miich xyajnähixø'øy coo højts hoy njäya'ayhädät nebiä Dios choquiän. Hoorä, coo højtsä gobiernä Rómabä hänäjty xyajnähuudiu'uda'añ, nej, hahixøøby jaduhñ coo højts nnähjuudiú'udädä —nømä Jesús miäyajtøøwä.

15 Mänitä Jesús yhadsooyy:

—Tiich hajxy jaduhñ coo xjia wi'i yajcapxtägoyya'añ. Høøchä xädø'øñ tu'ug huuc yaghíxäc.

Paadiä Jesús jaduhñ miänaañ, ñajuøøby hänäjty jaduhñ coo hänäjty jia wi'i yajcapxtägoyya'añii.

16 Mänitä Jesús xädø'øñ jiaanč yaghijxä. Mänit miänaañ:

—Pøn wyiin jiojy yø'øduhñ. Pøn xiøø yø'øduhñ jim̄ miimb.

Mänit hajxy yhadsooyy:

—Ja'a gobiernä wyiin jiojy yø'ø, ja'a jim̄ tuumbä Roma. Jaaya'ay xiøø yø'øbä.

17 Mänitä Jesús miänáangumbä:

—Tøyhajt jaduhñ. Mo'owxä ja'a gobiernä hajxy pø je'e jie'e yø'ø. Pero mädyii ja'a Dios jie'e, mo'ow hajxy je'ebä.

Coo ja'a Jesús jaduhñ yhadsooyy, jaanč tehñ yagjuøøyy ja'a fariseoshajxy jaduhñ.

18 Mänitä Jesús ja'a saduceos näje'e ñämejtsä. Cabä saduceoshajxy hänäjty miäbøcy coogä ho'ogyjiäya'ayhajxy hänäjty jiuypiojtgatsa'añ. Jaduhñä saduceoshajxy hänäjty miäna'añ cooc tyijy ja'a ho'ogyjiäya'ayhajxy quia'a juyyiojtgatsa'añ.

19 Mänitä saduceos ja'a Jesús hajxy ñämaayy:

—Wiindsøn, jaduhñä Moisés jecy quiujahy neby højts nguhdujthájtämät, højts judiojyäya'ayhájtäm. Hoorä, coogä ya'adiøjc tu'ug yhö'ogät, coog hänäjty piøquiä, pø cáhnäg hajxy hänäjty yhuungpaadyñä, pø jímägä piuhya'ay, wéenägä piuhya'ay ja'a yaamgto'oxy wyiingpøcy, jaduhñäc hajxy jaduhñ yhuungpáadät. Jaduhñäc quiähxø'øgät coog hänäjty je'e yhuungä, ja'a hänäjty tøø yhö'oguiäbä.

20 Hoorä, jii jäya'ayhajxy hänäjty näjuxtujya'ay, haagä tu'que'ex. Mänitä tehñ quioobhuung tio'oxiojwiingpøjcy. Cab jejcy miøødtsänaayy, mänitä craa yho'cy. Cabä huung hajxy ñä'ä paaty.

21 Mänitä jioðsømy ja'a yaamgto'oxy wyiingpøjcy. Ni je'ehajxy quia'a huungpaatpä. Mänitä craa yho'pä. Jaduhñä jioðsømy je'ebä jia wiingpøjcumbä. Jaanä jaduhyyä je'e jiajpä nebiä yhajchhajxy jiajtiän.

22 Jaduhñ hajxy näjuxtujc jia møødtsänaayy, ni pøn je'e quia'a yaghuungpaaty. Nägøxiä hajxy jaduhñ yho'cy. Høxtä ja'a to'oxiojyc, jaac tehñ yho'c je'ebä.

²³ Bueno, coo ja'a ho'ogyjiäya'ayhajxy hänajty nägøxiä jiuypiojtägatsa'añ, pønda'a je'e tehñ tiøybä møødtsäna'awaamb, ja'a hajxy hänajty näjuxtujcpä. Hix, näjuxtujc hajxy hänajty tøø jia møødtsäna'ay. Paady højtsä tøyhajt ndsocy —nømä Jesús ñämaayyä.

²⁴ Mänitä Jesús yhadsooyy:

—Caj mijtsä tøyhajt hajxy mnä'ägä møødä, je'eguiøxpä coo ja'a Diosmädia'agy hajxy mga'a nä'ägädä wiinjuø'øy. Møød cab hajxy mnajuøøbiä nebiatiä Dios ja'a miøcmäjaa yajcähxø'øgy.

²⁵ Coo ja'a ho'ogyjiäya'ayhajxy hänajty jiuypiojtägatsa'añ, cab hajxy mänit piøga'añ, cab hajxy mänit yhu'uga'añ. Jaduhñ hajxy yhida'añ nebiä Diosmoonsähajxy jim yhitiän tsajpootyp.

²⁶ Tii mijts coo mga'a mæbøga'añ coo ja'a ho'ogyjiäya'ayhajxy jiuypiojtägatsa'añ. Jaduhñä Moisés jecy quiujahy coogä Dios tähooc miøødnibiaatä jim pactuum maagä hujts haptymøødpä hänajty tioyyän. Mänitägä Dios ja'a Moisés ñämaayy: “Høøchä Abraham xDyioshajp, møødä Isaac, møødä Jacob.”

²⁷ Coo ja'a Dios jaduhñ jecy miänaañ, jaduhñä tøyhajt hajxy nmøødhájtäm coo ja'a Abrahamhajxy hänajty tøø jiuypiojtägach, møødä Isaac, møødä Jacob. Hix, jujcyjiäya'ay ja'a Dios jaduhñ Dioshájtäp, ca'a yho'oguiäya'ayä. Coo mijts jaduhñ mmäna'añ cooc tyijy ja'a ho'ogyjiäya'ayhajxy quia'a juypiøjtägatsa'añ, caj mijtsä tøyhajt hajxy mnä'ägä møødä —nømä Jesús miänaañ.

²⁸ Jimä jäya'ay hänajty tu'ug yhamädoowhity. Tsajtøgooty hänajty tiuñ. Coo miädooyy coo ja'a Jesús hänajty hoy tøø yhadsoy, mänitä Jesús hoy wyiinguwa'agø'øyii. Mänit ñämaayyä:

—Madiu'u ja'a Moisés hajxy jecy xyhanéhmäm. Mädyii jaduhñ maas tuunpaaatp —nømä Jesús miäyajtøøwä.

²⁹ Mänitä Jesús yhadsooyy:

—Jaduhñ je'e miäna'añ: “Pønjetiä Israel jecy haphajt teedyhajt, hamädoowhit hajxy. Ja'a Dios hajxy nWindsønhájtäm. Tu'uquiä Dios jaduhñ Dyioshaty.

³⁰ Hamuumdu'jootä Dios hajxy mjaanç tehñ wyiingudsähgø'øwät nägø'ø nädecypiä. Mæbøjcä miädia'agy hajxy homiänaajä. Jahmiets hajxy jaduhñ cøjxta'axiøø.”

³¹ Jaduhñä miämetspä miänaambä: “Mdsögäbä jäya'ay hajxy nägøxiä nej mijts hamdsooyyä mnichogyijän. Ni mädyii mädia'agy jaduhñ quia'a mäbaady neby hädaa mädia'agy metspä tiuunpaaadiän” —nømä Jesús miänaañ.

³² Mänitä craa miänangumbä, ja'a hänajty tuumbä tsajtøgooty:

—Wiindsøn, jaanç tehñ yhoy miich mhadsooyy. Tøyhajt jaduhñ nej miich mmäna'añän coo Dios tiu'uquiä. Cabä wiingDios jyijä. Xjiaanç tehñ tiuunpaaatäm hajxy jaduhñ

³³ coo ja'a Dios hajxy hamuumdu'joot nwiingudsähgøøyyämät, møød coo jäya'ay hajxy nägøxiä ndsójcämät neby hajxy hamdsooyyä nniçhójcäm. Pero cab hajxy xjiaty tuunpaaatäm coo animal hajxy jii by nøcxy nnä'a hayójxäm tsajtøgooty no'cøøc —nømä Jesús ñämaayyä.

³⁴ Coo ja'a Jesús jaduhñ miädooyy coo ja'a craa hänajty najuøøyyhaamby tøø quiapxy, ja'a hänajty tuumbä tsajtøgooty, mänitä craa ñämaayyä:

—Jaac mæbøc ja'a Diosmädia'agy hamuumdu'joot, jaduhñds miich jim mnócxät Dioswiinduum —nømä Jesús miänaañ.

Mänitä häna'c-hajxy yhamoonnä, ja'a Jesús hajxy hänajty jia wi'i yagho'ogaambä. Cabä Jesús hajxy waamb miäyajtøønä je'eguiøxpä coo ja'a Jesús hajxy hänajty chähgø'øgy.

³⁵ Jiibiä Jesús hänajty yajnähixø'øy tsajtøgooty. Mänit miänaañ:

—Yø'ø häna'c-hajxy jii yajnähixøøbiä tsajtøgooty, tii hajxy jaduhñ coo miäna'añ coogä David ja'a Cristo yphaty yhoc-haty.

³⁶ Haa ca'a, jaduñ jim myiñ cujaayä maa ja'a Diosmädia'aguiän coo ja'a David hamdsooyä jecy miänaañ:

Mänitøchä Dios ja'a nWiindsøn xñämaayä:

“Yaa miñ häña'aw maačhä nhahooyhaampiän,

høxtä cóonøchä mmädsip nga'a yajmäjädáacämät.”

Ja'a Dioshëspirituhaamä David jaduñ jecy miänaañ.

³⁷ Jaduñä David jecy miänaañ coogä Cristo hänajty wyiindsøñhaty. Hoorä, pø tøyhajt jaduñ coo ja'a David ja'a Cristo jaduñ jecy wyiindsøñhajty, tii yø'ø jäya'ayhajxy coo miäna'añ coogä David ja'a Cristo ñä'ä haphaty ñä'ä hoc-haty —nømä Jesús miänaañ.

Jaanč tehñ yhomiädoonä ja'a jäya'ayhajxy hänajty miädooy nebiä Jesús hänajty yajñähixø'øyän. Nämayyä jäya'ayhajxy hänajty.

³⁸ Mänitä Jesús jiaac mänaañ:

—Yø'ø häna'c-hajxy jii yajñähixø'øbiä tsajtøgooty, cab yø'ø miädia'agy hajxy mmäbøjcät. Yoñwitmøød hajxy naxy wiädity cajptooty je'eguiøxpä coo hajxy wyl'i yajcumaya'añ. Wi'i yajwiingudsähgø'øwaamb hajxy jaduñ.

³⁹ Jiiby hajxy jia wi'i yhäña'awa'añ maa ja'a häñaabiejt yajxonjatypän, hädaa yaabä tsajtøgootypä, møød jim maa ja'a cay hu'ugy naxy jiadyiijän.

⁴⁰ Pero cabä quiuhdujthajxy ñä'ägädä hoyyä. Hix, pøjcäxäbä yaamgto'oxiä tiøjc-hajxy. Hoy hajxy jaduñ jia jatcø'øy, jejcyjatiä Dios hajxy jia wi'i pia'ya'axy. Pero jaanč tehñ yhooyhajxy jaduñ yajcumädowa'añii —nømä Jesús miänaañ.

⁴¹ Mänitä Jesús jim mädooyä hoy yhøxta'agy maa ja'a jäya'ay xädø'øñ hajxy hänajty naxy quiuyoxø'øyän. Ja'a mäyøøjäya'ayhajxy, majiatiä xädø'øñ hajxy hänajty piäda'agy. Jimä Jesús hänajty miähee'pna'ay.

⁴² Mänitä yaamgto'oxy tu'ug miejch. Jaanč tehñ yhäyoob hänajty je'e. Mejtsmägo'xä häyoobä je'e quiugonøoyy.

⁴³⁻⁴⁴ Mänitä Jesús ja'a jiamioødtøjc ñämaayy:

—Huug hix yø'ø yaamgto'oxy hajxy. Cøxiä yø'øduhñ tøø yecy mäduhñtiä hijty miøødä, ja'a hijty ñägayaambiä. Pero yø'ø mäyøøhäna'c-hajxy, weeñtiä hajxy jaduñ ñä'ä puhyejcy.

13

¹ Coo ja'a Jesúshajxy jiiby chajtøjpädsøømy, mäniä jiamioød tu'ug miänaañ:

—Wiindsøn, huug hix yø'ø tsajtøjc, jaanč tehñ yajxon yø'øduhñ miuuchä.

² Mänitä Jesús yhadsooyy:

—Hoy huuc tehñ yheeb. Hoy yø'ø tøjc jaduñ jia cruundä, cøxaamb yø'øduhñ jyida'añ. Haxit hatajø'øy yø'ø muuch jiada'añ.

³ Mänitä Jesúshajxy jim ñøcxy maa ja'a tun hänajty xiøhatiän Olivos, jim Jerusalén-woc-hawiimb. Coo hajxy jim miejch, mäniä Jesús hanidiuhmduum hoy yhøxta'agy. Mänitä Pedro ja'a Jesús hajxy ñänøcxy, møødä Santiago, møødä Juan, møødä Andrés. Mänitä Jesús hajxy miäyajtøoyy:

⁴ —Mänaads yø'ø tsajtøjc jaduñ jyida'añ. Mädyii hijxtáhñdäts jaduñ cähxø'øgaamb coo hänajty jaduñ yhabaada'añ.

⁵ Mänitä Jesús yhadsooyy:

—Mniyajcopcø'øwøøjap hajxy. Cab hajxy myajwiinhøønät.

⁶ Mayyä jäya'ayhajxy min miäwiinhøøna'añ. Jaduñ hajxy hänajty miäna'ana'añ: “Høøch je'e Cristo.” Mayyä jäya'ayhajxy hänajty jiaanč tehñ miäbøga'añ.

⁷ 'Coo hajxy mmädoyhädät coo tsip pleetä hänajty xii yaa tøø piädø'øgy, cab hajxy jaduñ mmäná'anät cooc tyijy ja'a naaxwiimbä hänajty wyiimbida'añ. Homiänaajä tsip pleetä jiadyii.

8 Nimiädsibø'owáanäp hajxy hánajty wiinghagajptjaty. Wiinduhmyhagajpt hujx hánajty ñaxa'añ. Jadáanäbä yuuxøø hánajty wiinduhmyhagajpt. Coø jaduhñ jiada'añí, hijxtahñd jaduhñ cáhxø'tsoonaamb coø tsø'ty häyohn hočhähgøøñäjäty hánajty jiada'añii.

9 'Mniyajcopcø'owóøjöp hajxy mänit. Mähahñdiuum hajxy hánajty mhida'añ. Xmiad-saambä mmädsip hajxy hánajty. Mänit hajxy jim xyajnøcxa'añ haguyc. Møød jim maa ja'a judíos chajtøjc-hajxiän, xwiobho'ogaamb hajxy hánajty jim. Xyajnøcxaamb hajxy hánajty jim maa ja'a gobiernä wyiinduumhajxiän, je'eguiøxpä cooč mijts xpiawädity. Jímhøch hajxy jaduhñ xmiädiá'agät gobiernäwiinduum.

10 Hix, cahnä naaxwiimbä hánajty wyiimbityñä, cøxaambä jäya'ay ja'a Diosmädia'agy hajxy miädowa'añ wiinduhmyhagajpt.

11 Y coø hajxy jim xyajnøcxät haguyc, cab hajxy mänit mnädaj mnämáyät waambaty hajxy mhadsówät. Hix, ja'a Dios ja'a mädia'agy hajxy hánajty xmio'owaamb. Cab hajxy hánajty hamdsoo mmädia'aga'añ; ja'a Dioshespíritu hajxy hánajty xyajmädia'agaamb.

12 Hamiñ haxøpiä jäya'ayhajxy hánajty tu'que'ex ññähduga'añii coø hajxy yagho'ogóøjät. Jaanä jaduhñä yhuung hajxy hánajty ñähdugaambä. Ja'a muutsc-häna'c-hajxy, jaanä jaduhñä tieedy hajxy hánajty tiunaambä.

13 Nägøxiä mijtsä jäya'ay xmiähahñhada'añ je'eguiøxpä cooč mijts xpiawädity. Pero pøn hánajty tøø miee'xtucy, hoy hánajty tøø jia ho'ogy, nähwa'adsaamb hánajty je'e.

14 'Habaadaamb jaduhñ coø ja'a haxøøgpä ca'a hoybä miedsa'añ maa ja'a Diostøjcän —pøn hädaa nocy capxp, ween jaduhñ wyiinjuø'øy—. Mänitä Diostøjc jaduhñ yajma'ada'añii. Coø ja'a haxøøgpä hajxy jaduhñ mhíxät, mänit hajxy päyø'øguiä mnøcxät tunjoot, pønjaty yaa tsänaaby Judeanaaxooty.

15 Pønjaty hánajty häñnaaby tøjñähgøxp, ween ñä'ägä päyø'øgy, cap nøcxy tii jiiby yajpädsømy tøgooty.

16 Pønjaty hánajty camjooty, cab jaduhñ jim ñøcxät maa ja'a tiøjcän. Cap nøcxy jiiby tii yajpädsømy, ni wyit ni tii.

17 Jaanč tehñ chaächpøgaambä to'oxiøjc-hajxy hánajty, ja'a hajxy hánajty co'na'awaambä, møød ja'a hajxy hánajty huungyajtsi'tspä.

18 Mmänuu'xtá'agäbä Dios hajxy coø tsø'ty häyohn ween quia'a jadyii coø hánajty jiaanč tehñ tiøøhcä.

19 Jaanč tehñ yhoyhoyyä jäya'ayhajxy hánajty chaächpøga'añ. Ni mädyii tsaächpä jaduhñ quia'a mäbaada'añ neby hánajty jiada'añiiän, ni ja'a jecy náxäbä, ni ja'a jaac minaambä.

20 Tøø ja'a Dios jaduhñ miäna'añ coø ja'a jäya'ayhajxy hánajty jecy quia'a tsaächpøga'añ, je'eguiøxpä coø chocy pønjaty jaduhñ tøø wyiimbíy. Coø ja'a Dios häxøpy jaduhñ tøø quia'a mäna'añ, jejquiä jäya'ayhajxy häxøpy chaächpøga'añ. Ni pøn häxøpy quia'a nähwa'adsa'añ.

21 'Coo mijts pøn xñámá'awät coog tyijy ja'a Cristo hánajty jii wiädity, cab hajxy mmäbøgät.

22 Hix, mayyä jäya'ayhajxy hánajty wiädita'añ mäwiinhøhmbä, cooc tyijy hajxy hánajty je'e Cristo, møød cooc tyijy hajxy hánajty Dyiosquexiä. Piayajcähxø'øgaambiä hijxtahñd hajxy hánajty hoy-yagjuøøñäbä. Jaduhñä jäya'ayhajxy hánajty jia wi'i wyiinhøøna'añii, møød ja'a hajxy hánajty Dioswiimbíyyäbä.

23 Mniyajcopcø'owóøjöp hajxy. Jäguemiä hajxy chamñ nnäma'ay coø hajxy mniyaj-copcø'owóøjät.

24 'Mänitxøøbä, coø ja'a tsaächpä hánajty tøø ñajxnä, mänitä xøø wyiingoodø'øwahñ møødä po'o.

25 Mänitä mamiadsa'a hánajty quia'awa'añ. Tsäyuyyaamb hánajty jaduhñ, tijaty jim cuhdujtmøød tsajtcøxp.

26 Mänitøch hänajty ngäda'aga'añ jocjooty, høøch ja'a Diosquexypä. Møcmäjaamøødhøch hänajty ngäda'aga'añ. Yajxønøhøch hänajty mänit ngäda'aga'añ. Mänitøchä jäya'ayhajxy hänajty may xpia'hee'ptägø'owa'añ.

27 Mänitøchä nmoonsä tsajpootypähajxy hänajty nguexa'añ coo hajxy jaduhñ quiøxy yajtu'ugmügät pønjätyhøch hänajty tøø nwiimbiy. Wiinduhmyhagajpt hajxy hänajty wioomuga'añii.

28 'Høxtahm̄dsä higueraquepy, coo jaduhñ wiámät, hijxtahnd jaduhñ coo hänajty tøø pioodtägøøñä.

29 Jaanä jaduhñduhmbä, coo ja'a tsø'ty hajxy jaduhñ mhíxät nébiøch naamñä tøø nmädia'agy, hijxtahnd hänajty jaduhñ cooçh hänajty mobädajpä ngädaactägatsa'añ hädaa yaabä naaxwiin, høøch ja'a Diosquexypä.

30 Cøxaamb jaduhñ jiada'añii nébiøch naamñä tøø nmädia'agy, cahnä jäya'ayhajxy hänajty quiøxy ho'ogyñä, ja'a hajxy jäda'ahaty jugyhajpä. Tøyhajt jaduhñ.

31 Cuhdägoyyaambä tsajt møødä naaxwiimbä. Pero tsipcøxp jaduhñ tiøjiada'añ nébiøch chamñ nmädia'aguiän.

32 'Ni pøn jaduhñ quia'a najuø'øy mänaa jaduhñ jiada'añii. Jagooyyä Dios nidiuhmñ ñajuø'øy, ja'a hajxy nDeedyhájtäm. Ni ja'a Diosmoonsähajxy jaduhñ quia'a najuø'øy, ja'a hajxy jimñ tsajpootypä. Ni høøch nga'a najuø'øy, høøch ja'a Diosquexypä.

33 'Paady, nähix hahixø'ø hajxy mhídät homiänaajä, je'eguiøxpä coo hajxy mga'a najuø'øy mänaa jaduhñ jiada'añii.

34 Jii jäya'ay hänajty tu'ug, coo hänajty ñøcxa'añ jäguemnaax, mänitä mioonsä ñämaayy coo ja'a tiøjc cwieendähájtäxät. Nägøxiä hajxy jaduhñ yhaagä nä'ä tuungmooyyä. Jaduhñä tu'jäya'ay ñämäayyäbä coo jimñ tiúnät maa ja'a tøgħaawän, weenä tøjc yaghawa'açh jopy; tsuu jadähooc yhagøøguiumbät.

35-36 Ja'a cudøjcä mioonsähajxy, cab hajxy hänajty ñajuø'øy mänaa ja'a wyiindsønñhajxy hänajty miejstägatsa'añ, pø coodsøøñäp hänajty jaduhñ, o pø tsuhm̄dä hänajty, o pø tu'tseey-yaaxø'øgy hänajty, o pø jobøøñäp hänajty. Nähix hahixø'ø ja'a wyiindsønñ hajxy jaduhñ yhahíxät. Pø caj, coo hajxy jaduhñ jaguiapxiä ñähmejtspedøøjät, wehndä hajxy hänajty mia'ay. Jaduhñ mäwínäts mijtspä, cab hajxy jaduhñ mnajuø'øy mänääjøch yaa ngädaactägatsa'añ hädaa yaabä naaxwiin. Paady hajxy nähix hahixø'ø homiänaajä mnä'ägä hídät.

37 Jaduhñhøchä jäya'ayhajxy nägøxiä nnämaabiä coo hajxy nähix hahixø'ø ñä'ägä hídät homiänaajä.

14

1 Mejtsxøø ja'a pascuaxøø hänajty quia'a habaady mänaa ja'a judíos tsajcaagy hajxy hänajty quiayyän, ja'a cajpä tsoomiøødpä. Ja'a teedywiindsønñhajxy, møødä häna'c-hajxy, ja'a hajxy hänajty jiiby yajñähixøøbiä tsajtøgooty, cojyquiapxytiuumb hajxy hänajty jaduhñ nebiä Jesús hajxy yajtsumøøjät hønnda'agymiädia'agyhaam, jaduhñ hajxy jaduhñ hoy yajyagho'ogøøjät.

2 Mänit hajxy näje'e ñiñämaayyä:

—Cab hajxy tsøc nej jatcøøyyäm coo ja'a cu'ug hajxy jaduhñ xñä'ä nähbädø'cämät.

3 Tøø ja'a Jesús hänajty yhäda'agy Betania. Jimñ hänajty miädsuugay maa ja'a Simón tiøjcän, ja'a hijty leprapa'ammøødpä. Mänitä to'oxiøjc tu'ug miejch. Jimñä nardoperfume hänajty quiø'øgonñhaty alabastro-vidrijooty. Jaançh tehñ chowä nardoperfume hänajty ñøcxy. Mänitä to'oxiøjcä perfume-vidrio piuhy. Mänitä Jesús ja'a perfume yajcuhtemøøyyä.

4 Mänitä jäya'ayhajxy näje'e jiootma'ty, ja'a hajxy hänajty jimñ pahäñaabiä. Mänit hajxy ñiñämaayyä:

—Cap yø'ø perfume jaduhñ cu yaghäyooyy.

⁵ Coo jaduhñ cu ñä'ägä too'cy, tsoobaadaamb yø'ø hijty, tägøøgmägo'x-xøøguduñ. Jimä häyoobädøjcä chow hajxy jaduhñ cu mioooyä coo jaduhñ cu ñä'ägä too'cy.

Jaduhñä to'oxiøjc yhojjä.

⁶ Mänitä Jesús miänaañ:

—Weends yhity. Ca'a hajxy mwi'i yhojy. Nébiøch yø'ø jaduhñ tøø xtiuñän, cab jaduhñ ñejpiä; hoy jaduhñ.

⁷ Homiänaajä mijtsä häyoobäjäya'ay mhixy. Homiänaajä hajxy jaduhñ mbuhbédät. Pero høøch, cábøch mijts jejcy xyhixa'añ.

⁸ Xwyiingudsähgøøbiøch yø'øya'ay jaduhñ, páadyhøchä perfume jaduhñ xyajcuhtemøoyy. Jaduhñ miäbaady nej cooç hähøpy tøø nho'oguiän. Jaduhñhøch yø'ø hijty xyajñhdema'añ.

⁹ Majatiä Diosmädia'agy wiädita'añ wiinduhmyhagajpt ja'a høøchcøxpä, jaduhñä jäya'ayhajxy miädia'aga'añ nébiøch yø'øya'ay naamñä tøø xtiuñ. Jaduhñ yø'ø homiänaajä jiahmiedsáañänä. Tøyhajt jaduhñ.

¹⁰ Jimä Jesús ja'a jiamiøød hänajty tu'ug xiøhaty Judas Iscariote, ja'a hajxy hänajty nämajmetspä. Mänitä Judas ja'a teedywiindsøñ hoy miøødcojyquiapxytiuñ coo ja'a Judas ja'a Jesús hänajty tiooga'añ.

¹¹ Coo ja'a teedywiindsøñhajxy jaduhñ miädooyy, mänit hajxy jaduhñ jiaanç tehñ xioonndaacpøjcy. Mänitä Judas yajwiinwaanøøyyä coo xädø'øñ hänajty mio'owa'añii. Mänitä Judas tiägøøyy wiinmaabiä nebiä Jesús paquiä yajcø'ødägø'owät.

¹² Mänitä pascuaxøø yhabaatnä. Jaduhñä judíoshajxy hänajty quiuhdujthaty coo tsajcaagy hajxy naxy quiay, ja'a cajpä tsoomiøødäbä. Jaduhñ hajxy hänajty quiuhdujthajpä coo meeghuung hajxy naxy yoxy ja'a pascuaxøøjooty. Mänitä Jesús ja'a jiamiøød miäyajtøøwä:

—Maada'a yhooyä coo pascuaxøø hajxy häyaa nwiindsuugáayyämät.

¹³ Mänitä Jesús ja'a jiamiøød nämetsc ñämaayy:

—Nøcx hajxy jim Jerusalén. Jimä jäya'ay hajxy tu'ug mbaada'añ nøøgón.

¹⁴ Je'eds hajxy mbadu'ubógäp. Mänit hajxy mbadøjtägø'owät. Mänitä cudøjc hajxy mnämä'awät: “Ja'a nWiindsøñ højts jaduhñ tøø xwyiinguexy coo højts nyajtówät maa højtsä pascuaxøø häyaa tsuu nwiindsuugáyät.”

¹⁵ Mänit mijtsä cudøjc cuarto nøcxy xyajñähixø'owa'añ nähbettøjcøxp. Jiaanç tehñ quiäruundä ja'a cuarto jaduhñ møød yajxonä. Jimä cay hu'ugy hajxy mnähix mhähixø'owät coo hajxy jim ndsuugayáañäm —nømä Jesús miänaañ.

¹⁶ Mänit hajxy nämetsc jiaanç nøcxy jim cajptooty. Jiaanç paat hajxy jaduhñ neby hajxy hänajty tøø ñäma'ayijän. Mänitä tsuugay hajxy tiägøøyy nähix hähixøøbiä.

¹⁷ Coo quioodsøøñä, mänitä Jesús hajxy jim nøcxy maa ja'a pascuaxøø hajxy hänajty wyiindsuugaya'añän, møødä jiamøødhajxy ja'a jaac nämajcpä. Mänit hajxy tiägøøyy caabiä.

¹⁸ Mänitä Jesús miänaañ:

—Tú'ughøch mijts mjamiøød xñäxø'owø'owa'añ. Quipxy hajxy je'e cham xmiøødcaamiújcäm. Tøyhajt jaduhñ —nømä Jesús miänaañ.

¹⁹ Mänit hajxy nägøxiä jiootmediägøøyy. Mänit hajxy tiägøøyy niñámáayyäbä:

—Nej, høøch je'eda'a tyijy xñänøømbä.

²⁰ Mänitä Jesús yhadsooyy:

—Mijts mjamiøød jaduhñ tu'ug jatcø'øwaamb, näguipxiä tsajcaagy hajxy jaduhñ jiiiby xmiøødpaguhmä'tsäm texyjooty.

²¹ Høøch, ja'a Diosquexypä, jaduhñhøch njada'añ nhabeta'añ nepy jim myiñän cujaay maa ja'a Diosmädia'aguiän. Tøjiadaambä Diosmädia'agy jaduhñ. Pero ja'a crájøch jaduhñ xñähdugaambä, jaanç tehñ yhooyhoy jaduhñ chaaçhpøga'añ. Maas hoy hähøpy coo quia'a nä'ägä naaxwiimbädsøømy —nømä Jesús miänaañ.

22 Caabyñä ja'a Jesúshajxy hánajty, mänitá Jesús ja'a tsajcaagy quionø'cy. Mänitá Dios ñämaayy: “Dioscujú'uyäp.” Mänitá jiamiøødä tsajcaagy nägøxiä yajnäguidøøyy. Mänit miänaañ:

—Cay hädaa hajxy; høøch nni'x ngopc hädaa —nømä Jesús miänaañ.

23 Mänitá Jesús ja'a vaso quionø'cy, ja'a hánajty vinomøødpä. Mänitá Dios ñämáaguiumbä: “Dioscujú'uyäp.” Mänitá Jesús ja'a vino yhuuctsohñ. Mänitá jiamiøød miooyy. Nägøxiä hajxy jaduhñ yhuucy.

24 Mänitá Jesús miänáangumbä:

—Høøch nnø'ty hädaa. Hijxtahnd hädaa jaduhñ coöchä nnø'ty nyajxee'xa'añ coöchä jäya'ayhajxy hánajty nnähho'tu'uda'añ. Jaduhñhøöchä cuhdujt nyajtødiägø'øwa'añ, ja'a Dios ja'a Abraham jecy miøødyajcuhdújcäbä.

25 Tøyhájtthøch jaduhñ nnámá'awät, cábøchä vino nhuuctägatsa'añ høxtä cóonøch hánajty jim tøø nnøcxtägach maachä nDeediä wyiinduumän. Mänitøchä vino jemýbiä nhuucmadsa'añ —nømä Jesús miänaañ.

26 Mänitá Jesús ja'a Dioshøy hajxy yhøøyy, møødä jiamiøødtøjc. Mänit hajxy jim chohñ. Mänit hajxy jim ñøcxy maa ja'a tun hánajty xiøhatiän Olivos.

27 Mänitá Jesús ja'a jiamiøødtøjc ñämaayy:

—Nägøxiøch mijts xñähgue'ega'añ, je'leguiøxpä coöch nmädia'agy hajxy xquia'a mabøgaanä. Jaduhñ jim myiñ cujaay maa ja'a Diosmädia'aguiän: “Nyagho'ogáambøchä meegcueendähajpä. Cøxaambä meeghajxy piäyø'øga'añ. Xii yaa hajxy ñøcxø'øwa'añ.”

28 Cooch hánajty tøø nho'ogy, mänitøch jadähooç njujypiøjtägatsa'añ. Mänitøch jim nnøcxa'añ Galilea. Mänitøch mijts jim nøcxy xpiaada'añ —nømä Jesús miänaañ.

29 Mänitá Pedro ja'a Jesús ñämaayy:

—Høøch mabøcypä, cábøch miich mänaa nbuhwa'adsa'añ, hoy miich hajxy nägøxiä xjia puhwá'adsät.

30 Mänitá Jesús yhadsooyy:

—Tøyhájtthøch miich nnámá'awät, häyaa coods miich tægøøghooç mniguiugapxa'añii coöch tyijy xquia'a hixiä.

31 Pero Pedro, tehngajnä je'e jiaac miänaañ:

—Cábøch mänaa nniguiugapxa'añii coöch tyijy miich nga'a hixiä, hóyhøch miich quipxy nja møødhó'ogät —nømä Pedro miänaañ.

Jaduhñ hajxy nägøxiä piahadsoobä.

32 Mänitá Jesúshajxy jim ñøcxy maa hánajty xiøhatiän Getsemaní. Mänitá Jesús ja'a jiamiøødtøjc ñämaayy:

—Jiids hajxy huuc häña'aw, nøcxy nhuuc Diospa'ya'axy.

33 Mänitá Jesús ja'a Pedro hawiing miøødnøcxy, møødä Santiago, møødä Juan. Mänitá Jesús hoyhoy jiaanç tehñ jiootmabiøjcy.

34 Mänitá Pedrohajxy ñämaayyä:

—Hoyhóyhøch jaduhñ njaanç tehñ jiootmayhaty. Høxtä ho'ogáambøch nnijiäwø'øyii. Huuc mähmø'øw hajxy yaa. Cab hajxy mmaahó'ogät. Jujcy hajxy mhídät —nømä Jesús miänaañ.

35-36 Mänitá Jesús weentiä jiaac nøcxy. Mänit jaduhñ miägutscädaacy. Mänitá Dios tiägøøyy mänuu'xtaacpä: “Teedy, mee'x, coo miich jaduhñ cu mga'a mänaañ, cábøch häxøpy ndsaachpøga'añ nébiøch cham nmänaxa'añän. Pero cábøchä nguhdujt yhidät nébiøchä njoot jia tsoquiän. Miichä mguhdujt jaduhñ nä'ägädä hidaamb.”

37 Mänitá Jesús jim ñøcxtägajch maa ja'a Pedrohajxy hánajty tøø miähmø'øyän. Coo jim miejch, mänit jaduhñ yhijsy coo hajxy hánajty tøø quioxy maaho'ogy. Mänitá Pedro ñämaayyä:

—Simón, nej, mmaabä. Nidu'hora miich tøø mga'a mee'xtucy.

38 Jujcy hajxy hit. Tehngajnä ja'a Dios hajxy mba'yá'axät. Jaduhnä møjcu'ugong hajxy xquia'a jøjcapxø'owät. Jia tsojpiä mjoothajxy jaduhn coo hajxy jujcy mhídät, pero cabä mni'x ja'a mgopc-hajxy jaduhn miee'xtuga'añ.

39 Mänitä Jesús ja'a Dios hoy pia'yáaxcumbä. Jaduhn jadähooc ñämánaanøøguiumbä.

40 Mänit jadähooc miéjtscumbä maa ja'a Pedrohajxy hänajty tøø miähmø'oyän. Tøø hajxy hänajty miaahó'cumbä. Hix, tøø hajxy hänajty jiaančh tehñ yhanuu'xø'oy. Coo hajxy jaduhn yujxä, cab hajxy hänajty ñä'ägä najuø'oy waamb hajxy yhadsówät.

41 Coo ja'a Jesús jaduhn miejch ja'a miädägøøghoocpä, mänit miänaañä:

—Nej, je'enä hajxy mwi'i mia'ayñä. Ween tiuhnä. Tøø yhabaatnä coočh cahwi-indøyhäna'c-hajxy xquiø'ødägø'owaannä, høøch ja'a Diosquexypä.

42 Pädø'näts hajxy. Jam hajxy. Ximä craa myiñ ja'ačh jaduhn xyajcø'ødägø'owaambä.

43 Jimä Jesús hänajty miädia'agyñä, mänitä Judashajxy miejch, møødä majiäya'ay, haagä espada-cap. Näje'e hajxy hänajty wiojptcappä. Ja'a teedywiindsøn hajxy jaduhn mäguejx, møødä häna'c-hajxy jiiby yajnähixøøbiä tsajtøgooty, møødä majjaya'adiøjc-hajxy.

44 Tøø ja'a Judashajxy hänajty quiojyquiapxytiuñ: “Ja'ačh hänajty ndsu'xaambiä, je'e hänajty je'e. Mänit hajxy mmádsät. Mänit hajxy nøcxy mdsumy”, nømä Judas hänajty tøø miäna'añ.

45 Mänitä Judas ja'a Jesús ñämejch. Mänit ñämaayy:

—¡Wiindsøn!

Mänitä Judas ja'a Jesús jiaančh tsu'xy.

46 Mänitä Jesús miajtsä.

47 Ja'a Jesús ja'a jiamiøød tu'ug, jimä espada hänajty miøjnädawhaty. Coo jaduhn yhijxy coo ja'a Jesús hänajty tøø miäčhii, mänitä yhespada jiuu'pädsøømy. Mänitä teedywiindsønä mioonsä tu'ug tiaatspujxtuutä.

48 Mänitä Jesús ja'a majiäya'ay ñämaayy:

—Tiich hajxy jaduhn coo tøø xñämiñ espada-cap wojptcap. Tiich hajxy xyhixy, mée'tspäjä.

49 Tiich hajxy jim coo xquia'a majtspä tsajtøgooty. Nébyhøch hajxy jaduhn høxtä yaa tøø xñämiñ. Nej, ca'a, jabom-jabómhøch hijty jim nøcxy nyajnähixø'oyä. Pero páadyhøch cham njaty nhabety, jaduhnä Diosmädia'agy tiøjiädät ja'a høøchcøxpä.

50 Nidiuhmä Jesús hänajty jiaac mädia'agy. Tøø ja'a jiamiøødhajxy hänajty quiøxy päyø'øgy.

51 Jimä høxcujc-häna'c ja'a Jesús hänajty tu'ug piawädijpä, poobwit-nähcäjeenä. Mänit jaduhn jia madsaanä.

52 Mänitä poobwit yajniñähajptuutä. Nähwa'ads høxwa'ads je'e piäyø'cy.

53 Mänitä Jesús yajnøcxä maa ja'a teedywiindsøn wyiinduumän, ja'a jaac tehñ miøjpä. Mänitä teedywiindsøn hajxy jiaac tehñ miejch, møødä majjaya'adiøjc-hajxy, møødä häna'c-hajxy jiiby yajnähixøøbiä maa ja'a tsajtøjcän.

54 Jimä Pedro hänajty jäguemjuøøby piädäna'ay maa ja'a teedywiindsøn tiøjwiingøn. Mänit jim piahøxtaacy maa ja'a hadänaabiähajxy hänajty jiøømba'axamiän.

55 Jimä teedywiindsøn hajxy hänajty jia wi'i wyiinmahñdyhaty nebiä Jesús hajxy ya-jyagho'ogøøjät. Pero cab hajxy hänajty ñä'ägä wiinmahmybiaady.

56 Hix, hoyyä Jesús hajxy hänajty nämay jia nähøønø'oy, wiingaty hajxy hänajty miädia'agy; cab hajxy hänajty tiu'ugmädia'aguiä.

57-58 Mänitä wiinghäna'c-hajxy tiänaayyø'cy; nøm hajxy je'e miänaambä:

—Tøø højts jaduhn nmädoy coo jaduhn miänaañ: “Hädaa tsajtøjc, jäya'ayhajxy hädaa hädiuun. Pero høøch, nyajnajtsjidø'owäbøch hädaa. Cudägøøgxøøyyøchä wiingpä nhädiuundägätsät. Ca'a jäya'ayhajxy je'e hädiúnäp” —jaduhn hajxy je'e yhøhndaacpä.

59 Ni je'e hajxy hänajty quia'a tu'ugmädiä'aguiäbä.

⁶⁰ Mänitā teedywiindsón tiänaayyø'cy majiäya'ayhagujc, ja'a tehñ miøjpä. Mänitā Jesús ñämaayyā:

—Nej, cab jaduñ mnä'ä hadsowa'añä waambaty hajxy miäna'añä.

⁶¹ Pero cabä Jesús waamb ñä'ägä hadsooyy. Mänit ñämäayyägumbä:

—Nej, tøyhajt jaduñä coo miichä Dios tøø xquixiä, Nej, miichä Dios xyHuunghajpä.

⁶² Mänitā Jesús yhadsooyy:

—Tøyhajt jaduñ. Høøch je'e. Xyhixáambøch mijts jaduñ cooçh jim nhäña'awa'añ Dioswiinduum, maa ja'a yhahooyhaampiän. Mänitøch hajxy jadähooc xyhixáangumbä cooçh hänajty yaa ngädaactägatsa'añ hädaa yaabä naaxwiin. Joczótyhøch hänajty nmänaca'añ.

⁶³ Mänitā teedywiindsón ja'a wyit quiøø'ch. Paady jaduñ jiatcøoyy coo hänajty jiaanç tehñ jiootma'ady. Mänit miänaañ:

—Tii testigo hajxy jaduñ nnä'ä jaac wáañämät.

⁶⁴ Tøø hajxy jaduñ mhamdsoo mädooy coo ja'a Dios tøø miägaptägoy. Waamb hajxy jaduñ mmäna'añ, neby hajxy ndúñämät.

Haagä jaduñ hajxy miänaañ cooc tyijy ja'a Jesús tøø quiädieey, møød cooc ween yagho'ogyii.

⁶⁵ Mänitā Jesús tiägøøyyä wiingutsujøøyyäbä. Mänit wyiinguxødsøøyyä. Mänit wyi-ingutexøøyyä. Mänit ñämaayyā:

—Najuø'øw pøn xquiojx.

Mänitā hadänaabiädøjc ja'a Jesús hajxy wyiingula'abøøyy.

⁶⁶⁻⁶⁷ Y ja'a Pedro, jiiby hänajty je'e hanaaxyp jøømba'axamy maa ja'a tøjwiingän. Mänitā teedywiindsónä qyixymoosä tu'ug miejch maa ja'a Pedro hänajtiän. Coo ja'a Pedro jaduñ yhiçä, mänit wyiinhee'ppejtä. Mänit ñämaayyā:

—Naxy miich yø'ø Jesús mmøødwädity, túhmäts. Haagä Nazaret hajxy mdsooñ nämetsc, túhmäts.

⁶⁸ Mänitā Pedro ñijjogapxä:

—Ni nga'a hixiøch yø'ø. Ni nga'a najuø'øyhøch jaduñ tiich jaduñ xjia wi'i yajmøødmädiaacp —nømä Pedro yhøhndaacy.

Mänitā Pedro quiuraabädsøømy. Mänitiä tseey tu'ug jiaanç yaaxø'cy.

⁶⁹ Mänitā quixymoosä ja'a Pedro yhiçcumbä. Mänitā jäya'ayhajxy ñämaayyā, ja'a hajxy hänajty jim jaac padänaabiä:

—Xii Jesús jiamioød tu'ug. Je'e yø'ø —nømä quixymoosä miänaañ.

⁷⁰ Mänitā Pedro jadähooc ñiguiugäpxägumbä. Cab jaduñ ñä'a jegøøyy, mänitā Pedro ñämäayyägumbä:

—Mbawädijpy miichä Jesús pä, túhmäts. Nyo'mädooby højts jaduñ coo miich jim mdsooñ Galilea.

⁷¹ Mänitā Pedro jadähooc miänáangumbä:

—Tøyhajt, cáboch jaduñ nnä'ägä hixiä pøn hajxy jaduñ mja mädiaacy.

Tähoocapxiä ja'a Pedro jaduñ miänaañ cooc tyijy ja'a Jesús hänajty quia'a nä'ägädä hixiä.

⁷² Mänitiä tseey miämetsc-hoocpä yäaxcumbä. Mänitā Pedro jiahmiejtstaacy coo ja'a Jesús hänajty tøø miäna'añ: “Cahnä tseey hänajty miämetsc-hoocpä ya'axy, tøø miich hänajty tægøøghooc mniguiugapxyii cooçh miich hänajty xquia'a hixiä.” Mänitā Pedro jøøguioo'ty coo ja'a tseey miämetsc-hoocpä jiaanç yaaxy.

15

¹ Coo jioobøoyy, mänitā teedywiindsónhajxy nägøxiä yhamugøøguiumbä, møødä majjäya'adiøjc-hajxy, møødä häna'c-hajxy jiiby yajnähixøøbiä tsajtøgooty. Mänit hajxy quiojyquiapxytiuuñ nebiä Jesús hajxy hänajty tiuna'añ. Mänitā Jesús hajxy quiø'øxojch. Mänitā Pilato hajxy hoy yajcø'ødägø'øy maa je'e hänajty guobiernähatiän.

² Mänitä Pilato ja'a Jesús miäyajtøøyy:

—Nej, tøyhajt jaduhñä coo miichä judíoshajxy xguiobiernähatiä.

Mänitä Jesús yhadsooyy:

—Tøyhajt jaduhñ.

³ Madiu'u ja'a teedywiindsón ja'a Jesús hajxy hänajty jia wi'i ñäxø'øwø'øyy. Pero cabä Jesús hänajty waamb ñä'ägä hadsooyy.

⁴ Mänitä Pilato miánaangumbä:

—Nej, caj mhadsowa'añä. Madiu'u miich hajxy xjia wi'i ñäxø'øwø'øyy —nømä Jesús ñämaayyä.

⁵ Pero cabä Jesús waamb ñä'ägädä hadsooyy. Jiaanç tehñ yagjuøøyy ja'a Pilato jaduhñ coo ja'a Jesús jaduhñ quia'a nä'ägädä hadsooyy.

⁶ Jaduhñä Pilato hänajty jomøjt-jomøjt quiuhdujthaty coo xøø hänajty jiadyii, mänitä tsumyjiäya'ay naxy tu'ug yajpädsømy, ja'a judíoshajxy hänajty yajnähdiipiä.

⁷ Jiibiä jäya'ayhajxy hänajty näje'e chumychäna'ay. Tsip hajxy hänajty tøø yagjadyii. Tøø hajxy hänajty miäjäya'ay-yagho'ogy. Tu'ugä tsumyjiäya'ay hänajty xiøhaty Barrabás.

⁸ Coo ja'a cu'ughajxy jim miejch maa ja'a Pilato wyiinduumän, mänitä Pilato hajxy jaduhñ ñämaayy coo ja'a tsumyjiäya'ay tu'ug yhøxmádsät.

⁹ Mänitä Pilato yhadsooyy:

—Nej, jaduhñ hajxy mmäna'añä coochä Jesús nhøxmádsädä, ja'a tyijy hajxy mgobiernähajpiä.

¹⁰ Paadiä Pilato jaduhñ miänaañ, ñajuøøby hänajty je'eduhñ tiiguiøxpä ja'a Jesús coo yajcø'ødägøøyyä ja'a teedywiindsón. Paadiä Jesús jaduhñ yajcø'ødägøøyyä je'eguiøxpä coo ja'a miädia'agy hänajty quia'a yajmädsójcäxä.

¹¹ Mänitä teedywiindsón ja'a cu'ug hajxy jiojcapxøøyy coo ja'a cu'ughajxy jaduhñ miänä'anät coo ja'a Jesús ween quia'a høxmächii, weenä Barrabás ñä'ägä høxmächii. Coo ja'a cu'ughajxy jaduhñ jiaanç mänaañ,

¹² mänitä Pilato ja'a cu'ug jadähooc miäyajtøøyy:

—Y yø'ø Jesúsäts, ja'a tyijy hajxy mgobiernähajpiä, neby hajxy yø'ø myajnähdiijy nébiøch yø'ø ndúnät.

¹³ Mänitä cu'ughajxy møc yaaxy:

—Møjpahbet hajxy cruzcøxp.

¹⁴ Mänitä Pilato miánaangumbä:

—¡Pero tisän! Tii tøø quiädieey.

Mänit hajxy maas møc yáaxcumbä:

—Møjpahbet hajxy cruzcøxp.

¹⁵ Mänitä Pilato jiaanç mänaañ coo ja'a Barrabás hajxy ween nøcxy yajpädsømy pujxtøgooty. Hiç, cabä Pilato ja'a cu'ug hänajty yagjootma'ada'añ. Mänitä Pilato miänaañ coo ja'a Jesús wiobho'ogøøjät. Mänit miánaangumbä coo ja'a Jesús hajxy nøcxy cruzcøxp miøjpahbety.

¹⁶ Mänitä soldado ja'a Jesús hajxy yajnøcxy maa ja'a haguçän. Mänitä soldado ja'a jiamiøød hajxy quiøxy møjyaaxy.

¹⁷ Mänitä Jesús hucywyit yajnähämoogøøyyä. Mänitä hptycorona yajcuhjenøøyyä.

¹⁸ Mänitä Jesús tiägøøyyä wiinyáaxäbä:

—¡Viva ja'a Jesús, ja'a judíoshajxy jaduhñ guibiernähajpiä! ¡Viva!

Jaduhñä Jesús hänajty wyiinwooñii.

¹⁹ Mänit hoyhoy wiojpä quiuhduum paxyhaam. Møød wyiingutsujøøyyä. Mänit wyiinjiçädaacä. Jaduhñä soldadohajxy hänajty jiatcø'øyy nebiä wyiingudsähgøøbiän.

²⁰ Pero wyiinwohmbiä Jesús hajxy hänajty jaduhñ. Mänitä hucywyit hajxy yajt-sijy. Mänitä yhamdsoo wit yajpøgøøyyäxä. Mänit hajxy yajnøcxy maa hajxy hänajty miøjpahbeda'añän.

21 Mänitä jäya'ay hajxy tu'ug jiojcubaadøøyy. Camjooty hänajty tøø yhoy. Simón hänajty xiøhaty. Jim hänajty choon Cirene. Jue'e yhuunghajxy hänajty xiøhaty Alejandro møødä Rufo. Jimä Jesús cruz hänajty chømä. Mänitä Simón hadsip nãmaayyã coo ja'a Jesús ween piuhdsømo'øy. Mänitä Simón ja'a cruz jiaançh tsømo'cy.

22 Mänitä Jesús yajmejtsä maa ja'a nähgaphuung hänajty xiøhatiän Gólgota. Jaduhnä nähgaphuung hänajty quiähxø'øgy nebiä ho'ogyjiäya'aguiopcän, paady hajxy jaduhñ yajxøbejty Gólgota.

23 Mänitä Jesús vino jia mooyyã. Mirra ja'a vino hajxy hänajty tøø yajmädemø'øy. Pero cabä Jesús jaduhñ ñä'ägä huucy.

24-25 Mänitä Jesús miøjpahbejtä cruzcøxp. Møjpetyxiøø hänajty jaduhñ. Tøø ja'a Jesús ja'a wyit hänajty jadähooc yajtsijjãxã. Mänitä soldado ja'a Jesús ja'a wyit hajxy tiägøøyy yajniguiuhäyø'cäbã.

26 Mänit hajxy jim yuugjahy cruzcopcuhdum tiiguiøxpä ja'a Jesús jaduhñ coo miøjpahbejtä: “Hädaa ja'a judíoshajxy guiobiernähajpy”, nøm hajxy jim quiujahy.

27 Mänitä mee'tspähajxy nämetsc miøjpahbéjtäbã. Tu'jäya'ay miøjpahbejtä maa ja'a Jesús yhahooyhaampiän. Jatu'ug miøjpahbéjtäbã maa ja'a Jesús yhanajtyhaampiän. Cujcä Jesús jaduhñ hoy piäda'agyii.

28 Coo ja'a Jesús ja'a mee'tspä jaduhñ näguipxy miøødho'cy, jaduhñä Diosmädia'agy tiøjiajty maa jaduhñ myiñän cujaay: “Haxøøghäna'c jaduhñ pianänøømä.”

29 Ja'a jäya'ayhajxy hänajty jaduhñ jim naxøøbiä, høxtä yagjuøøby hajxy hänajty coo ja'a Jesús hajxy jim yhijxy cruzcøxp. Møød hajxy hänajty wyiinwooñ:

—Ja'a, miich mahñdy ja'a tsajtøjc mwi'i yagjidaamby, y cudägøøgxøøyyã mahñdy miich je'e mhädiuundägätsät.

30 Pø tøy miich møcmäjaa mjaançh møødä, tiids miich jim coo mga'a mänacy cruzcøxp. Jaduhñäts mbäyø'øgät —nømä Jesús nãmaayyã.

31 Jaanä jaduhñä teedywiindsøn hajxy hänajty miäwiingapxpejpä, møødä häna'c-hajxy hänajty jim yajnähxøøbiä maa ja'a tsajtøjcän. Jaduhñ hajxy hänajty ñiñäma'ayii:

—Tøø yø'ø wiinghäna'c may yajnähwa'açh, pero caj yø'ø hamdsoo hoy yajniñhwa'adsa'añii. Jaduhñ hijty ñibiäda'agyii nebiä Dioshuungän. Jaduhñ hijty niñänømyii cooc tyijy ja'a judíoshajxy guiobiernähaty.

32 Mänit hajxy häyaa njaançh mäbøjcämät, nägooyyã jim miänácät cruzcøxp.

Jaanä jaduhñä mee'tspähajxy hänajty miäwiingapxpejpä, ja'a Jesús hajxy hänajty näguipxy tøø miøødmøjpahbedyijäbã.

33 Nägooyyã quiujyxiøøjøøyy, mänit jaduhñ cøjx wyiingoodsø'øy. Tägøøghora jaduhñ yhjity wiingoods.

34 Coo ja'a xøø jaduhñ wyiinajtúutcumbä, mänitä Jesús møc yaaxy: “Eloi, Eloi, lema sabactani.” Jaduhñ miädia'agytiägø'øy: “Diosteedy, Diosteedy, tiich coo tøø xñähgue'egy.”

35 Jimä jäya'ayhajxy hänajty näje'e miähee'pna'ay. Coo hajxy jaduhñ miädooyy, mänit hajxy miänaañ:

—Mäadow, Elíasäda'a møyjáaxäp.

36 Mänit tu'jäya'ay esponja hoy quioñ päyø'øguiä. Mänit jiiby piama'tsnajxy xunvinojooty. Mänitä esponja yujxojch paxyjøbhaam. Mänitä Jesús yaghagaabøøyyã coo jaduhñ wyiinmúgät. Mänit jaaya'ay miänaañ:

—Tsøc huuc híxãm pø minaambä Elías, pø yajmänacáañäbã Jesús cruzcøxp.

37 Mänitä Jesús møc yáaxcumbä. Mänit yho'nä.

38 Tuunä ja'a Jesús jaduhñ ñä'a ho'cy, mänitä tsajtøjc-hadøødiujt cujiä quiøø'tswa'xy. Quiuhdum chohñdaacy, høxtä yhøxhaam jaduhñ yhagøødsøøyy.

39 Jimä capitán ja'a Jesús hänajty tu'ug wyiindäna'ay. Coo yhjity coo ja'a Jesús hänajty tøø yho'ogy, mänit miänaañ:

—Tøyhajt yø'øduhñ hijty Dyioshuungä.

⁴⁰ Jimä tadjäya'ayhajxy hänajty näje'e miähee'pna'ay jäguemjuøøby. Jimä María hänajtypä, ja'a hänajty jim tsohm̄bä Magdala, møødä Salomé. Ja'a María, ja'a Santiago møødä José tiaj, jim hänajty je'ebä. Ja'a muutspä Santiago jaduhñ ñänøømby.

⁴¹ Hädaa tadjäya'ayhajxy, quipxiä Jesús hajxy hänajty tøø piawädity jim Galilea. Tøø hajxy hänajty piuhbety mänaa hänajty jim tøø yhitiän. Y coo ja'a Jesús jaduhñ piejnä Jerusalén, quipxy hajxy piabejty, näguipxy møødä wiingjäya'ayhajxy nämay.

⁴²⁻⁴³ Ja'a viernes hänajty tsuujøøby. Ja'a poo'xxiøø hänajty tsohnda'agaamb, ja'a pascuaxøø. Nähix yhahixøøbiä judíoshajxy hänajty ja'a pascuaxøøgøxpä. Jimä jäya'ay hänajty tu'ug choñ Arimatea. José hänajty xiøhaty. Jim hänajty miøjtuungmøødä tsajtøgooty. Jaanč tehñ yhojiäya'ayä José hänajty. Jiøbhixyp hänajty jaduhñ coo ja'a Dios ja'a møcmäjaa hänajty yajcähxø'øga'añ. Mänitä José ja'a Pilato ja'a Jesús ñaaxni'x hoy miäyujwaanä. Hix, cabä José ja'a Pilato hänajty chähgø'øy.

⁴⁴ Cahnä Pilato hänajty miädoyhatyñä coo ja'a Jesús hänajty tøø yho'nä. Yagjuøøyy je'eduhñ coo ja'a Jesús paquiä yho'cy. Mänitä Pilato ja'a capitán miøjyaaxy. Mänit miäyajtøøyy mäduhnajtä ja'a Jesús yho'cy.

⁴⁵ Coo ja'a Pilato jaduhñ yhawaañäxä coo ja'a Jesús hänajty tøø jiaanč ho'ogy, mänit miänaañ coo ja'a José ja'a ho'ogyjäya'ay ween yajmänacy cruzcøxp.

⁴⁶ Mänitä José sábana hoy jiuuy. Mänitä Jesús hoy yajmänacy cruzcøxp. Mänit ñähbijty ñähmojch sábanahaam. Mänit hoy yajnaaxtägø'øy tsaajutjooty. Mänitä tsaajut ja'a tsaajut hajxy yaghadäguejtägooyy.

⁴⁷ Jimä Maríahajxy hänajty miähee'pna'ay, møødä Magdala-tsohm̄bä, møødä José tiaj.

16

¹ Coo ja'a poo'xxiøø hänajty tøø ñajxnä, mänitä María perfume hajxy hoy jiuuy, møødä Magdala-tsohm̄bä, møødä Santiago tiaj, møødä Salomé. Ja'a Jesús ja'a perfume hajxy hänajty yajñähjaaxaamby.

² Cujaboom jopy ja'a Maríahajxy jim ñøcxy maa ja'a Jesús hänajty tøø ñaaxtägø'øyän. Näxøø hänajty je'e. Tøø ja'a xøø hänajty piädsøømnä.

³ Tu'haamnøcxpä hajxy tiägøøyy niñämäayyäbä:

—Pønä tsaajut häyaa hadäguejtú'udäp.

⁴ Tehñ miejtsp hajxy hänajty jim, mänitä tsaajut hajxy yhiixy coo hänajty yhawa'adsän. Tøø häna'cä tsaajut yagjua'ačh, hoyyä tsaajut jia cruundä.

⁵ Coo hajxy jiiby chaajuttägøøyy, mänitä muutsc-häna'c hajxy tu'ug yhiixy. Jiiby hänajty yhäña'ay hahooyhaamby. Yomybioobwit hänajty miøød. Coo ja'a Maríahajxy jaduhñ yhiixy, mänit hajxy chähgøøyy.

⁶ Mänit hajxy ñämaayyä:

—Ca'a hajxy mdsähgø'øy. Ja'a Jesús hajxy mhøxtaaby, ja'a jim tsohm̄bä Nazaret, ja'a tøø miøjpahbedylijäbä cruzcøxp. Tøø jiuuypiøjtägach. Tøø yaa chohñä. Huuc tehñ yhiix hajxy, cab je'e yaajän maa je'e piädaacän.

⁷ Nøcx ja'a jiamiøød hajxy hawaanä. Møødä Pedro, mhawaañäp je'ebä. Jaduhñ hajxy mhawaañät cooc jim ñøcxa'añ Galilea. Jimäc hajxy nøcxy piaady, neby hajxy hijty tøø yajmøødmädia'agyijän —nømä muutsc-häna'c miänaañ.

⁸ Päyø'øguiä Maríahajxy jiuutpädsøømy. Tsähgøøyyäp tsäyúuyyäp hajxy piädsøømy. Cab hajxy jaduhñ pøn ñä'ägädä hawaanä. Hix, jaanč tehñ chähgøøby hajxy hänajty.

⁹ Näxøø jopy ja'a Jesús jiuuypiøjtägajch. Mänitä María jayøjp yhiixtsohñä, ja'a hänajty jim tsohm̄bä Magdala, ja'a møjcu'u juxtujc-hooc yajñähwáatsäbä. Ja'a Jesús jaduhñ mäyajnähwaats.

¹⁰ Mänitä María ja'a Jesús jiamiøød hoy jia hawaanä. Wi'i jiøøby wi'i xiuu'tsp ja'a Jesús jiamiøødhajxy hänajty.

¹¹ Hoy hajxy jia nämaayyä coogä Jesús hänajty tøø jiuypioçy, møød coogä María hänajty tøø yhiçy hajujcy, cab hajxy ñä'ägä mæbøjcy.

¹² Cujecy, jimä Jesús ja'a jiamiøødhajxy hänajty nämetsc ñøçxy camjooty. Mänitä Jesús ñäguehçtøø'xy maa wyiinduumhajxiän.

¹³ Mänitä jiamiøød hajxy hoy jia hawáañäbä. Ni je'e ja'a miädia'agyhajxy jaduhñ quia'a mæbøjçäxä.

¹⁴ Cujequiä Jesús jiamiøødhajxy hänajty quiaçy, ja'a hajxy hänajty nämajtu'ugpä. Mänitä Jesús jim ñäguehçtøø'xcumbä maa hajxy hänajty quiaçyän. Mänit hajxy jaduhñ ñämaayyä:

—Tii mijtsä miädia'agy hajxy coo tøø mga'a mæbøjçä, ja'a mijts tøø xjia hawáañäbä cóogøch hajxy tøø xyhiçy hajujcy, cóogøch tøø njuypioçtägach.

¹⁵ Nøcx hädaa mädia'agy hajxy yajwa'x wiinduhmyhagajpt. Jaduhñä jäya'ay hajxy nägøçä myajwiingapxø'øwät neby hajxy ñähwá'adsät.

¹⁶ Pønjaty jaduhñ mæbøjp, pønjaty jaduhñ näbejp, je'edshajxy jaduhñ nähwa'adsaamb. Pero pønjaty jaduhñ ca'a mæbøjp, haxøøgtuum hajxy je'e miähmø'øwa'añ.

¹⁷ Pønjaty jaduhñ mæbøjp, hijxtahñd hajxy yajcähxø'øgaamby hoy-yagjuøøñäbä. Ja'a høøçhcøxpä, jaduhñä pa'amjäya'ay hajxy yajnähwá'adsät, ja'a hajxy mõjcu'umøødpä. Wiinghayuuc hajxy miädia'agáañäp.

¹⁸ Hoyyä tsahñdy hajxy tiehñ wyidsø'øgät, cab hajxy nej tiunøçjät. Hoyyä veneno hajxy tiehñ yhú'ugät, ni jaduhñ hajxy nej quia'a jádät. Y coo ja'a pa'amjäya'ay hajxy quio'ønähgábät, náxäbä pia'amhajxy.

¹⁹ Coo ja'a Jesús ja'a jiamiøødtøjc miøødmädiaacpædøøyy, ja'a hajxy nWiindsønhájtämbä, mänit ñøçxnä tsajpootyp. Mänit hoy yhøxta'agy maa ja'a Tieediä yhahooyhaampiän.

²⁰ Mänitä jiamiøødhajxy jiaançh tu'ubøjcy. Mänitä mädia'agy hajxy hoy yajwa'xy wiinduhmyhagajpt. Pihbejpiä Jesús ja'a jiamiøødtøjc hänajty. Majaty hajxy hänajty wiädity, yajcähxø'piä hijxtahñd hajxy hänajty hoy-yagjuøøñäjaty. Jaduhñ hänajty yajnajuø'øy coo hajxy hänajty tiømiädia'agy. Amén.

San Lucas

1-4 Mägu'ughajpä Teófilo, miichcǝxpøch hädaa nocy nhädiuñ nej miich ja'a tøyhajt jaduhñ mmøødhádät ja'a Jesucristocǝxpä, nej jiajty nej yhabejty, nej ñbianøcxyii. Pedyíjøch jaduhñ tøø nhabøcy. Jaduhñ miich tøø mmädoyhajpä. Nämaj jäya'ay ja'a nocy capxy hajxy tøø yajpádø'øgy ja'a Jesucristocǝxpä. Ja'a Diosmädia'agy-yajwa'xpähajxy, je'eds hajxy jaduhñ tøø xyajmädoyhájtäm. Yhamdsoo wiinhaam hajxy tiehm yhijxy.

5 Coö ja'a Herodes hänajty jim guobiernähaty Judeanaaxooty, jimä jäya'ay hänajty tu'ug xiøhaty Zacarías. Teedy ja'a Zacarías hänajty tiuumby maa ja'a judíos ja'a quiuhdujthajxy hänajty myiñän. Ja'a Abías ja'a quiuhdujt hänajty yajtúunäxäp neby hänajty jecy tøø yhane'emiän. Ja'a Zacarías ja'a tio'oxiøjc, Elisabet hänajty xiøhaty. Ja'a Aarón yhap yhoc ja'a Elisabet jaduhñ.

6 Pedyii ja'a Zacarías hajxy hänajty quiudiuñ ja'a Diosmädia'agy. Hoy hajxy hänajty yajtuñ nebiä Dios choquiän.

7 Pero cabä yhuunghajxy hänajty nitu'ugtä. Cahnä Elisabet hänajty ñä'ägädä huungpaadyñä. Tøøds hajxy hänajty miäjaanä.

8 Tu'ugxøøbä, jiibiä Zacarías hänajty tiuñ møjtsajtøgooty.

9 Mänitä piaatä coö ja'a poom jiiby jiógät maa ja'a poomjojtaactän, jim Dioswiinduum. Jaduhñä teedyhajxy hänajty quiuhdujthaty.

10 Mänit yhabaaty coö ja'a Zacarías ja'a poom hänajty jiiby jioga'añ. Mänitä cu'ughajxy yhamugøøyy møjtsajtøghaguuy. Mänit hajxy tiägøøyy Diospa'yaaxpä.

11 Jimä Zacarías hänajty piomjocy, mänitä Dios mioonsä tu'ug ñäguehxtøø'xy hahooyhaamby maa ja'a poom hänajty jioquiän. Jim hänajty tøø choñ Dioswiinduum.

12 Coö ja'a Zacarías jaduhñ yhijxy, mänit chähgøøyy. Cabä wiinmahñdy piaaty nej jiatcø'øwät.

13 Mänit ñämaayyä:

—Zacarías, ca'a mdsähgø'øy. Tøø ja'a Dios miädoy nej tøø mmägaxiän coö huung xmió'owät. Huungpaadaamb ja'a mdo'oxiøjc jaduhñ. Juan ja'a mhuung myajxøhátät.

14 Mxoonða'agaamb miich jaduhñ ja'a mhuungcǝxpä. Nämaj ja'a jäya'ayhajxy jaduhñ xioonða'agaambä coö mhuung myinät miédsät.

15 Cumay ja'a mhuung piädsøma'añ ja'a Dioscǝxpä. Miøødhadaambiä Dioshespíritu; jaduhñ miámín miäga'awa'añ. Cabä jocnøø yhu'uga'añ ni ja'a vino.

16-17 Jaduhñdsä cuhdujt miøødhada'añ nebiä Elías jecy miøødhajtiän. Ja'a Diosmädia'agy jaduhñ yajwa'xaamby. Mänitä judíos ja'a Dios hajxy jiahmiejtstaactägatsa'añ jadähooc. Jaduhñä Juan yajwiingapxø'øwa'añ coö ja'a yhuung hajxy quia'a møødnimiädsiphájtänät, y coods hajxy miäbójnät ja'a hoguiapxy ja'a homiädia'agy pøn yhamdsoo cuhdujt ja wi'i yajtunaamb. Coö hajxy jaduhñ quiudiünät, mänitä Dios jaduhñ quiuhbøga'añ.

18 Mänitä Zacarías miänaañ:

—Nébiøch ja'a tøyhajt jaduhñ nmøødhádät coöch nhuung myina'añ. Tøø højts nmäjaanä møødhøch ndo'oxiøjc.

19 Mänitä Dios mioonsä yhadsooyy:

—Gabriélhøch nxøhaty. Jímhøch ndsoon Dioswiinduum. Je'eç tøø xquiexy coöch miich min nhawaanä coö ja'a mhuung jaduhñ myina'añ.

20 Coöch miich ja'a nmädia'agy tøø xquia'a mabøjcä, huum miich mmähmø'øwa'añ. Høxtä coonä ja'a mhuung myinät, mänit mgapxø'øga'añ. Tøjiadaamb jaduhñ nébiøch cham nmädia'aguian.

21 Jimä cu'ug ja'a Zacarías hajxy hänajty jia wi'i yhahixy møjtsajtøghaguuy. Yagjuøøby hajxy hänajty coö ja'a Zacarías jiiby wyl'i jiecyc tsajtøgooty.

22 Coo ja'a Zacarías tiøjpädsøømnä, tøø hänajty jiaanč huumy. Mänitä cu'ughajxy ñajuøøyy coo ja'a Zacarías ja'a tsø'ty hänajty tøø yhixy. Hix, cø'øhaam yajnahixøøñä.

23 Hoorä, coo ja'a Zacarías yaghabejty mäduhñtiä hänajty tiuna'añ tsajtøgooty, mänit ñøcxnä maa ja'a quiajptän.

24 Mänitä tio'oxiøjc jiaanč mähmøøyy maaxhuungmøød. Jiiby ñä'ägä mähmøøyy tøgooty mägooxpo'o. Caj ñä'ägä tøjpädsøømnä. Jaduhñ hänajty wyi'i miädiaacta'agy quiopcooty:

25 “Páadyhøch ja'a Dios jaduhñ tøø xñäxuuč nébiøch ja'a cu'ughajxy jaduhñ xquia'a péjxnät.”

26 Tädujpo'o ja'a Elisabet hänajty tøø yhity maaxhuungmøød, mänitä Dios ja'a Gabriel quiéjxcumbä. Jimä Gabriel quiejxä maa ja'a cajpt xiøhatiän Nazaret jim Galileanaaxooty.

27 Ja'a María jaduhñ yajnäguejxä. Cäxyiihajpnä hänajty je'enä. Tøø hänajty tiødiägø'øy coo ja'a José hänajty piøga'añ. Jue'e ja'a José, David yhap yhoc je'e, ja'a hijty jegyhajty gobiernätuumbä.

28 Mänitä Gabriel tiøjtägøøyy maa ja'a María hänajtiän. Mänitä María ñämaayyä:

—Diøshøch tøø xquiey cooçh miich jaduhñ nmägápxät. Miiçhcøxpä ja'a Dios ja'a mayhajt tiuna'añ. Xmiøødhijp miich ja'a Dios. Maas hoy miich ja'a Dios xyhixy quejee ja'a mmädo'oxiøjc-hajxy.

29 Cabä María hänajty ñajuø'øy tii jaduhñ coo tøø ñäma'ayii ja'a Dioscøxpä. Tsähgøøyy jaduhñ siémpräm.

30 Mänitä ñämáayyägumbä:

—María, ca'a mdsähgø'øy. Møj ja'a Dios ja'a mayhajt tiuna'añ ja'a miichcøxpä.

31 Mhuungpaadaamb miich jaduhñ. Jesús ja'a mhuung myajxøhata'añ.

32 Møj jaanč jaduhñ yhida'añ. Høxcabáañäp jaduhñ coo Dyioshuungä. Dios jaduhñ päda'agaamb gobiernä nebiä David jecy tiuunñän, ja'a Jesús yhap tieedy.

33 Paady jaduhñ piäda'aga'añii gobiernä nebiä judíoshajxy yhané'emät cøjxta'axiøø. Nimänaa jaduhñ quia'a hanehmbädø'øwa'añ.

34 Mänitä María yajtøøyy:

—Nébiøch jaduhñ nnä'ä huungpáadät; cahnøch ya'adiøjc nhixyhatyñä.

35 Mänitä Gabriel yhadsooyy:

—Minaambä Dioshespíritu xyhuungmo'owa'añ. Dioshuung jaduhñ minaamb ca'awaamb. Cabä pojpa cädieey mänaa tiuna'añ.

36 Y miich mhocmaam, ja'a Elisabet, jaduhñ je'e miaaxhuungpaadaambä, hoy jaduhñ jia majjä jia petiä. Tädujpo'ohájñäp je'e. Cábäc tyijy hijty miaaxhuungpaada'añ; jaduhñä cu'ughajxy hijty miäna'añ.

37 Pero cabä Dios tii tsip ñä'ägä juø'øy. Hotyijä jaduhñ tiuna'añ.

38 Mänitä María miänaañ:

—Wéenhøch ja'a Dios jaduhñ xñä'ägä moonsähaty. Wéenhøch jaduhñ njaty nébiøch tøø xñäma'ayän.

Mänitä Gabriel wyiimbijnä.

39-40 Mänitä ja'a María ñøcxy maa ja'a Elisabethajxiän. Judeanaaxooty hajxy hänajty chäna'ay tunjooty. Mänitä María tiøjtägøøyy.

41 Mänitä Elisabet yajpoo'xä. Mänitä maaxhuung jiiby yu'xy Elisabet jioodoo. Mänitä Elisabet ja'a Dioshespíritu ñämejtsä.

42 Mänitä Elisabet møc yaaxy:

—Maas hoy miich ja'a Dios xyhixy quejee ja'a mmädo'oxiøjc-hajxy. Jaduhñ miich mhuung xyhixáañabä.

43 Ja'a miich mhuung, nwiindsøñhadáambiøch je'e. Nyagjuøøbiøch jaduhñ cooçh miich xwyiingudsähgø'øy.

44 Túunøch miich xñä'a yajpoo'xy, mänitiøch nhuung yaaby jiaančh tehñ yu'xy njoodóotyhøch. Jootcuyc jaduhñ ñijiäwø'oyii, paady yu'xy.

45 Tøjiadaamb jaduhñ nej miich ja'a Dios tøø xñäma'ayän. Coø jaduhñ mmäbøcy, jootcuyc mhida'añ —nøñä Elisabet ja'a María ñämaayy.

46 Mänitä María miänaañ:
Tøyhajtä Dios miøjjä jiaančhä.

47 Jootcuyc-høch ñijiäwø'oyii coøch je'e xyhixy.

48 Xjiahmiéjtspøch jaduhñ, hóyhøch nja häyoy.
Jootcuyc-høch ja'a jäya'ayhajxy xñä'ägä nänømaañnä,

49 je'eguiøxpä coøch ja'a Dios tøø xyhuungmo'oy.

Møj jaančh ja'a Dios.

50 Pønjaty ja'a Dios jaduhñ wiingudsähgøøby,
Dios jaduhñ näxuudsaañ cøjxta'axiøø.

51 Tøø ja'a Dios ja'a miäjaa yajcähxø'øgy;
tøø hajxy quia'a mäjäda'agy, ja'a hajxy hijty yajcumayaambä.

52 Tøø ja'a gobiernä quiuhdujthajxy piøjcäxä,
tøø ja'a häyoobäjäya'ayhajxy miøjtägø'oy.

53 Tøø ja'a häyoobäjäya'ayhajxy cøxiä wiinä mio'oyii;
cabä mäyøøjäya'ayhajxy tii tøø piaady.

54 Piuhbejt ja'a Dios ja'a judíoshajxy.

Cøjxta'axiøø ñäxuuch pia'häyoy,

55 nebiä Abrahamhajxy jecy ñämaayyän,
ja'a nhaphajtäm ja'a ndeedyhajtäm.

56 Tägøøgpø'o ja'a María jim jiaac hijty maa ja'a Elisabetän. Mänit yhädaacnä maa ja'a quiajptän.

57 Mänitä Elisabet miaaxhuungpaatnä; ya'ayhäna'c jaduhñ miingahw.

58 Mänitä Elisabet hoy quiuhixyijäm ja'a jiuju ja'a miägu'ughajxy møødä miädøjc-hajxy. Mänit hajxy nägøxiä xioondaacy coø Dios ja'a mayhajt jaduhñ tøø tiuñ.

59 Cuductujxøø ja'a pigäna'c hajxy hoy yajcircuncidarhadyii nebiä judíoshajxy hänajty quiuhdujthatiän. Mänit hajxy jia yajxøhataañ Zacarías nebiä tieedy hänajty xiøhatiän.

60 Mänitä tiaj miänaañ:

—Cábøch jaduhñ nyajxøhata'añ. Juánhøch jaduhñ nyajxøhata'añ.

61 Mänitä Elisabet ñämaayyä:

—Tii jaduhñ coø myajxøhata'añ. Caj pøn jaduhñ xiøhaty maa miich mjuju maa miich mmägu'ugän.

62 Mänitä Zacarías miäyajtøøwä cø'øhaam nebiä yhuung xiøhátät.

63 Mänitä pu'uyhuung ñädsiiwøøyy coø mio'owøøjät. Mänit yuugjahy pu'uguiøxp: “Juan xiøhata'añ.” Mänit hajxy nägøxiä yagjuøøyy.

64 Mänitä Zacarías quiapxø'nä. Mänitä Dios Dioscujú'uyäp miooyy.

65 Jaančh tehñ yagjuøøyy ja'a cu'ughajxy jaduhñ. Mänitä mädia'agy tiägøøyy wädijpä jim Judeanaaxooty jim tunjooty nebiaty ja'a Zacarías tøø jiaty.

66 Coø ja'a jäya'ayhajxy nägøxiä miädoyhajty, mänit hajxy tiägøøyy najuøødiaacpä. Mänit hajxy miänaañ:

—Pätiidä yø'ø pigäna'c tiunaamby coø hänajty tøø yeegy.

Tøyhajtä Dios hänajty piuhbeda'añ.

67 Mänitä Zacarías ñämejtsä ja'a Dioshespíritu. Mänitä Zacarías jiomädiaacnajxy neby hänajty tøø miøødmädia'agyijän ja'a Diósäm:

68 Møj jaančh ja'a Dios;

paady jaduhñ tøø quiäda'agy coø højts xyajnähwa'ads xyajcuhwa'adsáanäm, højts judíoshajtäm.

69 Tøø højts ja'a yajnahwaatspä yajcuhwaatspä xyajnäguéjxäm; je'edsä møjcuhdajt jaduhñ møød; ja'a David yhap yhoc je'e.

70-73 Jaduhñä Dios jecy miänaañ coo højts xyajnahwa'ads xyajcuhwa'adsáañäm højts nmädsiphajtäm.

Jaanä jaduhñ miänaambä coo xñäxuuds xpia'häyowáañäm.

Yajtøjiadaamby jaduhñ nebiä Abrahamhajxy jecy miøødyajcuhdujquiän, ja'a nhap ja'a ndeedyhajtämhajxy.

Ja'a Diosquexyhajxy jaduhñ jømädiaacnajx.

74 Coo ja'a Dios hajxy jaduhñ xñäwáañäm maa ja'a nmädsiphajtämhajxiän, paady hajxy nga'a tsähgøøyyänä. Hoyyä Dios hajxy nbanøcxämät.

75 Hawa'adstuum hajxy xyaghidáañäm cøjxta'axiøø.

76 Huung, miich nnämaaby coo Diosmädia'agy-yajwa'xpä mwädita'añ.

77 Myajwiingapxø'øwaamby ja'a Dios quiu'ughajxy neby hajxy jaduhñ ñähwa'ads quiuhwá'adsät.

Coo ja'a Dios ja'a piojpa quiädieey hajxy yajmøødmädiá'agät, mänit hajxy yajnahwa'ads yajcuhwa'adsøøjät.

78 Xñäxúu'tsäm ja'a Dios hajxy jaduhñ, paadiä yajnahwaatspä yajcuhwaatspä quiejxy.

79 Xpiädáacäm hajxy hawa'adstuum, xmióoyyäm ja'a hoyhajt ja'a weenhajt hajxy, nømä Zacarías miänaañ.

80 Hoorä, yee'c møjjøøyy ja'a Juan jaduhñ. Wiimahñdymejts jaduhñ. Ñajuøøyy jaduhñ mädyii hoy mädyii mäbaad. Miøødhajt ja'a Dioshespíritu jaduhñ. Coo miøjjøøyy, mänit tiägøøyy wädijpä hanidiuhmduum. Jim yhiyty høxtä coonä tiägøøyy Diosmädia'agy-yajwa'xpä.

2

1 Coo ja'a xøø jomøjt yhabaaty, mänitä gobiernä Augusto yhanehmy coo ja'a jäya'ayhajxy ween nøcxy nägøxiä ñiguiujaayii maa ja'a yhamdsoo cajpthajxiän, ja'a hajxy wiinduhmyhagajtpä.

2 Ja'a Augusto jaduhñ hanehmdsohñ; cahnä pøn hänajty jaduhñ yhane'emyñä. Ja'a Cirenio, je'e hänajty jim tuumb gobernador Sirianaaxooty.

3 Mänitä jäya'ayhajxy nägøxiä jiaançh cudiuuñ nebiä Augusto hänajty tøø yhane'emiän.

4-5 Jue'e ja'a José hänajty, ja'a David yhap yhoc hänajty je'e. Belén ja'a cajpt hänajty xiøhaty maa ja'a David hänajty tøø myiñ tøø quia'ayän, jim Judeanaaxooty. Coo ja'a David hänajty jim tøø myiñ tøø quia'ay, paadiä Joséhajxy hänajty jim nøcxy ñiguiujaaya'añii møødä María. Tøø hänajty tiödiägøøñä coo hajxy hänajty piøgaañä. Maaxhuungmøød ja'a María hänajty. Galileanaaxooty hajxy hänajty tøø chohnda'agy maa ja'a cajpt xiøhatiän Nazaret.

6 Coo hajxy jim miejch Belén, mänitä María miaaxhuungpaaty.

7 Ja'a quioobhuung jaduhñ miingahw. Mänitä María ñähbijty ñähmojch. Mänit quiugo'ogøøyy wajjøø'xøhñdyjooty. Hix, cabä mejtstaact hajxy hänajty maa tøø ñä'ägädä paady jim cajptooty. Paady hajxy jim ñä'ä nøcxøøyy tøjpa'c maa häna'c ja'a waj hajxy hänajty yajtána'ayän.

8 Jim häna'c-hajxy hänajty näje'e mieegcueendähaty cajtpa'a. Coods hänajty je'e.

9 Mänitä Dios ja'a cujajpä cudøø'xpä yajcähxø'cy maa hajxy hänajty mieegcueendähatiän. Mänitä Diosmoonsä tu'ug ñäguehxtøø'xy maa wyiinduumhajxiän; jim hänajty tøø choon tsajpootyp. Mänit hajxy chähgøøyy.

10-11 Mänit hajxy ñämaayyä:

—Ca'a hajxy mdsähgø'ø. Naamnä ja'a Cristo tøø myiñ tøø quia'ay jim Belén. Mi-jts jaduñ xyajnáhwa'ads xyajcuhwa'adsaamb. MWiindsønhadamb by hajxy jaduñ. Páadyhøch nhawáanäm nebiä jäya'ayhajxy nägøxiä xioondá'agät.

¹² Coo ja'a pigäna'c hajxy jaduñ mbáadät nähbity nähmoch wajjøø'xøhñdyjooty, jaduñ hajxy mnajuø'øwät coo hánajty jie'ejä.

¹³ Mänitä Diosmoonsähajxy nämay jiaac näguehxtøø'xy; Haagä jim hajxy hánajty tøø choon tsajpootyp. Mänit hajxy miänaañ:

¹⁴ Møj jaanč ja'a Dios; tsajpootyp jaduñ yhity.

Jootcujc ja'a jäya'ayhajxy yaa yhida'añ hádaa yaabä naaxwiin pønjaty ja'a Dios quiu-maaby.

¹⁵ Mänitä Diosmoonsä hajxy wyiimbijnä, ñøcxnä hajxy tsajpootyp. Mänitä meegcueendähajpähajxy ñiñämaayyä:

—Jam hajxy híxäm Belén nebiä Diosmoonsä hajxy tøø xyhawáanäm.

¹⁶ Päyø'øguiä hajxy tiu'ubøjcy. Mänitä Jesucristo hajxy hoy jiaanč paady møødä María møødä José. Jiibiä Jesucristo hánajty quio'na'ay nähbity nähmoch wajjøø'xøhñdyjooty.

¹⁷ Mänitä mädia'agy hajxy hoy yajwa'xy nebiaty hajxy hánajty tøø yhixy tøø miädoy ja'a Jesucristocøxpä.

¹⁸ Ja'a jäya'ayhajxy jaac mädoyhájtäbä, yagjuøøyy hajxy jaduñ.

¹⁹ Pero cabä María jaduñ yagjuøøyy. Tøø hánajty miøødmädia'agyii coo jaduñ jiada'añ yhabeta'añ. Jiiby quiopcooty miädiaactaacy. Caj pøn yajmøødmädiaacy.

²⁰ Haa ja'a meegcueendähajpähajxy, mänit hajxy wyiimbijnä, ñøcxnä hajxy. Mänitä Dios ja'a Dioscujú'uyäp hajxy miooyy coo hajxy tøø yhixy tøø miädoy nebiaty hajxy hánajty tøø miøødmädia'agyii.

²¹ Cuductujxøø ja'a Jesús hajxy yajcircuncidarhajtä. Mänit hajxy yajxøbejty Jesús nebiä María hánajty tøø ñäma'ayii coo hánajty quia'a huungmo'oyiinä. Ja'a Diosmoonsä tsajpootypä hánajty hoy tøø ñäma'ay.

²² Coo ja'a xøø hánajty tøø yhabejnä, mänit hajxy hoy chi'iy nebiä ley myiñän, ja'a Moisés jecy quiujáhyäbä. Mänitä Jesús hajxy jiiby chehñhádaacy Jerusalén jim mõjtsajtøgooty.

²³ Jaduñ jiiby myiñ maa ja'a Diosmädia'aguiän: “Ja'a coobhuung ya'ayhäna'cpähajxy, Diostuung hajxy tiunaamby.”

²⁴ Mänitä paloma hajxy metsc yojxy nebiä jiiby myiñän cujaay maa ja'a Diosmädia'aguiän.

²⁵ Jimä jäya'ay hánajty tu'ug chána'ay Jerusalén; Simeón hánajty xiøhaty. Hojiäya'ay hánajty je'e. Hoyyä Dios hánajty wyiingudsähgø'ø. Miøød ja'a Dioshespíritu hánajty je'e.

²⁶ Tøø hánajty miøødmädia'agyiiäm ja'a Dioshespíritu coo hánajty quia'a tsoj ho'oga'añ høxtä coonä ja'a Cristo hánajty tøø yhamdsoo hixy, ja'a Dios hánajty quiexaambiä.

²⁷ Mänitä Simeón ñämaayyä ja'a Dioshespíritu coo jim ñøcxät tsajtøgooty. Mänitä Jesús hoy jiiby piaady møødä tiajhajxy. Cahnä hajxy hánajty wyiimbityñä.

²⁸⁻²⁹ Mänitä Simeón ja'a Jesús chehñdsooyy. Mänitä Simeón miänaañ:
Diosteedy, Dioscujú'uyäp, jootcujc-høch nhó'ogät,

je'eguiøxpä coo tøø myajtøjaty nébiøch hijty tøø xmiøødmädia'aguiän.

³⁰ Hamdsóojøch tøø nhixy ja'a yajnáhwaatspä, ja'a yajcuhwaatspä,

³¹ ja'a miich tøø mguéxiäbä hádaa yaabä naaxwiin.

³² Ja'a hajxy ca'a judíospä, yajwiingapxø'øwáanäp ja'a hoguiapxy ja'a homiädia'agy hajxy.

Ja'a judíoshajxy, cumayáanäp hajxy je'e;

møj jaanč hajxy piäda'aga'añii.

³³ Mänitä Jesús tiajhajxy yagjuøøyy coo yhuunghajxy hánajty jaduñ tøø ñänøømäxä.

³⁴⁻³⁵ Mänit hajxy ñämaayyä:

—Weenä Dios ja'a hoyhajt ja'a weenhajt xmio'oy.

Mänitá María nidiuhm ñämaayyá:

—Näje'e ja'a judíoshajxy yhida'añ tu'ugmädia'agy mөөд miich mhuung. Piaadaamby ja'a hoyhajt ja'a weenhajt hajxy je'e. Pero nämay hajxy jaduhñ quia'a mөөdhida'añ tu'ugmädia'agy. Ñähwaambedaamby hajxy je'e. Tu'udägoyyaamb hajxy jaduhñ. Cähxø'øgaambä wyiinmahñdyhajxy jaduhñ neby hajxy tiajy miay.

³⁶⁻³⁷ Jiibiä yaamgto'oxy hänajty tu'ug tsajtøgooty; Ana hänajty xiøhaty. Fanuel ja'a tieedy hänajty tøø xiøhaty. Aser ja'a yhap ja'a tieedy jegyhajty xiøhaty. Jxutujcjomøjt ja'a ñihyhap hänajty tøø miøødtsäna'ay. Mänitá ñihyhap yho'nä. Mänitáts hänajty tøø jiaac jugyhaty mädaaxc-hii'xcumädaaxcjomøjt nidiuhm. Tøø hänajty miäjaanä. Ja'a Diosmädia'agy hänajty yajwa'xyp. Jiiby hänajty ñälägä tuñ tsajtøgooty. Xøømdsuhm ja'a Dios hänajty wyiingudsähgø'øy. Hayuu hänajty yhity tähoocjaty nebiä Diosmädia'agy jaduhñ maas hoy wyiinjuó'øwät.

³⁸ Coö ja'a Ana jaduhñ miädooyy nebiä Simeón ja'a Jesús ñänøømiän, mänitá Dios miooyy Dioscujú'uyäp. Mänitá mädia'agy tiägøøyy yajwa'xpä jim Jerusalén coö ja'a Cristo tøø quiäda'agy. Nägøxiä jäya'ayhajxy miädoyhajty, ja'a Cristo hajxy hänajty yhahixypä.

³⁹ Coö ja'a Maríahajxy hänajty tøø quiudiuñ nebiä Diosley myiñän, mänit hajxy wyiimbijnä, yhädaacnä hajxy Nazaret jiiby Galileanaaxooty, maa hajxy hänajty tøø chooñän.

⁴⁰ Yee'c möjjøøyy ja'a Jesús jaduhñ. Wiinmahñdymejts jaduhñ. Dios jaduhñ mooyy ja'a hoyhajt ja'a weenhajt.

⁴¹ Wiingujomøjt ja'a judíos ja'a xøø hajxy hänajty yagjadyii jim Jerusalén mänaabä ja'a meeghuung hajxy hänajty yoxiän.

⁴² Coö ja'a Jesús majmetscjomøjt yaghabejty, mänitá Maríahajxy ñøcxy xøøhajpä Jerusalén mөөдä Jesús, nebiä cuhdujt hajxy hänajty miøødän.

⁴³ Coö ja'a xøø hänajty tøø miaañä, mänit hajxy wyiimbijnä. Pero ja'a Jesús, jim je'e miähmøøyy Jerusalén nidiuhm. Cabä tiajhajxy hänajty ñajuø'øy pø tøø miähmø'øy.

⁴⁴ Jaduhñ hajxy hänajty miäna'añ cooc tyijy hajxy hänajty jim piamänaqyii mөөдä miägu'ughajpähajxy. Tu'xøø ja'a Maríahajxy hänajty tøø tiu'uyo'oy, mänitá Jesús hajxy yhixpaaty coö hänajty jim quia'a pamänacy høxhaam. Mänit hajxy jia høxtaayy maa ja'a jiuju ja'a miägu'ughajxiän.

⁴⁵ Coö hajxy quia'a paaty, mänit hajxy wyiimbjycumbä. Mänit hajxy ñøcxtägajch Jerusalén jadähooc.

⁴⁶ Jimä Jesús hajxy jiaanç paaty tsajtøgooty. Miädägøøgxøøbä hänajty jim tøø yhity. Jiiby hänajty yhäña'ay maa ja'a ley-yajnahixøøbiädøjc-hajxiän, ja'a hajxy jiiby tsajtøgootypä. Jiibiä capxy mädia'agy hänajty miämädoona'ay. Cøxiä wiinä hänajty yajtøy.

⁴⁷ Jaduhñ hänajty yhadsoy nebiä jajpän, nebiä tøøbä quiapxtá'aguiäbän. Yagjuøøby hajxy hänajty, ja'a hajxy hänajty jiiby häñaabiä tsajtøgooty.

⁴⁸ Coö ja'a Jesús jaduhñ piaatä ja'a tiajhajxy, mänit hajxy yagjuøøyy. Mänitá tiaj miänaañ:

—Huung, tii højts jaduhñ coö tøø xyhäyoowhixy coö tøø mmähmø'øy. Jiiby højts miich nja wi'i yhøxta'ay.

⁴⁹ Mänitá Jesús yhadsooyy:

—Tiiç mijs coö xyhøxta'ay. Nej, cab hajxy mnajuø'øyä cooç tsipcøxp nduna'añ maaç nDeedy tiøjcänä. Haa ca'a, Dióshøch jaduhñ nDeedyhajpiä.

⁵⁰ Pero cabä tiajhajxy wyiinjuøøyy tii jaduhñ coö tøø miäna'añ.

⁵¹ Mänitá Jesús jiaanç padu'ubøjnä, piahädaacy jiiby Nazaret. Hix, jiaac mäbøjcäp ja'a tiaj miädia'agyhajxy hänajty. Y ja'a María, jiiby hänajty yajnøcxy yagjuø'øy quiopcooty nebiä yhuung hänajty tøø xyi'igy tøø miädia'agy jiiby tsajtøgooty.

⁵² Yee'c-habejt ja'a Jesús jaduhñ; jaac wiinmahñdymejts jaduhñ. Quiumaayy ja'a Dios jaduhñ mөөдä tsaan mөөдä cu'ug.

3

¹⁻² Coο ja'a Juan hānajtj tөө miөjjөөñä, ja'a Zacarías yhuung, mānit miägäpää ja'a Diósäm. Mānit tiägөөyy wädijpä hanidiuhmduum. Majmocxjomөjt ja'a Tiberio hānajtj tөө guiobiernāhaty. Ja'a Poncio Pilato hānajtj tuumb gobernador Judeanaaxooty. Ja'a Herodes hānajtj tuumb gobernador Galileanaaxooty. Ja'a piuhya'ay Felipe hānajtj tuumb gobernador Itureanaaxooty mөөдä Traconitenaaxooty. Ja'a Lisaniās hānajtj tuumb gobernador Abilinianaaxooty. Ja'a Anās hānajtj tuumb teedywiindsön mөөдä Caifās.

³ Mānitä Juan ñөcxөөyy maa ja'a Jordānmөjnөө mäwiingonän. Jaduhñä tsaangu'ug hānajtj yajwiingapxө'өy coο hajxy ñābētāt, coο ja'a yhaxөөgwiinmahñdy hajxy ñajtshixө'өwāt, nebiä piojpä quiädieey hajxy jaduhñ ñāhwā'adsāt.

⁴⁻⁵ Tөjjajit jaduhñ nebiä Isaías ja'a Diosquexypä jecy jahyyän:

Jimä jäya'ay tu'ug yaaxwädity hanidiuhmduum:

“Najtshixө'өw ja'a mhaxөөgwiinmahñdy hajxy.

Jaduhñ ja'a mWiindsön hajxy hoy mhahixāt;

jaduhñ hajxy hoy mwiingudsähgө'өwāt.

⁶ Nägөxiä jäya'ayhajxy jaduhñ ñajuө'өwa'añ neby hajxy yajnähwa'adsөjät ja'a Diósäm.”

⁷ Coο ja'a tsaangu'ughajxy hānajtj yajnäbeta'añijäm ja'a Juängäm, jaduhñ hajxy hānajtj ñāma'ayii:

—Haay mөjcu'u, caj mijts hoguiuhdujt mnä'ägä mөөдä. Paady hajxy jaduhñ mhuuc näbetaambä nebiä Dios hajxy jaduhñ xquia'a yajcumädöwāt, túhmäts.

⁸ Hoy hajxy mwäditāt neby jaduhñ quiähxө'өгät coο ja'a mhaxөөgwiinmahñdy hajxy hānajtj tөө mnajtshixөөñä. Y cab hajxy jaduhñ mmäná'anät: “Abrahámhөch nhaphajt ndeedyhajt, páadyhөch ja'a Dios xquia'a yajcumädowa'añ.” Mānitä Dios hajxy xya-jnähwā'adsāt coο ja'a mhaxөөgwiinmahñdy hajxy mnajtshixө'өwāt; ca'a jie'eguiөxpä coο Abraham hajxy mhaphajtj mdeedyhajty.

⁹ Hoy hajxy mwäditāt nebiä Dios hajxy jaduhñ xquia'a pädá'agät haxөөgtuum. Pөн hoy ca'a wädijp, jaduhñ mäwíinäts je'e nebiä quepychaa ca'a төөmhajpän. Piuxaamby hajxy je'e; mānit hajxy ño'oga'añ.

¹⁰ Mānitä tsaangu'ughajxy miānaañ:

—Neby hөjts ndúnāt coο hөjts hoy nwäditāt.

¹¹ Mānitä Juan yhadsooyy:

—Pөн camiixy metsc mөөд, ween tu'ug ñä'ä mo'oy pөн quiamiixy ca'a hijp. Jaanä jaduhñduhmbä, pөн jөө'xypөcy mөөд, ween mio'oy pөн mähdiөjc ca'a mөөд —nөmä Juan miānaañ.

¹² Näje'e ja'a yajnähjuudiutpähajxy miejtspä näbejpä. Mānitä Juan hajxy ñāmaayy:

—Wiindsön, hөjtsäts, neby hөjts jaduhñ ndúnāt.

¹³ Mānitä Juan yhadsooyy:

—Cab hajxy nä'ä tägө'өbä myagjuuñáxāt.

¹⁴ Jaanä jaduhñä policíahajxy näje'e yajtөөbä. Mānitä Juan yhadsooyy:

—Cabä xädө'өñ pөн mbөjcät nä'ä nagoobä. Y caj pөн mnähwaambédāt nä'ä nagoobä. Mjootcädá'agäp ja'a mmäjuhñdy hajxy.

¹⁵ Ja'a tsaangu'ughajxy, jaduhñ hajxy hānajtj wyi'i yajtөy wyi'i yajtөxy pө Cristo je'e ja'a Juan. Paady hajxy hānajtj wyi'i yajtөy, coο ja'a Cristo hajxy hānajtj yhahixy.

¹⁶ Mānitä Juan yhadsooyy:

—Nөөháamhөch mijts chaa nyajnäbety. Pero xiičhä jäya'ay tu'ug xjiaac pamiñ. Je'eds mijts mähөcy xmio'owaamb ja'a Dioshespíritu. Xyajnähwa'ads xyajcuhwa'adsaamb

hajxy jaduhñ. Maas mœc cuhdujt jaaya'ay miœœdä quejeech hœœch. Cábœchä cuhdujt nnä'ägä mœœdä ni weeñtiä maa jaaya'aguiœxpän.

17 Pœñ ja'a haxœœgwiinmahñdy jaduhñ ca'a najtshixœ'œwaamb, haxœœgtuum piäda'aga'añii. Cœjxta'axiœœ jii by chaachpœga'añ. Pero pœnä homiädia'agy pawädijs, cœjxta'axiœœ hajxy jim yhida'añ tsajpootyp.

18 Madiu'u ja'a Juan ja'a cu'ug hänajty yajwiinxiic yajwiingapxœ'œy ja'a Diosmädia'agy. Mœc hänajty jiaançh tehñ miädia'agy.

19 Mänitä Juan ja'a Herodes hoy yhojy, ja'a hänajty tuumbä gobernador. Paadiä Herodes yhojjä coo yhamdsoo puhya'ay ja'a tio'oxiœjc hänajty miœœdtsänaayyä. Felipe ja'a piuhya'ay hänajty xiœhaty. Jiinä hänajty jiugyhatyñä. Herodías ja'a Felipe tio'oxiœjc hänajty xiœhaty. Madiu'u ja'a Herodes hänajty jiatcœ'œy haxœœg.

20 Coo ja'a Herodes jaduhñ yhojjä, mänitä Herodes ja'a Juan yajtsuumä. Hix, haxœœgwiinmahñdy ja'a Herodes hänajty miœœd.

21 Coo ja'a Juan hänajty quia'a tsumyiinä, jimä cu'ug hänajty yajnäbety. Mänitä Jesús miejch näbejpä. Juan hänajty je'e yajnäbetaamb. Jimä Jesús hänajty Dyiospa'ya'axy, mänitä tsajpootyp yhawaach.

22 Mänitä Dioshespíritu ja'a Jesús ñägädaacy nebiä paloman. Mänit hoy yhäñaaxiœpy ja'a Jesús ja'a quiuhduum. Mänitä Dios jim quiapxy tsajpootyp:

—NHuunghájpiœch miïch. Njaançh tehñ chœjpiœch miïch. Jootcujc-hœch jaduhñ nniäwœ'œyii maa miïchcœxpän.

23 Hii'xmajcjomœjt ja'a Jesús hänajty miœœdä mänaabä tiägœ'œyän yajnähixœœbiä. Ja'a cu'ug jaduhñ mänaan cooc tyijy ja'a Jesús ja'a José hänajty tieedyhaty. Ja'a José yhap tieedyhajxy, jaduhñä xiœœhajxy ñibianœcxä: Elí ja'a José tieedy xiœhajty.

24 Ja'a Elí tieedy, Matat je'e xiœhajty. Ja'a Matat tieedy, Leví je'e xiœhajty. Ja'a Leví tieedy, Melqui je'e xiœhajty. Ja'a Melqui tieedy, Jana je'e xiœhajty. Ja'a Jana tieedy, José je'e xiœhajty.

25 Ja'a José tieedy, Matatías je'e xiœhajty. Ja'a Matatías tieedy, Amós je'e xiœhajty. Ja'a Amós tieedy, Nahúm je'e xiœhajty. Ja'a Nahúm tieedy, Esli je'e xiœhajty. Ja'a Esli tieedy, Nagai je'e xiœhajty.

26 Ja'a Nagai tieedy, Maat je'e xiœhajty. Ja'a Maat tieedy, Matatías je'e xiœhajty. Ja'a Matatías tieedy, Semei je'e xiœhajty. Ja'a Semei tieedy, Josec je'e xiœhajty. Ja'a Josec tieedy, Judá je'e xiœhajty.

27 Ja'a Judá tieedy, Joanán je'e xiœhajty. Ja'a Joanán tieedy, Resa je'e xiœhajty. Ja'a Resa tieedy, Zorobabel je'e xiœhajty. Ja'a Zorobabel tieedy, Salatiel je'e xiœhajty. Ja'a Salatiel tieedy, Neri je'e xiœhajty.

28 Ja'a Neri tieedy, Melqui je'e xiœhajty. Ja'a Melqui tieedy, Adi je'e xiœhajty. Ja'a Adi tieedy, Cosam je'e xiœhajty. Ja'a Cosam tieedy, Elmodam je'e xiœhajty. Ja'a Elmodam tieedy, Er je'e xiœhajty.

29 Ja'a Er tieedy, Josué je'e xiœhajty. Ja'a Josué tieedy, Eliezer je'e xiœhajty. Ja'a Eliezer tieedy, Jorim je'e xiœhajty. Ja'a Jorim tieedy, Matat je'e xiœhajty.

30 Ja'a Matat tieedy, Leví je'e xiœhajty. Ja'a Leví tieedy, Simeón je'e xiœhajty. Ja'a Simeón tieedy, Judá je'e xiœhajty. Ja'a Judá tieedy, José je'e xiœhajty. Ja'a José tieedy, Jonam je'e xiœhajty. Ja'a Jonam tieedy, Eliaquim je'e xiœhajty.

31 Ja'a Eliaquim tieedy, Melea je'e xiœhajty. Ja'a Melea tieedy, Mena je'e xiœhajty. Ja'a Mena tieedy, Matata je'e xiœhajty. Ja'a Matata tieedy, Natán je'e xiœhajty.

32 Ja'a Natán tieedy, David je'e xiœhajty. Ja'a David tieedy, Isaí je'e xiœhajty. Ja'a Isaí tieedy, Obed je'e xiœhajty. Ja'a Obed tieedy, Booz je'e xiœhajty. Ja'a Booz tieedy, Sala je'e xiœhajty. Ja'a Sala tieedy, Naasón je'e xiœhajty.

³³ Ja'a Naasón tieedy, Aminadab je'e xiøhajty. Ja'a Aminadab tieedy, Admin je'e xiøhajty. Ja'a Admin tieedy, Esrom je'e xiøhajty. Ja'a Esrom tieedy, Fares je'e xiøhajty. Ja'a Fares tieedy, Judá je'e xiøhajty.

³⁴ Ja'a Judá tieedy, Jacob je'e xiøhajty. Ja'a Jacob tieedy, Isaac je'e xiøhajty. Ja'a Isaac tieedy, Abraham je'e xiøhajty. Ja'a Abra'am tieedy, Taré je'e xiøhajty. Ja'a Taré tieedy, Nacor je'e xiøhajty.

³⁵ Ja'a Nacor tieedy, Serug je'e xiøhajty. Ja'a Serug tieedy, Ragau je'e xiøhajty. Ja'a Ragau tieedy, Peleg je'e xiøhajty. Ja'a Peleg tieedy, Heber je'e xiøhajty. Ja'a Heber tieedy, Sala je'e xiøhajty.

³⁶ Ja'a Sala tieedy, Cainán je'e xiøhajty. Ja'a Cainán tieedy, Arfaxad je'e xiøhajty. Ja'a Arfaxad tieedy, Sem je'e xiøhajty. Ja'a Sem tieedy, Noé je'e xiøhajty. Ja'a Noé tieedy, Lamec je'e xiøhajty.

³⁷ Ja'a Lamec tieedy, Matusalén je'e xiøhajty. Ja'a Matusalén tieedy, Enoc je'e xiøhajty. Ja'a Enoc tieedy, Jared je'e xiøhajty. Ja'a Jared tieedy, Mahalaleel je'e xiøhajty. Ja'a Mahalaleel tieedy, Cainán je'e xiøhajty.

³⁸ Ja'a Cainán tieedy, Enós je'e xiøhajty. Ja'a Enós tieedy, Set je'e xiøhajty. Ja'a Set tieedy, Adán je'e xiøhajty. Ja'a Adán, Dios jaduhñ cunuu'x pädaac.

4

¹ Jimä Jesús hänajty maa ja'a Jordánmøjnøøjän. Miøødä Jesús ja'a Dioshespíritu hänajty. Mänitä Jesús wioonøcxä hanidiuhmduum ja'a Dioshespíritu.

²⁻³ Jim jaduhñ yhiyty juxychägui'xxøø. Hayuu hänajty ñä'ägä hity. Jimä Jesús hänajty jia jøjcapxø'øwa'añii ja'a møjcu'ugóngäm coog tyijy cu tiu'udägooyy. Mänitä Jesús yuu piaatä. Mänitä Jesús ñämaayyá ja'a møjcu'ugóngäm:

—Pø tøy miičh ja'a Dios xyHuunghaty, yajwa'añguioj yø'ø tsaá nebiä tsajcaaguiän —ja jøjcapxø'øwaanä ja'a Jesús jaduhñ, paady jaduhñ ñämaayyá.

⁴ Mänitä Jesús yhadsooyy:

—Jaduhñä Diosmädia'agy miäna'añ: “Ca'a quiaaguiä ja'a jäya'ayhajxy miäjyghádät hädaa yaabä naaxwiin; møødä Diosmädia'agy hajxy miäjyghádät.”

⁵ Mänitä møjcu'ugong ja'a Jesús wioonøcxy maa ja'a tun jaančh tehñ quiøxpän. Mänitä Jesús tu'habaquiä yajnäheebøøyyä ja'a naax ja'a cajpt cøxiä hädaa yaabä naaxwiin.

⁶⁻⁷ Mänitä Jesús ñämaayyá:

—Høøch nje'e yø'øduhñ cøxiä mäduhñtiä jii quiähxø'øgy. Yajxón yø'ø cajpt jaduhñ. Møj jaančh ja'a jäya'ayhajxy, ja'a hajxy xiiby tsänaabiä. Høøch jaduhñ cøxiä tøø xquiøxy cø'ødägø'øgy. Nmøødhøch ja'a cuhdujt jaduhñ cooch hopiønä nyajcø'ødägø'øwät. Y cooch miičh jaduhñ xwyiingudsähgø'øwät, mänitøch miičh ngøxy mó'owät.

⁸ Mänitä Jesús yhadsooyy:

—Jaduhñä Diosmädia'agy miäna'añ: “Mwiingudsähgø'øwäp ja'a Dios; je'eduhñ mWiindsønähädäp. Cab jaduhñ wiingpä mwiindsønähädät.”

⁹ Mänitä møjcu'ugong ja'a Jesús wioonøcxy jim Jerusalén-cajptooty. Mänit miøødwiimbejty møjtsajtøjcuhdum. Mänitä møjcu'ugong miänaañ:

—Pø tøy miičh ja'a Dios xyHuunghaty, cuhdøpxnax jii by naaxwiin.

¹⁰ Caj miičh nej mjádät. Jaduhñ jii by myiñ maa ja'a Diosmädia'aguiän: Dios hane'emaamb ja'a mioonsähajxy tsajpootypä coo miičh xcwieendähädät.

¹¹ Xchehñhidaamb miičh hajxy jaduhñ nej miičh tsaajooty jaduhñ mga'a cuhnébät.

¹² Mänitä Jesús yhadsooyy:

—Jaduhñä Diosmädia'agy miänaambä: “Cabä Dios mjøjcapxø'øwät, ja'a mWiindsønähajpiä.”

¹³ Coo ja'a møjcu'ugong miädia'agy hänajty quia'a jøjtägø'øwáañäxä, mänit ñähgueecnä.

14 Mänitä Jesús yhädaactägajch Galileanaaxooty. Diosmäjaa hänajty miøød. Mänitä mädia'agy wiädijty ja'a Jesúsçxpä wiinduhmyhagajpt.

15 Cajpt-cajpt ja'a Jesús hänajty wiädity yajnahixøøbiä tsajtøgooty. Mänitä Jesús quiu-maayyā ja'a jäya'ayhajxy nägøxiä.

16 Mänitä Jesús miejch Nazaret maa hänajty tøø miuutsc-hatiän. Coö ja'a poo'xxiøø yhabaaty, mänit tiägøøyy tsajtøgooty. Jaduhñ hänajty ñä'ägä cuhdujthaty ja'a poo'xxiøøjooty. Mänit ñämaayyā coö ja'a Diosmädia'agy quiápxät. Coö tiänaayyø'cy majiäya'awyiinduum,

17 mänitā libro miooyyā, ja'a Isaías hänajty jegyhajty tøø jiäayäbä, ja'a Diosquexypä. Mänitā libro quiejtøøyy. Mänit tiägøøyy capxpä:

18 Ja'a Dioshespíritøch nmøød.

Je'ech tøø xpiäda'agy coöchä häyoobäya'ayhajxy nhawáanät coö hajxy yaghoyø'øwa'añii. Jaduhñhøch tøø xwyiinguexy coöchä jäya'ayhajxy nhawáanät nebiä piojpä quiädieey hajxy ñähwa'ads quiuhwá'adsät, nebiä Diosmädia'agy hajxy pedyii quiudiúnät.

19 Tøø jaduhñ yhabaady coö ja'a Dios ja'a mayhajt jaduhñ tiuna'añ møj may.

20 Mänitä Jesús ja'a libro yhabäijnä. Mänitä tsajtøjyohbiä jaduhñ miooyyā. Mänitä Jesús yhäñaaguiädaacy. Wyi'i wyiinhee'ppejpy ja'a cu'ug ja'a Jesús hajxy hänajty.

21 Mänitä Jesús miänaañ:

—Tøø ja'a Diosmädia'agy tiøjaty nébiøch tøø ngapxiän.

22 Mänitä cu'ughajxy yagjuøøyy coö ja'a Jesús hänajty hoy tøø quiapxy. Hoy ja'a Jesús hajxy hänajty ñänømy:

—Maa yø'ø capxy yø'ø mädia'aguiäda'a tøø yhuug habøjpä. Haa ca'a, ja'a José yhuung yø'øduhñ, cabä —nøm hajxy hänajty miäna'añ.

23 Mänitä Jesús miänaañ:

—Jaduhñhøch mijtsäda'a xñäma'awa'añ: “Huuc yajcähxø'øg ja'a hijxtahñd yaa maa ja'a mhamdsoo cajptän nej miich jim tøø mhuuc yajcähxø'pän jim Capernaum.”

24 Mänitä Jesús jiaac mänaañ:

—Pero høøch jaduhñ mänaamb, ja'a Diosquexypähajxy, cabä miädia'agyhajxy miäbøgáanäxä maa yhamdsoo cajpthajxiän. Tehñ tiøyhajt jaduhñ.

25-26 Coö ja'a Elías hänajty jegyhajty wiädity Diosmädia'agy-yajwa'xpä yaa Israelpä-naaxooty, tægøøgjomøjtä cupc caj ñä'ägädä tuuyy. Chaadsä yuuxøø jiaanch tehñ jiajtä. Mänitä Dios ja'a Elías quiejxy maa ja'a cajpt hänajty xiøhatiän Sarepta, jim Sidón mäwiingón. Jimä Elías ja'a yaamgto'oxy hoy tu'ug piuhbety. Pero ja'a yaamgto'oxyhajxy yaabä, cab hajxy yajnäguejxä, hoy hajxy hänajty jia nämayyā.

27 Jaanä jaduhñduhmbä, jii haxøøgpa'ammøødpähajxy hänajty nämay yaa Israelpä-naaxooty mänaa ja'a Eliseo hänajty yaa wiäditiän Diosmädia'agy-yajwa'xpä. Pero cabä pia'amhajxy jaduhñ yajnax yajmäayyäxä. Jagooyyā Naamán pia'am nidiuhñ ñajxy miaayy, y jäguem hänajty chána'ay jim Sirianaaxooty, ca'a yaajä.

28 Coö ja'a jäya'ayhajxy jaduhñ miädooyy nebiä Jesús miänaañän, ja'a hajxy hänajty jii by tsajtøgootypä, cøjx hajxy jiootma'ady.

29 Mänitä Jesús hajxy ñädänaayyø'cy. Mänitä Jesús hajxy jim yajnøcxy tunguhduum jim cajtpa'a. Jimä Jesús hajxy hänajty quiuhjuipnaxa'añ.

30 Pero cabä Jesús hajxy nej ñä'a tuuñ. Jaduhyyä je'e yajyohñajxy majiäya'ayhagujc. Mänit jim wyiimbijnä.

31 Mänitä Jesús ñøcxy Capernaum, jim Galileanaaxooty. Coö ja'a poo'xxiøø yhabaaty, mänitä Jesús ja'a cu'ug tiägøøyy yajnahixøøbiä tsajtøgooty.

32 Jaduhñä Jesús hänajty yajnahixø'øy nebiä capxta'agypiän, paadiä cu'ughajxy hänajty yagjuø'øy.

33 Jiibiä jäya'ay hänajty tu'ug ja'a møjcu'uba'ammøødpä. Mänit møc yaaxy:

³⁴ —Ween hõjts nhity. Tii jaduñ mhõxtaaby maa hõjtsän. Nej, xyajcuhdägoyyaamb hõjtsä. Nhíxyhõch miich. Jesús mxõhaty. Nazaret mdsooñ. Nnajuõbìõch jaduñ coo miichä Dios xyHuunghaty.

³⁵ Mänitä Jesús ja'a mõjcu'u yhojy:

—Hamón, jua'ads jim maa yõ'õ craajän.

Mänitä mähdiõjc quiädaay naaxwiin maa ja'a jäya'ay wyiinduumhajxiän. Mänitä mõjcu'u piädsõõmy. Cabä mähdiõjc nej jiajnä.

³⁶ Mänitä jäya'ayhajxy nägõxiä chähgõõyy. Mänit hajxy ñiñämaayyä:

—Hõxtahm̄ds jaduñ quiapxy miädia'agy. Cuhdujtmõõdäda'a yõ'õduñ maa ja'a mõjcu'uhajxiän. Jaanç pädsoõmb hajxy jaduñ coo hajxy ñäma'ayii coo hajxy piädsõmät.

³⁷ Mänitä mädia'agy tiägõõyy wädiipä ja'a Jesúscõxpä jim wiinduhmyhagajpt.

³⁸ Mänitä Jesús piädsõõmy tsajtõgooty. Mänit ñõcxy maa ja'a Simón tiõjc-hajxiän. Jiibiä Simón miõ'õdhoc hänajty pia'amgo'na'ay tomiõõd. Mänitä Jesús hajxy miänuu'xtaacy coo ja'a toy ween yajtõjtsäxä.

³⁹ Mänitä Jesús ja'a pa'amjäya'ay wyiinguwoodsõõyy. Mänit miänaañ coo ja'a toy ween ñähwa'açhii. Mänitiä ja'a toy jiaanç tõjtsnä. Mänitä pa'amjäya'ay piädõ'cy. Mänit tiägõõyy mayhajt-tuumbä maa ja'a Jesúshajxiän.

⁴⁰ Coo chuujõõyy, mänitä pa'amjäya'ayhajxy may wiomejtsä maa ja'a Jesúsän. Madiu'u ja'a pa'am hajxy hänajty miõõdä. Mänitä Jesús nägõxiä quiõ'nähgajpy tu'ugjaty-tu'ugjaty. Jaduhnä pia'amhajxy ñähwaats quiuhwaatsä.

⁴¹ Nämäy hajxy hänajty miõjcu'uba'ammõõdä. Coo ja'a mõjcu'uhajxy piädsõõmy, mänit hajxy yhayaaxy:

—Dios miich xyHuunghajp.

Mänitä Jesús ja'a mõjcu'u yhojy. Cab hajxy ñä'ägä yajcapxä. Hix, ñajuõõby hajxy hänajty coo ja'a Jesús jie'ejä ja'a Cristo, ja'a Dios tõõ quiéxiäbä.

⁴² Coo jioõõyy, mänitä Jesús ñõcxy cajtpa'a haniduhm̄duum. Jimä cu'ug ja'a Jesús hajxy hänajty yhõxta'ay. Coo hajxy piaaty, mänit hajxy jia yajmähmõ'õwaañ.

⁴³ Mänitä Jesús miänaañ:

—Páadyhõch ja'a Dios yaa tõõ xquiexy hädaa yaabä naaxwiin cooç wiinduhmyhagajpt nwädität, cooç nyajwiingapxõ'õwät coo ja'a Dios ja'a miäjaa yajcähxõ'õgaanä. Paady, cábõch yaa nmähmõ'õwa'añ.

⁴⁴ Jaduhnä Jesús hänajty wiädity yajñähixõõbiä jim Galileanaaxooty. Wiinduhmyçhajtõjc hänajty wiädity.

5

¹ Mänitä Jesús hänajty jim tiäna'ay Genesaretmejypia'a. Mänitä jäya'ayhajxy may miejch Diosmädia'agymiädoobä. Nõ'õchpän ja'a jäya'ayhajxy hänajty tiäna'ay maa ja'a Jesúsän. Cabä hawa'adspä hänajty maa.

² Mänitä Jesús barco yhiijxy metsc jim mejypia'a. Yajwa'adsä barco hänajty. Jimä cubarcohajxy hänajty quihjuijptsabiujy mäwiingón.

³ Mänitä Jesús ja'a barco tu'ug yajpejty ja'a Simón jie'e. Mänitä Jesús ja'a Simón ñämaayy coo barco weenä yajmäwiingónät wiinduum. Jimä Simón ja'a Zebedeo yhuunghajxy hänajty miõõdä nämetsä. Jacobo hänajty tu'ug xiõhaty. Tu'ug hänajty xiõhajpä Juan. Mänitä Jesús yhäñaaguiädaacy barcojooty. Mänitä cu'ughajxy tiägõõyyä yajwiingapxõõyyäbä.

⁴ Coo ja'a Jesús jaduñ quiapxpädõõyy, mänitä Simón ñämaayyä:

—Yajmõjyo'oy ja'a mbarco ja ween com̄duum. Jiibiä mguhjuijptsay hajxy mbädä'agät.

⁵ Mänitä Simón yhadsooyy:

—Wiindsón, tu'tsuhm hõjts tøø nja cuhjuipy. Cab hõjts tii tøø nnä'ägädä mach. Pero cooçh miich jaduñ tøø xñäma'ay, nõcxyhõch nhuuc jaac juipy.

⁶ Coo hajxy jaduñ jiaanç cudiuuñ, mänitä hacx hajxy may miajch, hõxtä tsøømgøø'tsä ja'a cuhjuijtsaay jaduñ.

⁷ Mänitä miägu'ughajpä hajxy miøjyeemy, ja'a hajxy hänajty wiingbarcojootypä, coo hajxy miñ piuhbedyii. Mänitä barco hajxy metsc yaghujch. Ja weenjaty hajxy quia'a mäguiinä.

⁸⁻¹⁰ Mänit hajxy yagjuøøyy coo hacx hajxy may miajch. Mänit hajxy ñajuøøyy coo ja'a Jesús ja'a hijxtahnd jaduñ yajcähxø'cy hoy-yagjuøøñä. Mänitä Simón Pedro ja'a Jesús wyiinjiçädaacy. Mänit miänaañ:

—Wiindsón, cábõch miich hawiinmats xmiøødhídät. Cábõch hoguiuhdujt nmøødä.

Mänitä Jesús ja'a Simón ñämaayy:

—Ca'a mdsähgø'øy. Wiingtuung mbanõcxáañäp. Myajwiingapxø'øwaambiä cu'ug ja'a Diosmädia'agy.

¹¹ Mänitä barco hajxy yajmøjyohbiejty mejypia'a. Mänitä Jesús hajxy piadu'ubøjcy. Ñähgøecy hajxy jaduñ cøxiä.

¹² Mänitä Jesús wiingcajpt miejch. Jimä jäya'ay hänajty tu'ug haxøøgpu'udsmøød. Coo ja'a Jesús yhiçä, mänit wyiinjiçädaacä. Mänit ñämaayyä:

—Wiindsón, miich nnämaaby, høøch nbu'uds yajtsóocäc.

¹³ Mänitä Jesús ja'a mähdioçc ñähdoonñ. Mänitä Jesús miänaañ:

—Tøø jaduñ mdso'ogy.

Tuunä ja'a Jesús jaduñ ñä'ä mänaañ, mänitiä ja'a mähdioçc choocy.

¹⁴ Mänitä Jesús miänaañ:

—Caj pøn mhawáañät coo tøø mdso'ogy. Nøcx tu'uda'aquiä maa ja'a teediän. Jimä xädø'øn mguyoxø'øwät nebiä Moisés jecy yhanehmiän. Paadiä xädø'øn mguyoxø'øwät, jaduñä hijxtahnd myajcähxø'øgät coo tøø mdso'ogy.

¹⁵ Mänitä mädia'agy hajxy yajwädiçty jäguembaady cooc ja'a Jesús ja'a hijxtahnd tøø yajcähxø'øgy. Mänitä jäya'ayhajxy maas may jiaac hamugøøyy maa ja'a Jesúsän. Ja'a Jesús miädia'agy hajxy hänajty yhamädoowhidáañäp. Møødä pia'amhajxy hänajty yaj-naxáañäxä.

¹⁶ Coo ja'a jäya'ayhajxy hänajty wyi'i yhamugø'øy maa ja'a Jesúsän, paadiä Jesús hanidiuhmduum ñõcxy Diospa'yaaxpä.

¹⁷ Wiinghooçä Jesús ja'a cu'ug hänajty yajwiingapxø'øy. Jaanç tehñ yhuçts ja'a tøjc hänajty. Jiibiä fariseoshajxy hänajty yhäñ'ay møødä ley-yajñähixøøbiähajxy. Wi-induhmyhagajpt hajxy hänajty choon Galileanaaxooty møødä Judeanaaxooty møødä Jerusalén. Miøødä Jesús ja'a Diosmäjaa hänajty nebiä pa'am jaduñ yajnáxät.

¹⁸ Mänitä cøømucypiä tecymiucypiä tu'ug quiøømiejtsä tsaajiooty. Jiiby hajxy jia yajtøjtägø'øwaañ maa ja'a Jesús hänajty miädia'aguiän.

¹⁹ Pero jaanç tehñ yhuçts ja'a tägø'øwøødiaact hänajty. Mänit hajxy ñiñämaayyä coo hajxy jim yaghawa'adsa'añ tøjñähgøxp. Mänit pa'amjäya'ay hajxy quiuhdøøñajxy tøjcuhduum maa ja'a Jesús hänajty pia'täna'ayän.

²⁰ Coo ja'a Jesús ñajuøøyy coo ja'a miädia'agy hänajty miäbøgáañäxä, mänitä cøømucypiä tecymiucypiä ñämaayyä:

—Mägu'ughajpä, miich nnämaaby coo ja'a mbojpä mgädieey tøø xñähwa'açh tøø xquiuhwa'açh.

²¹ Mänitä fariseoshajxy quiopcooty tiägøøyy mädiaactaapä møødä ley-yajñähixøøbiä: "Tii yø'ø craa jaduñ coo miäna'añ. Capxtägooby yø'øduñ. Jagooyyä Dios ja'a cuhdujt jaduñ miøødä coo ja'a pojpa cädieey mié'e'xät."

²² Mänitä Jesús ñajuøøyy nebiaty hajxy hänajty miädiaacta'agy quiopcooty. Mänit miänaañ:

—Tii hajxy jaduhñ coo mmädiaacta'agy mgopcooty.

²³ Nej, maas páquiøch yø'ø mähdiøjc nnämä'awädä: “Tøøch miich mbojpa mgädieey nmämee'xy”, tøgä maas páquiøch jaduhñ nnämä'awädä “Tänaayyø'øg, yo'oyø'øg.”

²⁴ Mhuug híxäp hajxy nébiøch hädaa mähdiøjc nyajmøcpøga'añ. Jaduhñ hajxy mna-juø'øwät cooçhä cuhdujt jaduhñ nmøødä hädaa yaabä naaxwiin cooçhä pojpa cädieey jaduhñ nmée'xät, høøch ja'a Diosquexypä.

Mänitä mähdiøjc ñämaayyä:

—Tänaayyø'øg; widsø'øg yø'ø mdsaay; nøcxnä maa ja'a mdøjcän.

²⁵ Mänitä ja'a mähdiøjc jaduhñ tiänaayyø'cy maa ja'a wyiinduumhajxiän. Mänitä tsaay wyidsø'cy maa hänajty tøø quio'na'ayän. Mänit ñøcxnä maa ja'a tiøjcän. Mänitä Dios Dioscujú'uyäp miooyy.

²⁶ Mänit hajxy nägøxiä jiaanç tehñ yagjuøøyy. Jaanç tehñ chähgøøyy hajxy jaduhñ. Mänitä Dios Dioscujú'uyäp hajxy miooyy. Mänit hajxy miänaañ:

—Tøødsä hoy-yagjuøøñäbä hajxy nhíxäm jäda'a.

²⁷ Mänitä Jesús wyiimbijnä. Mänitä jäya'ay tu'ug yhijxy, ja'a Levíhajpä. Jimä Leví hänajty yhäñ'ay maa hajxy hänajty yajnähjuudiu'udiän. Je'e ja'a Leví hänajty tiuunghajpy. Mänitä Jesús ja'a Leví ñämaayy:

—Høøch pamínäc.

²⁸ Mänitä Leví tiänaayyø'cy, pianøcxy ja'a Jesús. Cøjx jaduhñ ñähgue'egy mäduhñtiä hänajty miøødä.

²⁹ Mänitä Leví ja'a xøø yagjajtä maa ja'a tiøjcän ja'a Jesúscøxpä. Jiibiä yajnähjuudiuutpähajxy hänajty nämay miägaabiä møødä wiinghäna'c-hajxy.

³⁰ Jiibiä fariseoshajxy hänajty miägaabiä møødä ley-yajnähixøøbiähajxy. Mänitä Jesús jiamiøødhajxy ñämaayyä ja'a fariseoshajxy:

—Tii yø'ø yajnähjuudiuutpä hajxy coo mmøødcay coo mmøødhu'ugy. Haa ca'a, jue'e yø'ø hajxy, pojpäya'ay cädieejäya'ayhajxy jaduhñ.

³¹ Mänitä Jesús yhadsooyy:

—Pøn møc, cab hajxy yajtsooyø'øy. Pøn pa'ammøød, je'eds hajxy yajtsooyøøby.

³² Jaduhñ mäwínäts høøch ja'a pojpäya'ay cädieejäya'ay nyajnähwa'açh nyajcuhwa'açh. Pero mijts jaduhñ mänaamb cooc tyijy pojpa cädieey hajxy mga'a møødä. Páadyhøch mijts waamb nga'a nämä'ay.

³³ Mänitä Jesús hajxy ñämaayy:

—Ja'a Juan jiamiøødhajxy, naxy hajxy yhity hayuu; naxiä Dios hajxy pia'ya'axy. Jaduhñä fariseos jiamiøødhajxy naxy quiudiuumbä. Pero miich mjamiøødhajxy, nä'a caaby nä'a huucp hajxy je'e. Cab hajxy yhity hayuu. Cab jaduhñ yhooyä.

³⁴ Mänitä Jesús miänaañ:

—Coo ja'a pøc hu'ug maa jiadyii, cabä woybä wichpähajxy hayuu wyiimbity. Jaduhñ mäwínäts høøch nebiä jamiø'ødän ja'a pøgaambä. Páadyhøch njamiøødhajxy hayuu quia'a hity.

³⁵ Habaadäännäp jaduhñ cooçh yaa ndsoonaannä. Mänítøch njamiøødhajxy yhida'añ hayuu mabøcypä.

³⁶ Mänitä Jesús jadähooc wyiingapxøøguiumbä:

—Cabä tucwit pøn yhagøyø'øy jemýwyithaam. Cøødsäp ja'a jemýwyit jaduhñ; cab jaduhñ ñibiaada'añii møødä tucwit.

³⁷ Jaanä jaduhñduhmbä, cabä jemývyino pøn quiudemø'øy ja'a tucwajhacxujiooty. Cøødsäp ja'a tucwajhacxuy jaduhñ; høxyógäp ja'a vino jaduhñ. Haagä tägóyyäp ja'a tucwajhacxuy jaduhñ møødä vino.

³⁸ Pero jiibiä jemývyino hajxy quiudemø'øy ja'a jemýwiajhacxujiooty. Cab jaduhñ tii mia'ady, ni ja'a jemývyino, ni ja'a jemýwiajhacxuy.

³⁹ Cabä jemvyvino pøn hoyhuucnä jäwø'øy coo ja'a vino hänajty tøø yhu'ugy ja'a tehm jiecypä. “Maas hoyhuucnä ja'a jecyvyino” —nømä jäya'ayhajxy miäna'añ.

6

¹ Mänitxøø ja'a Jesús hajxy hänajty wiädity trigoni'ibyquiujc. Poo'xxiøøjooty hänajty je'e. Mänitä jiamiøød ja'a trigo hajxy tiøjy. Mänit hajxy ñähxajtstuuty. Mänit hajxy jiøø'xy.

² Mänitä fariseoshajxy näje'e miänaañ:

—Cabä cuhdujt jaduhñ myiñ coo hajxy jaduhñ mdúnät ja'a poo'xxiøøjooty.

³ Mänitä Jesús miänaañ:

—Nej, cahnä ja'a Diosmädia'agy hajxy mgapxiä nebiä David tiuuñ coo hänajty yäho'ogyii møødä jiamiøødhajxy.

⁴ Mänit hajxy jiiby tiägøøyy tsajtøgooty. Mänitä tsajcaagy hajxy quiaaay ja'a teedyhajxy hänajty tøø quiuyoxó'øyäbä. Cabä David ja'a cuhdujt hajxy hänajty miøødä coo hajxy jaduhñ quiáyät. Jagooyä teedy ja'a cuhdujt hajxy hänajty miøødä coo hajxy quiáyät.

⁵ Høøch ja'a Diosquexypä, jadúhñhøch høøchpä, nmøødhøch ja'a cuhdujt jaduhmbä høxtä maa ja'a poo'xxiøøbaadiän —nømä Jesús miänaañ.

⁶ Jatu'ugpä poo'xxiøøjootypä ja'a Jesús tiägøøyy tsajtøgooty. Mänit tiägøøyy yajwiin-gapxøøbiä. Jiibiä mähdiøjc hänajty tu'ug hadu'ugcø'ødø'ødspä ja'a yhaooyhaampiä.

⁷ Jiibiä fariseoshajxy hänajty tiäna'ay møødä ley-yajñähixøøbiähajxy. Jiibiä Jesús hajxy hänajty wyl'i yheeby. Yhijxmajchp ja'a Jesús hajxy hänajty pø yajnaxaambiä pa'am ja'a poo'xxiøøjooty. Yhøxtaabiä fariseos ja'a wiinmahñdy hajxy hänajty nebiä Jesús hajxy yajtsumøøjät coo ja'a pa'amjäya'ay hänajty yajmøcpøgyii ja'a poo'xxiøøjooty.

⁸ Ja'a Jesús, ñajuøøby hänajty je'e nebiä fariseoshajxy hänajty tiajy miay. Mänitä Jesús ja'a mähdiøjc ñämaay ja'a hadu'ugcø'ødø'ødspä:

—Tänaayyø'øg, miñ huuc täna'aw cujc.

Mänit jiaançh tänaayyø'cy.

⁹ Mänitä Jesús ñämaay ja'a fariseoshajxy:

—Mijts nmäyajtøøby, nej, yejpiä Dios ja'a cuhdujt jaduhñ coo hajxy hoy ndúunämät ja'a poo'xxiøøjootiä, tøgä yejpiä cuhdujt coo hajxy haxøøg ndúunämät ja'a poo'xxiøøjootiä. Jaanä jaduhñduhmbä, nej, yejpiä Dios ja'a cuhdujt coo ja'a jäya'ay hajxy nyajñähwáatsämät ja'a poo'xxiøøjootiä, tøgä yejpiä cuhdujt coo jäya'ay hajxy nyajcuhdägóoyämät ja'a poo'xxiøøjootiä.

¹⁰ Mänitä Jesús ja'a jäya'ay wyiinhee'ppejty nägøxiä. Mänitä Jesús ja'a mähdiøjc ñämaay:

—Xajtøw yø'ø mgø'ø.

Mänitä quiø'ø jiaançh xajtøøyy. Mänitä quiø'ø hoy jiajnä.

¹¹ Mänitä fariseoshajxy jiootma'ty hoyhoy. Mänit hajxy quiojyquiapxyhajty nebiä Jesús hajxy tiuna'añ.

¹² Cujaboomgumaaxc ja'a Jesús ñøcxy tunghduum. Tu'tsuhmä Tieedy pia'yaaxy.

¹³ Coo jioobøøyy, mänitä jiamiøødhajxy miøjyaaxy. Mänitä nämajmetspähajxy wyiimbiiwä coo ja'a Diosmädia'agy hajxy yajwá'xät.

¹⁴ Jaduhñdsä nämajmetspähajxy hänajty xiøhaty: Simón, ja'a Jesús hänajty tøø yajxøbétiäbä Pedro, møødä piuhya'ay Andrés, møødä Jacobo, møødä Juan, møødä Felipe, møødä Bartolomé,

¹⁵ møødä Mateo, møødä Tomás, møødä Jacobo, ja'a Alfeo yhuung, møødä Simón ja'a celote,

¹⁶ møødä Judas, ja'a Jacobo yhuung, møødä Judas Iscariote; je'e ja'a Jesús hänajty yajcø'ødägø'øwaamb ho'cøøc maa ja'a fariseoshajxiän.

¹⁷ Mänitä Jesús hajxy miänajnä tunghduum. Mänit hajxy hoy ñaaxoguiädaacnä. Jimä Jesús jiamiøødhajxy hänajty nämay. Jimä jäya'ayhajxy hänajty may tøø miech. Ja'a

Jesús miädia'agy hajxy hänajty yhamädoowhidáañäp. Yajnaaxáañäxäp ja'a pia'amhajxy hänajty. Jäguembaady hajxy hänajty tøø chooñ Judeanaaxooty, møødä Jerusalén, møødä mejypia'a jim Tiro møød jim Sidón.

18 Ja'a jäya'ayhajxy hänajty møjcu'uba'ammøødpä, yajnájxäxä ja'a pia'amhajxy je'ebä.

19 Nägøxiä ja'a Jesús hajxy hänajty ñähdona'añ. Mänitä pia'amhajxy yajnájxäxä ja'a Jesús miäjaahaam.

20 Mänitä Jesús wyiinhee'ppejty ja'a jiamiøødhajxy. Mänit miänaañ:

—Jootcuyc mijts mhity, mijts häyoobädøjc. Paady hajxy jootcuyc mhity coo hajxy jim mnøcxa'añ maa ja'a Diosän.

21 'Jootcuyc mijts mhity, mijts yajmaajiajpä. Paady hajxy jootcuyc mhity coo ja'a Dios hajxy cøxiä wiinä xmio'owa'añ.

'Jootcuyc mijts mhity, mijts jøøbiä xuu'tspä. Paady hajxy jootcuyc mhity coo hajxy mxi'ig mxoonda'aga'añ.

22 'Jootcuyc mijts mhity, hoy mijts jäya'ay xjia mähanhaty ja'a høøhcøxpä, hoy mijts jäya'ay xquia'a ja tsocy xquia'a ja mee'xy, hoy mijts xjia nänømy, hoy mijts xjia pexy.

23 Mxi'ig mxoonda'agäp hajxy jaduñ. Mbaadaambiä hoyhajt ja'a weenhajt hajxy jim tsajpootyp. Jaduñ hajxy jiajpä yhabejpä, ja'a Diosmädia'agy hajxy jecy tøø yajwá'xiäbä.

24 'Pero mijts mäyøøjäya'ayhajxy, ja'a tsaachpä hajxy mbaadaamby. Cab hajxy mxoonda'agaañnä neby hajxy hijty mxoonda'aguian.

25 'Hoy mijts tii hamaay mga'a ja juø'øy, myajmaajiadaamby hajxy jaduñ.

'Hoy mijts mja xi'igy mja xoonda'agy, pero mnä'ägädä jøøw mnä'ägädä xuudsaamb hajxy.

26 'Tsipecøxpä tsaachpä hajxy mbaada'añ, hoyyä cu'ug hajxy xjia cumay. Jaduñnä jäya'ayhajxy hijty yajcumay ja'a hajxy hijty jegyhajty nä'ä wädijpä hønndaacpä. Nä'ä mänaamb hajxy hijty jaduñ cooc tyijy ja'a Diosmädia'agy hajxy yajwa'xy.

27 'Huuc mädown hajxy, mdsógäp hajxy pøn jaduñ xmiädsiphajp hädaa yaabä naaxwiin; mmée'xäp hajxy pøn jaduñ xmiähanhajp.

28 Mmänuu'xtá'agäp ja'a Dios hajxy coo ja'a Dios ween mio'oy ja'a hoyhajt ja'a weenhajt pønjaty mijts jaduñ xyhäyoowhijxp, pønjaty mijts jaduñ haxøøg xñänøømb.

29 Coo pøn xyhatejxø'øgät tu'nax, mmøjcóogumbäp jadu'nax; ween jaduñ jadu'nax xjiaac tehñ yhatejxø'øgy. Coo pøn mjocxwit xpiójcät, mänitä mgamiixy mjaac tehñ mió'owät.

30 Coo pøn tii jaduñ xmiäyujwá'anät, mmó'owäp jaduñ. Y coo pøn tii xpiójcät, cab je'e mmäyujwaanägájtñät.

31 Jaduñds mijts wiinghäna'c mnäxúudsät nej mijts hänajty myajnäxuudsa'añän.

32 'Coo ja'a mmägu'ughajpähajtiä hajxy mmøødnijootpaadøøjät, cab hajxy tii mbáadät; jaduñdsä pojpyä'ay cädieejiäya'ayhajxy ñiçhójcäbä.

33 Coo hajxy jagooyyä mmøødniñäxuudsøøjät pønjaty jaduñ xñäxuu'tsp, cab hajxy tii mbáadät; jaduñdsä pojpyä'ay cädieejiäya'ayhajxy ñiñäxú'utsäbä.

34 Coo jagooyyä xädø'øñ hajxy myaghanú'xät pøn jaduñ mnajuøøby xmioodiägatsaamb pedyii, cab hajxy tii mbáadät; jaduñdsä pojpyä'ay cädieejiäya'ay xädø'øñ hajxy yajnimiähanú'xäbä. Ñajuøøby hajxy jaduñ coo hajxy pedyii mioodiägatsa'añii.

35 Mdsógäp hajxy pøn jaduñ xmiädsiphajp. Mnäxúudsäp hajxy jaduñ. Coo pøn xädø'øñ xmiäyujwá'anät, mnä'ä mó'owäp jaduñ. Mänitä hoyhajt ja'a weenhajt hajxy mbáadät may. Mänitä Dios hajxy xyhuunghädät jim tsajpootyp. Hix, Dios, ñäxuu'chp ja'a jäya'ayhajxy høxtä ja'a jäya'ayhajxy ja'a Dioscujú'uyäp hajxy quia'a yejpiä, møød ja'a hojioot hajxy ca'a møødpä.

36 Mmøødhädäp ja'a hojioot hajxy jaduñ nebiä nDeedy hojioot miøødhájtäm.

37 'Cabä wiinghäna'c hajxy mnähójt coo ja'a Dios hajxy xyajcumädówät. Pero mmámée'xäp hajxy jaduhñ; mänitä Dios hajxy jaduhñ xmiämée'xpät.

38 Mäduhñtiä wiinghäna'c hajxy mmo'oy, nä'ä tågø'øbä hajxy mbaattägatsa'añ.

39 Jaduhñhøch mijts nyajmäbáadät nebiä wiindspän. Coo ja'a wiindspähajxy ñiwyitswädityii, tsipcøxp hajxy jiutca'ay. Paady mijts jaduhñ mga'a wädítät nebiä wiindspän.

40 Cabä capxtaacpäna'c-hajxy jiaty jaty nebiä wyiindsøñhajxy jiatiän. Coo hajxy nägø'ø nädecypiä quiapxtá'agät, mänit hajxy jaduhñ ñajtspaadó'øwät.

41-42 'Coo ja'a mmägu'ughajpä weeñtiä quiádiéeyät, y coo miich hänajty maas hanaxiä tøø mgädieey, cabä mmägu'ughajpä hawiinmats waamb mnä'ägädä nämá'awät. Coo miich hänajty tøø mnähwa'ačh, mänitä mmägu'ughajpä hawiinmats mwiingapx mjøjcaxó'øwät.

43 'Mädyii quepychaa pa'ag nä'ägädä tøømbejp, ni mänaa ja'a tiøøm quia'a xunä. Jaanä jaduhñduhmbä, mädyii quepychaa xunä nä'ägädä tøømbejp, ni mänaa ja'a tiøøm quia'a pa'agø'øy. Tøyhajt jaduhñ.

44 Mnajuøøby hajxy jaduhñ mädyii quepychaa hoy tøømhajp. Ja'a hapy, cab jaduhñ tiøømhaty nebiä piidsän. Y ja'a wädsats, cab jaduhñ tiøømhaty nebiä tsaatypän.

45 Jaduhñ mäwíinädsä hojiäya'ay ja'a howyiinmahñdy miøødä. Hoy jaduhñ wiädity. Pero ja'a ca'awiindøjiäya'ayhajxy, cabä howyiinmahñdy hajxy miøødä. Haxøøgwiinmahñdy hajxy miäwädiipy. Haxøøg hajxy jaduhñ ñä'ägädä capxy ñä'ägädä mädia'agy.

46 'Wiindsøñhøch mijts xwyi'i ñäma'ay; pero cab hajxy jaduhñ mgudiuna'añ nébiøch mijts nja hane'emiän.

47 Pøñhøch nmädia'agy xmiädóowäp, pøñhøch nmädia'agy xmiäböjcäp, jaduhñ mäwíinäts je'e

48 nebiä jäya'ay tiøjcojjiän. Cøøc jaduhñ tiajøøyy. Tsaawiing jaduhñ miuu'tsø'cy. Coo ja'a nøøgomdägoy quiädaacy, coo ja'a tøjc jaduhñ ñøøñahgoombejty, cab jaduhñ piädø'cy, je'eguiøxpä coo hänajty cøøc miuu'tsø'øguiä.

49 Pero pøñhøch nmädia'agy jaduhñ xquia'a mäböjcäp, jaduhñ mäwíinäts je'e nebiä jäya'ay tiøjc cøøc quia'a muu'tsø'quiän. Coo ja'a tøjc ñøøñahgoombejty, pädø'c jaduhñ; cøjx jaduhñ quiäday.

7

1 Coo ja'a Jesús miädiaacpädøøyy, mänit quiajptägøøyy Capernaum.

2 Jimä soldadowiindsøñ hänajty tu'ug. Roma hänajty chooñ. Tøø ja'a mioonsä hänajty tu'ug pia'ambety. Jaduhñ hänajty jiäwø'øy nebiä yhamdsoo puhya'ayän. Nä'ägädä ho'ogäännäp hänajty je'e.

3 Coo ja'a soldadowiindsøñ miädoyhajty coo ja'a Jesús ja'a pa'amjäya'ay hänajty yajmøcpøcy, mänitä majtøjc näje'e quiejxy maa ja'a Jesúsän. Judíos hajxy je'e.

4 Mänitä Jesús hajxy hoy miänuu'xta'agy coo ja'a pa'amjäya'ay ween nøcxy yajmøcpøcy. Mänitä Jesús ñämaayyä:

—Ja'a soldadowiindsøñ, hojiäya'ay je'e. Hahixøøby jaduhñ coo mbuhbédät.

5 Xhöjcäm hajxy jaduhñ. Tøø højts ndsajtøjc xyajcójjam.

6-7 Mänitä Jesús ja'a majtøjc miøødtu'ubøjcy. Ja ween hajxy hänajty quia'a coody maa ja'a soldadowiindsøñ tiøjcän, mänitä soldadowiindsøñ ja'a Jesús capxy yajnäguejxy:

—Wiindsøñ, jaduhyyä mmäná'anät cooçh nmoonsä miøcpøgät. Cábøch cuhdujt nmøødä nej miich cuhdujt mmøødän; paady jaduhñ caj yhawiinmatsä coo mdägó'øwät maačh ndøgootiän. Päädyhøch miich hamdsoo tøø nga'a mägapxy.

⁸ Hix, hané'emyhøch nhity; y cooch nsoldado howiaambä nhané'emät móødhøch nmoonsä, xquiudiúunäbøch nmädia'agy hajxy —nømä soldadowiindsøn ja'a Jesús quiapxyñäguejxy.

⁹ Jaanč tehñ yagjuøøyy ja'a Jesús jaduñ coo jaduñ ñämaayy. Mänitä cu'ug wyiinhee'ppejty. Mänit miänaañ:

—Cábøch nmägunaaxhajxy jaduñ miäbøcy nej yø'ø craa miäbøquiän, y jäguem chooñ.

¹⁰ Ja'a majtøjc hänajty tøø quiexyíjábä maa ja'a Jesúsän, mänit hajxy wyiimbijnä. Coo hajxy miejtstägajch maa ja'a soldadowiindsøn tiøjcän, tøø ja'a soldadowiindsøn mioonsä hänajty miøcpøjnä.

¹¹ Mänitä Jesúshajxy ñøcxy maa ja'a cajpt hänajty xiøhatiän Naín møødä miägu'ughajpähajxy. Nämäyvä jäya'ayhajxy hänajty pianøcxy.

¹² Jim hajxy hänajty miäwiingoñ cajtpa'a, mänitä ho'ogyjiäya'ay hajxy hoy jiojçubaadø'øy. Cabäsantä hänajty nøcxy ñaaxtägø'øy. Tu'ughuung hänajty je'e. Yaamgto'oxy ja'a tiaj je'ebä. Majiäya'ay hänajty panøcxp.

¹³ Coo ja'a Jesús ja'a yaamgto'oxy yhijxy, mänit ñäxuu'ch. Mänit ñämaayy:

—Ca'a mjø'øy ca'a mxuuč.

¹⁴ Mänitä Jesús miänaañ coo hajxy yhuuc yaghahíxät. Mänitä cøøbiädøjc-hajxy tiänaaxiojpy. Mänitä Jesús ja'a ho'ogyjiäya'aguiajä hoy ñähdoñ. Mänitä ho'ogyjiäya'ay ñämaayy:

—Jexy, pädø'øg.

¹⁵ Mänitä craa yhäñaayyø'cy. Mänit quiapxø'cy. Mänitä tiaj miødhajnä.

¹⁶ Mänitä jäya'ayhajxy nägøxiä jiaanč tehñ yagjuøøyy. Mänitä Dios hajxy ñämaayy:

—Dioscujú'uyäp.

Mänit hajxy ñiñämaayyä:

—Diosquexy yø'ø craa. Møj jaanč yø'øduñ. Paadiä Dios tøø quiexy, piuhbedaamby ja'a quiu'ug jaduñ, ja'a hajxy hädaa yaabä naaxwiimbä.

¹⁷ Mänitä mädia'agy tiägøøyy wädiäpä jim Judeanaaxooty coo ja'a Jesús ja'a ho'ogyjiäya'ay tøø yagjujypiøcy. Wiinduhmyhagajpt ja'a mädia'agy jaduñ wiädiäty.

¹⁸ Ja'a Juan, tøø je'e hänajty chumyii. Coo ja'a miägu'ughajpähajxy miädoyhajty nebiatiä Jesús hänajty tiuñ, mänitä Juan hoy yhawáañäxä.

¹⁹⁻²⁰ Mänitä Juan ja'a miägu'ughajpähajxy metsc miøjyaaxy. Mänit hajxy quiejxä maa ja'a Jesúsän. Coo hajxy jim miejch, mänitä Jesús hajxy ñämaayy:

—Juan mäyajnäbejpä højts tøø xquiexy coo højts miich nmäyajtówät pøn miich. Nej, miich ja'a Dios hijty jaduñ xquiexaambä, tøgä wiinghäna'c je'ejä.

²¹ Jimä Jesús ja'a pa'amjäya'ay hänajty yajmøcpøcy. Madiu'u ja'a pa'am hajxy hänajty miøødä møødä mõjcu'u. Møødä wiindspähajxy hänajty nämay yaghijxø'øgyii.

²² Mänitä Jesús yhadsooyy:

—Nøcxä Juan hajxy hawaanä nebiaty hajxy yaa mhixy mmädoy. Hijxø'p ja wiindspähajxy, yo'oyø'p ja'a tecymia'adpähajxy, nähwaatsp ja'a haxøøgpa'ammøødpähajxy, mädooowø'p ja'a cuhnatpähajxy, jujyipiøjp ja'a ho'ogyjiäya'ayhajxy, yajwiingapxøøyyäp ja'a häyoobäya'ay ja'a Diosmädia'agy hajxy.

²³ Pøñjátyhøch nmädia'agy xmiäbøjçäp tehngajnä, jootcujc hajxy jaduñ ñijiäwø'øyii —nømä Jesús miänaañ.

²⁴ Coo ja'a Juan miägu'ughajpähajxy wyiimbijnä, mänitä Jesús miänaañ:

—Coo hajxy tøø mhoy pactuum, Juan miädia'agy hajxy hänajty mmädowáañäp, túhmäts. Cabä tsajcapy pojyu'xpä hajxy hoy mhixy. Caj pues, paady hajxy jim tøø mhoy coo ja'a Juan ja'a miädia'agy hajxy hänajty mmädowáañä.

²⁵ Diosquexy je'e, paady hajxy hoy tøø mmädooowä, hoyyä howyit je'e quia'a ja møødä nebiä mäyøøjäya'ayhajxy miøødän.

26 Tøyhajt jaduhñ coo ja'a Juan ja'a Diosmädia'agy yajwa'xy. Maas may ja'a Dios ja'a Juan cuhdujt tøø mio'oy quejee ja'a jäya'ay ja'a Diosmädia'agy hajxy jecy yajwá'xäbä.

27 Ja'a jäya'ay ja'a Diosmädia'agy jecy nägápxäbä, Juan je'e. Jaduhñä Dios jecy miänaañ coo ja'a quiuguexy hänajty jayøjp quiexa'añ coo ja'a cu'ug ween yajwiinxiic yajwiin-gapxø'oy coo ja'a yhaxøøgcuhdujt hajxy ñajtshixø'owät. Høxháamhøch hijty ngäda'aga'añ. Jayøjpä Juan quiejxä; høxháamhøch njaançh cädaacy.

28 Ni pøn jaduhñ jäda'ahaty quia'a mäbaady hädaa yaabä naaxwiin nebiä Juan mäyajnäbejpä ja'a cuhdujt miøødän. Tøyhajt jaduhñ. Pero cooçh hänajty tøø nho'nä, cooçh hänajty tøø nnøcxtägach maaçh nhuuc tsohm̄bän, pønjaty ja'a Diosmädia'agy hänajty mäbøgaamb ja'a høøçhcøxpä, maas may ja'a cuhdujt hajxy hänajty miøødhada'añ quejee ja'a Juan jäda'ahaty miøødän, hoyyä møjcuhdujt hajxy hänajty quia'a ja møødä.

29 Coo ja'a cu'ughajxy jaduhñ miädooyy møødä yajnähuudiutpädøjc-hajxy, mänitä Dios hajxy quiapxpaaty coo yhooyä, je'eguiøxpä coo hajxy hänajty tøø yajnäbetyii ja'a Juángäm.

30 Pero ja'a fariseoshajxy møødä ley-yajnähixøøbiähajxy, cab hajxy hänajty tøø yajnäbetyii ja'a Juángäm. Paadiä Dios hajxy quia'a jøjpøgøøyy. Cabä jioot hajxy hänajty chocy coo hajxy yajnähwa'adsøøjät ja'a Diósäm.

31 Mänitä Jesús miänaañ:

—Nhuuc yajmäbáadyhøch ja'a jäya'ayhajxy jäda'ahatypä.

32 Cab hajxy tii yhojiäwø'øwa'añ. Jaduhñ mäwíinäts hajxy je'e nebiä pigäna'c-hajxy wiinhecpän. Coo hajxy naxy miech häyø'pä tøjpa'c, mänitä miäbigäna'c hajxy ñäma'ay: “Tøø højts nja xu'uxy, pero cab hajxy tøø mhech. Tøø højts hojiøøñä nja høy, pero cab hajxy tøø mjø'øy.”

33 Hoorä, coo ja'a Juan mäyajnäbejpä miejch, cabä tsajcaagy hänajty quiaya'añ, ni ja'a vino hänajty quia'a hu'uga'añ. Y mijts jaduhñ mänaamb coo quiuhmäñø'oy.

34 Y cooçh nnamejtspä, høøch ja'a Diosquexyypä, mänitøch ndägøøyy caabiä huucpä. Jaduhñch mijts xñänøømbä cooçh nwi'i quiaya'añ, cooçh nwi'i yhu'uga'añ, cooçhä pojpyä'ay cädieejiäya'ay nmägu'ughaty møødä yajnähuudiutpädøjc.

35 Pønjaty ja'a Dios jaançh jahmiejtsp, yajcähxø'py hajxy jaduhñ coo ja'a Dioswiin-mahñdy hajxy miøødä.

36 Mänitä fariseo ja'a Jesús tu'ug hoy wioy caabiä. Simón hänajty xiøhaty. Mänit hajxy yhäñaaguiädaacy caabiä maa ja'a Simón tiøjcän.

37 Mänitä to'oxiøjc tu'ug miejch cuhhiñbä. Haxøøgcuhdujt hänajty miøød. Tøø hänajty miädoyhaty coo ja'a Jesús jiiby tøø miech maa ja'a Simón tiøjcän. Perfume quionmejts alabastrofrascooty.

38 Mänit tiägøøyy jøøbiä. Mänitä Jesús tiecypuijy wyiinnøøhaam. Mänit tiecymieexy quiuhwaayhaam. Mänit tiecychu'xy. Mänit tiecyñähjahxy perfumehaam.

39 Mänitä Simón tiägøøyy tajpä maabiä: “Coo ja'a Jesús häxøpy quiunajuøhñdiä, tøø häxøpy ñajuø'øy coo yø'ø to'oxiøjc quiuhhiñä.”

40 Mänitä Jesús ja'a Simón ñämaayy:

—Simón, tsøg mädiäacäm.

Mänitä Simón yhadsooyy:

—Wiindsøn, tsøc.

41 Mänitä Jesús miänaañ:

—Jimä jäya'ay hijty tu'ug miänuu'xyhadyii jäya'ay metscä. Tu'jäya'ay hänajty miänuu'xyhaty mägooxmägo'x denarios. Jatu'ug, juxychägui'xmajc.

42 Cab hajxy hänajty tii miøødä nebiä ñuu'xy hajxy yajnähwá'adsät. Mänit hajxy ñämaayy: “Weends yhity.” Hoorä, pønäda'a maas mädsógäp.

43 Mänitä Simón yhadsooyy:

—Jue'eda'a, ja'a craa ja'a ñuu'xy maas may hijty miøødpä.

Mänitä Jesús miänaañ:

—Je'e pues.

⁴⁴ Mänitä Jesús ja'a to'oxiøjc miøjhee'py. Mänitä Simón ñämaayy:

—Cooch yaa ndägøøyy maa miičh mdøgootiän, cábøch miičh nøø tøø xmio'oy cooch ndecypiújät. Jaduhñ hajxy naxy nguhdujthájtäm. Pero yø'ø to'oxiøjc, wyiin-nøøháamhøch ndecy tøø xpiujjä, quiuhwaayháamhøch ndecy tøø xmieexä.

⁴⁵ Cábøch miičh tøø xchu'xy, pero yø'ø to'oxiøjc, tehngájnøch ndecy xwyi'i chu'xä.

⁴⁶ Cábøch miičh ja'a nguhwaay tøø xyhoonä. Jaduhñ hajxy naxy nguhdujthájtäm. Pero yø'ø to'oxiøjc, perfumeháamhøch ndecy tøø xyhoonä.

⁴⁷ Xjiaančh tehñ chójppøch yø'øduhñ; paadiä piojpä quiädieey yajñähwáatsäxä, hoy hijty may jia møødä. Pero pønä pojpä cádieey hijty ca'a jaty møød, cábøch jaduhñ xjiaty wiingudsähgø'øyy.

⁴⁸ Mänitä Jesús ja'a to'oxiøjc ñämaayy:

—Tøøch miičh ja'a mbojpä mgädieey nyajñähwáatsäm.

⁴⁹ Ja'a hajxy hñajty jiiiby pahäñaabiä, mänit hajxy tiägøøyy niñámáayyábä:

—Maa ja'a cuhdujtäda'a tøø yhuuc paatpä coo ja'a pojpä cádieey yajñähwa'ačh.

⁵⁰ Mänitä Jesús ja'a to'oxiøjc ñämáaguiumbä:

—Cooch nmädia'agy tøø xmiäbøjcä, páadyhøch ja'a mbojpä mgädieey tøø nya-jñähwa'ačh. Nøcxnä jootcujc.

8

¹ Mänitä Jesús hajxy tiägøøyy wädijpä wiinduhmyhagajpt møødä jiamiøødhajxy ja'a nämajmetspä. Diosmädia'agy-yajwa'xpä hajxy hñajty wiädity. Jaduhñä Jesús hñajty miäna'añ cooc ja'a Dios ja'a miäjaa hñajty yajcähxø'øgaanä.

² Quipxiä to'oxiøjc-hajxy hñajty nämay piawädijpä, ja'a Jesús hñajty tøø yajp'amnáxiäbä, møød ja'a møjcu'u hajxy hñajty tøø yajñähwa'ačhíjábä. Paadiä Jesús hajxy hñajty piawädity, mioobiä Jesús hajxy hñajty tijaty je'e hñajty miäjuggyhajpy. María ja'a to'oxiøjc hñajty tu'ug xiøhaty ja'a Magdalatsohmä. Juxtujc ja'a møjcu'u hñajty tøø yajñähwa'ačhi.

³ Jatu'ug hñajty xiøhaty Juana, ja'a Cuza tio'oxiøjc. Ja'a Cuza hñajty copc-hajp maa ja'a Herodes hñajty yhane'emiän. Møødä Susana hñajty piawädijpä.

⁴ Mänitä Jesús jäya'ay may ñänøcxä. Mayhagajpt hajxy hñajty choon. Coo hajxy hñajty may tøø yhamugø'øyy, mänitä Jesús tiägøøyy yajwiingapxøøbiä yajmäbaadyhaam:

⁵ —Mänitä jäya'ay tu'ug tiu'ubøjcy niippä. Coo ja'a tøømd tiägøøyy wøjpä, näje'e ja'a tøømd quiahy tu'haam. Mänitä muuxyhajxy hoy yajpädø'øgy. Mäduhñtiä ja'a muuxyhajxy quia'a yajpädø'cy, je'edsä jäya'ay jiaac yajtehñ.

⁶ Näje'e ja'a tøømd quiahy tsaanähgøxp. Ja mujx je'eduhñ, pero tøøts. Hix, weeñtiä ja'a naax jim tsaanähgøxp.

⁷ Näje'e ja'a tøømd quiahy haptiooty. Ja mujx je'eduhñ. Ja yee'c, pero caj ñä'ä tøømbejty. Hix, ja'a hapy je'e xaam.

⁸ Näje'e ja'a tøømd quiahy maa ja'a hoñaaxän. May je'e tiøømhajty høxtä mägo'xhaam.

Mänitä Jesús møc miänaañ:

—Pøn hädaa wiinjuøøby, wéenhøch hädaa nmädia'agy xmiäbøjcä.

⁹ Mänitä Jesús miäyajtøøwä neby jaduhñ miädia'agytiägø'øyy. Ja'a miägu'ughajpähajxy jaduhñ yajtøøw.

¹⁰ Mänitä Jesús yhadsooyy:

—Chojpiä Dios jioot jaduhñ coo mijts mwiinjuø'øwät nebiä miäjaa yajcähxø'øga'añ. Pero ja'a häna'c-hajxy jaac yaabä, cabä Diosmädia'agy hajxy tiu'jooottsocy. Hoyyä mädia'agy hajxy jia mädoy, pero cab hajxy wyiinjuø'øyy tii jaduhñ jia mädiaacyy.

11 Jaduhnds miädia'agytiägø'øy nébiøch hajxy tøø nyajwiingapxø'øyän. Jaduhndsä tøømd miäbaady nebiä Diosmädia'aguiän.

12 Ja'a tøømd cáhwäbä tu'haam, jaduhñ miäbaady nebiä jäya'ay ja'a Diosmädia'agy hajxy jia mädoyyän. Coø ja'a møjcu'u miech, mänit hajxy wyiinhøøñii neby hajxy jaduhñ quia'a mäbøgät, nebiä piojpä quiädieeyhajxy jaduhñ quia'a nähwá'adsät.

13 Y ja'a tøømd cáhwäbä tsaanähgøxp, jaduhnds je'e miäbaatpä neby hajxy jia mädoyyän. Tu'habaquiä hajxy jaduhñ xioonda'agy. Pero cab hajxy hamuumdu'joot pianøcxy. Coø hajxy cøxypänejpiä tiuñii, mänit hajxy ñajtshixøøñä.

14 Y ja'a tøømd cáhwäbä haptiooty, jaduhnds je'e miäbaatpä neby hajxy jia mädoyyän. Pero cabä yhamdsoo cuhdujt hajxy ñajtshixø'øwa'añ møødä miäyøøhajt. Cabä Diosmädia'agy hajxy hoy quiudiuna'añ.

15 Y ja'a tøømd cáhwäbä hoñaaxooty, jaduhñ miäbaady nebiä Diosmädia'agy hajxy hamuumdu'joot mäbøjpän. Jaançh tehñ yhoy hajxy jaduhñ quiudiuñ.

16 'Coo jäya'ay jøøñ hajxy quiuhno'ogø'øy, cøxp hajxy yujcoñ neby hajxy quiudøø'xøøjät, ja'a hajxy tøjtägøøbiä. Cabä pøn jøøñ quiuhjupy, ni maabejtpa'c hajxy quia'a päda'agy.

17 Jaduhñ mäwíinäts mijts ja'a nmädiá'agyhøch hajxy xwyiinjuø'øwaanä, ja'a tsipjätypøch jaduhñ tøø nyajwiingapxø'øyäbä.

18 'Huuc wiinjuø'øw hajxy hoy. Pøñhøch nmädia'agy tøø xmiäbøjcä, njaac yajñähixø'øwáambiøch je'e. Pøñhøch nmädia'agy tøø xquia'a mäbøjcä, cábøch tii nyañähixø'øwaanä. Høxtä jiahdiägoyyaamby hajxy je'e mädyii tyijy ja'a tøø wyiinjuø'øy.

19 Mänitä Jesús ñämejtsä ja'a tiaj møødä piuhya'ayhajxy. Cab hajxy hoy tiehñ wyiingumedsoøyy, je'eguiøxpä coø ja'a jäya'ayhajxy hänäjty ñämayyä jiiby tøgooty maa ja'a Jesús hänäjtiän.

20 Mänitä Jesús ñämaayyä:

—Ximä mdajhajxy tøghaguuy møødä mbuhya'ayhajxy. Miiçh hajxy xjia wi'i miøødmädia'agaamb.

21 Mänitä Jesús miänaañ:

—Pønä Diosmädia'agy jaduhñ mäbøjp, pøn jaduhñ cudiumb, je'eçh ndajhajpy, je'eçh nbuhya'ayhajpy.

22 Miäwiinghoocpä ja'a Jesús hajxy tiägøøyy barcojooty møødä miägu'ughajpähajxy. Mänitä Jesús miänaañ:

—Jam hajxy jim mejyhawiimb.

Mänit hajxy jiaançh tu'ubøjcy.

23 Nøcxnä hajxy hänäjty jaduhñ, mänitä Jesús miaaho'cy. Mänitä poj møc piädø'cy. Mänitä nøø quiubojøøyy barcojooty. Hújtsnäp ja'a barco hänäjty.

24 Mänitä Jesús hajxy hoy yuxy. Mänit hajxy ñämaayy:

—Wiindsøn, Wiindsøn, pädø'øg, quinaambä barco cham.

Mänitä Jesús piädø'cy. Mänitä poj yhojy møødä nøø. Mänitä poj yuungøøyy. Moñdiucy jaduhñ jiajnä.

25 Mänitä Jesús ja'a miägu'ughajpähajxy ñämaayy:

—Tii hajxy coø mwi'i chähgø'øy. Nej, cab hajxy mnajuø'øyä coøch mijts homiänaajä ngüeendähada'añ.

Jaançh tehñ yagjuøøyy hajxy jaduhñ. Mänit hajxy hamiñ haxøpy ñiñämaayyä:

—Pønäda'a yø'øduhñ coø ja'a miädia'agy miäbøjcäxä ja'a poj møødä nøø.

26 Mänit hajxy miejyhawiimpädsøømnä jim maa ja'a naax hänäjty xiøhatiän Gadara, jim jaduhñ mejyhawiimpä maa ja'a Galileanaaxootiän.

27 Coø ja'a Jesús biarcopädsøømy, mänitä jäya'ay tu'ug miejch Jesús wyiinduum, ja'a jim cajptooty tsänaabiä. Tøø hänäjty jiegø'øy mänaa ja'a mähdijc møjcu'u hänäjty tøø

ñämečhiijän. Cabä wit hänajty miøødhajnä, ni quia'a häña'ay hänajty tøgooty. Jim hänajty yhity maa ja'a cabäsantän.

²⁸ Coo ja'a Jesús yhijsy, mänit wyiinjiicädaacy. Mänitä møjcu'uhajxy yaaxy:

—Jesús, tii højts xwia'ana'añ. Dios miich xyHuunghajp ja'a tsajpootypä. Tunä mayhajt, ca'a højts jii by xquiexy maa jiaanč tehñ chaachpä.

²⁹ Paadiä mähdiøjc jaduhñ yaaxy, je'eguiøxpä coo ja'a Jesús ja'a møjcu'u hänajty tøø yhane'emy coo ñähwa'adsøøjät. Mayhooç ja'a mähdiøjc hänajty tøø ñämečhiijä ja'a møjcu'ujäm. Paadiä jäya'ayhajxy hänajty jia wi'i yaghida'añ cø'øxoch tecyxioch cadena-haam neby jaduhñ hoy yhidät. Pero nimiäpodøøyyäp hänajty je'e, y yajnøcxäp hänajty pactuum ja'a møjcu'ujäm.

³⁰ Mänitä Jesús ja'a mähdiøjc miäyajtøøyy:

—Tii mxøhaty.

Mänit yhadsooyy:

—Legiónhøch nxøhaty.

Paady jaduhñ miänaañ coo ja'a møjcu'u hänajty may miøødä.

³¹ Mänitä møjcu'u ja'a Jesús hajxy miänuu'xtaacy coo hajxy jii by quia'a quexøøjät møjcu'uhaam maa jiaanč tehñ chaachpä.

³² Jimä mayhädsøm hänajty yuemy tunmøjc. Mänitä møjcu'u ja'a Jesús hajxy miänuu'xtäaccumbä coo hajxy jim quieyxøøjät maa ja'a mayhädsøm hänajtiän. Mänitä Jesús cuhdujt miooyy.

³³ Mänitä mähdiøjc ja'a møjcu'u ñähwáatsänä. Mänitä hädsømhajxy hoy ñämečhiijä. Mänit hajxy wyiinmänacpäyø'cy. Mänit hajxy quihgahnajxy naaxøjpcøxp mejjiooty. Jii by hajxy cøjx ñøøho'ogø'øy.

³⁴ Coo ja'a hädsømguëendähajpähajxy jaduhñ yhijsy, mänit hajxy piäyø'cy. Mänitä cu'ug hajxy hoy yhawaanä cajptooty møødä cajtpa'a.

³⁵⁻³⁶ Mänitä cu'ughajxy hänajty nøcxy yhixa'añ neby hänajty tøø jiadyiijän. Mänit hajxy miehch maa ja'a Jesús hänajtiän. Jiibiä mähdiøjc ja'a Jesús hänajty wyiinhäña'ay, ja'a møjcu'u hänajty tøø ñähwa'ačhiijäbä. Tøø wit hänajty piägøøñä. Tøø hänajty wyiin-mahñdymejtsnä. Coo ja'a cu'ughajxy jaduhñ yhijsy, mänit hajxy chähgøøbiøjcy. Paady hajxy chähgøøyy, haxøøgjäya'ay tyijy ja'a Jesús. Mänitä cu'ughajxy yhawáanaxä nebiä mähdiøjc ja'a møjcu'u hänajty tøø ñähwa'ačhiijän. Ja'a hajxy hänajty tøø yhiixiäbä, je'e hajxy jaduhñ nägapx.

³⁷⁻³⁹ Mänitä Jesús hajxy tiägøøyy mänuu'xtaacpä coo jim choonät Gadara. Hix, jaanč tehñ chähgøøby hajxy hänajty. Jim tyijy ja'a Jesús cøxypänejiä jiaac jatcø'øwa'añ. Ja'a mähdiøjc hänajty tøø ñähwá'ačhäbä, mänitä Jesús miänuu'xtaacy coo cu miødhajty. Mänitä Jesús yhadsooyy coo miähmø'øwät maa quiajptän:

—Nøcx maa ja'a mdøjcän; mädia'ag nebiaty ja'a Dios tøø xpiuhbety.

Mänitä craa jiaanč nøcxy, miädiaacy jii by cajptooty nebiaty hänajty tøø piuhbedyijäm ja'a Jesús. Mänitä Jesús biarcotägøøñä, wyiimbijnä.

⁴⁰ Coo ja'a Jesús jim miejtstägajch mejyhawiimb, jimä cu'ughajxy hänajty yhahixy. Mänit hajxy xioondaacy.

⁴¹ Mänitä jäya'ay tu'ug miehch ja'a xøhajpä Jairo. Tsajtøjwiindsøn hänajty tiuumby. Mänitä Jesús wyiinjiicädaacy. Mänit miänuu'xtaacy coo ñøcxät maa ja'a tiøjcän.

⁴² Jimä Jairo yhuung hänajty yho'ogaanä. Tiu'ughuung hänajty je'e. Majmetscjomøjt ja'a to'oxyhäna'c hänajty miøødä. Mänitä Jesús tiu'ubøjcy. Mayyä jäya'ayhajxy piadu'ubøjcy, høxtä yhanø'tsmujpy ja'a Jesús hajxy hänajty.

⁴³⁻⁴⁴ Mänitä Jesús ja'a tajiäya'ay tu'ug jioGuyohdiägøøyyä. Pa'ammøød hänajty je'e. Majmetscjomøjt ja'a pa'am hänajty tøø miähäyoy. Ñø'ty hänajty wi'i xiee'xp, pero weenjaty weenjaty. Ni pøn hänajty quia'a najuø'øy nebiä choomiäyät. Mänitä Jesús wyitpa'a ñähdooñäxä. Mänitiä ja'a tajiäya'ay ñø'ty yhadujnä.

⁴⁵ Mänitä Jesús miänaañ:

—Pónhøch xñähdoñ.

Ni pøn quia'a mänaañ coo hajxy ñähdoñ. Mänitä Pedrohajxy miänaañ:

—Wiindsón, xjiaančh tehñ yhanø'tsmujp miich ja'a cu'ug. Tii nyajnajuoøyyäm pøn tøø xñähdoñ.

⁴⁶ Mänitä Jesús miänáangumbä:

—Nnajuøøbiøch coo pøn tøø miäbaadø'øy høøch nmäjaahaam. Páadyhøch jaduhñ tøø nnä'ä najuø'øy cooch hajxy tøø xñähdoñ.

⁴⁷ Mänitä tajiäya'ay jaduhñ ñajuøøyy coo ja'a Jesús hänajty ñajuø'øy coo je'e hänajty tøø miänähdoñ. Mänitä Jesús wyiingumedsøøyy tsäyúuyyap. Mänitä Jesús wyiinjiicädaacy. Mänit ñägapy cu'ughagujc cooc ja'a Jesús wyit hänajty tøø ñähdoñä, y cooc mäniä pia'amnajxy.

⁴⁸ Mänitä Jesús ja'a tajiäya'ay ñämaayy:

—Huong, paady miich tøø mba'amnaxy coo tøø mmäbøcy. Nøcxnä jootcuyc.

⁴⁹ Jimä Jesús hänajty miädia'agyñä, mäniä jäya'ay tu'ug miejch. Jim hänajty tøø chohnda'agy maa ja'a Jairo tiøjcän. Mänitä Jairo ñämaayyä:

—Tøø ja'a mhuung yho'ogy. Cabä wiindsón mhadsípnät.

⁵⁰ Miädoow ja'a Jesús jaduhñ. Mänitä Jairo ñämaayy:

—Ca'a mjootmayhaty. Mäbøc. Jujypiøgäp ja'a mhuung häyaa.

⁵¹ Mänit hajxy jim miejtsnä maa ja'a Jairo tiøjcän. Coo ja'a Jesús tiøjtägøøyy, caj pøn miøødtøjtägøøyy, jagooyyä Pedro møødä Juan møødä quixy tiaj tieedy.

⁵² Tøghaguuy ja'a cu'ughajxy miähmøøyy jøøbiä xuu'tspä. Mänitä Jesús miänaañ:

—Ca'a hajxy mwi'i jiø'øy mwi'i xiuuch. Caj tøø yho'ogy, nä'ä maab jaduhñ.

⁵³ Mänitä Jesús ñäxiicä. Ñajuøøby hajxy hänajty coo ja'a quixy hänajty tøø yho'ogy.

⁵⁴ Mänitä Jesús ja'a quixy quiø'ø miajtsä. Mänitä Jesús møc miänaañ:

—Huong, pädø'øg.

⁵⁵ Mänitä quixy jiuypiojcy. Mänit piädø'cy. Mänitä Jesús miänaañ coo hajxy yajcáyät.

⁵⁶ Jaančh tehñ yagjuøøyy ja'a tiaj ja'a tieedy jaduhñ. Mänitä Jesús miänaañ coo hajxy pøn quia'a yajmøødmädiá'agät neby hänajty tøø jiatiän.

9

¹ Mänitä Jesús ja'a jiamiøød miøjyaaxy ja'a hajxy nämajmetspä. Mänitä cuhdujt hajxy miooyyä coo ja'a møjcu'uba'ammøødpä hajxy nägøxiä yajnähwá'adsät. Møødä mäjaa hajxy mióoyyäbä coo ja'a pa'amjäya'ay hajxy yajmøøcpøgät.

² Mänit hajxy wyiinguejxä coo ja'a Diosmädia'agy hajxy yajwá'xät, coo ja'a pa'amjäya'ay hajxy yajmøøcpøgät. Jaduhñ hajxy miädiá'agät coo ja'a Dios ja'a miäjaa yajcähxø'øga'añ.

³ Mänit hajxy ñämaayyä:

—Cab hajxy tii mmänøcxät, ni cuhdajt, ni pijty, ni tsajcaagy, ni xädø'øñ. Tu'xojxc-hajtiä ja'a mwit hajxy mmänøcxät, ca'a mietscä.

⁴ Homiädyii tøjcä hajxy mmejtstä'agät, jim hajxy mmähmø'øwät høxtä coonä hajxy jim jadähooc mwiimbidät.

⁵ Y coo hajxy maa xquia'a yajtøjtägø'owá'anät, mäniä hajxy jim mdsónät maa ja'a cajptän. Mänitä mdecy hajxy mwiinwóbät nebiä hijxtahñd jaduhñ miähmø'øwät coo mijts tøø xquia'a yajtøjtägø'øy —nømä Jesús miänaañ.

⁶ Mänit hajxy tiu'ubøjcy. Wiinduhmyhagajpt hajxy hänajty wiädity Diosmädia'agy-yajwa'xpä, pa'amjäya'ay-yajmøøcpøjpä.

⁷ Ja'a Herodes hänajty jim tuumb gobernador. Mänit miädoyhajty nebiätiä Jesús ja'a hijxtahñd hänajty yajcähxø'øguiän. Cab hänajty ñajuø'øy nebiä wyiinmahñdyhädät. Hix,

näje'e hajxy hänajty miäna'añ cooc tyijy ja'a Juan hänajty tøø jiuypioçy. Hix, tøø ja'a Juan hänajty yagho'ogyii.

⁸ Näje'e hajxy hänajty miänaambä cooc tyijy je'e Elías, ja'a Diosmädia'agy jecy yajwá'xäbä. Näje'e hajxy hänajty jiaac mänaambä cooc tyijy ja'a jecyjiäya'ay tøø jiuypioçy, ja'a Diosmädia'agy jecy yajwá'xäbä.

⁹ Mänitä Herodes miänaañ:

—Høøchä Juan nyajyo'pujxä. Pønäda'a jaduhñ wädijp. Madiú'ujøch jaduhñ nmädoy yajcähxø'øgy.

Jiaançh tehñ yhixaambiä Herodes ja'a Jesús hänajty.

¹⁰ Cooc ja'a Jesús jiamiøødhajxy wyiimbijtagajch, mänitä Jesús hajxy yajmøødmädiaacy nebiaty hajxy hänajty tøø wiädity. Mänit hajxy miøødnøcxä pactuum, jim mävwiingón maa ja'a cajpt hänajty xiøhatiän Betsaida.

¹¹ Cooc ja'a cu'ughajxy jaduhñ miädoyhajty, mänitä Jesús hajxy jim piamejch. Mänit hajxy ñämaayyä cooc hajxy jim miähmø'øwät. Mänitä Diosmädia'agy hajxy yajmøødmädiaacy cooc ja'a Dios ja'a miäjaa yajcähxø'øga'añ. Møødä pa'amjäya'ayhajxy may yajmøcpøjcä.

¹² Tsujøñäp hänajty, mänitä Jesús wyiingumedsøøyyä ja'a jiamiøødhajxy ja'a nämajmetspä. Mänitä Jesús ñämaayyä:

—Näma'aw yø'ø jäya'ayhajxy cooc hajxy nøcxy pioo'xnä, cooc hajxy nøcxy quiayhøxta'ay wiingtuum maa ja'a cajpt miävwiingonän. Yaa maa hajxy nhjätäm, cabä tii yaa.

¹³ Mänitä Jesús miänaañ:

—Huuc yajcay mijts.

Mänit hajxy yhadsooyy:

—Cab højts tii nmøødä; jagooyyä højts tsajcaagy mägoøxc nmøødä møødä hacx metscä. Tøgä nøcxäp højts njuuyyä ja'a hajxy quiayaambiä, hoy hajxy jia nämayyä.

¹⁴ Nämägoøxmil ja'a ya'adiøjc-hajxy hänajty nägøxiä. Mänitä Jesús ñämaayy ja'a jiamiøødhajxy:

—Näma'aw hajxy ween hajxy yhäñaaguiäda'agy naaxwiin näjuxychägui'xmajcjaty.

¹⁵ Mänit hajxy ñämaayy cooc hajxy jaduhñ yhäñaaguiädä'agät. Mänit hajxy yhäñaaguiädaacy nägøxiä.

¹⁶ Mänitä Jesús ja'a mägoøxpä tsajcaagy quioondsooyy møødä metspä hacx. Mänit chajhee'py. Mänitä Dios pia'yaaçy, miänaañ:

—Dioscujú'uyäp cooc højts hädaa tøø xmio'oy.

Mänit jaduhñ yhaguidøøyy. Mänitä jiamiøød miooyy cooc hajxy jaduhñ yajwá'xät maa ja'a cu'ugän.

¹⁷ Mänit hajxy nägøxiä quiaayy cu'uxiä. Majmejtscach ja'a caadiuc quiunajxy.

¹⁸ Wiingxøø hänajty je'ebä, jimä Jesús ja'a Tieedy hänajty pia'ya'axy hanidiuhmduum. Jimä jiamiøødhajxy hänajty miøødä. Mänitä Jesús yajtøøyy:

—Nébyhøch ja'a cu'ughajxy xñänømy pønñhøch høøch.

¹⁹ Mänit hajxy yhadsooyy:

—Näje'e hajxy miäna'añ cooc tyijy miiçh mJuangä ja'a hijty mäyajnäbejpä. Näje'e hajxy miänaambä cooc tyijy miiçh mhElíasä. Näje'e hajxy jiaac mänaambä cooc tyijy ja'a jecyjiäya'ay tøø jiuypioçy, ja'a Diosmädia'agy jecy yajwá'xäbä, y cooc tyijy miiçh mje'ejä.

²⁰ Mänitä Jesús yajtøøgumbä:

—Mijtsäts, nej mijts mmänaambä pøn xtyijy høøch.

Mänitä Pedro yhadsooyy:

—Diosqueçy miiçh.

²¹ Mänitä Jesús møc miänaañ cooc hajxy quia'a nägäpxät pøn hänajty je'e.

²² Mänitä Jesús miänáangumbä:

—Høøch ja'a Diosqueçypä, hoyhøyhøch njaançh tehñ chaachpøga'añ. Cábøch ja'a tsajtøjwiindsønñhajxy xñä'ägädä wiingudsähgø'øwa'añ, ni ja'a teedywiindsønñhajxy,

ni ja'a jäya'ayhajxy jim̄ cuhdujtmøødpä tsajtøgooty. Xyagho'ogáambøch hajxy, pero cudägøøgxøøjøch njujypiøga'añ.

²³ Mänit̄ jiaac mänáangumbä:

—Pønjátyhøch nmädia'agy xpiadu'ubøgáanäp, ween yhamdsoo cuhdujt hajxy ñajtshixø'øy, ween hajxy chaačhpøjpä jabom̄-jabom̄ nébiøch ndsaachpøga'añän. Jadúhñhøch nmädia'agy hajxy hoy xpianøcxät.

²⁴ Pøn̄ jiugyhajt ja wi'i yaghoyø'øwaamb, nä'ägä cuhdägoyyaamb je'e. Pero pøn̄ jiugyhajt jaduhñ yajtägoyyaamb ja'a høøchcxpä, nä'ägä hodium je'e miähmø'øwa'añ.

²⁵ Coø hajxy hodium mga'a mmähmø'øwät, cab hajxy jaduhñ mniyaghoyø'øwøøjät, hoy hajxy mja mäyøøjä hädaa yaabä naaxwiin.

²⁶ Pøn̄høch xmiädsähdiuum̄b møødhøch nmädia'agyquiøxpä, mänitøch jaduhñ nmädsähdiunaambä coøch hänajty ngädaactägatsa'añ. Hajajaamb hänajty yaa neby jim̄ yhajajjiän tsajpootyp maačh nDeedy yhitiän, maa ja'a mioonsähajxy yhitiän.

²⁷ Tøyhájthøch jaduhñ nmäna'añ, ja'a hajxy yaa tänaabiä, näje'e hajxy jaduhñ quia'a tsoj ho'oga'añ høxtä coonä ja'a Dios ja'a miäjaa hänajty yajcähxø'øga'añ.

²⁸ Cuductujxøø ja'a Jesús ja'a Pedro miøødwimbejty tunghduum Diospa'yaaxpä, møødä Juan møødä Jacobo.

²⁹ Jimä Jesús ja'a Tieedy hänajty pia'ya'axy, mänitä wyiin jiojy høxtä haamb høxtä tsämaamb quiähxø'cy. Jaanč tehñ pioob ja'a wyit jaduhñ jiajnä.

³⁰⁻³¹ Mänitä Moiséshajxy ñäguehxtøø'xy maa jiajy maa chämamiän møødä Elías. Mänitä Jesús hajxy miøødtägøøyy mädiaacpä. Je'e hajxy hänajty miädiaacyy coø ja'a Jesús hänajty jim̄ nøcxy yho'oga'añ Jerusalén.

³² Hoyyä Pedrohajxy hänajty jia wi'i mia'awa'añ, cab hajxy ñä'ägädä maaho'cy. Mänit hajxy yhijxy coø ja'a Jesús hajxy hänajty jiajy chämamy møødä Moisés møødä Elías.

³³ Coø ja'a Moiséshajxy hänajty wyiimbidaañä, coø ja'a Jesús hajxy hänajty piuhwa'adsaañä, mänitä Pedro ja'a Jesús ñämaayy:

—Wiindsøn̄, hoyøøyy jaduhñ coø hajxy yaa tøø nbéjtäm. Ween højts tøjquemy tægøøg cu nhädiuun̄, tu'ug miich mje'e, tu'ug Moisés jie'e, tu'ug Elías jie'e.

Nä'a nagoobä ja'a Pedro jaduhñ miänaañ.

³⁴ Mänitä näma'a tehñ miapxy quiädaacy maa hajxy hänajtiän. Nädägooyy hajxy jaduhñ. Mänitä Pedrohajxy chähgøøbiøjcy.

³⁵ Mänit hajxy miädooyy ja'a Dios quiapxy näma'ajooty:

—Høøch nHuung hädaa. Høøch tøø nwiinguexy. Mhamädoowhíjtäp ja'a miädia'agy hajxy.

³⁶ Mänitä Jesús hajxy yhijxy coø hänajty nidiuhñ tiänaañä. Hamoñ hajxy jaduhñ miähmøøñä. Cab hajxy pøn̄ yajmøødmädiaacy nebiaty hajxy hänajty tøø yhixy.

³⁷ Cujaboom hajxy jim̄ wyiimbijnä tunghduum. Mänitä Jesús jäya'ay may jiojycubaadøøyyä.

³⁸⁻³⁹ Mänit tu'jäya'ay møc quiapxy maa ja'a cu'ugän:

—Wiindsøn̄, tú'uquiøch nhuung. Náxyhøch nhuung møjcu'u xjiaanč tehñ ñämejtsä. Møc jaduhñ ya'axy, møc chäyuy. Høxtä hahoo'p jaduhñ. Hanaxiä jaduhñ chaačhtiuñi, y cab jaduhñ ñä'ägädä nähwa'ačh. Wiindsøn̄, tunä mayhajt, yajnähwáatsägøch nhuung.

⁴⁰ Tøøch ja'a mjamiøød nja wi'i miänuu'xta'agy coøch nhuung hajxy xyajnähwáatsät, pero cab hajxy jaduhñ ñä'a jajty.

⁴¹ Mänitä Jesús ja'a jiamioød ñämaayy:

—Nej, cájtäm mijts mänaa mmäbøga'añä. Pämädühñtiøch mijts jaduhñ njaac mämee'xtuga'añ.

Mänitä cuhuung ñämaayy:

—Woomin̄xä mhuung.

42 Cahnä craa hänajty miechñä maa ja'a Jesúsän, mänit yajcädaawä ja'a møjcu'ujäm. Mänit yajtsäyuyy. Mänitä Jesús ja'a møjcu'u yhøxquejxy. Mänitä craa ñähwaach. Mänitä tieedy yajcø'ødägøøyyä.

43 Mänitä cu'ughajxy nägøxiä yagjuøøyy coo ja'a Dios miøjjä jiaančhä, nebiä Jesús ja'a hijxtahnd hänajty yajcähxø'øguiän.

Mänitä Jesús ñämaayy ja'a jiamiøødhajxy:

44 —Hoy hajxy wiinjuø'øw; ca'a hajxy mjahdiägoy; høøch ja'a Diosquexypä, nmädsíphøch hajxy jim xyajcø'ødägø'øwaamb maa ja'a cu'ughajxiän nägøxiä.

45 Pero cabä jiamiøødhajxy ñä'ägädä wiinjuøøyy neby hajxy hänajty tøø miøødmädia'agyijän. Hix, Jesús jaduhñ ca'a yajwiinjuøøyy. Cab hajxy jaduhñ yajtøøyy. Tsähgøøby hajxy hänajty.

46 Mänit hajxy tiägøøyy yajtsiptaacpä pøn cuhdujt maas møj mo'owáañäp.

47 Ñajuøøbiä Jesús hänajty nebiaty hajxy hänajty tiajy miay. Mänitä pigäna'c hoy tu'ug wioy, piädaacy miøjc-haamby.

48 Mänit miänaañ:

—Pøn hädaa pigäna'c jaduhñ tsógäp ja'a høøchcøxpä, jaduhñ mäwínäts høøch xchojpa. Y pønhoch jaduhñ xchojp, je'ečh nDeedy jaduhñ xjiahmiéjtsäp ja'ačh jaduhñ tøø xquiéxiäbä. Pøn ja'a møjcu'ujäm ca'a tsogaamb maa mijtsän, je'eds ja'a møjcu'ujäm jaduhñ nä'ägädä mo'owáañäp.

49 Mänitä Juan miänaañ:

—Wiindsøn, tøø højts tu'jäya'ay nhixy. Miičhcøxpä ja'a møjcu'u hijty yhøxquexy. Mänit højts jaduhñ nnämaayy coo quia'a høxquéjxnät, je'eguiøxpä coo højts xquia'a møødwädjätäm.

50 Mänitä Jesús miänaañ:

—Cab hajxy jaduhñ cu mnämaayy. Pøn højts jaduhñ xquia'a mädsiphájtäm, je'e højts jaduhñ xmiägu'ughájtäm.

51 Tøø hänajty miäwiingooñnä coo ja'a Jesús hänajty ñøcxaañnä tsajpootyp, mänitä jioot yajmøødmädiaacy coo jim ñøcxnät Jerusalén.

52 Mänitä jiamiøød mejtstägøøg quiejxø'cy. Mänitä mejtstaact hajxy hoy jia høxta'ay maa ja'a cajpthuung tu'ugän jim Samarianaaxooty.

53 Pero cab hajxy jaduhñ ñä'a tøjmooyy, je'eguiøxpä coo hajxy hänajty jim jiaac nøcxa'añ Jerusalén. Hix, cabä Samariabä-jäya'ayhajxy hänajty miøødnijootpaadyii ja'a jäya'ayhajxy hänajty tsänaabiä Jerusalén.

54 Coo ja'a Jacobo jaduhñ miädooyy møødä Juan, mänitä Jesús hajxy ñämaayy:

—Wiindsøn, tähooc ja'a Elías jøøn jim miøjyaaxy tsajpootyp nebiä haxøøgjäya'ayhajxy jaduhñ tióyät. Nej, mmäná'anäp miičh jaduhñ coo højts jøøn jim nmøjyáaxpät tsajpootyp neby hajxy jaduhñ tióbiät ja'a højts jaduhñ xquia'a tøjmo'owaambä.

55 Mänitä Jesús wyiinhee'ppejty; mänit yhojy:

—Mijts, cab hajxy mnajuø'øy coo haxøøgwiiñmahñdy hajxy mmøødä.

56 Páadyhøch yaa tøø ngäda'agy hädaa yaabä naaxwiin nébiøch ja'a jäya'ayhajxy jaduhñ nyajñähwa'ads nyajcuhwá'adsät. Cábøch hajxy jaduhñ nyajcuhdägoyya'añ.

Mänit hajxy jim tiu'ubøjnä, ñøcxy hajxy wiingcajpt.

57 Jim hajxy hänajty tiu'uyo'oyñä, mänitä jäya'ay hajxy tu'ug piaaty jim tu'haam. Mänitä Jesús ñämaayyä:

—Wiindsøn, nja wi'i pianøcxáambiøch miičh majaty miičh mnøcxa'añän.

58 Mänitä Jesús miänaañ:

—Ja'a xøøgaa, jimä jiut je'e; ja'a muuxy, jimä pie'eñ je'e; pero høøch ja'a Diosquexypä, cábøch ndøjc jaduhñ maačh nboox nhäñá'awät.

59 Mänitä Jesús wiinghäna'c ñämáaguumbä:

—Høøch padu'ubøjcäc.

Mänitä Jesús ñämaayä:

—Mänitøch miich nbadu'ubøgät cooch ndeedy hänajty tøø yho'nä, cooch hänajty tøø nyajnaaxtägøøñä.

⁶⁰ Mänitä Jesús miänaañ:

—Ja'a jäya'ayhajxy ca'a mæbøjpä, je'e miich ja'a mdeedy hajxy xyajnaaxtägø'øwáanäp. Pero miich, nøcx ja'a Diosmädia'agy yajwa'x coo ja'a Dios ja'a miäjaa yajcähxø'øga'añ.

⁶¹ Mänitä Jesús ñämaayä wiingjäyá'ayägumbä:

—Wiindsøn, nja wi'i pianøcxáambiøch miich, pero nøcxyhøch ja'a njujy nmägu'ug nhuuc hawaanä jayøjp cooch miich jaduhñ nbadu'ubøgaannä.

⁶² Mänitä Jesús yhadsooy:

—Pønhøch jaduhñ xjia wi'i piawäditaamb, cooch nmädia'agy hamuumdu'joot xquia'a mæbøjcät, cábøch jaduhñ hoy xpianøcxät.

10

¹ Mänitä Jesús jäya'ay jiaac wiimbiiyy nädägøøghii'xcumajc. Mänit hajxy metscaty metscaty quiejxø'cä majaty ja'a Jesús hänajty ñøcxa'añän.

² Mänit hajxy ñämaayä:

—Nämayyä jäya'ayhajxy jia mæbøga'añ; je'eds ca'a hijp pøn ja'a Diosmädia'agy yajwá'xäp. Mänuu'xta'ag ja'a Dios hajxy coo ja'a Diosmädia'agy-yajwa'xpä jiaac quéxät.

³ Nøcx hajxy. Mnigwieendähadøøjäp hajxy. Ca'awiindøyhäna'c-hagujc hajxy mwädita'añ.

⁴ Cabä xuumy hajxy mmänøcxät, ni xädø'øñ. Tu'tehngä cø'øg hajxy mmänøcxät. Cab hajxy pøn mwiindänaaxiøbät tu'haam.

⁵ Coo hajxy muum maa mhamejstá'agät, myajpóo'xäp ja'a cudøjc hajxy. “Weenä Dios hajxy xmio'oy ja'a hoyhajt ja'a weenhajt.” Jaduhñ hajxy mnämá'awät.

⁶ Pø hojiäya'ay ja'a cudøjc-hajxy jaduhñ, mänitä Dios jiaanç mó'owät ja'a hoyhajty ja'a weenhajt; pø caj, cab hajxy jaduhñ mio'owøøjät. Y cab hajxy jim mnä'ägä mähmø'owät.

⁷ Cab hajxy tøjc-tøjc mwädítät. Jim hajxy mnä'ägädä hídät maa hajxy hänajty tøø mmejtsta'aguiän. Jim hajxy mmähu'ug mmägáyät. Je'e hajxy jaduhñ mhú'ugäp mgáyäp tijaty hajxy jaduhñ xmiooby. Hawiinmats jaduhñ coo hajxy jaduhñ xmió'owät, je'eguiøxpä coo hajxy mwiinguexiä.

⁸ Homiädyii cajptä hajxy jaduhñ xtiøjmó'owät, mgáyäp hajxy jaduhñ tijaty hajxy xmiooby.

⁹ Myajmøcpøgäp ja'a pa'amjäya'ay hajxy maa ja'a cajptän. Jaduhñ hajxy mnämá'awät: “Tøø miäwiingoonnä coo ja'a Dios ja'a miäjaa yajcähxø'øga'añ ja'a mijtsøxpä.”

¹⁰ Pero homiädyii cajptä hajxy jaduhñ xquia'a tøjmó'owät, callejooty hajxy nøcxy mya'axy:

¹¹ “Hädaa cajpt yaabä, cabä quiuhdujthajxy yhooyä. Paady højts ndecy nwiinwoba'añ. Jaduhñä hijxtahñd miähmø'owät coo ja'a mguhdujthajxy quia'a hoyyä. Mjahmiédsäp hajxy jaduhñ coo miäwiingoonnä coo ja'a Dios ja'a miäjaa yajcähxø'øga'añ ja'a mijtsøxpä.”

¹² Tøyhájthøch jaduhñ nmäna'añ, coo ja'a naaxwiimbä hänajty wyiimbida'añ, maas hanaxiä ja'a cajpt jaduhmbä chaächpøga'añ quejee ja'a Sodomacajpt jecy chaächpøjquiän.

¹³⁻¹⁴ Mjaanç tehñ chaächpøgaamb hajxy pønjaty jim tsänaaby Corazíncajptooty møødä Betsaidacajptooty. Maas hanaxiä hajxy mdsaaçpøga'añ quejee ja'a jäya'ayhajxy jecy chaächpøjquiän, ja'a hajxy jecy tsänáayyabä Tirocajptooty møødä Sidóncajptooty. Coo je'e hajxy cu yhiixy ja'a hijxtahñd nej mijts mja hixiän, cu ñajtshixøoyy ja'a yhaxøøgcuhdujt hajxy; cu jiøoyy cu xiuu'ch hajxy jaduhñ.

¹⁵ Y mijts jim tsänaabiä Capernaum, haagä jiiby mijts mhäda'aga'añ møjcu'uhaam. Cab hajxy jim mnøcxa'añ tsajpootyp neby hajxy mdijjiän.

16 Mänitá Jesús ñämaayy ja'a jiamiøødhajxy ja'a nädägøøghii'xcumajcpä:

—Pønjaty mijts mmädia'agy xyhamädoowhíjtäp, jaaná jadúhñhøch nmädia'agy hajxy xyhamädoowhíjtäbä. Pero pønjaty mijts mmädia'agy xquia'a hamädoowhíjtäp, ni høøch nmädia'agy hajxy xquia'a hamädoowhíjtäbä; ni ja'a nDéedyhøch miädia'agy xquia'a hamädoowhíjtäbä, ja'ačh tøø xquiéxiäbä.

17 Mänitá nädägøøghii'xcumajcpähajxy tiu'ubøjcy Diosmädia'agy-yajwa'xpä. Cujecy hajxy wyiimbijtagajch. Jaanč tehñ jiootcuyc hajxy hänäjty. Mänit hajxy miänaañ:

—Wiindsón, høxtä ja'a møjcu'u højts nmädia'agy hajxy tøø xmiäbøjcä ja'a miíchcøxpä.

18 Mänitá Jesús miänaañ:

—Tøyhajt jaduhñ. Nhíxhøch ja'a Satanás coo jim quiahyc tsajpootyp. Nebiä wädsucän jaduhñ jiatcøøyy.

19 Huuc mädown hajxy, tøøch mijts ja'a mäjaa nmo'oy coo mijts tsahñdy myajtéenät møødä caa'pty, y coo ja'a møjcu'u hajxy mga'a yajmäjädá'agät; y cab hajxy nej mjada'añ.

20 Paady hajxy mxoondá'agät coo ja'a mxøøhajxy jim yhity cujaay tsajpootyp. Cab jaduhñ ñejpiä pø tøø ja'a møjcu'u ja'a mmädia'agyhajxy xmiäbøjcä.

21 Mänitá Jesús jiaanč tehñ yajxoonäacpøjcä ja'a Dioshespíritu. Mänitá Jesús miänaañ:

—Teedy, míchäts jim Wiindsønñhajp tsajpootyp møød hädaa yaabä naaxwiin. Chojpy miích mjoot jaduhñ coo ja'a hajxy ca'a høxpøcypä wyiinjuø'owät tijaty ja'a hajxy høxpøcypä tøø mga'a yajwiinjuø'oy. Páadyhøch miích hoy nnänømy.

22 Mänitá Jesús ñämaayy ja'a jiamiøødhajxy:

—Tøøch nDeedy ja'a cuhdujt xquiøxy mo'oy. Cábøch pøn xñajuø'oy pønñhøch høøch, jagóoyyøch nDeedy jaduhñ xñajuø'oy. Y jagóoyyøch nDeedy nnajuøøbiä. Ñajuøøby hajxy je'ebä pønjätyhøch tøø nyajnáhdijy coo hajxy ñajuø'owät.

23 Mänitá Jesús ja'a jiamiøød wyiinhee'ppejty ja'a hajxy nämajmetspä. Mänit hajxy hawiing ñämaayy:

—Jootcuyc hajxy jaduhñ mhídät je'eguiøxpä cooch mijts ja'a hijxtahñd may tøø nya-jnähixø'oy.

24 Tøyhájthøch jaduhñ nmäna'añ. Ja'a Diosmädia'agy-yajwa'xpähajxy møødä gobiernähajxy, nämay hajxy jia hixaañ tijaty mijts mhijxyp. Nämay hajxy jia mädownaañ tijaty mijts mmädooby.

25 Mänitá ley-yajnähixøøbiä tu'ug tiänaayyø'cy. Mänitá Jesús hoy miäyajtøy:

—Wiindsón, tiích ngudiúnäp nébiøch cøjxta'axiøø njugyhádät nebiä Dios jjugyhatiän.

Paadiä Jesús jaduhñ ñämaayy, nä'ä mädia'agyhixáañäp hänäjty je'e waamb hänäjty yhadsowa'añ.

26 Mänitá Jesús yhadsooyy:

—Neby jaduhñ jim myiñ cujaay maa ja'a leyän. Neby jaduhñ mwiinjuø'oy.

27 Mänitá ley-yajnähixøøbiä yhadsooyy:

—Jaduhñ jim myiñ maa ja'a leyän coo ja'a Dios mwiingudsähgø'owät hamuumdu'joot. Jaaná jaduhñ jim myiimbä coo hopiønä mdsógät mba'häyówät nebiä mni'x nebiä mgopc mdsoquiän.

28 Mänitá Jesús miänaañ:

—Hoy jaduhñ tøø mhadsoy; coo jaduhñ mgudiúnät, mänit jim mnócxät tsajpootyp.

29 Pero yajcumayaambä ley-yajnähixøøbiä hänäjty. Mänit miänáangumbä:

—Pøn jaduhñ mnänøømby cooch hopiønä ndsógät nba'häyówät.

30 Mänitá Jesús yhadsoogumbä:

—Nhuuc yajmøødmädiä'agyhøch mädia'agy tu'ug, nej miích jaduhñ hoy mwiinjuø'owät. Jiibiä jäya'ay hänäjty tu'ug yháda'agy Jericó. Jerusalén hänäjty tøø choñda'agy. Tu'haamhádaacpä ja'a mee'tspä piaaty. Cøjx jaduhñ mié'tsäxä møødä wyit. Mänit hoyhoy wiobho'cä. Nebiä ho'ogypiän hajxy jaduhñ ñähgüecy.

³¹ Mänit teedywiindsón tu'ug ñajxy. Coo ja'a mähdiøjc jaduhñ yhijxy, cab jaduhñ tiänaaxiøjpy. Jiuhyohy jaduhñ.

³² Jaduhñdsä tsajtøjcueendähajpä tu'ug ñajxpä; jaduhñ je'e jiuhyohbiä.

³³ Mänitä Samariabäya'ay tu'ug ñajxpä. Coo jaduhñ yhijxy, mänitä hojioot miøødhajty.

³⁴ Mänitä mähdiøjc chooyøoyy aceitehaam møødä vinohaam. Mänit yhamäguijty withaam maa hänajty tøø jiotiän. Mänitä yhamdsoo jäyujcøxp yujtsehñ. Mänitä mähdiøjc hoy ñajtsømø'oyii maa ja'a mejtstaactän. Mänit jim yhijxä.

³⁵ Cujaboomä Samariabäya'ay ja'a cudøjc plataxädø'ñ metsc miooyy. Mänit ñämaayy: “Tuñä mayhajt, huuc cueendähat yø'ø mähdiøjc. Mäduhñtiä xädø'ñ mjaac yajtuñ, mänitøch jaduhñ nmoodiägätsät cooçh nwiimbijtägätsät.”

³⁶ Mänitä Jesús ja'a ley-yajñähixøøbiä miäyajtøoyy:

—Pøn maas hoyhäna'c tøø piädsømy yø'ø nädägøøgpähajxy.

³⁷ Mänitä ley-yajñähixøøbiä yhadsooyy:

—Ja'a häna'c hojioot møødhájtäbä.

Mänitä Jesús miänaañ:

—Nøcx, y jaduhñ miich hojioot mmøødhájpät.

³⁸ Mänitä Jesúsahjxy tiu'ubøjcumbä. Mänit hajxy miejch wiingcajptooty. Mänitä Jesús yajtøjtägøoyy ja'a to'oxiøjc tu'ug ja'a xøhajpä Marta.

³⁹ Jimä Marta piuhdo'oxy hänajty tu'ug ja'a xøhajpä María. Mänitä María ja'a Jesús wyi-inhøxtaacy. Yhamädoowhidaamby hänajty je'e waambaty ja'a Jesús hänajty miädia'aga'añ.

⁴⁰ Pero wyi'i jioodhadóøtsäp ja'a Marta tiuung hänajty. Mänitä Jesús ñämaayy:

—Wiindsón, nej miich jaduhñ mnijiäwø'oyii cooçh nbuhdo'oxy ja'a tuung tøø xya-jmänähgueegø'øy. Huuc nämä'aw weenç xpiuhbety.

⁴¹ Mänitä Jesús yhadsooyy:

—Marta, Marta, madiu'u miich mwi'i tiajy mwi'i miay.

⁴² Tu'tu'uyyä jaduhñ yhawinmatsä. Hoyyä mbuhdo'oxy jaduhñ quiudiuñ. Cabä María ja'a cuhdujt jaduhñ pøn piøgäaaxä cooçh nmädia'agy jaduhñ xyhamädoowhíjtät.

11

¹ Wiingtuumä Jesús ja'a Dios hänajty pia'ya'axy. Coo pia'yaaxpädøoyy, mänitä jiamiøød tu'ug miänaañ:

—Wiindsón, højts Diospa'ya'ax yajñähixøoyyác nebiä Juan ja'a jiamiøød yajñähixøoyyän.

² Mänitä Jesús miänaañ:

—Coo ja'a Dios hajxy hänajty mba'ya'axa'añ, jaduhñ hajxy mmäná'anät:

Dios, miich højts nDeedyhajpy. Jim mhity tsajpootyp.

Weenä jäya'ayhajxy nägøxiä xwyiingudsähgø'øy. Weenä mmäjaa myajcähxø'øgy.

Weenä mmädia'agy hajxy yaa xmiäbøjcä hädaa yaabä naaxwiin neby hajxy jim xmiäbøjcän tsajpootyp.

³ Móoyyác højts ja'a cay jäda'axøø neby højts cu'uxiä ngáyät.

⁴ Højts ja'a pojpä cädieey mämée'xác neby højts jaduhñ nmämee'xiän pønjaty højts xñägädieeyøøby.

Cabä møjcu'ugong cuhdujt mmó'owät coo højts xjiøjcaxø'owät, coo højts ja'a haxøøgpä xyajñähdíjtät.

⁵ Mänitä Jesús miänáangumbä:

—Tsøg hajxy jaduhñ mänáanäm coo mijts mmägu'ughajpä mmøødä tu'ug. Coo miich cuptsuhmdä nøcxy mnäma'ay: “Mägu'ughajpä, høøçhä tsajcaagy tägøøg yajyujwáanác.

⁶ Ja'a nmägu'ughájpøch tu'ug tøø miech. Jäguem chooñ. Cábøch tii nmøødä tiiçh jaduhñ nnä'mó'owäp.”

7 Wehndä mmägu'ughajpä jii by tögooty xyhadsówät: “Ca'a xyhadsipy. Hagø'ø y ja'a tøjcän. Tøø højts ngøxy maaho'nä møødhøch nhuunghajxy. Cábøch nbädø'øgaanä cooçh miich jaduhñ tijaty nmó'owät.”

8 Tøyhájthøch jaduhñ nmäna'añ, hoy jaduhñ xjia mägu'ughaty, cab jaduhñ xñä'ä nábädø'øgáambät coo miich tijaty xmió'owät. Pero coo miich tehngajnä mwi'i ñé'emät, mänit jaduhñ piädø'øgät, mänit jaduhñ xmió'owät tijaty miich hänäjty myajmaajiajpy.

9 Tøyhájthøch jaduhñ nmäna'añ, coo mijts ja'a Dios tijaty mmäyujwá'anät tehngajnä, tsipcøxp jaduhñ xñä'ägädä mó'owät.

10 Coo pønä Dios tijaty miäyujwá'anät tehngajnä, tsipcøxp jaduhñ ñä'ägädä mo'owa'añii.

11 'Pø jim mhuunghajxy, coo tsajcaagy xmiäyujwá'anät, cabä tsaa mmo'owa'añ; coo hacx xmiäyujwá'anät, cabä tsahñdy mmo'owa'añ.

12 O coo tseediu'udy xmiäyujwá'anät, cabä caa'pty mmo'owa'añ.

13 Hojiatypä ja'a mhuung hajxy jaduhñ mmooby, hoy hajxy mja ca'awiindøyyä. Mänaxiä ja'a mDeedyhajxy jim tsajpootypä xmió'owät ja'a yhEspíritu coo mijts jaduhñ mmäyujwá'anät.

14 Wiinghooçä Jesús ja'a møjcu'u hänäjty yhøxquexy. Tøø jäya'ay hänäjty tu'ug yaghu-umyü. Coo ja'a mähdijc ñähwaatsnä, mänit quiapxø'nä. Yagjuøøyy ja'a jäya'ayhajxy jaduhñ.

15 Pero näje'e hajxy jaduhñ miänaañ:

—Yø'ø craa, ja'a møjcu'ugongä miäjaa jaduhñ miøødhájtäp, paadiä møjcu'u yhøxquexy. Ja'a møjcu'ugong, ja'a møjcu'u wyiindsøñhajxy je'e.

16 Näje'e häna'c ja'a Jesús hajxy hänäjty ñäma'ay coo hijxtahnd ween yajcähxø'øgy, ja'a jim tsajpootypä. Wyiinmahñdyhixaambiä Jesús hajxy hänäjty.

17 Pero ñajuøøbiä Jesús hänäjty nebiaty hajxy hänäjty wyi'i tiajy wyi'i miay. Mänit miänaañ:

—Homiiädyii cajptä, coo ja'a cu'ughajxy ñiyhawiingpäda'agóøjät, coo hajxy tu'tøjc ñimiädsibø'øwøøjät, cuhdägóyyäp ja'a chäna'ahajxy jaduhñ.

18 Jaanä jaduhñduhmbä, coo Satanáshajxy ñimiädsibø'øwøøjät, cuhdägóyyäp hajxy je'ebä. Mijts jaduhñ mänaamb cooçh tyijy ja'a møjcu'uhajxy nhøxquexy ja'a møjcu'ugongä miäjaagøxpä.

19 Pero coo häxøpy jaduhñ tiøyyä, maa mijts mjamiøød ja'a mäjaa hajxy yhuuc paatpä coo ja'a møjcu'u hajxy yhøxquexy. Cähxø'p jaduhñ coo mijts ja'a tøyhajt hajxy mga'a møødä.

20 Pero høøçh, ja'a Diosmäjaagøxpøch ja'a møjcu'uhajxy nhøxquexy. Y cähxø'p jaduhñ coo miäwiingoonnä coo Dios ja'a miäjaa yajcähxø'øga'añ ja'a mijtsøxpä.

21 'Tsøg jaduhñ mänáanäm, coo ja'a jäya'ay jaançh møcpä cwieendähádät ja'a yhamd-soo tøjc, coo pujxt coo wojpt hänäjty miøødä, cabä mee'tspä jaduhñ tiägø'owät.

22 Pero coo jäya'ay maas ca'awiindøybä miédsät, cabä cudøjc jaduhñ miäjädá'agät. Pøjcäxäp ja'a piujxt ja'a wiojpt jaduhñ ja'a tyijy yajmäjädä'agaambiä. Møød jaduhñ piøjcäxäbät tijaty jii by miøød tögooty. Y høøçh, jaduhñ mäwínäts høøçh ja'a møjcu'ugong nga'a yajmäjädä'agy.

23 'Pøñhøch jaduhñ xquia'a møødpädø'p, høøçh nmädsip je'eduhñ. Y pøñhøch jaduhñ xquia'a møødtuumb, je'e jaduhñ yajma'p pønjätyhøch nmädia'agy xjia wi'i miäbøgáanäp.

24 Mänitä Jesús miänáangumbä:

—Tsøg jadähooc mädiáaccumbä. Coo ja'a møjcu'u piädsømät maa jäya'ay tu'ugän, mänit tiägø'øy poo'xtaacthøxtaabiä pactuum. Y coo jaduhñ quia'a páadät, mänit miäna'añ cooc jim wyiimbida'añ maa tøø yhuuc pädsømbän.

25 Coo jim miejtstägätsät maa ja'a jäya'ayän, tøø ja'a jäya'ay hänäjty wyiinmahñdymech nebiä tøjc wa'adspän.

²⁶ Mänitä møjcu'u ja'a jiamiøød nøcxy wioy juxtuyc ja'a maas haxøøgpä. Mänit hajxy nägøxiä tiägø'øy maa ja'a jäya'ayän tsänaabiä. Y maas haxøøg ja'a jäya'ay nãägä jaty quejee hänajty.

²⁷ Jimä Jesús hänajty miädia'agyñä, mänitä to'oxiøjc tu'ug yaaxy cu'ughagujc:

—Jootcuyc miich mdaj mdsi'tsc jaduhñ yhity je'eguiøxpä coo miich tøø xyajtso'ogy tøø xyajyeegy.

²⁸ Mänitä Jesús miänaañ:

—Je'eds maas jootcuyc hijp, pønhatiä Diosmädia'agy cudiumb.

²⁹⁻³⁰ Tehngajnä ja'a Jesús ja'a cu'ug hänajty jiaanč tehñ nãmugø'øyii may. Mänitä Jesús miänaañ:

—Cabä jäya'ay howyiinmahñdy hajxy miøødä, ja'a hajxy jäda'ahatypä. Ja'a hijxtahñd hajxy jia wi'i yhixaamby, ja'a hoy-yagjuøñbä. Pero cab hajxy jaduhñ yaghixa'añii. Jagooyyä hajxy jaduhñ yhixa'añ cooçh høøçh jaduhñ njada'añ nebiä Jonás jecy jiajtiän mänaa jim quiexyijän Nínivecajptooty. Dios jaduhñ quejx.

³¹ Coo jaduhñ yhabáadät coo ja'a jäya'ayhajxy hänajty yajnähdiä'añii, mänitä to'oxiøjc piädø'øga'añ, ja'a jecy hanéhñäbä jim jäguemnaax ja'a jøømbojmanajpä. Je'e jaduhñ mäna'anaamb coo ja'a jäya'ayhajxy jäda'ahatypä piäda'agøøjät haxøøgtuum. Je'eds ja'a Salomón hoy tøø miämädoona'ay, je'eguiøxpä coo ja'a Salomón hänajty jiaanč tehñ quiuhwijjiä. Y cabä Salomón cuhdujt hänajty jiaty møødä nébiøch høøçh jaduhñ nmøødän.

³² Y ja'a jäya'ayhajxy jecy tsänáayyäbä Nínivecajptooty, jaduhñ hajxy miäna'anaambä coo ja'a jäya'ayhajxy jäda'ahatypä piäda'agøøjät haxøøgtuum. Coo ja'a Jonás ja'a Diosmädia'agy hoy yajwa'xy jim Nínivecajptooty, mänitä jäya'ay ja'a yhaxøøgwiiinmahñdy hajxy nãajtshixøøyy. Y cabä Jonás cuhdujt hänajty jiaty møødä nébiøch høøçh nmøødän.

³³ 'Coo ja'a jäya'ay jøøn hajxy quiuhno'ogø'øy, cøxp hajxy jaduhñ piäda'agy, nebiä jäya'ayhajxy jaduhñ quiudøø'xøøjät ja'a hajxy tøjtagøøbiä. Cabä jøøn hajxy yu'uçh, ni cab hajxy quiuhjupy cajonghaam.

³⁴⁻³⁶ Cooçh mijts ja'a nmädia'agy hamuumdu'joot xmiäbøjcät, hoy hajxy jaduhñ mwädítät homiänaajä. Pero cooçh nmädia'agy hajxy xquia'a mäbøjcät, hagoodstuum hajxy jaduhñ mhídät. Homiänáajøch nmädia'agy hajxy xmiäbøjcät neby hajxy hagoodstuum mga'a cá'awät.

³⁷ Coo ja'a Jesús miädiaacpädøøyy, mänitä Jesús wioonøcxä mägaabiä ja'a farisewäm. Coo jim miejch maa ja'a fariseo tiøjcän, mänit yhäñaaguiädaacy meexäwiinduum.

³⁸ Jaguiø'øbuyc ja'a Jesús yhäñaaguiädaacy. Caj quiø'øbuyc nebiä judíoshajxy hänajty quiuhdujthatiän. Coo hajxy hänajty tiägø'øwa'añ caabiä, mänit hajxy hänajty quiø'øbuyc. Coo ja'a Jesús quia'a cø'øbuyc, yagjuøøyy ja'a fariseo jaduhñ.

³⁹ Mänitä Jesús miänaañ:

—Mijts fariseodøjc, jaduhñ hajxy mja wi'i quiähxø'øga'añ nebiä hoyhäna'cän jim cu'ughagujc. Pero cabä mjoot cabä mjuøhñdyhajxy yhoyyä, je'eguiøxpä coo hajxy mwi'i mieeçh mwi'i pioty.

⁴⁰ Caj mijts mwiinmahñdy yhoyyä. Tøø ja'a Dios ja'a mni'x ja'a mgopc-hajxy xquiunuu'xä. Tøø ja'a mjoothajxy xjia cunúu'xäbä coo ja'a mjuøhñdyhajxy hoy cu mhijty.

⁴¹ Coo ja'a häyoobäya'ay hajxy mbuhbédät hamuumdu'joot, mänit hajxy jaduhñ mnähwá'adsät.

⁴² 'Mijts fariseodøjc, haxøøg hajxy mjada'añ mhabeta'añ. Xiøøbä hajxy mja nä'ä wi'i quiuyoxø'øy yø'øbi'c jøø'xychooy jiiy tsajtøgooty. Pero cabä Diosmädia'agy hajxy mgudiuna'añ maa jaduhñ myiñän coo hajxy hoy mwädítät, coo ja'a Dios hajxy mwiingudsähgø'øwät. Pedyii ja'a Diosmädia'agy hajxy mgudiúnät.

⁴³ 'Mijts fariseodøjc, haxøøg hajxy mjada'añ mhabeta'añ. Mjaanč tehñ ya-jcumayaamb hajxy jaduhñ. Jiiy hajxy mja wi'i yhäña'awa'añ maa ja'a häñaabiejt

hojiatypän jiiiby tsajtøgooty. Y chojpy ja'a mjoothajxy jaduhñ coo ja'a cu'ug hajxy xi'ig xon xwyiingudsähgø'øwät jiiiby halaplaaz.

⁴⁴ Mijts fariseodøjc, mijts ley-yajnäihixøøbiädøjc, mhøhndaacp hajxy jaduhñ. Cab hajxy myajcähxø'øgy coo ja'a mguhdujthajxy quia'a hoyyã. Y pønjaty ja'a mmädia'agyhajxy xpianøcxäp, tu'udägooby hajxy je'ebã, je'eguiøxpã coo hajxy quia'a najuø'øy coo mijts mguhdujt jaduhñ yhäxøøgã.

⁴⁵ Mänitã Jesús ñãmaayyã ja'a ley-yajnäihixøøbiã tu'ug:

—Wiindsøn, coo jaduhñ mmãna'añ, haxøøg højts jaduhñ xñänøømbã.

⁴⁶ Mänitã Jesús miãnaañ:

—Mijts ley-yajnäihixøøbiädøjc, jaanã haxøøg mijts mjadaambã mhabetaambã. Hanaxiã mijts ja'a tsipjatypã myajnäihixø'øy. Ni pøn jaduhñ quia'a jada'añ nej mijts myajnäihixø'øyã. Y cab hajxy hamdsoo mgudiuna'añ neby hajxy myajnäihixø'øyã ni weeñtiã.

⁴⁷⁻⁴⁸ Haxøøg hajxy mjada'añ mhabeta'añ. Haxøøg mijts mguhdujt nebiã mhap ja'a mdeedyhajxy hijty chãna'ay yhäyoyyã jegyhajty. Je'eds hajxy jaduhñ yagho'c ja'a Diosmädia'agy hajxy jecy yajwã'xãbã. Y mijts ja'a tiøjc-huunghajxy myajcøjjãp maa hajxy jecy ñãaxtägøøyyã. Myajcähxø'py hajxy jaduhñ coo ja'a mhap ja'a mdeedy hajxy tu'ugwiinmahñdy mmøødhity.

⁴⁹ Ñajuøøbiã Dios jaduhñ. Je'e jaduhñ mãnaan: “Nguexãambiøch nguguexyhajxy maa yø'ø häna'c-hajxiã. Nãjé'ejøch nguguexyhajxy xyagho'ogaanã. Nãje'e hajxy ñã'ã tsaächtiuna'añii.”

⁵⁰ Ja'a jäya'ayhajxy jäda'ahatypã, pojpatuum cãdieedium hajxy jaduhñ miãhmø'øwa'añ ja'a Dios quiuguexyøxpãhajxy, ja'a hajxy tøøbã yagho'ogyijãbã nägøxiã. Mänit hajxy tiägøøyyã yaghó'cãbã mãnaa hädaa yaabã naaxwiin yhawijy tiøø'xta'aguiã.

⁵¹ Møødã Abel yaghó'cãbã møødã Zacarías. Tsajtøghaguuy ja'a Zacarías yagho'cã jim mädøyyã maa ja'a altarã. Tøyhajt jaduhñ coo ja'a jäya'ayhajxy jäda'ahatypã miãhmø'øwa'añ pojpatuum cãdieedium.

⁵² Mijts ley-yajnäihixøøbiädøjc, haxøøg hajxy mjada'añ mhabeta'añ. Cabã cu'ug ja'a tøyhajt hajxy mnã'ã mo'owa'añ. Cabã tøyhajt hajxy hamdsoo mnã'ã tsoy. Mijts ja'a cu'ug mwi'i quiapxhiimby nebiã tøyhajt hajxy jaduhñ quia'a páadãt.

⁵³ Mänitã Jesús jiaançh tehñ miãjootma'tã ja'a fariseodøjc møødã ley-yajnäihixøøbiädøjc. Mänit hajxy tiägøøyy mãyajtøøbã madiu'u.

⁵⁴ Jia wiinmahñdyhixaan ja'a Jesús hajxy jaduhñ neby hajxy jaduhñ cu yajnähdsoømy.

12

¹ Mänitã jäya'ayhajxy yhamugøøyy milhaam høxtã niñø'tsmujcã hajxy jaduhñ. Mänitã Jesús ja'a jiamioød hawiing ñãmaayy:

—Cabã fariseos miãdia'agy hajxy mmãbøjcãt. Nãmay häna'c jaduhñ tiu'udägoy coo ja'a fariseos miãdia'agy hajxy miãbøjcã. Hix, høhndaacp ja'a fariseoshajxy jaduhñ. Yajnajuo'øwaamb jaduhñ tsipcøxp coo hajxy jaduhñ yhøhnda'agy. Hoy hajxy hoy jia capxy jia mädia'agy, cab hajxy hamdsoo hoy quiuidiun.

² Hix, cab jaduhñ tii ñã'ägãdã mãhmø'øwa'añ jañãgapxy. Haagã cãhxø'øgaamb jaduhñ cøxiã.

³ Jaanã jaduhñduhmbã ja'a mijtsøxpã, waambaty hajxy tøø mmãna'añ hamee'ch, yajmãdowaamb jaduhñ cu'ughagujc.

⁴ Mägu'ughajpãdøjc, cab hajxy mdsähgø'øwät pøn ja'a mni'x ja'a mgopc xyaghó'cãp. Cab jaduhñ nej xjiaac tünãt.

⁵ Pero ja'a Dios hajxy jaduhñ mdsähgø'øwãp. Je'edsã cuhdujt møød coo ja'a mjogyhajt hajxy xyajcuhdägøoyyãt, y coo hajxy xpiãdá'agãt haxøøgtuum.

6 'Høxtahm̄dsä muuxyhuunghajxy, hoy hajxy yaa tii quia'a ja wa'añ, jiahmiejchpä Dios je'e.

7 Mänaxiä mijts ja'a Dios xquia'a jahmiédsät. Paady hajxy jaduhñ mga'a tsähg'øwät. Xjiaanč tehñ chojp mijts ja'a Dios høxtä xmiooby hajxy tijaty hajxy myajmaajiajpy.

8 'Tøyhájthøch jaduhñ nmäna'añ, høøch ja'a Diosquexypä, põnhøch xquiapx-paatp cu'ughagujc, je'ečh jaduhñ ngapxpaattägatsaamby jim tsajpootyp ja'a Diosmoonsäwiinduum.

9 Pero põnhøch jaduhñ xquia'a capxpaatp cu'ughagujc, ni je'ečh jaduhñ nga'a capx-paadaambä ja'a Diosmoonsäwiinduum.

10 'Pønhøch haxøøg xñänøømb, mee'xáanäp je'e. Pero coo ja'a Dioshespíritu hajxy haxøøg ñänómät, cab hajxy jaduhñ miée'xänät.

11 'Coo mijts häna'c mädsibø'øbä xyajnöcxät tsajtøgooty o jim maa ja'a hagujtøjcän, cab hajxy mdaj mmáyät waamb hajxy mmädiá'agät,

12 je'eguiøxpä coo ja'a Dioshespíritu hajxy xñajtsapxøøyyät waambaty hajxy jaduhñ mhadsówät.

13 Mänitä Jesús ñämaayyä tu'jäya'ay maa ja'a cu'ugän:

—Wiindsøn, nämáayyägøch nbuhya'ay coočhännädeedyñaax xpiuhmó'owät.

14 Mänitä Jesús miänaañ:

—Pønhøch tøø xquiuhdujtmoy coočh mijts nhané'emät.

15 Mänitä Jesús miänáangombä:

—Mnigwieendähadøøjäp hajxy coo hajxy tii mga'a hadsógät. Cab hajxy nøcxy mdajy mmay coo hajxy cøxiä mga'a møødä.

16 Mänit miänáangombä:

—Tsøg hajxy mänáanäm, jii jäya'ay hijty tu'ug jaanč tehñ miäyøø. Mänitä ñøø miooc may jajpädø'cy.

17 Mänit tiägøøyy tajpä maabiä: “Nébiøch nnøø nmooc ndúnät. Maačh jaduhñ nnä'ä pädá'agät.”

18 Mänit miänáangombä: “Tøøch nnajuø'øyy maačh nbädá'agät. Nyajmá'adäbøch yø'ø ndsehx. Maas crúundøch ngójät. Jíibyøch nnøø nmooc ngøxy pädá'agät, mädúhñtiøch nmøødä.

19 Cábøch jaduhñ tii ndájñät nmáañät. Jootcujc-høch jaduhñ ndsánáañät nhäyóonät majiomøjt. Poo'xáambøch, cayáambøch hu'ugáambøch, xoonnda'agáambøch.”

20 Mänitä Dios ja'a craa ñämaayy: “Miičh, cab jaduhñ mnä'ägä mabøcy. Jäda'a coods mho'oga'añ. Yø'øduhñ tøø mwi'i piädá'aguiäbä, põñ jaduhñ mämähmø'øwaamb.”

21 Jaduhñdsä mäyøøjäya'ayhajxy jiaty yhabety põñjaty maxiädø'øñ jaduhñ tehngajnä vajmujp yhamdsoogøxpähajxy. Pero maa ja'a Dioswiinduumän, häyoob hajxy jaduhñ.

22 Mänitä Jesús ja'a jiamioød ñämaayy:

—Ca'a hajxy mdajy mmay tii hajxy mnäjugyhadaamby, tii hajxy mgayaamby, tii hajxy mwithadaamby.

23 Cab hajxy nøcxy mdajy mmay coo hajxy cøxiä wiinä mga'a møødä.

24 Høxtahm̄ds yø'ø muuxyhajxy, cab hajxy tiuñ xiajy. Cab hajxy tii ñi'iby; cab hajxy tii jajpädø'øgy; cabä tsehx hajxy miøødä. Ja'a Dios jaduhñ yagjøø'xp. Y mijts, mmaas tsoobaatp hajxy quejee ja'a muuxyhajxy.

25 Hoy hajxy mäduhñtiä mja taj mja máyät, cab hajxy hamdsoo mniyajyeegøøjät ni weeñtiä.

26 Pø cab hajxy hoy hamdsoo mniyajyega'añii, cab hajxy tii mdaj mmáyät.

27 'Høxtahm̄ds yø'ø pøjy, yee'p yø'ø. Pero cab tiuñ xiajy; cab pyiidyhädiuñ. Tøyhajt jaduhñ, ni ja'a rey Salomón jecy quia'a nä'ägä mäbaaty nej yø'ø pøjjiän, hoy howyit hánajty jia møødä.

28 Hoyyá Dios yø'ø pøjy yajxón jia cunuu'xy, cab jiecy. Mäna_xiä mijts ja'a Dios xquia'a witmó'owät, hoy mijts jaduñ mga'a ja mäbøcy.

29 Ca'a hajxy mwi'i tiajy mwi'i miay tii hajxy mgayaamby mhu'ugaamby.

30 Ja'a hajxy jaduñ ca'a mäbøjpä, je'eds hajxy wyi'i tiajpy wyi'i miaaby. Pero mijts, ñajuøøbiä mDeedyhajxy tijaty hajxy myajmaajiajpy.

31 Taj may hajxy nebiä Diosmädia'agy hajxy hoy mgudiúnät, mäniä Dios cø_xiä xmió'owät.

32 'Mägu'ughajpädøjc, ca'a hajxy mdsähgø'øy, hoy hajxy jaduñ mja nä'ä weeñtiä. Chojpiä mDeedy jioot jaduñ coo mijts xyhuunghádät.

33 Mdóogäp hajxy mäduhñtiä hajxy mmøødä; mäniä häyoobäya'ay hajxy mnä'ä mó'owät cø_xiä. Jaduñ mijts hoyhajt weenhajt jim mbáadät tsajpootyp. Cab jaduñ pøn jim tii xpiójcät.

34 Coo ja'a Diosmädia'agy hajxy hamuumdu'joot mgudiúnät, mbáadäp ja'a hoyhajt ja'a weenhajt hajxy jaduñ. Coo ja'a yaabä naaxwiimbä hajxy mbøcjuó'owät, cab hajxy tii mbáadät.

35-36 Mäniä Jesús tiägøøyy mädiaacpä nebiä jiamiøødhajxy nähix hahixø'ø yhidät coo hänäjty quiädaactägatsa'añ jadähooc. Mäniä miänaañ:

—Nähix hahixø'ø hajxy mhídät nebiä homioonsähajxiän coo ja'a wyiindsøn_nhajxy wyiimbídät mägaabiä mähuucpä maa ja'a pøc hu'ug jiadyijän. Jøønmøød hajxy jaduñ yhahixy. Coo ja'a wyiindsøn_nhajxy miech maa ja'a tiøjcän, mäniä hajxy yajtøjtägø'øy.

37-38 Pø jujyñä ja'a mioonsähajxy hänäjty, hoy ja tsuhmdä, hoy ja moññä, cumayaambä wyiindsøn_n jaduñ. Tøyhajt jaduñ. Høxtä yajcayøøjöp hajxy ja'a yhamdsoo wiindsøn_n.

39 Y jaanä jaduñduhmbä, coo ja'a cudøjc jaduñ ñajuó'owät mäduhnajtä ja'a mee'tspä miédsät, cab jaduñ ñä'ägä maahó'ogät nebiä mee'tspä jaduñ quia'a tøjtägø'owät.

40 Jaduñ mijts nähix hahixø'ø mhípäät. Cab hajxy mnä'ägä najuó'owät mänáajøch ngädaactägatsa'añ, høøch ja'a Diosquexypä.

41 Mäniä Pedro yajtøøyy:

—Wiindsøn_n, pøn miich hädaa myajmøødmädiaacypy, højtsyähajtiä tøgä nägø_xiä.

42 Mäniä Jesús yhadsooyy:

—Pøn jaduñ cudiuumb nebiatiä wyiindsøn_n yhane'emiän, je'eds jaduñ hoy copc-hajp maa ja'a wyiindsøn_n tiøjcän. Coo ja'a wyiindsøn_n maa ñøcxy, je'eduhñ mähmøøby coo jaduñ yajcáyät pøn jiiby hijp tøgooty.

43 Pø cudiuumbä copc-hajpä hänäjty hoy, coo ja'a wyiindsøn_n wyiimbijtagátsät, cumayáañäp jaduñ ja'a wyiindsøn_n.

44 Mäniä wyiindsøn_n yajnähdiä'añii coo jaduñ quiopc-hádät mäduhñtiä ja'a wyiindsøn_n miøødä cø_xiä.

45 Pero coo ja'a copc-hajpä miäná'anät coo ja'a wyiindsøn_n quia'a tsoj medsa'añ, coo ja'a miämoonsä yhäyoowhixät, coo tiägø'owät huucpä caabiä, coo miu'ugøøjät,

46 mäniä wyiindsøn_n miejtstägatsa'añ jaguiapxy, mäniä jaduñ jiaanç tehñ chaächtiuna'añii neby hajxy chaächtiunñijän ja'a hajxy ca'a mäbøjpä.

47 'Mädyii moonsä jaduñ ca'a mädia'agymiäbøjp, hoy jia najuø'øy nebiaty ja'a wyiindsøn_n yhane'emyii, jaanç tehñ chaächtiunáañäp je'e.

48 Pero mädyii moonsä ca'a mädia'agymiäbøjp je'eguiøxpä coo quia'a najuø'øy, cab jaduñ jiaty tsaächtiuna'añii. Pøn madiuung jaduñ yajcø'ødägøøyyäp, tsipcøxp jaduñ quiudiúnät nebiaty yhane'emyii.

49 'Páadyhøch yaa tøø ngäda'agy hädaa yaabä naaxwiin nebiä tsip jaduñ piädó'ogät. Weenä jäya'ayhajxy ñimiädsibø'øyyii.

50 Mobadäjpøch nho'oga'añ. Jiaanç tehñ chójpjøch njoot coo paquiä yhabáadät.

51-52 Páadyhøch yaa tøø ngäda'agy hädaa yaabä naaxwiin nebiä jäya'ayhajxy ñimiädsibø'øwøøjät. Cabä jäya'ayhajxy jootcujc ñä'ägä hidaannä. Nimiädsibø'øwáañäp hajxy tu'ugtøgooty. Nädägøøgpäna'c-hajxy yajmuga'añ ja'a nämetspäya'ay.

53 Miøødnimiädsibø'øwáañäp ja'a tiaj ja'a tieedyhajxy. Miø'ødhoc jiaxie'ebhajxy ñimiädsibø'øwa'añii.

54 Mänitä Jesús ja'a cu'ug ñämaayy:

—Coo ja'a joc piädø'øgy maa ja'a xøø quiuhnaxiän, hijxtahnd je'e coo tiu'uwa'añ.

55 Y coo jiøømbojy, hijxtahnd jaduhñ coo han yhida'añ. Y mnajuøøby hajxy jaduhmbä.

56 Tøyhajt jaduhñ, mnajuøøby hajxy jaduhñ nebiä xøø ñaxa'añ, pero cab hajxy mna-juø'øy tijaty jadáañäp habetáañäp. Hix, hamdsoo ja'a mjoothajxy quia'a tsocy coo hajxy jaduhñ mnajuø'øwät.

57 'Tii hoguihdujt hajxy hamdsoo coo mga'a jada'añ.

58 Coo pøn hñajty tøø xñäxø'øwø'øy, coo hñajty xyajnøcxy hagujc, tu'haamnøcxpä myajtødiägø'øwät. Pø caj, xchúmäp hajxy jaduhñ.

59 Y cab jaduhñ mdsoj pädsømät høxtä coonä mnuu'xy myajnáhwá'adsät pedyii. Jaduhñ mäwíináts Dios hajxy xyajcumädówät.

13

1 Mänitiä ja'a Jesús yhawáañäxä coo ja'a Pilato ja'a Galileabäya'ay hñajty näje'e tøø yajyagho'ogyii tsajtøghaguuy. Animalyøjxpä Galileabäya'ayhajxy hñajty. Jaduhñ hajxy hñajty quiuhdujthaty.

2 Mänitä Jesús miänaañ:

—Nej, mmánaamb hajxy jaduhñä, paady yø'ø häna'c-hajxy yagho'cä je'eguiøxpä coo maas may ja'a pojpä cädieey hajxy hñajty tøø tiuñ quejee ja'a miägunaaxhajxiä.

3 Høøch jaduhñ mänaamb, caj. Y coo mijts ja'a mhaxøøgcuhdujt hajxy mga'a najt-shixø'øwät, jaduhñ hajxy mjájpät nägøxiä.

4 Y yø'ø häna'c-hajxy nämajmocxtägøøgpä tøø yhó'oguiäbä jim Siloé mänaa ja'a møj torre tøø ñähgahbetiän, nej, mmánaamb mijts jaduhñä coo maas may pojpä cädieey hajxy hñajty tøø tiuñ quejee ja'a jiamiøødhajxy jim tsánaabiä Jerusalén.

5 Høøch jaduhñ mänaamb, caj. Y coo mijts ja'a mhaxøøgcuhdujt hajxy mga'a najt-shixø'øwät, jaduhñ hajxy mjájpät nägøxiä.

6 Mänitä Jesús miänaañgombä:

—Tsøc mädiáacäm, jii jäya'ay piids hijty tu'copc miøødä maa ja'a ñaaxän. Mänit hoy jia hixø'øy pø tøø tiøømbety. Cahnä hñajty tiøømbetyñä.

7 Mänitä mioonsä ñämaayy: “Huug hix yø'ø piids, tøø ndijy häxøpy tiøømbejnä cudägøøgjomøjt, y cahnä ñä'ägädä tøømbetyñä. Púxäts, xiøøbä jim ñä'a naaxnáhdäna'ay.”

8 Mänitä mioonsä miänaañ: “Wiindsøn, ween jiaac täna'ay tu'jomøjt. Nhuuc nä'a juhdajtú'udyhøch. Nhuuc tsooyø'øyhøch abonohaam.

9 Wehndä jaduhñ ñä'a tøømbédät. Pø caj, mänitøch nbúxät.”

10 Wiinghoocä Jesús hñajty jiiby yajwiingapxø'øy tsajtøgooty. Poo'xxiøøjooty hñajty je'e.

11 Jiibiä tadjäya'ay hñajty tu'ug. Majmocxtägøøgjomøjt ja'a pa'am hñajty tøø miähäyoy. Jøney ja'a mähdiøjc hñajty tøø yagjadyii ja'a møjcü'ujäm; ni cab hñajty hoy ñä'ägä tøwa'añ.

12 Coo ja'a Jesús ja'a tadjäya'ay yhiixy, mänit miøjyaaxy. Mänit miänaañ:

—Pi'maam, tøø ja'a mba'am jaduhñ xñähwa'açh.

13 Mänitä Jesús ja'a pa'amjäya'ay ñähdooñ. Mänitiä ja'a mähdiøjc tiøøyy. Mänit miänaañ coo ja'a Dios miøjjä jiaançhä.

14 Mänitä tsajtøjwiindsøn jiootma'ty je'eguiøxpä coo ja'a Jesús ja'a pa'am yajnaxxy ja'a poo'xxiøøjooty. Mänitä cu'ug ñämaayy:

—Tädujxøø ja'a Dios tøø quiunuu'xy coo hajxy ndúunämät. Mänitá mba'am hajxy min myajniñähwa'ačhii. Pero cab hajxy myajniñähwa'adsóøjät ja'a poo'xxiøøjooty.

¹⁵ Mänitá Jesús miänaañ:

—Mhøhndaacp mijts jaduñ. Nej, caj mijts mweey mburro hajxy myajnøøhu'ugy ja'a poo'xxiøøjootiä. Hoy hajxy hoy mja capxy mja hane'emy, cab hajxy hamdsoo hoy mgudiuñ.

¹⁶ Y hädaa tajjäya'ay, Abraham yhap yhoc hädaaduhñ. Majmocxtägøøgjomøjt hijty tøø yaghidyii pa'ammøød ja'a møjcü'ujäm. Nej, cábøch ja'a cuhdujt hijty nmøødä cooçh poo'xxiøøjooty tøø nyajñähwa'ačhä.

¹⁷ Mänitá Jesús miädsiphajxy chähdiuuñ. Pero ja'a cu'ug, jaançh tehñ xioonndaac hajxy jaduñ je'eguiøxpä coo ja'a Jesús ja'a hoy-yagjuøøñäjatypä hänajty tøø yajcähxø'ogy.

¹⁸ Mänitá Jesús miänaañ:

—Coo ja'a Dios ja'a miäjaa hänajty yajcähxø'oga'añ, jadúhñhøch nyajmäbaada'añ

¹⁹ nebiä habi'c mostazapajcän. Coo jäya'ay jaduñ ñí'ibät maa ja'a ñaaxän, cøxp jaduñ yéegät. Høxtä pe'eñhädiúnäp ja'a muuxyhajxy yhaa'xcøxp.

²⁰ Mänitá Jesús miänáangombä:

—Coo ja'a Dios ja'a miäjaa hänajty yajcähxø'oga'añ, jadúhñhøch nyajmäbaada'añ

²¹ nebiä to'oxiøjc tsajcaagychooy hajxy yajtuñän coo tsajcaagy hajxy yhädiuñ. Tägøøgquixøhñdy ja'a harina hajxy yajmäbädaagø'oy ja'a tsajcaagychooy. Mänit jaduñ hoy piädø'ogy.

²² Mänitá Jesús tiu'ubøjcy. Jerusalén hänajty ñøcxa'añ. Tu'haamnøcxpä ja'a Jesús hänajty yajñähixø'oy maa ja'a cajpthuungän.

²³ Mänitá Jesús miäyajtøøwä:

—Nej, näweeñtiä hajxy ñähwa'adsa'añ ja'a piojpä cädieeyhajxiä.

Mänitá Jesús yhadsooy:

²⁴ —Tsipcøxpä Diosmädia'agy hajxy hoy mgudiúnät nebiä cuhdujt hajxy hoy mmøødhädät neby hajxy jim mdägø'owät tsajpootyp. Nämaj hajxy jia wi'i tiägø'owa'añ, pero cab hajxy hänajty yajtägø'owa'añii coo cuhdujt hajxy hänajty quia'a møødä.

²⁵ Coo ja'a Dios ja'a tøjc hänajty tøø yhagøøñä, mänitá tøghagø'ow hajxy hänajty jia wi'i quiojxnoga'añ, pønjaty tøba'am hänajty tøø miähmø'oy. Mänit hajxy hänajty jia wi'i miäna'ana'añ: “Dios, yaghawa'ads yø'ø tøjc.” Mänitá Dios yhadsowa'añ: “Cábøch mijts nhixiä.”

²⁶ Mänit hajxy hänajty miäna'anáangombä: “Pero tøøds miich nmøødcaay nmøødhu'ugy; tøøds miich mmädia'agy xyajñähixø'oy mänaa jim mhitiän maa højts ngajptän.”

²⁷ Mänitá Dios hänajty yhadsowáangombä: “Tøø hajxy nnäma'ay coo hajxy nga'a hixiä. Wiimbit hajxy. Caj mijts mguhdujt ñä'ägä hoyyä.”

²⁸ Mänitá Abraham hajxy hänajty jim mhixa'añ tsajpootyp jim Dioswiinduum møødä Isaac møødä Jacob møødä Diosquexyhajxy nägøxiä. Mänit hajxy mjø'owa'añ mxu-udsa'añ coo ja'a Dios hajxy tøø xquia'a yajtägø'oy.

²⁹ Nøcxaambä jäya'ayhajxy miägaya'añ Dioswiinduum ja'a hajxy wiin-duhmyhagajpt-tsohmä.

³⁰ Jaaya'ayhajxy jäda'ahaty péjxäbä, näje'e møjtuuñg hajxy piaada'añ. Y jaaya'ayhajxy jäda'ahaty møjtuuñgmøødpä, näje'e tiuunghajxy piögáañäxä.

³¹ Mänitxøøbä ja'a fariseoshajxy näje'e miehch maa ja'a Jesúsän. Mänitá Jesús hajxy ñämaayy:

—Mdsónäp yaa coo ja'a Herodes xjia wi'i yajyagho'oga'añii.

³² Mänitá Jesús yhadsooy:

—Ca'awiindøyyä Herodes jaduñ. Nøcx hajxy näma'aw cooçh mejtsxøø tägøøgxøø njaac tuna'añ. Njaac høxquexáambiøch ja'a møjcu'uhajxy. Njaac yajmøcøpøgáambiøch ja'a pa'amjäya'ayhajxy. Mänitøch nduumbädø'owa'añ.

³³ Jexioo, mejtsxøø tægøøgxøøjoch njaac tu'uyo'oya'añ. Mänitøch jim nmedsa'añ Jerusalén. Cab jadhun yhawinmatsä coo ja'a Diosquexy wiingtuum yhó'ogät.

³⁴ Mänitä Jesús miänaangombä:

—Ja'a häna'c-hajxy jim tsänaabiä Jerusalén, tøø ja'a Diosquexy hajxy may quiuhga'açh. Tøøch mayhooç nja wi'i ñäma'ay coo ja'a yhaxøøgcuhdujt hajxy ñajtshixø'øwät; pero cab hajxy ñä'a najtshixø'øwa'añ.

³⁵ Cooch jim ngóodät Jerusalén, páquiøch jim nhida'añ. Mänitøch mijts jim nnähgue'egäangombä. Cábøch hajxy yxhixaañnä høxtä cóonøch hänäjty ngädaactägatsa'añ. Mänit hajxy hänäjty mmäna'ana'añ: “Jaançh tehñ miøj jaançh tehñ jiaançh ja'a Dios tøø quiéxiäbä.”

14

¹ Wiinghoocä Jesús ñøcxy mägaabiä maa ja'a fariseowiindsønä tiøjcän. Poo'xxiøøjooty hänäjty je'e. Jiibiä Jesús hänäjty miähijxna'ayíijäm tøgooty ja'a fariseoshajxy.

² Jiibiä mähdiojc hänäjty tu'ug qui'ixypa'ammøød. Jesúswiinduum hänäjty tiäna'ay.

³ Mänitä Jesús miäyajtøøyy ja'a ley-yajnahixøøbiähajxy møødä fariseoshajxy:

—Nej, jii cuhdujt jadhun coo ja'a pa'amjäya'ay myajmøcpøgät poo'xxiøøjootiä.

⁴ Pero cab hajxy waamb ñä'a hadsooyy. Mänitä Jesús ja'a pa'amjäya'ay ñähdoon, yajmøcpøjcy. Mänit ñämaayy coo wyiimbídät.

⁵ Mänitä fariseoshajxy ñämáayyägombä:

—Coo mijts mburro mweey quiuga'awø'øwät nøøjutjooty, nej, cab hajxy mänitiä myajpädsømäädä, hoy hänäjty jia poo'xxiøøjootiä.

⁶ Cab hajxy waamb ñä'ägä hadsooyy.

⁷ Mänitä Jesús yhiixy coo ja'a woybä wichpä hoyhänäabiejt hajxy jia wi'i yhøxta'ay. Mänit miänaañ:

⁸ —Coo ja'a pøc ja'a hu'ug hänäjty mänaa jiadyii, coo mijts myajwówät, cabä hoyhänäabiejt hajxy myaghänä'awø'øwät. Hix, coo häna'c maas cuhdujtmøødpä jiaac médsät,

⁹ mänitä cudøjc xñämä'awät: “Pädø'øg, mo'ow yø'ø hänäabiejt yø'ø häna'c tøø jiaac méchäbä.” Xyajtsähdiúnäp jadhun. Mänit nøcxy mhänä'ay maa ja'a hänäabiejt ca'a hojiatypän.

¹⁰ Pero jayøjp mhøxtá'awät ja'a hänäabiejt ca'a hojiatypä. Mänitä cudøjc xñämä'awät: “Mägu'ughajpä, yaa naç maa hädaa hänäabiejt hojiatypän.” Xquiumáyäp ja'a jäya'ayhajxy ja'a hajxy jim hänäabiä.

¹¹ Pøñ ja wi'i yajcumayaamb, yajpexaamb je'eduhñ. Pøñ ca'a yajcumayaamb, je'eds jadhun møjtägø'øwaamb.

¹² Mänitä Jesús ja'a fariseowiindsøn ñämaayy, ja'a hänäjty tøø miäwóyyäbä:

—Coo ja'a tsuunaç hänäjty mänaa myagjada'añii, cabä mmägu'ughajpähajxy mwówät, ni ja'a mbuhya'ayhajxy, ni ja'a mjujy ja'a mmägu'ughajxy, ni ja'a mmäjøøn ja'a mmädøjc-hajxy ja'a mäyøøbä. Xwioodägátsäp hajxy je'e ja'a miich hänäjty tøø mwóyyäbä.

¹³ Pero je'eds mwówäp ja'a häyoobä, ja'a ca'a hoybä, ja'a tecymia'adpä, ja'a wiindspä.

¹⁴ Hoy miich jadhun xquia'a ja woodägátsät, jootcujc mhídät jadähooc je'eguiøxpä coo ja'a hoyhajt ja'a weenhajt mbaada'añ mänaa ja'a jäya'ayhajxy hänäjty jiuypiojtägatsa'añän, ja'a Diosmädia'agy hajxy hänäjty tøø quiudiúñäbä.

¹⁵ Jimä jäya'ay hänäjty tu'ug yhäñä'ay meexäwiinduum. Mänitä Jesús ñämaayy:

—Jootcujc je'e, pøñ mägayaamb Dioswiinduum.

¹⁶ Mänitä Jesús miänaañ:

—Tsøc mädiáacäm. Jadhunä jäya'ay tsuunaç tu'ug yagjajtä. Mänitä jäya'ay may yajwoowä.

17 Coo hánajty tøø yhabaady, mänitá mioonsä ñämaayy: “Nøcx ja'a woybä wichpähajxy nämá'aw coo hajxy yhadó'ødsät, coo ja'a cay tøø yhabaatnä.”

18 Pero mänit hajxy nägøxiä yhadsooyy cooc hajxy quia'a näbaadø'øwáañäxä. Tu'jäya'ay miänaañ: “Tøøchä naax njuy; nøcxáambøch cham nhixa'añ. Huuc mee'x, cábøch xñäbaadø'øwáañä.”

19 Mänit wiingpä miänáangombä: “Tøøchä waj njuy mägooxmancuerno. Je'eéch nøcxy nyajtuunghabøga'añ. Huuc mee'x, cábøch xñäbaadø'øwáañä.”

20 Mänitá wiingpä jiaac mänáangombä: “Naambøcyhøch høøch; páadyhøch nga'a nøcxa'añ mägaabiä.”

21 Coo ja'a moonsä wyiimbijtagajch, mänit je'e cøjx ñägapxy waambaty hajxy yhadsooyy. Mänitá wyiindsøn jiaanč tehñ jiootma'ty. Mänitá mioonsä ñämáaguionbä: “Nøcx jim päyø'øguiä maa ja'a møjtu'ujän. Pønjaty jim mbaatyp, ja'a häyoobä, ja'a ca'a hoybä, ja'a tecymia'adpä, ja'a wiindspä, je'e jaduhñ mwoomínäp.”

22 Coo ja'a moonsä jadähooc wyiimbijtagajch, mänit miänaañ: “Wiindsøn, Tøøch ngudiuñ nébiøch miich tøø xyhane'emiän. Pero xiinä hawa'adspä.”

23 Mänitá wyiindsøn yhadsooyy: “Nøcx jim maa ja'a xu'udstu'ujän, maa ja'a padu'ujän; pønjaty jim najxp, mnämá'awäp hadsip coo hajxy myínät, nébiøch ndøjc jaduhñ yhúdsät.

24 Pero pønjátyhøch tøø nja yajwoyii, cab hajxy min quiaya'añ maač ndsuunax nyagjadyiijän.”

25 Nämayyä jäya'ay ja'a Jesús hánajty pianøcxy. Mänitá Jesús wia'wiimbijty. Mänit miänaañ:

26-27 —Pønjátyhøch xpianøcxaamb, wéenhøch xmiaas tsocy quejee ja'a tiaj ja'a tieedyhajxy chocy, møødä yhuch ja'a piuhya'ay; quejee ja'a yhuungä tio'oxy chocy. Pø caj, cábøch hoy xpianøcxät. Pøn ja'a jiugyhajt ca'a nähdujp, cábøch jaduhñ hoy xpianøcxät.

28 Coo pønä tøjc hánajty quioja'añ, jayøjpä xiädø'øñ miächoy pø pedáañäp jaduhñ.

29 Pø caj, mänit jaduhñ ñäxi'igøøjät coo hánajty quia'a maya'añ.

30 Jaduhñ hajxy miäná'anät: “Xiøøbä yø'ø craa ñä'a yajtsohndaacy; maa jaduhñ ñä'a yajmaayy.”

31 Coo ja'a reyhajxy hánajty ñimiädsibø'øwa'añii, jayøjp hajxy yhahixø'øy pø mäjäda'agaamb coo nämajcmil soldado jia møødä, coo ja'a miädsip ja'a soldado nähii'xmil miøødä.

32 Pø caj, jäguemiä ja'a quiuguexy quiéxät weenä miädsip jaduhñ miee'xy.

33 Jaaná jaduhñ mijtspä, coo hajxy cøxiä wiinä mga'a najtshixø'øwät ja'a høøchcøxpä, cábøch hajxy hoy xpianøcxät.

34 'Tuunghaatpä caan hit. Pero coo jiø'øwät, cab jaduhñ mänaa yhoyøñät.

35 Cab jaduhñ tiuunghaadaañä. Nä'a tägooby jaduhñ. Pø mwiinjuøøby hajxy, wéenhøch hádaa nmädia'agy xmiäbøjcä.

15

1 Mänitá Jesús ñämejtsä ja'a yajnähuudiutpähajxy nämay møødä cubojpä cugädieeybähajxy. Miädowaambiä miädia'agy hajxy hánajty.

2 Mänitá fariseos ja'a Jesús hajxy tiägøøyy mädiaacpä møødä ley-yajnähixøøbiähajxy:

—Cab jaduhñ yhoyyä coo yø'ø craa ja'a cubojpä ja'a cugädieeybä miägu'ughädät, coo miøødcáyät.

3 Mänitá Jesús tiägøøyy mädiaacpä:

4 —Tsøc mänáañäm, pøn meeg hánajty møød mägo'x, coo tu'ug tiägøyyät, nej, cabäda'a nägø'ø nädecypiä mhøxtá'awädä.

5 Y coo mbáadät, mänit mxoondá'agät. Mänitá meeg mdsehñø'øgät. Mänit mdsehñøcxät maa ja'a mdøjcän.

6 Coo jim̄ mmédsät, mänit mmäjøøn mmädøjc mwoomúgät møødä mmägu'ughajpähajxy. Mänit mmäná'anät: "Tsøg hajxy xoonḁáacäm; tøøchä meeg nbaady ja'a hijty tøø tiägóyyäbä."

7 Tøyhajt, jaanä jaduhñ hajxy jim̄ xioonda'agaambä tsajpootyp coo ja'a cubojpä cugädieeybä yhaxøøgcuhdujt hajxy ñajtshixó'øwät. Ja'a jaac nämädaaxc-hii'x-cumajmocxmädaaxc jäya'ayhajxy, ja'a hijty tøø quia'a tu'udägóyyäbä, cab hajxy jiaty näxoonḁa'aga'añii.

8'Tsøg jaac mänánañäm, mädyii to'oxiøjc xädø'øñ majc møød, coo tu'ug tiägóyyät, mänitä jøøn quiudøø'xø'øy. Mänit tiägø'øy tøjpeetpä hodia'agyhaamby, cham̄ jaduhñ yhøxta'ay.

9 Coo ja'a xädø'øñ piaady, mänitä miäjøøn miädøjc wioomucy møødä miägu'ughajpähajxy. Mänit miäna'añ: "Tsøg hajxy xoonḁáacäm; tøøchä xädø'øñ nbaady ja'a hijty tøø tiägóyyäbä."

10 Tøyhajt jaduhñ, jaanä jaduhñ ja'a Diosmoonsähajxy jim̄ xioonda'agaambä tsajpootyp coo ja'a cubojpä cugädieeybä yhaxøøgcuhdujt hajxy ñajtshixó'øwät.

11 Mänitä Jesús jadähooc miänaangombä:

—Tsøc mädiáacäm, jaduhñä jäya'ay hänajty tu'ug, metsc yhuung.

12 Mänitä muutspä ñämaayy ja'a tieedy: "Teedy, høøchä xädø'øñ móoyyác mädúhñtiøch hijty tøø xyajnáhdijy." Mänitä yhuunghajxy miooyy ja'a xädø'øñ.

13 Cujaboom cumaaxcä craa muutspä tiu'ubøjnä. Cøjxä xiädø'øñ miädu'ubøcy. Mänit ñøcxy jäguemnaax. Mänitä xiädø'øñ cøjx ñähaduñ ñähana'ma'awø'øy. Haxøøg hänajty wiädity.

14 Coo ja'a xiädø'øñ hänajty tøø quiøjxnä, mänitä yuu miehch maa ja'a craa hänajtiän. Mänitä yuu hoyhoy piáatänä.

15 Mänitä tuung hoy piaady mähädsømyagjøø'x.

16 Jia wi'i jiøø'xaamby hänajty ja'a hädsøm hänajty jiøø'xypä, pero cab hänajty tii ñä'ägä mo'oyii.

17 Mänit wyiinmahñdymejch: "Jim̄ maaçh ndeedy tiøjcän, jaançh tehñ quiu'uxiä ja'a moonsähajxy jim̄ quiay yhu'ugy. Y høøch, coøch yaa nmähmø'øwät, yuuhó'ogäbøch häyaa.

18 Nnä'ägä nõcxyhøch jim̄ maaçh ndeedy tiøjcän. Jadúhñhøch nnäma'awa'añ: Teedy, tøøch ngädieey ja'a Dioscøxpä møødä miichcøxpä.

19 Cábøch miich hawiinmats xyhuunghájnät. Hóyhøch miich xñä'a wá'anät moonsä."

20 Mänitä craa wyiimbijty, ñøcxtägajch maa ja'a tieedy tiøjcän.

'Møjnä hänajty quia'a mech, mänitä tieedy jiøjcuheebøøyyä. Mänitä tieedy jioot xiuu'tspøjcy jadähooc. Mänit päyø'øguiä hoy jiøjcubaadø'øy. Mänit ñähmäneeñ quiuhmäneeñ. Mänit chu'xy.

21 Mänitä yhuung miänaañ: "Teedy, tøøch ngädieey ja'a Dioscøxpä møødä miichcøxpä. Cábøch miich hawiinmats xyhuunghájnät."

22 Mänitä tieedy ja'a moonsä tu'ug ñämaayy: "Tsógäm, nõcx ja'a howyit yajpädsøm. Yajniguiubøgøø. Pädaacä cø'øjädsøhñdy tu'ug møødä xäguiø'øg.

23 Nøcxä wajhuung hajxy yagho'og ja'a ni'xpä. Tsøgä xøø hajxy yagjáltäm. Tsøg hajxy caayy tsøg hajxy húucäm.

24 Jadúhñhøch hädaa nhuung hijty nebiä ho'ogyipiän nebiä tägoybän. Pero tøøch jadähooc xyhajuø'øy. Y chaaçh tøø xñämech." Mänitä xøødsuu hajxy yagjältä.

25 'Ja'a craa mõjpä, jim̄ hänajty je'e camjooty. Mänit wyiimbijty. Coo hänajty miedsaannä maa tøjcän, mänit miädooyy coo hajxy wyi'i xiu'uxy, coo hajxy wyi'i yhech wyi'i piuty.

26 Mänitä moonsä tu'ug miøjyaaxy. Mänit miäyajtøøyy: "Tii jaduhñ jájtäp."

27 Mänit ñämaayy: "Tøø ja'a mhuch miehch hoy ween. Paadiä mdeedy ja'a wajhuung ni'xpä tøø yajyagho'ogyii."

28 Mänitā craa mōjpā jiootma'ty. Cab hānajt̄y tiōjtāgø'øwa'añ. Mänitā tieedy tiōjpādsøømy. Mänit hōy miānuu'xta'agyii coo tiāgø'øwāt.

29 Mänitā craa ja'a tieedy ñāmaayy: “Tøøch miich majiomøjt nja møødtuñ. Homiānāajøch miich mmādia'agy tøø nmābøjcām. Pero cábøch miich mānaa tii tøø xñā'ägā mo'oy, nébiøchā xøø jaduhñ nyagjadøøjāt møødhøch nmāgu'ughajpādøjc-hajxy.

30 Pero xiidsä mhuung tøø miech. Tøø miich mxädø'øñ xñā'ä yaghäyø'cä maa ja'a cuhhiñdo'oxiøjcän. Y yø'ø craagøxpä miichā wajhuung ni'xpä tøø myajyagho'ogyii.”

31 Mänitā tieedy miānaañ: “Huung, homiānāajøch miich tøø xmiøødhity. Y haagä miich mje'e jaduhñ mādúhñtiøch jii nmøødä.

32 Pero hawiinmats jaduhñ coo ja'a xøø nyagjājtāmät, coo nxoondáacāmät, je'eguiøxpä coo yø'ø mhuch tøø miech. Jaduhñ hijty nebiä ho'ogypiän nebiä tågoybän. Pero tøøds jadāhooc xyhajuøøyyām.”

16

1 Mänitā Jesús ja'a jiamiøød ñāmaayy:

—Jaduhñdsä mäyøøjäya'ay hānajt̄y tu'ug. Mänit hōy yhawáañxä coo ja'a xiädø'øñ hānajt̄y yajtúunäxä ja'a mioonsä.

2 Mänitā mioonsä miøjyaaxy: “Nej, tøyhajt̄ jaduhñ coøch miich ja'a nxädø'øñ xwyi'i yajtúunäjä. Hoorä, høøch móoyyāc mādúhñtiøch miich hijty tøø nyajcø'ødägø'øy. Cábøch miich nmoonsähadaañnä.”

3 Mänitā craa tiägøøyy tajpā maabiä: “Nébiøch jaduhñ nnä'ä jatcø'øwāt. Xpiøgáañbøch ja'a nduung jaduhñ. Cábøch møcmājaa nmøødä coøch nyu'uw coøch nbúxät. Tsähdiúnäbøch jaduhñ coøch ndägø'øwāt xädø'øñyujwaambä.

4 Tøøch nnajuø'øy nébiøch njatcø'øwāt, nébiøchā jäya'ayhajxy xtiøjmo'owāt, coøch nduung hānajt̄y tøø xpiøjcä.”

5 Mänit tu'ugjaty tu'ugjaty miøjyaaxy pønjaty ja'a wyiindsøn hānajt̄y mānuu'xyhajp. Mänitā tu'jäya'ay jayøbajt̄ miäyajtøøyy: “Mādúhñtiøch yø'ø nwiindsøn xmiānuu'xiä.”

6 Mänit yhadsooyy: “Mägo'xlatä acéitøch nmānuu'xiä.” Mänitā craa miānaañ: “Hādaa nocy jaduhñ mānaamb coo miich mägo'xlatä mmānuu'xyhaty. Chaadsä nocy wiingpä. Huug hädiuundägats coo juxychägui'xmajc-latä mmānuu'xyhaty.”

7 Mänitā tu'ug miäyajtøøgombä: “Míichäts, mādúhñtiä mnuu'xy.” Mänit yhadsooyy: “Mägo'xquipxøhñdyhøchä trigo nmānuu'xyhaty.” Mänitā craa miānaañ: “Chaadsä nocy wiingpä. Huug hädiuundägats coo mädaaxc-hii'x mmānuu'xyhaty.”

8 Manitā mäyøøjäya'ay ja'a mioonsä quiumaayy coo quiuhwijjiä. Maas cuhwijy ja'a Diosmädia'agy hajxy ca'a mabøjpä maa ja'a tiuunghajxiän quejee yø'ø Diosmädia'agy hajxy mabøjpä.

9 'Tsipcøxpä xädø'øñ quiøxa'añ hādaa yaabä naaxwiin. Myajtúnäp hajxy jaduhñ nebiä jäya'ay hajxy jaduhñ xmiägu'ughädät. Coo hānajt̄y tøø mho'nä, mänitā Dios jim xwyiingpøgät tsajpootyp.

10 'Pønä xädø'øñ hōy yajtuumb, hōy jia weñtiä, coo ja'a xädø'øñ hānajt̄y miayyā, mänit hōy yajtúunøgombät. Pero pønä xädø'øñ hōy ca'a yajtuumb coo hānajt̄y weñtiä, ni jaduhñ hōy quia'a yajtúnät coo hānajt̄y miayyā.

11 Jaduhñds je'e, coo mijts ja'a xädø'øñ hōy mga'a yajtúnät hādaa yaabä naaxwiin, caj mijts ja'a Dios xyajcø'ødägø'øwāt mädyii jaançh tsoobaadaamb.

12 Y coo wiingjäya'ay xiädø'øñ hajxy hōy mga'a yajtúnät, cabä hoyhajt̄ ja'a weenhajt̄ hajxy jim mbáadät tsajpootyp.

13 'Coo ja'a moonsä ja'a wyiindsøn metsc miädúnät, ja'a tu'jäyá'ayäbä, je'e miädia'agy hōy quiudiuunäp; ja'a tu'jäyá'ayäbä, cabä miädia'agy miäbøjcät. Jaanä jaduhñduhmbä, coo ja'a xädø'øñ hajxy mwil'i chógät, cabä Dios hajxy hōy mmädúnät.

14 Jimä fariseoshajxy hänajty näje'e miämädoona'ay. Jiaanč tehṃ piøcjuøöbiä fariseos ja'a xädø'ñ hajxy hänajty. Mänitä Jesús hajxy ñäxiicy.

15 Mänitä Jesús miänaañ:

—Mijts, mjaanč tehṃ yajcumayaamb hajxy jaduhṃ maa ja'a cu'ughagujcän. Pero xñajuøøyyäp ja'a Dios ja'a mwiinmahñdyhajxy. Mädyiijaty ja'a jäya'ayhajxy quiumaaby, je'edsä Dios jaduhṃ piejxyp.

16 'Ja'a Moisés miädia'agy hijty cudiúunäxäp møødä Diosquexy miädia'agyhajxy. Pero coo ja'a Juan ja'a Diosmädia'agy tiägøøyy yajwa'xpä, nägøxiä jäya'ayhajxy jia wi'i tiägø'owa'añ maa ja'a Diosmädia'aguiän.

17 'Pero cabä Moisés miädia'agy tiägøyya'añ. Maas paquiä ja'a tsajpootyp tiägøyyät møødä naaxwiin quejee ja'a Moisés miädia'agy.

18 'Pønä tio'oxiøjc høxmajtsp, tu'udägooby jaduhṃ coo wiingto'oxiøjc wyiingpójnät. Jaanä jaduhṃ tiu'udägoobiä pønä to'oxiøjc wiingpøjp ja'a tøø yhøxmachijäbä.

19 'Jaduhṃdsä mäyøøjäya'ay hänajty tu'ug. Jaanč tehṃ yajxon ja'a wyit hänajty miøødhaty. Jabom-jabom ja'a xøø hänajty yagjadyii jaanč tehṃ yajxon.

20 Jimä mähdiøjc hänajty tu'ug xiøhaty Lázaro. Jaanč tehṃ ñähbu'uds jaanč tehṃ quiuhbu'udsä Lázaro hänajty. Jim naxxy yhäña'ay naaxwiin maa ja'a mäyøøhäna'c tiøghaawän.

21 Je'e ja'a Lázaro hänajty jia wi'i quiayaamby tijaty jiiby cahb naaxwiin maa ja'a mäyøøjäya'ay mieexän. Høxtä nähwéhyyäxäbä Lázaro piu'uds hänajty ja'a húcäm.

22 Mänitä Lázaro yho'nä. Mänitä yháañmä yajnøcxäxä tsajpootyp maa ja'a Abraham wyiinduumän. Ja'a Diosmoonsä yajnøcx. Mänitä mäyøøjäya'ay yho'pä. Mänit yaj-naaxtägøøyyä.

23 Mänitä yháañmä yhädaacy møjcu'uhaam. Mänit tiägøøyyä tsaächtiúunäbä. Mänit chajhee'py. Jimä Abraham ñäheebøøyy møødä Lázaro.

24 Mänit yaaxy: “Abraham, høøch näxúu'tsäc. Høøchä Lázaro yajnäguéjxäc. Weenä quiø'øjp yajxoogy wéenhøch ndoots miṃ xyajtøjtsä. Jaanč tehṃ chaächpøjpøch yaa jøønjooty.”

25 Mänitä Abraham yhadsooyy: “Huong, jahmiets jaduhṃ nej tøø mdsäna'ay nej tøø mhäyoyyän yajxon. Pero Lázaro, jaanč tehṃ yhäyoob je'e hijty. Pero coo yaa tøø quioo'nä, jootcujc yhiñä. Míichäts jiiby tsaächpøjnäp.

26 Y chaads je'ebä, cabä najxtaact maa, coo ja'a Lázaro jiiby yhädá'agät, ni coo miich yaa mbédät.”

27 Mänitä mäyøøjäya'ay miänaañ: “Abraham, tunä mayhajt, huuc quex ja'a Lázaro jim maačh ndeediän.

28 Mägøøxc-høch nbuhya'ay jim. Weenä Lázaro nøcxy ñäma'ay coo ja'a yhaxøøgcuhdujt hajxy ñajtshixø'owät, neby hajxy yaa miṃ quia'a tsaächpøjpät.”

29 Mänitä Abraham miänaañ: “Jim hajxy je'e miøødä ja'a Moisés miädia'agy møødä Diosquexy miädia'agyhajxy. Je'e hajxy quiudiünäp.”

30 Mänitä mäyøøjäya'ay miänáangombä: “Abraham, tøyhajt jaduhṃ, pero coo ja'a ho'ogyjiäya'ay jim miédsät maačh ndeedyhajxiän, mänit mähøcypiä yhaxøøgcuhdujt hajxy ñajtshixø'owät.”

31 Mänitä Abraham yhadsóogombä: “Pø cab hajxy quiudiuna'añ nebiä Moisés jia hanehmiän, nebiä Diosquexyhajxy jia hanehmiän, nej, je'e hajxy nøcxy ñä'ä mähøquiä coo ja'a ho'ogyipiä jia médsädä.”

17

1 Mänitä Jesús ja'a jiamiøød ñämaayy:

—Tsipcøxpä jäya'ay hajxy xjia wi'i yajtu'udägøyya'añ. Pero pøn jaduhṃ jatcøøby, haxøøgjiada'añ.

2-3 Nägüentä hajxy mwädítät. Coo pøn yø'ø pigäna'c yajtu'udägóyyät, haxøøg jaduhñ jiadät. Mejor ñä'ägä mejjwyipø'øwøøjat molinopaanyo'xodsø'øy.

'Coo ja'a mbuhya'ay xñägädieeyø'øwät, mhójàp jaduhñ. Y coo xñámá'awät coo mmée'xät, mmée'xäp jaduhñ.

4 Coo juxtujc-hooc xñägädieeyø'øwät tu'xøøbä, y coo juxtujc-hooc xñámá'awät coo quia'a jatcø'øwaanñä jaduhñ, mmée'xäp jaduhñ.

5 Mänitä Jesús ñämaayyä ja'a jiamiøødhajxy:

—Højtsä mäjaa jaac móoyyác neby højts maas hoy nmäbógät.

6 Mänitä Jesús yhadsooyy:

—Coo mijts häxøpy mmäbøcy hoy jia tu'lii'xiä, coo yø'ø quepychaa hajxy mnámá'awät coo nøcxy ñimiejwyipø'øyii, xquiudiúunäbä mmädia'agyhajxy jaduhñ.

7 'Tsøg jaduhñ mänáanäm, coo ja'a mmoonsä tu'ug wyiimbídät camjooty, nej, jaduhñ mnámá'awädä: “Min cay.”

8 Caj pues, cab jaduhñ mnámá'awät. Jaduhñ mnámá'awät: “Høøch njøø'xy hädiúunäc, høøch puhbéjtäc maaçh cham गया'añ nhu'uga'añän. Mänit miich häyaa høxhaam mgáyät mhú'ugät.”

9 Ni mga'a Diosmó'owät coo ja'a mmädia'agy hänäjty tøø xquiudiuuñä.

10 Jaanä jaduhñ mijtspä, coo hajxy hänäjty tøø mgudiuñ nebiatiä Dios hänäjty tøø xyhane'emiän, jaduhñä Dios hajxy mnámá'awät: “Cab højts hawiinmats xmió'owät Dioscujú'uyäp. Jaduhyyä højts tøø ngudiuñ neby højts miich tøø xyhane'emiän” —nømä Jesús miänaañ.

11 Tu'uyóhñbä Jesúshajxy hänäjty. Jerusalén hajxy hänäjty ñøcxy. Mänit hajxy jim miejch maa ja'a Samarianaax miøødnibiaadyiiñ ja'a Galileanaax.

12 Mänit hajxy miejch maa ja'a cajpthuung tu'ugän. Mänitä Jesús jjøjcubaadøøyyä ja'a häna'c nämajcpä ja'a haxøøgpu'udsmøødpä. Pero cabä Jesús wiingón tiehm ñämejtsä.

13 Mänit hajxy yaaxy:

—Jesús, Wiindsón, højts näxúu'tsäc.

14 Coo ja'a Jesús jaduhñ yhijxy, mänit miänaañ:

—Nøcx hajxy niyajcähxø'øgøø maa ja'a teedyhajxiän.

Coo hajxy wyiimbijty, mänit hajxy øjx ñähwa'açh ja'a piu'uds.

15 Coo hajxy yhijxy coo hajxy hänäjty tøø ñähwa'açh, mänit tu'jäya'ay wyiimbíjcumbä. Mänit møc yaaxy coo ja'a Dios miøjjä jiaançhä.

16 Mänitä Jesús hoy wyiinjjcäda'agy. Høxtä mägujtsçädaac naaxwiin. Mänitä Jesús Dyiosmooyy. Samaria ja'a craa hänäjty chooñ.

17 Mänitä Jesús miänaañ:

—Nämajc ndijy hajxy tøø ñähwa'açh. Maa ja'a jiamiøødhajxy ja'a nädaaxtujcpä.

18 Jagooyyä hädaa craa nidiuhñ tøø wyiimbity Diospa'yaaxpä, y Samaria chooñ.

19 Mänitä Jesús ja'a craa ñämaayy:

—Tänaayyø'øg, nøcxnä. Coo tøø mmäbøcy, paadiä mbu'uds tøø cho'ogy.

20 Mänitä fariseos ja'a Jesús hajxy miäyajtøøyy mänaa hänäjty yhabaada'añ coo ja'a Dios ja'a miäjaa hänäjty yajcähxø'øga'añ. Mänitä Jesús yhadsooyy:

—Cab jaduhñ yaghixa'añ mänaa jaduhñ yhabaada'añ.

21 Cab hajxy jaduhñ miäna'ana'añ: “Xiids je'e”, o “Chaads je'e.” Tøø yhabaatnä coo ja'a Dios ja'a miäjaa yajcähxø'øga'añ.

22 Mänitä Jesús ja'a jiamiøød ñämaayy:

—Habaadaamb jaduhñ cooçh mijts xjia wi'i yhijxtägatsa'añ, høøch ja'a Diosquexypä; pero cábøch hajxy yhixa'añ.

23 Mänitä cu'ughajxy miäna'ana'añ cóogøch tyijy tøø ngäda'agy; pero cab hajxy mmäbógät.

24 Jaduhñhøch ngäda'aga'añ nebiä wädsucän coo xim yam tiägø'øy hajajpä.

25 Pero jaanč tehñ chaächpøgáambøch jayøjp. Cábøch jäya'ayhajxy xmiee'xa'añ ja'a hajxy jäda'ahatypä.

26 Cooč hänajty ngädaactägatsa'añ, jaduñnä jäya'ayhajxy hänajty jiatcø'øwa'añ nebiä jecyjäya'ayhajxy hänajty jiatcø'øyän mänaa ja'a Noé hänajty jyijän.

27 Wi'i quiaaby wi'i yhuucp hajxy hänajty, wi'i piøjp wi'i yhuucp hajxy hänajty. Mänitä Noé tiägøøyy barcojooty. Mänitä Dios ja'a nøøgomdägoy quiejxy. Cøjx hajxy jaduñ yho'ogy.

28 Jaduñ hajxy hänajty jiatcøøbiä mänaa ja'a Lot hänajty jyijän. Wi'i quiaaby wi'i yhuucp hajxy hänajty, wi'i jiuuby wi'i tiøøp hajxy hänajty, wi'i ñiip hajxy hänajty, wi'i tiøjcojp hajxy hänajty.

29 Coo ja'a Lot jim chohñ maa ja'a Sodomacajptootiän, mänitä jøøn tiägøøyy cahbä møødä azufre. Cøjxä jäya'ayhajxy yho'ogy.

30 Jaduñnä jäya'ayhajxy hänajty jiatcø'øwáangombä cooč hänajty ngädaactägatsa'añ, høøch ja'a Diosquexypä.

31 'Mänitxøø, pøn hänajty hijp tøjwiing, caj tiøjtägø'øwät coo cøxiä wiinä yajpädsómät; jaduhyä piäyø'øgät. Y pøn hänajty hijp camjooty, caj wyiimbídät maa ja'a tiøjcän; jaduhyä tiu'ubøjtøwät.

32 Høxtahmdsä Lot tio'oxiøjc jiajty.

33 Pønä jiugyhajt hädaa yaabä naaxwiin ja wi'i yaghoyø'øwaamb, haxøøgtuum piäda'aga'añii. Pero pønä jiugyhajt nähdugaamb, hodiium je'e ñä'ägä nøcxa'añ.

34 'Tøyhajt jaduñ, mänitcoods, nämetsc hajxy hänajty mia'awa'añ tu'ugmaabejt. Tu'ug yajnøcxa'añii, tu'ug yajmähmø'øwa'añii.

35 Jaduñnä to'oxiøjc-hajxy hänajty jiojtspä nämetsc. Tu'ug yajnøcxa'añii, tu'ug yajmähmø'øwa'añii.

36 Jaduñnä ya'adiøjc-hajxy hänajty nämetsc tiuumbä camjooty. Tu'ug yajnøcxa'añii, tu'ug yajmähmø'øwa'añii.

37 Mänitä Jesús miäyajtøøwä:

—Wiindsøn, maa jaduñ jiada'añii.

Mänitä Jesús yhadsooyy:

—Tsipecøxp jaduñ jiada'añii nébiøch chamñ nmädia'aguiän.

18

1 Mänitä Jesús tiägøøyy yajwiingapxøøbiä coo hajxy tehngajnä Dyiospa'yá'axät, coo hajxy mänaa quia'a jootmayhädät, hoyyä Dios quia'a ja tsoj hadsøwät.

2 Mänit miänaañ:

—Tsøg hajxy mädiáacäm. Jaduñnä jäya'ay hijty tu'ug quiuduunghaty. Cabä Dios hänajty wyiingudsähgø'øy ni ja'a miägajptjäya'ay.

3 Jimä yaamgto'oxy hänajty tu'ug maa ja'a cajptän. Ja'a miädsip hänajty jia wi'i ñäxø'øwø'øwaamb. Paady hänajty jabom-jabom ñøcxy maa ja'a cuduunğan neby jaduñ piuhbedøøjtät.

4 Cabä yaamgto'oxy miädia'agy hänajty ñä'ägä cudiunáanäxä. Mänitä cuduun tiägøøyy tajpä maabiä: "Cábøch pøn nwiingudsähgø'øy ni ja'a Dios ni ja'a jäya'ay.

5 Pero cooč yø'ø yaamgto'oxy xwyi'i yhadsipy, ngudiunáanäbøchä miädia'agy jaduñ, nébiøch min xquia'a wi'i yhadsíjpnät. Pø caj, jootmä'adäbøch häyaa."

6 —Nømä cuduun miänaañ, ja'a Dios ca'a wiingudsähgøøbiä.

7 Jaduñnä Dios ja'a yhuung piuhbedaambä, ja'a hajxy xøømdsuhm pa'yaaxpä.

8 Paquiä yhadsowa'añ. Pero høøch ja'a Diosquexypä, cooč yaa ngädaactägätsät hädaa yaabä naaxwiin, nej, je'enä ja'a jäya'ay ja'a Diosmädia'agy hajxy hänajty miäbøcyñjä.

9 Jimä jäya'ayhajxy hänajty näje'e, wi'i yajcumayaamb hajxy hänajty. Wyi'i piejxyp wyi'i tiehmby ja'a miägu'ughajpä hajxy hänajty. Mänitä Jesús miänaañ:

10 —Tsog hajxy mädiáacäm. Jaduhñä jäya'ay metsc ñøcxy tsajtøgooty Diospa'yaaxpä. Tu'ug hänajty tiuñ fariseo, tu'ug hänajty tiuñ yajñähjuudiutpä.

11 Ja'a fariseo, täna'a hänajty Dyiospa'ya'axy: “Haay Dios, Dioscujú'uyäp cooch nguhdujt quia'a haxøögä. Cábøch nmeech cábøch nboty, cábøchä to'oxiøjc nmøødä wiingpä. Cábøch jaduñ njatcø'øy nej yø'ø yajñähjuudiutpäñ.

12 Hayúujøch naxy nhity metsc-hooc tu'ugpä semana. Nyéjpiøchä diezmo homiänaajä.”

13 Jäguemjuøøbiä yajñähjuudiutpä hänajty tiäna'ay. Cab hänajty ñä'ägä tsajheebý. Jaanç tehñ jiootmayhajp hänajty je'e. Jaduhñ hänajty miäna'añ: “Haay Dios, høøch näxúu'tsäc. Nñajuøøbiøch cooch ngubojpä cooch ngugädieeyä.”

14 Tøyhajt jaduñ, coo ja'a yajñähjuudiutpä wyiimbijnä, tøø ja'a piojpa quiädieey hänajty yajñähwa'açhíijäm ja'a Diósäm. Pero ja'a fariseo, cab jaduñ yajñähwaatsä. Pøn ja wi'i yajcumayaamb, cabä Dios quiumay. Pero pøn ca'a yajcumayaamb, je'edsä Dios jaduñ quiumaaby.

15 Mänitä pigäna'c-huunghajxy näje'e wiomejtsä maa ja'a Jesúsän, nebiä Jesús jaduñ quiunúu'xät. Coo ja'a jiamiøødhajxy jaduñ yhjxy, mänit hajxy tiägøøyy hojpa ja'a pigäna'c-hajxy tøø wiomechíijäbä.

16-17 Mänitä Jesús ñämaayy ja'a jiamiøødhajxy:

—Weenç yø'ø pigäna'c-hajxy xñämiñ. Ca'a hajxy mhaducy. Yø'ø pigäna'c-hajxy, chojpiä jioothajxy coo ja'a Diosmädia'agy hajxy miäbøgät. Cab hajxy yajcumaya'añ. Pønä jioot jaduñ tsojpa coo ja'a Diosmädia'agy miäbøgät, pøn ca'a yajcumayaamb, je'eds jim nøcxaamb maa ja'a Dioswiinduumän. Tøyhajt jaduñ.

18 Mänitä Jesús miäyajtøøwä ja'a copc-hajpa tu'ug:

—Wiindsøn, mhoyhäna'c miich. Tiich ngudiünäp nébiøch cøjxta'axiøø njugyhädät nebiä Dios jiugyhatiän.

19 Mänitä Jesús yhadsooyy:

—Tiich coo xñäma'ay cooch nhoyhäna'cä. Jagooyyä Dios tu'ug yhooyä.

20 Mjajpy jaduñ nebiä Dios tøø xyhanéhmäm, tuhñds: “Cabä to'oxiøjc wiingpä mmøødhädät; ca'a mjäya'ay-yagho'ogy; ca'a nmeech; ca'a mhøhnda'agy; mwiingudsähgø'øwäp ja'a mdaj ja'a mdeedy.”

21 Mänitä copc-hajpa miänaañ:

—Ngudiúumbiøch jaduñ. Chúucnøch jaduñ nmädsøhndaacy ja'a wiinmahñdy hoybä.

22 Mänitä Jesús miänaañ:

—Jadu'tu'uyyä mga'a yajpedyii. Cøx toog mäduhñtiä mmøødä; mänitä häyoobäya'ay mnä'a mó'owät. Coo jaduñ mgudiünät, mänit jim mdägø'øwät tsajpootyp. Hoorä, høøch padu'ubøjcäc.

23 Mänitä craa jiootmabiøjcy, je'eguiøxpä coo hänajty jiaanç tehñ miäyøøjä.

24 Coo ja'a Jesús yhjxy coo ja'a craa hänajty tøø jiootmabiøcy, mänit miänaañ:

—Jaanç tehñ chip jaduñ coo ja'a mäyøøjäya'ayhajxy jim tiägø'øwät Dioswiinduum.

25 Maas paquiä ja'a camello ñaxø'øwät ja'a xuhñdyjutjooty quejee ja'a mäyøøjäya'ayhajxy jim tiägø'øwät Dioswiinduum.

26 Mänitä jäya'ayhajxy miänaañ, ja'a hajxy hänajty jim mämädoonaabiä:

—Pønäda'a jim nä'a tägø'øwäp Dioswiinduum.

27 Mänitä Jesús miänáangombä:

—Mädyii ja'a jäya'ayhajxy quia'a jadaambý, Dios mäbøcypiä jadaamb.

28 Mänitä Pedro miänaañ:

—Tøøds højts ngøxy najtshixø'øy mäduhñtiä højts hijty nmøødä, neby højts miich hoy nbanøcxät.

29 Mänitä Jesús yhadsooyy:

—Tøyhajt jaduñ, pønä tiøjc najtshixø'øwaamb, o ja'a tiaj ja'a tieedy, o ja'a piuhya'ay, o ja'a yhuung ja'a tio'oxy, ja'a Diosmädia'agyquiøxpä,

³⁰ piaadaamby ja'a maas hoybä ja'a maas weenbä hädaa yaabä naaxwiin. Y coo hänajty tøø yho'nä, mänit hänajty cøjxta'axiøø jiugyhada'añ nebiä Dios jiugyhatiän.

³¹ Mänitä Jesús ja'a jiamiøød hawiing wioonøcxy ja'a nämajmetspä. Mänit miänaañ:

—Yam hajxy nnøcxäm Jerusalén. Jímhøch njada'añ nhabeta'añ nébiøchä Diosquexyhajxy jecy xmiädiaaquiän, høøch ja'a Diosquexypä.

³² Xquiø'ødägø'øwáambøch ja'a teedywiindsønhajxy ja'a jäguembäya'ayhajxy. Xñäxi'igáambøch hajxy. Xwyiinwoonáambøch hajxy. Xwyiingutsujø'øwáambøch hajxy.

³³ Xwiobho'ogáambøch hajxy. Mänitøch hajxy xyagho'ogaannä. Y cudägøøgxøøjoch njujypiøga'añ.

³⁴ Cabä Jesús ja'a jiamiøødhajxy hänajty ñä'ägä wiinjuø'øy nebiä Jesús hänajty miädia'agy. Tsip hänajty miädia'agy.

³⁵ Coo ja'a Jesús hajxy hänajty tøø miäwiingoonnä maa ja'a cajpt hänajty xiøhatiän Jericó, jimä wiindspä hänajty tu'ug yhäña'ay tu'haam. Xädø'øñ hänajty yujwaamby.

³⁶ Coo miädooyy coo jäya'ay hänajty may wyl'i ñaxy, mänit yajtøøyy tii jájtäp.

³⁷ Mänitä yhawáañäxä coo ja'a Jesús hänajty ñaxy, ja'a Nazaret-tsohmä.

³⁸ Mänitä wiindspä yaaxy:

—Jesús, miichä David xyhaphajp xyhoc-hajp. Høøch hii näxúu'tsäc.

³⁹ Ja'a hajxy hänajty jawyiin najxpä, mänit hajxy yhojy coo yhamónät. Pero maas møc jadhñ jiaac yaaxy:

—Miiçhä David xyhaphajp xyhoc-hajp. Høøch hii näxúu'tsäc.

⁴⁰ Mänitä Jesús tiänaaxiøjpy. Mänit miänaañ:

—Yajmets yø'ø wiindspä yaa.

Coo ja'a mähdiøjc yajmejtsä maa ja'a Jesúsän, mänitä Jesús ja'a wiindspä miäyajtøøyy:

⁴¹ —Nébiøch miich nbuhbédät.

Mänitä mähdiøjc yhadsooyy:

—Wiindsøn, høøch hii yaghijxó'cäc.

⁴² Mänitä Jesús miänaañ:

—Tøø jadhñ mhijxø'øgy coo tøø mmäbøcy.

⁴³ Mänitiä ja'a wiindspä jiaanç hijxø'cy. Mänitä Jesús piadu'ubøjcy. Mänit tiägøøyy mänaambä coo ja'a Dios miøjjä jiaançhä. Ja'a jäya'ayhajxy jadhñ híxäbä, jadhñ hajxy miänaambä nägøxiä coo ja'a Dios miøjjä jiaançhä.

19

¹ Mänitä Jesús quiajptägøøyy Jericó. Mänit ñajxy cajptooty.

² Jimä mäyøøjäya'ay hänajty tu'ug ja'a xøhajpä Zaqueo. Wiindsøn hänajty tiuumby maa ja'a yajnähjuudiuutpähajxiän.

³ Ja'a Zaqueo, jia wi'i yhixaambiä Jesús hänajty, pero cab hänajty hoy yhixa'añ je'eguiøxpä coo hänajty jiaanç tehñ ñaaxypä, møødá jäya'ayhajxy hänajty jiaanç tehñ miayyä.

⁴ Mänit päyø'øguiä ñøcxy maa ja'a Jesús hänajty ñaxø'øwa'añän. Mänit piejty quepyquiøxp, nebiä Jesús jadhñ hoy yhíxät.

⁵ Coo ja'a Jesús jim ñajxy, mänit yuughee'py maa ja'a Zaqueo hänajty yhäña'ayän. Mänitä Jesús miänaañ:

—Zaqueo, tsógämäts, mänácäts, mejtsta'agáambøch jim maa miich mdøjcän.

⁶ Mänitiä ja'a Zaqueo miänajcy. Mänitä Jesús hoy yajtøjtägø'øy jootcujc.

⁷ Coo ja'a cu'ug jadhñ yhijxy, mänit hajxy tiägøøyy mänaambä cooc jadhñ quia'a hoyyä coo ja'a Jesús jim miejtstá'agät maa ja'a cubojpäya'ay cugädiejiäya'ay tiøjcän.

⁸ Mänitä Zaqueo tiänaayyø'cy. Mänitä Jesús ñämaayy:

—Wiindsón, huuc mäadow, mädúhñtiøch nmøødä, cúpc-høchä häyoobäya'ay nnä'a mo'owa'añ. Pønjátyhøch tøø nmämeech hønnda'agyimiädia'agyhaam, mädaaxcjadúhñtiøch nyajwiimbida'añ.

⁹ Mänitá Jesús miänaañ:

—Jädá'ajøchä piojpä quiädieeyhajxy nyajnáhwa'adsaanä hädaa tøgootypä, je'eguiøxpä coo yhAbraham yhap yhocä hädaa craabä, hoy jia nä'a yajnáhjuudiu'udy.

¹⁰ Páadyhøch yaa tøø ngäda'agy hädaa yaabä naaxwiin, høøch ja'a Diosquexypä, nébiøchä jäya'ay piojpä quiädieeyhajxy jaduñ nyajnáhwá'adsät. Jadúhñhøch njoot chocy.

¹¹ Mäwiingóonnäbä Jesúshajxy hánajty Jerusalén. Miädóowäbä cu'ugä Jesús miädia'agy hánajty. Jaduhñ hajxy hánajty miäna'añ cooc hánajty tøø yhabaatnä coo ja'a Dios ja'a miäjaa hánajty yajcähxø'øga'añ.

¹² Paadiä Jesús tiägøøyy mädiaacpä:

—Jaduhñä mäyøøhäna'c hánajty tu'ug. Nøcxaamb hánajty jäguemnaax coo hánajty mio'owa'añii mõjtuung maa ja'a yhamdsoo cajptän. Mänit hánajty wyiimbida'añ.

¹³ Coo hánajty tiu'ubøga'añ, mänitá mioonsä ja'a majcpä miøjyaaxy. Mänitá maxiädø'øñ hajxy nägøxiä yajcø'ødägøøyyä. Mänitá mäyøøjäya'ay miänaañ: “Mädúhñtiøch jäguem nhida'añ, myajmayø'øwäp hädaa xädø'øñ hajxy.” Mänitá craa tiu'ubøjcy.

¹⁴ Jaançh tehñ xiøøghájtäbä craa jim maa ja'a yhamdsoo cajptän. Mänitá cu'ugä capxy quiejxy coo hajxy hánajty quia'a tsoey coo ja'a craa jim quiopc-hádät maa ja'a quiajpthajxiän.

¹⁵ Coo ja'a craa hánajty tøø tiuungwiingpøjnä, mänit wyiimbijnä maa ja'a quiajptän. Mänitá mioonsä miøjyaaxy ja'a xädø'øñ hajxy hánajty tøø yajcø'ødägø'øyjjäbä. Yajtøwaambiä craa hánajty mäduhñjaty hajxy hánajty tøø yajmayø'øy.

¹⁶ Mänit tu'ug miejch. Mänit miänaañ: “Wiindsón, majcjaduhñtiä ja'a mxädø'øñ tøø miayø'øy.”

¹⁷ Mänitá craa yhadsooyy: “Jaançh tehñ yhoy miich tøø mgudiuñ. Wéeñtiøch miich hijty tøø nyajcø'ødägø'øy. Coo hoy tøø mgudiuñ, páadyhøch miich nyajnáhdijy coo mgopc-hádät maa yø'ø majcpä cajptän.”

¹⁸ Mänitá wiingpä miejtpä. Mänit miänaañ: “Wiindsón, mägoøxcjaduhñtiä ja'a mxädø'øñ tøø miayø'øy.”

¹⁹ Mänitá craa yhadsoogombä: “Jim miich mgopc-hada'añ maa ja'a mägoøxpä cajptän.”

²⁰ Mänitá wiingpä jiaac mejtpä. Mänit miänaañ: “Wiindsón, chaadsä mxädø'øñ. Paayyäjóotyhøch hijty nyaghity.

²¹ Miichhøch hijty ndsähgøøby je'eguiøxpä coo miich mjootmøjjä, coo miich myajpädø'øgy maa hijty tøø mga'a päda'aguiän.”

²² Mänitá mäyøøhäna'c miänaañ: “Caj miich hoy tøø mgudiuñ. Hamdsoo miich mmäna'añ cooçh njootmøjjä, cooçh nyajpädø'øgy maach hijty tøø nga'a päda'aguiän.

²³ Jimhøch nxädø'øñ häxøpy tøø xpiädaacä maa ja'a bancon, neby jaduñ cu miayøøyy, mädúhñtiøch hoy jäguem tøø nwädity.”

²⁴ Mänitá craa ja'a jäya'ay ñämaayy ja'a hajxy hánajty jiiby tänaabiä: “Pøjcä yø'ø craa yø'ø xädø'øñ. Mo'ow yø'ø craa ja'a xädø'øñ majcjaduhñtiä tøø yajmayø'øyábä.”

²⁵ Mänit hajxy yhadsooyy: “Wiindsón, tisän, ximä xädø'øñ may miøødäbä.”

²⁶ Mänitá mäyøøhäna'c yhadsooyy: “Høøch jaduñ mänaamb; pøn may møød, maas may mio'owa'añii. Pero pøn weeñtiä møød, pøgáanäxäp cøxiä mäduhñtiä miøødä.

²⁷ Y ja'a nmädsiphøchhajxy, ja'a høøch hajxy xxiøøghajpä, yajmín hajxy yaa; yagho'og hajxy yaa maach nwiinduumän” —nømä Jesús miänaañ.

²⁸ Mänitá Jesúshajxy tiu'ubøjcombä. Jerusalén hajxy hánajty ñøcxy.

²⁹ Mäwiingóomb hajxy hánajty maa ja'a cajpt hánajty metsc xiøhatiän Betfagé møødä Betania, mäwiingón maa ja'a tun hánajty xiøhatiän Olivos. Mänitá Jesús ja'a jiamioød metsc

30 ñämaayy:

—Nøcxø'øg hajxy jim maa yø'ø cajptän. Jim cajtpa'a ja'a burrohuung hajxy tu'ug mbaada'añ cuxoch. Cahnä pøn ñä'ägä yaghäñaabietyña.

Mmäguej'øwäp hajxy; mänit hajxy yaa mmämínät.

31 Coø pøn xmiäyajtówät tii ja'a burro hajxy coø mmäguej'øy, mänit hajxy mhadsówät coöch høøch jaduhñ nmäna'añ.

32 Mänitä burro hajxy hoy jiaanč paady nebiä Jesús hänajty tøø miäna'añän.

33 Jimä burro hajxy hänajty miäguej'øy, mänit hajxy ñämaayyä ja'a cuburrohajxy:

—Tii yø'ø burro hajxy coø mmäguej'øy.

34 Mänit hajxy yhadsooyy:

—Højts nwiindsøn jaduhñ mänaamb.

35 Mänitä burro hajxy yajnøcxy maa ja'a Jesúsän. Mänitä wyit hajxy piädaacy burronähgøxp. Mänitä Jesús hajxy yajpejty burronähgøxp.

36 Mänitä cu'ugä wyit hajxy tiägøøyy najtswidsoøbiä tu'haam maa ja'a Jesús hänajty ñaxø'øwa'añän.

37 Olivostunmøjcä tu'u hänajty ñaxø'øy. Coø hajxy miejtsnä maa ja'a wiinmänacän, mänitä Jesús jiamioødhajxy tiägøøyy yaaxpä jojpä je'eguiøxpä coø hajxy hänajty xioonda'agy. Nämäyyä Jesús jiamioødhajxy hänajty. Jaduhñ hajxy hänajty ya'axy coø ja'a Dios miøjjä jiaančhä, coø hajxy hänajty tøø yhixy ja'a hoy-yagjuøøñäjatypä ja'a Jesús hänajty tøø yajcähxø'øguiäbä:

38 —Møj jaanč hädaa gobiernä; Diosquexy hädaaduhñ. Møj jaančhä Dios jim tsajpootypä; ween hajxy jim xioonda'agy —nøm hajxy hänajty ya'axy.

39 Jimä fariseoshajxy hänajty näje'e piädäna'ay. Mänitä Jesús hajxy ñämaayy:

—Wiindsøn, mhøjäp yø'ø mjamioødhajxy.

40 Mänitä Jesús yhadsooyy:

—Hóyhøch yø'ø häna'c cu nja hoj, cab häna'c häyaa ñä'ä hamóombät; maas møc hajxy ñä'ägä yá'axät.

41 Coø ja'a Jesús hänajty jim miedsaannä Jerusalén, coø jaduhñ ñäheebøøyy, mänit tiägøøyy jøøbiä.

42 Mänit miänaañ:

—Yø'ø Jerusalénpäya'ayhajxy, coöch hajxy cu xchojcy, jootcujc hajxy häxøpy yhity. Tøø yhabaady coø ja'a cu'ughajxy cu jiootcugøøyy. Pero cab hajxy wyiinjuø'øwa'añ. Cábøch hajxy xchoga'añ xmiee'xa'añ.

43 Haxøøg hajxy jiada'añ yhabeta'añ. Medsaambä miädsiphajxy. Mänit hajxy jiuhguraajø'øwa'añii piquiä.

44 Cab hajxy yajmäjäda'aga'añii. Yagho'ogáanäp hajxy jaduhñ. Mänitä quiajpthajxy quihdägoyya'añ. Paady hajxy jaduhñ jiada'añ yhabeta'añ coöch hajxy jaduhñ xquia'a tsoga'añ.

45 Coø ja'a Jesús miehch cajptooty, mänit tiägøøyy tsajtøgooty. Mänit tiägøøyy høxquejxpädsøømbä pønjaty jii by juuby too'p.

46 Mänit miänaañ:

—Jim jaduhñ myiñ cujaay maa ja'a Diosmädia'aguiän: “Jue'ečh ndøjc hajxy xwiáanät coöch hajxy jii by xpia'yá'axät.” Ja'a Dios jaduhñ mänaañ. Pero mijts, jaduhñ hajxy mwa'añ meedsøhñdy.

47 Najxpäxøø ja'a Jesús hänajty jii by yajnähixø'øy tsajtøgooty. Pero ja'a teedywiindsøn hajxy møødä ley-yajnähixøøbiähajxy, quiojyquiapxytiumby hajxy hänajty nebiä Jesús hajxy yaghó'ogät, møødä cu'ugwiindsøn hajxy.

48 Pero cab hajxy hänajty ñajuø'øy neby hajxy jiatcø'øwät je'eguiøxpä coø ja'a cu'ug ja'a Jesús miädia'agy hajxy hänajty jiaanč tehñ miämädoonaayyä.

20

¹ Jiibiä Jesús ja'a cu'ug ja'a Diosmädia'agy hänäjty yajnahixø'ø y tsajtøgooty, mänitä Jesús ñämejtsä ja'a teedywiindsøn

² Mänit hajxy miänaañ:

—Pønä cuhdujt tøø xmio'oy coo ja'a cu'ug tøø mhøxquejxpädsømy tsajtøgooty, y coo tøø mdägø'ø y yajnahixøøbiä.

³ Mänitä Jesús miänaañ:

—Chaads mijts nmäyajtøwaambä. Mhadsówäp hajxy jaduñ:

⁴ Coo ja'a Juan hijty wiädity mäyajnäbejpä, pøn jaduñ quejx, Dios tögä jäya'ayä.

Cab hajxy ñä'ä hadsooyy.

⁵ Mänit hajxy tiägøøyy yajcapxiøøbiä:

—Neby hajxy nnä'ä hadsówämät; coo hajxy nmänáañämät coo ja'a Dios quiejxy, mänit yhadsowa'añ: “Tii hajxy coo mga'a mabøjcä.”

⁶ Y coo hajxy nmänáañämät coo jäya'ay quiejxy, mänitä cu'ug hajxy xquiuhgá'tsämät. Hix, haagä mänaamb hajxy jaduñ coo ja'a Juan tøø quiexyíjäm ja'a Dios.

⁷ Mänit hajxy yhadsooyy coo hajxy quia'a najuø'ø y pønä Juan quejx mäyajnäbejpä.

⁸ Mänitä Jesús miänaañ:

—Ni høøch nga'a nägapxa'añ pøn

⁹ Mänitä Jesús ja'a cu'ug tiägøøyy møødmädiaacpä:

—Jaduñä jäya'ay tsaatypcam piädaacy maa ja'a ñaaxän. Mänit yhadoo'tujcy. Mänit tiu'ubøjcy. Jäguem ñøcxy. Jegaamb hänäjty jim.

¹⁰ Coo ja'a tsaatypcam yhabaaty, mänitä mioonsä tu'ug quiejxy coo ja'a tsaatypcam pihmo'owøøjät. Mänitä mioonsä quioxhó'cäxä. Caj tii yajmäwiimbijtä.

¹¹ Mänitä mioonsä tu'ug quiejxcumbä. Jaduñä mähdiøjc quioxhó'cägombä. Haxøøgjaty jaduñ ñämaayy. Ni je'e tii quia'a mooyy.

¹² Mänitä wiingpä jiaac quiejxcombä. Nähdsäbit cuhdsäbit ja'a mähdiøjc piädáacänä.

¹³ Mänitä cudsatypcam miänaañä: “Nébiøch nnä'ä jatcø'owät. Tøøch cham nnajuø'øy. Hädaa nhúunghøch, njaançh tehñ chøjpiøch njaançh tehñ pia'häyóobiøch hädaa. Nhuuc quéyhøch hädaa. Coo yhøxcabøøjät, wehñä wyiingudsähgø'owøøjät.” Mänitä yhuung quiejxy.

¹⁴ Coo yhøxcajpä, mänit hajxy tiägøøyy ñiñämáayyäbä, ja'a tsaatypcam hajxy hänäjty hajoodiujpä: “Ja'a cudsatypcam yhuung yø'ø. Coo yø'ø tieedy jaduñ yhó'ogät, yø'ø mähmø'øwaamb cudsatypcam. Tsøg hajxy yaghó'cäm neby hajxy jaduñ nmämähmøøyyämät.”

¹⁵ Mänitä cudsatypcam yhuung yhøxwijtspädsøømäxä. Mänit hajxy yagho'cy.

Mänitä Jesús yajtøøyy:

—Nebiä cudsatypcam jiatcø'owa'añ coo yhuung yaghó'cäxä.

¹⁶ Nøcxaamb yagho'tägatsa'añ ja'a yhuung tøø yaghó'cäxäbä. Mänitä wiinghäna'c ja'a tsaatypcam yaghajoodiuga'añ.

Coo ja'a cu'ughajxy jaduñ miädooyy, mänit hajxy miänaañ:

—Ni ja'a Dios jaduñ quia'a mäná'anät.

¹⁷ Mänitä Jesús ja'a cu'ug wyiinhee'ppejty. Mänit miänaañ:

—Nej mijts ja'a Diosmädia'agy myajmädia'agytiägø'ø y coo miäna'añ:

Ja'a tsaä mädyii ja'a tøjcojpä hajxy quia'a nä'ägä cumaayy, je'e nä'ägä tuundsoñ.

(Jesús hamdsoo niñänøømä nebiä tsaajän je'eguiøxpä coo hänäjty quia'a tsoy quia'a mee'xyíjäm ja'a cu'ug. Pero mo'owáañäbä Jesús hänäjty møjtuumg.)

¹⁸ Mänitä Jesús miänáañgumbä:

—Pøn jaduñ cá'awäp yø'ø tsaanähgøxp, tägóyyäp jaduñ. Y coo pøn ñähgahbedøøjät yø'ø tsaä, tägóyyäp je'ebä.

19 Mänitiä ja'a Jesús jia madsaanä ja'a teedywiindsøn

20 Mänitä häna'c hajxy yajnahdijy coo hajxy ñibiäda'agøøjät nebiä hoyhäna'cän. Nócäp hajxy miädoy nebiaty ja'a Jesús hänajty miädia'aga'añ. Coo ja'a Jesús quiapxtägóyyät, mänit hajxy ñäxø'øwø'øwa'añ maa ja'a gobernadorän.

21 Mänitä Jesús hajxy miäyajtøøyy:

—Wiindsøn, nnajuøøby højts coo miichä tøyhajt myajnahixø'øy ja'a Diosmädia'agy. Hopiønä miich mmøødmädia'agy; y caj miich pøn mmøøjpäda'agy, hoy pøn møjtuung jia møødä.

22 Højtsä tøyhajt móoyäc. Coo højtsä gobiernä hänajty xyagjuy xyajmo'ona'añ, nej, hoyyada'a jaduñ coo højts njúyädä.

23 Pero ñajuøøbiä Jesús hänajty coo hänajty jia yajcapxtägoyya'añii. Mänit miänaañ:

—Tiich hajxy coo xjia wi'i jiojcapxø'øwa'añ.

24 Høøchä xädø'øñ tu'ug yaghíjác. Pøn yhajahñaxy yø'øduñ, pøn xiøø yø'øduñ.

Mänit hajxy yhadsooyy:

—Ja'a gobiernä.

25 Mänitä Jesús miänáangombä:

—Pues, mmó'owäp ja'a gobiernä hajxy tijaty yø'ø jie'ehajpy. Y mmó'owäbä Dios hajxy tijaty yø'ø jie'ehajpy.

26 Cabä Jesús hajxy hänajty hoy yajcapxtägoyya'añ cu'ughagujc. Yagjuøøyy hajxy jaduñ coo hoy yhadsooyy. Y cab hajxy waamb miänaañä.

27 Mänitä Jesús ñämejtsä ja'a saduceoshajxy näje'e, ja'a hajxy jaduñ mänaambä cooc tyijy ni pøn quia'a jujypiøga'añ. Mänitä Jesús hajxy ñämaayy:

28 —Wiindsøn, jaduñdsä Moisés jecy quiujahy, cooc ja'a ya'adiøjc hänajty tu'ug tøø yho'ogy, y cooc ja'a yaamgto'oxy ja'a huung quia'a møødä, mänitägä quiapy wyi- ingpögät, nébiägä yhuung jaduñ miähmø'øwät ja'a piuhya'aguiøxpä.

29 Jaduñä häna'c-hajxy hänajty, näjuxtujc tu'que'ex. Ja'a craa møjpä, mänit jia pøjcy. Mänit yho'cy. Nitu'ugtä yhuung quia'a mähmøøyy.

30 Mänitä jioðsømy ja'a yaamgto'oxy jia wiingpøjcombä. Mänit je'e yho'combä. Nitu'ugtä yhuung quia'a mähmøøbiä.

31 Mänitä yaamgto'oxy ja'a quiapy jia wiingpøjcombä jatu'ug. Jaanä jaduñ yho'combä. Nägøxiä ja'a yaamgto'oxy ja'a quiapy jia møødtsänaayy ja'a näjuxtujpä; cøjx hajxy yho'ogy, y ni pøn yhuung quia'a mähmøøyy.

32 Mänitä yaamgto'oxy jiaag ho'pä.

33 Hoorä, coo hajxy hänajty tøø jiuypiojñä, pønä to'oxiøjc tøyhajt møødtsäna'awaamb ja'a näjuxtujpä, jim tsajpootyp.

34 Mänitä Jesús yhadsooyy:

—Hädaa yaabä naaxwiin, pøjp huucp ja'a jäya'ayhajxy yaa.

35 Pero pønjaty jujypiøgaamb, pønjaty nøcxaamb tsajpootyp, cab hajxy jim piøgaañä yhu'ugaañä.

36 Cab hajxy mänaa yho'tägatsaañä. Coo hajxy hänajty tøø jiuypiojñä, jaduñ hajxy miähmø'øwaañä nebiä Dioshuungän, nebiä Diosmoonsän.

37 Hamdsoo ja'a Moisés hajxy xyajnahixøøyyäm coo ja'a ho'ogyjiäya'ayhajxy jiu- jypiojga'añ, jiiby maa jaduñ myiñän coo ja'a hujtshuung hänajty tioy tu'ug. Jaduñ jiiby myiimbä coo ja'a Dios wyiingudsähgø'øyíjäm ja'a Abraham møødä Isaac møødä Jacob.

38 Cabä Dios wyiingudsähgø'øyíjäm ja'a ho'ogypiähajxy. Ja'a jujcyjiäya'ayhajxy, je'eds hajxy jaduñ wiingudsähgøøby ja'a Dios.

39 Mänitä ley-yajnahixøøbiähajxy näje'e miänaañ:

—Wiindsón, yajxón miich jaduñ mmädia'agy.

⁴⁰ Cabä Jesús hajxy waamb ñämaañä je'eguiøxpä coo hajxy hñajty chähgøñä.

⁴¹ Mänitä Jesús miänaañ:

—Tii hajxy coo mmäna'añ cooc ja'a David yhuunghaty ja'a Diosquexy.

⁴² Hamdsoo ja'a David miänaañ maa ja'a Salmos quiujahyyän:

Mänitøchä Dios ja'a nwiindsón xñämaayyä:

“Yaads min häña'aw nhahooguiø'háampiøch,

⁴³ høxtä cóonøchä mmädsip tøø nga'a yajmäjädáacäm.”

⁴⁴ Coo ja'a David ja'a Diosquexy hamdsoo ñämaayy “wiindsón”, nébiäts jaduñ ñä'ä huunghädät.

⁴⁵ Jimä cu'ughajxy hñajty nägøxiä miämädoona'ay, mänitä Jesús ñämaayy ja'a jimämiøødhajxy:

⁴⁶ —Ca'a yøø ley-yajnähixøøbiä miädia'agy hajxy mmäbøjcä. Yoñwitmøød hajxy wyi'i wiädity je'eguiøxpä coo hajxy wyi'i yajcumaya'añ. Jaduhnä jioothajxy jia tsocy coo hajxy jim wyiingudsähgø'øwøøjät halaplaaz. Jiiby hajxy yhäña'awa'añ maa ja'a häñaabiejt yajxonjatypän jiiby tsajtøgooty, chaads jim maa ja'a xøø jiadyiijän.

⁴⁷ Y piøjcäbä yaamgto'oxy ja'a tiøjc hajxy. Wi'i yajcumayaamb hajxy, paady hajxy wyi'i Dyiospa'ya'axy jecyjiaty. Hanaxiä hajxy chaächtiuna'añii.

21

¹ Tsajtøgootiä Jesús hñajty, mänitä mäyøøjäya'ay yhiixy coo xädø'øñ hajxy hñajty quiuyoxøøy.

² Mänitä yaamgto'oxy tu'ug yhiixpä ja'a jaanç tehñ yhäyoobä. Jagooyyä xädø'øñhuung hñajty miøødá metsc. Je'eduhñ cøjx yecy.

³ Mänitä Jesús miänaañ:

—Tøyhajt jaduñ, maas may hädaa yaamgto'oxy häyoobä ja'a xädø'øñ tøø quiuyoxøøy quejee yøø mäyøøjäya'ayhajxy.

⁴ Yøø mäyøøjäya'ayhajxy, je'e hajxy quiuyoxøøy mäduhñtiä hajxy tøø yajcunaxy. Pero hädaa yaamgto'oxy, je'e cøjx quiuyoxøøy mäduhñtiä hijty ñägaya'añ.

⁵ Jiibiä jäya'ayhajxy hñajty näje'e tsajtøgooty. Jaduhn hajxy hñajty miädia'agy coo ja'a tsaajaanç tehñ yajxonjatiä, coo hajxy tøgooty yajxón jiaanç tehñ yhiixy nebiatiä jäya'ayhajxy hñajty tøø piäda'aguiän. Mänitä Jesús miänaañ:

⁶ —Habaadaamb jaduñ coo hädaa tsajtøjc jyida'añ cøxiä.

⁷ Mänitä Jesús ñämaayyä:

—Wiindsón, mänaa jaduñ jiada'añii. Tii hijxtahñd jaduñ naxaamb coo hñajty tøø yhabaatnä.

⁸ Mänitä Jesús yhadsooyy:

—Mniyajcopcø'øwøøjöp hajxy, cab hajxy myajwiinhøønät. Nämäy hajxy wiädita'añ. Jaduhn hajxy miäna'ana'añ: “Høøchä Dios tøø xqueixy”, y “Tøø yhabaatnä.” Pero cab hajxy mmäbøgät.

⁹ Coo hajxy jaduñ mmädoyhädät coo tsip piädø'øga'añ, cab hajxy mdsähgø'øwät. Jayøjpä tsip jiada'añii, cahnä hñajty yhabaadyñä.

¹⁰ Mänitä Jesús jiaac mänaañ:

—Nimiädsibø'øwáañäbä wiingcajptjaty.

¹¹ Møc hujx jiädita'añ. Jadáañäbä yuuxøø møødá pa'am wiinduhmyhagajpt. Y jimä høchähgøøñäjatypä quiähxø'øga'añ tsajtwiing.

¹² 'Pero cahnä hñajty yhabaadyñä, xmiadsaamb mijts ja'a jäya'ayhajxy. Xyajncxaamb hajxy maa ja'a tsajtøjcän. Jiiby hajxy xñäxø'øwø'øwa'añ. Xchumaamb hajxy jaduñ. Xyajncxaamb hajxy maa ja'a gobiernäwiinduumhaxiän. Ja'a høøchcøxpä hajxy xchaächtiuna'añ.

13 Coo hajxy jaduhñ mjádät mhabétät, mänítøch hajxy xmiädiá'agät.

14 Wiinjuø'øw hajxy jaduhñ. Cab hajxy jäguemiä mwiiinmahñdyhadät waambaty hajxy mhadsówät.

15 Høøch mijts nbuhbedaamby. Nmo'owáambiøch mijts ja'a wiinmahñdy nebiä mmädsip hajxy mga'a yajmäjädá'agät.

16 Høxtä xñähdugaambä mdeedy hajxy møødä mbuhya'ayhajxy møødä mjujy mmägu'ughajxy møødä mmägu'ughajpähajxy. Näjé'eyyäm mijts häna'c xyagho'oga'añ.

17 Nägøxiä hajxy xxiøøghada'añ maa ja'a høøchcøxpän.

18 Hoy hajxy cøxypänejpiä cu mja jat cu mja habet, tsipcøxp hajxy hodium mnøcxa'añ.

19 Coo hajxy hamuumdu'joot mmee'xtúgät, mdägø'øwäp hajxy jim tsajpootyp.

20 'Coo hajxy mhíxät coo ja'a Jerusaléncajpt hänajty tøø jiuhbigo'øyíjäm ja'a miädsip, mänit hajxy mnajuø'øwät coo hänajty tøø yhabaatnä coo Jerusalén quiuhdägoyya'añ.

21 Pønjaty hänajty yaa hijp Judeanaaxooty, tsipcøxp hajxy piäyø'øgät, nøcxäp hajxy jim maa ja'a tunän. Pønjaty hänajty yaa hijp Jerusaléncajptooty, tsipcøxp hajxy yaa chóonät. Pønjaty hänajty hijp camjooty, cab hajxy ñøcxtägátsät quiajptootyhajxy.

22 Jaançh tehñ chaächpøgaambä jäya'ayhajxy nägø'ø nädecypiä. Jadáanäp jaduhñ nebiaty jiiby myiñän cujaay maa ja'a Diosmädia'aguiän coo jiada'añii.

23 Jaançh tehñ chaächpøgaambä to'oxiøjc-hajxy hänajty, ja'a hajxy hänajty moxtsa'amhajpä, ja'a hajxy hänajty maaxhuungmøødpä. Hoyhoyyä jäya'ayhajxy yaa chaächpøga'añ hädaa yaabä naaxwiin. Jaançh tehñ yajcumädowáanäp hajxy jaduhñ.

24 Näje'e hajxy yho'oga'añ coo ja'a tsip jiada'añii. Näje'e hajxy miadsa'añii. Mänit hajxy yajnøcxa'añii wiinduhmyhagajpt. Minaambä jäguemjäya'ay ja'a Jerusaléncajpt hajxy yajma'ada'añ, høxtä coonä yhabétät coo ja'a cuhdujt hajxy piøjcäxät coo hajxy jaduhñ quia'a jatcøøñät.

25 'Cähxø'øgaambä hijxtahñd maa ja'a xøøjän, maa ja'a po'ojän, maa ja'a madsa'ajän. Pädø'øgaambä mejy; jäditaamb jaduhñ. Paadia cu'ughajxy chähgø'øwa'añ wiinduhmyhagajpt.

26 Wiinmahñtiägoyyaambä jäya'ayhajxy coo høchähgøøñä yaa jiada'añii hädaa yaabä naaxwiin. Tsäyuyyaambä xøø chaadsä po'o chaadsä madsa'a.

27 Mänítøch ngädaactägatsa'añ joc-hagujc, høøch ja'a Diosquexypä. Hajájjæbøch ngäda'aga'añ mäjaamøød. Xyhixáambøchä jäya'ayhajxy.

28 Coo jaduhñ jiadøøjät, mänit hajxy mjootcugø'øwät. Mänit hajxy mbädsøma'añ hawa'adstuum.

29 Mänitä Jesús miánáangombä:

—Høxtahñdsä quepychaa,

30 coo hajxy mhixy coo wiamy, mnajuøøby hajxy coo poodtägøøñä.

31 Jaduhñ mäwíinäts je'e coo ja'a hijxtahñd hajxy mhixtsóonät, mnajuø'øwäp hajxy jaduhñ coo yhabaatnä coo Dios ja'a miäjaa yajcähxø'øga'añ.

32 'Coo jaduhñ yhabáadät nébiøch cham nmädia'aguiän, cahnä jäya'ayhajxy hänajty quiøxy ho'ogyñä ja'a hajxy jäda'ahatypä. Tøyhajt jaduhñ.

33 Tägoyyaambä tsajtwiing møødä naaxwiin, pero tøjiaaamb nébiøch cham nmädia'aguiän.

34-35 'Mniyajcopcø'øwøøjäp hajxy. Cab hajxy mnajuø'øy mänájøch ngädaactägatsa'añ. Paady hajxy hoy mhídat. Cab hajxy mhu'ug cab hajxy mjøø'xät. Cab hajxy tii mhadsógät hädaa yaabä naaxwiin. Pønjaty jaduhñ ca'a cudiumb, haxøøg hajxy jiada'añ yhabeta'añ, høxtä hoy hajxy maa cu jia tsána'aw.

36 Nähix hahixø'ø hajxy mhídat. Homiánaajä hajxy mDiospa'yá'axät neby hajxy haxøøg mga'a jat mga'a habétät, nébiøch hajxy hoy xwyiingudsähgø'øwät, høøch ja'a Diosquexypä.

³⁷ Xøømbaadiä Jesús hänajty yajñähixø'øy tsajtøgooty. Coodspaady hänajty wiädity maa ja'a tun xiøhatiän Olivos.

³⁸ Jopyñä ja'a jäya'ayhajxy hänajty quiøxy hamugø'øy tsajtøgooty coo ja'a Jesús miädia'agy hajxy hänajty wyl'i yhamädoowhidaañä.

22

¹ Tøø ja'a pascuaxøø hänajty miäwiingoonnä mänaa ja'a tsajcaagy hajxy hänajty quiayyän ja'a cajpä tsooy miøødäbä.

² Jia wyl'i xyiictaacy py jia wyl'i miädiaactaacy py ja'a teedywiindsøn hajxy hänajty møødä ley-yajñähixøøbiähajxy nebiä Jesús hajxy yaghó'ogät. Pero chähgøøbiä cu'ug hajxy hänajty.

³ Mänitä Judas Iscariote ja'a Satanás jioottägøøyy quioptägøøyyä. Jesús jiamiøød hänajty je'e tu'ug maa ja'a nämajmetspän.

⁴ Mänitä Judas ja'a teedywiindsøn hoy miøødmädia'agy møødä møjhjäpä hajxy maa ja'a tsajtøjcän. Je'e yajmøødmädiaac nebiä Jesús yajcø'ødägø'øwät.

⁵ Mänitä teedywiindsøn hajxy xioondaacy. Mänitä Judas hajxy ñämaayy coo xädø'øñ hajxy mio'owa'añ.

⁶ Mänitä Judas ñähadsooy. Mänit tiägøøyy wiinmahñdyhäpä nebiä Jesús yajcø'ødägø'øwa'añ, mänaa ja'a cu'ughajxy hänajty quia'a jaty mayyän.

⁷ Mänitä pascuaxøø yhabaatnä mänaa ja'a tsajcaagy hajxy quiayyän, ja'a cajpä tsooy miøødäbä. Yojxypä meeghuung hajxy hänajty ja'a pascuaxøøjooty.

⁸ Mänitä Jesús ñämaayy ja'a Pedro møødä Juan:

—Nøcx ja'a tsuugay hajxy yaghoyø'øw. Tøø yhabaady coo hajxy ndsuugayáañäm ja'a pascuaxøøgøxpä.

⁹ Mänitä Jesús hajxy miäyajtøøyy:

—Maa højts nyaghoyø'øwät.

¹⁰ Mänitä Jesús yhadsooy:

—Coo hajxy mgajptägø'øwät, mbaadaambiä jäya'ay hajxy tu'ug majtcón. Mbanócxäp hajxy maa tiøjtägø'øwa'añän.

¹¹ Mänitä cudøjc hajxy mnämä'awät: “Højts nWiindsøn tøø xquiexy coo højts miich nmäyajtøwät maa hawa'adspä jii maa højts ndsuugáyät ja'a pascuaxøøgøxpä.”

¹² Mänitä hawa'adspä hajxy xmio'owa'añ cruundä jim cøxp. Tøø hajxy hänajty hoy yajxon yaghoyø'øy. Jimä tsuugay hajxy myaghoyø'øwät.

¹³ Mänit hajxy hoy piaady nebiatiä Jesús hänajty tøø miäna'añän. Mänitä tsuugay hajxy yaghoyøøyy ja'a pascuaxøøgøxpä.

¹⁴ Coo yhabaatnä, mänitä Jesús hajxy yhäñaaguiädaacy meexäwiinduum møødä jiamiøødhajxy.

¹⁵ Mänitä Jesús miänaañ:

—Cooch nho'ogaannä, jootcújc-høch nnijiäwø'øyii cooch mijts nmøødtsuugaya'añ ja'a pascuaxøøgøxpä.

¹⁶ Cábøch mijts nmøødtsuugaadiägatsa'añ høxtä coonä yhabáadät mänaa ja'a Dios ja'a miäjaa yajcähxø'øga'añän. Tøyhajt jaduñ.

¹⁷ Mänitä Jesús ja'a vaso tu'ug quionø'cy vinomøød. Mänitä Dioscujú'uyäp yejcy. Mänit miänaañ:

—Huucmuc hajxy hädaa nägøxiä.

¹⁸ Cábøchä vino nhuuctägatsa'añ høxtä coonä yhabáadät coo ja'a Dios ja'a miäjaa yajcähxø'øga'añ.

¹⁹ Mänitä Jesús tsajcaagy quionø'cy. Mänitä Dioscujú'uyäp yéjcombä. Mänitä tsajcaagy qyijwa'xy. Mänitä jiamiøød miooy. Mänit miänaañ:

—Høøch nni'x ngopc hädaa. Ja'a mijtscøxpøch nniñähduga'añii cooçh mijts nnähho'tu'uda'añ. Naaghóoc-høch mijts xjiahmiejtsta'agy, jaduhñä tsajcaagy hajxy mgáyät.

Coo hajxy quiaabiädøøyy, mänitä Jesús ja'a vaso quionø'cy, ja'a hñajty vinomøødpä. Mänit miänaañ:

²⁰ —Hädaa vino, hijxtahñd jaduhñ miähmø'øwa'añ nébiøch nnø'ty nyaghäyowa'añän cooçh mijts nnähho'tu'uda'añ.

²¹ 'Pero ja'a craa xyegáambøçhä, yaaçh jaduhñ xmiøødhäña'ay maa hädaa meexän.

²² Tsipcøxpøch nho'oga'añ nébiøçhä Dios tøø xyajñähdiijiän, høøch ja'a Diosquexypä. Pero ja'a craa xyegaambä, maas haxøøg jiada'añ yhabeta'añ.

²³ Mänitä Jesús jiamiøødhajxy tiägøøyy nimiäyajtøøwäbä hamiñ haxøøpy pønä Jesús yegaamb.

²⁴ Mänit hajxy tiägøøyy yajcapxiøøbiä pøn møjtuuñg mo'owáañp.

²⁵ Mänitä Jesús miänaañ:

—Hädaa hajxy yaa gobiernähajpä hädaa yaabä naaxwiin, nä'ä hanehmb hajxy. Tsipcøxpä cu'ughajxy quiuidiñ neby hajxy yhane'emyiijän.

²⁶ Pero mijts, cab hajxy mnibiäda'agøøjät nebiä gobiernän. Pøn møjtuuñg møød maa mijtsän, ween ñibiäda'agyii nebiä tuuñg møj ca'a møødpän. Pøn hanehmb maa mijtsän, ween ñibiäda'agyii nebiä moonsän.

²⁷ Pøn møjtuuñg møød, ja'a craa caabiä, tøgä craa mäyajcaabiä. Ja'a craa caabiä, je'eds møjtuuñg møød. Pero høøch mijts nyajcaaby, hóyhøch møjtuuñg nja møødä.

²⁸ 'Tøøch mijts xmiøødyo'oy xmiøødnaxy tsip xex.

²⁹ Páadyhøch mijts møjtuuñg nmo'owa'añ, nébiøch nDeedy tøø xmio'oyän,

³⁰ neby hajxy jim mgay mhú'ugät maaçh nmeexäwiinduumän maaçh ngob-iernähada'añän, nebiä hoyhäñaabiejt hajxy myaghäña'awø'øwät mänaa ja'a judíos hajxy mhane'ema'añän, ja'a nämajmetsc-hagajtpä.

³¹ Mänitä Jesús ja'a Pedro ñämaayy:

—Simón, Simón, mniyajcopcø'øwøøjöp. Tøøçhä Satanás cuhdujt xjia mäyujwa'añ coo mijts xyajtu'udägóyyät.

³² Pero tøøçhä Dios nmänuu'xta'agy ja'a miichcøxpä nébiøch miich nmädia'agy homiänaajä xmiäbøjcät. Coo miich hñajty tøø mwiiinmahñdymejtsnä, mjood-capxmøcpøgäp ja'a mjiamiøødtøjc neby hajxy jaduhñ quia'a tu'udägóyyät.

³³ Mänitä Pedro ja'a Jesús ñämaayy:

—Homiäajøch miich nbanøcxät, hoy jia pujxtøgootiä. Høxtä näguipxy jaduhñ nmøødhø'ogät.

³⁴ Mänitä Jesús miänaañ:

—Pedro, cham nnäma'ay, cahnä tseey hñajty ya'axyñä, tøø miich hñajty tægøøghooc mnijjogapxyii cooçh tyijy xquia'a hixiä.

³⁵ Mänitä Jesús miäyajtøøyy ja'a jiamiøødhajxy:

—Cooçh mijts nguejxy Diosmädia'agy-yajwa'xpä, mänitøch mijts nnämaayy coo hajxy tii mga'a wähátät, ni xuumy, ni xädø'øñhidøhñdy, ni cø'øg. Y tii hajxy myajmaajiajt.

Mänit hajxy yhadsooyy:

—Ni tii.

³⁶ Mänitä Jesús miänaañ:

—Pero chaaçh nmänaañnä coo xuumy hajxy mwähátät møødä xädø'øñhidøhñdy. Pøn espada ca'a møød, weenä wyit tioogy nebiä espada jiúyät.

³⁷ Tsipcøxp tiøjiada'añ neby jim myiñän cujaay maa ja'a Diosmädia'aguiän ja'a høøçhcøxpä: “Ca'awiindøyhäna'c jaduhñ tyijjä.” Cøxiä jaduhñ tiøjiada'añ neby jim myiñän cujaay ja'a høøçhcøxpä.

³⁸ Mänit hajxy miänaañ:

—Chaa hõjts espada metsc nmøødä.

Mänitä Jesús yhadsooyy:

—Mädøyyä jaduñ.

³⁹ Mänitä Jesús tiu'ubøjcy. Mänit ñøcxy maa ja'a Olivostunän neby hänajty ñä'ägä cuhdujthatiän. Quipxiä jiamiøødhajxy pianøcxy.

⁴⁰ Coo hajxy jim miejch, mänitä Jesús miänaañ:

—Tsögä Dios hajxy pa'yáaxäm; jaduñ hajxy mga'a tu'udägóyyät.

⁴¹ Mänitä Jesús ñøcxy jäguemjuøøby nidiuhm Diospa'yaaxpä. Mänit jyjcädaacy.

⁴² Mänit miänaañ:

—Teedy, coo miich jaduñ mmänä'anät, cáboch hádaa tsaächpä peenä nmänáxät. Pero ca'a yhøøch nguhtuñ nyaghidaamby; miich nguhtuñ hidaamb.

⁴³ Mänitä Diosmoonsä tu'ug ñäguexxtøøxy. Tsajpootyp hänajty chooñ. Ja'a Jesús ja'a mäjaa hoy mio'oy.

⁴⁴ Jaanč tehñ chaächpøjpä Jesús hänajty. Mänitä Dios miänuu'xtaacy nägøø nädecypiä. Mänit xiäbitnøø tiägøøyy ta'xpä naaxwiin nebiä nø'tiän.

⁴⁵ Coo ja'a Jesús Dyiospa'yaaxpædøøyy, mänit tiänaayø'cy. Mänitä jiamiøødhajxy hoy yhixø'oy. Haagä maab hajxy hänajty je'eguiøxpä coo hajxy hänajty jiaanč tehñ jiootmayhaty.

⁴⁶ Mänitä Jesús miänaañ:

—Tii hajxy coo mwi'i mia'ay. Pädø'og hajxy. MDiospa'yá'axäp hajxy; jaduñ hajxy mga'a tu'udägóyyät.

⁴⁷ Jimnä ja'a Jesús hänajty miädia'agyñä, mänitä cu'ug miejch. Ja'a Judas hänajty copc-hajp maa ja'a cu'ughajxiän. Je'e ja'a Jesús hänajty tøø jiamiøødhity maa ja'a nämajmetspähajxiän.

⁴⁸ Mänitä Jesús hoy chu'xy. Mänitä Jesús miänaañ:

—Judas, nej, tsu'xyháamhøch miich xyega'añä, høøch ja'a Diosquexypä.

⁴⁹ Mänitä Jesús jiamiøødhajxy miänaañ:

—Wiindsøn, nej, pädø'ögäp hõjts espadahaamä.

⁵⁰ Mänitä Jesús jiamiøød tu'ug tiaatspujxtuuty ja'a teedywiindsøn mioonsä. Ja'a hahooybä taatsc ñäbujx.

⁵¹ Mänitä Jesús miänaañ:

—Ween hajxy yhity. Ween tiuhnä.

Mänitä Jesús ja'a craa tiaatsc piädaacä. Tsooc je'e.

⁵² Mänitä Jesús ñämaayy ja'a teedywiindsøn hajxy, møødä tsajtøjwiindsøn hajxy, møødä møjtøjc-hajxy, ja'a Jesús hajxy hänajty yajpædø'ogaambä:

—Nej, méé'tspøch hajxy jaduñ xtyijjiä coo espada coo wojpt hajxy mmäbædø'oguiä.

⁵³ Cooch mijts hijty nmøødhity tsajtøgooty najxpæxøø, cáboch mijts hijty nej xtiuñ. Pero tøø yhabaatnä cooch mijts xmiädsät ja'a haxøøgpä miäjaagøxpä.

⁵⁴ Mänitä Jesús hajxy miajch. Mänit hajxy yajnøcxy maa ja'a teedywiindsøn tiøjcän. Jäguemjuøøbiä Pedro hänajty piayo'oy.

⁵⁵ Mänitä soldado jøøn hajxy tiägøøyy yajmøjjøøbiä jim tøba'amhagujc. Mänit hajxy yhøxtaacy piquiä jøømba'axaambä. Mänitä Pedro piahøxtaapä.

⁵⁶ Mänitä to'oxymoonsä ja'a Pedro yhijxy coo jiiby piahäñaabiä. Mänit miänaañ:

—Yø'ø mixy, ja'a Jesús jiamiøød yø'ø.

⁵⁷ Mänitä Pedro ñijjigapxä:

—Pi'muuxy, cábochä Jesús nhixiä.

⁵⁸ Mänitä Pedro yhøxcájpägombä wiinghäna'c. Mänit ñämaayyä:

—Miič mjamiøød je'e, tuhmds.

Mänitä Pedro yhadsooyy:

—Joom, caj tiøyyä.

59 Tøø hänajty tu'horä yhity, mänitä Pedro ñänøømä:

—Tøyhajt jaduñ coo ja'a Jesús jiamioød yø'ø. Galilea yø'ø craa choñbä.

60 Mänitä Pedro miänaañ:

—Joom, pätiidä miich jaduñ mnä'ä mädiaacyy.

Tuunä Pedro jaduñ ñä'ä mänaañ, mänitiä ja'a tseey jiaanč yaaxy.

61 Mänitä Jesús ja'a Pedro miøjhee'py. Mänitä Pedro cøjx jiahmiech waambaty hänajty tøø ñäma'ayíjäm ja'a Jesús: “Cahnä tseey hänajty ya'axyñä, tøø miich hänajty tägøøghooc mnijioøgapxyii cóogøch tyijy xquia'a hixiä.”

62 Mänitä Pedro wyiimbijnä. Mänit hoyhoy jioøyy.

63 Mänitä Jesús tiägøøyyä näxícäbä näyáaxäbä ja'a häna'c-hajxy hänajty hadänaabiä. Mänit tiägøøyyä wobhó'cäbä.

64 Mänit hajxy wyiinguxodsøøyy. Mänit hajxy wyiinguwobøøyy. Mänitä Jesús ñämaayyä:

—Najuø'ow pøn tøø xwiopy.

65 Jaanč tehñ yhaxøøgjatiä Jesús ñämaayyä.

66 Coo jioøøyy, mänitä judíoøhajxy yhamugøøyy, møødä møjtøjc-hajxy, møødä teedywi-indsønñhajxy, møødä ley-yajñähixøøbiähajxy. Mänitä Jesús hajxy yajnøcxy maa junta hajxy hänajty yagjadyiijän. Mänit hajxy miäyajtøøyy:

67 —Højtsä tøyhajt móøyyäc, nej, miich Dios tøø xquiexiä.

Mänitä Jesús yhadsooyy:

—Hóyhøch jaduñ cu nja mäna'an, cábøch mijts häyaa xñä'ä mábøjcäbät.

68 Y coøch mijts waambaty nmäyajtówät, cábøch hajxy xyhadsówät, ni cábøch hajxy xyhøxmádsät.

69 Tøø yhabaatnä coøch jim nnøcxaannä maa ja'a Diosän, ja'a møjcuñdujtmøødpä. Jimhøch nøcxy nhäña'awa'añ maa ja'a yhahooyhaampiän, høøch ja'a Diosquexypä.

70 Mänit hajxy wyi'i miäyajtøøyy:

—Nej, miichä Dios xyHuunghajpä.

Mänitä Jesús yhadsooyy:

—Tøyhajt jaduñ nej mijts mmäna'añän.

71 Mänit hajxy miänaañ:

—Tii testigo hajxy nnä'ä jaac wáañämät. Hamdsoo hajxy tøø nmädóowäm coo hamd-soo tøø ñimiädia'agyii.

23

1 Mänit hajxy nägøxiä tiänaayyø'cy. Mänitä Jesús hajxy yajnøcxy maa ja'a Pilato wyiinduumän.

2 Mänit hajxy tiägøøyy nähwaambejpä:

—Jim hädaa craa ja'a cu'ug hijty wyi'i quiapxhiñ. Nøm hijty miäna'añ coo højtsä gobiernä xädø'øñ nga'a mó'owät ja'a jim tsänaabiä Roma. Jaduñ hijty miänaambä cooc tyijy ja'a Dios tøø quiexyii gobiernähajpä.

3 Mänitä Pilato ja'a Jesús miäyajtøøyy:

—Nej, jaduñ miich mnibiäda'agyii nebiä gobiernän maa hädaa judíoøcájptänä.

Mänitä Jesús yhadsooyy:

—Tøyhajt jaduñ nej miich mmäna'añän.

4 Mänitä Pilato ñämaayy ja'a teedywiindsønñhajxy møødä cu'ug:

—Cábøch hädaa craa nhixy coo tii pojpä quia'a møødä.

5 Mänit hajxy tehngajnä wyi'i ya'axy:

—Høñda'agymiädia'agyaam yø'ø craa yajñähixø'øy ja'a Judeabä-jäya'ayhajxy. Jim yajtsoñdaacy Galilea. Yaa tøø miech. Jaduñ yaa jiatcøøbiä.

6 Coo ja'a Pilato jaduñ miädooyy, mänit yajtøøyy pø jimä Jesús jiaanč tsoñ Galilea.

⁷ Coo ja'a Pilato yhawáanäxä cooc ja'a Jesús jim chooñ, mänitä Pilato ja'a Jesús quiejxy maa ja'a Herodes wyiinduumän. Hix, gobernador ja'a Herodes hänajty jim tiuumby Galilea. Tøø hänajty quiody Jerusalén xøøhajpä.

⁸ Coo ja'a Herodes ja'a Jesús yhiixy, mänit jiootcugøøyy je'eguiøxpä coo hänajty jia wi'i yhixa'añ. Tøø hänajty miädoyhaty coo ja'a Jesús ja'a hoy-yagjuøøñäjatypä hänajty tøø yajcähxø'øgy. Jaduhnä Herodes hänajty jia wi'i yhixa'añ coo ja'a Jesús ja'a hoy-yagjuøøñäbä yajcähxø'øgät.

⁹ Mänitä Herodes ja'a Jesús madiu'u jia wi'i miäyajtøøyy, pero cabä Jesús ñä'ägä hadsooyy.

¹⁰ Tehngajnä ja'a Jesús hänajty ñähwaambedyíijäm ja'a teedywiindsøñhajxy møødä ley-yajñähixøøbiähajxy.

¹¹ Mänitä Herodes ja'a Jesús hajxy tiägøøyy näxiicpä näyaaxpä møødä soldadohajxy. Mänitä wit hajxy yajpägøøyy yajxonbä nebiä rey wyitän. Mänitä Herodes ja'a Jesús quiejxwiimbijty maa ja'a Pilatän.

¹² Mänitxøø ja'a Pilato ja'a Herodes miøødnimiägu'ughajpøjcä. Nimiädsiphájtäp hajxy hänajty.

¹³ Mänitä Pilato yaaxmujcy ja'a teedywiindsøñhajxy møødä copc-hajpähajxy møødä cu'ughajxy.

¹⁴ Mänit miänaañ:

—Míjtshøch hädaa craa tøø xyajnämech. Mmänaamb mijts jaduhñ coo ja'a cu'ug hijty quiapxhiñ. Tøøch nja yajmäyach maa mijts mwiinduumhajxiän, y tøø hajxy mhixy mmädoy coo ja'a pojpa quia'a møødä nej mijts tøø mja nähwaambetiän.

¹⁵ Ni ja'a Herodes quia'a mäna'añ coo ja'a pojpa miøødä, paady tøø quiejxwiimbity. Tøø hajxy mhixy coo ja'a pojpa quia'a møødä. Paady, cábøch nyajyagho'oga'añii.

¹⁶ Jayójpøch nyajcumädo'wä'añ, mänitøch nhøxmadsaannä.

¹⁷ Jaduhñ hajxy hänajty quiuhdujthaty coo ja'a tsumyjiäya'ay hajxy hänajty tu'ug yhøxmach ja'a pascuaxøøjooty.

¹⁸ Mänit hajxy nägøxiä yaaxy:

—Ca'a yø'ø craa mhøxmach. Jue'e mhøxmádsäp ja'a craa Barrabáshajpä.

¹⁹ Paadiä Barrabás hänajty tøø chumyii coo ja'a tsip hänajty tøø yajpädø'øgy cajptooty, møød coo hänajty tøø miäjäya'ay-yagho'ogy.

²⁰ Jia wi'i yhøxmadsaamby ja'a Pilato ja'a Jesús hänajty. Jaduhnä cu'ug jia nämáaguiombä.

²¹ Mänitä cu'ughajxy maas møc jiaac yaaxy:

—Møjpahbet hajxy cruzcøxp, møjpahbet hajxy cruzcøxp.

²² Miädägøøghoocpä ja'a Pilato jia mänáangombä:

—Pero nébiämäts jaduhñ tøø jiatcø'øy. Cabä pojpa tii miøødä. Nébiøch nya-jyagho'ogóøjät. Nyajcumädo'wäambiøch. Mänitøch nhøxmadsaannä.

²³ Pero tehngajnä hajxy jiaanç tehñ ya'axy coo ja'a Jesús miøjpahbedøøjät cruzcøxp. Jaduhñdsä teedywiindsøñhajxy yaaxpä. Mäjädaac hajxy jaduhñ neby hajxy hänajty miäna'añän.

²⁴ Mänitä Pilato miänaannä coo ja'a Jesús miøjpahbedøøjät cruzcøxp.

²⁵ Mänit Barrabás yhøxmajch, ja'a cu'ughajxy hänajty tøø yajñähdíjjiäbä, ja'a hänajty tøø chumyíijäbä je'eguiøxpä coo tsip hänajty tøø yajpädø'øgy, møød coo hänajty tøø miäjäya'ay-yagho'ogy. Mänitä Pilato yhanehmy coo ja'a Jesús miøjpahbedøøjät cruzcøxp.

²⁶ Jimä soldado ja'a Jesús hajxy hänajty yajnøcxy maa hajxy hänajty miøjpahbedä'añän. Mänitä jäya'ay hajxy tu'ug miajch, ja'a xøhajpä Simón, ja'a Cirenetsøhmä. Camjootiä Simón hänajty tøø yhoy. Mänitä cruz hadsip yajtsømdu'ubøjcä. Høxhaamä cruz miäyohy.

²⁷ Jaanç tehñ ñämay hajxy hänajty pianøcxy møødä to'oxiøjc-hajxy. Jóøyyäp yáaxäbä to'oxiøjc-hajxy hänajty ñøcxy. Jootmayhajp hajxy hänajty ja'a Jesúsøxpä.

28 Mänitä Jesús ja'a to'oxiøjc-hajxy miøjhee'ppejty ja'a hajxy tsohm̄bä Jerusalén. Mänit hajxy ñämaayyā:

—Ca'ačh hajxy xñäjø'øy. Mijts hamdsoo mniñäjø'øwójøp møødä mhuunghajxy.

29 Habaadaamb jaduhñ coo ja'a jäya'ayhajxy miäna'ana'añ: “Jootcujcä to'oxiøjc-hajxy yhity ja'a yhuung ca'a hijpä.”

30 Mänitä jäya'ay ja'a tuñ hajxy ñäma'awa'añ: “Højts nähgabhéjtäc, højts yú'tsäc.”

31 Xhaačhtiunáambøch ja'a jäya'ayhajxy, hóyhøchä pojpä cädieey nga'a ja møødä. Maas hanaxiä mijts mjada'añ mhabeta'añ.

32 Metscä mee'tspädøjc ja'a Jesús hänajty quipxy nøcxy miøødmøjpahbeda'añii.

33 Coo hajxy jim̄ miejch maa hänajty xiøhatiän “Maa ja'a Ho'ogyjiäya'aguiopc Ñähgädá'aguiän”, mänitä Jesús miøjpahbejtä cruzcøxp møødä mee'tspädøjc, tu'ug hana-jtyhaamby, tu'ug hahooyhaamby.

34 Jim̄nä ja'a Jesús hänajty miøjpahbedyiinä, mänit miänaañ:

—Teedy, mee'x yø'ø häna'c-hajxy; cab hajxy ñajuø'øy tii hajxy jaduhñ coo jiatcø'øy.

Mänitä soldado ja'a Jesús wyit hajxy tiägøøyy yajniguiuhäyø'cäbä.

35 Jim̄ä cu'ughajxy hänajty miähee'pna'ay møødä tuungmøødpähajxy. Jim̄ä Jesús hajxy hänajty wyl'i ñäxi'igy:

—Yajñähwaachp yø'ø craa hijty wiinghäna'c. Ween hamdsoo yajniñähwa'ačhii pø tøy jaduhñ Dyioshuungä, pø tøy jaduhñ Dyiosquexiä.

36 Jaanä jaduhñä soldadohajxy wyl'i ñäxiicpä. Mänitä Jesús vinagre yaghuucä.

37 Mänit ñämaayyā:

—Pø tøy miičhä judíoshajxy xquiobiernähaty, hamdsods yajniñähwa'adsøø.

38 Mänitä soldado pu'uyhuung hajxy jim̄ yujpahy cruzcuhduum. Tägøøgtu'u hayuuc hänajty miøødä cujaay: “Hädaadsä judíoshajxy guiobiernähajpy.” Griegohaam hänajty quiujaayä, møødä latínhaam, møødä hebreohaam.

39 Mänitä mee'tspä tu'ug miänaañ, ja'a hänajty tøø miøjpahbéjtäbä cruzcøxp:

—Pø tøyyä Dios tøø xquiexy, hamdsods yajniñähwa'adsøø, y yajñähwáatsägäts højtspä —nømä Jesús ñämaayyā.

40-41 Mänitä craa yhojjä jiamiøød:

—Nej, cájtämä Dios mwiingudsähgø'øyyä. Paady højts ngumadowáañäm coo tøø ngädiéhyäm. Pero hädaa craa, caj nej tøø jiatcø'øy.

42 Mänitä Jesús ñämaayyā:

—Jesús, høøch xjiahmiédsäp coo miičh hänajty mdägø'øwa'añ gobiernähajpä.

43 Mänitä Jesús yhadsooyy:

—Tøyhajt jaduhñ nnäma'ay, jädá'ajøch miičh jim̄ xmiødhada'añ tsajpootyp.

44 Cujyxiøø hänajty je'e, mänit wyiingoodsøøyy wiinduhm̄yhagajpt. Tägøøghorä yhiyty wiingoods.

45 Cabä xøø hänajty maa ñä'a hañ. Mänitä tsajtøjc-hadøødiuc quiøø'tswa'xy cujjiä.

46 Mänitä Jesús yaaxy:

—Teedy, høøch miičh njoot njuøhñdy nyajcø'ødägø'øwaamby.

Jagoo jaduhñ jiaac mänaannä, mänitiä yho'nä.

47 Mänitä soldadowiindsøn yhiyty nebiä Jesús jiajtiän. Mänit jia mänaañ coo ja'a Dios miøjjä jiaančhä, coo ja'a Jesús ja'a pojpä hijty quia'a møødä.

48 Coo ja'a cu'ughajxy yhiyty nebiä Jesús jiajtiän, mänit hajxy wyiimbijnä jootmayhájtäp.

49 Jim̄ä Jesús miägu'ughajpähajxy hänajty tiäna'ay jäguemjuøøby møødä to'oxiøjc-hajxy, ja'a hajxy hänajty jim̄ tøø piadsóoñäbä Galilea. Yhiyx hajxy je'ebä nebiä Jesús jiajtiän.

50 Jim̄ä hojiäya'ay hänajty tu'ug ja'a xøhajpä José. Arimatea hänajty chooñ jim̄ Judeanaaxooty. Møjtuung hänajty miøød maa ja'a judíoscajptän.

⁵¹ Pero cab jaduñ piamänaañ coo ja'a Jesús cu yagho'cä. Jiøbhijxyp hänäjty je'e coo ja'a Dios ja'a miäjaa yajcähxø'øga'añ.

⁵² Mänitä José ja'a Pilato ja'a cuhdujt hoy miäyujwa'añ coo ja'a ho'ogyjiäya'ay yajmānācāt cruzcøxp.

⁵³ Coo ja'a cuhdujt jaduñ mioooyä, mänit yajmānajcy. Mänitä poobwit yajnäbhijty. Mänit hoy yajnaaxtägø'øy maa ja'a tsaajutän ja'a naamhädiúñäbä.

⁵⁴ Mänacyxiøø hänäjty je'e mänaa ja'a Jesús ñaaxtägø'øyän. Viernes hänäjty je'e. Hadsuujøøñäp hänäjty; ja'a poo'xxiøø hänäjty habáatnäp.

⁵⁵ Ja'a to'oxiøjc-hajxy, ja'a Jesús hajxy hänäjty tøø piadsóñäbä Galilea, mänitä Jesús hajxy hoy yhixy maa hänäjty tøø ñaaxtägø'øyän.

⁵⁶ Coo hajxy wyiimbijty, mänitä pa'agxuu'pähón hajxy hoy jiuuy. Mänit hajxy pioo'xnä ja'a poo'xxiøøjooty neby hajxy hänäjty quiuhdujthatiän.

24

¹ Näxøøjopiä to'oxiøjc-hajxy ñøcxtägajch maa ja'a Jesús hänäjty tøø ñaaxtägø'øyän møødä jiamiøødhajxy wiingpä. Pa'agxuu'pähóngón hajxy ñøcxy ja'a hajxy hänäjty tøø jiuuyäbä.

² Coo hajxy jim miejch, mänit hajxy yhixy coo ja'a tsaajut hänäjty tøø yhawa'açh.

³ Mänit hajxy jiiby tiägøøyy. Cab hajxy jiiby pøn piaaty.

⁴ Mänit hajxy chähgøøyy. Cab hajxy hänäjty ñajuø'øy neby hajxy jiatcø'øwät. Mänit hajxy yhixy coo ja'a jäya'ay hajxy hänäjty metsc miøødtäna'ay. Yajxonjatiä wyithajxy hänäjty. Høxtä haambä wyithajxy hänäjty.

⁵ Mänitä to'oxiøjc-hajxy ñaaxcooyy je'eguiøxpä coo hajxy hänäjty chähgø'øy. Mänit hajxy ñämaayä:

—Tii ja'a Jesús hajxy yaa coo mhøxta'ay maa ja'a ho'ogyjiäya'ayhagujcän.

⁶ Cab je'e yaajän. Tøø jiuuypiøjnä. Nej, cab hajxy mjahmiechä neby hajxy jiiby tøø xyajmøødmädia'aguiän Galilea.

⁷ Nømä Jesús ja'a Diosquexypä hajxy xyhawaanä cooc hijty quiø'dägø'øwa'añii ja'a cubojpäya'ay ja'a cugädieejäya'ay, cooc hijty miøjpahbeda'añii cruzcøxp, cooc cudägøøgxøø hijty jiuuypiøga'añ.

⁸ Mänit hajxy jiaançh jahmiejtsnä neby hajxy hänäjty tøø ñäma'ayiiän Jesúsäm.

⁹ Mänit hajxy wyiimbijnä. Mänitä jiamiøød hajxy hoy yhawaanä ja'a nämajtu'ugpä møødä nämaybä.

¹⁰ Ja'a to'oxiøjc ja'a mädia'agy hajxy mämiejtsäbä, jue'e hajxy hänäjty näje'e xiøhaty María Magdalatsohmä, møødä Juana, møødä María ja'a Jacobo tiaj.

¹¹ Pero cabä to'oxiøjc ja'a miädia'agyhajxy miäbøjcäxä ja'a Jesús jiamiøødhajxy. Nebiä cuhhiimbä-mädia'aguiän hajxy jaduñ miädooyy.

¹² Pero ja'a Pedro, miäbøjc je'e. Päyø'øguiä ñøcxy maa ja'a Jesús hänäjty tøø ñaaxtägø'øyän. Coo jiiby quiuwoodsøyy, mänitä poobwit yhixy coo wiingtuum yhijnä. Mänit wyiimbijnä. Yagjuøøyy jaduñ neby hänäjty tøø jiadyiiän.

¹³ Mänitxøøbä ja'a Jesús jiamiøødhajxy hänäjty metsc ñøcxy maa ja'a cajpt hänäjty xiøhatiän Emaús. Majtu'ugkilómetro hänäjty jiäguemä maa ja'a Jerusaléncajptän.

¹⁴ Mädiäcäp hajxy hänäjty tiu'uyo'oy tijaty tøø jiadyii.

¹⁵ Mänit hajxy wyiingumedsøyyä ja'a Jesús. Mänit hajxy miøødtu'ubøjcy.

¹⁶ Hoy hajxy jia hijxy, cab hajxy yhøxcajpy.

¹⁷ Mänitä Jesús miänaañ:

—Tii hajxy mmädiaacyy. Tii hajxy coo mdajy coo mmay.

¹⁸ Tu'jäya'ay hänäjty xiøhaty Cleofas. Mänit yhadsooyy:

—Hopionä ñajuø'øy tii jim tøø jiadyii Jerusalén jäda'a xøøbä. Nej, miiçh nidiuhm mga'a najuøøby tii jim tøø jiadyiijä, hoy miiçh jim tøø mja hijpä.

19-20 Mänitä Jesús yhadsooyy:

—Tii jaduñ tøø jiadyii.

Mänit hajxy yhadsooyy:

—Ja'a Jesús tøø yagho'ogyii cruzcøxp. Ja'a teedywiindsønñhajxy yejc møød højts ngopc-hajpä. Diosquexy hijty wiädity. Hoy-yagjuøññajaty pä hijty yajcähxø'py. Hoy hijty miädia'agy ja'a Dioscøxpä cu'ughagujc.

21 Jaduñ højts njoot hijty chocy coo ja'a Jesús ja'a gobiernä Rómaba ja'a quiuhdujt cu piøjcä nebiä gobiernä yaa quia'a hanéhmñät maa højts ngajptän, højts judíosjäya'ayhajxy. Maaxtøjcy mädägøøyy jaduñ yagho'cä.

22 Haamiän ja'a to'oxiøjc-hajxy näje'e yhooyy maa ja'a Jesús hänajty tøø ñaaxtägø'øyän.

23 Pero cábac hajxy piaaty. Mänitägä Diosmoonsä hajxy metsc yhiixy ja'a tsajpootypä-tsohmä. Mänitac hajxy yhawáanäxä cooc ja'a Jesús hänajty tøø jiuypiojñä. Hoy-yagjuøññä højts hajxy xyajmøødmädiacy.

24 Mänit højts njamiøødhajxy hoy yhiixpä. Jaduññac hajxy piaatpä nebiä to'oxiøjc-hajxy hänajty tøø ñägäpxiän. Ni jé'egädsä Jesús hajxy quia'a hijxy.

25 Mänitä Jesús miänaañ:

—Nej, cab hajxy mnä'ägä wiinjuø'øyä, cab hajxy mnä'ägä mabøquiä nebiä Diosquexyhajxy jecy miänaañän.

26 Tsipcøxpä Diosquexy chaaçhpøga'añ coo hänajty jim ñøcxaannä tsajpootyp.

27 Mänit tiägøøyy yajwiingapxøøbiä ja'a Diosmädia'agy majaty miädia'agyijän. Jim quiapxtsoñ maa ja'a Moisés hänajty tøø quiujaayän. Cøjx quiapxy mäduhñtiä ja'a Diosquexyhajxy quiujahyyän.

28 Cooc hajxy jim miejch Emaús, mänitä Jesús miänaañ cooc jiaac yo'oya'añ.

29 Mänit hajxy ñämaayho'cy:

—Huuc mähmø'øw yaa maa højtsän. Tøø chuujøøñä. Coodsøøñäp jaduñ.

Mänitä Jesús jiaanç mähmøøyy. Mänit hajxy tiøjtägøøyy.

30 Mänit hajxy yhäñaaguiädaacy meexäwiinduum. Mänitä Jesús tsajcaagy quionø'cy. Mänitä Dioscujú'uyäp yejcy. Mänitä tsajcaagy qyijwa'xy. Mänitä jiamiøød miooyy.

31 Mänitnäs hajxy yhøxcapñä. Mänitä Jesús yhadägoyyøøñä.

32 Mänit tu'jäya'ay miänaañ:

—Wíinghøch hijty nnijäwø'øyii tu'haambejpä coo ja'a Diosmädia'agy xyajmøødmädiäacäm.

33 Mänitiä hajxy wyiimbijnä, ñøcxtägajch Jerusalén. Mänitä jiamiøød hajxy hoy piaady maa hajxy hänajty tøø yhamugø'øyän, ja'a nämajtu'ugpä møød hajxy nämaybä.

34 Mänit hajxy nämetspä ñämaayyä:

—Tøyhajt jaduñ coo ja'a nWiindsønñhajtäm tøø jiuypiojcy. Ja'a Simón jaduñ tøø yhiixy.

35 Mänit hajxy je'e ñägäpxpä cooc ja'a Jesús hajxy tøø piaady tu'haam. Mänitac hajxy yhøxcapñä coogä Jesús ja'a tsajcaagy qyijwa'xy.

36 Jiiby hajxy hänajty miädia'agyñä, mänitä Jesús ñäguehxtøø'xy maa hajxy hänajty yhäña'ayän. Mänit yajpoo'xy ja'a jiamiøødhajxy.

37 Mänit hajxy jiaanç tehñ chähgøøyy. Háañämä tyijy hajxy nämejtsä.

38 Mänitä Jesús miänaañ:

—Tii hajxy coo mwli' chähgø'øy. Tiich hajxy coo xquia'a høxcapy.

39 Høxtáhmdsøch hädaa ngø'ø, høxtáhmdsøch hädaa ndecy. Høøch je'e Jesús. Høøch hajxy nähdoñäc. Cabä háañämä ni'x copc miøødä nébiøch høøch nmøødän.

40 Mänitä Jesús ja'a quio'ødiacy yaghijxy ja'a jiamiøødhajxy.

41 Pero cab hajxy hamuumdu'joot ñä'ägä mabøjcy. Xoonäacp hajxy hänajty møød hajxy hänajty yagjuø'øy. Mänitä Jesús miänaañ:

—Tii hajxy jii mmøød cooch ngáyät.

42 Mänitä hacxtsa'ay hajxy miooyy møødä mõjtsiinjøødy.

⁴³ Mänitä Jesús quioondsooy. Mänit quiaayy maa ja'a wyiinduumhajxiän.

⁴⁴ Mänit miänaañ:

—Nébiøch tøø njatiän, tøøds hajxy hijty nhawáanäm mänaa hajxy quipxy tøø nhíjtäm. Tøjiajt jaduñ ja'a høøhcøxpä neby jiiby myiñän cujaay maa ja'a Moisés miädia'aguiän, chaads jiiby maa ja'a Sálmosän, chaads jiiby maa ja'a librän ja'a Diosquexyhajxy jecy jiáhyyäbä.

⁴⁵ Mänitä Diosmädia'agy quiapxtøøyy:

⁴⁶ —Jaduñ myiñ cujaay maa ja'a Diosmädia'aguiän cooc ja'a Diosquexy tsipcøxp yho'oga'añ, y cooc cudägøøgxøø jiuypiojtägatsa'añ,

⁴⁷ y cooc miädia'aga'añii wiinduhmyhagajpt. Yaa Jerusalén miädiaactsoona'añii. Jaduñä cu'ughajxy yajwiingapxø'øwa'añii coo ja'a yhaxøøgcuhdujt hajxy ñajtshixø'øwät. Mänit hajxy yajñahwa'adsa'añii ja'a piojpa quiädieey hajxy.

⁴⁸ Hamdsoo hajxy tøø mhixy tøø mmädoy nébiøch chamñ nmädia'aguiän.

⁴⁹ Nyajnäguexáambiøch mijts ja'a Dioshespíritu ja'a nDéedyhøch tøø xyajwi-inwaanø'øyäbä cooch mijts nmó'owät. Jim choona'añ tsajpootyp. Yaa hajxy mmähmø'øwät Jerusalén høxtä coonä ja'a Dioshespíritu hajxy hänajty tøø xñägäda'agy.

⁵⁰ Mänitä Jesús miøødcajptpädsøømy ja'a jiamiøødhajxy. Mänit hajxy miejch maa ja'a cajpt xiøhatiän Betania. Mänitä Jesús ja'a quiø'ø chajxajy. Mänitä Dioscujú'uyäp yejcy ja'a jiamiøødcøxpähajxy.

⁵¹ Mänit hajxy ñähguéecänä. Mänitä Jesús jim ñøcxy tsajpootyp.

⁵² Mänitä Jesús hajxy wyiingudsähgøøyy. Mänit hajxy wyiimbijnä jaançh tehñ jiootcujc. Mänit hajxy ñøcxy Jerusalén.

⁵³ Jabom-jabom hajxy hänajty ñøcxy tsajtøgooty. Nøcxy hajxy hänajty quiapxy miädia'agy coo ja'a Dios miøjja jiaançhä. Amén.

San Juan

¹ Ja'a Dioshuung, je'e hajxy xyajnahixóoyyäm nebiä Dios jiäya'ayhatiän. Jíyyäm hänajty je'e mänaa hädaa yaabä naaxwiin yhawijy tiøø'xta'aguiän. Jíyyäm hänajty je'e møødä Dios; Diósäts je'e.

² Jim hänajty je'e møødä Dios mänaa hädaa yaabä naaxwiin yhawijy tiøø'xta'aguiän.

³ Jaaya'ay jaduñ hädiuñ cøxiä. Nidiuhm yhädiuñ.

⁴ Ja'a Dioshuung, yejpy ja'a jugyhajt je'e. Jaduhñ mäwiin je'e nebiä cujajpä nebiä cudøø'xpän. Xyajpädsómäm hajxy hagoonstuum.

⁵ Coø jøøn yhajajy hagoonstuum, hoy jaduñ nhíxäm. Ja'a Dioshuung, jaduñ mäwínäts je'e nebiä jøønän coø xyaghíxäm neby hajxy hoy nwädíjtämät.

⁶ Mänitä Dios jäya'ay tu'ug quiejxy, ja'a xøhajpä Juan.

⁷ Paadiä Juan quiejxä, jaduñä Dioshuung ñägápxät, jaduñä jäya'ayhajxy nägøxiä miäbøgät.

⁸ Ja'a Juan, ca'a je'e Dyioshuungä. Nä'ä nägapxpä jaduñ quiejxä.

⁹ Tøø ja'a Dioshuung hänajty yaa miejtsnä hädaa yaabä naaxwiin. Je'e ja'a tøyhajt hajxy xmióoyyäm nägøxiä maa hajxy yaa ndsänáayyäm hädaa yaabä naaxwiin. Cøxiä xyajnahixóoyyäm.

¹⁰ Coø yaa miejch hädaa yaabä naaxwiin, cabä miädia'agy miäbøjcäxä, hoy hänajty cøxiä tøø jia hädiuñ.

¹¹ Jim je'e jia medsooyy maa ja'a yhamdsoo cajptän, pero cab jim chojçä.

¹² Pero näje'ejaty hajxy chojcy. Pøn jaduñ tsojç, pøn ja'a miädia'agy mäbøjcä, je'edsä cuhdujt hajxy mooyyä coø hajxy yhidät nebiä Dioshuungän.

¹³ Cab hajxy xyhuunghájtäm nebiä yaabä teedy hajxy xyhuunghájtäm. Pero coø hajxy nmäbøjcämät ja'a Dios ja'a miädia'agy, mänit hajxy jaduñ xyhuunghájtämät.

¹⁴ Ja'a Dioshuung, jäya'ayhajt je'e neby højts chaa njäya'ayhájtäm. Hädaa yaabä naaxwiin je'e chánaayy maa højtshájtäm. Tøø højts nhixy coø je'e miøjjä jiaançhä. Paady miøjjä jiaançhä coø je'e Dyioshuungä. Tiumby je'e ja'a mayhajt homiänaajä. Tømiädiaacp je'e homiänaajä.

¹⁵ Jaayá'ayädsä Juan jaduñ ñägápx:

—Yø'øya'ayhøch hijty nnägapxyp, yø'ø høxhaam tøø jiaac méchäbä. Høøch hijty jayøjp tøø nmech. Yø'ødsä møjcuhtdujt nä'ägädä møød. Høøch, cábøchä cuhdujt jaduñ nmøødä neby yø'øya'ay miøødän. Jímiäm yø'øya'ay hänajty coøch yaa nmiiñ ngahy.

¹⁶ Jaayá'ayäts ja'a mayhajt tuumb ja'a højtscøxphájtäm homiänaajä.

¹⁷ Dios ja'a Moisés ja'a cuhdujt jaduñ mooyy. Højts ja'a Moisés ja'a cuhdujt xmiöödiägájtsäm. Pero xchøjcäm ja'a Dios hajxy møød xmióoyyäm ja'a tøyhajt. Paadiä Jesucristo yaa quiejxä.

¹⁸ Ni pøn ja'a Dios quia'a hixyñä. Ja'a yHuung, je'e hajxy xyhawáanäm nebiä Dios jiäya'ayhatiän. Jiaanç tehñ chojpy ja'a Dios ja'a Jesucristo. Tu'ughuunghajp ja'a Jesucristo.

¹⁹ Mänitä teedyhajxy näje'e jim quiejxä møødä levitashajxy maa Juangän. Ja'a levitashajxy, tsajtøjcueendähajpä hajxy hänajty tiuunghajpy. Jim hajxy chohndaacy maa ja'a cajpt jaduñ xiøhatiän Jerusalén. Ja'a judíos wyiindsøn hajxy jaduñ mäguejx. Paadiä teedyhajxy jaduñ quiejxä coø ja'a Juan hajxy ween nøcxy tøyhajtmädoypøn je'e.

²⁰ Coø ja'a Juan jaduñ miäyajtøøwa, yejç je'e ja'a tøyhajt. Caj yhøhndaacy:

—Ca'a yhøøchä je'e ja'a Cristo, ja'a hajxy nhahíxämbä, ja'a Dios tøø wyiinguéxiäbä coø hajxy xyhanéhmämät.

²¹ Mänitä jadähooc miäyajtøøwägumbä:

—Pøñ miich. Nej, miich Elíashajpä ja'a mináambjä.

Mänitá Juan yhadsooyy:

—Caj.

Mänitá miäyajtøwägumbä:

—Nej, tøgä miich ja'a Diosmädia'agy jecy tøø mhuuc mäwädijpä.

Mänitá Juan yhadsoogumbä:

—Cábämäts.

²² Mänitá miäyajtøwägumbä:

—Pøñ miich. Højts ja'a tøyhajt móoyäc neby højts ja'a nwiindsøn häyaa nhawaandägätsät pøñ miich.

²³ Mänitá Juan yhadsooyy:

—Høøch, nyajcapxøbiøch ja'a Diosmädia'agy møc pactuum. Panøcx ja'a Diostu'u hajxy nebiä Isaiás jecy miänaañän coo hajxy mbanøcxät. Diosmädia'agy ja'a Isaiás jecy yajwa'x.

²⁴ Ja'a hajxy hänajty tøø quiexyíjábä maa ja'a Juangän, näje'e hajxy hänajty pianøcxä ja'a fariseos ja'a miädia'agy hajxy.

²⁵ Mänitá Juan miäyajtøwa:

—Tii miich coo mnä'ä mäyajnäbejpä pø cá'adäm miich mGristäjä, pø cá'adäm miich ja'a jäya'ay ja'a Diosmädia'agy jecy tøø yajwá'xiäbä.

²⁶ Mänitá Juan yhadsooyy:

—Høøch, nøøháamhøch nmäyajnäbety. Pero ximä jäya'ay tu'ug majiäya'ayhagujc. Cahnä hajxy mhixyhatyñä.

²⁷ Jayøjphøch nmejch. Mänit yø'øya'ay høxhaam jiaac mejch. Møjcuhtujt yø'øya'ay miøød quejeech nmøødä.

²⁸ Jimä Juan hänajty miäyajnäbety maa ja'a cajpt hänajty xiøhatiän Betábara, ja'a Jordánpä møjnøøhaawiimbä jaduhñ maa ja'a xøø piädsømiän.

²⁹ Cujaboom ja'a Juan ja'a Jesús yhiixy. Jimä Jesús hänajty miänacy maa ja'a Juan hänajty tiäna'ayän. Mänitá Juan miänaañ:

—Huug hix hajxy, xii jäya'ay tu'ug miänacy. Yø'ø jaduhñ xøhajt ja'a Meeghuung ja'a Dios tøø quiéxiäbä. Yø'øds hajxy je'e xñähho'tu'udáañäm. Yø'øds hajxy je'e xyajnahwa'ads xyajcuha'adsáañäm ja'a nbojpa ngädieeyhajtäm.

³⁰ Yø'øch hijty nnänøømby ja'a høxhaam tøø jiaac méchäbä. Høøch hijty jayøjp tøø nmech. Yø'øds je'e ja'a møjcuhtujt møød quejeech nmøødä. Jimiäm yø'øya'ay hänajty mänaäch nmiñ nga'ayän.

³¹ Cábøch hijty nnajuø'øy pøñ jaduhñ tunaamb nébiøch tøø nmädia'aguiän. Pero páadyhøch tøø nmech mäyajnäbejpä nøøhaam neby hajxy jaduhñ mnajuø'øwät pøñ je'e, mijts judíos.

³² Mänitá Juan miänáangumbä:

—Tøøchä Dioshespíritu nhixy coo jim tøø chooñ tsajpootyp. Mänitøch nhixy coo hänajty miänacy nebiä palomän. Mänitá ñaaxcädaacy. Mänitá jim yhøxtaacy yø'øya'ay quiuhduum.

³³ Cahnøch hänajty nnajuø'øy pøñ je'e. Pero jaayá'ayhøch tøø xquiéxiäbä mäyajnäbejpä nøøhaam, je'e ch jaduhñ xñämaayy: “Mhixaambiä Dioshespíritu maa je'e miänacø'øwa'añän. Jim jaduhñ miähmø'øwa'añ maa tu'jäya'ay quiuhduumän. Jaayá'ayäts ja'a Dioshespíritu jaduhñ yegáannäp.”

³⁴ Tøøch njaan ch hixy. Tøøch nnägaxy coo yø'øya'ay jiaan ch Dioshuungä. Nyéjpiøch ja'a tøyhajt jaduhñ.

³⁵ Cujaboom ja'a Juan hänajty jim tiänáaguiumbä møødä jiamiøød metscä.

³⁶ Jimä Jesús hänajty wiädijpä. Coo ja'a Juan ja'a Jesús miøjhee'py, mänitá Juan miänaañ:

—Yø'øds jaduhñ xøhajt ja'a Meeghuung ja'a Dios tøø quiéxiäbä.

³⁷ Coo ja'a Juan ja'a jiamiøødhajxy jaduhñ miädooyy, mänitä Jesús hajxy piadu'ubøjcy nämetscä.

³⁸ Coo Jesús jiäwøøyy coo hänajty pianøcxyii, mänitä wia'wiimbijty. Mänitä yhihxy coo hänajty nämetscä pianøcxyii. Mänitä miänaañ:

—Tii hajxy mhøxtaaby.

Mänit hajxy yhadsooyy:

—Wiindsón, maa miich tøø mmejtsta'agy.

³⁹ Mänitä Jesús yhadsooyy:

—Jam huug híxäm.

Mänit hajxy hoy jiaanç hixy maa Jesús hänajty tøø miejtsta'aguiän. Tøø hänajty miänacyxiøøjøñä. Jim hajxy miähmøøñä maa Jesúsän.

⁴⁰ Tu'ugä Juan ja'a jiamiøød hänajty xiøhaty Andrés, ja'a Simón Pedro piuhya'ay. Je'eds ja'a Jesús hänajty tøø piadu'ubøcy møødä jiamiøød tu'ug.

⁴¹ Mänitä Andrés ja'a piuhya'ay hoy piaady, ja'a xøhjäpä Simón. Mänitä Simón ñämaayy:

—Tøø højts ja'a Mesías nbaady —je'e jaduhñ ñänøømby ja'a Cristo, ja'a Dios tøø wyiinguéxiäbä coo hajxy yaa xyhanéhämät.

⁴² Mänitä Andrés ja'a Simón jim wioonøcxy maa ja'a Jesús hänajtiän. Coo ja'a Jesús ja'a Simón yhihxy, mänit miänaañ:

—Miiçh, Simón miich mxøhaty. Jonás miich mdeedyhajpy. Pero Pedro mxøhataañnä —je'e jaduhñ ñänøømby tsaa.

⁴³ Cujaboom ja'a Jesús hänajty ñøcxa'añ Galilea. Mänitä Felipe hoy piaady. Mänitä Felipe ñämaayy:

—Jámhøch quipxy møødwädíjtäc. Høøçhä nmädia'agy habøjcäc.

⁴⁴ Jimä Felipe hänajty chooñ maa ja'a cajpt hänajty xiøhatiän Betsaida. Jim ja'a Andrés hänajty chohmbä møødä Pedro.

⁴⁵ Mänitä Felipe ja'a Natanael hoy piaady. Mänitä Natanael ñämaayy:

—Tøø højts jaaya'ay nbaady ja'a Moisés tøø ñägápxiäbä maa ja'a nocy piädø'quiän, ja'a Diosmädia'agymiäwädijpähajxy tøø ñägápxiäbä. Jesús jaduhñ xiøhaty. José yhuung je'eduhñ. Jim jaduhñ chooñ Nazaret.

⁴⁶ Mänitä Natanael miänaañ:

—Nazaretä. Cabä ndijy hoybäda'a jim Nazaret.

Mänitä Felipe yhadsooyy:

—Jam huug híxäm.

⁴⁷ Jimä Natanael ja'a Jesús hänajty ñämech. Coo Jesús ja'a Natanael yhihxy, mänitä Jesús miänaañ:

—Yø'ø judío xii miimbä, hamuumdu'joot ja'a Diosmädia'agy quiudiuñ. Ni mänaa quia'a hønnda'agy.

⁴⁸ Mänitä Natanael ja'a Jesús miäyajtøøyy:

—Maaçh miich tøø xyhixy cooçh miich jaduhñ tøø xyhøxcapy.

Mänitä Jesús yhadsooyy:

—Jiiby miich hänajty mdäna'ay piidspa'c. Cahnä Felipe hänajty xmiägäpxy.

⁴⁹ Mänitä Natanael miänaañ:

—Wiindsón, Dios miich xyhuunghajp. Mhanehmby miich ja'a judíoshajxy.

⁵⁰ Mänitä Jesús miänaañ:

—Páadyhøch ja'a nmädia'agy xmiäbøjcä cooçh jaduhñ nmänaañ cooçh miich jiiby tøø nhixy piidspa'c. Pero mhixaamby cooçh maas hoy-yagjuøøñäjatypä nyajcähxø'øga'añ.

⁵¹ Mänitä Jesús miänaañgumbä:

—Chaads mijts nnámá'awät, mhixaamby hajxy coo ja'a tsajpootyp yhawa'adsa'añ. Mhixaamby ja'a Diosmoonsä hajxy ja'a tsajpootypä coo hajxy chajpeda'añ coo hajxy ñaaxcäda'aga'añ maačhä nwiinduumän, høøch ja'a Diosquexypä.

2

¹ Cumaaxc ja'a pøc hu'ug hänajty jiada'añii maa ja'a cajpt hänajty xiøhatiän Caná de Galilea. Jimä Jesús ja'a tiaj wioowä

² møødä Jesús møødä jiamiøødhajxy.

³ Mänitä vino quiøjxy. Mänitä Jesús ñämaayyä ja'a tiaj coog ja'a vino tøø quiøxy.

⁴ Mänitä Jesús yhadsooyy:

—Maam, ca'a mhaaw mbäda'agy. Ca'a myiichä mgüeendä. Høøch nnajuøøby. Cahnä yhabaadyñä cooch nmayhajtúnät.

⁵ Mänitä Jesús ja'a tiaj miänaañ, ñämaayyä ja'a moonsähajxy:

—Naxy hajxy mdehm miäböğät coo Jesús hajxy xmiägäp xyané'emät.

⁶ Jimä hamøj tsaanøøgow hänajty quiärumna'ay tädujčä. Tägø'øwaamb jii by tu'nøøgow mädaaxc-hii'xlitro o mägo'xlitro. Jue'e ja'a judíos hajxy hänajty wia'añ, cø'øbujnøøhidøhñdy. Jaduhñ hajxy hänajty quiuhdujthaty.

⁷ Mänitä Jesús miänaañ, ñämaayyä ja'a moonsähajxy:

—Cudemø'øw nøø hajxy nøøgowooty. Cøxy yaghuts hajxy.

Mänit hajxy jiaančh yaghujch.

⁸ Mänit Jesús miänáaṅumbä:

—Jee'ppädsøm nøø hajxy weeñtiä. Nøcx ja'a mwiindsón hajxy mo'ow.

Mänit hajxy jaduhñ quiudiuuñ.

⁹ Tøø ja'a nøø hänajty wia'añguiojy vino. Jesús jaduhñ yajwa'añguioj. Mänitä moonsäwiindsón ja'a vino quiøøchooyy. Mänit yhuucmajch. Cab hänajty ñajuø'øy maa ja'a vino tøø chooñ. Pero ñajuøøby ja'a moonsähajxy hänajty; hiṅ, je'e ja'a nøø hajxy hänajty tøø jiee'ppädsømmy. Mänitä moonsäwiindsón ja'a jamiø'ød miøjyaaxy.

¹⁰ Mänit ñämaayyä:

—Jayøjp ja'a hovyino hajxy naxy ñä'ägädä temy. Coo ja'a woybä wichpähajxy hänajty com tøø yhu'ugy, mänit hajxy hänajty jiaac tema'añ ja'a vino ca'a jaty hoybä. Pero miich, cahnä hovyino mdemyñä.

¹¹ Coo Jesús ja'a vino yajwa'añguiojy jim Caná de Galilea, hijxtahnd jaduhñ yajcähxø'tsohñ coo miøjjä coo jiaančhä. Coo Jesús ja'a jiamiøødhajxy jaduhñ yhiṅxy coo Jesús ja'a vino yajwa'añguiojy, paadiä Jesús miädia'agy miäböjčäxä.

¹² Mänitä Jesús hajxy jii by yhädaacy maa ja'a cajpt jaduhñ xiøhatiän Capernaum, møødä tiaj, møødä piuhya'ayhajxy, møødä jiamiøødhajxy. Coo hajxy jii by quiädaacy, mejtsxøø tægøøgxøø hajxy jii by yhiṅty.

¹³ Jadáañäp ja'a pascuaxøø hänajty jim maa ja'a cajpt jaduhñ xiøhatiän Jerusalén. Ja'a judíoshajxy hänajty jim yagjadáañäp. Mänit Jesús jim ñøcx Jerusalén.

¹⁴ Coo jim quioo'ty, mänit jii by tiøjtägøøyy maa ja'a tsajtøjc hamøjpän maa ja'a judíos ja'a Dios hajxy hänajty wyiingudsähgø'øyän. Jii by ja'a wajtoo'pähajxy hänajty møødä meegtoo'pä møødä palomatoopä. Jaanä jii piä xädø'øñguiuwijtspähajxy hänajty yhäñabiä.

¹⁵ Coo Jesús jaduhñ yhiṅxy, mänitä xaačh wyidsø'cy. Mänitä ju'xt yhädiuuñ. Mänitä jäya'ayhajxy cøjx yhøxpäbo'oyii jii by tsajtøgooty møødä waj møødä meeg cøxiä. Mänitä Jesús yajtsitø'cy ja'a xädø'øñguiuwijtspä mieexähajxy. Cøjx ja'a xiädø'øñhajxy yhøxxity.

¹⁶ Mänitä palomatoopähajxy ñämaayyä:

—¡Yajpädsøm yø'ø mbaloma hajxy! ¡Cábøch nDeedy ja'a tiøjc hajxy xwiáañät halaplaaz!

17 Mänitä jiamiøødhajxy jiahmiejtstaacy coo jaduhñ yhity cujaay: “Mjaanč tehñ cwieendhadáañbøch hädaa miich mdøjc nägøø nädecypiä, hóyhøch hajxy cu xjia yajcuyagho'ogø'øw.”

18 Mänitä judíoshajxy miänaañ, ñämaayyá Jesús:

—Tii hijxtahñd højts xyajcähxø'øgáañp hoy-yagjuøøñäjatypä pø mmøød miich cuhdujt jaduhñ coo yø'øya'ayhajxy tøø mgøxy høxpäbo'oy.

19 Mänitä Jesús yhadsooyy:

—Coo hädaa tsajtøjc hajxy myagjidät, pues cudägøøgxøyyøch nyaghoyøødiägätsät.

20 Mänitä judíoshajxy miänaañ:

—Cujuxychägui'xtädujcjumøjt hädaa tsajtøjc jecy miaayy y tægøøgxøyyä miich myaghoyøødiägatsa'añ. Cab højts jaduhñ nmäbøcy.

21 Pero jue'e Jesús hänajty ñänøømby “ja'a tsajtøjc”, ja'a yhamdsoo ni'x ja'a yhamdsoo copc.

22 Coo Jesús hänajty cujecy tøø jiaanč jujypiøcy, mänitä jiamiøødhajxy jiahmiejtstaacy nebiaty hänajty tøø miäna'añän. Mänitä Diosmädia'agy hajxy miäbøjnä møødä Jesús ja'a miädia'agy.

23 Mänaa ja'a Jesús jim yhitiän Jerusalén ja'a pascuaxøøjooty, mänitä cu'ugä Jesús hajxy yhiixy coo ja'a Jesús ja'a hoy-yagjuøøñäjatypä hänajty yajcähxø'øgy. Mänitä Jesús ja'a miädia'agy miäbøjcäxä nämøj nämay.

24 Pero cabä Jesús hänajty yajwiinhøøñ, je'eguiøxpä coo hänajty ñajuø'øy hamdsoohaamby coo ja'a cu'ughajxy hänajty hamuumdu'joot quia'a mäbøcy.

25 Hix, hamdsoohaambiä Jesús hänajty ñajuø'øy coo hajxy haxøøg nwiinmahñdyhájtäm nägøxiä. Cabä Jesús hänajty pøn miäyajtøy neby hajxy nwiinmahñdyhájtäm.

3

1-2 Coo maxiøø hänajty tøø yhiijnä, mänitä copc-hajpä jim tu'ug miejch maa Jesúsän. Nämay hajxy hänajty quiopc-haty maa judíoshajxiän. Nicodemo ja'a copc-hajpä hänajty xiøhaty. Pianøcxäp ja'a fariseos miädia'agyhajxy hänajty. Tøø hänajty quioodsø'øy coo jim miejch maa Jesúsän. Mänit Jesús ñämaayyá:

—Wiindsøn, nnajuøøby højts coo miichä Dios tøø xquiexy yajnahixøøbiä. Coo miichä Dios häxøpy xquia'a puhbety, caj miich hoy-yagjuøøñäjatypä häxøpy myajcähxø'øgy.

3 Mänit Jesús miänaañ:

—Chaads miich tehñ tiøyhajt nnämä'awät, coo mga'a miindägats mga'a cahdägätsät, cabä Dios xyhané'emät.

4 Mänit Nicodemo yajtøøyy:

—Pero neby jaduhñ mmiindägats mgahdägätsät coo hänajty tøø mmäjaanä. Neby jiiby mdägøødiägätsät ja'a mdaj jioodoooy coo jiiby jadähooc mmaaxhuunghädät.

5 Mänit Jesús yhadsooyy:

—Pues caj. Chaads miich tehñ tiøyhajt nnämä'awät, coo mga'a miindägats mga'a cahdägätsät nøøhaam møødä Dios yhEspirituhaam, cabä Dios xyhané'emät.

6 Coo tøø mmiñ tøø mga'ay nebiä maaxhuungän, Dios je'e xmiooyy ja'a mni'x ja'a mgopc møødä mjuøhñdy. Y jaduhñ mäwíinäts je'e, coo Dioshespíritu mbadu'ubøgät, nebiä miindägach cahdägachpän mmähmø'øwät.

7 Ca'a myagjuø'øy coo ch jaduhñ nnäma'ay coo tsipcøxp mmiindägats mgahdägätsät.

8 Coo poj jaduhñ xiämemy, cab hajxy nnajuøøyyäm maa myinø'øy maa ñøcxø'øy. Ho-miaajä poj xiämemy. Mmädówäp jaduhñ pero caj mhíxät. Jaduhñ mäwíinäts ja'a Dios yh-Espíritu coo xjioottägø'øw coo xquioptägø'øwät. Coo jaduhñ mmäbøgät hamuumdu'joot, jaduhñ mjädät nebiä miindägach cahdägachpän —nømä Jesús miänaañ.

9 Mänitä Nicodemo yajtøøgumbä:

—Neby je'eduhñ mnänømy.

¹⁰ Mänit Jesús yhadsooy:

—Yajnahixøøbiä miich mduunghajpy maa ja'a judíoshajxiän pero cáhnøch nmädia'agy xwyiinjuøøyyäbä.

¹¹ Chaads miich tehñ tiøyhajt nnämá'awät. Nmädiaacypy højts mädyijaty højts nna-juøøby y nnägapxyp højts mädyijaty højts tøø nhixy. Pero mijts, cab højts mijts nmädia'agy xñä'ägädä mabøjcä.

¹² Tøø hajxy nja yajmøødmädia'agy tijaty yaa ja hijp hädaa yaabä naaxwiin, pero cab hajxy mmabøcy. Hoorä, cooch ja'a tsajpootypä hajxy nyajmøødmädiá'agät, ni je'e hajxy mga'a wiinjuó'owät.

¹³ 'Ni pøn jim quia'a hoyñä tsajpootyp. Jagóoyyøch jim nidiuhñ ndsooñ, høøch ja'a Diosquexypä. Páadyhøch ja'a tøyhajt nmøødä neby jim.

¹⁴ Ja'a Moisés, jimä tsahñdyhahädiuunxaxy yujpahy quepyquiøxp jim pactuum. Jaaná jaduhñhøch jäya'ay xyujpa'awaambä, høøch ja'a Diosquexypä.

¹⁵ Pønjätyhøch nmädia'agy xmiäbøjcäp, cabä yháañämähajxy mänaa quiuhdägoyya'añ. Cøjxta'axiøø hajxy jiugyhada'añ nebiä Dios jiugyhatiän —nømä Jesús miänaañ.

¹⁶ Xjiaanç tehñ chojc xjiaanç tehñ pia'häyóowäm ja'a Dios hajxy nägøxiä, mäduhñtiä hajxy yaa nhijtäm hädaa yaabä naaxwiin; paadiä tiu'ughuung ñähdujcy. Coø ja'a mädia'agy hajxy hamuumdu'joot nmäbøjcämät ja'a Dioshuungcøxpä, cabä nháañämähajxy mänaa quiuhdägóoyyämät. Jaduhñ hajxy cøjxta'axiøø njugyhajtämät nebiä Dios jiugyhatiän.

¹⁷ Paadiä Dios ja'a yHuung yaa tøø quiexy hädaa yaabä naaxwiin coø hajxy jaduhñ ween xñähho'tuütäm. Cab hajxy jaduhñ xyajcumädoᵛáañäm.

¹⁸ Pønjätiä Dios yHuung ja'a miädia'agy mabøjcäxäp, cab hajxy je'e yajcumädoᵛa'añii. Pønjäty ca'a mabøjp, tøø Dios miäna'añ cooc hajxy yajcumädoᵛa'añii, coogä Dios ja'a yHuung ja'a miädia'agy quia'a mabøjcäxä.

¹⁹ Coø Dios yHuung yaa yhooyy hädaa yaabä naaxwiin, hagoonstuum jäya'ayhajxy hänajty yhity. Paady hajxy hänajty yhity hagoonstuum coø haxøøgwiinmahñdy hajxy hänajty tiuñ. Cabä Dios yHuung miädia'agy hänajty miäbøjcäxä. Jaduhñ mäwínäts je'e nebiä jøønän. Paady jaduhñ nebiä jøønän, jaduhñ jäya'ayhajxy piädsømät hagoonstuum. Pønjäty hagoonstuum mähmø'owaamb, je'eds Dios ñänøømby coø hajxy yajcumädoᵛa'añii.

²⁰ Pønjäty haxøøgwiinmahñdy tuumb, cab hajxy chocy maa jiajjiän. Cähxø'øgaamb yhaxøøgwiinmahñdyhajxy je'e, paady hajxy quia'a pädsøma'añ jaituum.

²¹ Pønjäty panøcxaamb ja'a tømiädia'agy, je'eds jaduhñ pädsømaamb jaituum. Paady hajxy jaduhñ piädsøma'añ, jaduhñ quiähxø'øga'añ coø Dios hajxy tøyhajt jiaanç puhbedyii.

²² Mänitä Jesúshajxy jim ñøcxy Judeanaaxooty møødä jiamiøødhajxy. Coø hajxy jim miejch, mänit hajxy tiägøøyy mäyajnäbejpä. Maxiøø hajxy jim yhiyty mäyajnäbejpä.

²³ Jaaná jimä Juanghajxy hänajty miäyajnäbejpä maa ja'a cajpt hänajty xiøhatiän Enón. Salim cajpt mäwiingón jaduhñ. Comä nøø hänajty jim. Mejtsp jäya'ayhajxy hänajty jim näbejpä.

²⁴ Cahnä Juan hänajty chumyii.

²⁵ Mänitä Juan ja'a jiamiøødhajxy tiägøøyy mädiaacpä møødä judíoshajxy nämejtsc nädägøøg. Je'e hajxy hänajty miädiaacypy neby hajxy ñäbétät.

²⁶ Mänit Juan hoy ñäma'ayii:

—Wiindsón, xiiby yø'øya'ay miäyajnäbety, ja'a miich hijty jim xmiøødhijpä ja'a Jordánpä møjnøøhawiimb, ja'a miich tøø mnägäpxiäbä coø Dios tøø quiexy. May jäya'ay tøø ñämech maa miäyajnäbetiän.

²⁷ Mänit Juan miänaañ:

—Coø ja'a Dios jaduhñ tøø miäna'añ, paadiä Jesús miädia'agy pianøcxäxä nämay.

²⁸ Tøø hajxy mmädoy cooch nga'a Cristo. Jawyíinhøch Dios xquiejxy. Páadyhøch jawyiin xquiejxy cooch mädia'agy nyajwá'xät yø'ø Jesúsøxpä.

²⁹ Coø ja'a pøc hu'ug maa jiadyii, ja'a jamiø'ød, je'eds ja'a jaxie'eb møød. Ja'a jamiø'ød ja'a miägu'ughajpä jii hijpä, xoonäacp je'eduhñ coø jamiø'ød quiapxy. Jaanä xoonäacpøch høøchpä je'eguiøxpä coø Jesús miädia'agy pianøcxäxä nämay.

³⁰ Tehñgahnä hajxy miayø'øwa'añ, ja'a Jesús miädia'agy hajxy panøcxäbä. Pero pønjátyhøchä nmädia'agy xpianøcxäp, haweenø'øwaamb hajxy je'e.

³¹ Xyhanéhäm hajxy je'e nägøxiä, jaaya'ay jim tsohmä tsajpootyp. Yaayyä hajxy ndsänáayyäm hädaa yaabä naaxwiin, y hädaa yaabä naaxwiimbä mädia'agy hajxy nmädiäacäm. Pero jaaya'ay jim tsohmä tsajpootyp,

³² je'eduhñ miädiacy py nebiaty jim tøø yhi xy tøø miädoyyän tsajpootyp. Pero cabä miädia'agy miäböjcäxä nämay.

³³ Pønjätiä Jesús miädia'agy mäböjcäp, je'eds tøyhajt yejp coø Dios tiømiädia'agy.

³⁴ Jaaya'ay Dios tøø quiéxiäbä, Diosmädia'agy je'eduhñ miädiacy py. Hamuumdu'joot Dios ja'a Jesús ja'a Dioshespíritu miooyy nebiä Jesús jaduhñ miädiaactägätsät.

³⁵ Choippy ja'a Dios ja'a yHuung; paadiä cøxiä wiinä tøø yajcø'ødägø'y.

³⁶ Pønä Dios yHuung ja'a miädia'agy mäböjcäp, je'eds cøjxta'axiøø jugyhadaamb nebiä Dios jiugyhatiän. Ja'a hajxy ca'a mäböjpä, cab hajxy jaduhñ jiugyhada'añ nebiä Dios jiugyhatiän; yajcumädowáañäp hajxy je'e ja'a Diósäm.

4

¹⁻³ Coø Jesús miädoyhajty coogä fariseoshajxy hänajty tøø miädoyhaty coogä Jesús ja'a jiamioødhajxy hänajty maas may yajmäböcy y yajnäbety quejee Juan, mänit Jesús hajxy wyiimbijty Judea. Galilea hajxy ñøcxtägajch.

⁴ Jim hajxy ñaxøøyy Samarianaaxooty.

⁵ Mänit hajxy jim miejch maa ja'a cajpt hänajty xiøhatiän Sicar jim Samarianaaxooty, mäwiingón maa José ñädeedyñaaxän. Ja'a tieedy jaduhñ jecy xøhajt Jacob.

⁶⁻⁸ Jimä nøøjut mädyii José yajmämähmøøyyä coø Jacob yho'cy. Coø Jesús hajxy jim miejch maa nøøjutän, tøø Jesús hänajty yhanuu'xø'y. Mänit Jesús yhøxtaacy nøøjutpa'a. Tøø hänajty quiujyxiøøjø'y. Mänitä jiamioødhajxy ñøcxy cajptooty juuguiäabiä. Mänitä to'oxiøjc tu'ug quiädaacy nøøgoombä; Samaria hänajty chooñ. Mänit Jesús to'oxiøjc ñämaayy:

—Høøchä nøø móoyyäc.

⁹ Mänit Jesús ñämaayyä:

—Tiich miich nøø coø xmiäyujwa'añ. Jue'e miich mdsooñ Judea. Høøch, yaaç ndsooñ Samaria.

(Ix, cabä Judéabä jäya'ayhajxy hänajty miøødnijootpaadyii ja'a Samáriabä jäya'ayhajxy.)

¹⁰ Mänit Jesús yhadsooyy:

—Coo häxøpy mnajuø'y tii mayhajt Dios tiunaamby maa miichcøxpän y pønch høøch cooch ja'a nøø tøø nja yujwa'añ, mänitøch cu xmiäyujwaañ ja'a nøø ja'a ni mänaa ca'a tøøtspä.

¹¹ Mänitä to'oxiøjc yhadsooyy:

—Tsäguhñ, cøøc hädaa nøøjut. Caj miich tii mmøødä coø ja'a nøø myajwohmäbädsömät. Maa tyijy miich ja'a nøø mbáadät, ja'a ni mänaa ca'a tøøtspä.

¹² Nejy, maas móctäm miich cuhdujt mmøødä quejee Jacob cuhdujt jegyhajty miøødä, ja'a hajxy hijty nhaphajt ndeedyhätäm. Je'e hädaa nøøjut xyajmämähmøøyyäm. Yaa jecy ñøøhuucy møødä yhuunghajxy møødä yhanimalhajxy.

¹³ Mänit Jesús yhadsooyy:

—Coo hädaa nøø hajxy yhu'ugy, najxp tiødsø'øhajxy jaduhñ. Mänit hajxy tiødsø'øbáatägumbä cujaboom cumaaxc.

14 Høøch, nyéjpiøch ja'a nøø, ja'a ni mänaa ca'a tøøtspä. Coø hajxy yhu'ugät, ni mänaa ja'a tødsø'ø hajxy quia'a paattägäjtänät. Cøjxta'axiøø hajxy jaduhñ jiuğyhada'añ nebiä Dios jiuğyhatiän.

15 Cahnä to'oxiøjc ja'a mädia'agy hänajty wyiinjuø'øñä nebiä Jesús ja'a nøø ñägaxiän. Jue'e Jesús jaduhñ ñänøøm ja'a mayhajt ja'a Dios jaduhñ tiunaamby maa højtscøxpän. Mänit to'oxiøjc miänaañ:

—Høøchä nøø móoyäc nébiøch tødsø'ø xquia'a páatnät. Jadúhñhøch yaa miñ nga'a nøøwóhñnät.

16 Mänit Jesús miänaañ:

—Nøcx ja'a mnihyhap mõjya'ax; mänit yaa mwoomínät.

17 Mänit to'oxiøjc yhadsooyy:

—Cábøch nnihyhap.

Mänit Jesús miänaañ:

—Tehm tiøyhajt miich jaduhñ mmäna'añ coø nihyhap mga'a mõødä.

18 Mägøøxcä mnihyhap tøø mmøødtsäna'ay, y yø'ø ya'adiøjc xim mmøødpä, tøyhajt, ca'a myiichä mhamdsoo nihyhap yø'ø.

19 Mänit to'oxiøjc miänaañ:

—Tsäguhm, nyo'mädóobiøch jaduhñ coø miich ja'a Dioshespíritu mmøødä.

20 Jim højts nhap ndeedy ja'a Dios hajxy hijty jecy wyiingudsähgø'øy maa yø'ø tuñän. Pero mijts mänaamb coø hajxy jim nwiingudsähgøøyyämät jim Jerusalén.

21 Mänit Jesús yhadsooyy:

—Muuxy, mabøjcägøch nmädia'agy. Habaadäänäp je'ejän coø mijts ja'a Diosteedy homiaajä mwiingudsähgø'øwaañä. Ca'a ñä'a jiiyyä hajtiä mwiingudsähgø'øwa'añ maa yø'ø tuñän ni jim Jerusalén.

22 Hoy Dios hajxy mja wiingudsähgø'øy, cab hajxy mhixiä. Højts, nhixy højts ja'a Dios. Jaduhñ ja'a Diosmädia'agy miäna'añ coø ja'a judíos jäya'ay tu'ug yajnahwa'ads yajcuhwa'adsa'añ.

23 Pøn ja'a Dios tehm tiøyhajt wiingudsähgøøñäp, je'eds hamuumdu'joot wiingudsähgøøby. Jadúhñäts ja'a Dios chocy coø wyiingudsähgø'øwøød hamuumdu'joot.

24 Jaduhñä Dios nebiä poj nebiä täxa'ajän. Tsipcøxp hit ja'a Dios hajxy nwiingudsähgøøyyämät.

25 Mänit to'oxiøjc miänaañ:

—Ja'a Cristo, ja'a Dios quiexaambiä, je'e højts nahíxäm. Coø je'e quiäda'aga'añ, mänit højts je'e cøxiä xyhawaañänäm.

26 Mänit Jesús miänaañ:

—Høøchäts je'e ja'a Cristo.

27 Mänit Jesús jiamiøødhajxy miejch. Coø hajxy yhiixy coø Jesús ja'a to'oxiøjc hänajty miøødmädia'agy, yagjuøøyy hajxy jaduhñ. Pero cab hajxy yajtøøyy tiiguixpä Jesús ja'a to'oxiøjc hänajty coø miøødmädia'agy.

28 Mänitä to'oxiøjc jiihy chohñ maa hajxy hänajty miädia'aguiän. Jiibiä miajt ñähgueecy, ñøcxy je'e cajptooty, hoy ja'a cu'ughajxy ñäma'ayii:

29 —Jam jäya'ay hajxy tu'ug huug híxäm. Tøøch je'e xñajuø'øy nebiátyhøch haxøøgpä tøø nduñ. Jadúhñhøch je'e tøø xyhawaañä. Je'e ndijjiäda'a je'e ja'a Cristo.

30 Mänitä cu'ughajxy tiu'ubøjcy cajptooty, ñänøcxy ja'a Jesús hajxy.

31 Jimä Jesús hänajty ñäma'ayii ja'a jiamiøødhajxy:

—Wiindsøn, cay.

32 Mänit Jesús yhadsooyy:

—Xiiçh jøø'xypøcy nmøødä. Cab hajxy mnajuø'øy tii je'eduhñ.

33 Mänitä jiamiøødhajxy ñiñämaayyä:

—Nejy, tøø jiøø'xypøquiäda'a yajméjtsäxä.

34 Mänit Jesús miänaañ:

—Cooch jaduhñ nmänaañ cooch jøø'xypøcy nmøødä, je'ečh hänajty jaduhñ nnänøømb by cooch njootcujcä, cooch ngudiúnät nébiøch Dios tøø xyhane'emiän, cooch tiuung nya-jmäayät; je'ečh jaduhñ tøø xquiexy.

35 Huug hiḡ yø'øya'ay hajxy xii mänajpä. Xmiäbøgáañbøch nmädia'agy hajxy yø'ø. Jaduhñ mäwínäts høøčhä nmädia'agy nebiä tøømd paquiä miayø'øyän. Tehm quiähxø'p jaduhñ. Cab hajxy jaduhñ mdehm miäná'anät nebiä niippädøjc-hajxy miäna'añän cooc mädaaxpo'o yhabety, mänítäc hajxy je'e yajpädø'øga'añ.

36 Pøñhøch jäya'ay ja'a nmädia'agy xyajmäbøgáañäp, xoonða'agaamb hajxy je'e coo hajxy je'e may miäbøga'añ. Quipxy hajxy miøødxoonða'aga'añ ja'a Diosmädia'agy hajxy jayøbajt yaghawa'xøøchóhñbä. Ja'a hajxy yajmäbøgáañbä, je'edshajxy cøjxta'axiøø jugyhadaamb nebiä Dios jiugyhatiän.

37 Tøyhajt je'eduhñ nebiä jäya'ayhajxy miäna'añän: “Wiingpä je'e niip, y wiingpä je'e yajpädø'p.”

38 Tøøch mijts nwiinguexy coo mijts jäya'ay ja'a Diosmädia'agy hajxy myajmäbøgät, ja'a hajxy hijty tøø miädoyhátiäbä. Wiingpä hajxy jayøbajt yajmädoyhajt; mijts høxhaam myajmäbøgaamb —nøñ Jesús miänaañ.

39 Ja'a Sicarpä jäya'ayhajxy, nämay hajxy je'eduhñ miäbøjcä ja'a Jesús miädia'agy. Paady hajxy je'eduhñ miäbøjcy coo ja'a to'oxiøjc hänajty jaduhñ tøø ñägapy cooc yhaxøøgwiinmahñdy cøjx ñajuøøyyäxä, møød cooc cøjx yhawaandøøwäxä. Jimä Sicarpä jäya'ayhajxy hänajty xiøønaxy Samarianaaxooty.

40 Mänit Jesús hoy miänuu'xta'agyii coo jim miähmø'øwät maa quiajpthajxiän. Mänit jiaanč mähmøøyy. Mejtsxøø je'eduhñ jim yhiyty.

41 Coo Jesús jiaac yajmøødmädiaacy ja'a jäya'ayhajxy, nämay ja'a miädia'agy jiaac mäbøjcäxä.

42 Mänitä to'oxiøjc hajxy ñämaayy:

—Høxtahm̄ds miüch jim hoy mnägapyxiän cajptooty, cab højts tu'joot nmäbøjcy. Pero coo højts jii by ngädaacy, mänit højts je'e xtiehm̄ yhamdsoo møødmädiaacy. Mänit højts nmäbøjcy. Mänit højts nnajuøøyy coo yø'øya'adiäm Cristohaty. Yø'øds hajxy xyajnähwä'ads xyajcuhwä'adsáañäm nägøxiä mäduhñtiä hajxy yaa ndsänáayyäm hädaa yaabä naaxwiin.

43 Nägooyyä mejtsxøø yhabety, mänit Jesús hajxy tiu'ubøjnä, ñøcxnä hajxy jim Galilea.

44 Hamdsoo Jesús je'eduhñ miänaañ cooc hajxy quia'a wiingudsähgø'øyii maa yhamdsoo cajptän, ja'a Diosmädia'agy hajxy yaghawa'xøøbiä.

45 Pero coo Jesús jim miejch Galilea maa yhamdsoo cajptän, mänit yajpoo'xä haxi'ig haxón. Paadiä Jesús yajpoo'xä, coo jäya'ayhajxy hänajty tøø yhixy hoy-yagjuøøñäjatypä, nebiaty Jesús jim tøø tiuñ tøø yajcähxø'øgy Jerusalén ja'a pascuaxøøjooty.

46 Mänit Jesús jim jadähooc miéjtscombä Caná de Galilea maa ja'a nøø hänajty tøø yajwa'añguiojjiän vino. Jimä gobiernä mioonsä hänajty tu'ug tøø miech. Tu'ugä yhuung hänajty tøø pia'ambety jim Capernaum.

47 Coo ja'a gobiernä mioonsä miädoyhajty coo Jesús hänajty tøø miech jim Galilea, mänit Jesús hoy miänuu'xta'agyii coo yhuung nøcxy yajmøøcpøjcäxä. Møjta'agy yhuung hänajty.

48 Mänitä gobiernä mioonsä ñämaayyä:

—Mijts, cahnä hajxy mmäbøcyñä, hoy hajxy tøø mja mädoxyaty cooch hoy-yagjuøøñäjatypä tøø nduñ. Mänit hajxy mmäbøga'añ coo hajxy mhuuc tehm̄ yhixa'añ.

49 Mänitä gobiernä mioonsä miänaañ:

—Tsógäm, jam hadø'øčhä; cháñhøch nhuung yho'ogaañä.

50 Mänit Jesús miänaañ:

—Wiimbit jootcujc. Cabä mhuung yho'oga'añ.

Mänit Jesús miädia'agy jiaanč mábójcäxä. Mänit gobiernä mioonsä jiaanč wiimbijty.
⁵¹ Tu'haamhädaacpä ja'a mioonsähajxy jiojcubaadøøyyä. Mänit yhawáañäxä cooc yhuung hänajty tøø jiaanč møcpøcy.

⁵² Mänit yajtøøyy mädunajtä hänajty tøø miøcpøcy. Mänit ñämaayyä:
 —Häxøøy ja'a tiøy tiøjch cujyxiøøho'ogy.

⁵³ Mänit ja'a gobiernä mioonsä jiaanč jahmiejch coo Jesús hänajty häxøøyhajty cujyxiøøho'ogy tøø miäna'añ cooc yhuung miøcpøga'añ. Mänit Jesús ja'a miädia'agy cøjx miábójcäxä mäduhñtiä hajxy tiu'ugtøjcä.

⁵⁴ Miämetsc-hoocpä Jesús je'eduhñ yajcähxø'cy ja'a hoy-yagjuøøñäjatypä jim Galilea. Mänit je'eduhñ yajcähxø'cy coo hänajty tøø yhoj Judea.

5

¹ Mänit Jesús ñócxumbä jim Jerusalén xøøhajpä. Ja'a judíos xiøøhajxy hänajty jadáañäp.

² Jimä tsiidaact jaduhñ tu'ug xiøhaty Betzata, ja'a hebreohayuuc-haamby. Jimä tsiidaact mädøyyä maa ja'a meegtoo'taactän. Mägooxc-hit ja'a tøjwiing wäditiä jim maa ja'a tsiidaactän.

³ Mayyä pa'amjäya'ay hänajty jim quio'na'ay møødä wiindspä møødä tecymia'adpä møødä tecymiucypiä. Jim hajxy hänajty yhahixy coo ja'a nøø jaduhñ jädsenyó'oyät.

⁴ Wiingumänaa ja'a Dios mioonsä tsajpootypä hänajty tu'ug quiäda'agy nøøyagjädsenyohbiä maa ja'a tsiidaactän. Pero cab hänajty quiähxø'ogy. Nägooyyä ja'a nøø hajxy hänajty jaduhñ yhixy tiägø'øy jädsenyohbiä, mänitä pa'amjäya'ayhajxy tiägø'øy nøøjooty. Ja'a hänajty jayøbajt tehñ tiägøø'chohmbä, je'eds hänajty jaduhñ møcpøjp nidiuhñ. Hoy tyii pa'amä hänajty jia møødä, yajnaxyp je'e.

⁵ Jim jäya'ay hänajty tu'ug pia'amgo'na'ay. Miähii'xmajmocxtägøøgjumøjtjä hänajty jim tøø yhity.

⁶ Coo Jesús ja'a pa'amjäya'ay jaduhñ yhijxy, mänit Jesús yajtøøyy:
 —Nejy, mmøcpøgaambä.

⁷ Mänitä pa'amjäya'ay yhadsooyy:
 —Cábøch nbøn pønñøch xpiädá'agäp nøøjooty coo ja'a nøø tiägø'øy jädsenyohbiä. Cooch hänajty jiiby nja tägø'øwa'añ, tøø wiingpä hänajty tiägøøñä.

⁸ Mänit Jesús miänaañ:
 —Pädø'øg, yajpädø'øg mdo'ogy, yohñä.

⁹ Mänitiä pa'amjäya'ay jaduhñ jiaanč møcpøjcy. Mänitä miaabejt jiaanč yajpadø'cy yo'oyø'cy. Poo'xxiøøjooty hänajty je'e.

¹⁰ Mänitä judíoshajxy miänaañ, ñämaayyä ja'a craa ja'a hänajty tøø yajmøcpøgyijäbä:
 —Poo'xxiøø jäda'a. Cabä cuhdujt jaduhñ myiñ coo yø'ø mdo'ogy jäda'a mgapwädítät.

¹¹ Mänit jäya'ay yhadsooyy ja'a hänajty tøø miøcpøquiäbä:
 —Jaayá'ayhøch tøø xyajmøcpøquiäbä, je'e'ch jaduhñ xñämaayy cooch ndo'ogy nya-jpädø'øgät.

¹² Mänit miäyajtøøwa:
 —Pøn jaduhñ tøø xñäma'ay coo mdo'ogy myajpädø'øgät, coo myo'oyø'øgät.

¹³ Cabä mähdiøjc ñä'ä hadsooyy. Hix, jaanč tehñ ñämay jäya'ayhajxy hänajty jim. Tøø Jesús hänajty yhijxtägóoyyänä. Paadiä mähdiøjc hänajty quia'a najuø'øy waamb yhadsówät.

¹⁴ Mänit cueeñtiä, mänit Jesús yhijxcumbä maa ja'a tsajtøjc hamøjpän. Mänit Jesús miänaañ:

—Huuc mädown, chaa miičh nnämä'awät, tøø miičh mmøcpøcy. Ca'a tii pojpä cädieey mduñ coo maas haxøøg mjädät.

¹⁵ Mänitä mähdiøjc hoy ñägapxy maa ja'a judíoshajxiän cóodäm Jesús je'e, ja'a hänajty tøø miäyajmøcpøquiäbä.

16 Coo Jesús ja'a hoy-yagjuøøñäjatypä yajcähxø'cy ja'a poo'xxiøøjooty, paadiä judíos Jesús hajxy miädsiphajty; paady hajxy wyiinmaayy nebiä Jesús hajxy yaghó'ogät.

17 Mänit Jesús miänaañ, ñämaayyä ja'a judíoshajxy:

—Cábøch nDeedy mänaa tiuumbädø'øy. Jäda'anäbaadyñä tiuñ. Páadyhøch jaduhñ nbaduumbä, hoy jaduhñ jia poo'xxiøøjootiä.

18 Paady hajxy jia wiinmaayy nebiä Jesús hajxy yaghó'ogät, coo Jesús ja'a hoy-yagjuøøñäjatypä yajcähxø'cy ja'a poo'xxiøøjooty, møød coo jaduhñ miänaañ cooc Dios Tieedyhaty, møød coo yajnimiäbaatä nebiä Diosän.

19 Mänit Jesús miänaañ, ñämaayyä ja'a judíoshajxy:

—Chaads mijts tehñ tiøyhajt nnämä'awät, cábøch nhamdsoo tuung nduñ; jadúhñhøch nduñ nébiøch nDeedy jim tiuñän. Nebiätühøch nDeedy tiuñ, jadúhñhøch nduumbä.

20 Xchójpøch nDeedy. Xyajnähixøøbiøch nebiaty je'e tiuñ. Maas hoy-yagjuøøñätyhøch nDeedy xyajnähixø'owa'añ neby hajxy myagjuø'øwät.

21 Yagjujypiøjpiøch nDeedy ja'a ho'ogyjiäya'ay. Jaanä jadúhñhøch nyagjujypiøgaambä, pønjätyhøch nyajñähdíjap.

22 NDéedyhøch, cab je'e pøn yajcumädowa'añ. Høøch je'e tøø xquihdujtmø'oy cooch jäya'ay nyajcumädowät, ja'a hajxy ca'a mädia'agymiäbøjpä.

23 Páadyhøch jaduhñ tøø xquihdujtmø'oy coochä jäya'ayhajxy ween xwyiin-gudsähgø'øy nébiøch nDeedy wyiingudsähgø'øyijän. Pønjätyhøch hajxy xquia'a wiingudsähgøøby, ni nDéedyhøch hajxy xquia'a wiingudsähgøøyyäbä, ja'ačh tøø xquiéxiäbä.

24 'Chaads mijts tehñ tiøyhajt nnämä'awät, pønjaty højts nmädia'agy hajxy xmiäbøgaanäp møødhøch nDeedy, tøø ja'a haxøøgpä hajxy quiøxy najtshixøøñä. Je'eds hajxy cøjxta'axiøø jugyhadaamb nebiä Dios jiugyhatiän. Cab hajxy je'e mänaa quiumädowa'añ.

25 Ja'a hajxy ca'a mäbøjpä, tøø yhabaady coochä nmädia'agy hajxy xmiäbøgaanä. Coochä nmädia'agy hajxy jaduhñ xmiäbøjcät, jaduhñ hajxy jiugyhada'añ cøjxta'axiøø nebiä Dios jiugyhatiän.

26 Miøødhøch nDeedy cuhdujt coo jäya'ayhajxy ñämä'awät coo hajxy jaduhñ jiu-gyhádat tsajpootyp cøjxta'axiøø. Je'ečh cuhdujt tøø xmio'oy coochä jäya'ayhajxy jaduhñ nnämä'awät coo hajxy jim yhidät cøjxta'axiøø.

27 Cooch je'eduhñ tøø xwyiinguexy, páadyhøch jaduhñ tøø xquihdujtmø'oy cooch nyajñähdíjät nebiaty jäya'ayhajxy jiädät.

28 Ca'a hajxy myagjuø'øy. Habaadaamb je'e coochä ho'ogyjiäya'ayhajxy nyaaxpädsøma'añ. Mänitøch nmädia'agy hajxy xmiädowaanä.

29 Mänit hajxy nägøxiä quiøxy jutpädsøma'añ mäduhñtiä hajxy hänajty tøø yho'ogy. Ja'ačh nmädia'agy hajxy hänajty tøø xmiäbøjcäbä, je'eds hajxy nøcxaamb tsajpootyp. Ja'ačh nmädia'agy hajxy hänajty tøø xquia'a mäbøjcäbä, je'eds hajxy ca'awaamb haxøøgtuum.

30 'Nyajtødiägøøbiøch nébiøch nDeedy xñäma'ayän. Ca'a yhøøchä nhamdsoo wiin-mahñdy nyaghijpy. Ngudiúumbiøch jaduhñ nébiøch nDeedy xmiägäpxy xyhane'emiän. Cooch jaduhñ ngudiuñ, páadyhøch ja'a tøyhajt nyecy cooch nyajtødiägø'øy.

31 Cooch häxøpy hamdsoo nniñägäpxyii, mänit hajxy cu mmänaañ coochä tøyhajt nga'a mädia'agy.

32 Jiichä wiingpä xñägäpxy; nnajuøøbiøch coo ja'a tøyhajt je'eduhñ yecy. Diøshøch je'e xñägäp.

33 Tøøch mijts hoy xyajtøy maa Juangän pø Diøshøch tøø xjiaančh quexy. Mänitä Juan ja'a tøyhajt hajxy xmiooyy.

³⁴ Pero høøch, ca'a jïäyá'ayhøch tøø xyhawaanä cooçh Dios tøø xquiexy. Nyagjah-miejchpøch mijts nebiä Juan hajxy tøø xyhawaanän cooçh Dios tøø xquiexy, neby hajxy jaduñ mnähwa'ads mguhwá'adsät.

³⁵ Yajwa'xyp ja'a Juan ja'a Diosmädia'agy hijty. Xyajnähxøøby hajxy hijty neby hajxy mnähwa'ads mguhwá'adsät. Hoy ja'a miädia'agy hajxy hijty mmädóowä. Pero cabä miädia'agy hajxy hijty mmäbøgaanä.

³⁶ Ndúumbiøch nébiøch nDeedy tøø xyhane'emiän. Cooçh jaduñ nduñ, cähxø'p jaduñ cooçh nDeedy tøyhajt tøø xquiexy. Cooçh hajxy jaduñ xyhixy nébiøch nduñän, páquiøch nmädia'agy hajxy xmiäbøjcät, hoy ja'a Juan ja'a miädia'agy hajxy tøø mga'a ja mäbøjcä ja'a høøchcøxpä cooçh xñägapxy.

³⁷ Ja'a nDéedyhøch, ja'açh tøø xquiéxiäbä, høøchcøxpä jii by tøø xyajcujaayii maa Diosmädia'aguiän. Pero cab hajxy mnajuø'øy cooçh nDeedy ja'a miädia'agy jaduñ nmädiaacä. Cab hajxy mnajuø'øy cooçh jaduñ nduñ nébiøch nDeedy tiuñän.

³⁸ Pero cábøch mijts nDeedy ja'a miädia'agy tøø xmiäbøjcä, ja'açh tøø xquiéxiäbä. Coo hajxy häxøpy tøø mmäbøcy, cu xmiäbøjcøch mijts ja'a nmädia'agy.

³⁹ Myajmädiaac-ho'py ja'a Diosmädia'agy hajxy, ja'a jecy mähmøøyyäbä cujaay. Paady hajxy jaduñ myajmädiaac-ho'ogy coo tyijy hajxy jaduñ mjugyhádat nebiä Dios jiu-gyhatiän. Chaads mijts hajxy nnámá'awät, cooçh nmädia'agy hajxy xyajtúunät, mänit hajxy jaduñ mjugyhádat. Pero hóyhøch Diosmädia'agy xjia nägapxy,

⁴⁰ cábøch mijts ja'a nmädia'agy xmiäbøgaanä. Cooçh mijts nmädia'agy hamuumdu'joot xmiäbøjcät, mänit hajxy mäbøcy mjugyhádat nebiä Dios jiu-gyhatiän.

⁴¹ 'Cábøch nmøjpäda'agy, hóyhøch jäya'ayhajxy xquia'a ja wiingudsähgø'øy.

⁴² Nnajuøbiøch coo mijts Dios mga'a tsocy.

⁴³ NDéedyhøch tøø xjia hamdsoo quexy. Pero cábøch mijts nmädia'agy xmiäbøgaanä. Coo wiingpä miédsät, je'eds mijts ja'a miädia'agy paquiä mmäbøgáanäp.

⁴⁴ Cábøch mijts nmädia'agy hoy xmiäbøgaanä. Jia tsojpy ja'a mjoothajxy jaduñ coo jäya'ay hajxy xwiingudsähgø'øwät. Pero cabä mjoothajxy chocy coo Dios hajxy xchógät.

⁴⁵ Ca'a yhøøchä mijts jim nnäxø'øwø'øwaamby maa Dios wyiinduumän. Ja'a Moisésäts mijts jaduñ xñäxø'øwø'øwaamb. Mmänaamb hajxy jaduñ coo tyijy Diosmädia'agy hajxy mmäbøcy, ja'a Moisés jecy quiujähyyäbä.

⁴⁶ Coo mijts cu mjaançh mäbøjcy, cu xmiäbøjcøch nmädia'agy hajxypä. Høøchcøxpä Moisés jaduñ jecy quiujahy.

⁴⁷ Pero pø cab hajxy mmäbøga'añ nebiä Moisés jecy quiujahyyän, ni høøchä nmädia'agy hajxy xquia'a mäbøgáanäbä.

6

¹ Cumejtspo'o cudägøøgpø'o Jesús jim ñøcxy mejyhawiimb. Mejtstu'u ja'a mejy xiøhaty Galilea møød Tiberias.

² Nämäy Jesús hänajty pianøcxyii jäya'ayhajxy. Paady hänajty pianøcxyii coo hoy-yagjuøøñäjatypä hänajty tøø yajcähxø'øgy, møød coo pa'amjäya'ay hänajty tøø yajmøcpøcy.

³ Mänit Jesús hajxy jim wyiimbejty maa ja'a tunghduumän møødä jiamiøødhajxy. Mänit hajxy jim yhøxtaacy tunghduum.

⁴ Mäwiingoomb ja'a pascuaxøø hänajty, ja'a judíoshajxy yagjätäbä.

⁵ Mänit Jesús wyiinhee'ppejty coo jäya'ay hänajty may pianøcxyii. Mänit Jesús ja'a Felipe ñämaayy:

—Maa ja'a caayyøøc hajxy nbáatämät coo yø'øya'ay hajxy nyajcáayyämät nämäy.

⁶ Paadiä Jesús jaduñ miänaañ, yhuuc nä'ä mädia'agyhixaamby hänajty waambä Felipe hänajty yhadsowa'añ. Tøø Jesús hänajty hamdsoo wyiinmay nebiä jäya'ayhajxy hänajty yajcaya'añii.

⁷ Mänitä Felipe yhadsooy:

—Ni mejtsmägo'x denariojuy ja'a tsajcaagy quia'a mädøyhädät, hoy hajxy tu'lii'xyjaty cu nja móoyäm.

⁸ Andrés ja'a Jesús ja'a jiamiøød hänajty tu'ug xiøhaty, ja'a Simón Pedro piuhya'ay. Mänitä Andrés ja'a Jesús ñämaayy:

⁹ —Chadsä pigäna'c ja'a cebadatsajcaagy miøødä mägooxcä, møødä hacx metscä. Pero cab jaduhñ miädøyhädät. Hiḡ, majiäya'ay yø'øduhñ.

¹⁰ Mänit Jesús miänaañ:

—Näma'aw hajxy ween hajxy yhøxta'agy.

Møj jim miøøjiotä. Jim hajxy yhøxtaacy ja'a mägooxmilpä ya'adiøjc-hajxy møødä to'oxiøjc-hajxy hawiing.

¹¹ Mänit Jesús ja'a tsajcaagy quioonðsooy. Mänit Jesús Dios jaduhñ ñämaayy: “Dioscujú'uyäp.” Mänit Jesús ja'a jiamiøød ja'a tsajcaagy miooyy. Mänitä jiamiøød ja'a tsajcaagy hajxy tiägøøyy yajwa'xpä maa jäya'ayhajxy hänajty yhäña'ayän. Møødä hacx hajxy yajmäwa'xøøbiä. Jaduhñtiä jäya'ayhajxy miooyy mäduhñtiä hajxy hänajty quiaya'añ.

¹² Coö hajxy quiaabiädøøyy, mänit Jesús ja'a jiamiøød ñämaayy:

—Yajpädø'øg tsajcaagyquiaadiuc hajxy møødä hacxtsu'tstuc, neby hajxy jaduhñ nga'a nähguéecämät.

¹³ Mänit ja'a tsajcaagyquiaadiuc hajxy cøjx yajpädø'øgy møødä hacxtsu'tstuc. Majmetscach hajxy yaghujch ja'a tsajcaagyquiaadiuc.

¹⁴ Coö jäya'ayhajxy yhiijxy nebiä Jesús ja'a tsajcaagy hänajty tøø yajwa'añguiojjiän, mänit hajxy tiägøøyy mänaambä:

—Pues tehñ tiøyhajt, yø'øds je'e, ja'a hajxy hijty nahíjxämbä coö hajxy hijty xñämedsáañäm nebiä Diosmädia'agy miäna'añän.

¹⁵ Coö Jesús ñajuøøyy coö hänajty nøcxy piäda'aga'añii gobiernä mädsibø'øbä, mänit jim chohñnä. Mänit jim ñøcxnä nidiuhñ tunjoot.

¹⁶ Coö chuujøøyy, mänitä Jesús jiamiøødhajxy yhädaacy mejypia'a.

¹⁷ Mänit hajxy tiägøøyy barcojooty. Mänit hajxy tiu'ubøjcy. Jim Capernaum hajxy hänajty ñøcxa'añ mejyhawiimb. Wiingoods hänajty. Cahnä Jesús ja'a jiamiøød hänajty piaadyñä.

¹⁸ Mänitä poj piädø'cy møc. Mänitä mejy chajcuju cøxp.

¹⁹ Mägooxkilómetro tädujkilómetro hajxy hänajty tøø ñøcxy, mänitä Jesús hajxy yhiijxy coö ja'a barco hänajty tøø ñajtspaadø'øy. Yohby Jesús hänajty mejywyiing. Mänitä jiamiøødhajxy chähgøøbiøjcy.

²⁰ Mänit hajxy ñämaayyä:

—Ca'a hajxy mdsähgø'øy; Jesús høch høøch.

²¹ Mänit hajxy jiootcugøøyy. Mänitä Jesús yajtägøøyyä barcojooty. Mänitiä hajxy jim miejtsnä mejypia'a maa hajxy hänajty ñøcxiän.

²² Cujaboom, jimnä majiäya'ayhajxy hänajty mejyhawiimbnä, maa hajxy hänajty tøø yajcayiiän. Ñajuøøby hajxy hänajty coö Jesús hänajty tøø quia'a møødtu'ubøgyii ja'a jiamiøødhajxy quipxy. Hijxä ja'a Jesús jiamiøødhajxy coö hajxy tiu'ubøjcy barcojooty ja'a majiäya'ayhajxy. Jagoo barco hänajty tu'ug; je'e hajxy hänajty tøø yajtu'ubøcy.

²³ Mänitä barco hajxy yajmejch wiingpä, ja'a Tiberiastsohmbä. Jim hajxy miedsøøyy maa jäya'ayhajxy hänajty tøø chajcaagyquiayyän, mänaa Jesús ja'a Dioscujú'uyäp yequiän.

²⁴ Coö ja'a majiäya'ayhajxy yhiijxy coö Jesús hajxy quia'a jiiän, mänit hajxy tiägøøyy barcojooty. Mänit hajxy tiu'ubøjcy Jesús høxtaabiä. Jim hajxy ñøcxy mejyhawiimb jim Capernaum.

²⁵ Coo hajxy jim̄ miehch mejyhawiimb, mänitá Jesús hajxy jim̄ piaaty. Mänit Jesús hajxy ñämaayy:

—Wiindsón, mänaa mmejch.

²⁶ Mänit Jesús miänaañ:

—Chaads mijts teh̄m tiøyhajt nnämä'awät, páadyhøch mijts hijty xyhøxta'ay cooçh mijts je'e cu'uxiä nyajcaayy. Cábøch mijts je'e xmiäyajtøwa'añ tiiguiøxpøch ja'a hoy-yagjuøøñäbä coo nyajcähxø'cy.

²⁷ Paady hajxy mduñ, jaduñä cay hu'ugy hajxy mbaady. Pero chaads mijts nnämä'awät jadunajtä coo hajxy mhøxtá'awät neby hajxy mjugyhádat nebiä Dios jiu-gyhatiän. Høøch mijts cuhdujt nmo'owaamby coo hajxy jaduñ mjugyhádat. Páadyhøch mijts jaduñ nmo'owa'añ, cooçhä Dios tøø xquiuhdujtmø'oy, høøch ja'a Diosqueypä.

²⁸ Mänit Jesús miäyajtøøwa:

—Neby højts ngudiúnät nebiä Dios choquiän.

²⁹ Mänit Jesús yhadsooyy:

—Chojpy ja'a Dios cooçh mijts ja'a nmädia'agy xmiäbøjçät, ja'açh tøø xquiéxiäbä.

³⁰ Mänitá Jesús miäyajtøøwägumbä:

—Tii hijxtah̄nd hoy-yagjuøøñäbä myajcähxø'øgaamby neby højts miich ja'a nmädia'agy jaduñ nmäbøjçät coo miich ja'a Dios tøø xquiexy.

³¹ Ja'a hajxy hijty nhaphájtäm ndeedyhájtäm ja'a jecypiä, jim̄ä maná hajxy quiaayy maa hánajty pøn quia'a tsäna'ayän. Moisés ja'a maná yajwa'añguioj. Ja'a maná, nebiä tsajcaaguiän je'e. Jiiby jaduñ myiñ cujaay maa ja'a Diosmädia'aguiän: “Yajcaayyä jäya'ayhajxy ja'a tsajcaagyhjäpä ja'a tsajpootyptsohm̄bä. Dios jaduñ quejx.”

³² Mänitá Jesús yhadsooyy:

—Chaads mijts teh̄m tiøyhajt nnämä'awät: Caha Mioisésä mijts ja'a tsajcaagy xya-jnäguejx ja'a tsajpootyptsohm̄bä. Dios, je'eds hajxy je'e xyajnäguejx. Je'eds hajxy je'e xquiuhdujtmø'owaam̄b coo hajxy jim̄ mdägø'owät tsajpootyp.

³³ Ja'a Dios tøø quiéxiäbä, jim̄ tsajpootyp je'e tøø chooñ. Paady je'e yaa tøø quiäda'agy neby mijts xquiuhdujtmø'owät coo hajxy mjugyhádat nebiä Dios jiugyhatiän.

³⁴ Mänitá Jesús ñämaayyä:

—Højts yø'ø tsajcaagy móoyyäc cøjxta'axiøøbä, ja'a tsajpootyptsohm̄bä.

Paady hajxy jaduñ miänaañ coo hajxy quia'a wiinjuøøyy coo Jesús jaduñ ñiñänøøma hamdsoo coo je'e tøø quiexyii ja'a Dios.

³⁵ Mänitá Jesús miänaañ:

—Høøch je'e, ja'a Dios tøø quiéxiäbä. Cuhdujtyéjpøch coo hajxy jim̄ tiägø'owät tsajpootyp pønjátyhøch ja'a nmädia'agy xmiäbøjçäp. Cøjxta'axiøø hajxy jim̄ yhidät.

³⁶ Pero mijts, cábøch ja'a nmädia'agy hajxy tøø xmiäbøjçä, hoy hajxy tøø mja hixy cooçhä hoy-yagjuøøñäbä tøø nja yajcähxø'øgy.

³⁷ Pønjátyhøch ja'a nDeedy jaduñ xyajcø'øwaanøøby, je'eçhä nmädia'agy xmiäbøgåanäp. Nguhbøgåambiøch hajxy je'e.

³⁸ Páadyhøch tøø ndsooñ tsajpootyp cooçh ngudiúnät nébiøch nDeedy xyhane'emiän, ja'açh tøø xquiéxiäbä. Cábøch ja'a nhamdsoo wiinmahñdy nyaghida'añ.

³⁹ Cábøçhä nDeedy miäna'añ coo hajxy haxøøgtuum quiá'awät, ja'açh hajxy tøø xya-jcø'øwaanø'øyäbä, coo ja'a xøø jumøjt jaduñ yhabéjnät. Pero jaduñ miäna'añ cooçh hajxy nyajnøcxät tsajpootyp.

⁴⁰ Jadúhñhøch ja'a nDeedy miäna'añ coo hajxy cøjxta'axiøø jiugyhádat neby jaaya'ay jiugyhatiän, pønjaty jaduñ najuøøby cooçhä Dios xyHuunghaty, pønjátyhøch ja'a nmädia'agy xmiäbøjçäp. Je'eçh hajxy jim̄ nyajnøcxaamby tsajpootyp coo ja'a xøø jumøjt yhabéjnät.

⁴¹ Coo Jesús miädiaacpädøøyy, mänit tiägøøyyä wiingapxpéjtäbä ja'a judíoshajxy. Paadiä wyiingapxpejtä coo hánajty tøø miäna'añ coo jim̄ chooñ tsajpootyp.

⁴² Jaduhñ hajxy ñiñämaayä:

—Jesús yø'øya'ay xiøhaty; José yhuung yø'ø. Nhixyhájtäm ja'a tiaj tieedy yø'ø. Høhndaacp yø'øduhñ cooc tyijy jim tøø chooñ tsajpootyp.

⁴³ Mänitä Jesús ja'a judíos yhojy:

—Ca'a hajxy mgapxtägooñä.

⁴⁴ Pøñhøch ja'a nDeedy yajnähdiipy, je'eçhä nmädia'agy xmiäbøgáañäp. Je'eçh nya-jnøcxaamby tsajpootyp coo ja'a xøø jumøjt yhabéjñät.

⁴⁵ Jiiby jaduñ myiñ cujaay maa ja'a Diosmädia'aguiän coo Dios jäya'ay nägøxiä yajnähixø'øwa'añ. Pøñjátýhøch ja'a nDeedy ja'a miädia'agy tøø xwyiinjuøøyyä tøø xyhabøjcä, je'edshøch ja'a nmädia'agy tøø xmiäbøjcä.

⁴⁶ 'Cábøch nDeedy mänaa yhixyüi jäyá'ayäm; høøch nidiuhñ tøø nhixy. Jímhøch ndsooñ Dioswiinduum.

⁴⁷ Chaads mijts tehñ tiøyhajt nnämá'awät, pøñhøch nmädia'agy xmiäbøjcäp, je'eds jugyhadaamb cøjxta'axiøø nebiä Dios jiugyhatiän.

⁴⁸ Høøch hajxy jaduñ jim nyajtägø'øwaamby.

⁴⁹ Ja'a nhaphájtäm ndeedyhájtämhajxy, ho'c hajxy je'e, hoy ja'a maná hajxy jia caayy pactuum. Ja'a maná, mäjaayejc jaduñ. Pero paquiä ja'a miäjaahajxy quiøjxy.

⁵⁰⁻⁵¹ Høøch, páadyhøch tøø ndsooñ jim tsajpooty nébiøch jäya'ayhajxy jim nya-jtägø'øwät. Jim hajxy yhida'añ cøjxta'axiøø pøñjátýhøch nmädia'agy xmiäbøjcäp. Nnähdugáambiøch ja'a nni'x ja'a ngopc. Nnähho'tu'udáambiøch jäya'ayhajxy nägøxiä.

⁵² Mänitä judíoshajxy yajcapxiøøyy ja'a Jesús ja'a miädia'agy:

—Nejy, xmio'owáañäm yø'øya'ay ñi'x quiopcäda'a coo ndsú'tsämädä.

⁵³ Mänitä Jesús ñämaayy ja'a judíoshajxy:

—Chaads mijts tehñ tiøyhajt nnämá'awät, høøch ja'a Diosquexypä, cooçh mijts ja'a nni'x ja'a ngopc xquia'a tsú'tsät, cooçh mijts ja'a nnø'ty ja'a njoot xquia'a húucät, cab hajxy jim mdägø'øwät maa Dioswiinduumän.

⁵⁴ Pøñjátýhøch ja'a nni'x ja'a ngopc xchú'tsäp, pøñjátýhøch ja'a nnø'ty ja'a njoot xyhúucäp, je'eds je'e hidaamb cøjxta'axiøø jim tsajpootyp.

⁵⁵ Tsu'tsøøc-høch ja'a nni'x ja'a ngopc; huucøøc-høch ja'a nnø'ty ja'a njoot.

⁵⁶ Pøñjátýhøch ja'a nni'x ja'a ngopc xchú'tsäp, pøñjátýhøch ja'a nnø'ty ja'a njoot xyhúucäp, je'eçh jaduñ nnänøømby ja'a nmädiá'agyhøch hajxy xmiäbøjcäp. Je'eçh hajxy nguhdujtmø'owaamby coo hajxy yhidät cøjxta'axiøø jim tsajpootyp. Tu'ugmädiá'agyhøch hajxy nmøødhida'añ.

⁵⁷⁻⁵⁸ Ja'a nDeedyhøch, ja'açh tøø xquiéxiäbä, je'eçh jaduñ tøø xquiuhdujtmø'oy cooçh jäya'ayhajxy jim nyajnøcxät tsajpootyp, pøñjátýhøch ja'a nmädia'agy xmiäbøjcäp. Jim hajxy yhida'añ cøjxta'axiøø. Ja'a nhaphájtäm ja'a ndeedyhájtäm, ho'c hajxy je'e jequiän, hoy ja'a maná hajxy jia caayy. Pero pøñjátýhøch ja'a nmädia'agy xmiäbøjcäp, cab hajxy quia'awa'añ haxøøgtuum mänaa.

⁵⁹ Jaduhñ Jesús jim miädiaacy Capernaum coo hänajty yajnähixø'øy tsajtøgooty maa ja'a judíos ja'a Dios hajxy hänajty wyiingudsähgø'øyän.

⁶⁰ Coo Jesús ja'a jiamiøødhajxy jaduñ jim miädooyy, mänit hajxy näje'e miänaañ:

—Cab hajxy jaduñ nguhbøjcämät; tsip xex yø'ø mädia'agy jaduñ.

⁶¹ Najuøøyy Jesús jaduñ nebiaty hajxy hänajty miädia'aguiän. Mänit hajxy ñämaayä:

—Nejy, cábøçhä nmädia'agy hajxy xjiøjpøgø'øwáañjä.

⁶² Cooçh mijts xyhíxät cooçh hänajty jim nnøcxy tsajpootyp, mänitøch mijts ja'a nmädia'agy xmiäbøgaañä cooçh jim ndsooñ tsajpootyp, høøch ja'a Diosquexypä.

⁶³ Ja'a mjuøhñdyhajxy, je'eds hajxy yaa xyagjugyhajp. Ja'a mni'x ja'a mgopc-hajxy, cab hajxy je'e yaa xyagjugyhaty. Cooçh mijts ja'a nmädia'agy xmiäbøjcät, mänit hajxy mdägø'øwät jim tsajpootyp.

⁶⁴ Pero cahnä hajxy nägøxiä mmäbøcyñä.

Paadiä Jesús jaduhñ miänaañ, ñajuøøby hänajty jaduhñ pønjaty hänajty je'e ca'a mädia'agymiäbøgaamb. Ñajuøøby hänajty je'ebä pøn hänajty yegáañäp ho'cøøc. Jäguemiä Jesús jaduhñ ñajuøøyy mänaa ja'a miägu'ughajpähajxy tiägø'øyän yajnähiøøbiä.

⁶⁵ Mänit Jesús miänaangumbä:

—Páadyhøch mijts jaduhñ nnämaayy: “Pønhøch ja'a nDeedy yajnähdijpy, je'ečhä nmädia'agy xmiäbøgáañäp.”

⁶⁶ Coö Jesús jaduhñ miädiaacpäðøøyy, mäniä jiamiøødhajxy nämay wyiimbijnä. Cabä Jesús hajxy hänajty miøødwäditaannä.

⁶⁷ Mänitä Jesús ja'a jiamiøøð miäyajtøøyy ja'a nämajmetspähajxy:

—Nejy, xpiuhwa'adsáambøch mijtspä.

⁶⁸ Mänitä Simón Pedro yhadsooyy:

—Wiindsøn, caj. Tii højts miich coö nnä'a puhwá'adsät. Miič højts je'e xyajnähiøøby neby højts jim ndägø'øwät tsajpootyp.

⁶⁹ Nmäbøjcäp højts miichä mmädia'agy. Nñajuøøby højts coö jim tøø mdsoon maa Diosän, coö mGristähaty, ja'a højts hijty nhahijxypä, ja'a Dios hijty quiexaambiä.

⁷⁰ Mänitä Jesús yhadsooyy:

—Páadyhøch mijts tøø nwiimbiy nébiøch hajxy jaduhñ xmiøødwädität, mijts ja'a nämajmetspä. Pero xii hajxy tu'jäya'ay mmøøðä, ja'a møjcu'uwiiinmahñdymøødpä.

⁷¹ Ja'a Judas jaduhñ nänøøma, ja'a Simón Iscariote yhuung. Ja'a Judas, je'edsä Jesús hänajty yegaamb ho'cøøc, hoy ja'a Judas ja'a Jesús hänajty jia møødwädity møøðä nämajtu'ugpähajxy.

7

¹ Mänitä Jesús tiägøøyy cajpthayohbiä jim Galilea. Cab hänajty jim wiäditaannä jim Judea, je'eguiøxpä coö ja'a judíøshajxy hänajty yhøxta'ay nebiä Jesús hajxy yaghó'ogät.

² Jadáañäp ja'a judíos xiøøhajxy hänajty coö ja'a ramada hajxy yhädiuñ. Jim hänajty jiada'añii Jerusalén.

³ Mänitä Jesús ñämaayyä yhuchhajxy:

—Ca'a yaa mmähmø'øy. Nøcx jim Judea. Ween ja'a mmägu'ughajpähajxy jimä yhuug hijxpä nejy miich ja'a hoy-yagjuøøñäjatypä myajcähxø'øguiän.

⁴ Myajcähxø'py miich hijty maa jäya'ay quia'a mayyän. Pero pø chojpy ja'a mjoot jaduhñ coö ja'a mmädia'agy wiädität ja'a miichcøxpä, mäniä hijxwiinduum myajcähxø'øgät majiäya'ayhagujc.

⁵ Cabä Jesús ja'a miädia'agy hänajty miäbøjcäxä ni ja'a yhamdsoo huchhajxy. Paady hajxy jaduhñ miänaañ.

⁶ Mänitä Jesús miänaañ:

—Cahnä yhabaadyñä coöch jäya'ayhajxy nhawáañät pønhøch høøch. Pero mijts, homiänaajä hajxy jim mnøcxät Jerusalén.

⁷ Caj mijts cu'ug xmiähahaty. Pero høøch, xmiähahájpyøch cu'ug. Páadyhøch hajxy xmiähahaty coöch nnägäp coö hajxy yhaxøøgwädity.

⁸ Nøcx mijts xøøhat. Cábøch nnøcxa'añ høøch. Cahnä yhabaadyñä coöch jäya'ayhajxy nhawáañät pønhøch høøch.

⁹ Mänit Jesús miädiaacpäðøøñä. Mänit jim jiaanč mähmøøñä jim Galilea.

¹⁰ Mänit Jesús yhuchhajxy jim ñøcxy xøøhajpä Jerusalén. Mänit Jesús jim pianøcxy hamee'ch.

¹¹ Jimä judíos ja'a Jesús hajxy hänajty yhøxta'ay maa ja'a xøø hänajty jiadyiijän. Jaduhñ hajxy hänajty miäna'añ:

—Maada'a tyijy je'e.

12 Mädiáacp ja'a Jesús hánajty ja'a majiäya'ayhajxy. Näje'e hajxy hánajty miäna'añ cooc yhojiäya'ayä. Näje'e hajxy hánajty miänaambä cooc tyijy yhaxøøgjäya'ayä, cooc tyijy hánajty wiädity cu'ugwiinhøhmbä.

13 Pero hamee'ch hajxy hánajty miädia'agy. Hix, chähgøøby hajxy hánajty ja'a judíos wyiindsønajxy.

14 Mägujnä xøø hánajty jiadyii, mänit Jesús tiägøøyy tsajtøgooty yajnäixøøbiä.

15 Mänitä judíoshajxy yagjuøøyy, miänaañ hajxy:

—Tii yø'øya'ayäda'a coo jiaanç tehñ jiaty madiu'u y caj yhøxpøquiä.

16 Mänit Jesús yhadsooyy:

—Ca'a yhøøchä nhamdsoo mädia'agy hädaa; nDéedyhøch miädia'agy hädaa jaduhñ, ja'aç tøø xquiéxiäbä.

17 Pøn jaduhñ cudiunaamb nebiä Dios miäna'añän, je'e najuø'øwaamb coo quia'a yhøøchä nhamdsoo mädia'agy hädaa, coo Diosmädia'agy hädaa.

18 Pøn jioot jaduhñ tsojp coo yajcumáyät, je'edsä yhamdsoo mädia'agy mädiaacp. Pero chójpíøch njoot coo Dios wyiingudsähgø'øwøøjät, ja'aç tøø xquiéxiäbä. Nmøødhøch ja'a tøyhajt; cábøch nhøhnda'agy.

19 Tøyhajt coo Moisés ja'a ñocy jecy yejcy, túhmäts. Jiiby jaduhñ miäna'añ ñocyjiooty coo hajxy hoy mjäya'ayhädät. Pero cab hajxy mgudiuñ. Mmänaamb hajxy jaduhñ cooçh hajxy xyagho'oga'añ.

20 Mänitä cu'ug yhadsooyy:

—Nej, mguhmäñøøbiä coo jaduhñ mmäna'añ coo højts miiçh nyagho'oga'añ. Pøñdsän miiçh xyagho'ogaamb.

21 Mänitä Jesús miänáangumbä:

—Tähóoc-høch ja'a hoybä tøø nduñ ja'a poo'xxiøøjooty; mänit hajxy myagjuøøyy nägøxiä. Mmänaamb hajxy jaduhñ coo hajxy tii nga'a túunämät ja'a poo'xxiøøjooty; paady hajxy myagjuøøyy.

22 Moisés ja'a cuhdujt jecy yejc coo hajxy mnicircuncidarhadøøjät. (Ca'a Mioisésä yajtsohndaac; yhaphajpä tieedyhajpähajxy jecy yajtsohndaac.) Paadiä mhuung hajxy mcircuncidarhaty hoy jia poo'xxiøøjootiä.

23 Mgudiuumb by hajxy jaduhñ nebiä Moisés ja'a cuhdujt jecy yejquiän; pero mjootma'p hajxy cooçhä jäya'ay tøø nyajmøcpøcy ja'a poo'xxiøøjooty.

24 Cabä jäya'ay hajxy paquiä mwiinmahñdyhíxät nebiä wyiinmahñdy je'e. Coe jecy mmøødhídät, mänitäts ja'a wyiinmahñdy je'e mhíxät. Cooçhä pa'amjäya'ay tøø nyajmøcpøcy ja'a poo'xxiøøjooty, paady hajxy jaduhñ mmäna'añ cóogøch tyijy ja'a haxøøgwiinmahñdy nmøødä. Mmänaamb hajxy jaduhñ coo tii nga'a túunämät ja'a poo'xxiøøjooty. Pero Dios mänaamb coo yhahixø'øy coo hajxy ndúunämät.

25 Mänitä Jerusaléngpä jäya'ayhajxy näje'e tiägøøyy mänaambä:

—Yø'øds hajxy yhøxtaaby coo hajxy yagho'oga'añ.

26 Xiidsä quiapxy majiäya'ayhagujc, y caj waamb ñäma'ayii. Nej, mänaamb højts nwiindsønajtämhajiäda'a coo yø'ø Miesíasä, ja'a hajxy nhahíxämbä.

27 Nnajuøøyyäm hajxy maa yø'øya'ay chooñ. Pero ja'a Mesías, ja'a gobiernähadaambä, cab hánajty yajnajuø'øwa'añ maa hánajty chooñ.

28 Jiibiä Jesús hánajty yajnäixø'øy tsajtøgooty. Coe jaduhñ miädooyy waambaty hajxy hánajty miäna'añ, mänitä møc miänaañ:

—Xyhixyhájpøch hajxy. Mnajuøøby hajxy maach ndsooñ. Pero ca'a yhøøchä hamdsoo tøø nwiinmay cooçh yaa ngädá'agät. Ja'a nDéedyhøch tøø xquiexy. Pero cab hajxy mnajuø'øy.

29 Nhíxyhøch je'e. Jímhøch ndsooñ. Je'eçh jaduhñ tøø xquiexy.

30 Coe Jesús jaduhñ miänaañ, mänitä jia madsaanä. Pero caj ñä'ä yajmajch. Cajnä hánajty yhabaadyñä coe Jesús yagho'ogøøjät.

31 Hoy ja'a Jesús hánajty jia madsa'añii, nämay ja'a Jesús ja'a miädia'agy hánajty miábójcäxä. Mänit hajxy miänaañ:

—Coo ja'a Mesías jaduhñ miédsät, ja'a hajxy naháíjxämbä, nej, maas hoy-yagjuøøñäjaty ja'a Mesíasäda'a yajcähxø'øga'añ quejee nej yø'øya'ay jaduhñ yajcähxø'øguiän.

32 Mänitä fariseoshajxy jaduhñ miädoyhajty waambaty Jesús hánajty miädia'agyii. Mänitä policíahajxy quiejxä coo Jesús hajxy miádsät. Ja'a fariseoshajxy jaduhñ mäguejx møødä teedywiindsøñhajxy.

33 Mänitä Jesús miänaañ:

—Cábøch mijts jejcy nmøødhidaannä. Nøcxáannäbøch maačhä ndsohñän.

34 Xjia høxta'awáambøch hajxy, pero cábøch hajxy xpiaada'añ. Cab hajxy jim hoy mnøcxät maač nhida'añän.

35 Mänitä judíoshajxy ñiñämaayyä:

—Maa yø'øya'ayäda'a ñøcxa'añ coo hajxy jaduhñ nga'a páatämät. Nej, nøcxaambäda'a jim maa ja'a judíoshajxy wa'xyjaty chäna'ayän maa ja'a hajxy ca'a Israelpähajpä, coo Diosmädia'agy yajnähixø'øwät ja'a hajxy ca'a judíoshajpä.

36 Tiida'a tyijy coo miäna'añ cooc hajxy nja høxta'awáanäm, pero cábäc hajxy nbaadaanäm, y cooc hajxy hoy nga'a nøcxämät maa yhida'añän.

37 Coo ja'a xøø hánajty miayaanä, ja'a mõjxøøjooty, mänitä Jesús tiänaayyø'cy. Mänitä møc miänaañ:

—Pøñ tødsøøyyäp, ween yaa myiñ maač høøchän, ween miñ yhu'ugy mädyíibøch nmo'owaamby.

Jaduhñ Jesús yajnimiäbaatä nebiä mõjnøøgopcän. Mänitä miänáangumbä:

38 —Pøñjátyhøch ja'a nmädia'agy xmiábójcäp, je'ečhä nmädia'agy xyajwa'xtägájtšäp, nebiä Diosmädia'agy miäna'añän.

39 Jaduhñ Jesús miänaañ, pøñjaty ja'a miädia'agy mábøgáanäp, mänitä Dioshespíritu mio'owa'añii. Cahnä Dioshespíritu hánajty quiäda'agyiñä. Cahnä Jesús hánajty yagho'ogyii; cahnä hánajty yhoodiägachñä maa ja'a Tieediän.

40 Coo ja'a cu'ughajxy jaduhñ miädooyy nebiä Jesús hánajty tøø miädia'aguiän, mänit hajxy näje'e miänaañ:

—Tehñ tiøyhajt ja'a Dios ja'a quiugapxy yø'ø, ja'a Dios hijty quiexaambiä.

41 Näje'e hajxy miänaambä:

—Ja'a Mesías yø'ø, ja'a gobiernähadaambä.

Pero näje'ehajxy miänaambä:

—Pero cabä Mesías jim choona'añ Galilea.

42 Jaduhñ Diosmädia'agy miäna'añ cooc ja'a Mesías ja'a David yhaphada'añ tieedyhada'añ, y cooc jim choona'añ Belén maa ja'a David jecy chänaayyän.

43 Coo hajxy hánajty jaduhñ miädia'agy, cab hajxy hánajty tu'ugmädia'agy ñibiaadyii ja'a Jesúsçøxpä.

44 Näje'e ja'a Jesús hajxy hánajty jia madsa'añ, pero caj pøñ ñä'a majch.

45 Mänitä policíahajxy wyiimbijty maa ja'a teedywiindsøñhajxiän, maa ja'a fariseoshajxiän. Mänitä policíahajxy ñämaayyä:

—Tii hajxy coo mga'a yajmejch.

46 Mänit hajxy yhadsooyy:

—Cab jaduhñ pøñ mänaa miädia'agy nej yø'øya'ay miädia'aguiän.

47 Mänitä fariseoshajxy miänaañ:

—Cab jaduhñ yhooyä coo mijts jaduhñ tøø myajwiinhøhmbä.

48 Caj yø'øya'ay ja'a miädia'agy miábójcäxä ja'a wiindsøñhajxy møødä fariseoshajxy.

49 Pero yø'ø cu'ughajxy, cabä jecyquihdujt hajxy jiaty. Ween hajxy chaachpøcy.

50 Jimä Nicodemo hánajty, ja'a Jesús hánajty tøø ñähóyyäbä. Fariseohajp hánajty je'ebä. Mänitä Nicodemo miänaañ:

51 —Cab hõjts nguhdujthájtám jaduhñ myíñám coo jáya'ay nyajcumadóowámät coo hánajty tøø nga'a mädia'agymiädóowám jáyøjp.

52 Mänitá Nicodemo wyiinwohñä ñämaayyá:

—Jaduhñ miich mbamädiaacpä nebiä Galileabä jáya'ayhajxy miädia'aguiän. Huuc tehñ yajmädia'ag ja'a Diosmädia'agy. Cab jaduhñ jiiby maa myiñ coo ja'a Dios ja'a quiugapxy jim choona'añ Galilea.

53 Mänit hajxy ñøcxnä maa ja'a tiøjc-hajxiän.

8

1 Mänitá Jesús jim ñøcxy maa ja'a tun jaduhñ xiøhatiän Olivos.

2 Cujaboom jopyjiajjøgyñä, mänitá Jesús ñøcxy maa ja'a tsajtøjcän. Mänitá Jesús ja'a cu'ug ñämejtsä. Mänitá Jesús yhäñaaguiädaacy, tiägøøyy yajñähixøøbiä.

3 Mänitá to'oxiøjc tu'ug yajmejtsä maa Jesúsän. Ja'a cuhdujtyajñähixøøbiähajxy mäyajmejts møødä fariseoshajxy. Paadiä to'oxiøjc hánajty tøø miächii coo hánajty tøø tiu'uma'ady tøø tiu'udägoy. Mänitá to'oxiøjc jim yajñøcxä maa ja'a cu'ughagujcän.

4 Mänitá cu'ug ja'a Jesús hajxy ñämaayy:

—Wiindsøn, paady hädaa to'oxiøjc tøø miächii coo tøø piaadyii wiingya'adiøjmøød.

5 Jiiby maa ja'a Diosmädia'aguiän, jiibiä Moisés hajxy xyhanéhñäm coo ja'a to'oxiøjc jaduhñbä hajxy nguhgá'tsämät. Miichäts, waamb miich mmänaambä.

6 Paady hajxy jaduhñ yajtøøyy, coo hajxy hánajty miädowa'añ pø tu'ugmädia'agy ja'a Jesús hánajty møødä Diosmädia'agy. Yhøxtaaby hajxy hánajty nebiä Jesús hajxy ñähwaambédät coo häxøpy quia'a tu'ugmädia'aguiä. Pero cabä Jesús waamb yhadsooyy. Mänitá Jesús ñäaxcooyy. Mänitá tiägøøyy jahbiä cø'øhaam naaxwiin.

7 Mänitá Jesús jaduhñ miäyajtøøwägumbä. Mänit yhäñaaguiugøøyy. Mänit miänaañ:

—Pønä pojpä cädieey ca'a møød, ween quia'tstsooñ.

8 Mänitá Jesús ñäaxcøogumbä. Mänit tiägøøguiumbä jahbiä naaxwiin.

9 Coo hajxy jaduhñ miädooyy nebiä Jesús hánajty tøø miäna'añän, mänit hajxy je'e tiu'ubøjnä hanidiuhmjaty. Ja'a møjpä, je'e jawyiin tehñ tiu'ubøjtsohñ. Niñajuøøyyä hajxy hamdsoo coo ja'a pojpä cädieey hajxy hánajty miøødä, paady hajxy tiu'ubøjcy. Mänämetscä Jesús ja'a to'oxiøjc miøødmähmøøyy. Jimä to'oxiøjc hánajty tiäna'ay Jesús ja'a wyiinduum.

10 Mänitá Jesús yhäñaaguiugøøyy. Mänitá Jesús ja'a to'oxiøjc ñämaayy:

—Maa jaaya'ayhajxy, ja'a hajxy hijty xquiuhga'adsaambä. Nej, caj pøn tøø xñä'a cuhga'açhä.

11 Mänitá to'oxiøjc yhadsooyy:

—Wiindsøn, caj.

Mänitá Jesús miänaañ:

—Ni høøch jaduhñ nga'a mänaambä coo miich myajcuhgá'adsät. Nøcx; cab jaduhñ haxøøg mjatcøøñät.

12 Mänitá Jesús miänángumbä:

—Jaduhñ mäwíinhøch nyajñimiäbaadyii nebiä jøønän coochä jáya'ayhajxy nyajñähixø'øyy ja'a tu'u hoybä. Pønjaty ja'a nmädia'agy xpianøcxáañäp, cab jaduhñ wiädita'añ hagoodstuum. Cøjxta'axiøø jim yhida'añ tsajpootyp.

13 Mänitá fariseos ja'a Jesús hajxy ñämaayy:

—Hamdsoo miich mniñänømyii. Pero caj miich mnä'a tømiädia'agy.

14 Mänitá Jesús yhadsooyy:

—Tømiädiäacpøch, hóyhøch hamdsoo nja niñänømyii. Nnajuøøbiøch maach ndsooñ maach nnøcxy. Pero mijts, cab hajxy mnajuø'øyy.

15 Nä'a nägóobøch mijts xñä'a nähwaambety. Pero høøchä, cábøch jáya'ay nä'a nägoobä nnähwaambety.

¹⁶ Tøyhájthøch nnä'ägädä mädia'agy. Ca'a yhøøchä nhamdsoo mädia'agy hädaa; ja'a nDéedyhøchä miädia'agy hädaa, ja'açh tøø xquiéxiäbä.

¹⁷ Miimb jaduhñ cujaay maa ja'a Diosmädia'aguiän, coo jäya'ayhajxy tiu'ugmädia'aguiä nämetscä, pues tøyhajt hajxy jaduhñ yejpy.

¹⁸ Pues højts, tu'ugmädia'agy højts møødhøch nDeedy cooçh je'e tøø xquiexy.

¹⁹ Mänitä fariseoshajxy miänaañ:

—Maa mDeedy.

Mänitä Jesús yhadsooyy:

—Cábøch mijts xñajuø'øy; ni ja'a nDéedyhøch hajxy xquia'a najuøøyyä. Cooçh mijts häxøpy xñajuø'øy, xñajuøøyyäbøch ja'a nDeedy hajxy häxøpy.

²⁰ Yajnahixøøguiujc ja'a Jesús jaduhñ miänaañ jiiy tsajtøgooty, jiiy mädooyyä maa ja'a cajän maa ja'a xädø'øñ hajxy hänajty yajnahgäda'aguiän. Pero cabä Jesús hänajty pøn miadsa'añii, hoy hänajty jia mädia'agy cu'ughagujc. Cahnä hänajty yhabaady coo je'e miadsøøjät.

²¹ Mänitä Jesús miänáangumbä:

—Nøcxáañnøbøch høøch. Xjia høxta'awáambøch mijts, pero cápøch hajxy xpiaada'añ. Cab hajxy hoy mnøcxät maach nnøcxa'añän. Coo hajxy mho'oga'añ, jiiy hajxy mga'awa'añ haxøøgtuum.

²² Mänitä judíoshajxy ñiñämaayyä:

—Nej, hamdsooda'a ñiyagho'oga'añii, coo hajxy jaduhñ nga'a nøcxämät maa ñøcxä'añän.

²³ Mänitä Jesús miänaañ:

—Yaa mijts mdsooñ, hädaa yaabä naaxwiin. Pero høøch, tsajpóotypøch ndsooñ, ca'a yaajä.

²⁴ Tøøch mijts jaduhñ nnäma'ay, coo hajxy hänajty tøø mho'ogy, cahnä mbojpa mgädieey hajxy hänajty xñähwa'açhñä. Cabä mbojpa mgädieey hajxy xñähwa'adsa'añ cooçhä nmädia'agy hajxy xquia'a mäbøjçät pøñhøch høøch.

²⁵ Mänitä Jesús hajxy miäyajtøøyy:

—Pønäsän miich.

Mänitä Jesús yhadsooyy:

—Tøøch mijts nja hawáañäm pøñhøch høøch.

²⁶ Madiú'ujøch nnägápxät coo hajxy haxøøg mjäya'ayhaty. Cápøch mijts ja'a nmädia'agy xmiäbøjçä. Nhawáañäm mijts jaduhñ nebiátyhøch jaaya'ay tøø xñajtscapxøøyyän, ja'açh tøø xquiéxiäbä.

²⁷ Pero cab hajxy wyiinjuøøyy coo Jesús ja'a Tieedy jaduhñ ñägaxy.

²⁸ Mänitä Jesús miänaañ:

—Cooçh mijts hänajty tøø xmiøjpahbety, mänit hajxy mnajuø'øwa'añ pøñhøch høøch, y cooçhä nhamdsoo cuhdujt nga'a yajtuñ. Pero jaduhñ nhawáañäm nebiátyhøch ja'a nDeedy tøø xyajnahixø'øy.

²⁹ Xmiøødwädíjpaçh je'e, ja'açh tøø xquiéxiäbä. Cápøch nidiuhñ tøø xñähgue'egy je'eguiøxpä cooçh homiänaajä ngudiuñ nébiøch tøø xyhane'emiän.

³⁰ Coo ja'a Jesús jaduhñ miädiaacy, mänitä miädia'agy miäbøjçäxä nämay.

³¹ Mänitä Jesús ñämaayy ja'a judíoshajxy, ja'a Jesús ja'a miädia'agy hajxy hänajty tøø miäbøjçäbä:

—Cooçh mijts ja'a nmädia'agy xquiudiúunät homiänaajä, mänitøch mijts hamuumdu'joot xmiøødwädítät.

³² Jaduhñdsä tøyhajt hajxy mmøødhädät cooçh ja'a Dios tøø xquiexy. Jaduhñdsä mhaxøøgwiinmahñdy hajxy mnajtshixø'øwät, nebiä møjcu'ugong hajxy jaduhñ xquia'a hané'emät.

³³ Mänitä judíoshajxy yhadsooyy:

—Abraham hõjts hijty nhaphajpy ndeedyhajpy. Cab hõjts põn xyhane'emy. Tii jaduñ coo mmäna'añ coo hõjts ja'a mõjcu'ugong xquia'a hané'emät.

³⁴ Mänitä Jesús yhadsooyy:

—Chaads mijts tehñ tiõyhajt nnämä'awät, põnjaty ja'a pojpa cädieey jaduñ mөөd, mõjcu'ugong jaduñ hanehmb.

³⁵ Ja'a moonsähajxy, cab hajxy jim yhity cõjxta'axiөө maa hajxy quiuduñän. Pero ja'a cumoonsä yhuungä, je'eds jim nä'ägä hijp maa ja'a tiõjcän.

³⁶ Hөөч, nbuhbédäbөch mijts jaduñ nebiä mhaxөөgwiinmahñdy hajxy mnajt-shixó'өwät, nebiä mõjcu'ugong hajxy jaduñ xquia'a hané'emät.

³⁷ Nnajuóөbiөch jaduñ coo Abraham hajxy hijty mhaphaty mdeedyhaty. Pero xyagho'ogáambөch mijts, je'eguiөxpä coo hajxy tu'joot mga'a tuna'añ nébiөch mijts nja nämä'ayän.

³⁸ Nmädiáacypiөch nébiөch ja'a nDeedy төө xyajmөөdmädia'aguiän. Pero mijts, jaduñ mijts mjäya'ayhaty nebiä mdeedy yaa jiäya'ayhatiän hädaa yaabä naaxwiin, nebiä cu'ug yhane'emiän.

³⁹ Mänit hajxy yhadsooyy:

—Abraham hõjts hijty nhaphajpy ndeedyhajpy.

Mänitä Jesús miänaañ:

—Pө төyhajt ja'a Abraham hajxy hijty mhaphaty mdeedyhaty, jaduñ hajxy mjäya'ayhápät nebiä Abraham jecy jiäya'ayhajiän.

⁴⁰ Pero xyagho'ogáambөch mijts, hóyhөch mijts ja'a төyhajt төө nja yajmөөdmädia'agy, mädyíibөch ja'a Dios төө xyajmөөdmädia'agy. Cábөchä Abraham häxөpy xyagho'oga'añ. Caj mijts mjäya'ayhaty nebiä Abraham jecy jiäya'ayhajiän.

⁴¹ Jaduñ mijts mjäya'ayhaty nebiä mdeedyhajxy jiäya'ayhatiän.

Mänitä Jesús ñämaayyä:

—Tөyhajt hõjts ja'a Abraham hijty nhaphaty ndeedyhaty. Jaduñ hõjts njäya'ayhaty nebiä Abraham jecy jiäya'ayhajiän. Tu'ug hõjts nDeedy; Dios je'e.

⁴² Mänitä Jesús miänaañ:

—Coo Dios hajxy häxөpy төyhajt mDeedyhaty, xchójpөch mijts häxөpy yaabä. Jímhөch төө ndsooñ maa Diosän; pero yaach nhijnä hädaa yaabä naaxwiin. Ca'a yhamdsoo jóothөch yaa төө ngäda'agy. Dióshөch xquiejx.

⁴³ Xióөbөch yaa nja mädia'agy; cábөch mijts ja'a nmädia'agy xñä'ä cudiunaanä.

⁴⁴ Ja'a mõjcu'ugong hajxy mdeedyhajpy. Jaduñ hajxy mjäya'ayhaty nebiä mdeedy jiäya'ayhatiän. Mänit je'e tiägөөyy jäya'ay-yagho'pä mänaabä naaxwiin yhawijy tiөө'xta'aguiän. Cabä tiөmiädia'agy. Cabä hädaa yaabä naaxwiin hoy jiäya'ayhaty. Hөhndaacp je'e; jaduñ ñä'ägä cuhdujthaty. Jaduñ jäya'ayhajxy yaa yajñähixө'өyii ja'a mõjcu'uwiinmahñdy.

⁴⁵ Pero hөөч, coөch mijts ja'a төyhajt nyajmөөdmädia'agy, cábөch nmädia'agy hajxy xmiäbөjcä.

⁴⁶ Hopiөñä ñajuө'өy coөchä pojpa cädieey nga'a möөdä. Jaduñ hajxy mnajuó'өwät coөchä төyhajt nmädia'agy.

⁴⁷ Ja'a Dios ja'a yhuungä, miädóowäp je'e ja'a Dios ja'a miädia'agy. Pero mijtsä, caj mijts Dios xyhuunghaty; paadiä Dios miädia'agy hajxy mga'a mädownaanä.

⁴⁸ Mänitä Jesús ñämaayyä ja'a judióshajxy:

—Nej, cab jaduñ tiөyyä coo jim mdsooñ Samaria, coo mõjcu'ugong төө xyajtägө'өy.

⁴⁹ Mänitä Jesús yhadsooyy:

—Cábөchä mõjcu'ugong төө xyajtägө'өy. Nwiinguhdsähgөөbiөch ja'a nDeedy. Pero cábөch mijts xwyiingudsähgө'өy.

⁵⁰ Cábөch hamdsoo nmäna'añ coөch hajxy xwyiingudsähgө'өwät. Ja'a nDeedyhөch jaduñ mänaamb. Yajcumädownaamby je'e pөnhөch haxөөg xñänөөmb.

⁵¹ Chaads mijts teh̄m̄ tiøyhajt nnämá'awät, coochä nmädia'agy pøn xmiäbójcät, ni mänaa quia'a hó'ogät.

⁵² Mänitä judíoshajxy yhadsooyy:

—Hoorá sí, tøø højts nnajuø'øyy coo møjcu'ugong tøø xyajtägø'øyy. Tøø ja'a Abraham yho'ogy møødä Dios ja'a quiugapxyhajxy. Pero miich mänaamb coo mmädia'agy pøn xmiäbójcät, ni mänaa quia'a hó'ogät.

⁵³ Nej, maas møc miichä cuhdujt mmøødä quejee ja'a Abraham jecy miøødhajty, ja'a hajxy hijty nhaphájtäm ndeedyhájtämbä. Tøø je'e yho'ogy. Jaduh̄n ja'a Dios ja'a quiugapxyhajxy tøø yho'pä. Pøn tyijy miich coo jaduh̄n mniñänømyii.

⁵⁴ Mänitä Jesús yhadsooyy:

—Cab jaduh̄n yahixø'øyy cooch hamdsoo nniguiumayóøjät. Pero Dióshøch xquiiumaaby, ja'a tyijy mijts mDioshajpy.

⁵⁵ Cahnøch nDeedy hajxy xñajuøøyyä. Pero høøch, nhíxyhøch høøch. Cooch nmäná'anät cooch nga'a hixiä, høhnda'agäbøch jaduh̄n nej mijts mhøhnda'aguiän. Pero nhíxyhøch høøch. Nmäbójcäbøch ja'a miädia'agy je'e.

⁵⁶ Ja'a Abraham, ja'a hajxy jecy nhaphájtäm ja'a ndeedyhájtämbä, xoonäacp je'e hijty cooch hänäjty xyhixa'añ mänáajøch hänäjty nhida'añän hädaa yaabä naaxwiin. Tøøch je'e xjiaanç hixy. Mänit jiaanç xoonäacp.

⁵⁷ Mänitä Jesús ñämaayy ja'a judíoshajxy:

—Je'enä jaduh̄n mdsaanä. Nej, tøø ja'a Abraham mhixiä.

⁵⁸ Mänitä Jesús yhadsooyy:

—Chaads mijts teh̄m̄ tiøyhajt nnämá'awät, jíyyämøch hänäjty; cahnä Abraham hänäjty jiinä.

⁵⁹ Mänitä tsaa hajxy quionø'cy; Jesús hajxy hänäjty quiuhga'adsaamby. Pero tøø ja'a Jesús hänäjty ñiguiu'uchii. Mänit piädsøømnä tsajtøgooty.

9

¹ Jimä Jesús hänäjty ñaxy. Mänitä wiindspä tu'ug yhijxy. Jaduh̄nä mähdijc ñä'ägä maaxhuunghajty wiinma'ad.

² Mänitä Jesús ñämaayy ja'a jiamiøødhajxy:

—Wiindsøn, tii yø'øya'ay wyiinäda'a coo mia'adä. Pønä pojpa cädieeyäda'a tøø tiuñ, yø'øya'ayä, tøgä tiaj tieediä.

³ Mänitä Jesús yhadsooyy:

—Ni pøn. Paady yø'øya'ay wyiin mia'adä nebiä Dios ja'a miäjaa jaduh̄n quiähxø'øgät maa yø'øya'aguiøxpän.

⁴ Tsøc Diostuung hajxy túunäm, ja'açh tøø xquiéxiäbä, mäduhñtiä jugyhajt hajxy nmøødhájtäm. Coø hajxy nhó'cänät, cab hajxy jaduh̄n mänaa ndúunänät.

⁵ Cooch yaa nhity hädaa yaabä naaxwiin, nyajcähxø'piøch jäya'ay piojpa quiädieeyhajxy.

⁶ Mänitä Jesús ñajtsujøøyy naaxwiin. Mänitä chujy yajmo'ondsojy. Mänitä pyiinø'cy. Mänitä wiindspä yajwiingupiinøøyy ja'a chujy, ja'a hänäjty tøø mio'ondscójiäbä.

⁷ Mänitä Jesús ja'a wiindspä ñämaayy:

—Nøcx niwyiimbujøø maa ja'a tsiidaact jaduh̄n xiøhatiän Siloé —je'e jaduh̄n ñänøømby, Quexy.

Mänitä wiindspä hoy jiaanç niwyiimbujyii. Coø wyiimbijnä, tøø hänäjty wyiindøø'xø'nä.

⁸ Mänitä mähdijc yhixä ja'a miädøjc-hajxy møødä hajxy hijty yhixypä coø hänäjty xiädø'øñyujwa'añ. Mänitä hajxy miänaañ:

—Nej, caj jie'e yø'øjä, ja'a hijty naxy xädø'øñyujwaambä häña'a.

⁹ Näje'e hajxy hänäjty miäna'añ:

—Jaanç je'e yø'ø.

Näje'e hajxy hänajty miäna'añ:

—Ca'a jie'ejä; pero tehñ jiaduhñ quiähxø'øgy.

Pero ja'a mähdiojc, hamdsoo hänajty ñiñänomyii:

—Høøch je'e hijty wiinds.

¹⁰ Mänitä miäyajtøøwa:

—Nejy mwiindøø'xø'cy.

¹¹ Mänit yhadsooyy:

—Jaaya'ay ja'a Jesúshajpä, jaaya'ay ja'a chujy yajmo'ondscoj. Mänitøch xyajwiingubiinøoyy. Mänitøch xñämaayy cooch nøcxy nniwyiimbujyii maa ja'a tsiidaact jaduhñ xiøhatiän Siloé. Mänitøch hoy njaanç niwyiimbujyii. Mänitøch nwiindøø'xø'cy.

¹² Mänitä miäyajtøøwägumbä:

—Maa jaaya'ayäda'a.

Mänit yhadsooyy:

—Pämäadädä.

¹³ Mänitä mähdiojc yajnøcxä maa ja'a fariseos wyiinduumhajxiän, ja'a hänajty tøø wyiindøø'xø'øguiäbä.

¹⁴ Poo'xxiøøjooty ja'a Jesús ja'a chujy yajmo'ondscojy, yajwiindøø'xø'cy ja'a wiindspä.

¹⁵ Mänitä mähdiojc miäyajtøøwägumbä ja'a fariseoshajxy:

—Nejy mwiindøø'xø'cy.

Mänit yhadsooyy:

—Chujy jaaya'ay yajmo'ondscoj; je'eçh je'e xyajwiingubiinøoyy. Mänitøch hoy nniwyiimbujyii. Mänitøch nwiindøø'xø'nä.

¹⁶ Mänitä fariseoshajxy näje'e miänaañ:

—Ca'a yø'øya'ay Dyiosquexiä. Tuumb yø'øduhñ poo'xxiøøjooty. Cabä cuhdujt miøødä coo jaduhñ tiünät poo'xxiøøjooty.

Pero näje'e hajxy hänajty miäna'añ:

—Pero nebiä cuboj cugädieejäya'ay ja'a hoy-yagjuøøñäjatypä jaduhñ ñä'ä yajcähxø'øgät.

Cab hajxy hänajty tu'ugmädia'agy ñibiaadyii.

¹⁷ Mänitä mähdiojc ñämaayyä, ja'a hänajty tøø wyiindøø'xø'øguiäbä:

—Míichäts, waamb miich mmäna'añ. Nejy yø'øya'ay mnänømy, ja'a tøø xyaghi-jxø'øguiäbä.

Mänit yhadsooyy:

—Dios je'e tøø quiexy.

¹⁸ Cabä judíoshajxy hänajty miäbøga'añ coo jaaya'ay hijty wyiindsä, coo jaaya'ay hijty tøø wyiindøø'xø'øgy. Paady hajxy miøjyaaxy jaaya'ay tiaj tieedy.

¹⁹ Mänit hajxy miäyajtøøwa:

—Nej, mijts ja'a mhuung yø'ø, ja'a hajxy mnänøømbiä coo hijty wiinds tøø miaaxhuunghatiä. Nebiäda'a tøø yhijsø'øgy.

²⁰ Mänitä tiaj tieedyhajxy yhadsooyy:

—Højts nhuung jaanç yø'ø. Wiinds jiaanç maaxhuunghajty.

²¹ Pero cab højts nnajuø'øy nejy tøø yhijsø'øgy o pøn jaduhñ tøø yaghijxø'øgy. Yø'ø hajxy mäyajtøw. Møj yø'øjän. Ween hamdsoo ñägapy.

²² Paady hajxy jaduhñ miänaañ, coo ja'a teedywiindsøn hajxy hänajty chähgø'øy. Tøø ja'a teedywiindsønhajxy hänajty quiojyquiapxyhaty coo hajxy hänajty yajpädsøma'añ tsajtøgooty pøn jaduhñ mäna'anaamb cooc Jesús Miesíashaty. Nägooyyä hajxy hänajty yajtøjpädsøma'añ, cab hajxy hänajty yajtøjtägø'øwaañnä tsajtøgooty.

²³ Paady jaaya'ay tiaj tieedyhajxy miänaañ: “Yø'ø hajxy mäyajtøw. Møj yø'øjän.”

²⁴ Mänitä mähdiojc miøjyaaxägumbä, ja'a hänajty tøø yhijsø'øguiäbä. Mänitä ñämaayyä:

—Højts tøyhajt móoyyäc. Nnajuøøby højts coo Jesús quiuboj quiugädieeyä.

25 Mänit yhadsooyy:

—Cábøch nnajuø'øy pø cuboj pø cugädieey je'e. Pero nnajuøbiøch coøch tøø nhijxø'øgy, hóyhøch hijty nja wiindsä.

26 Mänit ñämaayyä:

—Nej xyaghijxø'cy.

27 Mänit yhadsooyy:

—Tøøds mijts nja hawáañäm. Pero cab hajxy mmäbøjcy. Tii hajxy coo mmädoᵂáañgombä. Nej, mbanøcxáañp ja'a miädia'agy hajxypä.

28 Mänit yhojjä ñämaayyä:

—Miičh jaduhñ mbanøcxäp ja'a miädia'agy. Højtsä, Moisés ja'a miädia'agy nbanøcxäp.

29 Nnajuøøby højts coo Dios ja'a Moisés miøødmädiaacy jequiän. Pero jaaya'ayä, cab højts nnajuø'øy maa chooñ.

30 Mänitä mähdiøjc yhadsooyy:

—Hoy-yagjuøøñä jaduhñ. Cab hajxy mnajuø'øy maa jaaya'ay chooñ, hóyhøch tøø xjia yaghijxø'øgy.

31 Hoy piønä jaduhñ ñajuø'øy coo Dios jaduhñ quia'a mädoowa ja'a miädia'agy ja'a cuboj ja'a cugädieey. Pero pøn ja'a Dios jaduhñ wiingudsähgøøby, pøn jaduhñ cudiumb nebiä Dios yhane'emiän, je'e ja'a miädia'agy jaduhñ mädoᵂwäxäp ja'a Diósäm.

32 Høxtahm̄ds ja'a naaxwiin yhawijy tiøø'xta'aguiän, ni mänaa jaduhñ quia'a yajmädoyhaty coo jäya'ay yaghijxø'øgyii, ja'a wiinds tøø miaaxhuunghátiäbä, høxtä jäda'anäbaady.

33 Coo jaaya'ay häxøpy quia'a Diosquexiä, cab jaaya'ay cu yajcähxø'cy hoy-yagjuøøñäbä.

34 Mänitä mähdiøjc yhojjä:

—Nej, xyajñähixø'øwaamb højts miičhä. Pojpatuum cädieedium miičh tøø mmaaxhuunghaty.

Mänitä mähdiøjc je'e yajpädsøøma tsajtøgooty.

35 Mänitä Jesús miädoyhajty coo ja'a mähdiøjc hänajty tøø yajpädsømyii tsajtøgooty. Mänitä Jesús ja'a mähdiøjc yhöxtaayy. Mänit jiaanč paaty. Mänitä Jesús miänaañ:

—Nej, mmäbøjcäp ja'a miädia'agy, ja'a Dios tøø quiéxiäbä.

36 Mänitä mähdiøjc yhadsooyy:

—Wiindsøn, pøn jaduhñ mnänøømby. Høøch hawáañäc nébiøch ja'a miädia'agy nmäbøjcät.

37 Mänitä Jesús miänaañ:

—Tøø je'e mhixy. Høøch je'e.

38 Mänitä mähdiøjc miänaañ:

—Wiindsøn, mähøjpøch.

Mänitä Jesús wyiinjiicädaacä, wyiingudsähgøøyyä.

39 Mänitä Jesús miänaañ:

—Páadyhøch yaa tøø ngäda'agy hädaa yaabä naaxwiin neby hajxy jaduhñ yhijxø'øgät, ja'a hajxy hijpä nebiä wiindspän; møød neby hajxy jaduhñ wyiindsø'øwät, ja'a hajxy hijpä nebiä hijxpän.

40 Jimä fariseoshajxy hänajty näje'e tiäna'ay maa Jesús hänajty mädøyyän. Coo hajxy jaduhñ miädooyy nebiä Jesús miänaañän, mänitä Jesús hajxy ñämaayy:

—Nej, mmänaamb miičh jaduhñä coo højts jaduhñ nhijpä nebiä wiindspän.

41 Mänitä Jesús yhadsooyy:

—Coo hajxy häxøpy mhity nebiä wiindspän, cabä pojpä cädieey hajxy häxøpy mhixyhaty. Pero coo hajxy jaduhñ mmäna'añ coo hajxy mhity nebiä hijxpän, paadiä mbojpä ja'a mgädieey hajxy xquia'a nähwa'ačhñä.

10

¹ Mänitä Jesús miänáangombä:

—Chaads mijts tehñ tiøyhajt nnämä'awät: cabä mee'tspähajxy jii by tiägø'øwø'ø y maa ja'a meegcuraahaawän. Wiingtuum hajxy je'e tiägø'øwø'ø y maa ja'a curaahaaw quia'a hitiän.

² Pero ja'a cumeeg, je'eds jii by tägø'øwøø by maa ja'a curaahaawän.

³ Yajtägøø by ja'a curaagüendähajpä ja'a cumeeg jii by curaajooty. Coö hänajty mieegmøjya'axa'añ, mänitä mieeg quiøxy xøøguya'axy. Yo'mädooby ja'a meeg ja'a wyiindsøn hajxy. Mänitä cumeeg yhøxwoobädsømy.

⁴ Coö ja'a meeghajxy hänajty tøø piädsømy, mänitä wyiindsøn hajxy cøjx piadu'ubøcy. Paady hajxy jaduñ piadu'ubøcy coö ja'a wyiindsøn hajxy yo'mädooy.

⁵ Cabä wiingjäya'ay hajxy pianøcxa'añ. Coö wiingjäya'ay hajxy yo'mädooy, cøjx hajxy chähgø'øbäyø'øgy.

⁶ Ja'a Jesús, yajmäbaadyhaam hänajty miädia'agy; pero cabä miädia'agy hänajty wyiinjuøøyyäxä.

⁷ Mänitä Jesús miänáangumbä:

—Chaads mijts tehñ tiøyhajt nnämä'awät: Øøch, jaduñ mäwíinhøch nebiä curaahaawän maa ja'a meeghajxy tiägø'øwø'ø yän.

⁸ Cáhnoch hänajty nmech, tøø jäya'ayhajxy hänajty may miech høhndaacpä. Jaduñ hajxy ñibiäda'agyii nebiä Diosquexypän. Jaduñ mäwíinäts hajxy miäbaady nebiä meegmee'tspän. Pero cabä miädia'agyhajxy miäbøjçäxä. Jaaya'ayädshajxy jaduñ ca'a mäbøjç, pønjätyhøch nmädia'agy xmiäbøjçäp. Jaduñ mäwíinäts hajxy je'e miäbaatpä nebiä meegmädia'agymiäbøjçpän.

⁹ Ja'a meeghajxy, jii hajxy je'e tiägø'øwø'ø y maa ja'a curaahaawän. Høøch, jaduñ mäwíinhøch nebiä curaahaawän. Pønhoch ja'a nmädia'agy xmiäbøjçäp, je'e chngüeendähadaamby.

¹⁰ Ja'a hajxy jäya'awyiinhøhmbä, Diosmädiá'aguiäc tyijy hajxy je'e yajwa'xyp. Yhamdsoo copcooty ja'a mädia'agy hajxy hänajty yajpädsømy. Pero høøch, páadyhøch tøø ngäda'agy hädaa yaabä naaxwiin nebiä jäya'ayhajxy jaduñ jim ñøcxät tsajpootyp, neby hajxy jaduñ jim yhidät cøjxta'axiøø.

¹¹ Ja'a cumeeg, cwieendähajpy ja'a mieeg je'e. Jaduñ mäwíinhøch je'e, ngüeendähadaambiøch ja'a ch nmädia'agy hajxy xmiäbøjçäbä. Jaaya'ay ja'a meeg jaanç tehñ chojpä, høxtä ñähho'tú'udäp ja'a mieeg.

¹²⁻¹³ Ja'a moonsähajxy, cabä meeg hajxy tu'joot cwieendähaty. Paady hajxy je'e tu'joot quia'a cueendähaty, coö hajxy je'e quia'a yhamdsoo je'ejä. Mäjuy hajxy je'e jia cuduñ. Coö ja'a pahuc miech meegtsu'tspä, mänitä moonsähajxy piäyø'øgy. Mänitä meeg mähdiojç-hajxy ñä'ägä maçhii. Mänit hajxy chähgø'øbäyø'øgy.

¹⁴⁻¹⁵ Pero høøch, jaduñ mäwíinhøch nebiä jäya'ay meeg hajxy jaanç tehñ chojpän. Xyhixyhájpiøch ja'a nDeedy, y nhixyhájpiøch je'ebä. Jaanä jaduñds je'e, jaanä nhixyhájpiøch pønjätyhøch nmädia'agy hajxy xmiäbøjçäp. Nnähho'tu'udäambiøch hajxy je'e.

¹⁶ Jaanä xmiäbøgåanäbøch ja'a nmädia'agy hajxy, ja'a jäya'ayhajxy tsänaabiä wiinghagajpt. Tu'ugmädia'agy hajxy yhida'añ møød hädaa jäya'ayhajxy yaabä. Tu'cuhdújthøch ja'a nmädia'agy hajxy xmiäbøgåanä nägøxiä.

¹⁷ Páadyhøch ja'a nDeedy xchocy coöch jaduñ nmäna'añ coöch häna'c ween xyagho'ogy nébiøch jaduñ njujypiøgät jadähooc.

¹⁸ Høøch, hamdsooch nmäna'añ coöchä jäya'ay xyaghó'ogät. Coöch häxøpy nga'a mänaambä, cábøchä jäya'ay häxøpy xyagho'oga'añ. Nmøødhøch cuhdujt coöch nhó'ogät; y nmøødhøch cuhdujt coöch njujypiøgät jadähooc. Páadyhøch ja'a nDeedy tøø xwyiinguexy coöch nhó'ogät, coöch njujypiøgät.

¹⁹ Coo Jesús jaduhñ miädiaacy, paadiä judíoshajxy tu'ugmädia'agy quia'a nibiaatä.

²⁰ Mänit hajxy nämay miänaañ:

—Møjcu'uda'a miøød. Cuhmäñøöbiäda'a jaduhñ. Tii yø'ø miädia'agy hajxy coo mmädowaanä.

²¹ Mänit hajxy näje'e miänaañ:

—Cabä møjcu'umøødpä jaduhñ miädiá'agät. Cabä møjcu'u ja'a wiindspä jaduhñ yaghixø'øgät.

²² Jájtäbä xøø hänajty jim Jerusalén, ja'a xøhjäpä ja'a Dedicación. Tøøchpojooty hänajty.

²³ Jiibiä Jesús hänajty wiädity tsajtøgooty, jiiby maa ja'a tøjwiingän, ja'a xøhjäpä Salomón.

²⁴ Mänitä judíoshajxy jim yhamugøøyy maa Jesús hänajty wiäditiän. Mänitä Jesús ñämaayyä:

—Mänaa højts xyhawaanaanä pø tøyhajt mMesiášaty.

²⁵ Mänitä Jesús yhadsooyy:

—Tøøds mijts nja hawáanäm, pero cab hajxy mmäbøjcy. Cooch jaduhñ ngudiuñ nébiøch ja'a nDeedy tøø xyhane'emiän, cähxø'pøch jaduhñ cooçh nGristohaty.

²⁶ Pero, cooçh mijts ja'a nmädia'agy hajxy xquia'a panøcxä, páadyhøch ja'a nmädia'agy hajxy xquia'a mäbøgaanä.

²⁷ Nhixyhájpiøch pønñhøch ja'a nmädia'agy xmiäbøjcäp; je'eçh ja'a nmädia'agy xpi-anøcxäp.

²⁸ Nyajnøcxäambiøch hajxy jim tsajpootyp. Jim hajxy yhida'añ cøjxta'axiøø. Cábøch hajxy je'e pøn xpiójcät.

²⁹ Miøødhøch ja'a nDeedy ja'a mäjaa. Cabä pøn ja'a mäjaa jaduhñ miøødä nébiøch ja'a nDeedy miøødän. Ja'a nDeedyhøch jaduhñ tøø miäna'añ cooçh jaaya'ay ja'a nmädia'agy hajxy xmiäbøjcät. Cábøch ja'a nDeedy jaaya'ayhajxy mänaa piøgáanaxä.

³⁰ Høøch møødhøch ja'a nDeedy, tu'ugmädia'agy højts nhity.

³¹ Mänitä judíoshajxy tiägøøguiombä tsaagonø'pä. Jesús hajxy hänajty quia'adsaamby.

³² Mänitä Jesús ja'a judíos ñämaayy:

—Madiú'ujøch ja'a hoybä tøø ngudiuñ nébiøch ja'a nDeedy tøø xyhane'emiän. Tiguiøxpøch mijts coo xquia'adsa'añ.

³³ Mänit hajxy yhadsooyy:

—Paady højts miich nga'adsa'añ coo Dios haxøøg mnänømy, coo mnibiäda'agyii nebiä Diosän; ca'a jie'eguiøxpä coo hodiunng jaduhñ tøø mduñ.

³⁴ Mänitä Jesús yhadsooyy:

—Jiiby jaduhñ myiñ maa mijts mguhdujtän coo Dios jaduhñ miänaañ: “Mdioshajp hajxy.”

³⁵ Tøyhajt ja'a Diosmädia'agy jaduhñ ñä'ägädä mädia'agy. Jaduhñ miäna'añ cooc hajxy jaduhñ dyioshaty, ja'a jäya'ayhajxy tøø wyiingpøquiäbä ja'a Diosmädia'agy.

³⁶ Hoorä, Diøshøch tøø xquiunuu'xy tøø xpiäda'agy. Yaaçh tøø xquiexy hädaa yaabä naaxwiin. Cábøch Dios tøø nwiingapxpety cooçh nmänaañ cooçhä Dios xyHuunghaty. Tøyhájthøch jaduhñ xyHuunghaty.

³⁷ Cooçh häxøpy nga'a tuñ nébiøch ja'a nDeedy tiuñän, cábøçhä nmädia'agy hajxy häxøpy xmiäbøjcä.

³⁸ Pero jaançh túumbøch jaduhñ. Mmäbøgäp hajxy jaduhñ cooçhä Dios tøø xquiexy, hóyhøçhä nmädia'agy hajxy xquia'a ja mäbøjcä. Jaduhñds hajxy mnajuøøñät coo højts tu'ugjäya'ay nhity møødhøçhä nDeedy.

³⁹ Mänitä Jesús jia madsáanägumbä. Pero cabä ñä'a yajmajch.

⁴⁰ Mänitä miøjnøønájxcumbä ja'a Jordánpä møjnøøbä maa ja'a Juan miäyajnäbejtsohñän.

⁴¹ Mänitä Jesús hajxy ñämejch nämay. Mänit hajxy miänaañ:

—Cabä Juan ja'a hoy-yagjuøøñäbäjaty ñä'a yajcähxø'cy. Pero tøyhajt jaduhñ cøxiä nebiä Juan yø'øya'ay tøø ñägapxiän.

⁴² Mänitä Jesús ja'a miädia'agy hajxy jim miäbøjcä nämay.

11

¹ Tu'ug jäya'ay hänajty xiøhaty Lázaro. Tøø hänajty pia'ambety. Jim hänajty chäna'ay Betania møødä piuhdo'oxyhajxy, ja'a María møødä Marta.

² Cahnä hänajty yhabaady mänaa María ja'a Jesús ja'a perfume hänajty yajtecytia'xø'øwa'añ, mänaa María ja'a Jesús hänajty tiēcymie'exa'añ ja'a quiuhwaayhaam.

³ Coö Lázaro hänajty tøø pia'ambety, mänitä piuhdo'oxy ja'a capxy hajxy quiejxy maa Jesúsän coögä Lázaro tøø pia'ambety. Jesús ja'a miägu'ughajpä hänajty je'e.

⁴ Coö Jesús ja'a mädia'agy jaduhñ miädooyy, mänit miänaañ:

—Cabä mähdijc tiehm yho'oga'añ. Paady tøø pia'ambety neby jaduhñ quiähxø'øgät coö Dios miøjjä jiaančhä, neby jaduhñ quiähxø'øgät coöch nmøjjä njaančhä. Diøshøch xyHuunghajp.

⁵ Hoy ja'a Jesús hänajty jia jaanč tehñ miøødnijootpaadyii ja'a Lázarohajxy,

⁶ mejtsxøø jim jiaag hijty maa hänajty ñä'ägä hitiän.

⁷ Mänitä Jesús ja'a jiamiøød ñämaayy:

—Jamds hajxy jadähooc Judea.

⁸ Mänitä Jesús hajxy ñämaayy:

—Wiindsøn, cahnä jiegø'øy mänaa ja'a judíoshajxy xjia cuhga'adsa'añän. Tii jim coö mnøcxtägatsa'añ.

⁹⁻¹⁰ Mänitä Jesús yhadsooyy:

—Ja'a Diostuung hajxy tuumbä, coö ja'a tiuunghajxy je'e quia'a maynä, cahnä hajxy je'e yho'oga'añ. Jaduhñ mäwínäts hajxy je'e nebiä xøømbä tiu'uyo'oyän. Cab hajxy je'e quiuhnepy. Hoy hajxy je'e yhixy.

¹¹ Mänitä miänáangombä:

—Tøø højts nmägu'ughajpä Lázaro miaahó'cäm. Nøcxáambøch cham nyuxa'añ.

¹² Mänitä jiamiøødhajxy miänaañ:

—Pero, wiindsøn, pø nä'a maaho'c jaduhñ, møcpøjtägatsaambäda'a jaduhñ, cabä.

¹³ Coö Jesús jaduhñ miänaañ coö Lázaro miaaho'cy, jaduhñ hänajty miäna'anaañ coö tøø yho'ogy. Pero cabä jiamiøødhajxy jaduhñ wyiinjuøøyy coö Lázaro tøø yho'ogy. Jaduhñ hajxy wyiinjuøøyy coö tøø miaaho'ogy.

¹⁴ Mänitä Jesús howyiinjuøøñä tiehm ñägapxnä:

—Tøø ja'a Lázaro yho'ogy.

¹⁵ Xoondáacpøch jaduhñ coöch hänajty nga'a jimä. Coö hajxy jaduhñ mhixa'añ nébiøch nduna'añän, mänitøch mijts ja'a nmädia'agy xmiaas mæbøgaanä. Páadyhøch jaduhñ nxoonäda'agy. Jamds hajxy jim maa Lázarän.

¹⁶ Tu'ugä Jesús ja'a jiamiøødhajxy xiøhaty Tomás, ja'a hajxy hänajty ñänøømbiä hametsc-huung. Mänitä Tomás ñämaayy ja'a jiamiøødhajxy:

—Jamxä Jesús hajxy møødhó'cäm.

¹⁷ Coö hajxy jim miejch Betania, mänitä Jesús yhawáanäxä coö ja'a Lázaro hänajty jiiby tøø yhity mädaaxxøø jutjooty maa cabäsaantän.

¹⁸ Mäwiingón Betania hänajty jim Jerusalén. Jaduhñda'a jiäguema, mejtskilómetro ja cupcäda'a.

¹⁹ Nämay ja'a judíoshajxy hänajty tøø ñämech ja'a Marta møødä María. Capxmøcpøgáanäp hajxy hänajty coö ja'a piuhya'ayhajxy hänajty tøø yho'ogy.

²⁰ Coö ja'a Marta jaduhñ miädoyhajty coö Jesús hänajty miäwiingoñ, mänit hoy jijcubaadø'øy. Pero María, jiiby miähmøøyy maa ja'a tiøgootyhajxiän.

²¹ Mänitä Marta ja'a Jesús ñämaayy:

—Wiindsón, coo häxopy myaajä, cáböchä nbuhya'ay häxopy tøø yho'ogy.

²² Nnajuøbiøch jaduhñ, hoytyiijä Dios mmäyujwá'anät, xmió'owäp je'e.

²³ Mänitä Jesús ja'a Marta ñämaayy:

—Jujypiøgaambä mbuhya'ay.

²⁴ Mänitä Marta miänaañ:

—Nnajuøbiøch coo jiuypipiøga'añ coo ja'a naaxwiimbä hänäjty wyiimbida'añ, coo hajxy nägøxiä njuypipiøgáañäm.

²⁵⁻²⁶ Mänitä Jesús miänaañ:

—Nyagjuypipiøgáambiøch hajxy je'e pønjátyhøch ja'a nmädia'agy xmiäböjçäp. Nya-jnøcxáambiøch hajxy je'e jim tsajpootyp, hoy hajxy hänäjty jia jujcyñä, hoy hajxy hänäjty tøø jia ho'ogy. Nejj, mmäböjpy jaduhñä.

²⁷ Mänitä Marta miänaañ:

—Wiindsón, nmäböjpiøch coo miich ja'a Dios xyHuunghaty, coo mMesíashaty, coo miich ja'a Dios tøø xquiexy hädaa yaabä naaxwiin.

²⁸ Mänitä Marta ja'a piuhdo'oxy hamee'ch hoy ñäma'ay:

—Tøø ja'a nWiindsónhájtäm miéjtsäm. Miich xyajtøøb.

²⁹ Coo ja'a María miädooyy, mänitiä tiänaayyø'cy. Mänitä María ja'a Jesús ñänøcxy.

³⁰ Jimä Jesús hänäjty tøø miähmø'øy maa ja'a Marta hänäjty hoy tøø miøødmädia'aguiän. Cahnä Jesús hänäjty quiajptägø'øy.

³¹ Ja'a judíoshajxy hänäjty jiiby maa ja'a María tiøgootyhajxiän, coo hajxy yhijxy coo María tiänaayyø'cy, coo tiøjpädsøømy, mänitä María hajxy piadøjpädsøømy. Jim tyijy María hänäjty ñøcxy cabäsaantä jøøbiä xuu'tspä.

³² Coo ja'a María jim miejch maa ja'a Jesús hänäjty tøø miähmø'øyän, mänitä Jesús yhijxy. Mänitä María ja'a Jesús wyiinjiçädaacy. Mänitä María miänaañ:

—Wiindsón, coo miich häxopy myaajä, cáböchä nbuhya'ay häxopy tøø yho'ogy.

³³ Coo Jesús jaduhñ yhijxy coo María hänäjty jiø'øy møødä judíoshajxy, ja'a hänäjty tøø piamechíjábä, mänitä Jesús jiootmabiøjcy.

³⁴ Mänit miänaañ:

—Maa hajxy tøø myajnaaxtägø'øy.

Mänitä Jesús ñämaayyä:

—Wiindsón, jam nyajnahixø'øy.

³⁵ Mänitä Jesús jiøøyy.

³⁶ Mänitä judíoshajxy miänaañ:

—Høxtahmðs jiø'øy coo Lázaro hijty jiaançh tehñ miøødnijiootpaadyii.

³⁷ Mänit hajxy näje'e miänaañ:

—Tisän yø'øya'ay ja'a Lázaro coo quia'a yajmøcpøjcy. Tøø yø'øya'ay ja'a wiindspä yaghixø'øgy, túhmäts.

³⁸ Mänitä Jesús jiootmabiøjcombä. Mänit jim ñøcxy maa ja'a naaxjutän maa ja'a Lázaro hänäjty tøø ñaaxtägø'øyän. Jimä tsaa ja'a jut hänäjty yhadäguec-haty.

³⁹ Mänitä Jesús ñämaayy ja'a hajxy hänäjty jim tänaabiä juthaguum:

—Hadäguejtu'ud yø'ø jut hajxy.

Jimä cuhäyohnd hänäjty tiänaabiä, ja'a Martahajpä. Mänitä Marta ja'a Jesús ñämaayy:

—Wiindsón, pero mädaaxxøø jiiby tøø yhity jutjooty. Haxøøgxuu'päda'a yø'øjän.

⁴⁰ Mänitä Jesús ja'a Marta ñämaayy:

—Tøøch miich nhawáañäm, coo mmäbögåt, mänit mhíxät coo Dios miøjjä jiaançh.

⁴¹ Mänitä jut hajxy jiaançh yhadäguejtuuty. Mänitä Jesús chajhee'py. Mänit miänaañ:

—Teedy, Dioscujú'uyäp cooch miich ja'a nmädia'agy tøø xmiädoowa.

⁴² Nnajuøbiøch jaduhñ cooch miich ja'a nmädia'agy hoymiänaajä xmiädoowa. Páadyhøch miich tøø nnäma'ay “Dioscujú'uyäp” neby hajxy miäbögåt cooch miich tøø xquiexy, yø'øya'ayhajxy xii tänaabiä.

⁴³ Mänitä Jesús møc yaaxy:

—Lázaro, pädsómäts!

⁴⁴ Mänitä Lázaro jiaanč pädsøømy, ja'a hänajty tøø yho'oguiäbä. Nähbity nähmoch piädsøømy. Mänitä Jesús ñämaayy ja'a hajxy hänajty jim tanaabiä:

—Nähbijtu'ud yø'ø hajxy. Ween ñøcxy maa ja'a tiøjcän.

Mänitä Lázaro hajxy jiaanč nähbijtuuty. Mänit ñøcxy maa ja'a tiøjcän.

⁴⁵ Mänitä Jesús ja'a miädia'agy miäbøjcäxä nämay ja'a judíoshajxy, ja'a María hajxy hänajty tøø miøødhitiäbä maa ja'a tiøjc-hajxiän, ja'a hajxy hänajty tøø yhixiäbä coo ja'a Jesús ja'a ho'ogyjiäya'ay yagjujypiøjcy.

⁴⁶ Pero cab judíos hajxy näje'e miäbøjcy. Paady ja'a fariseos hajxy hoy yhawaanä nebiä Jesús hänajty tøø tiuñ.

⁴⁷ Mänitä teedywiindsøn hajxy yhamugøøyy møødä fariseoshajxy møødä tuungmøødpähajxy. Mänit hajxy ñiñämaayyä:

—Neby hajxy nwiinmahñdyhajtämät. Madiu'u jaaya'ay ja'a hoy-yagjuøøñäbäjaty tøø yajcähxø'øgy.

⁴⁸ Coo hajxy nga'a májtsämät, mänitä miädia'agy miäbøgáanäxä nägøxiä. Minaambä romano jäya'ayhajxy ja'a møjcuहुdujtmøødpä. Mänitä ndsajtøjc hajxy xyajma'adääñäm. Mänitä nguहुdujt hajxy xpiøgáanäm.

⁴⁹ Caifás ja'a teedywiindsøn hänajty xiøhaty ja'a møjcuहुdujtmøødpä. Mänit miänaañ:

—Cab hajxy tii mjaty mnajuø'oy.

⁵⁰ Cab hajxy mwiinjuø'oy coo maas hoy hit jaduहुn coo ja'a cu'ug tu'jäya'ay xñähho'túutamät. Cab hajxy jaduहुn nägøxiä nguहुdgóoyämät.

⁵¹ Ca'a Quiaifás ja'a yhamdsoo wiinmahñdy jaduहुn. Pero coo hänajty tiuñ teedywiindsøn møjcuहुdujtmøødpä, paadiä Dios ja'a Caifás jaduहुn yajnägäpaxy coo ja'a Jesús ja'a judíos hänajty ñähho'tu'uda'añ,

⁵² møød hajxy nägøxiä, ja'a Dios hänajty tøø wyiimbiyyäbä, ja'a wiinghagajptjatypä.

⁵³ Mänitä møjcuहुdujtmøødpähajxy quiojyquiapxyhajty coo Jesús hajxy hänajty yagho'oga'añ.

⁵⁴ Paadiä Jesús hänajty jim quia'a wäditaannä mayjiäya'ayhagujc maa ja'a Israelpähajxiän. Mänitä Jesús hajxy jim chohñ jim Judea, ñøcxy hajxy jim maa ja'a cajpt jaduहुn xiøhatiän Efraín. Jimä Jesús hajxy miähmøøyy møødä jiamiøødhajxy. Mäwiingön ja'a cajpt hänajty tøødsnähgäp.

⁵⁵ Habaadääñäp ja'a pascuaxøø hänajty, ja'a judíoshajxy yagjajtäbä. Nämay hajxy jim ñøcxy xøøhajpä jim Jerusalén, ja'a hajxy jim tsohmäbä maa ja'a cajpthuungän. Cahnä xøø hänajty jim chohnda'agy coo hajxy jim quioo'ty. Jayøjp hajxy hänajty yhuuc tsi'iwa'añ. Jadúhñac tyijy hajxy hänajty ñähwa'adsa'añ ja'a piojpä quiädieey.

⁵⁶ Jiibiä Israelpäjäya'ay ja'a Jesús hajxy hänajty yajcopcø'oy tsajtøgooty. Jiiby hajxy hänajty ñimiäyajtøyii:

—Nej, cabä Jesúsäda'a miedsa'añ xøøhájpäjä.

⁵⁷ Tøø ja'a teedywiindsøn hajxy hänajty yhane'emy møødä fariseoshajxy, coo Jesús pøn yhixät, mänit hajxy ñägäpxät, nebiä Jesús hajxy jaduहुn miädsät.

12

¹ Ja tädujxøø ja'a pascuaxøø hänajty quia'a habaady. Mänitä Jesús jim ñøcxy Betania, maa Lázaro hänajty chäna'ayän, ja'a Jesús hänajty tøø yagjujypiøquiäbä coo hänajty tøø yho'ogy.

² Nämayyä jäya'ayhajxy jiiby yhamugøøyy tsuugaabiä ja'a Jesús cøxpä. Ja'a Marta hänajty texyhabøgøøby. Jiibiä Lázaro ja'a Jesús hänajty miøødtsuugay tøgooty.

³ Mänitä María ja'a perfume quionmejch cuplitro. Haagä nardopøjy ja'a perfume hänajty ja'a tsowjatypä. Mänitä María ja'a Jesús yajtecytia'xøøyy ja'a perfume. Mänitä

María ja'a Jesús tiecymieexy quiuhwaayhaam. Mänitá perfume tiägøøyy pu'xø'pä tøgooty.

⁴ Jiibiä Judas hänajty, ja'a Simón Iscariote yhuung. Jesús ja'a jiamiøød hänajty je'ebä. Je'edsä Jesús hänajty yegaamb coo hänajty yajcø'ødägø'øwa'añii maa ja'a soldadohajxiän. Mänitá Judas miänaañ:

⁵ —Maas hoy hijty coo yø'ø perfume cu ndóo'cäm nebiä häyoobädøjc ja'a xädø'øñ cu nnä'ä móoyyäm.

⁶ Pero cabä Judas ja'a häyoobädøjc hänajty ñä'ägädä näxuuch. Je'e ja'a xädø'øñ hänajty yajconwädijtáp. Pero hamdsoo hänajty wyi'i yajpadsømy. Paady jaduhñ miänaañ coo ja'a perfume hajxy cu tío'cy nebiä xädø'øñ jaduhñ miéedsät.

⁷ Mänitá Jesús ja'a Judas ñämaayy:

—Ween yø'ø to'oxiøjc yhity. Ca'a waamb mnäma'ay. Ween yø'ø perfume yaghity høxtä cóonøch nhó'ogät. Mänitøch yø'ø perfume xyajñähjáaxät.

⁸ Hoymiänaajä mijts ja'a häyoobädøjc xmiøødhida'añ. Pero høøch, cáboch mijts hajxy jeicy nmøødhida'añ.

⁹ Nämayyá Israelpä jäya'ayhajxy miädoyhajty coogä Jesús hänajty jim tøø miech Betania. Mänitá Jesús hajxy hoy yhixy møødä Lázaro, ja'a Jesús hänajty tøø yagjujypiøquiäbä.

¹⁰⁻¹¹ Coo Jesús ja'a Lázaro hänajty tøø yagjujypiøcy, paadiä Israelpä jäya'ay ja'a Jesús hajxy hänajty tøø piadu'ubøcy nämay. Y paadiä Jesús ja'a miädia'agy hajxy hänajty tøø miäbøjcäxä nämay. Coo ja'a teedywiindsøn ja'a miädia'agyhajxy hänajty quia'a jaty panøcxäxä, paady hajxy quiojyquiapxytiuuñ coo ja'a Lázaro hajxy ween yagho'ogy nebiä Jesús hajxy hänajty yagho'oga'añän.

¹² Nämayyá jäya'ayhajxy hänajty jim tøø miech Jerusalén pascuaxøøhajpä. Cujaboom hajxy miädoyhajty coo ja'a Jesús hänajty miedsa'añ cajptooty.

¹³ Mänitá xi'iwhaay hajxy hoy piuxy. Mänitá Jesús hajxy hoy jiojcubaadø'oy xi'iwhaaguiap. Yáaxäp ja'a Jesús hajxy hänajty ñänøcxy:

—¡Viva Jesús! Tsøc yø'øya'ay hajxy wiingudsähgøøyyäm, yø'ø Dios tøø quiéxiäbä. Paadiä Dios tøø quiexy coo hajxy ngobiernähájtämät, højts ja'a Israelpäjäya'ayhájäm.

¹⁴ Mänitá Jesús ja'a burrohuung tu'ug piaaty. Mänit yajpejty. Jaduhñ jiiby myiñ cujaay maa ja'a Diosmädia'aguiän:

¹⁵ Ca'a hajxy mdsähgø'oy, mijts jim tsänaabiä Jerusalén.

Huug hix hajxy, xiidsä ngobiernähajxy piety burrohuungnähgøxp.

¹⁶ Cabä Jesús ja'a jiamiøødhajxy hänajty ñajuø'oy pøn jaduhñ ñänøømby coo miedsa'añ burrohuungnähgøxp, ja'a Dios quiexaambiä. Pero cujey, coo Jesús hänajty tøø jiu-jypiøjnä, coo hänajty tøø ñøcxnä tsajpootyp, mänitá jiamiøødhajxy jiahmiejstaacnä coo jaduhñ jiaanç miñ cujaay ja'a Jesúsøxpä y coo Jesús hajxy hänajty tøø piuhbety.

¹⁷ Mädiaacp hajxy hänajty neby hajxy hänajty jim tøø yhixy mänaa Jesús ja'a Lázaro jiiby yhøxyaaxpadsømiän tsaajutjooty. Ja'a hajxy hänajty tøø quia'a yhíxiäbä, je'eds hajxy hänajty miøødmädiaacpy.

¹⁸ Coo jaduhñ yajmädoyhajty nebiä Jesús ja'a Lázaro hänajty tøø yagjujypiøquiän, paadiä Jesús hajxy hänajty nøcxy jiojcubaadø'oy mayjiäya'ay.

¹⁹ Mänitá fariseoshajxy ñiñämaayyá:

—Nejy yø'øya'ay ndúunämät coo jaduhñ piawädityii nägøxiä.

²⁰ Tøø ja'a ca'a Israelpähajpähajxy hänajty näje'e quioo'pä xøøhajpä. Dioswiingudsähgøøbiä hajxy hänajty tøø quioody.

²¹ Mänitá Felipe hajxy hoy ñämech. Betsaida Felipe hänajty chooñ jim Galileanaaxooty. Mänitá Felipe ñämaayyá:

—Tsäguhñ, maa ja'a Jesús. Je'eds højts nja møødmädia'agaan.

²² Mänitá Felipe ja'a Andrés hoy yhawaanä coogä Jesús hajxy hänajty hoy tøø jia møødmädia'aga'añ. Mänitá Felipe ja'a Jesús hajxy hoy yhawaandägajtsä møødä Andrés.

²³ Mänitá Jesús miänaañ:

—Tøø yhabaady cooch nhó'ogät. Páadyhøch Dios tøø xquiexy.

²⁴ Chaads mijts tehñ tiøyhajt nnämä'awät, coo jäya'ay ja'a trigo hajxy ñi'iby, mänitä tøømd tyictspädsømy yhaabiädsømy. Coo jaduñ tyictspädsømat yhaabiädsømat, mänit hoy tiägøøñä yee'pä. Mayø'øb ja'a trigo jaduñ. Pero coo quia'a tictspädsømat quia'a haabiädsømat, jaduhyä piú'udsät. Cabä miúxät. Cabä trigo miayø'owät.

²⁵ Pønjátyhøchä nmädia'agy xquia'a mabøgaanäp, cab hajxy jim ñøcxät tsajpootyp. Páadyhøchä nmädia'agy hajxy xquia'a mabøgaanä coo hajxy chähgø'øy coo hajxy yagho'oga'añii. Pønjátyhøchä nmädia'agy xmiäbøjcäp, je'eds hajxy jim nøcxaamb tsajpootyp, hoy hajxy jia yagho'ogyii ja'a høøchcøxpä.

²⁶ Pø xWyiindsønhadáambøch hajxy je'e, wéenhøchä nmädia'agy hajxy xpianøcxä. Nwowhídäbøch hajxy je'e. NDéedyhøch päda'agaamb coo hajxy wyiingudsähgø'owøød wiingjäya'aybä.

²⁷ Jootmayhájpøch cham. Cab jaduñ yhahixø'øy coochä nDeedy nnämä'awät ween xyajtso'ogy cooch hänajty yaa nho'oga'añ hädaa yaabä naaxwiin. Páadyhøch yaa tøø ngäda'agy cooch yaa nhó'ogät.

²⁸ Teedy, yajcähxø'øg ja'a mmäjaa.

Mänitá Dios jim yhadsooyy tsajpootyp:

—Tøøch tähooc nyajcähxø'øgy. Nyajcähxø'øgåambiøch jadähooc.

²⁹ Ja'a hajxy hänajty jim tänaabiä nämay maa ja'a Jesús ja'a wyiinduumän, jia mädoow hajxy, pero cab hajxy wyiinjuøøyy. Näje'e hajxy miänaañ cooc tyijy hänee yaaxy. Näje'e hajxy miänaañ cooc tyijy ja'a Dios ja'a mioonsä jim tsajpootyp tu'ug quiapxy.

³⁰ Mänitá Jesús miänaañ:

—Ca'a yhøøchcøxpä ja'a Dios jaduñ miänaañ. Paady jaduñ miänaañ nej mijts mnajuó'owät cooch jaduñ xmiägapxy.

³¹ Cooch nhó'ogät, cábøch ja'a mõjcu'ugong nyajmäjäda'aga'añ, jaaya'ay hanehmbä hädaa yaabä naaxwiin. Dios jaduñ mänaamb coo hajxy ween yajcumädoy, ja'a høøchä nmädia'agy hajxy xquia'a mabøjcäbä.

³² Høøch, cooch nyajmøjpahbédät cruzcøxp, mäníthøchä nmädia'agy hajxy xmiäbøgaanä, ja'a hajxy tsänaabiä wiinduhmyhagajpt.

³³ Paadiä Jesús jaduñ miänaañ, neby hajxy ñajuó'owät neby hänajty yagho'oga'añii.

³⁴ Mänitá Jesús ñämaayyä:

—Jiiby jaduñ myiñ maa højts nguhdujtän coo jaaya'ay hänajty yhane'ema'añ mayjiomøjt, ja'a Dios quiexaambiä, ja'a højts nhahijxypä. Pero miich jaduñ mänaamb coo tsipcøxp ja'a Diosquexypä yajmøjpahbeda'añ cruzcøxp. Pøn miich jaduñ mnänøømby ja'a Diosquexypä.

³⁵⁻³⁶ Mänitá Jesús miänaañ:

—Cábøch mijts hajxy jecy nmøødhida'añ. Jaduñ mäwínhøch mijts ngudøø'xy nebiä jøønän. Mäbøjcägøch ja'a nmädia'agy hajxy, mäduhñtiøch hädaa yaabä naaxwiin nhídät, nébyhøch mijts jaduñ hoy xpianøcxät, neby hajxy mga'a hídät hagoodstuum. Pøn hajxy jaduñ hijp hagoodstuum, tægodiium hajxy ñä'ägädä hity. Høøch, nøcxaanäbøch. Cábøch ja'a nmädia'agy hajxy xmiädowáanänä.

Coo ja'a Jesús jaduñ miädiaacpädøøyy, mänitä tiu'ubøjnä. Mänit ñiguii'tsä.

³⁷ Cabä Jesús ja'a miädia'agy hänajty miäbøgaanäxä, hoy hänajty madiu'u hoy-yagjuøøñäjaty tøø jia yajcähxø'øgy.

³⁸ Paady hajxy hänajty quia'a mabøga'añ nebiä profeta Isaías ja'a miädia'agy jaduñ tiøjiädät, nebiä jecy quiujahyyän:

Dios, cab højts ja'a nmädia'agy pøn tøø xmiäbøjcä.

Tøø ja'a mmäjaa mja yajcähxø'øgy, pero cab hajxy tøø xmiøjpäda'agy.

³⁹ Cabä Jesús ja'a miädia'agy miäbøgaanäxä nebiä Isaías wiingtuum quiujahyyän:

⁴⁰ Tøø ja'a Dios miäna'añ:

Tøøchä quiopc-hajxy nyajxejxä nébyhøchä nmädia'agy hajxy xquia'a wiinjuøøyyät, nebiä yhaxøøgwinnmahñdy hajxy quia'a najtshixó'owät. Cábøch ja'a piojpä quiädieey hajxy nyajnhwáatsät.

⁴¹ Jaduhnä Isaías jecy quiujahy nebiä Isaías ja'a Jesús hänajty tøø yhiñiän tsajpootyp. Cahnä Jesús hänajty yaa quiäda'agy hädaa yaabä naaxwiin.

⁴² Siémpräm ja'a Israelpä jäya'ay ja'a Jesús ja'a miädia'agy hajxy miäbøjcä, møødä copc-hajpähajxy nämay. Pero hamee'ch hajxy miäbøjcy. Cabä Jesús hajxy hänajty quiapxpaady mayjiäya'ayhagujc. Tsähgøøby hajxy hänajty coo hajxy yajpádsømmøød maa ja'a chajtøjc-hajxiän ja'a fariseoshajxy.

⁴³ Ja'a judíoshajxy, cab hajxy chocy coo hajxy quiumayøød ja'a Dios. Je'e hajxy chojpy coo hajxy ween wyiingudsähgøø'oyii ja'a cu'ug.

⁴⁴ Mänitä Jesús møc miänaañ:

—Pønhøch ja'a nmädia'agy xmiäbøjcäp, jaanä xmiäbøjcäbøchä nDeedy ja'a miädia'agy hajxypä, ja'açh yaa tøø xquiéxiäbä hädaa yaabä naaxwiin.

⁴⁵ Pønhøch jaduñ xyhiixp, jaanä xyhiñxäbøchä nDeedy hajxypä.

⁴⁶ Páadyhøch yaa tøø ngäda'agy hädaa yaabä naaxwiin, neby hajxy quia'a mähmó'owät hagogdstuum pønjátyhøch nmädia'agy hajxy xmiäbøjcäp. Jaduhn mäwíinhøch ngudøø'xy nebiä jøønän neby hajxy hoy yhiñät.

⁴⁷ Ca'a yhøøchä hajxy nyajcumädowaamby, ja'a nmädiá'agyhøch hajxy xquia'a mähøjcäbä, hoy hajxy jaduñ tøø jia mädoyhaty. Páadyhøch yaa tøø ngäda'agy hädaa yaabä naaxwiin, nébyhøch ja'a jäya'ayhajxy jaduñ nnähho'tú'udät. Ca'a yhøøchä hajxy je'e nyajcumädowaamby.

⁴⁸ Pønhøchä nmädia'agy hajxy xquia'a mähøjcäp, mänit hajxy quiumädowa'añ coo ja'a naaxwiimbä hänajty wyiimbida'añ. Paady hajxy quiumädowa'añ, coöchä nmädia'agy hajxy hänajty tøø xquia'a mähøjcä.

⁴⁹ Ca'a yhøøchä nhamdsoo mädia'agy jaduñ tøø nyaghity. Ja'a nDéedyhøch, ja'açh tøø xquiéxiäbä, je'eçh jaduñ tøø xyhane'emy nebiätyhøch nmädiá'agät.

⁵⁰ Høøchä, nmøødhøch ja'a tøyhajt jaduñ coo hajxy jim yhida'añ tsajpootyp cøjxta'axiøø, pønjátyhøch ja'a nDeedy ja'a miädia'agy mähøjcäp. Nmädiácypioch nébyhøchä nDeedy tøø xyhane'emiän.

13

¹ Mänitä pascuaxøø hänajty tiehm yhadsoojuø'oy. Tøø ja'a Jesús hänajty ñajuø'oy coo hänajty tøø yhabaady coo hänajty yaa choonaannä hädaa yaabä naaxwiin, coo hänajty jim ñøcxaannä maa ja'a Tieediän. Chojpy ja'a Jesús ja'a jiamiøød hänajty hamuumdu'joot hädaa yaabä naaxwiin.

² Coo ja'a Jesús hajxy hänajty chuugaya'añ, tøø Judas hänajty wyiinnmahñdyhaty, ja'a Simón Iscariote yhuung, coo Jesús hänajty yajcø'øwaanø'øwa'añii maa ja'a soldadohaxiän. Ja'a møjcu'ugong ja'a Judas jaduñ yajwiinnmahñdiägooyy.

³ Ñajuøøbiä Jesús hänajty nebiaty ja'a cuhdujt hänajty tøø mio'oyii ja'a Tieedy. Ñajuøøby hänajty coo hänajty jim tøø chooñ maa ja'a Tieediän, coo hänajty jim ñøcxáangombä jadähooc.

⁴ Coo hajxy hänajty tøø chuugaabiädøøñä, mänitä Jesús tiänaayyø'cy. Mänitä wyit chijy. Mänitä cuhbe'en tu'ug yajnimioxmäguitøøyyä.

⁵ Mänitä nøø quiudemøøyy palanganajooty. Mänitä Jesús tiägøøyy tecypiujpä ja'a jiamiøød. Coo tiecypiujpädøøyy, mänit tiecymiéexcombä.

⁶ Coo ja'a Jesús ja'a Simón Pedro hänajty tiecypiuja'añ, mänitä Simón Pedro miänaañ: —Nej, xtiecypiujáambøch høøchpäjä.

⁷ Mänitä Jesús yhadsooyy:

—Miičh, caj miičh mnajuø'øyy tiiguiøxpøch miičh coo ndecypiujuj. Mänit jaduñ mnajuø'øwa'añ cooçh jaduñ njádät nhabétät.

⁸ Mänitá Pedro miänaañ:

—Cab jaduñ yhahixø'øyy cooçh miičh jaduñ xtiecypiujujät.

Mänitá Jesús yhadsooyy:

—Pø cájtäm miičh myajtecypiuja'añ, cájtämøch miičh hoy xjiamiøødhadaañnä.

⁹ Mänitá Simón Pedro miänaañ:

—Bueno, Wiindsón, cóxiøch jaduñ xpiujujät móødhøçhä ndecy, móødhøçhä ngø'ø, móødhøçhä ngopc.

¹⁰ Mänitá Jesús yhadsooyy:

—Pøñ tøø chi'iy, wa'ads ja'a ñi'x ja'a quiopc je'e. Jagoo ja'a tiecy piujujät. Mijts, mwa'ads mijts hajxy, pero cab hajxy nägøxiä mwa'adsä.

¹¹ Ñajuøøbiä Jesús hánajty pøñ hánajty yajcø'øwaanø'øwáañäp. Paady jaduñ miänaañ coo tu'jáya'ay hánajty quia'a wa'adsä.

¹² Coo ja'a Jesús cøyx tiecypiujujädø'øyy ja'a jiamiøødhajxy, mänitá Jesús wyitpägøøñä. Mänit yhøxtaacánä. Mänit miänaañ:

—Chójpjøçhä njoot jaduñ coo hajxy mnajuø'øwät tiiguiøxpøch mijts coo tøø ndecypiujuj.

¹³ Hoy jaduñ cooçh mijts jaduñ xñäma'ay: “Wiindsón.” Tøyhájthøch mijts hajxy jaduñ xWyiindsønhaty.

¹⁴ Tøøçh mijts hajxy ndecypiujuj, hóyhøch Wiindsón nja tuñ. Jaaná jaduñ mijtspä, mnidiecyjujøøb hajxy hamiñ haxøpy.

¹⁵ Mbahíxäp hajxy jaduñ nebiátyhøch mijts tøø nduñ.

¹⁶ Chaads mijts tehñ tiøyhajt nnámá'awät, cabä moonsä cuhdujt møc miøødá quejee ja'a wyiindsón. Jaaná jaduñ je'ebä ja'a tøø quiexyíjábä, cabä cuhdujt je'e møc miøødába quejee ja'a tøø miäguéxiäbä.

¹⁷ Cooçhä nmädia'agy hajxy xwyiinjuøøyyät, coo hajxy jaduñ mgudiúnät, jootcuju hajxy jaduñ mhídät.

¹⁸ 'Cábøch mijts nägøxiä nnägäpaxy. Nnajuøøbiøch pønjátyhøch tøø nwiimbiy. Pero tøjiajpä Diosmädia'agy maa jaduñ miäna'añän: “Ja'a craaçh tu'ugmucy xmiøødcaabiä, tøøçh je'e xmiädsibø'øyy.”

¹⁹ Jáguémjøch mijts chaa nhawáañäm cooçh haxøøg njada'añ nhabeta'añ. Cooçh jaduñ njaançh jádät njaançh habétät, mänit hajxy mhuuc mábøgät cooçhä Dios tøyhajt tøø xjiaançh quexy.

²⁰ Chaads mijts tehñ tiøyhajt nnámá'awät, pøñ hajxy mägu'ugpøgaamb ja'açh nguexaambiä, møød høøçh jaduñ xmiägu'ugpøgaambä. Jaaná jaduñds je'ebä, pønjøch je'e xmiägu'ugpøgaamb, møødá Dios jaduñ miägu'ugpøgaambä, ja'açh tøø xquiéxiäbä.

²¹ Coo ja'a Jesús miädiaacpädøøñä, mänit jiootmadiägøøñä. Mänit miänaañ:

—Chaads mijts tehñ tiøyhajt nnámá'awät cooçh mijts ja'a mjamiøød tu'ug xyega'añ ho'cøøc.

²² Mänitá jiamiøødhajxy ñiwyiinhee'ppejtä. Cab hajxy hánajty ñajuø'øyy pøñ ja'a Jesús hánajty jaduñ ñänøømby.

²³ Jimä Jesús ja'a jiamiøød hánajty yháña'ay tiehñ ñähmøjc. Jaançh tehñ yhoy ja'a Jesús hánajty miøødnijiootpaadyii.

²⁴ Mänitá Simón Pedro ja'a craa miäwø'xy. Mänit hamee'ch ñämaayy:

—Huuc mäyajtøw pøñ jaduñ ñänøømby.

²⁵ Mänitá craa ja'a Jesús tiaatsmägowøøyy. Mänit miäyajtøøyy:

—Pøñ jaduñ mnänøømby.

²⁶ Mänitá Jesús yhadsooyy:

—Nbama'tsnaxáambiøch hädaa tsajcaagyhaguijt. Mänítøch ja'a craa nmo'owa'añ, ja'açh xyegaambä ho'cøøc.

Mänitä Jesús ja'a tsajcaagyhaguijt jiaançh pama'tsnajxy. Mänitä Judas yajcø'øgonøøyy, ja'a Simón Iscariote yhuung.

²⁷ Tuunä Judas ja'a tsajcaagy ñä'a coonðsooyy, mänitiä miøjcu'ujoottägøøyyä. Mänitä Jesús ja'a Judas ñämaayy:

—Tsógäm. Nøcx jatcø'øw nejj mjatcø'øwa'añän.

²⁸ Ja'a hajxy hänajty jim caabiä, cab hajxy hänajty ñajuø'øy tiiguiøxpä Jesús jaduhñ coo miänaañ.

²⁹ Näje'e hajxy hänajty wyiinmahñdyhaty coo tyijy ja'a Jesús ja'a Judas hänajty quiexy juubiä mädyijaty tyijy hänajty yajtunaamby xøøjooty. Näje'e hajxy hänajty wyiinmahñdyhajpä coo tyijy Jesús ja'a Judas ja'a häyoobäya'ay hänajty yajmo'owa'añ xädø'øñ. Paady hajxy hänajty wyiinmahñdyhaty, coo ja'a Judas ja'a xädø'øñ hänajty yajwijtswädityii.

³⁰ Tuunä Judas ja'a tsajcaagy ñä'a coonðsooyy, mänitiä tiøjpädsøømy. Tøø hänajty quioodsøøñä.

³¹ Coo ja'a Judas tiøjpädsøømy, mänitä Jesús miänaañ:

—Tøø yhabaady cooçh ngähxø'øga'añ cooçh nmøjjä njaançhä. Høøçhcøxpä Dios jaduhñ quiähxø'øga'añ coo miøjjä jiaançhä. Diøshøch tøø xwyiinguexy.

³² Nyajcähxø'øgåambiøch ja'a Dios coo miøjjä jiaançhä. Mobädájpoçh ja'a Dios xya-jcähxø'øgaambä cooçh nmøjjä njaançhä.

³³ Mägu'ughajpædøjc, cáboçh mijts jejcy nmøødhida'añ. Xjia høxta'awáambøch mijts, pero cáboçh hajxy xpiaada'añ. Chaads mijts hajxy nnämä'awät nébyhøçhä Israelpä jäya'ayhajxy tøø nnäma'ayän: Cab hajxy jim hoy mnøcxät maaçh nhida'añän.

³⁴ Chaads mijts hajxy ja'a hawiinjemyguiuhdujt nmó'owät coo hajxy hamiñ haxøpy mniçhogøød nébyhøch mijts ndsoquiän.

³⁵ Coo hajxy mniçhogøød mnibia'häyowøød, cähxø'øgäp jaduhñ cooçh mijts ja'a nmädia'agy xjiaançh panøcxä. Xyhíxäp ja'a jäya'ayhajxy jii nägøxiä.

³⁶ Mänitä Simón Pedro ja'a Jesús miäyajtøøyy:

—Wiindsøn, maa mnøcxa'añ.

Mänitä Jesús yhadsooyy:

—Cábøch miich jadunajtä hoy xpianøcxät maaçh nnøcxa'añän. Miiçh, høxhaam miich mnøcxät.

³⁷ Mänitä Pedro ja'a Jesús miäyajtøøgumbä:

—Tiiçh miichäda'a jadunajtä hoy coo nga'a panøcxät. Nnähho'tú'udäbøch miich häyaa.

³⁸ Mänitä Jesús yhadsooyy:

—Jaançhä; cabä ndijy miichäda'a xñähho'tú'udät. Chaads miich jadunajtä nnämä'awät, cahnä tseyy hänajty ya'axyñä, tøø miich hänajty tägøøghooc mnijjogapxyii cooçh tyijy miich hänajty xquia'a hixiä.

14

¹ Mänitä Jesús miänaañ:

—Ca'a hajxy mwi'i tiajy mwi'i miay. Mäbøjcä ja'a Dios ja'a miädia'agy hajxy, y mäbøjcägøch ja'a nmädia'agy hajxypä.

² Jim tsajpootyp maaçhä nDeediän, mayyä tsäna'awøhñdy jim. Coo häxøpy quia'a tøyyä, cab hajxy cu nhawáañäm. Nøcxáambøch ja'a tsäna'awøhñdy nbäda'aga'añ nähix hahixø'ø maa mijts mhídat.

³ Cooçh jim nnøcxa'añ, cädaactägatsáambøch jadähóocägumbä. Mänítøch mijts jim ngøxy woonøcxa'añ maaçh nhida'añän. Näguipxy hajxy jim nhidáañäm.

⁴ Mnajuøøby hajxy maačh nnøcxa'añ. Jaduhñ hajxy mnajuøøbiä neby hajxy jim mnøcxät.

⁵ Mänitä Tomás ja'a Jesús ñämaayy:

—Wiindsøn, pero cab højts nnajuø'øyy maa miich nnøcxa'añ. Neby højts jaduhñ jim nnä'a nøcxät.

⁶ Mänitä Jesús yhadsooyy:

—Jaduhñ mäwíinhøch høøch nebiä tu'ujän. Høøchcøxpä hajxy jim mgooda'añ pønjátyhøch ja'a nmädia'agy xmiäbøjcäp. Høøchcøxpä hajxy jim mhida'añ cøjxta'axiøø. Paady hajxy jim mhida'añ coochä tøyhajt nyajcähxø'øgy ja'a Dioscøxpä.

⁷ Pønjátyhøch je'e xyhixyhajp, jaanä xyhixyhájtäbøch ja'a nDeedy je'ebä. Tøø hajxy mhixy.

⁸ Pero cab hajxy wyiinjuøøyy waambä Jesús jaduhñ jia mänaañ. Mänitä Felipe ja'a Jesús ñämaayy:

—Wiindsøn, ween højts ja'a mDeedy xyhuuc yaghíxät. Mänit højts jootcuyc nmähmø'øwät.

⁹ Mänitä Jesús yhadsooyy:

—Felipe, tii jaduhñ coo mmäna'añ. Tøøch miich jejcy xpiawädity. Xyhixyhájpøch miich jaduhñ. Pønch xyhixp, jaanä xyhíxäbøch ja'a nDeedy je'ebä. Tiiich miich jaduhñ coo xñäma'ay cooch mijts ja'a nDeedy nyaghíxät.

¹⁰ Nej, cab jaduhñ mmäbøquiä coochä nDeedy tu'ugmädia'agy nmøødhity. Ja'a nDéedyhøch miädia'agy, je'ečh jaduhñ nmädiäacäp; ca'a yhøøchä nhamdsoo mädia'agy nmädiaacyy. Ja'a nDéedyhøch ja'a mäjaa jaduhñ xmiooby; je'ečh ja'a tiuung jaduhñ ndúunäp.

¹¹ Mäbøjcägøch ja'a nmädia'agy hajxy coochä nDeedy jaduhñ tu'ugmädia'agy nmøødhity. Hoy hajxy mwiiinjuø'øyy mga'a ja wiinjuø'øyy, mmäbøgäp hit hajxy jaduhñ. Páadyhøch hit hajxy ja'a nmädia'agy xmiäbøjcät, cooch hoy-yagjuøøñäjatypä nyajcähxø'øgy.

¹² Chaads mijts tehñ tøyhajt nnämäaguimbä, pønchøch ja'a nmädia'agy xmiäbøjcäp, jaanä yajcähxø'øgaamby je'ebä ja'a hoy-yagjuøøñäjaty. Maas hoy-yagjuøøñäjatypä je'e yajcähxø'øga'añ quejeech nyajcähxø'øgy. Paady jaduhñ yajcähxø'øga'añ cooch jim nnøcxa'añ maačhä nDeediän.

¹³⁻¹⁴ Cooh hajxy mmäbøgät cooch ja'a cuhdujt tøyhajt nmøødä, coo hajxy hänäjty tii myu-jwa'ana'añ, ngudiúnäbøch jaduhñ neby jaduhñ quiähxø'øgät coochä nDeedy je'eduhñ miøjjä jiaančhä.

¹⁵ Pø xchøjpøch mijts, mänítøch mijts ja'a nmädia'agy xquiudiúunät nebiätyhøch mijts tøø nmägapy tøø nhane'emiän.

¹⁶ Nnämäabiøch ja'a nDeedy coo mijts ja'a jootcapxmøcpøjpä wiingpä xyajnäguéxät, ja'a tømiädiacpä. Ja'a Dioshespíritu je'e. Cøjxta'axiøø hajxy jaduhñ xmiøødhida'añ.

¹⁷ Pønjaty ja'a Diosmädia'agy ca'a mäbøjp, cabä Dioshespíritu hajxy choga'añ. Cab hajxy mänaa yhixyhada'añ. Pero mijts, mobädajpä hajxy je'e mhixyhada'añ. Xmiøødhidáannäp hajxy je'e. Jiiby hajxy mmøødhada'añ mjoodootyhajxy.

¹⁸ Cábøch mijts je'e nnähgue'ega'añ nidiuhñ nämetsc. Cädaactägatsáambøch yaa jadähooc maa mijtsän.

¹⁹ Mejtsxøø tægøøgxøøch ja'a jäya'ayhajxy xjiaag hixa'añ. Cábøch hajxy hänäjty yaa xy-hixaañnä cooch yaa ndsoonaannä. Cooch cøjxta'axiøø nhida'añ, paady mijts cøjxta'axiøø mhidaambä.

²⁰ Mobädajpä hajxy jaduhñ mnajuø'øwa'añ coochä nDeedy tu'ugmädia'agy nmøødhity. Jaanä tu'ugmädia'agy hajxy jaduhñ nhidáannämbä.

²¹ Pønjátyhøch ja'a nmädia'agy xquiudiúunäp nébiøch tøø nmägapy tøø nhane'emiän, xchøjpøch je'e. Jaanä ndsojpy højts je'ebä møødhøch ja'a nDeedy. Nyaghixáambøch ja'a nwiinmahñdy hajxy.

²² Jii Jesús ja'a jiamiøød hānajtj tu'ug xiøhaty Judas. Pero ca'a je'e yhIscariote. Mānitā Judas ja'a Jesús miāyajtøøyy:

—Wiindsøn, tii højts ja'a mwiinmahñdy coo xyaghixa'añ, pero cabā cu'ughajxy myaghixa'añ.

²³ Mānitā Jesús yhadsooyy:

—Pónhøch xchojpp, xquiudiúunäbøch ja'a nmādia'agy je'e. Y chójpiøchā nDeedy je'ebā. Tu'ugmādia'agy højts nmøødhida'añ møødhøch ja'a nDeedy.

²⁴ Pónhøch jaduhñ xquia'a tsojpp, cábøchā nmādia'agy xyajtuunā. Ca'a yhøøchā nhamd-soo mādia'agy hādaa, hādaa hajxy nyajmøødmādiaacypiā. Ja'a nDēedyhøch miādia'agy hādaa, ja'açh tøø xquiéxiäbā.

²⁵ 'Mijts, nyajmøødmādiaacypiøch mijts jaduhñ mäduhñtiä hajxy yaa nmøødhitiän.

²⁶ Nägøoyyøch nnøcxaanñä ndu'ubøgaanñä, mānitøch ja'a nDeedy yhEspiritu quiexa'añ maa mijtsän. Je'eçh jaduhñ nguwitshadaamby. Mijts jaduhñ xjiootcapxmøcpøgaamb. Cøxaamb hajxy xyajnähiø'øwa'añ. Cøxaamb hajxy xyagjahmiejtsta'aga'añ nebiátyhøch mijts yaa tøø nyajmøødxi'igy tøø nyajmøødmādia'agy.

²⁷ 'Jootcújc-høch mijts nyajmähmø'øwa'añ. Cab mijtsä cu'ug xyagjootcugø'øwät nébiøch mijts jootcujc tøø nyaghitiän. Ca'a hajxy tii mnādajy mnāmay. Ca'a hajxy mdsähgø'øy mdsähdiuñ.

²⁸ Tøøch mijts nhawáañäm cooçh nnøcxa'añ ndu'ubøga'añ. Pero cādaactägatsáambøch jadähooc. Pø xchójppøch mijts tøyhajt, mxoondá'agäp hajxy coo nhawáañäm cooçh jim nnøcxa'añ maächä nDeediän. Míaaas møødä mājaa je'e quejeeçh nmøødä.

²⁹ Tøøch mijts jäguemiä nhawáañäm nébiøch yaa njada'añ hādaa yaabā naaxwiin y cooçh jim nnøcxaanñä maächä nDeediän. Cooçh jaduhñ njädät, cooçh jim nnøcxät, mānit hajxy mhuuc tehñ miäbøgät.

³⁰ 'Tu'habáquiøch mijts nhuuc jaac møødmādia'agyñä. Medsaambä møjcu'ugong, ja'a yaa cu'ughanehmbä; pero cabā cuhdujt miøødä maäch høøchcøxpän.

³¹ Ngudiunāañbøch nébiøch ja'a nDeedy tøø xmiägapy tøø xyhane'emiän. Páadyhøch jaduhñ ngudiuna'añ neby jaduhñ quiähxø'øgät cooçhā nDeedy tøyhajt njaançh tsoy. Tānaayyø'øg hajxy. Jam hajxiän.

15

¹ 'Høøch, jaduhñ mäwíinhøch høøch nebiä tsaatyptequiän ja'a tøyhajtpä. Ja'a nDēedyhøch, jaduhñ je'e nebiä cudsaatypcamän.

² Ja'a nDēedyhøch, xyhøxpújxäbøch ja'a nhaads mädyii ca'a tømbejpp; pero mädyiids jaduhñ tømbejpp, je'eds jaduhñ weenjaty yhøxpuyxyp, nebiä maas majiaty tiøømbédät.

³ Coo hajxy jaduhñ tøø mmäbøcy nebiátyhøch mijts je'e tøø nyajnähiø'øyän, jadúhñhøch ja'a nDeedy mijts tøø xyajnähwa'açh ja'a mhaxøøgwiinmahñdyhajxy. Jaduhñ mäwíinäts je'e nebiä tsaatyp hajxy jiojpuxiän.

⁴ Tehngájnoçh ja'a nmādia'agy hajxy xpianøcxät; tehngájnoçh mijts nbuhbeda'añ. Ja'a tsaatyphaads, cab je'e tiøømbeda'añ coo ja'a yhøjxä tiecy hānajtj quia'a hity. Jaduhñ mäwíinäts mijtspä, pø cábøch ja'a nmādia'agy hajxy tehngajnā xpianøcxaanñ, cab hajxy hoy mwädítät.

⁵ 'Høøch, jaduhñ mäwíinhøch høøch nebiä tsaatyptequiän. Høøch mijts jaduhñ nhaadshajpy. Cooçhā nmādia'agy hajxy tehngajnā xpianøcxät, mānit hajxy hoy mwädítät. Nbuhbédäbøch mijts jaduhñ. Cooçh mijts nga'a puhbédät, cab hajxy tii hoy mduna'añ.

⁶ Pónhøchā nmādia'agy xquia'a panøcxäp, jaduhñ mäwíinäts je'e nebiä tsaatyphaads hajxy yhøxpuxiän. Coo jaduhñ tiø'øch, mānit hajxy yajpädø'øgy; mānit hajxy ño'ogy.

⁷ 'Cooçhā nmādia'agy hajxy tehngajnā xpianøcxät, coo hajxy mga'a jahdiägøyyät nebiátyhøch mijts tøø nyajnähiø'øy, ngudiunäbøch jaduhñ mädyiibäjatj mijts xmiäyujwa'anaamb.

8 Coo hajxy hoy mwädítät, cähxó'ögäp jaduhñ coochä nmädia'agy hajxy tøyhajt xpi-anöcxä. Jaanä cähxó'ögaamb jaduhñbä coochä nDeedy je'e miöjjä jiaančhä.

9-10 Nébiöchä nDeedy xchoquiän, jadúhñhöch mijts ndsojpä. Coochä nmädia'agy hajxy xyajtúunät, ngumáyäböch mijts jaduhñ; hoy miänáajöch mijts ndsógät. Jadúhñhöchä nDeedy xchocy coochä miädia'agy nyajtúunäbä.

11 'Páadyhöch mijts jaduhñ nyajmøødxí'igy nyajmøødmädia'agy coo hajxy tehngajnä mxoondá'agät nébiöch nxoonda'aguiän.

12 Míjtshöch jaduhñ nmägäpxyp nhanehñby coo hajxy hamiñ haxöpy mniçhogøød mnibia'häyowøød nébiöch mijts ndsoquiän.

13 Pøñ jaduhñ jaanč tehñ chójcäp, coo hñajty yagho'oga'añii, nähho'tu'udøøb je'e ja'a miägu'ughajpä.

14 Coo hajxy mgudiúnät nebiátyhöch mijts tøø nmägäpxy tøø nhane'emy, xmiägu'ughájpxöch mijts hñajty jaduhñ.

15 Cáböch mijts nnäma'awaanä “moonsä.” Ja'a moonsä, cabä ñajuø'öy tii ja'a wyi-indsón tiuumby. Pero mijts, tøø mijts ngøxy hawáañäm nebiátyhöch ja'a nDeedy je'e tøø xyhawaanä. Páadyhöch mijts nnäma'awaanä “mägu'ughajpä.”

16 Ca'a yhööch mijts je'e tøø xwyiimbiy; hööch mijts je'e tøø nwiimbiy. Tøöch mijts jaduhñ nwiinguexy coo hajxy hoy mwädítät, coo Diosmädia'agy hajxy myajwá'xät, neby hajxy jaduhñ mmayó'owät. Weenä Diosmädia'agy hajxy tehngajnä pianöcxpä; ween hajxy hoy wiädijpä. Jadúhñhöch mijts nDeedy xmió'owät tijaty mijts hñajty mdsogaamby, coochä nmädia'agy hajxy hñajty xmiäböjçä.

17 Chámhöch mijts jadähooc nmägäpxy nhane'emy coo hajxy mniçhogøød mnibia'häyowøød hamiñ haxöpy.

18 'Mijts, xmiähanhadaamb ja'a tsaan ja'a cu'ug hajxy. Moorä hööch hajxy tøø xmiähanhajpä.

19 Xmiähanhadaamb mijts je'e, ja'a hajxy haxøøgwädijpä. Paady mijts xmiähanhada'añ coo mijts ja'a haxøøgpä tøø mgøxy najtshixøøñä. Tøø mijts ja'a mbojpä mgädieey nyajñähwáatsäm. Coo mijts häxöpy tøø mga'a najtshixø'öy ja'a haxøøgpä, cu xmiägu'ughajty jäya'ay hajxy may.

20 Huuc jahmiets hajxy nejy mijts tøø nnäma'ayän, cabä moonsähajxy quiuhdujtmøød quejee wyiindsönhajxy. Coochä jäya'ayhajxy näje'e xmiädsiphaty, paady mijts hajxy xmiädsiphadaambä. Ý coochä nmädia'agy hajxy näje'e xmiäböjçä, paady mijts ja'a mmädia'agy hajxy xmiäbögåanäbä.

21 Hööchcøxpä mijts ja'a cu'ug xmiädsiphada'añ, je'eguiøxpä coochä nDeedy hajxy xquia'a hixyhajtä, ja'ačh tøø xquiéxiäbä.

22 'Tøöch jäya'ay ja'a nmädia'agy hajxy hoy nyajmädoxyhaty. Coochä nmädia'agy hajxy tøø xquia'a mäböjçä, paady hajxy quiumädowa'añ. Coochä nmädia'agy hajxy häxöpy tøø xquia'a mädoxyhajtä, cab hajxy häxöpy quiumädowa'añ.

23 Pøñhöch xmiähanhajp, jadúhñhöchä nDeedy xmiähanhájtäbä.

24 Tøöchä hoy-yagjuøøñäjatypä nyajcähxó'ögy. Caj pøñ jaduhñ yajcähxó'ögy hädaa yaabä naaxwiimbä. Hoy jäya'ayhajxy tøø jia hixy tøø jia mädoxy, xmiähanhajp højts møødhöchä nDeedy. Paady hajxy je'e quiumädowa'añ. Coochä hoy-yagjuøøñäjatypä häxöpy tøø nga'a yajcähxó'ögy, cab hajxy häxöpy quiumädowa'añ.

25 Coochä jäya'ayhajxy xmiähanhaty, tøjiajp jaduhñ nebiä Diosmädia'agy myiñän, neby hajxy jecy quiujahyyän: “Pues, nä'a nägóoböch hajxy xmiähanhaty.”

26 'Nguexáambiöch ja'a Dioshespíritu, ja'a mijts xjiotcapxmøcpøgaambä, ja'a tømädiaacpä. Jim jaduhñ choona'añ maačhä nDeediän. Coo quiäda'aga'añ, mänitöch je'e xñägäpxa'añ.

²⁷ Jadúhñhøch mijts xñägapxaambä, nebiátyhøch mijts yaa tøø nmøødwädity. Høxtáhmdsøchä jäya'ayhajxy nyajnáhixøøchoonän, quípxyhøch mijts nmøødtägøøyy wädijpä høxtä jäda'anäbaadyñä.

16

¹ 'Páadyhøch mijts cham nyajmøødxi'igy nyajmøødmadia'agy, coøch mijts ja'a nmädia'agy ni mänaa xquia'a najtshixøøyyät, hoy mijts jäya'ay mäduhñtiä xjia mädsiphaty xjia mähanhaty.

² Xyajpádsømaamb mijts je'e tsajtøgooty. Høxtä habaadaamb jaduhñ coo mijts xyagho'oga'añ je'eguiøxpä cooc tyijy ja'a Diosmädia'agy hajxy quiuidiñ.

³ Paady mijts je'e xmiädsiphada'añ coo højts je'e xquia'a hixiä møødhøchä nDeedy.

⁴ Coø hajxy jaduhñ mjádät mhabétät, mänit hajxy jaduhñ mjahmiédsät coo hajxy nhawáanäm. Paady cham nhawáanäm.

'Cooch mijts hijty quipxy nmøødwädity, paady hajxy hijty nga'a hawáanäm.

⁵ Nøcxáanábøch jim maaçhä nDeediän, ja'açh tøø xquiéxiäbä. Jimhøch nhidaannä. Pero cábøch mijts xmiäyajtøy maaçh nnøcxa'añ.

⁶ Mjootmayhajp mijts jaduhñ coøch mijts jaduhñ tøø nyajmøødmadia'agy.

⁷ Chaads mijts tehñ tiøyhajt nnämä'awät, hoyø'øwaamb jaduhñ mijtsøxpä coøch nnøcxa'añ. Nguexáambiøch pøn mijts xjiootcapxmøcpøgaamb. Cooch nga'a nøcxät, cab jaduhñ quiädá'agät maa mijtsän.

⁸⁻⁹ Tsipcøxp jaduhñ ñä'ägä cáda'aga'añ. Mänitä jäya'ayhajxy yajwiinjuø'øwa'añii coo pojpa cádieey hajxy tøyhajt jiaançh møødá. Paady hajxy miøødá, coøchä nmädia'agy hajxy tøø xquia'a mäbøjcä. Paady hajxy yajcumädowa'añii ja'a Diósäm.

¹⁰ Jaduhñ hajxy yajwiinjuø'øwáanábä coøch ja'a pojpa cádieey nga'a møødá. Nøcxáambøch jim maaçhä nDeediän; cábøch mijts yaa xyhixaañä.

¹¹ Jaduhñ hajxy yajwiinjuø'øwáanábä coo hajxy yajcumädowa'añii ja'a Diósäm, pønjaty ja'a møjcu'ugong ja'a miädia'agy panøcxäp, ja'a yaa hanehmbä hädaa yaabä naaxwiin. Tøø ja'a Dios miäna'añ coo ja'a møjcu'ugong quiumädowa'añ.

¹² 'Madiu'u mijts nja hawaanáanäm, pero cab hajxy mwiiinjuø'øwät.

¹³ Coø ja'a Dioshespíritu hánajty quiäda'aga'añ, mänit mijts ja'a tøyhajt xquiøxy yajwiinjuø'øwa'añ. Ca'a yhamdsoo mädia'agy je'e miädia'agaamby. Piamädia'agaamby jaduhñ nebiaty je'e tøø miädoy. Je'e mijts xyajmädoyhadaamb tijaty jadaan tunáanäp.

¹⁴ Xñägapxáambøch je'e coøch nmøjjä njaançhä. Mijts xyajmädoyhadaamb nebiátyhøch je'e tøø nnäma'ayän.

¹⁵ Coø højts nhity tu'ugmädia'agy møødhøchä nDeedy, páadyhøch mijts cham nnäma'ay coo mijts ja'a Dioshespíritu xyajmädoyhada'añ nebiátyhøch je'e tøø nnäma'ay.

¹⁶ 'Mobädájpøch jim nnøcxaannä maaçhä nDeediän. Pero cábøch njega'añ; mänitøch mijts hánajty xyhijxtägatsa'añ.

¹⁷ Mänitä Jesús ja'a jiamiøødhajxy näje'e ñiñämaayyä:

—Pätiidä yø'øya'ay jaduhñ coo ñä'ä mäna'añ cooc mobädajpä ñøcxaannä; cábäc jaduhñ jiega'añ. Mänitäc nhixáanägombä. Pätiidä coo ñä'ä mäna'añ cooc ñøcxa'añ maa ja'a Tieediän.

¹⁸ Pätiidä coo ñä'ä mäna'añ “mobädajpä.” Päwaambtä jaduhñ jia mäna'ana'añ.

¹⁹ Ñajuøøbiä Jesús hánajty coo hánajty miäyajtøwa'añii. Mänit miänaañ:

—Xmiäyajtøwáambøch mijts tijátyhøch jaduhñ tøø nja mädia'agy, túhñämäts.

²⁰ Chaads mijts tehñ tiøyhajt nnämä'awät, mjø'øwaamb mxuudsaaamb mijts ja'a høøchøxpä. Pero yø'ø cu'ughajxy, jaançh tehñ xioonda'agaamb hajxy. Pero cab hajxy jejcy mjootmayhada'añ. Paquiä hajxy mjootcugø'øwáanögombä.

²¹ Coø ja'a to'oxiøjc ja'a xiøøbio'ohajxy piedyii, mänitä jioothajxy piädø'ogø'ogy. Nägooyyä ja'a yhuunghajxy je'e miejtsnä, hagädaacp ja'a jioothajxy je'e. Cab hajxy

je'e jiahmiejtsnä coo ja'a jioothajxy hänajty tøø piädø'øgy. Xoonðáacnöp hajxy coo yhuunghajxy hoy ween tøø myiñ tøø quia'ay.

²² Jaduhñ mäwínäts hajxy mjootmayhaty nebiä to'oxiøjc ja'a jioothajxy piädø'øguiän. Pero nägooyä højts nniyhíxägumbä, mänit mijts mxoonða'aga'añ. Caj mijts pøn xyagjootmayhadaannä.

²³ 'Cábøch mijts hänajty tii xmiäyujwa'anaannä. Chaads mijts tehñ tiøyhajt nnämä'awät, cooch mijts nDeedy hänajty tijaty xmiäyujwa'anaannä, xmio'owaamb mijts je'e ja'a høøchcøxpä.

²⁴ Cahnä hajxy tii mhuuc yujwa'añ ja'a høøchcøxpä. Coo hajxy tijaty myujwá'anät, xñä'ägä mo'owaamb hajxy je'e. Jaduhñ hajxy hoy jootcuyc mhídät.

²⁵ 'Yajmäbaadyháamhøch mijts tøø nmøødmädia'agy. Habáatnöp jaduhñ cooch nga'a mädia'agaannä yajmäbaadyhaam. Howyiinjuøøñoch ja'a nDeedy nmädia'agaannä.

²⁶⁻²⁷ Mänitøch mijts ja'a nDeedy hoy tyiijä xmiäyujwa'anaannä ja'a høøchcøxpä. Mänit hajxy xmio'owa'añ. NDéedyhøch mijts xyhamdsoo mäyujwa'anáanöp je'eguiøxpä cooch mijts nDeedy xjiaanç tehñ chocy. Paady mijts xchocy cooch mijts xchojpä, cooch mijts ja'a nmädia'agy hajxy tøø xmiäbøjcä cooch jim tøø ndsooñ maaçhä nDeediän. Hamdsoo hajxy mmäyujwa'ana'añ; cábøch waamb nmäna'ana'añ.

²⁸ Høøch, jímhøch tøø ndsooñ maaçhä nDeediän. Yaaç tøø ngäda'agy hädaa yaabä naaxwiin. Pero tsoonáambøch yaa jadähóocägumbä. Nøcxtägatsáambøch jímgumbä maaçhä nDeediän.

²⁹ Mänitä Jesús ja'a jiamiøødhajxy miänaañ, ñämaayyä Jesús:

—Hoorá sí, howyiinjuøøñä miich mmädiaacnä.

³⁰ Tøø højts nnajuø'øy. Cab højts miich tii nmäyajtøwaannä. Nmäbøjnöp højts jaduhñ cóodäm miich jim mjaanç tsooñ maa Diosän.

³¹ Mänitä Jesús yhadsooyy:

—Mjaanç mäbøjpiäda'a tyijy hajxiä.

³² Habáatnöp jaduhñ coo mijts ja'a cu'ug xquiøxy päboowia'xa'añ. Mänit hajxy jim mnøcxaannä maa mdøjc-hajxiän. Nidiuhmhøch hajxy yaa xñähgue'egaannä. Pero cábøch nidiuhñ tøyhajt nhida'añ. Ja'a nDéedyhøch jaduhñ xmiøødhidaamb.

³³ Páadyhøch mijts jaduhñ cham nyajwiinxiic nyajwiingapxø'øy coo mijts ween jootcuyc mhijnät coochä nmädia'agy hajxy xmiäbøjcät. Mbaadaambiä tsaachpa peenä hajxy hädaa yaabä naaxwiin. Pero ca'a hajxy tii mdajy mmay; cábøchä møjcu'ugong nyajmäjäda'aga'añ.

17

¹ Nägooyyä Jesús miädiaacpädøøyy, mänit yuughee'py tsajpootyp. Mänit miänaañ:

—Teedy, tøø yhabaatnä. Huuc yajcähxø'øg cooch nmøjjä cooch njaançhä. Jaduhñhøch nyajcähxø'øgaambä coo miich mmøjjä coo miich mjaançhä.

² Tøøch miich cuhdujt jaduhñ xmio'oy coochä jäya'ayhajxy nägøxiä nguhdujtmó'owät coo hajxy jim jaduhñ ween yhity maa miichän cøjxta'axiøø, pønjätyhøch miich tøø xyajcø'øwaanø'øy.

³ Jaduhñ hajxy jim cøjxta'axiøø yhida'añ maa miichän, coo højts ja'a nmädia'agy jaduhñ xmiäbøjcämät coo miich nidiuhñ mDioshaty, coo miich mdømiädia'agy, cooch miich yaa tøø xquiexy hädaa yaabä naaxwiin.

⁴ 'Høøch, ngudiúumbiøch hädaa yaabä naaxwiin nébiøch miich tøø xyhane'emiän. Nyajcähxø'piøch jaduhñ coo miich ja'a mäjaa tøyhajt mmøødä.

⁵ Teedy, høøchä nmäjaa yajcähxø'cäc jim maa miichä mwiinduumän nébiøchä mäjaa hijty jim nmøødän mänaabä hädaa yaabä naaxwiin yhawijy tiøø'xta'aguiän.

⁶ 'Pønjaty miich yaa tøø mwiimbiy hädaa yaabä naaxwiin, je'eçhajxy jayøjp nya-jmädoyhajt coo miich nidiuhñ mDioshaty, coo miich mdømiädia'agy. Miichä mgø'øjooty

hajxy je'e hijty. Pero jadähóoc-høch miich je'e tøø xyajcø'øwaanøøguiumbä. Tøø ja'a mmädia'agy hajxy je'e xmiäbøjcä xquiudiunä.

⁷ Ñajuóøñäp hajxy cooch miich jaduñ tøø xmio'oy mäduhñtiøch nmøødä.

⁸ Tøøch hajxy ngøxy yajnähixø'oy nebiátyhøch miich tøø xyajnähixøøbiän. Ñajuóøñäp hajxy cooch jim tøyhajt ndsoñ maa miichän. Tøøchä mmädia'agy hajxy jaduñ xmiäbøjcä cooch miich tøø xquiexy.

⁹ 'Teedy, tunä mayhajt. Cueendähat hädaa jäya'ayhajxy, hädäjøch miich tøø xya-jcø'øwaanø'øyabä. Ca'a jie'emøødøch jaduñ nnänømy ja'a mmädia'agy hajxy tøø xquia'a mäbøjcäbä.

¹⁰ Højts hädaa jäya'ay nje'ehajmújcäm; páadyhøch miich nnäma'ay coo mgüeendähädät. Hädaa jäya'aguiøxpä jaduñ quiähxø'øga'añ coo højts nmøjhajtäm coo højts njaançhajtäm.

¹¹ 'Cábøch yaa nhidaanä hädaa yaabä naaxwiin. Nøcxáannäbøch jim maa miichän. Pero yaaçhä njamiøødhajxy miähmø'øwa'añ. Cueendähat hajxy neby hajxy jaduñ yhidät tu'ugmädia'agy neby højts nhíjtäm tu'ugmädia'agy. Miichä mmäjaagøxpä mgüeendähädät. Míichhøch hajxy tøø xyajcø'øwaanø'øy. Jaançh tehñ wia'ads miichä mjoot miichä mwiiinmahñdy.

¹² Høxtä jäda'anäbáadyñøch hajxy ngüeendähaty miichä mmäjaagøxpä. Caj miichä mmädia'agy hajxy nägøxiä tøø xñajtshixøøyyä. Jagooyyä tu'jäya'ay ja'a mmädia'agy tøø xñajtshixøøyyä, ja'a hijty nä'ägä tu'udägoyyaambä. Paady jaduñ tiu'udägooyy nebiä mmädia'agy jaduñ tiøjiädät nebiä cujaaybä miähmøøyyän.

¹³ 'Høøch, nøcxáannäbøch jim maa miichän. Páadyhøch miich jaduñ cham nya-jmøødmädia'agy hädaa jäya'ay wyiinduumhajxy neby hajxy jaduñ xioonäacpät nébiøch nxoonä'aguiän.

¹⁴ Tøøch miichä mmädia'agy hädaa jäya'ayhajxy nyajmøødmädia'agy. Paady hajxy yaa miähanhadyii hädaa yaabä naaxwiin, coo hajxy haxøøgtuum quia'a wädijnä. Høøch hajxy xpiahijxp cooch haxøøgtuum nga'a wädity.

¹⁵ Chaads miich nnämä'awät coo miich hädaa jäya'ayhajxy mgüeendähädät maa ja'a møjcu'ugongän. Cábøch jaduñ nmäna'añ coo hajxy yaa choonät hädaa yaabä naaxwiin.

¹⁶ Hoy hajxy jaduñ wiädity nébiøch nwäditiän.

¹⁷ Cunuu'x hädaa jäya'ayhajxy ja'a miichä mhomiädia'agyhaam nebiä mmädia'agy hajxy tehngajnä xpianøcxät xquiudiunät. Mäduhñtiä miichä mmädia'aguiä, tøyhajt je'e.

¹⁸ Høøch, hädaa yaabä naaxwiinhøch miich tøø xquiexy nébiøch miich ja'a jäya'ay ja'a mmädia'agy hajxy nyajmädoyhädät. Jadúhñhøch yø'øya'ayhajxy nwiinguexaambä nebiä mmädia'agy hajxy xyaghawa'xøøyyät.

¹⁹ Nnähho'tu'udáambiøch hädaa jäya'ayhajxy neby miichä mmädia'agy hajxy tehngajnä xpianøcxät xquiudiunät.

²⁰⁻²¹ 'Jadúhñhøch nmänaambä coo jäya'ayhajxy ween yhity tu'ugmädia'agy nägøxiä mäduhñtiøch ja'a mmädia'agy hajxy xmiäbøgaanä majatyhagájphøchä njamiøød ja'a mmädia'agy hajxy xyajwa'xaanä. Ween hajxy xmiøødhíjtäm tu'ugmädia'agy neby højts nhíjtäm tu'ugmädia'agy. Jaduñdsä jäya'ayhajxy miäbøga'añ cooch miich tøyhajt tøø xjiaançh quexy.

²² Tøøch hajxy nguhdujtmø'oy coo hajxy yhidät tu'ugmädia'agy, nébiøch miich tøø xquiuhdujtmø'oyän coo nhíjtämät tu'ugmädia'agy.

²³ Tu'ugmädiá'agyhøch hajxy xmiøødhity nébiøch miich nmøødhitiän tu'ugmädia'agy. Nägøxiä hajxy jaduñ yhidät tu'ugmädia'agy, ja'a mmädiá'agyhøch hajxy tøø xmiäbøjcäbä. Jaduñdsä jäya'ayhajxy ñajuø'øwa'añ nägøxiä cooch miich tøø xquiexy, coo miich hajxy jaduñ mdsocy nébiøch miich xchoquiän.

²⁴ 'Teedy, mänáambøch jaduñ cooch hajxy jim ween xmiøødhity maaçh nhida'añän, ja'açh miich tøø xyajcø'øwaanø'øyabä. Jadúhñhøch nmänaambä coo ja'a mäjaa hajxy

ween yhiŋy, ja'ačh miich tøø xmió'oyäbä. Xjiaančh tehñ chójpøch miich hānajtŋ mānaabä hädaa yaabä naaxwiin yhawijy tiøø'xta'aguiän. Høxtä jäda'anäbāadyñøch miich xchocyñä.

²⁵ Teedy, tøyhajt miich mnä'ägädä mädia'agy. Ja'a cu'ughajxy, cab hajxy wyiinjuø'øy coo miich mdømiädia'agy. Pero høøčh, nhíxyhøch miich. Hädaa njamiøødhøch hajxy chaa tänaabiä, ñajuøøby hajxy je'e cooçh miich tøø xquiexy.

²⁶ Tøøch hajxy je'e nyajmøødmädia'agy coo miich nidiuhñ mDioshaty, coo miich mdømiädia'agy. Tehngājnøch jaduññ nyajmøødmädia'aga'añ neby hajxy jaduññ ñichogøød ñibia'hāyowøød nébiøch miich xchoquiän. Wéenhøch hajxy tu'ugmädia'agy xmiøødhity.

Mānitä Jesús miädiaacpādøøyy.

18

¹ Coo Jesús miädiaacpādøøyy, mānitä Jesúshajxy chohñ cajptooty møødä jamiøødhajxy. Mānitä woc hajxy yajnajxy, ja'a hānajtŋ xøhajpä Cedrón. Mānit hajxy tiägøøyy olivocamjooty.

² Ja'a Judas, yhiŋy hānajtŋ je'e jiiby olivocamjooty. Mayhooc ja'a Jesúshajxy hānajtŋ jiiby tøø yhamugø'øy. Ja'a Judas ja'a Jesús hānajtŋ yegaamb. Ja'a Jesús ja'a miädsiphajxy hānajtŋ yajcø'ødägø'øwāañäp.

³ Mānitä Judas ja'a soldadohajxy hoy wioy. Møødä policíahajxy hoy wioy maa ja'a teedywiindsønñhajxiän, maa ja'a fariseoshajxiän. Mānitä Jesús jiiby ñägādaacä olivocamjooty, ja'a Judashajxy møødä soldado møødä policía. Tøø hānajtŋ quioodsøøñä. Møødä jiøøn møødä quiuhñd hajxy quiādaacy.

⁴ Ja'a Jesús, ñajuøøby hānajtŋ je'e nebiaty hānajtŋ je'e tiuna'añii. Mānitä Jesús hoy jiøjcuyo'oyø'øy ja'a Judashajxy. Mānit miäyajtøøyy:

—Pøn hajxy mhøxtaaby.

⁵ Mānit hajxy yhadsooyy:

—Jesús Nazaretpä højts nhøxtaaby.

Mānitä Jesús miānaañ:

—Høøch jaduññ xøhajp.

⁶ Coo ja'a soldadohajxy jaduññ miādooyy, mānit hajxy jaduhyä yhøxtägø'øwa'cy. Jaduhyyä hajxy çøjx quiāday.

⁷ Mānit Jesús miäyajtøøgumbä:

—Pøn hajxy mhøxtaaby.

Mānitä Judashajxy yhadsoogumbä:

—Ja'a Jesús Nazaretpä højts nhøxtaaby.

⁸ Mānit Jesús miānaañ:

—Tøøds mijts nja hawāañäm. Høøchämäts je'e. Pø høøçhtiäm mijts xyhøxtaaby, wéenhøchä njamiøødhajxy wyiimbity.

⁹ Paadiä Jesús jaduññ miānaañ neby jaduññ tiøjiädät nebiä Tieedy hānajtŋ tøø ñāma'ayän: “Pønñøch miich tøø xyajcø'øwaanø'øy, cábøch pøn xpiøgaanä. Cab hajxy nej jiada'añ.”

¹⁰ Mānitä Simón Pedro ja'a espada jiädujpädsøømy. Mānitä teedywiindsønñ ja'a mioonsä tiaatsc ñä'a pújxäxä, ja'a hahoodiaatsc. Malco hānajtŋ xiøhaty.

¹¹ Mānitä Jesús ja'a Pedro yhojy:

—Cuyugø'øw yø'ø mhespada. Tsiçøxpøch nho'oga'añ nébiøchä nDeedy tøø xñāma'ayän.

¹² Mānitä Jesús miajtsä quiø'øxojsä. Ja'a soldadohajxy jaduññ jatcøøyy møødä wyiindsønñhajxy møødä policíahajxy, ja'a judíoshajxy hānajtŋ tøø quiéxiäbä.

13 Mänitä Jesús yajnøcxä maa ja'a Anás ja'a tiøjcän. Ja'a Anás ja'a Caifás hänajty miøødhajpy. Teedywiindsøn ja'a Caifás hänajty tiuumby.

14 Ja'a Caifás, je'e ja'a judiøshajxy hänajty tøø ñäma'ay cooc yhahixø'øy jaduhñ coo tu'jäya'ay ja'a cu'ug ñähho'tú'udät.

15 Høxhaam ja'a Simón Pedro ja'a Jesús hajxy hänajty pianøcxy nämetscä. Ja'a Jesús ja'a jiamiøødhajxy nämetscä. Ja'a Simón Pedro miägu'ughajpä, yhixy ja'a teedywiindsøn hänajty je'e. Mänit Jesús piadägøøyyä ja'a Simón Pedro miägu'ughajpä maa ja'a teedywiindsøn tiøghawa'adsän.

16 Ja'a Pedro, jim je'e miähmøøyy tøghawa'adshaguum. Mänitä Pedro miägu'ughajpä piädsøømy. Mänitä to'oxymoonsä miägapy ja'a tøjcueendähajpä. Mänitä Pedro quiuwowøøyyäbä tøghawa'ads ja'a yhamdsoo mägu'ughajpä.

17 Mänitä to'oxymoonsä ja'a Pedro miäyajtøøyy:

—Miičh yø'øya'ay mmøødwädiipy, túhñämäts.

Mänitä Pedro yhadsooyy:

—Ca'a yhøøchä.

18 Jimä policíahajxy hänajty jiøømba'axamy møødä moonsähajxy. Tøøchc hänajty. Paady hajxy hänajty tøø jiøønyajmøjjø'øy. Jimä Pedro hänajty jiøømba'axaambä.

19 Mänitä Jesús miäyajtøøwa ja'a jiamiøødcøxpä møødä miädia'agyquiøxpä. Ja'a teedywiindsøn jaduhñ yajtøøw.

20 Mänitä Jesús yhadsooyy:

—Jímhøch hijty tøø nmädia'agy majiäya'ayhagujc. Jímhøch hijty nmäyajnähixø'øy Diostøgooty møød tsajtøgooty maa ja'a judiøshajxy naxy yhamugø'øyän. Cábøch jim mänaa pactuum tøø nmädia'agy.

21 Tiičh miičh coo xmiäyajtøy. Yø'øya'ayhajxy mmäyajtøwäp yø'ø nmädiä'agyhøch hajxy tøø xmiädóowäbä. Yø'øhajxy je'e najuøøby nebiátyhøch jim tøø nmädia'aguiän.

22 Tuunä Jesús jaduhñ ñä'ä hadsooyy, mänit yhala'abø'cä. Policía jaduhñ tu'ug jatcøøyy. Mänitä policía Jesús ñämaayy:

—Cab jaduhñ yhooyä coo ja'a teedywiindsøn jaduhñ mhadsówät.

23 Mänitä Jesús miänaañ:

—Pø tøøch ngapxtägoy, yec ja'a tøyhajt yaa. Pø caj, cab jaduhñ yhooyä coöch miičh nä'ä nägoobä xñä'ä hala'abø'øgät.

24 Mänitä Anás ja'a Jesús quiejxy cø'øxoch maa ja'a Caifás ja'a wyiinduumän. Caifás hänajty teedywiindsøn tuumb.

25 Ja'a Simón Pedro, jim hänajty jiøømba'axamy. Mänit miäyajtøøwa:

—Miičh yø'øya'ay mmøødwädiipy, túhñämäts.

Mänitä Pedro ñiguiugapxä:

—Ca'a yhøøchä.

26 Mänitä Pedro miäyajtøøwägumbä:

—Tøøch miičh jiiiby nhixy olivocamjooty møød yø'øya'ay, túhñämäts.

Ja'a teedywiindsøn ja'a mioonsä jaduhñ mäyajtøøw, jaaya'ayä jiujuy miägu'ug ja'a tiaatsc hänajty tøø ñä'ä púxäxä ja'a Pedro.

27 Mänitä Pedro ñiguiugápägumbä. Tuunä jaduhñ ñä'ä mänaañ, mänitä tseey yaaxy.

28 Mänitä Jesús yajnøcxä maa ja'a gobernador tiøjcän. Pilato hänajty tuumb gobernador. Jobø'øwaamb hänajty. Coo hajxy jim quiøo'ty, cabä teedywiindsøn hajxy ñä'ä tøjtagøøyy. Cabä Israelpä quiuhdujthajxy hänajty jaduhñ myiñ coo hajxy jiiiby tiøjtägø'øwät maa ja'a tiøjc-hajxiän, ja'a hajxy ca'a Israelpähajpä, ja'a pascuaxøøjooty. Coo hajxy jiiiby tiøjtägø'øwät, cädiéeyäp hajxy jaduhñ. Coo hajxy jaduhñ quiädiéeyät, cab hajxy miägáyät ja'a pascuaxøøjooty. Paady hajxy jiiiby quia'a tægøøyy Pilato tiøgooty.

29 Coo Pilato miädooyy coo hajxy hänajty tøø quiøody, mänit hajxy ñädøjpädsøøma. Mänitä Pilato miänaañ:

—Tii mijts yø'øya'ay myajcuxø'øwø'øwaamby.

³⁰ Mänit hajxy yhadsooyy:

—Coo hädaa jäya'ay häxøpy tøø quia'a cädieey, cab højts miich häxøpy tøø nyajnägoody.

³¹ Mänitä Pilato miänáangumbä:

—Yajwiimbit yø'øya'ay hajxy. Nøcx mijts mädia'agymiadow nej mijts ja'a mguhdujt myiñän pø tøø quiädieey.

Mänitä judíoshajxy yhadsooyy:

—Ja mäná'anäp højts jaduhñ coo yagho'ogøød; pero højts, cab højts ja'a cuhdujt jaduhñ nmøødä coo højts jäya'ay nyaghó'ogät.

³² Paady hajxy jaduhñ yhadsooyy, ween ja'a Pilato jaduhñ ñägäpxy pø tøø Jesús tøyhajt jiaanç cädieey. Tøjiajt jaduhñ nebiä Jesús hänajty tøø miäna'añän coo hänajty yega'añii maa ja'a ca'a Israelpähajxiän, coo hänajty yagho'oga'añii cruzcøxp.

³³ Mänitä Pilato tiøjtägøøyy. Mänitä Jesús quiuyaxøøyyä tøgooty. Mänit miäyajtøøwa:

—Nej, miichä judíoshajxy xguiobiernähajpä.

³⁴ Mänitä Jesús yhadsooyy:

—Pøn jaduhñ xñämaayy. Tøgä miichä mhamdsoo copcooty mnä'a yajcojjiä.

³⁵ Mänitä Pilato jadähooc yhadsoogumbä:

—Tiich nyajnajuø'øb. Ca'a yhøøchä Israelpäjäya'ay. Miichä mhamdsoo mägunáaxhøch miich tøø xyajnägoody møødä teedywiindsøn

hajxy. Tii jaduhñ tøø mgädieey.

³⁶ Mänitä Jesús yhadsooyy:

—Høøch, cábøch yaa nduñ gobiernä hädaa yaabä naaxwiin. Cooch häxøpy nduñ, tøøchä nmoonsähajxy häxøpy xñäwa'añ. Cábøchä judíoshajxy häxøpy tøø xñä'a mach. Cábøch yaa nduñ gobiernä.

³⁷ Mänitä Pilato miänaañ:

—Mduumbäda'a gobiernä.

Mänitä Jesús miänaañ:

—Jexioo, túumbøch jaduhñ. Høøch, nmädiácypioch ja'a tøyhajt hädaa yaabä naaxwiin. Páadyhøch yaa tøø nmiñ tøø nga'ay. Pønjaty ja'a tømiaadia'agy mæbøjp, je'eçhä nmädia'agy xmiäbøjcäp.

³⁸ Mänitä Pilato miänaañ:

—Pätiidä miich jaduhñ mnänøømby ja'a tøyhajt.

Mänitä Pilato tiøjpadšøømgumbä. Mänitä judíoshajxy ñämaayyä:

—Høøch, cábøch yø'øya'ay tøø nhamdsoo hixy tøø nhamdsoo paady pø tøø quiädieey.

³⁹ Jii mijtsä mguhdujt jaduhñ cooch mijts ja'a jäya'ay tu'ug nhøxmájtsämät ja'a pas-cuaxøøjooty. Nej, mmänaamb hajxy jaduhñä coo ja'a mgobiernähajxy nhøxmájtsämät.

⁴⁰ Mänit hajxy møc yhadsooyy:

—¡Ca'a yø'øya'ay mhøxmach! ¡Høxmats ja'a craa Barrabáshajpä!

Paadiä Barrabás hänajty chumyçhäna'ay coo hänajty tøø mieeç tøø pioty. Mänitä Pilato tiøjtägøøñä.

19

¹ Mänitä Pilato ja'a Jesús yajwojpä.

² Mänitä soldado ja'a wädsatscorona hajxy yhädiuñ. Mänitä Jesús ja'a quiuhduum piädáacäxä. Mänitä Jesús ja'a hucywyit yajnähgäjenøøyyä nebiä gobiernähajxy hänajty wyithatiän. Paadiä Jesús jaduhñ tiuunä, neby hajxy hänajty ñä'a wi'i ñäxi'iga'añ ñä'a wi'i ñäya'axa'añ. Paady hajxy hänajty ñä'a wi'i ñäxi'iga'añ coo ja'a Pilato hänajty tøø miäna'añ coogä Jesús hänajty guiobiernähaty.

³ Mänitä Jesús miäwiingoonä. Mänit ñäxiicä:

—¡A poco miich tuumb gobiernäjä!

Mänitä Jesús tiägøøyyä coxhó'cäbä.

4 Mänitä Pilato tiøjpädsømgumbä. Mänitä judíoshajxy ñämaayyá:

—Nyajtøjpädsømämbiøch yø'øya'ay nebiä tøyhajt hajxy jaduñ mmøødhádät cooçh tøø nhixy tøø nbaady coo tøø quia'a cádieey.

5 Mänitä Jesús piadøjpädsømy hucywyitmøød, coronamøød. Mänitä Pilato ñämaayy ja'a Israelpäjäya'ayhajxy:

—Xiids yø'øya'ay tøø tiøjpädsømy.

6 Coø Jesús jaduñ yhiixä ja'a teedywiindsøñhajxy møødä policíahajxy, mänit hajxy ñäyaaxøøyy:

—¡Møjpahbétäts hajxy cruzcøxp! ¡Møjpahbétäts hajxy!

Mänitä Pilato miänaañ:

—Hamdsoo hajxy mmøjpahbédät. Høøch, cábøch jaduñ nmäna'añ coo tøø quiädieey.

7 Mänitä Israelpäya'ayhajxy yhadsooyy:

—Jaduñ højts nguhdujt myiñ coo yø'øya'ay ween yagho'ogyii je'eguiøxpä coo tøø miäna'añ coogä Dios Tieedyhaty.

8 Coø Pilato jaduñ miädooyy, mänitä chähgøøbiøjcy.

9 Mänitä Pilato ja'a Jesús miøødtøjtägøøñä. Mänitä miäyajtøøyy:

—Maa miich mjaançh tsooñ.

Pero cabä Jesús waamb miänaañ.

10 Mänitä Pilato miänáangumbä:

—Nej, cábøch xñä'ägä hadsowa'añä. Nej, caj miich mnajuø'øya cooçhä cuhdujt nmøødä cooçh miich nhøxmádsät, ó cooçh miich nyajmøjpahbedøød.

11 Mänit Jesús yhadsooyy:

—Coo Dios miich cuhdujt häxøpy tøø xquia'a mo'oy, caj miich ja'a cuhdujt häxøpy mmøødä maaçh høøhcøxpän. Paady miich ja'a pojpa caj mjaty møødä quejee ja'a teedywiindsøn, ja'a høøch yaa tøø xyajméçhäbä maa miichä mwiinduumän.

12 Mänit Pilato jia wiinmahñdyhajty nebiä Jesús yhøxmádsät. Pero mänitä Israelpäya'ayhajxy ñäyaaxøøguiumbä:

—¡Pø mmägu'ughajpy miich ja'a gobiernä César, caj miich yø'ø craa mhøxmádsät! Pøn jaduñ wi'i ñibiädáacáp nebiä gobiernän, je'edsä gobiernä César møøtnimiädsiphájtäp.

13 Coø Pilato jaduñ miädooyy, mänitä Jesús miøødtøjpädsømgumbä. Mänitä Pilato yhøxtaacy häñaabiejtcøxp maa hajxy hänajty xiøhdaacthatiän. Jue'e hänajty jim xiøhaty Gabata, hebreohayuuc-haamby. Je'eduhñ ñänøømby “maa ja'a tsaä quiøøñä'ayän.”

14 Tøø hänajty quiujyxiøøj'øy. Hadsuuj'øwaambä pascuaxøø hänajty. Mänitä Pilato ñämaayy ja'a Israelpäya'ayhajxy:

—¡Xiidsä mgobiernähajxy!

15 Mänit hajxy ñäyaaxøøguiumbä:

—¡Ween yho'ogy! ¡Ween yho'ogy! ¡Nøcx hajxy møjpahbet!

Mänit Pilato miänaañ:

—Nej, mmäná'anäp mijts jaduñä coo mijts ja'a mgobiernä nmøjpahbétämät.

Mänit teedywiindsøñhajxy yhadsooyy:

—César højts ngobiernähajpy. Ca'a wyiinghäna'cä.

16 Mänitä Pilato Jesús yajcø'ødägøøyy maa ja'a Israelpähajxiän, coo Jesús miøjpahbedøød.

17 Mänitä Jesús jim yajnøcxä maa jaduñ xiøhatiän “Maa ja'a Ho'ogyjiäya'aguiopcän.” Gólgota jim xiøhaty hebreohayuuc-haamby. Yhamdsoo cruz je'e yajquejyquiaphajtä.

18 Jimä Jesús hoy miøjpahbedyii. Metscä jäya'ay jim miøjpahbétäbä Jesús ja'a ñähmøjc. Cujc ja'a Jesús quiuba'awøøyyä.

19 Mänitä Pilato yagjahyyä pu'uyhuungcøxp: “Jesús Nazaretpä, ja'a Israelpäjäya'ay ja'a guobiernähajxy.” Mänitä pu'uyhuung yajyujpahwa cruzcuhduum.

²⁰ Tägøøghayuuc-haamby jaduñ yagjahyyä, mөөдä hebreo, mөөдä griego, mөөдä latín. Cajptmäwiingón Jesús miøjpahbejtä. Paadiä judíoshajxy nämay yajmädiaacy nebiä Pilato hänajty tөө yajyuugjaayiyän cruzcøxp. Mänitä teedywiindsøn ja'a Pilato hajxy ñämaayy:

²¹ —Cab hijty jaduñ yhahixø'øy coo jaduñ cu mjahy: “Ja'a Israelpäjäya'ay ja'a guobiernähajxy.” Jaduñ cu mjahy: “Nä'ä nibiädäacäp jaduñ nebiä Israelpäjäya'ay ja'a guobiernähajxiän.”

²² Mänitä Pilato yhadsooyy:

—Tөөч jaduñ njaay; cábөч nyajtägatsa'añ.

²³ Coo Jesús hänajty tөө miøjpahbedyii, mänitä soldado ja'a Jesús ja'a wyit hajxy yajpädø'cä. Nämädaaxc ja'a soldadohajxy hänajty. Mänitä wit hajxy yajwa'xy cødu'ug. Jii Jesús ja'a yoñwit hänajty tu'ug. Tu'ugwit hänajty tөө quiojy; cab hänajty maa xiuyyä.

²⁴ Mänitä soldadohajxy ñiñämaayyä:

—Cab jaduñ yhojy coo hädaa wit hajxy nhagøødsøoyyämät. Tsөг hajxy häyø'cäm. Pөñ hädaa wit jaduñ cuhäyø'ögäp, je'e jaduñ je'ehädäp.

Mänitä soldadohajxy jaduñ jiaančhäyø'cy. Jaduñdsä Diosmädia'agy tiøjiajty maa jaduñ cujaay myiñän: “Xyajwá'xөч ja'a nwit hajxy; xquihäyø'cөч ja'a nwit hajxy jaduñ.”

²⁵ Jimä Jesús ja'a tiaj hänajty tiäna'ay maa hänajty mädøyyä tөө miøjpahbedyijän, chaadsä tiaj ja'a piuhdo'oxy, chaadsä María ja'a Cleofas ja'a tio'oxiøjc, chaadsä María Magdalena. Jimä Jesús ja'a miägu'ughajpä hänajty tu'ug tiäna'ay maa ja'a Jesús tiaj mädøyyän, ja'a Jesús hänajty jiaančhäyø'cy.

²⁶ Coo hajxy yhijxä ja'a Jesús, mänitä Jesús ja'a tiaj ñämaayy:

—Maam, hädaads mhuunghädäp.

²⁷ Mänitä Jesús ja'a miägu'ughajpä ñämaayy:

—Hädaads mdajhädäp, ja'a hөөчhä ndaj.

Mänit jiaančhäyø'cy.

²⁸ Mänitä Jesús miänaañ:

—Tөdsøoyyäbөч.

Tøjiajt ja'a Diosmädia'agy jaduñ. Ñajuøøbiä Jesús hänajty coo hänajty tөө yhavejnä.

²⁹ Jimä texy hänajty tu'ug quiøøña'ay vinoxunmөөд. Mänitä xo'od hajxy quiugonøoyy vinojooty. Cөjx je'e chomø'øy. Mänitä paxy hajxy yagjøjwøønøoyy ja'a xo'od. Mänitä Jesús ja'a xo'od hajxy yaghayuugøoyy.

³⁰ Coo Jesús ja'a vino miuu'cy, mänitä miänaañ:

—Tөөds jaduñ miaañä.

Mänitä quiopc yagjänaañä. Mänit yho'nä.

³¹ Mänaa ja'a Jesús yho'oguiän, ja'a pascuaxøø hänajty tehñ yhadsooyy. Cu-jaboom ja'a møjpascuaxøø hänajty jiada'añii, poo'xxiøøjooty. Jaduñdsä judíoshajxy hänajty quiuhdujthaty, cabä ho'ogyjiäya'ay hajxy hänajty jim yajmähmø'øy cruzcøxp ja'a poo'xxiøøjooty. Mänitä Israelpä ja'a Pilato hajxy hoy ñäma'ay coo soldado quiéxät weenä Jesús ja'a tiecyhajxy nөcxy tiøjjäxä neby hajxy paquiä yho'ogät. Nägooyyä hajxy jaduñ yho'ogät, mänit hajxy yajmänacøød cruzcøxp.

³²⁻³³ Mänitä Pilato ja'a soldado jiaančhäyø'cy. Coo ja'a soldadohajxy jim miejch, mänit hajxy yhijxy coo ja'a Jesús hänajty tөө yho'ogy. Cabä tiecy hajxy je'e ñä'ä tøjjä. Mänitä ñähmøjcpähajxy tiecytiøjjä nämetscä. Cahnä hajxy hänajty yho'ogy.

³⁴ Mänitä Jesús quiaačhmägumøoyyä cuhmðhaam. Soldado jaduñ tu'ug jatcøoyy. Mänitä nө'ty piädsøømy chaadsä nөө.

³⁵ Hөөч, төyhájthөч jaduñ tөө nhixy. Páadyhөч mijts jaduñ nyajmädojhaty neby hajxy jaduñ mmäbögät.

36-37 Jecy hajxy jaduhñ quiujahy Diosmädia'agyjooty ja'a Jesúsçøxpä: “Cabä piajc tiøjáanäxä.” Jaduhñ hajxy quiujahbiä ja'a Jesúsçøxpä: “Wyiinhee'ppedaamby hajxy, ja'a hajxy hänajty tøø quiümüäbä.” Coö ja'a Jesús ja'a tiocy jaduhñ quia'a jaançh tøjjäxä, coö jaduhñ jiaançh cuuma, tøjiajt ja'a Diosmädia'agy jaduhñ.

38 Tu'ugä jäya'ay hänajty jim chooñ Arimatea. José hänajty xiøhaty. Hamee'ch ja'a Jesús hänajty miøødnimiägu'ughadyii. Chähgøøbiä José ja'a judíos hänajty. Paadiä Jesús hänajty hijxwiinduum quia'a møødwädityii. Mänitä José ja'a cuhdujt hoy yajpädsømy maa ja'a Pilatän coö ja'a Jesús yajmänaca'añ cruzçøxp. Mänitä Pilato ja'a cuhdujt jiaançh yejcy. Mänitä José ja'a Jesús yajmänajcy cruzçøxp.

39 Mänitä Nicodemo ja'a perfume miämejch hii'xmajc kilo. Mäyäbicø'øy miämejch møødä mirra møødä áloes. Tøø hänajty jiegø'øy coö ja'a Nicodemo hänajty tøø yhuug hoobiä coods maa ja'a Jesúsän.

40 Mänitä José ja'a Jesús hajxy ñähbijty møødä Nicodemo. Jiibiä perfume hajxy yajmänähbidøøyy. Jaduhñsä judíoshajxy hänajty quiuhdujthaty. Perfumemänähbidø'øy ja'a ho'ogyjiäya'ay hajxy hänajty yajnaaxtägø'øy.

41 Jimä olivocam hänajty tu'ug mäwiingón maa ja'a Jesús hänajty tøø miøjpahbedyijän. Jiibiä tsaajut hänajty tu'ug olivocamjooty wiinmøjtuum. Naamba'ay ja'a tsaajut hänajty. Cahnä ho'ogyjiäya'ay hänajty jiiby piädaactsooñiinä.

42 Ja'a judíoshajxy, tsuu ja'a pìoo'xxiøø hajxy hänajty yajtsohnda'agy. Cab hajxy hänajty quiuhdujthaty coö hajxy tii tiúnät ja'a poo'xxiøøjooty. Ja ween ja'a poo'xxiøø hänajty quia'a habaady, paadiä Joséhajxy quia'a näbaadøøyyä coö hajxy hoy jäguem cu yajnaaxtägøøyy. Paady hajxy jimä ñä'ä pädaacy tsaajutjooty ja'a olivocamjootypä.

20

1 Cumaaxc, näxøø hänajty je'e. Mänitä María Magdalenahajxy jim ñøcxy maa ja'a tsaajutän, maa ja'a Jesús hänajty tøø ñaaxtägø'øyän. Cahnä hänajty hoy jiajjo'øgyñä. Coodsjuøøbyñä hänajty. Mänit hajxy yhiijxy coö ja'a tsaajut jim tøø jiøwa'açh juthaguuy.

2 Coö ja'a María yhiijxy coö ja'a tsaajut quia'a jimän juthaguuy, mänit wyiimbijty päyø'øguiä. Mänitä Simón Pedrohajxy piaatä chaadsä Jesús ja'a miägu'ughajpä, ja'a Jesús hänajty jiaançh tehñ chojpiä. Mänitä María miänaañ:

—Tøø ja'a nWiindsønhtëjtäm hajxy xyajpädsøømäm tsaajutjooty. Cab højts nnajuø'øy pämaadä hajxy tøø piäda'agy.

3 Coö ja'a Pedrohajxy jaduhñ miädooyy, mänit hajxy jim ñøcxy päyø'øguiä maa ja'a tsaajutän. Mänitä María jadähooc pianócxumbä.

4 Mänitä Pedro yhøxpäyø'cä. Jayøjp ja'a Pedro jiamiøød jim miejch maa ja'a tsaajutän.

5 Mänitä jimby quiuwoodsøøyy tsaajutjooty. Mänitä wit yhiijxy coö jimby yhoħna'ay jutjooty. Pero cab jimby tiehñ tiägøøyy. Nä'ä cuhixøøyy jaduhñ.

6 Mänitä Simón Pedro høħhaam jiaac mejch. Tu'uda'aquiä jimby tiägøøyy tsaajutjooty. Jaduhñä wit yhiixpä coö jimby yhoħna'ay.

7 Mänitä paayyä yhiijxy, ja'a Jesús hajxy hänajty tøø yajcuhmäguítiäbä. Hawiing hänajty jim ñe'na'ay.

8 Mänitä Pedro jiamiøød piädägøøbiä, ja'a hänajty jayøjp tøø miéchäbä. Mänitä paayyä yhiixpä coö hawiing ñe'na'ay. Paady jaduhñ miäbøjcy coö ja'a Jesús hänajty tøø jiuypioçy.

9 Cahnä Diosmädia'agy hajxy hänajty hoy wyiinjuø'øyñä ja'a jecypä maa jaduhñ myiñän coö ja'a Jesús hänajty jiuypioçga'añ coö hänajty tøø yho'ogy.

10 Mänitä Pedrohajxy wyiimbijnä, ñøcxnä hajxy maa ja'a tiøjc-hajxiän.

11 Tøø ja'a María hänajty piämèjtscumbä høħhaam maa ja'a tsaajutän. Coö ja'a Pedrohajxy wyiimbijnä, mähmøøyy ja'a María jim nidiuhñ. Wi'i jiøøby hänajty. Mänitä jimby quiuwoodsøøguiumbä tsaajutjooty.

12 Mänitä Diosmoonsä metsc yhijsy, ja'a tsajpootyptsohm̄bä. Haagä nähboobwit hajxy hänajty. Jiiby hajxy hänajty yhäña'ay maa ja'a Jesús hänajty t̄øø wyijtsna'ayän. Tu'jäya'ay hänajty yhäña'ay maa ja'a Jesús ja'a quiopc hänajty t̄øø quioonna'ayän. Y tu'jäya'ay hänajty yhäña'ay maa ja'a Jesús ja'a tiocy hänajty t̄øø quiajpna'ayän.

13 Mänitä María miäyajt̄øøwa:

—Muuxy, tii coo mwi'i jiø'øy.

Mänitä María yhadsooyy:

—T̄øøchä nWiindsõn hajxy xyajpädsõm̄ä. Pämaadä hajxy t̄øø piäda'agy.

14-15 Tuunä María jaduñ ñä'ä hadsooyy, mänitä wia'wiimbijty. Mänitä Jesús yhijsy. Jim̄ hänajty tiäna'ay; pero cab jaduñ yhøxcajpy. Olivocam̄güendähajpä je'e yhajoodhajt. Mänitä Jesús miänaañ:

—Muuxy, tii coo mwi'i jiø'øy. Põn mhøxtaaby.

Mänitä María yhadsooyy:

—Tsäguhm̄, pø miich t̄øø myajpädsõmy, hõøch hawáañäc maa t̄øø mbäda'agy nébiøch häyaa nõcxy nyajpädø'øgy.

16 Mänitä Jesús yhadsooyy:

—¡María!

Tuunä María jaduñ ñä'ä nämaayyä, mänitä wyiinhee'ppejty. Mänitä yhøxcajpy coo je'e Jiesúsä. Mänitä jaduñ miänaañ hebreohayuuc-haamby:

—¡Raboni! —je'e jaduñ ñänøømby “Wiindsõn.”

17 Mänitä María ja'a Jesús jia mats jia mäneñaañ. Mänitä Jesús miänaañ:

—Ca'açh xmiach. Cáhnøch jim̄ nhoyñä maachä nDeediän. Nõcxhøchä njamiøødhajxy hawáañäc cooçh jim̄ nnøcxa'añ maaçhä nDeediän, maaçhä nDiosän. Jaaná je'e mijts mDeedyhajpä mDioshajpä.

18 Mänitä María ja'a Jesús ja'a jiamiøødhajxy hoy jiaançh näma'ay:

—T̄øøch je'e nhixy, ja'a hajxy nWiindsõnhájtämbä.

Mänit hajxy cõjx yhawáañäxä nebiaty ja'a María hänajty t̄øø ñäma'ayii.

19 Coø quioodsõñä, mänitä Jesús ja'a jiamiøødhajxy ñiyhagøøyyänä. Hix, chähgøøby ja'a judíos hajxy je'e hänajty; paady hajxy ñiyhagøøyyä. Mänitä Jesús jiiby ñäguex̄t̄øø'xy haguyc hawa'ads. Mänitä Jesús miänaañ:

—Mäguieppe hajxy. Ca'a hajxy tii mdajy mmay.

20 Mänitä Jesús yajcähxø'cy ja'a quiø'øjoot møødä quiaaachhac maa hänajty t̄øø jiotiän. Coø hajxy yhijsy, mänit hajxy ñajuøøyy coo je'e Jiesúsä. Mänit hajxy xioondaacy.

21 Mänitä Jesús miänaañ:

—Ca'a hajxy tii mdajy mmay. Nébiøchä nDeedy t̄øø xwyiinguex̄iän, jaaná jadúhñhøch mijts nwiinguexaam̄bä.

22 Mänitä Jesús ñäbäxujy ja'a jiamiøødhajxy. Mänitä miänaañ:

—Wiingpøc ja'a Dioshespíritu hajxy.

23 Hõøch mijts ja'a mäjaa nmo'owaamby. Põnjaty mijts mhawáañäp coo Dios ja'a piojpä quiädieyhajxy t̄øø yajnähwa'açh, pues tøyhajt jaduñ coo Dios t̄øø yajnähwa'açh. Põnjaty mijts mhawáañäp coo Dios t̄øø quia'a yajnähwa'açh, pues tøyhajt jaduñ coo Dios t̄øø quia'a yajnähwa'açh.

24 Majmetscjäya'ay ja'a Jesús hänajty t̄øø miøødwädity. Tu'ug hänajty xiøhaty Tomás, ja'a hajxy hänajty ñänøøm̄biä “Hametsc-huong.” Mänaa ja'a Jesús ñäguex̄t̄øø'xtsooñän jayøbajt, cabä Tomás hänajty jim̄.

25 Mänitä Tomás ñämaayyä ja'a jiamiøødhajxy:

—T̄øø hõjts nhixy, ja'a hajxy nWiindsõnhájtämbä.

Mänitä Tomás miänaañ:

—Mänítøch nmäbögät cooch ndehm yhíxät pø jaančh jot ja'a quiø'ø, coochä ngø'ø jiiby nhuuc tehñ piädá'agät maa ja'a quiaačhmøjc jiütän. Pø cabä, cábøch jaduhñ nnä'ägä mäbögät.

²⁶ Cuductujxøø, jiibiä Jesús ja'a jiamiøødhajxy hänajty tøgóotiägumbä. Jiibiä Tomás hänajtypä. Tøø ja'a tøjc hajxy hänajty yhagóøguiumbä. Mänitä Jesús jiiby ñäguehxtøø'xcumbä haguyc hawa'ads. Mänitä miänaañ:

—Mäguieppe hajxy. Ca'a hajxy tii mdajy mmay.

²⁷ Mänitä Tomás ñämaayy:

—Tehñ quiudsiiwø'øw yø'ø mgø'ø yaaby ngø'øjóotyhøch maa ja'a clavohaawän. Híjxägøch hádaa ngø'ø. Päda'ag yø'ø mgø'ø yaaby ngaáčhmøjc-høch. Miičh, caj miičh hijty mmäbøcy. Chaačh miičh nnämä'awät coo mmäbögät.

²⁸ Mänitä Tomás yhadsooyy:

—Miičhhøch nWiindsøñhajpy, nDioshajpy.

²⁹ Mänitä Jesús miänaañ:

—Coočh miičh tøø xyhixy, paady jaduhñ mmäbøcy. Jootcuyc hajxy je'e, ja'a hajxy tøø miäbøquiäbä, hóyhøch hajxy je'e tøø xquia'a ja hixy.

³⁰ Madiu'u ja'a Jesús ja'a hoy-yagjuøøñjätypä yajcähxø'cy ja'a jiamiøødä wyiindu-umhajxy. Cab yam cøxiä quiujaayä hádaa librocøxp. Cujwa'xy je'e yam quiujaayä.

³¹ Paady yam quiujaayä neby hajxy jaduhñ mmäbögät coo Jesús ja'a Dios Tieedyhaty, coo Jesús je'e Miesíashaty, coo ja'a Dios jaduhñ tøø quiexy. Coo ja'a Jesús ja'a miädia'agy hajxy mmäbøjcät, mhídäp hajxy jim tsajpootyp cøjxta'axiøø.

21

¹ Jadähooc ja'a Jesús yhíjxägumbä ja'a jiamiøødhajxy jim mejypia'a ja'a xøhajpä Tiberias.

² Jimä Simón Pedrohajxy hänajty møødä Tomás, ja'a hajxy hänajty ñänøømbiä “Hametsc-huang”, møødä Natanael ja'a Caná de Galilea tsohmä, møødä Zebedeo yhuunghajxy, møød hajxy jaac nämetspä. Haagä Jesús ja'a jiamiøødhajxy jaduhñ.

³ Mänitä Simón Pedro miänaañ:

—Nøcxy nhuuc jaac hacxmach.

Mänitä jiamiøødhajxy miänaañ:

—Ween hajxy nnócxäm.

Mänit hajxy jiaančh nøcxy mejypia'a. Mänit hajxy biarcotägøøyy. Mänit hajxy hoy jia hacxmadsa'añ. Tu'tsuhñ hajxy jaduhñ jia wädiyty. Pero cab hajxy tii ñä'ägä paaty.

⁴ Coo jioböøyy, jimä Jesús hänajty tiäna'ay pu'uwiing. Pero cabä Jesús yhøxcajpä ja'a jiamiøødhajxy.

⁵ Mänitä Jesús miänaañ:

—Mägu'ughajpädøjc, nej, cab hajxy tii tøø mnä'ägä paadiä.

Mänit hajxy yhadsooyy:

—Joom mägu'ughajpä, cab højts tii tøø nnä'ägä paady.

⁶ Mänitä Jesús miänaañ:

—Päda'ag yø'ø mdsaay hajxy jimhaamby ja'a barcohahooyhaampiä pa'ahaam. Mänit hajxy jaduhñ mbáadät.

Mänitä chaay hajxy jim jiaančh pädaacy. May ja'a hacx hajxy jiaančh tehñ yaghadujcy. Cab hajxy hänajty miaya'añii coo ja'a tsaay hajxy hänajty jia wijtspädsøma'añ nøøjooty.

⁷ Mänitä Pedro ñämaayyä ja'a Jesús ja'a jiamiøød, ja'a Jesús hänajty jiaančh tehñ chojpiä:

—jJa'a nWiindsøñhajtämhajxy yø'ø!

Tuunä Pedro jaduhñ ñä'ä mädooyy coo je'e Jiesúsä, mänitä wyitpägøøyy. Høxyø'øhuungmøød hajxy hänajty yhacxmach. Mänitä quiuhtøpxnajxy nøøjooty. Nøcxaamb hänajty pu'uwiing maa ja'a Jesúsän.

⁸ Ja'a jiamiøødhajxy, jiīby hajxy miähmøøyy barcojooty. Mejypia'a mäwiingón hajxy hānajt̄y yhacxjoomy. Jaduhñäda'a ja'a mejypia'a hajxy hānajt̄y tøø ñāhgue'egy mägo'xmetro. Hujts ja'a tsaay ja'a hacx hānajt̄y miøødä. Mānitä tsaay hajxy pawich yajnøcxy mejypia'a barcojooty.

⁹ Mānit hajxy biarcopädsøømy. Mānitä juhñdy hajxy yhījxy coo jim̄ wyi'i tiøy pu'uwiiing. Jim̄ä Jesús hānajt̄y yhacxtsa'ay. Jim̄ä tsajcaagy hānajt̄y yajcoonna'ay.

¹⁰ Mānitä Jesús miānaañ:

—Māmín ja'a hacx hajxy mejtstägøøg, ja'a hajxy tøø mmächäbä.

¹¹ Mānitä Pedro tiägøøguiumbä barcojooty. Mānitä tsaay pawich yajmejch mejypia'a. Mägo'x cu juxychägui'xmajtägøøg ja'a hacx hānajt̄y jiīby tsaajiooty, haagä majatypä. Hujts ja'a tsaay hānajt̄y, pero cabä hacx yajcøø'ch.

¹² Mānitä Jesús miānaañ:

—Miñds hajxy cay.

Cab hajxy miäyajtøøyy pøn je'e. Tøø hajxy hānajt̄y yhøxcapy coo je'e Jiesúsä.

¹³ Mānitä Jesús ja'a jiamiøød ja'a tsajcaagy hajxy miooyy møødä hacxtsa'ay.

¹⁴ Miädägøøghoocpä ja'a Jesús hajxy hānajt̄y tøø yhīxy mānaa hānajt̄y tøø jiuypioquiän.

¹⁵ Coø hajxy quiaabiädøøyy, mānitä Jesús ja'a Simón Pedro ñāmaayy:

—Simón, Juan miich mdeedyhajpy. Pønñhøchäda'a xmiaas tsojp, yø'ø njamiøødhajtäm o miich.

Mānitä Pedro yhadsooyy:

—Mnajuøøby miich cooch miich njuø'øy nebiä hajch nebiä puhya'ayän.

Mānitä Jesús miānaañ:

—Yaghójcägøchä nmeeghuunghajxy.

Ca'a mieeghuungä ja'a Jesús jaduññ tiehm̄ ñänøøm. Je'eduhñ ñänøøm coo ja'a Simón Pedro ja'a jäya'ayhajxy yajnähixø'øwät, ja'a Jesús ja'a miädia'agy hajxy panøcxbä.

¹⁶ Mānitä Jesús miānaañgumbä:

—Simón, nej, xchójpøch miichä.

Mānitä Pedro yhadsooyy:

—Mnajuøøby miich cooch miich njuø'øy nebiä hajch nebiä puhya'ayän.

Mānitä Jesús miānaañ:

—Cueendähajtägøchä nmeeghajxy.

¹⁷ Ja'a miädägøøghoocpä ja'a Simón Pedro ñāmáayyägumbä:

—Simón, nej, jaduññch xjwiø'øya nebiä hajch nebiä puhya'ayän.

Mānitä Pedro jiootmadiägøøyy coo miäyajtøøwa ja'a miädägøøghoocpä.

Mānitä Pedro yhadsooyy:

—Cøxiä miich mnajuø'øy. Mnajuøøby jaduññ cooch miich njuø'øy nebiä hajch nebiä puhya'ayän.

Mānitä Jesús miānaañgumbä:

—Pues, yaghójcägøch ja'a nmeeghajxy.

¹⁸ Tehm̄ tiøyhájtøøch miich chaa nnämä'awät, coo hijty mdsucywiajyhatyñä, hamdsoo ja'a mwit hijty mbägø'øy. Mwädījp hijty maa ja'a mjoot hijty choquiän. Pero coo hānajt̄y tøø mmäjaanä, mānit mgø'ø mxajtøwa'añ. Mānitä wiinghāna'c ja'a mwit xyajpägø'øwa'añ. Mānit xyajñøcxa'añ maa ja'a mjoot hānajt̄y quia'a tsoquiän.

¹⁹ Paadiä Jesús jaduññ miānaañ nebiä Pedro jaduññ ñajuø'øwät neby hānajt̄y yagho'oga'añii, nebiä Dios ja'a miäjaa jaduññ yajcähxø'øgät ja'a Pedrocøxpä. Mānitä Jesús ja'a Pedro ñāmaayy:

—Jam̄ hajxy wädījtäm.

²⁰ Mānitä Pedro quioowiimbijty. Mānitøch xyhījxy coochä Jesús hānajt̄y nbanøcxpä. Høøch, Juánghøch høøch. Høøchä Jesús hijty xjiaanñch tehñ chojp. Høøch je'e hāñaayy

ja'a Jesús ja'a ñähmøjc mänaa højts ndsuugayyän. Høøch jaduhñ nyajtøøw: “Wiindsón, pøñ miičh jaduhñ xyegaamb.”

²¹ Coočhä Pedro xyhijxy, mänitä Jesús miäyajtøøyy:

—Wiindsón, yø'øya'ayäts, nej yø'øya'ay jiada'añ.

²² Mänitä Jesús yhadsooyy:

—Ca'a myiičhä mgüeentä yø'ø pø chójpiøchä njoot jaduhñ coo yø'øya'ay hänajty jiiinä coočhä ngädaactägätsät. Pero miičh, panøcxägøch ja'a nmädia'agy.

²³ Mänitä mädia'agy jii wiädiyty maa ja'a jäya'ayhajxiän ja'a Diosmädia'agy hajxy panøcxpä cóogøch tyijy nga'a ho'oga'añ. Pero cabä Jesús jaduhñ miänaañ cóogøch nga'a ho'oga'añ. Nøm jaduhñ miänaañ: “Ca'a myiičhä mgüeentä yø'ø pø chójpiøch ja'a njoot jaduhñ coo yø'øya'ay hänajty jiiinä coočh ngädaactägätsät.”

²⁴ Høøch, Juánghøch høøch. Tehm tiøyhájthøch jaduhñ tøø nhixy nébiøch chaa ngu-jaayän. Ñajuøøbiøchä njamiøødhajxy coočhä tøyhajt nmøødä.

²⁵ Madiu'u ja'a Jesús jaduhñ jiaančh tuuñ. Cábøch yam cøxiä tøø ngujaay. Cooch häxøpy cøxiä tøø ngujaay, cabä ndijy hädaa naaxwiimbä miädøyhädät. Amén.

Hechos

¹ Mägu'ughajpä Teófilo, mänáajøch miich jayøbajjt nnäjaayø'øyän, mänítøch ngøxy cu-jahy nebiatiä Jesús yaa wiädiyty hädaa yaabä naaxwiin, møød nebiaty yajnähiøøyy,

²⁻⁴ mänaa jaduñ tiägø'øyän wädiypä høxtä coonä hänajty ñøcxtägatsa'añ tsajpootyp. Cahnä Jesús hänajty yho'ogyñä, tøøyyämä jiamiøød hänajty wyiinguexy coo miädia'agy yajwá'xäxät wiinduhmyhagajpt. Coo Jesús yho'cy, mänit jiuypiojtägajch. Coo Jesús jaduñ yhiixä ja'a jiamiøødhajxy, jaduñä tøyhajt hajxy miøødhajty coo Jesús hänajty tøø jiaanç juyypiojtägach. Coo Jesús jaduñ jiuypiojtägajch, mänitä jiamiøød jiaac møødwädiyty juxychägui'xxøø. Jaduñä Jesús hänajty yajnähiøø'øy coo Dios hajxy xyhanéhäm ja'a miøcmäjaahaam. Coo juxychägui'xxøø yhabejty, mänitä Jesús ja'a jiamiøød miøødhamugøøyy maa tun hänajty xiøhatiän Olivostún. Mänitä Jesús tiägøøyy hanehmbä ja'a Dioshespíritu miäjaahaam. Mänit miänaañ:

—Coo hajxy jim mnøcxtägátsät Jerusalén, cab hajxy jim mdsøhndägátsät. Jim hajxy jaduñ mjøbhíxøt cooçh mijtsä nDeedy ja'a yhEspíritu xyajnäguexät nej mijts tøø nnäma'ayän. Tøøch mijtsä nDeedy xyhuuc yajwiinwaañøøbiä coo hajxy jaduñ xya-jnäguexa'añ.

⁵ Ja'a Juan, nøøhaam hijty miäyajnäbety. Tøyhajt jaduñ. Pero jaboom juxtøpc mijtsä Dios ja'a yhEspíritu xjiaanç yajnäguexa'añ. Ja'a yhEspirituhaam hajxy jaduñ xya-jnäbeta'añ —nømä Jesús ja'a jiamiøød ñämaayy, ja'a hajxy hänajty tøø yhamugó'øyäbä.

⁶ Mänitä Jesús miäyajtøøwä:

—Wiindsøn, nej, jaduñ miich tøø mwiinmahñdyhatiä coo højtsä nmädsip mga'a yajmäjädáacnädä, højts judíos, møød coo højtsä nhamdsoo mägunaax ngobiernähájnät.

⁷ Mänitä Jesús yhadsooyy:

—Ja'a nDéedyhøçhä tøyhajt møød mänaa jaduñ yajtøjiada'añ nej mijts myajtøyyän. Je'e cuhdujt nidiuhm møød coo jaduñ yajtøjiädät. Pero mijts, caj yahixø'øy coo mijtsä tøyhajt mmøødhädät.

⁸ Coo mijtsä Dioshespíritu xñägädá'agät, mänitä mäjaa hajxy xmio'owa'añ. Mänítøch hajxy jim xmiädiá'agät Jerusalén cooçh tøø njuypiojtägach, høyhøch hänajty tøø nja ho'ogy. Møød jim hajxy xmiädiáacpät Judea-naaxooty, møød jim Samaria-naaxooty, møød jim wiinduhmyhagajpt høxtä mäduhñtiä cajpt quiugøxø'øyän.

⁹ Mänitä Jesús miädiaacpädøøyy. Jimä Jesús hänajty wyiinhee'ppedyii ja'a jiamiøødhajxy, mänitä Jesús nä'a nägoobä chajpejty. Mänit hoy tiägø'øy jocjooty. Mänitä Jesús yhi-jxtägooyy ja'a jiamiøødhajxy.

¹⁰ Jim hajxy hänajty chajheebynä, mänitä jäya'ayhajxy metsc ñäguehxtøø'xy jim maa Jesús ja'a jiamiøødä wyiinduuhajxiän. Nähboobwit hajxy hänajty nämetsc.

¹¹ Mänitä Jesús ja'a jiamiøødhajxy ñämaayyä:

—Mägu'ughajpädøjc, jim hajxy mdsooñ Galilea maa Jesús chooñän. Mijtsä mmägunaax yøø. Quipxy hajxy hijty mmøødwädity. Ca'a hajxy mwi'i yuugheebý. Ca'a hajxy mwi'i tiajy mwi'i miay. Tøø Jesús jaduñ ñøcxnä tsajpootyp. Pero coo yhabaadät, mänit jaduñ wyiimbijtagatsa'añ neby hajxy tøø mhixnøcxian.

¹² Mänitä Jesús ja'a jiamiøødhajxy jim chohñ maa tun hänajty xiøhatiän Olivos. Mänit hajxy ñøcxy Jerusalén. Tu'kilómetro hänajty jiäguemä.

¹³ Jue'e Jesús ja'a jiamiøødhajxy hänajty xiøhaty: Pedro, Juan, Andrés, Felipe, Tomás, Bartolomé, Mateo, Simón ja'a Celote, møødä Judas. Nämetsc hajxy hänajty xiøhaty Santiago. Judas ja'a piuhya'ay je'e ja'a tu'jäya'aybä. Alfeo ja'a Judas ja'a tieedyhajxy hänajty xiøhaty.

¹⁴ Naxy hajxy hānajtŷ yhamugø'øy Diospa'yaaxpä nägøxiä, näguipxy møødä Jesús ja'a tiaj María, møødä Jesús ja'a piuhya'ayhajxy, møødä to'oxiøjc-hajxy, ja'a Jesús hānajtŷ quipxy tøø piawädityijäbä.

¹⁵ Cujaboom cumaaxc, mänitä mǎbøjpädøjc-hajxy yhamugøøyy. Nämägo'x-cu-ii'x hajxy hānajtŷ. Mänitä Pedro tiānaayø'cy. Mänit miānaañ:

¹⁶⁻²⁰ —Mägu'ughajpädøjc, jéquiänä David quiujahy salmosjooty ja'a Judascøxpä, nebiatiä Dioshespíritu ñajtsapxøøyyä: Pactsacä tiøjc jiada'añ; caj pøn jim chāna'awaanä. Ja'a Judas ja'a tiøjc jaduhñ nānøømāxä. Jaduhñ jim miānaambä coogä Judas wiingjäya'ay hānajtŷ ñāhduundu'uda'añii. Jaančh tøjiajt jaduhñ ja'a Judascøxpä nebiatiä David jecy quiujahyyän. Näguipxy højtsä Judas hijty xmiøødwädijtäm. Näguipxy højts hijty xmiøødtuunmújcam. Mänitä Judas wyiinmahñdyhajty coo Jesús ñāhdúgät. Mänitä Judas ja'a jäya'ay wioomejch maa Jesús hānajtŷ, ja'a Jesús hajxy hānajtŷ madsaambä. Coo Judas jaduhñ haxøøg jiatcøøyy, mänit miājuuyy. Mänitä naax hoy jiuuy. Mänit hoy quiuhgahnaxŷ cuhmānac. Coo mioxtsäbijty, mänitä tyiinčh yhøxhānøømbädsøømy. Coo jäya'ayhajxy jaduhñ miädoyhajty, ja'a hajxy hānajtŷ jim tsānaabiä Jerusalén, coo ja'a Judas hānajtŷ tøø yho'ogy, mänitä naax hajxy yajxøbejty Acéldama, ja'a Judas hānajtŷ tøø jiuuyäbä; jaduhñ miädia'agytiägø'øy yhamdsoo hayuuc-haambyhajxy, Nø'ñaax.

²¹⁻²² 'Jii højtsä nmägu'ughajpähajtäm, näguipxy hajxy tøø xmiøødwädijtäm mānaa Jesús hijty jiijän, mānaa Juan ja'a Jesús yajnābetiän, høxtä coo Jesús chajpejty cøxp. Hahixøøby jaduhñ coo hajxy tu'jäya'ay nwiinguéjxāmät, ja'a Judas nāhduundu'udaambä. Näguipxiä mädia'agy hajxy xmiøødyajwá'xāmät coo Jesús tøø jiuypioøcy —nømä Pedro miānaañ.

²³ Mänitä jäya'ay metsc ñānøømā. Tu'ug hānajtŷ xiøhaty Matías. Jatu'ugpä, tægøøgtu'u hānajtŷ xiøhaty: José, Barsabás, Justo.

²⁴ Mänitä Pedrohajxy tiägøøyy Diospa'yaaxpä:

—Teedy, miičh mnajuøøby neby højts nägøxiä nwiinmahñdyhatiän. Højts hawāanäc mädyii miičh tøø mwiimbiy hädaahajxy nāmetspä,

²⁵ mädyiibä Judas jaduhñ nāhduundú'udāp. Coo Judas jaduhñ quiädiehy, paadiä tiuunŷ yajtāgooyy. Paady jiihy yhädaacy haxøøgtuum —jaduhñä Dios hajxy pia'yaaxŷ.

²⁶ Mänit hajxy yhäyø'cy suertehaam mädyii hānajtŷ tuunŷtægø'øwaamb. Mänitä Matías piaatä. Mänitä Matías hajxy quiumaayy, ja'a hajxy hānajtŷ nāmajtu'ugpä.

2

¹ Coo Pentecostés-xøø yhabaaty, mänitä mǎbøjpädøjc-hajxy nägøxiä yhamugøøyy.

² Jiiby hajxy hānajtŷ tøgooty yhäña'ay. Mänit hajxy miädooyy nebiä poj yhamuuyän coo møc piojy. Cøxp jaduhñ chohñdaacy. Møc jiiby yhawaanndsøøyy tøgooty.

³ Mänit hajxy nägøxiä ñägādaacä hanidiuhmjaty ja'a Dioshespíritäm. Jaduhñ hānajtŷ quiāhxø'ogy nebiä tootsän, nebiä jøønhaayän.

⁴ Mänit hajxy nägøxiä yhadägøøyyä jioottägøøyyä ja'a Dioshespíritäm. Mänit hajxy tiägøøyy mädiaacpä wiinghayuucjaty. Ja'a Dioshespíritu hānajtŷ jaduhñ yajmädiaacp.

⁵ Tøø judíoshajxy hānajtŷ nāmāy miech Jerusalén xøøhajpä. Wiinduhmyhagajpt hajxy hānajtŷ chooñ. Paady hajxy miejch Jerusalén xøøjooty, quiudiunaambiä quiuhdujt hajxy hānajtŷ jaduhñ neby hajxy hānajtŷ quiuhdujthatiän.

⁶⁻⁷ Coo judíoshajxy miädooyy coo poj hānajtŷ møc yhamuuy jiihy tøgooty maa mǎbøjpädøjc-hajxy hānajtŷ tøø yhamugø'øyän, mänitä judíoshajxy jiihy tiøjtägøøyy. Coo judíoshajxy jaduhñ miädooyy coo mǎbøjpädøjc-hajxy hānajtŷ quiapxy miädia'agy wiinghayuucjaty, mänitä judíoshajxy wyiinjuøøyy yhamdsoo hayuuc-haamby neby hajxy hānajtŷ miädia'aguiän majaty hajxy hānajtŷ chooñ wiinduhmyhagajpt. Coo hajxy jaduhñ miädooyy, mänit hajxy jiaančh tehñ yagjuøøyy nägø'ø nādecypiä. Mänit hajxy ñiñāmaayyä:

—Yø'ø jäya'ayhajxy xiiby capxpä mädiaacpä, haagä Galilea yø'ø hajxy chooñ.

⁸ Tii hajxiäda'a coo tøø nmädóowäm nebiaty hajxy cøjwiinghayuuc tøø nmämín tøø nmäga'awóøyyäm.

⁹ Hix, wiinduhmyhagajpt hajxy ndsóhnäm, Partia, Media, Elam, Mesopotamia, Judea, Capadocia, Ponto, Asia,

¹⁰ Frigia, Panfilia, Egipto, møød jim Libia, Cirene mäwiingón. Høxtä Roma hajxy näje'e ndsóhnäm,

¹¹ møød Creta, møød Arabia. Näje'e hajxy judíos nmämín nmäga'awóøyyäm. Näje'e ja'a judíos quiuhdujt wyiinmahñdy hajxy tøø njøjpøgøøyyäm neby hajxy quiuhdujthatiän. Coø yø'ø Galileabä-jäya'ayhajxy jaduñ tøø quiapxy tøø miädia'agy wiinghayuucjaty nebiatiä Dios ja'a hoy-yagjuøñäbä tøø yajcähxø'øgy, jaduñ hajxy tøø nwiinjuøøyyäm ja'a nhamdsoo hayuuc-haamby cøjwiinduum —nømä judíoshajxy ñiñämaayyä.

¹² Coø judíoshajxy jaduñ wyiinjuøøyy ja'a yhamdsoo hayuuc-haamby, paady hajxy jiaanč tehñ yagjuøøyy nägø'ø nädecypiä. Mänit hajxy ñimiäyajtøøwä:

—Tii yø'ø jäya'ayhajxy coø quiapxy coø miädia'agy wiinghayuucjaty, yø'ø hajxy tsohm̄bä Galilea.

¹³ Mänit hajxy näje'e yhadsooyy xi'igy hanähaty:

—Múucäp hajxiäda'a.

¹⁴⁻¹⁵ Mänitä Pedrohajxy tiänaayyø'cy møødä jiamiøødhajxy ja'a nämajtu'ugpä, ja'a hajxy hänajty jaduñ Dioswiinguexypä. Mänitä Pedro møc tiägøøyy mädiacpä:

—Mägu'ughajpädøjc, nägøxiä hajxy njudíoshajtäm mäduhñtiä hajxy yaa nyajpáatäm, mäduhñtiä hajxy jäguem mdsooñ, møød mijts yaa tsohm̄bä Jerusalén. Näje'e mijts mmäna'añ cooc tyijy højts nmu'ugyii. Pero cab jaduñ tiøyyä. Cab jaduñ pøn yhu'ugy jopyñä.

¹⁶ Coø hajxy tøø mhixy tøø mmädoy coø højts tøø ngapxy tøø nmädia'agy wiinghayuucjaty, jaanč tøjiajt jaduñ nebiä Joel jecy quiujahyyän ja'a Dioscøxpä. Diosquexiä Joel hänajty. Jaduñä Joel jecy quiujahy:

¹⁷ Jaduñä Dios miänaañ: Coø hänajty yhabaadaañnä coø naaxwiimbä hänajty wyiimbidaañnä,

mäníthøchä nhEspíritu nguexa'añ maa jäya'ayhajxy nägøxiän, mäduhñtiä hajxy yaa yhity hädaa yaabä naaxwiin.

Y mijtsä mnøøx mmajc-hajxy, mäníthøchä nmädia'agy hajxy xyajwa'xaanä.

Ja'a høxcujc-häna'c-hajxy, hoy-yagjuøøñjätyhøch hänajty nyajwiinhixa'añ.

Jaana jaduñä majjäya'adiøjc-hajxypä, nyajcuma'awáambiøch hajxy hänajty hoy-yagjuøøñjäty.

¹⁸ Coø hänajty yhabaada'añ, mäníthøchä nhEspíritu nyajnäguexaambä ja'a nmoonsähajxy, ja'a ya'aybä, ja'a to'oxypä.

Mäníthøchä nmädia'agy hajxy xyajwa'xaanäbä.

¹⁹ Nyajcähxø'øgáambiøchä hijxtahñd hoy-yagjuøøñjätytä jim tsajtcøxp møød hädaa yaabä naaxwiin.

Hochähgøøñjätyhøch jaduñ nyajcähxø'øga'añ nebiä nø'tiän, nebiä jøønän, nebiä jøønjocän.

²⁰ Wiingoodsø'øwaambä xøø hänajty.

Ja'a po'o, tsapts hänajty yhana'añ nebiä nø'tiän.

Ja ween hänajty quia'a habaadyñä coochä naaxwiimbä nyajwiimbidaañnä, coochä nHuung Jesucristo yaa quiädaactägatsa'añ hädaa yaabä naaxwiin.

Mänitä jäya'ayhajxy nägøxiä yajtøyhajtyega'añii.

Jaduhñhøchä nmøcmäjaa hänajty nyajcähxø'øga'añ.

²¹ Pønjätiä Jesucristo hänajty capxpaadaamb, je'e hänajty hodium mähmø'øwaamb, nømä Dios miänaañ. Jim jaduñ myiñ maa Joel jecy quiujahyyän.

22 'Mijts israelitas, huuc hamädoowhit hajxy hoy. Mnajuøøby hajxy jaduhñ coo Dios ja'a Jesús ja'a Nazarettsohm̄bä wyiinguejxy coo jii tiúnät maa mijtsän. Madiu'u ja'a Jesús hijxtahñd yajcähxø'cy hoy-yagjuøøñajatypä maa mijtsä mwiinduumhajxiän.

23 Tøø Dios hänajty yajnähdiij coo mijtsä Jesús mmádsät. Mänitä cahwiindøyhänä'c hajxy hoy myajcø'ødägø'øy. Mänitä Jesús hoy miøjpahbedyii cruzcøxp. Mänit yho'cy.

24 Pero mänitä Dios ja'a Jesús yagjujypiøjtägajch. Jaduhñä Dios hänajty tøø miäna'añ coogä Jesús tsipcøxp jiuujypiøgät.

25 Hix, jaduhñä David jecy miädiaacy ja'a Jesúsøxpä:

Nnajuøøbiøch jaduhñ cooñ homiänaajä xpiuhbety.

Homiänáajøch jaduhñ xcwieendähaty, jaduhñhøch pøn xquia'a hadsähgø'øwøt.

26 Páadyhøch jootcujc njaanç tehñ ñijiäwø'øyii.

Páadyhøçhä Dios jootcujc nba'ya'axy.

Cábøçhä nho'og ndsähgø'øy je'eguiøxpä cooçhä njuøhñdy nbäda'agy maa Diosän.

27 Xyagjujypiøgáambøch miïch jaduhñ.

Cábøch miïch jiiiby jutjooty xyajmähmø'øwa'añ cooçhä jiiiby nbú'udsät,

je'eguiøxpä cooçhä miïch xyHuunghaty.

28 Xyagjugyhadáambøch miïch cøjxta'axiøø nej miïch homiänaajä mjogyhatiän.

Cooçhä miïch jaduhñ xmiøødhida'añ tehñgajnä, páadyhøch jootcujc nnijiäwø'øwa'añii.

29 Mänitä Pedro miänáangumbä:

—Mägu'ughajpådøjc, nmøødhájtämä tøyhajt hajxy jaduhñ coo David jaduhñ jecy quia'a nimiädiaacä hamdsoo. Hix, coo David jecy yho'cy, mänit hoy ñaaxtägø'øy. Jiiiby jaduhñ yhityñä jutjooty høxtä jäda'anäbaadyñä.

30 Coo David jaduhñ jecy miädiaacy, ñajuøøby hänajty jaduhñ coo yhapä yhoc hänajty tu'ug wyiinguexáanäxä ja'a Diósäm, møød coo hänajty yhane'emaambä nebiä David jecy yhanehmiän. Tøøyyämä Dios hänajty miäna'añ coo hänajty yajtøjiada'añ coo David ja'a yhapä yhoc hänajty tu'ug wiindsøn tiuna'añ.

31 Jaduhñä David tøyhajt jecy miøødhajty coo Dios ja'a wyiinguexypä yagjujypiøga'añ coo hänajty tøø yho'ogy, møød coo hänajty quia'a mähmø'øwa'añ jutjooty, møød coo ñi'xä quiopc hänajty jiiiby quia'a pu'uda'añ.

32 Ja'a Jesúsøxpä David jecy miädiaacy coo Jesús hänajty jiuujypiøjtägatsa'añ. Tøø højts nhamdsoo hixy coo jiaanç jujypiøjcy.

33 Mänitä Jesús jim miøjyaaxä maa Tieediä wyiinduumän. Mänit ñämaayyä coo jim yhøxtá'agät maa Tieediä yhahooyhaampiän. Mänitä Jesús jaa Tieediä yhEspíritu miooyyä nebiä Tieedy hänajty tøø yajwiinwaanø'øyijän. Mänitä Jesús ja'a Tieediä yhEspíritu yaghawa'xøoyyä. Je'e hajxy jaduhñ tøø mhixy tøø mmädoy.

34 Ja'a Jesúsäts jim miøjyaaxä tsajpootyp, ca'a Diavitä. Hix, jaduhñä David jecy miänaambä:

Ja'a høøçhä nWiindsøn, je'e jaduhñ nämaayyä ja'a Tiéediäm:

“Miñ yaa häña'aw maaçh nhahooyhaampiän.

35 Nmo'owáambøch miïch cuhdujt jaduhñ coo mmädsip mga'a yajmäjädá'agät.” Jaduhñä Dios ja'a yHuung ñämaayy.

36 Mänitä Pedro miänáangumbä:

—Jaduhñds je'e, ja'a Jesús, ja'a mijts mmøjpahbéjtäbä cruzcøxp, je'e ja'a Dios jaduhñ wyiinguejx coo hajxy nWiindsønñájtämät, coo hajxy xyajnähwáatsämät. Tøyhajt jaduhñ. Hahixøøby jaduhñ coo hajxy nägøxiä mmäbøgät ja'a Jesúsøxpä, mijts israelitas. Ca'a hajxy mga'a mabøcy —nømä Pedro miänaañ.

37 Ja'a jäya'ayhajxy hänajty jiiiby hamädoowhiipä, coo hajxy jaduhñ miädooyy, mänit hajxy tiägøoyy tajpä maabiä hoyhoy. Mänitä Pedrohajxy ñämaayyä møødä jiamioødtøjc:

—Mägu'ughajpådøjc, neby jaduhñ yahixø'øy højts ngudiúnät.

38 Mänitä Pedro yhadsooyy:

—Najtsnixø'øw ja'a mhaxøøgcuhdujt hajxy. Jøjpøgøøyyä ja'a Dios ja'a quiuhdujt hajxy. Näbet hajxy ja'a Jesucristocøxpä. Jaduhñä Dios ja'a mbojpa mgädieeybä hajxy xyajnähwäatsät. Jaduhñä yhEspíritu hajxy xmióobiät.

³⁹ Pønjataiä Dios ja'a nWiindsøn hájtämbä miøjyaaxyp, jé'egädsä piojpa quiädieeybä yajnähwäatsäxäp, jé'egädsä Dios yhEspíritu mio'owaamby, møød mijts, møødä mhap møødä mhoc-hajxy, møød pønjaty jäguem tsänaaby. Jaduhñ hajxy xyajwiinwaanøøyyäm —nømä Pedro miänaañ.

⁴⁰ Madiu'ujä Pedro jiaac mädiaacy. Mänit jiaac tehñ miänaañ:

—Yø'ø cahwiindøjia'ayhajxy, ca'a hajxy tehñgajnä mbahixy neby hajxy quiuhdujthatiän, coo hajxy jaduhñ mnä'ä padägöyyät —nømä Pedro miägäpaxy yhanehmy.

⁴¹ Mänitä Pedro miädia'agy miäböjçäxä nädägøøgmil-jäya'ay. Mänit hajxy hoy nägøxiä ñäbety.

⁴² Hamuumdu'joot hajxy hänajty miäböcy nägøxiä neby hajxy hänajty yajnähixø'øyiiän ja'a apóstoldøjçäm. Naxy hajxy hänajty yhamugø'øy tsajcaagyquiaamiujpä, møød hajxy hänajty Dyiospa'ya'axy. Tu'ugjoot tu'ugwiinmahñdy hajxy hänajty yhity. Hamiñ haxøpy hajxy hänajty ñibiuhbedyii.

⁴³ Madiu'ujä apóstoldøjçø hijxtahñd hajxy hänajty yajcähxø'øgy hoy-yagjuøøñäjaty. Jiaanç tehñ yagjuøøbiä mäböjpadøjç-hajxy hänajty neby hajxy hänajty yhiçiän.

⁴⁴ Tu'ugmädia'agy hajxy hänajty yhity mäduhñtiä hajxy hänajty miäböcy. Yajtuunmujpy hajxy hänajty tijaty hajxy hänajty miøød.

⁴⁵ Mänit hajxy nägøxiä tiägøøyy too'pä tijaty hajxy hänajty miøød. Pønjataiä xädø'øñ hänajty yajmaajiajp, mänitä xädø'øñ hajxy hänajty mio'oyii mäduhñjaty hajxy hänajty yajmaajiaty.

⁴⁶ Jabom-jabom hajxy hänajty yhamugø'øy maa møjtsajtøjçän Diospa'yaaxpä. Jootcuç hajxy hänajty quiaamiucy yhuucmucy maa yhamdsoo tøjç-hajxiän. Hojioot hajxy hänajty miøød.

⁴⁷ Wyiingudsähgøøbiä Dios hajxy hänajty. Møødä cu'ug hajxy hänajty wyiin-gudsähgøøbiä. Jabom-jabomä mäböjpadøjç-hajxy hänajty yajmayø'øyii ja'a Diósäm. Jaduhñ hajxy hänajty yajnähwa'açhii.

3

¹ Tu'ugxøøbä Pedrohajxy hänajty ñøcxy tsajtøgooty møødä Juan. Mänacyxiøø hänajty je'e. Jaduhñ hajxy hänajty quiuhdujthaty jabom-jabom coo hajxy mänacyxiøø Dyiospa'ya'axy.

² Jimä pa'amjäya'ay hänajty tu'ug yhäña'ay maa tsajtøghaawän. Tecymia'adä mähdiojç hänajty tøø myiñ tøø quia'ay. Jabom-jabom hänajty jim yajmeçhii maa tsajtøjçän xädø'øñyujwaambä. Jim hänajty jabom-jabom ñajtsähña'awø'øyii maa tsajtøghaawän, ja'a hänajty xøhajpä ja'a yajxonbä. Pønjaty hänajty jiiiby tægøøby, mänitä xädø'øñ hajxy hänajty miäyujwa'añii ja'a pa'amjäya'ay.

³ Coo Pedrohajxy hänajty jiiiby tiøjtägø'øwa'añ tsajtøgooty, mänit hajxy yhiçä ja'a pa'amjäya'ay. Mänitä xädø'øñ hajxy miäyujwaanä.

⁴ Mänitä Pedro ja'a mähdiojç ñaaxcuheebøøyy maa hänajty yhäña'ayän. Mänitä Pedro miänaañ:

—Højts wiinhee'ppéjtäc.

⁵ Mänitä Pedrohajxy jiaanç wiinhee'ppejtä. Jaduhñä mähdiojçä yhaa jioot hänajty yagjaty coo xädø'øñ hänajty mio'owa'añii.

⁶ Mänitä Pedro miänáangumbä:

—Cab højtsä xädø'øñ nnä'ä møødä tii højts miich nnä'ä mó'owäp. Pero ndunaamby højtsä mayhajt maa miichcøxpän. Jaduhñ højts miich nnäma'ay coo mbädø'øgät, coo

myo'oyó'ogät. Ja'a Jesucristocøxpä hõjts miich jaduñ nnäma'ay, ja'a hijty jim tsohm̄bä Nazaret.

⁷⁻⁸ Mänitä Pedro ja'a mähdiøjcä yhaoguiø'ø miajtsä. Mänitiä ja'a mähdiøjcä tiecy miøgøøyy møødä tiecy-yo't. Coø Pedro wyidsø'cy, mänitä pa'amjäya'ay tiøpxø'cy. Mänit yo'oyø'cy. Mänitä Pedrohajxy jiiby miøødtøjtägøøyyä tsajtøgooty. Tøpxäp júhyäp ja'a craa tiøjtägøøyy, ja'a hänajty tøø miøcpøquiäbä. Mänit tiägøøyy Dioscapxpaatpä.

⁹ Jiibiä jäya'ayhajxy hänajty nämay tsajtøgooty. Mänit hajxy yhiyxy coø craa hänajty yo'oy, møød coø Dios hänajty quiapxpaady.

¹⁰ Mänitä craa yhøxcäjpä coø hänajty je'e jie'ejä, ja'a hänajty jim tøø xiädø'õnyujwá'añäbä maa tsajtøghaawän, ja'a hajxy hänajty tyijpiä ja'a jaançh tehñ yajxonbä. Mänitä jäya'ayhajxy jiaançh tehñ yagjuøøyy nägø'ø nädecypiä coø craa hänajty tøø miøcpøcy.

¹¹ Jimä Pedrohajxy hänajty tiäna'ay maa hajxy hänajty tyijjiän Pórtico de Salomón, møødä Juan, møødä craa ja'a hänajty tøø miøcpøquiäba. Cabä Pedrohajxy hänajty piuhwa'adsa'añii. Mänitä jäya'ayhajxy jim ñøcxøøyy yagjuøøyyäp maa Pedrohajxy hänajty tiäna'ayän.

¹² Coø Pedro jaduñ yhiyxy coø jäya'ayhajxy hänajty yagjuø'øy, mänitä jäya'ay ñämaayy:

—Mägu'ughajpädøjc, israelitadøjc, tii hajxy jaduñ coø mwi'i yagjuø'øy. Tii hõjts jaduñ coø xwyi'i yheeby. Coø hädaa craa tøø miäbøcy ja'a Jesúsøxpä, paady jaduñ tøø yo'oyø'ogy, ca'a jie'eguiøxpä coø hõjts mäjaa nmøødä, ni quia'a je'eguiøxpä coø hõjtsä Dios hoy nwiingudsähgø'øy.

¹³⁻¹⁵ Jue'e hajxy jecy nhaphájtäm ndeedyháltäm, ja'a Abrahamhajpä, møødä Isaac-hajpä, møødä Jacobhajpä. Wyiingudsähgøøbiä Abraham ja'a Dios hajxy hänajty jegyhajty. Pero coø Dios ja'a yHuung Jesús yaa quiejxy hädaa yaabä naaxwiin, cab hajxy mwiingudsähgøøyy. Mänit hajxy hoy mmach. Mänitä tuungmøødpä hajxy hoy myajcø'ødägø'øy. Mänitä Pilato ja'a Jesús jia yaghøxmadsaanä. Pero mijts, caj mijts jaduñ mmänaañ coø Jesús yhøxmadso'øjät, hoyyä Jesús tii pojpä tii cädieey hänajty quia'a jagä møødä. Mänit mijtsä haxøøghäna'c mnä'ägä nähdujcy coø yhøxmadso'øjät, ja'a hänajty tøø jiäya'ay-yaghó'oguiäbä. Mänit hajxy mmänaañ coø Jesús yagho'ogø'øjät. Coø Jesús jaduñ yho'cy, xyajñähwáatsäm hajxy jaduñ; jaanä jaduñ hajxy xyagjugyhadáañäm cøjxta'axiøø neby je'e jiugyhatiän. Mänitä Dios ja'a Jesús yagjujyppiøjtägajch. Jaduñä Dios ja'a Jesús yajmøjtägøøyy. Coø Jesús hänajty tøø jiuujyppiøcy, mänit hõjts nhijxy, paady hõjts tøyhajt jaduñ nmøødä.

¹⁶ Hoorä, hädaa craa, mnajuøøby hajxy hijty coø hijty tiecymia'adä. Mhíjxnäp hajxy jaduñ coø tøø choocnä. Paady tøø cho'ogy coø tøø miäbøcy ja'a Jesúsøxpä, coø Jesús møcmäjaa miøødä, møødä møccuhdujt.

¹⁷ Mägu'ughajpädøjc, huuc mäadow hajxy. Nnajuøøbiøch jaduñ coø mijts hänajty mga'a najuø'øy coø Jesús Dyioswiinguexiä, paady hajxy myajyagho'cä. Ni ja'a mwiindsøñhajxy hänajty quia'a najuø'øy coø je'e Dyiosquexiä.

¹⁸ Jéquiänä Dios ja'a profetadøjc ñajtsapxøøyy coø Mesías hänajty tsipcøxp yho'oga'añ, ja'a Dios hänajty tøø wyiinguéxiäbä. Jaduñä profetadøjc-hajxy jiaançh cujahy. Y coø Jesús jaduñ jiaançh ho'cy, jaduñä Dios yajtøjajty neby hänajty jecy tøø miäna'añän.

¹⁹ Paadiä mhaxøøgcuhdujt hajxy mnajtshixó'owät. Jøjtägøøyyä ja'a Dios ja'a miädia'agy hajxy. Jaduñä Dios ja'a mbojpä mgädieeybä hajxy xyajñähwáatsät. Y jaduñä hoybä weenbä hajxy xmió'owät.

²⁰ Coø yhabáadät, mänitä Dios ja'a Jesús yaa quiejxtägatsa'añ hädaa yaabä naaxwiin, ja'a tøø wyiinguéxiäbä coø mijts xyajñähwá'adsät.

²¹ Cahnä yhabaady coø Jesús jim chohndägátsät tsajpootyp, coø yaa miänajtagátsät hädaa yaabä naaxwiin. Jim jaduñ yhida'aññä hõxtä coonä yhabáadät coø Dios

yaghoyøødiägätsät tijaty yaa hijp hädaa yaabä naaxwiin. Jaduhnä Dios ja'a profetadøjc jecy ñämaayy coo hajxy quiujáayät, ja'a Dios hänajty tøø wyiinguéxiäbä.

²² Hix, jéquiänä Moisés jaduhn ñämaayy ja'a nhaphájtäm ja'a ndeedyháltäm: “Tøøchä Dios xwyiinguexy coochä profeta ndúnät. Coo yhabáadät, mänitä Dios tu'jäya'ay wyiinguexa'añ, ja'a højts nmägünáaxäm. Jaduhn je'e tiunaambä profeta nébiøch nduñän. Nebiaty mijts xyhane'ema'añ, mgudiúunäbä miädia'agy hajxy.

²³ Pønjaty hänajty ca'a mabøgaamb, yajcuhdägoyyáanäp hajxy hänajty ja'a cú'ugäm”, nømä Moisés jecy miänaañ.

²⁴ Jaduhnä profetadøjc-hajxy jecy miädiaacy nägøxiä nebiaty jäda'ahaty jiadyii tiuñii, møødä Samuel, møød hajxy jaac túunäbä profeta.

²⁵ Ja'a hajxy jecy túunäbä profeta, mänitä Dios hajxy ñajtsapxøøyyä coo mijtsä Dios xñämaayy coogä Dios ja'a Mesías hänajty wyiinguexa'añ mijtsøxpä. Jaanä jaduhnduhmbä, jéquiänä Dios yajcuhdujcy møød højtsä nhaphájtäm møød højtsä ndeedyháltäm coo Mesías hänajty wyiinguexa'añ mijtsøxpä. Hix, jaduhnä Dios ja'a Abraham jecy ñämaayy: “Ja'a miichä mhapä mhoccøxpä tu'ug, jadúhnhøchä jäya'ay nägøxiä ngunuu'xa'añ wiinduhmyhagajpt”, nømä Dios jecy miänaañ.

²⁶ Y coo Dios ja'a yHuung yagjujyipiøjtägajch mänaa hänajty tøø yho'oguiän, mijts jayøjp xyajnäguejx. Paady mijts jaduhn xyajnäguejxy coo mijts jaduhn xquiunúu'xät, coo weenä mhaxøøgcuhdujt hajxy jaduhn nägøxiä mnajts hixø'øwät, —nømä Pedro miänaañ.

4

¹⁻² Jimä Pedro ja'a cu'ug hänajty miøødmädia'agyñä tsajtøgooty, mänitä teedyhajxy miädoyhajty møødä saduceodøjc coogä Pedro ja'a cu'ug hajxy hänajty yajnä hixø'øy coogä Jesús hänajty tøø jiujyipiøjtägach mänaa hänajty tøø yho'oguiän. Coogä Jesús jaduhn jiujyipiøjcy, jadúhñägä Pedro tøyhajt hajxy hänajty miøødä coogä ho'ogyjiäya'ayhajxy hänajty jiujyipiøgaambä. Coo teedyhajxy jaduhn miädoyhajty coogä Pedrohajxy hänajty jaduhn yajnä hixø'øy, mänitä teedyhajxy jiaanç tehñ jiootma'ty møødä saduceodøjc-hajxy, møødä tsajtøjcueendähajpä wyiindsøn hajxy. Mänitä Pedrohajxy ñämejtsä møødä Juan.

³ Mänitä Pedrohajxy hoy chumyii. Tøø hänajty chuujø'øy. Mänit hajxy jii by y hijty pujxtøgooty tu'tsuhñ.

⁴ Mänitä jäya'ayhajxy nämay miäbøjcy ja'a Jesúscøxpä, ja'a hajxy hänajty tøø miädóyyäbä nebiä Pedrohajxy yajnä hixøøyyän tsajtøgooty. Nämägøoxmil ja'a mabøjpädøjc-hajxy jaduhn jiajty, haagä ya'adiøjc.

⁵ Cujaboom, mänitä judíos wyiindsøn hajxy jim yhamugøøyy Jerusalén, møødä majjäya'adiøjc-hajxy, møødä cuhdujtyajnä hixøøbiädøjc-hajxy,

⁶ møødä Anás, ja'a hänajty tuumbä teedywiindsøn, møødä Caifás, møødä Juan, møødä Alejandro, møødä teedywiindsøn jiujy miägu'ughajxy.

⁷ Mänitä Pedrohajxy yajnøcxä møødä Juan jim maa judíos wyiindsøn hajxy hänajty tøø yhamugø'øyän. Mänitä Pedrohajxy piädaacä cujc. Mänit hajxy miäyajtøwä:

—Coo mijts hädaa craa tecymia'adpä tøø myajtso'ogy, pønä quiuhdujthaam, pønä miäjaahaam hajxy jaduhn myajtsoocy.

⁸ Haa ja'a Pedro, miøødä Dioshespíritu hänajty je'e. Mänitä Pedro miänaañ:

—Mijts cu'ugwiindsøn døjc, mijts majjäya'adiøjc,

⁹ mijts højts jaduhn xmiäyajtøøb neby højts hädaa mähdiøjc tøø nyajtso'ogy, hädaa hijty tecymia'adpä.

¹⁰ Huuc tunä mayhajt hajxy, huuc hamädoowhit hajxy weeñtiä neby højts cham nmädia'aga'añän maa mijtsä mwiinduumhajxiän. Jaduhnä tøyhajt hajxy nägøxiä mmøødhädät møødä israelitadøjc-hajxy nägøxiä neby hädaa mähdiøjc miøcpøjcy, hädaa

hijty tecymia'adpä, hädaa yaa tänaabiä mijtsä mwiinduum. Ja'a Jesucristo jaduñ ya-jmøcpøjc, ca'a yhøjtsä. Nazaret ja'a Jesucristo hijty chooñ. Mänit mijts myajmøjpahbejtä cruzcøxp. Mänitä Dios yagjujypiøjtägajch.

11 Jaduñ jim myiñ cujaay maa Diosmädia'aguiän: “Jaa tsaä mädyiibä tøjcojpadøjc-hajxy quia'a cumaayy, je'eds jaduñ jayøjp pädaactsoñä jim tøjteec.” Haa jaa Jesucristo, jaduñ je'e miäbaady nebiä tsaajän, ja'a jayøjp jim pädaactsóñäbä teectuum. Pero mijts, cab hajxy mgumaayy, paady hajxy myajyagho'cä.

12 Jaaya'ay hajxy jaduñ xyajnähwaats xyajcuhwáatsäm. Ja'a Dios jaduñ mänaañ coo Jesús hajxy jaduñ xyajnähwaats xyajcuhwáatsämät —nømä Pedro miänaañ.

13 Coo Pedrohajxy hänajty quiapxy hamøj jootmøj, paadiä møjtojc-hajxy hänajty yagjuø'oy. Hix, ñajuøøbiä møjtojc-hajxy hänajty coo Pedrohajxy hänajty quia'a høxpøquiä. Mänitä møjtojc-hajxy ñajuøøyy coo Pedro ja'a Jesús hänajty tøø piawädity, paady hajxy hänajty quiapxy hamøj jootmøj.

14 Cabä Pedrohajxy hänajty hoy quiapxhaduga'añii, je'eguiøxpä coo hajxy hänajty piuhdäna'awø'oyii ja'a craa ja'a hänajty tøø chó'oguiäbä.

15 Mänitä Pedrohajxy jii by yhøxquejxpädsøømä. Mänitä teedyhajxy tiägøøyy yajcapxiøøbiä:

16 —Neby hajxiäda'a nnä'ä jatcøøyyämät maa yø'ø häna'cøxpän. Mäduhñtiä cu'ughajxy yaa chäna'ay Jerusalén, quiøxy hixy quiøxy mädooy hajxy jaduñ coo yø'ø häna'c yø'ø tecymia'adpä hajxy tøø yajtso'ogy. Neby hajxy jaduñ nnä'ä mänaañämät coo jaduñ quia'a tøyyä neby yø'ø häna'c yø'ø tecymia'adpä hajxy tøø yajtso'oguiän. Pero cab jaduñ yhäxø'oy coo yø'ø capxy coo yø'ø mädia'agy jaduñ tehngahnä yhawaxø'øwät.

17 Hähixøøby jaduñ coo hajxy nhadsähgøøyyämät, jaduñä dijuuntä Jesús hajxy tehngahnä quia'a ja wi'i quiapxpäadät —nømä teedyhajxy ñiñämaayyä.

18 Mänitä Pedrohajxy yajmøjyaaxä møødä Juan. Mänit hajxy yhanemä coo Jesús hajxy quia'a capxpäatnät, coo cu'ug hajxy quia'a yajnähixøøñät ja'a Jesúsøxpä.

19 Mänitä Pedrohajxy yhadsooyy:

—Huuc wiinmahñdyhat hajxy waambä Diosäda'a miäna'añ, pø hähixøøby jaduñ coo højts mijtsä mmädia'agy ngudiúunämät, cahnä højtsä Dios ja'a miädia'agy hänajty ngudiunä.

20 Caj pues, cab jaduñ yhäxø'oy coo højts mijtsä mmädia'agy ngudiúunämät, cahnä højtsä Dios ja'a miädia'agy hänajty ngudiunä. Hoorä, jaduñ højtsä Dios tøø xyhane'emy coo højtsä miädia'agy tehngahnä ngapxwá'xät coo højtsä Jesús tøø nhixjujyicy, coo højts tøø nmädooy nebiatiä Jesús tøø yajnähixø'oyän. Paady højts jaduñ nga'a hamona'añ —nømä Pedrohajxy miänaañ.

21-22 Mänitä Pedrohajxy jadähooc yhädsähgøøyyä. Mänit hajxy yhøxmajtsä. Paady hajxy jaduñ yhøxmajtsä coo teedywiindsøn hajxy hänajty quia'a najuø'oy nebiä Pedrohajxy ñä'ä tsaächtiunøøjät. Hix, chähgøøbiä teedywiindsønä cu'ug hajxy hänajty je'eguiøxpä coo cu'ugä Dios hajxy hänajty tehngahnä wyi'i quiapxpaady coo mähdiøjc tøø cho'ogy, ja'a hänajty tøø myiñ tøø quiá'ayäbä tecymia'ad. Jiaanç tehñ yagjuøøbiä cu'ughajxy hänajty jaduñ, je'eguiøxpä coo mähdiøjc juxychägui'x naxy jomøjt hänajty miøødä, ja'a tøø chó'oguiäbä.

23 Coo Pedrohajxy yhøxmájtsänä møødä Juan, mänit hajxy jim ñøcxy maa jiamioødhajxiän. Mänit hajxy quiøxy mädiaacy waambatiä teedywiindsøn hajxy hänajty tøø miäna'añ, møødä majtojc-hajxy.

24 Coo jiamioødhajxy jaduñ miädooyy, mänit hajxy nägøxiä tiägøøyy Diospa'yaaxpä:

—Diosteedy, miich højts nWiindsøn hajpy. Miiçhä tsajt jaduñ mhädiuun møød hädaa yaabä naaxwiin, møødä mejy, møød tijaty jim hijp tsajtcøxp, møød hädaa yaabä naaxwiin, møød jii by mejjiooty.

25-26 Jaduñ miichä David jecy mnajtsapxøøyyä ja'a mhEspirituhaam:

Nä'ä nägoobä jäya'ayhajxy yhawa'anda'agy, ja'a Dios hajxy ca'a wiingudsähgøøbiä. Xiøøbä hajxy ñä'ä wiinmahñdyhaty, cab hajxy tii yhoyøøyyäxä.

Mänitä gobiernähajxy yhamugøøyy, ja'a hajxy yaa hanehmbä hädaa yaabä naaxwiin. Mänitä Dios hajxy jia näbädø'cy.

Jaanä Mesías jaduhñ ja näbädø'cäbä, ja'a Dios hänajty wyiinguexaambiä, nõmä David jecy miänaañ, ja'a miich jecy mmoonsähjätbä, ja'a højts jecy nhaphajt ndeedyhjätbä.

²⁷ 'Coo Jesús jaduhñ miajtsä, mänitä Herodeshajxy yaa yhamugøøyy juntahajpä yaa Jerusalén, møødä Poncio Pilato, møødä israelitahajxy, møødä jäya'ayhajxy ca'a israelítäbä. Jaduhñ jiaançh tøjiajty nebiä David jecy jiaançh mänaañän. Mänitä Herodes ja'a Jesús hajxy ñähwaambejty, hoyyä Jesús hänajty tii cädieey quia'a jagä møødä. Miichä mHuung je'e. Miich je'e mwiinguejx coo Mesías tiúnät.

²⁸ Tøøyyäm miich hänajty jaduhñ mmäna'añ coo Jesús hänajty jaduhñ tsipcøxp jiada'añ yhabeta'añ, paady miich jaduhñ waamb mga'a mänaañ coo Jesús jaduhñ jiaançh jajty jiaançh habejty.

²⁹ Hoorä, Diosteedy, mnajuøøby miich jaduhñ coo højtsä teedywiindsønðjyc tøø xjia hadsähgø'øy. Højts miich jaduhñ xmioonsähajp. Højtsä mäjaa jaac móoyäc, jaduhñ højts miichä mmädia'agy jaduhñ hoy njaac yaghawa'xøøyyät hamøj jootmøj.

³⁰ Højts jaac puhbéjtäc, jaduhñ højtsä pa'amjäya'ay nyajmøcpøgät ja'a miichä mHuungä miäjaagøxpä, ja'a Jesúsajpä, weenä cu'ughajxy jaduhñ jiaançh tehñ yagjuø'øy nej mijtsä møcmäjaa hajxy mjaançh tehñ miøødä — nõmä Pedro ja'a Dios hajxy pia'yaaxy.

³¹ Coo Pedrohajxy jaduhñ Dyiospa'yaaxpædøøyy, mänit jim chäyuuuy maa hajxy hänajty tøø yhamugø'øyøn. Mänitä Dioshespíritu hajxy nägøxiä yhadägøøyyä jioottägøøyyä. Mänitä Diosmädia'agy hajxy tiägøøyy yajwa'xpä hamøj jootmøj.

³² Tu'ugjoot tu'ugwiinmahñdiä mæbøjpædøjc-hajxy hänajty nägøxiä. Mäduhñjaty hajxy hänajty miøødä cøxiä wiinä, tu'ugmucy hajxy hänajty yajtuuñmucy. Cab hänajty pøn miäna'añ coo hänajty nidiuhñ jie'ehaty.

³³ Haa ja'a apóstoldøjc-hajxy, Diosmäjaamøød hajxy hänajty quiapxy miädia'agy coogä Jesús hänajty tøø jiuypioçy, ja'a hajxy nWiindsønñjätbä. Jaançh tehñ piuhbéjtäp hajxy hänajty nägøxiä ja'a Diösäm.

³⁴ Cab hänajty pøn tii yajmaajiaty. Hix, pønjatiä naax hänajty møød, møødä tøjc, tioo'py hajxy hänajty. Pønjaty hänajty tøø ñaaxtoogy tøø tiøjtoogy,

³⁵ mänitä xädø'øñ hajxy hänajty yecy maa apóstoldøjc-hajxiän. Mänitä mæbøjpædøjcä xädø'øñ hajxy hänajty yajniñäwa'xø'øyii pønjaty hänajty yajmaajiajp.

³⁶ Jimä mæbøjpä hänajty tu'ug xiøhaty José. Chiprenaaxooty hänajty chooñ. Ja'a Leví ja'a José hänajty jegyhajty tøø yhaphaty tøø tieedyhaty. Bernabé ja'a José yajxøbejtä ja'a apóstoldøjcäm. (Jue'e Bernabé miädia'agytiägø'øy hahebreohaam, “mäjootcapxmøcpøjp.”)

³⁷ Jimä José naaxcam hänajty miøødä. Mänit tioo'cy. Mänitä xädø'øñ hoy yecy maa apóstoldøjc-hajxiän.

5

¹ Jimä jäya'ay hänajty tu'ug xiøhaty Ananías. Safira ja'a tio'oxiøjc hänajty xiøhaty. Mänitä ñaax hajxy je'e piadoo'pä.

² Tøø hajxy hänajty quiojyquiapxytiuñ møødä tio'oxiøjc coogä xädø'øñ hajxy hänajty cujjiä yega'añ maa apóstoldøjc-hajxiän. Cújjiäc hajxy hänajty miämähmø'owa'añ. Coo Ananías ja'a Pedro ja'a xädø'øñ yajnämejch, mänitä Ananías miänaañ cooc tyijy ja'a xädø'øñ hänajty tøø quioxy yecy mäduhñtiä hänajty tøø tioogy.

³⁻⁴ Mänitä Pedro miänaañ:

—Ananías, coo miichä mnaax tøø mdoogy, cujjiä xädø'øñ tøø mmämähmø'øy mäduhñtiä tøø xquiujuuyy. Cooch miichä xädø'øñ cujjiä tøø xmio'oy, jaduhñ miich tøø

mmäna'añ cooçh tyijy cõxiä tøø xmio'oy. Coo naax hãnajty mga'a toogyñä, mje'ehajpyñä hãnajtyñä. Coo tøø mdoo'nä, miich mje'e hijty je'e ja'a naaxtsow. Coo jaduhñ tøø mhõhnda'agy, mgädiehy jaduhñ. Ja'a Dios miich mja wiinhõønaañ, ca'a yhõjtsä. Ja'a mõjcu'ugong miich jaduhñ xyajcapxtägooy, paadiä Dioshespíritu jaduhñ mja wiinhõønaañ —nõmä Ananías ñämaayyã.

⁵ Coo Ananías jaduhñ miädooyy, mänitiä ho'ogy quiädaayy. Põnjaty jaduhñ mädoyhajt coo Ananías jaduhñ yho'cy, mänit hajxy chãhgõøbiõjcy.

⁶ Mänitã hõxcujc-hãna'c-hajxy näje'e miejch. Mänitã ho'ogyjiäya'ay hajxy ñãhbijty. Mänit hajxy hoy yajnaaxtãgø'øy.

⁷ Cudãgõøghorã, mänitã Ananías tio'oxiõjc piamejtspã, ja'a hãnajty xõhajpã Safira. Cahnã Safira hãnajty miädoyhatyñä coo ñihyhap hãnajty tøø yho'ogy. Mänitã Safira tiõjtãgõøyy maa Pedro hãnajtiän.

⁸ Mänitã Pedro ja'a Safira miäyajtøøyy:

—Nej, jaduhñã mnaax hajxy mjaançh yejquiã, neby hajxy tøø mnãgapxiän.

—Jaduhñ —nõmä Safira yhadsooyy.

⁹ Mänitã Pedro miänãangumbã:

—Tii hajxy coo mja cojyquiapxytuiuñ coo hajxy hãnajty mhõhnda'aga'añ. Nej, cab hajxy mnajuø'øyã coo Dioshespíritu hotyijã yajcopcø'øy. Cab hajxy jaduhñ hoy mwiinhõønat. Coo mnihyhap yhõhndaacy, paady tøø yho'ogy. Xii hãna'c-hajxy je'e tiõjtãgø'øy, ja'a hajxy hoy tøø miäyajnaaxtãgø'øyãbã. Nõcxaamb miich yø'ø hãna'c xyajnaaxtãgø'øwaambã —nõmä Safira ñämaayyã.

¹⁰ Tuunã Safira jaduhñ ñä'ã mädooyy, mänitiä Pedro tiecyquiädawøøyyã ho'ogy. Coo hõxcujc-hãna'c-hajxy tiõjtãgõøyy, mänitã Safira hajxy yhijxy coo hãnajty tøø yho'ogy. Mänit hajxy yhõxcøøbiädsøømy. Mänit hajxy hoy yajnaaxtãgø'øy maa ñihyhapã ñãhmõjcan.

¹¹ Põnjaty jaduhñ mädoyhajt nebiã Ananías hajxy hãnajty tøø jiaty tøø yhabetiän, mänit hajxy nägõxiã chãhgõøbiõjcy, mõødã mãbõjpadõjc-hajxy nägõxiã.

¹² Mänitã apõstoldõjc-hajxy jim tiãgõøyy mãba'amyajnajxpã cajptooty. Jaançh tehñ yhoy-yagjuøøñã hajxy hãnajty tiuñ. Jaduhñ hajxy hãnajty yajcãhxø'øgy coo Dios mãjaa jiaançh tehñ miøødã. Jimã mãbõjpadõjc-hajxy hãnajty yhamugø'øyhaty tsajtõgooty maa hãnajty xiõhatiän ja'a Pórtico de Salomón.

¹³⁻¹⁴ Tehngahnã mãbõjpadõjc-hajxy hãnajty miayø'øy näya'ay-nãdo'oxy, ja'a hajxy hãnajty mãbõjpa ja'a Jesucristocõxpã. Haa ja'a jäya'ayhajxy hãnajty ca'a mãbõjpa, cab hajxy hãnajty jim ñä'ãgãdã nõcxy maa mãbõjpadõjc-hajxy hãnajty naxy yhamugø'øyän, hoyyã mãbõjpadõjc-hajxy hãnajty jiaançh tehñ quiumayii ja'a cú'ugãm. Paady hajxy hãnajty jim quia'a nõcxa'añ, ja'a hajxy hãnajty ca'a mãbõjpa, coo hajxy hãnajty chãhgø'øy.

¹⁵ Coo apõstoldõjcã pa'amjäya'ay hajxy hãnajty may yajmõcpøcy, paadiä pa'amjäya'ayhajxy hãnajty jim quiøøñõcxyii tu'haam maa Pedro hãnajty ñaxø'øwa'añän. Jaduhñägã pa'amjäya'ayhajxy jaduhñ näje'e miõcpõgãt coogã Pedro yhahapc hajxy ñä'ã páatãt maa hajxy hãnajty quio'na'ayän cõjxcøxp, mõød to'ogyquiøxp.

¹⁶ Mayyã pa'amjäya'ayhajxy hãnajty jim yajmeçhii Jerusalén, mõød ja'a hajxy haxøøgpã ca'a hoybã mõødpã, ja'a hajxy hãnajty tsohmbã Jerusaléncajptpa'a mãwiingõñ. Nägõxiã hajxy hãnajty yajmõcpøgyii.

¹⁷ Coo teedywiindsõñhajxy jaduhñ miädoyhajty coo pa'amjäya'ayhajxy hãnajty may tøø wyi'i miõcpøcy, mänit hajxy nägø'ø nãdecypiã jiootma'ty, mõødã saduceodõjc-hajxy. Hix, cabã apõstoldõjc-hajxy hãnajty yajmädsogyii coo hajxy hãnajty tehngahnã wyi'i yajnahixø'øy ja'a Jesúsõxpã.

¹⁸ Mänitã apõstoldõjc-hajxy hoy chumyii.

¹⁹ Mänitãcoodsã Diosmoonsã ja'a pujxtõghaaw hoy yaghawa'açh. Mänitã apõstoldõjc-hajxy yhõxwoobädsøømã ja'a Diosmõõnsãm.

²⁰ Mänit hajxy ñämaayyã:

—Coo jioþ'owät, mänit hajxy jim mnócxät maa tsajtøjcän. Jimä cu'ug hajxy myanähix'owät neby hajxy ñähwá'adsät, neby hajxy jaduñ jiuqyhádät cøjxta'axiøø nebiä Dios jiuqyhatiän —nømä Diosmoonsä miänaañ.

²¹ Coo jioþøyy, mänitä apóstoldøjc-hajxy jim jiaançh nøcxy tsajtøgooty neby hajxy hänajty tøø ñäma'ayiiän ja'a Diosmóonsäm. Mänitä cu'ug hajxy tiägøøyy yajnähiðøþiä.

Mänitä teedywiindsønñhajxy miänaañ coo hajxy nägøxiä yhamugø'owät juntahajpä, møødá majtøjc-hajxy israelitabä. Mänit hajxy miänaañ coo tsumyhäna'c-hajxy jim yajmedsøøjat maa junta hajxy hänajty yagjadyiiän.

²² Coo policíashajxy jim miejch maa pujxtøjcän, cab pønñ hänajty jiiþiän. Mänitä policíashajxy wyiimþijty.

²³ Mänit hajxy miänaañ:

—Coo højts jim nmejch maa pujxtøjcän, je'enä hänajty hoy yhaawguiiçhä. Jimä soldadohajxy hänajty yhadäna'ayñä maa pujxtøghaawän. Pero coo højts jiiþy nja tøjtägøøyy, cab pønñ hänajty jiiþiän —nømä policíashajxy miänaañ.

²⁴ Coo teedywiindsønñhajxy jaduñ miädooyy, møødá tsajtøjcueendähajpä wyiindsønñhajxy, møødá mõjteedywiindsønñ, mänit hajxy jiaançh tehñ yagjuøøyy. Cab hajxy hänajty ñajuø'oy tii hänajty jätäp túuñäp.

²⁵ Mänitä jäya'ay tu'ug miejch maa teedywiindsønñhajxy hänajty jiuñtahiän. Mänitä craa miänaañ:

—Ximä cu'ug wyi'i yajnähiðøøyyägumbä tsajtøgooty —nømä teedywiindsønñhajxy ñämaayyã.

²⁶ Mänitä apóstoldøjc-hajxy hoy wioyii. Ja'a tsajtøjcueendähajpähajxy hoy miäwoy møødá policíashajxy. Hahoy haweenä apóstoldøjc-hajxy jaduñ jim yajmejtsä maa junta hänajty jiadyiiän. Hix, tsähgøøþiø policíashajxy hänajty coo hajxy ñä'a paga'ads ñä'a pawobøøjat ja'a cú'ugäm.

²⁷ Coo apóstoldøjc-hajxy jim wioomejtsä maa junta hänajty jiadyiiän, mänit hajxy jim yajnøcxä maa mõjteedywiindsønñä wyiinduuman. Mänitä apóstoldøjc-hajxy ñämaayyã:

²⁸ —Tøø højts mijts nja näma'ay coo hajxy mga'a nä'ägädä yajnähiðøøñät ja'a dijuuntä Jesúcøxpä. Pero cab højts mijtsä nmädia'agy tøø xquiuduunä. Tøø cu'ug hajxy jaduñ mgøxy yajnähiðø'oy, mäduhñtiä hajxy yaa çhäna'ay Jerusalén. Y højts mijts jaduñ xjia wi'i yajnähdøømaamb cooc tyijy højtsä dijunto Jesús nyajyagho'cä.

²⁹ Mänitä Pedrohajxy yhadsooyy møødá jiamiøødhajxy:

—Cab yahixø'oy coo højtsä jäya'ay miädia'agy ngudiúunät, cahnä højtsä Dios miädia'agy hänajty ngudiuunä.

³⁰ Coo mijtsä Jesús myajyujmänoonä cruzcøxp, mänitä Dios ja'a Jesús yagjujyþiøjtägajch, ja'a højtsä nhapä ndeedyhajtäm jecy wyiingudsähgøøyyäbä.

³¹ Mänitä Dios ja'a Jesús cuhdujt miooyy coo Jesús jim miähané'emät tsajpootyp maa Dios yhaøoyhaampiän. Coo judíos ja'a yhaøøgcuhdujt hajxy ñajtshix'owät, jaduñä þiojþä quiädieeybä hajxy jaduñ yajnähwäats yajcuhwäatsäxät Jesúsäm.

³² Højtsä tøyhajt nyejpy coo Jesús jiuþyþiøjtägajch coo hänajty tøø yho'ogy. Jaanä jaduñä Dioshøþiritu tøyhajt yejþä coo Jesús jiuþyþiøjcy. Þønþatiä Dios ja'a miädia'agy jaduñä cudiúuñäp, je'e ja'a Dios ja'a yheþiritu miooby —jaduñä Pedrohajxy miänaañ.

³³ Coo teedywiindsønñhajxy jaduñ miädooyy, mänit hajxy jiaançh tehñ jiootma'ty. Mänit hajxy jaduñ jia mänaañ coo Pedrohajxy yagho'ogøøjat.

³⁴ Jimä fariseo hänajty tu'ug teedywiindsønñhagujc. Jue'e hänajty xiøhaty Gamaliel. Ley-yajnähiðøøþiä hänajty tiuunghajpy. Jaançh tehñ wyiingudsähgøøyyäþ hänajty je'e ja'a cú'ugäm. Mänit tiänaayyø'cy. Mänit yhanehmy coo apóstoldøjc-hajxy nøcxy yajþädsømyii tu'habaquiä.

³⁵ Mänitä Gamaliel ja'a jiamiøødtøjc ñämaayy:

—Mägu'ughajpädøjc, huuc wiinmahñdyhat hajxy hodiägaamby neby yø'ø häna'c hajxy mduna'añ.

³⁶ Huuc jahmiets hajxy nebiä Teudas jecy jiajtiän. Mänit jootmøj ñibiädaacä. Mänit ñiñänøømä cooc tyijy miøjjäya'ay jiaančhjäya'ayä. Mänit piadu'ubøjcä nämädaaxmägo'x jäya'ay. Mänitä Teudashajxy tiägøøyy tsiptuumbä. Mänitä Teudas yagho'cä. Ja'a soldadohajxy jaduhñ mäyagho'c. Mänitä Teudas jiamiøødhajxy xii yaa ñøcxøøyy. Mänitä tsip jaduhñ yhamaadiujnä.

³⁷ Mänitä tsip wiingpä jadähooc chohndáaccumbä mänaa censo hajxy hänajty yajpädø'øguiän. Ja'a craa Judas ja'a tsip jaduhñ yajtsohndaac, ja'a hänajty jim tsohmbä Galilea. Mänitä cu'ug may piadu'ubøjcäbä. Mänitä Judas yaghó'cäbä ja'a soldadohajxy. Jaduhñä Judas jiamiøødhajxy xii yaa ñøcxøøbiä.

³⁸ Paady, høxmats yø'ø häna'c hajxy. Cab jaduhñ yhahixø'øy coo hajxy nej mdúnät. Hix, pø yhamdsoo wiinmahñdy hajxy jaduhñ yajtuumbay, cab jaduhñ yhoyø'øwät; tu'umá'adäp jaduhñ.

³⁹ Pero pø yø'ø häna'cä Dios wyiinmahñdy hajxy yajtúunäp, cab hajxy jaduhñ hoy mgapxhadúgät. Hix, jaduhñ quiähxø'øgät nejpiä Dios hajxy hänajty mmädsiphajpiän —jaduhñä teedywiindsøñhajxy ñämaayyä.

Jiaančh mæbøjc hajxy jaduhñ nebiä Gamaliel miänaañän.

⁴⁰ Mänitä apóstoldøjc-hajxy jadähooc quiuyaaxøøyyä tøgooty. Mänit hajxy wiobho'cä. Mänit hajxy yhanehmä coo Jesús hajxy quia'a capxpáatnät. Mänit hajxy ñajtsmadsøøyyä.

⁴¹ Xoondáacäp hajxy tiøjpädsøømy maa junta hänajty jiadyiijän. Paady hajxy hänajty xioonäda'agy, hix, hahixøøby hänajty jaduhñ coo hajxy hočhähdiiuunnä chaächpøgät ja'a Jesúscøxpä.

⁴² Mänit hajxy tiägøøguiumbä yajnahixøøbiä ja'a Jesúscøxpä, tsajtøgooty møød tøgootypaady. Tehngahnä hajxy hänajty yajnahixø'øy jøjwidsø'ø.

6

¹ Tehngahnä mæbøjpädøjc-hajxy hänajty jiaančh tehñ miayø'øy. Jaduhñ hajxy hänajty quiuhdujthaty coo yaamgto'oxy cay hu'ugy hajxy jabom-jabom mio'owøøjät. Cujwa'xiä mæbøjpädøjc-hajxy hänajty quiapxy hagriego. Cujwa'xiä hajxy hänajty quiapxy hahebreo. Ja'a hajxy hänajty capxpä hagriego, mänit hajxy tiägøøyy mänaambä coo yaamgto'oxy cay hu'ugy hajxy hänajty pedyii quia'a móoyänä, ja'a hajxy hänajty capxpä hagriego. Høxtä yajtsip yajma'adøøby hajxy hänajty ja'a yaamgto'oxycøxpä.

² Mänitä apóstoldøjc ja'a nämajmetspähajxy miänaañ coo mæbøjpädøjc hajxy nägøxiä yhamugø'øwät. Mänitä apóstoldøjc-hajxy miänaañ:

—Mägu'ughajpädøjc, cab jaduhñ yhahixø'øy coo højtsä cay hu'ugy njaac yajwá'xät tehngahnä. Hix, cab højtsä Diosmädia'agy jaduhñ hoy ngapxwa'xaannä.

³ Paadiä, hahixøøby jaduhñ coo hajxy mniwiiimbiwøøjät näjuxtujc coo cay hu'ugy hajxy yajwá'xät. Jue'e hajxy mwiimbíwäp mädyii hoyhäna'c, mädyii Dioshespíritumøød, mädyii jajp najuøøby.

⁴ Y højts ja'a nämajmetspä, tehngahnä højtsä Dios nba'ya'axa'añ. Tehngahnä højtsä miädia'agy nyajnahixø'øwaanä —nømä apóstoldøjc-hajxy miänaañ.

⁵ Mänitä mæbøjpädøjc-hajxy nägøxiä cojyquiapxy miähmøøyy pønajaty hajxy hänajty wiiimbiwaamby. Jue'e hajxy jaduhñ wiimbiiwä, ja'a Esteban, møødä Felipe, møødä Prócoro, møødä Nicanor, møødä Timón, møødä Parmenas, møødä Nicolás. Haa ja'a Esteban, hoyyä Diosmädia'agy hänajty jiaančh tehñ miäböcy. Miøødä Dioshespíritu hänajty je'e. Haa ja'a Nicolás, Antioquia hänajty chooñ. Coo hänajty tøø miøjjø'øy, mänit jaduhñ tiägøøyy maa judíos quiuhdujthajxiän.

⁶ Mänitä näjuxtujpähajxy jim wioonøcxä apóstolwiinduumhajxy. Coo näjuxtujpähajxy jim miejch, mänit hajxy quiø'ønähgajpä ja'a apóstoldøjc. Mänitä apóstoldøjcä Dios hajxy

pia'yaaxy coo näjuxtupä cuhdujt hajxy mio'owóøjät coo hajxy jaduhñ tiúnät nebiä apóstoldøjc-hajxy hänajty tiuñän.

⁷ Tehngahnä Diosmädia'agy hänajty yhawa'xø'øy. Mayøøbyñä ja'a mäbøjpädøjc-hajxy hänajty tehngahnä jim Jerusalén. Mayyä teedywiindsønñhajxy hänajty miäbøjpä.

⁸ Haa ja'a Esteban, miøødä Diosmäjaa hänajty je'e. Dioswiinguexy hänajty jaduhñ. Mänit tiägøøyy pa'amyajnajxpä maa cu'ugän. Hoy-yagjuøøñä hänajty jaduhñ wyi'i tiuñ.

⁹ Mänitä judíos ja'a Esteban hajxy näje'e tiägøøyy yajcapxiøøbiä nebiatiä Esteban hänajty yajnahixø'øy. Tøø hajxy hänajty yhity nebiä cudoogø'øybän. Pero tøø hajxy hänajty yhøxmájsänä. Jimä yhamdsoo tsajtøjc hajxy hänajty miøødä. Jäguembaady hajxy hänajty chooñ wiinghagajptjaty, møød jim Cirene, møød jim Cilicia-naaxooty, møød jim Asia-naaxooty.

¹⁰ Pero cab hajxy hänajty miäjäda'aga'añ je'eguiøxpä coo Esteban hänajty jiaançh tehñ jiaty mädia'ag. Hix, miøødä Esteban ja'a Dioswiinmahñdy hänajty nebiaty hänajty mio'oyii ja'a Dioshespíritäm.

¹¹ Mänitä judíoshajxy quiojyquiapxytiuuñ coo wiinghäna'c hajxy miäjúyät coo weenä Esteban ñähwaambedyii cooc tyijy ja'a Moisés hänajty haxøøg tøø ñänømyii møødä Dios.

¹² Coo Esteban jaduhñ ñähwaambejtä, mänitä cu'ughajxy hoyhoy jiootma'ty, møødä majtøjc-hajxy, møødä ley-yajnahixøøbiädøjc-hajxy. Mänitä Esteban yajmujcä. Mänit miajtsä. Mänit yajnøcxä maa teedywiindsønñwiinduumhajxiän, maa junta hajxy hänajty yagjadyiijän.

¹³ Mänitä wiinghäna'c-hajxy yajmejtsä maa junta hänajty jiadyiijän. Mänitä Esteban tiägøøyyä nähwaambéjtäbä:

—Tehngahnä yø'ø craa hädaa tsajtøjc haxøøg ñänømy maa Dios hajxy nwiin-gudsähgøøyyämän. Jaduhñä ley haxøøg ñänøømbä, ja'a Moisés jecy quiujáhyyäbä.

¹⁴ Jaduhñ højts nmädooyy coo jäya'ayhajxy miänaambä cooc tyijy ja'a Jesús Nazaretpä hädaa tsajtøjc yajma'ada'añ, cooc tyijy ja'a cuhdujt yajtägatsa'añ, ja'a Moisés hajxy jecy xyajmänähgueegøøyyämbä —nømä Esteban ñähwaambejtä.

¹⁵ Mänitä tuungmøødpä Esteban hajxy wyiinhee'ppejty, mäduhñtiä hajxy hänajty jim yhäña'ay maa junta hänajty jiadyiijän. Haamb tsämaambä Esteban wyiin jiojyp hänajty quiähxø'øgy nebiä Diosmoonsä wyiin jiojphajxy quiähxø'øguiän, ja'a hajxy jim hijpä tsajpootyp.

7

¹ Mänitä teedywiindsønñä Esteban miäyajtøøyy:

—Nej, jaançh tøyhajt jaduhñä nej miich yø'ø häna'c xñänømiän.

² Mänitä Esteban yhadsooyy:

—Majtøjc, puhya'adiøjc, høøchä nmädia'agy hajxy huuc hamädoowhíjtäc. Ja'a Abraham hajxy jecy nhaphajt ndeedyhájtäm. Jim hänajty chäna'ayñä Mesopotamia-naaxooty maa Caldeabä-jäya'ayhajxy hänajty chäna'ayän. Cahnä Abraham hänajty jim jiojbajnaxyñä maa naax hänajty xiøhatiän Harán. Mänitä Dios tsajpootypä jim näguehxtøø'xy maa Abraham wyiinduumän.

³ Mänitä Dios ja'a Abraham ñämaayy: “Mdsóonäp yaa maa mnaax maa mgajptän. Mnähgué'egäbä mjujy mmägu'ug. Jim mnócxät maaçh miich nwoonøcxa'añän. Mänitøch miich jim nyajnahixø'øwät maa mdsänaadiaacpógät”, nømä Abraham jecy nämaayyä.

⁴ Mänitä Abraham jim jiaançh tsohñnä Mesopotamia. Mänit jim ñøcxy tsänaadiaacpøjpä Harán-naaxooty. Pero cab jim jecy yhiyty Harán-naaxooty. Coo Abraham tieedy yho'cy, mänit jim chóhngumbä. Mänitä Dios ja'a Abraham yaa wiomejch hädaa yaabä naax hädaa yaabä cajpt maa hajxy jäda'ahaty nhíjtäm.

⁵ Pero cabä Dios ja'a Abraham cuhdujt ñä'ägä mooyy ni weeñtiä coo yaa chänaadiaacpógät. Jaduhñä Abraham cuhdujt ñä'a mooyyä coo yaa ñä'a hahídat. Mänitä

Dios ja'a Abraham yajwiinwaanøøyy coogä cuhdujt hänäjty mio'owa'añ coo yhap yhoc-hajxy yaa chänáañät coo Abraham hänäjty tøø yho'ogy, hoyyä Abraham yhuung hänäjty quia'a jagä jiijä mänaa jaduhñ yajwiinwaanøøyyän.

⁶ Jaduhñä Dios jiaac mänaañ coogä Abraham yhap yhoc-hajxy hänäjty wiingnaaxooty nõcxy yhadsäna'awa'añ, møød coog hajxy hänäjty yhida'añ nebiä cudoogø'øybän mädaaxmägo'xjumøjt, møød coog hajxy tsaächtiunñ yhida'añ.

⁷ Mänitä Dios miänáangumbä: “Coo miichä mhapä mhoc-hajxy hänäjty tøø yag-jaamduñ tøø yajtsaächtiunñ, mänithøchä jäya'ay nyajcumädowa'añ, ja'a miichä mhapä mhoc hänäjty tøø xjiaamduun tøø xchaächtiunñäbä. Mänitä mhapä mhoc-hajxy jim choona'añ. Mänit hajxy yaa myina'añ. Yaaçh hajxy jaduhñ xwyiingudsähgø'øwa'añ.”

⁸ Coo Dios ja'a Abraham jaduhñ yajmøødmädiacy, yajcuhdujc hajxy jaduhñ neby hajxy jaduhñ miädiaaquiän. Mänitä Dios ja'a Abraham yhanehmy coo Abrahamhajxy yajcircuncidarhädät, møødä yhuunghajxy, møødä yhapä yhoc-hajxy. Jaduhñä hijxtahñd miähmøøyy coo Dios ja'a Abraham jaduhñ miøødyajcuhdujcy. Paadiä, coo Abraham yhuung Isaac jiaançh miiñ jiaançh cahy, cuctujxøø ja'a Abraham ja'a yhuung jiaançh circuncidarhajty. Y coo Isaac hänäjty tøø miøjjø'øy, jaduhñä yhuung Jacob tiumbä. Y ja'a Jacob, jaanä jaduhñä ñøøx miajc yajpanøcxpä, ja'a nämajmetspä, ja'a højts jecy nhaphajt ndeedyhätämbä.

⁹ 'Jue'e Jacob yhuung hänäjty tu'ug xiøhaty José. Coo José hänäjty jiaançh tehñ chogyii ja'a tiédiäm, paadiä José yahajchhajxy jiootma'ty. Mänitä José jim quiudoogøøyyä Egipto-naaxooty. José yahajchhajxy jaduhñ jatcøøyy. Pero tehngahnä Dios ja'a José hänäjty cwieendähaty.

¹⁰ Coo José hänäjty hoyhoy tøø chaächtiunñii, mänit yajnähwaatsä ja'a Diósäm. Mänitä José wiinmahñdy miooyyä. Mänitä Dios miänáañ coo José quiumayøøjät ja'a Faraóngäm, ja'a hänäjty jim tuumbä gobiernä Egipto-naaxooty. Mänitä Faraón ja'a José wyiinguejxy coo José jim yhané'emät mäduhñtiä Egipto-naax, møød jimbaady maa Faraón tiøjcän.

¹¹ Mänitä yuuxøø hoyhoy jiajtä jim Egipto møød jim Canaán-naaxooty. Mänit højtsä nhapä ndeedyhajxy jiaançh tehñ chaächpøjcy ja'a yuugøxpä, coo cay hu'ugy hänäjty jim quia'a hijnä.

¹² Pero coo Jacob jaduhñ miädoyhajty coo trigo hänäjty jim yajpaady Egipto, mänitä ñøøx miajc jim quiejxy trigojuubiä. Coo Jacob yhuunghajxy yhoöchohñ jayøbajt, cabä José choj høxcajpä ja'a yhájchäm.

¹³ Coo hajxy miämetsc-hoocpä yhoodiägajch, mänitä José ñiñägäpxä. Mänit yhöxcájpänä. Mänitä Faraón ñajuøøñä coo José yahajchhajxy hänäjty je'e.

¹⁴ Mänitä José quiapxyñäguejxy coo tieedyhajxy jiiby ween miänacy Egipto, møødä jiuju miägu'ughajxy nägøxiä. Jue'e hajxy hänäjty nägøxiä, nädägøøghii'xcumajmocx.

¹⁵ Mänitä Jacobhajxy jiiby jiaançh hädaacnä Egipto møødä yhuunghajxy. Jiiby hajxy nägøxiä yho'taacy, ja'a hajxy jecy nhaphajt ndeedyhätämbä.

¹⁶ Cujequiä Jacob piajc-hajxy yagjødsohñnájxäxä møødä José piajc. Jimä piajc-hajxy yajnøcxäxä maa cajpt hänäjty xiøhatiän Siquem. Jim hajxy hoy ñaaxtägøødiägach maa Abraham ja'a naax hänäjty tøø jiuuyyän. Ja'a Hamor yhuungä naax hajxy too'c.

¹⁷ Coo hänäjty yhabaadaañä coo Dios hänäjty yajtøjiada'añ nebiä Abraham hänäjty tøø yajwiinwaanøø'yijän, tøø højtsä nhaphätämä ndeedyhätämhajxy hänäjty miayøøñä jim Egipto.

¹⁸ Mänitä wiinggobiernä jim tiägøøyy tuumbä Egipto-naaxooty. Cabä gobiernä miøjpädaacy nebiä José hänäjty tøø tiunñän.

¹⁹ Mänit højtsä nhaphätämä ndeedyhätämhajxy wyiinhøhñä. Ja'a gobiernä jaduhñ mäwiinhøhñ. Mänit hajxy jiaamduunä chaächtiunñä. Mänit hajxy yhanehmä hadsip coo yhuung hajxy yhöxtseenät yhöxcónät, ja'a naammiñ ja'a naammechpä, coo hajxy jaduhñ ween yho'ogy.

²⁰ Mänitä Moisés myiiñguiahy. Yajxón jiaanč tehñ miaaxhuunghajty. Cabä Moisés yhøxtsehñä nebiä gobiernä hänajty tøø jia hane'emiän. Yu'učhä Moisés yaghijtä tågøøgp'o tøgooty.

²¹ Coö Moisés hänajty hoy yu'uč quia'a hidaañä, mänitä gobiernä tio'oxyhuungä Moisés yohbiaaty. Mänit yajtsoocy nebiä hamdsoo huungän.

²² Coö Moisés miøjjøøyy, mänitä cuhdujt cøxiä yajwiinhixøøyyä nebiä egipcioshajxy hänajty quiuhdujthatiän. Jaanč tehñ jiajp jaduñ piädsøømy. Jaanč tehñ yajxón hänajty quiapxy miädia'agy nebiä jajp nebiä najuøøbiän. Jaanč tehñ yhoy hänajty miähane'emy.

²³ 'Coo Moisés jiumøjt juxychägui'x yhabejty, mänit wyiinmaadiaacy coö ja'a miägunaax nøcxy quiuhixa'añ.

²⁴ Jimä Moisés ja'a miägunaax hänajty tu'ug chaačhtiuñii ja'a egipcio-jäyá'ayäm. Coö Moisés jaduñ yhjy, mänitä miägunaax ñäwaañ. Mänitä egipcio-jäyá'ay yagho'cy, ja'a hänajty mädsaačhtiuumbä.

²⁵ Paadiä Moisés jaduñ jiatcøøyy, jaduñ hänajty tiajy miay coö miägunaaxhajxy hänajty tøø miäbøcy coö Moisés hänajty tøø wyiinguexyii ja'a Diósäm coö miägunaax jaduñ yajñähwá'adsät. Pero cab hajxy jaduñ ñä'ä mäbøjcy.

²⁶ Cujaboom, jimä israelitahajxy hänajty nämetsc ñiguioxyii. Coö Moisés jaduñ yhjy, mänit jia mänaañ coö hajxy ñiyhøxmadsoøjät. Mänit miänaañ: “Mägu'ughajpädøjc, jue'e mijts jaduñ, mdu'ugcunaax mijts jaduñ. Cab jaduñ yhahixø'øy coö hajxy jaduñ mniguioxøøjät.”

²⁷ Mänitä Moisés yhøxjahmä tu'jäyá'ay, ja'a hänajty mäjäda'agaambä. Mänitä Moisés ñämaayy: “Pøn miich tøø xpiäda'agy coö højts miich xyhané'emät.

²⁸ Nej, jaduñ miich mdaj mmaabiä coöch miich xyagho'ogaambä nej miichä egipcio-jäyá'ay häxøøyy myagho'quiän.”

²⁹ Coö Moisés jaduñ miädooyy, mänit piäyø'cy. Mänit jim ñøcxy jäguem maa naax hänajty xiøhatiän Madián. Mänit jim tiägøøyy hadsänaabiä. Mänitä jäyá'ay wyiingpøjcy. Mänitä huung hajxy metsc piaaty.

³⁰ 'Coo Moisés hänajty jim tøø yhijnä Madián juxychägui'xjumøjt, mänit jim tiägøøyy wädijpä pactuum, jim mädooyy maa ja'a tun hänajty xiøhatiän Sinaí. Mänitä Moisés yhjy coö ja'a wädsats hänajty tioy. Mänitä Diosmoonsä tu'ug ñäguehxtøø'xy jøønhaajiooty. Tsajpootyp hänajty tøø chooñ.

³¹ Coö ja'a Moisés jaduñ yhjy, mänit jaduñ jiaanč tehñ yagjuøøyy. Mänitä Dios ja'a Moisés ñämaayy:

³² “Høøch Dioshajp. Høøchä Abrahamhajxy jecy xwyiingudsähgøøyy, møødä Isaac, møødä Jacob, ja'a miich jecy mhaphajt mdeedyhajtäbä.” Mänitä Moisés tiägøøyy tsäyubiä. Jaanč tehñ chähgøøby hänajty jaduñ. Cab hänajty jim ñä'ägä møjheeba'añ maa hänajty miägapxyiijän.

³³ Mänitä Moisés ñämäayyägumbä: “Jen yø'ø mgø'øg. Høøch nwiinduum miich yaa mdäna'ay.

³⁴ Tøøch nhixy coöchä ngu'ughajxy jim jiaanč tehñ chaačhpøcy Egipto-naaxooty. Tøøch nmädooy coö hajxy wyi'i jøø'øy wyi'i xiuuuch. Páadyhøch yaa tøø ngäda'agy hädaa yaabä naaxwiin, ja'a ngú'ughøch nyajñähwa'ads nyajcuhwa'adsaamby. Miich jim nguexaamby Egipto yajñähwaatspä”, nømä Dios miänaañ.

³⁵ Mänitä Esteban jiaac mädiaacy:

—Tøø ja'a Moisés ja'a miädia'agy hänajty quia'a mäbøjcäxä. Ja'a yhamdsoo miägunaaxhajxy hänajty tøø quia'a mäbøcy. Mänit hajxy miänaañ: “Pøn miich tøø xwyiinguexy coö mmøjhädät, coö mmähane'emät.” Hoyy Moisés hänajty jaduñ tøø jia näma'ayii, mänitä Dios ja'a Moisés wyiinguexy wiindsønähajpä maa ja'a quiu'ugän,

coo hajxy jaduhñ ñähwa'ads quiuhwá'adsät. Ja'a Diosmoonsä ja'a Moisés jaduhñ najtscapxøøyyä, ja'a hänajty tøø ñäguehxtøø'xiäbä maa ja'a wädsats hänajty tioyyän.

³⁶ Mänitä Moisés ja'a hoy-yagjuøøñäjatypä may yajcähxø'cy jim Egipto-naaxooty. Mänitä miägunaax jim hoy wioobädsømy. Majatiä Moisés hajxy hänajty wiädity, yajcähxø'piä Moisés ja'a hoy-yagjuøøñäjatypä hänajty, møød jim maa ja'a Tsaptsmejjiän, møød jim pactuum. Juxychägui'xjumøjt hajxy jim wiädiyty pactuum.

³⁷ Mänitä Moisés ja'a miägunaax ñämaayy: “Nébiøchä Dios tøø xwyiinguexiän coo mijts nyajñähwá'adsät, jaanä jaduhñä Dios wiinghänä'c wyiinguexaambä, ja'a jaac miimbä ja'a jaac cahbä. Mijtsä mmägunaax jaduhñ pädsømaamb. Naxiä miädia'agy hajxy mdehm quiudiúunät waambaty hänajty miäna'ana'añ”, nømä Moisés jecy miänaañ.

³⁸ Hanäguipxiä Moisés ja'a miägunaax jim miøødwädiyty pactuum, ja'a hõjts nhaphajt ndeedyhåjtäm. Coo hajxy jim miejch maa ja'a tun hänajty xiøhatiän Sinaí, mänitä Diosmoonsä ja'a Moisés jim tu'ug miägapxy, ja'a hänajty jim tsohmbä tsajpootyp. Mänitä Moisés ja'a Diosmädia'agy ñajtscapxøøyyä. Paady jaduhñ ñajtscapxøøyyä, coo hõjts jaduhñ xyajmähgüegøøyyämät. Ja'a Diosmädia'agy, cab jaduhñ mänaaxøø quiuhdägoyya'añ.

³⁹ 'Pero cabä Moisés ja'a miädia'agy hänajty yajtunáanäxä. Ja'a hõjts nhaphajt ndeedyhåjtäm hajxy hänajty ca'a cudiunaamb. Jaduhñä jioot hajxy hänajty tøø piäda'agy coo hajxy hänajty wyiimbida'añ, coo hajxy hänajty jim ñøcxtägatsa'añ Egipto.

⁴⁰ Jimä Moisés ja'a piuhya'ay hänajty tu'ug xiøhaty Aarón. Coo ja'a Moisés hänajty tøø ñøcxy tunmøjc, mänitä cu'ugä Aarón hajxy ñämaayy: “Huuc tunä mayhajt, hõjtsä saandä mejtstägøøg hädiúunäc, jaduhñ hõjts nwiingudsähgø'øwät. Je'e hõjts jaduhñ xwyiinwówäp. Ja'a Moisés, ja'a hõjts tøø xwioobädsøømämbä jim Egipto-naaxooty, cab jaduhñ yajnajuo'øy neby jaduhñ tøø jiaty tøø yhabety”, nømä Aarón ñämaayyä.

⁴¹ Mänitä saandä hajxy yhädiuun wajhuunghahädiuunnaxy. Mänitä saandä hajxy tiägøøyy wiingudsähgøøbiä. Mänitä animal hajxy tiägøøyy yojxpä ja'a saandäcøxpä. Mänitä saandä hajxy wyiinxoonäacy, ja'a hajxy hänajty hamdsoo tøø yhädiúñäbä.

⁴² Mänitä Dios ja'a tsaangu'ug piuhwaatsnä. Mänit ñähgüecnä, je'egüøxpä coo ja'a xøø hajxy hänajty tøø tiägø'øy wiingudsähgøøbiä møødä po'o møødä madsa'a. Hix, jaduhñ jim myiñ cujaay maa ja'a profeta jecy quiujahyyän:

Mijts Israelpjäya'ay,
mänaa hajxy jecy mwädiän pactuum juxychägui'xjumøjt,
ca'a yhøøchcøxpä ja'a animal hajxy mwi'i yojxy,
ca'a yhøøchä mijts xwyiingudsähgøøyy.

⁴³ Caj pues, ca'a yhøøchä.

Je'e hajxy mwiingudsähgøøyy ja'a saandä hänajty xøhåjpä Moloc.

Je'e chajtøjc-hahädiuunnaxy hajxy mmädajnajxä, møødä saandä Renfán ja'a miadsa'ahahädiuunnaxy.

Hamdsoohaambiä saandä hajxy mhädiuun neby hajxy jaduhñ mwiingudsähgø'øwät.

Coo hajxy jaduhñ mjatcø'øy, paady mijts nhøxquejxpädsøma'añ maa ja'a mhamdsoo naaxhåjxiän.

Jäguem mijts nguexa'añ Babilonia-nänaxy.

Jaduhñ jim myiñ cujaay maa ja'a Diosmädia'agiän.

⁴⁴ 'Hoorä, mänaa hõjts nhaphajt ndeedyhåjtäm hajxy jecy wiädiän pactuum, carpa-tøbia'cä Dios hajxy hänajty wyiingudsähgø'øy. Tsajtøjcä carpa-tøy hajxy hänajty wia'añ. Hoy ñä'a majatiä carpa hajxy hänajty ñä'a tøy. Jaduhñä carpa-tøy hajxy yhädiuun nebiä Dios ja'a Moisés ja'a hijxtahnd jecy yaghijxiän coo jaduhñ piahädiúnät.

⁴⁵ Ja'a nhaphajt ja'a ndeedyhåjtäm hajxy, ja'a hajxy jaac pühwäbä jaac hí'cäbä, tehngahnä cuhdujt hajxy hänajty jiaac panøcxy coo ja'a Dios hajxy hänajty wyiingudsähgø'øy carpa-tøbia'c. Jaduhñ hajxy hänajty jiaac paduññä mänaa ja'a Josué hajxy jim wioonøcxyijän wiinghagajpt maa ja'a wiingjäya'ay hajxy hänajty chäna'ayän. Coo ja'a

nhaphajt ja'a ndeedyháltämä naax hajxy ñädägøøyy tsiptuumbä, ja'a Dioscøxpä hajxy miäjädaacy. Ja'a miädsiphajxy, cøjxä ñaax hajxy yhøxpäyø'øgy. Y coo ja'a David cujecy tiägøøyy gobiernähajpä, je'enä ja'a nhaphajt ja'a ndeedyháltämä cuhdujt hajxy hänajty jiaac paduñ coo ja'a Dios hajxy hänajty wyiingudsähgø'øy carpa-tøbia'c, ja'a hajxy hänajty tøø jiaac tehñ piú'uyäbä, ja'a hajxy hänajty tøø jiaac tehñ yhí'iguiäbä.

⁴⁶ Ja'a David, jaanč tehñ quiumaabiädsøøm jaaya'ay maa ja'a Diosän. Mänitä David ja'a Dios cuhdujt miäyujwaañ coo ja'a tsajtøjc yhädiúnät maa ja'a Jacob yhap yhoc ja'a Dios hajxy jaduhñ pia'yá'axät.

⁴⁷ Ca'a Diavitä ja'a tsajtøjc hädiuun ja'a Dioscøxpä. Ja'a David ja'a yhuung Salomón, je'edsä tsajtøjc jaanč hädiuun.

⁴⁸ Pero ja'a Dios tsajpootypä, cab jaduhñ tiehm yhity tsajtøgooty, ja'a jäya'ayhajxy yhädiuumbiä. Jaduhñä profeta tu'ug jecy quiujahy coogä Dios miänaañ:

⁴⁹ Høøch Dioshajp. Yaač nhäña'ay tsajpootyp.

Yaač nmähane'emy. Jiiby naaxwiin, jíbyhøchä ndecy nyaghity.

Cábøchä tøjc nyajmaajiaty maač nbóo'xät. Cab jaduhñ yhahixø'øy coo mijtsä tøjc xquiójjät.

Tiičhä tøjc jaduhñ nnä'a wá'anät.

⁵⁰ Haa ca'a, høøch cøxiä tøø nhuuc hädiuumbä mäduhñtiä yaa tsajpootypä møød jiiby naaxwiin, nømä Dios miänaañ.

⁵¹ Mänitä Esteban jiaac miänaañ:

—Ja'a mijtsä mhapä mdeedyhajxy ja'a jecypiä haampiä, jaanč tehñ quiuhxex hajxy hijty, nebiä Diosmädia'agy hajxy ca'a mæbøjpän. Jaanä jaduhñ mijtspä, caj mijtsä Diosmädia'agy mmæbøgaambä. Høxtä Dioshespíritupaady hajxy jaduhñ homiänaajä mmädsiphaty.

⁵² Ja'a mijtsä mhapä mdeedyhajxy ja'a jecypiä haampiä, quiøxy jaamduun quiøxy tsaächtuuun ja'a profetadøjc hajxy jecy, ja'a Dios hänajty tøø wyiinguéxiäbä coo ja'a mädia'agy hajxy yajwá'xät coogä Dios ja'a yHuung hänajty yaa quiexa'añ hädaa yaabä naaxwiin, ja'a pojpä cädieey ca'a møødpä. Høxtä yagho'cä ja'a profetadøjc-hajxy jaduhñ. Y coo ja'a Dios yHuung yaa jiaanč cädaacy, mänit mijts mgø'øyejcy coo yagho'ogøøjät.

⁵³ Coo ja'a Dios ja'a Moisés cuhdujt jecy miooyy, ja'a Diosmoonsä ja'a Moisés najscapxøøyyä, ja'a jim tsohmä tsajpootyp, mänit mijtsä mhapä mdeedy ja'a cuhdujt hajxy jaduhñ mioodiägajtsä. Hoyyä Diosmoonsä ja'a cuhdujt hajxy jia yejcy, cab hajxy jaduhñ mgudiuñ —nømä Esteban miädiaacpædøøyy.

⁵⁴ Coo ja'a teedywiindsønhajxy jaduhñ miädooyy nebiä Esteban hänajty miädia'aguiän, mänitä Esteban hajxy jaduhñ jiaanč tehñ miäjootma'ty. Høxtä tøøtscädajp hajxy hänajty.

⁵⁵ Pero cabä Esteban jaduhñ ñä'a møjpädaacy. Hix, miøødhajpiä Esteban ja'a Dioshespíritu hänajty. Mänitä Esteban yuughee'py tsajpootyp. Mänit jaduhñ yhiijxy coo jim jiaanč tehñ yajxonä maa ja'a Dios yhäña'ayän. Mänitä Jesús jaduhñ yhijxäbä coo jim yhäñaabiä maa ja'a Dios ñähmøjcän yhahooyhaamby.

⁵⁶ Mänitä Esteban miänaañ:

—Huug hix hajxy. Jaduhñhøchä tsajt nhixy nebiä hawa'adspän. Ximä Jesucristo yhäña'ay Diosnähmøjc maa yhahooyhaampiän.

⁵⁷ Mäduhñtiä jäya'ayhajxy hänajty yhamädoowhity, mänit hajxy ñidiaatsmo'xä; haa ca'a, cab hajxy hänajty tehngahnä miädoowaannä nebiatiä Esteban hänajty miädia'agy. Mänit hajxy tiägøøyy yaaxpä jojpä møcjaty. Mänitä Esteban yajmujcä.

⁵⁸ Mänit yajnøcxä cajtpa'a hadsip. Ja'a häna'cä Esteban hajxy hänajty tøø ñähwaambétiäbä, mänitä jiocxwit hajxy nägøxiä yhøxchijy. Jimä høxcujc-häna'c hänajty tu'ug piädäna'ay, ja'a hänajty xøhajpä Saulo. Mänitä Saulo ñämaayyä coo ja'a jiocxwithaxxy cwieendähältäxät. Mänitä Esteban tiägøøyyä ca'adshó'cäbä.

59 Jimä Esteban hänajty quia'adsho'ogyii, mänit tiägøøyy Diospa'yaaxpä. Mänit miänaañ:

—Wiindsøn Jesús, tunä mayhajt, høøch njuøhñdy jim wiingpøjcäc tsajpootyp.

60 Mänitä Esteban jyijcädaacy. Mänit møc yaaxy:

—Dios, ca'a jaduñ mmøjpäda'agy nébiøch yø'ø häna'c xchaaçhtiuñän, hoy jia møjpoj jia møjcädieeyä.

Coo ja'a Esteban jaduñ jiaac tehñ quiapxy, mänit yho'nä.

8

1 Y ja'a Saulo, quiumaayy je'eduhñ coo ja'a Esteban yagho'cä.

Ja'a mänitxøøbä ja'a mäbøjpädøjc-hajxy tiägøøyyä jaamduun tsaächtiúunäbä jim Jerusalén. Mänit hajxy xii yaa ñøcxøøyy. Näje'e hajxy miähmøøyy Judea-naaxooty wiinduhmyhagajpt. Näje'e hajxy ñøcxøøbiä Samaria-naaxooty. Jagooyyä ja'a apóstolädøjc-hajxy jim jiaac mähmøøyy Jerusalén.

2 Mänitä dijuuntä Esteban hoy yajnaaxtägø'oyii. Näje'e jäya'ayhajxy hoy miäyajnaaxtägø'oy, pønjataiä hojioot hänajty møød. Hoyhoyyä Esteban ñäjøøyy ñäxuu'tsä.

3 Y ja'a Saulo, tehngahnä ja'a mäbøjpädøjc hänajty jiaamduñ chaaçhtiuñ wiinduhmyhagajpt. Høxtä jäya'adiøgootypaadiä Saulo hänajty tiägø'oy. Pønjataiä hänajty yajpaatp tiøgooty, mänit hajxy hänajty yhøxwich yhøxwooñii, ja'a ya'adiøjc ja'a to'oxiøjc.

4 Y ja'a mäbøjpädøjc-hajxy, ja'a hajxy hänajty tøø chóoñäbä Jerusalén, je'enä ja'a Diosmädia'agy hajxy hänajty tehngahnä yajwa'xy ja'a Jesúscøxpä, majaty hajxy hänajty wiädity.

5 Høxtáhmdsä craa Felipehajpä, coo jim chohñ Jerusalén, mänit jim ñøcxy Samaria-cajptooty. Coo jim miejch, mänit jaduñ tiägøøyy mädiaacpä ja'a Jesúscøxpä, coo hänajty je'e Dyiosquexiä.

6 Mayyä jäya'ayhajxy hänajty yhamugø'oy mädia'agyhamädoowhijpä waambatiä Felipe hänajty miäna'añ. Madiu'u ja'a Felipe hoy-yagjuøøñäjatypä hänajty yajcähxø'ogy, paadiä miädia'agy hänajty jiaanç tehñ yhamädoowhijtäxä.

7 Pønjataiä haxøøgpä ca'a hoybä hänajty møød, mänit hajxy nämay pia'amnajxy. Yáaxäp jójcäbä haxøøgpä ca'a hoybähajxy hänajty piädsømy. Jaduhñä cø'ømucypiä tecymiuçyipiähajxy hänajty miøcpøjpä møødä tecymia'adpähajxy.

8 Paadiä cu'ughajxy hänajty jiaanç tehñ xioonda'agy jim Samaria.

9-11 Jimä jäya'ay hänajty tu'ug xiøhaty Simón. Tøø ja'a magia-wiinmahñdy hänajty jejcy tiuñ jim Samaria. Tøø ja'a Simón ja'a jäya'ay hänajty jim may jiaanç tehñ wyiinhøñ. Jaduhñä Simón hänajty ñiñänømyii cooc tyijy jiaanç tehñ miøj jiaanç tehñ jiaançhä, je'eguiøxpä cooc tyijy ja'a magia hänajty jiaanç tehñ jiaty. Madiu'u ja'a Simón ja'a hoy-yagjuøøñäjatypä hänajty jiaanç tehñ yajcähxø'ogy, paadiä miädia'agy hänajty jiaanç tehñ miäbøjcäxä nägøxiä høxtä ja'a møjtøjcpaady:

—Yø'ø Simón, jue'eda'a yø'ø, Dioswiinguexiäda'a yø'ø, paadiä møcmäjaa jaduñ jiaanç tehñ miøødä.

Jaduhñä Simón hänajty ñänømyii ja'a cú'ugäm.

12 Jaduhñä Felipe hänajty yajnähixø'oy coogä Dios yhane'emy ja'a miøcmäjaahaam, møød coogä Jesús Dyioswiinguexiä. Mänitä jäya'ayhajxy may miäbøjcy näya'ay nädo'oxy. Mänit hajxy nägøxiä hoy ñäbety.

13 Y ja'a Simón, miäbøjc je'eduhmbä. Mänit hoy pianäbejpä. Mänitä Simón ja'a Felipe tiägøøyy møødwädijpä. Yagjuøøbiä Simón hänajty nebiä Felipe ja'a hoy-yagjuøøñäbä hänajty yajcähxø'oguiän.

14 Y ja'a apóstoldøjc-hajxy, ja'a hajxy hänajty tøø miähmø'oyäbä Jerusalén. Mänit hajxy miädoyhajty coogä cu'ug ja'a Diosmädia'agy hajxy hänajty tøø jiojpoøgø'oy jim Samaria. Mänitä Pedrohajxy jim quiejxä møødä Juan.

15 Coo hajxy jim miejch Samaria, mänit hajxy tiägøøyy Diospa'yaaxpä ja'a mabøjpädøjcøxpahajxy, weenä Dioshespíritu hajxy nägøxiä yhadägø'øyy jioottägø'øyyii.

16 Hix, cahnä Dioshespíritu hänajty pøn yhadägø'øyy jioottägø'øyyii. Tøø hajxy hänajty jia näbety ja'a Jesúscøxpä. Cahnä hajxy hänajty miädoyhatyñä ja'a Dioshespíritucøxpä.

17 Coo ja'a Pedrohajxy Dyiospa'yaaxpädøøyy møødä Juan, mänitä mabøjpädøjc-hajxy quiø'ønähxajjä. Mänit hajxy yhadägøøyy jioottägøøyyä ja'a Dioshespíritäm.

18 Y ja'a Simón, coo jaduhñ yhjy, mänitä Pedro xädø'øñ hajxy jia yajmähawaanøøyyä.

19 Mänitä Simón miänaañ:

—Høøch yø'ø mäjaa jaduhmbä yaghabøjcäc. Hix, cooch pøn jaduhñ ngø'ønähxájät, tehñ jiaduhñ je'e yhadägøøyy jioottägøøyyäbät ja'a Dioshespíritäm.

20 Mänitä Pedro yhadsooyy:

—Coo miich jaduhñ mwi'i tiajy mwi'i miay coo højts miich ja'a Diosmäjaa nyaghabøgät juyhaam, paady miichä Dios xyajcuhdägoyya'añ møødä mxädø'øñ. Hix, ñä'ä yejpiä Dios jaa miäjaa jaduhñ, caj pøn yajmädoogy.

21 Caj miich cuhdujt mnä'ägädä møødä coo højts miich ja'a Diostuung xmiøødtúnät, je'eguiøxpä coo miichä mwiinmahñdy quia'a nä'ägädä hoyyä ja'a Dioscøxpä.

22 Najtshixø'øw ja'a mhaxøøgwiiinmahñdy jaduhñ. Jímädä Dios xñä'ä mämée'xät coo mmänuu'xtá'agät.

23 Tøøch miich nhøxcapy coo miichä mhaa mjoot jiaanç tehñ yhaxøøgä, møød coo miich haxøøg mjaanç tehñ tiajy mjaanç tehñ miay mjoodooty mgopcooty.

24 Mänitä Simón yhadsooyy:

—Huuc tunä mayhajt hajxy, huuc Diospa'ya'ax hajxy ja'a høøhcøxpä, jaduhñhøchä Dios xquia'a yajcumädówät nébiøch hajxy tøø xyajmøødmädia'aguiän —nømä Simón miänaañ.

25 Jimä Pedrohajxy hänajty jiaac capxy jiaac mädia'agy ja'a Jesúscøxpä møødä Juan, nebiaty hajxy hänajty tøø yhamdsoo yajnähixø'øyyii ja'a Jesúsäm. Mänit hajxy wyiimbijnä, mänit hajxy jim ñøcxtägajch Jerusalén näguipxy møødä Felipe. Tu'haamnøcxpä, nøødänáyyäp tu'udänáyyäp hajxy hänajty ñøcxy. Majatiä cajpthuung jim Samaria-naaxooty, jaduhñä Diosmädia'agy hajxy hänajty yajwa'xy nebiä cu'ugä piojpa quiädieeybä ñähwa'ads quiuhwá'adsät.

26 Coo hajxy jim quioo'ty Jerusalén, mänitä Felipe ja'a Diosmóonsäm tu'ug ñämaayyä, ja'a jim tsohmä tsajpootyp:

—Nøcxø'øw jim jøømboj mänajpä. Ja'a møjtu'u mbanøcxäp, ja'a jim nøcxpä maa ja'a cajpt jaduhñ xiøhatiän Gaza.

Ja'a møjtu'u jaduhmbä, pactuum jaduhñ ñøcxø'øyy.

27-28 Mänitä Felipe jiaanç tu'ubøjcy. Ja'a tu'haamnøcxpä, mänitä Felipe ja'a jäya'ay tu'ug piaaty, ja'a hänajty tsohmä Etiopía. Tøø jaaya'ay hänajty yhoy Jerusalén Dioswiingudsähgøøbiä. Quiajptooty hänajty ñøcxnä. Eunuco je'e. Møjtuung hänajty jim miøød maa ja'a ñaax maa ja'a quiajptän. Xädø'øñgwieendähajpä hänajty jim tiuumby. Ja'a reina mioonsä hänajty je'eduhñ, ja'a hänajty jim mähanehmä Etiopía. Carretajooty jaaya'ay hänajty ñøcxy nocyhéepäp. Jue'e hänajty quiapxyp, ja'a nocy ja'a Isaías jecy quiujähyyäbä, ja'a jecy túunäbä profeta.

29 Mänitä Felipe ñämaayyä ja'a Dioshespíritäm coo jim miøjwá'agät carretawiinduum.

30 Coo ja'a Felipe jim jiaanç møjwa'cy carretawiinduum, mänitä Felipe miädooyy coo ja'a Etiopíabä jäya'ay ja'a nocy hänajty quiapxy, ja'a Isaías jecy quiujähyyäbä. Mänitä Felipe jaaya'ay miäyajtøøyy:

—Nej, mwiinjuøøby miich jaduhñä nebiaty mgapxiän.

31 Mänitä jaaya'ay yhadsooyy:

—Cábøch nwiinjuø'øyy. Cábøch pøn nmøødä pønñøch jaduhñ xquiapxtøøwäp.

Mänitá Felipe ñämaayyá coo jim̄ piédät carretajooty, coo jim̄ yhøxtá'agät maa ja'a Etiopíabä jäya'ay ñähmøjcän.

³² Jaduhñä jaaya'ay hänäjty quiapxy:

Hadsipä mähdiøjc yajnøcxä maa ja'a yagho'taactän, jaduhñ nebiä meeg yajnøcxyiijän maa ja'a yagho'taactän.

Cabä mähdiøjc waamb ñä'ägädä capxy;

jaduhñ hamoñ yhiyty nebiä meeg hamoñ yhitiän coo ñähme'xyii.

³³ Hochähdiuunnä ja'a mähdiøjc yagho'cä.

Cab jaduhñ pøn ñähgapxtuuty.

Cabä ñøøxä miajc miøødhajty; hix, tøø ja'a jiugyhajt hänäjty yaa quiøjxnä hädaa yaabä naaxwiin.

³⁴ Mänitá Felipe ñämaayyá:

—Tuñä mayhajt, høøch huuc hawáañäc, coo ja'a Isaiás jaduhñ jecy quiujahy, pøn jaduhñ miädiaac, wiingjäya'ay tøgä je'eguiøxpä —nømä Etiopíabä jäya'ay yajtøøyy.

³⁵ Mänitá Felipe tiägøøyy capxtøøbä waambaty hänäjty jaduhñ miädia'agytiägø'øy. Mänit miädiaacy ja'a Jesúscøxpä, coo hajxy hoy xñähho'túutäm.

³⁶ Weeñtiä hajxy jaduhñ jiaac yohy carretajooty, mänitá nøø hajxy piaaty. Mänitá Etiopíabä jäya'ay miänaañ:

—Xii nøø. Nej, cab jaduhñ yhahixø'øyä cooch nnäbétädä.

³⁷ Mänitá Felipe yhadsooyy:

—Hahixøøby jaduhñ pø tøyhajt jaduhñ mmäbøcy hamuumdu'joot.

Mänitá Felipe yhadsoowä:

—Nmäbøjpiøch jaduhñ coo ja'a Jesucristo Dyioshuungä.

³⁸ Mänitá Etiopíabä jäya'ay ja'a carreta yajyajtänaaxiøjpä. Mänitá Felipehajxy nämetsc quiarretamänajcy, møødä Etiopíabä jäya'ay. Mänit hajxy nämetsc ñøødägøøyy. Mänitá Etiopíabä jäya'ay ñäbejty.

³⁹ Coo hajxy ñøøbädsøømgumbä, mänitá Felipe wiingtuum yajnøcxä ja'a Diosh-espíritäm. Cabä Felipe yhiyxtägäjsänä ja'a Etiopíabä jäyá'ayäm. Xoondáacäp ja'a Etiopíabä jäya'ay ñøcxnä.

⁴⁰ Y ja'a Felipe, mänit jim̄ miehch maa ja'a cajpt hänäjty xiøhatiän Azoto. Mänit tiägøøyy wädijpä cajpt-cajpt. Yajwa'xypä Felipe ja'a Diosmädia'agy hänäjty nebiä cu'ugä piojpä quiädieeybä ñähwa'ads quiuhwá'adsät. Mänit jim̄ miehch Cesarea.

9

¹ Y ja'a Saulo, tehngahnä ja'a mäbøjpädøjc hänäjty yhadsähgø'øy yhajuø'øy coo hajxy hänäjty yagho'oga'añii, pønjaty hänäjty mäbøjp ja'a Jesúscøxpä. Coo ja'a Saulo hänäjty jaduhñ tehngahnä jia wi'i miähadsähgø'øwa'añ, paady jim̄ ñøcxy maa ja'a teedywi-indsønän.

² Mänitá Saulo cuhdujt miooyyä nocyhaam coo jim̄ ñøcxät Damasco, coo ja'a mäbøjpädøjc-hajxy jim̄ yhøxta'awøøjät wiinduhmçhajtøjc, majatiä judíoshajxy hänäjty yhamugø'øyän. Jaduhñä Saulo hänäjty tiajy miay coo ja'a mäbøjpädøjc-hajxy hänäjty jim̄ nøcxy chuma'añii Jerusalén, ya'adiøjcä tio'oxiøjcä.

³ Mänitá Saulohajxy tiu'ubøjcy møødä jiamioød nämetsc nädägøøg. Ja ween hajxy hänäjty jim̄ quia'a mech Damasco, mänitá Saulo jøøn møc quiuhajcädaacä wäditiä. Tsajpootypä jøøn chohñdaacy.

⁴ Mänitá Saulo quiädaayy. Mänit miädooyy coo jäya'ay hänäjty tu'ug quiapxy:

—Saulo, Saulo, tiich miich jaduhñ coo xwyi'i miädsibø'øy.

⁵ Mänitá Saulo yajtøøyy:

—Wiindsøn, pøn miich jaduhñ.

Mänit yhadsoowä:

—Jesúshøch høøch. Høøch miich jaduñ xwyi'i miädsibøøby. Cooch miich jaduñ xwyi'i miädsibø'oy, hamdsoo miich jaduñ mnichaaçhtiuñii.

⁶ Tsähgøøyy tsäyúuyyábä Saulo yajtóøgumbä:

—Wiindsón, neby yhahixø'oy njatcø'owädøch.

Mänit yhadsóowägumbä:

—Pädø'øg, nøcx cajptooty. Jim häna'c xyhawáanät nej mjatcø'owät.

⁷ Y ja'a Saulo jiamiøødhajxy, coo hajxy jaduñ miädooyy nebiatiä Saulo hänajty tøø miägapyiijän, jaanç tehñ chähgøøyy hajxy jaduñ. Hix, cab hajxy pøn yhiijxy. Høxtä hahuum høxtä hawiinds hajxy miähmøøyy.

⁸ Mänitä Saulo jiaanç tänaayyø'cy. Coo jaduñ jia wiindøø'xy, cab jaduñ tii yhiijxy. Hix, tøø hänajty wyiinxooch. Coo hajxy jaduñ tiu'ubøjtägajch, wichhaamä Saulo jim yajmejtsä Damasco.

⁹ Tägøøgxøø ja'a Saulo jim yhiijty wiinxoods Damasco. Ni quia'a cay ni quia'a hu'ugy hänajty tii.

¹⁰ Jimä jäya'ay hänajty tu'ug chäna'ay Damasco, ja'a hänajty xøhajpä Ananías. Tøø ja'a Diosmädia'agy hänajty miäböcy. Mänitä Ananías ja'a Jesús wyiinhijxy haguma'ayhaam. Mänitä Ananías miägaxä:

—Ananías.

Mänit yhadsooyy:

—Wiindsón, chaaç høøch, tisän.

¹¹ Mänitä Jesús miänaañ:

—Pädø'øg. Nøcx jim maa ja'a mõjtu'u jaduñ xiøhatiän Tødiu'u. Jimä jäya'ay tu'ug chäna'ay, ja'a xøhajpä Judas. Jimä craa tu'ug yhahity, ja'a xøhajpä Saulo. Jim je'e chooñ maa ja'a cajpt xiøhatiän Tarso. Diospa'yaaxp jim jadunajtä maa ja'a Judas tiøjcän. Coo jim mmédsät, mänitä Saulo myajtówät.

¹² Tøø miichä Saulo xwyiinhixy haguma'ayhaam coo miich hoy mnähdoñ, jaduñ yhiixtägätsät.

¹³ Coo ja'a Ananías jaduñ miädooyy, mänit miänaañ:

—Wiindsón, tøøch jaduñ mayhooc nmädoyhaty nebiä craa Saulo naxy jiatcø'oy jim Jerusalén. Náxiägä mäbøjpadøjc-hajxy jim jiaamduñ chaaçhtiuñii, ja'a miichä mmädia'agy hajxy xmiäböjcbä.

¹⁴ Jaduhñhøch tøø nmädoyhajpä coogä cuhdujt jim miooyyä coo ja'a mäbøjpadøjc-hajxy yaabä yajnøcxøøjät jim Jerusalén, coo hajxy jim chúumäbät, pønjaty miich jaduñ yaa xquiapxpaatp. Ja'a teedywiindsønä cuhdujt hajxy jaduñ yejc. Hoorä, tøø ja'a Saulo yaa miejtsnä Damasco —nømä Ananías miänaañ.

¹⁵ Mänitä Jesús ja'a Ananías ñämáaguumbä:

—Tsógäm, nøcx cudiún nébiøch miich tøø nhane'emiän. Tøøchä Saulo nyajnähdiij coo miädiä'agät ja'a høøchcøxpä jim maa ja'a israelitahajxiän, møød jim maa ja'a ca'a israelitahajxypän, møød jim maa ja'a guiobiernähajxiän.

¹⁶ Høøchä Saulo nyajnähdiijaamby mäduhñtiä jaduñ yhahixø'oy chaaçhpøgät ja'a høøchcøxpä.

¹⁷ Mänitä Ananías jiaanç nøcxy maa ja'a Saulo hänajty tøø miejtsta'aguiän. Coo ja'a Ananías tiøjtägøøyy, mänitä Saulo quiø'ønähgajpä. Mänit ñämaayyä:

—Mägu'ughajpä Saulo, ja'a Jesús miich jaduñ jim mhijx tu'haammiimbä. Jaayá'ayhøch jaduñ yaa tøø xquiexy nej miich jaduñ mhixø'tägätsät hoy. Y jaduñ miichä Dioshespíritu xyhadägø'ow xjiøottägø'owät.

¹⁸ Tuunä ja'a Ananías jaduñ ñä'ä mänaañ, mänitiä Saulo wyiingahduutä nebiä tsaamghacän. Mänitä yhiixø'tägajch. Mänit tiänaayyø'cy. Mänit hoy ñäbety.

¹⁹ Mänit quiaayy yhuucy. Møcøjc je'e jaduñ. Mänit jim jiaac mähmøøyy mejtsxøø tægøøgxøø Damasco maa ja'a mäbøjpadøjc-hajxiän.

²⁰ Mänitä Saulo tiägøøyy mädia'agy-yajwa'xpä wiinduhm̄chajtøjc jim̄ Damasco maa ja'a judíos chajtøjc-hajxiän. Jaduhñ hñanjty miädia'agy coogä Jesús Dyioshuungä.

²¹ Pønjaty ja'a Saulo miädia'agy hñanjty hamädoowhíjtáp, jiaanč tehñ yagjuøøby hajxy hñanjty jaduhñ nebiä Saulo hñanjty miädia'aguiän ja'a Jesúscøxpä. Mänit hajxy tiägøøyy niñámáyyäbä:

—Yø'ø craa Saulo, jue'e yø'ø, yø'ø ja'a mábøjpädøjc jim̄ wi'i miädsibøøby Jerusalén, pønjatiä Jesús capxpaatp. Paady yø'ø yaa tøø piejpä Damasco coo ja'a mábøjpädøjc-hajxy yaa miäjtsäbät, møød coo hajxy jim̄ yajnøcxøød Jerusalén hadsip, jaduhñ hajxy jim̄ nøcxy quiø'øyegyii maa ja'a teedywiindsøn̄hajxiän —nømä Saulo ñänøømä.

²² Y ja'a Saulo, tehñgahnä hñanjty hamøj jootmøj jiaty coo ja'a tsaanä cu'ug hñanjty yajwiinxiic yajwiingapxø'oy coogä Jesús Dyioswiinguexiä. Jaanč tehñ homiäbøjnä hñanjty miädia'agy. Y ja'a judíoshajxy, ja'a hajxy hñanjty jim̄ tsänaabiä Damasco, cabä Saulo hajxy hñanjty hoy quiapxhaduga'añ, je'eguiøxpä coo Saulo hñanjty miädia'agy hamøj jootmøj.

²³ Cujecy, mänitä judíoshajxy jim̄ yhamugøøyy. Mänit hajxy quiojyquiapxytiuuñ coogä Saulo hajxy hñanjty yagho'oga'añ.

²⁴ Xøømdsuhmä Saulo hñanjty miäxojna'ayii mäduhñjatiä tægø'øwøødiaactän maa ja'a Damasco-cajpt jiuhmuu'tswädiän. Mänitä Saulo jaduhñ miädoyhajty cooc hñanjty yagho'oga'añii.

²⁵ Mänitä mábøjpädøjcä Saulo hajxy coods piädaacy mõjcachjooty. Mänit hajxy quiuhdøøñajxy maa ja'a cajpt hñanjty piquiä yhamuudsø'øguiän. Jaduhñsä Saulo piäyø'cy.

²⁶ Coo Saulo jim̄ chohñ Damasco, mänit jim̄ ñøcxtägajch Jerusalén. Coo jim̄ quioo'ty, mänit jim̄ ñøcxøøyy maa ja'a mábøjpädøjc-hajxiän. Pero je'enä ja'a Saulo hajxy hñanjty nägøxiä jiaanč tehñ chähgø'oy. Hix, cab hajxy hñanjty ñajuø'oy pø mábøjp hñanjty je'ebä.

²⁷ Jimä mábøjpä hñanjty tu'ug xiøhaty Bernabé. Je'e mábøcypiä, cab hñanjty chähgø'oy. Mänitä Bernabé ja'a Saulo wioonøcxy maa ja'a apóstoldøjc-hajxiän. Mänitä Bernabé ja'a apóstoldøjc yajmøødmädiaacy coogä Saulo ja'a Jesús hñanjty tøø wyiinhixy tu'haamnøcxpä jim̄ Damasco-mäwiingón, møød coogä Jesús ja'a Saulo jim̄ miägapxy, møød coogä Saulo tiägøøyy mädiaacpä hamøj jootmøj jim̄ Damasco ja'a Jesúscøxpä. Jaduhñä Bernabé ja'a apóstoldøjc yajmøødmädiaacy ja'a Saulocøxpä.

²⁸ Mähmøøyy ja'a Saulo jim̄ Jerusalén. Mänitä Saulo ja'a apóstoldøjc tiägøøyy møødwädiäjpä. Mänitä mädia'agy tiägøøyy yajwa'xpä ja'a Jesúscøxpä hamøj jootmøj.

²⁹ Jimä judíoshajxy hñanjty näje'e, hagriego hajxy hñanjty yhayuuc-hajpy. Mänitä Saulo tiägøøyy møødyajcapxiøøbiä ja'a Jesúscøxpä. Pero cabä judíoshajxy jaduhñ yhojiäwøøyy. Mänit hajxy wyiinmaayy coo ja'a Saulo hajxy yagho'ogät.

³⁰ Coo ja'a mábøjpädøjc-hajxy jaduhñ miädoyhajty coogä Saulo hñanjty yagho'oga'añii, mänitä Saulo hajxy miøødnøcxy jim̄ Cesarea. Coo hajxy jim̄ miejch, mänitä Saulo hajxy quiejxtägajch Tarso.

³¹ Mänitä tsip jaduhñ yhamaadiujnä ja'a mábøjpädøjcøxpähajxy, mäduhñjaty hajxy hñanjty xii yaa chäna'ay, møød jim̄ Judea, jim̄ Galilea, jim̄ Samaria. Tehñgahnä mõcmäjaa hajxy hñanjty mio'oyii jøjwidsø'ø ja'a Dioshespíritäm, paady hajxy hñanjty jabom̄-jabom̄ miayø'oy.

³² Y ja'a Pedro, wiinduhm̄chajtøjc hñanjty wiädity mäduhñjatiä mábøjpädøjc-hajxy hñanjty chäna'ay. Mänit jim̄ ñøcxøøbiä maa ja'a cajpt hñanjty xiøhatiän Lida. Jimä mábøjpädøjc-hajxy hñanjty chänaabiä.

³³ Jimä jäya'ay hñanjty tu'ug pia'amgo'na'ay, ja'a hñanjty xøhajpä Eneas. Tuctujcjumøjt hñanjty tøø piøgyii. Jue'e hñanjty je'e, cø'ømucy tecymiucy. Coo ja'a Pedro jim̄ miejch Lida, mänit jim̄ ñøcxy maa Eneas tiøjcän.

³⁴ Mänitä Pedro miänaañ:

—Eneas, ja'a Jesucristo miičh xyajmøcpøgaamb. Pädø'øg. Pädit yø'ø mgøjxt.

Tuunä ja'a Eneas jaduhñ ñä'ä nämäaayy, mänitiä jiaančh pädø'cy.

³⁵ Mäduhñtiä jäya'ayhajxy hänajty chäna'ay jim Lida møød jim maa ja'a joy hänajty xiøhatiän Sarón, coo hajxy jaduhñ miädoyhajty coogä Eneas hänajty tøø pia'amnaxy, mänitä Eneas hajxy nägøxiä hoy yhixy coo tøø jiaančh møcpøcy. Mänitä Diosmädia'agy hajxy tiägøøyy mæbøjpä ja'a Jesúscøxpä. Mänitä yhamdsoo cuhdujt hajxy ñajtshixøøñä.

³⁶ Jimä tadjäya'ay hänajty tu'ug chäna'ay maa ja'a cajpt hänajty xiøhatiän Jope. Tabita ja'a tadjäya'ay hänajty xiøhaty arameo-ayuuc-haamby. Hagriegohaamby, jue'e hajxy hänajty tyijy Dorcas. Jaduhñ miädia'agytägø'øy "Gacela." Hoorä, ja'a Dorcas, miäbøjpiä Diosmädia'agy hänajty je'e, paadiä häyoobädøjc hänajty naxy piuhbety, pønjaty hänajty tii vajmaajiajp. Jaančh tehñ yhooyä Dorcas hänajty jiäya'ayhaty.

³⁷ Mänitä Dorcas pia'ambejty. Mänit yho'cy. Mänitä ho'ogyjiäya'ay hajxy yajtsiyy. Mänit hajxy hoy piäda'agy cøxp nähbettøgooty.

³⁸ Jim Jope, wiingón hänajty jim Lida maa ja'a Pedro hänajty yhitiän. Hoorä, ja'a mæbøjpädøjc-hajxy hänajty jim tsänaabiä Jope, coo hajxy jaduhñ miädoyhajty coogä Pedro hänajty jim wiädityñä Lida, mänitä cugapxy hajxy metsc quiejxy coo Pedro paquiä yhuuc nõcxät jim Jope maa ja'a Dorcas hänajty tøø yho'oguiän.

³⁹ Mänitä Pedro jiaančh panøcxy. Coo hajxy jim miehch Jope, mänitä Pedro wioonøcxä nähbettøgooty maa ja'a ho'ogyjiäya'ay hänajty wyijtsna'ayän. Piquiä ja'a yaamgto'oxy ja'a ho'ogyjiäya'ay hajxy hänajty tøø piäda'agy. Wi'i jiøøby wi'i xiuu'tsp hajxy hänajty. Mänitä Pedro ja'a wit tucxy yaghixä mädyiijatiä Dorcas hänajty tøø yhädiuñ.

⁴⁰ Mänitä Pedro ja'a jäya'ay nägøxiä yhøxquejxpädsøømy. Mänitä Pedro jyijcädaacy. Mänit Dyiospa'yaaxy. Mänitä ho'ogyjiäya'ay wyiinhee'ppejty. Mänit miänaañ:

—Tabita, pädø'øg.

Mänitä Dorcas wyiindøø'xø'cy. Coo ja'a Dorcas ja'a Pedro yhijxy, mänitä Dorcas yhäñaayyø'cy.

⁴¹ Mänitä Pedro ja'a Dorcas wyidsø'cy. Mänitä Pedro ja'a mæbøjpädøjc quiuyaaxøøyy tøogooty møødä yaamgto'oxy. Coo hajxy tiøjtägøøyy, mänit hajxy yhijxy coo ja'a Dorcas hänajty tøø jiuypiojnä.

⁴² Mänitä mädia'agy paquiä wia'xy jim Jope cooc jaduhñ tøø jiuypiojcy. Mänitä jäya'ayhajxy may jiaančh mæbøjcy ja'a Jesúscøxpä.

⁴³ Mänitä Pedro jim jiaac mähmøøyy Jope maxiøø. Jim hänajty miejtsta'agy maa ja'a Simón tiøjcän, ja'a wajhacyajtøøtspä.

10

¹ Jimä jäya'ay hänajty tu'ug chäna'ay Cesarea, ja'a hänajty xøhajpä Cornelio. Soldado-wiindsøn hänajty tiuumby. Italia ja'a soldadohajxy hänajty chooñ. Nämäyä soldadohajxy hänajty jim yhity Cesarea.

² Hoyyä Cornelio ja'a Dios hajxy hänajty wyiingudsähgø'øy møødä yhuung møødä tio'oxy. Hojiootä Cornelio hänajty jiaančh tehñ miøød. Naxiä judíoshajxy hänajty piuhbodyii xädø'øñhaam, ja'a hajxy hänajty häyoobä. Jabom-jabomä Cornelio hänajty Dyiospa'ya'axy.

³ Mänacyxiøø hänajty jaduhñ, jimä Cornelio hänajty tiuñ xiajy tøogooty, mänitä Diosmoonsä tu'ug ñäguehxtøø'xy maa Cornelio hänajtiän. Tsajpootyp ja'a Diosmoonsä hänajty tøø chohnda'agy. Mänitä Diosmoonsä ja'a Cornelio ñämäaayy:

—Cornelio.

⁴ Coo ja'a Cornelio ja'a Diosmoonsä jaduhñ yhijxy, chähgøøyy jaduhñ. Jejcy-juøøby miähee'pnaayy. Mänit miäyajtøøyy:

—Wiindsøn, tii mdsojpy.

Mänitä Diosmoonsä yhadsooyy:

—Xquiumaaby miichä Dios jaduhñ coo miich tehñgahnä mba'ya'axy, mөөd coo miichä häyoobäjäya'ay naxy mbuhbety.

⁵⁻⁶ Jim Jope, jimä jäya'ay tu'ug chäna'ay mejypia'a, ja'a xөhjäpä Simón. Jue'e Simón tiuunghajpy, wajhacyajtөtsp. Jimä craa tu'ug yhäñña'ay maa ja'a Simón tiөjcän. Mejtstu'u ja'a craa xiөө, Simón mөөd Pedro. Jimä cugapxy mejtstägөөг mguéxät Jope, weenä Pedro jaduhñ nөcxy ñäma'ayii cooc miich yaa min xquiuhixy. Jaaya'ay jaduhñ xyhawáanäp tii miichä Dios xyajmädsojp coo mgudiúnät —nөmä Diosmoonsä miänaañ.

⁷ Coo ja'a Diosmoonsä wyiimbijnä, mänitä Cornelio ja'a mioonsä metsc quiuyaaxөөyy mөөdä soldado tu'ug. Dioswiingudsähgөөbiä soldado hänäjty. Miөөdnijiootpáatäbä Cornelio ja'a soldado hänäjty.

⁸ Mänitä Cornelio quiөxy yajmөөdmädiaacy waambaty hänäjty tөө ñäma'ayii ja'a Diosmóonsäm. Mänitä Cornelio ja'a mioonsä jim quiejxy Jope nädägөөг mөөdä soldado.

⁹ Cujaboom cujyxiөө, jim hajxy hänäjty tiu'uyo'oyñä. Ja ween hajxy hänäjty jim quia'a mech Jope. Y ja'a Pedro, mänit jim wyiimbejty tөjnähgөөxp Diospa'yaaxpä.

¹⁰ Jaanč tehñ yähó'cäbä Pedro hänäjty. Jaguiay hänäjty je'eduhñ. Jimä quiay hänäjty yaghoyөөyyäxä. Mänit jaduhñ wyiinhijxy

¹¹ coo ja'a tsajt hänäjty tөө yhawa'ačh. Mänit jaduhñ yhijxy coo tii jaduhñ quiuhdөөñaxyii nebiä poobwit crutypän. Mädaaxc-hitä poobwit hänäjty xiojtsө'öguiä. Jaduhñ hänäjty miänoonna'ay.

¹² Madiu'u animalhajxy hänäjty jim quiähxө'ögy poobwittөguiөxp, mөөdä hamädaaxtecypiähajxy, mөөdä tsahñdy, mөөdä muuxy.

¹³ Mänitä Dios ja'a Pedro ñämaayy:

—Pedro, pädө'ög. Yagho'og yө'ө animal maybä. Mänit mdsú'udsät.

¹⁴ Mänitä Pedro yhadsooyy:

—Wiindsón, caj; cábөch yө'ө animal jaduhmbä mänaa ndsu'učh. Hix, cab hөjts nguhdujt jaduhñ myiñ coo hөjts animal hoñä'a mädyiibä ndsú'udsät.

¹⁵ Mänitä Pedro ñämäayyägumbä:

—Tijátyhөch nyajnähdijpy coo hajxy mdsú'udsät, cab jaduhñ yhäñhixө'öy coo hajxy mwiingápxät —nөmä Dios miänaañ.

¹⁶ Tägөөghoocä Pedro jaduhñ miägäpxä, mänit yhijxy coo ja'a poobwit chajpəcumbä tsajpootyp.

¹⁷ Wyi'i tiajpy wyi'i miaabiä Pedro hänäjty tiiguiөxpä hänäjty jaduhñ coo tөө wyiinhixy. Y ja'a Cornelio quiugapxyhajxy, tөө ja'a Simón ja'a tiөjc hajxy hänäjty piáatänä.

¹⁸ Mänit hajxy mөc quiugapxөөyy pө jiibiä Simón Pedro jiaanč hity.

¹⁹ Y ja'a Pedro, je'enä hänäjty wyi'i tiajpy wyi'i miay tiiguiөxpä hänäjty jaduhñ coo tөө wyiinhixy. Mänitä Dioshespíritu ja'a Pedro ñämaayy:

—Mädow, xiiby miich häna'c nädägөөг xyhөxta'ay.

²⁰ Mänac, nөcx yө'ө häna'c yajtөjtägө'өw. Hoy jaduhñ coo mbanөcxät coo hajxy hänäjty wyiimbida'añ. Hix, hөөch yө'ө häna'c jaduhñ tөө nguexy coo miich jaduhñ xwioonөcxät maa ja'a quiajpthajxiän.

²¹ Mänitä Pedro jiaanč mänajcy. Mänitä Pedro ja'a häna'c nädägөөгpä ñämaayy:

—Hөөch Pedrohajp. Hөөch mijts xyhөxtaaby. Tiich mijts xwia'ana'añ.

²² Mänit hajxy yhadsooyy:

—Ja'a Cornelio hөjts tөө xquiexy, ja'a soldado-wiindsón. Jaanč tehñ yhojiäya'ay je'e. Dioswiingudsähgөөby je'e. Jiaanč tehñ chojpiä judíos ja'a Cornelio hajxy. Jiaanč tehñ quiumaaby hajxy jaduhñ —nөmä Pedro ñämaayyä.

²³ Mänitä Pedro ja'a häna'c nädägөөгpä ñämaayy coo hajxy tiөjtägө'өwät, mөөd coo hajxy jim miejtstä'agät. Cujaboom hajxy wyiimbijnä näguipty mөөdä Pedro. Näje'e ja'a mäbөjpädөjc-hajxy pianөcxpä, ja'a hajxy hänäjty jim tsänaabiä Jope.

²⁴ Cumaaxc hajxy jim miejch Cesarea. Jimä Cornelio hänajty yhahixy, møødä jiuju møødä miägu'ug, møødä miägu'ughajpähajxy.

²⁵ Coö ja'a Pedro jim miejch maa ja'a Cornelio tiöjcän, mänitä Cornelio ja'a Pedro yajpoo'xy. Mänitä Cornelio ja'a Pedro wyiinjiicädaacy. Wyiingudsähgø'øwaambiä Cornelio ja'a Pedro hänajty jaduhñ.

²⁶ Mänitä Pedro ja'a Cornelio ñämaayy:

—Tänaayyø'øg, ca'açh nDiosä. Nä'ä pajäya'ayhájþøch høøch nej miichän. Cab jaduhñ yhahixø'øy coöch miich xwyiingudsähgø'øwät.

²⁷ Mänitä Cornelio jiaançh tänaayyø'ocy. Mänit hajxy paquiä miädiaacy. Mänit hajxy tiöjtägøøyy maa ja'a Cornelio miägu'ughajpähajxy hänajty nämay tøø yhamugø'øyän.

²⁸ Mänitä Pedro miänaañ:

—Højts judíos-jäya'ay, jaduhñ højts nguhdujt myiñ coö højts jiiby nga'a tøjtagø'øwät maa jäya'ay tiöjc-hajxiän, ja'a hajxy ca'a judiöspä, nébiøch chaa tøø ndøjtägø'øyän. Coöchä Dios jaduhñ xyajwiinhijxy, jadúhñhøch tøø xyajwiinjuø'øy coö jaduhñ quia'a hahixø'øy coöch pøn nbéxät.

²⁹ Paady, coöchä Cornelio tøø xyajmøjya'axyii, páadyhøch jaduhñ tøø nga'a mäna'añ coöch hänajty nga'a mina'añ. Huuc tunä mayhajt, høøch huuc hawáañäc tiich jaduhñ coö tøø xyajmøjya'axyii.

³⁰ Mänitä Cornelio yhadsooyy:

—Maaxtøjcy mädagøøyy, yáabiøch hänajty nDiospa'ya'axy tøgooty. Mänacyxiøø hänajty je'e. Mänitä jäya'ay tu'ug ñäguehxtøø'xy høøch nwiinduum. Jaançh tehñ yhaambä wyit hänajty.

³¹ Mänitøch xñämaayy: “Cornelio, tøø miichä Dios xmiädoy coö jaduhñ jabom-jabom mba'ya'axy. Xquiumaaby miichä Dios jaduhñ coö miichä häyoobädøjc mnäxuuçh.

³² Capxyñäguex ja'a Simón Pedro jim Jope coö ween yaa myiñ. Jim jaduhñ yhahäña'ay maa ja'a craa Simónhajpä tiöjcän, ja'a wajhacyajtøøtspä. Mejypia'a mädoyyä chäna'ay. Coö ja'a Simón Pedro yaa miédsät, mänit miich jaduhñ xmiøødmädia'aga'añ.”

³³ Mänitøch häna'c jim njaançh quejxy coö miich nøcxy xwioy. Hoy jaduhñ coö tøø mmiñ. Paady højts yaa tøø nhamugø'øy coö højts miich mgapxy mmädia'agy nhamädoowhidáañäm nebiaty miichä Dios tøø xñajtscapxøøyyän coö højts jaduhñ xyajmøødmädiaactägätsät. Xyhijxp højtsä Dios jaduhñ coö højts hamuumdu'joot nmäbøga'añ —nømä Pedro ñämaayyä.

³⁴ Mänitä Pedro tiägøøyy mädiaacpä:

—Tøøch nwiinjuøøñä coö højtsä Dios tu'cuhdujt xchójcäm. Cabä Dios pøn hixy heeby piäda'agy. Tøyhajt jaduhñ.

³⁵ Pønjetiä Dios jaduhñ wiingudsähgøøby hamuumdu'joot, pønjaty hojiot møød, je'edsä Dios quiumaaby, homiädyii cajptä hajxy jia tsooñ.

³⁶⁻³⁷ Mänaa ja'a Juan tiägø'øyän mäyajnäbejpä, mänitä mädia'agy jim tiägøøyy yajwa'xpä Galilea-naaxooty cooc ja'a Dios ja'a Jesucristo hänajty quixa'añ maa ja'a israelita-jäya'ayhajxiän, majaty hajxy hänajty chäna'ay, jaduhñä piojpa quidiieeybä hajxy ñähwa'ads quihwá'adsät. Jaaya'ay hajxy nägøxiä nWiindsønhtëm.

³⁸ Nazaret ja'a Jesús hänajty chooñ. Mänitä Dios ja'a Jesús ja'a yhEspíritu miooyy møødä mäjaa. Jaduhñä Jesús wyiinguejxä coö wiädítät mayhajtuumbä. Pønjaty hänajty pøjcäp, yajpa'amnájxäp hajxy hänajty. Pønjetiä haxøøgpä ca'a hoybä hänajty møød, yajnhwáatsäp hajxy hänajty. Puhbéjtäbä Jesús hänajty ja'a Diósäm.

³⁹ Højts, hamdsoo højts nhijxy tijatiä Jesús jim tiuun Judea-naaxooty møød jim Jerusalén. Paady højtsä tøyhajt nmøødä coö tiøyyä. Mänitä Jesús miøjpahbejtä cruzcøp. Jaduhñ yho'cy.

⁴⁰⁻⁴¹ Pero cumaaxcä Dios ja'a Jesús yagjuypiojcy. Mänit højtsä Dios ja'a Jesús xyaghijxy coö hänajty tøø jiaançh juypiojcy. Cabä jäya'ayhajxy nägøxiä yhijxy. Jagooyyä højts

nhijxy. Paady hõjtsä Dios xyaghijxy coo hõjts hãnajty jaduhñ tøø xyajñãhdijy. Mãnit hõjtsä Jesús nmøødcaay nmøødhuucy.

⁴² Mãnit hõjtsä Jesús xwyiinguejxy coo hõjtsä Diosmãdia'agy nõcxy nyajwa'xy wiinduhmyhagajpt ja'a Jesúscøxpä, coo ja'a Dios ja'a Jesús tøø piãda'agy coo jãya'ayhajxy nãgøxiã yajtøyhajtyegøøjät, yho'oguiã, jiujuquiã.

⁴³ Jaduhñä profetadøjc-hajxy jecy quiujahy coogã jãya'ayã piojpä quiãdieey hajxy yajñãhwa'açh yajcuhwa'açhii, pønjatiã Jesús ja'a miãdia'agy mãbøjcãp.

⁴⁴ Cahnã ja'a Pedro hãnajty miãdiaacpãdø'oyñã, mãnit hajxy nãgøxiã yhadãgøøyy jioottãgøøyyã ja'a Dioshespíritã, pønjatiã Pedro ja'a miãdia'agy hãnajty hamãdoowhíjtãp.

⁴⁵ Y ja'a judíoshajxy, ja'a Pedro hajxy hãnajty tøø piameçhíjãbã, ja'a hajxy hãnajty mãbøjpã, coo hajxy jaduhñ yhiijxy coo ja'a jãya'ayhajxy ca'a judíoshajpã yhadãgøøyy jioottãgøøyyã, mãnit hajxy jiaançh tehñ yagjuøøyy.

⁴⁶ Hix, miãdoow ja'a judíoshajxy jaduhñ coo ja'a ca'a judíospãhajxy hãnajty wiinghayuuc miãdia'agy. Jaduhñä Dios hajxy hãnajty quiapxpaady coo miøjjã coo jiaançhã.

⁴⁷ Mãnitã Pedro ja'a judíos ñãmaayy:

—Neby hõjtsä Dioshespíritu xyhadãgøøyy xjioottãgøøyyãm, jaanã jaduhñ hädaa jãya'ayhajxy yaabã tøø yhadãgøøyy tøø jioottãgøøyyãbã, hädaa ca'a judíoshajxypã. Hahixøøby jaduhñ coo hajxy ñãbéjpat.

⁴⁸ Mãnitã Pedro ja'a jãya'ay ca'a judíospã jiaançh nãmaayy coo hajxy ñãbétãt ja'a Jesucristocøxpã. Mãnit hajxy hoy jiaançh nãbety. Mãnitã Cornelio ja'a Pedro ñãmaayy coo Pedro jim jiaac hídat mejtsxøø tãgøøgxøø maa ja'a Cornelio tiøjcãn.

11

¹ Mãnitã mãdia'agy jim wia'xy Judea-naaxooty wiinduhmyhagajpt coogã jãya'ayã Diosmãdia'agy hajxy hãnajty tøø jiojpcøgø'oy, ja'a hajxy ca'a judíospã. Jaduhñä apóstoldøjc-hajxy miãdoyhajty møødã mãbøjpcøgø'oy-hajxy.

²⁻³ Pero coo ja'a Pedro jim ñøcxtãgajch Jerusalén, mãnit ñãhojjã:

—Tii miichã jãya'ay hoy coo tøø mguhixy, ja'a hajxy ca'a judíospã. Tii hoy coo tøø mmøødcay coo tøø mmøødhu'ugy.

Ja'a mãbøjpcøgø'oy-hajxy jaduhñ mãnaan, ja'a hajxy hãnajty mãnaambã coo ja'a ca'a judíoshajxy tsipcøxp yajcircuncidarhájpãt nebiã judíoshajxy quiuhdujthatiãn.

⁴ Mãnitã Pedro quiøxy mãdiaacy tiiguioxpã hãnajty coo tøø yhoj Cesarea:

⁵ —Jimhøch hãnajty nDiospa'ya'axy maa ja'a cajpt xiøhatiãn Jope, mãnitøch nwiinhijxy coo tii hãnajty quiuhdøøñaxyii tsajpootyp nebiã poobwit crutypãn. Mãdaaxc-hit hãnajty xiojtsø'oguiã. Jaduhñ hãnajty miãnooñna'ay. Coo jaduhñ ñãaxcãdaacy maaçh hãnajtiãn,

⁶ mãnitøch jii by nguheebøøyy poobwittøjiooty. Mãnithøchã animal madiu'u nhijxy møødã hamãdaaxtecypiãhajxy, møødã hawa'anjatypã, møødã tsahñdy, møødã muuxy.

⁷ Mãnithøchã Dios xñãmaayy: “Pedro, pãdø'og. Yagho'og yø'ø animal. Mãnit mdsú'udsãt.”

⁸ Mãnithøch nhadsooyy: “Wiindsøn, caj, cáboch yø'ø animalduhmbã mãnaa ndsu'uçh. Hix, cab hõjts nguhdujt jaduhñ myiñ coo hõjtsã animal hoñã'ã mãdyiibã ndsú'udsãt.”

⁹ Mãnithøchã Dios jadãhooc xñãmãaguiumbã: “Tijãtyhøch nyajñãhdijpy coo hajxy mdsú'udsãt, cab jaduhñ yahixø'oy coo hajxy mwiingãpxãt.”

¹⁰ Tãgøøghøoc-høchã Dios jaduhñ xñãmaayy, mãnithøchã poobwit nhijxy coo çajpcumbã tsajpootyp.

¹¹ Mãnithøchã hãna'c nãdãgøøg xñãmejch maaçh hãnajty nmejtsta'aguiãn. Jim hajxy hãnajty tøø choñda'agy Cesarea.

¹² Mãnithøchã Dioshespíritu xñãmaayy cooçh tãhoocapxiã nbadu'ubøgãt. Mãnithøch njaançh møødnøcxy. Mãnit hädaa mãbøjpcøgø'oy-hajxy nãdãdujç piadu'ubøjpã. Jope hajxy

chooñ. Coo højts jim nmejch Cesarea, mänit højts jim ndøjtägøøyy maa ja'a craa Corneliohajpä tiøjcän.

13 Mänit højtsä Cornelio xyajmøødmädiaacy nébiägä Diosmoonsä tsajpootypä ñäguehxtøø'xiän ja'a Cornelio wyiinduum. Mänitägä Diosmoonsä ja'a Cornelio ñämaayy: "Jimä craa tu'ug yhity Jope, ja'a xøhajpä Simón Pedro. Capxyñäguex ja'a craa jaduhñ coo yaa myñät.

14 Coo yaa miédsät, mänit miičh xyhawaanaana nebiä mbojpä mgädieeybä hajxy mnähwa'ads mguhwa'adsät, møødä mhuung møødä mdo'oxy."

15 Cooch ndägøøyy mädiaacpä, mänitä Corneliohajxy yhadägøøyy jioottägøøyyä ja'a Dioshespíritäm, neby højts jayøbajt xyhuuc nägädaacämbän.

16 Mänitøch njahmiejtstaacy nebiä Jesús tähooc miänaañän: "Ja'a Juan, nøøhaam hijty miäyajnäbety. Tøyhajt jaduhñ. Pero mijts jaduhñ xyajnäbetaamb ja'a Dios yh-Espírituhaam", nøm højtsä Jesús xñämaayy.

17 Y coo hajxy tøø nmäbójcäm ja'a Jesucristocøxpä, paadiä Dios ja'a yhEspíritu hajxy tøø xmióoyyäm. Hoorä, ja'a jäya'ayhajxy ca'a judíospä, tøø ja'a Dios ja'a yhEspíritu mioobiä, neby hajxy tøø xmióoyyämbän. Pønñhøch høøch coochä Dios jaduhñ nnä'ä capxhadúgät —nømä Pedro miädiaacy.

18 Coo ja'a mäbøjpädøjc-hajxy jaduhñ miädoyhajty jim Jerusalén, mänit hajxy hamoñ haducy miähmøøyy. Mänitä Dios hajxy pia'yaaxy coo miøj coo jiaančhä. Mänit hajxy miänaañ:

—Ja'a jäya'ayhajxy ca'a judíospä, tøø ja'a cuhdujt hajxy mióoyyäbä coo ja'a Dios hajxy jiøjpøgø'owät, møød coo ja'a yhaxøøgcuhdujt hajxy ñajtshixø'owät, jaduhñ hajxy cøjxta'axiøø jiugyhádät nebiä Dios jiugyhatiän.

19 Tøøyyämä Esteban hänajty jim yagho'ogyii Jerusalén, mänitä mäbøjpädøjc-hajxy jim tiägøøyyä jaamdúunäbä tsaächtiúunäbä. Coo hajxy jim chohñ, näje'e hajxy jäguembaady ñøcxøøyy, Fenicia, Chipre, Antioquía. Coo ja'a Diosmädia'agy hajxy hänajty yajwa'xy ja'a Jesucristocøxpä homiaajä, jagooyyä judíos ja'a Diosmädia'agy hajxy hänajty yajñähixø'oyii. Pønjaty hänajty ca'a judíos, cab hajxy hänajty yajñähixø'oyii.

20 Ja'a mäbøjpädøjc-hajxy hänajty jim tsohmä Chipre møød Cirene, coo hajxy näje'e miejch maa ja'a cajpt hänajty xiøhatiän Antioquía, hopiønä Diosmädia'agy yajñähixøøyyä ja'a Jesúscøxpä, møødä judíoshajxy, møødä ca'a judíoshajxypä. Jaduhñ hajxy yajñähixøøyyä coo ja'a Jesús hajxy nWiindsønähjätäm.

21 Ja'a mäbøjpädøjc-hajxy, miøødhájtäbä Dios ja'a miøcmäjaa hajxy hänajty. Mänitä jäya'ay ja'a jiecyquihdujt hajxy nämay ñajtshixøøyy. Mänitä Dios hajxy jiøjpøgøøyy.

22 Ja'a mäbøjpädøjc-hajxy, ja'a hajxy hänajty hijpä Jerusalén, coo hajxy jaduhñ miädoyhajty coo ja'a mäbøjpädøjc-hajxy hänajty jim miayø'oy Antioquía, mänitä Bernabé hajxy jim quiejxy.

23 Coo ja'a Bernabé jim miejch Antioquía, mänit yhijxy coo ja'a Dios ja'a mayhajt hänajty møj tøø tiuñ, coo ja'a mäbøjpädøjc-hajxy hänajty tøø jiaanč mayø'oy. Mänitä Bernabé jiaanč tehñ xioondaacpøjcy. Mänitä Bernabé ja'a mäbøjpädøjc ñämaayy coo ja'a Diosmädia'agy hajxy tehngahnä miäbøgät hamuumdu'joot ja'a Jesucristocøxpä.

24 Hojiootä Bernabé hänajty jiaanč tehñ miøød. Jiaanč tehñ miøødä Diosh-espíritu hänajty je'eduhñ. Hamuumdu'jootä Diosmädia'agy hänajty miäbøcy. Paadiä mäbøjpädøjc-hajxy hänajty jaduhñ tehngahnä miayø'oy, ja'a hajxy hänajty mäbøjpä ja'a Jesúscøxpä.

25 Coo ja'a Bernabé jim chohñ Antioquía, mänitä Saulo hoy piaady. Mänit hajxy jim nämetsc ñøcxtägajch Antioquía.

26 Tu'jumøjtä Bernabéhajxy jim yhijty møødä Saulo maa ja'a mäbøjpädøjc-hajxiän. Jimä cu'ugä Diosmädia'agy hajxy nämay yajwiingapxøøyyä. Jim Antioquía, jimä

mäbøjpädøjc-hajxy yajxøbejtsohnä cristianos, je'eguiøxpä coo ja'a Jesucristo hajxy hänajty tøø jiojpoøg'øy.

²⁷ Mänitä jäya'ayhajxy näje'e jilby quiädaacy Antioquía. Jerusalén hajxy hänajty tøø chohnda'agy. Tøø hajxy hänajty ñajtsapxøøyyä ja'a Diósäm.

²⁸ Tu'jäya'ay hänajty xiøhaty Agabo. Tøø ja'a mäbøjpädøjc-hajxy hänajty yhamugø'øy. Mänitä Agabo tiänaayyø'cy jäya'ayhagujc. Mänit miänaañ coogä yuuxøø hänajty jejcy jiada'añii wiinduhmyhagajpt. Mänit jaduñ jiaančh tøjiajty cujegy mänaa ja'a Claudio hänajty jim tiuunøgmøødän Roma.

²⁹ Mänitä mäbøjpädøjc-hajxy quiojyquiapxytiuuñ jim Antioquía coo ja'a xädø'øñ hajxy hänajty jim quiexa'añ Judea maa ja'a mäbøjpädøjc-hajxy jimbän. Jaduhñ hajxy hanidiuhmjaty yejcy, mäduhñtiä xädø'øñ hajxy hänajty miøødä.

³⁰ Mänitä xädø'øñ hajxy jaduñ jiaančh quejxy. Ja'a Bernabéhajxy jim mänøcx Judea møødä Saulo. Mänitä majjäya'adiøjc ja'a xädø'øñ hajxy hoy mio'oyii, ja'a hajxy hänajty tsänaabiä jim Judea.

12

¹ Mänitä mäbøjpädøjc-hajxy näje'e tiägøøyyä jaamdúunäbä tsaächtiúunäbä. Ja'a Herodes jaduñ jatcøøyy, ja'a hänajty tuumbä gobiernä jim Judea.

² Mänitä Herodes ja'a Santiago yajyagho'cä espadahaam, ja'a Juan yhajch.

³ Coo ja'a Herodes jaduñ yhijsy coo ja'a judíoshajxy hänajty xioonda'agy je'eguiøxpä coo ja'a Santiago hänajty tøø yagho'ogyii, mänitä Herodes ja'a Pedro yajmajtsä. Ja'a xøø hänajty jájtäp mänaa ja'a judíos ja'a tsajcaagy hajxy hänajty quiayyän, ja'a ca'a tsoomiøødpä.

⁴ Coo ja'a Pedro jaduñ yajmajch, mänit chuumä. Xøømdsuhm ja'a Pedro hänajty cwieendähadyii ja'a soldádäm. Tädujc-horajatiä soldadohajxy hänajty nämädaaxcjaty yhadäna'ay. Niguiuwjtsäp hajxy hänajty. Tøø ja'a Herodes hänajty wyiinmay coo ja'a Pedro hänajty xøønaxy yajtyyegalañii cu'ughagujc.

⁵ Hoyyä Pedro hänajty jia tsumiä, tehñgahnä mäbøjpädøjc ja'a Dios hajxy hänajty pia'ya'axy ja'a Pedrocøxpä, coo yhøxmadsoøjät.

⁶ Cujaboomä Herodes ja'a Pedro hänajty yajnøcxa'añ cu'ughagujc, jimä Pedro hänajty mia'ay pujxtøgooty. Coods hänajty jaduñ. Soldadohajxy hänajty mia'ay. Cø'øxoch hänajty jaduñ mejtsnax. Jimä soldadohajxy hänajty yhadäna'ay pujxtøghaawjooty.

⁷ Mänitä Diosmoonsä tu'ug näguehxtø'xy ja'a Pedro wyiinduum. Mänitä jøøn jilby yagjajøøyy pujxtøgooty. Mänitä Diosmoonsä ja'a Pedro jiahmyu'xy. Mänitä Pedro ñämaayyä:

—Tsógäm, pädø'øg.

Mänitä Pedro ja'a cadena quiø'øgahduutä.

⁸ Mänitä Diosmoonsä miänáangumbä, ja'a hänajty jim tsohmä tsajpootyp:

—Niwiøhnda'adsøø. Pägø'øw yø'ø mgø'øg.

Coo ja'a Pedro jaduñ quiudiuuñ, mänit ñämáayyägumba:

—Pägø'øw yø'ø mjocxwit. Høøch pajámäc.

⁹ Mänitä Pedro ja'a Diosmoonsä jiaančh padu'ubøjcy. Cabä Pedro hänajty ñajuø'øy pø tøyä ja'a Diosmoonsä jiaančh hijxy, tögä ñä'ä wiinhijx jaduñ.

¹⁰ Mänitä Pedrohajxy jim ñajxy maa ja'a soldado jayøjpä hänajty yhadäna'ayän. Mänit hajxy ñajxy maa ja'a miämetspän. Coo hajxy jim miejch maa tehñ piujxtøghaawän, mänit yhawaach hamdsoo. Coo hajxy piädsøømy, mänit hajxy weeñtiä jiaac nøcxy. Mänitä Diosmoonsä yhadägoyyøøñä. Nidiuhmä Pedro jaduñ miähmøøyy.

¹¹ Mänitä Pedro wyiinmahñmejtsnä. Mänit miänaañ quiopcooty:

—Tøyhajt jaduñ coöchä Dios ja'a mioonsä tøø xyajnägüxy. Tøøch jaduñ xyajñähwa'ačh ja'a Herodescøxpä møødä judíoshajxy.

¹² Mänitä Pedro jim ñöcxý maa ja'a María tiöjçän, ja'a Juan ja'a tiaj. Jaduhñä Juan hajxy hänajty tyijpä Marcos. Tøø jäya'ayhajxy hänajty may yhamugø'øý tøgooty Diospa'yaaxpä.

¹³ Coö ja'a Pedro jim miejch, mänitä tøgħaaw quiojxnojcy. Mänitä quixy tu'ug jim miejch maa ja'a tøgħaawän, ja'a hänajty xøhajpä Rode. Miädowaambiä Rode hänajty jaduñ pønä tøjç cojxnojç.

¹⁴ Coö ja'a Rode ja'a Pedro yo'mädooyy, mänitä Rode päyø'øguiä wyiimbijty xoondáacäp. Cabä Rode ja'a tøjç ñä'ä yaghawaach. Mänit hoy ñägäpçy coögä Pedro hänajty jim tiäna'ay töguyy.

¹⁵ Mänitä Rode ñämaayyä:

—Tøø miichäda'a mguhhiñ.

Pero tehngahnä Rode hänajty miäna'añ cooc hänajty jie'ejä ja'a Pedro. Mänit hajxy yhadsooyy:

—Ca'ada'a yø'ø jie'ejä. Ja'a yhaañämädah yø'ø.

¹⁶ Jimä Pedro ja'a tøgħaaw hänajty tehngahnä jia wi'i quiojxnocy. Coö hajxy hoy yaghawa'açh, mänit hajxy yhijxy coö hänajty jiaançh je'ejä.

¹⁷ Mänitä Pedro seña tiuuñ quio'øhaam coö hajxy yhamónät. Mänit jaduñ miädiaacy neby hänajty tøø yajpädsomyii pujxtøgooty ja'a Diósäm. Mänit jiaac mänaañ:

—Nöcxä Santiago hajxy hawaanä møødä mabøjpädøjc coöçh tøø nnähwa'açh.

Coö ja'a Pedro jaduñ miädiaacpädøoyy, mänit wiingtuum ñöcxnä.

¹⁸ Coö jioðøñä, mänitä soldadohajxy jiaançh tehñ yagjuøoyy coö ja'a Pedro hänajty quia'a jiibiän pujxtøgooty.

¹⁹ Mänitä Herodes yhanehmy coö ja'a Pedro yhöxta'awóøjät. Coö ja'a Pedro maa quia'a yajpaaty, mänitä soldadohajxy yajnähdsøømä, ja'a hajxy hänajty tøø yhadaná'ayäbä maa ja'a pujxtøjçän. Mänitä Herodes yhanehmy coö ja'a soldadohajxy yagho'ogóøjät. Mänitä Herodes jim chohñ Judea. Mänit jim ñöcxý tsänaabiä Cesarea.

²⁰ Mänitä Herodes ja'a cu'ug jiaançh tehñ miäjootma'ty, ja'a hajxy hänajty tsänaabiä jim Tiro møød jim Sidón. Mänitä cu'ughajxy nägøxiä quiojyquiapxytiuuñ coö hajxy nägøxiä jim ñöcxät ja'a Herodes wyiinduum. Jimä Herodes ja'a mioonsä hänajty tu'ug xiøhaty Blasto. Møjtuungä Blasto hänajty jim miøød maa ja'a Herodes wyiinduumän. Mänitä cu'ugä Blasto hajxy miäjuuyy coö ja'a Blasto ja'a cu'ug piuhbédät, weenä tsip jaduñ ñaxy miay. Hix, jimä cu'ughajxy hänajty tiuundaacthaty maa ja'a Herodes ñaaxootiän.

²¹ Coö hajxy hänajty tøø yajcuħducy mänaa hajxy hänajty jim yhamugø'øwa'añän maa ja'a Herodes wyiinduumän, mänitä Herodes ja'a reewyit piägøoyy. Mänit jim yhöxtaacy maa ja'a yhäñaabiejtän, maa ja'a cu'ughajxy hänajty tøø yhamugø'øýän. Mänitä Herodes ja'a cu'ug tiägøoyy møødmädiaacpä.

²² Mänitä cu'ughajxy tiägøoyy yaaxpä:

—Yø'ø craa xim capxpä, jue'e yø'ø, Diosäda'a yø'ø; ca'ada'a yø'ø jiäya'ayä neby højtshájtäm.

²³ Tuunä hajxy jaduñ ñä'ä mänaañ, mänitä ja'a Diosmoonsä ja'a Herodes yajpa'ambejty. Paady jaduñ yajpa'ambejtä je'eguiøxpä coö ja'a Dios hänajty tøø quia'a wiingudsähgø'øý. Mänitä Herodes tiøøngcuħdsu'tsä. Mänit yho'nä.

²⁴ Pero ja'a Diosmädia'agy, tehngahnä hänajty jaduñ wia'xy wiinduhmyñaax wiinduhmyguiajpt.

²⁵ Hoorä, coö ja'a Bernabé møødä Saulo ja'a majjäya'adiøjc ja'a xädø'øñ hajxy hänajty tøø mio'oy jim Jerusalén, mänit hajxy wyiimbijnä. Mänit hajxy ñöcxätägajch jim Antioquia. Quipxiä Juan Marcos pianöcxý.

13

¹ Jim Antioquia, jimä jäya'ayhajxy hänajty may tøø yhamugø'øý Jesúswiingudsähgøøbiä. Näje'e hajxy hänajty tiuñ Diosmädia'agy-yajwiingapxøøbiä. Näje'e hajxy hänajty tiuumbä

yajnáhixøøbiä. Ja'a hajxy hänajty jaduñ tuumbä, jue'e hajxy hänajty xiøhaty: Bernabé, Simón ja'a humybiä, Lucio ja'a Cirene-tsohmä, Saulo, møød Manaén. Quipxiä Manaén ja'a Herodes hänajty tøø miøødmuutsc-haty, ja'a hänajty jim tøø guiobiernähátiäbä Galilea.

² Jiibiä Dios hajxy hänajty wyiingudsähgø'øy jaguiay jayhu'ugy maa ja'a cha-jtøjc-hajxiän. Mänit hajxy ñämaayyä ja'a Dioshespíritäm:

—Tøøchä Bernabé møødä Saulo nyajnáhdijy coöchä nduunḡ hajxy xtiúunät. Mwiinguéxäp hajxy jaduñ.

³ Coö ja'a mäbøjpädøjc-hajxy jaduñ Dyiospa'yaaxpádøøyy, mänitä Bernabéhajxy quiø'ønähgajpä møødä Saulo. Mänitä Bernabéhajxy tiu'ubøjnä møødä Saulo.

⁴ Mänitä Bernabéhajxy wyiinguejxä ja'a Dioshespíritäm coö hajxy wiädítät Diosmädia'agy-yajwa'xpä. Mänit hajxy jiiby yhädaacy maa ja'a cajpt hänajty xiøhatiän Seleucia. Mänit hajxy hoy biarcotägø'øy. Mänit hajxy ñøcxy mejyhawiimb maa ja'a naax hänajty xiøhatiän Chipre, ja'a mejyhagujpä.

⁵ Coö hajxy jim miejch, mänit hajxy jim biarcömänajcy maa ja'a cajpt hänajty xiøhatiän Salamina. Mänit hajxy tiägøøyy Diosmädia'agy-yajwiingapxøøbiä maa ja'a judíos cha-jtøjc-hajxiän. Jimä Juan Marcos hänajty piawädijpä nä'ä jamiøød.

⁶ Coö ja'a Bernabé ja'a cajpthuung hajxy hänajty tøø quiøxy hawädity jim Chipre, mänit hajxy miejch maa ja'a cajpt hänajty xiøhatiän Pafos. Jimä jäya'ay hänajty tu'ug wiädijpä, ja'a hänajty xøhajpä Barjesús. Judío hänajty je'e. Wiinmahñmøød hänajty je'e. Jaduñ hänajty yhöñda'agy cooc tyijy hänajty je'e Dyiosquexiä.

⁷ Hoyyä Barjesús ja'a Sergio Paulo hänajty miøødnimiägu'ughadyii, ja'a hänajty tuumbä gobernador. Coö ja'a Sergio Saulo jaduñ miädoyhajty coö ja'a Bernabé ja'a Diosmädia'agy hajxy hänajty miäwädity, mänitä Bernabéhajxy miøjyaaxä møødä Saulo. Miädowáambiägä Sergio Paulo ja'a Diosmädia'agy hänajty.

⁸ Haa ja'a Barjesús, Elimas hänajty xiøhaty hagriegoaam. Hoorä, coö ja'a Elimas jaduñ miädoyhajty coögä Sergio Paulo ja'a Diosmädia'agy hänajty miädowa'añ, cabä Elimas jaduñ yhojiäwøøyy. Mänitä Elimas ja'a Sergio Paulo jia jøjcaxøøyy coö quia'a mäbøgät.

⁹ Haa ja'a Saulo, mejtstu'u hänajty je'e xiøhajpä møødä Pablo. Hoorä, miøødä Pablo ja'a Dioshespíritu hänajty. Mänitä Pablo ja'a Elimas wyiinhee'ppejty.

¹⁰ Mänit yhojy:

—Møjcu'uhuung, mjaanč tehḡ yhöñdaacp miich. Jaanč tehḡ yhaxøøg miichä mwiinmahñdy. Caj miich myajmädsocy coö jäya'ayhajxy hoy quiuhdujthädät. Tii miich jaduñ coö mwi'i miäna'añ cooc tyijy ja'a Diosmädia'agy quia'a tøyyä.

¹¹ Xyajcumädowaamb miichä Dios. Xyajwiinwoodsamb miich jaduñ. Jejcy miich wiinds mmähmø'øwa'añ. Caj miichä jajpä mdsoj hixa'añ, —nømä Elimas ñämaayyä.

Mänitä Elimas jiaanč wiinxoo'ch. Hobiänejpä hänajty tioonda'ay maa ñøcxø'øwät. Yhöxtaaby hänajty jaduñ pøn jaduñ wiinwidsäp.

¹² Coö ja'a Sergio Paulo jaduñ yhijsy nebiä Elimas hänajty tøø jiaty tøø yhabetiän, mänit yagjuøøyy. Mänitä Diosmädia'agy jiaanč mäbøjcy coö tiøyyä.

¹³ Mänitä Pablohajxy jim biarcotägøøguiumbä, møødä Bernabé, møødä Juan Marcos. Mänit hajxy miejyñájxcumbä. Mänit hajxy miejch maa ja'a cajpt hänajty xiøhatiän Perga, jim maa ja'a naax hänajty xiøhatiän Panfilia. Jimä Juan Marcos wyiimbijnä nidiuhḡ. Mänit yhädaacnä Jerusalén.

¹⁴ Coö ja'a Pablohajxy jim chohñ Perga, møødä Bernabé, mänit hajxy jiaac nøcxy maa ja'a cajpt hänajty xiøhatiän Antioquia, jim maa ja'a naax hänajty xiøhatiän Pisidia. Coö ja'a poo'xxiøø yhabaaty, mänitä Pablohajxy chajtøjtägøøyy maa ja'a judíos chajtøjc-hajxiän. Mänit hajxy jiiby yhäñaaguiädaacy.

15 Ja'a häna'c-hajxy hänajty jiiby tuumbä tsajtøgooty, mänitä Diosmädia'agy hajxy quiapxy maa ja'a Moisés jecy quiujahyyän, møød maa ja'a profetahajxy jecy quiujahyyän. Mänitä Pablohajxy ñämaayyá:

—Mägu'ughajpådøjc, pø jii mijts mädia'agy hajxy mmädia'aga'añ, huuc capx hajxy, weenä cu'ughajxy miädoy.

16 Mänitä Pablo tiänaayyø'cy. Mänitä quiø'ø chajtsihy, weenä cu'ughajxy jaduhñ yhamädoowhity. Mänit miänaañ:

—Huuc hamädoowhit hajxy nägøxiä, mijts israelitashajxy, møød mijts ca'a israelítabä. Mhaagä wiingudsähgøøbiä Dios hajxy.

17 Højts israelítabä, Dios højts nDioshajpy. Jegyhajty højtsä nhapä ndeedyhajxy hijty jim yhadsäna'ay maa ja'a naax xiøhatiän Egipto. Mänit hajxy jaduhñ yajnähdiijä ja'a Diósäm coo hajxy hänajty quiu'ughada'añii ja'a Diósäm. Mänit hajxy jim Egipto yhøxwoobädsøømä ja'a Diósäm. Jaduhñä Dios ja'a miäjaa yajcähxø'cy.

18 Coo hajxy jim wiomejtsä pactuum maa hänajty pøn quia'a tsäna'ayän, jim hajxy miähmøoyy juxychägui'xjomøjt. Miece'xtujpiä Dios hänajty jaduhñ, hoyyä miädia'agy hänajty quia'a jagä yajtúunäxä.

19 Mänitä israelitashajxy jim ñøcxy maa ja'a naax hänajty xiøhatiän Canaán. Ja'a jäya'ayhajxy hänajty jim tsänaabiä, ja'a näjuxtujc-hagajtpä, cøjx hajxy yajcuhdägoyyii ja'a Diósäm. Mänit højtsä nhapä ndeedyhajxy ñaaxpaatnä.

20 Mädaaxmägo'xjomøjt ja cupc hänajty tøø yhity coo hajxy hänajty tøø chooñ Egipto.

'Mänitä Dios miänaañ coo cuduung hajxy miøødhädät. Jaduhñ hajxy jejcy miøødhajty. Ja'a Samuel, je'eds jaac tehñ tiuun cuduung.

21 Mänitä cu'ughajxy miänaañ coo gobiernä hajxy mio'owøøjät, coo hajxy jaduhñ yhane'emøøjät. Mänitä Dios ja'a Saúl yajnähdiijy coo je'e tiúnät gobiernä, ja'a Cis yhuung. Benjamín ja'a Cis hänajty jegyhajty tøø yhaphaty tøø tieedyhaty. Juxychägui'xjomøjtä Saúl jaduhñ tiuun gobiernä.

22 Mänitä Dios miänaañnä coo Saúl jaduhñ quia'a túunnät gobiernä. Jaduhñ miänaañnä coo David jaduhñ ween tiuunnä gobiernä: “Njaançh tehñ quiumáabiøchä David jaduhñ, ja'a Isaí yhuung. Cøxaamb jaduhñ quiudiuna'añ waambátyhøch nnäma'awa'añ”, nømä Dios ja'a David jecy ñänøømy.

23 Mänitä Jesús cujegy jiaac mejch. Ja'a Jesús ja'a David jecy yhaphajt tieedyhajt. Paadiä Dios ja'a Jesús quiejxy coo ja'a israelitashajxy jaduhñ ween min yajnähwa'açhii. Jéquiänä Dios hajxy jaduhñ yajwiinwaanøøyyä coogä yajnähwaatspä hänajty quiexa'añ.

24 Cahnä Jesús hänajty tiägø'øynä wädijpä, jimä Juan ja'a israelitas ja'a Diosmädia'agy hänajty yajwiingapxø'øy coo ja'a yhaxøøgcuhdujt hajxy nägøxiä ñajtsixø'øwät, møød coo ja'a Dios hajxy hamuumdu'joot wyiingudsähgø'øwät, møød coo hajxy ñäbétät.

25 Coo ja'a Juan hänajty tiuumbädø'øwaañnä, mänit miänaañ: “Jaduhñhøch mijtsäda'a xñänømy cooc tyijy høøch nGristo. Ca'açh nje'ejä. Jímhøchä njamiøød tu'ug jiaac medsa'añ. Maas møcmäjaamøød je'e miedsa'añ queeçh høøch. Cábøch cuhdujt jaduhñ njaty møødä nebiä cuhdujt je'e miøødän ja'a jaac medsaambä.”

26 'Mägu'ughajpådøjc, højtsä Abraham jecy nhaphajt ndeedyhajtäm; møød mijts ca'a judíospä, mwiingudsähgøøbiä Dios hajxypä. Nägøxiä ja'a Dios hajxy tøø xyajnähdiijäm coo hajxy nägøxiä xyajnähwa'adsaanäm.

27 Coo ja'a Jesús quioo'ty Jerusalén, cabä cu'ughajxy hänajty ñajuø'øy coo hänajty je'e Dyiosquexiä. Ni ja'a teedywiindsøn hajxy hänajty quia'a najuøøbiä. Coo ja'a Jesús hajxy yajyagho'cä, jaduhñä Diosmädia'agy hajxy yajtøjajty nej myiñän cujaay coo ja'a Diosquexy hänajty yagho'oga'añii. Ja'a profetadøjc-hajxy jaduhñ jecy cujahy, ja'a Diosmädia'agy hajxy hänajty jegyhajty mäwädijpä. Hoyyä cu'ugä Diosmädia'agy hänajty jia mädooy wiingusábadohaam nebiä profetadøjc ja'a Diosquexy hajxy hänajty jia mädia'aguiän, cabä cu'ughajxy hänajty ñajuø'øy coo ja'a Jesús hänajty Dyiosquexiä.

28 Jaduhnä cu'ughajxy hānajtý tehngajnā ñā'ägā mānaañ cooc tyijy ja'a Jesús hānajtý hanaxiä tøø quiadieey. Pero cab hānajtý jaduhn ñā'ä tøyäbä. Hoy hānajtý quia'a jagä tøyä, tehngajnā cu'ug ja'a Pilato hajxy jaduhn ñāmaayy coo ja'a Pilato ja'a Jesús yajyagho'ogøjät.

29 Coo ja'a Jesús jaduhn jiaanč ho'cy, cøjx jaduhn tiøjiaty nebiaty jim miädia'agyijän maa ja'a Diosmädia'agy myiñän. Mänit yajmänajcä cruzcøxp. Mänit hoy yajnaaxtägø'øyii.

30 Mänitä Dios ja'a Jesús yagjujyiptägajch.

31 Mayhoocä Jesús jaduhn jiaac hijxä ja'a jiamioødhajxy, ja'a hajxy hānajtý quipxy tøø piadsohnda'aguiäbä jim Galilea. Quipxiä Jesús hajxy piagoo'ty Jerusalén. Hoorä, jäda'ahatiä Jesús hajxy miädiaacpä maa ja'a judíošhajxiän coogä Jesús Quiäristo.

32 Paady højts mijts jaduhn nyajwiingapxø'øy ja'a Jesús cøxpä. Jequiän højts nhap ndeedyhajxy yhawáañäxä ja'a Diósäm coogä Dios ja'a yajnähwatšpä hānajtý quixa'añ.

33 Coo ja'a Jesús hajxy tøø xñähho'túutäm, møød coo jiujyiptägajch, jaduhnä Jesús hajxy tøø xjiaanč yajnähwáatsäm. Jaduhnä Dios ja'a miädia'agy yajtøjiajty neby højts nhap ndeedyhajxy jecy yhawáañäxäm coogä Dios ja'a yajnähwatšpä hānajtý quixa'añ. Jaduhn jim myiñ cujaay maa ja'a salmo miämetspän: “Høøch miich nHuunghajpy. Jäda'ach miich tøø nyagjujyiptägach.”

34 Jéquiänä Dios jaduhn miänaañ coogä yHuung hānajtý yagjujyiptägatsa'añ, jadúñäc je'e quia'a pú'udsät. Jaduhn jim myiimbä cujaay maa ja'a Diosmädia'aguiän: “Mijtshøch ngunuu'xaamby nébiøchä David tøø yajnäma'ayän. Nyajtøjiadäämbiøch jaduhn.”

35 Jaduhn jim myiimbä cujaay wiingsalmojooty: “Caj miich mmäna'ana'añ coo ja'a mHuungä ñi'xä quiopc piú'udsät, coo hānajtý tøø yho'ogy. Myagjujyiptägatsaamby miich jaduhn”, nömä Dios ñāmaayyä.

36 Hoorä, coo ja'a David jecy miähanehmbädøøyy nebiä Dios hānajtý tøø yajnähdijjiän, mänitä David yho'nä tiägoonä. Mänit hoy ñāaxtägø'øy. Mänit piuutsnä. Tøyhajt jaduhn.

37 Pero ja'a Jesús, coo je'e yho'cy, cab je'e piuuch, je'eguiøxpä coo yagjujyiptägajtsä.

38-39 Mägu'ughajpädøjc, huuc hamädoowhit hajxy, jaduhn højts mijts nyajwiingapxø'øy coo ja'a Jesús hajxy nägøxiä tøø xñähho'túutäm, møød coo jädähooc jiujyiptägajch. Pønjatý jaduhn mäßøjp, nähwa'adsaamb hajxy je'e; hawa'adstuum hajxy miähmø'øwa'añ. Hoyyä jecyquiuhdujt hajxy hijty nja wi'i quiudiunäänäm, ja'a Moisés jecy quiujähyyäbä, cab hajxy hoy pedyii ngudiunäänäm, paady hajxy hijty nga'a nähwa'adsäänäm.

40 Naxy hädaa mädia'agy hajxy mdehm miäbøgät neby højts mijts cham nyajwiingapxø'øyän. Pø caj, wehnda hajxy mjat mhabétät nebiä profetadøjc-hajxy jecy quiujähyyän:

41 Huuc mädoow hajxy, pønjatý jaduhn mäwiingapxøjpejp,

myagjuø'øwäp hajxy jaduhn;

mniguiu'uds mniguiuhhämeedø'øwøjöp hajxy.

Hix, hoy-yagjuøøñøch jaduhn njaanč tehñ yajcähxø'øga'añ maa mijts mwiinduumhaxiän.

Pero cab hajxy jaduhn miäbøga'añ, ja'a hajxy hamdsoo ca'a hixaambä, nömä Dios jecy miänaañ.

42-43 Mänitä Pablo miädiaacpädøøñä. Coo ja'a Pablohajxy chajtøjpädsøømy møødä Bernabé, mänit hajxy ñāmaayyä coo hajxy jädähooc ween min miädia'agy ja'a sábado hānajtý jaac miimbä, neby hajxy hānajtý tøø yhuuc mädiaacpä. Mänitä Pablo jäya'ay hajxy may piadu'ubøjcä, møødä judíošhajxy, møødä ca'a judíošpähajxy, ja'a Diosmädia'agy hajxy hānajtý mäßøjpä. Mänitä Pablohajxy miänaañ coo ja'a jäya'ayä Dios hajxy homiänaajä yhajodhädät.

44 Coo ja'a sábado hānajtý jädähooc yhabáatcumbä, mänitä cu'ughajxy jim miejch maa ja'a judíos chajtøjc-hajxiän. Tøø ja'a cu'ughajxy hānajtý miädoyhaty coo ja'a Pablo ja'a Diosmädia'agy hānajtý jädähooc miädia'agään gumbä.

⁴⁵ Coo ja'a judíos wyiindsøn_hajxy jaduhñ yhi_jxy coo ja'a cu'ughajxy hānajt_y jaančh tehñ miay tøø miech Diosmädia'agyhamädoow_hijpä, mänit hajxy jiootma'ty. Mänit hajxy tiägøøyy mänaambä cooc tyijy ja'a Pablohajxy hānajt_y yhøhñda'agy. Wiingapxpéjtäbä Pablohajxy hānajt_y jaduhñ.

⁴⁶⁻⁴⁷ Pero cabä Pablohajxy ñä'ägä mõjpdäacy. Mänit hajxy yhadsooyy:

—Jaduhñ højtsä Dios tøø xwyiinguexy coo højts mijts judiöspä jayøjp nyajwiingapxø'øwät ja'a mädia'agy ja'a Jesúscøxpä. Pero caj mijts hädaa mädia'agy mnä'ägä mädowna'añ. Coo hajxy jaduhñ mga'a mabøga'añ, paady jaduhñ quia'a hawiinmatsä coo hajxy homiänaajä mjugyhädät nebiä Dios homiänaajä jiugyhatiän. Cab højts mijts hädaa mädia'agy nyajmøødmädia'agaanä. Jim højtsä jäya'ay nøcxy nnä'ägä yajwiingapxø'øwaañnä, ja'a hajxy ca'a judiöspä. Jaduhñ jim myiñ cujaay maa ja'a Diosmädia'aguiän.

⁴⁸ Coo hajxy jaduhñ miädooyy, ja'a hajxy ca'a judiöspä, mänit hajxy xioondaacpøjcy. Mänit hajxy tiägøøyy mänaambä coogä Diosmädia'agy ja'a Jesúscøxpä jiaančh tehñ yhooyä. Mänit hajxy nägøxiä miäbøjcy, pøn_jatiä Dios hānajt_y tøø yajnähdi_jy coo hajxy jiugyhada'añ homiänaajä neby je'e jiugyhatiän.

⁴⁹ Mänitä Diosmädia'agy ja'a Jesúscøxpä tiägøøyy wa'xpä wiinduhmyhagajpt.

⁵⁰ Mänitä mäyøøjäya'ayhajxy jiojcapxøøyyä møødä to'oxiøjc-hajxy, ja'a hajxy hānajt_y Dioswiingudsähgøøbiä. Jaduhñ hajxy ñämaayyä coo ja'a Pablo miädia'agyhajxy quia'a mabøjcäxät. Ja'a judiöswiindsøn_hajxy jaduhñ mänaañ. Jaduhñ hajxy hānajt_y miänaambä coo ja'a Pablohajxy yhøxpäbo'owøjät.

⁵¹⁻⁵² Mänitä Pablo ja'a tiecy hajxy wyiinxi_jty wyiinwojpy, weenä naaxoc jaduhñ quiøxy ca'ay. Hijxtahñd hajxy jaduhñ yajcähxø'c coo ja'a jäya'ay ja'a Diosmädia'agy hajxy hānajt_y nämay quia'a mabøga'añ. Pero ja'a jäya'ayhajxy hānajt_y mabøj_pä, jaančh tehñ xioondaacp hajxy hānajt_y. Høxtä piaatypä Dioshespíritu hajxy hānajt_y. Mänitä Pablohajxy jim chohñnä møødä Bernabé. Mänit hajxy jim ñøcxy maa ja'a cajpt hānajt_y xiøhatiän Iconio.

14

¹ Mänitä Pablohajxy jim miejch Iconio. Coo sábado yhabaaty, mänit hajxy ñøcxy maa ja'a judiö ja'a chajtøjc-hajxiän. Mänitä Pablo ja'a Diosmädia'agy hajxy yajwiingapxøøyy. Mänitä jäya'ayhajxy may miäbøjcy, møødä judiöshajxy, møød hajxy ca'a judiöspä.

² Pero cabä judiöshajxy nägøxiä miäbøjcy. Mänitä jäya'ayhajxy jiojcapxøøyyä, ja'a hajxy hānajt_y ca'a judiöspä, ja'a hajxy hānajt_y mabøj_pä. Jaduhñ hajxy jiojcapxøøyyä coo ja'a Pablo miädia'agy hajxy quia'a mabøjcäxät. Ja'a judiöshajxy jaduhñ mänaañ, ja'a hajxy hānajt_y ca'a mabøj_pä. Jaduhñ hajxy hānajt_y miänaambä coo ja'a Pablohajxy wyiingapxpedøjät.

³ Jejquiä Pablohajxy jim jiaac hijty Iconio. Cabä Diosmädia'agy hajxy hānajt_y tsähgø'ø-tsähgø'ø ñä'ä mädia'agy. Jaduhñ hajxy hānajt_y miädia'agy coogä Dios hajxy xjiaančh tehñ chójcäm. Madiu'u ja'a Pablo pa'am hajxy hānajt_y yajnaxy. Hijxtahñd hajxy hānajt_y yajcähxø'py jaduhñ coo ja'a Pablo ja'a Jesús ja'a miäjaa hajxy hānajt_y tøø mio'oyii. Hi_x, ja'a Jesús ja'a miäjaahaamä pa'am hajxy hānajt_y yajnaxy. Jaduhñä cu'ughajxy hānajt_y ñajuø'øy coo ja'a Dios hajxy tøyhajt xjiaančh tsójcäm.

⁴ Pero cabä cu'ughajxy hānajt_y tiu'ugmädia'aguiä. Näje'e ja'a judiö miädia'agy hajxy hānajt_y miäbøjcä. Näje'e ja'a Pablo miädia'agy hajxy hānajt_y miäbøjcä. Dioswiinguexiä Pablohajxy hānajt_y tiuumby møødä Bernabé.

⁵ Mänitä mõjtuun_gmøødpähajxy quiojyquiapxytiuuñ coo ja'a Pablohajxy quiuhga'adsøjät. Jaduhñä judiöshajxy piämanaambä møød hajxy ca'a judiöspä.

⁶ Coo ja'a Pablohajxy jaduhñ miädooyy, mänit hajxy jim piäyø'cy. Mänit hajxy ñøcxy maa ja'a naax hänajty xiøhatiän Licaonia, møød maa ja'a cajpt hänajty xiøhatiän Listra møød Derbe.

⁷ Mänitä Diosmädia'agy hajxy jim tiägøøyy yajwiingapxøøbiä Licaonia-naaxooty wiinduhmyhagajpt.

⁸ Jimä pa'amjäya'ay hänajty tu'ug chäna'ay Listra. Tecymiuquiä mähdiøjc hänajty tøø myiñ tøø quia'ay. Cahnä hänajty mänaa yo'oyø'øgy.

⁹ Jiaančh tehñ yhamädoowhijpiä mähdiøjc hänajty waambatiä Pablohajxy hänajty miädia'agy. Coo ja'a Pablo ja'a mähdiøjc jaduhñ yhiixy coo ja'a mähdiøjcä jioot hänajty tøø piäda'agy coo miøcpøgät, møød coo hänajty miäbøcy coo ja'a Pablo ja'a Jesús miäjaa hänajty miøødhajtä,

¹⁰ mänitä Pablo ja'a mähdiøjc ñämaayy:

—Pädø'øg, tänaayyø'øg.

Møcä Pablo jaduhñ miänaañ. Mänitä craa jiaančh tänaayyø'cy. Mänit hoy tiägøøñä yohbiä.

¹¹⁻¹² Coo ja'a cu'ugä craa hajxy jaduhñ yhiixy coo hänajty tøø miøcpøcy, mänit hajxy tiägøøyy yaaxpä yhamdsoo hayuuc-haambyhajxy:

—Tøø ja'a Zeus hajxy xñägädäcäm møødä Hermes, ja'a hajxy nwiingudsähgøøyyämbä. Tøø hajxy jaduhñ ñibiäda'agyii neby jäya'ayän —nømä Pablohajxy ñänøømä.

Jaduhñä Bernabé hänajty yhajodhadyii nebiä Zeusän. Haa ja'a Pablo, jaduhñ hänajty je'e yhajodhajtäbä nebiä Hérmesän, je'eguiøxpä coo ja'a Pablo hänajty jiaančh tehñ miädia'agy.

¹³⁻¹⁴ Pero cabä Pablohajxy hänajty wyiinjuø'øyy waambaty hajxy hänajty ñänømyii. Hoorä, jimä tsajtøjc hänajty tu'ug cajtpa'a maa ja'a cu'ugä Zeus hajxy hänajty wyiingudsähgø'øyän. Ja'a jäya'ay hänajty jim tuumbä teedy, mänitä waj may yajmejch maa ja'a Pablohajxy hänajty cajtpa'a tøø miähmø'øyän. Mayyä pøjy jaduhñ yajmejtspä. Mänitä Pablohajxy tiägøøyyä wiingudsähgøøyyäbä. Ja'a cu'ughajxy møødä teedy, je'e hajxy hänajty mäwiingudsähgøøby. Mänitä teedyhajxy tiägøøyy mänaambä coogä waj hajxy hänajty yoxa'añ ja'a Pablocøxpähajxy. Hagriegohaam hajxy jaduhñ miänaañ. Coo ja'a Pablohajxy jaduhñ wyiinjuøøñä nebiä cu'ughajxy hänajty jiatcø'øwa'añ, mänitä Pablohajxy tiägøøyy tajpä maabiä. Mänitä wyit hajxy quiøø'ch. Mänit hajxy jim tiägøøyy cu'ughagujc. Mänit hajxy yaaxy:

¹⁵ —Mägu'ughajpädøjc, ca'a højts xwyiingudsähgø'øyy. Jäya'ay højts nej mijtsän. Paady højts yaa tøø nmech maa mijts mgajptän, coo højts mijtsä Diosmädia'agy nyajwiingapxø'øwät, jaduhñä Dios juppiä ja'a miädia'agy hajxy mmäbøjcät. Jéquiänä Dios ja'a tsajt yhädiuñ, møødä naaxwiin, møødä mejy, møødä tijaty jaac jii, cøxiä. Jaduhñä Dios miäna'añ coo hajxy je'e mwiingudsähgøøñät, coo ja'a mhamdsoo cuhdujt hajxy mnajtshixøøñät, ja'a ca'a tsoobaatpä.

¹⁶ Hijty, jaduhñä Dios hijty miäna'añ coo ja'a jäya'ayä yhamdsoo cuhdujt hajxy ween yajtuñ.

¹⁷ Homiänaajä ja'a Dios yajcähxø'øgy coo hojioot jiaančh tehñ miøødä maa mi-tscøxpän, møød coo yajtu'uy coo yajta'xy, møød coo ja'a camä tu'u yaghoyø'øyy, jaduhñ hajxy ngaayy nhúucäm jootcujc —nømä Pablohajxy miänaañ.

¹⁸ Hobiänejiä ja'a Pablo ja'a cu'ug hajxy jaduhñ yajmäbøjcy coo ja'a waj hajxy quia'a yóxät, coo ja'a Pablohajxy jaduhñ quia'a wiingudsähgø'øwøød møødä Bernabé.

¹⁹ Mänitä judíoshajxy näje'e miehch. Antioquia hajxy hänajty chooñ møød Iconio. Mänitä cu'ug hajxy yajmäbøjtägajch cooc tyijy ja'a Pablohajxy hänajty yhöñda'agy møødä Bernabé. Mänitä cu'ugä Pablo hajxy jaduhñ jia ca'ch. Jaduhñ hajxy hänajty yhajodhaty coo ja'a Pablo hänajty tøø yho'ogy, pero cab hänajty tøø ñä'a ho'pä. Mänitä Pablo hajxy hoy yhöxwich cajtpa'a.

²⁰ Ja'a jäya'ayä Diosmädia'agy hajxy hänajty jaduñ tøø miäbøquiäbä, mänitä Pablo hajxy hoy jiuhmugø'øy. Mänitä Pablo jadähooc wyiinmahñmejch. Mänitä Pablohajxy jaduñ jüby tiägøøguiumbä cajptooty møødä mäbøjpädøjc. Cujaboomä Pablohajxy jim chohñ møødä Bernabé. Mänit hajxy ñøcxy maa ja'a cajpt hänajty jaduñ xiøhatiän Derbe.

²¹ Coo ja'a Pablohajxy jim miejch Derbe, mänitä Diosmädia'agy hajxy tiägøøyy hawaan hayaaxøobiä. Coo ja'a cu'ughajxy jaduñ miädooyy, mänit hajxy may miäbøjcy. Mänitä Pablohajxy jim wyiimbíjcumbä. Mänit hajxy jim ñøcxtägajch Listra, møød jim Iconio, møød jim Antioquía, majaty hajxy hänajty tøø yhuuc hoobiän.

²² Ja'a jäya'ayä Diosmädia'agy hajxy hänajty tøø miäbøquiäbä, mänit hajxy wyiin-gapxøøyyä coo ja'a Diosmädia'agy hajxy hamuumdu'joot pianøcxät tehngahnä, hoy hajxy jaduñ cu jia mänaḡ cu jia yajnaḡ ja'a tsaächpä ja'a peenä. Mänit hajxy jaduñ jim ñøcxät Dioswiinduum.

²³ Majatiä Pablohajxy hänajty wiädity, wyiinguejxyp hajxy hänajty pøñ jaduñ jim túnäp wiindsøn maa ja'a tsajtøjcän. Mänitä Pablo ja'a Dios hajxy pia'yaaxy coo hajxy jaduñ quiuweendähadøøjtät ja'a Diósäm, ja'a hajxy hänajty tøø miäbøquiäbä. Jaguiay jayhu'uguiä Dios hajxy hänajty miänuu'xta'agy.

²⁴ Mänitä Pablohajxy jim ñaxøøyy møødä Bernabé maa ja'a naax hänajty xiøhatiän Pisidia. Møød hajxy jim yhoobiä maa ja'a naax hänajty xiøhajpäñ Panfilia.

²⁵ Mänitä Pablohajxy jim jadähooc miéjtscumbä Perge. Jimä Diosmädia'agy hajxy jadähooc yajwá'xcumbä. Mänit hajxy ñøcxy jadähooc Atalia.

²⁶ Jim hajxy jadähooc hoy biarcotägø'øy. Mänit hajxy jim ñøcxcumbä Antioquía maa hajxy hänajty jaduñ tøø yhuuc tsohndaacpäñ, maa hajxy hänajty jaduñ tøø wyiinguexyijän coo ja'a Dios ja'a tiuunḡ hajxy tiúunät. Coo hajxy jaduñ jim miejtstägajch Antioquía, yaghabejt hajxy jaduñ nebiä Dios hänajty tøø yhane'emiän coo hajxy jaduñ tiúnät.

²⁷ Coo hajxy jim miejch Antioquía, mänitä Pablo ja'a mäbøjpädøjc hajxy wioomuicy. Mänit hajxy miädiaacy nebiatiä Dios hajxy hänajty tøø piuhbedyijän, møød coo ja'a Dios cuhdujt jaduñ tøø yecy coo ja'a jäya'ayhajxy jaduñ miäbøjpät, ja'a hajxy hänajty jaduñ ca'a judíospä.

²⁸ Jejquiä Pablohajxy jim yhiyty Antioquía. Xyiicy xioondaacy hajxy jaduñ møødä mäbøjpädøjc-hajxy.

15

¹ Mänitä jäya'ayhajxy jaduñ jim näje'e miejch Antioquía. Judea hajxy hänajty tøø chohnda'agy. Mänitä mäbøjpädøjc-hajxy yajnähihøøyyä coo hajxy jaduñ quiudiúnät nebiä Moisés hänajty jegyhajty tøø yhane'emiän, coo hajxy yajcircuncidarhädät. Cooc hajxy jaduñ quia'a cudiúnät, cábac hajxy jaduñ ñähwá'adsät. Ja'a jäya'ayhajxy hänajty jim tsohmä Judea, je'edsä mäbøjpädøjc hajxy jaduñ yajnähihøøyy.

²⁻³ Pero cabä Pablohajxy jaduñ quiumaayy coo ja'a mäbøjpädøjc-hajxy jaduñ yajnähihøøwøøjtät. Mänitä Pablo ja'a mädia'agy hajxy jaduñ yajcapxiøøyy coo ja'a mäbøjpädøjc-hajxy jaduñ quia'a mäbøgät neby hajxy hänajty tøø yajnähihøøyijän coo hajxy tsipcøxp yajcircuncidarhädät. Mänitä Pablohajxy jim quiejxä Jerusalén møødä Bernabé, møødä wiinghäna'c-hajxy. Ja'a mäbøjpädøjc-hajxy jaduñ mäguejx coo ja'a tsip ja'a pleetä jaduñ ween nøcxy yajcøxy yajmay. Ja'a jäya'ayhajxy hänajty jim tuumbä Jerusalén maa ja'a tsajtøjcän, je'edsä tsip ja'a pleetä hajxy hänajty miøødyajcøxaamby miøødyajmamaamby, jaduñ hajxy quia'a tsipyajpädø'nät. Coo ja'a Pablohajxy jim tiu'ubøjcy Antioquía, mänit hajxy jim ñaxøøyy maa ja'a naax hänajty xiøhatiän Fenicia, møød jim maa ja'a naax hänajty xiøhatiän Samaria. Jimä Pablo ja'a mäbøjpädøjc hajxy miøødmädiaacy, ja'a hajxy hänajty tsänaabiä jim Fenicia møød jim Samaria. Jaduñnä Pablohajxy miädiaacy coogä jäya'ayä Diosmädia'agy hajxy hänajty tøø piadu'ubøcy,

ja'a hajxy hänajty ca'a judíospä, møød coogä yhamdsoo cuhdujt hajxy hänajty tøø ñajtshixøøñä. Coø ja'a mäbøjpädøjc-hajxy jaduhñ miädooyy, mänit hajxy jaduhñ jiaançh tehñ xioondaacy.

⁴ Coø ja'a Pablohajxy jim miejch Jerusalén møødä Bernabé, mänitä mäbøjpädøjc-hajxy jim yhamugøøyy maa ja'a tsajtøjcän, møødä Dioswiinguexypähajxy, møødä tsajtøjc-wiindsønñhajxy. Mänitä Pablohajxy miädiaacy nebiatiä Dios hajxy hänajty tøø piuhbedyiijän.

⁵ Jimä fariseoshajxy näje'ebä. Tøø ja'a Diosmädia'agy hajxy hänajty miäbøjpä ja'a Jesucristocøxpä. Mänit hajxy tiänaayyø'cy. Mänit hajxy miänaañ:

—Tsipecøxpä mäbøjpädøjc-hajxy yajcircuncidarhájpät, hoy hajxy jaduhñ quia'a jagä judíospä; weenä mädia'agy hajxy jaduhñ quiudiuñ nebiä Moisés jecy yhanehmiän —nømä fariseoshajxy miänaañ.

⁶ Mänitä Dioswiinguexypähajxy yhamugøøyy møødä tsajtøjc-wiindsønñhajxy. Mänit hajxy tiägøøyy mädiaacpä waambatiä fariseoshajxy tøø miäna'añ.

⁷ Mänitä Pedro tiänaayyø'cy mädiaaccujc. Mänit yajcapxøøyy:

—Puhya'adiøjc, mnajuøøby hajxy jaduhñ coočhä Dios jecy xwyiinguejxy coočhä jäya'ayä Diosmädia'agy nyajwiingapxø'øwät, ja'a hajxy ca'a judíospä, coø hajxy miäbøgät, jaduhñ hajxy ñähwa'ads quiuhwä'adsät.

⁸ Haa ja'a Dios, xyhixyhájtämä njootä njuøhñdyhajxy. Coø ja'a Diosmädia'agy hajxy jaduhñ miäbøjcy, ja'a ca'a judíospä, mänitä Dioshèpíritu hajxy mióoyyabä, nebiä Dios ja'a yhEspíritu hajxy tøø xmióoyyäm højtshájtäm. Jaduhñä tøyhajt hajxy nmøødhájtäm coø ja'a nähwaatstaact hajxy jaduhñ piaatpä, neby højts tøø nbäatäm.

⁹ Tu'cuhdujtä Dios hajxy tøø xyajñähwaats tøø xyajcuhwäatsäm møødä cajpä judíospähajxy. Coø hajxy jaduhñ tøø miäbøjpä, paadiä piojpä quiädieeyhajxy tøø ñähwaatspä.

¹⁰ Pero jaduhñ mijts mja mäna'añ coø ja'a cajpä judíospä ja'a mädia'agy hajxy jaduhñ quiudiúumbät nebiä Moisés jecy yhanehmiän. Ni højts pedyii nga'a cudiúunäm, højts judíoshájtäm. Ni højtsä nhapä ndeedyhajxy hijty jegyhajty hoy quia'a cudiúunämbä. Coø mijts jaduhñ mja mäna'añ coø ja'a cajpä judíoshajxy jaduhñ quiudiúumbät, jaduhñ hajxy myajcähxø'øgy nebiä Dios ja'a miädia'agy hajxy mga'a mäbøjcäbän.

¹¹ Pero jaduhñ hajxy nnajuøøyyäm coø ja'a Jesús hajxy tøø xñä'a yajñähwäatsäm tu'cuhdujt, møød højts judíospähájtäm, møødä cajpä judíoshajxy. Hojiootä Jesús jaduhñ miøødhajpy maa højtscøxphájtäm —nømä Pedro miänaañ.

¹² Mänitä mäbøjpädøjc-hajxy miädiaacpädøøyy, ja'a hajxy hänajty jim tsänaabiä Jerusalén. Mänitä Pablohajxy tiägøøyy mädiaacpä møødä Bernabé nebiatiä Dios ja'a miäjaa hänajty tøø yajcähxø'øgy maa ja'a jäya'aguiøxpähajxiän, ja'a cajpä judíospähajxy, møød nebiatiä Pablo ja'a hoy-yagjuøøñäjatypä hajxy hänajty tøø tiuñ.

¹³ Coø ja'a Pablohajxy jaduhñ miädiaacpädøøyy, mänitä Santiago miänaañ:

—Puhya'adiøjc, huuc tunä mayhajt hajxy, huuc hamädoowhit hädaa mädia'agy hajxy.

¹⁴ Jaduhñä Simón tøø miädia'agy coø ja'a Dios ja'a hojioot miøødhajnä maa ja'a jäya'aguiøxpähajxiän, ja'a hajxy cajpä judíospä, møød coø ja'a Dios wyiimbiy pønjaty jaduhñ quiu'ughädäp.

¹⁵ Jaduhñ jim myiñ cujaay maa ja'a Diosmädia'aguiän nebiä profetadøjc-hajxy jecy quiapxy miädiaaquiän coø ja'a Dios hojioot hänajty miøødhada'añ maa ja'a jäya'aguiøxpähajxiän, ja'a hajxy cajpä judíospä. Jaduhñä profeta Amós jecy quiujahy quiuguee'ch

¹⁶ coø ja'a Dios jaduhñ miänaañ:

Nguexáambiøchä nguguexy coø ween jaduhñ yhanehmbä nebiä David jecy yhanehmiän,

¹⁷ jaduhñhöchä jäya'ayhajxy xwyiingudsähgø'øwät,

ja'a hajxy cajpä judíospä, pønjátyhøch tøø nwiimbiy cooçh je'e ngu'ughádät.

¹⁸ Jéquiänä Dios jaduhñ miänaañ coo jaduhñ yajtøjiada'añ.

¹⁹ Mänitä Santiago jiaac mänaañ:

—Tøyhajt jaduhñ nebiä Diosmädia'agy miäna'añän. Cab jaduhñ yhahixø'øy coo ja'a mæbøjpädøjc hajxy nhanéhmämät, ja'a hajxy ca'a judíospä. Cab hajxy nnämáayyanät coo højtsä nguhdujt hajxy xpiahíxämät, højts judíoshájtäm.

²⁰ Jaduhñ mæbøcypä, tsøc hajxy yajnäjaayøyyäm coo hajxy jaduhñ quia'a tsú'udsät tijatiä jäya'ayhajxy tøø yoxy quepychechwiinduum, møød coo wiingto'oxiøjc hajxy quia'a møødmá'awät, møød coo animal hajxy quia'a tsú'udsät ja'a jañø'xiee'xypä, møød coo animalnø'ty hajxy quia'a hu'ug quia'a jøø'xät.

²¹ Jaduhñä Moisés jecy quiujahy coo højts jaduhñ nguhdujthájtämät, højts judíoshájtäm. Jaduhñ højts wiindu'ugpoo'xxiøø nyajnähixøyyäm maa ja'a tsajtøjcän wiinduhmyhagajpt.

²² Mänitä mæbøjpädøjc-hajxy nägøxiä quiojyquiapxyhajty møødä Dioswiinguexypähajxy, møødä tsajtøjc-wiindsøn_hajxy, coo ja'a cunocy hajxy jim quiéxät Antioquía, coo ja'a Pablohajxy miødhadøøjat møødä Bernabé. Mänitä Judashajxy jaduhñ wyiinguejxä møødä Silas coo hajxy jaduhñ quiunocyhádät. Jimä Judashajxy hänajty quiopc-haty møødä Silas maa ja'a tsajtøjcän. Mejtstu'u ja'a Judas hänajty xiøhaty møødä Barsabás.

²³ Mänitä mæbøjpädøjcä nocy hajxy yhädiuñ. Mänitä Pablo ja'a nocy hajxy yajcø'ødägøøyyä coo hajxy miänøcxät Antioquía. Jaduhñä nocy hajxy quiujahy:

“Puhya'adiøjc, mijts hädaa nocy nyajnæguejxyp, mijts ca'a judíospä, coo ja'a Diosmädia'agy hajxy tøø mmæbøcy, pønjaty jim tsänaaby Antioquía, møød jim Siria, møød jim Cilicia. Højts hädaa nocy tøø nhädiuñ, højts mæbøjpädøjc yaa hijpä Jerusalén, møødä Dioswiinguexypähajxy, møødä tsajtøjc-wiindsøn_hajxy.

²⁴ Tøø højts jaduhñ nmädoyhaty coo højtsä nmägu'ughajpähajxy näje'e jim tøø yhoy maa mijtsän. Ca'a yhöjts jaduhñ nguejx; hamdsoo joot hajxy jim tøø ñøcxy. Jaduhñ højts tøø nmädoyhaty coo mijtsä häna'c xjia wi'i wyiinhøøna'añ, ja'a hajxy jim tøø yhöyyäbä maa mijtsän, møød coo mijts näje'e tøø myajwiinhøøñ.

²⁵ Coo mijtsä häna'c jaduhñ xjia wi'i wyiinhøøna'añ, paady højts tøø ngojyquiapxyhaty coo højtsä nmägu'ughajpä nämetsc jim nguéxät maa mijtsän näguipxy møødä Pablo møødä Bernabé. Højtsä Pablo njaançh tehñ chojpy njaançh tehñ pia'häyooby møødä Bernabé.

²⁶ Jaançh tehñ yhooyä Pablo ja'a Jesucristo hajxy miäduñ. Coo hajxy jaduhñ hoy miäduñ, paady hajxy mayhooc tøø jia wi'i yagho'oga'añii.

²⁷ Ja'a Judas højts nwiinguejxyp møødä Silas coo hajxy jim ñøcxät maa mijtsän. Hajäya'ayhaam mijts jaduhñ xmiøødmädia'aga'añ waambaty højts cham njaay ngueechän nocyquiøxp.

²⁸⁻²⁹ Jaduhñ højtsä Dioshespíritu tøø xmiøødcojyquiapxyhaty coo mijts nhané'emät coo hajxy mga'a tsú'udsät mädyijaty animal ja'a häna'c tøø yoxy quepychechwiinduum, møød coo animal hajxy mga'a tsú'udsät ja'a jañø'xiee'xypä, møød coo wiingto'oxiøjc hajxy mga'a møødmá'awät. Coo hajxy jaduhñ mgudiúnät, jaduhñ hajxy mniyaghoyø'owøøjät. Cabä wiingcuhdujt yaghane'ema'añ. Ja'a Dios hajxy jaduhñ xcwieendähádäp.” Jaduhñä mæbøjpädøjcä nocy hajxy yhädiuñ, ja'a hajxy hänajty jim hijpä Jerusalén.

³⁰ Mänitä Pablohajxy jim tiu'ubøjcy møødä Bernabé, møødä Judas, møødä Silas. Mänit hajxy jim ñøcxy Antioquía. Coo hajxy jim miejch, mänitä mæbøjpädøjc-hajxy nägøxiä jim yhamugøøyy maa ja'a tsajtøjcän. Mänitä Pablo ja'a mæbøjpädøjcä nocy hajxy yajcø'ødägøøyy.

³¹ Mänitä mǎbǝjpǎdǝjcǎ nocy hajxy quiapxy. Mänit hajxy jiaančh tehṁ jiootcugǝǝyy je'eguiǝxpǎ coo hajxy jaduhṁ quiapxmǝcpǝjcǎ nocyhaam.

³² Mänitä Diosmädia'agy hajxy yajwiingapxǝǝyyǎ. Ja'a Judashajxy jaduhṁ capx mǝǝdǎ Silas. Yoñ hajxy jaduhṁ quiapxy miǎdiaacy. Diosquexiǎ Judashajxy hǎnajty mǝǝdǎ Silas nǎmetsc.

³³ Maxiǝǝ ja'a Judashajxy jim yhiyty Antioquía mǝǝdǎ Silas. Coo hajxy hǎnajty wyiimbidaañǎ, mänit hajxy ñǎmaayyǎ coo ja'a Dioscujú'uyǎp hajxy jim nǝcxy yecy Jerusalén. Mänitä Judashajxy ñǝcxnǎ Jerusalén maa hajxy hǎnajty tǝǝ yhuuc tsohṁdaacpǎn.

³⁴ Pero cabǎ Silas ja'a Judas pianǝcxy. Jim miǎhmǝǝyy Antioquía

³⁵ nǎguipxy mǝǝdǎ Pablo mǝǝdǎ Bernabé. Mänitä Diosmädia'agy hajxy tiǎgǝǝyy yajwiingapxǝǝbiǎ nǎguipxy mǝǝdǎ mǎbǝjpǎdǝjc-hajxy nǎmaybiǎ.

³⁶ Mänitä Pablo ja'a Bernabé cujecy ñǎmaayy:

—Jam jadǎhooc wǎdǎjtǎm majatiǎ Diosmädia'agy hoy nyajwǎ'xǎm. Jamǎ mǎbǝjpǎdǝjc kuhǎjxǎm pǝ tehṁgahnǎ ja'a Diosmädia'agy hajxy hoy pianǝcxy.

³⁷ Jia nǎhadsoow ja'a Bernabé jaduhṁ. Mänit jaduhṁ jia mǎnaañ coo ja'a Juan Marcos hajxy cu miǝdhajty.

³⁸ Pero cabǎ Pablo jaduhṁ miǎnaañ coo ja'a Juan Marcos hajxy jaduhṁ miǝdhǎdǎt je'eguiǝxpǎ coo ja'a Juan Marcos hajxy hǎnajty tǝǝ piuhwa'ačhii mǎnaa hajxy hǎnajty jim wiǎditiǎn Panfilia maa ja'a Diosmädia'agy hajxy hǎnajty yajwa'xiǎn.

³⁹ Coo ja'a Pablo hǎnajty quia'a tu'ugmädia'aguiǎ mǝǝdǎ Bernabé, paady hajxy mänit ñiwiǎ'xǎ. Mänitä Bernabé ja'a Marcos wiowǝ'cy. Mänit hajxy tiǎgǝǝyy barcojooty. Mänit hajxy jim ñǝcxy mejyhawiimb maa ja'a naax hǎnajty xiǝhatiǎn Chipre.

⁴⁰ Haa ja'a Pablo, mänit je'eduhṁ miǎnaañ cooc ja'a Silas hǎnajty miǝǝdwǎdita'añ. Mänitä mǎbǝjpǎdǝjcǎ Dios hajxy miǎnuu'xtaacy coo ja'a Pablohajxy piuhbedǝǝjǎt. Mänitä Pablohajxy tiu'ubǝjnǎ mǝǝdǎ Silas.

⁴¹ Mänit hajxy jim ñaxǝǝyy Siria mǝǝd jim Cilicia. Majatiǎ Pablohajxy hǎnajty wiǎdity, jimǎ mǎbǝjpǎdǝjc hajxy hǎnajty quiapxmǝcpǝcy.

16

¹ Mänitä Pablohajxy jim ñǝcxy Derbe. Coo hajxy jim tiu'ubǝjccumbǎ, mänit hajxy jim ñǝcxcumbǎ Listra. Jimǎ craa hajxy tu'ug hoy piaady. Timoteo ja'a craa hǎnajty xiǝhaty. Miǎbǝjpiǎ Timoteo ja'a Diosmädia'agy hǎnajty. Ja'a Timoteo ja'a tiajjǎ, judía hǎnajty je'e. Jaanǎ miǎbǝjpiǎ Diosmädia'agy hǎnajty je'ebǎ. Ja'a Timoteo ja'a tieediǎ, ca'a hǎnajty je'e jiidǝsǎ.

² Quiumaabiǎ mǎbǝjpǎdǝjcǎ Timoteo hajxy hǎnajty, ja'a hajxy hǎnajty jim tsǎnaabiǎ Listra mǝǝd jim Iconio.

³ Mänitä Pablo ja'a Timoteo ñǎmaayy coo hǎnajty miǝǝdwǎdita'añ. Pero cahnǎ Timoteo hǎnajty yajcircuncidarhaty. Mänitä Pablo ja'a Timoteo yajcircuncidarhajtǎ, jaduhṁnǎ judíoshajxy jaduhṁ quia'a jootmǎ'adǎt. Hix, ñajuǝǝbiǎ judíoshajxy hǎnajty nǎgǝxiǎ coo ja'a Timoteo hǎnajty quia'a yajcircuncidarhatyñǎ. Coo ja'a Timoteo ja'a tieedy hǎnajty quia'a judíosǎ, paadiǎ Timoteo hǎnajty quia'a yajcircuncidarhatyñǎ.

⁴ Mänitä Pablohajxy tiǎgǝǝyy wǎdijpǎ cajpt-cajpt mǝǝdǎ Silas mǝǝdǎ Timoteo. Majaty hajxy hǎnajty wiǎdity, jimǎ mǎbǝjpǎdǝjc hajxy hǎnajty yajmǎdoyhaty waambatiǎ Dioswiinguexpǎhajxy hǎnajty tǝǝ yhane'emiǎn, mǝǝdǎ tsajtǝjc-wiindsǝnhajxy, ja'a hajxy hǎnajty jim hijpǎ Jerusalén.

⁵ Jaanǎ jaduhṁnǎ Pablo ja'a mǎbǝjpǎdǝjc hajxy hǎnajty quiapxmǝcpǝjpǎ wiinduhmyhagajpt, paadiǎ mǎbǝjpǎdǝjcǎ Diosmädia'agy hajxy hǎnajty hoy jiaac tehṁ miǎbǝcy. Mǝǝd hajxy hǎnajty jiaac tehṁ miayǝ'ǝy jabom-jabom.

⁶ Pero cabä Pablo cuhdujt hajxy choj mooyyã ja'a Dioshespíritäm coo ja'a Diosmädia'agy hajxy jim̄ nõcxy yajwa'xy Asia. Paady hajxy jim̄ jiaac wädiyty Frigia møød jim̄ Galacia.

⁷ Mänit hajxy jim̄ miejch maa ja'a naax̄ hänajty xiøhatiän Misia. Mänit hajxy jia mänaañ coo hajxy jim̄ ñócxät maa ja'a naax̄ hänajty xiøhatiän Bitinia. Pero cabä Jesús yHespíritu jaduñ miänaañ coo hajxy jim̄ ñócxät.

⁸ Coo hajxy jim̄ ñaxøyy Misia, mänit hajxy jim̄ miejch maa ja'a cajpt hänajty xiøhatiän Troas.

⁹ Mänitcoodsä Pablo jäya'ay tu'ug wyiinhijxy. Jim̄ hänajty chooñ maa ja'a naax̄ hänajty xiøhatiän Macedonia. Tänaaby hänajty jaduñ. Mänitä Pablo ñämaayyã: “Huuc tunä mayhajt, jam̄ højtsä Diosmädia'agy yajwiingapxøyyäc jim̄ Macedonia.” Jaduhñä Pablo miänuu'xtaacä.

¹⁰ Coo ja'a Pablo jaduñ wyiinhijxy, mänit højts jaduñ nwiinmaayy coo højts jim̄ njaanč nõcxät Macedonia. Jaduhñ højts hänajty nwiinjuø'oy coo højtsä Dios hänajty tøø xwyiinguexy coo højtsä Diosmädia'agy jim̄ nõcxy nyajwa'xy.

¹¹ Mänit højts hoy nbarcotägø'oy. Mänit højts jim̄ ndsohñ Troas. Mänit højts nõcxy mejyhawiimb maa ja'a naax̄ hänajty xiøhatiän Samotracia. Mejihagujcä naax̄ jaduñ. Cujaboom højts jadähooc nbarcotägøøguiumbä. Mänit højts njaac nõcxy mejyhawiimb maa ja'a cajpt hänajty jaduñ xiøhatiän Neápolis. Coo højts jim̄ nmejch mejyhawiimb, mänit højts nbarcopädsøømnä.

¹² Mänit højts nõcxcumbä maa ja'a cajpt hänajty jaduñ xiøhatiän Filipos, jim̄ Macedonia-naaxpa'a. Jim̄ä Rómabä jäya'ayhajxy hänajty nämay chäna'ay. Jim̄ højts jaduñ maxiøø nhijnä.

¹³ Coo ja'a poo'xxiøø yhabaaty, mänit højts jim̄ nõcxy mõjnøøba'a, jim̄ cajptpa'a. Jim̄ä judíos ja'a Dios hajxy hänajty naxy pia'ya'axy. Jim̄ä to'oxiøjc-hajxy hänajty näje'e tøø yhamugø'oy. Mänit højts jim̄ nhøxtaacy. Mänit højtsä jäya'ay ndägøøyy yajmøødmädiaacpä ja'a Diosmädia'agy, ja'a hajxy hänajty tøø yhamugø'oyäbä. Haagä to'oxiøjc hajxy hänajty je'e.

¹⁴ Tu'jäya'ay hänajty xiøhaty Lidia. Jim̄ hänajty chooñ maa ja'a cajpt hänajty xiøhatiän Tiatira. Hucywyit hänajty tíoopy, ja'a hojiatypä. Wyiingudsähgøøbiä Lidia ja'a Dios hänajty. Mänitä Dios ja'a Lidia yajmabøjcy waambatiä Pablo hänajty yajnähixø'oy.

¹⁵ Mänitä Lidiahajxy hoy ñäbety nägøxiä mäduhñtiä hajxy hänajty jim̄ yhity maa ja'a tiøjcän. Mänit højtsä Lidia xñämaayy:

—Pø mmänaamb hajxy jaduñ coöchä Dios ja'a miädia'agy hamuumdu'joot nmabøjcä, jam̄ hajxy jim̄ mejtsta'ag maachä ndøjcän —nøm højts jaduñ xñämaayyho'cy.

Mänit højts jim̄ hoy nmejtsta'agy.

¹⁶ Wiinghooc højts hänajty jim̄ nõcxy maa ja'a Dios hajxy hänajty pia'ya'axiän. Tu'haamnøcxpä, jim̄ højtsä cäxyihäna'c tu'ug hoy nbaady. Cudoogø'oy hänajty je'eduhñ. Ja'a haxøøgpä hänajty miøød. Cuwiinmahñdy hänajty je'eduhñ. Cøxiä hänajty jaduñ ñajuø'oy tijaty hänajty jadäänäp tunäänäp. Majiatiä xädø'øñ hänajty ñämechii coo hänajty jaduñ cøxiä ñajuø'oy. Coo xädø'øñ hänajty mio'oyii, cøxiä wyiindsøn hänajty miøodiägach, mäduhñtiä hänajty quianarhaty.

¹⁷ Mänit højtsä cäxyihäna'c xpiadu'ubøjcy høxhaam. Mänit tiägøøyy yaaxpä jøjpä:

—Yø'ø jäya'ayhajxy, ja'a Dios hajxy miäduumby, ja'a maas mõc cuhdujt mõødpä. Mijts hajxy xyajwiingapxø'øwaamb neby hajxy mnähwa'ads mguhwá'adsät.

¹⁸ Maxiøø højtsä quixy jaduñ xpiawädiyty yáaxäp wäänäp. Coo ja'a Pablo jaduñ chíjpänä coo ja'a quixy jaduñ wyi'i ya'axy, mänitä Pablo ñäwa'wiimbijty. Mänitä Pablo ja'a haxøøgpä yHøxquejxy:

—Ja'a Jesucristocøxpøch miič nhøxquexy; pädsøm jiiby maa yø'ø cäxyihäna'cän —nømä Pablo miänaañ.

Mänitá haxøøgpä jaduhñ jiaančh pädsøømy.

¹⁹ Coo ja'a quixiä wyiindsønñhajxy jaduhñ yhijsy coo ja'a quixy hänajty jaduhñ tøø ñähwa'ačhii, mänit hajxy jaduhñ ñajuøøyy coo ja'a quixy hänajty jaduhñ quia'a canarhadaanä, møød coo xädø'øñ hajxy hänajty quia'a mo'owáañänä. Mänitá Pablohajxy miajtsä møødä Silas. Mänit hajxy yajnøcxä hagujs.

²⁰ Mänit hajxy jaduhñ ñäxø'øwøøyyä:

—Hädaa judíosñhajxy, cajptyajma'p hajxy jaduhñ.

²¹ Wiingcuhdujt højts xjia wi'i yajnähixø'øwáañäm. Cab hajxy hawiinmats nmäbøjcamät, je'eguiøxpä coo hajxy jim ndsónñäm Roma —nømä Pablohajxy ñänøømä.

Ja'a quixiä wyiindsønñhajxy jaduhñ mänaañ.

²² Mänitá Pablohajxy ñäbädø'cä ja'a cú'ugäm. Mänitá cuduunghajxy miänaañ coo ja'a Pablo ja'a wyithajxy yajtsijjächät, møød coo hajxy wiobho'ogøøjät paxyhaam.

²³ Coo ja'a Pablohajxy hänajty tøø wiobho'ogyii, mänit hajxy hoy chumyii. Mänitá tsumyjiäya'agwieendähajpä yhanehmä coo ja'a Pablohajxy hoy cwieendähadøøjät.

²⁴ Mänit hajxy hoy piäda'agyii hadsihxtuum jiiby pujxtøgooty. Pu'uyhawa'adsootiä tiecyhajxy jaduhñ yhame'mújcächä.

²⁵ Cuptsuhmdä hänajty jaduhñ, jiibiä Pablo ja'a Dios hajxy hänajty pia'høy pia'ya'axy. Jiibiä miädsomyjiäya'ayhajxy hänajty jaduhñ yhamädoowhity.

²⁶ Mänitá hujx møc ñajxy. Høxtä tsäyuuuy ja'a pujxtøjc jaduhñ. Cøjxä tøgħaaw jaduhñ yhawa'ačh. Møødä cadena jaduhñ cøjx pioty maa ja'a tsumyjiäya'ayhajxy hänajty jaduhñ quiuxochän.

²⁷ Coo ja'a tsumyjiäya'agwieendähajpä mia'abiädø'cy, mänit jaduhñ yhijsy coo ja'a tøgħagø'øw hänajty jaduhñ tøø quiøxy hawa'ačh. Mänit jaduhñ miänaañ cooc tyijy ja'a tsumyjiäya'ayhajxy tøø quiøxy päyø'øgy. Mänitá espada jiuu'ty. Niyagħo'ogáañäp hänajty jaduhñ hamdsoo je'eguiøxpä coo hajxy cu piäyø'cy.

²⁸ Mänitá Pablo yaaxy:

—Ca'a jaduhñ mniyagħo'ogyii. Chaa højts jaduhñ nägøxiä. Caj pøñ tøø piäyø'øgy —nømä tsumyjiäya'agwieendähajpä ñämaayyä.

²⁹ Jaančh tehñ chähgøøby hänajty je'eduhñ. Høxtä tsäyuuuy hänajty je'eduhñ. Mänitá jøøn hoy quioñ. Päyø'øguiä tiøjtägøøguiumbä. Mänitá Pablohajxy hoy wyiinjiicäda'agyii møødä Silas.

³⁰ Mänit hajxy yhøxwoobädsøømä pujxtøgooty. Mänit hajxy miäyajtøøwä:

—Wiindsønñøjc, ja wi'i ñähwa'adsáambøch høøch. Nébyhøch jaduhñ njatcø'øwat.

Ja'a tsumyjiäya'agwieendähajpä jaduhñ mänaañ.

³¹ Mänitá Pablohajxy yhadsooyy:

—Coo hajxy jaduhñ mmäbøgät ja'a Wiindsønñ Jesúsøxpä, jaduhñ hajxy mnähwá'adsät mäduhñtiä hajxy jim mhity maa ja'a mdøjcän.

³² Mänitá tsumyjiäya'agwieendähajpä ja'a Dioscapxy ja'a Diosmädia'agy hajxy hoy yajwiingapxø'øyyii mäduhñtiä hajxy hänajty jim yhity maa ja'a jiøøn maa ja'a tiøjcän. Ja'a Pablohajxy jaduhñ mäyajwiingapxøøyy.

³³ Moññä hänajty jaduhñ. Mänitá Pablohajxy hoy yajtsi'iyii møødä Silas majaty hajxy hänajty jaduhñ tøø chaachø'øyän. Ja'a tsumyjiäya'agwieendähajpä jaduhñ mäyajtsiiw. Mänit hajxy nägøxiä hoy ñäbety mäduhñtiä hajxy hänajty jiiby yhity maa ja'a jiøøn maa ja'a tiøjcän.

³⁴ Mänitá Pablohajxy jim wioonøcxä maa ja'a craa tiøjcän. Mänit hajxy yajcaayy yaghuucä. Jaančh tehñ xioondaac ja'a craahajxy jaduhñ je'eguiøxpä coo ja'a Dioscapxy ja'a Diosmädia'agy hajxy hänajty tøø miäbøcy.

³⁵ Coo jiobøøyy, mänitá cuduungå policia hajxy quiejxy maa ja'a pujxtøjcän. Mänitá policia ja'a tsumyjiäya'agwieendähajpä hajxy hoy ñäma'ay coo ja'a Pablohajxy ween yhøxmächii møødä Silas.

³⁶ Mänitä Pablo hoy ñämaadiägachii:

—Tøøchä cuduunghajxy jaduhñ xyhane'emy cooch mijts nhøxmádsät. Nøcx hajxy jaduhñ jootcujc.

³⁷ Mänitä Pablo ja'a policia ñämaayy:

—Højts, Roma højts nxønaxy. Jaduhñ højts cuhdujt nmøødä nebiä Rómabä jäya'ayhajxy miøødän. Hoy højts jim nja xønaxy Roma, tøø højtsä cuduunghajxy xyajwobho'ogyii hijwiinduum. Hoy højts tii pojpä tii cädieey nga'a jagä møødä, tøø højts xyajtsumyii. Hoorä, tsähdiuumbä cuduunghajxy jaduhñ coo højts jaduhñ tøø xchaächtiiñ. Paady højts hamee'ch xjia wi'i yaghøxmasda'añii. Ween højts miñ xyhamdsoo høxmach —nømä policiahajxy ñämaayyä.

³⁸ Mänitä cuduunghajxy hoy yhawáanäxä waambatiä Pablo hánajty tøø miäna'añ. Coo ja'a cuduunghajxy jaduhñ miädooyy coogä Pablohajxy hánajty jim xiønaxy Roma, mänit hajxy chähgøøbiøjcy.

³⁹ Mänitä Pablohajxy hoy ñäma'ayii møødä Silas:

—Huuc tunä mayhajt hajxy, højts huuc mämée'xäc —nømä cuduunghajxy hoy miäna'añ.

Mänitä Pablohajxy yhøxmájtsänä. Mänit hajxy miänuu'xtaacä coo hajxy jim chónät Filipos.

⁴⁰ Coo ja'a Pablohajxy piujxtøjpädsøømy, mänit hajxy jim ñøcxy maa ja'a Lidia tiøjcän. Mänitä mäbøjpädøjc-hajxy jim yhamugøøyy. Mänit hajxy quiapxmøcpøjcä ja'a Pablo. Mänitä Pablohajxy jim chohñnä møødä Silas.

17

¹ Mayhagajptä Pablohajxy ñaxøøyy, møød jim Anfípolis, møød jim Apolonia. Mänit hajxy jim miejch maa ja'a cajpt hánajty xiøhatiän Tesalónica. Jimä judíos ja'a chajtøjc-hajxy hánajty tu'ug.

² Jaduhñä Pablo hánajty quiuhdujthaty coo jaduhñ chajtøjyo'oy. Wiindu'ugpoo'xxiøø hánajty jaduhñ jim ñøcxy maa ja'a tsajtøjcän. Tägøøghoocä Pablo jim yhooyy maa ja'a tsajtøjcän jim Tesalónica. Jimä Pablo ja'a jäya'ay hánajty miøødcapxy miøødmädia'agy. Ja'a Diosmädia'agy hajxy hánajty yajcapxiøøby.

³ Jaduhñä Pablo hánajty quiapxtøy coo jaduhñ jim myiñ cujaay maa ja'a Diosmädia'aguiän coogä Dios ja'a Mesías hánajty yaa quiexa'añ hädaa yaabä naaxwiin, møød cooc hánajty yho'oga'añ, møød cooc hánajty jiuypiojtägatsa'añ:

—Ja'a Jesúshøch mijts nyajmøødmädiaacyy. Jue'e je'e, ja'a Mesías je'e, ja'a Dios jecy ñänøømäbä cooc hánajty yaa quiexa'añ ho'pä —nømä Pablo miänaañ.

⁴ Näje'e ja'a judíoshajxy miäbøjcy. Nämayyä jäya'ayhajxy miäbøjpä, ja'a hajxy hánajty ca'a judíospä, ja'a Dios hajxy hánajty wiingudsähgøøbiä. Nämayyä to'oxiøjc-hajxy miäbøjpä, pønjetiä ñihyhaphajxy hánajty jim tuunghmøød haguyc. Mänitä Pablohajxy miägu'ugpøjcä møødä Silas, ja'a jäya'ayhajxy hánajty tøø miäbøquiäbä.

⁵ Coo ja'a Pablohajxy jaduhñ miägu'ugpøjcä, mänitä judíoshajxy jiootma'ty, ja'a hajxy hánajty ca'a mäbøjpä. Mänitä haxøøghäna'c-hajxy hoy wioomugyii. Mänit hajxy ñämaayyä coo hajxy ween quiajptyajma'ady. Mänitä haxøøgjäya'ayhajxy miädoyhajty cooc tyijy ja'a Pablohajxy hánajty jim tøø miech maa ja'a Jasón ja'a tiøjcän. Jue'e ja'a haxøøgjäya'ayhajxy hánajty jiatcø'owa'añ møødä judíoshajxy, jimä Pablohajxy hánajty yajnøcxa'añii haguyc. Mänitä Jasón ja'a tiøjc hadsip yhajahmdúutäxä.

⁶ Coo ja'a Pablohajxy jim quia'a paatä, mänitä Jasónhajxy jim wyitsnøcxä haguyc hadsip, møødä mäbøjpädøjc-hajxy näje'e. Mänitä judíoshajxy tiägøøyy yaaxpä jojpä, ja'a hajxy hánajty ca'a mäbøjpä:

—Ja'a Pablohajxy, cajptyajma'pä hajxy jaduhñ wiädity homiaajä. Tøø hajxy yaa miejtpä.

⁷ Jim hajxy miejtsta'agy maa ja'a Jasón ja'a tiøjcän, paadiä Jasón ja'a pojpa miøødäbä. Homiaajä Pablohajxy jaduhñ wiädity, jaduhñä cu'ug hajxy jiøjcaxø'øy coo ja'a gobiernä miädia'agy hajxy quia'a mäbøjcänät, ja'a jim møjhaja Roma. Jaduhñä Pablohajxy yhöndaacpä cooc tyijy ja'a Jesús jaduhñ miøjhajpä nebiä gobiernän —nømä judíoshajxy miänaañ, ja'a hajxy hanaajty ca'a mäbøjpa.

⁸ Coo ja'a cu'ughajxy jaduhñ miädooyy møødä møjhajaahajxy, manit hajxy tiägøøyy yaaxpä waambä.

⁹ Manitä Jasónhajxy ñiñähjuudiutä møødä mäbøjpädøjc-hajxy, ja'a hajxy hanaajty tøø miächíjábä. Manit hajxy yhöxmájtšanä.

¹⁰ Coo quioodsøøyy, manitä Pablohajxy ñämaayyä møødä Silas coo hajxy jim chónät, coo hajxy ñøcxät jim maa ja'a cajpt hanaajty xiøhatiän Berea. Ja'a mäbøjpädøjc-hajxy jaduhñ mänaañ. Manitä Pablohajxy jim jiaančh nøcxy Berea. Coo hajxy jim miejch, manit hajxy ñøcxy maa ja'a judíos chajtøjc-hajxiän.

¹¹ Manitä Diosmädia'agy hajxy tiägøøyy yajñähixøøbiä. Coo ja'a judíoshajxy jaduhñ miädooyy, manit hajxy jaduhñ jiootcugøøyy. Cab hajxy jaduhñ jiootma'ty nebiä miäjudíoshajxy hanaajty tøø jiootma'adiän jim Tesalónica. Manitä Diosmädia'agy hajxy tiägøøyy capxtaacpä jabom-jabom pø jaančh tøyhajt hanaajty jaduhñ nebiä Pablo hajxy hanaajty miädia'aguiän.

¹² Paady hajxy jaduhñ may miäbøjcy. Møødä jäya'ayhajxy may miäbøjpa, ja'a hajxy hanaajty ca'a judíospä, møødä møjhajaahajxy, ya'adiøjc-hajxy møødä to'oxiøjc-hajxy.

¹³ Ja'a jäya'ayhajxy hanaajty jim tsänaabiä Tesalónica, ja'a hajxy judíospä, coo hajxy jaduhñ miädoyhajty coo ja'a Pablo ja'a Diosmädia'agy hanaajty jim yajwa'xy Berea, manit hajxy jiootma'ty. Manitä jäya'ayhajxy Beréabä hoy jiøjcaxø'øy coo ja'a Pablo ja'a miädia'agy quia'a mäbøjcäxät.

¹⁴ Ja'a jäya'ayä Diosmädia'agy hajxy hanaajty mäbøjpa jim Berea, manit hajxy miänaañ coo ja'a Pablo jim chónät, coo wiingtuum ñøcxät mejypia'a. Paady hajxy jaduhñ miänaañ je'eguiøxpä coo hajxy hanaajty chähgø'øy coo ja'a Pablo cøxypänejpä tiunøjät. Coo ja'a Pablo jim jiaančh tsohñ Berea, jimä Silashajxy miähmøøyy møødä Timoteo.

¹⁵ Yajmøødquejxä ja'a Pablo ja'a mäbøjpädøjc nämetsc nädägøøg. Coo ja'a Pablohajxy jim miejch mejypia'a, manit hajxy biarcotägøøyy. Manit hajxy ñøcxy barcojooty maa ja'a cajpt hanaajty xiøhatiän Atenas. Coo hajxy jim miejch, manitä Pablo jiamiøødhajxy wyiimbijnä. Manitä Pablo capxy jim quiejxy Berea coo ja'a Silashajxy jim paquiä ñøcxpät Atenas møødä Timoteo, coo ja'a Pablo hajxy jim piäadät.

¹⁶ Jimä Pablo ja'a Silas hanaajty yahixy Atenas møødä Timoteo, manitä Pablo yhiixy coo tsaasaandä hanaajty jim jiaančh tehñ miayyä cajptooty. Je'e ja'a cu'ughajxy hanaajty wyiingudsähgøøby. Coo ja'a Pablo jaduhñ yhiixy, manit jiaančh tehñ jiootmayhajty.

¹⁷ Naxiä Pablo hanaajty jim ñøcxy maa ja'a judíos chajtøjc-hajxiän. Ja'a Jesucristocøxpä ja'a Pablo hanaajty jim yajcapxy yajmädia'aguiø'øy møødä judíoshajxy, møødä jäya'ayhajxy ca'a judíospä, ja'a Dios hajxy hanaajty wiingudsähgøøbiä. Jabom-jabomä Pablo hanaajty jim ñøcxy cajptcujc. Møød jimä Pablo ja'a Jesucristocøxpä hanaajty yajcapxy yajmädia'aguiøøbiä møødä cu'ug, ja'a hajxy hanaajty jim yohby najxpä.

¹⁸ Manitä jäya'ayä Pablo hajxy näje'e wyiingumedsøøyy. Cujwa'xy hajxy hanaajty yhabøcy ja'a epicureodøjcä miädia'agy. Møød kujwa'xy hajxy hanaajty yhabøjpa ja'a estoicodøjcä miädia'agy. Manit hajxy näje'e miänaañ:

—Yø'ø craa, jaančh tehñ yajcumayaamb yø'øduhñ cooc tyijy jiaančh tehñ yhöxpøquiä. Pero cap yø'øduhñ tii ñä'ägädä jaty —nømä Pablo jaduhñ ñänøømä.

Manitä wiinghäna'c-hajxy miänaañ:

—Jäguem yø'ø craa choon. Wiingdiosäda'a miädiaacypy.

Paady hajxy jaduhñ miänaañ, je'eguiøxpä coo ja'a Pablo ja'a Jesucristo hanaajty miädia'agy, cooc hajxy hoy xñähho'túutäm, møød cooc jadähooc jiuypijøjtägajch.

19 Mänitā Pablo jim̄ wioonøcxā maa ja'a tunhuung hānajty xiøhatiän Areópago. Jim̄ä jäya'ayhajxy hānajty may tøø yhamugø'øy. Mänitā Pablo ñāmaayyā:

—Højts hawāanāc tii miich jaduhñ mmādiaacypy hawiinjemybiā.

20 Jaanč tehñ wyiing miich jaduhñ mmādia'agy. Højts capxwíjjāc neby jaduhñ miādia'agytiägø'øyän —nømā Pablo miāyajtøøwā.

21 Hix, ja'a jäya'ayhajxy hānajty jim̄ tsānaabiā Atenas, møødä jäya'ayhajxy hānajty jim̄ hadsänaabiā, jaduhñ hajxy hānajty quiuhdujthaty coo hajxy hānajty cøxiā wiinä miādowa'añ, ja'a hānajty hawiinjemybiā.

22 Mänitā Pablo tiānaayyø'cy cu'ughagujc. Mänit miānaañ:

—Mägu'ughajpādøjc, mijts yaa tsānaabiā Atenas, tøøch jaduhñ nhixy coo mijtsä tsaasaandā madiu'u mwiingudsähgø'øy.

23 Mayhitā wiingudsähgøødiaact hajxy mmøødä. Tøøchā altar tu'ug nhixy coo letra jaduhñ yuugjaay miøødä: “Jii ja'a Diosāda'a tu'ug, cahnā pøn yhixyñā. Je'e yhaltar hädaa.” Hoorā, mwiingudsähgøøby yø'ø Dios hajxy jaduhñ, hoy hajxy mga'a jagā hixyhatyñā. Pues je'eč mijts jaduhñ nyajmøødmādiaacypy.

24 'Ja'a Dióshøch jaduhñ nmādiaacypiā, cøxiā je'e yhädiuuñ møød hädaa yaabā naaxwiimbā, møød tijaty yaa hijp. Wiindsøn_hajp je'e jim̄ tsajpootyp møød hädaa yaabā naaxwiin. Cøxiā wiinä jaduhñ yhane'emy homiaajä. Cab jaduhñ jiiby chāna'ay tsajtøgooty, ja'a jäya'ayhajxy jaduhñ yhädiuumbiā.

25 Cabā Dios tii yajmaajiaty. Cab jaduhñ miāna'añ coo højts nbuhbéjtāmät. Pero jaaya'ay hajxy cøxiā xmióoyyām tijaty hajxy nyajmaajijājtām, møødä jugyhajt, møødä poj, cøxiā.

26 'Tu'ug jäya'ay ja'a Dios jecy yhädiuundsøhñ. Je'e hajxy nägøxiā nhøjxhājtām ndecyhājtām mäduhñtiā hajxy yaa ndsānāyyām hädaa yaabā naaxwiin wiinduhmyhagajpt. Cahnā Dios hajxy hānajty xyhädiuunām, tøøyyām hajxy hānajty xyajnähdíjjām mānaa hajxy nmiin ngāhwāmät, maa hajxy ndsānaayy nhäyóowāmät.

27 Chojpiā Dios ja'a jioot jaduhñ coo hajxy nwiingudsähgøøyyāmät, paady hajxy tøø xyhädiuunām. Coo ja'a Dios hajxy hamuumdu'joot nba'yāaxāmät, xyhadsóowām hajxy jaduhñ.

28 Hix, jaaya'ay hajxy xyagjugyhājtām. Jaduhñ hajxy tøø xquiunú'u'xām coo hajxy ndsānaayy nhäyóowāmät, møød coo hajxy nyohy nnāxāmät. Jaduhñä yaabā jäya'ayhajxy näje'e tøø quiujaay coogā Dios hajxy xyhuunghājtām.

29 Tøyhajt jaduhñ coo ja'a Dios hajxy xyhuunghājtām. Pero coo jäya'ayä jäya'ayhahädiuunnaxy hajxy yhädiuñ, jue'e hajxy yajtuumby, oro, møødä poobhoro, møødä tsaā. Cab jaduhñ yhahixø'øy coo jaduhñbā jäya'ayhahädiuunnaxy hajxy nwiingudsähgøøyyāmät. Hix, ca'a Dyiosä je'e jaduhñ.

30 Jegyhajty, cabā jäya'ayhajxy hijty ñajuø'øy pø jii Dios. Y cabā Dios hijty miøjpāda'agy coo hijty quia'a wiingudsähgø'øyii. Pero jäda'ahaty, tøø ja'a Dios hajxy xyhanéhmām coo ja'a nhaxøøgcuhdujt hajxy nägøxiā nnajtshixøøyyāmät, mäduhñtiā hajxy yaa ndsānāyyām hädaa yaabā naaxwiin.

31 Hix, tøø ja'a Dios wyiinmay coo hajxy nägøxiā xyajtøyhajtyegānām. Jaanā jaduhñ tøø wyiinmaabiā mānaa hajxy jaduhñ xyajtøyhajtyegānām. Tøø ja'a Dios tu'jäya'ay yajnähdijy coo hajxy mänitxøøbä xyajcueendäyegānām. Coo tu'jäya'ay jaduhñ yho'cy, mänitā Dios jaaya'ay yagujypiojtägajch jadāhooc. Coo jaaya'ay jaduhñ jiaanč jujypiojtägajch, jaduhñä tøyhajt hajxy nmøødhājtām coo jaaya'ay hajxy tøyhajt xyajcueendäyegānām mänitxøøbä —nømā Pablo miānaañ.

32 Coo ja'a cu'ughajxy jaduhñ miädooyy coo ja'a Pablo jaduhñ miānaañ cooc tu'jäya'ay hānajty tøø jiuypiojtägach, ja'a hānajty tøø yhó'oguiäbā, mänitā Pablo hajxy näje'e ñäxiicy. Mänit wiinghāna'c-hajxy näje'e miānaañ:

—Mmínäp yaa jadähooc. Njaac mädo_waam_{by} hõjts jadu_hn nej miich mmädia'aguiän —nõmä Pablo ñämaayyä.

³³ Mänitä Pablo wyiimbijnä.

³⁴ Näje'e jäya'ayä Pablo hajxy pianøcxy. Miäbøjc hajxy jadu_hn. Tu'jäya'ay hänajty xiøhaty Dionisio. Møjhajp hänajty je'e jim maa ja'a Areópagon. Jaanä jadu_hnä to'oxiøjc tu'ug miäbøjpä. Dámaris hänajty xiøhaty. Näm_{ay} hajxy jadu_hn miäbøjcy.

18

¹ Mänitä Pablo jim chohñ Atenas. Mänit wiingtuum ñøcxy maa ja'a cajpt hänajty xiøhatiän Corinto.

² Jimä Pablo ja'a judío tu'ug miøødnibiaatä. Jue'e ja'a judío hänajty xiøhaty Aquila. Jim hänajty choon maa ja'a naax hänajty xiøhatiän Ponto. Jue'e tio'oxiøjc hänajty xiøhaty Priscila. Naam mech hajxy hänajty jim Corinto. Jim hajxy hänajty tøø chohnda'agy maa ja'a naax hänajty xiøhatiän Italia. Paady hajxy jim chohñ Italia, je'eguiøxpä coo ja'a gobiernä Claudio hänajty tøø yhane'emy coo ja'a judiøshajxy jim quiøxy tsóonät Roma. Mänitä Pablo jim ñøcxy cuhijxpä maa ja'a Aquilahajxy hänajty yhahäña'ayän.

³ Jue'e Aquilahajxy hänajty tiuunghajpy, loondøy hajxy hänajty yhädiuumby. Y ja'a Pablo, jaanä jadu_hn hänajty tiuungmøødäbä. Paadiä Aquila ja'a Pablo ñämaayy coo ja'a Pablo jim miøødtúnät. Mänitä Pablo jim miähmøøñä.

⁴ Wiindu'ugäsábado ja'a Pablo hänajty jim ñøcxy maa ja'a judíos chajtøjc-hajxiän. Jiibiä Pablo ja'a Diosmädia'agy hänajty yajwiingapxø'øy ja'a Jesucristocøxpä, weenä jäya'ayhajxy jadu_hn miäbøcy, møødä judiøshajxy, møødä ca'a judiøshajxypä.

⁵ Mänitä Silashajxy jim miehch Corinto møødä Timoteo. Macedonia hajxy hänajty tøø chohnda'agy. Mänitä Pablo jadu_hn wyiinmaayy coo tu'tu'uyyä hänajty tiunaannä, coo ja'a Diosmädia'agyhajtiä hänajty miäwäditaannä. Mänitä Pablo ja'a judíos tiägøøyy yajmøødmäiaacpä coogä Jesús hänajty ja'a Mesías, ja'a Dios hänajty jecy tøø yajnähdiijiäbä coo hänajty quixa'añ yajnähwaatspä.

⁶ Mänitä judiøshajxy jiootma'ty. Mänit hajxy miänaañ cooc tyijy ja'a Pablo hänajty yhøhnda'agy. Mänitä Pablo ja'a wyit wyiinxiyty. Jadu_hnä hijxtahnd yejcy coo ja'a judíos wyiinmahñdyhajxy hänajty quia'a hoyyä. Mänitä Pablo miänaañ:

—Hamdsooyyä pojpa hajxy jadu_hn mmøødä coo hajxy jadu_hn mga'a nähwa'adsa'añ. Paady hajxy jadu_hn mga'a nähwa'adsa'añ coo haxøøgwiinmahñdy hajxy mmøødä. Ca'a yhøøchä pojpa jadu_hn nmøød coo hajxy mga'a nähwa'adsa'añ. Cábøch mijtsä Diosmädia'agy nyajwiingapxø'øwáannä. Ja'a jäya'ayhajxy ca'a judiøspä, je'eçh hajxy jadu_hn nyajwiingapxø'øwáannäp —nõmä Pablo ja'a judíos ñämaayy.

⁷ Mänitä Pablo chajtøjpadsoømy. Mänit jim ñøcxy maa ja'a craa Ticio Justo tiøjcän, jim tsajtøjnähmøjc. Wyiingudsähgøøbiä Ticio Justo ja'a Dios hänajty, hoy hänajty je'e quia'a jagä judiøsä.

⁸ Jimä jäya'ay hänajty tu'ug xiøhaty Crispo. Jue'e hänajty tiuumby tsajtøjwiindsøn. Mänitä Crispo ja'a Diosmädia'agy hajxy miäbøjcy nägøxiä, møødä yhuung møødä tio'oxy. Näm_{ayy}ä jäya'ayä Diosmädia'agy hajxy miäbøjpä, ja'a hajxy hänajty jim tsänaabiä Corinto. Mänit hajxy hoy ñäbety.

⁹ Mänitä Pablo ja'a Jesucristo wyiinhijxy coods. Mänitä Jesucristo miänaañ:

—Ca'a pøn mdsähgø'øy. Høøch nmädia'agy tehngajnä yajwá'xäc. Caj mhamónät.

¹⁰ Høøch miich ngüeendähajpy. Caj miich pøn nej xtiuna'añ. Hix, näm_{ayh}øchä jäya'ay ja'a ngapxy ja'a nmädia'agy hajxy yaa xmiäbøjcä maa hädaa cajptän —nõmä Pablo ñämaayyä.

¹¹ Tu'jomøjtä cupcä Pablo jim yhiyty Corinto. Jue'e ja'a Pablo hänajty jadu_hn ñä'ägädä tuunghajpy, ja'a Diosmädia'agy-yajwa'xyiibä.

12 Pero coo ja'a craa Galión jim̄ tiägøøyy tuumbä gobernador maa ja'a naax̄ hänajty xiøhatiän Acaya, mänitä judíos ja'a Pablo hajxy tiägøøyy mädsibøøbiä. Mänit hajxy jim̄ yajnøcxy haguyc maa ja'a Galión hänajty tiuñän.

13 Mänitä judíos ja'a Galión hajxy ñämaayy:

—Jue'e hädaa craa jiatcø'øyy, jiøjcapxøøby hädaa craa ja'a cu'ug coo højts nguhdujt hajxy xquia'a yajtúunät neby højtsä Dios nwiingudsähgø'øyyän. Wiingwiinmahñdy jaduhñ yajnahixøøby coo højtsä Dios wiing nwiingudsähgø'øwät —nømä Pablo ñähwaambejtä.

14 Coo ja'a Pablo hänajty yhadsowa'añ, mänitä Galión yaghadsowøøyy:

—Coo hädaa craa häxøpy tøø quiädieey, mänitøch mijtsä mmädia'agy häxøpy nmädowaanä.

15 Pero ja'a mhamdsoo cuhdujt hajxy jaduhñ myajtsibøøby. Ja'a mhamdsoo mädia'agy hajxy jaduhñ myajcapxiøøby pøn jaduhñ xøhajp ja'a Mesías. Hamdsoo mijts myajtødiägø'øwät. Cábøch jaduhmbä nmädowa'añ —nømä judíoshajxy yhojjä.

16 Mänitä Galión ja'a judíos yhøxquejxy maa ja'a hagujtøjcän.

17 Jim̄ä jäya'ay hänajty tu'ug xiøhaty Sóstenes. Copc-hajp hänajty je'e maa ja'a judíos chajtøjc-hajxiän. Mänitä cu'ugä Sóstenes hajxy miajch. Mänit hajxy jim̄ yajnøcxy haguyc. Mänit hajxy jim̄ quioxho'cy. Pero cabä Galión jaduhñ miøjpädaacy.

18 Y ja'a Pablo, maxiøø je'e jim̄ jiaag hijty Corinto. Mänitä Pablo ja'a mæbøjpädøjc ñämaayy coo hänajty jim̄ choonaanä. Jim̄ hänajty ñøcxa'añ Siria barcojooty näguipxy møødä Priscila møødä Aquila. Cahnä hajxy hänajty jim̄ biarcotägø'øyy Cencrea, mänitä Pablo cuhdøø'x yajcuhme'xy. Paady jaduhñ yajcuhme'xy coo ja'a Dios hänajty cøxiä wiinä tøø miäyujwa'añ. Mänitä Pablohajxy tiu'ubøjnä barcojooty.

19 Mänit hajxy mejyhawiimb ñajxy. Mänit hajxy jim̄ miejch maa ja'a cajpt hänajty xiøhatiän Efeso. Jim̄ä Pablohajxy ñibiuhyohdiüütänä møødä Priscila møødä Aquila. Mänitä Pablo jim̄ ñøcxy nidiuhñ maa ja'a judíos chajtøjc-hajxiän. Mänitä Pablo ja'a judíos tiägøøyy møødmädiaacpä.

20 Mänitä judíoshajxy jia mänaañ coo ja'a Pablo jim̄ jejcy yhidät. Pero cabä Pablo jaduhñ miänaañ.

21 Mänit miänaañ: “Nøcxáambøch cham̄ Jerusalén xøøhajpä. Pero coo ja'a Dios jaduhñ miäná'anät, mänitøch yaa nmiindägátsät maa mijtsän.”

Coo ja'a Pablo jaduhñ quiapxpädøøyy, mänit jadähooc biarcotägøøguiumbä. Mänit jim̄ chohñ Efeso.

22 Mänit jim̄ ñøcxy barcojooty maa ja'a cajpt hänajty xiøhatiän Cesarea. Coo jim̄ miejch, mänit biarcopädsøømy. Mänit ñøcxy Jerusalén. Coo jim̄ quioo'ty, mänitä mæbøjpädøjc-hajxy hoy quiuhixyii. Mänitä Pablo jim̄ ñøcxy Antioquía.

23 Maxiøø jim̄ yhijty. Mänit jim̄ tiu'ubøjcumbä. Mänit jim̄ ñøcxy maa ja'a naax̄ hänajty xiøhatiän Galacia møød jim̄ Frigia. Majatiä Pablo hänajty wiädity, jim̄ä mæbøjpädøjc-hajxy hänajty quiapxmøcpøgyii nebiä Diosmädia'agy hajxy jaduhñ hoy yajnøcxät.

24 Mänitä judíos jim̄ tu'ug miejch Efeso. Apolos hänajty xiøhaty. Jue'e hänajty choon̄ Alejandría maa ja'a naax̄ hänajty xiøhatiän Egipto. Jøjwidsø'ø hänajty quiapxy miädia'agy. Ca'xiä Diosmädia'agy hänajty jiaanç tehñ jiaty.

25 Tøø ja'a Diostu'u hänajty jaduhñ hoy yhabøcy. Hamuumdu'joot hänajty yajnahixø'øyy ja'a Jesúsøxpä, neby hänajty tøø jiaty tøø yhabetiän. Ñajuøøbiä Apolos hänajty jaduhñ coo ja'a Juan hänajty tøø miäyajnäbety. Pero cahnä Apolos hänajty miädoyhatyñä coo ja'a mæbøjpädøjc-hajxy hänajty ñäbejnä ja'a Jesucristocøxpä.

26 Mänitä Apolos jim̄ ñøcxy maa ja'a judíos chajtøjc-hajxiän. Mänitä Apolos ja'a Diosmädia'agy tiägøøyy yajwiingapx yajwiinmädiaagøøbiä. Møcjoot hänajty miøød. Jim̄ä Priscilahajxy hänajty yhamädoowhity tsajtøgooty møødä Aquila. Coo ja'a Apolos jaduhñ miädiaacpädøøyy, mänitä Priscila ja'a Apolos hajxy hawiing wioonøcxy. Mänitä Apolos

hajxy ca'xy yajmøødmädiaacy nebiä Apolos ja'a Diosmädia'agy jaduhñ maas hoy yajñøcxät.

²⁷ Mänitä Apolos miänaañ coo hänajty jim ñøcxa'añ Acaya. Mänitä mabøjpädøjc-hajxy jaduhñ piämänaañ coo ja'a Apolos jim ñøcxät. Mänitä mabøjpädøjc nocy hajxy yhädiuun coo ja'a Apolos jim piuhbedøjät Acaya. Ja'a mabøjpädøjc-hajxy hänajty jim hijpä Acaya, je'edsä Apolos hajxy puhbedäp. Mänitä Apolos jim chohñ Efeso. Mänit jim ñøcxy Acaya. Coo jim miejch, mänitä mabøjpädøjcä Apolos hajxy piuhbejty nägø'ø nädecypiä. Paady hajxy hänajty tøø miäbøcy ja'a Jesucristocøxpä, je'eguiøxpä coo ja'a Dios hojioot jiaanç tehñ miøødä.

²⁸ Majatiä Apolos ja'a judíos ja'a Diosmädia'agy hänajty miøødyajcapxiø'øy cu'ughagujc, cabä judíoshajxy hänajty yajmäjäda'agyii. Jaduhñä Apolos yajñähixø'øy coogä Jesús hänajty je'e Miesíasä, ja'a Dios hänajty jecy tøø yajñähdíjjiäbä coo hänajty yaa quiexa'añ hädaa yaabä naaxwiin. Jaduhñä Apolos hänajty yajñähixøøbiä coo jaduhñ jim myiñ cujaay maa ja'a Diosmädia'aguiän coo ja'a Dios jaduhñ jecy tøø miäna'añ coogä Mesías hänajty yaa quiexa'añ.

19

¹ Jimä Apolos hänajty yhityñä Corinto, mänitä Pablo jim chohñ Antioquía. Mänit jim ñaxøøyy tunjoot. Mänit jim miejch Efeso. Jimä Pablo ja'a mabøjpädøjc may piaaty.

² Mänitä Pablo miänaañ:

—Mänaa mijtsä Diosmädia'agy mmäbøquiän, nej, mänitiä ja'a Dioshespíritu hajxy xquiorazóngtägøøyyä —nømä mabøjpädøjc-hajxy miäyajtøøwä.

Mänit hajxy yhadsooyy:

—Tii jaduhñ mnänøømby ja'a Dioshespíritu. Cahnä højts jaduhñ nmädoyhatyñä.

³ Mänitä Pablo miänáangumbä:

—Mänaa mijts mnäbetiän, pønä quiuhdujt hajxy myajtuunä.

Mänit hajxy yhadsooyy:

—Ja'a Juan quiuhdujt højts nyajtuunä.

⁴ Mänitä Pablo jiaac mänáangumbä:

—Jue'e ja'a Juan hänajty yajñäbejpy, pønjatiä yhaxøøgwiinmahñdy hänajty tøø ñajtshixø'øy. Jaduhñä Juan hänajty yajñähixøøbiä coo ja'a Jesús ja'a miädia'agy miäbøjcäxät, ja'a hänajty jaac medsaambä —nømä Pablo ja'a mabøjpädøjc ñämaayy.

⁵ Coo hajxy jaduhñ miädooyy, mänit hajxy hoy ñäbety ja'a Jesucristocøxpä.

⁶ Mänitä Pablo ja'a mabøjpädøjc tiägøøyy cø'øguhaxjäpä hanidiuhmjaty. Mänitä Dioshespíritu hajxy ñähgädaacä. Mänit hajxy tiägøøyy capxpä wiinghayuuc-haamby. Mänitä Dios ja'a miädia'agy hajxy tiägøøyyä najtscapxøøyyäbä.

⁷ Nämajmetscä mabøjpädøjc-hajxy hänajty.

⁸⁻⁹ Mänitä Pablo tiägøøyy nøcpxä maa ja'a judíos chajtøjc-hajxiän jim Efeso. Sábadohaam hänajty ñøcxy. Mänitä Pablo ja'a judíos ja'a Diosmädia'agy tiägøøyy yajwiingapx yajwiinmädiaagøøbiä nebiatiä Dios yhane'emiän. Møcjootä Pablo miøødhajt. Jia wi'i yajmäbøgaambiä Pablo ja'a judíos hänajty. Jia mabøjc hajxy jaduhñ näje'e. Pero cab hajxy nägøxiä miäbøjcy. Ja'a hajxy hänajty ca'a mabøjpä, mänit hajxy haxøøgjaty ñä'ägä mänaañnä jäya'ayhagujc. Haxøøgä Diostu'u hajxy piädaacnä. Mänitä Pablo wyiinmaayy coo hänajty jim quia'a nøcxaañnä maa ja'a judíos chajtøjc-hajxiän. Tägøøgpø'o hänajty tøø yhabety coo ja'a Pablo jim tiägøøyy nøcpxä. Coo ja'a Pablo jim chohñ, mänitä Pablo ja'a mabøjpädøjc jiaac møødnøcxy. Mänit hajxy tiägøøyy hamugøøbiä maa ja'a Tirano tiøjcän. Hamøj ja'a Tirano tiøjc hänajty. Jabom-jabomä Pablohajxy hänajty jim ñøcxy capxpä mädiaacpä.

10 Mejtsjomøjtä Pablo jim jiaac yajnahixøøyy. Nämayyä jäya'ayä Diosmädia'agy hajxy jaduhñ jim miädooyy maa ja'a naax hänajty xiøhatiän Asia, wiinduhmyhagajpt, møødä judíoshajxy, møød hajxy hänajty ca'a judíospä.

11 Madiu'ujä Pablo pa'am jim yajnajxy ja'a Dios miäjaahaam. Hoy-yagjuøøñäjätiä Pablo jaduhñ tiuuhñ.

12 Coo ja'a Pablo wyit hänajty ñähdóonäxä, høxtä najxpä pia'amhajxy hänajty, høxtä nähwáatsäp ja'a haxøøgpoj hajxy hänajty.

13 Jimä judíoshajxy hänajty näje'e wiädity. Jäya'ay hajxy hänajty yajnahwaachp, ja'a hajxy hänajty haxøøgpoj møødpä. Coo ja'a judíoshajxy jaduhñ miädooyy cooc ja'a Pablo jäya'ay haxøøgpoj hänajty yajnahwa'açh ja'a Jesús miäjaagøxpä, mänit hajxy wyiinmaadiaacy coo ja'a Pablo hajxy hänajty jaduhñ piahixaambä. Mänitä haxøøgpoj hajxy tiägøøyy nämabiä:

—Ja'a Jesús miäjaagøxpä, ja'a Pablo naxy miädiaacypiä, jaduhñ miich nhane'emy coo miich jiiby mjøwá'adsät.

14-15 Jaduhñä Esceva yhuunghajxy hänajty jiatcøøbiä, ja'a hajxy hänajty näjuxtupä. Teedywiindsønä Esceva hänajty tiuumby maa ja'a judíos chajtøjc-hajxiän. Mänitä jäya'ay hajxy tu'ug piaaty. Haxøøgpoj hänajty miøød. Mänitä haxøøgpoj hajxy ñämaayy:

—Ja'a Jesús miäjaagøxpä miich nhane'emy coo miich jiiby mjøwá'adsät.

Mänitä haxøøgpoj yhadsooyy:

—Nhíxyhöchä Jesús. Nnajuøøbiøch pøn je'e ja'a Pablo. Pero mijts, caj mijts nhixiä —jaduhñä Esceva yhuunghajxy yhadsoowä.

16 Mänit hajxy hoyhoy quioxho'cä. Ja'a craa jaduhñ jatcøøyy, ja'a haxøøgpoj hänajty møødpä. Hoyhoy hajxy jaduhñ chaaçhøøyy. Nähwa'ads høxwa'ads hajxy jaduhñ piädaacä. Mänit hajxy jiiby yhøxpäbooyy maa craa tiøjcän.

17 Mänitä mädia'agy jim wiädijty Efeso nebiä Esceva yhuunghajxy jiajty yhabejty. Nägøxiä jäya'ayhajxy jaduhñ miädoyhajty, møødä judíoshajxy, møødä ca'a judíoshajxypä. Jaançh tehñ chähgøøyy ja'a cu'ughajxy jaduhñ. Mänitä Jesús hajxy tiägøøyy wiin-gudsähgøøbiä nägø'ø nädecypiä, ja'a hajxy nWiindsønähájtämbä.

18 Mänitä mäbøjpädøjc-hajxy nämay hoy ñägapxy cu'ughagujc nebiaty hajxy hänajty haxøøg tøø jäya'ayhaty.

19 Ja'a jäya'ayhajxy hänajty tøø tiuuhñäbä magiahaam, mänitä magianocy hajxy quiøxy yajmejch. Mänit hajxy quiøxy no'cy hijxwiinduum. Jue'egä noquiäda'a hänajty tøø choobaady juxychägui'xmajcmil.

20 Coo ja'a ñocy hajxy jaduhñ ño'cy, jaduhñä hijxtahnd hajxy yejcy coo ja'a Diosmädia'agy hajxy hänajty hoy tøø miäbøcy. Tehngajnä ja'a Diosmädia'agy hajxy jim jiaac yajwa'xy wiinduhmyhagajpt.

21 Mänitä Pablo wyiinmaadiaacy coo hänajty jim nøcxy wiädita'añ Macedonia møød jim Acaya. Coo hänajty jim tøø quiøxy wädity, mänit hänajty jim ñøcxa'añ Jerusalén. Mänit miänaañ:

—Cooch hänajty tøø nhoy Jerusalén, mänitøch jim nnøcxa'añ Roma.

22 Jimä Pablo jiamiøød hänajty miøødä nämetsc, ja'a Timoteo møødä Erasto. Mänit ja'a Pablo ja'a jiamiøød jim quiejxø'cy Macedonia. Haa ja'a Pablo, maxiøø jim jiaag hijty Asia.

23 Mänitä jäya'ayä tsip hajxy näje'e jim yajpädø'cy Efeso. Paady hajxy jaduhñ yajpädø'cy je'eguiøxpä coo ja'a Diosmädia'agy hajxy hänajty quia'a tsocy.

24 Jimä jäya'ay hänajty tu'ug xiøhaty Demetrio. Saandätøjc-hahädiuunñaxiä Demetrio hänajty yhädiuumby poobhorohaam maa ja'a saandä hänajty yhitiän, ja'a xøhajpä Artemisa. Mayyä Demetrio moonsä hänajty miøødä. Jaançh tehñ quianarhajp hajxy hänajty jaduhñ coo ja'a saandätøjc-hahädiuunñaxy hajxy hänajty tioogy.

²⁵ Mänitā Demetrio ja'a mioonsä miøødhamugøøyy nägøxiä møød pønjaty hānajt̄y hawing saandähādiuumbä. Mänitā Demetrio miānaañ:

—Mägu'ughajpādøjc, coo hädaaduhmbä tuuᅅg hajxy ndúunām, paady hajxy njaančh tehᅅ quianarhāj̄tām. Tøyhajt jaduhᅅ.

²⁶ Tøø hajxy mhixy, tøø hajxy mmādoy coo ja'a Pablo jii wiädity, coo jii quiapxy coo jii miādia'agy cooc tyijy hōjtsä nsaandä quia'a jújquiām. Tøø jäya'ayhajxy may miäbøcy; ca'a yaayyā Efeso, pero cøxiä wiinduhmyhagajpt̄ yaa Asianaaxooty.

²⁷ Coo jäya'ayhajxy maas may jiaac mabøgät, cab hajxy majiaty nganarhāj̄tānät. Y cabä jäya'ayā nsaandähajxy xwyiingudsähgø'øwāanānā, ni ja'a saandätøjc maa yhi-tiän. Jiahdiägoyyaamby hajxy jaduhᅅnān. Wiinduhmyhagajpt̄ä saandä Artemisa wyiingudsähgø'øyii yaa Asianaaxooty møød jäguembāady.

²⁸ Coo ja'a jäya'ayhajxy jaduhᅅ miädooyy, mänit hajxy jiootma'ty. Mänit hajxy tiägøøyy yaaxpā jojpā.

—¡Viva Artemisa, viva! Hōjtsä Artemisa yaa nsaandähāj̄tām yaa Efeso.

²⁹ Coo ja'a cu'ughajxy jaduhᅅ miädooyy coo ja'a Demetrio mioonsähajxy hānajt̄y jaduhᅅ wyi'i ya'axy wyi'i jiocy cajptooty, mänitā cu'ughajxy tiägøøyy haamhāj̄pā. Jimā Pablohajxy hānajt̄y wiädity cajptooty. Jue'e ja'a jiamioødhajxy hānajt̄y xiøhaty, Gayo møød Aristarco. Macedonia hajxy hānajt̄y nāmetsc chooñ. Mänitā Gayohajxy miajtsä møødä Aristarco. Ja'a cu'ughajxy jaduhᅅ māmajts. Mänitā Gayohajxy piawijtsä piajāgucā maa ja'a hamugøødiaactān. Mänit hajxy jim ᅅñxø'øwøøyyā.

³⁰ Haa ja'a Pablo, coo jaduhᅅ miädoyhajty coo ja'a jiamioød jaduhᅅ miājtsäxä, mänit jiiiby jia wi'i tiägø'øwaañ jäya'ayhagujc. Ja'a jiamioød hānajt̄y jia wi'i ᅅñhgapxtu'udaamby. Pero cabä mabøjpādøjcā Pablo hajxy jaduhᅅ quiejxy.

³¹ Jimā Pablo ja'a miägu'ughajpāhajxy näje'e miøjhaty Asia. Mänitā Pablo nocy ya-jnäguejxä coo jiiiby quia'a tægø'øwät jäya'ayhagujc.

³² Jaančh tehᅅ yaaxp jaančh tehᅅ jiojpā cu'ughajxy hānajt̄y jim maa hajxy hānajt̄y tøø yhamugø'øyän. Wiingjaty hajxy hānajt̄y ya'axy. Cab hajxy hānajt̄y tu'cuhdujt̄ ya'axy. Ni quia'a najuø'øy hajxy hānajt̄y tii hajxy hānajt̄y jaduhᅅ tøø ᅅñhamugø'øy.

³³ Jimā judíos hānajt̄y tu'ug xiøhaty Alejandro. Mänitā Alejandro jaduhᅅ piajahmā jäya'ayhagujc. Ja'a miägunaaxhajxy jaduhᅅ näje'e jatcøøyy. Mänitā Alejandro yhawāanäxä tiiguiøxpā yø'ø jäya'ayhajxy hānajt̄y jaduhᅅ coo wyi'i yhaamhaty. Mänitā Alejandro ja'a judíos jia ᅅñhgapxtu'udaañ jäya'ayhagujc.

³⁴ Coo ja'a cu'ugä Alejandro hajxy jaduhᅅ yhøxcajpy coo hānajt̄y je'e jiidíospä, mänit hajxy tiägøøguiumbä yaaxpā jojpā.

—¡Viva Artemisa, viva! Hōjtsä Artemisa yaa nsaandähāj̄tām yaa Efeso.

Mejtshora hajxy jaduhᅅ jiaac yaaxy jiaac jojcy.

³⁵ Hobiä nejpiä ja'a secretario ja'a cu'ug yaghamooñ. Mänit miānaañ:

—Mägu'ughajpādøjc, mijts yaa tsānaabiä Efeso, jéquiänä tsa tu'ug quiah y tsajtwiing. Artemisa hajxy nyajxøhāj̄tām. Je'e hajxy yaa nwiingudsähgøøyyām yaa Efeso. Tøø ja'a tiøjc hajxy jaduhᅅ nhädiúunām coo jaduhᅅ jiiiby yhidät jiiiby tiøgooty. Hōjtsä cuhdujt̄ jaduhᅅ nmøød'āj̄tām coo hōjtsä Artemisa ngüeendähāj̄tām.

³⁶ Tøyhajt jaduhᅅ. Hopiønä jaduhᅅ miāna'añ. Hoorä, huuc tuᅅnä mayhajt hajxy. Huuc hamón hajxy. Hoy hajxy jaduhᅅ mhuuc tehᅅ tiaj mhuuc tehᅅ miáyät jayøjp̄ tii hajxy mdunaamby.

³⁷ Hädaa mähdiøjc hajxy tøø mmächäbä, cabä tii pojpa tii cädieey hajxy hädaa tøø tiuñ. Cabä Artemisa hajxy tøø miägapxtägoy, ni cab hajxy tii tøø mieečh maa ja'a Artemisa tiøgootiän.

³⁸ Pø tøø hädaa mähdiøjc-hajxy jaduhᅅ jiaančh cädieey nebiä Demetrio hajxy ᅅñxø'øwø'øyän, weenä Demetrio hajxy jim nøcxy ᅅñxø'øwø'øy maa ja'a haguajt̄jcān. Jaduhᅅnā cuhdujt̄ ᅅñ'ägä miñ. Paadiä cuduung yhuuc jimäbä.

³⁹ Pø jimä tsip wiingpä hajxy jaduhñ mjaac møødä, mänit hajxy mnägápxät coo junta hñajty jiaac jada'añii.

⁴⁰ Cab jaduhñ yhäxø'øy coo hajxy jaduhñ nwi'i yhaamhajtäm nä'ä nägoobä, coo tsip hajxy jaduhñ nä'ä nägoobä nyajpádó'cäm. Coo ja'a gobiernä Rómabä jaduhñ miädoyhádät neby hajxy jäda'a tøø njatcøyyäm, wehñdä häyaa xñäxø'øwøøyyämät. Neby hajxy häyaa nnä'ä hadsóowämät.

⁴¹ Mänitä secretario quiapxpädøøñä. Mänit miänaañ coo ja'a jäya'ayhajxy wyiimbijnät.

20

¹ Coo ja'a jäya'ayhajxy hñajty tøø mioon tøø tiujnä, mänitä Pablo ja'a mäbøjpädøjc miøjyaaxy. Mänitä Pablo miägäpxy yhanehmy. Mänit miänaañ coo hñajty jim wyiimbidaañä, møød coo hñajty jim ñøcxaannä Macedonia.

² Coo jim miejch, mänit jim tiägøøyy wädijpä cajpt-cajpt. Majaty hñajty wiädity, jimä mäbøjpädøjc hñajty miägäpxy yhan'eemy. Mänitä Pablo jim chóhngumbä Macedonia. Mänit jim ñøcxy Grecia.

³ Coo jim miejch, mänit jim yhijty tægøøgpø'o. Coo hñajty jim choonángumbä, mänit hñajty jim ñøcxa'añ Siria barcojooty. Cahnä Pablo hñajty biarcotägø'øyñä, mänit miädoyhajty coogä judíoshajxy hñajty tøø quiojyquiapxytiun coogä Pablo hajxy hñajty miadsa'añ, nägóoyyádsä Pablo jiiby tiägó'øwät barcojooty. Mänitä Pablo wyiimahñdyhajty coo hñajty quia'a tu'ubøgaannä barcojooty. Jaduhñ wyiimahñdyhajnä coo jim ñøcxø'øwät Macedonia tecy-yo'oyhaam.

⁴ Nämayyä Pablo miägu'ughajpähajxy jim miøødnøcxy Asia, møødä Timoteo, møødä Sópater, ja'a hñajty jim tsohmä Berea, ja'a Pirro yhuung, møødä Gayo, ja'a hñajty jim tsohmä Derbe, møødä Aristarco, møødä Segundo, møødä Tíquico, møødä Trófimo. Tesalónica ja'a Aristarcohajxy hñajty chooñ møødä Segundo. Asia ja'a Tíquicohajxy hñajty chooñ møødä Trófimo.

⁵ Coo ja'a Pablohajxy jim miejch Filipos møødä jiamiøødhajxy, mänithøchä Pablo jim nbaattägajch, høøch Lucas. Høøch hädaa nocy jaduhñ nhädiuumby. Mänitä Pablo jiamiøødhajxy jim ñøcxø'cy Troas. Jim højts hñajty xyhäxø'añ, høøch møødä Pablo.

⁶ Paady højts jim nmähmøøyy Filipos, coo ja'a judíos ja'a xiøøhajxy hñajty jiada'añii mänaa ja'a judíos ja'a tsajcaagy hajxy quiayyän, ja'a ca'a levadura møødpä. Coo ja'a xøø jaduhñ miaayy, mänit højts jim nbarcotägøøyy. Mänit højts jim ndsohñä Filipos barcojooty. Mägøøxxøø højts mejjiooty nyohy. Mänit højts jim nmejch Troas. Mänit højtsä Pablo ja'a jiamiøød jim nbaattägajch, ja'a højts hñajty jim xyhäxø'ä. Jim højts njaac hijty juxtujxøø nägøxiä.

⁷ Coo näxøø jaduhñ yhabaaty, mänit højts nhamugøøyy, højts mäbøjpädøjc. Mänit højtsä Santa Cena nyagjajtä. Mänit højtsä Pablo xtiägøøyy yajnahixøøbiä. Jejcy jaduhñ miädiaacy je'eguiøxpä coo hñajty cujaboom tiu'ubøgaannä. Cuptsuhmdä hñajty tøø jiaty, jimnä ja'a Pablo hñajty miädia'agyñä.

⁸ Maa højts hñajty tøø nhamugø'øyän, nähbettøjtøgooty hñajty jaduhñ jim. Jiibiä jøøn hñajty may tiøy.

⁹ Jimä høxcujc-häna'c hñajty tu'ug yhäña'ay ventanahaguuy nähbettøjnähgøxp ja'a miädägøøgpísobä. Eutico ja'a craa hñajty xiøhaty. Jim Eutico ja'a Pablo hñajty yhamädoowhity. Tøø ja'a Pablo hñajty jejcy miädiaacnä. Mänitä Eutico jim miaaho'cy maa hñajty yhäña'ayän ventanahaguuy. Mänit jim quiuhgahnajxy. Ho'ogy hoy wyidsø'cänä.

¹⁰ Coo ja'a Pablo jaduhñ yhijxy, mänit jiiby yhädaacy naaxyp maa ja'a Eutico hñajty tøø quia'ayän. Mänitä Pablo ja'a Eutico miäneenø'cy. Mänit højtsä Pablo xñämaayy:

—Ca'a hajxy mdsähgø'øy. Jujcyñä hädaa craa jaduhñ.

11-12 Jujcy ja'a craa jiaančh yajnøcxä maa ja'a tiøjcän. Mänitä mabøjpädøjc-hajxy jiaančh tehṁ xioõndaacy. Mänitä Pablo jim̄ ñøcxtägajch cøxp maa hänajty yajnähixø'oyän. Mänitä Pablo ja'a tsajcaagy yajwa'xy. Mänit højts ngaayy nhuucy nägøxiä. Mänitä Pablo jiaac tægøøyy yajnähixøøbiä. Jim̄ højts jaduhṁ ngujobøøyy. Mänitä Pablo miädiaacpäddøñä. Mänit jim̄ chohṁnä Troas.

13-14 Tøø højtsä Pablo hänajty xñäma'ay cooc hänajty tecy-yo'oyhaam ñøcxa'añ jim̄ maa ja'a cajpt hänajty xiøhatiän Aso. Pero højts, barcojooty højts jim̄ nnøcxy, høøch Lucas møødä Pablo jiamiøødhajxy. Coø højts jim̄ nmejch Aso, mänitä Pablo jim̄ tiägøøbiä barcojooty. Mänit højts jim̄ ndu'ubøjcumbä Aso näguipxy møødä Pablo. Mänit højts jim̄ nägøxiä nnøcxy maa ja'a cajpt hänajty xiøhatiän Mitilene.

15 Coø højts jim̄ ndsøhngumbä, mänit højts cujaboom nnaxøøyy jim̄ mädøyyä maa ja'a naax hänajty xiøhatiän Quío. Mänit højts jim̄ cujaboom nmejch maa ja'a cajpt hänajty xiøhatiän Samos. Coø højts jim̄ ndsøhngumbä, cujaboom højts jim̄ nméjtscumbä maa ja'a cajpt hänajty xiøhatiän Mileto.

16 Tøø ja'a Pablo hänajty wyiinmay coo hänajty jim̄ quia'a näxø'owáangumbä Efeso. Hix, cabä Pablo hänajty jim̄ jejcy wiädita'añ Asianaaxooty. Paady hänajty jim̄ quia'a wädita'añ Asia coo hänajty jim̄ ñøcxa'añ Jerusalén. Mobädajpä ja'a Pentecostésxøø hänajty jim̄ jiada'añii. Paadiä Pablo hänajty yhadø'øch, jaduhṁnä Pentecostés-xøø mädøyyä piädät.

17 Jim̄nä højts hänajty nhityñä Mileto, mänitä Pablo capxy jim̄ quiejxy Efeso coo ja'a tsajtøjwiindsønṁhajxy jim̄ ñøcxät Mileto, ja'a hajxy hänajty jim̄ tuumbä Efeso.

18 Coø hajxy jim̄ miejch Mileto, mänit hajxy ñämaayyä:

—Mänáajøch jim̄ nhitiän maa mijtsän jim̄ Asianaaxooty, jaančh tehṁ yhóyhøch jim̄ nduunṁ mädúhñtiøch jim̄ nhijty. Mnajuøøby hajxy jaduhṁ cooçh jaduhṁ nga'a høhnda'agy.

19 Jaančh tehṁ yhóyhøchä Jesús ja'a tiuung hänajty nduunä, ja'a hajxy nWiindsønṁhajtämbä. Mee'xxiéemyhøch hänajty nduñ. Näxyhøch hänajty njootmayhaty cooçhä nmägunaaxä Jesús ja'a miädia'agy hajxy hänajty quia'a mabøgaanä. Mayhooc hajxy jaduhṁ quiojyquiapxytiuunṁ cooçh hajxy hänajty xjia wi'i yagho'oga'añ.

20 Cøxyhøch mijts hänajty nyajwiinxiic nyajwiingapxø'oy neby hajxy hoy mhídät. Homiänáajøch mijts hänajty yajnähixø'oy, møød jim̄ jäya'ayhagujc, møød jim̄ maa ja'a mdøjc-hajxiän.

21 Jadúhñhøch mijts hänajty nmägapxy nhane'emy coo ja'a mhaxøøgcuhdujt hajxy jaduhṁ mnajtshixø'øwät, møød coo ja'a Diosmädia'agy hajxy mmäbøgät ja'a Jesúsøxpä, ja'a hajxy nWiindsønṁhajtämbä. Nägøxiøch mijts hänajty jaduhṁ nmøødmädia'agy, møød mijts judíosahajxy, møød mijts cajpä judíospä.

22 Hoorä, tøøchä Dioshespíritu xñäma'ay cooçh jim̄ nnøcxät Jerusalén. Pero cábøch nnajuø'oy nébyhøch jim̄ njada'añ nhabeta'añ.

23 Jagóoyyøch jaduhṁ nnajuø'oy cooçh jim̄ nyajtsuma'añ, cooçhä tsaachpä peenä jim̄ nbaada'añ. Majátyhøch jaduhṁ tøø nwädity, jadúhñhøchä Dioshespíritu tøø xyhawaanä cooçh jaduhṁ njada'añ nhabeta'añ.

24 Pero cábøch tii ndajy nmay. Cabä cueentä jaduhṁ cooçh nnä'ä hó'ogät. Je'eyyähajtøch nbøcjuøøby cooçhä nduung nyajmayaannä, ja'a Jesúsøch xmióoyyäbä, ja'a hajxy nWiindsønṁhajtämbä. Jadúhñhøch xtiuungmooyy cooçhä mädia'agy jaduhṁ nyajwä'xät coo ja'a Dios hojioot jiaančh tehṁ miøødä.

25 'Tøøch mijts nyajwiinxiic nyajwiingapxø'oy coo ja'a Dios yhane'ema'añ ja'a miøcmäjaahaam. Hoorä, cábøch mijts mänaa xyhijxtägatsaannä. Tøyhajt jaduhṁ.

26 Coø mijtsä Diosmädia'agy mga'a mabøgät nébyhøch tøø nja mädia'aguiän, ca'a yhøøchä pojpä jaduhṁ nmøød.

27 Hix, pedyíjøch mijts tøø nyajmøødmädia'agy nebiatiä Dios tøø yhane'emiän.

28 Mniyajcopcø'owóøjöp hajxy. Mgüeendähádäbä mábøjpädøjc hajxy nägøxiä. Ja'a Dioshespíritu hajxy jaduhñ xpiádaac coo hajxy jaduhñ mgüeendähádät. Coø ja'a Jesucristo hajxy tøø xñähho'túutäm, paadiä Dios hajxy jaduhñ xyhuunghájtäm, coø ja'a miädia'agy hajxy nmábøjcäm.

29 Cooch mijts jaduhñ nbuhwa'adsaannä, mänitä wiinghäna'c-hajxy yaa miedsa'añ maa mijtsän. Mäwiinhøhmbä hajxy jaduhñ miedsa'añ. Xjia wi'i jiojcapxø'øwaamb mijts jaduhñ coø ja'a Diosmädia'agy hajxy mnajtshixø'øwät. Jaduhñ mäwínäts hajxy jiatcø'øwa'añ nebiä pahucä meeg hajxy chu'učhän. Tøyhajt jaduhñ.

30 Høxtä mijtsä mjamiøød näje'e tiägø'øwaambä høhndaacpä. Näje'e ja'a mábøjpädøjc-hajxy jaduhñ yajtägoyyáanäbä nebiä høhndaacpähajxy tiägoyya'añän.

31 Naxy hajxy jaduhñ mdehmñ ñiyajcopcø'owóøjät. Tägøøgjomøjthøch mijts jaduhñ nmägapy nhanehmy xøømdsuhm. Jaanč tehñ chaačhpøjpøch hñajty. Naxy hajxy jaduhñ mdehmñ jiahmiédsät.

32 'Hoorä, mábøjpädøjc, mijtsä Dios nyajcø'øwaanøøby ween hajxy jaduhñ xcwieendähaty. Jaduhñä Diosmädia'agy miäna'añ cooc ja'a Dios hojioot jiaanč tehñ miøødä. Coø ja'a Diosmädia'agy hajxy hamuumdu'joot mmábøgät, jaduhñä Dios hajxy xjiaac tehñ piuhbédät ja'a miäjaahaam. Møød hodium hajxy jaduhñ xpiädá'agät näguipxy møød pønjaty ja'a Dios yhuunghajpy.

33 Cábøch pønä wyitä xiädø'øn tøø nhadsojcä.

34 Ja'a nhamdsoo cø'øháamhøch jaduhñ tøø nniyhixyii. Jaduhñhøchä nmägu'ughajpä tøø nbuhbejpä. Tøyhajt jaduhñ.

35 Homiänájøch mijts tøø nmägapy tøø nhane'emy coo hajxy mniguiudúunäxät, møød coø ja'a pa'amjäya'ay hajxy jaduhñ mbuhbédät møødä häyoobäjäya'ay. Mjahmiédsäp hajxy jaduhñ coø ja'a Jesús jaduhñ jecy miänaañ: "Coo wiinghäna'c mbuhbédät, jaduhñds jootcujc mhídät. Pø mnä'ä yajpuhbedaamb jaduhñ, cab jaduhñ jootcujc mhídät."

36 Coø ja'a Pablo jaduhñ quiapxpädøøyy miädiaacpädøøyy, mänit hajxy nägøxiä jyjicädaacy näguipxy møødä Pablo. Mänit hajxy tiägøøyy Diospa'yaaxpä.

37 Mänit hajxy tiägøøyy jøøbiä xuu'tspä coø ja'a Pablo hajxy hñajty piuhwa'adsáanänä. Mänitä Pablo hajxy miajch miäneeñ. Mänitä Pablo hajxy chu'xy.

38 Jaanč tehñ jiootmayhajp hajxy hñajty je'eguiøxpä coø ja'a Pablo hñajty tøø miäna'añ cooc ja'a Pablo hajxy hñajty quia'a hijxtägatsaannä. Mänitä Pablo hajxy hoy ñajtshixøøñä maa ja'a Pablo hñajty biarcotägø'øwa'añän.

21

1 Mänit højtsä mábøjpädøjc nbuhwaatsnä. Mänit højts nbarcotägøøyy. Mänit højts jim ndsohñnä Mileto. Mänit højts jim tu'uda'aquiä nnøcxy maa ja'a cajpt hñajty xiøhatiän Cos. Cujaboom højts njaac nøcxy maa ja'a naax hñajty xiøhatiän Rodas. Coø højts jim ndsøhngumbä, mänit højts jim njaac nøcxy maa ja'a cajpt hñajty xiøhatiän Pátara.

2 Jim højtsä barco wiingpä hoy nbaady. Jim hñajty ñøcxa'añ maa ja'a naax hñajty xiøhatiän Fenicia. Mänit højts ndu'ubøjcumbä wiingbarcojooty.

3 Mänit højtsä naax nnäheebøøyy, ja'a hñajty xøhajpä Chipre. Hahooyhaamby højts jim nwiinnajxy jäguemjuøøby. Jim højts hñajty nnøcxø'øy maa ja'a naax hñajty xiøhatiän Siria. Coø højts jim nmejch, mänit højts jim nbarcopädsøømy maa ja'a cajpt hñajty xiøhatiän Tiro. Paadiä barco jim miedsøøyy Tiro coø tsømy hajxy hñajty jim ñähdsøømdu'uda'añ.

4 Jim højtsä mábøjpädøjc näje'e nbaaty. Mänit højts jim nhijty Tiro juxtujxøø maa ja'a mábøjpädøjc-hajxiän. Mänitä Pablo hajxy jia nãmaayy coø jim quia'a jaac nøcxät Jerusalén. Jaduhñäc hajxy hñajty tøø ñajtsapxø'øyii ja'a Dioshespíritäm. Pero cabä Pablo jaduhñ ñä'ä møjpädaacy.

⁵ Coo juxtujxøø yhabejty, mänit højts jim ndu'ubójcumbä. Mänit højtsä mabøjpädøjc nägøxiä hoy xñajtshixø'øy cajtpa'a møødä yhuung møødä tio'oxy. Mänit højts jim njijcädaacy pu'uwiing. Mänit højts nDiospa'yaaxy.

⁶ Mänit højtsä mabøjpädøjc xpuihwaatsnä. Mänit hajxy wyiimbijnä maa ja'a tiøjc-hajxiän. Mänit højts ndägøødiägajch barcojooty.

⁷ Mänit højts jim ndsóhngumbä Tiro. Mänit højts jim njaac nøcxy maa ja'a cajpt hänajty xiøhatiän Tolemaida. Coø højts jim nmejch, mänit højtsä mabøjpädøjc hoy nguhixy. Tu'tsuhm højts jim nhijty maa ja'a mabøjpädøjc-hajxiän.

⁸ Cujaboom højts jim ndu'ubójcumbä. Mänit højts jim nnøcxy maa ja'a cajpt hänajty xiøhatiän Cesarea. Coø højts jim nmejch, mänit højts jim nnøcxøøyy maa ja'a Felipe tiøjcän. Mänit højtsä Felipe xñämaayy coø højts jim nmejtstá'agät maa ja'a tiøjcän. Jue'e ja'a Felipe hänajty tiuunghajpy, ja'a Diosmädia'agy hänajty yajwa'xyp. Tøø hänajty jaduhñ wyiinguexyii coø ja'a mabøjpädøjc piuhbédät. Näjuxtujc hajxy hänajty jaduhñ wyiinguejxä coø hajxy jaduhñ miäbuhbédät.

⁹ Mädaaxcä Felipe yhuung hänajty haagä cäxyii. Nämädaaxcä Diosmädia'agy hajxy hänajty ñajtscapxø'øy.

¹⁰ Maxiøø højts hänajty jim tøø nhity maa ja'a Felipe tiøjcän, mänitä jäya'ay tu'ug miejch. Agabo hänajty xiøhaty. Jim hänajty choñ Judea. Ñajtscapxøøbiä Diosmädia'agy hänajty je'ebä.

¹¹ Coø ja'a Agabo jim miejch maa højts hänajty nmejtsta'aguiän, mänitä Pablo ja'a wiøøn wiähájtäxä. Mänitä Agabo hamdsoo ñiguiø'øxojs ñidiecyxiojtsä ja'a Pablo ja'a wiøønhaam. Mänitä Agabo ja'a Pablo ñämaayy:

—Jadúhnhøchä Dioshespíritu tøø xñäma'ay coøch miich nnaajtscapxøøyyät. Jadúhñäc miichä judíos xquiø'øxots xtiecyxiodsaambä jim Jerusalén nébyhøch chamñ tøø nhamayyän. Mänitac miich xyajcø'ødägø'øwa'añ ja'a soldadohajxy Rómabä.

¹² Coø højts jaduhñ nmädooyy, møødä mabøjpädøjc-hajxy, mänit højtsä Pablo nja nämaayy coø jim quia'a nócxät Jerusalén.

¹³ Mänitä Pablo yhadsooyy:

—Tii hajxy coø mjø'øy coø mxuuch. Tiich hajxy coø xyagjootmayhaty. Cabä cueentä jaduhñ coøchä häna'c jaduhñ jim xquiø'øxots xtiecyxiódsät Jerusalén. Cabä cueentä jaduhñ coøch häna'c jim xyaghó'ogät ja'a Jesúsøxpä, ja'a hajxy nWiindsøñhájttämbä —nømä Pablo miänaañ.

¹⁴ Coø højts jaduhñ nhijxy coø ja'a Pablo hänajty quia'a mabøga'añ, mänit højts nmänaañnä:

—Ween jaduhñ jiadyii nebiä Dios tøø miäna'añän.

Mänit højts nhamoønä.

¹⁵ Mänit højts nhadsøømbøjcy, høøch møødä Pablo. Mänit højts jim nnøcxy Jerusalén.

¹⁶ Näje'e højtsä mabøjpädøjc jim xpianøcxy, ja'a hajxy hänajty jim tsohmä Cesarea. Coø højts jim nmejch Jerusalén, mänit højts hoy xñajtswowø'øy maa ja'a Mnasón ja'a tiøjcän. Jimä Mnasón hänajty jecy tøø chohnda'agy Chipre. Tøø hänajty jiegø'øy coø ja'a Mnasón ja'a Diosmädia'agy hänajty tøø miäböcy. Jim højts nmejtstaacy maa ja'a Mnasón ja'a tiøjcän.

¹⁷ Coø højts jim nmejch maa ja'a mabøjpädøjc-hajxiän, mänit højts xquioñdymooyy xoonäacäp.

¹⁸ Cujaboom højtsä Pablo jim xmiødhajty maa ja'a tsajtøjcän. Jimä Santiago hänajty møødä tsajtøjwiindsøñhajxy nägøxiä.

¹⁹ Mänitä Santiagohajxy miøødniyajpoo'xä ja'a Pablo. Mänitä Pablo tiägøøyy mädiaacpä nebiatia Diosmädia'agy hänajty tøø yajwa'xiän maa ja'a cajpa judiøshajxiän, cooc jaduhñ quiapxy miädiaacy ja'a Dios miäjaaam.

²⁰ Coo ja'a Santiagohajxy jaduhñ miädooyy, mänitä Dios hajxy wyiingudsähgøøyy. Mänitä Pablo hajxy ñämaayy:

—Mägu'ughajpä Pablo, mnajuøøby miich jaduhñ coo ja'a judíos ja'a Jesús ja'a miädia'agy hajxy nämay tøø miäbøjcä. Jaduhñ hajxy nägøxiä miäna'añ coo ja'a cuhdujt hajxy tsipcøxp ngudiúunämät, ja'a Moisés jecy yhanéhmäbä.

²¹ Tøø hajxy jaduhñ miädoyhaty cooc tyijy miichä judíos wiingcuhdujt tøø myajnahixø'øyy, ja'a hajxy jäguembaady hadsänaabiä. Jaduhñäc tyijy tøø myajnahixø'øyy coo cuhdujt hajxy ñajtshixø'øwät, ja'a Moisés jecy yhanéhmäbä. Jaduhñäc tyijy tøø myajnahixøøbiä coo højts ja'a nguhdujt nga'a cudiúunänät, højts judíos, møød coo højts nhuung nga'a circuncidarhátänät.

²² Coo ja'a cu'ughajxy jaduhñ miädoyhädät coo miich yaa tøø mgoody Jerusalén, mänitä tøyhajt hajxy choga'añ pø tøyhajt jaduhñ coo miichä judíos jaduhñ tøø mjaançh yajnahixø'øyy, ja'a hajxy jäguembaady hadsänaabiä.

²³ Tøø højts ja'a wiinmahñdy tu'ug nbaady nej miich myajniyhoyø'øwøjät. Jii højtsä nmägu'ughajpä nämädaaxcä. Tøø xøø hajxy yhagapxtucy coo meeg hajxy hänajty yoxa'añ nebiä Moisés jecy yhanehmiän coo hajxy jaduhñ nguhdujthátämät.

²⁴ Mmødhädäp miich yø'ø häna'c yø'ø nämädaaxpä. Jaduhñ miich mnämäjuyø'øwät coo meeg hajxy hänajty yoxa'añ. Jaanä jaduhñ miichä meeg tu'ug myøjxpät. Coo miich jaduhñ mnämäjuyø'øwät, jaduhñ hajxy hoy yajcuhmé'xät. Coo miich jaduhñ mguhdujthädät, jaduhñ miichä cu'ug xyhíxät coo miichä cuhdujt jaduhñ mgudiuumbä, ja'a Moisés jecy yhanéhmäbä. Jaduhñä cu'ugä tøyhajt hajxy miøødhada'añ coo miich wiingcuhdujt tøyhajt mga'a yajnahixø'øyy.

²⁵ Pero ja'a jäya'ayhajxy ca'a judíospä, ja'a hajxy mäbøjpä, tøø højtsä nocy nya-jnäjaayø'øyy. Jaduhñ højts tøø nmägapxy tøø nhane'emy coo hajxy quia'a tsú'udsät mädyiibä häna'c tøø yoxxy quepychechwiinduum, møød coo hajxy quia'a tsú'tspät ja'a tøø quia'a nø'xié'xiäbä, møød coo wiingto'oxiøjc hajxy quia'a møødmá'awät —nømä Pablo ñämaayyä.

²⁶ Mänitä Pablo ja'a häna'c miødhajty ja'a nämädaaxpä. Mänit hajxy cujaboom hoy quiudiuñ nebiä judíos quiuhdujthajxy hänajty myiñän. Mänit hajxy tiøjtägøøyy tsajtøgooty. Mänit hajxy ñägapxy cooc juxtujxøø hänajty quia'a habetyñä neby hajxy hänajty tøø yhagapxtuquiän coo meeg hajxy hänajty yoxa'añ.

²⁷⁻³⁰ Ja weenjaty hänajty quia'a habety ja'a juxtujxøøbä. Mänitä jäya'ayhajxy näje'e tiägøøyy tsajtøgooty. Jim hajxy hänajty chooñ Asia. Coo ja'a Pablo hajxy jiiby yhiixy tsajtøgooty, mänit hajxy tiägøøyy yaaxpä cooc ja'a Pablo hänajty jiiby wiädity:

—Judíostøjc, højts puhbéjtäc. Xiids yø'ø craa Pablo wiädity. Yø'ødsä wiingcuhdujt homiajaty nøcxy yajwiinhixø'øyy. Jaduhñ yø'ø craa ja'a cu'ug jiojcapxø'øyy coo højtsä nguhdujt hajxy xquia'a cudiúunämät, nebiä Moisés jecy jia hanéhmiän. Jaduhñ yø'ø craa yajwiinhixøøbiä cooc tyijy hädaa tsajtøjc jaduhñ quia'a tsoobaady. Maas hanaxiä haxøøg tøø jiatcø'øyy coo jäya'ay yaa tøø miøødtägø'øyy tsajtøgooty, ja'a hajxy ca'a judíospä. Hix, cabä cuhdujt jaduhñ ñä'ägä miñ coo hajxy yaa tiägø'øwät tsajtøgooty, pønjaty ca'a judíos.

Paady hajxy jaduhñ miänaañ, je'eguiøxpä coo ja'a Pablo hänajty tøø yhixyii cajptooty coo ja'a Trófimo hänajty miøødä. Jaduhñä Asiabäjäya'ayhajxy hänajty miäna'añ cooc tyijy ja'a Pablo ja'a Trófimo hänajty tøø miøødtägøøyy tsajtøgooty. Efeso ja'a Trófimo hänajty chooñ. Ca'a jiidíosä hänajty je'e. Hoorä, coo ja'a cu'ughajxy jaduhñ miädooyy cooc ja'a Pablo hänajty jiiby wiädity tsajtøgooty, mänit hajxy tiägøøyy haamhajpä. Mänitä Pablo hajxy miajch. Mänit hajxy piawijch piäjädujty jim tsajtøghaguuy. Mänitiä tsajtøjc hajxy yhagøøyy.

³¹ Jimä cu'ugä Pablo hajxy hänajty ñä'ägä yagho'ogaannä, mänitä soldado-wiindsønä mädia'agy ñämejtsä coogä cu'ughajxy hänajty jim wyi'i yhaamhaty Jerusalén. Roma ja'a soldadohajxy hänajty chooñ.

³² Tuunä ja'a soldado-wiindsón jaduhñ ñä'ä mädooyy, mänitä soldadohajxy yhamugøøyy. Mänit hajxy päyø'oguiä yhädaacy maa ja'a cu'ughajxy hänajty yhaamhatiän. Coo ja'a cu'ugä soldado hajxy jaduhñ jiojcuheebøøyy coo ja'a soldadohajxy hänajty miänacy maa ja'a Pablo hänajty wiobho'ogyiijän, mänitä Pablo yhøxmajtsä.

³³ Coo ja'a soldado-wiindsón jiiby quiädaacy, mänitä Pablo chuumä. Hamejtsadena quiø'øxojs tiecyxiojtsä. Mänitä soldado-wiindsönä cu'ug miäyajtøøyy pønä Pablo, møød ti hänajty coo tøø wiobho'ogyii.

³⁴ Mänitä jäya'ayhajxy may yhadsooyy haagä wiingjaty. Cab hajxy hänajty tiu'ugmädia'aguiä. Coo ja'a cu'ughajxy hänajty jaduhñ wyi'i ya'axy, cabä soldado-wiindsönä tøyhajt hänajty hoy piaada'añ. Mänit miänaañ coo ja'a Pablo jim yajnøcxøjät maa ja'a cuartelän.

³⁵ Coo ja'a soldado ja'a Pablo hajxy jim miøødcoo'ty maa ja'a escalera jaduhñ chohnda'aguiän, mänitä Pablo hajxy quiøyø'cy. Paady hajxy jaduhñ quiøyø'cy coo ja'a cu'ugä Pablo hajxy hänajty jia wi'i yagho'oga'añ.

³⁶ Høxhaamä cu'ugä soldado hajxy hänajty pianøcxy yáaxäp coo ja'a Pablo yagho'ogøjät.

³⁷ Jimä soldado ja'a Pablo hajxy hänajty miøødtägø'owa'añ cuarteltøgooty, mänitä Pablo ja'a soldado-wiindsón ñämaayy:

—Huuc min, nhuuc møødmädiä'agyhøch miich paquiä.

Hagriego haamä Pablo jaduhñ miänaañ. Mänitä soldado-wiindsón yhadsooyy:

—Mjájpytiämä hagriego jaduhñä.

³⁸ Cäjtam miich jim ndsoñ Egipto-naaxootiä. Tøø jiegø'øy coo häna'c tsip jim tøø yajpädø'øgy Egipto. Nämädaaxmilä jiamiøød hänajty, haagä cahwiindøyhäna'c. Mänit hajxy piäyø'cy. Mänit hajxy jim ñøcxøøyy pactuum maa pøn quia'a tsäna'ayän.

³⁹ Mänitä Pablo miänáangumbä:

—Cábøch jim ndsoñ Egipto. Judíojäyá'ayhøch høøch. Jimhøch ndsoñ maa ja'a cajpt jaduhñ xiøhatiän Tarso jim Cilicianaaxooty. Møjjuøøbyhøch ngajpt. Huuc tunä mayhajt, nhuuc cøxy møødmädiä'agyhøch yø'ø cu'ug.

⁴⁰ Mänitä soldado-wiindsönä Pablo cuhdujt miooyy coo quiápxät. Mänitä Pablo piejty escaleracøxp. Mänitä quiø'ø chajxajy. Mänitä cu'ughajxy cøjx yhamoñ. Mänit tiägøøyy xiicpä mädiaacpä hebreohayuuc-haamby:

22

¹ —Mägu'ughajpädøjc, huuc hamädoowhit hajxy hoy; mijts nmøødmädia'agaamby.

² Coo ja'a cu'ughajxy jaduhñ miädooyy coo ja'a Pablo hänajty quiapxy miädia'agy hebreohayuuc-haamby, tehngajnä hajxy hänajty hoy yhamädoowhity. Mänitä Pablo jiaac mädiaacy:

³ —Judíojäyá'ayhøch høøch. Jimhøch nnaaxque'exä Tarso, jim Cilicianaaxooty. Múutsnøch yaa ngoo'ty Jerusalén. Ja'a teedyhap Gamaliélhøch yaa xyajcapxtaac. Jaanç tehñ yhöyhøch xyajnahixøøyy ja'a jecyquiuhdujt. Jaanç tehñ yhöyhøchä Dioscuhdujt hijty nbaduñ hamuumdu'joot nej mijts jäda'ahaty mbaduñän.

⁴ Nyajtsaaçhpøjpiøchä jäya'ay hijty, ja'a Diosmädia'agy hajxy mäbøjpä ja'a Jesúsøxpä, to'oxiøjcä, ya'adiøjcä. Høxtä nyaghó'piøch hijty tähoocjaty. Pawíchhøch hijty pujxtøgooty nyajnøcxy cø'øxoch tecyxioch.

⁵ Ja'a teedywiindsón yaa tuumbä Jerusalén, coo hajxy jaduhñ mmäyajtówät pø tøyhájthøch jaduhñ tøø njatcø'øy, xmió'owäbä tøyhajt hajxy jaduhñ. Jaanä jaduhñä majtøjcä tøyhajt hajxy yéjpät coo hajxy jaduhñ mmäyajtówät. Yø'øchä nocy hajxy tøø xya-jmäguexy coo højts nmägunaax jim nmó'owät maa ja'a cajpt jaduhñ xiøhatiän Damasco. Jimhøchä jäya'ay hänajty nøcxy nhøxta'awa'añ Damasco pønatiä Diosmädia'agy mäbøjpä

ja'a Jesúscøxpä. Je'ečh hānajtj nøcxy nmdasa'añ. Yaačh hānajtj nyajmānaca'añ Jerusalén. Yaačh hānajtj miñ ndsaáčtiuna'añ.

⁶ Jim tu'haamnøcxpā, ja weenjátyhøch hānajtj jim nga'a coody Damasco, mānitā jøøn quiuhjajcādaacy jaančh tehñ miøc, mādúhñtiøch hānajtj nyo'oy. Cujyxiøøho'ogy hānajtj jaduhñ.

⁷ Túunøčhā jøøn jaduhñ nnā'ā hijxy, mānitiøch jaduhñ ngādaayy. Mānitiøch nmādooyy cooč hāna'c hānajtj xxiøøguya'axy: “Saulo, Saulo, tiich jaduhñ coo xwyi'i miādsibø'oy.”

⁸ Mānitiøch nmāyajtøoyy: “Wiindsøn, pøn miich.” Mānitiøch xyhadsooyy: “Jesúshøch høøch. Nazaréthøch hijty ndsooñ. Høøch miich jaduhñ xmiādsibøøby.”

⁹ Pønjátjyøch hānajtj nmøødnøcxyp, yhiyx ja'a jøøn hajxy. Pero cab hajxy miādooyy coočhā Jesús jaduhñ xmiāgapxy.

¹⁰ Mānitiøchā Jesús nmāyajtøøgumbā: “Wiindsøn, tiich jaduhñ ndúnāp.” Mānitiøch xyhadsoøgumbā: “Tānaayyø'øg. Jaac nøcx jim Damasco. Coo miich jim mgóodāt, mānit miich hāna'c jim xyhawaanaañā tijaty miichā Dios jaduhñ xyajtunaamb.”

¹¹ Hoorā, coočhā jøøn nhijxy, wiinxóo'tshøch jaduhñ. Cábøch hānajtj hoy nhijxnā. Ja'a njamiøødhøch hajxy jim xjiaac witscoo't Damasco.

¹² Jimā jāya'ay hānajtj tu'ug chāna'ay. Ananías hānajtj xiøhaty. Jaančh tehñ yhooyā Ananías ja'a cuhdujt hānajtj piaduñ nebiā Moisés jecy yhanehmiān. Jimā judíosahajxy hānajtj naje'e chānaabiā Damasco. Jiaančh tehñ quiumaabiā judíos ja'a Ananías hajxy hānajtj jaduhñ.

¹³ Hoorā, coočhā jim ngoo'ty Damasco, mānitiøchā Ananías hoy xquiuhixy. Mānitiøch xñāmaayy: “Puhya'ay Saulo, hijxø'øg jadāhooc cham jaduhñajtā.” Tuunā ja'a Ananías jaduhñ ñā'ā mānaañ, mānitiøch jaduhñ njaančh hijxø'cy.

¹⁴ Mānitiøchā Ananías xñāmáaguumbā: “Ja'a nhaphájtāmhajxy ja'a ndeedyhájtāmhajxy ja'a jecypiā haampiā, ja'a Dios hajxy hijty wyiingudsāhgøøby jegyhajty. Jaaya'ay miich jaduhñ tøø xyajñāhdijy coo jaduhñ mdúnāt neby je'e jioot choquiān, møød coo ja'a Jesús mhamdsoo híxāt coo mhamdsoo mādōwāt nebiaty je'e miādia'agy.

¹⁵ Nøcxaamb miich mmādia'aga'añ wiinduhmyhagajpt ja'a Jesúscøxpā, nebiaty tøø mhixy nebiaty tøø mmādooy.

¹⁶ Hoorā, tsógānāmāts, nøcx nābejnā. Jaduhñā Jesús mmānuu'xtā'agāt coo weenā mbojpā mgādieey xyajñāhwaats xyajcuhwāatsāt”, nómhøchā Ananías xñāmaayy.

¹⁷⁻¹⁸ Mānitiøch yaa nwiimbijtagajch Jerusalén. Mānitiøch nnøcxy tsajtøgooty Diospa'yaaxpā. Mānitiøchā Jesús nwiinhijxy, ja'a hajxy nWiindsønhájtāmbā. Mānitiøchā Jesús xñāmaayy: “Tsógānāmāts, mdsóonāp yaa. Caj miichā cu'ugā mmādia'agy yaa xmiābøgaanā coočhā miich yaa xjia wi'i miādia'aga'añ.”

¹⁹ Mānitiøch nhadsooyy: “Wiindsøn, ñajuøøbiā cu'ughajxy coočhā hijty nwādity wiinduhmyhagajpt maa ja'a judíos chajtøjc-hajxiān, coočhā jāya'ay hijty nyajnøcxy pu-jxtøgooty pønjetiā mmādia'agy xmiābøjcāp. Náxyhøch hijty nyajwobyii.

²⁰ Y coo ja'a Esteban yagho'cā, jímhøch hānajtj nbadsóonābā. Møødhøch hānajtj nbamānaambā coo yagho'ogøøjāt. Ja'a hāna'cā Esteban hajxy yaghó'cābā, høøchā wyit ngüeendāhajtā. Paadiā Esteban jaduhñ yagho'cā je'eguiøxpā coo miichā mmādia'agy hānajtj xyajwa'xā.”

²¹ Mānitiøchā Jesús xñāmáaguumbā: “Cabā cueentā jaduhñ. Nøcxnā. Jāguémhøch miich nguexa'añ maa ja'a jāya'ayhajxy chāna'ayān, ja'a hajxy ca'a judiøspā.”

²² Māduhñjatiā Pablo hānajtj miādia'agy, hamādoowhíjtāxābā miādia'agy hānajtj jaduhñ. Pero coo jaduhñ miānaañ cooc hānajtj jāguem quiexa'añii maa ja'a jāya'ayhajxy chāna'ayān, ja'a hajxy ca'a judiøspā, cabā cu'ugā Pablo ja'a miādia'agy hajxy hānajtj yhamādoowhidāañānā. Mānitā cu'ughajxy tiägøøyy yaaxpā jojpā:

—Ween yøø craa yho'ogy. Yagho'og yøø craa hajxy.

²³ Tehngajnä hajxy hänajty jaduñ wyi'i ya'axy wyi'i jiocy. Yamä wyit hajxy hänajty wyi'i chajyemy. Yamä naaxoc hajxy hänajty wyi'i chajwøjy. Paady hajxy hänajty jaduñ wyi'i jiatcø'øy coo ja'a Pablo hajxy hänajty jiaanč tehñ miädsiphaty.

²⁴ Mänitä soldado-wiindsón miänaañ coo ja'a Pablo jiiby yajtøjtägø'øwøøjät cuarteltøgooty. Mänit jiaac mänaañ coo ja'a Pablo wiobho'ogøøjät, ween jaduñ quiøxy nägapxy tiiguiøxpä cu'ugä Pablo hajxy hänajty coo tøø wyi'i ñäya'axy.

²⁵ Mänitä soldado ja'a Pablo hajxy quiø'øxoich. Wiobho'ogaambiä Pablo hajxy hänajty. Mänitä Pablo ja'a capitán miägapxy, ja'a hänajty jim tanaabiä wiinduum:

—Caj mijts cuhdujt mmøødä cooçh mijts xwióbät nä'a nägoobä. Cab hajxy mnajuø'øy pø tøøch ngädieey. Høøch, jadúhñhøchä cuhdujt nmøødä nebiä Rómabä jäya'ayhajxy miøødän —nømä Pablo ja'a capitán ñämaayy.

²⁶ Coo ja'a capitán jaduñ miädooyy, mänitä wyiindsón ñämaayy:

—Ca'a hajxy jaduñ mwopy. Jadúhñäc yø'ø craa cuhdujt miøødä nebiä Rómabä jäya'ayhajxy miøødän.

²⁷ Mänitä soldado-wiindsónä Pablo hoy miäyajtøy:

—Nej, tøyhajt jaduñ coo miichä cuhdujt jaduñ mmøødä nebiä Rómabä jäya'ayhajxy miøødänä.

Mänitä Pablo yhadsooyy:

—Tøyhajt jaduñ.

²⁸ Mänitä soldado-wiindsón miänaañ:

—Jadúhñhøchä cuhdujt nmøødäbä nebiä Rómabä jäya'ayhajxy miøødän. Pero jaanč tehñ chówhøch jaduñ tøø xyhabädsøømä cooçhä cuhdujt jaduñ tøø njuy.

Mänitä Pablo miänaañ:

—Cooçh jim nnaaxque'exä Tarso, páadyhøchä cuhdujt jaduñ nmøødä nebiä Rómabä jäya'ayhajxy miøødän.

²⁹ Ja'a soldadohajxy hänajty mäwobaambä, coo hajxy jaduñ miädooyy coogä Pablo cuhdujt hänajty jaduñ miøødä nebiä Rómabä jäya'ayhajxy hänajty miøødän, mänitä Pablo hajxy piuhwaach. Y ja'a soldado-wiindsón, coo je'e jaduñ miädooyy, tsähgøøyy je'eduhñ je'eguiøxpä coo ja'a Pablo hänajty tøø quiø'øxoçhii tøø tiecyxioçhii.

³⁰ Cujaboomä soldado-wiindsón jaduñ miänaañ coo ja'a Pablo quiø'øguejøøjät. Mänit miänaañ coo ja'a teedywiindsønñhajxy yhamugø'øwät møødä majtøjc-hajxy. Mänitä Pablo jim yajnøcxä maa ja'a teedywiindsønñhajxy hänajty tøø yhamugø'øyän. Mänitä Pablo jim yajtanaaguiädaacä cu'ugwiinduum. Miädowaambiä soldado-wiindsón hänajty jaduñ tiiguiøxpä judíos ja'a Pablo hajxy hänajty coo tøø ñäxø'øwø'øy.

23

¹ Mänitä teedywiindsønñhajxy wyiinhee'ppejtä ja'a Pábläm. Mänitä Pablo miänaañ:

—Mägu'ughajpädøjc, Dióshøch jaduñ xyhijxp cooçh homiänaajä nhojiäya'ayhaty.

² Coo ja'a Pablo jaduñ miänaañ, mänitä häna'c-hajxy ñämaayyä coo ja'a Pablo hajxy yhapo'xø'øgät, ja'a häna'c-hajxy hänajty jim tanaabiä Pablo wyiinduum. Ja'a Ananías jaduñ mänaañ coo hajxy jaduñ jiatcø'øwät. Møjhajpä Ananías hänajty jim maa ja'a teedywiindsønñhajxiän.

³ Mänitä Pablo ja'a Ananías ñämaayy:

—Dios miich jaduñ xyajcumädowaamb. Caj miich hoy mduñ. Jaduñ miich mduungmøødä cooçh miich xyajtøyhajtyégät hoy yajxón nebiä cuhdujt myiñän. Pero coo miich jaduñ tøø mmäna'añ cooçh häna'c xquióxät, myajcähxø'py miich jaduñ coo miichä cuhdujt hoy mga'a yajtuñ.

⁴ Ja'a häna'c-hajxy hänajty jim tanaabiä, mänitä Pablo hajxy ñämaayy:

—Tøø miich jaduñ ngapxtägoy coo yø'ø møjteedywiindsón jaduñ tøø mwiingapxpety. Haa ca'a, Dios yø'øduhñ tøø yhuuc pädaacpä.

⁵ Mänitä Pablo yhadsooy:

—Mägu'ughajpädöjc, huuc mee'x hajxy, cáboch hijty nnajuø'øyy coo yø'ø jaduhñ tiuñ møjteedywiindsøn. Jaduhñ jim myiñ cujaay maa ja'a Diosmädia'aguiän coo hajxy nga'a nänömät haxøøg, pønjataiä tuuñg møød maa ja'a tsaan maa ja'a cu'ugän.

⁶ Mänitä Pablo jaduhñ yhijxy coo häna'c-hajxy hänajty mejtstu'u tøø yhamugø'øyy, møødä saduceoshajxy, møødä fariseoshajxy. Mänitä Pablo møc quiapxy:

—Mägu'ughajpädöjc, høøch, jue'eçh høøch, fariséoshøch høøch. Haagä fariseos højts jaduhñ. Cooch jaduhñ nmäböcy coo ja'a ho'oguiäya'ayhajxy jaduhñ jiuypijøjtägatsa'añ, páadyhøchä häna'c jaduhñ tøø xñäxø'øwø'øyy.

⁷ Coo ja'a Pablo jaduhñ miänaañ, mänitä fariseoshajxy tiägøøyy yajcapxiøøbiä møødä saduceoshajxy. Cabä miädia'agyhajxy hänajty ñibiaadyii.

⁸ Hix, jaduhñä fariseoshajxy hänajty miäböcy cooc ja'a ho'oguiäya'ayhajxy jiuypijøjtägatsa'añ. Jaduhñ hajxy hänajty miäböjpä cooc ja'a Dios ja'a mioonsä jim miøødä tsajpootyp, møød cooc ja'a nhaañämähájtämhajxy quia'a hó'cäm. Pero cabä saduceosha-jxy hänajty miäböcy nebiä fariseoshajxy hänajty miäböquiän.

⁹ Tehngajnä hajxy hänajty miaas nämayø'øyy haamhajpä. Tehngajnä hajxy hänajty yhamböcy. Mänitä fariseoshajxy näje'e tiänaayø'cy, ja'a hajxy hänajty yajnahixøøbiä maa ja'a tsajtøjcän. Mänit hajxy miänaañ:

—Yø'ø craa, cap tii pojpä cädieey miøødä. Jímbädä Diosmoonsä tøø miägapyii, o háañämä.

¹⁰ Maas hanaxiä hajxy hänajty yhamböcy. Tsähgøøbiä soldado-wiindsøn hänajty coo ja'a Pablo hänajty yagho'oga'añii. Mänitä soldado-wiindsønä soldado miøjyaaxy coo ja'a soldado ja'a Pablo hajxy jilby wyitstsóonät, møød coo hajxy jim yajnøcxät maa ja'a cuartelän.

¹¹ Mänitcoodsä Jesús jii by ñäguehxtø'xy maa ja'a Pablo wyiinduumän. Mänitä Jesús ja'a Pablo ñämaayy: “Ca'a mdsähgø'øyy. Nébyhøch miich yaa tøø xmiädia'aguiän Jerusalén, jaanä jaduhñhøch miich jim nøcxy xmiädia'agáangumbä Roma.”

¹² Cujaboomä judíoshajxy näje'e hoy quiojyquiapxyhaty coo ja'a Pablo hajxy yaghó'ogät. Mänit hajxy ñiñämaayyä:

—Mäduhñtiä Pablo jiaac jugyhaty, cab hajxy nnä'ägä caayy nnä'ägä húucämät.

¹³ Näjuxychägui'xnaxy hajxy hänajty je'eduhñ, ja'a hajxy hänajty jaduhñ tøø quiojyquiapxyhätibä.

¹⁴ Mänit hajxy hoy ñägapy maa ja'a majtøjc-hajxiän:

—Tøø højts jaduhñ ngojyquiapxyhaty coo højtsä Pablo nyaghó'ogät. Høxtä mänit højts ngaya'añ nhu'uga'aññä.

¹⁵ Hoorä, mijts, nøcxä soldado-wiindsøn hajxy jaduhñ nämä'aw coo weenä Pablo yaa yajmechii mijts mwiinduum. Jaduhñ hajxy mwiinhøønät coo tyijy ja'a Pablo hajxy mjaac tehñ miäyajtøwa'añ. Cahnä Pablo hänajty yaa quioody maa mijts mwiinduumän, jim højts nyaghó'ogät tu'haam —nømä teedywiindsøn hajxy ñämaayyä.

¹⁶ Mänitä Pablo chojmajc jaduhñ miädoyhajty coogä Pablo hänajty yagho'oga'añii. Mänitä Pablo hoy yhawáanaxä maa hänajty chumiän.

¹⁷ Mänitä Pablo ja'a capitán tu'ug miøjyaaxy. Mänit ñämaayy:

—Huuc tunä mayhajt, huuc woonøcx hädaa craa jim maa ja'a mwiindsønän. Jim jaduhñ miøødmädia'aga'añ.

¹⁸ Mänitä Pablo chojmajc wioonøcxäxä maa ja'a soldado-wiindsønän. Mänitä capitán ja'a soldado-wiindsøn ñämaayy:

—Ja'a Pábløch jaduhñ tøø xñäma'ay cooch hädaa craa yaa nwoomínät maa miichän. Míichäc jaduhñ xmiøødmädia'agaamb.

¹⁹ Mänitä Pablo chojmajc wiingtuum wyitsnøcxäxä. Mänitä soldado-wiindsøn miänaañ:

—Tiich jaduhñ xyhawaanáañäp —nòmä Pablo chojmajc miäyajtøwäxä.

²⁰ Mänitä Pablo chojmajc yhadsooyy:

—Tøø ja'a judíoshajxy näje'e quiojyquiapxytiunñ cooc miich xñäma'awa'añ coo miichä Pablo jaboom ween mguexy maa ja'a teedywiindsønä wyiinduumhajxiän. Jaduhñäc miich xwyiinhøøna'añ cooc tyijy ja'a Pablo hajxy cøxiä wiinä jiaac tehñ miäyajtøwa'añ.

²¹ Caj miich jaduhñ mmäbógät. Näjuxychägui'xnaxiä jäya'ayhajxy jaduhñ tøø quiojyquiapxyhaty coo ja'a Pablo hajxy yaghó'ogät tu'haamnøcxpä. Cábäc hajxy jaduhñ ñä'ägä caya'añ ñä'ägä hu'uga'añ. Høxtä coogä Pablo hajxy yaghó'ogät, mänitäc hajxy quiaya'añ yhu'uga'aññä. Miichäc hajxy xyhuuc jaac hahijxp cooc miich jaduhñ mmäná'anät pø mgudiunaamby jaduhñ —nòmä soldado-wiindsøn ñämaayyä.

²² Mänitä Pablo chojmajc ñämäayyäxä coo quia'a nägäpxät wiingtuum waambaty hänäjty jaduhñ tøø miädia'agy. Mänitä soldado-wiindsøn jaduhñ miänaañ coo ja'a Pablo chojmajc wyiimbijnät.

²³⁻²⁴ Mänitä soldado-wiindsønä capitán metsc miøjyaaxy. Mänit hajxy wyiinguejxä coo ja'a Pablo hajxy coods jim yajnøcxät Cesarea. Nämäyvä soldadohajxy hänäjty pianøcxa'añ. Námejtsmägo'x hajxy hänäjty ñøcxa'añ tecy-yo'oyhaam; møød nädägøøghii'xcumajc hajxy hänäjty ñøcxa'añ cuaañähgøxp; møød námejtsmägo'x hajxy hänäjty ñøcxaambä cuhñdcap. Jaduhñä capitánhajxy ñämäayyäbä coo ja'a Pablo cuaañähgøxp ñøcxät, møød coo hoy cwieendähadøøjät, jaduhñ nejy quia'a jat quia'a habétät. Jaduhñä soldado-wiindsøn yhanehmbyä coo ja'a Pablo ja'a gobernador Félix yajcø'ødägø'øwøøjät.

²⁵ Mänitä soldado-wiindsønä nocy yhädiuunñ. Ja'a gobernador Félix hänäjty yajnäguexaamby. Jaduhñ soldado-wiindsøn quiujahy:

²⁶ “Høøch hädaa nocy nhädiuumby, høøch Claudio Lisias. Wiindsøn Félix, miich jaduhñ cham nyajpoo'xyp.

²⁷ Hädaa jäyá'ayhøch miich nyajnäguejxyp. Pablo jaduhñ xiøhaty. Häxøøyy maaxtøjquiä Pablo yaa miajtsä Jerusalén. Ja'a judíoshajxy jaduhñ mämajts. Yagho'ogáañäbä Pablo hänäjty. Pero coöch jaduhñ nmädoyhajty coo ja'a Pablo cuhdujt jaduhñ miøødä nebiä Rómabä jäya'ayhajxy miøødän, mänitøchä soldado ja'a Pablo hoy nmøødyajñäwa'açh.

²⁸ Je'eçh hänäjty nmädowaamby tiiguixpä Pablo hänäjty coo tøø miächii, páadyhøch jiiby nmøødhädaacy maa ja'a judíos ja'a junta hajxy hänäjty yagjadyiijän.

²⁹ Mänitøch nmädooyy coogä Pablo tii pojpä tii cädieey quia'a møødä. Je'eduhñ yajcumadsøyyä coo ja'a judíos ja'a quiuhdujthajxy wyiingjatiä. Páadyhøch jaduhñ nga'a mänaañ coo ja'a Pablo yagho'ogøøjät, ni coo chumøøjät.

³⁰ Cooch jaduhñ nmädoyhajty coo ja'a judíoshajxy hänäjty näje'e tøø quiojyquiapxyhaty coo ja'a Pablo hajxy hänäjty yagho'oga'añ, mänitøch jaduhñ nwiinmaayy coöch miich jaduhñ nyajnäguéxät. Ja'a häna'cä Pablo hajxy ja wi'i yagho'ogaambä, tøøch nnäma'ay coo ja'a Pablo jim nøcxy ñäxø'øwø'øyii miich mwiinduum.”

³¹ Mänitä soldadohajxy jiaançh cudiuunñ nebiä wyiindsøn hajxy hänäjty tøø ñäma'ayijän. Mänitä Pablo hajxy jim coods yajnøcxy maa ja'a cajpt hänäjty xiøhatiän Antípatris.

³² Cujaboomä soldadohajxy wyiimbijty, ja'a hajxy hänäjty tøø ñøcxy tecy-yo'oyhaam. Ja'a hajxy hänäjty cuaañähgøxpä, je'edsä Pablo hajxy jaac møødnøcxnä.

³³ Mänit hajxy jim quioo'ty Cesarea. Mänitä Pablo ja'a Félix hoy yajcø'ødägø'øyii møødä nocy, ja'a soldado-wiindsøn hänäjty tøø quiéxiäbä.

³⁴ Mänitä Félix ja'a nocy quiapxy. Mänitä Félix ja'a Pablo miäyajtøøyy maa je'e chooñ. Mänitä Pablo yhadsooyy coo hänäjty jim chooñ Cilicianaxooty.

³⁵ Coo ja'a Félix jaduhñ miädooyy, mänitä Pablo ñämaayy:

—Weenä jäya'ayhajxy yhuuc mech, ja'a miich hajxy jaduhñ xñäxø'øwø'øwaambä, mänitøchä tøyhajt nmädowa'añ ja'a miichcøxpä.

Mänitä Félix ja'a soldado ñämaayy coo ja'a Pablo piäda'agóøjät møjtoogooty, ja'a hänajty xøhajpä Palacio de Herodes. Jaanä jaduhñä Félix miänaambä coo ja'a Pablo hoy cwieendähadóøjät.

24

¹ Cumägooxxøø ja'a Ananíashajxy jim̄ quioo'ty Cesarea. Møjteedywiindsønä Ananías hänajty tiuumby jim̄ Jerusalén. Näguipxiä majtojc-hajxy näje'e piagoo'pä møødä licenciadä tu'ug, ja'a hänajty xøhajpä Tértulo. Mänit hajxy jim̄ ñøcxy maa ja'a gobernador Félix hänajty tiuñän. Mänitä Félix hajxy ñämaayy coo ja'a Pablo hajxy hänajty ñäxø'øwø'øwa'añ.

²⁻³ Mänitä Félix miänaañ coo ja'a Pablo yajmedsøøjät maa ja'a Félix wyiinduumän. Coo Pablo jaduhñ yajmejtsä, mänitä Tértulo ja'a Pablo tiägøøyy näxø'øwøøbiä:

—Wiindsøn Félix, hoy højts njaanç tehñ ñijiäwø'øyii maa miichcøxpän, coo miich hoy mjaanç tehñ tiuñ. Tøø højts miichä nnaaxä ngajpt xjiaanç tehñ yaghoyøøyyä. Cabä tsip cabä pleetä jaduhñ maa yajpaady. Coo miich jaduhñ hoy mjaanç tehñ tiuñ, paady højts Dioscujú'uyäbä njaanç tehñ yecy maa miichcøxpän.

⁴ Cábøch miich jejcy nhadsiba'añ. Huuc tunä mayhajt, højtsä nmädia'agy hamädoowhíjtäc. Paquiä højts jaduhñ nmädia'aga'añ.

⁵ Yø'ø craa Pablohajpä, nmøødhajpy højtsä tøyhajt jaduhñ coo yø'ø højts xjiaanç tehñ miädsibø'øy majaty højts nhity, højts judíoshajpä. Jaduhñ højts xjia wi'i jiojcapxø'øy coo højtsä nguhdujt nnajtshixø'øwät. Jaduhñä tsip homiaajä yajpadø'øgy. Ja'a jäya'ayä Jesús Nazaretpä miädia'agy hajxy panócxäbä, je'e ja'a Pablo hajxy wiindsønñhajp.

⁶ Mänitä Pablo jäya'ay nämädaaxc miøødtøjtägøøyy maa højtsä nmøjtsajtøgootiän. Ja'a hajxy nämädaaxpä, ca'a hajxy je'e jiidíosa. Cab højtsä nguhdujt jaduhñ myiñ coo wiingjäya'ay jii by tiägø'øwät. Mänit højtsä Pablo nyajmajtsä. Nyajcumädowaamby højts hänajty, tii hänajty jii by tiuumby tsajtøgooty. Jaduhñ højtsä nguhdujt myiñ coo jaduhñ quiumädówät.

⁷ Mänitä soldado-wiindsøn piayajcahw piayajpøgøøyy, ja'a xøhajpä Lisias. Mänit højtsä Pablo mädsibø'øbä xpiøjcä.

⁸ Mänit højtsä Lisias xñämaayy coo højts yaa nmínät maa miichä mwiinduumän, coo højtsä Pablo yaa nnäxø'øwø'øwät. Hoorä, hamdsoo miichä Pablo mmäyajtøwät pø tøyhajt jaduhñ neby højts cham̄ nnäxø'øwø'øyän —nømä Tértulo ja'a Félix ñämaayy.

⁹ Jaduhñä judíoshajxy piämänaambä.

¹⁰ Mänitä gobernador Félix ja'a Pablo miäwø'xy coo ja'a Pablo miädiá'agät. Mänitä Pablo miänaañ:

—Wiindsøn Félix, jaanç tehñ jiootcújc-høch cham̄ nnijiäwø'øyii cooçh yaa nniguiugapxa'añii miichä mwiinduum. Hix, nnajuøøbiøch jaduhñ coo miich møjtuunç jejcy yaa tøø mmøødhaty maa højtsä nnaax maa højtsä ngajptän.

¹¹ Chaanä miajmetxøøhaty cooçh jim̄ ngoo'ty Jerusalén. Jim̄høchä Dios hänajty nwiingudsähgø'øwa'añ tsajtøgooty. Tøyhajt jaduhñ. Hoy piønä jaduhñ miäna'añ.

¹² Pero cábøchä tsip jim̄ nhøxtaayy. Cábøchä tsip ni maa nhøxtaayy, majátyhøch tøø nwädity, ni jii by møjtsajtøgooty, ni jii by muutstsajtøgooty, ni jim̄ cajptooty. Cábøch pøn jim̄ nmøødyajcapxiøøyy.

¹³ Hoorä, yø'ø häna'c-hajxy xim̄ xwyiingapxpéjpøchä, hønndaacp hajxy yø'ø. Cab hajxy tøyyä ñä'ä mädia'agy.

¹⁴ Pero jaduhñ mäbøcypä, nwiingudsähgøøbiøchä Dios. Nebiä jecyjiäya'ayä Dios hajxy wyiingudsähgøøyyän, jaduhñhøch nwiingudsähgøøbiä. Cooçhä Dios jaduhñ nwiingudsähgø'øy, páadyhøchä yHuung Jesús ja'a miädia'agy jaduhñ nbanøcxä. Yø'ø häna'c-hajxy ximbä, cabä Jesús ja'a miädia'agy hajxy wyiinjuøøyyä. Cábäc tyijy jaduhñ tiøyyä. Pero nmäbøjpiøchä jecymiädia'agy, ja'a Moisés hajxy jecy quijähyyäbä møødä profetadøjc-hajxy.

15 Yø'ø häna'c-hajxy, jaduhñ hajxy miäbøcy cooc ja'a ho'oguiäya'ayhajxy nägøxiä jiuypiojtagatsa'añ, hoyhäna'cä, haxøøghäna'cä. Jaanä jaduhñhøch nmäbøjpä. Cooc ja'a Dios jaduhñ miänaañ cooc hajxy nägøxiä xyagjuypiojtagatsaanäm, tøy jaduhñ.

16 Cooch jaduhñ nmäbøcy, páadyhøchä njoot homiänaajä nbäda'agy coochä Diosmädia'agy hoy tehngajnä nbadúnät. Jaduhñhøchä Dios xquiumáyät. Jaanä jaduhñhøchä cu'ug xquiumáabiät.

17 'Mänáajøch hoy nwädiän jäguembaady mejtsjomøjt tægøøgomøjt, mänitøch jim nmejstägajch Jerusalén. Xädø'øñhøch jaduhñ nmämejts. Ja'a nmägunáaxhøch hänajty nmo'owaamby. Møødhøchä meeg hänajty nyoxa'añ ja'a Dioscøxpä.

18 Jaduhñhøch hänajty jiiby nguhdujthaty mõjtsajtøgooty, mänithøchä judíosahajxy näje'e xyhijxy, ja'a hajxy jim tsohmä Asia. Tøøch hänajty ngudiuñ neby højtsä nguhdujt myiñän. Cábøchä häna'c hänajty nämay nmøødä. Cab højts hänajty nhaamhaty.

19 Ja'a jäya'ay højts jaduhñ xyhixäbä mõjtsajtøgooty, je'eds jaduhñ hahixøøby xñäxø'øwø'øwäbøch yaa miichä mwiinduum, pø tøøch hajxy jaduhñ xyhixy cooch ngädiehy.

20 Yø'ø häna'c-hajxy xim tanaabiä, ween yø'øhajxy jaduhñ ñägäpaxy pø tøøch hänajty ngädieey mänaachä häna'c jim xyajmechän maa ja'a teedywiindsønä wyiinduumhajxiän jim Jerusalén.

21 Wéhñdøch mänit ngapxtägooyy cooch nmänaañ cooch nmäbøcy coo ja'a ho'oguiäya'ayhajxy jiuypiojtaga'añ. Møc-høch jaduhñ nmänaañ.

Mänitä Pablo quiapxpädøñä.

22 Cooc ja'a Félix jaduhñ miädooyy, mänit jaduhñ wyiinmahñdyhajty coo ja'a tsip hänajty quia'a tsoj yajtødiägø'øwa'añ ja'a Pablocøxpä. Hix, ñajuøøbiä Félix hänajty jaduhñ coo ja'a jäya'ayhajxy hänajty hoy quihdujthaty, ja'a Jesús ja'a miädia'agy hajxy hänajty panøcxäbä. Mänitä Félix ja'a judíos ñämaayy:

—Mhahixäbä Lisias hajxy. Cooc je'e yaa quiädá'agät, mänitøchä mdsiphajxy nya-jtødiägøøyyät —nømä Félix miänaañ.

23 Mänitä Félix ja'a capitán ñämaayy coo ja'a Pablo jiaac yaghidøøjät tsumy, møød coo quia'a tsaachtunøøjät ni weñtiä. Jaduhñä Félix miänaambä coo ja'a Pablo quihixøøjät ja'a miägu'ughajpädøjc, møød coo hoy tyiijä ween yajnämechii.

24 Cumejtsxøø cudägøøgxøø ja'a Félix ja'a tio'oxiøjc miøødmeich maa haguicän. Drusila hänajty xiøhaty. Judía hänajty je'e. Mänitä Félix miänaañ coo ja'a Pablo yajmedsøøjät maa ja'a Félix wyinduumhajxiän. Miädoowaambiä Félixhajxy hänajty tiiguiøxpä Pablo ja'a Jesús ja'a miädia'agy hänajty coo pianøcxä.

25 Mänitä Pablo tiägøøyy mädiaacpä coo hajxy hoy njäya'ayhajtämät, møød coo hajxy hoy nguhdujthajtämät, møød coo ja'a Dios hajxy cøxiä xyajnägäpaxaanäm nebiaty hajxy hänajty tøø njäya'ayhajtäm. Cooc ja'a Félix jaduhñ miädooyy, mänit chähgøøbiøjcy. Mänitä Félix ja'a Pablo ñämaayy:

—Ween tiuhñä. Tøø ja'a mmädia'agy nmädóowäm. Nøcxnä. Cooc jadähooc ñäbaadø'øwät, mänit miich jadähooc nyajmøjya'axøøjät —nømä Félix ja'a Pablo ñämaayy.

26 Jaduhñä Félix hänajty miäna'añ cooc tyijy xädø'øñ mio'owa'añii Pábläm, cooc tyijy ja'a Pablo jaduhñ yajpädsømøøjät pujxtøgooty. Paadiä Félix ja'a Pablo hänajty ja naañhooc yajmøjya'axyii coo hänajty miøødmädia'aga'añii.

27 Mejtsjomøjtä Pablo hänajty jim tøø chumyçhäna'ay Cesarea, mänitä gobernadorhaxxy ñiguiuwijtsä. Cooc ja'a Félix piädsøømy, mänit wiinghäna'c tiägøøguiumbä. Porcio Festo hänajty xiøhaty. Cabä Félix ja'a judíos hänajty yagjootma'ada'añ, paadiä Félix miänaañ coo ja'a Pablo jaduhñ jiaac hídät tsumy.

25

¹ Mänitä Festo tiägøøyy tuumbä gobernador jim Cesarea. Cudägøøgxøø jim ñøcxy Jerusalén.

² Coo jim quioo'ty, mänitä teedywiindsønhajxy jim miejch maa ja'a Festo wyiindu-umän, møødä møjhjäpä judíoshajxy. Mänitä Pablo hajxy tiägøøyy näxø'øwøøbiä.

³ Mänitä Festo hajxy miänuu'xtaacy coo mayhajt cu tiuun, coo cu yhanehmy coo ja'a Pablo jim cu quiejxä Jerusalén. Hix, tøø ja'a judíoshajxy hänajty quiojyquiapxyhaty coo ja'a Pablo hajxy yaghó'ogät tu'haamnøcxpä.

⁴ Pero cabä Festo jadhun ñähadsooy. Mänit miänaañ coo ja'a Pablo hänajty jiihy chumyčhäna'ay Cesarea. Jadhunä Festo miänaambä coo hänajty paquiä jim yhida'añ Jerusalén, møød coo hänajty jiihy yhäda'agaaḅgumbä Cesarea.

⁵ —Pøn cuhdujt møød maa mijtsän, wéenhøch hajxy jiihy xpiahäda'agy Cesarea. Y pø tøødsä Pablo jadhun jiaanč cädieey, jiihy jadhun ñäxø'øwø'øwøøjät —nømä Festo ja'a judíos ñämaayy.

⁶ Tuctujxøø ja'a Festo jim jiaac hijty Jerusalén. Mänit jiihy yhädaactägajch Cesarea. Co jiihy quiädaacy, mänit jim tiägøøyy tuumbä hagujc. Mänit miänaañ coo ja'a Pablo jim yajmedsøøjät.

⁷ Co ja'a Pablo jim miejch hagujc, mänitä judíos ja'a Pablo hajxy piquiä piädaacy, ja'a hajxy hänajty tøø chohndá'aguiäbä Jerusalén. Mänitä Pablo hajxy cøxypänejpy ñähwaambejty.

⁸ Mänitä Pablo ñijjigapxä:

—Cábøchä cädieey jadhun maa nmøødä, ni jim maa ja'a judíos quihdujthajxiän, ni jim maa ja'a chajtøjc-hajxiän, ni jim Roma maa ja'a gobiernä yhane'emiän.

⁹ Mänitä Festo ja'a Pablo ñämaayy:

—Nej, mmänaamb miich jadhunä coo højts jim nnøcxämät Jerusalén, coo miich jim mdøyhajtyégät maächä nwiinduumän.

Paadiä Pablo jadhun ñämaayy, je'eguiøxpä coo ja'a Festo ja'a judíos hänajty quia'a yagjootma'ada'añ.

¹⁰ Mänitä Pablo yhadsooy:

—Cab jadhun yhawiinmatsä cooch jim ndøyhajtyégät Jerusalén. Hix, cábøch tii cädieey nmøødä maa yø'ø judíoshajxiän. Mnajuøøby miich jadhun. Jadhun mábøcypiä yhawiinmatsä cooch yaa ndøyhajtyégät maa ja'a gobiernä yhane'emiän, ja'a jim tuumbä Roma.

¹¹ Cooch häxøpy tøø ngädieey, hahixøøby hijty jadhun cooch nhó'ogät. Pero cábøch tøø ngädieey, hoy yø'ø judíoshajxy jadhun tøø xjia nähwaambety. Cab jadhun yhahixø'øy cooch pøn xyégät maa yø'ø judíoshajxiän. Jaduhñhøch nja mäna'añ cooch jim ndøyhajtyégät maa ja'a gobiernä wyiinduumän jim Roma —nømä Pablo miänaañ.

¹² Mänitä Festo ja'a jiamiøød miäyajtøøyy neby jadhun wyiinmahñdyhädät ja'a Pablocøxpä. Mänitä Festo ja'a Pablo ñämaayy:

—Miich jadhun tøø mmäna'añ coo miich jim nøcxy mdøyhajtyega'añ jim Roma maa ja'a gobiernä wyiinduumän. Pues jimhøch miich njaanč quexa'añ Roma tøyhajtyejpä.

¹³ Cumejtspo'o cudägøøgpø'o, mänitä Agripahajxy jim miejch Cesarea møødä tio'oxiøjc Berenice. Gobiernä ja'a Agripa hänajty tiuumby wiingtuum. Mänitä Agripa ja'a Festo hajxy yajpoo'xy.

¹⁴ Maxiøø ja'a Agripahajxy hänajty jim yhida'añ maa ja'a Festo tiøjcän. Mänitä Festo ja'a Agripa ñämaayy:

—Jimä jäya'ay tu'ug chumyčhäna'ay. Pablo jadhun xiøhaty. Co ja'a Félix yaa piädsøømy tuumbä, jimä Pablo jadhun jiaac mähmøøyy tsumy.

15 Mänáajoch jim nhoyyän Jerusalén, mänitøchä judíoshajxy xñähooyy, ja'a hajxy hánajty møjhájpä, møødä teedywiindsønajxy. Mänitä judíos ja'a Pablo hajxy ñäxø'øwøøyy maaçh nwiinduumän. Mänitä judíoshajxy miänaañ coo ja'a Pablo cu yagho'cä.

16 Mänitøch nhadsooyy: “Jaduhñ hajxy jim quiuhdujthaty Roma, cab jaduhñ pøn yagho'ogyii, pø cahnä hánajty ñijjogapxyii maa ja'a jäya'ayä wyiinduumhajxiän, ja'a hajxy hánajty mänäxø'øwøøbiä”, nómhøchä judíos nnämaayy.

17 Hoorä, cooch yaa ngädaactägajch Cesarea, mänitøchä judíos xpiamänajcy. Cujabóomhøch ndägøøyy tuumbä. Mänitøchä Pablo nyajmøjyaaxä.

18 Coo ja'a judíoshajxy jim miejch maaçh nwiinduumän, mänitä Pablo hajxy tiägøøyy näxø'øwøøbiä. Haxøøgaty ndijy ja'a Pablo hánajty ñäxø'øwø'øwa'añii. Pero cabä Pablo jaduhñ haxøøgaty ñä'a nänøømä.

19 Jue'e ja'a judíoshajxy hánajty yajcapxiøøby, nebiatiä quiuhdujt hajxy yaghity, møød coogä Pablo hoy quia'a cudiuñ. Møød hajxy hánajty yajtsibøøbiä pø tøø ja'a Jesús jiaançh juyypjotägach, ja'a hánajty tøø yhó'oguiäbä. Jaduhñä Pablo yhajodhaty coogä Jesús tøyhajt tøø jiuypjocy.

20 Høøch, cábøch hánajty nnajuø'øy nébiøchä capxy mädia'agy jaduhñ nyajtødiägø'øwät. Mänitøchä Pablo nmäyajtøøyy pø nøcxaamb hánajty jim Jerusalén coo jim cu tiøyhajtyeicy.

21 Mänitä Pablo yhadsooyy cooc hánajty jim quia'a nøcxa'añ Jerusalén. Mänit miänaañ cooc hánajty jim nøcxy yajtøyhajtyega'añii Roma maa ja'a gobiernä tiuñän. Coo jaduhñ yhadsooyy, páadyhøch jaduhñ nmänaañ coo yaa jiaac hídät tsumy. Coo jaduhñ ñäbaadó'øwät, mänitøch jim nguexa'añ Roma, ween jim nøcxy tiøyhajtyeicy maa ja'a gobiernä wyiinduumän —nømä Festo quiapxy miädiacy.

22 Mänitä Agripa ja'a Festo ñämaayy:

—Nmädowáambiøch høøchpä waambä craa jaduhñ miädia'aga'añ.

Mänitä Festo yhadsooyy:

—Jaboom mmädówät —nømä Agripa ñämaayyä.

23 Cujaboomä Agripahajxy jim miejch haguyc møødä Berenice. Wiinxu'uxy wiinwopy hajxy jim miejch. Mänit hajxy jii by tiøjtägøøyy maa ja'a Festo hánajty tiuñän, näguipxy møødä soldado-wiindsønajxy, møødä møjtøjc-hajxy. Mänitä Festo ja'a Pablo yajmøjyaaxä.

24 Coo ja'a Pablo jii by tiägøøyy, mänitä Festo miänaañ:

—Wiindsøn Agripa, møød pønjaty yaa tøø miech maa højts nwiinduumän, mjítsäts jaduhñ nmägapxyp. Yø'ø craa xii tänaabiä, yø'øds jaduhñ xøháj päb lo. Yø'ødsä judíoshajxy tøø wyi'i ñäxø'øwø'øy yaa Cesarea møød jim Jerusalén. Jaduhñ hajxy tøø wyi'i ya'axy tøø wyi'i jiocy coo yø'ø Pablo ween yho'ogy.

25 Pero høøch, cábøch jaduhñ nmäna'añ coo tøø quiädieey. Páadyhøch jaduhñ nmäna'añ coo quia'a hó'ogät. Pero hamdsoo yø'øduhñ tøø miäna'añ coo jim ñøcxät Roma, coo jim nøcxy yajtøyhajtyega'añii maa ja'a gobiernä wyiinduumän. Páadyhøch jaduhñ jim nguexa'añ.

26-27 Cábøch nnajuø'øy waambáthøchä gobiernä Rómabä nnocyñäjaayø'øwät ja'a Pablocøxpä. Cab jaduhñ yhawinmatsä coochä Pablo jim nguéxät Roma tsumy, pø cábøch tøyhajt nmøødä pø tøø jiaançh cädieey. Hoorä, páadyhøchä Pablo yaa tøø nyajmech coo mijts jaduhñ ween myajtøyhajtyeicy. Miiçh, Wiindsøn Agripa, miiçh mjaançh tehñ jiajpy mjaançh tehñ ñajuøøby. Coo mijts hánajty tøø myajtøyhajtyeicy nebiaty jaduhñ tøø jiaançh cädieey, mänitøch mábøcy nnajuø'øwät nébiøch njáayät —nømä Festo miänaañ.

26

1 Mänitä Agripa ja'a Pablo ñämaayy:

—Hahixøøby jaduhñ coo miiçh hamdsoo mnijjogapxøøjät.

Mänitä Pablo ja'a quiø'ø chajxajy. Mänit tiägøøyy mädiaacpä:

² —Wiindsón Agripa, chámhøch nnijogapxa'añii nebiátyhøchä judíoshajxy tøø xñähwaambety. Jootcújc-høch jaduhñ nnijiäwø'øyii coøch yaa nmädia'aga'añ miich mwiinduum.

³ Páadyhøch jootcuyc nnijiäwø'øyii je'eguiøxpä coo miich mjaanç tehñ jiaty mjaanç tehñ ñajuø'øy nebiatiä judíoshajxy quiuhdujthaty, møød tijaty hajxy naxy yajtsibøøby. Høøch huuc mée'xác. Høøchä nmädia'agy huuc hamädoowhíjtác.

⁴ 'Ñajuøøbiä judíoshajxy jaduhñ nägøxiä coøchä quiuhdujthajxy hoy ngudiuunä homiänaajä, møød jim maaçhä nhamdsoo cajptän, møød jim Jerusalén. Múutsnøch hänäjty jaduhñ coøchä quiuhdujthajxy jaduhñ nbadu'ubøjcä.

⁵ Jaanä jaduhñä judíoshajxy ñajuøøbiä coøchä fariseos quiuhdujthajxy hoy nya-jtúunäbä. Múutsnøch hänäjty jaduhñbä coøch ndägøøyy habøjpä. Miøødá judíos ja'a tøyhajt hajxy jaduhñ. Hahixøøby jaduhñ coo hajxy jaduhñ ñägápxät. Ja'a fariseoshajxy, ca'xiä cuhdujt hajxy yajnøcxy nebiä judíoshajxy yajnahixø'øyän.

⁶⁻⁷ Jéquiänä Dios jaduhñ miänaañ coogä ho'ogyjiäya'ay yagjujypiøga'añ. Højts judíos, jaduhñ højtsä nhapä ndeedyhajxy jecy xyajwiinwaanøøyyä ja'a Diósäm. Nägøxiä højts jaduhñ njøbhixy coo ja'a Dios jaduhñ yajtøjiada'añ neby jecy miänaañän, højts ja'a majmetsc-hagajtpä. Paady højtsä Dios xøømdsuhñ nwiingudsähgø'øy. Hoorä, Wiindsón Agripa, coøch jaduhñ nmäböcy coo ja'a Dios ja'a ho'ogyjiäya'ay yagjujypiøga'añ, páadyhøch yø'ø judíoshajxy cham xñäxø'øwø'øy miich mwiinduum —nømä Pablo ja'a Agripa ñämaayy.

⁸ Mänitä Pablo ja'a judíos ñämaayy:

—Tii hajxy jaduhñ coo mga'a mäbøga'añ coo ja'a Dios ja'a ho'ogyjiäya'ay yagjujypiøga'añ.

⁹ Mänitä Pablo jiaac mänaañ:

—Bueno, jaduhñhøch hijty nmäna'añ coo hijty yhahixø'øy coøchä jäya'ayhajxy nd-saaçhtiúnät, ja'a Jesús Nazaretpä ja'a miädia'agy hajxy hänäjty panøcxäbä.

¹⁰ Jaduhñhøch jim njaanç jatcøøyy Jerusalén. Ja'a teedywiindsønøchä cuhdujt hajxy jim xmioooy coøchä jäya'ayhajxy nyajtsumøød, ja'a Jesucristo miädia'agy hajxy hänäjty panøcxäbä. Nämäyhøch hajxy jaduhñ njaanç yajtsuumä. Y coo hajxy yagho'cä, jaduhñhøch hänäjty nbamänaambä coo hajxy yagho'ogøøjät.

¹¹ Ja naañhøc-høch hajxy tøø nyajtsaaçhtiunñii coo hajxy ñijogapxøøjät ja'a Jesúscøxpä. Wiinduhmyçhajtøjc-høch hijty ndsaaçhtiunñ. Hanáxiøch hajxy hijty nmäjootma'ady, páadyhøch hajxy hijty jäguembaady ndsaaçhtiunñ.

¹² 'Mänithøchä teedywiindsønøchajxy jim xwyiinguejxy Damasco coøchä mäbøjpädøjc jim nyajtsaaçhtiunøøjät.

¹³ Tu'haamnøcxpä, mänit højtsä jøøn xquiuhajcädaacy jaanç tehñ miøc. Cujyx-iøøho'ogy hänäjty je'e. Cabä xøø hänäjty miäbaady nebiä jøøn hänäjty jiajjiän. Høxtä xquiuhajwädijt højts jaduhñ.

¹⁴ Coo højtsä jøøn jaduhñ nhijxy, mänit højts nägøxiä ngädaayy. Mänitøch nidiuhñ nmädooyy coøchä häna'c xmiägapxy hahebreohaam. Mänitøch xñämaayy: “Saulo, Saulo, tiich miich jaduhñ coo xwyi'i miädsibø'øy. Coøch miich jaduhñ xwyi'i miädsibø'øy, hamdsoo miich jaduhñ mnichaachtiunñii.”

¹⁵ Mänitøch nmänaañ: “Wiindsón, pøn miich.” Mänitøch xyhadsooyy: “Jesúshøch høøch. Høøch miich jaduhñ xmiädsibøøby.

¹⁶ Tänaayyø'øg. Páadyhøch jaduhñ tøø nnägüehxtøø'xy ja'a miichcøxpä, míchhøch nwiinguexaamby coo ja'a mädia'agy jaduhñ myajwá'xät nebiátyhøch tøø xyhixy, møød nebiátyhøch miich njaac yajnahixø'øwa'añ.

¹⁷ Nnäwa'anäambiøch miich majaty miich mwädita'añ, jim maa ja'a judíoshajxiän, jimøød maa ja'a wiingjäya'ayhajxiän, ja'a hajxy ca'a judíospä. Jimhøch miich jaduhñ nguexa'añ maa ja'a wiingjäya'ayhajxiän.

18 Páadyhøch miich jim nguexa'añ, jaduñ miichä Diosmädia'agy myajwiingapxó'øwät, jaduñä yhaxøøgcuhdujt hajxy ñajtshixó'øwät. Cabä møjcu'ugong ja'a miädia'agy jaduñ miäbójcäxät. Ja'a Diosmädia'agy hajxy jaduñ miäbógäp. Y coöchä nmädia'agy hajxy jaduñ xmiäbójcäbät, jadúñhøch nyajñähwá'adsät ja'a piojpa quiädieeyhajxy, jaduñ hajxy miähmó'øwät hawa'adstuum", nómhøchä Jesús xñämaayy.

19 'Wiindsón Agripa, coöchä Jesús jaduñ jim xmiägapy tsajpootyp, páadyhøchä miädia'agy jaduñ ngudiuunä.

20 Mänitøchä Diosmädia'agy ndägøøyy yajwa'xpä coo jäya'ayä yhaxøøgcuhdujt hajxy ñajtshixó'øwät, coo ja'a Diosmädia'agy hajxy piadu'ubógät. Coö hajxy jaduñ yhojjäya'ayhädät, jaduñ hajxy yajcähxó'øgät coo yhaxøøgcuhdujt hajxy tøø jiaanç najtshixó'øy. Jimhøchä Diosmädia'agy nyajwa'xtsohñ Damasco. Mänitøch jim njaac yajwa'xy Jerusalén, møød jim Judeanaaxooty wiinduhmyhagajpt. Mänitøchä jäya'ayhajxy njaac yajñähixøøyy, ja'a hajxy ca'a judíospä.

21 Coöchä jäya'ayhajxy jaduñ nyajñähixøøyy, ja'a hajxy ca'a judíospä, páadyhøchä judíoshajxy näje'e jim xjia majch møjtsajtøgooty, jim Jerusalén. Coöch hajxy jaduñ xmiajch, mänitøch hajxy xjia yagho'ogaañ.

22-23 Pero Dióshøch xpíuhbejp. Tehngájnochä Diosmädia'agy nyajwa'xy høxtä jäda'anäbaady, ja'a Jesúscøxpä. Nägøxiøchä jäya'ayhajxy jaduñ nyajñähixó'øy, møjtojc, häyoobädøjc. Jadúñhøch nnä'ägä mädia'agyhaty neby jim cujaay myiñän nocyjiooty, ja'a profetadøjc-hajxy jecy yhädiuunäbä, ja'a Moisés jecy yhädiuunäbä. Jaduñ hajxy jecy quiujahy coogä Dios ja'a wyiinguexypä hänajty quiexa'añ, ja'a xøhajpä Cristo. Jaduñ hajxy jecy quiujahbiä coogä Cristo hänajty yho'oga'añ. Jaayá'ayäc hänajty jayøjp juyypigaaamb. Jadúñägä jäya'ayhajxy hänajty yajñähwa'adsa'añii, møødä judíoshajxy, møødä wiingjäya'ayhajxy. Hoorä, coo ja'a Jesús yaa yhooyy hädaa yaabä naaxwiin, Dios jaduñ wiinguejx. Jaduñ tiøjiajty nebiä profetadøjc-hajxy jecy quiujahyyän, nebiä Moisés jecy quiujahyyän —nømä Pablo ñijiogapxä.

24 Mänitä Festo yaaxy:

—Pablo, tøø miich jaduñ mguhhiñ. Coö hanaxiä tøø mgapxta'agy, je'e tøø xyajcuhhiñ.

25 Mänitä Pablo yhadsooyy:

—Wiindsón Festo, cáboch nguhiñ. Ja'a tøyhajt, je'eçh nmädiaacy. Homiäbójnoch jaduñ nmädia'agy.

26 Mänitä Pablo ja'a Agripa ñämaayy:

—Wiindsón Agripa, cóxiøch cham nmädia'agy maa miich mwiinduumän. Nmøødhøchä tøyhajt jaduñ coo miich jaduñ mgøxy najuøøbiä nebiátyhøch cham nmädia'agy. Hijxwiinduum jaduñ tøø jiadyyi tøø tiuñii, ca'a yhayu'uch ca'a yhamee'chä.

27 Wiindsón Agripa, nnajuøøbiøch jaduñ coo miichä mädia'agy mmäbøcy, ja'a profetadøjc-hajxy jecy yhädiuunäbä.

28 Mänitä Agripa yhadsooyy:

—Ja weenjátyhøch miich xquia'a yajniñähdujcä coöch jaduñ nmäbógät ja'a Jesúscøxpä.

29 Mänitä Pablo miänaañ:

—Hoy jia weenjaty hoy jia møjaty hajxy mga'a mäbøcyñä, chojpiä Dios ja'a jioot jaduñ coo ja'a miädia'agy hajxy nägøxiä mmäbójcät ja'a Jesúscøxpä nébiøch nmäbøquiän, mäduhñtiä hajxy yaa mhamädoowhity, møød miich Wiindsón Agripa. Pero cáboch jaduñ nmäna'añ coo hajxy tsumy mhídät nébiøch høøchän.

30 Mänitä Agripahajxy tiänaayyø'cy, møødä Festo, møødä Berenice, møødä jäya'ayhajxy nägøxiä.

³¹ Mänitä hajxy tiøjpädsøømy. Mänitä Agripahajxy hawiing ñiñämaayyä møødä Festohajxy:

—Caj yø'ø craa tii cädieey miøødä. Cab jadhun yhähixø'øy coo tsumy jiaac hídät ni coo yagho'ogøøjät.

³² Mänitä Agripa ja'a Festo ñämaayy:

—Coo yø'ø craa häxøpy tøø quia'a mäna'añ coo jim nøcxy yajtøyhajtyega'añii Roma maa ja'a gobiernä wyiinduumän, tøø häxøpy yhäxmaçhii.

27

¹ Mänitä Festo wyiinmahñdyhajty coo ja'a Pablohajxy jim quiexøøjät Italia barcojooty møød jiamioødhajxy, ja'a hajxy hänajty tsumybiä. Mänitä Julio ja'a tsumyhäna'c yajcø'ødägøøyyä. Capitán ja'a Julio hänajty tiuumby maa ja'a Augusto biatallóngän. Høøch Lucas, høøchä Pablo hänajty nbanøcxaamby.

² Mänit højts hoy nbarcotägø'øy. Jimä barco hänajty tøø chohnda'agy maa ja'a cajpt hänajty xiøhatiän Adramitio. Tänaayyaambiä barco hänajty ñøcxa'añ majatiä cajpt hänajty miejypia'ajän jim Asianaaxooty. Jimä jäya'ay hänajty tu'ug piadsoonä. Aristarco hänajty xiøhaty. Jim hänajty quiunaaxä Tesalónica, jim Macedonia-naaxooty. Mänit højts ndu'ubøjnä barcojooty.

³ Cujaboom højts nmejch maa ja'a cajpt hänajty xiøhatiän Sidón. Jaançh tehñ yhojiootä Julio hänajty miøød ja'a Pablocøxpä. Paadiä Julio ja'a Pablo cuhdujt miooyy coo ja'a Pablo ja'a miägu'ughajpä nøcxy quiuhixy cajptooty, weenä Pablo jadhun piuhbedyii.

⁴ Mänit højts jim jadähooc ndu'ubøjcumbä Sidón barcojooty. Møc højts hänajty xjiøjcubojoø'øy. Paady højts Chiprenaaxooty hahooyhaamby nwiinnajxy maa hänajty møc quia'a jaty pojjiän.

⁵ Mänit højts jim nnaxøøyy Cilicia-naaxooty møød Panfilia-naaxooty. Mänit højts jim nmejch maa ja'a cajpt hänajty xiøhatiän Mira, jim Licea-naaxooty.

⁶ Jimä Julio wiingbarco hoy piaady, ja'a hänajty nøcxaambä Italia. Alejandría ja'a barco hänajty tøø chohnda'agy. Mänit højts barcojooty hoy ndägøødiägach. Mänit højts ndägøøyy tu'uyohbiä jadähooc.

⁷ Je'enä højts hänajty møc xjiøjcubojoø'øy, paady højts hänajty hodiägaamby ndu'uyo'oy. Mädaaxxøø mägoøxxøø højts hänajty tøø njaac nøcxy coo højts jim nmejch mäwiingón maa ja'a cajpt hänajty xiøhatiän Gnido. Hobiänejpiä højts jim nmejch. Cab højts hänajty hoy ndu'uyo'oyaannä. Je'enä højts hänajty møc xjiøjcubojoø'øy. Mänit højts wiingtuum nnøcxøøyy maa ja'a naax hänajty xiøhatiän Creta. Coo højts jim nnaxøøyy mäwiingón maa hänajty xiøhatiän Cabo Salmón, mänit højts Creta hanajtyhaamby nnøcxøøyy maa hänajty møc quia'a jaty pojjiän.

⁸ Hamäjaa højts jim nmejypia'ayohy. Mänit højts jim nmejch maa ja'a cajpt hänajty xiøhatiän Buenos Puertos, jim mäwiingón maa ja'a cajpt hänajty xiøhatiän Lasea.

⁹ Maxiøø højts jim nhijty. Tøø højts hänajty hanaxiä nhøxhaamø'øy. Mäjahñ ja'a tu'uyo'oyiibä hänajty tøø jiajnä je'eguiøxpä coo tøøchpoj hänajty tøø piädsøømnä. Mänitä Pablo miänaañ:

¹⁰ —Wiindsøndøjc, mäjahñdiägøøbiøchä tu'uyo'oyiibä jadhun nhixnä coo tøøchpoj tøø piädsøømnä. Wehñdä barco jadhun miá'adät møødä tsømydiajy cøxiä. Wehñdä højts jadhun nhó'cämät.

¹¹ Pero cabä Julio ja'a Pablo ja'a miädia'agy ñä'ä yajtuunä. Jue'e ja'a miädia'agyhajxy yajtuunäxä, ja'a barcoyayohbiä møødä cubarco. Jadhun hajxy hänajty tøø miäna'añ cooc tyijy hänajty quia'a mäjahñä.

¹² Cab hänajty yhähixø'øy coo højts tøøchpoj jim nyajnáxät Buenos Puertos. Mänit hajxy nämay miänaañ coo højts jadähooc ndu'ubøjcumbät barcojooty. Jim hajxy hänajty ñaxa'añ maa ja'a cajpt hänajty xiøhatiän Fenice. Creta-naaxooty hänajty je'e mejypia'a.

Cab hänajty jim̄ jiaty mäjahñä je'eguiøxpä coo jim̄ møc quia'a pojy. Paadiä tøøchpoj hajxy hänajty jim̄ yajnaxa'añ.

13 Mänitä jøømboj yuung piädsøømy. Mänit hajxy miänaañ cooc hajxy hoy jiaac tu'uyo'oya'añ barcojooty. Mänit højts njaanč tu'ubøjcumbä. Jim̄ højts njaac mejypia'ayohy Creta.

14 Weeñtiä højts hänajty tøø njaac tu'uyo'oy, mänitä tsuxpoj møc piädsøømy.

15 Møc højts hänajty xjiøjcubojø'oy. Coo ja'a barcoyajyohbiä jaduhñ yhijsy coo hänajty quia'a mäjäda'aga'añ, mänit hajxy ñiñämaayyä coo ja'a barco ween piabojy.

16 Mänit højts jim̄ nmejch maa ja'a naax mejyquiujc chuucpä, ja'a hänajty xøhjäpä Cauda. Mänit højts jim̄ nnaxøøyy hanajtyhaamby maa hänajty møc quia'a pojjiän. Jim̄ højtsä barcohuung hänajty nbawich. Hobiänejpiä højtsä barcohuung jiiby nyuugjädujty møjbarcojooty.

17 Coo hajxy yajwiimbejty, mänitä barco hajxy yagjuhmäguiwädijsy laansähaam, jaduhñä barco quia'a má'adät. Coo ja'a mejy hänajty jim̄ quia'a jaty hagamä, paadiä barcoyajyohbiähajxy hänajty chähgø'oy coo ja'a barco jiiby jié'xät tsäbiu'ujooty nøøba'c. Mänitä wit pojyohbiä hajxy yajmänajcy, ja'a barco hänajty quiuhdøyhajpiä. Mänit hajxy miänaañ coo ja'a barco ween jaduhyyä piabojy.

18 Cujaboom, je'enä hänajty møc piojy. Møcä barco hänajty miøjpojpedyii. Ja'a tsømydiajy ja'a barco hänajty yajnøcxypä, mänit hajxy ñøøjuip ñøøpøgøøyy mejjiooty.

19 Cujaboom højtsä tuumbejt njaac nøøjuip njaac nøøpøgøøyy, møødä wit pojyohbiä, ja'a barco hänajty quiuhdøyhajpiä, møødä wittøøbiejt.

20 Maxiøø højts jaduhñ nmänajxy nyajnajxy. Tehñgajnä hänajty møc piojy. Jaanč tehñ wyiimbøcy hänajty. Cabä xøø cabä madsa'a hänajty quiähxø'ogy ni weeñtiä. Cab højts hänajty nnajuø'oy maa højtsä poj hänajty xchømnøcxy. Jaanč tehñ chähgøøby højts hänajty coo højts nhø'ogät.

21 Tøø højts hänajty maxiøø nhity jaguiay. Mänitä Pablo tiänaayyø'cy jäya'ayhagujc. Mänit miänaañ:

—Wiindsøndøjc, coöchä nmädia'agy hajxy häxøpy tøø xyajtuunä, cab hajxy häxøpy jim̄ tøø mdsoñ Creta, y cabä tsø'ty cabä häyohn hajxy häxøpy tøø nbäatäm.

22 Pero, ca'a hajxy mdsähgø'oy. Caj pøn yho'oga'añ, hoyyä barco cu jia ma'ad.

23 Hix, haamyquiøodshøchä Diosmoonsä tu'ug nwiinhijxy. Jim̄ choon Dioswiinduum. Nwiingudsähgøøbiøchä Dios. Je'eč jaduhñ xwyiinguejx.

24 Mänithøchä Diosmoonsä xñämaayy: “Pablo, ca'a mdsähgø'oy. Tsipcøxp yhahixø'oy coo miich jim̄ mmédsät Roma maa ja'a gobiernä wyiinduumän. Miihcøxpä ja'a Dios tøø miäna'añ cooc pøn quia'a ho'oga'añ mäduhñtiä hajxy jiiby mnøcxy barcojooty”, nõmhøchä Diosmoonsä xñämaayy.

25 Paady, ca'a hajxy mdsähgø'oy. Nmäbøjcäbøchä Dios ja'a miädia'agy jaduhñ cooc hajxy xyajnähwa'adsäänäm, nebiätyhøchä Diosmoonsä tøø xyajmøødmädia'agy.

26 Jim̄ mejyquiujc, jim̄ä naaxhuung tu'ug. Jim̄ højts nøcxy nmøjpojpedäänäm. Tøyhajt jaduhñ —nømä Pablo miänaañ.

27 Majmactsxøø højts hänajty tøø nbabojy barcojooty jim̄ maa ja'a mejy hänajty xiøhatiän Adriática. Cuptsuhñ hänajty jaduhñ, mänitä barcoyajyohbiähajxy ñajuøøyy coo højts hänajty naaxpa'a tøø nmäwiingonñ.

28 Mänitä nøø hajxy qyipyx mäduhñtiä quiøøcä. Jue'e hänajty quiøøcä, hii'xmajmøcxmetro. Coo hajxy weeñtiä jiaac nøcxy, mänit hajxy qyípxcumbä. Jue'e hänajty quiøøcä, hii'xjuxtujmetro.

29 Tsähgøøby hajxy hänajty coo ja'a barco tsaä nøøba'c miøjpohmbédät, paadiä pujxthajo'c hajxy mädaaxc ñøøjuipøøyy barcohøxhaam. Cuxodsø'oyä pujxthajo'c hänajty. Paady hajxy jaduhñ ñøøjuipøøyy coo ja'a barco jaduhñ jiiby wiohñmähmø'owøjät.

Jaančh tehñ jiootmayhajp hajxy hñajty. Jaduhñ hajxy hñajty miäna'añ coo paquiä cu jioobøøyy.

³⁰ Mänitä barcoyajyohbiä ja'a barcohuung hajxy quiuhdøøñajxy nøøjooty. Jaduhñ hajxy hñajty yajnänøma'añ cooc tyijy ja'a pujxthajo'c hñajty ñøøjuipø'øwa'añ barcojøbhaam. Ja wi'i piäyø'øgaambä barcoyajyohbiähajxy hñajty jaduhñ ja'a barcohuungooty.

³¹ Pero cabä Pablo yajwiinhøhñ. Mänitä Juliohajxy ñämaayyä møødä soldadohajxy:

—Coo yø'ø yajyohbiädøjc-hajxy häyaa piäyø'øgät, mhó'ogäp hajxy jaduhñ —nømä Pablo miänaañ.

³² Mänitä soldado ja'a barcohuung hajxy miäbuxøøyy. Mänitä barcohuung chømnøcxä nähgapjooty.

³³⁻³⁴ Jobø'øwaamb hñajty jaduhñ, mänitä Pablo jäya'ay ñämaayy:

—Joom, huuc wiingaañáxäts hajxy hii. Majmactsxøø hajxy tøø mhity jaguiay jamia'ay. Cab jaduhñ yhooyä coo hajxy jaguiay mjaac hídät, coo hajxy jaduhñ mnä'ä päma'ayø'øwät. Hix, cab hajxy nej mjada'añ.

³⁵ Coo ja'a Pablo jaduhñ quiapxpädøøyy, mänitä tsajcaagy quionø'cy. Mänitä Dios ñämaayy “Dioscujú'uyäp” jiamiøødwiinduum. Mänitä tsajcaagy yhaguidøøyy. Mänit tiägøøyy caabiä.

³⁶ Coo ja'a Pablo jaduhñ yhiyxä coo hñajty quiay, mänitä jiamiøødhajxy jiootcugøøyy. Mänit hajxy piädägøøbiä caabiä.

³⁷ Jue'e højts hñajty nhity barcojooty nämejtsmägo'xcudägøøghii'x cu majmocxtu'ug.

³⁸ Coo hajxy jaduhñ quiaabiädøøyy, mänitä trigo hajxy miejjwyipøøyy, jaduhñä barco ween pie'tiø'øy.

³⁹ Coo jioobøøyy, cabä barcoyajyohbiädøjc-hajxy hñajty yhajuø'øyii. Mänitä laguun hajxy yhiyxey mejypia'a. Pa'adsäbiu'u hñajty je'e. Mänit hajxy miänaañ coo ja'a barco hajxy jim yajnøcxät pu'uwiing, coo hajxy jim yajmøjyädsujtspédät.

⁴⁰ Mänitä pujxthajo'c hajxy miäbuxøøyy. Jiiby jaduhñ miähmøøyy mejjiooty. Mänitä barcoaa'pt hajxy yajyuungøøyy, jaduhñä barco hoy yó'oyät. Mänitä wit hajxy yujxojch barcojøbhaam, ja'a barco hñajty quiuhdøyhajpiä. Mänitä barco tiägøøyy yohbiä. Jim ñøcxøøyy pu'uwiing.

⁴¹ Mänitä barco jie'xy nøøba'c tsäbiu'ujooty maa nøø hñajty quia'a comän. Ja'a barcojøbhaam jaduhñ je'x. Mänitä barcohøxhaam tiägøøyyä møjcujpéjtäbä. Mänit tiägøøyy ma'pä tsaybiig.

⁴² Coo ja'a soldadohajxy jaduhñ yhiyxey coo ja'a barco hñajty mia'ada'añ, mänitä tsumyhäna'c-hajxy jia yagho'ogaañä, jaduhñ hajxy cu quia'a päyø'cy yáhwäp.

⁴³ Pero cabä Julio jaduhñ miänaañ coo ja'a tsumyhäna'c-hajxy yagho'ogóøjät. Paady jaduhñ miänaañ je'eguiøxpä coo ja'a Julio ja'a Pablo hñajty yajnähwa'adsa'añ. Mänitä Julio miänaañ coo hajxy ñøøga'awø'øwät, pønjaty yaaw hñajty jajp, jaduhñ hajxy ñøcxät tø'ødstuum yáhwäp.

⁴⁴ Pønjaty hñajty ca'a yaawjajp, wéenäc hajxy ñøcxy pu'uñähgøxp, møødä barcohadøjcøxp. Jaduhñ højts nägøxiä ndsoocy tø'ødstuum.

28

¹ Coo højts jaduhñ nägøxiä ndø'ødspädsøømy, mänit højts nmädooyy coo ja'a naax hñajty xiøhaty Malta.

² Mänit højtsä jäya'ay xñäxuu'ch, ja'a hajxy hñajty jim nä'ägä tsänaabiä. Tuub hñajty; tøøchc hñajty jaduhñ. Mänitä jøøn hajxy yajmøjjøøyy. Mänit højts xñämaayy coo højts njøømba'axámät.

³ Mänitä Pablo ja'axy tø'ødspä miämejch tu'tso'oy. Jiibiä Pablo ja'axy hänajty piäda'agy jøønhaajiooty. Mänitä hawa'andsahñdy tu'ug piädsøømy jøønhaajiooty. Mänitä Pablo quiø'ømäwødsøøyyä.

⁴ Coø ja'a jäya'ayhajxy jaduhñ yhiixy coø ja'a Pablo tsahñdy hänajty miøødä quiø'øgøxp, mänit hajxy ñiñämaayyä:

—Tøø yø'ø craada'a miäjäya'ay-yagho'ogy. Coø jaduhñ tøø quiädieey, paady jaduhñ tsipcøxp yho'oga'añ, hoy jaduhñ tøø jia tso'ogy mejjiooty.

⁵ Mänitä Pablo ja'a quiø'ø xiädiyty. Mänitä tsahñdy hoy quia'ay jøønhaajiooty. Cabä Pablo nej jiajty.

⁶ Nømä jäya'ayhajxy hänajty miäna'añ coog ja'a Pablo quiø'ø cu qyixta'ch, o cooc cu yho'cy. Pero coø hajxy yhiixy coø ja'a Pablo nej quia'a jajty, mänit hajxy miänaañnä cooc tyijy ja'a Pablo Dyiosä.

⁷ Jimä jäya'ay hänajty tu'ug chäna'ay mäwiingón maa højts hänajty njøømba'axamiän. Publio hänajty xiøhaty. Gobernador ja'a Publio hänajty jim tiuumby Malta. Coø højts jim nmejch maa ja'a tiøjcän, mänit højts jim xyajmejtstaacy tægøøgxøø.

⁸ Jimä Publio tieedy hänajty pia'amgo'na'ay. Tøoyyöp hänajty jaduhñ møødä nø'tiø'onøø hänajty miøødä. Mänitä Pablo jiiby tiøjtægøøyy maa ja'a Publio tieedy hänajty pia'amgo'na'ayän. Mänitä Pablo ja'a Dios pia'yaaxy. Mänitä Pablo ja'a pa'amjäya'ay ñähdoñ. Mänit pia'amyajnajxä.

⁹ Coø ja'a pa'amjäya'ayhajxy jaduhñ jim miädoyhajty Malta, mänit hajxy hoy yajmøcpøjcäbä nägøxiä.

¹⁰⁻¹¹ Mänit højts madiu'u xñä'ä mooyy cøxiä wiinä. Jimä barco hänajty tu'ug tiøøchpojnaxy. Jue'e ja'a barco hänajty xiøhaty: “Ja'a Hametsc-huang.” Alejandria ja'a barco hänajty tøø chohnda'agy. Coø højts hänajty jim tøø nhity Malta tægøøgpø'o, mänit højts nbejty barcojooty, ja'a hänajty xøhajpä: “Ja'a Ametsc-huang.” Mänit højtsä jäya'ay xjiaac mooyy tijaty højts hänajty nmänøcxaamby barcojooty. Ja'a jäya'ayhajxy hänajty tøø miøcpøquiäbä, je'e hajxy jaduhñ xmiooyy. Mänit højts jim ndu'ubøjnä Malta.

¹² Mänit højts nmejch maa ja'a cajpt hänajty xiøhatiän Siracusa. Jim højts njaac hijty tægøøgxøø.

¹³ Coø højts jim ndu'ubøjcumbä, mänit højts njaac mejypia'ayohy. Mänit højts jim nmejch maa ja'a cajpt hänajty xiøhatiän Regio. Cujaboomä jøømboj piädsøømy. Mänit højts jadähooc ndu'ubøjcumbä. Cumaaxc højts jim nmejch maa ja'a cajpt hänajty xiøhatiän Puteoli. Jim højtsä barco nnähmänajtuutnä.

¹⁴ Mänit højtsä jäya'ay näje'e nbaaty. Ja'a Diosmädia'agy hajxy hänajty miäbøjpy. Mänit højts xñämaayy coø højts jim nmejtstá'agät maa ja'a tiøjc-hajxiän. Juxtujxøø højts jim nhijty. Mänit højts jim ndu'ubøjcy tecy-yo'oyhaam. Jaduhñ højts hänajty jim njaac nøcxa'añ Roma.

¹⁵ Mänitä mäbøjpädøjc-hajxy Rómabä miädoyhajty coø højts hänajty jim nnøcxy Roma. Mänit højts näje'e hoy xjiøjcubaadø'oy jim maa hänajty xiøhatiän Foro de Apio. Näje'e højts hoy xjiøjcubadøøbiä maa hänajty xiøhatiän Tres Tabernas. Coø ja'a Pablo jaduhñ yhiixy, mänitä Dioscujú'uyäp yejcy. Mänit jiootcugøøyy.

¹⁶ Coø højts jim ngoo'nä Roma, mänitä Pablo cuhdujt miooyyä coø ja'a yhamdsoo tøjc yhøxtá'awät maa jaduhñ yhidät. Mänitä soldado tu'ug yajcø'øwaanøøyyä coø ja'a Pablo cwieendähadøøjät, coø ja'a Pablo jaduhñ ñä'ä päyø'øgät. Mänitä tsumyhäna'c-hajxy jiaac yajcø'ødägøøyyäbä ja'a soldado-wiindsøn, ja'a copc-hajpä.

¹⁷ Cudägøøgxøø ja'a Pablo ja'a judíos yajmøjyaaxä, ja'a hajxy hänajty møjhajpä maa ja'a chajtøjc-hajxiän. Coø hajxy hänajty tøø yhamugø'oy, mänit hajxy ñämaayyä:

—Mägu'ughajpädøjc, mänájøch jim nhitiän Jerusalén, jimhøch häna'c näje'e xmiajch, hóyhøch hänajty tøø nga'a jagä cädieey, hóyhøchä cuhdujt hänajty pedyii tøø nja cudiuñ nebiä nhaphajtämä ndeedyhajtämhajxy jecy yajtsohndaquian. Ja'a

nmägunaaxhajtämhajxy jaduhñ xmiajts. Mänitøch hajxy xquiø'øyejcy maa ja'a soldadohajxiän, ja'a hajxy yaa tsohm̄bä Roma.

¹⁸ Coochä soldadoshajxy hänajty tøø xyajtøyhajtyecy, mänit hajxy jaduhñ ñajuøøyy cooch hänajty tøø nga'a cádieey. Mänit hajxy jia mänaañ cooch hajxy jaduhñ xyhøxmádsät.

¹⁹ Pero cabä judíoshajxy jaduhñ miänaambä cooch nyaghøxmádsät. Mänitøch nwiinmahñdyhajty coo jaduhñ yhahixø'øy cooch yaa ndøyhajtyégät Roma maa ja'a gobiernä wyiinduumän. Pero cáboch hänajty nmäna'añ coochä nmägunaaxhajxy nnäxø'øwó'øwät.

²⁰ Hoorä, cooch jaduhñ tøø njaty tøø nhabety, páadyhøch mijts jaduhñ nmøødmädia'aga'añ. Páadyhøch cham̄ ndsumyhaña'ay coo højts judíos nmäbøjcäm coo ja'a ho'ogyjiäya'ayhajxy jiuypio'ga'añ —nømä Pablo miänaañ.

²¹ Mänitä judíos ja'a Pablo hajxy ñämaayy:

—Cab højts tii capxy tii mädia'agy tøø nmädoyhaty maa miüchcøxpän. Caj miüch pøn waamb tøø xñänømy, ja'a hajxy jim̄ tsohm̄bä Judea.

²² Jaduhñ højts tøø nmädoyhaty coo jäya'ayhajxy wiinduhmyhagajpt miädsiphadyii, ja'a hajxy jaduhñ mäbøjpä coo ja'a Jesús Dyiosquexiä. Paady højts nhamädoowhida'añ nej miüch mwiinmayyän —nømä judíoshajxy miänaañ.

²³ Mänitä judíos ja'a Pablo hajxy miøødcojyquiapxytiuuñ mänaa hajxy jadähooc ñócxät maa ja'a Pablo hänajty yhitiän. Coo yhabaaty, mänitä jäya'ayä Pablo hajxy nämay jiaançh nämejch. Tu'xøø ja'a Pablo jäya'ayä Diosmädia'agy yajwiingapxøøyy ja'a Jesúscøxpä, coo ja'a Dios ja'a Jesús hänajty tøø quiexy, nebiä Moisés jecy quiujahyyän, nebiä profetadøjc-hajxy jecy quiujahyyän. Jia wi'i yajniñähdugáañäbä Pablo ja'a jäya'ay hänajty coo hänajty tøyhajt miädia'agy ja'a Jesúscøxpä.

²⁴ Näje'e hajxy miäbøjcy nebiatiä Pablo hänajty tøø miädia'aguiän. Näje'e hajxy quia'a mäbøjcy.

²⁵ Mänitä mädia'agy hajxy tiägøøyy yajcapxiøøbiä nebiä Pablo hänajty tøø miädia'aguiän. Coo ja'a miädia'agy hajxy quia'a yajnibiaatä, mänit hajxy tiägøøyy wiimbijpä. Mänitä Pablo miänaañ:

—Jéquiänä Dioshespíritu ja'a profeta Isaías miägapxy. Mänit højtsä nhaphajtämä ndeedyhajtämhajxy miägapxtägajtsä:

²⁶ Nøcx yø'ø jäya'ay näma'aw:

Hoy hajxy mja madowa'añ, cab hajxy mwiinjuø'øwa'añ.

Hoy hajxy mja hixa'añ, cab hajxy mmäbøga'añ.

²⁷ Tøø hajxy mguhxexy. Jaduhñ hajxy mnibiäda'agyii nebiä wiindspän nebiä cuhnatpän.

Coo hajxy häxøpy tøø mga'a cuhxexy, cu mwiinjuøøyy hajxy.

Jaduhñä mhaxøøgwiinmahñdy hajxy cu mnajtshixøøyy.

Jaduhñ hajxy cu nyajñähwaach,

nømä Dioshespíritu jecy miänaañ. Tøyhajt jaduhñ miänaañ.

²⁸ Mänitä Pablo jaduhñ jiaac mänaañ:

—Huuc madow hajxy, ja'a jäya'ayhajxy ca'a judíospä, yajwiingapxø'øwáañäbä Diosmädia'agy hajxy je'e coo hajxy yajñähwa'adsáañäbä. Je'e hajxy mäbøcypä mäbøgaamb.

²⁹ Coo ja'a Pablo jaduhñ quiapxpädøøyy, mänitä judíoshajxy quiøxy wiimbijnä.

³⁰ Mejtsjomøjtä Pablo jim̄ jiaag hijty maa ja'a tøjc hänajty yhajoodiuquiän. Pønjaty hänajty jim̄ mejtsp tøghayohbiä, mioobiä Pablo häñaabiejt hänajty.

³¹ Hagujc jootcujcä Pablo ja'a Diosmädia'agy hänajty yajwiingapxø'øy ja'a Jesúscøxpä coo ja'a Dios ja'a Jesús hänajty yaa tøø quiexy hädaa yaabä naaxwiin. Cabä Pablo hänajty yhagapxtugyii ni pøn.

Romanos

¹ Høøch hädaa nocy njahby, høøch Pablohajpä. Høøchä Jesucristo xyajtuumb nebiä moonsän. Hamuumdu'jóothøchä miädia'agy jaduhñ nyajtuunä. Dióshøch jaduhñ xpiädaac cooçh ndúnät apóstol. Cooçh jaduhñ nduñ apóstol, je'eduhñ ñänøømby cooçhä Dios xwyiinguejxy cooçhä miädia'agy nmäwädíjtät ja'a yHuungcøxpä, coo hajxy yaa hoy xñähho'túutäm.

² Jéquiänä Dios jaduhñ miänaañ cooc ja'a yHuung hänajty yaa quiexa'añ hädaa yaabä naaxwiin. Jim jaduhñ myiñ cujaay maa ja'a Diosmädia'aguiän. Ja'a jäya'ayä Diosmädia'agy hajxy jecy yajwá'xäbä, jaaya'ayhajxy jaduhñ jecy cujahy.

³ Ja'a Jesucristo ja'a Dios jaduhñ yHuunghajpy, ja'a hajxy nWiindsønähjtämbä. Jäya'ayhajt je'e hädaa yaabä naaxwiin neby højtshájtäm. Ja'a rey David yhap yhoc hänajty je'e.

⁴ Y coo ja'a Jesucristo yho'cy, mänit jiuypiojtägajch ja'a yHespírituhaam. Coo jaduhñ jiuypiojtägajch, jaduhñ yajnajuø'oy coo je'e ja'a Dios yHuunghadyii, coo møcmäjäa jiaanç tehñ miøødä, coo ja'a Dioshespíritu jiaanç tehñ miøødä.

⁵ Coo ja'a Jesucristo hajxy xñähho'túutäm, coo jiuypiojtägajch, páadyhøchä Dios tøø xquiexy wiinduhmyhagajpt mädia'agy-yajwa'xpä ja'a Jesucristocøxpä, weenä jäya'ayä Diosmädia'agy hajxy miäbøcy, ween hajxy hoy yajtuñ, weenä Jesucristo hajxy jaduhñ wyiingudsähgø'oy. Cooçhä Dios jaduhñ tøø xquiexy, yajcähxø'py je'eduhñ cooçh jaduhñ xquiumay.

⁶ Møød mijtsä Dios xyajnähdijpä coo ja'a Jesucristo miädia'agy hajxy mbanøcxäbät, mijts jim hijpä maa ja'a cajpt jaduhñ xiøhatiän Roma.

⁷ Mijts hädaa nocy nyajnajaayøøby, pønjatiä Dios yaghijpy quiø'øjooty jim Roma. Jaaya'ay mijts jaduhñ xyajnähdij coo ja'a miädia'agy hajxy mmäbøjcät. Xjiaanç tehñ chojp mijts jaaya'ay jaduhñ. Ween mijtsä hoyhajtä weenhajt xmio'oy møødä yHuung Jesucristo, ja'a hajxy nWiindsønähjtämbä. Ja'a Dios hajxy nDeedyhajtäm.

⁸ Jayøjphøchä Dios Dioscujú'uyäp nmo'oy. Coo ja'a Dioscujú'uyäp hajxy jaduhñ nyéjcäm, mänitä Jesucristo hajxy jaduhñ xñähgapxtúutäm. Wiinduhmyhagajptä mädia'agy wiädity cooc mijtsä Diosmädia'agy hoy mjaanç tehñ miäbøcy nägøxiä. Páadyhøchä Dioscujú'uyäp nyecy.

⁹ Najuøøbiä Dios cooçh tøy nmädia'agy cooçh nmäna'añ coo mijts homiänaajä njahmiech cooçhä Dios naxy nba'ya'axy. Hamuumdu'jóothøchä Dios nmøødtuñ cooçhä miädia'agy nyajwa'xä ja'a yHuungcøxpä.

¹⁰ Mayhøoc-høch jim tøø nja nøcxa'añ maa mijtsän. Jadúhñhøchä Dios nja wi'i ñäma'ay cooçh jim xyajnøcxät. Wehndä jaduhñ miänáannät.

¹¹ Páadyhøch jim nja wi'i ñøcxa'añ maa mijtsän, jaduhñ mijts hoy nbuhbédät ja'a Dioshespíritucøxpä, jaduhñä Diosmädia'agy hajxy maas hoy mmäbøgät.

¹² Coo ja'a Diosmädia'agy hajxy näguipxy nmäbøjcäm, páadyhøch jim nja wi'i ñøcxa'añ maa mijtsän, jaduhñ hajxy hoy hamiñ haxøpy nnijiootcapxmøpcøjcämät.

¹³ Mägu'ughajpädøjc, jadúhñhøch nja wi'i miäna'añ cooçh jim nja wi'i ñøcxa'añ maa mijtsän, cábøch jaduhñ nnä'ä yajnäbaadø'oy. Páadyhøch jim nja wi'i ñøcxa'añ, chójpiøchä njoot jaduhñ coo hajxy mjaac mayø'øwät maa ja'a Diosmädia'agy hajxy mmäbøquiän, nebiä mäbøjpädøjc-hajxy tøø miayø'øyän wiingtuumjaty, majátyhøchä Diosmädia'agy tøø nyajwa'xiän.

¹⁴ Jadúhñhøchä Dios xwyiinguejxy cooçhä miädia'agy nyajwá'xät ja'a yHuungcøxpä wiinduhmyhagajpt majatiä jäya'ayhajxy griegohaam miädia'aguiän, møød majatiä jäya'ayhajxy griegohaam quia'a mädia'aguiän. Jadúhñhøch tøø xwyiinguejxpä cooçhä

jäya'ay jaduhñ nägøxiä nyajwiingapxø'owät, hoy hajxy jia høxpøquiä, hoy hajxy quia'a jagä høxpøquiä.

15 Páadyhøch jim nja wi'i ñøcxaambä Roma maa mijtsän, jimhøchä jäya'ayä Diosmädia'agy nyajwiingapxø'owaambä.

16 Hix, cábøchä Diosmädia'agy nmädsähdiuñ ja'a Jesucristocøxpä, je'eguiøxpä coo jäya'ayhajxy nägøxiä piäda'aga'añii hawa'adstuum ja'a Dios miäjaahaam, pønjetiä Diosmädia'agy mæbøjp ja'a Jesucristocøxpä. Højts judíos, højts ja'a Diosmädia'agy jayøjp nmädoodsøn. Høxhaamä jäya'ayhajxy jiaac mädooyy, ja'a hajxy ca'a judíospä.

17 Ja'a miädia'agyhaamä Dios hajxy xyajwiinjuøyyäm coo piäda'aga'añ hawa'adstuum pønjaty jaduhñ mæbøgaamb coo ja'a Dios yajtøjiada'añ waambaty tøø quiapxy tøø miädia'agy. Pøn jaduhñ ca'a mæbøgaamb, cab je'e piäda'aga'añii hawa'adstuum. Jaduhñ jim myiñ cujaay maa ja'a Diosmädia'aguiän: "Pønjaty jaduhñ mæbøgaamb coo ja'a Dios yajtøjiada'añ waambaty tøø quiapxy tøø miädia'agy, je'e ja'a Dios jaduhñ piäda'agaamby hawa'adstuum. Je'e jaduhñ nøcxaamb Dioswiinduum."

18 Hoy piønä jaduhñ ñajuø'øy coo ja'a Dios tsajpootypä yajcumädowna'añ pønjetiä Dios ca'a wiingudsähgøøby, møød pønjetiä jioot ca'a tsojp coo ja'a Dios wyiingudsähgø'owøøjät wiinghäna'c. Paadiä jioothajxy jaduhñ quia'a tsoy je'eguiøxpä coo hajxy haxøøg jiaac jatcø'owa'añ.

19 Cabä tøyhajtpä hajxy chocy, hoyyä Dios hajxy tøø jia yajwiinjuø'øyii nebiatiä Dios jaduhñ wyiinmahñdyhaty.

20 Jéquiänä Dios cøxiä yhädiuñ, møød yøø tsajt, møød hädaa yaabä naaxwiin, cøxiä. Coo hajxy jaduhñ nhíxäm tijaty ja'a Dios jaduhñ tøø yhädiuñ, paadiä tøyhajtpä hajxy nmøødhájtäm coo ja'a Dios møcmäjaa miøødä homiänaajä, møød coo cøxiä wiinä yhane'emy, hoyyä Dios hajxy nga'a jagä híxäm. Jaduhñä tøyhajtpä hajxy nmøødhájtäm coo ja'a Dios hajxy nwiingudsähgøøyyämät. Cab jaduhñ pøn hawiinmats miäná'anät cooc tyijy hajxy quia'a najuø'øy coo ja'a Dios jyijä.

21 Ja'a häna'c-hajxy jaduhñ haxøøg jatcøøbiä, cabä Dios hajxy wyiingudsähgø'øy, hoy hajxy jaduhñ jia najuø'øy coo ja'a Dios jyijä. Ni cabä Dios Dioscujú'uyäp hajxy mio'oy. Paadiä wyiinmahñdyhajxy quia'a tsoobaada'añ. Y paady hajxy tehngajnä wyiinmahñdyhada'añ haxøøg. Cabä howyiinmahñdy hajxy hoy miøødhadaannä.

22 Hoy hajxy jia nibiäda'agyii nebiä jaanč tehñ jiajpän, cab hajxy tii ñä'ägädä jaty.

23 Ja'a Dios, møj jaanč je'e. Hoy miänaajä yhity. Cab jaduhñ mänaa yho'ogy. Pero cabä haxøøghäna'cä Dios hajxy wyiingudsähgø'owa'añ. Jäya'ayhahädiuunnaxy hajxy wyiingudsähgøøby, hoyyä jäya'ayhajxy jia ho'ogy; møødä muuxyhahädiuunnaxy hajxy wyiingudsähgøøbiä, møødä tsahñdyhahädiuunnaxy, møødä animalhahädiuunnaxy ja'a hamädaaxtecypiä.

24 Paady, cabä Dios waamb miäna'anaannä, weenä jäya'ayhajxy haxøøg wyiinmahñdyhaty nebiä jioot hajxy choquiän, coo hajxy cøxypänejpiä ween ñidiuñii høchähdiuunnä,

25 je'eguiøxpä coo ja'a tøyhajtpä hajxy tøø quia'a mæbøcy ja'a Dioscøxpä. Ja'a høhñda'agymiädia'agy hajxy jaduhñ miäbøjpy. Cabä Dios hajxy wyiingudsähgø'øy. Jue'e hajxy wyiingudsähgøøby, tijatiä Dios yaa tøø quiunuu'xy hädaa yaabä naaxwiin. Pero, hahixøøby coo ja'a Dios hajxy nwiingudsähgøøyyämät homiänaajä. Tøyhajt jaduhñ.

26 Coo häna'cä Dios hajxy quia'a wiingudsähgø'owa'añ, paadiä Dios waamb quia'a mäna'ana'añ, ween hajxy høchähdiuunnä ñidiuunnä. Høxtä to'oxiøjpaadyhajxy jaduhñ jiatcø'øy. Cabä ñihyhap hajxy näje'e miøødtsäna'awaannä; quipxyjatiä to'oxiøjc-hajxy cøxypänejpiä ñidiuñii høchähdiuunnä.

27 Jaanä jaduhñä ya'adiøjc-hajxy näje'ebä, cabä tio'oxiøjc hajxy miøødtsäna'awaannä. Quipxyjatiä ya'adiøjc-hajxy ñimiøødtsäna'awa'añii. Høchähdiuunnä hajxy jaduhñ

ñidiuñii cøxypänejpiä. Coo hajxy jaduhñ jiatcø'øy, paady hajxy quia'a niyaghoyø'øyii maa ja'a ñi'xcøxp maa ja'a quiopcøxphajxiän, møød maa ja'a wiinmahñdycøxphajxiän.

²⁸ Coo ja'a haxøøghäna'cä Dios hajxy jaduhñ quia'a wiingudsähgø'øwa'añ, paady hajxy ñajtshixø'øyii ja'a Diósäm. Ja'a Dios, cab jaduhñ waamb miäna'anaañä, weenä yhaxøøgwiinmahñdy hajxy tiuñ, ween hajxy jaduhñ jiaac jiatcø'øy haxøøg.

²⁹ Madiu'u hajxy haxøøg jiatcø'øy cøxypänejpiä. Miøødtsänaabiä cuhhiñdo'oxiøjc hajxy. Møødä jäya'ajie'e hajxy yhadsocy. Cab hajxy hojiäwø'øy pø jimä miägu'ughajpähajxy cøxiä wiinä miøødä. Høxtä niyaghó'cäp hajxy. Nimiädsiphájtäp hajxy. Høhñdaacp hajxy. Niñähøønóøyyäp hajxy.

³⁰ Niwyiingapxpéjtäp hajxy. Møødä Dios hajxy miähañhaty. Nibiéjxäp hajxy. Yajcumayaamb hajxy. Hawiinjemybiä haxøøgwiinmahñdy hajxy yajcojpy. Cabä tiaj, cabä tieediä miädia'agy hajxy miäbøjcä.

³¹ Jaanč tehñ quiuhxex hajxy. Ni ja'a yhamdsoo mädia'agy hajxy quia'a cudiuna'añ. Cab hajxy pøn chocy miee'xy. Ni cab hajxy pøn miee'xa'añ. Cabä hojiot hajxy ñä'ägädä møødä.

³² Ñajuøøby hajxy jaduhñ coo ja'a Dios tøø yhane'emy coo hajxy haxøøgjaty quia'a jiatcø'øwät nébiøch naañä tøø nmädia'aguiän. Jaanä jaduhñ hajxy ñajuøøbiä, pøn jaduhñ haxøøg jiatcøøby, quiumädowaamb by hajxy je'e tehñgajnä. Pero nägø'ø nädecypiä hajxy jaduhñ jiatcø'øy, hoy hajxy jaduhñ jia najuø'øy. Høxtä xoonñdaacp hajxy jaduhñ coo wiinghäna'c-hajxy jaduhñ haxøøg pijaatcøøbiä.

2

¹⁻³ Nnajuøøyyäm hajxy jaduhñ coo jaduhñ yhahixø'øy coo ja'a Dios hajxy nägøxiä xyajcumädóowämät je'eguiøxpä coo hajxy nägøxiä haxøøg njatcøøyyäm. Cab jaduhñ yhahixø'øy coo højtsä jäya'ay nnänøømämät coo hajxy hoy quia'a hity, coo hajxy ween quiumädoy. Caj pues, haa ca'a, jaduhñ højts haxøøg nbajatcøøyyämbä. Hix, ni pøn jaduhñ hahixøøby quia'a mäná'anät cooc tyijy hoy tiehñ yhity. Paady jaduhñ yhahixø'øy coo ja'a Dios hajxy nägøxiä xyajcumädóowämät, je'eguiøxpä coo hajxy hoy nga'a hoy-hidáañäm.

⁴ Pero hojiotä Dios jiaanč tehñ miøød, paady hajxy xquia'a tsoj tsaächtiúuñäm. Chojiä jiot jaduhñ coo howyiinmahñdy hajxy nbadu'ubøjcänät, coo ja'a nhaxøøgwiinmahñdy hajxy nnajtshixøøyyänät.

⁵ Pero jii jäya'ayhajxy näje'e, jaanč tehñ xiexä quiopcä tiaatsc-hajxy. Cabä yhaxøøgwiinmahñdy hajxy ñajtshixø'øwa'añ. Y coo hajxy jaduhñ tehñgajnä quia'a mäbögät, mänit hajxy hñajty hanaxiä chaächpøga'añ coo yhabáadät coo ja'a Dios ja'a cahwiindøyhäna'c hñajty chaächtiuna'añ.

⁶⁻¹⁰ Pønä jiot nägø'ø nädecypiä tsojp coo hoy yhidät, pønä jiot pädaacp coo jim ñócxät Dioswiinduum, coo ja'a hoyhajtä weenhajt jim piáadät, coo jim quiumayøøjtät ja'a Diósäm, pues je'edsä Dios jim yajnøcxaamb by. Mio'owaambiä Dios je'e ja'a hoyhajtä weenhajt. Quiumayaambiä Dios jaduhñ. Yaghidaambiä Dios je'e jootcujc homiänaajä, hopiønä, hoy jia judíosä, hoy quia'a jagä judíosä. Pero hoyhoyyä Dios chaächtiuna'añ pøn haxøøg jiatcøøby, pønä Diosmädia'agy ca'a cudiunaamb, pøn ca'a yajmägapx ca'a yaghane'emaamb waambatiä Dios hajxy jaduhñ xjia hanéhmäm. Hopiønä jaduhñ chaächpøga'añ, pønjaty jaduhñ haxøøg jiatcøøby, hoy hajxy jia judiøspä, hoy hajxy quia'a jagä judiøspä.

¹¹ Hix, cabä Dios miøjpäda'agy pø mjudio miich, pø caj. Je'e yajcopcøøby pø mhoyhäna'c, pø caj.

¹²⁻¹⁵ Højts judiøshajpä, jequiän højtsä Dios xyhanehmy neby højts hoy nguhdujthädät. Mänitä Moisés ja'a mädia'agy jaduhñ quiujahy nebiaty højts hoy nguhdujthädät. Hoorä,

ja'a häna'c-hajxy ca'a judíospä, cabä mädia'agy hajxy miädooyä nebiä Moisés jecy quiujahyyän. Pero hoy hajxy quia'a jagä mädooyä, coo hajxy hamdsoojoot hoy quiudiúnät nebiä Dios jioot jia tsoquiän, cähxø'ögäp jaduhñ coo hajxy yhawáañäxä ja'a Diósäm ja'a wyiinmahñdyhaamhajxy. Jaduhñ hajxy hamdsoo ñajuø'øy pø hoy hajxy quiuidiuñ, pø caj. Jaduhñ hajxy yajtuungpaady néjjiäm hajxy häxøpy tøø miädoy ja'a mädia'agy ja'a Moisés jecy quiujahyyäbä. Y coo hajxy hoy quia'a cudiúnät neby hajxy ñajuø'øy ja'a wyiinmahñdyhaamhajxy, mänit hajxy quiumädowna'añ. Jaaná jaduhñ hõjtspä, hõjts judíospä, coo hõjts nga'a cudiúnät neby hõjtsä Dios jecy xyhanehmian, nebiä Moisés ja'a mädia'agy jecy quiujahyyän, jaduhñ hõjts ngumädownaambä. Hix, pøn jaduhñ cudiuumb nebiä Dios yhane'emiän, je'e ja'a Dios piäda'agaamby hawa'adstuum, hoyyä mädia'agy tøø quia'a jagä mädooy nebiä Moisés jecy quiujahyyän. Pero pøn jaduhñ ca'a cudiuumb, hoyyä mädia'agy tøø jia mädooy nebiä Moisés jecy quiujahyyän, cab je'eduhñ hawa'adstuum piäda'aga'añii ja'a Diósäm. Jaduhñds je'e, nägøxiä ja'a cahwiindøyhäna'c-hajxy quiumädowna'añ, hoy hajxy jia judíospä, hoy hajxy quia'a jagä judíospä.

¹⁶ Mänit hajxy jaduhñ quiumädowna'añ coo ja'a Dios ja'a Jesucristo hånajty yaa quiejxtägatsa'añ hädaa yaabä naaxwiin. Mänitä jäya'ayhajxy yhixa'añii ja'a Jesucristäm nebiaty hajxy hånajty yaa tøø jiatcø'øy. Mänit hajxy yagjahmiejtsta'aga'añii nebiaty hajxy hånajty tøø wyiinmahñdyhaty hamee'ch. Jaduhñä Diosmädia'agy miäna'añ ja'a Jesucristocøxpä, ja'açh nyajwa'xypä.

¹⁷ Hõjts judíoshajpä, naxy hõjts nniguiumayii coo hõjts njudíoshaty, coo hõjtsä mädia'agy nmäbøcy ja'a Moisés jecy quiujahyyäbä. Jaduhñ hõjts nniguiumáayyäbä coo hõjtsä Dios tøyhajt xqui'u'ughaty, hõjtsyähajtiä, hõjts judíoshajpä.

¹⁸ Nñajuøøby hõjts jaduhñ nebiatiä Dios jioot chocy coo hõjts nhoyhäna'c-hädät. Y ja'a mädia'agy ja'a Moisés jecy quiujahyyäbä, je'e hõjts jaduhñ xyhawáañäp neby hõjts nwiimbíwät tii hoy tii mäbaad.

¹⁹⁻²⁰ Niyhajuøøyyäp hõjts coo hõjts häna'c hoy nyajnahixø'øwa'añ, ja'a häna'cä Diosmädia'agy hajxy ca'a jappä ca'a najuøøbiä. Jim hõjtsä tøyhajt nbaady maa ja'a mädia'aguiän, ja'a Moisés jecy quiujahyyäbä.

²¹ Hoorä, coo hõjts häna'c jaduhñ nyajnahixø'øy ja'a Diosmädia'agy, hahixøøby jaduhñ coo hõjtsä Diosmädia'agy hoy ngudiúnät. Cábøchä nmägunaaxhajxy näje'e hoy quiuidiuñ. Y coo hõjts häna'c nmägapxy nhane'emy coo hajxy quia'a méedsät, hahixøøby jaduhñ coo hõjts nga'a méé'tspät. Jaduhñhøchä nmägunaaxhajxy näje'e jiatcø'øy.

²² Y coo hõjts häna'c nmägapxy nhane'emy coo wiinghäna'cä tio'oxiøjc hajxy quia'a møødtsänáayyät, cab jaduhñ yhahixø'øy coo hõjts jaduhñ njatcøøbiät. Jaduhñhøchä nmägunaaxhajxy näje'e jiatcø'øy. Cab hõjts quepychech naaxpoch nwiingudsähgø'øy. Pero cab jaduhñ yhahixø'øy coo hõjts xädø'øñ nméedsät tsajtøgooty maa ja'a quepychech naaxpoch yhitiän. Jaduhñhøchä nmägunaaxhajxy näje'e jiatcø'øy.

²³ Niguiumáayyäp hõjts jaduhñ coo hõjtsä mädia'agy nmäbøcy ja'a Moisés jecy quiujahyyäbä. Pero näje'eçhä nmägunaaxhajxy, cab hajxy hoy quiuidiuñ. Jaduhñ hajxy yajcähxø'øgy coo ja'a Dios hajxy tøyhajt quia'a wiingudsähgø'øy.

²⁴ Jaduhñ jim myiñ cujaay maa ja'a Diosmädia'aguiän: “mijts judíoshajpä, coo ja'a Diosmädia'agy hajxy hoy mga'a cudiuñ, paadiä Dios haxøøgjaty ñähojyii ja'a häna'c-hajxy ca'a judíospä.” Tøyhajt jaduhñ.

²⁵ Hõjts, judíos hõjts nmäminø'øy nmäga'awø'øy. Mänit hõjtsä Dios xquiuumáyät coo hõjtsä mädia'agy hoy ngudiúnät, ja'a Moisés jecy quiujahyyäbä. Pero coo hõjts jaduhñ hoy nga'a cudiúnät, cab hõjtsä Dios jaduhñ xquiuumaya'añ.

²⁶ Hoorä, ja'a häna'c-hajxy ca'a judíospä, coo hajxy hoy quiudiúnät nebiä Dios yhane'emiän, mänit hajxy quiuumaya'añii ja'a Diósäm.

²⁷ Näje'ečhä nmägunaaxhajxy, cab hajxy hoy quiudiuñ nebiä Dios yhane'emiän, hoy hajxy judíos jia mäminø'oy jia mäga'awø'oy, hoyyä mädia'agy hajxy jia mädooyä, ja'a Moisés jecy quiujáhyyäbä. Je'ehajxy mäbøcypiä ca'a cumayáañäp ja'a Diósäm.

²⁸ Pønjaty hoy cudiuumb nebiä Dios yhane'emiän, je'edsä Dios quiu'ughajpy, hoy hajxy judíos quia'a jagä mäminø'oy quia'a jagä mäga'awø'oy, hoyyä hijxtahnd hajxy quia'a jagä møødä maa ja'a ñi'xcøxphajxiän neby højts judíos nmøødän.

²⁹ Hix, coo pøn hoy quiudiünät hamuumdu'joot nebiä Dios choquiän, mänit hajxy quiu'ughada'añii ja'a Diósäm, hoyyä judíoshajxy näje'e quia'a ja mäna'añ cooc tyijy hajxy jaduhñ quia'a cu'ughadyii ja'a Diósäm. Hix, quiumaabiä Dios jaduhñ pøn jaduhñ cudiuumb hamuumdu'joot.

3

¹⁻² Xchoobáatäp højts jaduhñ madiu'u coo højts judíos nmäminø'oy nmäga'awø'oy, coo højtsä hijxtahnd nyajpäda'agy maa højts nni'xcøxpän, ja'a jaduhñ yajcähxø'pä coo højtsä Dios xquiu'ughaty. Tøyhajt jaduhñ. Haa ca'a, Dios højts nhap ndeedy jecy xyajcø'ødägøoyyä ja'a mädia'agy ja'a Moisés jecy quiujáhyyäbä. Mänit hajxy ñämaayyä ja'a Diósäm coog hajxy hänäjty quiu'ughada'añii.

³⁻⁴ Y je'enä højtsä Dios xquiu'ughatyñä neby højts jecy xyajwiinwaanøoyyän, hoy højts nhap ndeedy nämay hoy quia'a jagä cudiuuñ neby hajxy hänäjty tøø yhane'emyiijän ja'a Diósäm. Tøyhajt jaduhñ coo ja'a Dios tiømiädia'agy. Cabä Dios mänaa yhöhnda'agy, hoy hajxy nägøxiä cu nja mänáañäm cooc tyijy ja'a Dios quia'a yajtøjiaty waambaty hajxy tøø xyajwiinwaanøoyyäm. Jaduhñ jim myiñ cujaay maa ja'a Diosmädia'aguiän:

Diosteedy, hopiønä jaduhñ ñajuø'oy coo miich myajtøjiaty waambaty højts miich tøø xyajwiinwaanø'oy.

Coo miich pøn xñäxø'owø'owät cooc tyijy miich jaduhñ mga'a yajtøjiaty waambaty miich tøø mmädia'agy,

cähxø'ogaamb jaduhñ coo je'e yhöhnda'agy, ja'a miich jaduhñ xñäxø'owøøbiä.

⁵ Jaanč tehñ yhooyä Dios yhity. Pero højts, cab højts hoy nnä'ägä hjítäm. Tøyhajt jaduhñ. Paadiä, cähxø'p jaduhñ coo ja'a Dios jiaanč tehñ hoyyä. Hix, coo højts häxøpy nhjítäm hoy, cab jaduhñ häxøpy quiähxø'ogy coo ja'a Dios jaduhñ hoy jiaanč tehñ yhity. Pero jaduhñä jäya'ayhajxy näje'e miäna'añ cooc tyijy ja'a Dios howyiinmahñdy quia'a møødä, je'eguiøxpä coo hajxy xyajcumädowáañäm.

⁶ Pero hahixøøby jaduhñ coo ja'a Dios hajxy xyajcumädóowämät. Haa ca'a, coo ja'a Dios häxøpy hoy quia'a hity, cabä cuhdujt häxøpy miøødä coo hajxy jaduhñ xya-jcumädóowämät.

⁷ Hoyyä jäya'ayhajxy näje'e jia mäna'añ cooc tyijy ja'a Dios quia'a yajtøjiaty waambaty tøø quiapxy tøø miädia'agy, yajnajuøøby jaduhñ coo ja'a Dios tøyhajt mänaa quia'a höhnda'agy. Jaduhñä jäya'ayhajxy nägøxiä ñajuø'owa'añ coo jaduhñ yhähixø'oy coo ja'a Dios hajxy nwiingudsähgøoyyämät. Pero coo pønä Dios jaduhñ ñänómät cooc tyijy quia'a yajtøjiaty waambaty tøø quiapxy tøø miädia'agy, hahixøøby jaduhñ coo je'e quiumädóowät.

⁸ Näje'ečhä jäya'ayhajxy xñähøønø'oy cóogøch tyijy nmäna'añ cooc tyijy jaduhñ yhähixø'oy coo hajxy haxøøg njatcøoyyämät, jaduhñäc tyijy maas hoy quiähxø'oga'añ coo ja'a Dios jiaanč tehñ yhooyä. Ja'a hänä'c-høch hajxy jaduhñ xñähøønøøbiä, höhndaacp hajxy jaduhñ. Hahixøøby jaduhñ coo hajxy quiumädóowät.

⁹ Jaanä jaduhñ højts judíospä, cab højtsä Diosmädia'agy maas hoy ngudiuñ quejee ja'a häna'c-hajxy ca'a judíospä. Haa ca'a, tøøch nhuuc mänaambä coo hajxy jaduhñ hoy nga'a nä'ägä hojiäya'ayhajtäm, coo ni pønä Diosmädia'agy hoy quia'a nä'ägä cudiuñ, ni højts judíos, ni ja'a häna'c-hajxy ca'a judíospä. Hamdsoojoot hajxy jaduhñ hoy nga'a jäya'ayhajtäm.

¹⁰ Jaduhñ jim myiñ cujaay maa ja'a Diosmädia'aguiän:

Ni pøn hoy quia'a wädity.

¹¹ Ni pøn jaduhñ quia'a wiinjuø'owa'añ nebiä Dios wyiinmahñdyhatiän.

Ni pønä jioot quia'a päda'agy maa ja'a Diosän.

¹² Tøø ja'a jäya'ayä Diosmädia'agy hajxy nägøxiä ñajtshixøøñä.

Cøjnøø cøjtu'u hajxy tøø piadu'ubøjnä.

Haxøøg hajxy jiäya'ayhajnä nägøxiä.

¹³ Jaanç tehñ yhaxøøg hajxy quiapxy miädia'agy.

Jaduhñä yhaawhajxy tiocxuugy nebiä ho'oguiäya'ajiut tiocxuuguiän, ja'a tøø yhawá'açhäbä.

Jaanç tehñ yhöñdaacp hajxy. Jaduhñä haxøøgpä hajxy yaghity yhaawjooty nebiä haxøøgtsahñdyhaawän.

Jaanç tehñ miägäpøp hajxy.

¹⁴ Jaanç tehñ quiapxtägooby hajxy hoñejpiä nebiä jioot hajxy yajmädsøquiän. Jaanç tehñ yhaxøøg hajxy ñiñänømyii.

¹⁵ Jaanç tehñ piaquiä jootma'ad hajxy piaadyii, mänitä miäya'adiøjc hajxy nøcxy yagho'oga'añ.

¹⁶ Jaanç tehñ chipyajpæð'p hajxy majaty hajxy wiädity. Chaächtiumbiä cu'ug hajxy jaduhñ.

¹⁷ Jaanç tehñ chiptsojp hajxy.

¹⁸ Cab hajxy tiajy miay pø yajcumädwáanäbä Dios hajxy.

¹⁹ Jaduhñds je'e, yajcumädwáambiä Dios ja'a jäya'ay nägøxiä, pønä miädia'agy hoy ca'a cudiúunäp, møød højts judíos, møødä häna'c-hajxy ca'a judíospä. Højts judíos, højtsä pojpä nmaas møød, je'eguiøxpä coo højtsä Dios ja'a nhapä ndeedy jecy xjia hanehmä coo hajxy haxøøgaty quia'a jatcø'owät nébiøch naamñä tøø ngujaayän. Pero cab højts jaduhñ nnä'ägädä cudiuna'añ.

²⁰ Jéquiänä Dios ja'a Moisés yhanehmy coo ja'a miädia'agy quiujähyyäxät. Jaduhñ hajxy nnajuøøyyäm coo hajxy nägøxiä hoy nga'a jäya'ayhájätäm. Ni pøn jaduhñ hoy quia'a cudiuna'añ ja'a Diosmädia'agy. Coo ja'a Jesucristo hajxy tøø xñähho'túutäm, paadiä Dios hajxy xpiäda'agáanäm hawa'adstuum, caj jie'eguiøxpä cooc tyijy ja'a mädia'agy hajxy hoy ngudiúunäm, ja'a Moisés jecy quiujähyyäbä.

²¹⁻²⁶ Hoorä, nnajuøøyyäm hajxy jaduhñ coo hajxy nägøxiä haxøøg njatcøøyyäm, mäduhñtiä hajxy yaa ndsänáayäm hädaa yaabä naaxwiin, møød højts judíos, møødä häna'c-hajxy ca'a judíospä. Cabä Dios pøn ñä'ägädä cumay. Jaduhñä jäya'ayhajxy näje'e miäna'añ cooc tyijy hajxy piäda'aga'añii hawa'adstuum coogä jecymiädia'agy hajxy hoy quiudiúnät, ja'a Moisés jecy quiujähyyäbä. Pero tøø hajxy nhíxäm coo ni pøn jaduhñ quia'a päda'aga'añii hawa'adstuum. Hoorä, jéquiänä Dios wyiinmaayy coo ja'a yHuung hänajty yaa quixa'añ maa højtshájätäm. Mayhajtä Dios hänajty tiunaamby maa højtshájätäm. Jaduhñ hajxy hänajty xpiäda'agáanäm hawa'adstuum. Jim jaduhñ myiñ cujaay maa ja'a jecymiädia'aguiän, ja'a Moisés jecy quiujähyyäbä. Pero cabä jecyjiäya'ayhajxy hänajty wyiinjuø'oy. Hojiootä Dios miøød coo ja'a jecyjiäya'ayhajxy quia'a pädaacä haxøøgtuum, hoy hänajty jia hawiinmatsä coo hajxy jim cu piädaacä, je'eguiøxpä coo hajxy hänajty haxøøg jiatcø'oy. Paadiä Dios ja'a yHuung ñähdujcy, jaduhñä jäya'ayä piojpä quiädieey hajxy ñähwá'adsät. Jaduhñ quiähxø'ogy coo ja'a Jesucristo ja'a jecyjiäya'ay yajnähwaach ja'a piojpä quiädieeyhajxy. Høxtä jäda'anäbaadyñä ja'a Dios hajxy xyajwiinjuøøyyäm neby hajxy xpiädaacäm hawa'adstuum. Jaanä jaduhñ hajxy xyajwiinjuøøyyämbä coo hajxy piäda'aga'añii haxøøgtuum pønjaty haxøøg jatcøøby jäda'ahaty. Paadiä Dios ja'a yHuung ñähdujcy, ja'a Jesucristo, neby hajxy jaduhñ xñähho'túutämät. Y coo hajxy jaduhñ nmäbøjcämät coo ja'a Jesucristo hajxy tøø xjiaanç nähho'túutäm, jaduhñä Dios ja'a nbojpä ngädieey hajxy xyajnähwáatsäm, jaduhñ hajxy

xpiädáacäm hawa'adstuum, hopiønä, mөөд һөјts judíos, näguipxy mөөдä häna'c-hajxy ca'a judíospä. Mayhajtä Dios jaduhñ tiuun maa һөјtshájtäm coo hajxy jaduhñ xpiädáacäm hawa'adstuum.

²⁷⁻²⁸ Cab jaduhñ yhawiinmatsä coo hajxy hamdsoo nniguiumáayyämät. Hix, coo hajxy nmäbøjcämät coo ja'a Jesucristo hajxy tөө xñähho'túutäm, paadiä Dios hajxy xpiäda'agáanäm hawa'adstuum, hoy hajxy nga'a jagä panócxäm nebiä Moisés jecy quiujahyyän. Coo ja'a Dios hajxy häxøpy xpiädáacäm hawa'adstuum je'eguiøxpä coo ja'a jecymiädia'agy hajxy ngudiúunäm, ja'a Moisés jecy quiujahyyäbä, mänit hajxy mäbøcy cu nniguiumáayyäm hamdsoo. Pero caj pøn jaduhñ piäda'aga'añii hawa'adstuum hamdsoohaam.

²⁹⁻³⁰ Tu'uquiä Dios jaduhñ. Tu'cuhtuhtä Dios hajxy xyhíxäm nägøxiä, mөөд һөјts judíos, mөөдä häna'c-hajxy ca'a judíospä. Tøyhajt jaduhñ. Coo hajxy nägøxiä nmäbøjcämät coo ja'a Jesucristo hajxy tөө xñähho'túutäm, paadiä Dios hajxy jim xpiädáacämät hawa'adstuum nägøxiä.

³¹ Pero cábøch nmäna'ana'añ coo ja'a jecymiädia'agy quia'a tøyä, ja'a Moisés jecy quiujahyyäbä, hoy hajxy nja wiinjuøyyänä coo ja'a Jesucristo hajxy xpiädáacäm hawa'adstuum mänaa hajxy tөө xñähho'túutäm. Hix, maas hoy hajxy jaduhñ nwiinjuøyyänä coo ja'a jecymiädia'agy jaduhñ jiaanç tøyä, ja'a Moisés jecy quiujahyyäbä. Coo hajxy nmäbøjcäm coo ja'a Jesucristo hajxy tөө xñähho'túutäm, paady hajxy xpiädáacäm hawa'adstuum, caj jie'eguiøxpä cooc tyijy ja'a jecymiädia'agy hajxy jaduhñ hoy ngudiúunäm. Tөө hajxy jaduhñ nwiinjuøyyänä coo jaduhñ tiøyhajtä.

4

¹ Hөјts judíos, һөјtsä Abraham jecy nhaphajt ndeedyhajt.

² Hoyyä Abraham hijty jiäya'ayhaty jegyhajty. Hoorä, coo ja'a Dios ja'a Abraham häxøpy tөө piäda'agy hawa'adstuum je'eguiøxpä coo ja'a Abraham hoy jia jäya'ayhajty, mänitä Abraham cu ñiguiumaayyä.

³ Hix, paadiä Dios ja'a Abraham piädaacy hawa'adstuum, coo ja'a Abraham ja'a Dios miädia'agy miäbøjcä cooc ja'a Dios yajtøjaty waambaty tөө quiapxy tөө miädia'agy, ca'a jie'eguiøxpä coo ja'a Abraham hoy jiäya'ayhajty. Jaduhñ jim myiñ cujaay maa ja'a Diosmädia'aguiän.

⁴ Hoorä, ja'a cuduumädøjc, paady hajxy miäjuyii coo hajxy quiuduñ, cab jaduhñ ñä'a mayhajtä. Jaduhñ miäbaady nebiä jäya'ayhajxy näje'e wyiinmahñdyhatiän. Yajcumayaamb hajxy ja'a Diósäm, paady hajxy jia wi'i yhojiäya'ayhada'añ.

⁵ Pero pønjaty tөө miäbøcy coo ja'a Dios yajtøjaty waambaty tөө quiapxy tөө miädia'agy, je'edshajxy jaduhñ hawa'adstuum päda'agáanäp. Paady hajxy jim piäda'aga'añii coo hajxy jaduhñ miäbøcy, ca'a jie'eguiøxpä coo hajxy hoy jia jäya'ayhaty. Jim hajxy jaduhñ piäda'aga'añii, hoy hajxy häxøg tөө jia jatcø'øy. Tiuumbiä Dios mayhajt jaduhñ. Coo ja'a Dios hajxy häxøpy xpiädáacäm hawa'adstuum je'eguiøxpä cooc tyijy hajxy hoy njäya'ayhajtäm, cab hajxy häxøpy nmänaanäm cooc ja'a Dios mayhajt tiuñ.

⁶ Jaduhñä David jecy miänaañ cooc hajxy jootcuyc yhida'añ, pønjaty jaduhñ najuøøby coo ja'a Dios hajxy xpiädáacäm hawa'adstuum ja'a miayhajthaam, hoy hajxy hänajty häxøg tөө jia jatcø'øy. Hix, cabä Dios miøjpäda'agy pø cabä häna'c hänajty hoy tөө jiäya'ayhaty.

⁷⁻⁸ Coo jaduhñ yhabáatnät coo Dios ja'a jäya'ay yajtøyhajtyega'añ nebiaty hajxy hänajty tөө quiädieeyän,

mänit hajxy jootcuyc yhida'añ pønjatiä Dios piädaacy hawa'adstuum, pønjatiä Dios miee'xyp,

pønjatiä piojhajpiä ja'a quiädieeyhajpiä hajxy yajnähwáatsäxä, nömä David jecy miänaañ.

⁹ Jue'e ja'a David jecy ñänøøm cooc hajxy jootcuyc yhida'añ, pønhatiä Dios piädaacyy hawa'adstuum, hopiønä, mөөdä judíoshajxy, ja'a Dios quiu'ughajpiä, mөөdä cajpä judíoshajxy. Je'edshajxy ca'a cu'ughajtäp ja'a Dios. Hix, jaduhñ myiñ cujaay maa ja'a Diosmädia'aguiän: "Coo ja'a Abraham ja'a Dios miädia'agy miäbøjcä cooc ja'a Dios mänaa quia'a hõhnda'agy, paady piädaacä hawa'adstuum."

¹⁰ Hoorä, jaduhñä judíoshajxy quiuhdujthaty, yajcircuncidarhajpä ya'adiøjc-hajxy. Jaduhñ miädia'agytiägø'øy coo hijxtahnd hajxy piädäacäxä maa ja'a ñi'xcøxpajxiän. Hoorä ja'a Abraham, tøyymä hänajty je'e piädäacänä hawa'adstuum, cajnä hijxtahnd hänajty jaduhñ piädäacäxä maa ja'a ñi'xcøxpän. Jaduhñä tøyhajt hajxy nmөөdhajtäm coo häna'c-hajxy piäda'agyii hawa'adstuum je'eguiøxpä coo ja'a Dios miädia'agy hajxy miäbøjcä cooc ja'a Dios yajtøjiaty waambaty je'e tөө quiapxy tөө miädia'agy, hoyyä hijxtahnd hajxy quia'a jagä mөөdä maa ja'a ñi'xcøxpajxiän.

¹¹ Paadiä Abraham hijxtahnd jaduhñ piädäacäxä maa ja'a ñi'xcøxpän, jaduhñ yajna-juø'øy coo ja'a Abraham hänajty tөө piäda'agyii hawa'adstuum. Paady jim piädaacä coo ja'a Dios ja'a miädia'agy hänajty tөө miäbøjcäxä. Jaduhñä Abraham piädaactsohñä hawa'adstuum, hoyyä hijxtahnd hänajty jaduhñ quia'a jagä pädaacäxänä maa ja'a ñi'xcøxpän. Pønhaty jaduhñ mäbøjp nebiä Abraham jecy miäbøjquiän, jaanä jaduhñ hajxy yhixáanäbä ja'a Dios nebiä Dios ja'a Abraham jecy yhiixiän, hoy hajxy quia'a jagä judiøspä. Coo hajxy jaduhñ nmäbøjcäm nebiä Abraham jecy miäbøjquiän, jaduhñ quiähxø'øgy coo ja'a Abraham hajxy nhøjxhajtäm ndecyhajtäm.

¹² Højts judíoshajxy, højtsä Abraham jecy nhaphajt ndeedyhajt. Jaaya'ay jaduhñ pädaactsohñä hawa'adstuum je'eguiøxpä coo jaduhñ miäbøjcy coo ja'a Dios yajtøjiaty waambaty hänajty tөө quiapxy tөө miädia'agy. Tøyhajt jaduhñ. Højts judíos, jaduhñ højts nyajcircuncidarhaty nebiä Abraham jecy yajcircuncidarhajiän. Pero tøyymä Abraham ja'a Dios ja'a miädia'agy hänajty miäbøjcä, cahnä hänajty yajcircuncidarhaty. Højts judíos, højts jaduhñ mäbøjpä, jaanä jaduhñ højts nmäbøjpä nebiä Abraham jecy miäbøjquiän. Jaduhñä tøyhajt hajxy nmөөdhajtäm coo højtsä Abraham jecy nhøjxhajty ndecyhajty, coo højts jaduhñ nmäbøcy, højts judíos.

¹³ Jéquiänä Dios ja'a Abraham ñämaayy cooc hänajty yaa miähane'ema'añ hädaa yaabä naaxwiin näguipxy mөөdä yhap mөөdä yhoc. Ja'a Dios jaduhñ mänaañ. Paadiä Abraham jaduhñ ñämaayyä je'eguiøxpä coo ja'a Abraham ja'a Dios miädia'agy hajxy miäbøjcä, ca'a jie'eguiøxpä cooc tyijy ja'a Abraham jia cudiuun nebiaty hänajty tөө yhane'emyii. Pero coo ja'a Abraham jaduhñ miäbøjcy coo ja'a Dios yajtøjiaty waambaty hänajty tөө quiapxy tөө miädia'agy, paadiä Abraham jaduhñ ñämaayyä coo ja'a Abrahamhajxy hänajty yaa miähane'ema'añ hädaa yaabä naaxwiin, mөөdä yhaphajxy, mөөdä yhoc-hajxy.

¹⁴ Haa ca'a, jaduhñä Dios miänaañ cooc hajxy yaa miähane'ema'añ hädaa yaabä naaxwiin pønhaty jaduhñ mäbøjp coo ja'a Dios yajtøjiaty waambaty hänajty tөө miäna'añ. Jaduhñ miädia'agytiägø'øy coo ja'a Dios ja'a hoybä weenbä hajxy xmio'owáanäm je'eguiøxpä coo hajxy jaduhñ nmäbøjcäm. Pero coo ja'a hoybä weenbä hajxy häxøpy nbáatäm je'eguiøxpä coo ja'a jecymiädia'agy hajxy hoy ngudiúunäm, ja'a Moisés jecy quiujáhyyäbä, cab jaduhñ cu choobaaty coo ja'a Dios hajxy jaduhñ tөө xñámáayyäm coogä mayhajt hänajty tiuna'añ coo ja'a hoybä weenbä hajxy xmio'owáanäm. Ni jaduhñ cu quia'a tsoobaaty coo højts cu nmäbøjcäm coo ja'a Dios jaduhñ yajtøjiaty waambaty tөө quiapxy tөө miädia'agy.

¹⁵ Hix, cabä jecymiädia'agy hajxy hoy ngudiúunäm, ja'a Moisés jecy quiujáhyyäbä. Coo hajxy jaduhñ nga'a cudiúunäm, paady hajxy ngädiéhyäm. Y paady jaduhñ yhahixø'øy coo hajxy ngumädóowämät. Pero pønhaty ja'a jecymiädia'agy tөө quia'a mädoy, ja'a Moisés jecy quiujáhyyäbä, cab hajxy jaduhñ quiumädowa'añ, hoy hajxy tөө quia'a jagä tuñ nebiä Moisés jecy yhanehmiän.

¹⁶ Coo ja'a Abraham jaduhñ jecy miäbøjcä ja'a Dios miädia'agy coo ñämaayyä coogä

Abrahamhajxy hänajty yaa miähane'ema'añ hädaa yaabä naaxwiin, mөөдä yhap mөөдä yhoc-hajxy, paadiä tøyhajt hajxy nmөөdhájtäm coo ja'a Dios ja'a hoybä weenbä hajxy nägөxiä xmiо'owáañäm nä'ä mayhajt, coo ja'a Abraham hajxy nbamäbөjcämät coo ja'a Dios yajtөjiaty waambaty tөө miäna'añ, mөөд hөjts judíos, mөөд mijts ca'a judíospä. Coo ja'a Abraham hajxy jaduһn nbamäbөjcämät, jaduһn mäwiin hajxy nägөxiä xya-jmäbáatäm nebiä Abraham hajxy xyhaphájtäm xyhoc-hájtäm. Jaduhн quiähxө'өgy coo ja'a Abraham hajxy nhөjxhájtäm ndecyhájtäm.

¹⁷ Hix, jaduһn jim myiñ cujaay maa ja'a Diosmädia'aguiän cooc ja'a Dios ja'a Abraham piädaacy coo ja'a jäya'ayhajxy mayhagajtpä yhaphat yhoc-hadөөjät ja'a Abraham. Y miäbөjc ja'a Abraham jaduһn coo jaduһn ñämaayyä coogä tio'oxiөjc hänajty quio'na'awa'añ, hoy hajxy hänajty tөө jia miäjaaná. Paadiä Abraham jaduһn miäbөjcy, ñajuөөby hänajty jaduһn coo ja'a Dios mäjaa miөөдä coo ja'a ho'oguiäya'ay yagjuypiojtagátsät, y coo mäjaa miөөдäbä coo ja'a jäya'ay quiunúu'xät ja'a hajxy hänajty ca'a miimb ca'a cahbnä. Y coo ja'a Abraham hajxy jaduһn nbamäbөjcäm, jaduһn mäwiin hajxy nmäbáatäm nebiä Abraham hajxy xyhaphájtäm xyhoc-hájtäm. Jaduhн quiähxө'өgy coo ja'a Abraham hajxy nhөjxhájtäm ndecyhájtäm.

¹⁸⁻²¹ Coo ja'a Dios ja'a Abraham jaduһn jecy ñämaayy coogä mayhaga-jtpä-jäya'ayhajxy hänajty yhaphada'añ tieedyhada'añ ja'a Abraham, tөө ja'a Abrahamhajxy hänajty miäjaaná mөөдä tio'oxiөjc. Mägo'x-jomөjtä Abraham hänajty miөөдä. Y ja'a tio'oxiөjc, ja'a Sarahajpä, cahnä hänajty ñä'ägädä huungpaadyña, hoyyä jomөjt hänajty tөө jia nөcxnä coo yhuungpáadät. Pero cabä Abraham jaduһn ñä'ägädä möjpädaacy coo hajxy hänajty tөө miäjaaná. Hamuumdu'jootä Abraham jaduһn miäbөjcy nägө'ө nädeciä neby hänajty tөө ñäma'ayijän ja'a Diósäm coog hänajty jäya'ay may yhaphat yhoc-hada'añii. Paady jaduһn tiojajty. Jaduhн jim myiimbä cujaay maa ja'a Diosmädia'aguiän cooc ja'a Abraham yhap yhoc-hajxy hänajty jiaanč tehм miayө'өwa'añ. Paadiä Abraham jaduһn miäbөjcy, ñajuөөby hänajty jaduһn coo ja'a Dios mäjaa miөөдä coo jaduһn yajtөjiädät waambaty hänajty tөө quiapxy tөө miädia'agy. Mänitä Abraham ja'a Dios jaduһn miөjpädaacy jiaančpädaacy.

²² Coo ja'a Abraham jaduһn miäbөjcy, paady hawa'adstuum piädaacä.

²³ Jaduhн jim myiñ cujaay maa ja'a Diosmädia'aguiän coo ja'a Abraham piädaacä hawa'adstuum je'eguiөxpä coo ja'a Dios miädia'agy miäbөjcäxä coogä Dios yajtөjiaty waambaty tөө quiapxy tөө miädia'agy.

²⁴ Jaaná jaduһn hөjtsä Diosmädia'agy xñänöömämbä. Coo ja'a Dios ja'a miädia'agy hajxy jaduһn nmäbөjcämbät, jaduһnä Dios hajxy xpiädáacämbät hawa'adstuum, je'eguiөxpä coo ja'a Dios ja'a Jesucristo yagjuypiojtagajch. Ja'a Jesucristo, je'e hajxy nWiindsөnhájtäm.

²⁵ Jaaya'ay jaduһn nähdujcä coo hajxy xñähho'túutäm. Jaduhnä nbojphájtäm ja'a ngädieyhájtäm hajxy xyajnáhwáatsäm. Y coo ja'a Jesucristo jaduһn yagjuypiojtagajtsä, jaduһn hajxy nmähmöyyänä hawa'adstuum.

5

¹ Hoorä, coo hajxy nmäbөjcäm coo ja'a Jesucristo hajxy tөө xñähho'túutäm, paadiä Dios hajxy tөө xyajnáhwáatsäm ja'a nbojphájtäm ja'a ngädieyhájtäm. Paady hajxy xpiädáacäm hawa'adstuum. Jootcujcä Dios hajxy jaduһn xmiөөdhájtäm.

² Coo ja'a Jesucristo hajxy jaduһn tөө xñähho'túutäm, coo je'e jiuypiojtagajch, paadiä Dios hajxy xquiümáayyänä. Paady hajxy nxoon dáacäm. Y coo jaa tøyhajt hajxy jaduһn nmөөdhájtäm coo ja'a Dios hajxy jim xyajnөcxáañäm maa ja'a wyiinduumän, paady hajxy jootcujc nhájtäm.

³⁻⁴ Jaaná jaduһnduhmbä, xoon dáacäm hajxy hädaa yaabä naaxwiin, hoy hajxy yaa nja tsaächpөjcäm. Coo hajxy nmeex'tújcämät, jaduһnä Diosmädia'agy hajxy

hoy ngudiúunämät. Y coo hajxy jaduhñ hoy ngudiúunämät, jaduhñä tøyhajt hajxy nmøødháanäm coo ja'a Dios hajxy jim xyajnøcxáanäm maa ja'a wyiinduumän. Coo hajxy jaduhñ nnajuóøyyäm coo hajxy jim xyajnøcxáanäm, paady hajxy yaa nxoondáacäm, hoy hajxy yaa nja tsaachpójcäm.

⁵ Coo ja'a Dios jaduhñ miána'añ coog hajxy jim xyajnøcxáanäm maa ja'a wyiinduumän, jejpiä Dios ja'a tøyhajt jaduhñ. Cab hajxy jaduhñ xwyiinhóhñäm. Hix, tøø ja'a Dioshespíritu hajxy xyhadägøøyy xjioottägøøyyäm. Jaduhñ hajxy xyajnajuóøyyäm coo hajxy xjiaanč tehñ chójcäm hamuumdu'joot.

⁶ Coo ja'a Dios yajnähdiy coo hñajty tøø yhabaatnä, mänitä Jesucristo hajxy hoy xñähho'túutäm. Jaduhñä nbojhájtämä ngädieeyhájtäm hajxy xyajnhwáatsäm. Cab hajxy hñajty hoy nnähwa'adsáanäm hamdsoo je'eguiøxpä coo hajxy hñajty ngahwi-indøyhájtäm.

⁷ Hix, caj miich pøñ xchoj nähho'tú'udät, hoy miich hñajty mja hojiäya'ayhaty.

⁸ Pero ja'a Dios hajxy xjiaanč tehñ chójcäm, paadiä Jesucristo hajxy hoy xñähho'túutäm, hoy hajxy hñajty nja cuboj nja cugädieeyhájtäm.

⁹ Hoorä, coo ja'a Jesucristo hajxy tøø xñähho'túutäm, coo ja'a Dios hajxy tøø xpiädáacäm hawa'adstuum, jaduhñä tøyhajt hajxy nmøødhájtäm coo ja'a Dios hajxy xquia'a yajcumädowáanäm.

¹⁰ Coo hajxy hijty cøxypänejpiä njäya'ayhájtäm, jaduhñ mäwiin hijty piaady néjjiäm coo ja'a Dios hajxy hijty nmädsiphájtäm. Pero coo ja'a yHuung Jesucristo hajxy hoy tøø xñähho'túutäm, ja'a hajxy nWiindsønhájtämbä, paady cabä Dios hajxy nmädsiphájtänä. Hoyyä Dios hajxy xyhuunghájtänä. Tu'ugjoot tu'ugwiinmahñdiä Dios hajxy nmøødhájtänä. Y coo ja'a Jesucristo jiuypiojtägajch, coo jim ñøcxtägajch maa ja'a Tieediän, jaduhñä tøyhajt hajxy nmøødhájtäm coo hajxy jim xyajnøcxáanämbä.

¹¹ Jaduhñä tøyhajt hajxy nmøødhájtämbä coo ja'a Dios hajxy xquiumáayyänä. Paady hajxy jaduhñ xquiumáayyänä coo ja'a Jesucristo ja'a nbojpä ngädieey hajxy tøø xyanähwáatsäm. Tsøcxä hajxy jaduhñ xoondáacäm.

¹² Hoorä, tu'jäya'ay jecy quia'a cudiuundsohñ neby hñajty tøø yhane'emyiijän ja'a Diósäm. Ja'a Adánhøch jaduhñ nnänøømby, ja'a hajxy jecy nhaphájtäm ndeedyhájtäm. Jaduhñä pojpa cádieey yaa chohndaacy hädaa yaabä naaxwiin. Y coo ja'a Adán jaduhñ jecy quiädiehy, paady jaduhñ yhuuc ho'tsohmä. Y coo ja'a Adán hajxy jaduhñ jecy nhaphájtäm ndeedyhájtäm nägøxiä, paady hajxy nbagädiéhyyäm, paady hajxy nbahó'cäm.

¹³⁻¹⁴ Høxtä jecyjiäya'abiaady hajxy haxøøg jiäya'ayhajty, paady hajxy nägøxiä yho'cy, hoyyä Moisés hñajty quia'a jagä miññä, quia'a jagä ca'ayñä, hoyyä Dios hñajty quia'a jagä hane'emyñä coo ja'a jäya'ayhajxy hoy jiäya'ayhädät nebiä Moisés jecy quiujahyyän, hoy hajxy hñajty quia'a jagä pagädiehbiä nebiä Adán hñajty tøø quiädieeyän. Hoyyä Dios hñajty quia'a jagä hane'emyñä coo ja'a jäya'ayhajxy hoy jiäya'ayhädät, nägøxiä jäya'ayä pojpa cádieey hajxy hñajty miøødä. Y ja'a Adán, jaduhñ je'e jecy ñämaayyä cooc hñajty yho'oga'añ, pø cab hñajty jaduhñ quiudiuna'añ nebiä Dios hñajty tøø yhane'emiän. Y coo ja'a Moisés jaduhñ cujecy quiujahy nebiatiä Dios hñajty tøø yhane'emiän, jaduhñä jäya'ayhajxy nägøxiä ñämäayyäbä coogä Adán hajxy hñajty nägøxiä piahø'ogaambä, pø cab hajxy hñajty quiudiuna'añ nebiä Dios hñajty tøø yhane'emiän. Ja'a jecyjiäya'ayhajxy hñajty jiiä, cahnä Moisés hñajty quiujaayñä nebiatiä Dios hñajty tøø yhane'emy, cab hajxy hñajty jaduhñ nämay ñajuø'øy coo hajxy hñajty yho'oga'añ, pø haxøøg hajxy hñajty jiäya'ayhaty.

¹⁵ Coo ja'a Adán ja'a Dios miädia'agy jaduhñ jecy quia'a cudiuunä, paady hajxy nägøxiä nhó'cäm. Pero coo ja'a Jesucristo ja'a Tieediä miädia'agy jaduhñ quiudiunä, paady hajxy nnähwaats nguhwáatsäm. Coo ja'a Jesucristo hajxy jaduhñ hoy xñähho'túutäm, paadiä Dios hajxy xpiädáacäm hawa'adstuum. Møjmayhajtä Dios jaduhñ tiuun maa

højtshájtäm, pønjatiä miädia'agy tøø miäbøjcä ja'a Jesucristocøxpä. Paady hajxy jim xyajnøcxáanäm maa ja'a wyiinduumän.

¹⁶ Coo ja'a Jesucristo hajxy hoy tøø xñähho'túutäm, jaduhñä tøyhajt hajxy nmøødhájtäm coo ja'a nbojpä ngädieey hajxy jaduhñ xyajñähwáatsäm nägøxiä, pønjaty tøø miäbøcy ja'a Jesucristocøxpä. Paadiä Dios hajxy xpiädáacäm hawa'adstuum. Paady hajxy jim xyajnøcxáanäm maa ja'a wyiinduumän.

¹⁷ Jaduhñds je'e, coo ja'a Adán ja'a Dios miädia'agy jecy quia'a cudiuunä, paady hijty yhawiinmatsä coo ja'a Dios hajxy xpiädáacämät haxøøgtuum. Pero tøø ja'a Jesucristo hajxy xyajñähwaats xyajcuhwáatsäm. Møjmayhajtä Dios jaduhñ tiuun. Paadiä Dios hajxy xquia'a päda'agáanäm haxøøgtuum, pønjaty hawa'adstuum. Y paady højtsä hoyhajtä weenhajt yaa nbaadáanäm hädaa yaabä naaxwiin je'eguiøxpä coo ja'a Jesucristo hajxy tøø xyajñähwaats tøø xyajcuhwáatsäm.

¹⁸⁻¹⁹ Mänaa ja'a Jesucristo yaa yhitiän hädaa yaabä naaxwiin, ca'xiä Tieediä miädia'agy quiudiuunä mäduhñtiä yaa yhiyty. Y coo hajxy jaduhñ xñähho'túutäm, ja'a Tieediä miädia'agy jaduhñ quiudiuunä. Jaduhñ hajxy xyajñähwáatsäm. Coo hajxy jaduhñ nmäbøjcämät coo ja'a Jesucristo hajxy tøø xjiaançh nähho'túutäm, mäniä Dios hajxy xpiädáacämät hawa'adstuum. Hoorä, ja'a Adán, haxøøg je'e jecy jiäya'ayhajty. Cabä Adán ja'a Dios miädia'agy jecy ñä'ägädä cudiuunä. Y coo ja'a Adán hajxy jecy nhaphájtäm ndeedyhájtäm, paadiä Dios miädia'agy hajxy nga'a nä'ägädä cudiunáanämbä. Coo hajxy jaduhñ nga'a cudiunáanäm, paady hijty yhawiinmatsä coo ja'a Dios hajxy jii by cu xpiädáacäm haxøøgtuum. Pero coo ja'a Jesucristo hajxy tøø xñähho'túutäm, paady hajxy jim xyajnøcxáanäm Dioswiinduum. Jaduhñä Dios mayhajt møj jiaançh tehñ tiuun maa højtshájtäm.

²⁰⁻²¹ Coo ja'a Dios jecy yhanehmy coo ja'a jäya'ayhajxy hoy jiäya'ayhádät, mäniä Moisés jaduhñ quiujahy. Y coo ja'a nocy hajxy ngápçämät, ja'a Moisés jecy quiujáhyyäbä, jaduhñ hajxy nnajuøøyyämät coo hajxy njaançh cädiéhyäm. Hoy hajxy jaduhñ nja najuøøyyäm, cab hajxy nmäbøjcäm. Pero xjiaançh tehñ ñäxúu'tsämä Dios. Paadiä møjmayhajt jiaançh tehñ tiuun maa højtshájtäm. Jaduhñds je'e, coo hajxy ngädiéhyäm, paady hajxy nhó'cäm. Pero coo ja'a Dios hajxy xñäxúu'tsäm, paadiä Jesucristo hajxy hoy xñähho'túutäm, ja'a hajxy nWiindsønhájtämbä. Jaduhñä Dios hajxy xpiädáacäm hawa'adstuum. Mäniä hajxy xyagjugyhadáanäm cøjxta'axiøø nebiä Dios jiugyhatiän.

6

¹ Cab jaduhñ ñä'ägädä hahixø'ø y coo hajxy nmänáanämät: “Tsøg hajxy cädiéhyäm tehngajnä. Haa ca'a, tehngajnä Dios hajxy xñäxuudsáanäm.”

² Caj pues, cab jaduhñ yhahixø'ø y coo hajxy tehngajnä ngädiéhyämät. Haa ca'a, tøø ja'a pojpä cädieey hajxy nnajtshixøøyyänä coo ja'a Diosmiädia'agy hajxy tøø nmäbøjcäm ja'a Jesucristocøxpä.

³⁻⁵ Tøgä cab hajxy mnajuø'ø yä coo ja'a Jesucristo hajxy nmøødhájtäm tu'ugjoot tu'ugwiinmahñdy coo hajxy tøø nnäbétäm ja'a Jesucristocøxpä. Y coo hajxy jaduhñ tøø nnäbétäm ja'a Jesucristocøxpä, jaduhñ mäwiin piaady néjjiämä Jesucristo hajxy häxøpy näguipxy tøø nmøødhó'cäm. Jaanä jaduhñ mäwiin piaatpä néjjiämä Jesucristo hajxy häxøpy näguipxy tøø nmøødnaaxtägøøyyäm. Coo ja'a pojpä cädieey hajxy tøø nnajtshixøøyyänä, jaduhñ miädia'agytiägø'ø y coo hajxy jaduhñ ween nga'a jatcøøyyänä haxøøg. Y coo ja'a Dios ja'a Jesucristo yagjujypiojtägajch ja'a miäjaahaam, mäniä Jesucristo jugyhajt hawiinjemybiä miøødhajty. Jaanä jaduhñ højtshájtämbä, coo hajxy nnäbétäm, jaduhñ mäwiin piaady néjjiämä Jesucristo hajxy häxøpy näguipxy tøø nmøødjujypiojtägájsäm. Paadiä jugyhajt hajxy hawiinjemybiä nmøødhájtämbä. Tøyhajt jaduhñ. Jaduhñä hojiootä howyiinmahñdy hajxy nmøødhájtämät. Jaduhñ

miädia'agytiägø'øy coo ja'a Dios hajxy xyagjyghadäänäm cøjxta'axiøø neby je'e jiu-gyhatiän.

⁶ Coo ja'a Jesucristo hajxy tøø xñähho'túutäm cruzcøxp, mänitä nhaxøøgwiinmahndyhajxy quiuhdägóoyänä nebiä haxøøgwiinmahñdy hajxy nägøxiä hijty nmøødhájtäm. Coo ja'a nhaxøøgwiinmahñdyhajxy jaduñ quiuhdägóoyänä, paadiä Jesucristo hajxy nmøødhájtänä tu'ugjoot tu'ugwiinmahñdy. Paady hajxy jaduñ tøø xñähho'túutäm, jaduñä nhaxøøgwiinmahñdyhajxy jaduñ quiuhdägóoyänä. Jaduñä njoot hajxy nga'a pädáacänät maa ja'a haxøøgpän.

⁷ Pønä Jesucristo hänajty møødhijp tu'ugjoot tu'ugwiinmahñdy mänaa ja'a Jesucristo yho'oguiän, cabä jioot piädaacnä maa ja'a haxøøgpän.

⁸ Coo hajxy nmäbøjcam coo ja'a Jesucristo hajxy jaduñ tøø xñähho'túutäm møød coo jadähooc jiuypiojcy, jaduñ mäwiin miäbaady néjjiäm coo ja'a Jesucristo hajxy häxøpy näguipxy tøø nmøødjuypiojcam. Paady hajxy jaduñ njygyhadäänäm cøjxta'axiøø neby je'e jiu-gyhatiän.

⁹ Coo ja'a Jesucristo jiuypiojtägajch, cab jaduñ mänaa yho'tägatsaannä. Homiänaaxøøjä homiänaadsuujä jiu-gyhada'añ. Tøyhajt jaduñ.

¹⁰ Hix, tähoocnäho'tu'utiä ja'a Jesucristo hajxy xñähho'túutäm. Jaduñä nbojpä ngädieey hajxy tøø xyajnähwáatsäm. Y coo ja'a Jesucristo tøø jiuypiojtägajtsnä, paady homiänaaxøøjä homiänaadsuujä ja'a Dios miøødhidaannä.

¹¹ Jaanä jaduñ højtshájtämbä, coo ja'a Jesucristo hajxy nmøødhájtänä tu'ugmädia'agy, tsøg hajxy jahmiejtstäacäm coo ja'a nhaxøøgwiinmahñdyhajxy tøø quiuhdägóoyänä. Jaduñ hajxy tsøc jahmiejtstäacämbä coo hawiinjemybiä juyghajt hajxy nmøødhájtänä nebiä Jesucristo hänajty miøødhatiän mänaa jiuypiojtägachän. Paadiä Dios hajxy nmøødhájtämbä tu'ugmädia'agy.

¹² Cab hajxy cøxypänejpiä tsøc jatcøøyyänä. Cabä njootä ngopc hajxy nbädáacänät maa ja'a haxøøgpän.

¹³ Cabä ngø'ø ndecy hajxy nyaghanáxänät, ni ja'a nhaawhájtäm. Tsøgä Diosmädia'agy hajxy hamuumdu'joot cudiúunäm. Coo ja'a Jesucristo hajxy hänajty nmøødhájtäm tu'ugjoot tu'ugwiinmahñdy mänaa yho'oguiän, møød mänaa jiuypiojtägachän, paadiä Dios hajxy nmøødhájtänä tu'ugjoot tu'ugwiinmahñdy.

¹⁴⁻¹⁵ Paadiä Dios hajxy xquiumáayyäm coo mayhajt tøø tiuñ maa højtshájtäm, ca'a jie'eguiøxpä coo ja'a mädia'agy hajxy nja wli' quiudiunäänäm, ja'a Moisés jecy quiujáhyyäbä. Coo ja'a Dios mayhajt jaduñ tiuñ maa højtshájtäm, je'eçh jaduñ nnänøømby coo hajxy xyajnähwáats, coo hajxy xyajcuhwáatsäm. Hoyyä Dios mayhajt jaduñ tiuñ maa højtshájtäm, cab jaduñ ñä'ägä hahixø'øy coo hajxy haxøøg njatcøøyyämät tehngajnä.

¹⁶ Tsøg hajxy paquiä mädiáacäm neby hajxy yaa nguhdujthájtäm hädaa yaabä naaxwiin. Jaduñä cuhdujt hajxy nmøødhájtäm coo hajxy nwiimbíiwämät pøn jaduñ nmädunäänäm. Y jaduñ hajxy ngudiúunäm nebiatiä nwiindsøn hájtäm hajxy xyhanéhmäm. Jaanä jaduñä cuhdujt hajxy nmøødhájtämbä coo hajxy nwiimbíiwämät mädyii hajxy nyajtunäänäm, ja'a Diosmädia'agy, o ja'a nhaxøøgwiinmahñdyhájtäm. Coo ja'a Diosmädia'agy hajxy nyajtuunämät, mänitä Dios hajxy jaduñ xquiumáayyämät. Pero coo ja'a nhaxøøgwiinmahñdy hajxy nyajtuunämät, cabä Dios hajxy jaduñ nmøødhájtämät tu'ugjoot tu'ugwiinmahñdy. Mänitä Dios hajxy xpiädáacämät haxøøgtuum. Tøyhajt jaduñ.

¹⁷ Dioscujú'uyäp ja'a Dios coo mijtsä Diosmädia'agy hamuumdu'joot myajtuunnä neby hajxy tøø mmäbøquiän. Cahnä Diosmädia'agy hajxy mmädoyñä, haxøøg hajxy hijty mjäya'ayhaty.

¹⁸ Coo mijts tøø mmäbøcy coo ja'a Jesucristo hajxy tøø xñähho'túutäm, paadiä mhaxøøgwiinmahñdy hajxy tøø mnajtshixøøñä. Tøø ja'a mjoot hajxy mbäda'agy coo

hajxy hamuumdu'joot mhojiäya'ayhájnät.

¹⁹ (Páadyhøch jaduhñ nmädia'agy neby hajxy yaa nguhdujthájtäm hädaa yaabä naaxwiin, jaduhñ hajxy hoy mwiinjuó'owät. Cab hajxy jaduhyyä hoy mwiinjuó'owa'añ.) Hijty, jaanç tehñ yhaxøøgjaty hajxy hijty mjäya'ayhaty. Cøxypänejpiä hajxy hijty mjaanç tehñ jiatcø'ø. Maas hanaxiä hajxy hånajty mjatcø'owa'añ tehngajnä. Pero tøø ja'a Diosmädia'agy hajxy mmäbøjnä ja'a Jesucristocøxpä, paadiä Diosmädia'agy hajxy myajtuunnät nägø'ø nädecypiä.

²⁰ Coo ja'a mhaxøøgwiinmahñdy hajxy hijty myajtuñ, cabä mjoothajxy hijty chocy coo hajxy hoy mjäya'ayhädät. Coo hajxy häxøpy tøø mhojiäya'ayhaty, tøø ja'a Dios hajxy häxøpy xquiumay.

²¹ Hoçhähdiiuunnä hajxy hijty mjatcø'ø. Cabä tii hoybä hajxy hijty mbaady. Haxøøgtuum hajxy hijty mnä'ägädä häda'aga'añ.

²² Paadiä Jesucristo hajxy tøø xñähho'túutäm, coo ja'a mhaxøøgwiinmahñdy hajxy jaduhñ mnajtsixó'owät. Tøyhajt jaduhñ. Paadiä Jesucristo hajxy mmøødhijnä tu'ugjoot tu'ugwiinmahñdy. Coo ja'a mjoot hajxy hamuumdu'joot tøø mbäda'agy coo ja'a Dios hajxy mmøødtuna'añ, paadiä hoyhajtä weenhajt hajxy mbaada'añ. Jaduhñ miädia'agytiägø'ø, coo mijtsä Dios hoyhäna'c xyagjada'añ nebiä Jesucristo yohyhäna'c-hatiän, paadiä Dios hajxy xyagjughada'añ cøjxta'axiøø neby je'e jiugyhatiän.

²³ Coo hajxy cøxypänejpiä njatcøøyyämät, cabä Dios hajxy jaduhñ nmøødhíjtämät tu'ugmädia'agy, møød haxøøgtuum hajxy nhädáacämät. Pero tøø ja'a Dios mayhajt tiuñ coo ja'a yHuung hajxy yaa tøø xyajnäguéjxäm, ja'a Jesucristo, ja'a hajxy nWiindsønhájtämbä. Hoyyä Jesucristo hajxy tøø xñähho'túutäm. Jaduhñä Dios hajxy xpiädáacäm hawa'adstuum. Coo hajxy jaduhñ nmäbøjcämät, mänitä Dios hajxy xyagju-gyhájtämät cøjxta'axiøø neby je'e jiugyhatiän.

7

¹ Mägu'ughajpädøjc, mnajuøøby hajxy jaduhñ nebiä cuhdujt yaa myiñ hädaa yaabä naaxwiin. Ja'a häna'c-hajxy møjcuuhdujtmøødpä, ja'a häna'c hajxy jaduhñ xyhanéhmäm mäduhñtiä hajxy yaa njugyhájtäm, túhmäts. Pero coo hajxy nhó'cänä, cab hajxy jaduhñ xyhanéhmänä.

²⁻³ Høxtahmðsä to'oxiøjc ja'a ya'adiøjcmøødpä, jaduhñä cuhdujt myiñ coo hajxy ñimiøødtsäna'awóøjät mäduhñtiä hajxy nämetsc jiugyhaty. Hoorä, coo ja'a to'oxiøjc wiingya'adiøjc miøødtsäná'awät, y je'enä ñihyhap jiugyhatyñä, haxøøgä to'oxiøjc jaduhñ jiatcø'owät. Hix, cabä cuhdujt jaduhñ myiñ coo jaduhñ jiatcø'owät. Pero coodsä ñihyhap yhó'ogät, mänitä quixy cuhdujt miøødänä coo piøjtägátsät, y cab jaduhñ ñejpiä.

⁴ Hoorä, mägu'ughajpädøjc, coo mijtsä Jesucristo hånajty mmøødhity tu'ugjoot tu'ugwiinmahñdy mänaa yho'oguiän, paadiä jecymiädia'agy hajxy xquia'a hanehmñä, ja'a Moisés jecy quiujáhyyäbä. Jaanä jaduhñduhmbä, tu'ugjoot tu'ugwiinmahñdiä Jesucristo hajxy hånajty mmøødhíjtäbä mänaa jiujiypiøjtägachän. Tøø ja'a mjoot hajxy mbäda'agy coo jaaya'ay hajxy mmøødtúnät. Jaduhñä Dios hajxy mmøødtúumbät.

⁵ Cahnä hajxy hånajty nmäbøjcäm coo ja'a Jesucristo hajxy hoy xñähho'túutäm, jaduhñä njoot hajxy hånajty nnä'ägädä pädáacäm coo hajxy hånajty jaduhñ njatcø'owáanäm hoñejpiä. Paady hajxy hijty nhäda'agáanäm jiiby møjcu'uhaam. Jaanç tehñ yhaxøøg hajxy hånajty nwiinmahñdyhájtäm. Hoyyä mädia'agy hajxy hånajty nja mädoowäm, ja'a Dios ja'a Moisés jecy ñajtsapxøøyyäbä, cab hajxy hånajty nyajtunáanäm.

⁶ Cahnä Diosmädia'agy hajxy hånajty nmäbøjcäm ja'a Jesucristocøxpä, tehngajnä ja'a jecymiädia'agy hajxy hånajty nja wi'i quiudiunáanäm, ja'a Moisés jecy quiujáhyyäbä. Jaduhñäc tyijy hajxy hånajty nnähwa'adsáanäm. Pero coo ja'a Jesucristo hajxy tøø xñähho'túutäm, paadiä jecymiädia'agy jaduhñmbä xquia'a hanéhmñä. Coo ja'a Jesucristo

hajxy tøø xyajnáhwáatsäm, jaduhñ hajxy xyagjugyhadáañäm cøjxta'axiøø neby jaaya'ay jiugyhatiän. Y xpiuhbéjtämä Dioshespíritu hajxy nebiä Dios hajxy hoy nmøødtúunämät.

7-9 Cáhnočhä jecymiädia'agy hánajty nmädoyñä, ja'a Moisés jecy quiujáhyyäbä, cábočh hánajty nnajuø'øy coočh hánajty hoy nga'a jáya'ayhaty. Pero coočh jecymiädia'agy jaduhñ nwiinjuøøñä, páadyhøch nnajuøøñä coočh cøxpänejpiä njatcø'øy hoñejpiä. Coočhä haxøøgwiinmahñdy jaduhñ njaanč tehñ miøødä, páadyhøčhä njoot hijty chocy coočh cøxpänejpiä njatcø'øwät hoñejpiä nebiatiä jecymiädia'agy hajxy xjia hanéhäm coo hajxy nga'a jatcøøyyämät, ja'a Moisés jecy quiujáhyyäbä. Y coočhä jecymiädia'agy jaduhñ nmädoy, maas hanáxiøch cøxpänejpiä njaac jatcø'øy tehñgajnä. Páadyhøčhä tøyhajt nmøødä coočh hijty nga'awa'añ haxøøgtuum.

10 Hóyhøch ndijy jaduhñ ngudiuna'añ ja'a jecymiädia'agy, ja'a Moisés jecy quiujáhyyäbä. Y coočh häxøpy hoy ngudiunñ, hawa'adstúumhøčhä Dios cu xpiädaacy. Pero cábočhä jecymiädia'agy jaduhñ hoy nnä'ägädä cu diuna'añ, páadyhøch hawiinmats nhädá'agät haxøøgtuum.

11 Hoy ndíjyhøčhä jecymiädia'agy hánajty nyajtuna'añ, ja'a Moisés jecy quiujáhyyäbä. Jaduhñ ndíjyhøčhä Dios ja'a hoyhajtä weenhajt xmio'owa'añ. Pero cábočhä tøyhajt hánajty nnä'ägä møødä. Coočhä haxøøgwiinmahñdy hánajty nmøødä, páadyhøčhä jecymiädia'agy hánajty hoy nga'a yajtuñ, ja'a Moisés jecy quiujáhyyäbä. Páadyhøch hánajty nga'awa'añ haxøøgtuum.

12 Ja'a jecymiädia'agy ja'a Moisés jecy quiujáhyyäbä, je'e hajxy xyhanéhäm coo hajxy hoy njäya'ayhájtämät. Jaduhñ miädia'agy neby hajxy hoy njäya'ayhájtämät. Xyajna-juøøyyäm hajxy jaduhñ coo ja'a Dios howyiinmahñdy jiaanč tehñ miøødä.

13 Paadiä jecymiädia'agy jaduhñ yhooyä, ja'a Moisés jecy quiujáhyyäbä. Pero hóyhøch hánajty tøø nja mädoy, tehñgájnočh hánajty haxøøg nwi'i jáya'ayhatyñä. Páadyhøch hijty jii by nga'awa'añ haxøøgtuum. Hiç, cábočhä nwiinmahñdy hánajty yhooyä. Y coočhä jecymiädia'agy jaduhñ nmädooy, ja'a Moisés jecy quiujáhyyäbä, maas hanáxiøch hánajty haxøøg njatcø'øwa'añ.

14 Jaduhñä tøyhajt hajxy nmøødhájtäm coo ja'a jecymiädia'agy hajxy xyhawáañäm coo ja'a Dios howyiinmahñdy jiaanč tehñ miøødä. Jaanä jaduhñ hajxy xyhawáañäm coo Dios ja'a jioot chocy coo hajxy hoy njäya'ayhájtämät. Pero højts, cab højts hoy nnä'ägädä jáya'ayhájtäm, je'eguiøxpä coo højts hädaa yaabä naaxwiimbä wiinmahñdy nmøødhájtäm. Hamdsoojoot hajxy jaduhñ haxøøg njatcøøyyäm.

15 Jaduhñä njoothajxy jia wi'i chójcäm coo hajxy hoy njäya'ayhájtämät, pero cab hajxy nnä'ägädä jadáañäm hojiäya'ayhat. Pätiidä hajxy jaduhñ coo nga'a jadáañäm. Cøxpänejpiä hajxy nwi'i jatcøøyyäm, hoy hajxy nja najuøøyyäm coo jaduhñ yhaxøøgä.

16 Nnajuøøyyäm hajxy jaduhñ coo ja'a jecymiädia'agy yhooyä, ja'a Moisés jecy quiujáhyyäbä. Jaduhñä njoothajxy jia tsójcäm coo hajxy ngudiunämät nebiatiä jecymiädia'agy hajxy xyhanéhäm. Pero cab hajxy hoy nnä'ägädä cu diunáañäm.

17 Pero, ca'a yhamdsoojoot hajxy jaduhñ haxøøg njatcøøyyäm. Ja'a nhaxøøgwiinmahñdy hajxy jaduhñ xyagjatcøøyyäm haxøøg.

18-19 Cabä Diosmädia'agy hajxy hoy ngudiunáañäm hamdsoojoot, hoyyä njoothajxy jia tsójcäm coo hajxy ngudiunämät. Haxøøg hajxy njatcøøyyäm, hoyyä njoothajxy jaduhñ quia'a jagä tsójcäm coo hajxy jaduhñ njatcøøyyämät.

20-21 Hiç, ja'a nhaxøøgwiinmahñdy hajxy haxøøg xyagjatcøøyyäm, ca'a yhamdsoojootä.

22 Jaduhñä Diosmädia'agy hajxy xyhanéhäm nebiaty hajxy hoy njäya'ayhájtämät. Njoodótyhøch ngopcóotyhøch jaduhñ njuø'øy coo ja'a Diosmädia'agy jiaanč tehñ yhooyä.

23 Nnajuøøbiøch jaduhñ coočhä haxøøgwiinmahñdy njaanč tehñ miøødä. Páadyhøčhä howyiinmahñdy hoy nga'a nä'ägädä yajtuna'añ. Hiç, ja'a nhaxøøgwiinmahñdyhøch haxøøg xyagiäya'ayhajp. Y cábočh hoy nnä'ägädä najtshixø'øwa'añ.

24 Cooch häxøpy pøn hoy xquia'a yajnahwa'adsa'añ ja'a nhaxøøgwiinmähñdyhøch, cábøchä Dios häxøpy hoy nmøødhida'añ tu'ugjoot tu'ugwiinmahñdy. Jíbyhøch häxøpy nhäda'aga'añ mõjcu'uhaam. Jaanç tehñ yhoñäxúu'tsnøch häxøpy nhity.

25 Pero nmóobiøchä Dios Dioscujú'uyäp coochä Jesucristo tøø xyajnahwa'açh, ja'a hajxy nWiindsønähjtämbä. Páadyhøchä Diosmädia'agy hoy nyajtuna'añ ja'a nhowyiinmahñdyháamhøch, hóyhøchä haxøøgwiinmahñdy nja møødnä. Je'eçh tähoocjaty haxøøg xyagjatcøøby.

8

1 Hoorä, hawa'adstuum hajxy nmähmøøyyänä coo ja'a Jesucristo hajxy nmøødhjätäm tu'ugmädia'agy. Jaduhñ hajxy ngudiúunäm nebiä Diosmädia'agy hajxy xyhanéhmäm. Cab hajxy cøxypänejniä njatcøøyyänä.

2 Coo ja'a Jesucristo hajxy tøø xñähho'túutäm, paady hajxy xmiøødhjätäm tu'ugjoot tu'ugwiinmahñdy. Paadiä Dioshespíritu hajxy xyagjugyhadaañäm cøjxta'axiøø nebiä Dios jiugyhatiän. Paadiä Dios hajxy tu'ugjoot tu'ugwiinmahñdy xmiøødhidáañäm homiänaajä. Coo ja'a Jesucristo ja'a nhaxøøgwiinmahñdy hajxy tøø xyajnahwáatsäm, paady hajxy jiiby nga'a häda'agáañänä haxøøgtuum.

3-4 Coo ja'a Dios ja'a yHuung yaa quiejxy hädaa yaabä naaxwiin, jaduhñ yaa jiäya'ayhajty neby højtshjätäm. Jesucristo je'e. Pero cabä Jesucristo haxøøg jiäya'ayhajty neby højtshjätäm. Mänitä Jesucristo hajxy xñähho'túutäm. Hoyyä Jesucristo ja'a jecymiädia'agy quiudiuuñ, ja'a Moisés jecy quiujáhyyäbä. Pero højtshjätäm, cab hajxy jaduhñ ngudiúunäm. Paady jaduhñ yhahixøøy coo hajxy ngumädóowämät. Coo ja'a Jesucristo hajxy xñähho'túutäm, quiumädoow je'e ja'a højtscøxphjätäm jaduhñ. Paadiä jecymiädia'agy hajxy xquia'a hanéhmänä, ja'a Moisés jecy quiujáhyyäbä. Ja'a Dioshespíritu hajxy xpiuhbéjtänä coo ja'a Dios hajxy xmiøødhjätämät tu'ugjoot tu'ugwiinmahñdy. Jaduhñ hajxy xpiuhbéjtämbä coo hajxy haxøøg nga'a jäya'ayhajtänät.

5 Y coo ja'a Dioshespíritu hajxy jaduhñ xpiuhbéjtäm, paady hajxy nxiictaac nmädiaactáacäm nebiä Diosmädia'agy hajxy maas hoy nyajtúunämät. Pero ja'a jäya'ay ja'a Dioshespíritu ja'a miädia'agy hajxy ca'a cudiunáañäbä, jaduhñ hajxy xyiicta'agy miädiaacta'agy nebiä yhamdsoo wiinmahñdy hajxy yajtuñ.

6 Pøn jaduhñ xiictaacp mädiaactaacp nebiä Dioshespíritu ja'a miädia'agy maas hoy miäbøjcät, je'e ja'a Dios jaduhñ miøødhijpy tu'ugjoot tu'ugwiinmahñdy. Je'eduhñ nøcxaamb Dioswiinduum. Jootcujc je'e jim yhida'añ møødä Dios. Pero pønä yhamdsoo wiinmahñdy wi'i yajtunaamb, ja'a Dios ja'a miädsip je'eduhñ. Haxøøgtuum je'eduhñ ñä'ägä häda'aga'añ,

7-8 je'eguiøxpä coo ja'a Dios miädsipaty. Cabä Diosmädia'agy hoy yajtuna'añ, ni ja'a jioot jaduhñ quia'a tsoy coo yajtúnät. Y cab jaduhñ quiumayii ja'a Diósäm.

9 Pønä Dioshespíritu ca'a møødhijp tu'ugmädia'agy, cabä Diosmädia'agy miäbøcy ja'a Jesucristocøxpä. Coo mijts jaduhñ mjaanç mäbøcy, paady mijtsä Dioshespíritu mmøødhity tu'ugmädia'agy. Y coo ja'a Dioshespíritu hajxy jaduhñ mmøødhity, paadiä mhaxøøgwiinmahñdy hajxy tøø mhøxhijxnä.

10 Tøyhajt jaduhñ coo hajxy nho'ogáañäm, je'eguiøxpä coo ja'a Adán jecy quiädiehy, ja'a hajxy jecy nhaphjätäm ndeedyhjtäm. Pero coo mijtsä Dios tøø xpiäda'agy hawa'adstuum, y coo ja'a Jesucristo hajxy mmøødhity tu'ugmädia'agy, paady mijtsä Dioshespíritu xyagjugyhada'añ homiänaajä nebiä Dios jiugyhatiän. Jim hajxy xya-jnøcxa'añ Dioswiinduum.

11 Coo ja'a Dioshespíritu hajxy xmiøødhjätäm tu'ugmädia'agy, paadiä Dios hajxy xyagjujypiøjtägatsáañäm ja'a yHespírituhaam coo hajxy hänajty tøø nhó'cäm. Jaduhñ hajxy xyagjujypiøjtägatsáañäm nebiä Jesucristo yagjujypiøjtägajtsän.

12 Mägu'ughajpädøjc, jaduhñds je'e, hahixøøby jaduhñ coo ja'a Dioshespíritu miädia'agy hajxy nyajtúunämät. Cab jaduhñ yhahixø'øyc coo ja'a nhamdsoo wiinmahñdy hajxy nyajtúunänät tehngahnä.

13 Hiñ, coo hajxy tehngahnä haxøøg njatcøøyyänät, cabä Dios hajxy hoy nmøødhíjtämät tu'ugjoot tu'ugwiinmahñdy. Mänit hajxy jii by nhädáacämät haxøøgtuum. Pero coo ja'a nhaxøøgwiinmahñdy hajxy nnajtshixøøyyämät ja'a Dioshespírituhaam, jaduhñä Dios hajxy hoy nmøødhíjtänät tu'ugjoot tu'ugwiinmahñdy.

14 Hiñ, pønjaty jaduhñ puhbéjtäp ja'a Dioshespíritu nebiä Diosmädia'agy hajxy jaduhñ hoy yajtúnät, Dios yhuung hajxy je'e.

15 Haa ca'a, ja'a yhEspírituhaamä Dios hajxy xyhuunghájtäm, paady hajxy nnämäáyyäm: "Diosteedy." Y coo ja'a Dios hajxy xyhuunghájtäm, paadiä Dios hajxy nga'a tsähgøøyyänä neby hajxy hijty ndsähgøøyyäm coo hajxy hijty xquia'a pädáacämnä hawa'adstuum.

16 Y coo ja'a Dioshespíritu hajxy jaduhñ xmiøødhíjtäm, jaduhñä tøyhajt hajxy xmiøøyyäm coo ja'a Dios hajxy xyhuunghájtänä.

17 Coo ja'a Dios hajxy xyhuunghájtäm näguipxy møødä Jesucristo, paadiä Jesucristo hajxy jim xyajnøcxáañäm Dioswiinduum. Paadiä Dios hajxy madiu'u xquiunuu'xáañäm näguipxy møødä Jesucristo, nebiä Dios jecy miánaañän cooc hajxy xquiunuu'xáañäm. Y coo hajxy ndsaačhpøjcämät ja'a Dioscøxpä nebiä Jesucristo chaačhpøjquiän, mänitä Dios hajxy møj jaanč xpiädáacämät näguipxy møødä Jesucristo.

18 Høøch jaduhñ mänaamb coo hajxy yaa weeñtiä ndsaačhpøjcäm hädaa yaabä naaxwiin. Pero cab jaduhñ ñä'ägädä mäbaady ni weeñtiä nebiä Dios ja'a hoyhajtä weenhajt hajxy jim xmiø'owáañäm maa je'e wyiinduumän.

19 Tijatiä Dios yaa tøø quiunuu'xy hädaa yaabä naaxwiin, jia wi'i jiøbhijxyp hajxy jaduhñ coo yhabáadät coo ja'a Dios ja'a hoyhajtä weenhajt mio'owa'añ pønjaty jaduhñ yhuunghajpy. Mänitä Dios jaduhñ miána'ana'añ coo hajxy nga'a tsaachpøgáañänä.

20-21 Coo ja'a Adán jaduhñ jecy jawyiinhajt quiädiehčohñ, ja'a hajxy jecy nhaphajt ndeedyhájtämbä, paadiä Dios ja'a tsø'ty ja'a häyohn yaa quiejxy hädaa yaabä naaxwiin. Mäduhñtiä Dios yaa tøø quiunuu'xy cøxiä hädaa yaabä naaxwiin, cøxaamb jaduhñ quiuhdägoyya'añ. Pero cabä pojpä hajxy tii miøødä. Ca'a jie'eguiøxpä ja'a Dios ja'a tsø'ty ja'a häyohn yaa quiejxy. Hiñ, jagooyyä jäya'ay pojpä cädieey hajxy miøødä, paadiä Dios tsø'ty häyohn yaa quiejxy. Jéquiänä Dios jaduhñ wyiinmaayy coo cøxiä wiinä chaačhpøgät näguipxy møødä jäya'ayhajxy, tijatiä Dios yaa tøø quiunuu'xy, høxtä coonä yhabáadät coo ja'a Dios hajxy xquia'a yajtsaačhtiunáañänä. Mänitä Dios ja'a hoyhajtä weenhajt hajxy nägøxiä xmiø'owáañäm, højts Dioshuung, näguipxy møød tijaty ja'a Dios yaa tøø quiunuu'xy.

22 Hiñ, tijatiä Dios yaa tøø quiunuu'xy hädaa yaabä naaxwiin, jia wi'i jiøbhijxyp hajxy jaduhñ coo yhabáadät coo ja'a Dioshuung ja'a hoyhajtä weenhajt hajxy mio'owa'añii. Tøyhajt jaduhñ. Pero cahnä yhabaady, jaanč tehñ chaačhpøjp hajxy jaduhñ.

23 Jaanä jaduhñ højtshájtämbä, jaduhñ højts ndsaačhpøjcämbä, jaduhñ højts nja wi'i jiøbhíxämbä coo yhabáadät coo ja'a Dios hajxy pedyii xmiø'owáañäm ja'a hoyhajtä weenhajt. Coo Dios hajxy xyhuunghájtäm, paady hajxy jaduhñ xmiø'owáañäm. Mänitä Dios ja'a hawiinjemybiä ni'xcopc xmiø'owáañäm, ja'a mänaa ca'a ma'p ca'a tägoobiä. Coo ja'a Dios ja'a yhEspíritu hajxy tøø xyajnäguéjxäm, jaduhñä tøyhajt hajxy nmøødhájtäm coo ja'a Dios hajxy xjiaanč huunghájtäm. Jaanä jaduhñä tøyhajt hajxy nmøødhájtämbä coo ja'a Dios ja'a hoyhajtä weenhajt hajxy pedyii xmiø'owáañäm.

24 Coo ja'a Diosmädia'agy hajxy tøø nmäbøjcäm ja'a Jesucristocøxpä, paady hajxy nnähwaats nguhwáatsäm, paadiä Dios hajxy xmiøødhíjtänä tu'ugjoot tu'ugwiinmahñdy. Y paady hajxy nja wi'i jiøbhíxäm coo yhabáadät coo ja'a Dios hajxy xmiø'owáañäm ja'a

hoyhajtä weenhajt cøxiä. Cahnä yhabaady, paady hajxy nja wi'i jìbhhíxämnä. Coö häxøpy tøø yhabaatnä, cab hajxy häxøpy njøbhíxänä.

²⁵ Coö hajxy hamuumdu'joot nmäbøjcäm coö ja'a Dios hajxy tøyhajt xmio'owáañäm tijaty hajxy xyajmädsójcäm, paady hajxy tsøc mee'xtújcäm mäduhñtiä hajxy yaa njaac jøbhíxäm, hoy hajxy nej nja jajt nja habéjtäm.

²⁶ Y xpiuhbéjtämä Dioshespíritu hajxy nebiaty hajxy hamdsoo nga'a jadáañäm. Hix, coö ja'a Dios hajxy naxy nja wi'i pia'ya'axáañäm, cab hajxy naxy nnajuøøyyäm tijatiä Dios hajxy nmäyujwáañämb, waambatiä Dios hajxy nmänuu'xtáacämät. Naxy hajxy jaduhñ njájtäm coö ja'a capxy ja'a mädia'agy hajxy hoy xquia'a habädsømáañäm. Nä'ä møcxéjjäm nä'ä ho'ogyxiéjjäm hajxy jaduhñ. Pero coö hajxy nga'a najuøøyyämät nebiä Dios hajxy nmänuu'xtáacämät, mänitä Dioshespíritu hajxy xpiuhbéjtämät.

²⁷ Piuhebjpiä Dioshespíritu pønjetiä Diosmädia'agy tøø miäbøcy. Hoorä, ñajuøøbiä Dioshespíritu jaduhñ waambatiä Dios jioot chocy coö ja'a Dios hajxy nmänuu'xtáacämät. Jaduhñä Dioshespíritu hajxy xyajxiic xyajmädiáacäm ja'a ngopcootyhájtäm. Y ñajuøøbiä Dios jaduhñ waambaty hajxy nxiic nmädiáacäm ja'a ngopcootyhájtäm.

²⁸ Hoorä, cab hajxy njootmayhájtämät coö Dios ja'a tsaachpä peenä hajxy xmiøøyyämät. Haa ca'a, nnajuøøyyäm hajxy jaduhñ coö Dios quiøxy najuøøy nebiaty hajxy njajt nhabéjtäm, pønjetiä Dios tsojp. Nnajuøøyyäm hajxy jaduhñ coö Dios wyiinmay coö hajxy ween xyhoyøøyyäm cøxiä wiinä. Tøø hajxy xyajnähdíjjäm coö hajxy njäya'ayhájtämät nebiä jioot choquiän. Jaanä jaduhñ hajxy xyhawáañämbä cooc hajxy xyhuunghadáañäm.

²⁹ Hix, jéquiänä Dios yhuuc najuøøbiä pønjetiä miädia'agy hñajty mäbøgáañäxäp. Je'ehajxy jaduhñ yajnähdíjjä coö hajxy yhojiäya'ayhadät nebiä Jesucristo yhojiäya'ayhatiän, ja'a Dios yHuung. Jaduhñä Dios hajxy nägøxiä xyhixáañänä nebiä Jesucristo yhuchän. Højts jaduhñ xñänøømäm coö Jesucristo hajxy nbuhya'ayhadáañäm, je'eguiøxpä coö Dios hajxy xyhuunghájtäm.

³⁰ Coö Dios hajxy jecy xyajnähdíjjäm coö miädia'agy hajxy nmäbøjcämät, paady hajxy tøø xyhawáañäm cooc hajxy xyhuunghadáañäm. Y coö miädia'agy hajxy jaduhñ tøø njaançh mäbøjcäm, mänit hajxy xpiädáacäm hawa'adstuum. Jaduhñ tøø miänaambä coogä cuhdujt hajxy nmøødhadáañäm nebiä Jesucristo miøødän.

³¹ Homiädoonä hädaa mädia'agy, túhmäts. Coö Dios hajxy jecy xyajnähdíjjäm coö hajxy xyhuunghájtäm, ni pøn jaduhñ xquia'a yajtu'udägøøyyämät. Tøyhajt jaduhñ coö Dios yajtøjiaada'añ tijaty tøø wyiinmay ja'a højtscøxphájtäm.

³² Xjiaançh tehñ chójcämä Dios jaduhñ. Høxtä ñähdujc ja'a yhamdsoo Ung coö hajxy hoy xñähho'túutäm nägøxiä. Jaançh tehñ miøjjä Dios mayhajt jaduhñ tiuunñ ja'a højtscøxphájtäm. Jaduhñä tøyhajt hajxy nmøødhájtäm coö ja'a mayhajt jaduhñ tehngajnä jiaac tuna'añ.

³³ Coö Dios hajxy tøø xyajnähdíjjäm coö miädia'agy hajxy nmäbøjcämät, paady hajxy pøn hoy xquia'a näxø'øwø'øwáañäm maa Dioswiinduumän. Haa ca'a, tøø Dios hajxy xpiädáacäm hawa'adstuum.

³⁴ Ni pøn hajxy jaduhñ hoy xquia'a päda'agáañäm haxøøgtuum. Haa ca'a, jimä Jesucristo hajxy xñähgapxtúutäm Dioswiinduum. Ja'a Dios yhahooyhaambiä Jesucristo yhäña'ay. Møj jaançh jim yhity. Paady hajxy jim xñähgapxtúutäm, coö hajxy hoy tøø xñähho'túutäm, møød coö hoy tøø jiuypiojtägach. Jaduhñ hajxy tøø xyajnähwaats tøø xyajcuhwáatsäm.

³⁵ Xjiaançh tehñ chójcämä Jesucristo hajxy jaduhñ nägø'ø nädecypiä. Nn'ägädä møødhájtämä tøyhajt hajxy jaduhñ coö hajxy mänaa xquia'a nähgue'egáañäm, hoyyä tsaachpä peenä hajxy cu nja páatäm, hoy hajxy pøn cu xjia tsaachtiiuunäm ja'a Diosmädia'agyquiøxpä, hoyyä yuu hajxy cu xjia páatäm, hoyyä wit tucxy hajxy cu nja

yajmaajiájtäm, hoy hajxy mäjahñdiuum cu nja wädíjtäm, hoyyá cahwiindøyhána'c hajxy cu xjia yaghó'cäm.

³⁶ Jaduhñ jim myiñ cujaay maa Diosmädia'aguiän:

Xøømdsuhm højtsä cahwiindøyhána'c xjia wi'i yagho'oga'añ ja'a miich
mmädia'agyquiøxpä;

ho'cøøc højts xñä'ägädä wa'ana'añ,
nømä Dios ñämaayyä.

³⁷ Hoy hajxy jaduhñ cu nja jajt, hoy hajxy jaduhñ cu nja habéjtäm, nnä'ägädä mee'xtugáanäm hajxy jaduhñ. Ja'a Jesucristo hajxy jaduhñ xñä'ägädä puhbéjtäm, je'eguiøxpä coo hajxy xjiaanç tehñ chójcäm. Naamgahnä hajxy tii xjiájtäm xyhabéjtäm, jaduhñä Jesucristo hajxy maas hoy nbanøcxämät hamuumdu'joot.

³⁸⁻³⁹ Coo Dios hajxy xjiaanç tehñ chójcäm, jaduhñä tøyhajt hajxy njaanç tehñ miøødhájtäm coo Jesucristo hajxy tehngajnä xñä'ägädä puhbedáanäm, hoy ñejpiä hajxy cu nja jajt cu nja habéjtäm, hoy yhädaa yaabä naaxwiinä, hoy hajxy cu nja hó'cäm, hoy hajxy cu nja tågóoyyäm, hoy hajxy cu nja jaac jugyhájtäm, hoy hajxy cu nja jaac tsuxc-hájtäm, hoyyá møjcu'ugong hajxy cu xjia mädsiphájtäm, ja'a pojhajpä taxa'ahajpä, hoyyá møjcu'ugong hajxy cu xjia mädsiphájtäm, hoy miaajä hajxy jia hity, hoy yhädaa yaabä naaxwiinä, hoy jyim tsajpootypä, hoy jyiiby møjcu'uhaamä. Pero cabä cuhdujt hajxy ñä'ägädä møødä maa Jesucristocøxpän, ja'a hajxy nWi-indsøn'hájtämbä. Paadiä Jesucristo hajxy homiänaajä xchójcäm; paady hajxy homiänaajä xcwieendähájtäm.

9

¹⁻³ Jaanç tehñ jiootmayhájpøchä judíosøxpähajxy je'eguiøxpä coo hajxy quia'a mäbøga'añ coo ja'a Jesucristo hajxy tøø ñähho'tu'udyii. Høøch nmägunaaxhajxy je'e. Jaanç tehñ chaaçhøøbiøch njoot jaduhñ coo hajxy quia'a mäbøga'añ. Tøyhøch jaduhñ nmädia'agy. Coochä Jesucristo nmøødhity tu'ugjoot tu'ugwiinmahñdy, jaduhñä tøyhajt hajxy nmøødhádät cooch nga'a høhnda'agy. Ja'a nhamdsoo juøhñdyháamhøch jaduhñ nnajuø'øy cooch nga'a høhnda'agy, møød coo Dioshespíritu jaduhñ miänaambä. Jaanç tehñ chaaçhøøbiøch njoot jaduhñ coochä nmägunaaxhajxy quia'a mäbøga'añ; høxtä cu nja nähhädaactu'udáan'høch hajxy jiiiby haxøøgtuum coo Dios jaduhñ cu miänaañ. Jaduhñhøch nmäna'ana'añ coochä Jesucristo cu xquia'a yajnähwaach, pero coochä nmägunaaxhajxy cu yajnähwaatsä. Hoorä, ja'a Israel, højts nhap ndeedy hijty je'e jegyhajty.

⁴ Jéquiänä Dios ja'a Israel miøødyajcuhdujcy coo Israel yhap yhoc-hajxy hänäjty piuhbedáanäxä. Jaanç huunghajtä hajxy je'eduhñ ja'a Diósäm. Je'eduhñ ñänøømby coo hajxy jaduhñ quiu'ughajtä ja'a Diósäm. Yhijx hajxy jaduhñ coo Dios ja'a miäjaa yajcähxø'cy jim mädøyyä maa Diostøjcän. Jaduhñ hänäjty quiähxø'øgy nebiä jocän. Mänitä Dios hajxy yhanemä madiu'u. Mänitä Moisés quiujahy nebiatiä Dios hänäjty tøø yhane'emiän. Mänitä Dios cuhdujt yejcy nebiatiä Dios hajxy jaduhñ jim wyi-ingudsähgø'øwät. Mänitä Dios tøyhajt yejcy coo ja'a yajnähwaatspä hajxy hänäjty yaj-näguexa'añii. Cooch jaduhñ nnänømy coo hajxy yhaphaty yhoc-hadyii ja'a Israel, højts jaduhñ niñänøømäp, højts judíosahajxy.

⁵ Højtsä jecyjiiäya'ay nhaphajt ndeedyhajt, ja'a Abraham møødä Isaac møødä Jacobo. Cumaayyä ja'a jecyjiiäya'ayhajxy jaduhñ ja'a Diósäm. Y coo Cristo yaa hoy jiiäya'ayhaty hädaa yaabä naaxwiin neby højtshájtäm, jaanä jaduhñ je'e yhaphájtäbä yhoc-hájtäbä ja'a Israel. Dioshajpä Cristo. Cøxiä wiinä je'eduhñ yhane'emy homiaajä. Tsøc hajxy wiingudsähgø'øyyäm homiänaaxøøjä coo miøjjä coo jiaançhä. Tøyhajt jaduhñ.

⁶ Cooch nmäna'añ coochä nmägunaaxhajxy quia'a mäbøga'añ coo Jesucristo hajxy tøø xñähho'túutäm, cáboch jaduhñ nmäna'ana'añ cooc tyijy ja'a Dios ja'a miädia'agy

tøø quia'a yajtøjaty coo jecy miänaañ coogä Israel yhap yhoc-hajxy hänajty yajnahwa'adsa'añii. Hix, coo Dios ja'a Israel jecy ñämaayy coo yhap yhoc-hajxy hänajty yajnahwa'ads yajcuhwa'adsaañäxä, cabä Dios hänajty miäna'ana'añ cooc tyijy hajxy hänajty nägøxiä ñähwa'ads quiuhwa'adsa'añ. Jue'e hänajty ñänøømby pønjaty mabøjp coo Dios yajtøjaty waambaty tøø quiapxy tøø miädia'agy. Hix, cabä Israel yhap yhoc-hajxy nämay miäböcy coo hajxy tøø ñähho'tu'udyii ja'a Jesucristäm. Pønjaty jaduhñ mabøjp, je'eds hajxy jaduhñ tøyhajt haphájtäp hoc-hájtäp ja'a Israel. Pønjaty jaduhñ ca'a mabøjp, cab hajxy tøyhajt yhaphaty yhoc-hadyii ja'a Israéläm.

⁷ Jaaná jaduhñä Abraham ja'a yhuunghajxy je'ebä. Tu'uquiiä jaduhñ ñänøømä ja'a Diósäm coo hoyhajt weenhajt hänajty mio'owáañäbä nebiä Abraham hänajty mio'owa'añii. Ja'a Abraham ja'a yhuung tu'ugpä, cab je'e jaduhñ ñänøømä coo tii mio'owa'añii. Jaduhñ jim myiñ cujaay maa Diosmädia'aguiän: “Ja'a miich mhuung Isaac, je'e yhap yhoc-höch jaduhñ nhixáañäp nej miich mhap nej miich mhocän”, nømä Dios ja'a Abraham jecy ñämaayy.

⁸ Jaduhñä tøyhajt hajxy nmøødhájtäm coo Isaac yhap yhoc-hajxy quiu'ughájtäxä ja'a Diósäm. Paadiä Isaac yhap yhoc-hajxy jaduhñ quiu'ughájtäxä ja'a Diósäm coo Abraham jecy yhawaañä coo tio'oxiøjc hänajty yhuungpaada'añ. Coo ja'a Abraham jaduhñ yhawáañäxä, tøø ja'a Sara hänajty miäjay, y cabä yhuung hänajty ni tu'ugtä.

⁹ Hix, cahnä Sara hänajty yhuungpaadyñä, tøyöyämä Dios ja'a Abraham hänajty jaduhñ ñäma'ay: “Coo jaduhñ yhabáadät, mänit miich mhixa'añ coochä nmädia'agy nyajtøjiada'añ. Co'na'awaambä mdo'oxiøjc Sara. Ya'ayhäna'c jaduhñ minaamb ca'awaamb”, nømä Dios ja'a Abraham jecy ñämáaguiumbä. Ja'a Isaac jaduhñ nänøømä coo hänajty myina'añ quia'awa'añ.

¹⁰ Jaaná jaduhñä Rebécabä, ja'a Isaac tio'oxiøjc, coo je'e quio'naabiä, mänitä pigäna'c-hajxy myiiñguiahy tähoocmechpä.

¹¹⁻¹² Cahnä Rebeca hänajty quio'na'ayñä, tøyöyäm hänajty ñäma'ayii ja'a Diósäm coo ja'a Jacobo ja'a Esaú hänajty yhane'ema'añ, hoyyä Esaú jayøjp jia mejch, hoyyä Jacobo jia jaac tehñ miejch høxhaam. Paadiä Dios jaduhñ miänaañ, tøyöyäm hänajty wyiinmahñdyhaty coo Jacobo yhap yhoc-hajxy hänajty quiu'ughadääñäxä ja'a Diósäm, møød coo Esaú yhap yhoc-hajxy hänajty jaduhñ quia'a cu'ughadääñäxä, hoy hänajty quia'a jagä cähxø'ogyñä pø hoyhäna'c-hadaambä Rebeca yhuunghajxy hänajty, pø caj. Hix, hamdsoojotä Dios jaduhñ wyiinmahñdyhajty nebiä Jacobo hänajty yhixa'añ, nebiä Esaú hänajty yhixa'añ.

¹³ Jaduhñ jim myiimbä cujaay maa Diosmädia'aguiän: “Ndsójc-höchä Jacobo møødä yhap møødä yhoc-hajxy, páadyhöch hajxy nnäxuuds'añ. Pero ja'a Jacobo yhajch, ja'a Esaú, cábøch je'e nnäxuuds'añ. Ni cábøchä yhap yhoc-hajxy jaduhñ nnäxuudsáañäbä”, nømä Dios cujecy miänaañ.

¹⁴ Pero cab hajxy hawiinmats waamb nmänáañämät cooc tyijy Dios hoy quia'a wiinmahñdyhajty coo miänaañ coogä Jacobo yhap yhoc-hajxy hänajty piuhbedääñäxä, møød coogä Esaú yhap yhoc-hajxy hänajty quia'a puhbedääñäxä. Caj pues. Haa ca'a, hoyyä Dios jaduhñ wyiinmahñdyhaty homiänaaxøøjä.

¹⁵ Hix, jaduhñä Dios ja'a Moisés jecy ñämaayy: “Nnäxúu'chpøch nba'häyóobiøch pønjátyhöch njoot chojpy cooch jaduhñ nnäxúudsät, cooch jaduhñ nba'häyówät. Cáboch nnäxuuds'añ pønhoch njoot quia'a tsojpy cooch nnäxúudsät.”

¹⁶ Coo Dios jaduhñ miänäxuuč, jaduhñ hajxy nyajnajuøöyäm coo hojiot jiaanč tehñ miøødä. Hamdsoo ñägapxy pøn ñäxuudsamby. Hamdsoojot jaduhñ miänäxuuč, caj jie'eguiøxpä coo hajxy cu nja nämáayyäm coo hajxy ween xñäxúu'tsä, coo hajxy ween xpia'häyóowäm. Ni quia'a je'eguiøxpä coo njoot hajxy nbädáacäm coo hajxy hoy njäya'ayhájtämät.

17-18 Hix, ñäxuu'chpä Dios pøn ñäxuudsaa_mby. Jaanä jaduh_nduh_mbä, yajnähdijpiä Dios coo quiopc-hajxy xiéxät pønä Dios jaduh_n yajmädsøjpy coo quiopc-hajxy jaduh_n xiéxät. Jaduh_nä Dios ja'a gobiernä ja'a quiopc jecy yajxejxä, ja'a hänajty jim hanehm_bä Egip-tonaaxooty. Tøyhajt jaduh_n. Haa ca'a, jaduh_n jim myiñ cujaay maa Diosmädia'aguiän coo Dios ja'a gobiernä jaduh_n ñämaayy: “Páadyhöch miich tøø nyajmøjtägø'ø, tøøch hänajty nwiinmay coochä nmäjaa hänajty nyajcähxø'øga'añ maa mijts mnaax maa mijts mgajptän. Cooch ngu'ug jim nhøxwoobädsömät maa mijts mnaax maa mijts mgajptän, jaduh_nhöch nmäjaa njaanč teh_m yajcähxø'øga'añ. Jaduh_nä mädia'agy wiädita'añ wiinduhmyhagajpt ja'a høøchcøxpä cooch njaanč teh_m miøjjä cooch njaanč teh_m jiaančhä”, nømä gobiernä jecy ñämaayyä.

19 Jii häna'c-hajxiäda'a näje'e miäna'ana'añ: “Cabä Dios wyiinmahñdy yhooyä je'eguiøxpä coo hajxy xñäxø'øwøøyyäm cooc højts pojpä cädieey nmøødhajtäm. Haa ca'a, hamdsoo højts ngopc tøø xyajxéxäm. Paady højts pojpä cädieey nmøødhajtäm.”

20 Pero cab jaduh_n yahixø'øy coo pøn jaduh_n miäná'anät. Tøyhajt jaduh_n. Caj pues. Haa ca'a, yaa hajxy njäya'ayhajtäm. Cabä cuhdujt hajxy nnä'ägädä møødhajtäm ni weeñtiä coo Dios hajxy nhadsóowämät. Hix, jaduh_n mäwíinäts højts Dios xya-jnähdijjäm nebiä tu'tspojtspädøjc-hajxy piochän nebiä jioot hajxy yajmädsøquiän. Co tu'ts quiapxø'øgät, cabä pojtspä hawiinmats ñámá'awät: “Tiich yajxon coo xquia'a pojch.” Caj pues, cab jaduh_n yahixø'øy coo tu'ts jaduh_n miäná'anät.

21 Haa ca'a, miøødä tu'tspojtspädøjc cuhdujt hajxy jaduh_n coo tu'tsnaax hajxy yajtúnät nebiä jioot hajxy yajmädsøquiän. Pø chojpiä jioothajxy jaduh_n coo tsowdu'ts hajxy piódsät, pues miøødä cuhdujt hajxy jaduh_n coo hajxy jaduh_n piódsät. Y pø chojpiä jioothajxy jaduh_n coo cuhga'aybä hajxy piódsät, jaduh_nä cuhdujt hajxy miøødäbä coo hajxy jaduh_n piódsät. Jaduh_n mäwíinädsä Dios cuhdujt miøødäbä coo hajxy xya-jnähdijjämät nebiä jioot choquiän. Co jioot jaduh_n chógät coo hajxy xpiädáacämät hawa'adstuum, pues miøødä cuhdujt jaduh_n coo hajxy jim xpiädáacämät. Y coo jioot jaduh_n chógät coo hajxy xpiädáacämät haxøøgtuum, jaduh_nä cuhdujt miøødäbä coo hajxy jaduh_n jim xpiädáacämät.

22 Y jaanä jaduh_nä Dios cuhdujt miøødäbä coo jaduh_n miee'xtujcy ja'a cahwi-indøjiäya'aguiøxpä. Miøødä Dios cuhdujt jaduh_n coo ja'a cahwiindøjiäya'ayhajxy yajcumädowøøjät. Pero cab hajxy choj cumädowa'añ, hoy hajxy tøø jia cädieey hanaxiä. Hawiinmats hit jaduh_n coo hajxy paquiä quiümädowät. Y coo Dios hänajty yajcumädowa'añ ja'a quiädieeguiøxpähajxy, hijxtahñdä Dios jaduh_n yajcähxø'øga_mby coo mäjaa møc miøødä. Jaduh_n yajcähxø'øga_mbä coo haxøøghäna'c-hajxy tehngajnä quia'a mee'xtuga'añii.

23-24 Coo Dios jaduh_n jecy wyiinmahñdyhajty coo haxøøghäna'c yajcumädowa'añ, paady jaduh_n wyiinmahñdyhajty neby højts jaduh_n hoy nwiinjuøøyyämät coo jaduh_n yhawiinmatsä coo haxøøghäna'cä quiädieey hajxy quiümädowät. Jaanä jaduh_nduh_mbä, paadiä Dios jäya'ay näje'e quia'a yajcumädoy, je'eguiøxpä coo hajxy ñäxuučhii ja'a Diósäm, hoy hajxy hänajty tøø jia cädieey. Jequiän hajxy jaduh_n yajnähdijjä coo hajxy jim ñöcxät Dioswiinduum. Højts jaduh_n xñänøømäm coo Dios hajxy tøø xyajnähdijjäm coo hajxy jim xyajnøcxáanäm wyiinduum, pønjaty hajxy tøø xyajwiinwaanøøyyäm coo hajxy xyhuunghadáanäm, møødä judíosahajxy, møødä cajpä judíosahajxy. Jaduh_n hajxy nwiinjuøøyyäm coo Dios møjmayhajt tøø tiuñ maa højtscøxphajtäm, møød coo hojioot jiaanč teh_m miøødä.

25 Maa Oseas nocy jecy quiujahyyän, jaduh_n jim myiñ cujaay coo Dios jaduh_n miänaañ:

Yøø jäya'ayhajxy cajpä judíos, cábøch hijty ngu'ughaty.

Cábøch hijty ndsocy. Pero tøøch nyajnähdijnä cooch ngu'ughadáannä. Ndsójnábøch jaduh_n.

26 Wiingtuum miánaangumbä: “Cábøch mijts hijty ngu'ughaty.”

Pero jaduhñhájtoch mijts nhuunghadaañä, homiaajä hajxy mhity, nõmä Dios miánaañ. Homiánaajä Dios yhity.

27 Y ja'a Isaías, jaduhñ je'e jecy quiujahy: “Yøø judíoshajxy, hoy hajxy jaduhñ jia nämayyä nebiä tsäbiu'ujän, näweñtiä hajxy jaduhñ cho'oga'añ.

28 Ja'a jäya'ayhajxy yaa cädiehbiä hädaa yaabä naaxwiin, mobädajpä hajxy yajcumädowna'añii ja'a Diósäm. Tähooc-yajcumädoybä hajxy yajcumädowna'añii hoyhoy.”

29 Jaanä jaduhñä Isaías jecy miädiáaccumbä ja'a judíoscøxpähajxy:

Cøxiä wiinä Dios yhane'emy homiaajä. Coø højtsä Dios häxøpy tøø xquia'a näxúu'tsäm, tøø højts häxøpy ngøxy cuhdägóoyyäm, nebiä jäya'ayhajxy jecy quiuhdägooyyän, ja'a hajxy hijty jegyhajty tsänaabiä maa cajpt hijty xiøhatiän Sodoma møød Gomorra.

30 Nébiøch cham tøø ngujaayän, jequiän højtsä Dios xyajnähdijy coø højts hänajty xquiu'ughada'añ, højts judíoshajpä. Pero, ja'a jäya'ayhajxy cajpä judíos, cabä Dios hijty je'e näxuuçh. Ni ja'a jäya'ayhajxy hijty quia'a näxúu'tsábä, ja'a hajxy hänajty ca'a tajp ca'a maabiä maa ñähwaatstaact hajxy piáadät. Pero cahnä jiegø'øy coø mädia'agy hajxy tøø miädoonä coogä Dios ja'a Jesucristo yaa quiejxy, cooc ja'a Jesucristo hajxy hoy xñähho'túutäm. Coø hajxy jaduhñ miädooy, näje'e hajxy miäbøjcy; paady hajxy tøø ñähwa'açh, paady hajxy tøø quiuhwa'açh.

31-32 Pero yøø judíoshajxy, jaduhñäc tyijy hajxy hijty ñähwa'adsa'añ je'eguiøxpä cooc tyijy hajxy hoy quiudiuñ nebiä Moisés jecy quiujahyyän. Pero cab hajxy jaduhñ ñä'ä nähwaach je'eguiøxpä coø tøyhajt hajxy quia'a møødä coø Dios miäyajnähwa'açh je'eguiøxpä coø hojioot miøødä, ca'a jie'eguiøxpä coø jäya'ayhajxy hoy jia wi'i jäya'ayhada'añ. Paadiä judíoshajxy quia'a nähwaach je'eguiøxpä coø hajxy quia'a mäbøjcy coø højtsä Jesucristo xñähho'túutäm. Jaduhñ mäwiin hajxy jiaty nebiä häna'c quiuhnepiän tsaanähgøxp päyø'cuyc. Cab hajxy ñä'ägä mech maa hajxy hänajty jia wi'i ñøcxa'añän.

33 Tøøyyämä Dios hänajty ñajuø'øy coø judíoshajxy hänajty quia'a mäbøga'añ coø Dios ja'a Jesucristo yaa quiejxy hädaa yaabä naaxwiin. Jimä cajpt tu'ug xiøhaty Siön. Jimä judíoshajxy chäna'ay, ja'a Dios quiu'ughajpiä. Jaduhñ jim myiñ cujaay maa Diosmädia'aguiän:

Jímhøch ngu'ug chäna'ay maa cajpt jaduhñ xiøhatiän Siön.

Jímhøchä tsa tu'ug nbäda'aga'añ, weenä jäya'ayhajxy jim quiuhnepy maa tsaajän, ween hajxy jim quiäday.

Ja'a Jesucristo jaduhñ mäbaat neby yøø tsaajän. Hix, pøn jaduhñ ca'a mäbøjp coø højtsä Jesucristo hoy xñähho'túutäm, jaduhñ je'e miäbaady nebiä häna'c cuhnejpän. Quiumädownaamby je'e. Pero pøn jaduhñ jaançh mäbøjp ja'a Jesucristocøxpä, je'eds hodium päda'agaañäp.

10

1 Mägu'ughajpädøjc, jia tsójpjøch njoot jaduhñ coø judíoshajxy ñähwá'adsät. Jaduhñhøchä Dios nja pa'ya'axy jaaya'aguiøxpä. Haa ca'a, judíohájjøch høøçhpä.

2 Jia wi'i quiudiunaambiä Diosmädia'agy hajxy. Tøyhajt jaduhñ. Pero cabä Diosmädia'agy hajxy hoy wyiinjuø'øy.

3 Hamdsoo hajxy jia wi'i yajniñähwa'adsa'añii yhamdsoo cuhdujtcøxpä. Hix, cab hajxy jaduhñ wyiinjuø'øy tiiguiøxpä Dios ja'a jäya'ay piäda'agy hawa'adstuum. Paady hajxy jim piäda'agyii coø Dios ja'a miädia'agy hajxy miäbøjcä coø hajxy jaduhñ ñähwa'adsa'añii.

4 Pønjaty mäbøjp coø hajxy tøø ñähho'tu'udyii ja'a Jesucristäm, je'edsä Dios ñäxuu'chp. Coø Jesucristo hajxy cu xquia'a nähho'túutäm, ngumädownaañäm hajxy hijty, je'eguiøxpä coø jecymiädia'agy hajxy tøø nga'a cudíuunäm, ja'a Moisés jecy quiujahyyäbä. Ja'a Jesucristo mäbøcypiä, ca'xiä jecymiädia'agy quiudiuñ, ja'a Moisés jecy quiujahyyäbä, nebiä

Dios hänajty tøø yhane'emiän. Jaančh tehñ yhooyä Jesucristo jaduhñ yhäna'c-hajty. Cabä pojpa cädieey hänajty ñä'ägädä møødä ni weeñtiä. Paady hijty jaduhñ quia'a hahixø'øy coo jaduhñ cu yho'cy. Pero coo ja'a Jesucristo hajxy hoy xñähho'túutäm, paady yø'ø jecymiädia'agy hajxy jaduhñ xquia'a hanéhñänä, ja'a Moisés jecy quiujáhyyäbä.

⁵ Jaduhñä Moisés jecy quiujahy coo judíoshajxy pedyii quiudiúnät nebiaty hänajty tøø quiujaay. Jaduhñägä hoyhajtä weenhajt hajxy piáadät.

⁶ Coo hajxy nmäbójcämät maa Jesucristocøxpän, jaduhñä hoyhajtä weenhajt hajxy nbáatämät. Ja'a Diosmädia'agy jaduhñ mänaamb. Pero cab hajxy ndaj nmáayyämät: “Pøn jim nõcxäp tsajpootyp coo yajñähwaatspä wioomänácät.”

⁷ Ni jaduhñ hajxy nga'a taj nga'a máayyämät: “Pøn jiiby hädá'agäp møjcu'uhaam coo ja'a yajñähwaatspä wioobédät, jiiby maa ho'ogyjiäya'ay yháañämähajxy yhitiän.” Paady hajxy jaduhñ nga'a taj nga'a máayyämät je'eguiøxpä coo Jesucristo yaa tøø yhoonä hädaa yaabä naaxwiin, coo hajxy hoy tøø xñähho'túutänä, møød coo jadähoc jiuypiojtägajch. Hix, jaduhñ hajxy tøø xyajñähwaats tøø xyajcuhwáatsäm.

⁸ Nägooyä hajxy jaduhñ nmäbójcämät coo Jesucristo hajxy tøø xñähho'túutäm, jaduhñ hajxy nnähwáatsämät. Cab hajxy jaduhñ pøn xñämáayyämät coo nähwaatstaact hajxy wiingtuum nhøxtáayyämät. Cab hädaa mädia'agy jaduhñ ñä'ägä tsipä. Howyiinjuøñä hädaa mädia'agy jaduhñ. Jaduhñ højts nnä'ägä yajñähixø'øyhaty.

⁹ Coo hajxy mejtstu'u ngudiúunämät, mänit hajxy nnähwáatsämät. Je'ečh jaduhñ nnänøømby mejtstu'u, coo hajxy nnägápxämät cu'ughagujc coo Jesucristo hajxy nWi-indsønähjtäm, møød coo hajxy nmäbójcämät hamuumdu'joot coo Dios ja'a Jesucristo yagjuypiojtägajch mänaabä hänajty tøø yho'oguiän. Coo Dios ja'a Jesucristo jaduhñ yagjuypiojtägajch, jaduhñ hajxy nnajuøøyyäm coo Dios ja'a Jesucristo quiumay, møød pønjaty ja'a Diosmädia'agy mäbøjp ja'a Jesucristocøxpä.

¹⁰ Coo hajxy jaduhñ nnä'ägä mäbójcämät hamuumdu'joot, jaduhñä Dios hajxy xquiumáayyämät. Y coo Jesucristo hajxy nmädiáacämät cu'ughagujc coo hajxy nWi-indsønähjtäm, mänit hajxy nnähwáatsämät.

¹¹ Jaduhñä Diosmädia'agy miäna'añ: “Pøn jaduhñ jaančh mäbøjp ja'a Jesucristocøxpä, je'eds jaduhñ päda'agáañäp hodium ja'a Diósäm.”

¹² Hix, tu'cuhdujt højtsä Jesucristo xyhíxäm, møødä judíoshajxy, møødä ca'a judíoshajxypä. Tu'cuhdujt højtsä Jesucristo jaduhñ xyhuunghajtäm. Coo højtsä Jesucristo nba'yáaxämät coo nbojpa ngädieey hajxy xyajñähwáatsämät, tsipcøxp højts jaduhñ xñäxúu'tsämät, tsipcøxpä mayhajt jaduhñ tiúnät maa højtscøxphajtäm.

¹³ Jaduhñä Diosmädia'agy miänáangumbä: “Pønä Jesucristo pa'yaaxp, hodium je'eduhñ piäda'aga'añii ja'a Diósäm.”

¹⁴ Pønjaty ca'a mädoobnä ja'a Jesucristocøxpä, cabä Jesucristo hajxy jaduhñ hoy miänuu'xta'aga'añ. Tøyhajt jaduhñ. Pø cahnä hajxy jaduhñ miädoyhaty coogä Jesucristo hajxy tøø xñähho'túutäm, cab hajxy hoy miäbøga'añ. Pø cahnä hajxy yajwiingapxø'øyii ja'a Jesucristocøxpä, cab hajxy hoy miädowa'añ.

¹⁵ Ja'a Diósädsä cugapxy quejx coo ja'a miädia'agy yajwá'xäxät maa jäya'ayhajxiän, ja'a cahnä hajxy hänajty miädoybä. Jaduhñ jim myiñ cujaay maa Diosmädia'aguiän: “Pønjetiä Diosmädia'agy tøø miädoy coogä Dios yajñähwa'ačh pønjetiä Dios pa'yaaxp, paady hajxy xioonda'agy coo hajxy jaduhñ tøø miädoonä. Jaančh tehñ yhoy jaduhñ coo Diosmädia'agy jaduhñ wia'xy.”

¹⁶ Pero cabä jäya'ayä Diosmädia'agy hajxy nägøxiä tøø miäbøcy ja'a Jesucristocøxpä. Jaduhñä Isaías jecy quiujahy: “Dios, tøø miäch mmädia'agy nja yajwa'xä, pero cab pøn tøø miäbøcy.”

¹⁷ Mayhagajptä Diosmädia'agy tøø wia'xy ja'a Jesucristocøxpä. Tøø jäya'ayhajxy may miädoonä. Näje'e hajxy hoy tøø wyiinjuø'øy. Je'eds hajxy jaduhñ tøø miäbøcy. Coo hajxy quia'a mädowät, cab hajxy jaduhñ miäbøgat.

¹⁸ Hoorä, ja'a judíoshajxy, tøyhajt jaduhñ coo hajxy je'e miädóyyäbä. Haa ca'a, jaduhñ jim myiñ cujaay maa Diosmädiá'aguiänä: “Wiinduhmyhagajptä mädia'agy tøø wia'xy ja'a Dioscøxpä.”

¹⁹ Y jia wiinjuøøyy ja'a judíos ja'a mädia'agy hajxy jaduhñ ja'a Jesucristocøxpä. Pero cab hajxy miäbøjcy. Ja'a jäya'ayhajxy ca'a judíospä, je'eds hajxy jaduhñ mäbøjc. Jaduhñä Moisés jecy quiujahy coogä judíoshajxy ñämaayyä ja'a Diósäm:

Mbejxyp mijts pønjaty ca'a judíoshajpä cóogøch tyijy nga'a cu'ughaty.

Pero ngu'ughadáambiøch hajxy je'e. Jaduhñ mijts mnänømy cooc tyijy hajxy tii quia'a jaty quia'a najuø'øy.

Pero nnäxuudsáambiøch hajxy je'e, paady mijts mjootma'ada'añ, nømä judíoshajxy jecy ñämaayyä.

²⁰ Mänitä Isaías høxhaam jiaac cujahy coogä Dios miänaañ:

Pønjatä nähwaatstaact hijty ca'a høxtaaby, tøøchä nmädia'agy hajxy xmiäbøjcänä.

Cábøch hajxy hijty xyajtøy, pero tøøch hajxy nyajwiinjuøøñä cooch hojioot njaançh tehñ miøødä.

²¹ Jaduhñägä Dios miänáangumbä: “Yø'ø judíoshajxy, tøøch hajxy jaduhñ nja wi'i miänuu'xta'agy cooch nmädia'agy hajxy xmiäbøjcät. Pero cab hajxy jaduhñ ñä'ägä mäbøga'añ. Jaançh tehñ xiexä quiopcä tiaatsc-hajxy jaduhñ”, nømä Dios jecy miänaañ.

11

¹ Pero cábøch nmäna'ana'añ coo judíoshajxy tøø ñajtshixø'øyyii ja'a Diósäm. Caj pues, caj tiähoocnajtshixø'øyyä; paquiä hajxy ñajtshixøøyyä. Haa ca'a, judíoshajpøch høøchpä. Abrahámhøch nhaphajt ndeedyhajt. Y ja'a Benjamínhajpä, møød je'eçh nhaphajty ndeedyhajty. Ja'a Abraham yhap yhoc je'ebä, ja'a Benjamínhajpä.

² Cab højtsä Dios tøø xñajtshixø'øy, højts judíoshajpä. Hix, jecuiän højtsä Dios xyajnáhdijy coo højts hänajty xquiu'ughada'añ. Jaduhñ jim myiñ cujaay maa Diosmädia'aguiän coogä Elías ja'a miägunaax jecy ñäxø'øwøøyy, ja'a judíoshajxy, ja'a Diosmädia'agy hajxy hänajty quia'a mäbøgaambiä. Ja'a Elías, jecuiän je'e quiuguexyhajtä Diósäm. Pia'yaaxypä Elías ja'a Dios hänajty coo jaduhñ miänäxø'øwøøyy:

³ “Dios, yø'ø judíoshajxy, haxøøg hajxy tøø jiatcø'øy. Tøø miich mguguexyhajxy xyagho'cä. Tøø tsaamaa'xy hajxy yajma'ady maa animalho'ogy hajxy hijty ño'oguiän coo miich hajxy hijty xwyiingudsähgø'øy. Nägøxiä jäya'ayhajxy tøø yagho'ogyii, ja'a miich hajxy hijty xwyiingudsähgøøbiä. Nidiúhmhøch tøø nmähmø'øy jujcy. Høøchpaady hajxy xjia wi'i yagho'ogaambä”, nømä Elías ja'a Dios jecy ñämaayy.

⁴ Mänitä Dios yhadsooyy: “Caj tiøyyä cooch miich nidiuhñ xjiaac wiingudsähgø'øyñä. Jé'enøchä jäya'ayhajxy xwyiingudsähgø'øyñä ja'a hajxy näjxujmilpä. Cabä Baal hajxy wyiingudsähgø'øy. Quepychech je'e ja'a Baalhajpä”, nømä Dios jecy miänaañ.

⁵ Ja'a judíoshajxy, jecuiän hajxy jaduhñ yajnähdiijä ja'a Diósäm coo hajxy hänajty quiu'ughada'añii. Paady hajxy jaduhñ quiu'ughadyii coo Dios hojioot jiaançh tehñ miøødä. Pero näweeñtiä judíos ja'a Dios miädia'agy hajxy miäbøjcä, caj ñamayyä. Jäda'anäbaadyñä, jiinä judíos ja'a Dios miädia'agy hajxy näje'e miäbøjcä. Je'enä hajxy quiu'ughadyiinä ja'a Diósäm. Coo hajxy jaduhñ ñäxuuchii, paady hajxy je'enä wioowhidyyii, jaduhñä Dios miädia'agy tehngajnä miäbøjcäxät.

⁶ Jaduhñä judíoshajxy yajnähdiijä coo ja'a Dios miädia'agy hajxy miäbøjcät ja'a Jesucristocøxpä. Paady hajxy jaduhñ yajnähdiijä je'eguiøxpä coo Dios hojioot miøødä, ca'a jie'eguiøxpä coo hajxy hoy jiäya'ayhaty. Coo jäya'ayhajxy häxøpy ñäxuuchii ja'a Diósäm je'eguiøxpä cooc tyijy hajxy hoy jiäya'ayhaty, cab hajxy jaduhñ cu nmänáanäm coo Dios hojioot miøødä.

⁷ Hix, näje'e judíoshajxy yajnähdiijä coo hajxy ñähwá'adsät näweeñtiä. Jaduhñä Dios miädia'agy hajxy miäbøjcä ja'a Jesucristocøxpä. Ja'a judíoshajxy nämaybä, cab hajxy

jaduh_n yajnáhdijjá, hoy hajxy hánajty jadhun_n jia wi'li ñähwa'adsa'añ. Hix, xejx ja'a quiopcä tiaatsc-hajxy jadhun_n. Cabä Dios miädia'agy hajxy miäbøjca ja'a Jesucristocøxpä.

⁸ Jadhun_n jim myiñ cujaay maa Diosmädia'aguiän: “Tøø quiopcä tiaatsc-hajxy yaxéjxäxä ja'a Diósäm. Jadhun_n hajxy yhity nebiä wiindspän nebiä cuhnatpän høxtä jäda'anäbaadyñä.”

⁹ Jadhunä David jecy quiujahbiä:

Xøødsuu ja'a judíosahajxy naxy yagjätäp. Jaduh_näc tyijy ja'a Diosmädia'agy hajxy hoy quiudiuñ.

Jaduh_näc tyijy hajxy quiumayii ja'a Diósäm. Pero ween hajxy hoy quiumädoy. Hix, cab hajxy tøyhajt miäbøga'añ.

¹⁰ Ween hajxy jadhun_n jiaty nebiä wiindspän nebiä xoodspän.

Ween hajxy ni mänaa quia'a wiinjuø'øy nebiä piojpa quiädieeyhajxy ñähwá'adsät.

Jadhunä David jecy quiujahy.

¹¹ Hoorä, nämayyä judíosahajxy tøø quia'a mäbøcy ja'a Jesucristocøxpä. Pero cab hajxy nägøxiä ñajtshixø'owa'añii ja'a Diósäm. Cab hajxy nägøxiä quiumädowa'añ. Pero jadhunä Dios wyiinmaayy coo jäya'ayhajxy ween mäbøcy ja'a Jesucristocøxpä, ja'a hajxy ca'a judíospä. Coö ja'a ca'a judíosahajxy ñähwaatsnä, paadiä judíosahajxy näje'e jia mänaambä coö hajxy ween ñähwáatspät.

¹² Coö judíosahajxy quia'a mäbøjcy ja'a Jesucristocøxpä, paady hajxy paquiä ñajtshixøøyyä ja'a Diósäm. Pero mänitä Dios wyiinmaayy coo jäya'ayhajxy ween ñähwa'açh wiinduhmyhagajpt, ja'a hajxy cajpä judíos. Paadiä judíos ja'a quiopcä tiaatsc-hajxy yaxéjxäxä ja'a Diósäm. Paadiä hoyhajtä weenhajt hajxy quia'a mooyyä ja'a Diósäm. Cu miooyyä hajxy jadhun_n coö hajxy cu mäbøjcy ja'a Jesucristocøxpä. Pero ja'a jäya'ayhajxy ca'a judíospä, ja'a hajxy jim tsänaabiä wiinduhmyhagajpt, je'edsä hoyhajtä weenhajt mäbøcypiä mooyyä. Hoorä, habaadaamb jadhun_n coö judíosahajxy miäbøgaambä ja'a Jesucristocøxpä. Mänit hajxy je'e ñähwa'adsaambä. Jaanç teh_n jiootcuyc hajxy jadhun_n yhidáannäbä. Mänitä jäya'ayä hoyhajtä weenhajt hajxy maas may jiaac mo'owa'añii wiinduhmyhagajpt.

¹³ Mijts jadhun_n ca'a judíosahajpä, mijts nyajwiinmädiaagøøñäp. Dióshøch jadhun_n tøø xwyiinguexy coöchä miädia'agy jim nyajwá'xät maa mijtsän. Xtiuungmöoyhøchä Dios jadhun_n. Nägø'ø nädécypiøchä nduung jadhun_n nnä'ägä tuñ,

¹⁴ ween mijts nämay mmäbøcy ja'a Jesucristocøxpä, ween mijtsä judíos jadhun_n xpi-ahixy. Coö mijtsä judíos jadhun_n xyhíxät coö mijtsä Dios ja'a hoyhajtä weenhajt tøø xmio'oy, mänitä judíosahajxy miäbøgaambä ja'a Jesucristocøxpä. Høøch nmägunaaxhajxy je'e ja'a judíosahajxy. Ween hajxy jadhun_n ñähwáatspät neby mijts tøø mnähwa'açhän.

¹⁵ Coö judíosahajxy quia'a mäbøjcy ja'a Jesucristocøxpä, paady hajxy ñajtshixøøyyä ja'a Diósäm. Paadiä Dios hánajty tøø wyiinmay coö mijtsä miädia'agy mmäbøjcänät, pønjayty jadhun_n ca'a judíospä. Y coö judíosahajxy jadhun_n miäbøjpät ja'a Jesucristocøxpä, mänit hajxy quiuhbøgáanägumbä ja'a Diósäm. Mänit hajxy yagjugyhada'añii homiänaajä ja'a Diósäm neby jaaya'ay jiugyhatiän.

¹⁶ Ja'a judíosahajxy, ja'a Abraham hajxy jecy yhaphajt tieedyhajt. Yhaadshajt tyictshajt ja'a Abraham hajxy jadhun_n. Jéquiänä Dios ja'a Abraham quiu'ughajty. Paadiä judíosahajxy jäda'ahaty quiu'ughajtäbä ja'a Diósäm. Jadhun_n mäwiinä Abraham miäbaady nebiä quepytyictsän. Y ja'a judíosahajxy, jadhun_n mäwiin hajxy miäbaatpä nebiä quepyhaa'xän.

¹⁷ Hoorä, nämayyä judíosahajxy tøø quia'a mäbøcy ja'a Jesucristocøxpä. Paady hajxy tøø ñajtshixø'øyii ja'a Diósäm. Jadhun_n mäwiin hajxy miäbaady nebiä olivohaa'x tøø piuhdøjjiän. Jadhun_n miädia'agytiägø'øy coö judíos ja'a hoyhajtä weenhajt hajxy quia'a mo'owáanänä ja'a Diósäm. Y mijts ca'a judíospä, jadhun_n mäwiin hajxy mmäbaatpä nebiä

yuuc-holivojaa'xän coo tøø yagjøjheedsø'øy maa olivohaa'x tøø piuhdøjjiän. Coo hajxy tøø mmäbøjnä, paadiä Dios hajxy xmiooñä ja'a hoyhajtä weenhajt.

18 Pero caj mijtsä judíos hawiinmats mbéxät. Ca'a hajxy mniguiumayii. Cab hajxy mmäná'anät: "Cabä judíoshajxy quiu'ughájtänä ja'a Diósäm. Højtsä Dios xquiu'ughájtänäp, højts ca'a judíospä." Hix, Dios mijts jaduhñ tøø xquiuunuu'xy je'eguiøxpä coo Abraham jecy quiunuu'xä møødä yhap møødä yhoc, ja'a judíoshajxy. Coo Dios ja'a Abraham jecy cu quia'a cunuu'xy, ni mijts hijty xquia'a cunuu'xaambä.

19 Wehndä pøn miäná'anät: "Yø'ø judíoshajxy tøø quia'a mabøquiäbä ja'a Jesucristocøxpä, høøchcøxpä hajxy tøø ñajtshixø'øyii ja'a Diósäm. Hix, páadyhøchä Dios xchocy cooch nga'a judíosä. Cabä judíoshajxy chójcänä ja'a Diósäm."

20 Tøyhajt jaduhñ. Paadiä judíoshajxy tøø ñajtshixø'øyii ja'a Diósäm coo hajxy tøø quia'a mabøcy ja'a Jesucristocøxpä. Y mijts, coo hajxy tøø mmäbøcy, paady mijtsä Dios tøø xquiuunuu'xy. Pero ca'a hajxy mniguiumayii coo Dios hajxy jaduhñ xñä'ä najtshixø'øbiät. Hix, caj mijts hijty hoy mjäya'ayhaty. Coo Dios hojioot miøødä, paady hajxy xquiuunuu'xy.

21 Jaanč tehñ yajcumayaambä judíoshajxy jaduhñ. Paady hajxy jaduhñ ñiguiumayii coo hajxy tøø quia'a mabøcy coo hajxy tsipcøxp ñäxuudsø'øjät ja'a Diósäm. Paady hajxy ñajtshixø'øyyä ja'a Diósäm, hoyyä Abraham hajxy jecy jia haphajty jia teedyhajty. Jaanä jaduhñ mijtspä, mijts ca'a judíospä, coo mijts jaduhñ mniguiumáayyät, mänitä Dios hajxy jaduhñ xñajtshixø'øbiät.

22 Hix, jiaanč tehñ quiunuu'xypä Dios ja'a quiu'ug. Pero pønjatiä Dios tøø ñajtshixø'øy, je'eds hajxy jaduhñ jaanč tehñ yajcumädowáañäp ja'a Diósäm. Paady mijtsä Dios xjiaanč tehñ quiunuu'xy, coo hajxy mmäbøcy. Pero pø cab hajxy jaduhñ mmäbøgaanä, mänitä Dios hajxy xyajcumädowaambä.

23 Hoorä, ja'a judíoshajxy tøø quia'a mabøquiäbä, coo hajxy jaduhñ miäbøjpät, mänit hajxy jadähooc quiu'ughájtägumbät ja'a Diósäm. Haa ca'a, miøødä Dios mäjaa jaduhñ coo hajxy jaduhñ quiu'ughájtägumbät.

24 Hix, ja'a judíoshajxy, Abraham hajxy jecy yhaphajt tieedyhajt. Jéquiänä Abrahamhajxy yajnähdiijä ja'a Diósäm coog hajxy jaduhñ quiu'ughadø'øjät ja'a Diósäm, møødä Abraham yhap yhoc-hajxy, ja'a judíoshajxy. Tøyhajt jaduhñ, paadiä Abrahamhajxy paquiä hoy quiu'ughadäänägumbä Diósäm. Y mijts, jaanä jaduhñ mijtsä Dios xquiu'ughájnäbä, hoy mijts hijty jegyhajty xquia'a cu'ughaty. Paady, ca'a hajxy mmäna'añ cooc tyijy ja'a judíoshajxy quia'a cu'ughajtägatsa'añii ja'a Diósäm.

25-26 Mägu'ughajpädøjc, nébiøch chamñ nmädia'aga'añän, náamnøchä Dios tøø xñajtsapxø'øyyä. Cahnä jäya'ay hädaa mädia'agy hajxy nämay miädoynä. Paady mijts jaduhñ nhawáañäm, jaduhñ hajxy mga'a niguiumayø'øjät, hoyyä Dios hajxy tøø xjia cu'ughaty. Tøyhajt jaduhñ coo judíoshajxy nämay tøø quia'a mabøcy ja'a Jesucristocøxpä. Pero habaadaambä jaduhñ coo hajxy nägøxiä miäbøgaanä. Mänit hajxy jaduhñ miäbøga'añ coo mijts hänajty tøø mmäbøcy, ja'a mijts ca'a judíospä, mäduhñtiä hajxy hänajty mmäbøga'añ. Jaduhñ jim myiñ maa Diosmädia'aguiän:

Mänitä yajnähwaatspä jim choona'añ maa cajpt jaduhñ xiøhatiän Sión, maa judíoshajxy chäna'ayän.

Cøxaambä judíoshajxy jaduhñ miäbøga'añ ja'a yajnähwaatspäcøxpä. Cøxaambä piojpä quiädieeybä hajxy ñähwa'adsa'añ.

27 Cooch hajxy jaduhñ nyajnähwá'adsät, mänit jaduhñ tiøjiada'añ nébiøch hajxy hijty tøø nyajwiinwaanø'øyän mänájøch hajxy nmøødyajcuhduquiän hawiinjemy, nømä Dios miänaañ.

28 Coo judíoshajxy tøø quia'a mabøcy ja'a Jesucristocøxpä, paady hajxy tøø ñajtshixø'øyii ja'a Diósäm. Y coo hajxy jaduhñ tøø ñajtshixø'øyii, paady mijtsä Dios tøø xyajnähdiijy coo hajxy mmäbøgät ja'a Jesucristocøxpä, mijts ca'a judíospä. Pero, hoyyä judíoshajxy

tøø quia'a jagä mäsöcy, tsójcäpnä hajxy jaduhñ ja'a Diósäm je'eguiøxpä coo yhapä tieedyhajxy jecy yajnähdíjähä ja'a Diósäm coo hajxy quiu'ughadøøjät.

²⁹ Hix, cabä Dios mänaa yhöñda'agy. Homiänaajä yajtøjaty waambaty quiapxy miädia'agy. Y coo Dios jaduhñ jecy miänaañ coogä judíosahajxy homiänaajä quiu'ughada'añii, yejca Dios ja'a tøyhajt jaduhñ. Hix, cabä Dios ja'a miädia'agy mänaa yajtägach. Jaduhñä tøyhajt hajxy nmøødhájtäm coo Dios jiaançh yajtøjiada'añ waambaty tøø miäna'añ ja'a judíosøxpähajxy.

³⁰ Mijts ja'a ca'a judíospä, cabä Diosmädia'agy hajxy hijty mmädoyyä. Cabä Dios hajxy hijty mwiingudsähgøøy. Y coo judíosahajxy tøø quia'a mäsöcy ja'a Jesucristocøxpä, paadiä Dios hojioot miøødä ja'a mijtscøxpä.

³¹ Jäda'anäbaadyñä, cabä judíos ja'a Dios miädia'agy jäda'ahaty miäbögaanä ja'a Jesucristocøxpä. Coö hajxy jaduhñ quia'a mäböga'añ, paady mijtsä Dios xñäxuu'tsnä, mijts ca'a judíospä. Hoorä, coo mijtsä judíos xyhixät coo mijtsä Dios xñäxuu'ch, mänit hajxy jaduhñ miäbögaambä ja'a Jesucristocøxpä. Mänit hajxy ñäxuu'dsäanäbä ja'a Diósäm.

³² Jéquiänä Dios jäya'ay yhawaanä nägøxiä coo pojpä cädieey hajxy miøødä, møødä judíosahajxy, møødä ca'a judíosahajxypä. Jaduhñ hajxy jecy yhawáanähä coo hajxy hawiinmats quiumädówät. Hix, paadiä Dios jaduhñ miänaañ, je'eguiøxpä coo jäya'ayhajxy hánajty nägøxiä ñäxuu'dsä'añii tu'cuhdajt, møødä judíosahajxy, møødä ca'a judíosahajxypä. Coö Dios hajxy häxøpy tøø xquia'a näxúu'tsäm, nägøxiä hajxy hijty ngumädowáanäm.

³³ Jaançh tehñ jiajp, jaançh tehñ ñajuøøbiä Dios. Cab hajxy hoy nnä'ägä wiinjuø'owáanäm nebiatiä Dios wyiinmay. Hix, hojiootä Dios jiaançh tehñ miøød coo hajxy nägøxiä tøø xñäxúu'tsäm, møødä judíosahajxy, møød cajpä judíosahajxy. Nägøxiä ja'a hoyhajtä weenhajt hajxy xmio'owáanäm tu'cuhdajt.

³⁴ Jaduhñ jim myiñ cujaay maa Diosmädia'aguiän: "Cabä Dios ja'a wyiinmahñdy pøn ñajuøøyyäxä. Cabä Dios pøn miäyajtøy nebiä wyiinmahñdyhadät.

³⁵ Cabä Dios pøn miänuu'xyhaty."

³⁶ Hamdsoojootä Dios ja'a naaxwiimbä jecy yhädiuun møødä jäya'ay nägøxiä. Tijaty yaa jäjtäp túunäp hädaa yaabä naaxwiin, ja'a Dios jaduhñ hanehmb coo jaduhñ jiadøøjät, coo jaduhñ tiunøøjät. Y tijaty jaduhñ jadaañäpnä tunáañäpnä, ja'a Dios jaduhñ yajtøjiadaamb nebiaty hánajty tøø wyiinmay. Tsögä Dios hajxy møj jaançh pädaacäm homiänaajä. Tsög hajxy homiänaajä wiingudsähgøøyyäm. Amén.

12

¹ Mägu'ughajpädøjc, miøødä Dios hojioot maa højtscøxphájtäm. Chamçh mijts nhane'emy coo hajxy hamuumdu'joot mniyegøøjät Dios quiø'øjooty tiecyjiooty. Jaduhñä Diosmädia'agy hajxy hoy mgudiúnät hamuumdu'joot. Jaduhñä Dios hajxy hoy mwiingudsähgøøwät nebiä Dios hajxy xyajmädsøquiän.

² Ca'a hädaa wiinmahñdy hajxy myajtuñ nebiä jäya'ay wyiinmahñdyhajxy yaajän. Pønjatiä Dios quia'a cu'ughajpy, je'eds hädaa yaabä wiinmahñdy hajxy yajtuumb. Cabä yhäxøøgwiinmahñdy hajxy ñajtshixø'owa'añ. Ca'a hajxy mbahixy. Hawiinjemybiä wiinmahñdy hajxy jaduhñ mmøødhájnäp, je'eguiøxpä coo Jesucristo hajxy mmøødhijnä tu'ugjoot tu'ugwiinmahñdy. Jaduhñä tøyhajt hajxy mmøødhádät tijatiä Dios hajxy xyajmädsøjp coo hajxy mdúnät. Homiänaajä Dios hajxy xyajmädsójcäm coo hajxy hoy njäya'ayhájtämät, coo hajxy hoy ndúunämät. Coö hawiinjemybiä wiinmahñdy hajxy jaduhñ nmøødhájtämät, jaduhñä tøyhajt hajxy jaduhñ nmøødhájtämät tijatiä Dios hajxy xyajmädsójcäm coo hajxy ndúunämät.

³ Mayhajtä Dios jaduhñ ñä'a tuun ja'a høøhcøxpä coöchä cuhdajt jaduhñ xmiooyy coöch mijts nmägäpñ nhané'emät. Ca'a hajxy mniguiumayii cooc tyijy hajxy cøxiä wiinä njaançh tehñ jiaty. Tijatiä tuungä Dios hajxy tøø xmio'oy, je'eds hajxy mmøjpädä'agäp.

Ca'a wiingtuung hajxy mmøjpäda'agy. Hoy hajxy mdúnät nebiatiä Dios hajxy tøø xyajnáhdijy.

⁴ Hix, nägøxiä ni'xcopc hajxy nmøødhájtäm møødá cø'ødecy, møødá wiinjøjp, møødá copctaatsc. Cab hajxy tiu'ugtuungä; haagä hawiingjaty hajxy tiuñ. Pero haagä tuungpaatp hajxy jaduñ.

⁵ Jaduhñ mäwiin højts nmäbáatäm nebiä tu'ugni'x tu'ugcopcän coo hajxy tu'cuhdujt nmäbøjcäm ja'a Jesucristocøxpä, hoy hajxy nja nämayahájtäm. Jaduhñ hajxy hawiingjaty ndúunäm. Jaduhñ hajxy nnibiuhbéjtäm hamiñ haxøpy.

⁶ Tsøg hädaa tuung hajxy hoy yajnøcxäm nebiatiä Dios hajxy tøø xyhanéhäm. Mayhajtä Dios jaduhñ tiuun coo wiinmahñdy hajxy cøjwiinduum xmióoyyäm nebiaty hajxy ndúunämät. Pønjaty tøø tiuungmo'oyii coo Dios ja'a miädia'agy hajxy yajwá'xät nebiaty hajxy hánajty tøø ñajtscapxøøyyäxä, ween hajxy jaduhñ yajwa'xy nebiaty hajxy hánajty piuhbedyii.

⁷ Pønjaty tøø tiuungmo'oyii coo hajxy miäbuhbédat, ween hajxy hamuumdu'joot tiuñ. Pønjaty tøø tiuungmo'oyii coo Diosmiädia'agy hajxy yajwá'xät, ween hajxy hoy yajwa'xy.

⁸ Pønjaty tøø tiuungmo'oyii coo hajxy miäjootcapxmøcpøgät, ween hajxy hoy tiuñ. Pønjaty mäyøø, weenä häyoobä hajxy piuhbety hamuumdu'joot. Pønjaty tøø tiuungmo'oyii coo hajxy miähané'emät maa tsajtøjcän, ween hajxy hoy miähane'emy. Hix, Dios ja'a cuhdujt jaduhñ yejc coo hajxy jaduhñ miähané'emät. Pønjaty tøø tiuungmo'oyii coo mayhajt hajxy tiúnät maa häyoobädøjcän, møød maa yaamgto'oxyhajxiän, ween hajxy hamuumdu'joot piuhbety. Møød weenä pa'amjäya'ay hajxy quiuhixy.

⁹ Tsøg hajxy hamuumdu'joot niçhøjcäm nibia'häyóowäm. Tsøgä haxøøgpä hajxy najtshixøøyyäm. Tehngajnä howyiinmahñdy hajxy tsøc tsójcäm.

¹⁰ Hamiñ haxøpy hajxy mniçhogøøjät mnibia'häyowøøjät neby tu'ugpuhya'ay neby tu'ugpuhdo'oxypän. Hamiñ haxøpy hajxy mniwyiingudsähgø'øwøøjät. Cab hajxy mnibiexøøjät.

¹¹ Hamuumdu'jootä Wiindsón Jesucristo hajxy mmädúnät. Jootcujc hajxy jaduhñ mdúnät. Cab hajxy jaduhñ mänaa mnänuuxø'øwät.

¹² Coo hajxy pøn xchaächtiúnät, cab hajxy mmøjpädá'agät; mmee'xtúgäp hajxy jaduhñ. Mnajuøøby hajxy jaduhñ coo hajxy jim mnøcxa'añ maa Dioswiinduumän. Paady hajxy jaduhñ mxoondá'agät. Homiänaajä Dios hajxy mba'yá'axät.

¹³ Coo pøn tii yajmaajiádät, naxy hajxy mdehm piuhbédat. Je'eçh jaduhñ nnänøømby pøn jaduhñ mabøjp ja'a Jesucristocøxpä. Pønjaty jaduhñ mejtsp maa mdøjc-hajxiän, myajtøjtägø'øwäp hajxy je'e. Myajcáyäp myaghú'ugäp hajxy jaduhñ.

¹⁴ Coo hajxy pøn xchaächtiúnät, cab hajxy mmähanhádät. Pero mmänuu'xtá'agäp ja'a Dios hajxy coo hajxy ween ñähwa'açh.

¹⁵ Pønjaty xoondaacp, mmøødxoondá'agäp hajxy je'e. Pønjaty jøøby xuu'tsp, mmøødjø'øw mmøødxúudsäp hajxy je'ebä.

¹⁶ Tu'ugcopc tu'ugwiinmahñdy hajxy mnimiøødhidøøjät. Cab hajxy pøn mbéxät. Jootcujc hajxy mhídät, hoyyä møjtuumg hajxy mga'a jagä møødá. Cab hajxy mänaa mniguiumayøøjät.

¹⁷ Coo häna'c hajxy xyhäyoowhíxät, cab hajxy myaghawiimbijtägátsät. Hoy hajxy mjäya'ayhádät, jaduhñä Dios hajxy jaduhñ xquiumáyät; jaduhñ mijtsä cu'ug waamb xquia'a nänómät. Pero xwyiingudsähgø'øwäbä cu'ug hajxy jaduhñ.

¹⁸ Coo mijtsä cu'ug xjia wli jiccapxø'øwät coo hajxy jaduhñ mbahíxät nebiaty hajxy haxøøg jiatcø'øyän, cab hajxy jaduhñ mbahíxät. Pero coo hajxy waamb xquia'a nämá'awät, mänit hajxy hoy yajxon mmøødmädiá'agät. Cab hajxy pøn mmädsiphádät.

¹⁹ Mägu'ughajpädøjc, coo hajxy pøn xyhäyoowhíxät, cab hajxy myaghawiimbijtagátsät. Dios jaduhñ yaghawiimbídäp. Jaduhñ jim myiñ cujaay maa Diosmädia'aguiän coogä Dios jaduhñ miänaañ: “Høøch jaduhñ nyaghawiimbídäp.”

²⁰ Coo hajxy pøn xmiädsiphádät, cab hajxy mmädsiphajtagátsät. Jaduhñä Diosmädia'agy miäna'añ: “Pø yähó'cäbä häna'c ja'a miich hänajty jaduhñ xmiädsiphajpä, myajcáyäp myaghú'ugäp jaduhñ. Pø tødsøyyäp, mmó'owäbä nøø. Coo jaduhñ mgudiúnät, hoy-hoyyä häna'c chähdiúnät, ja'a miich hänajty jaduhñ xmiädsiphajpä.”

²¹ Nägüeeñtä hajxy mhídät, cabä haxøøgpä hajxy myaghawiimbijtagátsät. Coo hajxy jaduhñ mjatcø'owät, myajcähxø'ogäp hajxy jaduhñ coo mhaxøøgwiinmahñdy hajxy hänajty tøø mbadu'ubøjcumbä. Pero coo häna'c hoy yajxón mmägápxät, ja'a mijts hänajty xmiädsiphajpä, jaduhñ hajxy myajcähxø'ogät coo hawiinjemybiä wiinmahñdy hajxy hänajty mmøødhajnä. Mänitä Dios jaduhñ xquiumáyät.

13

¹ Tsøg hajxy nägøxiä cudiúnäm nebiatiä cuduung hajxy xyhanéhmäm. Hix, Dios ja'a cuhdujt møc møød. Je'e ja'a cuhdujt yejp jadähooc. Pønä cuhdujt møød, paady jaduhñ miøødä coo tøø mio'oyii ja'a Diósäm.

² Pøn jaduhñ ca'a cudiunaamb nebiatiä cuduung jia hane'emiän, quiumädowaamb by hajxy je'e. Hix, ja'a Dios ja'a cuduung pädaac coo yhané'emät. Jaduhñds je'e, pø cab hajxy jaduhñ mgudiuna'añ nebiatiä cuduung yhane'emiän, jaduhñ miäbaady coo Dios miädia'agy hajxy mga'a cudiunaañä.

³ Pønjaty hoy wädijp, cabä cuduung hajxy chähgø'ø. Pero pønjaty hoy ca'a wädijp, je'eds mäbøcypä tsähgøøby. Coo hajxy hoy mwädítät, mänitä cuduung hajxy xquiumáyät. Cab hajxy jaduhñ xchaächtiúnät.

⁴ Hix, ja'a cuduunghajxy, moonsähájtäp hajxy je'e ja'a Diósäm. Paady hajxy jaduhñ tiuñ, coo mijts hajxy jaduhñ xwioowhídät. Jaduhñä cuhdujt hajxy tøø miøoyyäbä coo mijts hajxy xyajcumädówät coo mijts hänajty tøø mgädieey. Paady hajxy jaduhñ mdsähgø'owät.

⁵ Naxy hajxy mdehm quidiúnät nebiatiä cuduung hajxy xyhane'emiän, coo Dios hajxy jaduhñ xnä'a yajcumädówät. Jaanä jaduhñduhmbä, coo hajxy hamdsoo mna-juø'ø coo jaduhñ yähixø'ø coo hajxy hoy mwädítät, paady hajxy jaduhñ mgudiúnät waambatiä cuduung hajxy xyhane'emiän. Coo hajxy jaduhñ mga'a cudiúnät, cab hajxy jootcujc mhídät, je'eguiøxpä coo hajxy hänajty mnajuø'ø hamdsoo coo hajxy hänajty tøø mgädieey.

⁶ Jaanä jaduhñduhmbä, tsipcøxp hajxy mnähjuudiú'udät tijaty häna'c hajxy xyanämaaby coo hajxy mnähjuudiú'udät. Hix, ja'a Dios ja'a cuhdujt jaduhñ yejc coo mijtsä häna'c jaduhñ xyagjúyät.

⁷ Hähixøøby jaduhñ coo cuduung hajxy mmäjúyät nebiaty hajxy xyajnäma'ay. Jaanä jaduhñ yähixøøbiä coo cuduung hajxy mwiingudsähgø'owät, miøjjä miuutscä.

⁸ Naxiä mnuu'xy hajxy mdehm jiahmiédsät. Naxy hajxy mniçhogøjät nebiä tu'ugpuhya'aybän, nebiä tu'ugpuhdo'oxypän. Hix, pøn wiinghäna'c tsojp, hoy jaduhñ quidiuñ nebiatiä Dios hajxy xyhanéhmäm.

⁹ Jaduhñä Diosmädia'agy miäna'añ: “Pø jim miich mdo'oxiøjc, cabä wiingpä mmøødhídät. Cab mmäyaghó'ogät. Cab mméedsät. Cabä mmädøjcä jie'e mhadsóçät.” Hoorä, coo wiinghäna'c mdsógät hamuumdu'joot, hoy jaduhñ mgudiúnät nébiøch naañnä tøø nmädia'aguiän.

¹⁰ Hix, pøn wiinghäna'c jaanç tsojp hamuumdu'joot, cab jaduhñ mänaa yhäyoowhixa'añ. Hoorä, coo wiinghäna'c mjaanç tsógät hamuumdu'joot, hoy ca'xy mgudiúnät nebiä Dios yhane'emiän.

11 Naxy hajxy jaduhñ mdehm ñichogóójtät. Hix, mnajuøøby hajxy jaduhñ coo tøø jiecy mänaa hajxy tøø mmäbøquiän. Habáatnäp jaduhñ coo Jesucristo hajxy min xyajpädø'ogáañäm, coo hajxy jim xyajnøcxáañäm tsajpootyp. Nägüeentä hajxy jaduhñ mwädítät. Hix, cab hajxy nnajuøøyyäm mänaa Jesucristo yaa quiädaactägatsa'añ, coo hajxy jaduhñ xñä'ä nähgädaacpéjtämät. Hix, coo jaduhñ quiädaactägátsät, mänit hajxy xyajtøyhajtyegáañäm.

12 Habáatnäp jaduhñ coo hajxy yaa ndsoonáañäm, coo hajxy jim nnøcxáañäm tsajpootyp. Tsøcxä ja'a haxøøgpä hajxy najtshixøøyyäm neby hajxy yaa tøø njäya'ayhájtäm, cahnä Dios hajxy hñajty nwiingudsähgøøyyäm.

13 Tøø Dios hajxy xyajnähdíjjäm coo hajxy homiänaajä njugyhájtämät neby je'e jiugyhatiän. Paadiä Diosmädia'agy hajxy hoy nbanøcxáañäm. Tsøcxä hajxy hoy wädíjtäm, ca'a jiaduhñä nebiä häna'c-hajxy hagogdstuum wädijpäñ. Cab hajxy mhaxøøghu'ug mhaxøøgiøø'xät. Cab hajxy comjaty mhú'ugät. Cab hajxy jim mnøcxät maa cuh-hinðo'oxiøjc-hajxiän. Tsøgä to'oxiøjc hajxy wiingudsähgøøyyäm. Hix, ja'a cu'ug hajxy xyhíjäm neby hajxy njäya'ayhájtäm, pø hoy, pø caj. Cab hajxy haxøøg mnä'ägä jatcø'øwät. Cab hajxy pøn mmähanhádät, hoy hajxy jia mäyøøjä que mijts. Cab hajxy tii mmädsibø'øwät.

14 Ja'a Jesucristo hajxy nWiindsønähájtäm. Je'e hajxy xyhanéhäm. Jaanç tehñ yhoy je'e wyiinmahñdyhaty. Naxy hajxy jaduhñ mdehm miøødhídät tu'ugjoot tu'ugwiinmahñdy. Jaduhñä mhaxøøgwiinmahñdy hajxy hoy mhøxhíxät. Jaduhñ hajxy hoy mhäna'c-hádät.

14

1 Jii jäya'ayhajxy näje'e, cahnä Diosmädia'agy hajxy hoy yhabøcyñä, hoy hajxy tøø jia mäbøcy ja'a Jesucristocøxpä. Hahixøøby jaduhñ coo hajxy mmägu'ughádät. Pero cab jaduhñ yhahixø'øy coo mädia'agy hajxy mmøødyajyónät ja'a cuhdujtcøxpä.

2 Pønjatä Diosmädia'agy hoy tøø yhabøcy, ñajuøøby hajxy je'eduhñ coo jaduhñ yhawinmatsä coo hotyijjä mgáyät. Pero pønjaty hoy tøø quia'a habøcy, cábac tyijy yhooyä coo tsu'uçh ndsú'tsämät. Páadiäc tyijy quia'a hoyyä coo tsu'uçh ndsú'tsämät, yajnajuøøby jaduhñ coo häna'c ja'a tsu'uçh hajxy hñajty tøø quiunuu'xy maa habojsnaxy wyiinduumän. Jaduhñäc tyijy miäbaady néjjiämä habojsnaxy jaduhñ mwiingudsähgøøbiän.

3 Hoorä, pø mdsu'chp miichä tsu'uçh, cab jaduhñ mbéxät ja'a häna'cä tsu'uçh ca'a tsu'tspä. Jaanä jaduhñduhmbä, pønä tsu'uçh ca'a tsu'tsp, cab jaduhñ waamb ñämä'awät ja'a häna'cä tsu'uçh tsu'tspä cooc tyijy jaduhñ quiädieey. Haa ca'a, ja'a Dios yhuung je'ebä.

4 Cabä cuhdujt jaduhñ myiñ coo waamb mnämä'awät pønä Diosmädia'agy panøcxp. Haa ca'a, ja'a Dios ja'a mioonsä je'ebä. Jagooyyä Dios cuhdujt jaduhñ miøødá coo miänä'anät pø hoyyä mioonsä quiudiuñ, pø caj. Hamdsoojä Dios jaduhñ ñämä'awät neby hoy wiädítät. Haa ca'a, ja'a Dios je'e hanehmb.

5 Näje'ejä jäya'ayhajxy miäna'añ coo poo'xxiøø jyijjä mädyii hajxy yhamajtsc-hádäp. Näje'e hajxy miänaambä coo Dios hajxy homiänaajä nwiingudsähgøøyyämät. Pero mijts, jaduhñ hajxy mgudiúnät nebiä Dios hajxy hamdsoo tøø xyajwiinjuø'øyän.

6 Hix, pønjaty jaduhñ mänaamb coogä poo'xxiøø jyijjä, nägüeentä hajxy jaduhñ wiädity ja'a poo'xxiøøjooty. Jaduhñä Dios hajxy wyiingudsähgø'øy. Jaanä jaduhñduhmbä, pønjaty jaduhñ mänaamb cooc jaduhñ quia'a cädieeyä coo tsu'uçh ndsú'tsämät, hoy hñajty tøø jia cunuu'xyii maa habojsnaxy wyiinduumän, mioobiä Dios Dioscujú'uyäp jaduhñ coo jaduhñ yajcayii. Jaanä jaduhñduhmbä, pøn jaduhñ mänaamb cooc jaduhñ quia'a hoyyä coo tsu'uçh ndsú'tsämät, jaanä jaduhñä Dios Dioscujú'uyäp mioobiä coo jaduhñ yajcayii.

⁷ Coo Diosmädia'agy hajxy nmäbójcäm ja'a Jesucristocøxpä, paady hajxy xmioonsähájtäm. Paady jaduñ quia'a hahixø'oy coo hajxy njäya'ayhájttämät nebiä nhamdsoojoot hajxy chójcäm. Ni ja'a cuhdujt hajxy nga'a møødhájtäm coo hajxy hamdsoo nniyajnáhdíjjämät mänaa hajxy nho'ogáañäm ndägoyyáañäm.

⁸ Ja'a Jesucristo hajxy xmioonsähájtäm mäduhñtiä hajxy yaa njugyhájtäm, hoy ñejpiä hajxy cu nja jajt cu nja habéjtäm. Y coo hajxy nho'c coo hajxy ndägóoyyämät, je'enä hajxy hánajty xmioonsähadáañäm homiánaajä.

⁹ Coo ja'a Jesucristo hajxy xñähho'túutäm, mänit jadähooc jiuypiojtägajch. Jaduhñ hajxy xquiu'ughájtäm, pønjaty jaduñ mäbøjp, møød hajxy tøø yho'oguiäbä, møød hajxy jaac jujcypia jaac tsuxpä. Jaaná jaduñ hajxy xyhanéhmbä.

¹⁰ Cabä mmägu'ughajpä hajxy hawiinmats mbéxät, hoyyä Diosmädia'agy hajxy hoy quia'a jagä habøcyñä. Cab hajxy pøn mnämä'awät cooc tyijy hajxy hoy quia'a cudiuñ, hoyyä wiingcuhdujt hajxy jia panøcxy. Hix, coo Jesucristo yaa quiädaactägátsät, mänit hajxy nägøxiä jim nmaxø'owáañäm ja'a Jesucristo wyiinduum tøyhajtyejpä.

¹¹ Jaduhñ jim myiñ maa Diosmädia'aguiän:

Nägøxiöchä jäya'ayhajxy nøcxy xwyiinijina'awa'añ.

Xwyiingudsähgø'owáambøch hajxy jaduñ. Jaduhñhøch hajxy xquiapxpaadaambä coöch nidiuhñ nDioshaty. Tøyhajt jaduñ, nømä Dios miánaañ.

¹² Jaduhñ hajxy nyajnajuoøyyäm coo hajxy nägøxiä jim nøcxy ndøyhajtyegáañäm Dioswiinduum.

¹³ Cab hajxy tsøc niñänóømänä cooc tyijy ja'a Diosmädia'agy hajxy hoy nga'a panøcxäm. Pero jaduñ tsøc cudiuñäm nebiatiä mäbøjpadøjc-hajxy quiudiuñän, jaduñ hajxy waamb xquia'a nänóømämät. Pøn jaduñ mänaamb cooc tyijy quia'a hawiinmatsä coo tsu'uçh ndsú'tsämät, pues, hahixøøby jaduñ coo mga'a tsú'udsät coo hánajty mmøødhity. Hix, wehñdä miich jaduñ xpiadsú'udsät. Coo miich jaduñ xjiaançh padsú'udsät, cädiéeyäp je'eduhñ.

¹⁴ Cab jaduñ quiädieeyä coo tsu'uçh ndsú'tsämät, hoy hánajty tøø jia cunuu'xyii maa habojsnaxy wyiinduumän. Nmøødhøchä tøyhajt jaduñ. Hix, tu'ugmädiá'agyhøchä Jesucristo nmøødhity, ja'a nWiindsønhájtämbä. Pero jii jäya'ayhajxy näje'e miána'añ cooc tyijy quia'a hoyyä coo tsu'uçh ndsú'tsämät. Coo hajxy jaduñ jiaançh tsú'udsät, ja'a hajxy jaduñ mänaambä, pues, cädiéeyäp hajxy jaduñ.

¹⁵ Hoorä, coo miichä tsu'uçh jaduñ mdsú'udsät, y coo jaaya'ay jaduñ xpiahíxät, ja'a jaduñ mänaambä cooc tyijy quia'a hoyyä coogä tsu'uçh mdsú'udsät, myajcädiéeyäp miich je'eduhñ. Pø jaançh tøy mdsocy, cab jaduñ myajcädiéeyät, je'eguiøxpä coo Diosmädia'agy miäbøcy. Hix, ja'a Jesucristo jaaya'ay tøø ñähho'tu'udy. Pero coo myajcädiéeyät, wehñdä Jesucristo miädia'agy ñajtshixøøyyäxät.

¹⁶ Y coo jaaya'ay jaduñ myajcädiéeyät, wehñdä miich myajnänómät. Y wehñdä jaaya'ay yajnänóømbät, ja'a Jesucristo miädia'agy tøø ñajtshixøøyyäbä. Jaduhñds je'e, maas hoy hit jaduñ coo tsu'uçh mga'a nä'ägä tsú'udsät, hoy jaduñ mja najuoøy coo jaduñ quia'a cädieeyä coo mdsú'udsät.

¹⁷ Coo hajxy tøø nmäbójcäm ja'a Jesucristocøxpä, paadiä Dios hajxy xyhanéhmänä. Hix, cabä Dios waamb miána'añ coo hajxy hotyijjä ngaayy nhúucäm; ni jaduñ quia'a mänaambä coo hajxy tii nga'a caayy nga'a húucämät. Coo Dios hajxy tøø xpiädäacäm hawa'adstuum, paady hajxy hoy njäya'ayhájttäm, paady hajxy jootcuyc nnimiøødhíjtäm, paadiä Dioshespíritu hajxy xyajxoondäacäm.

¹⁸ Hoorä, pønä Jesucristo miädia'agy jaduñ cudiunáañäp, cumayáañäp je'e ja'a Diósäm møødä cú'ugäm. Tsøcxä hajxy jaduñ cudiuñäm nebiä mäbøjpadøjc-hajxy quiudiuñän.

¹⁹ Mägu'ughajpädøjc, tsøgä hoybä hajxy tehngajnä høxtáayyäm, jaduñ hajxy jootcujc nnimiødhíjtämät, jaduñ hajxy hoy nniguiapxmøcpøjcämät, jaduñä Jesucristo miädia'agy hajxy hoy ngudiúunämät hamuumdu'joot.

²⁰⁻²¹ Cab jaduñ quiädieeyä coo hajxy hotyijä ngaayy nhúucämät. Pero pø jii mæbøjpädøjc-hajxy jaduñ näje'e miäna'añ cooc tyijy ja'a tsu'u'ch hajxy nga'a tsú'tsämat, cooc tyijy ja'a vino hajxy nga'a húucämät, pues, maas hoy jaduñ coo mga'a tsú'udsät, coo mga'a hú'ugät. Hix, coo hajxy jaduñ xyhíxät coo hánajty jaduñ mgay mhu'ugy, wehñdä hajxy jaduñ xpiahíxät. Y coo hajxy jaduñ xpiahíxät, cädiéeyäp hajxy jaduñ. Jaduñ quiähxø'øgät coo miich hánajty tøø myajcädieey. Y cab jaduñ yhooyä coo mæbøjpädøjc myajcädiéeyät hoy ñä'a tiiguiøxpä. Hix, jia wi'i pianøcxáanäbä Jesucristo miädia'agy hajxy jaduñ, y coo hajxy jaduñ quiädiéeyät, cab hajxy jaduñ hoy pi-anøcxät.

²² Hoy miich mja najuø'ø y coo quia'a cädieeyä coo hotyijä mgay mhú'ugät, cab jaduñ yhooyä coo wiinghána'c mmøødyajtsibø'øwät. Ja'a Dios miich jaduñ xyhijxp coo hoy mgudiüñ. Pøn jaduñ najuøøby coo quiumayii ja'a Diósäm nebiä quiuhdujthaty, jootcujc je'eduhñ yhity.

²³ Pero pøn jaduñ ca'a najuøøby pø yejpiä Dios cuhdujt jaduñ coo tsu'u'ch ndsú'tsämat, pø caj, coo je'e jiaanç tsú'udsät, cädiéeyäp je'eduhñ, hoy hamdsoo jaduñ jia mäna'añ cooc tyijy ja'a Dios tøø miäna'añ coo hajxy nga'a tsú'tsämat. Paady jaduñ miäna'añ, wehñdä tsu'u'ch hánajty tøø quiunuu'xyii maa habojsnaxiä wyiinduumän. Jaaná jaduñduhmbä, hoy ñä'a tiiguiøxpä, pøn jaduñ ca'a najuøøby pø tøø Dios cuhdujt yecy je'eguiøxpä, o pø caj, coo jaduñ jiaanç jatcø'øwät, cädiéeyäp jaduñmbä.

15

¹⁻² Nnajuøøyyäm højts jaduñ coo quia'a cädieeyä coo hajxy hotyijä ngaayy nhúucämät. Pero tsøgä nmägu'ughajpädøjc ja'a Diosmädia'agy jaac yajmæbøjcäm, ja'a hajxy naamdägø'ø y habøjpä, ja'a hajxy jaduñ mänaambä cooc tyijy quia'a hawiinmatsä coogä tsu'u'ch ndsú'tsämat, coogä vino nhúucämät. Cabä nhamdsoo cuhdujthajtiä hajxy nyaghíjtämät; møødä Dioscuhdujt hajxy nyaghíjtämät.

³ Hix, mänaa Jesucristo yaa yhitiän hädaa yaabä naaxwiin, cabä yhamdsoo cuhdujt hánajty yaghity. Ja'a Tieediä miädia'agy jaduñ quiudiunä, paady jaduñ chaachpøjcy. Jaduñ jim myiñ cujaay maa Diosmädia'aguiän: "Pønjaty miich haxøøg xñänøømb, jaduñ mäwiin miäbaady néjjiäm høøch xñänøømbän", nømä Jesucristo ja'a Tieedy ñämaayy.

⁴ Ja'a højtscøxpä Dios ja'a miädia'agy jecy yajcujahyyä, jaduñ hajxy hoy ngapxtäacämät. Jaduñ højtsä tøyhajt nmøødhíjtäm coo Dios yajtøjiada'añ neby jecy yajcujahyyän coo højts jim xyajnøcxáanäm maa wyiinduumän. Coo hajxy jaduñ nnajuøøyyäm coo hajxy jim nnøcxáanäm, paady hajxy hotyijä nmee'xtújcämät. Cab hajxy tsøc jootmayhíjtäm, hoy hajxy cøxypänejpiä cu nja jajt cu nja habéjtäm.

⁵ Ja'a Dios hajxy jaduñ xpuihbéjtäm coo hajxy jaduñ nmee'xtújcämät, coo hajxy jaduñ nga'a jootmayhíjtämät. Ween mijtsä Dios xpuihbety coo hajxy jaduñ mbahíxät nebiä Jesucristo hoy yhitiän. Jootcujc hajxy jaduñ nnimiødhidø'øjät tu'ugmädia'agy.

⁶ Jaduñ hajxy tu'ugmädia'agy mhídat coo Dios hajxy mgapxpáadät møj jaanç. Ja'a Dios, ja'a Jesucristo Tieedy je'e. Ja'a Jesucristo hajxy nWiindsøn'híjtäm.

⁷ Hoorä, nebiä Jesucristo hajxy xchøjcäm, jaaná jaduñ hajxy hamuumdu'joot nniçhøjcämbät. Coo cu'ug hajxy jaduñ xyhíxämät coo hajxy hánajty nniçhøjcäm, jaduñä cu'ughajxy ñajuø'øwaambä coo Dios miøjjä jiaançhä.

⁸ Jéquiänä Dios jaduñ miänaañ coogä yajnähwaats yajcuhwaatspä quiexa'añ maa judíoshajxiän. Ja'a judíos ja'a yhapä tieedy hajxy, je'eds hajxy jaduñ jecy hawáanäxä, møødä Abraham, møødä Isaac, møødä Jacob. Coo Jesucristo yaa quiejxä hädaa yaabä

naaxwiin, hoyyá judíoshajxy piuhbedyii. Tøjiajt jaduhñ nebiá Dios jecy miánaaññän coo yajnähwaats yajcuhwaatspä hñajty quiexa'añ. Hix, tømiádiaacpä Dios. Caj mänaa yhöhnda'agy. Tøyhajt jaduhñ.

⁹ Jaaná jaduhñduhmbä, paadiä Jesucristo yaa quiejxä, hoyyá jäya'ayhajxy piuhbéjtäbä, ja'a hajxy ca'a judíospä. Coö hajxy jaduhñ ñäxúu'tsäbä ja'a Diósäm, paadiä Dios hajxy mõj jaančh quiapxpaady. Jaduhñ jim myiñ cujaay maa Diosmädia'aguiän:

Miich ngapxpaadaamby mõj jaančh näguipxy mõød hajxy ca'a judíospä.

Høyháamhøch miich nwiingudsähgø'øwa'añ,

nømä Dios ñämaayyá.

¹⁰ Wiingtuumä Diosmädia'agy myiñgumbä cujaay:

Mijts ca'a judíospä, xoonđa'ag hajxy mõødä Dios quiu'ughajxy näguipxy.

¹¹ Jaduhñ cujaay myiñgumbä wiingtuum:

Mijts ca'a judíospä, weenä Dios hajxy mõj jaančh mgapxpaady wiinduhmyhagajpt.

¹² Wiingtuumä Isaías jecy quiujáhguiumbä:

Ja'a Isái yhapä yhoc, minaamb je'e miähane'ema'añ.

Ja'a jäya'ayhajxy ca'a judíospä, je'eds hajxy jaduhñ hane'emáañäp.

Jaaya'ay hajxy jaduhñ jìøbhijxyp coö hajxy min yajnähwa'ads yajcuhwa'adsa'añii, nømä Jesucristo jecy ñänøømä, mõødä jäya'ayhajxy ca'a judíospä.

¹³ Hoorä mijts, coö Diosmädia'agy hajxy tøø mmäbøcy, weenä Dios hajxy hoyhoy xyajxoonđa'agy, ween hajxy xyaghity jootcujc. Hix, tøø Dios hajxy xyhawáañäm coögä hoyhajtä weenhajt hajxy xmio'owáañäm ca'xy pedyii. Hamuumdu'joot hajxy jaduhñ mjøbhíxät. Xpiuhbédbä Dioshespíritu hajxy jaduhñ ja'a miäjaahaam.

¹⁴ Mägu'ughajpådøjc, nmøødhøchä tøyhajt jaduhñ coö hajxy hamuumdu'joot mniçhocy mnibia'häyoyii, mõød coö hojioot hajxy mmøødä, mõød coö Diosmädia'agy hajxy hoy mwiinjuø'øy, mõød coö hajxy mjaty mägäpx hane'em.

¹⁵⁻¹⁶ Nébiøch hádaa nocy chamñ ngujaayän, hamøc hadsaach mijts tøø nmägäpxy tøø nhane'emy. Nyagjahmiejchp mijts jaduhñ jadähøoc. Nmøødhøchä cuhdujt jaduhñ coöch mijts nyagjahmiédsät. Hix, ja'a Dióshøch jaduhñ tøø xtiuunqmo'oy coöchä miädia'agy nyajwá'xät ja'a Jesucristocøxpä jim maa mijtsän, mäduhñtiä hajxy mga'a judíoshaty. Coö jäya'ayhajxy nämay miäbøgät hamuumdu'joot ja'a Dioshespíritu miäjaahaam, mänit hajxy quiumaya'añii ja'a Diósäm.

¹⁷ Jootcujc-høch jaduhñ nnijwiø'øyii coöchä nduunq tøø yhoyø'øy, ja'a Dióshøch tøø xmió'oyäbä. Ja'a Jesucristøch jaduhñ xpiuhbejp, páadyhøch nduunq tøø yhoyø'øy.

¹⁸ Jayóoyyøch chamñ nmädia'aga'añ nebiátyhøchä Jesucristo xpiuhbejty mänábøchä jäya'ay ja'a Diosmädia'agy nyajmábøquiän, ja'a hajxy ca'a judíospä. Cábøch nmädia'aga'añ nebiatiä wiinghäna'c-hajxy tøø tiuñ. Mädia'agyháamhøchä jaaya'ay nyajmábøjcy, mõød coöchä hoy-yagjuøøñbä hñajty nyajcähxø'øgy.

¹⁹ Ja'a Dios, ja'a miäjaahaamä hijxtahñd tøø yajcähxø'øgy hoy-yagjuøøñä. Ja'a yh-Espírituhaamä jäya'ay tøø yajmábøcy. Wiinduhmyhagájpthøchä Diosmädia'agy hoy nyajwá'xy ja'a Jesucristocøxpä, coö jaaya'ay hajxy hoy xñähho'túutäm. Jimhøch ndägøøyy wädijpä Jerusalén. Jägüémhøch hoy nwädity. Høxtä jimhøch hoy nwädity maa naax xiøhatiän Iliria.

²⁰ Jayóoyyøch jim tøø nwädity majatiä Jesucristo hñajty tøø quia'a mädoyhadyijän. Jaduhñhøch nnä'ägä wädityhaty. Hix, cábøchä Dios xtiuunqmooyy coöch nwädítät maa wiinghäna'cä Diosmädia'agy hñajty tøø yajwá'xiän.

²¹ Pønjetiä Diosmädia'agy tøø quia'a mädoy, je'eçh tøø nyajwiingäpxø'øy. Jaduhñ jim myiñ cujaay jaaya'aguiøxpä maa Diosmädia'aguiän, ja'a hñajty cahnä miädoybä:

Pønjaty ca'a mädoobnä coö Dios ja'a yajnähwaatspä tøø quiexy, je'edshajxy jaduhñ mädoyhadaamb.

Ja'a jäya'ayä Diosmädia'agy hajxy hijty ca'a mädoobnä, jaduñ hajxy yajmøødmädia'aga'añii coo hajxy ñäxuučhii ja'a Diósäm.

²² Tøøch jim mayhooc nja nøcxa'añ maa mijtsän jim Roma. Pero cábøch hijty xñäbaadøyyä cooch jim nnøcxät. Hiç, ja'a Diosmädia'agyhøch hijty nyajwa'xyp wiinduhmyhagajpt.

²³ Pero tøøch nwädijpådøñä wiinduhmyhagajpt. Mobädájpnoch jim nnøcxaannä maa mijtsän. Tøø jaduñ majiomøjt yhiñä cooch jim tøø nja wi'i ñøcxa'añ maa mijtsän.

²⁴ Cooch mäböcy hñajty jim nnøcxa'añ España, mänitøch mäböcy jim ndu'unaxó'owät maa mijtsän. Jootcújc-høch jaduñ nnijwiø'owøøjät cooch mijts jaduñ nguhíxät. Mänitøch njaac tu'uyó'oyät cooch hñajty jim nnøcxa'añ España. Mänitäts mijts hii xpiuhbedät.

²⁵⁻²⁶ Pero cab jaduñ choj näbaadø'owa'añ cooch jim nnøcxät maa mijtsän. Hiç, Jerusalénhøch jayøjp nnøcxa'añ. Xädø'øñhøch jim nøcxy nyega'añ. Ja'a häyoobädøjc-høch nøcxy nmo'owa'añ, ja'a hajxy mäböjpä. Ja'a mäböjpädøjc-hajxy jim tsänaabiä Macedonia møød jim Acaya, jaaya'ayä xädø'øñ hajxy yajmujc. Høøchä xädø'øñ hajxy xyajmäguexaamb cooch hñajty jim nnøcxa'añ Jerusalén.

²⁷ Hamdsoojoot hajxy yajmujcy, ca'a yhøøchä nnämaayy coo hajxy yajmügät. Hawiinmats jaduñ coo mäböjpädøjc-hajxy piuhbedøøjät, ja'a hajxy jim tsänaabiä Jerusalén. Hiç, judíoshajp hajxy je'e. Jaaya'ayä Diosmädia'agy hajxy jim mäböjtsohn Jerusalén mänaabä Diosmädia'agy tiägø'øyän wädijpä ja'a Jesucristocøxpä. Mänitä jäya'ayhajxy høxhaam jiaac mädoyhajty, ja'a hajxy ca'a judíospä. Miäböjc hajxy je'ebä. Paady jaduñ yhawiinmatsä coo ja'a judíoshajxy piuhbedøøjät ja'a jäya'ayháxiäm, ja'a hajxy ca'a judíospä.

²⁸ Hoorä, coochä xädø'øñ hñajty jim hoy tøø nyecy Jerusalén, mänitøch mäböcy jim nnøcxa'añ España. Mänitøch jim ndu'unaxó'owät maa mijtsän jim Roma.

²⁹ Y cooch jim nmédsät maa mijtsän, nägø'ø nädécypiøchä Jesucristo xpiuhbeda'añ cooch mijtsä Diosmädia'agy nyajnáhixó'owät, jaduñ hajxy tu'ugmucy nhíjtämät jootcujc. Nmøødhøchä tøyhajt jaduñ.

³⁰ Mägu'ughajpådøjc, tu'ugmädia'aguiä Jesucristo hajxy nmøødhíjtämbä, ja'a hajxy nWiindsønhájtäm. Ja'a Dioshespíritu hajxy xyajniçhójcäm. Huuc tunä mayhajt hajxy maach høøhcøxpän. Tsøgä Dios hajxy hamuumdu'joot mänuu'xtáacäm maach høøhcøxpän

³¹ coochä Dios jim xñäwá'anät Judeanaaxooty maa jäya'ayhajxy ca'a mäböjpän. Jaduñä Dios hajxy nmänuu'xtáacämbät coochä mäböjpädøjc-hajxy jim jootcujc xtiøjmó'owät jim Jerusalén cooch jim nmédsät xädø'øñyejpä.

³² Y coo Dios jaduñ miáná'anät, mänitøch jim nwiimbídät, mänitøch jim jootcujc nnøcxät maa mijtsän. Jootcújc-høch jaduñ jim nbóo'xät. Hamiñ haxøpy hajxy mänit nnijiootcapxmøpcøjcämät.

³³ Xmióoyyämä Dios ja'a hoyhajtä weenhajt hajxy. Wéenäts mijts nägøxiä xpiuhbety.

16

¹ Jímhøchä nmägu'ughajpä tu'ug chäna'ay maa cajpt xiøhatiän Cencrea. Febe xiøhaty. Diosmädia'agymiäböjp je'ebä. To'oxiøjc je'eduhñ. Mäbuhbejp jaduñ maa tsajtøjcän.

² Coe Febe jim miédsät maa mijtsän, naxy hajxy jootcujc mdehm miägu'ugpógät ja'a Jesucristocøxpä. Hawiinmats coo hajxy jaduñ mmägu'ugpógät pønjetiä Diosmädia'agy mäböjp. Mmó'owäbä Febe hajxy jaduñ tijaty yajmaajiajpy. Hiç, náxyhøch jaduñ xpiuhbety. Nämay hajxy jaduñ tøø piuhbedyii.

³ Nyajpóo'xypøchä Prisca møødä Aquila. Tøøch hajxy jaduñ xmiøødtuñ ja'a Jesucristocøxpä.

⁴ Tøøch hajxy jaduhñ jim xñäwa'añ mäjahñdiuum. Páadyhøchä Dioscujú'uyäp nmo'oy. Jaduhñä mäbøjpädøjcä Dioscujú'uyäp hajxy yejpä, ja'a hajxy ca'a judíospä, wiinduhmyhagajpt.

⁵ Møødhøchä jäya'ay jaduhñ nyajpoo'xpä, pønjaty jaduhñ hamugøøby Dioswiingudsähgøøbiä maa Prisca tiøjc-hajxiän. Møødhøchä Epeneto nyajpoo'xpä. Jaanç tehñ yhöyhøch je'eduhñ xmiägu'ughaty. Jaayá'ayäts jim mäbøjtsohñ ja'a Jesucristocøxpä maa naax jaduhñ xiøhatiän Asia.

⁶ Nyajpoo'xypøchä Mariábä. Jaanç tehñ yhoy jim tiuñ maa mijtsän.

⁷ Nyajpoo'xypøchä Andrónico møødä Junias. Høøch nmägunaaxhajxy je'e. Näguipxyhøch hajxy hijty xmiøødtsumyçhänä'ay. Hoy piønä jaduhñ ñajuø'øy coo hajxy Dyiosquexiä. Paady hajxy jaduhñ quiejxä, coo Diosmädia'agy hajxy jaduhñ yajwá'xät. Jayøjp hajxy miäbøjcy ja'a Jesucristocøxpä. Høøch høxhaam njaac mäbøjc.

⁸ Nyajpoo'xypøchä Ampliato. Hóyhøch je'e xmiøødnijootpaadyii ja'a Jesucristocøxpä, ja'a hajxy nWiindsønñájtäm.

⁹ Nyajpoo'xypøchä Urbano. Näguipxy hajxy je'e xmiøødtuunäm ja'a Jesucristocøxpä. Nyajpoo'xypøchä Estaquis. Hóyhøch je'eduhñ xmiägu'ughaty.

¹⁰ Nyajpoo'xypøchä Apeles. Tøø jiaanç tehñ miee'xtucy ja'a Jesucristocøxpä. Nyajpoo'xypøch pønjaty jaduhñ jim tsänaaby maa Aristóbulo tiøjcän, ja'a hajxy mäbøjpä.

¹¹ Nyajpoo'xypøchä Herodiön. Høøch nmägunaax je'ebä. Nyajpoo'xypøch pønjaty jaduhñ jim tsänaaby maa Narciso tiøjcän, ja'a hajxy mäbøjpä.

¹² Nyajpoo'xypøchä Trifena møødä Trifosa. Tuumb hajxy jaduhñ ja'a Jesucristocøxpä, ja'a hajxy nWiindsønñájtämbä. Nyajpoo'xypøchä Pérsida. Jaanç tehñ chójcäp je'e. Hoy jiaanç tehñ tiuumbä maa Jesucristocøxpän.

¹³ Nyajpoo'xypøchä Rufo møødä tiaj. Jaanç tehñ yhooyä Rufo ja'a Jesucristo miädia'agy pianøcxä. Jaduhñhøchä tiaj njuøøyyä nébiøch nhamdsoo tajiän.

¹⁴ Nyajpoo'xypøchä Asíncrito, møødä Flegonte, møødä Hermas, møødä Patrobas, møødä Hermes, møødä mäbøjpädøjc jaac jimä.

¹⁵ Nyajpoo'xypøchä Filólogo, møødä Julia, møødä Nereo møødä piuhdo'oxy, møødä Olimpas, møødä Diosmädia'agymiäbøjpähajxy jaac jimä.

¹⁶ Xi'ig xon hajxy mniyajpoo'xøøjät ja'a Jesucristocøxpä. Xyajpoo'xp mijtspä, ja'a hajxy mäbøjpä ja'a Jesucristocøxpä wiinduhmyhagajpt.

¹⁷ Mägu'ughajpädøjc, jii jäya'ayhajxy näje'e wiädity, wiing hajxy yajnähiø'øy; cab hajxy yajnähiø'øy nej mijts tøø mhabøquiän ja'a Jesucristocøxpä. Cabä jioot hajxy xyajmädsocy coo mijts tu'ugmädia'agy mhídät maa Diosmädia'agyquiøxpän. Jaduhñ hajxy yajnähiø'øy coo wiingmädia'agy hajxy mbadu'ubögät. Naxy hajxy mdehmñigwieendähadøøjät maa jaaya'ayhajxy jaduhmbän. Cab hajxy jim mnøcxø'øwät maa jaaya'ayhajxy jaduhmbän.

¹⁸ Hiç, cabä Diosmädia'agy hajxy yajnähiø'øy ja'a Jesucristocøxpä. Jaduhñ hajxy yajnähiø'øy nebiä cu'ughajxy jia mädowa'añän. Paady hajxy jaduhñ yajnähiø'øy, yajmäjuyaamb hajxy jaduhñ; jaduhñ hajxy hoy jiatcø'øwa'añ nebiä jioot hajxy choquiän. Hoy yajxon hajxy jia capxy jia mädia'agy. Pero xjia wi'i yajtägoyyaamb mijts jaduhñ.

¹⁹ Hopiønä tøø miädoyhaty coo mijtsä Diosmädia'agy hamuumdu'joot mmäbøcy ja'a Jesucristocøxpä; páadyhøch jootcujc mnijiäwø'øyii ja'a mijtsøxpä. Jaduhñ mijts nyajmädsocy coo hajxy mniyajcopcø'øwøøjät, jaduhñ hajxy hoy mwädítät, jaduhñ hajxy haxøøg mga'a jäya'ayhädät.

²⁰ Ja'a Dios hajxy xyaghidaamb jootcujc. Coo hajxy mga'a møjpädä'agät waambatiä hønñdaacpä hajxy xjia wi'i yajnähiø'øwa'añ, jaduhñä Dios ja'a møjcu'ugong quia'a yajmäjädá'agät. Y cabä møjcu'ugong hajxy nej xtiüunnät. Ween mijtsä Jesucristo ja'a hoyhajtä weenhajt tehñgajnä xmiø'oy, ja'a hajxy nWiindsønñájtämbä.

²¹ Xyajpoo'xp mijtsä Timoteo. Høøch jaduhñ xmiøødtuumb. Jaanä xyajpoo'xp mijts jaduhñ ja'a Lúciobä, møødä Jasón, møødä Sosípater. Haagä høøch nmägunaaxhajxy je'e.

²² Høøch Tercio, høøch hädaa nocy ngujahby. Jaanä høøch mijts nyajpoo'xpä ja'a Jesucristocøxpä.

²³ Xyajpoo'xp mijtsä Gayo. Yaačh jaduhñ nhity ja'a Gayo tiøgooty. Yejpiä tiøjc jaduhñ coo mæbøjpädøjc-hajxy yaa yhamugó'øwät Dioswiingudsähgøøbiä. Xyajpoo'xp mijtsä Erasto. Jim je'e tiuñ haguyc. Xädø'øñgwieendähajp jim. Møødä hermano Cuarto hajxy xyajpoo'xpä.

²⁴ Ween mijtsä Jesucristo ja'a hoyhajtä weenhajt xmio'oy nägøxiä. Amén.

²⁵ Hoorä, tsögä Dios hajxy møj jaančh capxpáatäm. Jaaya'ay mijts hamuumdu'joot xjiaac yajmæbøgäp ja'a Jesucristocøxpä. Jaduhñhøch nnä'ägä yajnähixø'øyhaty coo Dios ja'a Jesucristo quiejxy. Jaduhñä Jesucristo hajxy hoy xyajnähwáatsäm nägøxiä, møødä judíoshajxy, näguipxy møødä ca'a judíoshajxypä. Tøyhajt jaduhñ. Jéquiänä Dios jaduhñ wyiinmaayy, pero cab jaduhñ choj yajtøjiajty. Paady hajxy nga'a tsoj wiinjuøøyyäm.

²⁶ Pero jim jaduhñ myiñ cujaay maa Diosquexyhajxy jecy quiujahyyän. Jim jaduhñ cøxiä quiapxtøy. Naamnä hajxy jaduhñ tøø nwiinjuøøyyäm. Paadiä Dios jaduhñ yhanehmñä coo mädia'agy ja'a Jesucristocøxpä wiá'xät wiinduhmyhagajpt, jaduhñä jäya'ayhajxy nägøxiä miæbøgät, jaduhñ hajxy quiudiúumbät. Homiänaajä Dios yhity.

²⁷ Jagooyyä Dios tøø wyiinmay coo hajxy xyajnähwáatsäm, coo hoyhajtä weenhajt hajxy xmióoyyäm. Ja'a Jesucristocøxpä Dios møj jaančh quiapxpaadyii cøjxta'axiøø. Amén.

1 Corintios

¹⁻² Høøch Pablo hädaa nocy cham njahby. Dióshøch xwyiinguejx coöchä Jesucristo xquiuguexyhädät. Mijts hädaa nocy cham nyajnäjahby, pønjaty ja'a Diosmädia'agy mäbøjp maa ja'a cajpt jaduñ xiøhatiän Corinto. Dios ja'a Jesucristo jaduñ quejx coo hajxy hoy xñähho'túutäm, pønjaty ja'a Jesucristo miädia'agy mäbøjcäp wiinduhmyhagajpt. Jaaya'ay hajxy nWiindsønhtëäm. Dios hajxy xyajnähdijäm coo ja'a Jesucristo hajxy xñähho'túutämät. Ja'a hermano Sóstenes, xyajpoo'xp mijts je'ebä.

³ Weenä Dios hoyhajt weenhajt hajxy xmio'oy møødä Jesucristo. Ja'a Dios hajxy nDeedyhtëäm.

⁴ Homiänájøch ja'a Dios nnäma'ay Dioscujú'uyäp je'eguiøxpä coo Dios mayhajt tiuñ maa mijtsøxpän. Paadiä Dios mayhajt jaduñ tiuñ, coo Jesucristo hajxy tu'ugmädia'agy mmøødhity.

⁵ Coo hajxy jaduñ mmøødhity, paadiä Dios hajxy tøø xpiuhbety møj may, jaduñ hajxy hoy mgápxät, jaduñ hajxy hoy mwiinjuø'øwät cøxiä.

⁶ Coo højts mijts ja'a mädia'agy tøø nyajwiingapxø'øy coo Jesucristo hajxy xñähho'túutäm, paadiä Diosmädia'agy hajxy hamuumdu'joot mmäbøjnä.

⁷ Coo hajxy jaduñ mmäbøjnä hamuumdu'joot, paadiä Dios mäjaa hajxy xjiaanç tehñ mio'oy coo hajxy mgudiuñ waambaty hajxy xyhane'emy. Mjøbhijxyp mhajuøøbiä Jesucristo hajxy jaduñ coo quiädaactägatsa'añ.

⁸ Dios hajxy xpiuhbedaamb coo miädia'agy hajxy hoy mgudiúunät. Paady mijts Dios hänajty xpiäda'aga'añ hawa'adstuum coo ja'a Jesucristo ja'a haxøøgiäya'ay hänajty yajcumädoawaannä.

⁹ Tøyhajt ja'a Dios miädia'agy jaduñ. Cabä Dios mänaa yhøhnda'agy. Jaaya'ay hajxy tøø xyajnähdijy coo yHuung hajxy mmøødhjät tu'ugmädia'agy. Ja'a Jesucristo je'e.

¹⁰ Hermanodøjc, ja'a Jesucristo miädiá'agyhøch mijts cham nyajmøødcapx nya-jmøødmädiaactägatsaamby coo hajxy tu'ugjoot tu'ugwiinmahñdy mhídät maa tsajtøjcän. Cab hajxy tii myajtsibø'øwät.

¹¹ Páadyhøch jaduñ nmäna'añ, tøøchä hermanohajxy xyajmädoxyaty coog hajxy mnimiädsibø'øyii. Jim hajxy choon maa Cloé tiøjcän.

¹² Wiingátiägä mädia'agy hajxy mbanøcxy. Näje'e hajxy miäna'añ cóogøch høøch nmädia'agy hajxy xpianøcxä. Näje'e hajxy miänaambä coogä Apolos miädia'agy hajxy pianøcxä. Näje'e hajxy miänaambä coogä Pedro miädia'agy hajxy pianøcxä. Y näje'e hajxy miänáangombä coogä Jesucristo miädia'agy hajxy pianøcxä.

¹³ Pero cabä Jesucristo miädia'agy hajxy madiu'u xyajnähixøøyyäm. Hix, jaaya'ay mijts jaduñ xñähho'tuut cruzcøxp, ca'a yhøøch mijts nnähho'tuut. Paady hajxy mnäbejty coo Jesucristo miädia'agy hajxy mbanøcxä, ca'a jie'eguiøxpä coöch høøch nmädia'agy hajxy xpianøcxä.

¹⁴⁻¹⁵ Jagóoyyøch ja'a craa Crispo nyajnäbejty maa mijtsän møødä craa Gayo. Cábøchä wiinghäna'c jim nnä'ä yajnäbejty. Cab hajxy jaduñ mmäná'anät cooc xtyijy nyajnäbejty. Páadyhøchä Dios jaduñ nnäma'ay Dioscujú'uyäp.

¹⁶ (Jexioo, chamçh njahmiejtstáacombä coöchä Estéfanashajxy nyajnäbejpä, møødä yhuung møødä tio'oxy. Cab ndijy wiinghäna'c njaac yajnäbejty.)

¹⁷ Ca'a jiäya'ay-yajnäbéjpøch Jesucristo xquiejxy. Diosmädia'agy-yajwá'xpøch xquiejxy coo hajxy xñähho'túutäm cruzcøxp. Coöch jaduñ nwädity Diosmädia'agy-yajwá'xpä, howyiinjuøøñøch hänajty ngapxy nmädia'agy. Páadyhøch jaduñ ngapxy nmädia'agy howyiinjuøøñä, chójpiøch njoot jaduñ coo hajxy hoy

mwiinjuó'owät ja'a Jesucristocøxpä. Cábøch njoot chocy cooch nmädia'agy hajxy xquiumáayyät je'eguiøxpä cóogøch tyijy yajxón ngapxy nmädia'agy.

18 Nmäbøjcäm ja'a mädia'agy hajxy jaduhñ coo Jesucristo hajxy xñähho'túutäm cruzcøxp. Pønjaty häda'agaamb møjcu'uhaam, coo hajxy miädoy coo Jesucristo hajxy tøø xñähho'túutäm cruzcøxp, ñäxiicypy hajxy jaduhñ je'eguiøxpä cooc tyijy jagooyyä cädieeyhäna'c-hajxy yagho'ogyii cruzcøxp.

19 Jaduhñ jim myiñ cujaay maa Diosmädia'aguiän:

Ja'a häna'c-hajxy cuwiinmahñdypä, ja'a tyijy hajxy howyiinmahñdymøødpä, cábøchä wyiinmahñdyhajxy nyajtsoobaadaanä, nømä Dios miänaañ.

20 Hoorä, yajcähxø'piä Dios coo jäya'ay wyiinmahñdyhajxy quia'a tsoobaada'añ, ja'a hajxy niñänøømäbä cuwiinmahñdy, ja'a tyijy hajxy howyiinmahñdymøødpä. Ñäxiicypiä Dios jaduhñ.

21 Jaanç tehm quiuwiinmahñdiä Dios tu'uquiä. Je'e jaduhñ mänaañ coo højts ja'a miädia'agy nyajwá'xämät coo Jesucristo hajxy xñähho'túutäm. Pønjaty jaduhñ mäbøjp, Dios jaduhñ wiinmahñdyhajt coo hajxy jaduhñ yajnähwa'adsøøjät ja'a piojpä quiädieeyhajxy, hoyyä jäya'ayhajxy näje'e jia näxi'igy. Ca'a yhöjts nhamdsoo wiinmahñdyhaam ja'a Dios ja'a miädia'agy hajxy xyajwiinjuøøyyäm. Jaduhñä Dios miänaañ.

22 Ja'a judíosahajxy, coogä hoy-yagjuøøñäbä hajxy yhíxät, mänítac tyijy hajxy jaduhñ miäbøga'añ. Y ja'a griegohajxy, mänítac tyijy hajxy jaduhñ miäbøga'añ coogä jäya'ay miädia'agy hajxy miädóowät, ja'a hajxy niñänøømäbä cuwiinmahñdy, ja'a tyijy hajxy howyiinmahñdymøødpä.

23 Pero højtshájtäm, jaduhñ højts nmädiáacäm coo Jesucristo hajxy xñähho'túutäm cruzcøxp. Cabä judíosahajxy jaduhñ miäbøcy. Cab hajxy jaduhñ miäna'añ cooc tyijy Jesucristo quia'a Dioshuungä. Hix, nøm hajxy miäna'añ cooc tyijy ja'a Dioshuung quia'a ho'oga'añ cruzcøxp. Hoorä, ja'a jäya'ayhajxy ca'a judíospä, ni je'e hajxy quia'a mäbøjpä. Hoñäxiicnä Diosmädia'agy hajxy miädoy.

24 Pero coo Dios hajxy tøø xwyiimbíiwäm, paady hajxy nmäbøjcäm coo Jesucristo hajxy xñähho'túutäm, hoy hajxy nja judíosäm. Cooc hajxy jaduhñ xñähho'túutäm, jaduhñä Dios yajcähxø'cy coo mäjaa miøødä, coo quiuwiinmahñdiä.

25 Cooc Dios ja'a yHuung ñähdujcy coo yagho'ogøøjät, paadiä jäya'ayhajxy näje'e miäna'añ cooc tyijy Dios quia'a cuwiinmahñdiä, cooc tyijy mäjaa quia'a møødä. Cabä Diosmädia'agy hajxy miäbøcy, paady hajxy jaduhñ miäna'añ. Hoyyä Dios ja'a wiinmahñdy häxøpy weeñtiä jia møødä, ni jaduhñä jäya'ay wyiinmahñdyhajxy häxøpy quia'a najtspaadøøyyä. Jaanä jaduhñduhmbä, hoyyä Dios ja'a mäjaa häxøpy weeñtiä jia møødä, ni jaduhñä jäya'ay miäjaahajxy häxøpy quia'a najtspaadøøyyä.

26 Hermanodøjc, huuc mäadow hajxy, mänaa mijts Dios xwyiimbiiyyän, cab hajxy hñajty nämay mhøxpøquiä, näjé'eyyäm; cab hajxy hñajty nämay mmäyøøjä, näjé'eyyäm; cabä møjcuहुdujt hajxy hñajty nämay mmøødä, näjé'eyyäm.

27-28 Nmäbøjcäm ja'a Diosmädia'agy hajxy. Xpiéjxäm jäya'ay hajxy hijty coo hajxy hijty nga'a høxpøquiäm, coo hajxy hijty nga'a mäyøøjäm, coo møjcuहुdujt hajxy hijty nga'a møødhájtäm. Xxiøøghájtäm ja'a jäya'ay hajxy hijty jaduhñ. Pero coo Dios hajxy xwyiimbíiwäm, jaduhñä Dios ja'a jäya'ay yajtsähdiuundägajch, ja'a hajxy hijty xpiéjxämbä. Jaduhñä Dios yajcähxø'cy coo hajxy hñajty tøyhajt quia'a høxpøquiä, coo hajxy hñajty tøyhajt quia'a mäyøøjä, coo møjcuहुdujt hajxy hñajty tøyhajt quia'a møødä.

29 Hix, cab jaduhñ pøñ jim ñiguiumayáañänä Dioswiinduum.

30 Dios hajxy jaduhñ xpiädáacäm tu'ugmädia'agy møødä Jesucristo. Jaduhñä Dios yajcähxø'cy coo quiuwiinmahñdiä coo Jesucristo yaa quiejxy hädaa yaabä naaxwiin, coo hajxy hoy xñähho'túutäm. Jaduhñ hajxy xyajnähwáatsäm ja'a nbojpä ngädieeyhájtäm. Jaduhñ hajxy xpiädáacäm hawa'adstuum.

³¹ Jaduhñä Diosmädia'agy miäna'añ: “Cab hajxy hamdsoo nniguiumáayyämät. Tsögä Dios hajxy møj jaançh pädáacäm.”

2

¹ Hermanodøjc, mänájøch mijts nnähooçhooñän, mänájøch mijts ja'a Diosmädia'agy nyajwiingapxøøçhooñän, cab mijts yajxon nmøødmädiaacy.

² Cooçh hänajty jim nnøcxa'añ maa mijtsän, tøøch hänajty nwiinmahñdyhaty coo Jesucristo hajxy hänajty nyajmøødmädia'aga'añ, coo hajxy hänajty je'e tøø xñähho'túutäm cruzcøxp. Cábøch wiingmädia'agy hänajty nmädia'aga'añ.

³ Nnajuøøbiøch hänajty cooçh hänajty hoy nga'a capxa'añ ja'a nhamdsoo copc-háamhøch. Høxtä tsähgøøbiøch hänajty; høxtä tsäyúubiøch hänajty.

⁴ Høyhøch hänajty yajxon nga'a jagä mädia'agy, xpiuhbéjpech ja'a Dioshespíritu hänajty ja'a miäjaahaam neby hajxy jaduhñ ca'xy mwiinjuø'owät.

⁵ Hix, chojpiä Dios ja'a jioot jaduhñ coo miädia'agy hajxy mmäbøjcät. Ja'a miäjaahaamä Dios hajxy xyajmäböcy, ca'a quiuwiinmahñdyhäna'c hajxy jaduhñ xyajmäböjp.

⁶⁻⁷ Ja'a häna'c-hajxy cuwiinmahñdypä hädaa yaabä naaxwiimbä, cábøch hajxy jaduhñ xñänømy cooçh nguwiinmahñdiä. Jaduhñhøch häna'c-hajxy xñänømbä cooçh nga'a cuwiinmahñdiä, ja'a møjcuhdujtmøødpähajxy ja'a hädaa yaabä naaxwiimbä, ja'a Diosmädia'agy hajxy ca'a mäböjpä. Mänitä miäjaahajxy piögáanäxä møødä wyiinmahñdyhajxy coo hädaa yaabä naaxwiimbä hänajty quiuhdägoyya'añ. Pønjetiä Diosmädia'agy ca'xy cudiumb, ñajuøøby hajxy jaduhñ coo Dios tøyhajt quiuwiinmahñdiä. Paady hajxy jaduhñ ñajuø'øy cooçh jaduhñ tøø nyajmøødmädia'agy coo Jesucristo hajxy tøø xñähho'túutäm, møød coo hajxy jim nnøcxäänäm Dioswiinduum. Jequiän ja'a Dios jaduhñ wyiinmaayy. Cahnä naaxwiimbä hänajty yhawijy tiøø'xta'agy. Cabä Dios ja'a wyiinmahñdy choj yajwiingähxø'cy. Cahnä hajxy xyajwiinjuøoyyäm høxtä jäda'anäbaadyñä.

⁸ Pero cabä møjcuhdujtmøødpähajxy jaduhñ wyiinjuø'owa'añ. Coo hajxy cu wyiinjuøoyy, cabä Jesucristo hajxy cu miøjpahbejty cruzcøxp. Piädaac ja'a Dios ja'a yHuung jaduhñ coo yaa wyiingudsähgø'owøøjät hädaa yaabä naaxwiin.

⁹ Jaduhñä Diosmädia'agy miäna'añ:

Ni pøn quia'a hixyñä, ni quia'a mädoynä,

ni quia'a wiinmayñä nebiatiä Dios hoyhajt weenhajt mio'owa'añ pøn jaduhñ chojpy.

¹⁰ Ja'a højtshajtäm, tøø Dios hajxy xyajwiinjuøoyyäm ja'a yhEspírituhaam nebiaty jaduhñ wyiinmahñdyhajty. Yhøxtaabiä yhEspíritu jaduhñ neby hajxy hoy xyajwiinjuøoyyämät.

¹¹ Cabä wiinghäna'c jaduhñ xñajuøoyyät nebiaty hänajty mwiinmay. Jagooyyä miich mhamdsoo juøhñdy jaduhñ ñajuø'owät. Jaanä jaduhñä Diospä, cab jaduhñ pøn ñajuøøbiä nebiatiä Dios wyiinmay. Jagooyyä Dios yhamdsoo Espíritu jaduhñ ñajuø'øy.

¹² Tøø Dios ja'a yhEspíritu hajxy xmióoyyäm coo højts ja'a miädia'agy jaduhñ nmäböjcäm. Ja'a yaabä juøhñdy, cab jaduhñ miäbaady nebiä Dios ja'a yhEspíritän. Paady hajxy jaduhñ xmióoyyäm, jaduhñ hajxy xyajnajuøoyyäm coo hoyhajt weenhajt hajxy xñä'a móoyyäm.

¹³ Jaduhñä jäya'ay hajxy nhawaandägájtsäm coo hajxy jaduhñ xñä'a móoyyäm. Jaduhñ hajxy nhawäänäm nebiatiä Dioshespíritu hajxy xyajwiinjuøoyyäm. Jaduhñ hajxy nyajwiinjuøødiägájtsäm je'eguiøxpä coo Dioshespíritu hajxy miøødhajpä. Ja'a häna'c-hajxy tyijy cuwiinmahñdypä, cabä wiinmahñdy hajxy ca'xy miøødä coo tijaty mädia'agy hajxy hänajty xyajmøødmädia'aga'añ. Paadiä wiinmahñdy hajxy ca'xy quia'a møødä coo Dioshespíritu hajxy quia'a møødä. Pero højts, cab højts nmädiäacäm ja'a nhamdsoo wiinmahñdyhaam.

¹⁴ Põnjatiä Dioshespíritu ca'a mөөд, cab hajxy wyiinjuo'oy nebiatiä Dioshespíritu hajxy jia wi'i yajmөөдmädia'aga'añii. Cábäc tyijy jaduһn choobaady. Hix, coo Dioshespíritu hánajty mga'a mөөдä, cab jaduһn mnä'ägädä wiinjuo'owät nebiä Dioswiinmahñdy.

¹⁵ Põnjatiä Dioshespíritu mөөд, quioxy wiinjuo'oby hajxy jaduһn. Põnä Dioshespíritu ca'a mөөд, cabä cuhdujt hajxy miөөдä coo hajxy miänä'anät cooc tyijy jäya'ay ja'a Diosmädia'agy hajxy hoy quia'a yajnahixo'oy, ja'a jäya'ay ja'a Dioshespíritu hajxy mөөdpä.

¹⁶ Jaduһn jim myiñ cujaay maa Diosmädia'aguiän: “Cabä Dios wyiinmahñdy põn ñajuo'oyyä. Cabä Dios põn yajnahixo'oyii.” Pero nmөөdhajtäm ja'a Jesucristo wyiinmahñdy hajxy jaduһn.

3

¹⁻² Hermanodøjc, cooch jim nhoochohñ maa mijtsän, cábøch mijts tsipjaty nya-jnähixo'oyy. Ja'a ca'a tsipjátypøch mijts jaduһn nyajnahixo'oyy. Hix, je'enä hajxy hánajty mhityñä nebiä naamdägø'oybän maa Jesucristocøxpän. Jaduһn hajxy hánajty mhity nebiä Diosmädia'agy ca'a mæbøjpän. Cahnä hajxy hánajty may mwiinjuo'oyñä maa Dioshespíritucøxpän. Y høxtä jäda'anäbaadyñä, cahnä hajxy jaduһn may mwiinjuo'oyñä.

³ Je'enä hajxy mniwyiinhecy mniwyiindoyiinä coo hajxy mga'a hity tu'ugmädia'agy. Cab hajxy jaduһn mniçocy mnimiee'xyii. Je'enä hajxy jaduһn mjäya'ayhaty nebiä Diosmädia'agy ca'a mæbøjpän.

⁴ Näje'e hajxy mmäna'añ: “Høøch ja'a Pablo miädia'agy nbanøcxäp.” Näje'e hajxy mmänaambä: “Høøch ja'a Apolos miädia'agy nbanøcxäp.” Coo hajxy jaduһn mga'a hity tu'ugmädia'agy, cähxø'p jaduһn coo hajxy jaduһn mjäya'ayhatyñä nebiä Diosmädia'agy ca'a mæbøjpän.

⁵ Høøch Pablo, cábøch møjcuhdajt nmөөдä. Ni ja'a Apolos jaduһn quiaa mөөдäbä. Cab jaduһn yhäxø'oy coo højts nmädia'agy hajxy jaduһn xyajtsibø'oyyät. Jue'e højts, Dios højts jaduһn xñä'a moonsähajp. Dios højts jaduһn xquiejx coo mijts jaduһn nyajnahixo'owät. Jaduһn hajxy mmæbøjcy ja'a Dioscøxpä. Cøjwiinduum højts ja'a Dios ja'a tuuᅅg xmiooyy.

⁶ Høøch mijts ja'a Diosmädia'agy nyajnahixøøchohn. Mänitä Apolos hajxy jaduһn xjiaac yajnahixø'oyy. Pero Dios, je'e mijts jaduһn xyajmæbøjc. Y tehᅅgahnä hajxy xjiaac yajmæbøga'añ. Tehᅅgahnä hajxy xjiaac yajmayø'owa'añ.

⁷ Høøch Pablo, cábøch møjcuhdajt nmөөдä. Ni ja'a Apolos jaduһn quia'a mөөдäbä. Jagooyyä Dios møjcuhdajt miөөдä. Je'eduhᅅn tu'ug xyajmæbøgäp. Je'eduhᅅn tu'ug xyajmayø'owäp.

⁸ Tu'ugmädiä'agyhøch ja'a Apolos nmөөdhity, hoy højts cøjwiingtuuᅅg nja mөөдä. Coo højts hoy ndúnät, mänitä Dios møjmayhajt tiúnät maa højtscøxpän. Pero coo højts hamuumdu'joot nga'a túnät, mänitä Dios mayhajt hánajty weeñtiä tiunaambä maa højtscøxpän.

⁹ Højts ja'a Dios nmөөdtuumby. Y coo mijts hoy mjäya'ayhaty, jaduһnä jäya'ay tøyhajt hajxy miөөдä coo Dios hajxy hoy xyagjäya'ayhaty. Mijts ja'a Dios ja'a mwiinmahñdy xyajtägäjtšäp neby hajxy jaduһn mhídät nebiatiä jioot chocy.

¹⁰⁻¹¹ Tøøchä Dios xwyiinguexy coo mijts ja'a miädia'agy nyajnahixø'oyyät ja'a Jesucristocøxpä. Xmióoyyhøchä wiinmahñdy jaduһn nébiøch mijts jaduһn hoy nya-jnähixø'ød. Cabä cuhdujt jaduһn myiñ coo põn ja'a Dios miädia'agy yajtägäjtšät ja'a Jesucristocøxpä. Ween hajxy jaduһn yajnahixø'obiä nébiøch tøø nyajnahixø'oyän.

¹² Põnjatiä Diosmädia'agy mæbøjp, jaduһn hajxy tiuuᅅghaty nebiä jäya'ayhajxy jaduһn miädoyhädät ja'a Jesucristocøxpä. Näje'e hermanodøjc-hajxy hoy tiuñ. Paady hajxy jiaanç tehᅅ quimayii. Jiiby hajxy näje'e, cab hajxy hoy tiuñ. Paady hajxy jaduһn quia'a cumayii.

13-14 Coo Jesucristo hānajtj yaa quiādaactāgatsa'añ, mānit jaduhñ quiāhxø'øga'añ pønajatj hānajtj hoy tøø tiuñ. Cøjxta'axiøø ja'a Dios jiahmiedsa'añ neby hajxy hānajtj hoy tøø tiuñābā. Møjmayhajt ja'a Dios tiunaambā maa hāna'c hoy tøø tiuñān. Jaduhñ je'e quiāhxø'øgaambā pønajatj hānajtj hoy tøø quia'a tuñ. Cabā Dios mayhajt tiuna'añ maa hāna'c hoy tøø quia'a tūñābān.

15 Hawa'adstuum hajxy yaghida'añii, pero hobiā nejpiā.

16 Jaduhñ hajxy nmābāatām hādaa hajxy njoothājtāmbā nebiā Diostøjcān coo Diosh-espíritu hajxy nmøødhājtām maa hādaa njoodootyhajxiān. Mnajuøøby hajxy jaduhñ, túhmāts.

17 Pønajatj haxøøg nā'ägädā jāya'ayhāj, hoyyā Dioshespíritu hajxy jia møødā jioodooty, päda'agāañāp hajxy hajøøxc. Hix, coo ja'a Dioshespíritu hajxy mmøødā ja'a mjoodooty, päadiāts mjoot hajxy wa'ads myaghídāt. Hix, cabā Dioshespíritu hoñā'ā maajā yhida'añ majaty hānajtj quia'a wa'adsä.

18-19 Nāje'eg tyijj mijts madiu'u mnajuø'øy neby hādaa yaabā naaxwiimbā wiinmahñdy myiñ. Cab hajxy hamdsoo mniguiumayøød coo hajxy mjaty coo hajxy mnajuø'øy. Nømä Dios miāna'añ cooc hādaa yaabā naaxwiimbā wiinmahñdy quia'a tsoobaady. Hahixøøby jaduhñ coo mhamdsoo wiinmahñdy hajxy mnajtshixøøñāt, coo hajxy jaduhñ mnibiāda'agøøjāt nebiā ca'a wiinjuøøbiān. Jaduhñ ja'a Dioswiinmahñdy hajxy hoy mwiinjuø'øwāt nebiā tiøyyān. Jaduhñ jim myiñ cujaay maa Diosmādia'aguiān: "Dios yajcumādowaamb ja'a hāna'c jaanč tehñ jiajpā māwiinhøøn."

20 Jaduhñ jim myiimbā cujaay maa Diosmādia'aguiān: "Ñajuøøbiā Dios coo jāya'ay wyiinmahñdyhajxy quia'a tsoobaady, ja'a hajxy tyijpiā cuwiinmahñdy."

21-22 Nāje'e jāya'ayhajxy ñiguiumayii je'eguiøxpā coo jāya'ay miādia'agy hajxy pianøcxā ja'a tyijj tøyhajtmøødpā. Cab hajxy jaduhñ mbahixāt. Mijtsøxpā Dios cøxiā yhädiuñ tijaty yaa hijp hādaa yaabā naaxwiin. Møød højts ja'a Dios jaduhñ xyhādiuumbā ja'a mijtsøxpā, højts yajñāhixøøbiādøjc, møød høøch, møødā Apolos, møødā Pedro. Paadiā Dios jugyhajt hajxy xmióoyyām neby hajxy jaduhñ hoy nyajtuungpáatāmāt. Hoy hajxy cu nja hó'cām, hoy hajxy nyajtuungpaađāañām tijaty jādā'ahaty jājtap túunāp, chaads tijaty jādāañāp tunāañāp, je'eguiøxpā coo Diosmādia'agy hajxy nbanøcxām.

23 Hix, coo Jesucristo hajxy mWiindsøñhaty, paadiā miādia'agy hajxy myajtuunā. Y jaduhñā Jesucristobā, yajtúunābā Tieedy miādia'agy je'ebā.

4

1 Cab højts møjcuहुdjt jaduhñ nmøødā, ni høøch ni Apolos; xñā'ā moonsāhāj højts ja'a Jesucristo jaduhñ. Dios højts jaduhñ tøø xwyiinguexy coo højts ja'a Diosmādia'agy ca'xy ngapxtøwāt, mädyiijaty ja'a jāya'ayhajxy hijty jegyhajty quia'a wiinjuøøby.

2 Māduhñtiā jāya'ay mioonsāhadyii, tsipcøxp hajxy quiudiúnāt neby hajxy yhane'emyii. Paady højts jaduhñ ngudiunaambā neby højts ja'a Dios tøø xwyiinguexy.

3-4 Pero høøch, cábøch jaduhñ tii nmøjpāda'agy cooch pøn waambaty xñānómāt pø hóyhøch nyajñāhixø'øy, pø caj. Hóyhøch cu nja māna'an cooch hoy nyajñāhixø'øy, cab jaduhñ choobaada'añ. Tu'uquiā Jesucristo jaduhñ ñajuø'øy pø hóyhøch njaanč yajñāhixø'øy. Y høøch, cooch hamdsoo nniñānømøøjāt pø hóyhøch nyajñāhixø'øy, pø caj, cábøch nmādia'agy jaduhñ choobāadāt. Cábøch nnajuø'øy pø hóyhøch tøø nyajñāhixø'øy, pø caj. Pero, cab jaduhñ ñejpiā pø nnajuøøbiøch, pø cábøch nnajuø'øy. Ja'a Jesucristo tu'uquiā nāgapxaamb pø hóyhøch tøø nyajñāhixø'øy, pø caj.

5 Caj pøn nā'ā nāgoobā mnā'ā nānómāt coo tøø quiādieey pø cabā tøyhajt hānajtj mnā'ā møødā. Coo Jesucristo yaa quiādaactāgātsāt, mānit hānajtj jaduhñ yajcāhxø'øga'añ neby hajxy nwiinmahñdyhājtām, nebiaty hajxy hānajtj hamee'ch tøø njāya'ayhājtām. Mānitā Dios hajxy xquiumayāañām coo hajxy hānajtj hoy tøø ngudiúunām.

6 Páadyhøch cham tøø nmädia'agy ja'a høøchcøxpä møødä Apoloscøxpä neby højts nyajnähixø'øy, cábøch njoot jaduhñ chocy coo hajxy jaduhñ mnänómät coo tu'jäya'ay jiaty, coo tu'jäya'ay quia'a jaty. Pønjetiä Diosmädia'agy yajnähixøøby, je'eçh jaduhñ nnänøømby coo hajxy jaduhñ mga'a nänómät.

7 Cab jaduhñ yhooyä coo hajxy mniguiumayøøjät. Hix, Dios mäjaa hajxy jaduhñ xmiooby neby hajxy jaduhñ hoy mmädúnät. Cab jaduhñ yhooyä coo hajxy mmáná'anät coo hajxy hamdsoohaamby mbaady. Caj mijts pøn xñänømy cooc tyijy mijts mjaançh tehñ miøj mjaançh tehñ jiaançhä.

8 Nøm mijtsäda'a hamdsoo mniñänømyii cooc tyijy Jesucristo mmäbaatnä nej yho-jäya'ayhatiän, y cooc tyijy ja'a Diosmäjaa hajxy mjaançh tehñ miøødä. Jaduhñ mäwiin mijts mnibiädáacänä nebiä jäya'ayhajxy hanehmbän, cooc tyijy mijts cuhdujt mmaas møødä que højts. Pero mgapxtägooby hajxy jaduhñ. Hoy hijty jaduhñ coo hajxy cu mhanehmy. Näguipxy hajxy jaduhñ cu nhanéhäm.

9 Pero højts Diosqueypä, jaduhñ mäwíinhøch ndijy højts Dios xpiädaacy nebiä cuhdujtmøød ca'a hidaambän. Jaduhñ mäwiin højts xpiädaacpä nebiä cädieeyhána'c yagho'oga'añijän. Hijxwiinduum højts jaduhñ njaançh tehñ chaachpøcy. Ja'a Diosmoonsähajxy tsajpootypä, je'e højts jaduhñ xyhijxp, møødä jäya'ayhajxy hädaa yaabä naaxwiimbä.

10 Nömä jäya'ayhajxy miäna'añ cooc tyijy højts tii nga'a jaty nga'a najuø'øy. Paady højts jaduhñ xñänømy coo højts ja'a Jesucristo miädia'agy nyajwa'xä. Pero mijts, mjaançh tehñ ñiguiumáayyap hajxy jaduhñ cooc tyijy mijts ja'a Dios xjiaançh tehñ yajwiinjuø'øy ja'a Jesucristocøxpä. Jaduhñ højts jäya'ayhajxy xñänøømbä cooc tyijy højts Diosmäjaa nga'a møødä. Pero mijts, mjaançh tehñ miøød ja'a Diosmäjaa tyijy. Mijts ja'a jäya'ayhajxy xñä'ägä wiingudsähgøøby. Pero højts jäya'ay xjiaançh tehñ piejxp xjiaançh tehñ tiehmb cooc tyijy højts tii nga'a jaty nga'a najuø'øy.

11 Jaguiay jayhu'ugy højts naxy nhity homiänaaxøøjä. Hagøødsø'øy højts nwit nducxy naxy nmäwädity. Xjiaançh tehñ chaachtiumb højts jäya'ayhajxy yaa homiänaaxøøjä. Cab højts tsänaadiaact maa tøø nmøødhaty ni mänaa.

12 Hamdsoo cøøhaam hamdsoo tecyhaam højts nduñ nxajy. Jaduhñ højts nnägaayyøøc nbaady. Cooc højts jäya'ay naxy xñänømy haxøøgjaty, cab højts ndsippäda'agy nma'adpäda'agy. Yajxón højts nhadsoy. Cooc højts jäya'ay naxy xyajtsaaçhpøcy, nmee'xtujpy højts jaduhñ. Cab højts waamb jaduhñ nnä'ägädä mäna'añ.

13 Cooc højts jäya'ay naxy xñähwaambety nä'ä nägoobä, mee'xxieemy højts jaduhñ njaançh tehñ yhadsoy. Høxtä jäda'anäbaadyñä højts jäya'ay xyhixy nebiä hujts nebiä haayän.

14 Hermanodøjc, jaduhñhøch mijts njuøøñä nebiä hamdsoo huungän. Páadyhøch mijts jaduhñ nmägapxy nhane'emy. Cábøch mijts jaduhñ nyajtsähdiuna'añ.

15 Hoy mijts häna'c xjia yajnähixø'øy nämay ja'a Jesucristocøxpä, høøch mijts jaduhñ tu'uquiä xtieedyhajp ja'a Jesucristocøxpä, je'eguiøxpä cooçh mijts jayøbajt nya-jnähixøøyy coo Jesucristo hajxy tøø xñähho'túutäm, y coo jadähooc jiuypijøjtägajch.

16 Jaduhñhøch mijts nja nämä'ay cooçh hajxy jaduhñ xpiähixät.

17 Y ja'a Timoteo, jaduhñhøch je'e ndsocy nébiøch nhamdsoo huungän ja'a Jesucristocøxpä. Pedyii jaduhñ jiaançh tehñ quiuidiñ ja'a Diosmädia'agy. Páadyhøch jim tøø nguexy maa mijtsän nébiøch mijts jaduhñ xjiahmiejtstá'agät cooçhä Jesucristo nbanøcxy. Wiinduhmyhagájphøçhä Jesucristo miädia'agy nyajwiingapxøøyyä maa tsajtøjcän.

18-19 Høøch, mobädájpøch jim nnøcxaambä maa mijtsän coo Dios jaduhñ miäná'anät. Cabä jäya'ayhajxy näje'e miäbøcy cooc tyijy jaduhñ jim nga'a nøcxa'añ, je'eguiøxpä cooc tyijy njaançh tehñ chähgø'øy. Paady hajxy jiaançh tehñ ñiguiumayii. Howiaambaty hajxy jiaançh tehñ miäna'añ. Pero cooçh jim jaduhñ njaançh nøcxät maa mijtsän,

mänítøch jaduhñ jim nhixa'añ pø jaançh tøyhajt ja'a Diosmäjaa hajxy jiaançh møødä, ja'a hajxy jaduhñ niguiumáayyäbä. Paady hajxy ñiguiumayii cooc tyijy ja'a Diosmäjaa hajxy jiaançh tehñ miøødä.

²⁰ Je'e jaduhñ jaançh tehñ choobaatp coo Diosmädia'agy hajxy hoy mgudiúnät. Cab jaduhñ choobaady coo hajxy nä'ä nägoobä mnä'ä xi'ig mnä'ä mädiá'agät.

²¹ Nøcxáambøch jim maa mijtsän. Coo mhaxøøgcuhdujt hajxy mnajtshixø'øwät, mänítøch hajxy hoy yajxón nmøødmädiá'agät. Pero pø cabä mhaxøøgcuhdujt hajxy nnajtshixø'øwa'añ, nmøødhøch cuhdujt jaduhñ coo hajxy nyajcumädówät.

5

¹ Tøøch nmädoyhaty coo tu'jäya'ay haxøøg jiaançh tehñ jiatcø'øy maa mijtsän, hoyyä Diosmädia'agy hajxy mja mäbøcy. Yhamdsoo huudájjac jaduhñ miøødtsänaaby. Ni pøn jaduhñ quia'a jatcø'øy, ni ja'a cajpä jiuđíoshajxy.

² Hahixøøby jaduhñ coo yø'øya'ay hajxy mga'a mägu'ughájnät. Cu mhojy hajxy jaduhñ. Jaduhñ hajxy cu mjootmayhajty. Pero cab hajxiäda'a waamb tøø mnä'ägädä näma'ay. Höchähdiuunnä jaduhñ coo hajxy mga'a hojy. Cab jaduhñ yhojy coo hajxy mniguiumayii.

³⁻⁴ Hóyhøch jim nga'a jagä hity maa mijtsän, nmøødhøch cuhdujt jaduhñ cooch mijts nhané'emät ja'a Jesucristocøxpä coo jaaya'ay hajxy mga'a mägu'ughájnät, ja'a yhamdsoo huudaj jaduhñ miøødtsänaabiä. Mänit hajxy myajpádsómät coo hajxy hánajty mhamugø'øy. Diøshøch ja'a cuhdujt jaduhñ xmiooyy cooch mijts jaduhñ nhané'emät.

⁵ Cab hajxy jim myajméjtsnät maa tsajtøjcän. Ween jaduhñ chaachtuñii ja'a møjcu'ugóngäm. Wehñdä jaduhñ yhuuc tehñ wyiinmahñmédsät coo haxøøg jiatcø'øy. Mänit jaduhñ ñähwá'adsät ja'a piojpä quiädieey. Mänit jaduhñ jim ñøcxpät tsajpootyp coo Jesucristo yaa quiädaactägátsät, ja'a nWiindsønhájtämbä.

⁶ Cab jaduhñ yhojy coo hajxy myajcumáyät. Huuc mäadow hajxy, coo jäya'ay tsajcaagy hajxy yajcojy, mänitä chooy hajxy piädaacä harinajooty. Mänit hajxy yajmätijwäditø'øy. Mänitä harina chooy yajtägø'øyii.

⁷ Paadiä craa hajxy mga'a yajméjtsnät maa tsajtøjcän coo mijts jaduhñ mnä'ä pahíjxpät ja'a haxøøgpä. Jaduhñ mijts jaduhñ mga'a padu'udägóobiät. Hix, tøø Jesucristo hajxy xñähho'túutäm. Jaduhñ nbojhájtäm ngädieeyhájtäm hajxy xyajñähwáatsäm.

⁸ Jaduhñds je'e, tsøgä haxøøgpä hajxy najtshixø'øyyäm. Tsøgä tøyhajtpä hajxy hamuumdu'joot hoy yajtu'uyóhyäm.

⁹ Tøøch mijts ja'a nocy tu'ug nyajnäjaayø'øy coo hajxy mga'a mägu'ughádät ja'a jäya'ayhajxy haxøøgwädijpä.

¹⁰⁻¹³ Je'eçh jaduhñ nnänøømby pønđa'a tyijy tuumb hermano. Cab hajxy jaduhñ mmägu'ughádät ja'a hajxy wiingto'oxiøjc pawädijpä, møød hajxy jäya'ajie'e hadsojpä, møød ja'a quepychech hajxy wiingudsähgøøbiä, møød hajxy jäya'añähwaambejpä, møød hajxy jaduhñ múucäp wädijpä, møødä jäya'ayhajxy mee'tspä. Ni jäya'ay jaduhmbä hajxy mga'a møødcáyät, pøn tyijy jaduhñ tuumb hermano. Tsipcøxp hajxy jaduhñ jim mhøxquejxpádsómät maa tsajtøjcän, pønjaty jaduhñ haxøøgwädijp. Pero cab højts cuhdujt nmøødhájtäm maa jäya'aguixpähajxiän, ja'a hajxy ca'a tuumbä hermano, hoy hajxy jaduhñ jia wädijpä haxøøg. Dios jaduhñ najuøøby nebiä tsaaçhpä hajxy mio'owa'añii. Homiajatiä jäya'ay hajxy nbáatäm ja'a hajxy haxøøgwädijpä, møød ja'a jäya'ajie'e hajxy hadsojpä, møød ja'a mee'tspähajxy, møød ja'a quepychech hajxy wiingudsähgøøbiä.

6

¹ Hermanodøjc, coo mijts hánajty mniñäxø'øwø'øwa'añii, jim hajxy mnøcxät maa Dios quiu'ugän; cab hajxy jim mnøcxät maa cuduunghajxiän, ja'a Diosmädia'agy hajxy ca'a mäbøjpä. Jaduhñä hermanohajxy näje'e jiatcø'øy.

² Tögä cab hajxy mnajuø'øyä coo højts jäya'ayhajxy nägøxiä nyajtøyhajtyegáanäm ja'a hädaa yaabä naaxwiimbä, coo Jesucristo quiadaactägátsät. Paady hajxy hänajty jaduhn ndunáanäm coo Dios hajxy xquiu'ughájtäm. Hoorä, pø myajtøyhajtyegaamby hajxy hänajty jaduhnä, tii hajxy coo mga'a jajpä yajtøyhajtyec mädyiibä ca'a tsipjaty.

³ Tögä cab hajxy mnajuø'øyä coo Diosmoonsäbaady hajxy nyajtøyhajtyegáanämbä, ja'a hajxy jim hijpä Dioswiinduum. Jaduhnds je'e, hoy hajxy jaduhn nyajtøyhajtyécämät mädyijaty hädaa yaabä naaxwiimbä.

⁴ Pø jii hajxy tijaty myajtsibø'øy ja'a hädaa yaabä naaxwiimbä, tii hajxy jim coo nøcxy myajtødiägø'øy maa hajxy ca'a mæbøjpän.

⁵ Hoçhähdiuunnä hajxy jaduhn mjatcø'øy. Jii jajpähäna'cäda'aduhñ maa mijtsän tu'ug metsc. Je'eduhñ xyajtødiägø'øyyp ja'a mdsiphajxy, hermanodøjc.

⁶ Cab jaduhñ yhooyä coo hajxy hamiñ haxøpy mniñäxø'øwø'øwø'øjät maa cuduunñän, ja'a Diosmädia'agy ca'a mæbøjpä.

⁷ Coo hajxy hänajty tijaty myajtsibø'øy, myajcähxø'py hajxy hänajty jaduhn coo Diosmädia'agy hajxy hoy mga'a cudiuñ. Maas hoy hit jaduhñ coo pøn xmiägädiéeyät, coo pøn xmiäméedsät, cab hajxy mnäxø'øwø'øwät.

⁸ Pero cab jaduhñ yhooyä coo hajxy mnimiägädieeyø'øjät, coo hajxy mnimiäméedsø'øjät, haagä hermanodøjc.

⁹ Tögä cab hajxy mnajuø'øyä coo haxøøghäna'c-hajxy jim quia'a tægø'øwa'añ maa Dioswiinduumän. Tøyhajt jaduhñ. Jue'eçh jaduhñ nnänøømby ja'a haxøøgjäya'ayhajxy, ja'a hajxy nimiøødtsänáayyabä jabiøcy, møød hajxy quepychech naaxpoch wiingudsähgøøbiä, møød hajxy wiingjäya'ay tio'oxiøjc møødtsänaabiä, møødä jäya'ay miäya'adiøjc møødtsänaabiä,

¹⁰ møødä mee'tspähajxy, møød hajxy jäya'ajie'e hadsojpä, møød hajxy múucäp wädijpä, møød hajxy wi'i quiapxpä, møød hajxy mee'tspä høhnda'agyhaam. Pønjaty jaduhñ jatcøøby, cab hajxy jim tiägø'øwa'añ maa Dioswiinduumän.

¹¹ Jaduhñ hajxy hijty näje'e mbajatcøøbiä. Pero tøø Dios ja'a mbojpä mgädieeyhajxy xyajnáhwa'açh ja'a yHespírituhaam maa Jesucristocøxpän, ja'a hajxy nWiindsønähájtämbä. Jaduhñä Dios hajxy tøø xpiädáacäm coo hajxy hoy nwädíjtämät, coo hajxy hoy njäya'ayhájtämät nebiä jioot jaduhñ chocy.

¹² Jaduhñä jäya'ayhajxy näje'e miäna'añ coogä cuhdujt jaduhñ myiñ cooc hajxy hotyijatiä ndúunämät nnájxämät. Tøyhajt jaduhñ. Pero cab jaduhñ xyhahixø'øyyämät coo hajxy cøxiä wiinä ndúunämät nnájxämät. Y cab hajxy ndehm yaghanájxämät nebiä nwiinmahñdy hajxy hoy nhøxhíjxämät.

¹³ Paadiä Dios jøø'xytiøjc caadiøjc hajxy xmióoyyäm coo hajxy jaduhñ ngáayyämät coo hajxy jaduhñ nhúucämät. Pero nä'a mädøyyä hajxy ngáayyämät nhúucämät, cab hajxy ngaayyanájxämät. Pero cab jaduhñ ñejpiä pø cáayyäm pø ca'a ngáayyäm; hix, ñä'ägädä yajcuhdägoyyaambiä Dios je'e. Paadiä Dios hajxy xpiädáacäm coo miädia'agy hajxy ngudiúunämät. Pero cabä jioot jaduhñ chocy coo hajxy haxøøg nwädíjtämät.

¹⁴ Nebiä Dios ja'a yHuung yagjujypiøjquiän, jaanä jaduhñ højts xyagjujypiøgáanämbä ja'a miäjaahaam.

¹⁵ Huuc mädown hajxy, coo Jesucristo hajxy nWiindsønähájtäm, paady jaduhñ quia'a nä'ägädä hoyyä coo cuhñdo'oxiøjc hajxy nmøødmáawämät.

¹⁶ Jaduhñä Diosmädia'agy miäna'añ, coo jäya'ayhajxy ñimiøødma'awø'øjät, jaduhñä Dios yhixy nebiä tu'ugpä jäya'ayän. Jaduhnds je'e, coo cuhñdo'oxiøjc hajxy nmøødmáawämät, jaduhñä Dios hajxy xyhíjxäm nebiä tu'ugpä jäya'ayän.

¹⁷ Pero coo Jesucristo miädia'agy hajxy nbanócxämät, tu'ugjoot tu'ugwiinmahñdy ja'a Jesucristo hajxy jaduhñ nmøødhíjtämät.

¹⁸ Cabä cuhñdo'oxiøjc hajxy mmøødmá'awät; haxøøg jaduhñ. Hoy hajxy nej cu mja jatcø'øw, cabä mni'x cabä mgopc nej jiaty jádät. Pero coo cuhñdo'oxiøjc hajxy

mmøødmá'awät, mnä'ägädä mägädiehbiä mhamdsoo ni'x ja'a mhamdsoo copc hajxy jaduhñ.

¹⁹ Nej, cab hajxy mnajuø'øyä coo Dioshespíritu jii by yhity mjuøhñdiootyhajxiä. Dios hajxy jaduhñ xmiøoyy. Jaaya'ay hajxy jaduhñ xyhuunghajp, paadiä miädia'agy hajxy myajtúunät; cabä mhamdsoo cuhdujt hajxy myajtúnät.

²⁰ Paady hajxy xyhuunghaty coo yHuung hajxy xñähho'tuuty. Paady hajxy hoy mwädítät, jaduhñ hajxy myajcähxø'øgät coo Dios miøjjä jiaančhä.

7

¹ Hoorä, tsøg hajxy mädiáacäm waambátyhøch mijts xmiäyajtøoyy nocyhaam. Hoy hit jaduhñ coo ya'adiøjc ja'a to'oxiøjc quia'a møødtsáná'awät.

² Pero coo hajxy hánajty mga'a mee'xtuga'añ, maas hoy hit jaduhñ coo to'oxiøjc hajxy mnä'ägädä pøgät, y weenä to'oxiøjc ja'a ñihyhap miøødhájpät.

³⁻⁴ Ja'a pøcyjiäya'ayhajxy, hamiñ haxøpy hajxy ñimiøødma'awøøjät. Cabä cuhdujt hajxy mmøødä maa mhamdsoo ni'xhajxiän. Hix, pø xmiøødma'awaambä mjamiøød jaduhñ, naxy mdehmñ miøødmá'awät, cab jaduhñ mnimiøøjjø'øgøøjät.

⁵ Jaduhñ hajxy mnä'ägädä cuhdujthädät coo møjcu'ugong hajxy xñä'ä yajtu'udägóyyät. Coö hajxy jaduhñ nämetsc mmáná'anät coo Dios hajxy mba'yá'axät, mänit jaduhñ yhooyä coo hajxy mga'a nimiøødma'awøøjät hamiñ haxøpy. Hoorä, coo Dios hajxy hánajty tøø mba'ya'axy, mänit hajxy mnimiøødmáawägombät. Mänitä møjcu'ugong hajxy jaduhñ xquia'a yajtu'udägóyyät.

⁶ Cábøch jaduhñ nmäna'añ coo hajxy mädsibø'øbä mbøgät. Nnä'ä móobiøchä cuhdujt jaduhñ.

⁷ Maas hoy hit jaduhñ coo hajxy jaduhñ mnä'ägädä hídät nidiuhmñ nébiøch høøch jaduhñ nhitiän. Pero cøjhaminø'øy ja'a Dios hajxy tøø xpiädáacäm. Näje'e hajxy tøø xpiädáacäm coo hajxy nidiuhmñ nhítämät, näje'e caj.

⁸ Jaduhñds je'e, pøn jaduhñ nidiuhmhajpnä, jaduhñ ñä'ägädä mähmó'owät nidiuhmñ nébiøch høøch nhitiän. Y jaaná jaduhñduhmä, ja'a yaamgto'oxyhajxy, cab hajxy piøjtägátsät.

⁹ Pero pø cab hajxy mmee'xtuga'añ, maas hoy hit jaduhñ coo hajxy mbøgät, coo cuhhiñdo'oxiøjc hajxy xñä'ä yajcuhhínät.

¹⁰ Pero pønajaty jaduhñ tøø piøjnä, chamñ hajxy nmägapxy nhane'emy. Ca'a yhøøch nhamdsoo mädia'agy hädaa; Diosmädia'agy hädaa. Cab jaduhñ yhooyä coo to'oxiøjc ja'a ñihyhap piuhwá'adsät.

¹¹ Pero coods jaduhñ piuhwá'adsät, cabä wiingya'adiøjc wyiingpøgät. Maas hoy coo ñihyhap ñä'ägädä nämejtstägátsät. Y ja'a ya'adiøjc, jaaná jaduhñ je'ebä, cabä tio'oxiøjc yhøxmádsät.

¹² Chámhøch njaac mädia'aga'añ. Ja'a nhamdsoo mädiá'agyhøch hädaa; cab jaduhñ jim myiñ cujaay maa Diosmädia'aguiän. Pø jii ya'adiøjc tu'ug mäbøjpä, pø cabä tio'oxiøjc miäböcy, cabä tio'oxiøjc yhøxmádsät pø jaac møødtsána'awáanäp ja'a tio'oxiøjcäm.

¹³ Jaaná jaduhñduhmä, pø jii to'oxiøjc mäbøjpä, pø cabä ñihyhap miäböcy, cabä ñihyhap ñähgué'egät pø jaac møødtsána'awáanäp ja'a ñihyhápäm.

¹⁴ Coö ya'adiøjc ja'a Diosmädia'agy hánajty quia'a mäböcy, yaghoyóøyyäp je'e ja'a tio'oxiøjcäm je'eguiøxpä coo tio'oxiøjc miäböcy. Jaaná jaduhñduhmä, coo to'oxiøjc ja'a Diosmädia'agy hánajty quia'a mäböcy, yaghoyóøyyäp je'ebä ja'a ñihyhápäm je'eguiøxpä coo ñihyhap miäböcy. Coö hajxy jaduhñ yhodiuumä, paadiä yhuunghajxy jaduhñ yhodiuumäbä. Pø cabä tiaj tieedy häxøpy nidu'jäya'adiä quia'a mäböcy, cab hajxy häxøpy yhodiuumäbä.

15 Pøñ jaduñ mæbøjp, coo jiamiøød ja'a ca'a mæbøjpä hadsip miäná'anät coo hajxy ñiyhøxmadsoøjät, ween hajxy jaduñ ñiyhøxmaçhii. Jaduhñ jiájcombät nebiä tøø quia'a pøquiäbä. Hix, chojpiä Dios jioot jaduñ coo hajxy hoy nhíjtämät.

16 Pøñ jaduñ mæbøjp, cab jaduñ yajnajuø'oy pø yajmæbøgaambytiä ja'a jiamiøød ja'a ca'a mæbøjpä.

17 Cøjhaminø'oy ja'a Dios hajxy tøø xpiädáacäm. Jaduhñ hajxy jootcuje njaac híjtämät neby hajxy hánajty nhíjtäm mänaa Dios hajxy xyajnáhdíjjäm coo hajxy nmädúunämät. Hädaa mädiá'agyhøch homiaajä nyajnáhixøøby majatiä hermanodøjc-hajxy yhamugø'oyän Dioswiingudsähgøøbiä.

18 Højts judíos, coo Jesucristo miädiá'agy hajxy nbanøcxäm, cab hajxy ndsähdiúunämät, hoy hajxy nja judíoshájtäm. Y ja'a jäya'ayhajxy ca'a judíospä, ja'a Jesucristo miädiá'agy hajxy panøcxpä, ni je'ehajxy quia'a tsähdiúnät, hoy hajxy quia'a ja judíoshaty.

19 Cab jaduñ ñejpiä pø mjudíoshájp, pø caj. Je'e nä'ägädä tsoobaatp coo Dios miädiá'agy mgudiúunät.

20 Jaduhñ hajxy mjaac hídät neby hajxy hánajty mhitiän mänaa Dios hajxy xyajnáhdíjjän coo miädiá'agy hajxy mmæbøjcät.

21 Näje'e mijts jäya'ay xjie'ehaty nebiä waj nebiä cuaayän, hoyyä Diosmädiá'agy hajxy mja panøcxy. Cab hajxy jaduñ mmøjpadá'agät. Pero pø cabä mwiindsøñ hajxy xyajtunaannä, ween hajxy xyhøxmajtsnä.

22 Tøø mijts ja'a Dios xyajnáhdíjy coo miädiá'agy hajxy mmæbøjcät, hoyyä jäya'ay hajxy hánajty xjia je'ehaty nebiä waj nebiä cuaayän. Hix, tøø Jesucristo hajxy xyajnáhwáatsäm ja'a nbojphájtäm ja'a ngädieyhájtäm. Hoorä, pønjaty hánajty ca'a je'ehájtäp jaduñ nebiä waj nebiä cuaayän mänaa hajxy yajnähdiyyiijän ja'a Diósäm coo miädiá'agy hajxy miæbøjcät, moonsä hajxy je'e tiúnäp ja'a Jesucristocøxpä.

23 Tøø Jesucristo hajxy xñähho'túutäm, paadiä Dios miädiá'agy hajxy nmæbøjcänä. Cabä jäya'ay miädiá'agy hajxy nmæbøjcänät.

24 Jaduhñds je'e, hermanodøjc, jaduñ hajxy mjaac hídät neby hajxy hánajty mhitiän mänaa Dios hajxy xyajnáhdíjjän coo miädiá'agy hajxy mmæbøjcät. Jaduhñä Dios hajxy hoy mmädúnät.

25 Myajtøøw hajxy jaduñ pø hahixøøby jaduñ coo cäxyiihäna'c-hajxy piógät. Høøch nhamdsoo mädiá'agy hädaa; cab jaduñ jim myiñ cujaay maa Diosmädiá'aguiän. Pero hahixøøby jaduñ coöch mijts nmädiá'agy xmiæbøjcät; hix, Dióshøch jaduñ tøø xyajnáhdíjy coöch nmädúnät.

26 Pues høøch jaduñ mänaamb coo jaduñ yhahixø'oy coo hajxy mga'a pógät, je'eguiøxpä coo tsø'ty häyohn wiädijnä jäda'ahaty.

27 Pø jii mdo'oxiøjc, caj mhøxmádsät. Y pø cabä to'oxiøjc mmøødä, ca'a mhøxta'ay.

28 Cab jaduñ yhaxøøgä coo mbógät; y coo cäxyiihäna'c jaduñ piógät, ni jaduñ quia'a haxøøgä. Pero coo hajxy jaduñ piógät, maas hamäjaa jiugyhajt hajxy miänaxa'añ. Páadyhøch jaduñ nja mäna'añ coo hajxy quia'a pógät.

29 Hermanodøjc, jue'eçh jaduñ nja mäna'ana'añ, ja ween quia'a habaady coo Jesucristo yaa quiädaactägatsa'añ hädaa yaabä naaxwiin. Cab hajxy yaa jejcy njaac tunáanäm. Jaduhñds je'e, pønjaty to'oxiøjmøød, jaduñ hajxy xyiicta'ag miädiactá'agät nebiä Dios hajxy hoy miädúnät. Cabä yhuung tio'oxy hajxy ñädaj ñämáañät.

30 Pønjaty jaduñ jootmayhajp, ween hajxy jaduñ quia'a jootmayhajnä. Pønjaty jaduñ xoondaacp, ween hajxy jaduñ quia'a xoondaacnä. Y ja'a hajuubiädøjc-hajxy, ween hajxy jaduñ yhity nebiä toogy hajxy ca'a møødpän.

31 Pønjaty jaduñ yaa tsänaaby häyoob hädaa yaabä naaxwiin, ween hajxy jaduñ yhity neby hajxy tii ca'a møødpän. Hix, hädaa yaabä naaxwiin, neby hajxy cham nhíjxäm, cøxaamb hädaaduhñ quiuhdägoyya'añ.

³² Jadúhnhøch njoot chocy coo hajxy tii mga'a nädaj mga'a nämáyät. Ja'a ya'adiøjc nidiuhmhajpä, caj tii ñädajy ñämay. Jagoo tiajy miay nebiä Dios hoy miädúnät.

³³ Pero ja'a craa to'oxiøjmøødpä, je'e tiajpy miaaby nebiä yhuung nebiä tio'oxy hoy miøødhídät.

³⁴ Y cabä Dios hoy miäduna'añ. Jaanä jaduhñä cäxyihäna'c-hajxypä, cab hajxy tii tiajy miay. Jagoo hajxy tiajy miay nebiä Dios hajxy hoy miädúnät. Hamuumdu'jootä Diosmädia'agy hajxy quiudiuna'añ. Pero ja'a to'oxiøjc ja'a ya'adiøjmøødpä, nebiä ñihyhap hoy miøødhídät, je'eyä ñä'ä tajpy ñä'ä maaby.

³⁵ Páadyhøch jaduhñ nmäna'añ, mijts jaduhñ nja puhbedaan. Caj mijts jaduhñ nhane'ema'añ. Pero chøjpiøch njoot jaduhñ coo hajxy hoy yajxón mwädítät, coo Diosmädia'agy hajxy hamuumdu'joot mgudiúnät.

³⁶ Pø jii mhuunghajxy tøø quiäxyiijø'øy, ween hajxy piøcy, pø chojpy mjoothajxy jaduhñ. Cab jaduhñ yhaxøøgä coo hajxy jaduhñ piøgät.

³⁷ Pero pø cabä mjoothajxy chocy coo hajxy piøgät, ween hajxy jaduhñ quia'a pøcy. Hix, cabä cuhdujt pøn miøødä coo miich xyhané'emät maa mhuungcøxpän.

³⁸ Hoy jaduhñ coo mhuung myajpøgät. Jaanä hoy jaduhñbä coo mga'a yajpøgät; cab jaduhñ ñejpiä.

³⁹ Ja'a to'oxiøjc ya'adiøjmøødpä, cabä cuhdujt miøødä coo wiingpä miøødtsänä'awät. Pero coo ñihyhap yhö'ogät, mänit mäbøcy wyiingpøgät pøn jaduhñ chojpy. Pero tsipcøxpä hermano wyiingpøgät.

⁴⁰ Pero maas jootcuyc yhidät coo quia'a nä'ägädä pøjtägätsät. Høøch jaduhñ mänaamb. Ja'a Dioshespiritøch ndijy jaduhñ xñajtsapxøøyyäp.

8

¹ Näje'eçh hajxy tøø xmiäyajtøy pø hoy jaduhñ coo animalho'ogy hajxy ndsú'tsämät ja'a häna'c-hajxy quepychechwiinduum yojxypä. Tøyhajt jaduhñ coo hajxy nägøxiä tøø nmädoyhájtäm hädaagøxpä. Cab jaduhñ yhooyä coo hajxy nmänáanämät cooc tyijy hajxy cøxiä nwiinjuøøyyäm. Jaduhñä häna'c-hajxy näje'e miänaambä, ja'a hajxy yajcumayaambä. Pero coo hajxy hamiñ haxøpy nniçhojc nnimié'e'xämät, mänitä Diosmädia'agy hajxy maas hoy nmäbøjcämät.

² Pøn jaduhñ mänaamb cooc tyijy hotyijä jiaty, hønndaacp jaduhñ. Cab jaduhñ tiøyyä coo hotyijä jiaty. Ween jaduhñ jiaac habøcy.

³ Pønä Dios jaduhñ wiingudsähgøøby, ñajuøøbiä Dios jaduhñ pøn je'e.

⁴ Tsøg hajxy jadähooc jaac mädiäacäm pø hoy jaduhñ coo animalho'ogy hajxy ndsú'tsämät, ja'a häna'c-hajxy quepychechwiinduum yojxypä. Bueno, nnajuøøyyäm hajxy coo quepychech naaxpoch quia'a jujyquiä. Y nnajuøøyyäm hajxy coo Dios tiu'ugä.

⁵ Mayyä jäya'ayhajxy jaduhñ miäna'añ cooc tyijy ja'a Dioshajxy miayyä jim tsajpootyp chaads yaa hädaa yaabä naaxwiin. Je'eg hajxy jaduhñ jiaançh wiingudsähgøøby.

⁶ Pero højts jaduhñ mänanäm coo Dios tiu'ugä, ja'a nDeedyhájtäm. Je'e jaduhñ hädiuun cøxiä näguipxy møødä yHuung. Paady hajxy jaduhñ xquiunú'u'xäm xpiädäacäm coo hajxy jaduhñ ween nwiingudsähgøøyyäm. Jaduhñ hajxy nmänáanäm coo Jesu-cristo hajxy nWiindsønähjtäm. Cabä wiingpä hajxy nwiindsønähjtäm. Møød je'e cøxiä yhädiuumbä. Høxtä højtspaadyhájtäm hajxy xquiunú'u'xäm.

⁷ Pero cabä jäya'ayhajxy nägøxiä miäbøcy coo quepychech quia'a jujyquiä, coo naaxpoch quia'a jujyquiä. Näje'e jäya'ay quepychech naaxpoch hajxy wyiingudsähgøøyñä. Y coo hajxy jaduhñ chú'udsät tijaty jäya'ayhajxy yojxyp quepychechwiinduum, jootmayhajp hajxy jaduhñ cooc tyijy jaduhñ quia'a hoyyä coo hajxy chú'udsät. Hix, je'enä hajxy jaduhñ miäbøcyñä cooc tyijy quepychech jiujyquiä.

⁸ Nnajuøøyyäm hajxy coo Dios quia'a møjpäda'agy pø ndsú'tsäm pø caj ndsú'tsäm. Cab jaduhñ ñejpiä pø ndsú'tsäm pø caj ndsú'tsäm.

⁹ Pero hoy hajxy nja najuøøyyäm jaduhñ coo quia'a nejpiä pø ndsú'tsäm pø caj ndsú'tsäm, maas hoy hit jaduhñ coo nga'a tsú'tsämät, pø jii hermanohajxy näje'e quia'a najuøøbiä coo jaduhñ quia'a nejpiä coo hajxy ndsú'tsämät.

¹⁰ Tsøc mädiáacäm coo miich mnajuø'øy coo jaduhñ quia'a nejpiä coo yø'øduhmbä tsu'u'ch mdsú'udsät. Hoorä, tsøc mänánañäm coo miich yø'øduhmbä tsu'u'ch hñajty mdsu'u'ch maa quepychechwiinduumän. Hoorä, coo hermano jaduhñ tu'ug xyhíxät, ja'a ca'a najuøøbiä coo jaduhñ quia'a nejpiä coo miich jaduhñ mdsú'udsät, wehñdä je'e xpiadsú'tspät. Wehñdä miána'anät cooc tyijy jaduhñ tøø quiädieey coo jaduhñ tøø xpiadsu'u'ch.

¹¹ Y coo jaduhñ quiädieeyät, miichä pojpä hñajty mmøød je'eguiøxpä coo miich hñajty jim mgay. Hix, tøø mähdiøjc ñähho'tu'udyii ja'a Jesucristäm.

¹² Y coo miichä mähdiøjc jaduhñ myajcädieeyät, jaduhñ hñajty tøø piaady nejpä miichä Jesucristo hñajty tøø mmägadieeyän.

¹³ Hoorä, pø cädieeyaambä hermano tu'ug je'eguiøxpä cooch høøch yø'øduhmbä tsu'u'ch ndsu'u'ch, cábøch jaduhñ nn'ägädä tsú'udsät mänaa, coo hermano ñä'a cädieeyät.

9

¹ Cábøch pøñ xyhane'emy, túhmäts. Díshøch xwyiinguejx, túhmäts. Hamdsoochä Jesucristo nhijxy, túhmäts, ja'a hajxy nWiindsønñájtämbä. Mijts ja'a Diosmädia'agy nyajmábøjc, túhmäts.

² Näje'e jäya'ayhajxy miána'añ cooc tyijy høøchä Dios tøø xquia'a wiinguexy. Pero mmøødä tøyhajt hajxy jaduhñ coochä Dios tøø xwyiinguexy, je'eguiøxpä cooch mijts nyajmábøjcy ja'a Diosmädia'agy.

³ Cooch pøñ mänaa xñäma'ay cooc tyijy høøchä Dios tøø xquia'a wiinguexy, jaduhñhøch naxy nhadsoy:

⁴ Nmøødhøch ndijy cuhdujt jaduhñ cooch mijts cay hu'ugy nmäyujwá'anät je'eguiøxpä coochä Diostuung nduñ.

⁵ Ja'a Jesucristo yhuchhajxy, miøødä cuhdujt hajxy je'e coo hajxy wiädítät to'oxiøjmøød. Jaduhñä Pedro miøødäbä, møødä Dioswiinguexypähajxy. Jaduhñhøch cuhdujt nmøødäbä, hoyyä jäya'ayhajxy näje'e jia mäna'añ cooc tyijy høøch nga'a møødä.

⁶ Tøgä mmänaamb mijts jaduhñä coo højts cuhdujt nga'a møødä coo højts nduung nnajtshixø'øwät, coo højts ja'a Diosmädia'agy nyajwá'xät, høøch møødä Bernabé. Ja'a Diosquexyhajxy nägøxiä, tøø tiuung hajxy ñajtshixø'øy coo Diosmädia'agy hajxy yajwa'xy.

⁷ Yajmäjuuby hajxy je'e, y jaduhñ højts nyajmäjuyaambä. Hix, yajmäjuubiä soldadohajxy. Y jaanä jaduhñduhmbä, ja'a cudsaatypcamhajxy, jiøø'xypä tsaatyptsa'am hajxy. Y jaanä jaduhñduhmbä, ja'a meegcueendähajpähajxy, yhuucypiä meegtsi'tsnøø hajxy.

⁸ Ca'a yhøøch nhamdsoo mädia'agy hädaa; jaduhñä mädia'agy miänaambä ja'a Moisés jecy quiujáhyyäbä.

⁹⁻¹⁰ Jaduhñ jim myiñ cujaay: “Cabä waj mhaxuu'tsø'øgät coo trigopajc hñajty tiehñjo'o'ch.” Cooc Dios jaduhñ jecy miänaañ, jaduhñ miänaañ coo højts nyajmäjúyät. Hix, ja'a häna'c naaxpuhbähajxy møødä tsijpädøjc-hajxy, ñajuøøby hajxy jaduhñ coo hajxy yajmäjuya'añ. Jaanä jaduhñ højtspä, jaduhñ højts nyajmäjúubiät.

¹¹ Cooc højts mijtsä Diosmädia'agy tøø nyajnähixø'øy, paady hajxy xmiäjúyät.

¹² Mmäjuubiä Diosquexy hajxy, túhmäts; maas may højts cuhdujt nmøødä coo højts mijts xmiäjúubiät.

Pero cahnä højts mänaa nmäna'aññä coo højts nyajmäjúyät. Chojpy højts njoot jaduhñ coo Diosmädia'agy wiá'xät, ja'a Jesucristocøxpä, paady højts nhity jamiäjuy.

13 Pero nmøød højts cuhdujt jaduhñ coo højts nyajmäjúyät. Hix, ja'a häna'c-hajxy jim tuumbä tsajtøgooty, miøødä cuhdujt hajxy je'e coo hajxy quiáyät tijatiä cu'ughajxy jim quiuyoxøøby maa altarän.

14 Jaaná jaduhñduhmbä, tøø Dios yhane'emy coo Diosmädia'agy-yajwa'xpähajxy yajmäjúyät. Ja'a jäya'ayhajxy mädoobä, je'eds hajxy jaduhñ mäjúyap.

15 Pero høøch, cábøch mänaa tøø nmäna'añ cooch mijts xmiäjúyät. Jaduhñhøch njoot chocy cooch jamiäjuy ndúnät. Y cooch häyaa nnä'ä yuuhó'ogät, cab jaduhñ ñejpiä, nägooch hänajty tøø nduñ jamiäjuy.

16 Näje'e jäya'ayhajxy yajcumaya'añ je'eguiøxpä coo Diosmädia'agy hajxy yajwa'xy. Pero Díøshøch xwyiinguejx cooch nyajwá'xät høøch; cábøch hamdsoojoot nyajwa'xy. Paady, cábøch nyajcumaya'añ. Y coochä Diosmädia'agy jaduhñ nga'a yajwá'xät, xya-jcumädówäbøchä Dios jaduhñ.

17 Cábøch hamdsoojoot ndägøøyy Diosmädia'agy-yajwa'xpä. Díøshøch jaduhñ xwyiinguejx cooch miädia'agy nyajwá'xät. Cooch häxøpy tøø ndägø'øyy hamdsoojoot, mänitøch cu nyajmäjuuyy.

18 Jaanç tehñ xioondáacpøch jaduhñ coochä Diosmädia'agy nyajwa'xy jamiäjuy, hóyhøchä cuhdujt nja møødä cooch cu nyajmäjuuyy.

19 Hix, cooch jaduhñ nduñ jamiäjuy, cábøch pøn xyhane'emy. Pero chójpiøch njoot jaduhñ cooch hoy piønä xyhané'emät, nägoo Diosmädia'agy hajxy miäbøgät.

20 Cooch jim nhijty maa judíøshajxiän, jaduhñhøch nguhdujthajpä nebiä judíøshajxy quiuhdujthatiän, weenä Diosmädia'agy hajxy jaduhñ cu miäbøjcy. Y cooch jim nhijty maa jäya'ayhajxy hänajty yhane'emyiijän ja'a Diosmädia'agy, ja'a Moisés jecy quiujáhyyäbä, jaduhñhøch nyaghanehmbä neby hajxy hänajty yaghanehmbän, weenä Diosmädia'agy hajxy jaduhñ cu miäbøjcy, hóyhøchä cuhdujt nja nmøødä cooch nga'a yaghané'emät.

21 Y cooch jim nhijty maa jäya'ayhajxiän, ja'a cajpä judíøspä, ja'a mädia'agy hajxy ca'a cudiuumbä, ja'a Moisés jecy quiujáhyyäbä, jaduhñhøch nguhdujthajpä neby hajxy hänajty quiuhdujthatiän, weenä Diosmädia'agy hajxy jaduhñ cu miäbøjpä. Cábøch nmäna'ana'añ coochä Dios ja'a miädia'agy hänajty nga'a mäbøjcä. Hix, nmäbøjcäbøchä Jesucristo miädia'agy jaduhñ.

22 Y cooch jim nhijty maa hermanohajxiän, ja'a Diosmädia'agy hajxy ca'xy ca'a wiinjuøøbiä, jaduhñhøch nbaguhdujthajpä neby hajxy hänajty quiuhdujthatiän, je'eguiøxpä cooch hänajty nyajnahixø'øwa'añ nebiä Diosmädia'agy hajxy maas hoy wyiinjuø'øwät. Majátyhøch jaduhñ nwädity Diosmädia'agy-yajwa'xpä, cábøchä jäya'ayhajxy jaduhñ nyagjootma'ady, weenä Diosmädia'agy hajxy jaduhñ miäbøcy.

23 Páadyhøch jaduhñ nguhdujthaty, jaduhñhøchä Diosmädia'agy hoy nyajwá'xät. Y coochä jäya'ayhajxy may nyajmäbøgät, mänitøch jaduhñ nxoondá'agät.

24 Coö jäya'ayhajxy naxy ñiyhøxpäyø'øgyii, tu'jäya'ay jaduhñ nøcxy quiuhäyø'øgy, ca'a ñägøxiä. Tøyhajt jaduhñ. Jaduhñ mäwiin højtshájtäm, coo Diosmädia'agy hajxy nbanøcxäm, naxy hajxy hoy ndehñ quiudiúunämät, jaduhñ hajxy jim nnøcxämät Dioswiinduum.

25 Høxtahñdsä häyø'pädøjc-hajxy, tu'jøjpiä jioot ja'a wyiinmahñdy hajxy naxy piäda'agy coo hajxy jaduhñ quiuhäyø'øgät, túhmäts. Paadiä haxøøgpä hajxy jaduhñ quia'a nä'ägä nähdoñ. Premio hajxy jaduhñ móoyyap, y cab jaduhñ ñä'ä jecy. Pero højtshájtäm, coo Diosmädia'agy hajxy hoy njaanç tehñ quiudiúunämät, mänit hajxy jaduhñ jim nnøcxämät Dioswiinduum. Jimñds hajxy jaduhñ nhíjtämät cøjxta'axiøø.

26 Ja'a häna'c cuhäyø'pädøjc-hajxy, tøyyä hajxy jaduhñ ñä'ä päyø'øgy, cab hajxy jaduhñ yhimybiäyø'øgy miaamybiäyø'øgy. Ja'a boxeadorhajxy jajpä mägox mädex, cab hajxy jaduhñ ñä'ä yemy ñä'ä wopy. Jaduhñ mäwíinäts høøch, tu'jøjpiøchä Diosmädia'agy nbanøcxy.

²⁷ Cábøchhä haxøøgpä jaduhñ nnä'ägä nähdoñ. Ngudiúumbiøchhä Diosmädia'agy jaanç tehñ yhoy. Páadyhøchhä Dios jim xyajnöcxa'añ maa wyiinduumän. Y cooçh jaduhñ hoy nga'a cudiúnät, cábøch jim xyajnöcxät, hóyhøchhä jäya'ayhajxy hñajty tøø nja yajwiin-hixø'øy.

10

¹ Hermanodøjc, huuc mäadow hajxy jaduhñ. Jéquiänä Dios ja'a joc ja'a näma'a jaduhñ quiejxy maa nhaphájtäm maa ndeedyhájtämhajxy hñajtiän, møødá Moisés. Mänit hajxy jaduhñ jecy piadu'ubøjcy nägøxiä näwiinä. Mänit hajxy nägøxiä ñøønajxy coo Tsaptsmejy paquiä tiøøch.

² Ja'a Moisés hajxy hñajty näguipxy miøødwädipty nägøxiä maa joc hajxy hñajty piawäditiän, maa hajxy ñøønajxiän Tsaptsmejjiooty.

³ Mänitä Dios hajxy miooyyá ja'a cay ja'a hu'ugy. Mänit hajxy quiaaay nägøxiä.

⁴ Mänitä Dios ja'a tsa tu'ug yajtsäbijty. Mänitä nøø tiägøøyy xee'xpä. Mänit hajxy nägøxiä ñøøhuucy. Jaduhñ mäwíinäts ja'a Cristo neby yø'ø tsaajän. Hix, puhbéjtäp hajxy hñajty ja'a Crístäm majaty hajxy hñajty wiädity. Ja'a Cristo, Dios yHuung je'e.

⁵ Pero cabä Diosmädia'agy hajxy hoy nämay quiudiuuñ. Cabä Dios hajxy jaduhñ quiumaayyá. Paady hajxy jim tiu'uho'cy pactuum.

⁶⁻⁷ Paady hajxy jaduhñ jiajty yhabejty coo haxøøgpä hajxy yhadsojcy, coo quepychech ja'a naaxpoch hajxy wyiingudsähgøøyy. Hijxtahñd jaduhñ coo hajxy nga'a pahijx nga'a padúunämät. Jaduhñ jim myiñ cujaay maa Diosmädia'aguiän: “Mänit hajxy quiaaay yhuucy quepychechwiinduum; mänit hajxy yhejch piujty quepychechwiinduum.”

⁸ Näje'e hajxy haxøøg jiatcøøyy. Paady hajxy nähii'xtägøøg mil yho'cy tu'xøøbä. Paady hajxy jaduhñ nga'a pahijx nga'a padúunämät.

⁹ Näje'e Dios hajxy yhiixmajch pø tøyhajt hajxy hñajty yajcumädowa'añiijäm ja'a Dios. Mänit hajxy चाह्नुचु'tsä. Cøjx hajxy je'e yho'ogy. Paady hajxy jaduhñ nga'a pahijx nga'a padúunämät.

¹⁰ Näje'e hajxy hñajty jootcujc quia'a hity, je'eguiøxpä coo hajxy hñajty quia'a mäbøcy. Paadiä Dios ja'a mioonsä quiejxy, hoy hajxy yagho'ogyii.

¹¹ Paady hajxy jaduhñ jiajty yhabejty, hijxtahñd jaduhñ coo hajxy nga'a pahijx nga'a padúunämät. Paady cujaay yhity. Hix, habáatnäp jaduhñ coo Jesucristo yaa quiädaactägatsa'añ.

¹² Pøñ jaduhñ niñänøømäp coo hamuumdu'joot miäbøcy, naxy tiehñ ñiyajcopcø'wøøjät coo ñä'ä tu'udägóoyyät.

¹³ Mijts ja'a møjcu'ugong xjia wi'i yajtu'udägoyyaamb. Hoy piønä jaduhñ jia yag-jatcø'øwa'añii haxøøg. Pero jaduhñä Dios miäna'añ cooc hajxy xpiuhbedáañäm, neby hajxy jaduhñ nga'a tu'udägóoyyämät. Tøyhajt jaduhñ coo hajxy xpiuhbedáañäm. Hix, cabä møjcu'ugongä miäjaa jaduhñ miäbaady nebiä Dios mäjaa miøødän.

¹⁴ Jaduhñds je'e, hermanodøjc, cabä quepychech, cabä naaxpoch hajxy mwiingudsähgø'øwät.

¹⁵ Mnajuøøby hajxy jaduhñ cooçh tøyhajt nmädia'agy. Hix, mwiinjuøøby hajxy hädaaduhñ.

¹⁶ Coo tsuugay nyagjáltäm mänaa vino hajxy nhúucäm, mänitä Dioscujú'uyäp hajxy nyéjcäm. Je'e jaduhñ ñänøømby coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ñø'ty jiaanç tehñ yaghäyooyy mänaa hajxy je'e xñähho'túutäm maa hädaa yaabä naaxwiinän. Y coo tsajcaagy hajxy nyajniñäguidøøyyäm, je'e jaduhñ ñänøømgumbä coo hajxy tu'ugcopc tu'ugwiinmahñdy nhíjtäm, je'eguiøxpä coo Jesucristo ja'a ñi'x ja quiopc ñähdujcy mänaa hajxy je'e xñähho'túutäm.

17 Coo tu'ugpä tsajcaagy hajxy ngaamiújcäm, paady hajxy tu'ugcopc tu'ugwiinmahñdy nhíjtäm, hoy hajxy nja nämáyyäm.

18 Jaduhñä judíoshajxy yhippä tu'ugcopc tu'ugwiinmahñdy møødä Dios mänaa animal hajxy chu'učhän, ja'a jäya'ayhajxy yojxypä altarwiinduum.

19 Jadúhñhøch nmäna'añ coo quepychech naaxpoch quia'a jujyquiä. Jadúhñhøch nmänaambä coo animal quia'a cunuu'xiä ja'a jäya'ayhajxy yojxypä quepychechwiinduum.

20 Caj pues. Ja'a jäya'ay ja'a Diosmädia'agy hajxy ca'a mæbøjpä, coo animal hajxy yoxy quepychechwiinduum, ja'a møjcu'ugong hajxy jaduhñ wyiingudsähgøøby, ca'a Dyiosä. Cábøch njoot chocy coo jäya'ay hajxy mmøødhídät tu'ugwiinmahñdy, ja'a møjcu'ugong hajxy wyiingudsähgøøbiä.

21 Pø mhu'ugaambiä vino hajxy ja'a Dioscøxpä, cab hajxy hoy mhú'ugät ja'a møjcu'ugongcøxpä. Pø mgayaambiä tsajcaagy hajxy ja'a Dioscøxpä, cab hajxy hoy mgáyät ja'a møjcu'ugongcøxpä.

22 Cab jaduhñ yhooyä coo Dios hajxy nyagjootmä'tämät. Hix, maas mäjaamøødä Dios que højtshájtäm.

23 Jaduhñä jäya'ayhajxy miäna'añ cooc cuhdujt hajxy nmøødhájtäm hoy ñejpiä. Tøyhajt jaduhñ. Pero cab jaduhñ yhawiiinmatsä coo hajxy hoy ñejpiä njatcøøyyämät. Hix, coo hajxy hoy ñejpiä njatcøøyyämät, cabä Diosmädia'agy hajxy hoy nyajtu'uyóhyämät.

24 Näje'e jäya'ayhajxy yhøxta'ay coo hajxy chänä'awät coo hajxy yhäyówät. Pero maas hoy jaduhñ coo nmädøjc hajxy nbuhbéjtämät.

25 Tsu'udsä tsu'učh hajxy jaduhñ mädyiiaty jim tóo'cäp halaplazpa'c. Pero cab hajxy myajtówät pø tøø jäya'ay animal hajxy yoxy quepychechwiinduum. Cab hajxy je'eduhñ mnä'ä taj mnä'ä máyät ja'a tsu'učhcøxpä.

26 Hix, jaduhñä Diosmädia'agy miädia'agy: “Dios jie'e hädaa cøxiä maa hädaa yaabä naaxwiimbän.”

27 Coo pøn hajxy jaduhñ xwiówät mägaabiä, hoy jaduhñ coo hajxy mnócxät, hoyyä craa ja'a Diosmädia'agy hänäjty quia'a jagä mæbøcy. Y cab hajxy myajtówät pø tøø animal hänäjty quepychechwiinduum yoxyii. Cab hajxy mdaj cab hajxy mmáyät ja'a tsu'učhcøxpä.

28 Pero coo pøn hajxy jaduhñ xyhawáanät coo häna'c yø'ø animal hänäjty tøø yoxy quepychechwiinduum, cab hajxy jaduhñ mdsú'udsät, weenä craa jaduhñ quia'a jootma'ady ja'a hajxy tøø xyhawáanäbä. Jaduhñä craada'a tiajy miay coo jaduhñ quia'a hoyyä coo yø'øduhmbä tsu'učh hajxy ndsú'tsämat, ja'a häna'c yojxypä quepychechwiinduum.

29 Ja'a craa tøø xyhawáanäbä, je'ečh jaduhñ nnänøømby coo wehñdä jiootma'ada'añ. Cábøch jaduhñ nmäna'ana'añ coo mijts mjootma'ada'añ.

Näje'e jäya'ayhajxiäda'a miäna'ana'añ: “Ween yø'ø craa jaduhñ ñä'ä jootma'ady, nmøødhøch cuhdujt jaduhñ coochä animal ndsú'udsät, hoy häna'c tøø jia yoxy quepychechwiinduum.

30 Haa ca'a, nnämäabiøchä Dios Dioscujú'uyäp coochä tsu'učh hänäjty tøø ndsu'učh. Tiičh yø'ø craa jaduhñ coo xñä'ä nämä'ay cooch nga'a tsú'udsät.”

31 Jaduhñds je'e, tsøgä mädia'agy hajxy hoy yajxón yajtuun yaghíjtäm homiädyiibä coo hajxy ngaayy coo hajxy nhúucäm. Coo jäya'ay hajxy jaduhñ xyhíjämät coo mädia'agy hajxy hänäjty hoy yajxón nyajtuun nyaghíjtäm homiädyiibä, mänitä Dios hajxy miøjpäda'aga'añ jiaančpäda'aga'añ.

32 Hix, coo mädia'agy hajxy hoy yajxón nyajtuun nyaghíjtämät homiädyiibä, ni pøn jaduhñ quia'a jootmä'adät, ni ja'a judíoshajxy, ni ja'a jäya'ayhajxy cajpä judíoshajpä, ni ja'a jäya'ayhajxy ja'a Diosmädia'agy mæbøjpä.

³³ Jadúhnhøch høøchpä, hoy yajxónhøchä nyajtuñ nyaghity homiädyibä nébiøchä jäya'ayhajxy jaduhñ xquiumáyät. Cábøch pøn jaduhñ nyagjootma'ady. Hix, chójpiøch njoot jaduhñ coo jäya'ayhajxy nägøxiä ñähwá'adsät ja'a piojpä ja'a quiädieeyhajxy. Cábøch njoot chocy cooñ nidiuhñ nbáadät ja'a hoybä ja'a weenbä.

11

¹ Nébiøchä Jesucristo nbahixiän, jadúhnhøch mijts xpiahíxpät.

² Hermanodøjc, xoondáacpøch jaduhñ cooñ mijts xjiahmiejtsta'agy homiänaajä, y coo Diosmädia'agy hajxy homiänaajä myajtuñ nebiátyhøch hajxy tøø nnajtscapxøøyyäm.

³ Chójpiøch njoot jaduhñ coo hajxy mwiinjuó'øwät coo Jesucristo ja'a Dios Wyiindsønhaty y coo højtsä Jesucristo nWiindsønhtëmbä, højts ya'adiøjc-häjtäm. Jaanä jaduhñä ndo'oxiøjc-häjtäm hajxy xwyiindsønhtëmbä, højts ya'adiøjc-häjtäm.

⁴ Maa hermanodøjc-hajxy yhamugø'øyän tsajtøgooty, coo ya'adiøjc jim tu'ug Dyiospa'yá'axät cuhjupmøød, cabä Jesucristo hamuumdu'joot wyiingudsähgø'øy; ni jaduhñ coo Diosmädia'agy cuhjupmøød yajwiinhixó'øwät.

⁵ Jaanä jaduhñduhmbä, coo to'oxiøjc-hajxy jiiby Dyiospa'yá'axät cuhwa'ads tsajtøgooty, o coo Diosmädia'agy hajxy jiiby yajwiinhixó'øwät cuhwa'ads, høchähdiuunnä hajxy je'eduhñ. Jaduhñ je'eduhñ piaady nejpiän yø'ø to'oxiøjc quiuhwaay hajxy yhøxme'xypän.

⁶ Jaduhñds je'e, pø cabä to'oxiøjc-hajxy tiägø'øwa'añ tsajtøgooty cuhjuuxy, ween hajxy jaduhñ ñä'ägä yajcuhme'xy. Y pø tsähdiuumb hajxy jaduhñ cuhme'xy, ween hajxy ñiguiuhjuuxyii.

⁷ Pero ja'a ya'adiøjc-hajxy, cab hajxy je'e ween tsajtøgooty cuhjupmøød tiägøøbiä. Hix, jaduhñä Dios ja'a ya'adiøjc yhädiuunñ nebiä Diosän. Ja'a ya'adiøjc-cøxpä jaduhñ quiähxø'øgy coo Dios mäjaa jiaanç tehñ miøødä. Pero ja'a to'oxiøjc-cøxpä quiähxø'øgy coo ya'adiøjc mäjaa miøødäbä.

⁸ Coo Dios ja'a to'oxiøjc jecy yhädiuunñ, jayøjpä ya'adiøjc ja'a quiaaäch tu'ug piøjcäxä. Mänitä to'oxiøjc yajwa'añguiojjä caächhaam. Jaduhñ jim myiñ cujaay maa Diosmädia'aguiän. Pero cab jaduhñ miäna'añ coo ya'adiøjc yajwa'añguiojjä ja'a to'oxiøjc quiaaächhaam.

⁹ Ja'a ya'adiøjc-cøxpä ja'a to'oxiøjc yhädiuunäbä. Cab hajxy nmänáanämät coo ya'adiøjc yhädiuunä ja'a to'oxiøjc-cøxpä.

¹⁰ Páadiädsä to'oxiøjc-hajxy wiädítät cuhjuuxy, jaduhñ hajxy yajcähxø'øgät coo hajxy yhane'emyii ya'adiøjcäm. Jaduhñä Diosmoonsähajxy quiumay, ja'a hajxy jim tsajpootypä.

¹¹ Pero jaduhñä Dios hajxy jecy xquiunú'xäm ya'adio'oxy.

¹² Hix, jéquiänä to'oxiøjc yajwa'añguiojjä ja'a ya'adiøjc quiaaächhaam. Jaanä jaduhñduhmbä, ja'a to'oxiøjc-cøxpä ja'a ya'adiøjc myiñguia'ay.

¹³ Huuc mäna'an mijts pø hawiinmats jaduhñ coo to'oxiøjc-hajxy cuhwa'ads Dyiospa'yá'axät tsajtøgooty.

¹⁴ Høchähdiuunnä jaduhñ coo ya'adiøjc quiuhwaayhajxy yoñ yajyéegät. Hoy piønä jaduhñ miäna'añ.

¹⁵ Pero hahixøøyyäp ja'a to'oxiøjc-hajxy jaduhñ coo quiuhwaay hajxy yajyéegät yoñ; jaduhñ je'eduhñ miäbaady nebiä cuhmochpä.

¹⁶ Jaduhñ højts nnä'ägädä yajnahixø'øy coo to'oxiøjc-hajxy cuhmoch Dyiospa'yá'axät tsajtøgooty. Y jaduhñä hermanohajxy nägøxiä yajnahixøøbiä tsajtøgooty wiinduhmyhagajpt. Hoorä, pønjaty jaduhñ mänaamb cooc tyijy jaduhñ quia'a nejpiä coo to'oxiøjc-hajxy jaguiuhmoch tsajtøgooty Dyiospa'yá'axät, cabä tøyhajt hajxy ñä'ägädä møødä.

17-19 Tøøch nmädoyhaty coo hajxy näje'e haxøøgtøjiämuum mniñäma'ayii maa hajxy tsajtøgooty mhamugø'øyän. Tøyhajtäda'a jaduhñ. Cab jaduhñ yhooyä y cábøch jaduhñ ngumay, hóyhøch jaduhñ nja najuø'øy coo jäya'ayhajxy yhixa'añ pønjaty tøyhajt hoy wädijp.

20 Coo Jesucristo hänäjty yagho'oga'añii, mänitä jiamiøød ñämaayy coo hajxy chuu-gaamiügät ja'a Jesucristocøxpä. Pero mijts, coo hajxy naxy tsajtøgooty mhamugø'øy, coo hajxy naxy mdsuugaamiucy, cabä Jesucristo hajxy naxy mjahmiech.

21 Hanidiuhmjaty hajxy naxy mgay. Cab hajxy naxy mdajy mmay pø jii mmägu'ughajpä caayyøøc hajxy miøødä quia'a møødä. Näje'e hajxy naxy mmu'ugyii.

22 Jim hajxy hawiinmats mgay mhú'ugät maa mhamdsoo tøjc-hajxiän. Cab jaduhñ yhooyä coo hajxy jaduhñ mjatcø'øy maa Diostøjcän. Myajtsähdiuumbiä häyoobäya'ay hajxy jaduhñ. Cáboch mijts jaduhñ nnä'ägädä cumay coo hajxy jaduhñ mjatcø'øy.

23 Hamdsoöchä Jesucristo xyajnahixøøyy nébiøch mijts tøø nnajtsapxøøyyäm: Hoorä, mänittsuu, coo Jesucristo hänäjty tiooga'añii, mänitä Jesucristohajxy tiägøøyy tsuugaabiä møødä jiamiøødhajxy. Mänitä Jesucristo tsajcaagy quionø'cy.

24 Mänit Dioscujú'uyäp yejcy. Mänitä tsajcaagy yhaguidøøyy. Mänit miänaañ: "Huuc cay hajxy. Høøch nni'x høøch ngopc hädaa. Mijtscøxpøchä häna'c xtiooga'añ. Cooch mijts mänaa xjiahmiejtstä'agät, jaduhñä tsajcaagy hajxy mgáyät."

25 Y coo hajxy hänäjty tøø chuugaabiädøøñä, mänitä Jesús vino quionø'cy copajooty. Mänit miänängombä: "Cooch mijts nnähho'tu'udaannä, cooch nnø'ty nyaghäyowaannä, hawiinjemybiä Dios hajxy xmiøødyajcuhduga'añ. Hoorä, hädaa vino, hijxtahñd jaduhñ miähmø'øwa'añ nébiøch nnø'tiän. Y naaghooc hädaa vino hajxy mhü'ugy, mänitøch hajxy xjiahmiejtstä'agät."

26 Homiänaajä hädaa tsajcaagy hajxy hänäjty mgaya'añ, homiänaajä hädaa vino hajxy hänäjty mhü'uga'añ, myajcøhxø'py hajxy hänäjty coo Jesucristo hajxy tøø xñähho'túutäm. Hix, wiimbijtägatsaambä Jesucristo. Yaa jadähooc quiädaactägatsa'añ hädaa yaabä naaxwiin.

27 Nebiä Jesucristo jiamiøødhajxy miøødcaayy miøødhuuquiän, jaduhñäc hajxy ngaayy, jaduhñäc hajxy nhúucämbät. Pønjataiä howyiinmahñdy hänäjty ca'a møød coo hänäjty jaduhñ quiaya'añ, coo hänäjty jaduhñ yhu'uga'añ, haxøøg hajxy jaduhñ jiatcø'øy ja'a Jesucristo ñi'xcøxpä ñø'tycøxpä.

28 Jaduhñds je'e, coo hajxy hänäjty mgaya'añ ja'a Jesucristocøxpä, coo hajxy hänäjty mhü'uga'añ ja'a Jesucristocøxpä, naxy hajxy jayøjpiä mdehmñ ñiñajuø'øwøøjät pø howyiinmahñdy hajxy hänäjty mjaançh møød.

29 Pønjaty jaduhñ caaby huucp ja'a Jesucristocøxpä, coo hajxy jaduhñ quia'a møjpdä'agät coo Jesucristo hajxy xñähho'túutäm, yajcumädowáañäp hajxy jaduhñ.

30 Näje'e hajxy mba'ambety; näje'e hajxy mga'a majaamøødä. Høxtä näje'ejaty hajxy jaduhñ tøø yho'ogy. Paady hajxy jaduhñ mjaty mhabetý coo hajxy mga'a møjpdä'agy coo Jesucristo hajxy tøø xñähho'túutäm.

31 Pero cabä Dios hajxy xyajcumädóowämät coo howyiinmahñdy hajxy hänäjty nmøødhátäm coo hajxy hänäjty ngayáañäm ja'a Jesucristocøxpä, coo hajxy hänäjty nhu'ugáañäm ja'a Jesucristocøxpä.

32 Paadiä Dios hajxy tähoogaty xyajcumädóowäm, jaduhñ hajxy xyajnajuøøyyäm coo miädia'agy hajxy hänäjty hoy nga'a yajtúunäm. Y coo miädia'agy hajxy hoy nyajtúunämät, cab hajxy jii by nnä'ä hädáacämät møjcu'uhaam maa jäya'ayhajxy yhäda'aga'añän, ja'a hajxy ca'a mäbøjpä.

33 Jaduhñds je'e, hermanodøjc, coo hajxy hänäjty mänaa mgaamiuga'añ ja'a Jesucristocøxpä, coo hajxy hänäjty mänaa mhüucmuga'añ ja'a Jesucristocøxpä, naxy hajxy tu'cuhdujt mdehmñ quiaačhóonät. Mniyhahixø'øwøøjäp hajxy jaduhñ.

³⁴ Pø myähó'cäp hajxy hänajty, jayøjp hajxy mnä'ägä cáyät maa mdøjc-hajxiän. Jaduhñä Dios hajxy xquia'a yajcumädówät coo hajxy hänajty mgaamiuga'añ ja'a Jesucristocøxpä, coo hajxy hänajty mhuucmuga'añ ja'a Jesucristocøxpä. Madiu'uch hajxy tøø xjiaac mäyajtøy. Cooch jim nnøcxät maa mijtsän, mänítøch jim nyajtødiägó'øwät.

12

¹ Hermanodøjc, tsøg hajxy mädiáacäm nebiatiä Dioshespíritu hajxy xpiuhbéjtäm, coo hawiingatiä tuuᅅg hajxy xmióoyyäm. Naxy hajxy jaduhñ mdehñ wyiinjuó'øwät.

² Mnajuøøby hajxy jaduhñ, coo Diosmädia'agy hajxy hänajty mga'a panøcxyñä, je'enä quepychech naaxpoch hajxy hänajty mwiingudsähgø'øyñä. Cabä quepychech naaxpoch quiapxy miädia'agy. Jaduhñ hajxy hänajty mwädity nebiä tu'udägoybän.

³ Huuc wiinjuø'øw hädaa mädia'agy hajxy. Pønjetiä Dioshespíritu jaduhñ najtsapxøøyyäp, cabä Jesús hajxy je'e haxøøg ñänømy. Y pønjetiä Dioshespíritu jaduhñ ca'a najtsapxøøyyäp, cab hajxy hoy miäna'ana'añ coo Jesús hajxy nWiindsøñhájtäm.

⁴ Coo Diostuuᅅg hajxy jaduhñ ndúunäm, hawiingatiä Diostuuᅅg hajxy jaduhñ xpiáatäm. Pero ja'a Dios ja'a yhEspírituhajtiä hajxy jaduhñ xtiuuᅅgmóoyyäm.

⁵ Madiu'u ja'a Diostuuᅅg hajxy jaduhñ njaançh túunäm, pero tu'jäya'ayyä hajxy jaduhñ nWiindsøñhájtäm. Ja'a Jesucristo je'e.

⁶ Ja'a Dios hajxy xpiuhbéjtäm coo tiuuᅅg hajxy ndúunämät, nebiatiä tiuuᅅg hajxy xpiáatäm.

⁷ Paadiä Dioshespíritu hajxy hawiingaty xtiuuᅅgmóoyyäm, jaduhñ hajxy hoy nnibihbéjtämät hamiñ haxøpy.

⁸ Hix, näje'e hermanohajxy tiuuᅅgmo'oyii ja'a Dioshespíritäm coo hajxy quiapx coo hajxy miädiá'agät nebiä jajpä häna'cän.

⁹ Näje'e hermanohajxy piuhbedyii ja'a Dioshespíritäm coo hajxy hoy jiaançh tehñ miäböğät ja'a Diosmädia'agy. Näje'e hajxy miäjaamo'oyii nebiä jäya'ay hajxy yajmøcpøğät, ja'a pøjc ja'a híxäbä.

¹⁰ Näje'e hermanohajxy piuhbedyii ja'a Dioshespíritäm coo hajxy hoy-yagjuøøñä tiuñ ja'a Diosmäjaagøxpä. Näje'e hajxy tiuuᅅgmo'oyii coo Diosmädia'agy hajxy yajwá'xät. Näje'e hajxy tiuuᅅgmóoyyäbä coo hajxy yhøxcábät pøñ najtsapxøøyyäp ja'a Dioshespíritäm, pøñ najtsapxøøyyäp ja'a møjcu'ugóngäm. Näje'e hajxy piaadyii coo hajxy quiápxät wiinghayuucjaty. Näje'e hajxy piáatäbä coo hajxy quiapxhoyó'øwät waambatiä hermanohajxy tøø quiapxy wiinghayuucjaty.

¹¹ Hanidiuhmjatiä Dioshespíritu hajxy xtiuuᅅgmóoyyäm, nebiä jioot chocy. Tu'uquiä ja'a Dioshespíritu jaduhñ.

¹² Ja'a tu'ugpä ni'x, ja'a tu'ugpä copc, madiu'u pajc miøødä. Pero tu'ugpä ni'x tu'ugpä copc hajxy jaduhñ nmøødhájtäm. Jaduhñ mäwiin højtshájtäm, tu'ugmädia'agy hajxy nhájtäm coo Jesucristo hajxy nWiindsøñhájtäm, hoy hajxy nja nämayhájtäm.

¹³ Coo hajxy nnäbéjtäm, jaduhñä Dioshespíritu hajxy xpiädáacäm tu'ugmädia'agy nägøxiä, møødä judíoshajxy, møødä cajpä judíoshajxy, møødä jäya'ayhajxy je'ehájtäbä wiinghänä'cäm, møødä jäya'ayhajxy hijpä hawa'adstuum. Nägøxiä ja'a Dioshespíritu hajxy nmøødhájtäm.

¹⁴ Ja'a tu'ugpä ni'x ja'a tu'ugpä copc, madiu'u pajc hajxy nmøødhájtäm.

¹⁵ Coods yø'ø tecy jaduhñ ñä'ä mäná'anät: “Cábøch tii nmach cábøch tii nnähdoñ nej yø'ø cø'øjän, páadyhøch miich jaduhñ xquia'a yajtuna'añ”, cab jaduhñ ñä'ä tóyyäbä; haa ca'a, nyajyohy nyajnáxäm ja'a tecy jaduhñbä.

¹⁶ Jaaná jaduhñduhñbä, coo yø'ø taatsc jaduhñ miänáambät: “Cábøch jaduhñ nhixy nej yø'ø wiinän, páadyhøch miich jaduhñ xquia'a yajtuna'añ”, cab jaduhñ ñä'ä tóyyäbä; haa ca'a, nyajmädóowäm ja'a taatsc jaduhñbä.

¹⁷ Coo hajxy häxøpy nhaagä wiinhájtäm, cab hajxy häxøpy nmädóowäm. Y coo hajxy häxøpy nhaagä mädohndhájtäm, cab hajxy häxøpy tii xjiøjxuugøøyyäm.

¹⁸ Jaduhñä Dios hajxy xquiunúu'xäm nebiaty hajxy xyajmädsójcäm. Paadiä ni'x ja'a copc hajxy nmøødhájtäm, paadiä cø'ø ja'a tecy hajxy nmøødhájtäm.

¹⁹ Coo hajxy häxøpy nhaagä pajc-hájtäm, cabä nni'x ja'a ngopc-hajxy häxøpy yhíjtäm.

²⁰ Madiu'u ja'a pajc hajxy nmøødhájtäm ja'a tu'ugpä jäya'ay. Tu'ugni'x tu'ugcopc hajxy jaduhñ nmøødhájtäm.

²¹ Coo wiin häxøpy quiapxy, cabä cø'ø jaduhñ ñámá'awät: “Cábøch miiçh nyajmaajiaty.” Jaanä jaduhñä copcpä, coo häxøpy quiapxy, cabä tecy jaduhñ ñámáabiät: “Cábøch miiçh nyajmaajiaty.”

²² Pero nhaagä yajtuungpáatäm ja'a ni'x ja'a copc cøxiä, hoyyá pajc näje'e quia'a jagä møcä.

²³ Cabä ni'x ja'a copc hajxy teeñmuum nyajcähxø'øgåñäm, paadiä wit hajxy nmøødhájtäm.

²⁴ Pero ja'a nwiin ja'a njøjphájtämhajxy, cab jaduhñ ñejiä coo hajxy nyajcähxø'cämät. Jaduhñhøch cham tøø nmädia'agy nebiä Dios ja'a nni'x ja'a ngopc-hájtämhajxy xquiunúu'xäm tu'ughamuum. Hoorä, jaduhñ mäwiin højtshájtäm, tu'ugmädia'agy hajxy nnimiøødhíjtäm coo Diosmädia'agy hajxy näguipxy nmäbøjcäm, coo Jesucristo hajxy näguipxy nWiindsønhájtäm. Jaduhñä Dios hajxy xquiunúu'xäm coo hermanodøjc hajxy nwiingudsähgøøyyämät, hoy hajxy jia xoñ jia häyoy.

²⁵ Jaduhñä Dios quiumay coo hajxy nhíjtämät tu'ugjoot tu'ugcopc, coo hajxy nniçhojc coo hajxy nnimié'e'xämät hamiñ haxøpy.

²⁶ Coo tu'jäya'ay chaächpøgät, mänit hajxy nägøxiä njootmayhájtämät. Jaanä jaduhñduhmbä, coo tu'jäya'ay wyiingudsähgø'øwøøjät, mänit hajxy nägøxiä nxoondáacämät.

²⁷ Nwiindsønhájtämä Jesucristo hajxy nägøxiä pønhatiä Diosmädia'agy mäbøjp. Hawiingatiä Dios hajxy tøø xquiunúu'xäm.

²⁸ Näje'e hermanohajxy tøø tiuunqmo'oyii ja'a Diósäm. Ja'a Dios quiuguexyhájtäbä, je'e hajxy jayøjp tuunqpaat. Mänit hajxy je'e tiuunqpaatpä, ja'a Diosmädia'agy-yajwa'xpähajxy, møødä Diosmädia'agy-yajwiinhixøøbiähajxy. Näje'e hermanohajxy hoy-yagjuøøñä tiuñ ja'a Diosmäjaagøxpä. Näje'e hermanohajxy yajmøcpøcy ja'a jäya'ayhajxy nähba'amguhba'ambä. Näje'e hermanohajxy miäbuhbety. Näje'e hajxy jaduhñ miägapy yhane'emy. Näje'e hajxy piaadyii coo wiinghayuucjaty hajxy quiápxät.

²⁹ Hoorä, cabä Dios hajxy nägøxiä xquiuguexyhájtäm. Cabä Diosmädia'agy hajxy nägøxiä nyajwá'xäm. Cab hajxy nägøxiä nyajnähixøøyyäm. Cab hajxy nägøxiä ndúunäm hoy-yagjuøøñä ja'a Diosmäjaagøxpä.

³⁰ Cab hajxy nägøxiä nba'amyajnáxäm. Cab hajxy nägøxiä tøø xpiáatäm coo ngápämät wiinghayuucjaty. Y cab hajxy nägøxiä tøø xpiáatäm coo hajxy ngapx-hoyøøyyämät waambatiä hermano tøø quiapxy wiinghayuucjaty.

³¹ Tsøgä njoot hajxy pädáacäm hamuumdu'joot coo Dios tuunq hajxy ween xmióoyyäm ja'a maas tsoobaatpä. Chámhøchä mädia'agy hajxy nyajnähixø'øwa'añ nebiä Dios miädia'agy hajxy hoy mmaas yajtu'uyó'oyät.

13

¹ Coo nmädøjc hajxy nga'a tsojc nga'a mé'e'xämät, cabä Diosmädia'agy hajxy hänajty hoy ngudiúunäm, hoy hajxy cu nja capx cu nja mädiáacäm madiu'u nebiä jäya'ayhajxy yaa jia capxiän hädaa yaabä naaxwiin, nebiä Diosmoonsähajxy jim jia capxiän tsajpootyp.

² Coo nmädøjc hajxy nga'a tsojc nga'a mé'e'xämät, cab hajxy nnä'ägädä tsoobáatämät, hoy hajxy cu nja najuøøyyäm tii jadáañäp tii tunáañäp, hoy hajxy cøxiä wiinä cu nja

najuøyy cu nja jahmiéjtsäm, hoyyä møcmäjaa hajxy cu nja jaanč tehṁ miøødhájtäm hoy ñä'a tiigøxpä.

³ Coo nmädøjc hajxy nga'a tsojc nga'a mée'xämät, cab hajxy nnä'ägädä tsoobáatämät, hoyyä häyoobäjäya'ay hajxy cøxiä wiinä cu nja móoyyäm mäduhñtiä hajxy nmøødhájtäm, hoyyä jäya'ay hajxy cu nja nähho'túutäm.

⁴ Pøñä miädøjc tsojp mee'xp, mee'xxieemy hajxy jaduhñ yhity. Hoy hajxy jaduhñ miädøjc-haty. Cabä hadsocywyiinmahñdy hajxy miøødä. Cab hajxy yajcumaya'añ.

⁵ Pøñä miädøjc tsojp mee'xp, cab hajxy chähdiuhñdägoyyä. Cab hajxy wyiinducä. Cab hajxy jiootma'ady, hoy hajxy cøxypänejpä cu jia tunøø.

⁶ Cabä haxøøgpä hajxy chocy; ja'a tøyhajtpä hajxy jaduhñ chojpy.

⁷ Pøñä miädøjc tsojp mee'xp, miee'xtujpy hajxy. Coo hajxy cøxypänejpä tiunøøjät ja'a miädøjcäm, cab hajxy jiootma'ady. Cab hajxy ñäxø'øwø'øy, cab hajxy ñähøønø'øy. Hoy hajxy miäxi'igy, hoy hajxy miägapxy, weenä craa ja'a tøø quiädiéeyäbä jaduhñ yhuuc wiinmahñmech coo jaduhñ tøø quiädieey.

⁸ Habaadaamḃ jaduhñ coo jäya'ayä Diosmädia'agy hajxy hänäjty quia'a yajwa'xaannä. Habaadaamḃ jaduhñ coo jäya'ayhajxy hänäjty quia'a capx quia'a mädia'agaannä wiinghayuucjaty. Habaadaamḃ jaduhñ coo quia'a tsoobaadaannä tijatiä jäya'ayhajxy yaa ñajuøøby hädaa yaabä naaxwiin. Pero cøjxta'axiøø hajxy nničhoc nnimiee'xäänäm.

⁹ Cahnä hajxy hoy nwiinjuøøyyäm je'eguiøxpä coo hajxy yaa nhíjtämnä hädaa yaabä naaxwiin. Cahnä Diosmädia'agy hajxy hoy nhabøjcäm coo hajxy nyajwä'xämät.

¹⁰ Habaadaamḃ jaduhñ coo Diosmädia'agy hajxy maas ca'xy nwiinjuø'øwáanäm, paady hänäjty pøñ quia'a wäditaanñä Diosmädia'agy-yajwa'xpä.

¹¹ Coo hajxy nmuutsc-hájtämnä, cahnä hajxy hänäjty nwiinmahñméjtsäm. Pero coo hajxy nmøjjøøyyänä, mänit hajxy najuøøyyänä. Tøø hajxy nwiinmahñméjtsänä; cab hajxy nwiinmahñdyhájtänä neby hajxy tøø nmuutsc-hájtäm.

¹² Jaduhñ mäwíinäts je'e, coo hajxy yaa nhíjtäm hädaa yaabä naaxwiin, cahnä Diosmädia'agy hajxy hoy nwiinjuøøyyämnä. Cahnä Dios hajxy nhixyhájtäm. Pero coo hajxy jim nnøcxäänäm tsajpootyp, mänitä Dios hajxy nhixyhadäänäm neby hajxy je'e xyhixyhájtäm. Mänitä miädia'agy hajxy ca'xy nwiinjuø'øwáanäm.

¹³ Tägøøgtu'u ja'a Dios hajxy xyhanéhäm; coo miädia'agy hajxy nmäbøjcämät coo tiøyhajtä, chaads coo Jesucristo hajxy njøbhíxämät coo yaa quiädaactägatsa'añ, chaads coo nmädøjc hajxy ndsojc nmée'xämät. Hädaa høxhaambä jaduhñ maas tsoobaadaamḃ coo nmädøjc hajxy ndsojc nmée'xämät.

14

¹ Naxy hajxy ndehm ñiçhojc ndehm ñimiee'xämät hoy miänaajä. Je'e maas tsoobaatp. Jaanä jaduhñduhmbä, tsøgä Dios hajxy nämáayyäm coo mäjaa hajxy ween xmióoyyäm coo tiuung hajxy jaduhñ ndúunämät. Je'e tsoobaatp coo hermano ja'a Diosmädia'agy hajxy yajwa'xy.

² Näje'e hermanohajxy, coo hajxy hänäjty quiapxa'añ tsajtøgooty, cab hajxy howyiinjuøøñä miädia'agy. Hix, ja'a Dios hajxy jaduhñ miøødmädiaacypy, ca'a yhøjtshájtäm, je'eguiøxpä coo Dioshajtiä wyiinjuø'øy. Cab højts jaduhñ nnä'ägädä wiinjuøøyyäm. Najtsapxøøyyäp hajxy jaduhñ ja'a Dioshespíritäm. Jagooyyä Dios jaduhñ ñajuø'øy waambaty hajxy jaduhñ miädia'agy.

³ Pero coo Diosmädia'agy hajxy ngápxämät nebiä jäya'ayhajxy jaduhñ wyiinjuø'øwät, mänitä jäya'ay ja'a Diosmädia'agy hajxy hoy nyajwiingapxøøyyämät, hoy hajxy jaduhñ nmägapx nhané'emät, hoy hajxy jaduhñ ngapxmøcpøjcämät.

⁴ Pøñ Dioshajtiä nä'a møødmädiaacp, je'e mäjaa nidiuhñ móoyyäp nebiä Diosmädia'agy maas hoy jiaac wiinjuø'øwät. Hix, cabä jäya'ayhajxy jaduhñ wyiinjuø'øy waambaty

jaduhñ miädia'agy. Pero coo hermanodøjc ja'a Diosmädia'agy hajxy nyajwiin-gapxøyyämät howyiinjuøøñä, mänit hajxy miäjaamo'owøøjät nebiä Diosmädia'agy hajxy jaduhñ maas hoy jiaac wiinjuø'owät.

⁵ Maas tsoobaatp jaduhñ coo Diosmädia'agy hajxy ngápxämät howyiinjuøøñä; jaduhñä hermanohajxy nägøxiä wyiinjuø'owät, ja'a hajxy mädoobä. Hoy hit jaduhñ coo Dioshajtiä hajxy nägøxiä mmøødmädiá'agät. Mänit mæbøcy yhoyø'owät coo hajxy mgapxhoyø'owät, jaduhñä hermanohajxy nägøxiä wyiinjuø'owät.

⁶ Hermanodøjc, coochä Dioshajtiä nnä'ä møødmädiá'agät maa mijtsän, cab hajxy jaduhñ hoy mwiinjuø'owät. Pero mänit hajxy jaduhñ mwiinjuø'owät cooch mi-jtsä Diosmädia'agy hoy nyajwiinhixø'owät nebiätyhøchä Dios ja'a miädia'agy hånajty xñajtsapxøøyyä.

⁷ Høxtáhmädsä xuuxpædøjc-hajxy, coo hajxy hoy quia'a xú'uxät, nägoodä hajxy nøcxy ñä'ä yajxu'uxy ñä'ä yajpøgø'øy, y cab hoy yajmädoy.

⁸ Jaanä jaduhñduhmbä maa jäya'ayhajxy chiptuñän, coo soldado ja'a corneta hoy quia'a yajxú'uxät, cabä jiamiøødhajxy jaduhñ hoy chiptúnät. Nä'ä himybiäyø'øg nø'ø maamybiäyø'øgäp hajxy jaduhñ.

⁹ Jaduhñ mäwíinäts højtshájtäm, coo Dioshajtiä hajxy nmøødmädiáacämät, cabä nmädia'agy hajxy jaduhñ nniwyiinjuøøyyämät hamiñ haxøpy. Xiøøbä hajxy jaduhñ nnä'ä capx nnä'ä mädiáacämät.

¹⁰ Madiu'u hayuuc hajxy yaa ngápxäm hädaa yaabä naaxwiin. Hawiingaty hayuuc hajxy nniwyiinjuøøyyäm.

¹¹ Y coo mädia'agy hajxy hamiñ haxøpy nga'a nniwyiinjuøøyyämät hawiingjaty, cab hajxy jaduhñ hoy nnimiøødmädiáacämät.

¹² Jaduhñ mäwíinäts mijts, mjaançh tehñ miänaamb mijts jaduhñ coo Dioshespíritu hajxy xtiuungmó'owät. Y myujwá'anäp ja'a tuung hajxy mädyii maas tsoobaatp. Jaduhñä hermanodøjc hajxy maas hoy myajwiingapxø'owät nebiä Diosmädia'agy hajxy jaduhñ maas hoy wyiinjuø'owät.

¹³ Jaduhñds je'e, pøñ jaduhñ howyiinjuøøñä ca'a capxp ca'a mädiacp, weenä Dios jaduhñ ñäma'ay coo miäjaamo'owøøjät nebiä miädia'agy quiapxhoyø'owät.

¹⁴ Coo Dios hajxy nba'yáaxämät ja'a hayuuc-haamby mädyii Dioshajtiä wyiinjuøøbiä, cab hajxy nwiinjuøøyyämät, hoy hajxy cu nja mädiáacäm wiinmahñdyhaam. Y cab hajxy jaduhñ nnä'ägädä wiinjuøøyyäm.

¹⁵ Jaduhñds je'e, tsøcxä Dios hajxy pa'yáaxäm juøhñdyhaam, pero howyiinjuøøñä. Tsøcxä Dioshøy hajxy høøwäm juøhñdyhaam, pero howyiinjuøøñä.

¹⁶ Coo Dios hajxy nnämáayyämät “Dioscujú'uyäp”, ja'a hayuuc-haamby mädyii Dioshajtiä wyiinjuøøby, cab hajxy hamdsoo nwiinjuøøyyämät. Y ja'a jäya'ayhajxy jii mädoobä, ni je'e hajxy jaduhñ quia'a wiinjuø'owät. Y cab hajxy hoy piamáná'anät “Dioscujú'uyäp.”

¹⁷ Hoyyä Dios hajxy yajxón cu nja nämáayyäm “Dioscujú'uyäp”, ja'a jäya'ayhajxy jii mädoobä, cab hajxy wyiinjuø'owät. Y cabä Diosmädia'agy hajxy jaduhñ jiaac wiinjuø'owät.

¹⁸ Høøch, nnämáabiøchä Dios “Dioscujú'uyäp” je'eguiøxpä cooch pøñ jaduhñ xquia'a najtspaadø'øy nébiøch hayuuc-haamby ngapxiän, ja'a Dioshajtiä wyiinjuøøbiä.

¹⁹ Pero maa hajxy nhamugøøyyämän tsajtøgooty Dioswiingudsähgøøbiä, tsoobaatp jaduhñ cooch howyiinjuøøñä ngápxät, hoy jia weentiä. Cab jaduhñ jiaty tsoobáadät cooch hayuuc-haamby ngápxät ja'a Dioshajtiä wyiinjuøøbiä, hóyhøch yoñ cu nja capx. Hix, cooch howyiinjuøøñä ngápxät, wyiinjuø'owäp ja'a hermanohajxy jaduhñ, jaduhñhøchä Diosmädia'agy hajxy hoy nyajwiingapxø'owät.

²⁰ Hermanodøjc, tsøg hädaa mädia'agy hajxy hoy wiinjuøøyyäm nebiä møjhäna'c-hajxy hoy wyiinjuø'øyän. Yø'ø pigäna'c-hajxy, cahnä hajxy wyiinmahñmechñä. Pero cahnä haxøøgpä hajxy yhixy yhabaadyñä.

21 Jaduhnä Diosmädia'agy jecy miänaañ: “Ja'a judíoshajxy, cábøçhä nmädia'agy hajxy xmiábøgaanä. Nguexáambiøçhä jäguembä jäya'ay jim maa judíoshajxiän. Mänit hajxy miøødmädia'aga'añii wiinghayuuc-haamby. Pero ni jaduhñhøçhä nmädia'agy hajxy xquia'a mäbøgaanä, nømä Dios miäna'añ.”

22 Ja'a jäya'ay ja'a Diosmädia'agy hajxy ca'a mäbøjpä, je'eguiøxpä højts hayuuc-haamby ngápãm, ja'a Dioshajtiä wyiinjuøøbiä, ca'a jie'eguiøxpä ja'a jäya'ayhajxy ja'a Diosmädia'agy mäbøjpä. Coø hajxy naxy ngápãm ja'a hayuuc-haamby mädyii Dioshajtiä wyiinjuøøby, jaduhnä Dios hijxtahñd xii yecy coø jäya'ay tsaächpä peenä hajxy piaada'añ, ja'a Diosmädia'agy hajxy ca'a mäbøjpä. Pero coø Diosmädia'agy hajxy naxy ngápãm howyiinjuøøñä, jaduhnä Dios hijxtahñd xii yecy coø jäya'ay hoybä weenbä hajxy piaada'añ, ja'a Diosmädia'agy hajxy mäbøjpä.

23 Hiç, coø hajxy nägøxiä ngápãmät ja'a hayuuc-haamby mädyii Dioshajtiä wyiinjuøøby maa hajxy hñajty nhamugøøyyämän tsajtøgooty Dioswiingudsähgøøbiä, y coø jäya'ayhajxy jim tiägø'øwät, ja'a Diosmädia'agy hajxy ca'a mäbøjpä, jaduhñda'a hajxy miäná'anät cooc tyijy hajxy nguuhñäm.

24-25 Pero coø Diosmädia'agy hajxy nägøxiä ngápãmät howyiinjuøøñä, mänitä jäya'ayhajxy wyiinjuøøwät, ja'a hajxy ca'a mäbøjpä. Mänit hajxy yhuuc tehñ wyiinmahñmédsät. Mänit hajxy hamdsooyä ññajuøøwøøjät coø hajxy hñajty hoy tøø quia'a jäya'ayhaty. Mänit hajxy jaduhñ jyicädá'agät. Mänitä Dios hajxy yhuuc tehñ wyiingudsähgøøwät. Mänit hajxy yhuuc tehñ miäná'anät coø Dios hajxy hñajty tøy xjiaanç tehñ miøødhñtam.

26 Hermanodøjc, maa hajxy nhamugøøyyämän tsajtøgooty Dioswiingudsähgøøbiä, tsøg hajxy yajxon yagjñtam nägøxiä, jaduhnä Diosmädia'agy hajxy maas hoy nmaas mäbøjcämät. Näje'e Dioshöy hajxy yhøwa'añ. Näje'e hajxy yajnähixø'øwa'añ. Näje'e hajxy miädia'aga'añ waambatiä Diosmädia'agy hajxy hñajty tøø ñajtsapxøøyii ja'a Diósäm. Näje'e hermanohajxy quiapxa'añ hayuuc-haamby mädyii Dioshajtiä wyiinjuøøby. Y näje'e hermanohajxy quiapxhoyø'øwa'añ waambatiä hermanohajxy hñajty tøø quiapxy ja'a hayuuc-haamby ja'a Dioshajtiä wyiinjuøøbiä.

27 Coø hajxy mänaa ngápãmät ja'a hayuuc-haamby ja'a Dioshajtiä wyiinjuøøbiä maa hajxy hñajty nhamugøøyyämän tsajtøgooty Dioswiingudsähgøøbiä, nämetsyä nädägøøquiä hajxy ngápãmät hanidiuhmjaty. Mänitä hermano tu'jäya'ay xquiapxhoyøøyyämät.

28 Pero pø cabä hermanohajxy jim näje'e jiaty capxhoyø'øw, mejor ween hajxy jim nga'a nä'ägädä cápxämät tsajtøgooty ja'a hayuuc-haamby mädyii Dioshajtiä wyiinjuøøby. Wiingtuum hajxy nøcxy nnä'ägädä cápxäm jaduhñ hanidiuhmjaty. Xmiädóowämöp ja'a Dios hajxy jaduhñ.

29 Jaanä jaduhñduhmbä, coø hermanohajxy hñajty quiapxa'añ waambaty hajxy hñajty ñajtsapxøøyii ja'a Diósäm, ween hajxy nämetsyä nädägøøquiä quiapxy. Y ja'a hermanohajxy jaac jiiä, mänit hajxy jaduhñ miäná'anät pø tøø hajxy hoy miädoy, pø caj.

30 Y coø wiinghermano hñajty quiapxa'añ waambaty hñajty ñajtsapxøøyii ja'a Diósäm, weenä hermano yhuuc hamoñ, ja'a hñajty capxpä.

31 Hanidiuhmjaty hajxy ngápãmät nägøxiä waambatiä Dios hajxy hñajty xñajtsapxøøyyäm. Jaduhñ hajxy nägøxiä maas hoy nhabøjcämät; jaduhñ hajxy nägøxiä nniguiapxwññämät.

32 Hiç, coø miiç hñajty mgapxa'añ waambaty miiçhä Dios hñajty xñajtsapxøøwaañä, mänit mgápät coø hñajty tøø xyhabaatä.

33-34 Jaduhnä Dios quiumay coø hajxy hanidiuhmjaty ngápãmät. Cab jaduhñ quiu-may coø hajxy nägøxiä nxiicmujc nmädiaacmññämät tsajtøgooty.

Cab jaduhñ yhooyä coo to'oxiøjc-hajxy jiihy quiápxät tsajtøgooty maa Dios hajxy hñajty nwiingudsähgøøyyämän. Cabä Dios jaduhñ miäna'añ coo hajxy jiihy quiápxät. Jaduhñä hermanohajxy nägøxiä quiuhdujthaty wiinduhmyhagajpt. Jaduhñä Diosmädia'agy miäna'añ coo to'oxiøjc-hajxy miädia'agymiäbøgät.

³⁵ Hoçhähdiiuunnä jaduhñ coo to'oxiøjc-hajxy jiihy quiápxät tsajtøgooty. Pø cabä Diosmädia'agy hajxy hñajty tøø wyiinjuø'øy tsajtøgooty, jimä ñihyhap hajxy miäyajtówät maa yhamdsoo tøgootyhajxiän.

³⁶ Jaduhñä hermanodøjc-hajxy nägøxiä miäna'añ wiinduhmyhagajpt coo to'oxiøjc-hajxy jiihy quia'a capx quia'a mädiá'agät tsajtøgooty nebiä Diosmädia'agy miäna'añ. Y mijts jim hijpä Corintos, jaduhñ mijts mbaguhdujthájpät. Caj mijts mhamdsoo cuhdujt myajtúnät.

³⁷ Nébiøch chamñ ngujaay, Diosmädia'agy hädaaduhñ. Naxy hajxy jaduhñ mdehmñ miäbøgät, pønjaty jaduhñ niñänøømäp coo Dios hajxy ñajtsapxøøyyäxä, coo Dioshèspiritu piuhbedyii.

³⁸ Pønjaty hajxy jaduhñ ca'a mäbøgaamb, cabä Dios hajxy jaduhñ quiumaya'añii.

³⁹ Jaduhñds je'e, hermanodøjc, tsøgä Dios hajxy nämáayyäm coo hajxy tehngajnä ween xpiuhbéjtämät, coo miädia'agy hajxy xñajtsapxøøyyämät. Jaduhñä miädia'agy hajxy hoy nyajwá'xämät. Pøn jaduhñ capxaamb mädia'agaamb ja'a hayuuc-haamby ja'a Dioshajtiä wyiinjuøøbiä, ween hajxy jaduhñ quiapxy, ween hajxy jaduhñ miädia'agy.

⁴⁰ Pero tsøgä Diosmädia'agy hajxy hoy yajxonñ yagjáltäm tsajtøgooty.

15

¹⁻² Hermanodøjc, tsøg hajxy jahmiejtstáacäm coo Jesucristo hajxy tøø xñähho'túutäm. Jaduhñhøch mijts tøø nyajwiingapxø'øy. Tøø hajxy jaduhñ nmäbøjcäm. Coo hajxy tehngajnä nmäbøjcämät hamuumdu'joot, mänit hajxy jim nnøcxämät Dioswiinduum. Pero coo hajxy jaduhñ nga'a mäbøjcämät, cab hajxy jim nnä'ägädä nøcxämät.

³ Jaduhñhøch mijts tøø nyajwiingapxø'øy nebiátyhøchä Dios tøø xñajtsapxøøyyä. Jaanç tehñ choobaatp hädaa Diosmädia'agy jaduhñ. Tøø Jesucristo hajxy xñähho'túutäm; jaduhñä nbojpä ngädieeyháltäm hajxy tøø xyajnáhwáatsäm. Jaduhñ jim myiññ cujaay maa Diosmädia'aguiän.

⁴ Coo Jesucristo hñajty tøø yho'ogy, mänit hoy ñaaxtägø'øy. Mänit hoy jiuypiojtägach cumaaxc. Jaduhñ jim myiñngombä cujaay maa Diosmädia'aguiän.

⁵ Mänitä Pedro ja'a Jesucristo hoy wyiinguhixø'øy. Mänitä Jesucristo hoy wyiinguhixøøyyägombä ja'a jiamiøødhajxy, ja'a nämajmetspäjäya'ayhajxy.

⁶ Mänit hoy wyiinguhixøøyyägombä ja'a miägu'ughajpähajxy nämägooxmägo'xnaxiä. Näje'eyyä hajxy tøø yho'nä, caj ñämayyä.

⁷ Mänitä Jacobo ja'a Jesucristo jadähooc wyiinguhixøøguiombä. Mänitä Jesucristo hoy wyiinguhixøøyyägombä ja'a jiamiøødhajxy nägøxiä.

⁸ Høøch, høxháamhøchä Jesucristo njaac tehñ yhiyxy. Pero cábøch mähdiojc jaduhñ nnä'ägädä tsoobaady.

⁹ Cábøch cuhdujt møc nmøødä nej yø'ø Dioscuguexyypä cuhdujt hajxy møc jiaanç tehñ miøødän. Cábøch mähdiojc nhawiinmatsä cooçh mähdiojc jaduhñ nniñänømøøjät cooçh Dios xquiuguexyhajpä. Hix, haxøøghøch hijty njäya'ayhaty. Nyajtsaächpøjpiøchä jäya'ayhajxy hijty, ja'a Diosmädia'agy hajxy hijty panøcxpä.

¹⁰ Pero cooçhä Dios xjiaanç cuguexyhaty, páadyhøch jaduhñ xpiuhbety. Hóyhøch nduñ. Maas máyhøchä Diosmädia'agy tøø nyajwa'xy ja'a nmädia'agyháamhøch que ja'a Dios quiuguexyypähajxy tøø yajwa'xy, ja'a hajxy jaac jimä. Ca'a yhøøch jaduhñ tøø nnä'ä piy ngopcóotyhøch; Diøshøchä wiinmahñdy tøø xmio'oy. Jaduhñhøchä Dios xpiuhbety ja'a miäjaahaam.

11 Pero cab jaduñ ñeipiä pønjaty mijtsä Diosmädia'agy tøø xyajwiingapxø'øy, pø høøch, pø wiinghäna'c. Tu'ugmädia'agy højtsä Diosmädia'agy nyajwa'xy. Y tøø mijtsä Diosmädia'agy mmäbøcy.

12 Jaduñ højtsä mädia'agy nyajwa'xy coo Jesucristo jiuypiojtägajch coo hänajty tøø yho'ogy. Mayyä jäya'ayhajxy jaduñ quia'a mäbøcy cooc tyijy ja'a ho'oguiäya'ayhajxy quia'a juypiøga'añ. Cabä tøyhajt hajxy jaduñ ñä'ä møødä.

13 Pø cab häxøpy jaduñ tiøyyä coo ho'oguiäya'ayhajxy jiuypioøga'añ, cabä Jesucristo cu jiuypiojcy.

14 Y coo Jesucristo häxøpy tøø quia'a juypiøcy, cajxä hädaa mädia'agy häxøpy choobaady neby højts jaduñ nja yajwa'xy. Y nej mijtsä mädia'agy hajxy mja mäbøcy, ni je'e häxøpy quia'a tsoobaady.

15 Jaduñ højtsä Diosmädia'agy nyajwa'xy coo Dios ja'a Jesucristo yagjuypiojcy. Pø cab häxøpy jaduñ tiøyyä, hønndaacp højts häxøpy ja'a Dioscøxpä. Hix, pø cab häxøpy jaduñ tiøyyä coo ho'oguiäya'ayhajxy jiuypioøga'añ, cabä Dios ja'a Jesucristo cu yagjuypiojcy.

16 Pø cab häxøpy jaduñ tiøyyä coo ho'oguiäya'ayhajxy jiuypioøga'añ, cabä Jesucristo cu jiuypiojcy.

17 Y coo Jesucristo cu quia'a juypiøjcy, cabä mädia'agy häxøpy choobaady neby hajxy nmäbøjcäm. Y cabä nbojpä ngädieeyhajxy häxøpy ñähwaatsäm.

18 Y tøø ho'oguiäya'ayhajxy häxøpy yhäda'agy møjcu'uhaam, hoy hajxy cu jia mäbøc ja'a Jesucristo miädia'agy.

19 Coo Jesucristo cu quia'a juypiøjcy, cab hajxy häxøpy jim nnøcxäänäm tsajpootyp. Tøø hajxy häxøpy nniwyiinhøhnäm hamiñ haxøpy. Hoñäxuu'tsnä jäya'ay hajxy häxøpy xyhjxäm.

20 Pero tøyhajt jaduñ coo Jesucristo jiuypiojtägajch. Jayøjp je'e jiuypiojtsohñ. Høxhaam hajxy njaac juypiøgäänäm.

21 Tu'jäya'ay jecy yho'tsohñ hädaa yaabä naaxwiin, ja'a craa Adánhajtäbä. Paadiä Adán jecy yho'cy, coo Dios ja'a miädia'agy quia'a cudiuunä. Y jaanä jaduñduhmbä, tu'jäya'ay jiuypiojtsohñ; ja'a Jesucristo je'e.

22 Ja'a Adán, højts nhaphajt ndeedyhajtäm je'e, paady hajxy nägøxiä nbaho'ogäänäm. Y jaanä jaduñduhmbä, nägøxiä hajxy njuypioøgäänämbä, pønjataiä Jesucristo miädia'agy mäbøjcäp.

23 Coo Jesucristo hänajty tøø jiuypiojtägach, mänit jim ñøcxcombä maa Tieediän. Coo jim quioo'ty, mänit tiägøøyy hanehmä. Y coo yaa quiädaactägätsät hädaa yaabä naaxwiin, mänitä ho'oguiäya'ayhajxy jiuypiojtägatsa'añ, ja'a Jesucristo miädia'agy hajxy hänajty tøø miäbøjcäbä.

24-26 Mänitä Jesucristo miäjäda'aga'añ. Mänitä Dios ja'a miädsip ja'a quiuhdujthajxy piøgäänäxä nägøxiä. Mänitä jäya'ayhajxy quia'a ho'ogaannä ni mänaa. Mänitä Jesucristo ja'a Dios cuhdujt yajcø'ødägø'øwa'añ neby jäda'ahaty yhane'emiän. Mänitä naaxwiimbä wyiimbidaannä:

27 "Tøø Dios ja'a Jesucristo cuhdujt mio'oy coo jäya'ay cøxiä yhané'emät." Nømä Diosmädia'agy jecy miänaañ. Mänit jaduñ tiøjiajty mänaa Jesucristo tiägø'øyän jäya'ayhanehmä. Pero cabä Diosmädia'agy jecy miänaañ coo Dios yaghane'emy. Hix, jaaya'ayä cuhdujt yejc coo Jesucristo jäya'ay cøxiä yhané'emät.

28 Coo Jesucristo ja'a miädsip hänajty tøø quia'a cøxy yajmäjäda'agy, mänitä Tieedy cuhdujt quiøxy yajcø'ødägø'øwa'añ mäduhñtiä cuhdujt hänajty tøø mio'oyii. Jaduñnä Jesucristo yhane'ema'añii ja'a Tiéediäm. Jaduñnä Dios cøxiä yhane'ema'añ.

29 Näje'e jäya'ayhajxy ñäbety ho'oguiäya'aguixpä. Pø cab häxøpy jaduñ tiøyyä coo ho'oguiäya'ayhajxy jiuypioøga'añ, tiiguixpä jäya'ayhajxy jaduñ coo ñäbety ho'oguiäya'aguixpä.

³⁰ Nmäbøjpy hõjts jaduhñ coo hajxy njujypiøgáañäm, paady hõjts nga'a mõjpäda'agy, hoy hõjts nja wädity mäjahñdiuum homiänaajä.

³¹ Cooch nmäna'añ cooch jaduhñ nwädity mäjahñdiuum, je'eçh jaduhñ nnänøømby coochä ca'awiindøyhäna'c-hajxy xjia wi'i yagho'oga'añ homiänaajä. Hermanodøjc, tehñ tiøyhajt jaduhñ cooch nxoonda'agy mijtsøxpä, je'eguiøxpä coo Jesucristo miädia'agy hajxy mmäbøjcä, ja'a hajxy nWiindsøñhåjtämbä. Hoorä, jaanä tøyhajt je'eduhñbä cooch nwädity mäjahñdiuum homiänaajä.

³² Tøøchä ca'awiindøyhäna'c-hajxy mayhooc xjia wi'i yagho'oga'añ yaa Efeso ja'a Diosmädia'agyquiøxpä. Cooch häxøpy nga'a mäbøcy coo ho'oguiäya'ayhajxy jiu-jypiøga'añ, cábøchä Diosmädia'agy häxøpy nyajwa'xy. Coo häxøpy jaduhñ quia'a tøyyä coo ho'oguiäya'ayhajxy jiu-jypiøga'añ, cu nmänáañäm hajxy jaduhñ: “Tsøg hajxy jaac cáayyäm, tsøg hajxy jaac húucäm, coo hajxy jaboom nho'ogáañäm.”

³³ Cab hajxy myajwiinhóønät. Cab hajxy mmøødwäidjmúgät ja'a häna'c-hajxy mänaambä cooc tyijy ho'oguiäya'ayhajxy quia'a jujypiøga'añ coo hajxy jaduhñ xya-jtu'udägóyyät.

³⁴ Najtshixø'øw yø'ø mhaxøøgcuhdujt hajxy. Hoy hajxy myohy, hoy hajxy mnájxnät. Näje'e yø'ø mjamiøødhajxy quia'a mäbøcyñä ja'a Diosmädia'agy. Hoçhähdiuunñä je'eduhñ.

³⁵ Näje'e jäya'ayhajxy yajtøwa'añ: “Nebiä ho'oguiäya'ayhajxy jiu-jypiøga'añ. Tii ni'x tii copc hajxy miøødhadaamby.”

³⁶ Hoy piønä jaduhñ ñajuø'øy. Coo mädyii tøømd mní'ibät, hoy trigo, tsipcøxp jaduhñ piu'udy; pø caj, cab jaduhñ ñä'ä muxy.

³⁷ Y ja'a tøømd jaduhñbä, coo mní'ibät, wiing jaduhñ jiajnä coo miuxy.

³⁸ Dios jaduhñ tøø wyiinmay nebiatiä tøømd jiädät. Wiingatiä tøømd quiunuu'xy.

³⁹ Jaanä wiingatiä Dios ja'a nni'x ja'a ngopc-hajxy xquiunúu'xämbä. Y wiingatiä animal ñi'x quiopc-hajxy quiunúu'xäxäbä, møødä animalhajxy ja'a tø'ødstuum tsänaabiä, møødä muuxyhajxy, møødä hacxhajxy.

⁴⁰ Ja'a hajxy jim hijpä tsajtcøxp, wiing hajxy jaduhñ quiähxø'øgy. Cab hajxy jaduhñ quiähxø'øgy neby hajxy yaa quiähxø'øguiän, ja'a hajxy yaa hijpä hädaa yaabä naaxwiin.

⁴¹ Haagä hajajp ja'a xøø møødä po'o møødä madsa'a, pero haagä wiingaty yhajajy. Jaanä jaduhñ ja'a madsa'abä, haagä wiingaty yhajajp.

⁴²⁻⁴⁴ Jaduhñ mäwíinäts hõjtshåjtäm, coo hajxy nho'c coo hajxy ndägóoyyäm, cabä mäjaa hajxy nmøødhåjtänä. Mänit hajxy nõcxy nnaaxtägøøyyänä. Ja'a naaxni'x ja'a naaxcopc jaduhñ naaxtägøøby. Mänit hajxy ngøxy yajxee'xtúutänä jutjooty. Mänit hajxy njåjtänä hoxiøøghajnä. Pero coo Jesucristo yaa quiädaactägatsáañgombä hädaa yaabä naaxwiin, mänit hajxy njujypiøjtägatsáañgombä, coo hajxy hånajty tøø nho'c coo hajxy hånajty tøø ndägóoyyäm. Wiing hajxy jaduhñ njadäänänä coo hajxy jim nnøcxáañänä Dioswiinduum. Hoy yajxon hajxy hånajty njadäänäm haagä mäjaamøød. Y cab hajxy hånajty mänaa nho'tägatsáañänä. Wiing hajxy yaa nhíjtäm hädaa yaabä naaxwiin; wiing hajxy hånajty jim nhidäänänä Dioswiinduum.

⁴⁵ Jaduhñä Diosmädia'agy miäna'añ: “Coo Adán jaduhñ quiunuu'xtsohñä, mänitä ju-gyhajt miooyyä.” Pero coo Jesucristo jiu-jypiøjtägajch, paadiä tøyhajt hajxy nmøødhåjtäm coo hajxy nbaju-jypiøjtägatsáañämbä.

⁴⁶ Jawyiin hajxy yaa nhíjtäm hädaa yaabä naaxwiin. Coo hajxy njujypiøjtägatsáañäm, mänit hajxy jim nnøcxáañäm Dioswiinduum.

⁴⁷⁻⁴⁹ Ja'a craa Adánhåjtäbä, jecy je'eduhñ quiunuu'xtsohñä naaxoc-haam. Yaa jaduhñ jecy chänaabiä hädaa yaabä naaxwiin. Jaanä jaduhñ hõjtshåjtämbä, naaxoc hajxy nni'xhåjtäm ngopc-håjtäm nebiä Adángän. Hix, je'e hõjts nhaphajt ndeedyhåjtäm. Haa ja'a Jesucristo, jim je'eduhñ chohñ tsajpootyp. Coo yaa quiädaactägatsa'añ hädaa yaabä

naaxwiin, mänit hajxy njujypiogáanäm, pønjatiä miädia'agy hánajty tøø miäbøjcä. Jaduhñ hajxy jimñ nhidáanäm tsajpootyp nebiä Jesucristo jimñ yhitiän.

⁵⁰ Hermanodøjc, huuc mäadow hajxy, cab hajxy jimñ hoy nnøcxämät Dioswiinduum ni'xcopcmøød nebiä nni'xä ngopc hajxy yaa nmøødhájtäm hädaa yaabä naaxwiin, je'eguiøxpä coo hajxy nho'og coo hajxy ndägoyyáanäm. Coo hajxy ndägájtsämät nebiä Jesucristo yhitiän, mänit mäbøcy hajxy jimñ nnøcxämät tsajpootyp.

⁵¹ Huuc mäadow hajxy nébiøchä Dios jaduhñ xñajtsapxøøyyä. Coo Jesucristo quiädaactägatsa'añ, cahnä hajxy hánajty nägøxiä nho'c ndägóoyyäm. Näje'e hajxy hánajty njújqüiämnä. Pero nägøxiä hajxy ndägatsáanäm, møødä jujcypiä møødä ho'ogypiä.

⁵² Nägooyyä Diosmoonsä ja'a corneta hánajty høxhaam jiaac yajxuuxmaya'añ, ja'a tsajpootypä, mänitä ho'oguiäya'ayhajxy jiujypiøjtägatsa'añ. Cab hajxy hánajty mänaa yho'tägatsaanä. Mänitiä hajxy nägøxiä ndägatsáanäm, møød hajxy hánajty yaabä jujcypiä, møød hajxy hánajty tøø yhó'oguiäbä.

⁵³ Hädaa naaxni'x hajxy nmøødhájtämbä, nä'ägädä ho'og nä'ägädä tägoyyáanäm hajxy jaduhñ. Tsipcøxp hädaa nni'x hädaa ngopc-hajxy tiägatsáanäm, mänit hajxy jimñ nnøcxáanäm Dioswiinduum. Y cab hajxy hánajty nho'tägatsáanänä ni mänaa.

⁵⁴ Y coo hajxy jaduhñ njadáanäm, mänitä Diosmädia'agy tiøjiada'añ coo jaduhñ miäna'añ: “Cabä jäya'ayhajxy hánajty mänaa yho'og tiägoyyaañnä.” Coo Jesucristo hajxy tøø xñähho'túutäm, paady hajxy jii by nga'a häda'agáanäm møjcu'uhaam.

⁵⁵ Y coo hajxy jii by nga'a häda'agáanäm, paady hajxy nga'a tsähgøøyyänä coo hajxy hánajty nho'ogáanäm.

⁵⁶ Hoorä, coo Diosmädia'agy hajxy hoy nga'a cudiúunäm, paady hajxy ngädiéhyäm, paady hajxy nhó'cäm.

⁵⁷ Tsøgä Dios hajxy nämáayyäm “Dioscujú'uyäp”, je'eguiøxpä coo Jesucristo hajxy xñähho'túutäm, ja'a hajxy nWiindsønähájtämbä. Coo hajxy xñähho'túutäm, paady hajxy jii by nga'a häda'agáanäm møjcu'uhaam.

⁵⁸ Jaduhñds je'e, hermanodøjc, tsøg hajxy hoy túunäm hamuumdu'joot ja'a Dioscøxpä. Cabä miädia'agy hajxy mänaa nnajtsihixøøyyämät, howyiaambatiä jäya'ay hajxy cu xjia nämáayyäm. Nnajuøøyyäm hajxy jaduhñ coo Dios hajxy xpiuhbedáanäm.

16

¹ Mguexaambiä xädø'øñ hajxy jimñ Judeanaaxooty maa hermanodøjc-hajxiän. Jaduhñ hajxy myajmújpät nébiøchä hermanodøjc-hajxy nhanehmy jimñ Galacianaaxooty.

² Näxøøbaadiä xädø'øñ hajxy mbuhgónät mäduhñtiä hajxy hánajty tøø mguduñ. Hawiing hajxy jaduhñ myaghídat. Mänitøch hajxy xmió'owät cooch jimñ nmédsät maa mijtsän neby hajxy jaduhñ mänit møc hadø'øchä mga'a wädijta'agät.

³ Mänitä hermano hajxy mwiimbíwät pønjátyhøchä xädø'øñ hánajty nyajmäguexaamby jimñ Jerusalén maa hermanodøjc-hajxiän. Nocymiøød hajxy ñøcxät nebiä hermanohajxy jimñ ñajuó'owät cooch hánajty tøø nguexy.

⁴ Pø hahixøøby hánajty cooch jimñ nnøcxät, mänitøch hajxy xpianøcxät.

⁵ Cooch hánajty jimñ nnøcxa'añ Corintos, tu'unaxáambøch jimñ Macedonia.

⁶⁻⁷ Coo Dios jaduhñ miänä'anät, jégabøch jimñ maa mijtsän. Wéhñdøch jimñ nga'a tsoj wiimbídat høxtä coo tøøchpoj hánajty tøø ñaxy. Jaduhñhøch mijts jejcy nguhíxät. Jaduhñhøch hajxy xpiuhbedät majátyhøch hánajty njaac wädita'añ.

⁸ Pero cábøch yaa ndsoj tu'ubøga'añ yaa Efeso. Coo Pentecostésxøø hánajty tøø yhabaady, mänitøch ndu'ubøga'añ.

⁹ Hix, jaanç tehñ miäbøgaambä jäya'ayhajxy yaa, hóyhøch nmädsiphajxy jia nämayyä.

¹⁰ Coo Timoteo jimñ miédsät maa mijtsän, hoy yajxon hajxy myajmédsät. Hix, jaduhñä Diostuung tiuumbä nébiøch nduñän.

¹¹ Cab hajxy jaduhñ mbéxät. Mbuhbédäp hajxy jaduhñ nebiaduhñ jootcuyc jiaac mínät yaa maäch høøchän. Nja wi'i jiøbhijxyp højts yaa møødä hermanodøjc-hajxy.

¹² Y ja'a hermano Apolos, nja mänuu'xtáac-høch je'e coo hermanodøjc cu miøødnøcxy maa mijtsän, pero cab jäda'a tiehñ ñøcxa'añ. Cooc ñäbaadø'øwáañäxä, mänítnäc hänäjty ñøcxa'añ.

¹³ Mniyajcopcø'øwøøjäp hajxy. Hoyyä Diosmädia'agy hajxy myajtu'uyó'oyät. Cab hajxy pøñ mdsähgø'øwät. Mmee'xtúgäp hajxy.

¹⁴ Mniçhoc mnimiee'xøøjäp hajxy hamuumdu'joot.

¹⁵ Hermanodøjc, mnajuøøby hajxy coo Estéfanas ja'a Diosmädia'agy hajxy jayøjp miäbøjtsohñ jimñ Acayanaaxooty, møødä yhuung møødä tio'oxy. Jimä hermanodøjc hajxy piuhbety.

¹⁶ Jadúhñhøchä njoot chocy coo hajxy mbahix mbadúnät nebiä Estéfanashajxy tiuñän.

¹⁷ Xoondáacpøch jaduhñ coo Estéfanashajxy tøø miech møødä Fortunato møødä Acaico. Nñajootmayhápiøch mijts coo hajxy mjäguemä. Pero coo Estéfanashajxy tøø miech, paady cábøch njootmayhajnä.

¹⁸ Tøøchä njoot hajxy xyajmøcpøjcä. Jadúhñhøchä mjoothajxy nyajmøcpøgáañäbä. Mnajuø'øwäp hajxy jaduhñ coo Estéfanashajxy hoy tiuñ.

¹⁹ Mijtsä hermanodøjc-hajxy xyajpoo'xp ja'a hajxy jimñ tsänaabiä Asianaaxooty. Xyajpoo'xp mijtsä Aquilahajxypä ja'a Dioscøxpä, møødä Priscila, møødä hermanodøjc-hajxy jimñ hamugøøbiä Dioswiingudsähgøøbiä maa tiøjc-hajxiän.

²⁰ Xyajpoo'xp mijtsä hermanodøjc-hajxy nägøxiä. Hoy yajxón hajxy mniyajpoo'xøjät.

²¹ Nhamdsoo cø'øháamhøch hädaa nocy njahmiay, høøch Pablo.

²² Pøñä Jesucristo ca'a tsojp, ja'a hajxy nWiindsønñhájtämbä, ween haxøøgtuum ñøcxy. Wiindsønñ, minñ hadø'øchä.

²³ Weenä Jesucristo hajxy xmio'oy ja'a hoyhajt ja'a weenhajt, ja'a hajxy nWiindsønñhájtämbä.

²⁴ Ndsójpøch mijts nägøxiä ja'a Jesucristocøxpä. Amén.

2 Corintios

¹ Høøch Pablo hädaa nocy njahby. Jesucristøch tøø xwyiinguexy cooçh ja'a miädia'agy nyajwá'xät. Ja'a Dios jaduhñ mänaamb cooçh nyajwá'xät. Ja'a hermano Timoteo, tu'ugwiinmähñdyhøch je'e xmiøødhity cooçh hädaa nocy njaay. Mijts hädaa nocy nya-jnäguexaamby pønjaty Diosmädia'agymiäbøjp maa ja'a cajpt xiøhatiän Corinto, møød maa ja'a naax xiøhatiän Acaya wiinduhmyhagajpt.

² Ween mijts ja'a Dios hoyhajt weenhajt xmiø'oy møødä Jesucristo. Dios hajxy nDeedyhajtäm. Jesucristo hajxy nWiindsøn'hajtäm.

³ Tsögä Dios hajxy tehngajnä wiingudsähgøøyyäm. Tsøc hajxy tehngajnä nämáayyäm Dioscujú'uyäp. Ja'a Jesucristo Tieedy je'e. Jaançh tehñ yhojioot ja'a Dios miøød. Xjiootcapxmøcpøjcäm hajxy homiänaajä,

⁴ hoy ñebiaty hajxy cu nja jajt cu nja habéjtäm. Paady hajxy jaduhñ xjioot-capxmøcpøjcäm, jaduhñ hajxy hoy njootcapxmøcpøjtägájtämd pønjaty häyohmbaatp.

⁵ Hix, nebiä Jesucristo chaachpøjquiän, jaanä jaduhñ hajxy ndsaaçhpøjcämbä. Y coo ja'a Jesucristo hajxy nmøødhíjtäm tu'ugmädia'agy, paadiä Dios hajxy xjiaançh tehñ jiootcapxmøcpøjcäm.

⁶ Coø højts ndsaaçhpøcy, mänit højts Dios xjiootcapxmøcpøcy. Y jaduhñ mijts njoot-capxmøcpøjtägajtpä. Y jaduhñ mijts Diosmädia'agy nyajwiingapxø'øwät neby hajxy jaduhñ mnähwá'adsät. Coø mijts mdsaaçhpøjpät neby højts ndsaaçhpøquiän, mänit mijts njootcapxmøcpøgät neby hajxy jaduhñ hoy mmee'xtúgät.

⁷ Nnajuøøby højts coø mijts mmee'xtuga'añ, coø mijts Dios xjiootcapxmøcpøga'añ, hoy miäduhñtiä mijts cu mja tsaachpøc neby højts ndsaaçhpøquiän. Nmøød højts ja'a tøyhajt jaduhñ.

⁸ Mägu'ughajpädøjc, chojpy højts njoot coø hajxy mnajuø'øwät nebiaty højts jim ndsaaçhpøjcy maa ja'a naax jaduhñ xiøhatiän Asia. Hanaxiä højts jim njajty nhabejty. Jaançh tehñ jiootmayhajp højts hänajty. Høxtä mänaan højts jaduhñ coø ndijy højts hänajty jim nho'oga'añ,

⁹ coø ndijy häna'c hänajty tøø quiojyquiapxytiuñ coø højts hänajty xyagho'oga'añ. Paady højts jaduhñ njajty nhabejty, jaduhñ højts nnajuø'øwät coø jagooyyä Dios xñäwá'anät, cab højts hamdsoo hoy nniñäwa'anøøjät. Haa ca'a, Dios jaduhñ yagju-jypiøjtägajtpä ja'a tøø yhó'oguiäbä.

¹⁰ Xñäwaan højts ja'a Dios coø højts häna'c hänajty jim xjia yagho'oga'añ. Homiänaajä højts jaduhñ xñäwa'ana'añ. Nmøød højts ja'a tøyhajt jaduhñ.

¹¹ Naxy mijts ja'a Dios mdehñ pia'yá'axät maa højtscøxpän. Jaduhñ højts mijts hoy xpiuhbédät. Coø jäya'ayhajxy nämay Dyiospa'yá'axät maa højtscøxpän, mänit højts ja'a Dios xñäwa'ana'añ, mänitä jäya'ay ja'a Dios hajxy nämay ñäma'awa'añ "Dioscujú'uyäp", je'eguiøxpä coø højts Dios hoyhajt weenhajt xmiø'oy.

¹² Jootcujc højts nnijiäwø'øyii coø højts hoy tøø njäya'ayhaty maa mijtsän hädaa yaabä naaxwiin. Dios højts jaduhñ xpiädaac coø højts hoy njäya'ayhädät. Jaaya'ay højts xyhijxp coø højts hoy njaançh jäya'ayhaty. Xpiuhbejp højts jaduhñ neby højts hoy njaac jäya'ayhädät. Cab højts hamdsoo hoy nhojiäya'ayhädät.

¹³⁻¹⁴ Hix, howyiinjuøøñä mijts tøø nnäjaayø'øy, caj chipjatiä. Caj mijts mänaa tøø nwiin-høøñ. Tøø højts nmädia'agy hajxy siémpräm xwyiinjuøøyyä. Chojpy højts njoot coø hajxy ca'xy mwiinjuø'øwät, jaduhñ hajxy mxoondá'agät maa højtscøxpän coø ja'a Jesucristo hänajty quiädaactägatsa'añ. Je'e hajxy nWiindsøn'hajtäm. Mänit højts nxoonda'agaambä maa mijtsøxpän.

15 Nmóødhøch tøyhajt jaduhñ coo højts nmädia'agy hajxy ca'xy xwyiinjuø'øwaanä, páadyhøch hijty tøø nja wiinmay coo mijts jadähooc nøcxy cu ngu hijxy. Jaduhñ hajxy jadähooc cu nxoondáacäm nägøxiä.

16 Hix, nøcxáambøch hijty jim maa ja'a naax jaduhñ xiøhatiän Macedonia, y jim mijts hijty ndu'uguhixa'añ Corinto. Y cooç hijty nwiimbidaañnä Macedonia, mänit mijts hijty jadähooc ndu'uguhixáangombä cooç hijty jim nnøcxa'añ maa ja'a naax jaduhñ xiøhatiän Judea. Jim mijts jaduhñ cu xpiuhbejty.

17 Pero cabä Dios jaduhñ miänaañ cooç jim cu nminøyy maa mijtsän. Ca'a yhamd-soojóotøch jim tøø nga'a naxø'øy. Cab jaduhñ yhooyä coo hajxy mmänä'anät cóogøch tyjy jaduhñ ndu'ugcapxy nmetscapxy, cooç jim tøø nga'a naxø'øy. Ja'a häna'c-hajxy ca'a mäbøjpä, je'eds hajxy tu'ugcapxp metscapxp, ca'a yhøøchä.

18 Dios højts xyhijxp coo højts nga'a hønnda'agy. Cab højts mijts mänaa tøø nmøødtu'ugcapxy tøø nmøødmetscapxy.

19 Hix, ja'a Jesucristo, ja'a Dioshuung, cab je'eduhñ mänaa tiu'ugcapxy mietscapxy. Homiänaajä tiømiädia'agy. Y coo højts mijts nyajwiingapxøyy ja'a Jesucristocøxpä, paady højts nga'a tu'ugcapxy nga'a metscapxy, ni høøch Pablo, ni hermano Silvano, ni hermano Timoteo.

20 Waambatiä Dios jecy miänaañ coo hänajty yajtøjiada'añ, cøjx jaduhñ tiøjiaty ja'a Jesucristocøxpä. Y coo højts ja'a mädia'agy nmäbøjcäm ja'a Jesucristocøxpä, jaduhñä Dios møj jaançh nbädáacäm.

21 Pero ja'a Dios hajxy xpiuhbéjtäm nebiä Jesucristo hajxy jaduhñ nmøødhjätämnd tu'ugmädia'agy tehngajnä, møød højts møød mijts nägøxiä. Jaanä Dios højts jaduhñ xwiinguejxpä coo højts ja'a miädia'agy nyajwá'xät.

22 Xyaghijp højts ja'a Dios quiø'øjooty ja'a yhEspírituhaam. Xyhuunghajp højts jaduhñ. Xmióoyyäm ja'a tøyhajt hajxy jaduhñ coo hajxy homiänaajä xcwieendähadäänäm.

23 Dios ja'a tøyhajt møød cooç nga'a hønnda'agy. Páadyhøch jim tøø nga'a naxø'øy Corinto maa mijtsän, cábøch njoot hänajty chocy coo mijts nhójät.

24 Pero cab højts mijts nhane'ema'añ nebiatiä Diosmädia'agy hajxy mmäbøgät. Hix, nnajuøøby højts jaduhñ coo hajxy hamuumdu'joot mmäbøcy. Nja wi'i piuhbedaañby højts mijts jaduhñ nebiä Diosmädia'agy hajxy maas hoy mbanøcxät. Jaduhñ hajxy maas jootcuyc mhídät.

2

1 Mänäajøch jim nhuug hoobiän maa mijtsän, mänitøch mijts nhojy je'eguiøxpä coo hajxy hänajty hoy mga'a tuñ. Jootmayhájbøch jim nwiimbijty. Hoorä, tøøch nmädoyhájcombä coo hajxy hoy mga'a túungombä. Tøøch nwiinmahñdyhaty cooç jim nga'a tsoj nøcxtägatsa'añ maa mijtsän, coo mijts jim nnä'ä hojtägätsät.

2 Hix, coo mijts nhojtägätsät, mänitøch jadähooc njootmayhada'añ. Pero chójpjøch njoot jaduhñ coo hajxy hoy mdúnät. Jaduhñhøch jootcuyc nhídät.

3-4 Mänäajøch mijts jayøbajt nhuuc näjaayøøbiän, mänit mijts nmägapxy nhanehmy coo ja'a mhaxøøgcuhdujt hajxy mnajtshixø'øwät. Jaançh tehñ jootmayhájpøch hänajty coo ja'a Diosmädia'agy hajxy hänajty hoy mga'a panøcxy. Høxtä jøøyyhøch jaduhñ. Paady mijts jaduhñ nmägapxy nhane'emy nocyhaam, njaançh tehñ chojpy mijts jaduhñ. Cáboch njoot chocy coo hajxy mjootmayhadät. Coo ja'a mhaxøøgcuhdujt hajxy mnajtshixø'øwät nébiøch chamñ nmägapxy nhane'emiän nocyhaam, mänitøch jim jootcuyc nnøcxa'añ maa mijtsän. Coo mijts ja'a Diosmädia'agy hoy cu mbanøcxy, cáboch jaduhñ mänaa cu njootmayhajty. Nnajuøøbiøch jaduhñ coo ja'a Diosmädia'agy hajxy hoy mja wi'i pianøcxa'añ. Y coo hajxy jaduhñ hoy mbanøcxät, jaduhñ hajxy nägøxiä jootcuyc nhjätäm, møød høøch møød mijts.

⁵ Ja'a mijts mmägu'ughajpä ja'a tøø quiädiéeyäbä, nägøxiä hajxy jaduhñ tøø xñägädieeyðøyyäm, ca'a yhøøchähajtiä nidiuhñ. Pero cábøch nmäna'añ coo hanaxiä tøø quiädieey. Hix, cábøch hanaxiä nyajtsähdiuna'añ.

⁶ Hoorä, tøø ja'a mmägu'ughajpähajxy chaaçhpøcy. Tu'ugwiinmahñdy hajxy mnibi-aatä, paadiä mmägu'ughajpä hajxy myajcumädooyy. Hoorä, tøø jaduhñ chaaçhpøjnä.

⁷ Hahixøøby hajxy jaduhñ mmämée'xnät. Jaduhñ hoy jiootcugøøguiumbät, y cab jaduhñ hanaxiä jiootmayhädät.

⁸ Coo hajxy jaduhñ mmämée'xnät, myajcøxø'øgaambby hajxy jaduhñ coo hajxy mjaançh tehñ chocy.

⁹ Paady mijts jayøbajt nnäjaayøøyy, nhijxmajts mijts jaduhñ pø tøyhájthøch nmädia'agy hajxy hänajty xmiäbøgaanä hamuumdu'joot.

¹⁰ Pønjaty mijts mmämee'xyp, jaanä jadúhñhøch nmämee'xaambä. Haa ca'a, pø tøøch häna'c nmämee'xy, páadyhøch tøø nmämee'xy, jaduhñ mijts jootcuyc mhídät. Jesucristøch jaduhñ xyhijxp cooçh nga'a høhnda'agy.

¹¹ Coo hajxy jaduhñ nnimiämée'xämd, cabä møjcu'ugong miäjädá'agät maa højtscøxphájtäm. Nnajuøøyyäm hajxy coo ja'a møjcu'ugong jiaançh tehñ miäwiinhøøñ.

¹² Cooçh jim nmejch maa ja'a cajpt jaduhñ xiøhatiän Troas Diosmädia'agy-yajwa'xpä ja'a Jesucristocøxpä, nbáathøch hawa'adspä cooçh jim ndägó'øwät Diosmädia'agy-yajwa'xpä.

¹³ Pero cooçhä hermano Tito jim nga'a paaty maa ja'a hermanodøjc-hajxiän, mänítøch ndägøøyy jootmayhajpä. Mänítøch nwiimbijnä. Mänítøch nnøcxy maa ja'a naax jaduhñ xiøhatiän Macedonia.

¹⁴ Dioscuju'uyäp ja'a Dios coo højts xpiuhbety, coo højts xyaghity tu'ugmädia'agy møødä Jesucristo. Jaduhñ højts ja'a Dios xpiuhbety coo højts ja'a møjcu'ugong nga'a yajmäjäda'agy majaty højts ja'a Diosmädia'agy nyajwa'xy ja'a Jesucristocøxpä. Homiädoonä ja'a jäya'ayhajxy miädoy nebiaty højts nyajwiingapxø'øy.

¹⁵⁻¹⁶ Xquiumaaby højts ja'a Dios coo højts ja'a miädia'agy nyajwa'xä ja'a Jesucristocøxpä. Pønjaty hoy mädoob, pønjaty mæbøjp, je'eds nähwa'adsaamb. Jugyhadaamb hajxy je'eduhñ cøjxta'axiøø nebiä Dios jiugyhatiän. Pero pønjaty hoy ca'a mädoob, pønjaty ca'a mæbøjp, cab hajxy jaduhñ nähwa'adsa'añ. Je'eds hajxy haxøøgtuum nøcxy miähmø'øwa'añ. Caj pøn yhamdsoo jada'añ Diosmädia'agy-yajwa'x.

¹⁷ Højts mæbøcypiä njajpy je'eguiøxpä coo højts ja'a Dios xwyiinguejxy. Hamuumdu'joot højts nduñ je'eguiøxpä coo højts ja'a Jesucristo tu'ugmädia'agy nmøødhity. Xyhijxp højts ja'a Dios jaduhñ coo højts hoy nduñ. Jii häna'c näje'e, cab hajxy hoy tiuñ. Ja'a Diosmädia'agy tyijy hajxy yajwa'xyp. Pero yhamdsoo mädia'agy hajxy wyi'i miädiaacy, je'eguiøxpä coo hajxy jia wi'i quiänaarhada'añ. Højts, cab højts jaduhñ nbahixy.

3

¹ Cab hajxy mmäná'anät coo tyijy højts nniguiumayii nebiä häna'c ñiguiumayijän, ja'a yhamdsoo mädia'agy hajxy miäwädijpiä. Coo hajxy hänajty maa ñøcxa'añ, mänitä hermanodøjc hajxy ñäma'ay coo nocy hajxy jaduhñ ween yhädiúunäxä cooc tyijy ja'a Diosmädia'agy hajxy hoy tøø yajwa'xy. Pero højts, cab højts jaduhmbä nocy nyajmaajiaty, ni coo mijts nyaghíxät, ni coo mijts xmió'owät.

² Hoy piønä ñajuø'øy coo højts ja'a Diosmädia'agy hoy nyajwa'xy. Haa ca'a, tøø ja'a Diosmädia'agy hajxy mmæbøcy mänaa højts jim hoy nyajnahixø'øyän. Hix, njaançh tehñ chojpy højts mijts hamuumdu'joot. Homiänaajä højts mijts njahmiejtsta'agy.

³ Coo ja'a Diosmädia'agy hajxy tøø mmæbøcy, jaduhñä cu'ug ja'a tøyhajt hajxy miøødä coo højts ja'a Jesucristo jaduhñ xwyiinguejxy maa mijtsøxpän, coo højts mijts ja'a

Diosmädia'agy nyajwiingapxø'owät. Jujcy ja'a Dios. YhEspírituhaam ja'a Dios ha-jxy xyajmábøjcy. Jaduhñ miäbaady coo ja'a Jesucristo tøø yuugjaay maa ja'a jäya'ay quiorazoncøxphajxiän. Cab jaduhñ tøø yuugjaay tsaagøxp tintahaam nebiä Dios jecy yuugjahyyän tsaagøxp maa ja'a tun xiøhatiän Sinaí.

⁴ Paady højts jaduhñ nmäna'añ, nmøød højts ja'a tøyhajt coo højts ja'a Jesucristo xwyiinguejxy.

⁵ Pero cab højts tii njada'añ hamdsoo. Dios højts jaduhñ xpiuhbejp coo højts njädät.

⁶ Jaaya'ay højts jaduhñ tøø xyajnähdijy coo højts ja'a hawiinjemybiä mädia'agy nya-jwá'xät ja'a Jesucristocøxpä. Hädaa hawiinjemybiä mädia'agy, yhEspírituhaam højts ja'a Dios tøø xmio'oy. Cabä Dios tøø jiahñä tsaagøxp nebiä jecyquiuhdujt jecy jiahyyän tsaagøxp. Yø'ø jecyquiuhdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum. Pero coo ja'a hawiinjemymiädia'agy hajxy mmábøgät, mänitä Dios hajxy xyagjugyhädät cøjxta'axiøø yhEspírituhaam neby je'e jiugyhatiän.

⁷ Hoorä, coo ja'a Dios ja'a jecyquiuhdujt jiahy tsaagøxp, høxtä haamb høxtä tsämaamb ja'a Moisés ja'a wyiin jiojy hänajty, høxtä cabä israelita ja'a Moisés ja'a wyiin jiojy hajxy hänajty hoy yheebaanä. Pero paquiä ja'a Moisés ja'a wyiin jiojy jaduhñ ñä'ä haañ ñä'ä tsämaamy. Paadiä Moisés ja'a wyiin jiojy hänajty yhañ chämaamy, tøø ja'a Moisés hänajty yhoy jim Dioswiinduum maa ja'a Dios hänajty tøø quiäda'aguiän jim tungøxp. Y møcmäjaa ja'a Dios jiaanč tehñ miøød. Hoorä, yø'ø jecyquiuhdujt, cab jaduhñ pøn hoy quiudiuna'añ, paady hijty pøn quia'a pädsøma'añ haxøøgtuum.

⁸⁻⁹ Hoorä, coo ja'a Dios ja'a Moisés ja'a wyiin jiojy jecy yaghaanä yajtsämaamä, jaduhñä Dios yajcähxø'cy coo møcmäjaa miøødä. Y coo ja'a Dios ja'a hawiinjemymiädia'agy tøø yejnä coo hajxy tøø xpiädäacäm hawa'adstuum, ja'a yhEspírituhaam ja'a Dios ja'a hawiinjemymiädia'agy tøø yecy. Jaduhñä Dios maas hoy tøø yajcähxø'øgy coo møcmäjaa miøødä. Hix, hoy-yagjuøøñä ja'a Moisés ja'a wyiin jiojy jecy yhaan chämaamy. Maas hanaxiä ja'a hawiinjemymiädia'agy yhoy-yagjuøøñä, ja'a højts nyajwa'xypä.

¹⁰⁻¹¹ Jaduhñ quiähxø'øgy coo ja'a jecyquiuhdujt jaduhñ quia'a jaty tsoobaatnä. Ja'a hawiinjemymiädia'agy ja'a Jesucristocøxpä, je'eds jaduhñ tsoobáatnäp. Y cab jaduhñ mänaa tiägoyya'añ.

¹² Tøyhajt jaduhñ, paady højts nga'a tsähdiuñ mänaa højts ja'a Diosmädia'agy nya-jwa'xiän, ni nga'a mädsähdiuñii højts jaduhñ.

¹³ Hix, haamb tsämaambä Moisés ja'a wyiin jiojy hänajty coo ja'a Dios ja'a Moisés ja'a miädia'agy miooyy. Mänitä Moisés ja'a cu'ug ja'a Diosmädia'agy yajwiingapxøøyy. Coo ja'a Moisés miädiaacpædøøyy, mänitä wit ñiyajwiinguwidøøyyä, je'eguiøxpä coo ja'a wyiin jiojy hänajty jejcy quia'a hanaannä quia'a tsämamaannä. Paady jaduhñ miädsähdiuunä. Hix, yhixaambiä israelita ja'a Moisés hajxy hänajty coo ja'a Moisés ja'a wyiin jiojy hänajty quia'a haannä quia'a tsämaamñä.

¹⁴⁻¹⁶ Pero ja'a israelitahajxy, jaanč tehñ quiuhxex hajxy hänajty, cab hajxy hänajty miädia'agywyiinjuø'oy. Høxtä chamñäbaadyñä hajxy jaduhñ quiuhxexä. Coo ja'a jecyquiuhdujt hajxy mänaa miädooy, cab hajxy jaduhñ wyiinjuø'oy, ja'a Moisés jecy miädiäacäbä. Mänit hajxy jaduhñ wyiinjuø'owät coo hajxy hänajty tøø miäbøcy hamuumdu'joot ja'a Jesucristocøxpä. Je'e hajxy nWiindsønähjätäm.

¹⁷ Hoorä, tu'ugjuøhñdy ja'a Jesucristo yhity møødä Tieediä yhEspíritu. Y coo hajxy nmäbøjcäm ja'a Jesucristocøxpä, jaduhñä cuhdujt hajxy xmióoyyäm coo Dios hajxy nba'yáaxämd.

¹⁸ Hoorä, pønjaty jaduhñ hamuumdu'joot mábøjp ja'a Jesucristocøxpä, tøø hajxy ngøxy wiinjuøøyyäm coo ja'a Jesucristo miøjjä jiaančhä. Tehngajnä ja'a Jesucristo hajxy xyaghaguijxyjatiøøyyäm neby je'e yhity møødä Tieediä yhEspíritu.

4

1 Hojiot ja'a Dios jiaanč teh̄m̄ miøød, paady hõjts tøø xwyiinguexy coo hõjts ja'a miädia'agy nyajwá'xät ja'a Jesucristocøxpä. Paady hõjts nga'a jootmayhaty ni mänaa.

2 Nyejpy hõjts ja'a tøyhajt coo hõjts ja'a Diosmädia'agy nyajwa'xy. Cab hõjts jaduh̄n mänaa nhøhnda'agy. Ñajuøobiä cu'ughajxy jaduh̄n coo hõjts mänaa nga'a nhøhnda'agy. Xyhixp hõjts ja'a Dios jaduh̄n. Ja'a häna'c-hajxy høhndaacpä, cabä Diosmädia'agy hajxy ca'xy yajwa'xy. Yhamdsoo mädia'agy hajxy jaduh̄n yajmämädiaagøøby magämaa. Höchähdiuunnä hajxy jaduh̄n jiatcø'øy. Pero hõjts, ja'a tøyhajt hõjts nmädiaacyy.

3 Cabä jäya'ay ja'a mädia'agy hajxy nägøxiä wyiinjuø'øy, ja'a hõjts jaduh̄n nyajwa'xypä ja'a Jesucristocøxpä. Paady hajxy jaduh̄n quia'a wiinjuø'øy coo hajxy haxøøgtuum wiädity.

4 Paadiä Diosmädia'agy hajxy quia'a mæbøga'añ, tøø ja'a wyiinmahñdyhajxy piädäacäxä haxøøgtuum ja'a mõjcu'ugóngäm, ja'a yaa hanehmbä hädaa yaabä naaxwiin. Coo ja'a wyiinmahñdyhajxy tøø piädäacäxä haxøøgtuum, paadiä Diosmädia'agy hajxy hoy quia'a wiinjuø'øwa'añ maa jaduh̄n myiñän cujaay coo ja'a Jesucristo mõcmäjaa miøødä. Tu'ugmädia'agy ja'a Jesucristo yhity mõødä Tieedy.

5 Coo hõjts ja'a Diosmädia'agy nyajwa'xy, ja'a Jesucristo hõjts nmädiaacyy coo hajxy nägøxiä nWiindsønhtëm̄. Cab hõjts jaduh̄n nyajcumaya'añ. Jaduh̄n hõjts njoot chocy coo hõjts mijts nbuhbédät, je'eguiøxpä coo hõjts ja'a Jesucristo nWiindsønhyaty.

6 Dios jecy mänaa coo jøøn jiájät hagoonstuum. Cahnä ja'a naaxwiimbä hänajty yhojø'øy. Jaaya'ay hõjts ja'a miädia'agy jaduh̄n tøø xyajwiinjuø'øy coo je'e mõcmäjaa miøødä. Coo ja'a Jesucristo hajxy tøø xyajnahwaats tøø xyajcuhwáatsäm, jaduh̄n hajxy nyajnajjuøøyyäm coo ja'a Dios mõcmäjaa miøødä.

7 Jaaya'ay hõjts tøø xwyiinguexy coo hõjts ja'a miädia'agy nyajwá'xät ja'a Jesucristocøxpä. Jaanč teh̄m̄ choobaatp ja'a miädia'agy jaduh̄n. Hõjts, cab hõjts mõcmäjaa nhamdsoo mõødä. Dios hõjts jaduh̄n xpiuhbejp coo hõjts ja'a miädia'agy nyajwá'xät. Coo hõjts jaduh̄n xpiuhbety, jaduh̄n yajnajjuø'øy coo ja'a Dios mõcmäjaa jiaanč teh̄m̄ miøødä.

8 Tøø hõjts häyohn may nmänaaxy nyajnaaxy, pero cab jaduh̄n tiehm̄ yhanaxiä. Naxy hõjts nga'a najuø'øy neby hõjts njatcø'øwät, pero cab hõjts hanaxiä njootmayhaty.

9 Tøø hõjts häna'c mayhooc xjia wi'i chaächtiuna'añ, pero cab hõjts ja'a Dios mänaa xñajtshixø'øy. Hoy hõjts häna'c mayhooc tøø xjia häyoowhixy, cab hõjts nmøjpäda'agy. Hix, homiänaajä hõjts ja'a Dios jaduh̄n xcwieendähaty.

10-11 Nebiä Jesucristo hijty mäjähñdium wiäditiän jabom-jabom, jaanä jaduh̄n hõjts mäjähñdium nwädijpä homiänaajä. Ja'a Jesucristocøxpä hõjts häna'c xjia wi'i yagho'oga'añ. Pero cab hõjts Jesucristo xñä'ägä nähducy. Hix, coo ja'a Jesucristo yho'cy, mänit jiuujypiøjtägajch. Mänit jim̄ ñøcxy maa ja'a Tieediä wyiinduumän. Jim̄ä mõcmäjaa jäda'ahaty miøødänä. Paady hõjts jaduh̄n homiänaajä xcwieendähaty.

12 Paady hõjts mäjähñdium nwädity coo hõjts Diosmädia'agy nyajwa'xy. Coo ja'a Jesucristo jiuugyhaty, paady hajxy xcwieendähhtëm̄ homiänaajä.

13 Jaduh̄n jim̄ myiñ cujaay maa ja'a Diosmädia'aguiän coo tu'jäya'ay jecy miänaañ: "Nmæbøjpiøch ja'a Diosmädia'agy, päadyhöch ja'a Dios ngapxpaady"; jaanä jaduh̄n hõjts ja'a Diosmädia'agy nmæbøjpä, paady hõjts ja'a Dios ngapxpaatpä.

14 Coo ja'a Dios ja'a Jesucristo yagjujypiøjtägajch, ja'a nWiindsønhtëm̄, jaduh̄n hõjts ja'a tøyhajt mõødä coo hõjts xyagjujypiøjtägatsaambä näguipxy mõød mijts. Paadiä Dios hajxy xyagjujypiøjtägatsaanäm coo hajxy nhhtëm̄ tu'ugmädia'agy mõødä Jesucristo. Mänitä Dios hajxy nägøxiä xyajnöcxäänäm jim̄ maa ja'a wyiinduumän näguipxy mõød mijts.

15 Paady hõjts häyohn nmänaaxy nyajnaaxy, chojpy hõjts njoot jaduh̄n coo mijts ja'a Diosmädia'agy hamuumdu'joot mmæbøgät cooc ja'a Jesucristo hajxy tøø xñähho'túutäm.

Jaanä jaduhñ hõjts njoot chojppä coo ja'a jäya'ayhajxy maas nämäy jiaac mäbõgät, weenä Dios hajxy nämäy ñäma'ay: “Dioscujú'uyäp”, je'eguiõxpä coo ja'a Dios hojioot jiaançh tehñ miõödä. Y weenä Dios hajxy nämäy ñämaabiä coo mõcmäjaa jiaançh tehñ miõödä.

¹⁶ Nnajuõõby hõjts jaduhñ coo ja'a Dios hajxy xyagjujypiõgäänäm, paady hõjts nga'a jootmayhaty. Tehngajnä hõjts ja'a Dios mõcmäjaa xjiaac mo'oy maa hõjts njuõhñdycõxpän, hoy hõjts nni'x ngopc tehngajnä jia mäjay.

¹⁷ Neby hõjts häyohn yaa nmänaxy nyajnaxiän, cab hõjts jejcy nmänaḡ nyajnaḡa'añ. Y cab hõjts jaduhñ njaty tsaachpõcy. Coo hõjts jaduhñ tõõ njaty tõõ nhabety, paadiä Dios ja'a mayhajt mõj may tiuna'añ maa hõjtsõxpän cõjxta'axiõõ.

¹⁸ Pero cab hõjts jaduhñ nmõjpäda'agy coo hõjts jaduhñ yaa njaty nhabety hädaa yaabä naaxwiin. Hix, paquiä hõjts nnä'ä jaty nnä'ä habety. Jim hõjts njoot nbäda'agy maa ja'a Dios ja'a wyiinduumän. Cõjxta'axiõõ hajxy jim xyaghidäänäm.

5

¹ Tsipcõxp hajxy nho'ogäänäm ndägoyyäänäm. Pero nmõõdhajtäm ja'a tõyhajt hajxy jaduhñ coo ja'a Dios hajxy tõõ xyajnähdijjäm cooc hajxy jim xyaghidäänäm maa ja'a wyiinduumän cõjxta'axiõõ. Diõsäts hajxy jim xyaghidäänäm, ca'a wyiingjäya'ayä hajxy jim xyaghidäänäm.

² Coo hajxy yaa ndsaachpõjcäm hädaa yaabä naaxwiin, paadiä njoot hajxy jaduhñ tõõ nbädaacäm coo hajxy jim nnõcxäänäm tsajpootyp.

³ Coo hajxy jim ngõo'tämd, jaançh tehñ jiootcuyc hajxy jim nnijjääwõ'õwäänäm jim Dioswiinduum.

⁴ Mäduhñtiä hajxy yaa njaac hjtäm hädaa yaabä naaxwiin, cab hajxy jootcuyc nhjtäm je'eguiõxpä coo hajxy yaa ndsaachpõjcäm. Pero cab hajxy ndsõjcäm coo hajxy paquiä nho'c ndägõoyyäm. Je'e hajxy ndsõjcäm coo njugyhajtäm cõjxta'axiõõ nebiä Dios jiugyhatiän.

⁵ Ja'a Diõsäts hajxy jaduhñ xyajnähdijjäm coo hajxy jim xyajnõcxäänäm maa ja'a wyiinduumän. Tõõ ja'a yhEspíritu hajxy jaduhñ xyajnäguéjxäm coo hajxy jaduhñ xmiõõdhajtäm tu'ugmucy. Jaduhñä tõyhajt hajxy nmõõdhajtäm coo ja'a Dios hajxy tõyhajt xjiaançh yagjugyhadaanäm cõjxta'axiõõ neby je'e jiugyhatiän.

⁶ Paady hõjts jootcuyc nhity jabom-jabom. Mäduhñtiä hõjts yaa njaac jugyhaty hädaa yaabä naaxwiin, cab hõjts jim ndsoj nõcxa'añ maa ja'a Jesucristo wyiinduumän. Tõyhajt jaduhñ.

⁷ Hoy hõjts ja'a Jesucristo yaa nga'a ja hixy hajujcy, nmäbõjcäp hõjts ja'a miädia'agy jaduhñ.

⁸ Cab hõjts nnä'ägä jootmayhaty ni weñtiä. Chojpy hõjts ja'a njoot coo hõjts nõ'ogät, coo hõjts jim nnõcxät maa ja'a Jesucristo wyiinduumän.

⁹ Cab hõjts nmõjpäda'agy põ ho'ogaamb hõjts, ó põ cab hõjts ndsoj ho'oga'añ. Pero chojpy hõjts njoot jaduhñ coo hõjts ja'a Jesucristo miädia'agy hoy ngudiúunät. Jaduhñ hõjts ja'a Jesucristo xquiumáyät.

¹⁰ Hix, nägõxiä ja'a Jesucristo hajxy nõcxy nwiindäna'awäänäm. Mänit jaaya'ay ñägapxa'añ põñ hänäjty hoy tõõ quiudiuñ, põñ hänäjty hoy tõõ quia'a cudiuñ. Põnjaty hänäjty hoy tõõ quiudiuñ, je'eds ja'a hoyhajt ja'a weenhajt hajxy paadaamb. Pero põnjaty hänäjty hoy tõõ quia'a cudiuñ, quiumädowaamb by hajxy je'e.

¹¹ Nwiingudsähgõõby hõjts ja'a Jesucristo. Jia wi'i chojpy hõjts ja'a njoot jaduhñ coo hõjts xquiumáyät. Nja wi'i yajmäbõgaamb by hõjts ja'a cu'ughajxy coo hõjts ja'a Jesucristo tõyhajt tõõ xwyiinguexy. Najuõõbiä Dios coo hõjts ja'a miädia'agy hamuumdu'joot ngudiunä. Chõjpiõchä njoot jaduhñ coo mijts mnajuõõbiät coo hõjts ja'a Diosmiädia'agy hamuumdu'joot ngudiuñ.

¹² Cab hõjts nyajcumaya'añ, hoy hõjts jaduñ nja niñänomyii coo hõjts ja'a Jesucristo tøø xwyiinguexy. Paady hõjts mijts jaduñ nhawáañäm, jaduñ mijts mnajuó'owät neby hõjts mijts xpiuhgapxó'owät coo hõjts häna'c hänajty jaduñ tøø xñähwaambety. Ja'a häna'c-hajxy jaduñmä, je'e hajxy yajcopcøøby pø hoy yhamdsoo cuhdujt hajxy quiudiuñ. Cab hajxy ñä'ägädä wiinjuø'oy coo ja'a wyiinmahñdyhajxy quia'a nä'ägädä hoyyä.

¹³ Jaduñ hõjts häna'c xñänomy cooc tyijy hõjts nguhmäñø'oy coo hõjts ja'a Dios ndsocy. Diósäts hõjts xñajuøøby coo hõjts nga'a cuhhiñ coo hõjts nga'a cuhmäñø'oy. Hix, chojpy hõjts ja'a njoot jaduñ coo mijts ja'a Dios ja'a hoyhajt ja'a weenhajt xmió'owät.

¹⁴ Coo hõjts ja'a Jesucristo xjiaançh tehñ chójcäm, paady hõjts ja'a miädia'agy ngudiúunäm hamuumdu'joot. Nmøødhajtäm ja'a tøyhajt hajxy jaduñ coo jaaya'ay hajxy hoy xñähho'túutäm nägøxiä. Xyajñähwáatsäm ja'a nbojpa ngädieeyhajtämhajxy.

¹⁵ Coo ja'a Jesucristo hajxy hoy xñähho'túutäm, paadiä nhamdsoo cuhdujt hajxy nga'a yajtúunänä. Tsøgä miädia'agy hajxy jaduñ cudiúunäm mäduhñtiä hajxy yaa njaac jugyhajtäm. Y coo ja'a Jesucristo jiuypijøjtägajch, jaduñnä tøyhajt hajxy nmøødhajtäm coo hajxy xyagjugyhadáañäm cøjxta'axiøø nebiä Tieedy jiuigyhatiän.

¹⁶ Cab hõjts pøn nyajcopcøøñä pø mäyøøhajxy, pø häyoobhajxy. Ja'a Jesucristo, jaduñ hõjts hijty nhixy nebiä pajäya'ayän. Pero cab hõjts jaduñ nhixnä nebiä pajäya'ayän.

¹⁷ Hoorä, pønjaty ja'a Jesucristo tu'ugjoot tu'ugjuøhñdy møødhijnäp, hawiinjembä wiinmahñdy hajxy jaduñ miøødhajnäp. Tøø ja'a yhaxøøgwiinmahñdy hajxy jaduñ yhøxhixnä.

¹⁸⁻¹⁹ Ja'a Dios jaduñ mänañ coo hawiinjembä wiinmahñdy hajxy nmøødhajtäm. Y coo ja'a Jesucristo hajxy hoy xñähho'túutäm, jaduñnä Dios ja'a nbojpa ngädieey hajxy xyajñähwáatsäm. Jaduñ hajxy xmiøødnijootpáatäm. Y hõjts jaduñ tøø xwyiinguexy coo hõjts ja'a miädia'agy jaduñ nyajwá'xät coo ja'a Jesucristo hajxy tøø xñähho'túutäm, y coo ja'a Dios hajxy xyajñähwáatsäm, y coo ja'a Dios hajxy jaduñ xmiøødnijootpaadääñäm.

²⁰ Ja'a Dios hõjts tøø xwyiinguexy coo hõjts ja'a Jesucristo miädia'agy nyajwá'xät. Jaduñ hõjts tøø xñäma'ay coo hõjts mijts nmänuu'xtá'agät coo miädia'agy hajxy mmäbøjcät. Jaduñnä Dios hajxy xyajñähwá'adsät. Jaduñ hajxy ween xmiøødnijootpaadøøjät.

²¹ Cabä Jesucristo ja'a Dios mänaa miägädiehy. Pero coo Dios hajxy xjiaançh tehñ chójcäm, paady miänaañ coo ja'a Jesucristo ja'a nbojpa ngädieeyhajxy xchømó'cämd. Y coo ja'a Jesucristo hajxy xñähho'túutäm, jaduñnä Dios hajxy xyajñähwáatsäm. Jaduñ hajxy xpiädáacäm hawa'adstuum.

6

¹ Tøø ja'a Diosmiädia'agy hajxy mmäbøcy, paadiä Dios ja'a hoyhajt ja'a weenhajt hajxy tøø xmió'oy. Hõjts mijts nmänuu'xtaacypy coo ja'a Diosmiädia'agy hajxy hoy mgudiúnät. Paady mijts jaduñ nmänuu'xta'agy, coo hõjts ja'a Dios nmøødtuñ.

² Hix, jaduñ jim myiñ cujaay maa ja'a Diosmiädia'aguiän:

Tøøch nyajñähdiy mánájøch miich ja'a hoyhajt ja'a weenhajt hawiinmats nmó'owät. Cooch miich mänit xpia'yá'axät, mänitøch miich nmädówät. Mänit nbuhbédät. Mänit nyajñähwa'ads nyajcuhwá'adsät, nømä Diosmiädia'agy miäna'añ. Hoorä, tøø yhabaatnä coo ja'a Dios hajxy nba'yáaxämd. Jaduñnä Dios hajxy xyajñähwaats xyajcuhwáatsämd.

³ Maa hõjts ja'a Diostuung nduñän, hoy hõjts njäya'ayhaty. Hix, cab hõjts ndsocy coo hõjts pøn xñähwaambédät.

⁴ Hoy hõjts ja'a Diostuung njaanč tuñ. Nmee'xtujpy hõjts hoy tyiijä, hoy ñejiä hõjts nja jaty nja habety. Hanaxiä hõjts tøø ndsaachpøcy. Tøø hõjts häyohn mayhooc nmänaxy nyajnaxy.

⁵ Tøø hõjts mayhooc nyajwobho'ogy. Tøø hõjts mayhooc nyajtsumy. Tøø hõjts ja'a cu'ug mayhooc xñäbädø'ogy. Tøø hõjts mayhooc nhanuu'xø'øy ja'a Diosmädia'agyquiøxpä. Tøø hõjts jamia'ay nhity mayhooc ja'a Diosmädia'agyquiøxpä. Tøø hõjts mayhooc jaguiay jayhu'ugy nhijpä.

⁶ Coø hõjts ja'a Diostuung nduñ, cab hõjts haxøøgwiinmahñdy nnä'ägä møødä. Nwi-injuøøby hõjts ja'a Diosmädia'agy. Mee'xxieemy hõjts nhity, cab hõjts tii nmøjpäda'agy. Hojioot hõjts nmøød. Hiḡ, ja'a Dioshespíritu hõjts nmøød. Hamuumdu'joot hõjts jäya'ay jaduñ ndsocy nba'häyoy.

⁷ Nyajwa'xyp hõjts ja'a tøyhajt. Ja'a Diosmäjaa hõjts nmøød. Jaanč tehḡ yhoy hõjts njäya'ayhaty nebiä Dios choquiän. Jaduñ hõjts ja'a haxøøgpä nga'a yajmäjäda'agy.

⁸ Näje'eyyä hõjts jäya'ay jaduñ xwyiingudsähgø'øy. Näje'e hõjts xquia'a tsocy xquia'a mee'xy. Näje'e hõjts xquiumay, näje'e hõjts xñähojy. Tømiädiaacp hõjts, hoy hõjts jäya'ay näje'e xjia nänømy cooc tyijy hõjts nhøhnda'agy.

⁹ Hoy hõjts ja'a tsaangu'ug xjia hixyhaty, cab hõjts häna'c näje'e xmiämøj xmiämayø'øy. Mäjahñdiuum hõjts njaanč tehḡ wiädity, høxtä xyagho'ogaamb hõjts jäya'ay. Pero ja'a Dios hõjts jaduñ xcwieendhajt. Tøø hõjts ja'a Dios xyajcumädoy, pero cabä Dios jaduñ miäna'añ coo hõjts nhó'ogät.

¹⁰ Jootcujc hõjts nnä'ägä hity homiänaajä, hoy hõjts wiingumänaajaty nja mänaxy nja yajnaxy. Hoy hõjts nja häyoy, nyajnahixøøby hõjts ja'a jäya'ay ja'a Diosmädia'agy nämay, jaduñä hoyhajt ja'a weenhajt hajxy piädät. Hoy hõjts tii nga'a ja møødä, Dios hõjts xmiooby tijaty hõjts nyajmaajajpy.

¹¹ Mägu'ughajpädøjc, ja'a mijts jim hijpä Corintos, mijts jaduñ nmägapxyp. Tøø mijts ngøxy hawáañäm nebiaty hõjts ja'a mädia'agy nmøødä. Njaanč tehḡ chojpy hõjts mijts jaduñ.

¹² Nja wi'i miøødnijootpaadäänäp hõjts mijts. Cab hõjts nnajuø'øy pø jaduñ mijts xjiäwøøbiä.

¹³ Tunä mayhajt hajxy, tsøc hajxy nijootpáatäm. Jaduñ mijts nmägapxy nebiä huungän.

¹⁴ Cab hajxy mmøødwädiymügät pøn ja'a Diosmädia'agy ca'a mæbøjp, coo hajxy jaduñ mnä'ä pahjxpät neby hajxy yhaxøøgwäditiän. Hiḡ, pønjaty ja'a Diosmädia'agy mæbøjp, hoy hajxy quiudiuñ. Hawa'adstuum hajxy je'e. Pero pønjaty ca'a mæbøjp, cab hajxy quiudiuñ. Wiing ja'a wyiinmahñdyhajxy. Haxøøgtuum hajxy je'ebä.

¹⁵ Hiḡ, cabä Jesucristo tu'ugmädia'agy yhity møødä møjcu'ugong. Jaanä jaduñduhmbä, pøn ja'a Diosmädia'agy mæbøjp, cab hajxy tu'ugmädia'agy yhiipä møød ja'a Diosmädia'agy hajxy ca'a mæbøjpä.

¹⁶ Cabä cuhdujt jaduñ myiñ coo häna'c quepychech naaxpoch hajxy wyiingudsähgø'øwät maa ja'a Diostøjcän. Cabä quepychech naaxpoch jiujuquiä. Ja'a Diósäts mæböcy jujcy. Y coo ja'a Diosmädia'agy hajxy nmæböjcäm, jaduñ mäwiin hajxy nmäbaatäm nebiä Diostøjcän, je'eguiøxpä coo ja'a Dioshespíritu hajxy nmøødhajtäm. Jaduñä Dios jecy miänaañ:

Pønjátyhøchä nmädia'agy xmiøbøjcäp, je'ečhä nhEspíritu nmo'owaamby.
Nwoowhidäämbiøch hajxy je'e.

Xwyiingudsähgø'øwäämbøch hajxy je'e. Ngu'ughadäämbiøch hajxy je'e, nømä Dios hajxy jecy xmiädiácäm.

¹⁷ Jaduñä Dios jecy miänaañbä:

Puhwaatsnä hajxy ja'a häna'c ja'a quepychech hajxy wiingudsähgøøbiä, ja'a häna'c ja'a naaxpoch hajxy wiingudsähgøøbiä.

Cab hajxy mmøødwädiymúnät. Høxhix ja'a haxøøgpä hajxy. Mänítøch mijts xquiø'ødägøñät.

18 XTieedyhadáambøch mijts hánajtiän. Nnøøxhadáambiøch nmajc-hadáambiøch mijts hánajtiän, nømä Dios jecy miänaañ. Møccuhdujt ja'a Dios miøød. Hoy piønä jaduhñ yhane'emy.

7

1 Mägu'ughajpädøjc, tøyhajt jaduhñ coo ja'a Dios hajxy xyhuunghájtäm. Tsøcxä haxøøgwinnmahñdy hajxy najtshixóøyyäm cøxiä. Yø'ø haxøøgwinnmahñdy, xyajmá'táp ja'a mni'x ja'a mjuøhñdy jaduhñ. Tsøgå Dios hajxy wiingudsähgøøyyäm. Tsøgå njoot hajxy pädáacäm maa ja'a Dioscøxpän.

2 Cham højts mijts nnämäaguiumbä, tunä mayhajt hajxy, tsøc hajxy nijiootpáatäm. Cab højts pøn tøø nhäyoowhixy, cab højts pøn haxøøgwinnmahñdy tøø nyajnáhixø'øy, cab højts pøn tøø nwiinhøøñ.

3 Pero cábøch nmäna'añ cooch pøn tøø xñähøønø'øy. Njaanč tehñ chojpy højts mijts jaduhñ mäduhñtiä hajxy yaa njaac jugyhájtäm hädaa yaabä naaxwiin. Jaduhñ mijts hijty tøø nhuuc nämaabiä.

4 Nnajuøøbiøch coo mijts ca'xy mgudiuna'añ waambátyhøch mijts tøø nmägapy tøø nhane'emy. Ngumáabiøch mijts jaduhñ. Jootcújc-høch njaanč tehñ ñijiäwø'øyii maa mijtscøxpän. Jaanč tehñ xioondaacpøch, hoy højts madiu'u nja tsaächpøcy.

5 Coo højts ja'a hermano Tito jim nga'a paaty maa ja'a cajpt jaduhñ xiøhatiän Troas, paady højts jim nwiimbijty. Y coo højts yaa nmejch Macedonia-naaxooty, ni yaa højts ja'a hermano Tito nga'a paatpä. Coo højts yaa nga'a tsoj paaty, paady højts hijty jootcujc nga'a nä'ägädä ñijiäwø'øyii. Xmiädsiphajp højts jäya'ayhajxy hijty ja'a Diosmädia'agyquiøxpä. Jootmayhajp højts hijty je'eguiøxpä cooc tyijy mijts jaduhñ mga'a mabøga'añ.

6 Ja'a Dios, yagjootmøcpøjpy je'e pønjaty jaduhñ jootmayhajp. Y coo ja'a hermano Tito jiaanč mejch, mänit højts ja'a Dios xyagjootmøcpøjcy.

7 Xjiaanč tehñ yagjootmøcpøjc højts ja'a Dios jaduhñ coo højts ja'a hermano Tito xyhawaanä coo mijts je'e myagjootmøcpøjcy mänaa jim yhitiän maa mijtsän. Cøjx højts xyhawaanä cóogøch mijts xjia wi'i jibhixy cooch jim nnøcxät maa mijtsän. Jaduhñ højts tøø xyhawaanäbä cooc mijts mjootmayhaty je'eguiøxpä cooch mijts hijty tøø xyhuuc yagjootmayhajpä. Y jaduhñ højts tøø xyhawaanäbä cóogøch mijts xjiaanč tehñ jiahmiejtsta'agy. Coo højts jaduhñ tøø xquiøxy hawaanä, páadyhøch njaanč tehñ xioonda'agy.

8 Mänájøch mijts ja'a nocy jawyiinhajtpä nyajnäguexiän, nhójjøch mijts jaduhñ siémpräm. Paady hajxy weeñtiä mjootmayhajty. Jootmayhájthøch høøch weeñtiäbä coo mijts nhojy.

9 Coo mijts nhojy, paadiä mhaxøøgcuhdujt hajxy mhøxhijxy. Xquiumaayy mijts ja'a Dios jaduhñ coo hajxy jaduhñ mhøxhijxy. Coo hajxy jaduhñ mhøxhijxy, páadyhøch nxoonda'agy, ca'a jie'eguiøxpä coo hajxy mjootmayhajty.

10 Pønjaty yhaxøøgcuhdujt høxhijxp, je'edshajxy hodium mähmó'øwäp. Cumay hajxy jaduhñ piädsómät maa ja'a Diosän. Y cab hajxy jaduhñ jootmayhájnät. Pero pønjaty yhaxøøgcuhdujt ca'a høxhijxp, haxøøgtuum hajxy miähmó'øwät. Hoy miänaaxøø hajxy jaduhñ jootmayhada'añ.

11 Pero mijts, hamuumdu'joot hajxy mgudiun nebiaty mijts tøø nmägapy tøø nhane'emiän mänájøch ja'a jayøbajtpä nocy nguexiän. Mjaanč høxhijx ja'a mhaxøøgcuhdujt hajxy nebiä Diosmädia'agy yhane'emiän. Mjootmayhajt hajxy jaduhñ coo hajxy hijty tøø mgädieey. Y mdsähgøøyy hajxy jaduhñ weeñtiä. Chojpy

ja'a mjoothajxy coo mijts ngumáyät, paadiä craa hajxy mhøxquejxpädsøømy, ja'a haxøøgjatcøøyyäbä. Tøø hajxy myajcähxø'nø coo hajxy tii pojpä tii cädieey mga'a møødän.

¹² Paady højts ja'a nocy jim nguejxy maa mijtsän, coo häna'c-hajxy haxøøg tøø ñidiuñii. Ca'a jie'eguiøxpahjitiä højts yø'ø nocy nguejxy. Paady højts nguejxpä, chojpy højts ja'a njoot hänajty coo hajxy myajcähxø'ögät coo højts mijts xchocyñä. Xyhijxp højts ja'a Dios jaduñ coo højts nga'a høhnda'agy.

¹³ Coø højts mijts jaduñ xchocyñä, paady højts nxoonda'agy.

¹⁴ Xoondaacp højts jaduñbä coo ja'a hermano Tito xioondaacpä. Paady xioonda'agy coo ja'a Diosmädia'agy hajxy hänajty hoy mbanøcxyñä nägøxiä mänaa jim yhitiän maa mijtsän. Tøøchä hermano Tito hijty nnäma'ay coo mijts ja'a Diosmädia'agy hoy mgudiuñ. Y tøyhajt hajxy mjaanç cudiuñ.

¹⁵ Hamuumdu'joot mijts ja'a hermano Tito xjiaanç tehñ chocy, je'eguiøxpä coo mijts ja'a miädia'agy mmäbøjcä hamuumdu'joot nebiaty mijts xyhanehmiän.

¹⁶ Nnajuøøbiøch coo mijts ja'a Diosmädia'agy hoy mbanøcxaanñä; päadyhøch nxoonda'agy.

8

¹ Hoorä, mägu'ughajpädøjc, cham højts mijts nyajmøødmädia'aga'añ nebiaty ja'a Dios mayhajt tøø tiuñ ja'a mäbøjpädøjcøxpähajxy, ja'a hajxy jim tsänaabiä Macedonia-naaxooty.

² Jaanç tehñ xioondaacp hajxy, hoy hajxy jaduñ tøø jia tsaachpøcy hoyhoy, hoy hajxy jaduñ jia häyoy hanaxiä. Coø hajxy jaduñ jiaanç tehñ xioonda'agy, paadiä xädø'øñ hajxy may tøø yajmucy. Hojioot hajxy jiaanç tehñ miøød, paady hajxy may tøø yajmucy. Tøø ja'a häyoobäjäya'ay xädø'øñ hajxy mio'oyii; ja'a hermanodøjc-hajxy jaduñ tøø yecy.

³ Hamuumdu'joot hajxy jaduñ tøø yecy, ca'a yhadsipä, ca'a yhajootma'adä. Tøøch nhamdsoo hixy coo hojioot hajxy jaduñ jiaanç tehñ miøødä. Høxtä yejnajxypä xiädø'øñ hajxy jaduñ näjootpä.

⁴ Coø hajxy miädoyhajty coo højts ja'a häyoobäjäya'ay hänajty nbuhbeda'añ xädø'øñhaam, ja'a Diosmädia'agy hajxy mäbøjpä, mänit højts xñämaayy coogä xädø'øñ hajxy jaduñ quiexaambä, ja'a hajxy jim tsänaabiä Macedonia. Hamuumdu'jootäc hajxy jaduñ quiexa'añ.

⁵ Xoondaac højts jaduñ coo ja'a hermanodøjc xädø'øñ hajxy may yejcy, ja'a hajxy jim tsänaabiä Macedonia. Y coø hajxy miänaañ coo ja'a Dios ja'a miädia'agy hajxy hamuumdu'joot quiudiunaanä, paady højts maas hanaxiä nxoondaacy. Dios jaduñ mänaan coo hajxy jaduñ quiudiünät. Jaduñ hajxy miänaambä cooc højts ja'a nmädia'agy hajxy xquiudiunáanäbä.

⁶ Mänaa ja'a hermano Tito jim jayøbajt yhooyän maa mijtsän, mänit hajxy xñämaayy coo xädø'øñ hajxy myajmúgät. Hoorä, jim højts ja'a hermano Tito nguejxtägatsaambä maa mijtsän, weenä xädø'øñ hajxy mgøxy yajmucy. Mänit hajxy jim mguéxät maa ja'a häyoobäjäya'ayhajxiän, ja'a Diosmädia'agy hajxy mäbøjpä.

⁷ Jaanç tehñ yhoy ja'a Diosmädia'agy hajxy mmäbøcy. Jaanç tehñ yhoy hajxy myajwiingapxø'øy. Jaanç tehñ yhoy hajxy mwiinjuø'øy. Hamuumdu'joot hajxy jaduñ mmäbøcy. Xjiaanç tehñ chojpy højts mijts. Hoorä, chojpy højts ja'a njoot coo mijts ja'a häyoobäjäya'ay mjaanç tehñ piuhbédät hamuumdu'joot xädø'øñhaam.

⁸ Cábøch mijts ndehm yhane'emy coo hajxy mbuhbédät. Paady mijts jaduñ nyajmøødmädia'agy nebiatiä wiingjäya'ayhajxy tøø miäbuhbetiän, ween hajxy jaduñ mbahjxpät. Jaduñ hajxy myajcähxø'ögät coo hajxy tøyhajt mjaanç mädsøjpä.

⁹ Tøyhajt jaduñ coo ja'a Jesucristo hojioot jiaanç tehñ miøødä, ja'a nWiindsønajtämhajxy. Cahnä hänajty yaa quiäda'agyñä hädaa yaabä naaxwiin nebiä

pajäya'ayän, jim hijty mœc yhane'emy maa ja'a Tieedy ja'a wyiinduumän. Pero coo yaa quiädaacy, mänit jaduñ jiajty nebiä hädaa yaabä jäya'ayhajxiän, neby hajxy yaa nhäyóowäm. Jaduhñ hajxy hoy xñähho'túutäm. Y coo hajxy jaduñ tœ xñähho'túutäm, paady hajxy jim xyajnœcxáanäm maa ja'a Tieediä wyiinduumän, pœnjatiä miädia'agy jaduñ mäbójcäp.

10-12 Cham mijts nwiingapx njøjcapxœ'œwa'añ coo ja'a xädœ'œñ hajxy myajpedœœd neby hajxy hadojumœjt mwiinmahñdyhajtän coo hajxy hänäjty myajmuga'añ. Mja nähmajts hajxy jaduñ, pero cahnä hajxy myajpedyii. Hahixœœby jaduñ coo hajxy myajpedœœd, jaduñ hajxy myajcähxœ'œgät coo hojiot hajxy tœyhajt mjaançh mœœdä. Mijts jaduñ mwiinmahñdyhajtsohñ coo xädœ'œñ hajxy hänäjty myajmuga'añ. Jaduhñ hajxy myégät neby hajxy mmäjäda'aga'añ. Mädyyyä jaduñ. Cab jaduñ yhahixœ'œy coo hajxy hanaxiä myégät. Hix, jaduñä Dios ja'a jiote chocy coo hajxy myajcähxœ'œgät coo hojiot hajxy jaduñ mjaançh mœœdä.

13 Cábœch nmäna'añ coo hajxy mhäyoodägœ'œwät, páadyhöch tœœ nmäna'añ coo hajxy hanaxiä mga'a yégät.

14 Jaduhñhöchä njote chocy coo pœñ tii quia'a yajmaajiädät. Jaduhñds je'e, hahixœœby jaduñ coo mijts ja'a häyoobäjäya'ay mbuhbédät, je'eguiœxpä coo mijts nä'ä tægœ'œbä mmœœdä jäda'ahaty. Y coo mijts hänäjty tœœ mhäyoodägœ'œy, mänit mijts xpiuhbejtägätsät, pœ jim hajxy hänäjty miœœdä nä'ä tægœ'œbä.

15 Jaduhñ jim myiñ cujaay maa ja'a Diosmädia'aguiän: "Pœnjaty may yajpädœ'c, piuhmooyy hajxy je'e pœnjaty weeñtiä yajpädœ'c. Yaghaguipxyjatiœœy hajxy jaduñ tu'cuhtujt."

16 Dios ja'a hermano Tito jaduñ tœœ yajnähdijy coo hojiote miœœdhädät maa mi-jtsœœxpä, neby höjts hojiote nmœœdän maa mijtsœœxpän. Dioscujú'uyäp ja'a Dios jaduñ.

17 Coe höjts ja'a hermano Tito nnämaayy coo jim ñœcxät maa mijtsän, jootcugœœy je'e coe höjts jaduñ nnämaayy coo jim ñœcxät. Hix, hamdsoojote hijty jaduñ ñä'ägä nœœxa'añ.

18 Nyajmäguexœ'œwaamby höjts ja'a hermano Tito ja'a mägu'ughajpä wiingpä. Wi-induhñçhajtœjc tœœ yajmädohyaty coo ja'a Diosmädia'agy hoy yajwa'xy ja'a Jesu-cristocœxpä.

19 Jaduhñä mäbøjpädœjc-hajxy tœœ miänaambä coe höjts nmœœdhädät majaty höjts ja'a xädœ'œñ nyajmucy mänaa höjts ja'a häyoobäjäya'ayhajxy hänäjty nœœxy nmo'owa'añän. Cähxœ'œgaamb jaduñ coo ja'a Dios miœjja jiaançhä. Jaduhñ quiähxœ'œgaambä coe höjts hojiote nmœœdä.

20 Paady höjts nämetsc nädägœœg nwädity xädœ'œñyajmujpä, cab höjts ndsocy coe höjts pœñ xñänœmät coe tyijy höjts nje'ehada'añ. Hix, majiaty höjts xädœ'œñ nyajmucy.

21 Chojpy höjts ja'a njote jaduñ coe höjts ja'a jäya'ayhajxy xquiumáyät neby höjts ja'a Dios xquiumáyyän.

22 Chaads höjts ja'a mägu'ughajpä mäwiingpä nguexáangumbä mœœdä hermano Tito-hajxy. Mayhooc höjts hoy tœœ xmiœœdтуñ hoy ñä'ä mädyii tuungä. Hamuumdu'jote jim ñœœxa'añ maa mijtsän. Hix, ñajuœœby jaduñ coe mijts hoy myajtœjtägœ'œwa'añ.

23 Naxiä hermano Tito hajxy hoy mdehm yajtœjtägœ'œwät coe hajxy jim miédsät. Haa ja'a hermano Tito, hoy miänájœch jaduñ xñä'ägä mœœdтуñ, páadyhöch jim nguexa'añ maa mijtsän. Y ja'a jiamiœœdhajxy nämetspä, ja'a mäbøjpädœjc-hajxy yaabä, jaduñ hajxy tœœ miänaambä coe hajxy jim ñœcxät. Hoyyä Jesucristo hajxy wyiingudsähgœ'œy.

24 Coe mijts ja'a hermano Tito hoy myajtœjtägœ'œwät mœœdä jiamiœœdhajxy, jaduñ mijts ja'a mäbøjpädœjc hajxy xyhíxät coe hajxy tœyhajt mjaançh mädsocy. Tœjiädäp jaduñ neby höjts mijts tœœ nmädia'aguiän coe mijts hojiote mjaançh tehñ miœœdä.

9

¹ Høøch mijts jaduñ nnä'a jaac näjaayøøby. Nnajuøøbiøch jaduñ coo mijts ja'a häyoobäjäya'ayhajxy mbuhbeda'añ, ja'a Diosmädia'agy hajxy mäbøjpa.

² Hix, nnajuøøbiøch coo hajxy hamuumdu'joot mbuhbeda'añ. Jadúñhøchä mäbøjpädøjc-hajxy tøø nhawaanä, ja'a hajxy jim tsänaabiä Macedonia-naaxooty. Jadúñhøch hajxy tøø nhawaanä coo mijts hadojumøjt mdägøøyy xädø'øñyajmujpä, pønjatiä Diosmädia'agy jim mäbøjp Acaya-naaxooty. Y coo mijts jayøjp mnähmajch, paadiä Macedóniabä jäya'ayhajxy nämay xpiahixaambä. Jaduhñ hajxy hamuumdu'joot miäbuhbedaambä nej mijts mmäbuhbeda'añän hamuumdu'joot.

³ Páadyhøchä hermano Titohajxy jim nguejxø'øga'añ maa mijtsän, weenä xädø'øñ hajxy paquiä myajmujpädø'y. Jaduhñds je'e, cooch jim nnøcxät, tøø ja'a xädø'øñ hajxy hänäjty mgøxy yajmujnä. Haa ca'a, tøøchä Macedoniabähajxy nhawaanä coo mijts ja'a xädø'øñ myajmuga'añä.

⁴ Hix, wéñndøchä Macedóniabä jäya'ayhajxy näje'e nmødhádät jim maa mijtsän. Y coo hajxy jaduñ xyhíxät coo ja'a xädø'øñ hajxy hänäjty mga'a cøxy yajmucyñä, mdsähdiunaamb hajxy jaduñ. Jadúñhøch ndsähdiuumbät je'eguiøxpä cooch mijts tøø nmädia'agy coo ja'a xädø'øñ hajxy hänäjty myajmuga'añ.

⁵ Páadyhøch jaduñ nwiinmaayy coo hijty yhahixø'øy coochä hermano Titohajxy jawyiin nguejxø'øgät maa mijtsän, jaduñ mijts jim xpiuhbédät maa ja'a xädø'øñ hajxy myajmuquiän. Jaduhñä xädø'øñ hajxy myaghídät nähix hahixø'ø cooch jim nmédsät, neby hajxy jaduñ tøø mmäna'añän coo hajxy myaghida'añ. Jaduhñ hajxy myajcähxø'øgät coo ja'a xädø'øñ hajxy myega'añ hojiotcøxpä. Cab pøn jaduñ miäná'anät cooc tyijy mijts hadsip tøø nhane'emy coo hajxy myégät.

⁶ Jaduhñds je'e, pønjaty jaduñ wiinduc wiindsaäch, cabä hoyhajt hajxy piaada'añ. Pero pønjatiä häyoobäjäya'ay näxuu'tsp, je'edsä hoyhajt hajxy jaduñ paadaamb. Tøyhajt jaduñ.

⁷ Jootcujc hajxy myégät hamuumdu'joot neby hajxy hänäjty myega'añän, ca'a yhad-sipä ca'a yhajootma'adä, ca'a hajxy tii mnajtshäyowø'øy. Hix, je'e ja'a Dios chojpy pønjaty jaduñ jootcujc yejp.

⁸ Møj jaançhä Dios. Xmió'owäp mijts ja'a hoyhajt ja'a weenhajt møj may, jaduñ hajxy tii mga'a yajmaajiádät ni mänaa. Nä'a tægø'øbä hajxy jaduñ xmió'owät, jaduñä wiingjäya'ay hajxy hoy mbuhbejtägätsät hoy ñejpiä.

⁹ Jaduhñ jim myiñ cujaay maa ja'a Diosmädia'aguiän:

Pøn hojiäya'ay, møj mayyä häyoobäjäya'ay piuhbety.

Hoy miänaaxøø ja'a Dios jaduñ piuhbejtägätsa'añ.

¹⁰ Ja'a Dios, yejpy je'e ja'a tøømd mädyii mní'ibäp, mädyii mdúnäp. Yajmayøøby jaduñ nebiä mgáyät nebiä mhú'ugät. Jaanä jäduñduhmbä, xmió'owäp mijts ja'a Dios nä'a tægø'øbä tijaty hajxy hänäjty myajmaajiajpy, jaduñ mijts ja'a häyoobäjäya'ay mmoodiägätsät.

¹¹ Y coo mijts ja'a häyoobäjäya'ay jaduñ hamuumdu'joot mbuhbédät, mänit mijts ja'a Dios ja'a hoyhajt ja'a weenhajt møj may xmió'owät. Y coo højts ja'a häyoobäjäya'ay xädø'øñ nøcxy nmo'oy, ja'a mijts hänäjty tøø myéquiäbä, mänitä häyoobäjäya'ay ja'a Dios hajxy ñäma'awa'añ: "Dioscujú'uyäp."

¹² Hix, coo mijts ja'a häyoobäjäya'ay jaduñ mbuhbédät, mejtstu'u ja'a hoybä hajxy jaduñ mduna'añ. Piaadaambiä häyoobäjäya'ayhajxy tijaty hajxy hänäjty yajmaajiajpy, y tehngajnä ja'a Dios hajxy jaduñ ñäma'awa'añ: "Dioscujú'uyäp."

¹³ Coo mijts ja'a häyoobäjäya'ay jaduñ mbuhbédät jootcujc hoy miädyii cajptä, myajcähxø'øgaamb by hajxy jaduñ coo ja'a Dios ja'a miädia'agy hajxy mgudiunä ja'a Jesucristocøxpä. Jaduhñä häyoobäjäya'ay ja'a Dios hajxy møj jaançhä ñäma'awa'añ,

je'eguiøxpä coo mijts ja'a Dios ja'a miädia'agy mgudiuunä, møød coo hojiot hajxy mjaanč tehñ miøødä ja'a häyoobäjäya'aguiøxpähajxy.

¹⁴ Coo mijts ja'a Dios ja'a hoyhajt ja'a weenhajt mõj may tøø xmio'oy, paady mijts ja'a häyoobäjäya'ay xchoga'añ xpia'häyowa'añ, møødä Dios hajxy pia'ya'axa'añ ja'a mijtsøxpä.

¹⁵ Tsøcxä ja'a Dios hajxy nägøxiä nämáayyäm: “Dioscujú'uyäp”, je'eguiøxpä coo ja'a yHuung yaa quiejxy hädaa yaabä naaxwiin, coo hajxy hoy xñähho'túutäm. Møjmayhajt ja'a Dios jaduhñ tiuun hoy-yagjuøñä.

10

¹ Høøch mijts chamñ nmägapxaamby nhane'emaamby, høøch Pablohajpä. Mänaa ja'a Jesucristo yaa wiäditiän hädaa yaabä naaxwiin, jaanč tehñ miøødä hojiot hänajty. Mee'xxieemy hänajty jiaanč tehñ wiädity. Jadúhñhöch je'e nja pahixaañ cooçh mijts jaduhñ nmägapxa'añ nhane'ema'añ. Ja'a nmädsiphøchhajxy, jadúhñhöch hajxy xñänømy cooc tyijy mijts hänajty tsähgø'ø tsähgø'ø nmägapxy nhane'emy mänájøch jimñ nhitiän maa mijtsän, pero cooc tyijy høøch nga'a tsähgøøñä coo mijts nmägapxy nhane'emy nocyaam. Cab jaduhñ tiøyyä, nä'ä høhndaacp hajxy jaduhñ.

² Mägu'ughajpædøjc, huuc tunä mayhajt hajxy, høxhix ja'a haxøøgpä ja'a ca'a hoybä hajxy. Coo hajxy jaduhñ mhøxhixät, cab mijts jim waamb nnämä'awät cooçh jim nnøcxät maa mijtsän. Pero pøn jaduhñ mänaamb cooc tyijy højts hoy nga'a wädity nebiä hädaa jäya'ayhajxy hoy quia'a wäditiän hädaa yaabä naaxwiin, je'eçh mæbøcy hajxy nhøjäp hajäya'ayhaam. Nyajcähxø'øgäbøch jaduhñ cooçh hänajty tøyhajt nga'a tsähgø'øy.

³⁻⁴ Hoy højts yaa nja tsäna'ay hädaa yaabä naaxwiin, cab højts ja'a nhamdsoo wiinmahñdy nyajtuñ nebiä yaabä jäya'ayhajxy yajtuñän. Ja'a Dios højts xpiuhbejp ja'a miäjaahaam, cab højts ja'a Dios ja'a miädsip jaduhñ nyajmäjädaacä.

⁵ Jii jäya'ayhajxy näje'e wiädity, yajcumayaamb hajxy, høhndaacp hajxy. Cabä jioothajxy yajmädsocy coo wiinghäna'c ja'a Dios hajxy pia'häyowät. Nyajcähxø'py højts jaduhñ coo yø'ø häna'c-hajxy jaduhñ yhøhnda'agy. Y coo højts hänajty tøø nga'a yajmäjäda'agy, mänit højts nyajmäbøga'añ ja'a Jesucristocøxpä, coo ja'a miädia'agy hajxy ween quiidiuunä.

⁶ Y coo mijts hänajty hoy tøø mgudiuñ, cab højts mijts hänajty waamb nnäma'awaannä. Pero pønjaty jaduhñ ca'a nä'ägädä cudiunaamb, je'eds højts hahoy nhøxquexaamby maa ja'a tsajtøjcän.

⁷ Pønjaty jaduhñ najuøøby coo hajxy tøø wyiinguexyii ja'a Jesucristäm, ween hajxy ñajuøøbiä cooçh ja'a Jesucristo tøø xwyiinguejxpä. Tøyhajt jaduhñ. Hoy piønä jaduhñ ñajuø'øy.

⁸ Ja'a Jesucristo højts ja'a cuhdujt jaduhñ tøø xmio'oy coo højts mijts nmägapx nhané'emät. Chojpiä jioot jaduhñ coo mijts ja'a miädia'agy mjaac mæbøjcät. Cabä jioot chocy coo hajxy mdudägóyyät. Tøyhajt jaduhñ cooçhä Jesucristo ja'a cuhdujt jaduhmbä tøø xmio'oy. Cooçh jaduhñ nniñänømyii, cábøch ndsähdiuna'añ, hóyhøch häna'c jaduhñ xjia nänømy cóogøch tyijy nyajcumaya'añ hanaxiä.

⁹ Cábøch mijts nhadsähgø'øwa'añ, hoy mijts nocy naxy nja yajnäguexy.

¹⁰ Ja'a nmädsiphøchhajxy, jaduhñ hajxy miäna'añ cooc tyijy mijts møc nhane'emy nocyaam. Pero jaduhñ hajxy miänaambä cooc tyijy hänajty møc nga'a hane'emy mänájøch jimñ nhitiän maa mijtsän, cooc tyijy hänajty weenjaty ndsähgø'øy.

¹¹ Pero pønjaty jaduhñ mänaamb, cabä tøyhajt hajxy miøødä. Jaduhñdsä tøyhajtpä, neby højts mijts møc nhane'emiän nocyaam, jaanä jaduhñ mijts møc nhane'emaambä coo højts jimñ nnøcxtägätsät maa mijtsän.

¹² Jii häna'c-hajxy näje'e, jaanč tehñ yajcumayaamb hajxy cooc tyijy hajxy jiaanč tehñ jiaty jiaanč tehñ ñajuø'øy. Hamiñ haxøpy hajxy jaduhñ ñiguiumayii. Y cabä

wiinghäna'c hajxy quiumay. Pero cabä tøyhajt hajxy miøødä. Højts, cab højts jaduhñ nhäna'c-haty. Cab højts jaduhñ niguiumayii.

¹³ Caj pues, cab højts nyajcumaya'añ. Jaduhñ højts nduna'añ neby højts ja'a Dios tøø xyajñahdijjiän coo højts ndúnät. Jaduhñ højts tøø xyajñahdijy coo højts jim ndúnät høxtä jimbaady maa mijtsän.

¹⁴ Coo højts jim nduñ maa mijtsän, ngudiumby højts jaduhñ neby højts ja'a Dios tøø xñäma'ayän. Hix, højts ja'a Diosmädia'agy jim nyajwa'xtsohn maa mijtsän, ja'a Jesucristocøxpä.

¹⁵ Majaty wiinghäna'c jaduhñ tøø tiuundsooñän, cab højts jaduhñ nmäna'añ coo højts jim tøø nduñ. Cab højts jaduhñ nguhdujthaty. Pero chojpy højts ja'a njoot coo mijts ja'a Diosmädia'agy maas hoy mmäbögät, jaduhñ højts maas hoy njaac tehñ tiúnät maa mijtsän.

¹⁶ Y jaduhñ højts ja'a Diosmädia'agy hoy nyajwá'xät jäguembaady maa pøn ja'a Diosmädia'agy quia'a mädoynän. Hix, cab højts nduna'añ maa wiinghäna'c jaduhñ tøø tiuundsooñän. Hix, cab højts jaduhñ nyajcumaya'añ.

¹⁷ Jaduhñ jim myiñ cujaay maa ja'a Diosmädia'aguiän: “Cab jaduhñ yhahixø'øy coo hamdsoo mniguiumayøøjät. Pero jaduhñ yhahixø'øy coo ja'a Dios hajxy møj jaançh mnänómät.”

¹⁸ Je'eduhñ tsoobaatp coo ja'a Dios jaduhñ xquiumáyät. Cab jaduhñ choobaady coo hamdsoo mniguiumayøøjät.

11

¹ Huuc tunä mayhajt hajxy, huuc mee'x hajxy weeñtiä. Chámhøch weeñtiä nhuuc mädia'aga'añ nebiä jäya'ayhajxy yajcumayaambän. Cooch jaduhñ weeñtiä nniguiumayii, jaduhñ yajmädoy nebiä cuhhiimbähajxy miädia'aguiän.

² Nej mijts ja'a Dios xchoquiän, jaduhñhøch mijts ndsojpa, je'eguiøxpä cooch mijts ja'a Diosmädia'agy tøø nyajmäbøcy ja'a Jesucristocøxpä. Chójpjøchä njoot jaduhñ coo ja'a njoot hajxy mbädá'agät hamuumdu'joot maa ja'a Jesucristocøxpän. Cabä njoot hajxy wiingtuum mbädá'agät.

³ Mnigwieendähadøøjöp hajxy, jaduhñ hajxy pøn xquia'a jøjcapxø'øwät, coo hajxy xyagjahdiägóyyät ja'a Jesucristo. Jii häna'c-hajxy näje'e wiädity mäwiinhøhmä. Cab mijts xyajmädsocy coo ja'a Jesucristo hajxy hamuumdu'joot mbanøcxnät. Paquiä hajxy jaduhñ xwyiinhøønät. Haa ca'a, jaduhñä Eva jecy yhuuc wiinhøhñäbä ja'a møjcu'ugóngäm mänaa ja'a møjcu'ugong ñibiäda'agyiijän nebiä tsahñdiän. Siémprämä møjcu'ugong quiuwiinmahñdiä. Paquiä ja'a Eva yajwiinhøhñ.

⁴ Paquiä mijts ja'a miädia'agyhajxy jaduhñ mmäbøjcø'cä pønjaty mijts jaduhñ wiing xyajñahixøøby ja'a Jesucristocøxpä. Cab hajxy jaduhñ yajñahixø'øy neby højts ja'a Diosmädia'agy nyajñahixø'øyän ja'a Jesucristocøxpä. Cab hajxy jaduhñ yajñahixø'øy ja'a Dioshëpíritucøxpä neby højts nyajñahixø'øyän. Paquiä mijts ja'a miädia'agyhajxy jaduhñ mbadu'ubøjcä.

⁵ Yøø häna'c-hajxy jaduhñ wiing yajñahixøøbiä ja'a Jesucristocøxpä, jaduhñ hajxy ñiñänømyii nebiä Dioswiinguexypän, neby jaançh tehñ jiajpän. Cab jaduhñ yhooyä coo hajxy mmäná'anät cooc tyijy hajxy miaas jaty queeçh høøch njaty.

⁶ Wehñdáda'a jaduhñ tiøyyä cooch hoy yajxón nga'a xi'igy nga'a mädia'agy; cab jaduhñ ñejpiä. Pero tøyhajt jaduhñ cooch madiu'u njaty nnajuø'øy ja'a Diosmädia'agyquiøxpä. Homiänaajä højts mijts ja'a tøyhajt nmo'oy hoy ñä'a tiiguiøxpä.

⁷ Mänájøch mijts ja'a Diosmädia'agy nyajwiingapxø'øyän, cábøch mijts jaduhñ mänaa nnämaayy cooch mijts xmiäjúyät. Niguiudúunäbøch hänäjty hamdsoo, je'eguiøxpä coochä njoot hänäjty chocy coo mijts ja'a Diosmädia'agy maas hoy mmäbögät. Y cooch

hänajty hamdsoo nniguiudúunäxä, páadyhøchä jäya'ayhajxy näje'e xñänømy cóogøch tyijy hänajty hoy nga'a cudiuñ. Pero cab jaduñ tiøyyä.

⁸ Wiingjäya'ayhøchhajxy hänajty xpiuhbejp, ja'a Diosmädia'agy hajxy hänajty mæbøjpä wiingtuumjaty. Páadyhøch hajxy hänajty xpiuhbety cooch mijts ja'a Diosmädia'agy hänajty nyajwiingapx nyajwiinmädiaagø'y.

⁹ Mänáajøch jim nhitiän maa mijtsän, cábøch hänajty pøn nnäma'ay cooch hajxy xpiuhbédät xädø'øñhaam, hóyhøch hänajty tii nja yajmaajiaty táhoocjaty. Hix, xpiuhbéjpechä jäya'ayhajxy hänajty, ja'a Diosmädia'agy hajxy hänajty mæbøjpä, ja'a hajxy hänajty jim tsohmä Macedonia-naaxooty. Xmióobiøch hajxy hänajty tijátyhøch hänajty nyajmaajijapy. Y cábøch mijts mänaa nnäma'awa'añ cooch mijts xpiuhbédät xädø'øñhaam.

¹⁰ Tømiädiáacpøch jaduñ nebiä Jesucristo tiømiädia'aguiän. Cábøchä xädø'øñ pøn nmäyujwa'añ jim maa mijts mdsäna'ayän Acaya-naaxooty.

¹¹ Coø pøn jaduñ miäná'anät cóogøch tyijy mijts nga'a tsoy, høhndaacp hajxy jaduñ. Ja'a Dios jaduñ najuøby cooch mijts njaanç tehñ chocy njaanç tehñ pia'häyoy.

¹²⁻¹³ Jii häna'c-hajxy näje'e wiädity mäwiinhøhmbä. Ja'a Jesucristäc tyijy hajxy tøø wyiinguexyii coø ja'a Diosmädia'agy hajxy yajwá'xät maa ja'a mæbøjpädøjc-hajxiän, neby højts ja'a Jesucristo tøø xwyiinguexiän coø højts ja'a Diosmädia'agy nyajwá'xät. Pero høhndaacp hajxy; cab hajxy tøyhajt tøø wyiinguexyii ja'a Jesucristäm. Paady hajxy jaduñ yhøhnda'agy coø hajxy yajcumaya'añ.

¹⁴⁻¹⁵ Yø'ø häna'c-hajxy, ja'a møjcu'ugong hajxy wyiindsøn'hajpy. Jaaya'ay hajxy jaduñ piahixyp. Nnajuøøyyäm hajxy coø ja'a møjcu'ugong ñibiäda'agyii nebiä jaanç tehñ yhoybän, nebiä Diosmoonsän. Hoorä, cab jaduñ yhoy-yagjuøøñä coø ja'a møjcu'ugongä mioonsähajxy piajatcø'y, coø hajxy yhøhnda'agy cooc tyijy hajxy tøø wyiinguexyii ja'a Jesucristäm. Y coø hajxy jaduñ haxøøg jiäya'ayhaty, je'e hajxy jaduñ quiumädoowaamby.

¹⁶ Hoorä, chámhøch mijts nmägápcombä. Cab hajxy jaduñ mmäná'anät cóogøch tyijy tøø nguhhiñ, hóyhøch weeñtiä nja niguiumayii. Pero, pø mjaanç mänaamb hajxy jaduñ cóogøch tyijy tøø nguhhiñ, huuc tunä mayhajt hajxy, høøchä nmädia'agy hajxy weeñtiä huuc hamädoowhíjtäc. Nhuuc nimiädia'agyíjøch weeñtiä. Nhuuc niguiumayíjøch weeñtiä.

¹⁷ Cábøch nmäna'añ coochä Dios ja'a cuhdujt tøø xmio'oy cooch jaduñ nniguiumayøjät. Jaduhñhøch nniguiumayii nebiä cuhhiimbän.

¹⁸ Hix, ja'a jäya'ayhajxy nämaybä, miäniguiumáayyap hajxy tijaty hajxy yaa miøød hädaa yaabä naaxwiin, møød tijaty hajxy jaduñ tøø tiuñ. Jaduhñch høøchpä, wéeñtiøch cham nmäniguiumayáañäbä tijátyhøch tøø nduumbä.

¹⁹ Jaduñ mijts mjaanç tehñ ñibiäda'agyii nebiä jaanç tehñ jiajpän nebiä jaanç tehñ ñajuøobiän. Paady mijts ja'a cuhhiimbähäna'cä miädia'agyhajxy mhamädoowhidaañä. Pero cab hajxy tøyhajt mjaanç jaty mjaanç najuø'y.

²⁰ Hix, mmee'xtujpy hajxy hoy ñä'ä tijatiä, hoy mijts yø'ø häna'c-hajxy hoy ñebiatiä xjia häyoowhixy, yø'ø häna'c-hajxy høhndaacpä, yø'ø miädia'agy hajxy mjaanç tehñ yhamädoowhidáañäbä. Xyhanehmb mijts jaduñ nebiä moonsän. Y xñägáayyap xñähúucap mijts ja'a mxädø'øñ. Xwyiinhøhmb mijts yø'ø häna'c. Xpiejxp mijts yø'ø häna'c. Høxtä xquiojxp mijts yø'ø häna'c, y cab hajxy waamb mmäna'añ. Cab mijts yø'ø häna'c xyhixy nebiä jäya'ayän.

²¹ Pero højts, cab mijts jaduñ mänaa nhäyoowhixy neby mijts yø'ø häna'c xyhäyoowhixiän, yø'ø häna'c-hajxy høhndaacpä. Cab højts jaduñ njootmøjjä.

Chámhøch weeñtiä nhuuc mädia'agáangumbä nebiä cuhhiimbän. Tijaty yø'ø häna'c-hajxy miäniguiumáayyap, nmøødhøchä cuhdujt høøchpä cooch jaduñ nmäniguiumáayyabät.

²² Niguiumáayyap hajxy je'eguiøxpä coo hajxy yhebreojäya'ayä, coo ja'a Abraham hajxy jecy yhaphajty tieedyhajty møødä Israel. Pues jaanä jaduhñch høøchpä, jaduhñch nniñänøømäbä coochä Abraham tøø nhaphajpä tøø ndeedyhajpä.

²³ Jaduhñ hajxy ñiguiumáayyabä je'eguiøxpä cooc tyijy hajxy mioonsähadyii ja'a Jesucristøm. Pues xmioonsähajpøchä Jesucristo høøchpä. Y maas hóyhøch nduñ que yø'ø häna'c-hajxy tiuñ. Cooch jaduhñ weeñtiä nniguiumayii, jaduhñ yajmädooy nebiä cuhhiimbähajxy miädia'aguiän. Maas móc-høch tøø nduñ que yø'ø häna'c-hajxy tøø tiuñ. Mayhóoc-høch tøø nyajtsumy tøø nyajmach. Ni pøn jaduhñ quia'a yajtsumy quia'a yajmachñä nébiøch tøø nyajtsumiän. Mayhóoc-høchä häna'c tøø xjiaanç tehñ wiobho'ogy. Mayhóoc-høchä häna'c ja'a weenjaty tøø xquia'a yagho'ogy.

²⁴ Mägoøxc-hóoc-høchä judíoshajxy tøø xjiu'xy hii'xmajmoxmädaaxcø'ø.

²⁵ Tägoøghóoc-høchä häna'c tøø xwiopy paxyhaam. Tähóoc-høchä häna'c xjia ca'ch; xquiuhga'adsáambøch hajxy hñajty. Tägoøghóoc-høchä barco tøø xmiäma'adø'øy mejjiooty. Xjia møødnøøguguíñhøch jaduhñ. Mänájøchä barco tähooc xmiägüiññän, tu'xøøch jii by nhijty mejywyiing møød tu'tsuhñ.

²⁶ Mayhóoc-høchä yoñdiu'u tøø ndu'uyo'oy. Mayhóoc-høch ja weenjaty tøø nga'a nøøho'ogø'øy møjnøøgujc. Tøøchä mee'tspädøjc mayhooc nyohbiaady. Tøøchä nhamd-soo mägunaax mayhooc xjia yagho'oga'añ. Tøøchä wiinghäna'c xjia yagho'ogaambä; ca'a yhøøchä nmägunaaxhajxy je'e. Tøøch nwädity mähññdiuum jim cajptooty, møød jim pactuum, møød jim mejjiooty. Tøøchä häna'c mayhooc xchaaçhtiuñ, ja'a hajxy jaduhñ mänaambä cooc tyijy hajxy miäböcy.

²⁷ Tøøchä tuung mayhooc xyaghanuu'xø'øy; høxtä xyajtsaaçhpøjc-høch jaduhñ. Mayhóoc-høch tøø ndsunaxy jamia'ay jayhity. Tøøchä yuu mayhooc nmänaxy nyajnaxy møødä tødsø'ø. Tøøch mayhooc nhity jaguiay jayhu'ogy. Tøøchä tøøchpä mayhooc nmänaxy nyajnaxy. Nja yajmaajiápiøchä wit tucxy hñajty.

²⁸ Tøøch madiu'u ndsaaçhpøcy, pero cábøch jaduhñajtä ngøxy mädia'aga'añ. Je'eçh nmädia'agaamby coochä mäbøjpädøjc jabom-jabom nnädajy nnämay wiinduhñçajtøjc, pø hoy pø ween hajxy yhity. Hix, høøchä ngø'øjooty hajxy jaduhñ yhity.

²⁹ Pønä Diosmädia'agy hoy ca'a cudiunaamb, hoy hajxy jia mäböcy, nnäjootmayhápiøch hajxy jaduhñ. Pøn jaduhñ cädiehby je'eguiøxpä coo tøø wyiinhøøñii, nnäjootma'adhápiøchä häna'c ja'a tøø miäwiinhøøñäbä.

³⁰ Høøch, cábøch nyajcumaya'añ. Pero cooch häxøpy nyajcumaya'añ, je'eçh häxøpy nyajniguiumayáanap coochä häyohn mayhooc tøø nmänaxy tøø nyajnaxy.

³¹ Ja'a Dióshøch jaduhñ xñajuøøby cooch nga'a høhnda'agy. Ja'a Jesucristo ja'a Tieedy je'e. Tsøgä Dios hajxy cøjxta'axiøø wiingudsähgøøyyäm. Ja'a Jesucristo hajxy nWi-indsønñajtäm.

³² Mänaa ja'a Aretas hñajty tiuñän gobiernä, mänitøchä mioonsä xjia yajmadsaañ jim maa ja'a cajpt jaduhñ xiøhatiän Damasco. Juhmuu'tswäditiä cajpt hñajty jaduhñ. Jia pädaac ja'a hadänaabiä hajxy majatiä tägø'øwøødiaact nébiøch jaduhñ nga'a pädsømat.

³³ Pero päyø'c-høch. Ja'a nmägu'ughajpøchhajxy hoy xquiuhdøøñaxy cachjooty maa ja'a muuñ hñajty jiuñän.

12

¹ Cab jaduhñ yhäxø'øy cooch nyajcumáyät. Pero nébiøch cham nmädia'aga'añän, jaduhñ yajmädoowa'añ nébiøch nyajcumaya'añän. Je'eçh cham nmädia'agaamby nebiätyhøchä Jesucristo hijxtahñd tøø xyajwiinhixiän.

²⁻³ Nmøødhípiøchä Jesucristo tu'ugmädia'agy. Tøø yhiñnä majmactsjumøjt coochä Dios jim tøø xyaghoy tsajpootyp maa ja'a wyiinduumän. Cábøch nnajuø'øy pø ni'xhaam pø copc-háamhøch jim nhooyy, o pø juøhñdyhaam. Ja'a Dios jaduhñ nidiuhñ najuøøby.

4 Madiú'ujõchä hoy-yagjuõõñäjatypä jim̄ nmädooyy tsajpootyp. Cábõchä cuhdujt nmõödä cooch nmädiaactägätsät.

5 Coo wiinghäna'c häxõpy jim̄ tõõ yhoy tsajpootyp, mänitõch häxõpy nmõjpadä'aga'añ. Pero hõõch, cábõch hamdsoo nniguiumaya'añii. Jagóoyyõch nmädia'aga'añ nebiátyhõchä häyohn tõõ nmänaaxy tõõ nyajnaaxy.

6 Nmõõdhõchä cuhdujt jaduñ cooch nmädiá'agät nebiátyhõchä Dios tõõ nmõõdtuñ. Hix, tõyhájthõchä Dios jaduñ tõõ nmõõdtuñ. Cábõch nmädia'aga'añ cooch jim̄ nhooyy tsajpootyp, je'eguiõxpä coochä njoot quia'a tsoy cooch põñ xmiõjpadá'agät. Coochä jäya'ayhajxy xyhixät cooch hoy njäya'ayhaty, cooch hajxy xmiädówät cooch hoy ngapxy nmädia'agy, mänitõch hajxy xquiumáyät.

7 Jaanç teh̄m̄ yhoy-yagjuõõñäjätyhõch jim̄ nwiinhijxy tsajpootyp. Pero cabä Dios ja'a jioot chocy cooch nniguiumayõjät. Paadiä Dios miänaañ coochä mõjcu'ugong ja'a tsaachpä xyajpáadät, jadúhñhõch hamdsoo nga'a niguiumayõjät.

8 Tägõõghóoc-hõchä Jesucristo nja mänuu'xtaacy cooch cu xyajnähwaach.

9 Mänitõch xyhadsooyy: “Njaanç teh̄m̄ chojpy njaanç teh̄m̄ pia'häyóobiõch miich. Páadyhõch miichä mdsaaçpä nga'a yajnähwa'adsa'añ, nyajcähxõ'õgáambioch jaduñ coo miich mduñ ja'a hõõchä nmäjaagõxpä”, nõmhõchä Jesucristo xñämaayy. Xoondáacpõch jaduñ coochä ndsaaçpä xquia'a yajnähwa'adsaana, je'eguiõxpä cooch tõõ xñäma'ay cóogõch xyajtuna'añ ja'a miäjaagõxpä.

10 Xoondáacpõch jaduñ coochä Jesucristo xyajtuñ, hóyhõchä tsaachpä nja paady madiu'u. Náxyhõchä häna'c xyhäyoowhixy. Náxyhõch cõxiä wiinä nyajmaajiaty. Náxyhõchä häna'c xchaachtiujä ja'a Diosmädia'agyquioxpä. Náxyhõchä häyohn nmänaaxy nyajnaaxy. Pero cábõch nnä'ägä mõjpadä'agy cooch jaduñ njaty nhabety. Hix, cooch jaduñ njaty nhabety, cähxõ'p jaduñ cooch tii nga'a tuñ ja'a nhamdsoo mäjaaháamhõch; ja'a Jesucristo miäjaaháamhõch jaduñ nduñ.

11 Hoorä, hóyhõch tii nga'a ja jada'añ hamdsoo, nmaas jájpiõch hõõch quejee yõ'õ häna'c-hajxy, yõ'õ hajxy jaduñ niñänõõmábä cooc tyijy hajxy Dyioswiinguexiä. Cábäc tyijy põñ jaduñ jiaty nébiäc hajxy jatiän. Y cooch yõ'õ häna'c-hajxy jaduñ tõõ xñähwaambety, tiich mijts jaduñ coo tõõ xquia'a nähgapxtu'udy. Cooch mijts tõõ xquia'a nähgapxtu'udy, páadyhõch cham̄ hamdsoo nniñähgapxtu'udyii. Jaduñ weenjaty yajmädooy nebiä yajcumayaambän.

12 Mänájõch jim̄ nhitiän maa mijtsän, mänithõchä hijxtahnd madiu'u nyajcähxõ'cy hoy-yagjuõõñäjatypä. Ja'a Diosmäjaaháamhõch jaduñ nyajcähxõ'cy. Nyajcähxõ'c-hõch jaduñ coochä Dios jaduñ tõyhajt tõõ xwyiinguexy. Mee'xtújpõch hñajty.

13 Jaanç teh̄m̄ yhóyhõch nduñ hoy miädyii tsajtõgootiä. Jaanä jadúhñhõch jim̄ hoy nduumbä maa mijtsä mdsajtõjcän. Pero je'e mijts mga'a hojiäwõõby cooch mijtsä xädõ'õñ tõõ nga'a mäyujwa'añ nébiõch wiingtuumjaty nyujwa'añän. Jaanç teh̄m̄ wyiingä wiinmahñdy hajxy mmõödä. Põ tõõch mijts nyagjootma'ady, hõõch hajxy huuc mée'xäc.

14 Metsc-hóoc-hõch jim̄ tõõ nhooñä maa mijtsän. Miädägõõghóocpõch cham̄ nnõcxáangumbä. Cábõch mijts tii nmäyujwa'ana'añ. Cábõchä njoot chocy coo hajxy tii xmió'owät. Jaduñ mijts ndsocy nebiä hamdsoo huungpän, paady mijts jaduñ nbuhbeda'añ. Pero cábõch nmäna'añ cooch mijts xpiuhbejtägätsät xädõ'õñhaam.

15 Tõõchä njoot hamuumdu'joot nbäda'agy maa mijtsän coo mijts nbuhbédät hoy ñejpiä, hóyhõch cõxypänejpiä cu nja jat cu nja habet maa mijtsõxpän. Njaanç teh̄m̄ chojpy mijts jaduñ; pätiidä mijts jaduñ coo xquia'a tsojtägach.

16 Mänájõch jim̄ nhoyyän maa mijtsän, cab mijtsä xädõ'õñ nmäyujwaañ. Mnajuõõby hajxy jaduñ, tuhmds. Pero näje'e mijts jaduñ mmäna'añ cóogõch tyijy mijts tõõ nwiinhõõñ

17 mänáajøchä nmägu'ughajpähajxy jim̄ nguexiän maa mijtsän xädø'øñyajmujpä. Jaduhñägäts tyijy mijts tøø nmämeech. Pero cab jaduñ tiøyyä.

18 Mänáajøchä hermano Titohajxy jim̄ nguexiän maa mijtsän møødä mägu'ughajpähajxy tu'ugpä, ni je'e mijts xquia'a mäme'e'tspä. Hix, jaduñä hermano Tito howyiinmahñdy hajxy miøødäbä nébiøch nmøødän. Hoguiuhdujt hajxy miøødäbä nébiøch nmøødän.

19 Jaduhñ mijtsäda'a mmäna'añhaty cooc tyijy højts nja wi'i ñiñähgapxtu'uda'añii maa mijtsøxpän. Pero cab jaduñ tiøyyä. Ja'a Dios højts xyhijxp coo højts ja'a Jesucristo tu'ugmädia'agy nmøødhity. Mägu'ughajpädøjc, paady højts mijts ja'a Diosmädia'agy jaduñ nyajwiingapxø'øy, chojpy højtsä njoot jaduñ coo mijts hamuumdu'joot mjaac mäbøgät.

20 Cooch jim̄ nnøcxtägätsät maa mijtsän, mänitøch jootcujc nhídät pø hoy hajxy hñajty mwädity. Jaduhñ hajxy jootcujc mhíjpät ja'a høøchcøxpä. Pero pø cab hajxy hñajty hoy mwädity, jootmayhádäbøch jaduñ. Jaaná jaduñ mijts mjootmayhájpät. Je'e'ch jaduñ cham̄ nnädaj nnämaaby. Je'e'ch jaduñ nnänøømby ja'a ca'a howiädit, pø mnimiädsibøøyyäp hajxy hñajty, pø cab hajxy hñajty myajniyajmädsogyii, pø mnimiäjootmä'täp hajxy hñajty, pø mnimiädsiphájtäp hajxy hñajty, pø mniwiyingapxpéjtäp hajxy hñajty, pø mniñänøømäp hajxy hñajty cøxypä waamb, pø mniguiumáayyäp hajxy hñajty, pø mdsipyagjätäp hajxy hñajty.

21 Pø jaduñ hajxy hñajty mjaançh jootcø'øy cooch jim̄ nnøcxtägätsät maa mijtsän, wéhñdøchä Dios weenjaty xyajtsähdiúnät maa mijtsøxpän. Je'e'ch cham̄ nnädaj nnämaaby. Nñäjootmayhádäbøch hajxy je'e, pønjatiä yhaxøøgcuhdujt hajxy hñajty tøø quia'a najtshixø'øy. Je'e'ch jaduñ nnänøømby coo wiingto'oxiøjc hajxy piawädity tehñgajnä.

13

1 Miädägøøghóocpøch jim̄ nnøcxa'añ maa mijtsän. Jaduhñä cuhdujt myiñ, coo hajxy hñajty pøn̄ mnäxø'øwø'øwa'añ, tsipcøxpä testigo hajxy myajcähxø'øgät mejtstägøøg.

2 Mänáajøch jim̄ nhuug hoobiän maa mijtsän ja'a miämetsc-hoocpä, mänitøch hajxy nyajcuhojøøyy coo hajxy haxøøg quia'a jootcøñät, pønjaty hñajty haxøøgwädijp. Y chámhøch mijts jadähooc nnäma'awáangumbä nägøxiä coo hajxy mga'a haxøøgwädítät. Y pø je'enä hajxy hñajty mhaxøøgwädity cooch jim̄ nnøcxtägätsät maa mijtsän, tsipcøxpøch mijts nøcxy nyajcumädowa'añ.

3 Jaduhñhøch nyajcähxø'øga'añ coochä Jesucristo miädia'agy tøyhajt nyajnaxä. Haa ca'a, jaduhñhøch mijts tøø xyhuuc nämaabiä cooch jaduñ nyajcähxø'øgät. Hix, møcmäjaahaamä Jesucristo hajxy xyajcumädówät coo hajxy hoy mga'a wädítät.

4 Coo ja'a Jesucristo miøjpahbejtä cruzcøxp, cabä miøcmäjaa hñajty yajcähxø'øgy. Pero coo jiuypjøjtägajch, coo jim̄ ñøcxtägajch maa ja'a Tieediän, jímäts jaduñ yhiñä ja'a Tieediä miøcmäjaahaam. Nebiä Jesucristo ja'a miøcmäjaa hijty quia'a yajcähxø'øguiän, jaduñ højts mäjaa nga'a møødäbä hamdsoo. Pero coo højtsä Jesucristo nmøødhity tu'ugmädia'agy, paady højts mijts hoy nhane'ema'añ ja'a Dios ja'a miøcmäjaahaam.

5 Huuc niñajuø'øwøø hajxy hamdsoo. Coo ja'a Jesucristo ja'a miädia'agy hajxy hoy mbanøcxät, jaduñ hajxy myajnajuø'øwät coo ja'a Jesucristo hajxy tøyhajt mjaançh møødhity tu'ugmädia'agy. Pero coo hajxy hoy mga'a panøcxät, cabä Jesucristo hajxy tøyhajt mmøødhídät tu'ugmädia'agy.

6 Chojpy højtsä njoot coo hajxy mnajuø'øwät coo højtsä Jesucristo tøyhajt nmøødhity tu'ugmädia'agy. Cab højts jaduñ nhøhnda'agy.

7 Nmänuu'xtaacypy højtsä Dios coo hajxy hoy mwädítät, coo hajxy haxøøg mga'a jäya'ayhädät. Pø mwädijp hajxy hñajty hoy coo højts jim̄ nnøcxtägätsät maa mijtsän, cab højts hñajty nyajcähxø'øga'añ coo højtsä Jesucristo ja'a cuhdujt tøø xmio'oy coo højts mijts nyajcumädówät. Y coo højts jaduñ nga'a yajcähxø'øgät coo højtsä Jesucristo ja'a

cuhdujt jaduhñ tøø xmió'oy, cab jaduhñ ñejpiä. Je'e højtsä njoot chojpy coo hajxy hoy mwädítät.

⁸ Pø mjaançh wädijp hajxy hänajty hoy coo højts jim nnócxät, cab højts mijts hänajty waamb nnäma'awa'añ. Chojpy højtsä njoot coo hajxy tøyhajt hoy mwädítät. Pero pø cab hajxy hänajty tøyhajt hoy mwädity, mänit højts mijts mábøcy nhoja'añ.

⁹ Coó hajxy hoy mwädítät, xoondá'agäp højts jaduhñ. Cab højts jaduhñ nyajcähxó'ögät coo højtsä Jesucristo ja'a cuhdujt hänajty tøø xmió'oy coo højts mijts jaduhñ nya-jcumädówät. Nmänuu'xtaacypy højtsä Dios jaduhñ coo ja'a mhaxøøgcuhdujt hajxy mgøxy najtshixó'øwät, coo ja'a hoguiuhdujt hajxy hamuumdu'joot mjaac panócxät tehngajnä.

¹⁰ Páadyhøch mijts cham weenjaty nhojy nocyhaam, jadúhñhøchä njoot chocy coo hajxy hoy mwädítät. Ja'a Jesucristøchä cuhdujt jaduhñ tøø xmió'oy maa mijtsçøxpän, weenä miädia'agy hajxy maas hoy mjaac mábøjcä. Cabä Jesucristo jioot chocy coo hajxy mdu'udägóyyät. Y pø mjaançh wädijp hajxy hänajty hoy cooch jim nnøcxtägätsät maa mijtsän, cábøch mijts hänajty waamb nnäma'awa'añ. Pø caj, mänit højts mijts mábøcy nyajcumädówät.

¹¹ Hoorä, mägu'ughajpädøjc, chámhøch jaduhñ nyajmayaanä maa hajxy cham nmägapxy nhane'emiän. Huuc cudiún hajxy jaduhñ nébiøch cham nnäma'ayän. Yaghoyø'øw ja'a mdu'u hajxy. Ca'a haxøøgtu'u hajxy mbanøcxnä. Tsøc hajxy jaduhñ nimiøødhíjtäm tu'ugmädia'agy. Cab hajxy tii myajtsip myajma'adøøñät. Jaduhñä Dios hajxy xmiøødhíjnät. Xchójcäm ja'a Dios hajxy. Chojpiä jioot jaduhñ coo hajxy jootcujc nhíjtämät.

¹² Mniyajpoo'xóøjäp hajxy hamuumdu'joot, ween jaduhñ quiähxø'øgy coo ja'a Diosmädia'agy hajxy mmábøcy.

¹³ Xyajpoo'xp mijtsä hermanodøjc-hajxy yaabä, ja'a Diosmädia'agy hajxy yaa mábøjpä.

¹⁴ Weenä Jesucristo hajxy nägøxiä xmió'oy ja'a hoyhajt ja'a weenhajt. Je'e hajxy nWiindsøn hájtäm. Weenä Dios hajxy xchójcäm homiänaajä. Weenä Dioshèspíritu hajxy xmiøødhíjtäm nägøxiä. Amén.

Gálatas

1-2 Høøch Pablo, hädaa nócyhøch nhädiuumby mөөдä hermanohajxy yaabä nägøxiä. Mijts hädaa nocy nyajnäguejxyp, mijts hermanodøjc jim tsänaabiä Galacia. Cab hajxy mmäná'anät cooch jäya'ay tøø xwyiinguexy. Jesucristøch xwyiinguejx mөөдä Dios ja'a nDeedyhåjtäm. Jaayá'ayädsä Jesucristo yagjujypiøjc.

3 Weenä Dios ja'a nDeedyhåjtäm hajxy xmio'oy ja'a hoyhajt ja'a weenhajt mөөдä Jesucristo ja'a nWiindsønåjtäm.

4 Jaaya'ay hajxy xñähho'túutäm ja'a nbojpä ngädieyhåjtäm nebiä Dios ja'a nDeedyhåjtäm tøø miäna'añän. Paadiä Jesucristo hajxy xñähho'túutäm nebiä haxøøgpä hajxy yaa xñähwáatsämät hädaa yaabä naaxwiin.

5 Tsøgå Dios hajxy møj jaançh pädáacäm cøjxta'axiøø. Amén.

6 Hermanodøjc, Dios hajxy xmiøjyáaxäm je'eguiøxpä coo ja'a Jesucristo hajxy xchójcäm. Pero tøøch nmädoyhaty coo ja'a Diosmädia'agy hajxy mga'a panøcxnä je'eguiøxpä coo ja'a wiingmädia'agy hajxy tøø mbadu'ubøjnä. Nyagjuøøbiøch jaduhñ coo ja'a Dios hajxy paquiä tøø mnajtshixøøñä.

7 Pero cabä wiingmädia'agy jii neby hajxy mnähwá'adsät. Jaduhñä häna'c-hajxy näje'e wiädity yajnähixøøbiä. Xjia jøjcapxø'owaamb mijts jaduhñ. Ja'a hønnda'agymiädia'agy mijts hajxy xyajnähixøøby ja'a Jesucristocøxpä.

8-9 Tøøch mijts jaduhñ nhuuc nämaabiä, y chaach jadähooc nmänáangumbä, tøøch mijts ja'a Diosmädia'agy nyajnähixø'øby neby hajxy jaduhñ mnähwá'adsät. Pero coo mijts pøn wiingmädia'agy xyajnähixø'øwät, jiiby nøcxy quia'awa'añ haxøøgtuum, hoy piønä, hoy yhøøchä, hoy jim jia tsooñ tsajpootyp.

10 Ndsøjpiøch coochä Dios xquiumáyät. Cábøch ndsocy coochä cu'ughajxy xquiumáyät. Cooch häxøpy jaduhñ ndsocy, cábøchä Jesucristo häxøpy hoy nbanøcxnä.

11-12 Hermanodøjc, huuc wiinjuø'øw hajxy jaduhñ, hädaa mädiä'agyhøch mijts nyajwiingapxøøbiä, ja'a Jesucristøch xmiooyy; ca'a jäya'ayä xmiooyy hädaa yaabä naaxwiimbä.

13 Tøø hajxy nmädoyhaty nébyhøch hijty nwädity, mänáajøchä judíos miädia'agy hajxy hänajty nbanøcxnä. Mnajuøøby hajxy nébyhøchä jäya'ayhajxy hijty ndsaaçhtiuñ nägø'ø nädecypiä, ja'a Diosmädia'agy hajxy panøcxpä. Páadyhøch hijty ndsaaçhtiuñ nebiä Diosmädia'agy hajxy jaduhñ ñajtshixø'øwät.

14 Maa yø'ø judíos miädia'agyhajxy myiñän, maas hóyhøch hijty nbanøcxy. Cábøch nmägunaax pøn hijty xyhabexy, ja'a høøch nmädu'ugyee'taact. Hix, maas pedyíijøch hijty ngudiuñ ja'a nhap ndeedy quiuhdujthajxy ja'a jecypiä.

15 Pero tøøchä Dios hijty xwyiimbiy, cáhnøch hänajty nmiñ nga'ayñä. Páadyhøch tøø xmiøjya'axy cooch xjiaançh tehñ chocy.

16 Mänitä Dios miänaañ coochä yHuung nhixyhåjtät, nébiøchä miädia'agy jaduhñ nyajwiingapxøøyyät ja'a hajxy ca'a judíospä, neby hajxy jaduhñ ñähwá'adsät. Cooch jaduhñ njajty, cábøch hoy pøn tøø nyajmøødmädia'agy,

17 ni ja'a hermanodøjc-hajxy jim hijpä Jerusalén, ja'a hajxy hijty tøø wyiinguexyíjábä ja'a Dios. Pero jimhøch nnøcxtøøyy Arabianaaxooty. Mänitøch nwiimbijty, nmejtstägajch maa ja'a cajpt xiøhatiän Damasco.

18 Coo tægøøgjomøjt hänajty tøø ñajxnä, mänitøch jim nnøcxy Jerusalén. Jimhøchä Pedro hoy nhixyhaty. Mänitøch nmøødhijty majmocxxøø.

19 Jimhøchä Jacobo nhixyhajpä ja'a nWiindsønåjtämä piuhya'ay. Pero cábøchä hermano wiingpä nhijxy, ja'a wiinguejxypä.

²⁰ Tehm̄ tiøyhajt jaduhñ nébiøch cham̄ njaayän. Cábøch nhøhñda'agy. Diøshøch jaduhñ xyhijxp cooçh nga'a høhñda'agy.

²¹ Mänítøch hoy nwädity Sirianaaxooty møødä Cilicianaaxooty.

²² Ja'a hermanodøjc-hajxy jim̄ hijpä Judeanaaxooty, ja'a Jesucristo miädia'agy hajxy hänajty panøcxäbä, cahnøch hajxy hänajty nhixyhatyñä.

²³ Jagooyyä hajxy hänajty miädoyyä cooçhä Diosmädia'agy hänajty nyajwa'xnä. Tøø hajxy hijty miädoyhaty cooçhä hermanohajxy hijty ndsaächtiuñ, nebiä Diosmädia'agy hajxy ñajtshixø'øwät. Pero cooçhä Diosmädia'agy hänajty nyajwa'xnä høøçhpä,

²⁴ paadiä Dios hajxy miooyy Dioscujú'uyäp ja'a høøçhcøxpä.

2

¹ Coø majmactsjomøjt hänajty tøø ñajxnä, mänítøch hoy ngoonä Jerusalén møødä Bernabé møødä Tito.

² Diøshøch jim̄ xquiejx. Jímhøçhä Jacobo nmøødhamugøøyy hamee'ch møødä Pedro møødä Juan. Jim̄ hajxy hänajty quiopc-haty maa ja'a hermanodøjc-hajxiän. Mänítøch hajxy nyajmøødmädiaacy nebiätühøçhä jäya'ay ja'a Diosmädia'agy hajxy nyajwiingapxø'øy, ja'a hajxy ca'a judiøspä, neby hajxy hoy ñähwá'adsät. Páadyhøçhä copc-hajpädøjc jawyiin nyajmøødmädiaacy, nébiøch hajxy jaduhñ xquia'a jøjcaxø'øwät.

³⁻⁵ Xjiøjpøgøøyy højts jaduhñ; cab højts waamb xñämaayy. Tøø häna'c-hajxy näje'e yajtägø'øy maa ja'a hermanodøjc-hajxiän; nøm̄ hajxy hänajty miäna'añ cooc tyijy hajxy pianøcxpä; pero cab hajxy hänajty tøyhajt pianøcxy. Højts hajxy xjia jøjcaxø'øwaan. Coø højtsä Jesucristo miädia'agy hänajty nbanøcxänä, cab højtsä judiøspä cuhdujt hänajty nbanøcxnä. Pero cab højts nmøjpdäacy, neby højts mijts hoy njaac yajwiingapxø'øwät ja'a tøyhajt, nej mijts jaduhñ hoy mnähwá'adsät. Jaduhñ hajxy hänajty jia mänaambä coo ja'a Tito ween yajcircuncidarhaty nebiä judiøshajxy quiuhdujthatiän, hoyyä Tito hänajty quia'a ja judiøspä. Cabä copc-hajpähajxy miänaañ coo ja'a Tito yajcircuncidarhädät.

⁶⁻⁹ Cábøçhä Jacobohajxy hänajty nmøjpdä'agy, hoy hajxy hänajty tøø jia päda'agyii copc-hajpä. Hix, cabä Dios hajxy xmiøjpdäacäm, hoyyä møjtuung hajxy nja møødhajtäm. Mänítøch hajxy xyhixyhajty cooçhä Dios hänajty tøø xwyiinguexy, cooçhä miädia'agy nyajwiingapxøøyyät ja'a ca'a judiøspähajxy, nebiä Pedro hänajty tøø wyiinguexyiiän coo ja'a judiøshajxy yajwiingapxø'øwät. Mänit højts ja'a copc-hajpähajxy xjiøjpøgøøyy møødä Bernabé. Mänit højts tu'ugmädia'agy nmähmøøyy coo højts nwädität maa ja'a ca'a judiøspän, chaads häna'c-hajxy jaduhñ wiädität maa ja'a judiøspän. Y cábøch hajxy nej xyhanehmy.

¹⁰ Jagooyyä højts xñämaayy coo højtsä häyoobäya'ayhajxy nbuhbédät. Jaduhñch nnä'ägä cuhdujthaty.

¹¹⁻¹⁴ Mänítøçhä Bernabé nmøødhädaacy maa ja'a cajpt xiøhatiän Antioquía. Cujecy højtsä Pedro xpiagädaacy. Mänitä Pedro tiägøøyy caamiujpä møødä hermanodøjc ja'a ca'a judiøspä. Mänitä Jacobo miägu'ughajpähajxy näje'e quiädaacpä. Mänitä Pedro quia'a møødcaamiújcänä ja'a hajxy ca'a judiøspä. Hix, chähgøøbiä Pedro hänajty coo ja'a hermanodøjc-hajxy miädoyhädät jim̄ Jerusalén, ja'a hajxy hänajty jaac panøcxpä ja'a judiøscuhdujt. Mänitä Bernabé piajatcøøbiä møødä hermanodøjc-hajxy nägøxiä ja'a judiøc, coo hajxy quia'a møødcaamiugaannä ja'a hajxy ca'a judiøspä. Hix, mejtstu'u ja'a wyiinhahñdyhajxy hänajty. Y cooçh nhixy neby hajxy hänajty jiatcø'øyän, coodsä tøyhajt hajxy quia'a panøcxnä, ja'a Diosmädia'agy, mänítøçhä Pedro njøjcuhøjøøyy ja'a hermanodøjc wyiinduumhajxy. “Jue'e miich, mjudiøc miich, y caj miich hijty nbanøcxy ja'a judiøscuhdujt. Caj miichä cuhdujt mnä'ägä møødä coo miichä wiinghana'c mädsibø'øbä mnämä'awät coo hajxy pianøcxät ja'a judiøscuhdujt.” Páadyhøçhä Pedro jaduhñ nhojy coo je'e ja'a pojpä hänajty miøødä.

15 Jue'e hõjts'hájtäm, judíos hõjts nmiin ngáhwäm. Caj tyijy hõjts ngahwiindõyyä nebiä wiingjäya'ayhajxiän.

16 Pero, paadiä Dios hajxy xpiädáacäm hawa'adstuum je'eguiõxpä coo ja'a Jesucristo miädia'agy hajxy hamuumdu'joot nmäbõjcäm, ca'a jie'eguiõxpä coo hajxy ngudiúunäm nebiä jecyquihdujt myiñän. Coo ja'a Jesucristo miädia'agy mga'a mäbõjcät, cabä Dios xpiädá'agät hawa'adstuum, hoy mja cudiuñ nebiä jecyquihdujt myiñän.

17 Pero tsõc mänáanäm, coo jaduñ quiähxõ'õgät coo hõjts ngahwiindõyyäbä, hoyyä Jesucristo miädia'agy nja mäbõjcäm, cab hajxy nmänáanämät cooc tyijy ja'a Jesucristo tõõ xyajtu'udägooyäm.

18 Coo hõjtsä jecyquihdujt nnajtshixõoyyämät, cab jaduñ yhooyä coo hajxy jadähooc nbadu'ubõjcämät. Hix, cähxõ'õgäp jaduñ coo hõjts ja'a pojpa cädieey nmõõdhájtäm.

19 Pero hõõch, cábõchä jecyquihdujt nbanõcxnä. Tõõch nnajtshixõõñä, nébiõchä Dios hamuumdu'joot jaduñ nbanõcxnät.

20 Coo ja'a Jesucristo hajxy tõõ xñähho'túutäm cruzcõxp, páadyhõch je'e hamuumdu'joot nbanõcxy; cábõch nhamdsoo wiinmahñdy nyajtunaanä. Tu'ugmädiä'agyhõchä Jesucristo xmiõõdhijnä. Xchõjõpõch je'eduhñ, páadyhõch tõõ xñähho'tu'udy.

21 Paadiä Dios hajxy xpiädáacäm hawa'adstuum je'eguiõxpä coo ja'a Jesucristo miädia'agy hajxy nmäbõjcäm; ca'a jie'eguiõxpä coo ja'a jecyquihdujt hajxy ngudiúunäm. Coo häxõpy quia'a jaduñä, xiõõbä ja'a Cristo häxõpy tõõ ñä'ä ho'ogy. Paady, cábõchä hoyhajt nnajtshixõ'õwa'añ mädyíjõchä Dios tõõ xmio'oy.

3

1-5 Mijts hermanodõjc, nej, mguhmañõby hajxy jaduñä coo ja'a Diosmädia'agy hajxy mga'a panõcxaanä. Nej, mbanõcxtägatsaambiä jecyquihdujt hajxy jadähoocä. Mnajuõõby hajxy coo ja'a Jesucristo hajxy tõõ xñähho'túutäm. Coo mijtsä Jesucristo miädia'agy tõõ mmäbõjcä, paadiä Dios ja'a yHespíritu hajxy tõõ xmio'oy, paadiä hoy-yagjuõõñäjatypä tõõ yajnaxy maa mijtsän. Ca'a jie'eguiõxpä coo ja'a jecyquihdujt hajxy hijty mgudiñ. Pero cabä ndijy ja'a Diosmädia'agy hajxy tõyhajt mnajtshixõ'õwa'añ.

6 Ja'a Abraham, ja'a hajxy nhaphájtäm ja'a hajxy ndeedyhájtämbä, miäbõjc je'e ja'a Diosmädia'agy. Paadiä piädaacä hawa'adstuum.

7 Y coo hõjtsä Diosmädia'agy nbamäbõjcämät, mänitä Dios hajxy xpiädáacämät nebiä Abraham yhap yhocän. Mänit hõjts xpiädáacänät hawa'adstuum.

8 Jéquiänä Dios ja'a Abraham ñämaayy: "Miihcõxpõchä jäya'ayhajxy nbuhbeda'añ nägõxiä ja'a wiinduhmyhagajtpä je'eguiõxpä coo miiçh tõõ mmäbõcy." Jiiby jaduñ myiñ cujaay maa ja'a Diosmädia'aguiän. Jaduñ hajxy nyajnajuõõyyäm coo ja'a Dios hajxy xpiäda'agáanäm hawa'adstuum põnjaty mäbõjp, hoy hajxy quia'a ja judíosä.

9 Entonces, ja'a hajxy mäbõjpä, jaduñ hajxy piuhbedyii nebiä Abraham jecy piuhbejtän.

10 Ja'a hajxy jaduñ mänaambä cooc tyijy hajxy ñähwa'adsa'añ je'eguiõxpä coo ja'a jecyquihdujt hajxy quiudiñ, haxõõgtuum hajxy je'e piäda'aga'añii. Jaduñ jiiby myiñ cujaay maa ja'a jecyquihdujtän, "Haxõõgtuum piäda'aga'añii põnjaty hoy ca'a cudiumb nebiaty hädaa libro xyhanéhmäm."

11 Jaduñ jiiby myiimbä cujaay maa ja'a Diosmädia'aguiän: "Coo ja'a Diosmädia'agy hajxy nmäbõjcämät, mänitä Dios hajxy xyajnähwáatsämät." Ca'a jie'eguiõxpä cooc tyijy hajxy ngudiúunäm ja'a jecyquihdujt.

12 Pero jaduñä jecyquihdujt miäna'añ: "Põñä jecyquihdujt cudiumb, hawa'adstuum piäda'aga'añii."

13 Coodsä jecyquihdujt hajxy hijty hoy nga'a cudiunáanäm, haxøøgtuumä Dios hajxy hijty xpiáda'agáanäm. Pero xñähúu'tsämä Dios hajxy jaduhñ; paadiä Jesucristo hajxy xñähho'túutäm; paadiä Dios hajxy xpiadáacäm hawa'adstuum. Jaduhñä jii by myiñ cujaay maa ja'a Diosmädia'aguiän: “Pøñ møj pahbéjtäp quepyquiøxp, tøø hñajty piáda'agyii haxøøgtuum.”

14 Paadiä Jesucristo hajxy tøø xñähho'túutäm, nebiä jäya'ayhajxy jaduhñ piuhbéjtäbät, ja'a hajxy ca'a judíospä, nebiä Abraham jecy piuhbejtän. Y coo hajxy nmäbøjcamät, mäniä Dios ja'a yhEspíritu hajxy xmio'owáanäm nägøxiä neby hajxy jecy xyajwiin-waanøøyyäm cooc hajxy xmio'owáanäm.

15 Hermanodøjc, tsøg hajxy mädiáacäm neby hajxy yaa nguuhdujthájtäm hädaa yaabä naaxwiin. Coo pøñ tii yajcuhdúgät maa ja'a hagujtøjcän, coo fyirmarhadät, ni pøñ jaduhñ quia'a yajtägátsät, ni quia'a mäná'anät coo quia'a hoyyä.

16 Bueno, coo ja'a Dios ja'a Abraham miøødyajcuhdujcy cooc hoy miänaajä piuhbeda'añ, jaduhñ miänaambä cooc ja'a Abraham yhap yhoc miøødyajcuhdújcäbä. Jaduhñ jii by myiñ cujaay maa ja'a Diosmädia'aguiän. (Cab jaduhñ myiñ cooc hajxy nämay miøødyajcuhdujjä.) Coo jaduhñ miäna'añ: “Abraham yhap yhoc”, ja'a Jesucristo jaduhñ nänøømäp.

17 Y coo mädaaxmägo'xcuhii'xmajcjomøjt hñajty tøø ñaxy, mäniä jecyquihdujt piádaacä. Pero cab jaduhñ yajtägajch nebiä Dios ja'a Abraham hñajty tøø miøødyajcuhduquiän.

18 Coo häxøpy quia'a tøyhajtä jaduhñ, cab häxøpy tiuñ nebiä Dios jecy yajcuhdujquiän.

19 Paadiä Dios ja'a jecyquihdujt yecy neby jaduhñ quiähxø'øgät coo ja'a pojpä cädieey hajxy nmøødhájtäm. Pero coo ja'a Jesucristo yaa tøø y hoy hädaa yaabä naaxwiin, ja'a hñajty tøø miøødyajcuhdugyíjábä, cabä jecyquihdujt jaduhñ tiunaanä. Bueno, coo ja'a Dios ja'a jecyquihdujt piádaacy, mäniä mioonsä tsajpootypä ja'a Moisés hoy mio'oy. Mäniä Moisés jiøyejnajxy.

20 Pero hamdsoo ja'a Dios ja'a Abraham miøødyajcuhdujcy; cabä jiøyejnajxpä jaduhñ ñä'a yajtuuñ.

21 Cab hajxy nmänáanämät coo ja'a jecyquihdujt yajtägajch nebiä Dios hñajty tøø yajcuhduquiän. Coo ja'a Dios häxøpy tøø miäna'añ coo hajxy cu nnähwáatsäm maa ja'a jecyquihdujtän, pues tøø ja'a jecyquihdujt hajxy häxøpy xyajnähwáatsäm ja'a nbojpä ngädieeyhájtäm.

22 Ja'a Diosmädia'agy jaduhñ mänaamb coo hajxy nägøxiä nhíjtäm haxøøgtuum je'eguiøxpä coo ja'a pojpä cädieey hajxy nmøødhájtäm. Pero coo ja'a Jesucristo miädia'agy hajxy nmäbøjcamät, mäniä Dios hajxy jaduhñ xyhuunghájtämät nebiä jecy yajcuhdujquiän.

23-25 Tuungpaatpä jecyquihdujt hijty. Tsipcøxp højts hijty ngudiúunäm. Pero coo ja'a Jesucristo tøø y hoy, cab højtsä jecyquihdujt nbanøcxänä. Coo ja'a Jesucristo miädia'agy hajxy nmäbøjcamät, jaduhñä Dios hajxy xyhuunghájtämät.

26 Y xjiaanç huunghajp mijts ja'a Dios je'eguiøxpä coo ja'a Jesucristo miädia'agy hajxy mmäbøjcä, coo ja'a Jesucristo hajxy mmøødhity tu'ugmädia'agy.

27 Y coo hajxy jaduhñ mmøødhídat, coo hajxy jaduhñ mnäbétät, mäniä Dios hajxy xyhuunghádät, nebiä Dios ja'a Jesucristo yHuunghatiän.

28 Tu'ugmädia'agy hajxy mhijnä møødá Jesucristo. Cabä Dios tiehm yajtø y pø mjudíos, pø caj, pø mmäyøø, pø caj mmäyøøjä. Cabä Dios yajtø y ja'a haagä tehñ ya'adiøjcpä, ja'a haagä tehñ tio'oxiøjcpä. Jøjwa'achä yajtø y. Jaduhñä Dios hajxy xyhijxnä nebiä yhamdsoo huungän.

29 Y coo ja'a Jesucristo hajxy mmøødhity tu'ugmädia'agy, paadiä Dios hajxy xyhuunghaty, nebiä Dios ja'a Abraham jecy yhuunghajtiän.

4

1-2 Jaduhñds je'e, coo jáya'ayhajxy hánajty naje'e yho'ogaannä, mänit hajxy miäna'añ coo yhuunghajxy yhíxäxät ja'a miägu'ughajpähajxy. Coo ja'a yhuunghajxy miöjjóñät, mänit nádeedy hajxy miämähmóñät. Pero coo hajxy hánajty miuutsnä, jaduhñ hajxy yhane'emyii nebiä moonsän, høxtä coonä hajxy hánajty tøø miöjjóñä.

3 Y højtshájtäm, coo ja'a Jesús hajxy hánajty nga'a hixyhájtämnä, jaduhñ mäwínäts hajxy hijty nhíjtäm nebiä hane'emybiän coo ja'a jecyquihdujt hajxy hijty tehngajnä nbanócxäm.

4 Pero coo yhabaaty, mänitä Dios ja'a yHuung quiejxy; Jesucristo je'e. Hoy je'e miñguia'ay neby højtshájtämän yaa judíosnaaxooty, maa ja'a jecyquihdujt tiuñän.

5 Paadiä Jesús quiejxä neby højts jaduhñ xñähho'túutämät, je'eguiøxpä coo højts ja'a jecyquihdujt hijty nbanócxäm tehngajnä. Coo hajxy xñähho'túutäm, xyhuunghájtäm ja'a Dios hajxy jaduhñ.

6-7 Xmio'owáanäm hajxy jaduhñ nebiaty ñägapxy. Cab hajxy nhíjtänä nebiä hane'emybiän. Coo ja'a Dios hajxy xyhuunghájtäm, paadiä yhEspíritu hajxy xya-jnäguéjxäm. Paady hajxy je'e nnämäayyäm: "Teedy" hamuumdu'joot.

8 Jue'e mijts hijty mwi'i wyiingudsähgøøby, quepychech naaxpoch. Cahnä ja'a Dios hajxy hánajty mhixyhatyñä.

9 Pero coo ja'a Dios hajxy tøø xwyiimbiy, paady hajxy mhixyhajnä. Cab jaduhñ yhahixø'øy coo ja'a jecyquihdujt hajxy jadähooc mbadu'ubójcombät. Cab hajxy nyaghanéhmänät maa ja'a jecyquihdujtän.

10 Pero mijts, je'enä xøø hajxy mwi'i yagjadyii. Jaduhñ tyijy hajxy mnähwa'adsa'añ.

11 Nej, xiøøbøch mijts ja'a Diosmädia'agy tøø nja yajwiinhixø'øy. Pø tøyhajt jaduhñ, njaanč tehñ yagjuøøbiøch jaduhñ.

12-14 Hermanodøjc, nnämä'awäbøch mijts cooçh mijts xpiahíxät. Najtshixø'øw ja'a jecyquihdujt hajxy nébiøch tøø nnajtshixø'øyän. Mänájøch mijtsä Diosmädia'agy nyajwiingapxøøçhooñän, hóyhøch mijts xmiägu'ugpøjcy. Jaduhñhøch hajxy xjiøjppøgøøyy nebiä Diosquexiän, nebiä Jesucristän. Cábøch hajxy xxiøøghajty, hóyhøchä pa'am hánajty nja møødä, hóyhøch mijts hoxiøøghajnä hánajty xjia hixy. Cooçhä pa'am hánajty nmøødä, páadyhøch jim nmähmøøyy maa mijtsän.

15 Pero mijts, cab hajxy jootcuyc mhijnä. Pänebiä hajxy tøø mjaty. Mänájøch jim nhitiän maa mijtsän, høøhcøxpä mijts hánajty mduñ hoy miädyii mayhajtä. Xmióobiøch mijts hánajty hoy tyijjä.

16 Páadyhøch mijtsäda'a xquia'a mägu'ughadaannä cooçh mijts tøø nhawáanäm ja'a tøyhajt.

17 Y häna'c-hajxy høhndaacpä, paady mijts hajxy xmiägu'ughada'añ nébiøch mijts jaduhñ xquia'a panócxnät. Pero caj mijts hajxy hamuumdu'joot xmiägu'ughada'añ. Xñä'ä wiinhøønaamb mijts hajxy jaduhñ.

18 Hoy hit jaduhñ coo mijts pøn hamuumdu'joot xmiägu'ughädät hoy miänaajä, hóyhøch hánajty jim nga'a ja hity maa mijtsän.

19 Mägu'ughajpä, jaanč tehñ jootmayhájpøch jadähooc ja'a mijtsøxpä. Jiaanč tehñ chójpjøch njoot coo mijts ja'a Jesucristo mmøødhídät tu'ugmädia'agy.

20 Cu nnócyhøch jim maa mijtsän. Cu nmøødmädiáacyhøch mijts jaduhñ yajxón. Cooçh mijts hoy nga'a møødmädia'aga'añ hajäya'ayhaam, cábøch nnajuø'øy nébiøch ndaj nmáyät ja'a mijtsøxpä.

21 Hoorä, pø chojpiä mjoothajxy tehngajnä coo ja'a jecyquihdujt hajxy mbanøcxa'añ, huuc mädown hajxy neby jiiby myiñän maa ja'a jecyquihdujtän.

22-23 Metscä Abraham yhuung hánajty. Tu'ug hánajty xiøhajty Isaac. Tøø Dios Abraham hánajty jaduhñ yajwiinwaanø'øy coo ja'a Isaac hánajty myina'añ quia'awa'añ. Abraham

yhamdsoo huunghajxy je'eduhñ mөөдä tio'oxiøjc. Jatu'ugpä, Ismael je'e xiøhajpä. Jaduhyyä je'e ñä'ä müññ ñä'ä cahy. Moonsä je'e tiajhajt.

²⁴⁻²⁵ Hädaa mädia'agy, nebiä hijxtahñdän hädaa jaduñ. Ja'a Ismael tiaj, ja'a Agarhajpä, moonsähajp hänajty je'e. Cabä yhamdsoo cuhdujt hänajty yaghity. Hoorä, coo ja'a Dios ja'a cuhdujt yejcy maa ja'a tun hänajty xiøhatiän Sinaí, jim Arabianaaxooty, jaduñ mäwíinäts hajxy nhíjtäm nebiä Agar hänajty mioonsähatiän. Cabä nhamdsoo cuhdujt hajxy nyaghíjtäm. Mejtstu'u ja'a tun hänajty xiøhaty. Xøhajp hänajty Sinaí, mөөдä hänajty xiøhaty Agar. Ja'a cajpt jaduñ xøhajpä Jerusalén, ja'a hädaa yaabä naaxwiimbä, jaduñ mäwíinäts je'e nebiä Agarän. Hix, cabä Jerusalénpä-jäya'ay yhamdsoo cuhdujt hajxy yaghity.

²⁶ Jaduhñ ja'a cajpt jim xiøhajpä tsajpootyp Jerusalén. Jim hajxy nxøønájxäm. Cabä jecyquihdujt jim tíuunnä nebiä Dios yejquiän Sinaí. Jemyguiuhdújtäts jim tíuunnäp.

²⁷ Jaduhñ jiiby myiñ cujaay maa ja'a Diosmädia'aguiän:

Huuc xoonða'ag, hoyyä huung mga'a ja paadyñä, Maas may miiçh huung mbaada'añ. Cabä mmoonsä may jiaty paada'añ.

²⁸ Hoorä, hermanodøjc, tөө ja'a Dios hajxy xyajnähdíjjäm coo hajxy xyhuung-hadaañäm, nebiä Isaac yajnähdíjjän.

²⁹ Dios ja'a yhEspíritu ja'a Isaac yajmägunuuxøøyy coo myínät. Cabä Ismael yajmädsøjcy coo ja'a Abraham ja'a Isaac yhuunghádät. Jaduhñ mäwíinäts højtsä jäya'ayhajxy xquia'a yajmädsójcäm coo ja'a Dios hajxy xyhuunghájtämät.

³⁰ Jaduhñ jiiby myiimbä cujaay maa ja'a Diosmädia'aguiän: “Høxquejxpädsøm yø'ø to'oxymoonsä mөөдä yhuung.” Cabä moonsä yhuung ñä'ägädä puhmo'owa'añii ñädeedy. Pero yhamdsoo to'oxiøjc yhuung, je'eds jaduñ mio'owaamby.

³¹ Hermanodøjc, coo ja'a Diosmädia'agy hajxy hamuumdu'joot ndsójcäm, jaduñ mäwíinäts hajxy nhíjtäm nebiä Isaac jecy yhijtän. Pero ja'a hajxy ca'a tsojpä, jaduñ mäwíinäts hajxy je'e nebiä Ismaelän, ja'a moonsä yhuung.

5

¹ Coo ja'a Dioscuhdujt hajxy nyaghíjtäm, mädyii ja'a Moisés jecy miähooyy, jaduñ mäwíinäts hajxy hijty nhíjtäm neby hajxy hadsip yajtuñíjjän. Coo ja'a Jesucristo quiädaacy, mänit hajxy xñámáayyäm coo ja'a jecyquihdujt hajxy nga'a möjpädáacänät. Xyhawáañäm hajxy jaduñ neby hajxy nnähwáatsämät. Hamuumdu'jootä Jesucristo miädia'agy hajxy mbanócxät. Cabä Moisés jecyquihdujt hajxy mbadu'ubójcät jadähooc.

² Huuc hamädoowhit hajxy. Coo hajxy nyajcircuncidarhíjtämät cooc tyijy hajxy jaduñ nnähwa'adsáañäm, xiøøbä ja'a Jesucristo hajxy häxøpy tөө xñä'ä nähho'túutäm. Høøch jaduñ mänaamb, Pablo. Diosquéxyhøch høøch.

³ Jaduhñhøch jadähooc nmänáangombä, pønjaty mänaamb coo hajxy yajcircuncidarhádät, tsipcøxp hajxy quiudiúnät nebiatiä Moisés jecyquihdujt yajnähdíjy coo hajxy quiudiúnät.

⁴ Jii häna'c-hajxy näje'e miäna'añ: “Páadyhøch nnähwa'adsa'añ coochä Moisés jecyquihdujt hoy ngudiuunä.” Pero cab jaduñ tíøyyä coo hajxy ñähwa'adsa'añ. Hix, cabä Jesucristo hajxy miøødhijnä tu'ugmädia'agy.

⁵ Pero nmäbójcäm højts coo hajxy nnähwa'adsáañäm ja'a Jesucristocøxpä. Ja'a Diosh-espíritu hajxy xpiuhbedáañäm.

⁶ Coo ja'a Jesucristo hajxy tu'ugmädia'agy nmøødhíjtämät, cab jaduñ ñejpiä pø tөө hajxy nyajcircuncidarhíjtäm, o pø caj. Je'eduhñ tsoobaatp coo ja'a Jesucristo miädia'agy hajxy nmäbójcämät y coo hajxy hamiñ häxøpy nniçhójcämät nebiä Jesucristo hajxy xchójcäm.

⁷ Hoy ja'a Diosmädia'agy hajxy hijty mbanøcxy. Pätiidä hajxy coo tøø mnajtshixø'oy. Pábøndä hajxy tøø xwyiinhøøñ.

⁸ Ca'a Dyiosä hajxy xyajnajtshixøøyy. Jaaya'ay hajxy xyajnähdíjjäm coo ja'a miädia'agy hajxy nbanøcxämät.

⁹ Jaduhnä jäya'ayhajxy miäna'añ: "Coo tsajcaagyooy weeñtiä nbädáacämät, cøxiä harina yajtägø'oyii." Jaduhn mäwíinäts højtshájtäm coo häna'c høhnda'agymiädia'agy hajxy xyajnähxixøøyyämät; nägøxiä hajxy jaduhn nmá'tämät.

¹⁰ Nbädáacypiøčhä njuøhñdy ja'a Dioscøxpä coo wiingmädia'agy hajxy mga'a mábógät. Dios jaduhn yajcumädowaamb pøn mijts høhnda'agymiädia'agy xyajnähxixøøby.

¹¹ Tehngájnočhä Diosmädia'agy nyajwa'xy coo ja'a jäya'ayhajxy ween miäbøcy; je'eguiøxpä coo ja'a Jesucristo hajxy tøø xñähho'túutäm cruzcøxp. Páadyhøčhä jäya'ayhajxy xmiähanhaty. Näje'e hajxy miäna'añ cooc tyijy høøčhä mädia'agy nyajwa'xy coo hajxy ween ñiseñapáda'agyii. Pero cab jaduhn ñä'ä tøyyä. Coočhä mädia'agy häxøpy nyajwa'xy coo hajxy yajcircuncidarhádät, cábočhä jäya'ayhajxy häxøpy xmiähanhaty.

¹² Yø'ø häna'c mijts xjia wi'i ñämaabiä coo hajxy myajcircuncidarhádät, ween hajxy jaduhn xpiuhwaatsnä.

¹³ Tøø mijts ja'a Dios xyajnähdijy coo ja'a Moisés jiecycuiuhdujt hajxy mnajtshixøøyyät. Pero cabä Dios jaduhn miäna'añ coo hajxy cøxypänejpä mjäya'ayhádät. Jaduhn miäna'añ coo hajxy yajxon mničhogøøjtät, coo hajxy yajxon mnibihbedøøjtät.

¹⁴ Jaduhnä Dios jiecycuiuhdujt miäna'añ coo hajxy hoy piønä mdsoc mba'häyówät hädaa yaabä naaxwiin nebiä mhamdsoo ni'x nebiä mhamdsoo copc hajxy mdsocuiän.

¹⁵ Cab jaduhn yhooyä coo hajxy mnimiähanhadøøjtät tu'ugpä tsajtøjc, jaduhn hajxy mga'a niyajtägoyyøøjtät.

¹⁶ Hoy hajxy mwädítät ja'a Diosmäjaagøxpä. Cabä mhamdsoo wiinmahñdy hajxy myaghíjnät, hoyyä mjoothajxy hánajty tii jia tsocy.

¹⁷ Ja'a Diosmäjaa, cabä tu'ugjuøhñdy yhity møødä haxøøgcuhdujt. Coo hánajty haxøøg mjatcø'øwa'añ, Dios xyhadujp mga'a jatcø'oy jaduhn cøxypänejpä. Hoorä, coo ja'a mjoot hánajty chocy coo hánajty hoy mwädita'añ, ja'a mhaxøøgwiinmahñdy jaduhn xyhadujp.

¹⁸ Pø chojpiä mjoot jaduhn coo ja'a Diosmäjaagøxpä mwädítät, cabä Moisés jiecycuiuhdujt mbanøcxänät.

¹⁹ Madiu'u ja'a jäya'ayhajxy yhaxøøgcuhdujthaty: jabiøcy hajxy ñimiødtsäna'ayii; cøxypänejpä hajxy jiäya'ayhaty; haxøøg hajxy wiädity, hoy hajxy jia to'oxiøjcmøødä;

²⁰ wyiingudsähgøøbiä quepychech naaxpoch hajxy; mähijxp mábäxujp hajxy; nimiädsiphájtäp hajxy; yhadsojpy hajxy mädyiijatiä miägu'ughajpähajxy miøød; paquiä hajxy ñimiäjootma'adyii; wiinduc-ho'p hajxy; nibiuhyohdiúutäp hajxy; cab hajxy tiu'ugmädia'aguiä;

²¹ hadsojt hajxy wyi'i miøød; jäya'ay-yagho'p hajxy; haxøøghuucp hajxy, haxøøgjøø'xp hajxy; madiu'u hajxy jaduhn jiatcø'oy. Tøøds mijts nja yagjahmiech, chaads jadähooc nhawáanäm: pøn haxøøgcuhdujt møød, cab jim ñøcxa'añ tsajpootyp.

²² Pero coo ja'a Diosmäjaagøxpä hajxy nwädíjtämät, Dios hajxy jaduhn xpiuhbéjtäm coo ja'a jäya'ay hajxy hoy nmägu'ughájtämät, coo hajxy nxoondáacämät, coo hajxy jootcujc nhíjtämät, coo hajxy nmee'xtújcämät, coo ja'a nmäjøøn coo ja'a nmädøjc hajxy yajxon nmägu'ughájtämät, coo ja'a hojioot hajxy nmøødhájtämät, coo hajxy nga'a høhndáacämät,

²³ coo hajxy mee'xxieemy nhíjtämät, coo hajxy jootxeemy nhíjtämät. Coo hajxy jaduhn njäya'ayhájtämät, cab hajxy pøn waamb xñämäayyämät.

²⁴ Pønä Jesucristo miädia'agy panøcxäp hamuumdu'joot, tøø ja'a yhaxøøgcuhdujt yhøxhixy, y cab jaduhn jahmiejtsnä.

²⁵ Pø mänáanäm hajxy jaduhn coo ja'a Diosmäjaagøxpä hajxy nhíjtäm, tsøg hajxy hamuumdu'joot pawädíjtäm.

26 Cab hajxy nyajcumáayyämät; cab hajxy nniyagjootmä'tämät hamiñ haxøpy; cab hajxy cøxiä wiinä nniyhadsójcämät.

6

1 Hermanodøjc, coo pøn tiu'udägóyyät, mee'xxieemy hajxy mmägäp mhané'emät, nej mijtsä Diosmäjaa mmøødän, weenä yhaxøgpä yhøxhijxnä. Pero mnigwieendähadøjöp hajxy coo mijts jaduhñ mnä'a tu'udägóobiät.

2 Nibiuhbedøø hajxy neby hajxy jaduhñ mmäjädá'agät, neby hajxy jaduhñ mga'a tu'udägóyyät. Jaduhñsä Jesucristo miädia'agy hajxy mgudiúuñät.

3 Pøn yajcumayaamb je'eguiøxpä cooc tyijy miøjjä, caj ñä'a tøyyä coo miøjjä. Nä'a niwyiinhøñp jaduhñ.

4 Cøjwiinduum hajxy mniyhixøjät pø hoy hajxy tøø mgudiñ. Y pø tøø hajxy hoy mgudiñ, mänit hajxy mxoondá'agät. Pø tøø ja'a mmägu'ughajpä hajxy mbexy, cab hajxy nøcxy mniguiumayii.

5 Cøjwiinduum hajxy mniyajcopcø'øwøjät pø hoy hajxy mgudiñ.

6 Pøn jaduhñ yajnahixøyyäp ja'a Diosmädia'agy, tsipcøxpä ofrenda hajxy yégät, mio'owøjät ja'a yajnahixøbiä.

7 Ca'a hajxy myajwiinhøñ; ñajuøbiä Dios neby hajxy nwiinmahñdyhajtäm. Nej tøø mjäya'ayhatiän, høxtä jaduhñ mguhbédät.

8 Pønä Dioshespíritu panøcxp, je'e cøjxta'axiøø jugyhadaamb nebiä Dios jiugyhatiän; pero pøn yhamdsoo cuhdujt yajtuumb, cab jaduhñ jiugyhada'añ nebiä Dios jiugyhatiän.

9 Tsögä njoot hajxy møc pädáacäm; coo hajxy tehngajnä hoy nwädíjtämät, mänit hajxy jim nnøcxämät tsajpootyp coo yhabáatnät.

10 Hoy miänaajä ja'a jäya'ay hajxy mbuhbédät nägøxiä. Tsipcøxpäsä hermanodøjc hajxy mnä'ägädä puhbédät.

11 Hamdsóojøch hädaa letra nhädiñ, paady miøjjatiä.

12 Pønjaty mijts xjia wi'i ñämaaby coo hajxy myajcircuncidarhädät, paady hajxy jaduhñ miäna'añ coo hajxy wyi'i yajcumaya'añ cu'ughagujc. Hix, tsähgøøby hajxy jaduhñ coo hajxy miädsibø'øwøjät ja'a homiädia'agyquiøxpä, coo ja'a Jesucristo hajxy tøø xñähho'túutäm cruzcøxp.

13 Hoy hajxy näje'e tøø jia yajcircuncidarhaty, cabä Moisés jicyquiuhdujt hajxy yajtuunä. Paady mijts hajxy xjia wi'i ñäma'ay coo hajxy myajcircuncidarhájpat, yajcumayaamb hajxy jaduhñ ja'a mijtsøxpä.

14 Pero høøch, cábøch nmäna'añ coo mädyii miøjjä jiaančhä. Jagóoyyøch nmäna'añ coo miøjjä jiaančhä coöchä Jesucristo tøø xñähho'tu'udy cruzcøxp. Cábøchä njoot yaa nbädaacnä hädaa yaabä naaxwiin. Hoyyä jäya'ay hajxy waambaty jia mäná'anät, cábøch tii nmøjpädaacnä. Cábøch tii hadsojt nmøødän hädaa yaabä naaxwiin.

15 Cab jaduhñ ñeipiä pø tøø myajcircuncidarhaty o pø caj. Je'eduhñ tsoobáatnöp coo ja'a Dios hajxy tøø xpiädáacäm hawiinjemy.

16 Pønä Diosmädia'agy hoy cudiuumb, je'eds hoyhajt weenhajt mo'owáanöp.

17 Páadyhøch chaä nnähxäguuöch nguhxäguuöchä coöchä Jesucristo miädia'agy tøø nmädiaacä. Y coöch jaduhñ tøø ngudiñ, páadyhøchä cuhdujt nmøødän. Páadyhøch hajxy tii xquia'a yajnamáañät.

18 Hermanodøjc, weenä Jesucristo hajxy xcwieendähaty. Amén.

Efesios

¹ Høøch xøhajt Pablo. Høøch hädaa nocy njahby. Ja'a Dios jaduhñ mänaañ cooçhä Jesucristo xwyiinguéxät. Mijts hädaa nocy nyajnäjaayøøby pønhatiä Diosmädia'agy mäbøjp jim maa ja'a cajpt jaduhñ xiøhatiän Efeso, pønhatiä Jesucristo miädia'agy jim hoy yajtúunäp.

² Weenä Dios hajxy xmio'oy ja'a hoyhajt ja'a weenhajt, møødä Jesucristo. Ja'a Dios hajxy nDeedyhájtäm. Ja'a Jesucristo hajxy nWiindsønähájtäm.

³ Tsögä Dios hajxy wiingudsähgøøyyäm. Ja'a Jesucristo, Dyioshajpiä Dios je'eduhmbä; y jaduhñ je'e Tieedyhajpä. Coö ja'a Jesucristo hajxy xmiøødhájtäm tu'ugmädia'agy, paadiä Dios tsajpootypä ja'a mayhajt madiu'u tiuñ ja'a højtscøxphájtäm.

⁴ Cahnä hädaa yaabä naaxwiin hänajty chohnda'agy, tøøyyämä Dios hajxy hänajty xwyiimbíiwäm coö ja'a Jesucristo hajxy xmiøødhájtämät tu'ugmädia'agy. Jaaná jaduhñ hajxy xwyiimbíiwämbä coö hajxy hoy njäya'ayhájtämät, coö hajxy nga'a cädiéhyämät, jaduhñ hajxy wa'ads hoy nhájtämät maa ja'a Dioswiinduumän.

⁵ Coö ja'a Dios hajxy xchójcäm, paadiä Jesucristo yaa quiejxä hädaa yaabä naaxwiin ja'a højtscøxphájtäm. Paadiä Dios ja'a Jesucristo yaa quiejxy coö ja'a Dios hänajty tøø wyiinmay coö hajxy xyhuunghadaañäm. Hamdsoojotä Dios jaduhñ miänaañ coö hajxy xyhuunghájtämät.

⁶ Tsøcxä Dios hajxy wiingudsähgøøyyäm coö hajxy xjiaançh tehñ chójcäm, coö ja'a Jesucristo yaa quiejxä maa højtshájtäm. Jaduhñä Dios ja'a mayhajt møj tiuñ ja'a højtscøxphájtäm. Paady hajxy xchójcäm coö ja'a Jesucristo hajxy xmiøødhájtäm tu'ugmädia'agy. Hix, jaançh tehñ chójcäbä Jesucristo ja'a Tiéediäm.

⁷ Coö ja'a Dios hajxy jaduhñ xjiaançh tehñ chójcäm, paadiä Jesucristo hajxy yaa hoy tøø xñähho'túutäm, jaduhñä nbojpä ngädieey hajxy xyajnahwaats xyajcuhwáatsäm. Jaduhñä Dios hajxy xmié'e'xäm.

⁸ Coö hajxy jaduhñ xjiaançh tehñ chójcäm, paady hajxy hoy tøø xyajwiinjuøøyyäm nebiaty jaduhñ tøø wyiinmay ja'a højtscøxpä.

⁹ Tøø ja'a wyiinmahñdy hajxy xyhawáañäm ja'a hijty jaduhñ quiuyu'chpä. Hamdsoojotä Dios jaduhñ tøø wyiinmahñdyhaty. Chojpiä jioot hänajty jaduhñ coö ja'a mayhajt hänajty tiuna'añ ja'a højtscøxphájtäm.

¹⁰ Jaduhñä Dios tøø wyiinmahñdyhaty coö ja'a Jesucristo Wyiindsønähadøøjät cøxiä tijaty jim tsajpootyp, møødä tijaty yaa hädaa yaabä naaxwiin. Coö ja'a Dios jaduhñ yaghabáadät, mänit hänajty tiøjiada'añ coö ja'a Jesucristo jaduhñ Wyiindsønähada'añii.

¹¹ Ja'a Dios, yajtøjiajpy je'eduhñ nebiaty je'e wyiinmay. Hoorä, jéquiänä Dios wyiinmaayy coö højts ja'a yHuung xyajnahwa'ads xyajcuhwá'adsät, højts judíospä, coö højts jaduhñ nmøødhídät tu'ugmädia'agy.

¹² Jéquiän højts ja'a nhap ja'a ndeedy ja'a Dios ja'a miädia'agy hajxy tiägøøyyä mäbøjcäbä coö højts xyajnahwa'ads xyajcuhwá'adsät. Hoorä, paadiä Dios jaduhñ jecy wyiinmaayy coö højts ja'a yHuung xyajnahwa'ads xyajcuhwá'adsät, jaduhñä jäya'ayä Dios hajxy nägøxiä wyiingudsähgøøwät coö jiaançh tehñ miøjjä coö jiaançh tehñ jiaançhä.

¹³ Y mijts ja'a ca'a judíospä, jaaná jaduhñä Dios tøø wyiinmaabiä coö mijts ja'a yHuung xyajnahwaats xyajcuhwáatspä. Y jaduhñ hajxy tøø mmäbøjpä coö ja'a yHuung hajxy tøø xyajnahwaats tøø xyajcuhwaatspä. Jaançh tehñ tiømiädiaacpä Dios jaduhñ. Coö hajxy jaduhñ nmäbøjcäm, paadiä Dios ja'a yhEspíritu yaa tøø quiejxy maa højtshájtäm, jaduhñä tøyhajt hajxy nmøødhájtäm coö ja'a Jesucristo hajxy tøø xjiaançh yajnahwaats tøø xjiaançh yajcuhwáatsäm. Hix, jéquiänä Dios jaduhñ miänaañ cooc ja'a yhEspíritu hänajty quixa'añ maa ja'a jäya'ayhajiän, ja'a miädia'agy hajxy hänajty mäbøjcäbä

coo hajxy hānajtj yajnāhwa'ads yajcuhwa'adsa'añii. Jaduhñä Dios ja'a tøyhajt hajxy xmiöoyyäm coo hajxy hoy miānaajä xcwieendāhadāñäm.

14 Y coo ja'a Dios ja'a yhEspíritu tøø jiaančh quejxnä maa højtshajtäm, jaduhñä tøyhajt hajxy nmøødhajtämbä coo hajxy jim xyajnøcxāñäm maa ja'a wyiinduumän. Jaduhñä DioshEspíritu hajxy xmiøødhidāñäm høxtä coonä yhabáadät coo ja'a Dios hajxy jim xyajnøcxämät maa ja'a wyiinduumän, y coo ja'a Dios ja'a mayhajt jaduhñä tiuñ ja'a højtscøxphajtäm, páadiäts hajxy nwiingudsähgøøyyämät coo jiaančh tehñ miøjjä coo jiaančh tehñ jiaančh.

15 Nmädöyhøch jaduhñä coo ja'a Jesús ja'a miädia'agy hajxy tøø mmäbøjcä, ja'a hajxy nWiindsønñhajtämbä. Jaduhñhøch nmädöyyäbä coo hajxy mdsocy mba'häyoy pønñatiä Diosmädia'agy panøcxp.

16 Cooch jaduhñä nmädöyyä, páadyhøch Dios Dioscujú'uyäp nmo'oy ja'a mijscøxpä hoy miānaajä, cooch hānajtj nDiospa'ya'axy ja'a mijscøxpä.

17 Nmānuu'xtāacypiøchä Dios coo ja'a wyiinmahñdy hajxy jaduhñä ween xmiø'oy ja'a yhEspirituhaam, y coo ja'a wyiinmahñdy hajxy jaduhñä ween xyajwiinjuø'oy. Dioshajtäbä Dios ja'a Jesucristäm, ja'a hajxy nWiindsønñhajtämbä. NDioshajtämä Dios hajxy. Møj jaančh je'e. Hawiinmats hajxy jaduhñä nwiingudsähgøøyyämät.

18 Jaduhñhøchä Dios nmānuu'xtaäcpä coo hajxy ween xyajwiinjuø'oy coo je'e tøø wyiinmay coo hajxy jim xyajnøcxāñäm maa ja'a wyiinduumän. Paady hajxy jim xyajnøcxāñäm coo hajxy xyhuunghajtäm. Jaančh tehñ yhoy jaančh tehñ yajxon hajxy jim nhidāñäm.

19 Weenä Dios hajxy xyajwiinjuøøbiä coo møcmäjaa jiaančh tehñ miøødä, coo ja'a miäjaahaam hajxy xpiuhbajtäm coo ja'a miädia'agy hajxy nmäbøjcäm coo tiømiädia'agy.

20 Jaanä miäjaahaamä yHuung jaduhñä yagjujyipiøjtägajtspä. Mānit jim yajnøcxy maa ja'a wyiinduumän. Mānit ñāmaayy coo yhøxtä'agät maa ja'a quiø'ø hahooyhaampiän. Jimä Jesucristo ja'a Tieedy miøødhanehñä.

21 Ni pønä cuhdujt jaduhñä quia'a nä'ägädä møødä nebiä Jesucristo møjcuhdajt miøødän, ni jim tsajpootyp, ni hädaa yaabä naaxwiin. Ni pønä cuhdujt mānaa quia'a møødhada'añ nebiä Jesucristo møjcuhdajt miøødän.

22 Jaduhñä Jesucristo piädaacä coo cøxiä wiinä yhané'emät hoy miaajä. Jaduhñä je'e piädaacäbä coo højts nWiindsønñhajtämät coo ja'a miädia'agy hajxy nmäbøjcäm coo tiømiädia'agy.

23 Hoyyä Jesucristo cøxiä wiinä jia hane'emy hoy miaajä, coo hajxy jaduhñä nmäbøjcäm, xjiootcädäacäm hajxy jaduhñä coo hajxy xmiøødhajtämät tu'ugmädia'agy. Ni tii jaduhñä quia'a jootcädaacy neby højts xjiootcädäacäm.

2

1 Jue'e mijs hijty, cabä Dios hajxy hijty mwiingudsähgøø'oy, je'eguiøxpä coo ja'a pojpä cädieey hajxy hijty mmøødä, coo ja'a Diosmädia'agy hajxy hijty mga'a cudiuñ.

2 Jaančh tehñ yhaxøøgtuum hajxy hijty mnä'ägädä hity. Jaduhñsä jäya'ayhajxy yhity ja'a Diosmädia'agy hajxy ca'a mäbøjpä. Ja'a møjcu'ugong ja'a miädia'agy hajxy hijty mmäbøjcäp. Jaayá'ayäts møjtuungmøød tsajtcøxp. Yhanehñby jaduhñä pønñatiä Diosmädia'agy ca'a mäbøjp.

3 Jaduhñä hajxy hijty nägøxiä njatcøøyyämbä. Haxøøg hajxy hijty nwädajtäm nebiä njootä ngopc-hajxy hijty chójcäm. Paadiä Dios hajxy hijty xyajcumädowāñäm nägøxiä näguipxy møødä haxøøgjäya'ayhajxy.

4 Pero hojiootä Dios jiaančh tehñ miøød. Xjiaančh tehñ chójcäm hajxy.

5 Hoyyä Dios ja'a miädia'agy hajxy hijty nga'a ja cudiuñäm, ja'a miäjaahaamä Dios ja'a nwiinmahñdyhajxy tøø xyajtägajtsäm, nebiä miädia'agy hajxy jaduhñä hoy ngudiuñämät,

nebiä Jesucristo yagjujyppiøjcän ja'a Tieediä miäjaahaam. Coö ja'a Dios hajxy xjiaançh tehñ chójcäm, paady hajxy tøø xpiädáacäm hawa'adstuum.

⁶ Nebiä Dios ja'a Jesucristo yagjujyppiøjtägajchän, jaanä jaduhñ højts xyagjujyppiøjtägatsáanämbä. Tøø hajxy xpiädáacäm coö ja'a Jesucristo hajxy nmøødhíjtämät tu'ugmädia'agy. Y nebiä Dios ja'a Jesucristo ja'a cuhdujt miooyyän coö jim miähané'emät tsajpootyp, jaanä jaduhñ højtsä cuhdujt xmio'owáanämbä.

⁷ Paadiä Dios ja'a cuhdujt hajxy jaduhñ xmióoyyäm, jaduhñ yajcähxø'øga'añ coö hojioot jiaançh tehñ miøødä maa højtsçøxpän, coö hajxy xjiaançh tehñ chójcäm. Paadiä Jesucristo yaa quiejxä hädaa yaabä naaxwiin; paady hajxy hoy xñähho'túutäm. Jimä Dios hajxy hoy miänaajä xyaghidáanäm maa ja'a wyiinduumän.

⁸ Cab hajxy hamdsoo tøø nhawa'adspädsøømäm. Ja'a Dios hajxy tøø xpiädáacäm hawa'adstuum. Paady hajxy xyaghawa'adspädsøømäm coö hojioot jiaançh tehñ miøødä, coö hajxy nmäbøjcäm coö hojioot miøødä.

⁹ Coö ja'a nbojpa ngädieey hajxy hamdsoo tøø nga'a yajniñähwáatsäm, paady hajxy hamdsoo nga'a niguiumáayyämät, hoy hajxy tøø nja hojiäya'ayhájttäm.

¹⁰ Hix, tøø ja'a Dios ja'a nwiinmahñdyhajxy xyajtägájtäm coö ja'a Jesucristo hajxy xmiøødhíjtäm tu'ugmädia'agy. Tøø ja'a Dios ja'a mäjaa hajxy xmióoyyäm neby hajxy hoy nhíjtämät. Jéquiänä Dios jaduhñ wyiinmaayy coö hajxy jaduhñ hoy nhíjtämät.

¹¹ Hoorä, højts judíospä, yajcumaaby højts jaduhñ coö højts nyajcircuncidarhaty. Jaduhñ højts tyjy nyajcähxø'øgy coö højtsä Dios xquiu'ughaty. Coö højts jaduhñ nyajcircuncidarhaty, je'eduhñ nänøømby coö højtsä seña nbäda'agy maa højtsä nni'xcøxpän. Paady højts mijts nxøøghaty, mijts ca'a judíospä, coö hajxy mga'a yajcircuncidarhajpä. Tøyhajt jaduhñ.

¹² Hix, højts judíospä, ja'a Dios højts jecy xquiu'ughajt. Jaduhñ højtsä Dios xmiøødyajcuhdujcy coö højts hänajty xyajñähwa'ads xyajcuhwa'adsa'añ. Pero mijts ca'a judíospä, caj mijtsä Dios xñämaayy coö mijts xquiu'ughada'añ, coö mijts xyajñähwa'ads xyajcuhwa'adsa'añ. Hix, cahnä Diosmädia'agy hajxy hänajty mmädoyñä ja'a Cristocøxpä. Paady hajxy hijty mga'a najuø'oy coö mijts ja'a Dios xyajñähwa'ads xyajcuhwa'adsaambä.

¹³ Caj mijtsä Dios hijty xquiu'ughaty. Cabä Diosmädia'agy hajxy hijty mmädoyyä. Pero coö ja'a Jesucristo hajxy tøø xñähho'tu'udy, paadiä Dios hajxy xquiu'ughajnä.

¹⁴ Coö ja'a Jesucristo hajxy tøø xñähho'túutäm, jaduhñ hajxy tøø xpiädáacäm tu'ugmädia'agy nägøxiä, møød højts judíospä näguipxy møød mijts ca'a judíospä. Hamiñ haxøpy hajxy hijty nnimiädsiphájttäm. Pero tøø hajxy nnimiägaxø'cänä je'eguiøxpä coö ja'a Jesucristo hajxy tøø xñähho'túutäm.

¹⁵ Højts judíospä, mijts hijty nmøødnimiädsiphájttäp, mijts ca'a judíospä. Hix, højtsä Dios jecy xyhanehm madiu'u, ca'a myijtsä. Mänitä Moisés quiujahy nebiaty højtsä Dios xyhanehmy, y coö ja'a Jesucristo hajxy hoy xñähho'túutäm, paadiä Dios ja'a mädia'agy yaghamaadiujnä nebiä Moisés hänajty jecy tøø quiujaayän. Jaduhñä Jesucristo hajxy tøø xpiädáacäm tu'ugmädia'agy møød je'e, møød højts judíospä näguipxy møød mijts ca'a judíospä. Paady hajxy nga'a nimiädsiphájttänä hamiñ haxøpy neby hijtiän, højts judíospä møød mijts ca'a judíospä.

¹⁶ Coö ja'a Jesucristo hajxy tøø xñähho'túutäm cruzcøxp, paadiä Dios hajxy tu'ugmädia'agy xmiøødhíjtänä, møød højts judíospä näguipxy møød mijts ca'a judíospä. Cabä Dios hajxy jaduhñ nmädsiphájttänä.

¹⁷ Hoyyä Jesucristo hajxy xyhawáanäm coögä Dios ja'a jioot quia'a tsoey coö ja'a Dios hajxy nga'a mädsiphájttänät. Jaduhñägä jioot chocy coö hajxy nmøødhíjtänät tu'ugmädia'agy nägøxiä, møød højts judíospä näguipxy møød mijts ca'a judíospä.

¹⁸ Hix, coö ja'a Jesucristo hajxy nägøxiä tøø xñähho'túutäm, paadiä Dios hajxy nägøxiä nmøødhíjtänä tu'ugmädia'agy, møød højts judíospä näguipxy møød mijts ca'a judíospä. Ja'a

yhEspirituhaam hajxy jaduhñ xyajmøødhjítäm tu'ugmädia'agy nägøxiä.

¹⁹ Xquiu'ughájñäp mijtsä Dios møødä jáya'ayhajxy nägøxiä, ja'a Diosmädia'agy hajxy mábøjpä, hoy hajxy mga'a jagä judíospä. Xyhuunghájñäbä Dios hajxy jaduhñ. Cabä Dios hajxy hijty xquiu'ughaty xyhuunghaty, coo ja'a miädia'agy hajxy hijty mga'a mábøjcä.

²⁰ Coo ja'a Jesucristo hajxy hoy tøø xñähho'túutäm, mänit je'e hoy jiuypiojtägach. Mänitä Diosquexy ja'a Diosmädia'agy hajxy tiägøøyy yajwa'xpä. Mänitä Diosmädia'agy hajxy nmábøjcäm.

²¹⁻²² Paadiä Jesucristo hajxy xmiøødhjítäm tu'ugjoot tu'ugwiinmahñdy coo ja'a Diosmädia'agy hajxy näguipxy nmábøjcäm, møød højts judíospä, møød mijts ca'a judíospä. Hix, tøø ja'a Dios hajxy xyajnähwaats xyajcuhwáatsäm ja'a nbojpä ngädieyhájtäm. Ja'a yhEspirituhaam hajxy jaduhñ xyajmøødhjítäm tu'ugjoot tu'ugwiinmahñdy.

3

¹ Høøch Pablo, páadyhøch chaa ndsumyçhäna'ay cooçhä Jesucristo miädia'agy nya-jwa'xä maa mijtsän, mijts ca'a judíospä. Coo ja'a Jesucristo hajxy tøø xpiädáacäm tu'ugmädia'agy nägøxiä, páadyhøchä Dios nba'ya'axy ja'a mijtsçøxpä.

² Tøø hajxiäda'a mmädoyhaty cooçhä Dios tøø xwyiinguexy coo mijtsä Diosmädia'agy nyajwiingapxø'øwät, coo ja'a Dios ja'a hojioot miøødä ja'a mijtsçøxpä.

³ Jéquiänä Dios wyiinmaayy coo højtsä nbojpä ngädieey xyajnähwaats xyajcuhwáatsät, højts judíospä. Nnajuøøby højts hijty jaduhñ. Pero cuyu'uçhä Dios hijty yaghity coo hánajty tøø wyiinmaabiä coo mijts xyajnähwa'ads xyajcuhwa'adsaambä, mijts ca'a judíospä. Hoorä, tøøçhä Dios hädaa mädia'agy xyajwiinjuøøñä nébiøch hädaa mädia'agy weenjaty chamñ njaayän.

⁴ Coo hädaa mädia'agy hajxy mgápçät, jaduhñ hajxy mnajuø'øwa'añ cooçhä Dios ja'a mädia'agy tøø xyajwiinjuø'øy, ja'a Jesucristocøxpä, ja'a cuyu'uçhä tøø yhítiäbä.

⁵ Cab hädaa mädia'agy hijty pøn miädoyyä. Pero tøø ja'a Dios ja'a wyiinguexyhajxy yajwiinjuøøñä. Ja'a yhEspirituhaam jaduhñ yajwiinjuøøyy.

⁶ Jaduhñ hajxy nnajuøøyyäm coo ja'a Dios jecy wyiinmaayy coo ja'a Jesucristo hajxy hánajty xñähho'tu'udáañäm, coo hánajty jiuypiojtägatsa'añ. Y coo ja'a Diosmädia'agy hajxy nmábøjcäm, paadiä Jesucristo hajxy nägøxiä nmøødhjítäm tu'ugjoot tu'ugwiinmahñdy, møød højts judíospä näguipxy møød mijts ca'a judíospä. Jaduhñä Dios hajxy nägøxiä xyhuunghájtäm. Tu'ugmädia'aguiä Dios hajxy jaduhñ xyaghjítäm ja'a Jesucristocøxpä. Paadiä Dios hajxy jaduhñ xyajnähwaats xyajcuhwáatsäm coo ja'a Jesucristo hajxy hoy tøø xñähho'túutäm. Jéquiänä Dios jaduhñ wyiinmaayy.

⁷⁻⁸ Ja'a miøcmäjaaháamhøchä Dios tøø xtiuunçmo'oy cooçhä ja'a miädia'agy nyajwá'xät maa ja'a ca'a judíoshajxypän. Xtiuunçmóoyhøchä Dios jaduhñ cooçhä judíoshajxy nyajwiingapxø'øwät coo Dios ja'a mayhajt mõj may tiuna'añ ja'a højtscøxphájtäm, je'eguiøxpä coo ja'a Jesucristo hajxy hoy tøø xñähho'túutäm. Hojiootä Dios miøød, páadyhøch jaduhñ xtiuunçmooyy, hóyhøch nga'a jagä mäna'añ cooçhä nga'a tsoobaady cooçhä jaduhñ ndúnät, hóyhøch nja mäna'añ coo ja'a Dioshuunghajxy miaas tsoobáadät, coo hajxy jaduhñ tiúnät.

⁹ Jaaná jadúhñhøchä Dios tøø xtiuunçmoobiä cooçhä jáya'ayhajxy nägøxiä nyajwiinjuø'øwät coo ja'a Dios jecy wyiinmaayy coo mijtsä Jesucristo hánajty xyajnähwa'ads xyajcuhwa'adsaambä, mijts ca'a judíospä. Mänitä Dios jaduhñ wyiinmaayy mänaa cøxiä wiinä yhädiuñän. Cab hajxy xchoj yajwiinjuøøyyäm. Jecy jaduhñ yaghijty cuyu'uçhä.

¹⁰ Hoorä, coo ja'a Jesucristo hajxy nägøxiä tøø xyajnähwaats tøø xyajcuhwáatsäm, møød højts judíospä näguipxy møød mijts ca'a judíospä, coo ja'a Diosmädia'agy hajxy näguipxy nmábøjcäm coo tiømiädia'agy, jaduhñä Diosmoonsä hajxy jimñ ñajuøøñä tsajpootyp coo ja'a Dios jiaanç tehñ quiuwiinmahñdiä madiu'u. Haa ca'a, xyhíçxämä Diosmoonsä hajxy coo hajxy tu'ugmädia'agy jaduhñ nhjítänä.

11 Jaduhñä Dios ñä'ägädä wiinmaayy jequiän, jajty hädaa naaxwiin yhädiuñ. Jaduhñ jajtøjajaty coo ja'a Jesucristo hajxy hoy xñähho'túutäm, ja'a hajxy nWiindsønähjätämbä.

12 Coo ja'a Jesucristo hajxy nmøødhjätäm tu'ugmädia'agy, coo ja'a miädia'agy hajxy nmäbøjcäm, jaduhñä tøyhajt hajxy nmøødhjätäm coo ja'a cuhdujt hajxy nmøødhjätäm coo ja'a Dios hajxy nba'yáaxämät. Jaduhñä tøyhajt hajxy nmøødhjätämbä coo hajxy xmiädóowäm.

13 Mijts nmänuu'xtaacyy coo hajxy mga'a jootmayhädät, hóyhøch yaa nja tsaachpøcy. Páadyhøch chaa ndsaachpøcy coochä Diosmädia'agy nyajwa'xy maa mijtsän. Pádiäts hajxy jaduhñ mxoondá'agät.

14-16 Ja'a nWiindsønähjätäm Jesucristo, Dios je'e Tieedyhajpy. Tieedyhajpiä Dios hajxy je'ebä pønjaty jim tsänaaby tsajtcøxp møød pønjaty yaa tsänaaby hädaa yaabä naaxwiin. Coo ja'a Jesucristo hajxy tøø xpiädáacäm tu'ugmädia'agy møød højts judíospä näguipxy møød mijts ca'a judíospä, páadyhøchä Dios hamuumdu'joot nmänuu'xta'agy coo mijtsä mäjaa ween xmio'oy ja'a yhEspírituhaam, neby hajxy jaduhñä mjuøhñdyhaam mmee'xtúgät. Xpiuhbédbä Dios hajxy jaduhñ je'eguiøxpä coo je'e miøjjä jiaançhä.

17 Jaduhñhøchä Dios nmänuu'xtaacyy coo ja'a Jesucristo yhEspíritu hajxy ween mjaac møødhjätä, je'eguiøxpä coo ja'a miädia'agy hajxy mmäbøjcä. Jaduhñ hajxy hoy yajxon mníchoc mnimiee'xøøjät hoy miänaaxøøjä.

18-19 Y jaduhñ hajxy mwiinjuøøbiät coo ja'a Jesucristo hajxy xjiaançh tehñ chójcäm møj may. Hanaxiä hajxy jaduhñ xjiaançh tehñ chójcäm. Cab hajxy ca'xy nwiinjuøøyyäm nebiaty hajxy jaduhñ xjia tsójcäm. Cab hajxy pedyii nwiinjuøøyyäm. Coo hajxy hoy nwiinjuøøyyämät, hoyyä nwiinmahñdyhajxy jiadáañäm nebiä Dios ja'a wyi-inmahñdiän.

20 Jaançh tehñ miäjaamøødá Dios. Ja'a miäjaahaamá nwiinmahñdyhajxy xyajtägájsäm. Jaaná miäjaahaamá mayhajt møj may tiuumbä ja'a højtscøxphjätäm. Høxtä cab hajxy hoy nwiinjuøøwáañäm nebiatiä mayhajt jaduhñ tiuunñ. Møj mayyä mayhajt jaduhñ tiuunñ, hoy hajxy nga'a jagä mäyujwáañäm.

21 Tsøgä Dios hajxy hoy miänaajä wiingudsähgøøyyäm, coo ja'a miädia'agy hajxy nmäbøjcäm, je'eguiøxpä coo ja'a Jesucristo hajxy tøø xñähho'túutäm. Tøyhajt jaduhñ.

4

1 Coochä Jesucristocøxpä nduñ, páadyhøch chaa ndsumyçhäna'ay. Coo mijtsä Dios tøø xyajnähdiy coo hajxy hoy mwädítät, paady hajxy jaduhñ mgudiúnät.

2 Cab hajxy myajcumáyät. Mee'xxieemy hajxy mhídät. Mmee'xtúgäp hajxy jaduhñ. Hamiñ haxøpy hajxy mníchoc mnimiee'xøøjät.

3 Naxy hajxy tu'ugcopc tu'ugwiinmahñdy mdehm yhídät. Ja'a Dioshespíritu hajxy jaduhñ xyaghídäp tu'ugmädia'agy.

4 Tu'ugmuquiä Jesucristo miädia'agy hajxy nbanøcxäm, møød højts judíospä näguipxy møød mijts ca'a judíospä. Tu'ugmuquiä Dioshespíritu hajxy nmøødhjätäm. Nägøxiä Dios hajxy xyajnähdíjäm coo hajxy jim xyajnøcxáañäm maa ja'a wyiinduumän. Tu'ugmucy hajxy jaduhñ njøbhjxäm.

5 Tu'ugmuquiä Jesucristo hajxy nWiindsønähjätäm. Tu'ugmuquiä miädia'agy hajxy nmäbøjcäm coo tiømiädia'agy. Ja'a Jesucristocøxpä hajxy nägøxiä nnäbéjtäm.

6 Tu'ugmuquiä Dios hajxy nDeedyhjäjtäm nägøxiä. Jaaya'ay hajxy xyhanéhäm nägøxiä. Ja'a højtscøxphjätäm jaaya'ayä mayhajt tiuunñ nägøxiä. Jaaya'ay hajxy hoy xmiøødhjätäm nägøxiä.

7 Cøjhawiingatiä Jesucristo hajxy tøø xyajnähdíjäm nebiaty hajxy ndúunämät.

8 Jaduhñä Diosmädia'agy miäna'añ:

Coo jim ñøcxy tsajpootyp, tsumiä miädsip yajnøcxy, ja'a hajxy hñajty tøø quia'a mäjädá'aguiäbä.

Mänitä jiamiøød madiu'u miooyy cøxiä wiinä.

9-10 Coo jaduhñ miäna'añ coo ja'a Jesucristo ñøcxy tsajpootyp, jaduhñ miäna'ana'añ coo hñajty yaa tøø yhoy hädaa yaabä naaxwiin. Jim hñajty tøø yhuuc tsohndaacpä tsajpootyp. Y coo jim ñøcxtägajch Dioswiinduum, jim møj jaanč yhiñä. Jim jaduhñ yhanehmñä tsajpootyp møød hädaa yaabä naaxwiin.

11 Ja'a Jesucristo højts xpiädaac coo højts madiu'u ndúnät jaaya'aguiøxpä. Näje'e højts xyajñähdiyy coo højts ndúnät apóstol. Je'ečh jaduhñ nnänøømby coo højtsä Jesucristo xquiejxtsohñ Diosmädia'agy-yajwa'xpä wiinduhmyhagajpt. Näje'e hajxy yajñähdiñjäbä coo ja'a Diosmädia'agy hajxy jiaac yajwá'xät. Näje'e hajxy yajñähdiñjäbä coo ja'a Diosmädia'agy hajxy yajwiingapxó'øwät. Näje'e hajxy yajñähdiñjäbä coo ja'a Diosmädia'agy hajxy yajñähixó'øwät. Näje'e hajxy yajñähdiñjäbä coo hajxy quiopc-hädät maa ja'a hermanodøjc-hajxy yhamugø'øyan Dioswiingudsähgøøbiä.

12 Paady hajxy jaduhñ tiuñ, jaduhñä Diosmädia'agy hajxy maas hoy quiudiúnät coo ja'a Diosmädia'agy hajxy miäbøcy. Jaanä jaduhñ hajxy tiuumbät ja'a Dioscøxpä. Jaduhñ hajxy maas hoy wiädítät nägøxiä coo ja'a Jesucristo hajxy pianøcxy.

13 Jaduhñä Dios ja'a miädia'agy hajxy tu'ugmucy hoy nmäbøjcämät nägøxiä coo tiømiädia'agy ja'a Jesucristocøxpä. Y jaduhñä Jesucristo hajxy hoy nmøødhjätämät tu'ugmädia'agy, ja'a Dioshuung. Jaduhñä Diosmädia'agy hajxy maas hoy nwiinjuøyyämät. Jaduhñ hajxy maas hoy nyajtúunämät. Mänit hajxy hoy nwiinmäyyämät nebiä Jesucristo wyiinmayyän. Y jaduhñ hajxy hoy nwädjätämät nebiä Jesucristo hoy wiäditiän.

14 Pønjetiä Diosmädia'agy hoy ca'a wiinjuøøbyñä, jaanč tehñ piaquiä hajxy yajwiinhøøñ. Hoy tyii mädia'aguiä hajxy miäbøga'añ. Hix, ja'a häna'c-hajxy mäwiinhøømbä, jiaač tehñ jiajpy hajxy mäwiinhøøñ. Jaanč tehñ piaquiä hajxy jaduhñ xwyiinhøøñät. Pero højtshjätäm, cab højts jaduhñ nyajwiinhøøñämät.

15 Pero, tsøg hajxy tøguiäpxäm, tsøg hajxy tømiädiäcäm. Tsøg hajxy tsójcäm, tsøg hajxy méé'xäm pønjaty hajxy nmøødmädiäcäm. Jaduhñ hajxy hoy nwädjätämät nebiä Jesucristo hoy wiäditiän, ja'a hajxy nWiindsønähjätämbä.

16 Coo hajxy nhjätämät tu'ugmädia'agy, coo hajxy nnibiuhbéjtämät hamiñ haxøpy nebiatiä Dios hajxy tøø xtiuungmóoyyäm, jaduhñä Jesucristo hajxy xpiuhbéjtämät, neby hajxy jaduhñ maas hoy nničhojc nnimiéé'xämät hamiñ haxøpy, nebiä Diosmädia'agy hajxy jaduhñ maas hoy nwiinjuøyyämät, neby hajxy jaduhñ maas hoy ngudiúunämät.

17-19 Pønjetiä Diosmädia'agy ca'a panøcxp, cab hajxy miøjpäda'agy tijaty jaduhñ tsoobaatp. Cab hajxy tii wyiinjuø'øy. Jaanč tehñ xiexä jiootä quiopc-hajxy; paady hajxy quia'a wiinjuø'øy coo ja'a Dios ja'a møjmayhajt tøø tiuñ ja'a højtscøxphjätäm, paady hajxy quia'a cumayii ja'a Diósäm. Tsähdiuhndägoy hajxy jaduhñ. Hanaxiä hajxy yhaxøøgjatcø'øy cøxypänejpiä. Paady mijts jaduhñ nmägäpaxy nhane'emy ja'a Jesucristocøxpä coo hajxy jaduhñ mga'a pajatcøøbiät.

20 Coo hajxy tøø mhabøcy ja'a Jesucristocøxpä, paady hajxy mnajuø'øy coo jaduhñ quia'a hoyyä coo hajxy jaduhñ mga'a haxøøgwädjñät, neby hajxy naamñä tøø nmägäpaxy tøø nhane'emiän.

21 Tøyhajt jaduhñ coo hajxy tøø mhabøcy ja'a Jesucristocøxpä. Jaaya'ay hajxy xyajñähixøøyy ja'a yhEspirituhaam. Hix, tøguiäpxp tømiädiäacp je'e.

22 Jaduhñ hajxy xyajñähixøøyy coo ja'a mhaxøøgcuhdujt hajxy mnajtsähixó'øwät neby hajxy hijty mhaxøøgjäya'ayhatiän. Mdu'udägoyyaamb hajxy hijty je'eguiøxpä coo hajxy hijty cøxiä wiinä mhadsocy, cooc tyijy hajxy hijty jaduhñ mbaada'añ ja'a hoyhajtä weenhajt. Pero myajwiinhøømb hajxy hijty. Hix, cabä hoyhajtä weenhajt hajxy jaduhñ mbáadät.

23 Pero, yajtägatsä mjootä mwiinmahñdy hajxy.

²⁴ Tøø ja'a Dios hajxy xmióoyyäm ja'a hawiinjembäi howyiinmahñdy nebiä Dios hajxy jaduhñ hoy nbahíxämät. Jaduhñ hajxy tøyhajt hoy mjäya'ayhädät. Jaduhñ hajxy tøyhajt haxøøg mga'a wädíjnät.

²⁵ Jaduhñds je'e, cab hajxy mhøhndáacnät. Tøyhajt hajxy mmädiáacnät. Hix, tu'ugmädia'agy hajxy nhíjtäm.

²⁶⁻²⁷ Coo hajxy tähoocjaty mnimiäjootma'adøøjät, paquiä hajxy jadähooc mnimiägaxø'cägumbät, coo ja'a møjcu'ugong hajxy jaduhñ paquiä xñä'ä yajcädiéeyät.

²⁸ Pønjaty mee'tsp, cab hajxy miée'tsnät. Ween hajxy tiuunnä, jaduhñä wiingjäya'ay hajxy piuhbédät pøn jaduhñ yajmaajiajp.

²⁹ Cab hajxy mhaxøøgcápät. Coo hajxy hoy mgapx mmädiá'agät, jiaac wiinjuø'øwaambiä jäya'ayhajxy, ja'a homiädia'agy hajxy hoy mädoobä. Jaduhñä Dios ja'a mayhajt tiúnät jaaya'aguiøxpähajxy, ja'a hajxy jaduhñ mädoobä.

³⁰ Cabä Dioshespíritu hajxy myagjootmadiägø'øwät. Hix, jaaya'ay hajxy jaduhñ xcwieendähadäänäm høxtä coonä ja'a Jesucristo hänajty yaa quiädaactägatsa'añ. Mänit jaduhñ quiäxø'øga'añ coo hajxy hänajty tøø xyajnahwaats tøø xyajcuhwáatsäm, møød coo hajxy hänajty tøø xyajpädsøømmäm haxøøgtuum.

³¹ Cab hajxy mnixiøøghájtänät. Cab hajxy mnimiädsiphájtänät. Cab hajxy mnimiäjootmä'tänät. Cab hajxy mniyhójjänät. Cab hajxy mniñähójjänät. Cab hajxy mnimiähahájtänät.

³² Pero, mniçhoc mnimiee'xøøjöp hajxy hamiñ haxøpy. Mniñäxuudsøøjöp hajxy jaduhñ. Mnimiee'xøøjöp hajxy jaduhñ. Hix, jaduhñä Dios hajxy tøø xmiée'xäm ja'a Jesucristocøxpä.

5

¹ Xyhuunghájtämä Dios hajxy; xchójcäm hajxy jaduhñ. Naxiä Dios hajxy ndehm piahíxämät.

² Mniçhoc mnimiee'xøøjöp hajxy nebiä Jesucristo hajxy xchójcäm. Coo hajxy jaduhñ xchójcäm, paady hajxy tøø xñähho'túutam. Quiumaayy ja'a Dios jaduhñ.

³ Coo ja'a Dios hajxy xyhuunghájtäm, paady hajxy haxøøg mga'a nä'ägädä jatcø'øwät. Ni mga'a hadsógät jäya'adio'oxiøjc hajxy. Jaaná jaduhñ mijts to'oxiøjc-hajxypä, caj mijts wiingya'adiøjc mmøødmábät. Ni mga'a hadsójcät hajxy ja'a mmädo'oxiøjcä ñihyhap. Ni cab hajxy mhaxøøgcápät.

⁴ Cabä haxøøghaaw hajxy mmøødhädät. Cab hajxy mguhhiñmädiá'agät. Cab hajxy mhanähädät. Cab jaduhñ yhawiinmatsä coo hajxy jaduhñ mjatcø'øwät. Pero ja'a Dios hajxy mnämä'awäp: "Dioscujú'uyäp."

⁵ Tøyhajt jaduhñ, pøn haxøøg jatcøøby, pøn jäya'ajie'e jaançh tehñ yhadsojp, cab jim tiägø'øwa'añ maa ja'a Jesucristo wyiinduumän, maa ja'a Dios ja'a wyiinduumän. Hix, pøn jäya'ajie'e hadsojp, cabä Dios hoy wyiingudsähgø'øy.

⁶ Cab hajxy nyajwiinhøhñämät coo jäya'ay hajxy hänajty xjia nämáayyämät cooc tyijy yhooyä coo hajxy haxøøg njatcøøyyämät, nébiäts naamnä tøø nmägapxy tøø nhane'emiän. Ja'a häna'c-hajxy ca'a mäbøjpä, ja'a häna'c-hajxy jaduhñ haxøøg jatcøøbiä, nébiäts naamnä tøø nmägapxy tøø nhane'emiän, yajcumädowáanäp hajxy je'eduhñ ja'a Diósäm.

⁷ Paady jaduhñ, tsøc ca'a møødjatcøøyyäm näguipxy.

⁸ Mijts, cabä Diosmädia'agy hajxy hijty mmädoyyä. Mhaxøøgwädiip hajxy hijty, møød hajxy hijty haxøøgjaty mjatcøøy. Pero coo ja'a Jesucristo miädia'agy hajxy tøø mmäbøjcänä, paadiä mwiinmahñdy hajxy mmøødän hawa'adstuum. Jaduhñä mwiinmahñdy hajxy mjaac yaghídät.

⁹ Pønjatiä wyiinmahñdy hawa'adstuum, hojioot hajxy miøød. Hoy hajxy jiäya'ayhaty. Tøguiapxp tømiädiaacp hajxy je'e.

10 Mjaac habógäp hajxy jaduhñ nebiatiä Dios hajxy xyajñähixø'øy neby hajxy jaduhñ maas hoy mjäya'ayhädät. Jaduhñä Jesucristo hajxy xmiäas cumáyät.

11 Ja'a häna'cä Diosmädia'agy hajxy ca'a mäbøjpä, cab hajxy hoy jiäya'ayhaty. Cab hajxy jaduhñ cøxypänejiä mmøødjatcø'øwät; pero mwiinguhojø'øwäp hajxy jaduhñ.

12 Jaanç tehñ yhoçhähdiuunnä hajxy hamee'ch jiatcø'øy; páadyhøch nga'a nägapxa'añ nebiaty hajxy jaduhñ jiatcø'øy.

13 Coö jäya'ay hajxy nwiinguhojøøyyämät coö hajxy yhaxøøgwädity, nebiä Diosmädia'agy miäna'añän, mänit hajxy jaduhñ yhooc tehñ ñajuø'øwät coö hajxy tøyhajt yhaxøøgwädity.

14 Jaduhñä jäya'ayhajxy näje'e miäna'añ:

Pøñ jaduhñ maab, ma'abiädø'øg hajxy;

pøñ jaduhñ tøø yho'ogy, mjujypiøjtägätsäp hajxy.

Ja'a Jesucristo mijts xquiujajaamb xquiudøø'xaamb.

Jaduhñ miädia'agytiägø'øy, pøñä Diosmädia'agy ca'a mäbøjp, ween hajxy miäbøcy. Jaduhñä Jesucristo hajxy xyajwiinjuø'øwät coö je'eyyä jaduhñ tu'uquiä ja'a mbojpa mgädieey hajxy xyajñähwäatsät.

15 Jaduhñds je'e, nägüeentä hajxy mwädítät. Cab hajxy mnibiäda'agøøjät nebiä jäya'ayä Diosmädia'agy hajxy ca'a wiinjuøøbiän. Paady hajxy hoy mwädítät coö ja'a Diosmädia'agy hajxy mwiinjuø'øy.

16 Naxy hajxy hoy mdehñ wiädítät. Hix, jiaanç tehñ miäwädijsiä jäya'ayä haxøøgwiinmahñdy hajxy jäda'ahaty.

17 Hoorä, cab hajxy mnibiäda'agøøjät nebiä jäya'ayhajxy ca'a jajpän. Naxiä Dios ja'a miädia'agy hajxy mdehñ wyiinjuøøyyät mdehñ wyiinmädóowät nebiatiä jioot chocy coö hajxy mgudiúunät.

18 Cab jaduhñ yhooyä coö hajxy mmu'ugøøjät; yajtägoobiä jocnøø jaduhñ. Pero weenä Dioshespíritu hajxy xjiaac puhbéjtäm coö ja'a miädia'agy hajxy jaduhñ njaac cudiúunäm.

19 Coö ja'a Dioshespíritu hajxy xpiuhbéjtäm, jaduhñ hajxy nnijiootcapxmøcpøjcäm ja'a Dioshøyaam. Jaduhñä Dios hajxy hamuumdu'joot mwiinhøw mwiinyá'axät.

20 Hoy miäduhñajtä Dios hajxy mnämä'awät: "Dioscujú'uyäp", ja'a Jesucristocøxpä, ja'a hajxy nWiindsøñhajtämbä. Paadiä Dios hajxy jaduhñ mnämä'awät: "Dioscujú'uyäp", coö ja'a hoyhajtä weenhajt hajxy je'e xmióoyäm. Hix, je'e hajxy nDeedyhajtäm.

21 Hoorä, coö ja'a mmähermano waamb xyhané'emät, hamuumdu'jootä miädia'agy mgudiúunät, je'eguiøxpä coö ja'a Jesucristo hajxy hoy nwiingudsähgøøyyäm.

22 Mijts to'oxiøjc-hajxy, mgudiúunäbä mnihyhapä miädia'agy hajxy. Jaduhñä Jesucristo hajxy xyhane'emy, ja'a hajxy nWiindsøñhajtämbä.

23 Coö ja'a mnihyhaphajxy quiopc-haty maa mijtsän, jaduhñ mäwiin miäbaady coö ja'a Jesucristo hajxy nWiindsøñhajtäm coö ja'a miädia'agy hajxy hoy nmäbøjcäm. Jaaya'ay hajxy xyajñähwäatsäm.

24 Coö ja'a Jesucristo miädia'agy hajxy ngudiúunäm, jaduhñ mijtsä mnihyhapä miädia'agy mgudiúunäbät, waambaty hajxy jaduhñ xyhane'emy.

25 Hoorä, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä Jesucristo hajxy xchøjcäm. Hix, tøø hajxy xñähho'túutäm.

26 Paady hajxy tøø xñähho'túutäm, jaduhñ hajxy tøø xyajñähwäatsäm ja'a nbojpa ngädieeyhajtäm. Paady hajxy jaduhñ tøø xyajñähwäatsäm coö ja'a miädia'agy hajxy tøø nmäbøjcäm. Y coö hajxy nnäbéjtäm, jaduhñ hajxy nmänáañäm coö ja'a nbojpa ngädieey hajxy tøø xñähwäatsäm.

27 Paadiä Jesucristo hajxy tøø xñähho'túutäm, jaduhñ hajxy hoy yajxon xyhíxämät nebiä pujy nebiä je'eçhpän coö hñajty yaa quiädaactägatsa'añ. Hix, tøø ja'a nbojpa ngädieey hajxy hñajty xyajñähwäatsäm.

²⁸ Jaduhñds je'e, mijts ya'adiøjc-hajxy, mdsógäp mmée'xäbä mdo'oxiøjc hajxy nebiä mhamdsoo ni'x nebiä mhamdsoo copc hajxy mjuø'øyän. Pønä tio'oxiøjc tsojp mee'xp, jaduñ miäbaady nebiä yhamdsoo ni'x nebiä yhamdsoo copc choquiän. Hiç, tu'ugni'x tu'ugcopc hajxy jiaty coo to'oxiøjc hajxy wyiingpøcy.

²⁹ Hiç, cap pønä yhamdsoo ni'x yhamdsoo copc xiøøghaty. Pero ngüeendähájtämä nni'x ja'a ngopc-hájtäm hajxy; jaduñ mäwínäts miäbaady nebiä Jesucristo hajxy xcwieendähájtäm.

³⁰ Hiç, tu'ugjoot tu'ugwiinmahñdiä Jesucristo hajxy xmiøødhájtäm coo hajxy nWiindsøn'hájtäm.

³¹ Jaduhñä Diosmädia'agy miäna'añ: "Jaduhñds je'e, coo ja'a ya'adiøjc to'oxiøjc piaady, mänitä tiaj tieedy piuhyohdiuutnä. Jaduhñ mäwínädsä ya'adiøjc-hajxy jiaty møødä tio'oxiøjc nebiä tu'ugni'x nebiä tu'ugcopcän."

³² Jaanç tehñ yajxón hädaa mädia'agy jaduñ. Cabä Dios hajxy hijty xchoj yajwiinjuøyyäm. Jaduhñch nwiinjuø'øy, coo ja'a ya'adiøjcä tio'oxiøjc miøødhity tu'ugmädia'agy, coo jaduñ miøødhity tu'ugni'x tu'ugcopc, jaduñ mäwínäts miäbaady coo ja'a Jesucristo hajxy xmiøødhíjtämbä tu'ugmädia'agy coo ja'a miädia'agy hajxy nmäbójcäm.

³³ Jaduhñds je'e, jaduñä mdo'oxiøjc hajxy mdsoc mmée'xät nebiä mhamdsoo ni'x nebiä mhamdsoo copc hajxy mdsocquiän. Y mijts to'oxiøjc-hajxy, jaanä jaduñä mnihyhap hajxy mwiingudsähgøøbiät.

6

¹ Mijts pigäna'tøjc-hajxy, mgudiúunäbä mdajjä mdeediä miädia'agy hajxy ja'a Jesucristocøxpä, ja'a hajxy nWiindsøn'hájtämbä. Hahixøøby jaduñ coo hajxy jaduñ mgudiúnät.

²⁻³ Jaduhñä Diosmädia'agy miäna'añ: "Pønjatiä tiaj tieedy wiingudsähgøøby, je'eç hajxy hoy nyajtsäna'awaamby nyaghäyowaamby hädaa yaabä naaxwiin; je'eç hajxy jecy nyagjugyhadaamby", nømä Diosmädia'agy miäna'añ. Coo ja'a Dios hajxy jaduñ jecy xyhanéhäm, mänit jaduñ miänaandsöhñ coo ja'a mayhajt hñajty tiuna'añ ja'a højtscøxphájtäm.

⁴ Mijts taj teedyhajxy, cabä mnøøx cabä mmajc hajxy hanaxiä mhójt coo hajxy xmiähanhädät. Jaduhñä mhuung hajxy mmägäp mhané'emät coo hajxy hoy wiädítät. Jaduhñ hajxy quiimayøøjtät ja'a Jesucristäm, ja'a hajxy nWiindsøn'hájtämbä.

⁵ Näje'e mijtsä jäya'ayhajxy xjie'ehaty nebiä waj nebiä cuaayän. Mgudiúunäbä mwiindsønä miädia'agy hajxy hamuumdu'joot, ja'a hajxy hädaa yaabä naaxwiimbä. Mwiingudsähgø'øwäp hajxy jaduñ nebiä Jesucristo hajxy nwiingudsähgøøyyäm.

⁶⁻⁷ Hoyyä jäya'ayhajxy tiuñ coo ja'a wyiindsøn hajxy hñajty wyiindäna'ayii neby hajxy jaduñ quiimayøøjtät ja'a wyiindsønäm. Pero näje'e jäya'ayhajxy hoy quia'a tuñ coo ja'a wyiindsøn'hajxy hñajty quia'a jimä. Mijts, cab hajxy jaduñ mbahíxät. Hamuumdu'jootä mwiindsøn hajxy mmädúnät. Jaduhñ hajxy hoy myajcähxø'øgät coo ja'a Jesucristo hajxy hoy mjaanç mäduñ. Jaaya'ay hajxy nmaas Wiindsøn'hájtäm. Jaduhñä Dios chojpä. Ja'a Jesucristocøxpä hajxy jaduñ mdúnät. Ca'a jñäya'aguøxpähajtiä hajxy mdúnät.

⁸ Mjahmiédsäp hajxy jaduñ, coo ja'a nwiindsøn hajxy hoy nmädúunämät, hoy hajxy xjia je'ehájtäm nebiä waj nebiä cuaayän, mänitä Jesucristo ja'a hoyhajtä weenhajt hajxy xmióoyämät.

⁹ Jaduhñ mijtspä, cumoonsädøjc, mnäxúudsäbä mmoonsä hajxy jaduñ. Cab hajxy mhadsähgø'øwät. Haa ca'a, jaduñ mijtsä Dios hajxy xyhanéhmbä nebiä mmoonsä hajxy xyhanéhmbän ja'a Diósäm, ja'a jim tsajpootypä. Haa ca'a, cabä Dios hajxy wiingxyhíxäm. Haa ca'a, tu'ugjäya'ayhájtäm hajxy nägøxiä.

10-11 Hoorä, mänuu'xta'agä Dios hajxy coo hajxy ween xpiuhbety ja'a miäjaahaam; jaduhñä miädia'agy hajxy maas hoy mjaac mäbójcät. Hix, jaanç tehñ miäwiinhøhmbä mójcu'ugong. Pero jiaanç tehñ miøødä Dios mäjaa. Y coo hajxy jaduhñ xpiuhbédät, cabä mójcu'ugong hajxy jaduhñ myajmäjädá'agät.

12 Hix, ja'a mójcu'ugong hajxy yaa xmiädsibøyyäm møødä mioonsä hajxy, ca'a jiäya'ayhajxiä ja'a hädaa yaabä naaxwiimbä. Haxøögä mójcu'uhajxy jiäya'ayhaty. Pojhaam hajxy wiädity. Cabä ni'x copc hajxy tiehñ miøødä neby højtshájtäm. Møcä mäjaa hajxy jiaanç tehñ miøødä. Ja'a hädaa yaabä naaxwiimbä haxøögjäya'ayhajxy hanéhmbä mójcu'ugongäm. Hoy chajtcøxpä ja'a mójcu'uhajxy wiädity.

13 Paadiä Dios hajxy mmänuu'xtá'agät coo hajxy ween xpiuhbety ja'a miäjaahaam. Jaduhñä mójcu'ugong hajxy hoy mjøjtáná'awät. Jaduhñ hajxy mga'a yajmäjädá'agät.

14 Jøjtäna'awxä ja'a mójcu'ugong hajxy. Naxy hajxy hoy miänaaxøøjä mdehñ tiømiädiä'agät. Jaduhñ hajxy hoy mmee'xtúgät. Jaduhñ mäwínäts miäbaady nebiä soldadohajxy møc ñiwiøhñta'açhiijän coo hajxy hñajty chiptuna'añ. Naxy hajxy hoy yajxon mdehñ wiädítät. Jaduhñä Dios hajxy xñáwá'anät. Jaduhñ mäwínäts miäbaady nebiä soldado latapujxt hajxy yajniguiaaächjubø'yiijän. Jaduhñ hajxy hoy miäjäda'aga'añ.

15 Niyhahixø'øwøø hajxy nebiä Diosmädia'agy hajxy jaduhñ hoy mmäwädítät. Coojäya'ayä Diosmädia'agy hajxy miäbögät, jaduhñ hajxy jootcuyc yhidät. Jaduhñ mäwínäts miäbaady nebiä soldadohajxy ñiyhahixø'øyiijän coo ja'a quiø'øg hajxy piägø'øy.

16 Naxiä Dios ja'a miädia'agy hajxy mdehñ miäbójcät coo ja'a Jesucristo hajxy tøø xyajñähwáatsäm. Jaduhñä mójcu'ugong hajxy mga'a yajmäjädá'agät. Jaduhñ mäwínäts miäbaady nebiä soldado escudo hajxy yajniyhawähajtugyiijän neby hajxy jaduhñ quia'a tøpxøøjät ja'a tøpxquepty tóoyyap queecpä.

17 Naxiä Diosmädia'agy hajxy mdehñ miäbögät coo ja'a Jesucristo hajxy tøø xñähho'túutäm. Jaduhñ mäwínäts miäbaady nebiä soldado pujxcuhjup hajxy miøødän. Naxiä Diosmädia'agy hajxy mdehñ yhabögät nebiä Dioshespíritu hajxy xyajñähixøøyyäm. Jaduhñ mäwínäts miäbaady nebiä soldadohajxy espadacap chiptuñän.

18 Coojaja'a Dios hajxy mba'yá'axät, mmäyujwá'anäp hajxy tijaty hajxy hñajty myajmaajiajpy. Mmäyajtówäbä Dios hajxy ja'a yhEspírituhaam tijaty hajxy mmäyujwá'anäp. Mmänuu'xtá'agäbä Dios hajxy ja'a jäya'aguiøxpä, ja'a Diosmädia'agy hajxy panøcxpä. Cab hajxy mnänuuxø'øwät coo ja'a Dios hajxy hñajty mba'ya'axa'añ.

19-20 Møød høøchcøxpøchä Dios hajxy xpia'yáaxäbät coöchä Dios xñajtsapxøøyyät waambátyhøch ngapx nmädiä'agät coöchä miädia'agy hñajty nyajwa'xä, ja'a hijty yaghijpiä cuyu'uçh. Ja'a Diøshøch jaduhñ xwyiinguejx coöchä miädia'agy jaduhñ nyajwá'xät. Páadyhøch chaan dsumychäna'ay ja'a Diosmädia'agyquiøxpä. Jaduhñhøchä Dios hajxy xpia'yáaxäbät coöch nga'a tsähgø'øwät coöchä miädia'agy hñajty nyajwa'xä, nébiøch jaduhñ hoy ngudiúnät.

21-22 Nguexäämbiøchä hermano Tíquico jim maa mijtsän. Coojim miédsät, jim hajxy jaduhñ xyhawáanät nebiaty højts chaan ngudiuñ nguñaxy, coo højts hoy ween nhity, neby hajxy jaduhñ mga'a jootmayhánät ja'a højtscøxpä. Høyhøchä hermano Tíquico nmøødnijjootpaadyii. Høyhøch jaduhñ xmiøøduñ ja'a Jesucristocøxpä.

23 Ween mijtsä Diosteedy hajxy xmio'oy ja'a hoyhajtä weenhajt møødä Jesucristo, ja'a hajxy nWiindsønhájtämbä. Weenä Dios hajxy xpiuhbety nebiä miädia'agy hajxy maas hoy mjaac mäbójcät, neby hajxy jaduhñ maas hoy mniçhoc mnimiee'xøøjät.

24 Weenä Dios ja'a mayhajt tiuñ ja'a højtscøxphájtäm nägøxiä coo ja'a Jesucristo hajxy nwiingudsähgøøyyäm hamuumdu'joot, ja'a hajxy nWiindsønhájtämbä. Tøyhajt jaduhñ. Amén.

Filipenses

¹ Jesucristo hõjts xmioonsähajp, hõõch Pablo mөөдä Timoteo. Hõjts mijts hädaa nocy nyajnäjaayөөby mäduhñtiä mijts ja'a Diosmädia'agy hajxy jim mbanөcxy maa ja'a cajpt xiөhatiän Filipos, nägөxiä mөөдä mwiindsөnhajpä jii by tsajtөгootypä, mөөд hajxy jii by puhbejpä.

² Weenä Dios hajxy xmio'oy hoyhajt weenhajt, ja'a nDeedyhajtäm hajxy jim tsajpootypä mөөдä Jesucristo hajxy nWiindsөnhajtämbä.

³ Naaghóoc-hөch mijts njahmiejtsta'agy, nnämäabiөch ja'a Dios “Dioscujú'uyäp” maa ja'a mijtsөxpän.

⁴ Naaghóoc-hөch ja'a Dios nba'ya'axy, nmäyujwáambiөch hoyhajt weenhajt ja'a mi-jtscөxpä. Coochä Dios hänajty nba'ya'axy ja'a mijtsөxpä, jootcújc-hөch hänajty nni-jjäwө'yii,

⁵ je'eguiөxpä coo ja'a Diosmädia'agy hajxy näguipxy tөө nyajwá'xäm, mänaa hajxy tөө mmädoodsoönän hөxtä je'enä jäda'anäbaadyñä.

⁶ Ja'a Dios ja'a hodiung yajtsohndaac ja'a mijtsөxpä. Nmөөdhөchä tөyhajt jaduhñ coo ja'a Dios ja'a tiung hoy yajtu'uyo'oya'añ hөxtä coonä Jesucristo hänajty quiädaactägatsa'añ.

⁷ Páadyhөchä tөyhajt nmөөдä cooch mijts njaanч tehñ chocy njaanч tehñ pia'häyoy, coo ja'a Dios hajxy xpiuhbéjtäm näguipxy, homiáajөch nhity, hoy piujxtөгootiä, hoy yhagujcä, cooch hänajty nmädia'agy coo ja'a Diosmädia'agy tiөyyä.

⁸ Najuөөbiä Dios cooch mijts njaanч tehñ chocy njaanч tehñ pia'häyoy nägөxiä, nebiä Jesucristo hajxy xchöjcäm.

⁹ Nmänuu'xtáacypiөchä Dios coo hajxy hamuumdu'joot mjaac niчoc mjaac nibia'häyowөjät, coo hajxy hoy mguhwijyhädät,

¹⁰ neby hajxy jaduhñ mnajuө'өwät mwiimbíwät ja'a hojiatypä hajxy. Jaduhñ hajxy mhídät hawa'adstuum nebiä Dios hajxy xyajmädsöjcäm, hөxtä coonä Jesucristo hänajty quiädaactägatsa'añ.

¹¹ Xpiuhbédap ja'a Jesucristo hajxy neby hajxy jaduhñ hoy mwädítät. Jaduhñdsä Dios hoy quiähxө'өгät coo miөjjä coo jiaanчä.

¹² Hermanodөjc, huuc wiinjuө'өw hajxy jaduhñ; cooch yaa ndsumyчhäna'ay, maas hóyhөchä Diosmädia'agy jaduhñ yaa nyajwa'xy.

¹³ Nägөxiä cu'ughajxy tөө miädoyhaty coochä Jesucristo miädia'agy ngudsumyчhäna'awөөyyä, nägөxiä, mөөдä soldadohajxy jim hadänaabiä maa ja'a gobernador tiөjcän.

¹⁴ Ja'a Jesucristo miädia'agyhөch ngudsumyчhäna'awөөby. Cábөch ndajy nmay. Cooch nga'a tajy nga'a may, paadiä hermanodөjc-hajxy nämay quia'a nä'ägädä taj quia'a nä'ägädä maabiä coo ja'a Diosmädia'agy hajxy yajwa'xy, hoy hajxy cu jia tsúumäbä. Cab hajxy ñä'ägädä tsähgө'өy ni weeñtiä. Hix, hөõch hajxy jaduhñ xpiahijxp.

¹⁵⁻¹⁷ Paadiä Diosmädia'agy hajxy yajwa'xy cooch hajxy xchocy xpia'häyoy. Ho-jioot hajxy jiaanч tehñ miөөд. Najuөөby hajxy jaduhñ coochä Diosmädia'agy ngudsumyчhäna'awө'өy. Pero jii hajxy näje'ebä, paadiä Diosmädia'agy hajxy yajwa'xy, cooch hajxy xmiädsiphaty. Tөyhajt jaduhñ. Je'eч hajxy xyajmädsөjp cooch yaa ndsaachpөгät pujxtөгooty. Cabä hojioot hajxy ñä'ägädä mөөдä ja'a hөõchөxpä.

¹⁸ Pero cábөch jaduhñ nmөjpäda'agy, hóyhөch hajxy jaduhñ xjia mädsiphaty.

Xoondáacpөch jaduhñ coo ja'a Jesucristo hajxy miädia'agy, hoy hojioot hajxy quia'a ja mөөдä ja'a hөõchөxpä.

19 Y jaac xoon^{da}'agáambøch jaduhⁿ. Nnajuó^{bi}øch coo^{ch} hodium nmähmø'^øwa'añ. Hix, mijts ja'a Dios hoyhajt weenhajt mmäyujwaamby ja'a høøchcøxpä. Y xpiuhbéj^pøchä Dioshespí^{ri}tu ja'a Jesucristocøxpä.

20 Cábøchä njoot ñä'ägädä tsoy coo^{ch} ndsähgø'^øwät mänáajøchä Jesucristo hänajty nmädia'aguiän. Cábøch mänaa ndsähgø'^øy ndsähdiuñ. Chójpiøch njoot jaduhⁿ coo^{ch}ä Jesucristo nyajcähxø'^øgät coo miøjjä coo jiaan^{ch}ä, hóyhøch njadehm quiuho'ogø'^øwät.

21 Madúhñtiøch yaa njaac jugyhaty, nyajcähxø'^øgäbøchä Jesucristo coo miøjjä coo jiaan^{ch}ä. Y coo^{ch} nhó'nät, maas hoy hänajty quiähxø'^øgaañnä coo miøjjä coo jiaan^{ch}ä. Mänitøch jim nnøcxaañnä maa je'e wyiinduumän.

22-23 Mejtstú'ujøchä njoot nyajmøødmädia'agy. Coo^{ch} nhó'ogät, mänitøch cu nnøcxnä maa ja'a Jesucristän. Maas jootcújc-høch jim nnijiäwøoyyänät. Pero coo^{ch} yaa njaac jugyhádät, maas hóyhøchä Jesucristo jaduhⁿ njaac mädúnät. Cábøch ndehm yhoñajuø'^øy pø maas hoy coo^{ch} nhó'nät, o pø caj.

24 Høøch jaduhⁿ mänaamb coo^{ch} hit nga'a tsoj hó'ogät; jadúhnhøch mijts ja'a Diosmädia'agy tehngajnä njaac yajnähixø'^øwät.

25 Nmøødhøchä tøyhajt jaduhⁿ coo^{ch} mijts njaac møødhida'añ. Njaac yajnähixø'^øwáambiøch mijts tehngajnä, neby hajxy jaduhⁿ maas hoy mmäbøgät, neby hajxy jaduhⁿ mjaac xoon^{da}acpøgät.

26 Coo^{ch}ä Jesucristo jim xyajnöcx^tägátsät maa mijtsän, mänit hajxy mmäna'ana'añ coo tiøyyä coo Jesucristo miøjjä jiaan^{ch}ä.

27 Naxiä Jesucristo miädia'agy hajxy mdehm yajtúuñät. Jaduhⁿä Diosmädia'agy hajxy näguipxy myajwá'xät tehngajnä, hóyhøch jim nga'a ja nócxät maa mijtsän.

28 Cabä mmädsip hajxy mnä'ägädä tsähgø'^øwät. Jaduhⁿ hajxy ñajuø'^øwa'añ coo hajxy haxøøgtuum yajca'awa'añijäm ja'a Diósäm, møød coo mijts ja'a Dios xpiäda'aga'añ hodium.

29-30 Tiumbiä Dios ja'a mayhajt coo hajxy xyajnähdijy coo ja'a miädia'agy hajxy mmäbøj^cät ja'a Jesucristocøxpä, nébiøch cham ndsaa^{ch}pøquiän. Tøøch hajxy hamdsoo xyhixy xmiädoy coo^{ch} yaa ndsaa^{ch}pøcy ja'a Jesucristocøxpä.

2

1 Coo mijts ja'a Jesucristo xchocy, paady hajxy xjootcapxmøcpøcy. Coo mijts ja'a Dioshespí^{ri}tu tu'ugmädia'agy mmøødhity, paady hajxy hamiñ haxøpy mni^{ch}ocy mnibia'häyoyii.

2 Jadúhnhøch njoot jiaan^{ch} teh^m chocy coo hajxy tu'ugmädia'agy mhídät. Coo hajxy mni^{ch}oc mnibia'häyowøjät, maas hóyhøch nnijiäwø'^øwøjät.

3 Ca'a mhamdsoo wiinmahñdy hajxy mwi'i yajtuñ. Ca'a hajxy mniguiumayii. Jaduhⁿ hajxy mmäná'anät coo ja'a mmägu'ughajpä miaas jaty quejee mi^{ch}.

4 Hamiñ haxøpy hajxy mnigwieendähadøjät.

5 Mbahixäp ja'a Jesucristo hajxy neby je'e jecy wiädi^{ti}än.

6 Hoyyä Jesucristo jia Dioshuungä, caj jiootma'ty coo ñämaayyä coo yaa jiäya'ayhádät hädaa yaabä naaxwiin.

7 Coo yaa jiäya'ayhajty, yhøxhijx yhamdsoo cuhdujt jaduhⁿän. Jaduhⁿ ñibiädáacänä nebiä moonsän. Cab hänajty hamdsooyyä miøjhada'añ.

8 Mänitä Dios miädia'agy quiudiuuñä coo yhó'ogät. Höchähdiuunä jim cruzcøxp miøjpahbejtä.

9 Coo ja'a Jesucristo quiudiuuñ neby ñämaayyän, paadiä yajmøjhajtä ja'a Diósäm. Ni pøn jaduhⁿ quia'a mäbaady nebiä Jesucristän.

10 Weenä Jesucristo hajxy nägøxiä wyiingudsähgø'^øy, jim tsajpootyp, møød hädaa yaabä naaxwiin, homiaajä.

11 Weenä Jesucristo hajxy nägøxiä quiapxpaady coo hajxy wyiindsønhaty. Jaduhnä Dios jim quiähxó'ogät møj jaanč, ja'a nDeedyhátäm.

12 Mägu'ughajpädøjc, mänájøch jim nhitiän maa mijtshajxiän, xmiäbøjcäbøchä nmädia'agy hajxy hänajty. Hoorä, cooch yaa jäguem nhijnä, miaas tsójpiøch njoot cooch nmädia'agy hajxy tehngajnä xmiäbøjcät. Naxiä Diosmädia'agy hajxy mdehm miäbøgät, neby hajxy jaduhñ hodiummähmó'owät. Naxiä Dios hajxy mdehm wyiingudsähgó'owät. Cab hajxy nä'ä nägoodä mnä'ä niguiumayó'øjät.

13 Jaduhnä Dios jioot chocy coo hajxy hoy mwädítät. Xpiuhbédäp ja'a Dios hajxy jaduhñ.

14 Hoy hajxy mwädítät. Cab hajxy tii mwi'i chippädá'agät. Cab hajxy tijaty myajnigu-iuhøjø'owó'øjät.

15-16 Jaduhñ hajxy hoy mwädítät nebiä Dioshuungän maa ja'a ca'awiindøyhäna'c-hagujcän. Coö ja'a Diosmädia'agy hajxy myajnahixó'owät, jaduhñ hajxy mwädítät nebiä jøøn yhajajjiän hagoonstuum; coö jäya'ayhajxy jaduhñ miäbøgät, mänit hajxy hodium piäda'agó'øjät. Coö hajxy mgudiünät neby hajxy chaa nnäma'ayän, mänitøch nxoondá'agät, mänaa ja'a Jesucristo hänajty jadähooc quiädaactägatsa'añän. Cähxø'øgaamb jaduhñ cooch hänajty hoy tøø nduñ maa mijtscøxpän.

17 Coö Diosmädia'agy hajxy hamuumdu'joot mmäbøcy, páadyhøch nxoonda'agy, hóyhøch cu nja ho'og. Chójpiøch njoot coö hajxy nmøødxoondá'agät.

18 Tsøgxä hajxy jaduhñ xoondáacäm.

19 Coö ja'a Jesucristo ja'a nWiindsønhatäm jaduhñ miäná'anät, mobädájpoçch mijts ja'a Timoteo nyajnäguexa'añ. Coochä Timoteo min jadähooc xyhawaanä coö mijts hoy mhity, hóyhøch hänajty nnijiäwø'øwa'añii.

20 Páadyhøchä Timoteo jim nguexa'añ cooch je'e nidiuhm xmiøødhity tu'ugmädia'agy maa mijtscøxpän. Xpiuhbedaamb mijts jaduhñ hamuumdu'joot.

21 Ja'a häna'c-hajxy jaac yaabä, yhamdsoo tuung hajxy tiuumby. Cabä Jesucristo tiuung hajxy hamuumdu'joot tiunaanä.

22 Mnajuøøby hajxy jaduhñ coochä Timoteo hoy xmiøødtuñ maa ja'a Diosmädia'agy myiñän, nébiøch nhamdsoo huungän.

23 Mänitøchä Timoteo nguéxät cooch hänajty tøø nnajuø'øy pø pädsømäambøch.

24 Coö ja'a Dios jaduhñ miäná'anät, mobädájpoçch jim nnøcxa'añ maa mijtsän.

25 Tøøch mijts ja'a hermano Epafrodito hijty xyajnäguexy cooch jaduhñ xpiuhbédät. Hóyhøch jaduhñ xjiaanč møødtuñ coochä Diosmädia'agy nyajwa'xy. Hahixøøby cooch mijts nyajnäguejxtägätsät,

26 je'eguiøxpä coö mijts xjia wi'i quiuhijxtägatsa'añ. Jaanč tehñ tiajp jaanč tehñ miäabiäc je'eduhñ coö mijts tøø mmädoyhaty coö hijty piøgyii.

27 Tøyhajt hijty piøgyii. Ja weenjaty jaduhñ quia'a ho'cy. Miøødhajt ja'a Dios hojioot ja'a Epafroditocøxpä møød høøhcøxpä. Coö häxøpy tøø yho'ogy, maas hanáxiøch häxøpy njootmayhaty.

28 Páadyhøch mijts ja'a Epafrodito nyajnäguejxtägatsa'añ, neby hajxy jaduhñ mxoondá'agät coö mijts jadähooc xñámejstägatsa'añ. Coö hajxy jaduhñ mxoondá'agät, mänitøch jaduhñ hoy nnijiäwø'øyyäbät.

29 Coö jim miédsät maa mijtsän, xi'ig xon hajxy myajpóo'xät nebiä hermanän. Homianaaja hajxy mwiingudsähgó'owät pønjetiä Diosmädia'agy pawädiyp nebiä Epafrodito piawäditiän.

30 Paady je'e ja weenjaty quia'a ho'cy cooch jaduhñ xmiøødtuñ maa ja'a Diosmädia'agy myiñän. Pero cabä miøjpäda'agy coö ja weenjaty tøø quia'a ho'ogy. Cooch yaa xpiuhbety, mijts yaa xñähduunduutp. Hix, cábøch mijts hoy yaa xpiuhbeda'añ; jäguem mijts jaduhñ xpiaatä.

3

¹ Hermanodøjc, tsøg hajxy xoonðáacám ja'a Dioscøxpä. Chaa hajxy jadähooc nhawaandägájtánäm neby hajxy tøø nhuuc nämaabiän. Coö hädaa mädia'agy hajxy jaduhñ myajtúnät, cab hajxy myajwiinhøönät. Ni mänáajøch jaduhñ nga'a nänuuxø'øy, hoñaağhoocä hajxy jaduhñ nhawáanamät.

² Mnigwieendähadøøjäp hajxy maa häna'c-hajxy jaançh tehñ quia'awiindøybän, ja'a hajxy jaduhñ mänaambä coö hajxy tsipcøxp nyajcircuncidarhajtämät.

³ Tøyhajtä Dios hajxy xjiaançh circuncidarhajtäm coö hajxy nwiingudsähgøøyyäm. YhEspirituhaam hajxy nwiingudsähgøøyyäm. Jootcuyc hajxy jaduhñ nnijiäwøøyyäm ja'a Jesucristocøxpä. Cab hajxy nmänáanam coö ja'a jecyquihdujt hajxy xyajnáhwáatsäm.

⁴ Høøçh, jadúhñhøch hijty nmänaambä cooc tyijy ja'a jecyquihdujt hajxy xya-jnáhwáatsäm. Pedyíijøch hijty ngudiuñ nej yhane'emiän. Cab jaduhñ pøn ñä'ägä cudiuñ nébiøch hijty ngudiuñän.

⁵ Judíoshøch høøçh. Judíospøch hijty ndajhajpy ndeedyhajpy. Benjamínhøch hijty nhaphajpy ndeedyhajpy. Mänáajøch nmiñ nga'ayän, cuductujxøøjøch hoy nyajcircuncidarhaty, nebiä judíoshajxy quihdujthatiän. Ja'a fariseos miädiá'agyhøch hijty nbanøcxäp.

⁶ Nägø'ø nädécypíøch hijty ngudiuñ, høxtä ja'a hermanobáadyhøch hijty nyajtsaaçhpøcy. Jaançh tehñ piedyíijøçhä ley hijty ngudiuñ; cábøch hijty pøn waamb xñäma'ay.

⁷ Jaançh tehñ ñiguiumáayäbøch hijty coöch hijty jaduhñ hoy ngudiuñ. Pero cábøch nniguiumayáanänä, je'eguiøxpä coöchä Jesucristo miädia'agy tøø nbadu'ubøjcänä.

⁸ Cójxhøch nnajtshixøøñä mädyíijátyhøch hijty nyajtuumb. Páadyhøch tøø nnajtshixøøñä, nébiøçhä Jesucristo miädia'agy jaduhñ hoy nbanøcxät. Maas tsoobáatnäp hädaa coöchä Jesucristo tu'ugmädia'agy nmøødhijnä ja'a nWiindsøn'hajpiä.

⁹ Coöchä Jesucristo miädia'agy nmäbøjcä, páadyhøçhä Dios tøø xyajnáhwa'açh. Cábøch nmänaannä cóogøch tyijy ja'a jecyquihdujt xyajnáhwá'adsät.

¹⁰ Chójpiøch njoot coöchä Jesucristo tu'ugmädia'agy nmøødhijnät. Coö ja'a Jesucristo jadähooc jiuypíøjcy, paadiä mäjaa jaduhñ miooyyä coöch jaduhñ xpiuhbédät. Chogáambíøch njoot coöch ndsaaçhpøgät ja'a Jesucristocøxpä. Høxtä ho'ogáambøch jaduhñ neby je'e yho'quiän.

¹¹ Páadyhøch njoot jaduhñ chocy coö ja'a Dios jaduhñ ween miäna'añ coöch xyagjujyipiøjtägätsät.

¹²⁻¹⁴ Hermanodøjc, cábøch jaduhñ nmäna'añ coöch tøø nyajpedyii. Cábøch njahmiejtsnä nébiøch hijty nwädity. Coöchä Jesucristo xmioonsähaty, páadyhøch miädia'agy nyajcopcøøyyänä, nébiøch jaduhñ ca'xy ngudiúunänät. Ñä'ägädä tsójpiøch njoot nägø'ø nädécypíä coöch ca'xy ngudiúnät. Jadúhñhøçhä Dios jim xmiøjyá'axät tsajpootyp, je'eguiøxpä coöchä Jesucristo tøø xyajnáhwa'açh.

¹⁵ Tsøg hajxy tu'ugcopc hjtäm nébiøch jaduhñ naamnä ngujaayän, pønjaty ca'xy cudiuumb. Pønjaty xquia'a møødhjttäm tu'ugcopc, weenä tøyhajt hajxy mio'oyíijäm ja'a Diósäm.

¹⁶ Tsøg hajxy tehngajnä yajtu'uyóhyäm nebiä Dios hajxy xyajnáhixøøyyäm.

¹⁷ Hermanodøjc, xpiahíxäbøch hajxy jaduhñ nébiøch hoy nwäditiän. Xpiahíxpøch hajxy jaduhñ nämay. Mbahíxäp hajxy je'eduhmbä.

¹⁸ Tøøçh mijts mayhooc nnäma'ay coö ja'a hønndaacpähajxy may wiädity. Cábac tyijy jaduhñ tíøyyä coö ja'a Jesucristo hajxy tøø xñähho'túutäm cruzcøxp. Cháajäts jadähooc nnämáaguumbä. Jaançh tehñ hoñäjøøñä jaduhñ.

¹⁹ Haxøøgtuum hajxy yhida'añ cøjxta'axiøø. Hix, cabä Dios hajxy wyiingudsähgø'øy. Yhamdsoo cuhdujt hajxy yajtuumb. Tijaty maas høçähdiuunnä, je'e hajxy ñä'ägä

cumaaby. Je'e hajxy jaduhñ wyi'i chojpy coo hoyhajt weenhajt hajxy cu piaaty hädaa yaabä naaxwiin.

²⁰ Pero højtshájtäm, jim højts njoot hamuumdu'joot nbädáacäm tsajpootyp. Ja'a Jesucristo, ja'a hajxy nWiindsønhájtämbä, je'e hajxy xyajnáhwáatsäm. Je'e hajxy nahíjxäm coo jim choona'añ tsajpootyp, coo yaa miänaca'añ hädaa yaabä naaxwiin.

²¹ Mänitä nnaaxni'xhajxy xyhädiuundägatsáañänä. Jaduhñ hajxy yajxón ngähxø'ogáañäm nebiä Jesucristo yhamdsoo ni'x yhamdsoo copcän. Miøødá Jesucristo cuhdujt jim cøxp møød hädaa yaabä naaxwiin homiaajä. Paadiä nnaaxni'xhajxy xyhädiuundägatsáañäm coo cuhdujt jaduhñ miøødá.

4

¹ Hermanodøjc, njaanč tehñ chojpy njaanč tehñ pia'häyóobiøch mijts jaduhñ. Páadyhøch nja wi'i ñøcxa'añ maa mijtsän. Jaanč tehñ xioondáacpøch jaduhñ ja'a mijtsøxpä, je'eguiøxpä coo mijts ja'a Diosmädia'agy jaanč tehñ yhoy mgudiñ, coo hajxy jim mnøcxa'añ tsajpootyp. Tehñgajnä ja'a Dios hajxy mmøødhídät tu'ugmädia'agy.

² Evodia møødá Síntique, mijts nmänuu'xtaacyppy coo hajxy mhídät tu'ugmädia'agy. Jaduhñä Diosmädia'agy hajxy hoy myajtuunmúgät.

³ Chaads miič mägu'ughajpä, hóyhøch miič xjiaanč tehñ jiamiøødhaty, tunä mayhajt, mmägápxäp mhané'emäp ja'a Evodia møødá Síntique coo hajxy tu'ugmädia'agy yhíjnät. Näguípxyhøchä Diosmädia'agy hajxy hoy nmøødyajwa'xy, møødá Clemente møødá hermanodøjc-hajxy may. Jim hajxy nøcxy yhidaañnä tsajpootyp cøjxta'axiøø.

⁴ Tehñgajnä hajxy homiänaajä mxoondá'agät ja'a Diosøxpä.

⁵ Hoy hajxy mjaanč tehñ jiäya'ayhádät cu'ughagujc. Mäwiingomb jaduhñ coo ja'a Jesucristo quiädaactägatsa'añ.

⁶ Cab hajxy tii mdaj mmáyät. Dios hajxy mmäyujwá'anäp coo hajxy xpiuhbédät. Mnämä'awäp ja'a Dios hajxy jaduhñ “Dioscujú'uyäp.”

⁷ Mänitä Dios hajxy xmió'owät hoyhajt weenhajt. Jaduhñ hajxy tii mga'a taj mga'a máañät. Jagoo hajxy jaduhñ mjaac taj mjaac máyät ja'a Jesucristoøxpä. Ni pøn jaduhñ xquia'a puhbédät nebiä Dios hajxy xpiuhbetiän.

⁸ Hermanodøjc, chaačhä nocyhädiún nyajmayaannä. Je'e hajxy myajcopcø'øwäp mädyiijaty jaduhñ tøyhajt, mädyiijaty jaduhñ howyiingudsähgøøñä, mädyiijaty jaduhñ hoy, mädyiijaty jaduhñ yajxón, mädyiijaty jaduhñ hoguiumaañä.

⁹ Tehñgajnä hajxy hoy mgudiñät neby hajxy tøø nyajnáhixø'øyän. Jadúhñhøch hajxy xpiahíxät nébiøch hoy ngudiñän. Jaduhñä Dios hajxy xmiøødhídät tu'ugmädia'agy. Jaduhñ hoyhajt weenhajt hajxy xmió'owät.

¹⁰ Xoonáacpøch je'eguiøxpä cooçh mijts jadähooc xpiuhbéjcumbä xädø'øñhaam. Páadyhøchä Dios jaduhñ nnäma'ay “Dioscujú'uyäp.” Jia tsojc ja'a mjoothajxy cooçh hajxy cu xpiuhbejty, pero cab hajxy xñä'ä näbaadøyyä.

¹¹ Cábøch hänäjty ndsippäda'agy, hóyhøch hänäjty tii nja yajmaajiaty. Tøøch nhabøjnä nébiøch jootcuyc nhíjnät, hóyhøch hänäjty tijaty nja yajmaajiaty.

¹² Cábøch nmøjpädaacnä mädyiijátýhøch nyajmaajiajpy. Cábøch nøcxy nniguiumayii cooçhä Dios xpiuhbety.

¹³ Hotýíjøch njada'añ. Ja'a Jesucristøch homiänaajä xpiuhbejp.

¹⁴ Hoyøøyy cooçh mijts xpiuhbejty xädø'øñhaam.

¹⁵ Pero jadúhñhøch mijts naxy xñä'ägädä puhbetyhaty. Cooçh hänäjty jim ndsoona'añ Macedonianaaxooty, mänitøchä xädø'øñ hajxy hoy xmio'oy. Páadyhøch hajxy hoy xmio'oy cooçhä Diosmädia'agy jim hoy njaanč tehñ yajwa'xy jim maa mijtsän jim Filiposcajptooty. Cábøch wiinghäna'c-hajxy hänäjty tii xñä'ägädä mo'owa'añ.

¹⁶ Mánáajøch hánajty jim nhityñä maa ja'a cajpt xiøhatiän Tesalónica, coo hajxy mmädoyhajty cooçh hánajty nyajmaajiaty, metsc-hooc tågøøghóoc-høch xädø'øñ hajxy jim xyajnäguejxy.

¹⁷ Cab hajxy mmáná'anät cóogøch tyijy xädø'øñ nwi'i quiuhbøcjuø'øy. Cooçh mijts xpiuhbety, paadiä Dios hajxy xmio'owa'añ hoyhajt weenhajt. Høøch, páadyhøch nx-ooñda'agy.

¹⁸ Cábøch tii nyajmaajiajnä. Nä'ä tågø'øbøch mijts xyajnäguejxy, ja'a Epafrodito miäméjtsäbä. Xjiaançh tehñ quiumaabiä Dios hajxy jaduhñ cooçh hajxy xjiaançh tehñ piuhbety.

¹⁹ Coo hajxy hánajty tii myajmaajiaty, xmió'owäp ja'a Dios hajxy ja'a Jesucristocøxpä. Jim cøxiä miøødä tsajpootyp.

²⁰ Tsøgä Dios hajxy nämáayyäm cøjxta'axiøø coo miøjjä coo jiaançhä; je'e hajxy nDeedyhájtäm. Amén.

²¹ Ja'a hermanodøjc-hajxy yaabä, højts mijts nyajpoo'xyp pønhatiä Diosmädia'agy jim mæbøjp Filipos.

²² Pønhatiä Diosmädia'agy yaa mæbøjp, je'eds mijts xyajpoo'xp, møød hajxy yaa tuumbä maa ja'a gobiernä tiøjcän.

²³ Weenä Jesucristo hajxy xmio'oy hoyhajt weenhajt. Je'e hajxy nWiindsøñhájtäm. Amén.

Colosenses

¹⁻² Høøch jaduhñ xøhajt Pablo. Jesucristøch xquiuguexyhajp. Ja'a Dios jaduhñ mänaañ cooçh jaduhñ xquiuguexyhádät. Højts hädaa nocy nhädiuumby møødä mägu'ughajpä Timoteo. Mijts jaduhñ nnocyñäjaayøøby, pønjatiä Diosmädia'agy jim mæbøjp maa ja'a cajpt xiøhatiän Colosas. Tu'ugmädia'agy mijtsä Jesucristo mmøødhity. Weenä Dios ja'a hoyhajtä weenhajt hajxy xmio'oy. Hix, jaaya'ay hajxy jaduhñ nDeedyhajtäm.

³ Naaghooc højtsä Dios jaduhñ mba'ya'axy ja'a mijtscøxpä, nnämaaby højtsä Dios "Dioscujú'uyäp." Haa ja'a Jesucristo, ja'a hajxy nWiindsønähjtämbä, ja'a Dioshuung je'e.

⁴ Tøø højts jaduhñ nmädoyhaty coo mijtsä Jesucristo miädia'agy mmæbøjcä, møød coo mijtsä mæbøjpädøjc nägøxiä mdsocy, ja'a Diosmädia'agy hajxy mæbøjpä.

⁵ Tøø ja'a mjoot hajxy jim mbäda'agy tsajpootyp coo hajxy jim nøcxy mhida'añ cøjxta'axiøø. Mänitä mjoot hajxy jim mdehm piädaacy mänaa ja'a Diosmädia'agy hajxy mmädoodsooñän, ja'a jaançh tehñ tiøyhajtpä.

⁶ Wiinduhmyhagajptä Diosmädia'agy wia'xnä. Jaduhñä jäya'ayhajxy wiinduhmyhagajpt miäbøjnäbä. Jaduhñ mijts tøø mmæbøjpä coo ja'a Dios hajxy tøyhajt xchøjcäm.

⁷ Højts nmägu'ughajpä Epafras, jaaya'ayä Diosmädia'agy hoy yajwa'xtsooñ maa mijtsän. Jaanä Jesucristo quiuguexy je'ebä. Hoy højts jaduhñ xmiøøduñ.

⁸ Je'e højts hoy xyhawaanä cooc mijtsä mæbøjpädøjc mjaançh tehñ chocy mjaançh tehñ pia'häyoy ja'a Dioshespíritucøxpä.

⁹ Jajty højts jaduhñ nmädoyhajty cooc hajxy hoy mjaançh tehñ miäböcy, jabom-jabom højtsä Dios nba'ya'axy ja'a mijtscøxpä, ween hajxy jaduhñ mnajuø'øy tii ja'a Dios hajxy xyajmädsøjp, møød weenä Dios ja'a miädia'agy hajxy cøxiä xyajwiinjuø'øy.

¹⁰ Jaduhñ højtsä Dios nba'yaaxpä coo hajxy hoy mwädítät. Jaduhñä Jesucristo hajxy xquiuumáyät. Jaduhñä hoybä hajxy madiu'u mgudiúnät. Maas hoyyä Dios hajxy jaduhñ mmøødhídät tu'ugmädia'agy, møød jaduhñ hajxy xquiuumábiät.

¹¹ Jaduhñ højtsä Dios nba'yaaxpä coo ja'a Dios hajxy ween xpiuhbety ja'a miäjaagøxpä ja'a jim miøødpä tsajpootyp. Jaduhñ hajxy hoy mmee'xtúgät, hoy häna'c hajxy nebiaty cu xjia tun. Tehñgajnä hajxy jaduhñ mxoondá'agät, hoy hajxy nej cu mja jat cu mja habet.

¹² Tehñgajnä ja'a nDeedyhajtäm hajxy jaduhñ mnämä'awät "Dioscujú'uyäp." Hix, jaaya'ay hajxy hawa'adstuum xpiädáacäm møødä jäya'ayhajxy nägøxiä, ja'a miädia'agy hajxy mæbøjcäbä.

¹³ Tøø ja'a Dios hajxy xyajpædsøømäm hagoonstuum. Hodium hajxy hoy nmähmøøyyäm maa ja'a yHuung yhane'emiän. Jiaançh tehñ chojpiä Dios ja'a yHuung jaduhñ.

¹⁴ Jaayá'ayäts hajxy jaduhñ xñähho'túutäm; jaduhñä nbojpä ngädieey hajxy xyanähwáatsäm.

¹⁵ Haa ja'a Jesucristo, jíiyyäm hänajty je'e mänaa hädaa yaabä naaxwiin yhawijy tiøø'xta'aguiän. Tu'uquiä Jesucristo jaduhñ møødä Dios. Mänitä Jesucristo hoy yaa jäya'ayhaty hädaa yaabä naaxwiin. Nhíxäm hajxy jaduhñ. Haa ja'a Dios, cab hajxy mänaa nhíxäm.

¹⁶ Cøxiä Jesucristo yhädiuñ jim tsajpootyp møød yaa hädaa yaabä naaxwiin, tijaty hajxy yaa nhíxäm, møød tijaty hajxy yaa nga'a híxäm, møødä poj møødä täxa'a, ja'a jim mähanehmbä tsajtcøxp, møød pønjaty yaa mähanehmb hädaa yaabä naaxwiin, møød pønjaty jim jaac mähanehmb tsajpootyp. Paadiä Jesucristo jaduhñ cøxiä yhädiuñ coo hänajty jaduhñ tøø yhane'emyii ja'a Tieedy. Madiu'u ja'a tuung jim tsajpootyp maa

ja'a Jesucristo ja'a Diosmoonsä hoy piäda'aguiän. Hamdsoo ja'a Jesucristo jaduhñ cøxiä ñiyhädiúunäxä.

¹⁷ Jiyyäm hñajty je'e mänaa hädaa yaabä naaxwiin yhawijy tiø'xta'aguiän. Je'enä yaghityñä tijaty yhädiuun.

¹⁸ Jaayá'ayäts jaduhñ copc-hajp maa ja'a Diosmädia'agy hajxy nmäbójcäm. Coö hajxy hoy xñähho'túutäm, coö jadähooc jiuypiojtägajch, paady møj jaanç yhiñä. Hix, jayøjp je'e jiuypiojcy. Y coö jaduhñ jiuypiojtsohñ, paady møjcuhtujt miøødän.

¹⁹ Nebiä Dios jim yhitiän tsajpootyp, jaanä jaduhñä Jesucristo jim yhiñäbä. Jaduhñä Dios ja'a yHuung Jesucristo yajmädsocy coö ja'a Jesucristo pedyii Dyioshadät nebiä Tieedy Dyioshatiän.

²⁰ Jaduhñä Dios ja'a jioot jia tsojpä coö hoy piønä miøødhädät, møød coö ja'a Dios hajxy jaduhñ nga'a mädsiphájtänät. Paadiä Dios ja'a yHuung yaa quiejxy coö hajxy jaduhñ xñähho'túutämät cruzcøxp.

²¹ Mijts, cabä Dios hajxy hijty mmøødhity tu'ugmädia'agy. Mmädsiphajpiä Dios hajxy hijty jaduhñ. Haxøøg hajxy hijty mwädity.

²² Coö ja'a Jesucristo hoy yaa jiäya'ayhaty hädaa yaabä naaxwiin, coö hajxy hoy xñähho'túutäm, tu'ugmädia'agy hajxy jaduhñ xmiøødhíjtänä. Jaduhñä nbojpä ngädieey hajxy xyajñähwáatsäm. Jaduhñä Tieedy tøø yhawaanä coö hajxy tøø nnähwáatsäm.

²³ Hoyyä Jesucristo hajxy tøø xjia yajñähwáatsäm, pø cabä Diosmädia'agy hajxy hoy ngudiunäänäm, cabä Dios hajxy jaduhñ xquiumáayyämät. Paadiä Diosmädia'agy hajxy hamuumdu'joot mgudiúnät nebiä Epafras hajxy xyajñähixøøyyän. Cab hajxy mnajtshixø'øwät. Jaduhñ hajxy jim mnøcxät tsajpootyp. Wiinduhmyhagajptä Diosmädia'agy jäda'ahaty wia'xnä. Høøch jaduhñ nyajwa'xyp, høøch Pablo.

²⁴ Xoondáacpøch je'eguiøxp coöch jaduhñ ndsaaçhpøcy ja'a mijtsøxpä pønjetiä Jesucristo miädia'agy mäbójcäp. Jaduhñä Jesucristo hajxy maas hoy mmøødhídät tu'ugmädia'agy. Jaduhñch ndsaaçhpøjpä nebiä Jesucristo chaachpøjquiän.

²⁵ Jaayá'ayhøch jaduhñ xpiädaac coods mijtsä Diosmädia'agy ca'xiä ngøxy yajñähixø'øwät. Jaduhñch xpiädaacpä coöchä jäya'ay nägøxiä nbuhbédät, ja'a miädia'agy hajxy jaduhñ mäbójcäbä.

²⁶ Cabä Dios ja'a wyiinmahñdy choj yajwiingähxø'cy. Cujecy hajxy jaduhñ tøø xyajmädoyhájtäm pønjetiä miädia'agy mäbójcäp.

²⁷ Jaduhñä Dios wyiinmahñdyhajty coö ja'a Jesucristo hajxy nägøxiä nmøødhíjtämät tu'ugmädia'agy møød mijts ca'a judiøspä. Mänit hajxy nägøxiä jim mnøcxäänä tsajpootyp. Hoy-yagjuøøñä ja'a Dios jaduhñ wyiinmahñdyhajty.

²⁸ Hoy miaajä højts Jesucristocøxpä nwädity yajñähixøøbiä coö jäya'ayä yhaxøøgcuhtujt hajxy ñajtshixø'øwät, møød coö ja'a Jesucristo miädia'agy hajxy cøxiä ween yajtuunghpaatä. Ja'a Dios højtsä wiinmahñdy xmiøoby nebiaty højts nyajñähixø'øwät. Jaduhñ højtsä Jesucristo nhawaanä coö ja'a jäya'ayä Jesucristo miädia'agy hajxy hoy yajtuunänä. Cumayáanäp hajxy jaduhñ ja'a Jesucristo.

²⁹ Hamuumdu'jóothøch jaduhñ nduunghaty nägø'ø nädecypiä. Ja'a Jesucristøch xpiuhbejp. Je'eçhä mäjaa xmiøoby pedyii.

2

¹ Jabom-jabómhøchä Dios møc-møc nmänuu'xta'agy ja'a mijtsøxpä møødä mäbøjpädøjcøxpähajxy, ja'a hajxy jim tsänaabiä Laodicea, møødä mäbøjpädøjc-hajxy nägøxiä pønjätyhøch xquia'a hixyhajpnä.

² Ween mijtsä Dios xquiapxmøcpøcy. Jaduhñä Jesucristo hajxy maas hoy mmøødhídät. Ween hajxy hamiñ haxøpy mniçhocy mnibia'häyoyii. Mmøødhájnäbä tøyhajt hajxy jaduhñ coö ja'a Jesucristo hajxy xmiøødhijnä tu'ugmädia'agy. Ween hajxy jaduhñ tehñgajnä mjaac habøcy.

³ Y coo ja'a Jesucristo hajxy tu'ugmädia'agy xmiøødhijnä, jaduhñ hajxy mnajuøøñä nebiatiä Dios wyiinmahñdyhaty, coo cøxiä wiinä jiaançh tehñ ñajuø'øy, coo cøxiä wiinä jiaançh tehñ jiaty.

⁴ Paady mijts jaduhñ nhawáañäm, jaduhñ hajxy mga'a yajwiinhóønät, hoy häna'c hajxy yajxón cu xjia møødmädia'ag.

⁵ Hóyhøch jim nga'a ja hity maa mijtsän hajäya'ayhaam, njahmiejchp mijts jaduhñ. Xoondáacpøch jaduhñ coo ja'a Jesucristo miädia'agy hajxy hamuumdu'joot mmäbøjcä, møød coo hajxy tu'ugmädia'agy mhity.

⁶ Tøø ja'a Jesucristo miädia'agy hajxy mmäbøjcä, ja'a hajxy nWiindsøn hájtämbä. Paady hajxy mmøødhijnät tu'ugmädia'agy. Paadiä miädia'agy hajxy pedyii mgudiúunänät.

⁷ Ca'xy hajxy jaduhñ mgudiúnät nebiä Epafras hajxy xyajñähixøyyän. Mijts, mmäbøjcäbä Jesucristo miädia'agy hajxy. Tsipecøxpä Dios hajxy jabom-jabom mnämä'awät "Dioscujú'uyäp." Hix, coo ja'a Jesucristo hajxy tøø xyajñähwa'açh, paady hajxy jaduhñ mmäbøgät.

⁸ Mnigwieendähadøøjäp hajxy. Cabä häna'cä miädia'agy hajxy mmäbøjcät, ja'a häna'cä Jesucristo hajxy ca'a capxpaatpä. Høhndaacpä hajxy jaduhñ wiädity. Cab tii tøyhajt hajxy ñä'ägädä yecy.

⁹ Nebiä Dios jim yhitiän cøxp, jaanä jaduhñä Jesucristo jim yhiipä. Hix, pedyii ja'a Jesucristo Dyioshaty nebiä Tieedy Dyioshatiän.

¹⁰ Coo ja'a Jesucristo hajxy xmiøødhijnä tu'ugmädia'agy, jaduhñä Dios hajxy xmiøødhijpä. Haa ja'a Jesucristo, nägøxiä ja'a Diosmoonsähajxy jim yhanéhmänä tsajpootyp ja'a Jesucristo.

¹¹ Coo ja'a Jesucristo hajxy jaduhñ xmiøødhijtäm tu'ugjoot tu'ugwiinmahñdy, jaduhñ hajxy xyhíxäm nejjiän coo hajxy häxøpy tøø nyajcircuncidarhajtäm, je'eguiøxp coo ja'a nhaxøøgwiinmahñdy hajxy tøø nhøxhíxäm. Jaduhñä jäya'ayhajxy näje'e jia wi'i miäna'añ coo hajxy nyajcircuncidarhajtämät, højts ya'adiøjc-hajtäm. Coo ja'a Jesucristo ja'a nbojpä ngädieey hajxy häxøpy tøø xquia'a yajñähwáatsäm, cabä circuncisión häxøpy tiuunpaaady.

¹² Coo hajxy nnäbéjtäm, jaduhñ hajxy ngähxø'cäm coo ja'a nhaxøøgcuhdujt hajxy tøø nnajtshixøøyyänä, møød coo ja'a Diosmädia'agy hajxy nmäbøjcänä coo ja'a Jesucristo hajxy xñähho'túutäm, møød coo yagjujypijøjtägajtsä ja'a Dios.

¹³⁻¹⁴ Jaduhñ mäwíinäts hajxy hijty nhíjtäm nebiä ho'ogypiän coo ja'a pojpa cädieey hajxy hijty njaançh tehñ miøødhajtäm coo hajxy hijty haxøøg njaançh tehñ jiäya'ayhajtäm. Jéquiänä Moisés hajxy xyhanéhmäm nebiä hoguiuhdujt hajxy ngudiúunämät. Pero cab hajxy hoy ngudiunáañäm. Paadiä Moisés jecy miänaañ coo hajxy cu ngumädóowäm. Mänitä Dios miänaañ coo ja'a Jesucristo hajxy xñähho'túutämät cruzcøxp. Jaduhñä nbojpä ngädieey hajxy cøjx xyajñähwáatsäm. Jaduhñä Jesucristo hajxy tu'ugmädia'agy nmøødhijtänä.

¹⁵ Coo ja'a Jesucristo hajxy jaduhñ xñähho'túutäm cruzcøxp, mänitä møjcu'ugongä quiuhdujt hajxy quiøxy pøjcäxä ja'a højtscøxpä. Tøø ja'a Dios jaduhñ yajcähxø'øgy coo ja'a Jesucristo ja'a møjcu'ugong hoyhoy tøø quia'a yajmäjäda'agy.

¹⁶ Coo mijts pøn xjia wi'i yhane'emá'anät coo ja'a quiuhdujt hajxy myajtúunät, cab hajxy mnä'ägädä møjpadá'agät. Madiu'u cuhdujt hajxy miøødá, coo hajxy tijaty mga'a hu'ug mga'a cáyät, møød coo ja'a xøø hajxy myagjadøøjät, ja'a jomøjthaambä, ja'a po'oahaambä, ja'a poo'xxiøøhaambä. Cabä cuhdujt jaduhñbä hajxy mgudiúnät.

¹⁷ Hix, cab jaduhñ tiuunnä, je'eguiøxpä coo ja'a Jesucristo yaa yhooy hädaa yaabä naaxwiin. Jaayá'ayädsä quiuhdujt jaduhñ túunnäp.

¹⁸ Näje'e jäya'ayä Diosmoonsä hajxy wyiingudsähgø'øy. Páadiäc hajxy jaduhñ wyiingudsähgø'øy je'eguiøxp cooc tyijy hajxy quia'a jada'añ nebiä Dios hajxy wyiingudsähgø'øwät. Haxøøg hajxy jiaançh tehñ wyiinmahñdyhaty. Jaançh tehñ

ñiguiumáayyap hajxy je'eguiøxp cooc tyijy hajxy naxy cøxiä wiinä wyiinhixy. Cooc mijts xjia wi'i yhane'emá'anät cooc hajxy mbahíxät, cab hajxy mnä'ägädä yajwiinhóønät.

¹⁹ Yhøxhijxypä Jesucristo hajxy jaduhñ. Haa ca'a, je'e hajxy ngopc-hájtäm nägøxiä, mäduhñtiä Diosmädia'agy hajxy nmäbójcäm. Tu'ugmädia'agy hajxy xmiøødhíjtäm. Je'e ja'a mäjaa hajxy xmióoyyäm nebiä Diosmädia'agy hajxy jaduhñ maas hoy ngudiúunämät, neby hajxy jaduhñ tu'ugmädia'agy nnimiøødhíjtämät hamiñ haxøpy. Chojpiä Dios ja'a jioot jaduhñ.

²⁰ Tøø ja'a Jesucristo hajxy xñähho'túutäm. Paadiä mhamdsoo wiinmahñdy hajxy tøø mnajtshixø'øpy. Tii hajxy cooc mwi'i quihdujthatyñä nebiä häna'c-hajxy yhuuc cuhdujthatiän, ja'a hajxy ca'a mäbøjpä.

²¹ Madiu'u hajxy jaduhñ jiaanç tehñ quihdujthaty. Jaduhñ hajxy miäna'añ cooc hajxy tijaty mga'a nä'ä jøø'xät, møød cooc hajxy tijaty mga'a nä'ä nähdonät, je'eguiøxp cooc tyijy quia'a hoyyä.

²² Yhamdsoo cuhdujt hajxy jaduhñ yaghijpy cooc hajxy jaduhñ miäna'añ cooc hajxy tijaty nga'a jøø'xämät, cooc hajxy tijaty nga'a nähdoonämät. Hix, cab tii jaduhñ ñä'ägädä jecy. Paadiä cuhdujt jaduhmbä quia'a jegaambä.

²³ Cooc hajxy jaduhñ quihdujthaty, hamuumdu'joot hajxy jaduhñ quiudiuñ nägø'ø nädecypiä. Jaduhñ hajxy jia nibiäda'agyii nebiä jaanç tehñ jiootxeemybiän. Hamdsoo hajxy jia nichaaçhtiuñii, cooc tyijy yhaxøøgwinnmahñdy hajxy jaduhñ hoy yhøxhixa'añ. Tøyhajt jaduhñ cooc ja'a cuhdujt jaduhmbä hoy jia cähxø'øgy; pero cab jaduhñ ñä'ägädä tuunpaaady.

3

¹⁻² Cooc ja'a Jesucristo jiuypiojcy, paady hajxy jim nnoçxáanäm maa yhäña'ayän, jim hahooyhaamby maa ja'a Dios yhäña'ayän. Tsøcxä Diosmädia'agy hajxy hamuumdu'joot mäbójcäm. Cab hajxy nyajcopcøoyyämät ja'a hädaa yaabä naaxwiimbä.

³ Tøø hajxy jaduhmbä nnajtshixøoyyänä je'eguiøxp cooc ja'a Jesucristo hajxy xñähho'túutäm. Cooc hajxy tu'ugmädia'agy nmøødhíjtäm, paadiä Dios hajxy jim xyaghidáanäm maa je'e yhiän. Tøø ja'a hawiinjemywyiinmahñdy hajxy xmióoyyäm.

⁴ Y cooc ja'a Jesucristo yaa quiädaactägatsa'añ, mänit hajxy min xyajpædø'øgáanäm. Mänit hajxy jim xyajnøçxáanäm tsajpootyp. Hoy miänaajä hajxy jim xyaghidáanäm.

⁵ Paadiä mguhdujt hajxy naxy mdehñ ñajtshixø'owät, ja'a hajxy yaa myajtuumbiä hädaa yaabä naaxwiin. Cabä to'oxiøjc hajxy nä'ä nägoobä mnä'ä møødtsáná'awät jabiøcy. Cab hajxy haxøøg mjäya'ayhadät. Cabä mjoot hajxy mbädá'agät maa haxøøg ca'a hoybän. Cabä mmäjøønä mmädøjc hajxy tijaty mhadsójcät. Jaanç tehñ yhaxøøg jaduhñ. Jaduhñ miäbaady nej cooc jäya'ayä quepychechä naaxpoch hajxy wyiingudsähgø'øpy.

⁶ Cooc hajxy jaduhñ jiatcø'øpy, ja'a hajxy ca'a mäbøjpä, paady hajxy yajcumädowa'añii ja'a Dios.

⁷ Jaduhñ hajxy hijty mbajatcøøbiä haxøøg.

⁸ Cooc ja'a Jesucristo hajxy xñähho'túutäm, hahixøøby jaduhñ cooc ja'a mhaxøøgcuhdujt hajxy mnajtshixø'owät. Cab hajxy mnimiäjootma'adøøjät. Cab hajxy mniyhøjøøjät. Cab hajxy haxøøg mniñänømøøjät. Cab hajxy mhaxøøgcapx mhaxøøgmädiá'agät.

⁹ Cab hajxy hamiñ haxøpy mniwyiinhøønøøjät. Jaduhñ hajxy hijty mjatcø'øpy. Cab hajxy jaduhñ mjatcøøñät.

¹⁰ Ja'a hawiinjemywyiinmahñdy hajxy mhabójnöp, jaduhñä Dios hajxy hoy mbahijx mbadúunnät, je'eguiøxp cooc hajxy tu'ugmädia'agy nmøødhíjtäm. Paadiä Jesucristo ja'a hawiinjemywyiinmahñdy hajxy xmióoyyäm tehngajnä, jaduhñ hajxy maas hoy nbahíxämät.

11 Je'eduhñ tsoobaatp coo ja'a Jesucristo hajxy nmøødhíjtäm tu'ugjoot tu'ugwiinmahñdy, je'eguiøxp coo hajxy nägøxiä xñähho'túutäm wiinduhmyhagajpt, hoy piønä. Cabä Jesucristo hajxy wiingaty xquiunúu'xäm. Tu'cuhdujt hajxy xquiunúu'xäm haagä hawa'adstuum. Cab jadhñ miøjpäda'agy pø judíoshájtäm hajxy, pø caj. Cab jadhñ ñejpiä pø høxpøcyhájtäm hajxy, pø caj. Cab jadhñ ñejpiä pø cudoogø'øyhájtäm hajxy, pø caj.

12 Mijtsä Dios tøø xyajnáhdijy coo ja'a tiuung hajxy jadhñ mdúunät. Paady hajxy xjiaançh tehñ chocy. Naxiä hojioot hajxy mdehñ miøødhádät. Naxy hajxy jadhñ mhídät mee'xxieemy. Mmee'xtúgäp hajxy jadhñ.

13 Cab hajxy tii mdsippadá'agät, cab hajxy tii mma'adpáda'agät. Coo hajxy mniñägädieeyø'øwøjät, mnimiämee'xøjöp hajxy jadhñ, nebiä Jesucristo hajxy xmiéé'xäm. Coo hajxy jadhñ xmiéé'xäm, paady hajxy mmáméé'xät pøn xñägädieeyøøby.

14 Hamiñ haxøpy hajxy mniçhogøjät. Jadhñ hajxy hoy mjaançh tehñ yhidät tu'ugmädia'agy.

15 Weenä Jesucristo hajxy jadhñ jootcuyc xyaghíjtäm tu'ugmädia'agy neby hajxy yaa tøø xpiadáacäm. Jabom-jabom hajxy tsøc híjtäm jootcuyc. Tsögä Dios hajxy námáayyäm "Dioscujú'uyäp."

16-17 Mhabøjcäbä Jesucristo miädia'agy hajxy cøxiä. Myajtuungpáadäp hajxy jadhñ. Ja'a Dioswiinmahñdyhaam hajxy myajniñähixø'øwøjät. Jaaná jadhñ hajxy mnijoot-capxmøcpøjcäbät. Hamuumdu'jootä Dioshøy hajxy mhøwät. Naxiä Diosteedy hajxy mdehñ ñámá'awät "Dioscujú'uyäp", je'eguiøxp coo ja'a Jesucristo hajxy xñähho'túutäm. Je'e hajxy nWiindsønähájtäm. Ja'a Jesucristocøxpä hajxy tijaty mdúnät.

18 Mijts to'oxiøjc hajxy, tsipcøxpä mnihyhapä miädia'agy hajxy mmäbøjcät. Cähxø'øgaamb hñajty jadhñ coo ja'a Diosmädia'agy hajxy mmäbøcy. Chojpiä Dios ja'a joot jadhñ coo hajxy jadhñ mgudiúnät.

19 Mijts, ya'adiøjc-hajxy, yajxonä mdo'oxiøjc hajxy jadhñ mdsoc mba'häyówät. Cab hajxy mnä'ägä hójät.

20 Pønjaty høxcujc-hajp, mmäbøjcäbä mdajjä mdeediä miädia'agy hajxy jadhñ cøxiä. Xquiumáyäbä Dios hajxy jadhñ.

21 Jaaná jadhñ mijts teedyhajpä, cabä mnøøxä mmajc hajxy nä'ä nägoobä mnä'ä yagjootmä'adät, coo hajxy jadhñ ñä'ä jootmayhádät.

22 Jaaná jadhñ mijtspä, mijts moonsähajpä, hamuumdu'jootä mwiindsønä miädia'agy hajxy mgudiunñ mguñájxät, nebiaty hajxy xyhane'emy. Jadhñä hñä'c-hajxy näje'e jiatcø'øy, coo ja'a wyiindsøn hajxy hñajty jim tiäna'ay, mänit hajxy hñajty jøjwidsø'ø tiägø'øy tuumbä. Yajcumayaamb hajxy hñajty coo hajxy hñajty jiaançh tehñ tiuñ. Caj mijts jadhñ mjatcøøbiät. Coo hajxy hoy mdúnät, cähxø'øgäp jadhñ coo ja'a Dios hajxy hoy mwiingudsähgø'øy.

23 Hamuumdu'joot hajxy mdúnät hoy tiehñ miädyii tuungä, jadhñä Dios hajxy xquiumáyät. Cab hajxy mnä'ä yajcumayá'anät cu'ughagujc.

24 Paady hajxy jadhñ hoy mdúnät, tøø hajxy mnajuø'øy coo ja'a Dios hajxy jim xyajnøcxa'añ tsajpootyp, je'eguiøxp coo ja'a Jesucristo hajxy mmäduñ. Hix, tøyhajt hajxy jadhñ mnä'ägädä Wiindsønhaty.

25 Pøn hoy ca'a jäya'ayhajp, tsipcøxp jadhñ nøcxy quiumädowa'añ. Hoy jia mäyøøjä, cabä Dios miøjpäda'agy.

4

1 Hoorä, pønjaty moonsämøød, hoyyä moonsä hajxy myajtúnät. Cab hajxy md-saaçhtiúnät nä'ä nägoobä. Naxy hajxy mdehñ jahmiédsät coo mijtsä mWiindsøn jyjijäbä, ja'a jim hijpä tsajpootyp.

² Tehngajnä Dios hajxy mba'yá'axät hamuumdu'joot. Ca'a Diosmädia'agy hajxy mmäniyhøxmaaho'ogyii. Mnämä'awäbä Dios hajxy “Dioscujú'uyäp.”

³ Mba'yá'axäbä Dios hajxy ja'a højtscøxpä coo højts ween xyajyajnäbaadø'øy coo højtsä miädia'agy njaac mädiäacät ja'a Jesucristocøxpä, ja'a naam yajmädoyhátiäbä. Cooch jaduhñ tøø nmädia'agy, páadyhøch yaa ndsumy'häñ'ay.

⁴ Pa'ya'axä Dios hajxy ja'a høøchcøxpä, jaduhñchä Diosmädia'agy howyiinjuøøñä nyajñähixó'øwät. Jaduhñä Dios jiaanç tehñ quiumay.

⁵⁻⁶ Ja'a häna'cä Diosmädia'agy hajxy ca'a mäbøjpä, hoy yajxón hajxy mmøødmädiä'agät hoy miänaajä. Cab hajxy mmädsip, cab hajxy mmäma'adø'øwät. Coo ja'a Dios jaduhñ miäná'anät, naxy hajxy mdehm quiudiúnät. Jaduhñ hajxy paquiä mnajuø'øwät neby hajxy hoy mhadsówät hoy tiehm piønä.

⁷ Haa ja'a mägu'ughajpä Tíquico, jaanç tehñ yhóyhøch je'e xmiøødtuñ ja'a Dioscøxpä. Coo jim miédsät maa mijtsän, mänit hajxy xyhawaanaañä cøxiä ja'a høøchcøxpä.

⁸ Mänit hajxy xjiotcapxmøcpøga'añ.

⁹ Quipxiä Onésimo miødhada'añii. Hóyhøch je'e xmiøødtuumbä. Jim je'e chohmbä maa mijtsän. Xyhawaanaañäp mijts jaduhñ nebiaty yaa jiadyii.

¹⁰ Haa ja'a Aristarco, yaaç je'e xmiøødtsumçhänäabiä. Xyajpoo'xp mijts je'ebä. Møødä Marcos hajxy xyajpoo'xpä. Ja'a Bernabé jiuju miägu'ug je'eduhñ. Tøø mijts nnocyñäjaayø'øy ja'a Marcoscøxpä. Coo jim miédsät maa mijtsän, mänit hajxy hoy yajxón mwiingudsähgø'øwät.

¹¹ Jaduhñä Jesús Justo hajxy xyajpoo'xpä. Haa ja'a judíoshajxy yaabä, ja'a Diosmädia'agy hajxy tøø miäbøquiäbä, cábøchä Diosmädia'agy hajxy xmiøødyajwa'xa'añ. Jagóoyyøchä Aristarcohajxy xmiøødtuñ, møødä Marcos, møødä Jesús Justo. Hóyhøch hajxy jaduhñ xpiuhbety.

¹²⁻¹³ Xyajpoo'xp mijtsä Epafras jaduhmbä. Ja'a Jesucristo tiuung je'e tiúunäbä. Jim je'e chohmbä maa mijtsän. Høøchä tøyhajt nmøød coo ja'a Epafras ja'a Dios jiaanç tehñ miänuu'xta'agy ja'a mijtsøxpä, møødä mäbøjpadøjcøxpähajxy, ja'a hajxy jim tsänaabiä Laodicea, møød jim Hierápolis. Jaduhñä Epafras ja'a Dios miänuu'xta'agy coo mijtsä Diosmädia'agy pedyii myajtúnät hamuumdu'joot. Jaduhñä Dios hajxy xquiumáyät.

¹⁴ Jaduhñ mijts ja'a Demas xyajpoo'xpä, møødä Lucas ja'a mädsøoyøøbiä.

¹⁵ Huuc yajpoo'xä mäbøjpadøjc hajxy, ja'a hajxy jim hijpä Laodicea. Jaduhñä hermana Ninfa hajxy myajpoo'xpät, møødä mäbøjpadøjc-hajxy, ja'a hajxy jim nøcxpä Dioswiingudsähgøøbiä maa ja'a Ninfas tiøjcän.

¹⁶ Coo hädaa nocy hajxy hänäjty tøø mgapxy, mänit hajxy jim mguejxtägátsät Laodicea, weenä mäbøjpadøjc-hajxy jim quiáxpät. Mänitä nocy hajxy mgápxpät, ja'aç jim tøø nguéxiäbä Laodicea.

¹⁷ Huuc näma'awä Arquipo hajxy jaduhñ coo naxy hoy tiehm quiudiúnät nebiaty tøø yhane'emyii ja'a Dios.

¹⁸ Hamdsoo cø'øjaayháambyhøch hädaa nocy nyajmaya'añ. Huuc pa'ya'axä Dios hajxy ja'a høøchcøxpä cooch ween xpiuhbety maaç yaa ndsumyçhänä'ayän. Weenä Dios ja'a hoyhajtä weenhajt hajxy xmio'oy. Amén.

1 Tesalonicenses

¹ Chaa hõjts hädaa nocy nhädiuunmuga'añ, hõõch Pablo, mõødä Silvano, mõødä Timoteo. Mijts hädaa nocy nyajnäjaayøøby, pønjetiä Diosmädia'agy jim mæbøjp Tesalónica. Mwiingudsähgøøbiä Diosteedy hajxy mõødä Jesucristo, ja'a hajxy nWiindsønähjtämbä. Tu'ugmädia'agy hajxy mmøødhity. Weenä Dios ja'a hoyhajtä weenhajt hajxy xmio'oy mõødä Jesucristo.

²⁻³ Tehngajnä hõjtsä Dios nnäma'ay “Dioscujú'uyäp” ja'a mijtscøxpä nägøxiä. Jaanä mijtscøxpä hõjtsä Diosteedy nmänuu'xta'agy tehngajnä. Jaduhñ hõjtsä Dios nnäma'ay coo mijtsä miädia'agy hamuumdu'joot mmæbøjcä, paady hajxy hoy mjaanç tehñ quiudiuunä. Paady hajxy jaduhñ mgudiuñ, coo ja'a Dios hajxy mjaanç tehñ chocy. Coo ja'a Jesucristo hajxy hamuumdu'joot mjøbhixy, paady hajxy nägøø nädecypiä mmee'xtucy.

⁴ Mägu'ughajpædøjc, xchojpä Dios hajxy jaduhñ. Nnajuøøby hõjts jaduhñ coo ja'a Dios hajxy tøø xwyiimbiy.

⁵ Hix, coo hõjts mijts nyajwiingapxøøyy coo ja'a Jesucristo hajxy tøø xñähho'túutäm, ja'a Dioshèspiritu hõjtsä mäjaa hänajty xmiooby. Cab hõjts hänajty nä'ä nägoobä nnä'ä capxy nnä'ä mädia'agy. Coo hõjtsä mäjaa jaduhñ xmioooy, paady hõjts hänajty nnajuøøy coochä tøyhajt hänajty nyecy. Mänaa hõjts jim nhitiän maa mijtsän, hoy hõjts jim nhijty. Paady hõjts jaduhñ hoy nhijty coo hõjts mijts hänajty jaduhñ hoy ween xpiahity. Mjähmiejchp hajxy jaduhñ, túhmäts.

⁶ Jaduhñ hõjts mijts hoy xjiaanç pahity. Jaduhñä Wiindsøn Jesucristo hajxy hoy tøø mbahixpä. Yajxonä mädia'agy hajxy jaduhñ mmædooy, ja'a hõjts mijts nyajwiingapxøøyyäbä ja'a Jesucristocøxpä, ja'a hõjtsä Dios xñajtsapxøøyyäbä. Mxoondaac hajxy jaduhñ coo hajxy jaduhñ mmædooy, hoy hajxy hänajty jaduhñ hanaxiä mja tsaachpøcy. Ja'a Dios hajxy jaduhñ xyajxoondaac.

⁷ Coo ja'a Diosmädia'agy hajxy tøø mmæbøcy, hoy hajxy hänajty mja tsaachpøcy, paadiä mæbøjpædøjc-hajxy hoy miæbøjpä nägøxiä, ja'a hajxy jim tsänaabiä maa ja'a naax xiøhatiän Macedonia mõød Acaya.

⁸ Ca'a jyimiähajtiä ja'a Diosmädia'agy jaduhñ tøø wia'xy ja'a Jesucristocøxpä. Wiinduhmyhagajpt jaduhñ wia'xnä. Jaanä jaduhñä mädia'agy wia'xpä wiinduhmyhagajpt coo mijtsä Diosmädia'agy mmæbøjtsohñ. Coo ja'a mæbøjpædøjc-hajxy jaduhñ tøø miädoyhajnä, paady hõjts jaduhñ nga'a nägapxy.

⁹ Hix, majaty hõjts nwädity, jaduhñ hõjtsä mæbøjpædøjc xñäma'ay coog hõjts mijts hoy yajxon xyajtøjtägøøyy mänaa hõjts jim nhoyyän maa mijtsän, mõød coogä quepychechä naaxpoch hajxy tøø mnajtshixøøñä. Páadiäc hajxy tøø mnajtshixøøy coogä Dios hajxy mwiingudsähgøøñä, mõød coogä Diosmädia'agy hajxy hamuumdu'joot myajtuunnä. Tøyhajtä Dios jiujuä. Cabä quepychechä naaxpoch jiujuä.

¹⁰ Mõød jaduhñ hajxy miänaambä cooc mijtsä Dioshuung Jesucristo hajxy mjøbhixy coo yaa quiädaactägatsa'añ hädaa yaabä naaxwiin. Tsajpootyp chohnda'aga'añ coo hänajty yaa miänaca'añ. Coo ja'a Jesucristo hänajty tøø yho'ogy, mänit yagjujyipiøjcä ja'a Tieedy. Mänit jim ñøcxy tsajpootyp. Ja'a Jesucristo hajxy jaduhñ xyajnähwa'adsäanäm coo ja'a haxøøgjäya'ayhajxy hänajty yajcumädowa'añii ja'a Dios.

2

¹⁻² Mägu'ughajpædøjc, coo hõjts jim nhooy Filipos Diosmädia'agy-yajwa'xpä, mänit hõjtsä jäya'ay jim xxiøøghajty. Høxtä xchaaçhtiuun hõjts jaduhñ. Pero coo hõjts mäniä nnøcxy maa mijtsän, mänit hõjtsä Dios xjiootcapxmøcpøjcy, hoy hõjtsä jäya'ay hänajty xjiaanç tehñ miädsiphaty. Y coo hõjts mijtsä Diosmädia'agy nyajwiingapxøøyy, mänit

hajxy mmäbøjcy hamuumdu'joot. Tøyhajt jaduhñ, túhmäts. Coo højtsä Dios xpiuhbety, paady højtsä miädia'agy hamøj jootmøj nyajwa'xä.

³ Tøyhajtä Diosmädia'agy jaduhñ. Hamuumdu'joot højts nyajwa'xy. Cab højts nhøhnda'agy.

⁴ Haa ca'a, ja'a Dios højts xwyiinguejx Diosmädia'agy-yajwa'xpä, paady højts hamuumdu'joot nyajwa'xy ca'xy pedyii. Cab højts nyajtägach ni weeñtiä. Ja'a Dios højts xquiumaayy. Jaduhñ højtsä njoot chocy coo højts xquiumáyät. Cab højts nmøjpäda'agy pø cab højtsä cu'ug xquiumay. Hix, jaduhñä Dios hajxy xñajuóøyyäm neby hajxy nwiinmahñdhájtäm.

⁵ Mänaa højts jim nhoyyän maa mijtsän, cab højts mijts hänajty nwiinhøøna'añ. Jii jäya'ayhajxy näje'e, yajxón hajxy miäwiinhøøñ je'eguiøxp coo hajxy yajcumaya'añ. Pero højts, cab højts jaduhñ mänaa njatcø'ø. Ni cab højtsä xädø'øñ mänaa nhadsocy. Jii jäya'ayhajxy näje'ebä, yajxón hajxy miäwiinhøøñ, weenä xädø'øñ hajxy jaduhñ mio'oyii. Pero højts, cab højts jaduhñ njatcø'ø. Tøyhajt jaduhñ. Xñajuóøbiøchä Dios jaduhñ cooch nga'a høhnda'agy.

⁶ Cab højts jaduhñ nmäna'añ coo højts pøn xwyiingudsähgø'owät, ni mijts ni pøn, hoy jaduhñ jia hawiinmatsä coo højts cu xwyiingudsähgøøyy, je'eguiøxpä coo højtsä Jesucristo tøø xwyiinguexy.

⁷ Pero nnäxuu'chp højts mijts. Mijtsøxpä højtsä hojiot nmøødhaty. Høxtahmäsä tajiäya'ay ja'a yhuung hajxy cwieendähaty, jaduhñ højts mijts ngüeendähajpä.

⁸ Njaanç tehñ chojpy højts mijts, paady højts mijtsä Diosmädia'agy hoy nyajwiingapxø'ø. Høxtä cu nnähho'tuuty højts mijts coo ja'a Dios jaduhñ cu miänaañ. Hix, hoyhoy højts mijts ndsocy nba'häyoy nägø'ø nädecypiä.

⁹ Mägu'ughajpädøjc, mänaa højts mijtsä Diosmädia'agy hoy nyajwiingapxø'øyän, nna-juøøby højts hänajty coo mijtsä xädø'øñ hänajty may mga'a møødä. Paady højts hänajty møc nduñ nxajy xøømdsuhm. Mjahniejch hajxy jaduhñ, túhmäts. Ja'a nhamdsoo caayyøøc højts hänajty nguduumby nguxajpy. Cab højts hänajty nmäna'añ coo højts mijtsä caayyøøc xñä'ä mó'owät.

¹⁰ Mägu'ughajpädøjc, hoy højts jim nwädipty maa mijtsän. Cab højts jim nme'e'ch nbojty. Cab højts jim nduundägooyy nnajxtägooyy. Ni weeñtiä højts jim nga'a cädiehy. Tøyhajt jaduhñ, túhmäts. Jaduhñ højtsä Dios xñajuøøbiä coo tiøyyä.

¹¹ Høxtahmäsä teedyjäya'ayä yhuung hajxy jiootcapxmøcpøcy, jaanä jaduhñ højts mijts njootcapxmøcpøjpä. Tøyhajt jaduhñ, túhmäts. Jaduhñ mijts nmägäp xhanehmä coo hajxy hoy yajxón mjäya'ayhädät.

¹² Jaduhñä Dios jioot chocy. Coo hajxy jaduhñ hoy yajxón njäya'ayhájtmät, paadiä Dios hajxy jim xyajnøcxáanäm tsajpootyp maa miähane'emiän, maa wyiingudsähgø'øyyijän.

¹³ Paady højtsä Dios tehngajnä nnäma'ay “Dioscujú'uyäp.” Hix, coo højts mijtsä Diosmädia'agy hoy nyajwiingapxø'ø, mänit hajxy hamuumdu'joot mguhbøjcy. Jaduhñ hajxy mmäbøjcy coo jiaanç Diosmädia'aguiä. Cab hajxy mmänaañ cooc tyijy jäya'ay tøø yhädiuñ. Tøyhajt jaduhñ coo ja'a Dios tøø yhädiuñ. Y coo hajxy jaduhñ mmäbøcy, paady hajxy hoy mjäya'ayhajnä.

¹⁴ Mägu'ughajpädøjc, coo ja'a mhamdsoo mägunaax hajxy xchaaçhtiuuñ, ja'a judíos hajxy, jaduhñ hajxy mjajt mhabejpä nebiä mæbøjpädøjc-hajxy jim chaaçhpøquiän Judea-naaxooty, ja'a hajxy mæbøjpä ja'a Diosmädia'agy møødä Jesucristo miädia'agy. Jaduhñ hajxy chaaçhtiuunäbä ja'a yhamdsoo mägunaaxhajxy, ja'a judíos hajxy.

¹⁵ Coo ja'a Wiindsøn Jesucristo yagho'cä, ja'a judíos hajxy jaduhñ jatcøøyy. Jaduhñä judíos ja'a profetadøjc hajxy jecy yagho'pä. Højtspadiä judíos xjiaac hadsaächtiunnajxpä. Coo ja'a judíos hajxy jaduhñ haxøøg yhäna'c-haty, paady hajxy quia'a cumayii ja'a Dios. Hoy piønä hajxy jaduhñ miädsiphaty.

¹⁶ Hix, coo hõjtsä jäya'ayä Diosmädia'agy hänajty nyajmøødmädia'agy, ja'a hajxy ca'a judíospä, ween hajxy jaduhñ ñähwaats quiuhwaatspä, mänit hõjtsä judíos hänajty xjia wi'i yhaduga'añ. Coo ja'a judíos hajxy jaduhñ jiatcø'ø, tehngajnä hajxy hanaxiä haxøøg jiaac tehñ jiatcø'ø. Pero mobädajpä hajxy hoyhoy yajcumädowa'añii ja'a Dios.

¹⁷⁻¹⁸ Hoorä, mägu'ughajpädøjc, coo hõjts jim̄ nhooyy maa mijtsän, mänit hõjts jim̄ nwiimbíjumbä. Mänit hõjts yaa nmänajcy. Pero cab hõjts hijty yaa njega'añ. Ja wi'i ñøcxtägatsaamb hõjts jim̄ jadähoooc maa mijtsän. Hix, jaduhñ hõjts mijts njuø'ø nebiä hamdsoo huungpän. Hoy miänaajä mijts njahmiejtsta'agy, hoy hajxy nga'a ja niyhíxäm hajujcy. Høøch Pablo, mayhóoc-høch jim̄ tøø nja wi'i ñøcxtägatsa'añ, pero cab hõjtsä møjcu'ugong tøø xyajnäbaadøøyyä coo hõjts jim̄ nnøcxtägätsät.

¹⁹⁻²⁰ Haa ja'a Jesucristo, ja'a hajxy nWiindsøn hájtämbä, coo je'e yaa quiädaactägätsät hädaa yaabä naaxwiin, mänit hajxy hänajty mgähxø'øga'añ maa wyiinduumän coo ja'a Diosmädia'agy hajxy hänajty hamuumdu'joot tøø mmäbøcy. Paady hõjts njøbhixy coo ja'a Jesucristo yaa quiädaactägatsa'añ. Mänit hõjts jaduhñ nxoonäda'aga'añ nägø'ø nädecypiä ja'a mijtsøxpä. Mänit hõjtsä Dios xquiumaya'añ je'eguiøxp coo ja'a miädia'agy hajxy hoy mgudiuunä mänaabä hõjts mijts hoy nyajwiingapxø'øyän.

3

¹⁻³ Coo hõjts jaduhñ nmädoyhajty coog hajxy hijty mjaanç tehñ chaaçhpøcy, mänitøch njaanç tehñ jiootmayhajpøjcy je'eguiøxp cooçh hänajty nga'a najuø'øy pø mjøjtänaabiä møjcu'ugong hajxy hänajty. Páadyhøchä njoot hänajty jiaanç tehñ chocy cooçh jim̄ nnøcxät maa mijtsän, nmäyajtøwäämbiøch mijts hänajty pø hoy hajxy hänajty mmee'xtucy. Pero cab hänajty ñäbaadø'øwa'añ cooçh jim̄ nnøcxät. Mänitøch jaduhñ nwiinmahñdyhajty cooçhä hermano Timoteo jim̄ nguéxät nidiuhñ, y cooçh jiiby nidiuhñ nmähmø'øwät Atenas. Näguipxy hõjtsä hermano Timoteo xmiøødtuñ Diosmoonsä maa hõjtsä Diosmädia'agy nyajwa'xiän ja'a Jesucristocøxpä. Páadyhøchä hermano Timoteo jim̄ nguejxy maa mijtsän coo mijts jaduhñ xjiootcapxmøcpøgät maa hajxy hänajty mdsaaçhpøquiän, weenä Diosmädia'agy hajxy hänajty jaduhñ maas hoy mmäbøcy hamuumdu'joot, møød ween hajxy hänajty jaduhñ mga'a jootmayhaty. Hix, ja'a Dios hajxy jaduhñ tøø xyajnähdíjjäm coo hajxy jaduhñ ndsaaçhpøjcämät ja'a Jesucristocøxpä. Tøyhajt jaduhñ, túhmäts.

⁴ Haa ca'a, mänaa hõjts jim̄ nhoyyän maa mijtsän, mänit hajxy nhawáanäm coo hajxy hänajty tsipcøxp ndsaaçhpøgáanäm. Jaduhñ hajxy tøø njaanç jajt tøø njaanç habéjtäm, túhmäts.

⁵ Hoorä, cooçh hänajty nga'a najuø'øy pø hoyyä møjcu'ugong hänajty mjøjtäna'ay maa hajxy hänajty xjia wi'i jiojcapxø'øyän, mänitøch jaduhñ nja mänaañ cooçh jim̄ nnøcxät maa mijtsän. Pero coo hänajty quia'a näbaadø'øwa'añ cooçh jim̄ nnøcxät høøch, páadyhøchä hermano Timoteo jim̄ nguejxy, ween mijts jaduhñ xmiäyajtøy pø hoyyä møjcu'ugong hajxy hänajty tøø mjøjtäna'ay, pø hoyyä Diosmädia'agy hajxy hänajty mbanøcxyñä. Hix, ndsähgøøbiøch hänajty coo ja'a møjcu'ugong hajxy hänajty tøø xjiojcapxø'øy. Coo hajxy häxøpy tøø mga'a mee'xtucy, xiøøbä hõjts mijtsä Diosmädia'agy häxøpy hoy tøø nyajwiingapxø'øy.

⁶ Coo ja'a Timoteo jim̄ jiaanç hooyy maa mijtsän, mänit wyiimbíjumbä. Hoy yaa miejtstägach maa hõjtsän. Mänit hõjts xyhawaanä coogä Diosmädia'agy hajxy tehngajnä mmäbøcy hamuumdu'joot, møød coog hajxy hamiñ haxøpy mniçhogyii. Hoxioondaacnä jaduhñ. Jaduhñä Timoteo miänaambä cóogøch mijts hoy miänaajä xjiahmiejtsta'agy, møød cóogøch mijts xchocy xpia'häyoy. Jaduhñägøch mijts xjia wi'i yhixa'añ nébiøch mijts nja wi'i yhixa'añän.

⁷ Mägu'ughajpädøjc, coo højts jaduhñ nmädoyhajty coogä Diosmädia'agy hajxy hänajty tehñgajnä mmäbøcy hamuumdu'joot, mänit højts njootcugøøyy, hoy højts hänajty hanaxiä nja tsaaçhpøcy, hoy højts hänajty mõj may nyajmaajiaty.

⁸ Paady højts jootcujc nnijiäwøøyyänä coo mijtsä Diosmädia'agy tehñgajnä mbanøcxy hamuumdu'joot ja'a Jesucristocøxpä.

⁹ Coo mijts jaduhñ mmäbøcy tehñgajnä, paady højts njaançh tehñ xioonda'agy Dioswiinduum, paady højtsä Dios hoy miänaajä nnäma'ay "Dioscujú'uyäp."

¹⁰⁻¹¹ Xøømdsuhñ højtsä Diosteedy mba'ya'axy møødä Wiindsøn Jesucristo. Jaduhñ højts nmänuu'xta'agy hamuumdu'joot coo hajxy ween yajnäbaadø'øy coo højts jim nnøcxtägätsät maa mijtsän, jaduhñ højts mijtsä Diosmädia'agy njaac yajnähixø'øwät nebiaty hajxy pedyii mga'a mäbøcyñä,

¹² møød weenä Jesucristo hajxy xjiaac puhbety coo hajxy hamuumdu'joot mjaac niçhogøøjät hamiñ haxøpy neby højts mijts ndsoquiän, møød coo jäya'ay hajxy jaduhñ nägøxiä mdsoc mba'häyówät,

¹³ møød weenä Jesucristo hajxy xjiaac puhbety coo ja'a Diosmädia'agy hajxy hamuumdu'joot mbanøcxät, møød coo hajxy mga'a najtshixø'øwät, møød coo hajxy mga'a wädítät haxøøg, jaduhñ hajxy mhídät hawa'adstuum, jaduhñ hajxy pøn xquia'a nähwaambédät maa ja'a Diosteedy wyiinduumän coo ja'a Wiindsøn Jesucristo hänajty yaa tøø quiädaactägach hädaa yaabä naaxwiin. Näguipxiä Jesucristo ja'a mioonsä hänajty nägøxiä miøødcäda'aga'añ møød pønjetiä Diosmädia'agy hänajty tøø miäbøcy.

4

¹ Hoorä mägu'ughajpädøjc, ja'a Jesucristocøxpä højts mijts chamñ nmägapxy nhane'emy coo hajxy hoy mjaac tehñ jäya'ayhädät, jaduhñä Dios hajxy xquiumáyät. Jaduhñ højts mijts jayøbajt nyajnähixøøyy. Y jaduhñ hajxy hoy mjaançh jäya'ayhaty.

² Jaduhñ højtsä Wiindsøn Jesucristo tøø xñajtsçapxø'øy coo højts mijts nyajwiin-gapxø'øwät, túhmäts.

³ Jaduhñä Dios hajxy xyajmädsójcäm coo hajxy hoy ngudiúunämät nebiaty hajxy tøø xyhanéhñäm coo hajxy hoy nwädíjtämät, møød coo ja'a haxøøgwiinmahñdy hajxy ngøxy najtshixøøyyämät.

⁴ Jaanä jaduhñä Dios hajxy tøø xyhanéhñämbä coo ja'a ndo'oxiøjc hajxy hoy yajxonñ nmøødtsänáyyämät, møød coo hajxy nwiingudsähgøøyyämät.

⁵ Haa ja'a jäya'ayä Dios hajxy ca'a hixyhajpnä, cabä miädia'agy hajxy jaduhñ quiudi-uunä. Hix, wiingto'oxiøjc hajxy wyi'i yhadsojpy. Pero mijts, ca'a hajxy jaduhñ mbajatcø'øy.

⁶ Ca'a mmäjøøn mmädøjcä tio'oxiøjc hajxy jaduhñ mmägapxtägooyä. Pønjaty jaduhñ jatcøøby, tsipcøxp hajxy hoyhoy yajcumädowa'añii ja'a Jesucristo. Haa ca'a, jaduhñ højts mijts tøø nhuuc hanehmbä.

⁷ Hix, jaduhñä Dios hajxy tøø xyajnähdíjjäm coo hajxy hoy yajxonñ njäya'ayhájämät. Cab hajxy jaduhñ xyajmädsójcäm coo hajxy haxøøg nwädíjtämät.

⁸ Jaduhñds je'e, paadiä Dios ja'a yhEspíritu tøø xmióoyäm, jaduhñ hajxy hoy njäya'ayhájämät. Pønjaty jaduhñ ca'a cudiunaamb nébiøch chamñ nmädia'aguiän, ja'a Dios hajxy jaduhñ ñägädieeyøøby, ca'a jäya'ayä.

⁹ Mägu'ughajpädøjc, ja'a Dios hajxy jaduhñ tøø xyajnähixøøyyäm coo hajxy hamiñ haxøpy nniçójcämät, pønjetiä Diosmädia'agy mäbøjp. Hoorä, coo ja'a Dios hajxy jaduhñ tøø xyajnähixøøyyäm, cab yhadsipä coo højts mijts jaduhñ njaac yajnäjaayø'øwät coo hajxy jaduhñ nniçójcämät.

¹⁰ Tøyhajt jaduhñ coo ja'a mäbøjpädøjc hajxy nägøxiä mdsocy yaa Macedonia-naaxooty wiinduhmyhagajpt. Jaduhñ højts mijts mäbøcy nmänuu'xta'agy coo hajxy maas hamuumdu'joot mmädsógät.

11 Jaduhñ højts mijts tøø nhuuc hanehmbä coo hajxy hamoñ haducy mhídät, coo hajxy mga'a yajtägó'owät maa cueendä hajxy mga'a møødän, møød coo hajxy mnihix mnimiähäyowó'jät hamdsoohaamby. Jaduhñä mjoot hajxy mbádá'agät coo hajxy jaduhñ mgudiúnät,

12 jaduhñä cu'ug hajxy xquiumáyät, møød jaduhñ hajxy tii mga'a yajmaajiádät.

13 Mägu'ughajpädøjc, ja'a jäya'ayhajxy ca'a mæbøjpä, coo ja'a jiuju ja'a miägu'ug hajxy yho'ogy tiägoy, mänit hajxy jiaançh tehñ jiootmayhaty. Paady hajxy jaduhñ jiootmayhaty coo hajxy quia'a najuø'øy coo ja'a Dios ja'a ho'oguiäya'ay yagjujypiøjtägatsa'añ, ja'a hajxy hånajty tøø miäbøquiäbä. Paady højts mijts chamñ nhawáanäm, cab højtsä njoot chocy coo hajxy mjootmayhápat.

14 Hoorä, coo hajxy jaduhñ nmäbøjcäm coo ja'a Jesucristo jiujypiøjtägajch mänaabä hånajty tøø yho'oguiän, paady hajxy jaduhñ nmäbøjcämbä coo ja'a Dios ja'a ho'oguiäya'ay yagjujypiøjtägatsa'añ, ja'a hajxy hånajty tøø miäbøquiäbä ja'a Jesucristocøxpä, ja'a Jesucristo hajxy møødhijpä tu'ugmädia'agy.

15-17 Hädaa mädia'agy jaduhmbä, ja'a Jesucristøch jaduhñ xñajtsapxøøyyä. Hoorä, coo ja'a Jesucristo hånajty yaa quiädaactägatsa'añ hädaa yaabä naaxwiin, mänit jim choona'añ tsajpootyp. Mänit møc ya'axa'añ nebiä soldadowiindsøñhajxy møc ya'axiän coo hajxy hånajty chiptuna'añ. Mänitä Diosmoonsä møc ya'axaambä, ja'a møjtuung jim møødpä tsajpootyp. Mänitä Dios ja'a xiuuxt yajxu'uxa'añii møc. Mänitä ho'oguiäya'ayhajxy jiujypiøga'añ, ja'a hajxy hånajty tøø miäbøquiäbä ja'a Jesucristocøxpä. Mänitä mæbøjpädøjc-hajxy nägøxiä chajpeda'añ, pønjaty hånajty jujyñä tsuxnä, näguipxy møød pønjaty hånajty tøø yho'ogy, ja'a hajxy hånajty tøø jiujypiøjtägächäbä. Mänitä Jesucristo hajxy nägøxiä nøcxy njøjcubaadøwáanäm jim jocjooty, møød pønjaty hånajty tøø jiujypiøjtägach, møød pønjaty hånajty jujyñä tsuxnä. Hoy miänaajä ja'a Jesucristo hajxy nägøxiä xmiøødhidáanäm. Cab hajxy mänaa xpiuhwa'adsáanäm.

18 Tøyhajt hädaa mädia'agy jaduhñ. Coo hajxy jaduhñ mmæbøcy, jaduhñ hajxy hamiñ haxøpy mnijiootcapxmøcpøgø'jät.

5

1-2 Mägu'ughajpädøjc, mnajuøøby hajxy jaduhñ coo jaduhñ quia'a yajnajuø'øy mänaa xøø tiempo yhabaada'añ coo ja'a Jesucristo yaa quiädaactägatsa'añ hädaa yaabä naaxwiin. Paady, cab yhadsipä cooçh mijts njaac yajnajaayó'owät mänaa jaduhñ jiada'añii. Pero jaduhñ mæbøcy, mnajuøøby hajxy jaduhñ coo ja'a Jesucristo hajxy xyajcädaacpedáanäm jaguiapxy jamiädia'agy.

3 Jaduhñä cu'ughajxy hånajty miäna'ana'añ: "Jootcuyc hajxy nhíjtäm; cab hajxy nej njadáanäm, cab hajxy nej nhabetáanäm", nøm. Mänitä tsø'ty häyohn jaguiapxy jamiädia'agy yhabaada'añ. Paquiä cu'ughajxy jaduhñ jiada'añii tiuna'añii jaduhñ mäwiin nebiä to'oxiøjc-hajxy jiaty yhabetiän coo ja'a yhuunghajxy hånajty myina'añ quia'awa'añ. Cabä cu'ughajxy hånajty hoy piäyø'øga'añ.

4 Pero mijts, mägu'ughajpädøjc, mwiinjuøøby hajxy jaduhñ. Cab hajxy jaduhñ myagjuø'øwa'añ coo ja'a Jesucristo hajxy jaduhñ xyajcädaacpéjtämät jaguiapxy jamiädia'agy.

5 Hix, coo ja'a Diosmädia'agy hajxy nmäbøjcäm ja'a Jesucristocøxpä, paady hajxy jaduhñ mäwiin nmäbáatäm nebiä jäya'ayhajxy xøøm wädijpän. Hoy hajxy yhixy. Cab hajxy nhíjtäm hagoodstuum.

6-8 Coo hajxy jaduhñ nmäbøjcäm ja'a Jesucristocøxpä, tsøcxä hajxy híjtäm nähix hahixøø. Tsøc hajxy híjtäm wijy quejy. Jaduhñ hajxy nga'a híjtämät nebiä jäya'ay maabän, nebiä jäya'ay múucäbän. Jaduhñä haxøøgpä hajxy hoy njøjtänáayyämät nebiä soldadohajxy chiptuñän nähbujxt cuhbujxt. Tsøcxä Diosmädia'agy hajxy

hamuumdu'joot mábójcäm. Tsögä jäya'ay hajxy nägøxiä tsojc pa'häyóowäm. Tsögä Jesucristo hajxy jøbhíjxäm coo hajxy xyajnáhwa'ads xyajcuhwa'adsáanäm.

⁹ Hix, cabä Dios hajxy xyajmädsójcäm coo hajxy ndsaačhpójcämät. Caj pues. Jaduhñ hajxy tøø xyajnáhdíjjäm coo ja'a Wiindsón Jesucristo hajxy xyajnáhwaats xya-jcuhwáatsämät.

¹⁰ Paady hajxy hoy xñähho'túutäm, jaduñ hajxy hoy xmiøødhidáanäm cøjxta'axiøø. Coo yaa quiädaactägatsa'añ hädaa yaabä naaxwiin, mänit hajxy nägøxiä xwiowø'ogáanäm, møød pønjaty hánajty jujyñä tsuxnä, møød pønjaty hánajty tøø yho'ogy tøø tiägoy.

¹¹ Hoorä, jaac nijiootcapxmøcpøgøø hajxy hamiñ haxøpy. Jaac niyajnähixø'øwøø ja'a Diosmädia'agy hajxy. Jaduhñ hajxy jäda'ahaty mjaančh cudiuñ.

¹² Mägu'ughajpädøjc, mijts nmänuu'xtaacypy coo ja'a wiindsøndøjc hajxy mwiingudsähgø'øwät, ja'a hajxy jim tuumbä maa ja'a Diostøjcän, ja'a mijts xwyiingapx xjiøjcaxøøbiä.

¹³ Coo hajxy jaduñ tiuñ, paady hajxy hamuumdu'joot mdsoc mba'häyówät. Jootcujc hajxy mnimiøødhidøøjät. Cab hajxy mnimiäjootma'ad mnimiädsiphadøøjät.

¹⁴ Mägu'ughajpädøjc, jaduñ mijts njaac yajwiinxiic njaac yajwiingapxø'øy coo häna'c hajxy mhójät, ja'a hajxy naxy nuuxho'pä, coo hajxy ween tiuñ; møød coo häna'c hajxy mjootcapxmøcpøgät, ja'a hajxy jootmayhajpä; møød coo häna'c hajxy mwiingapx mjøjcaxø'øwät, ja'a hajxy hoy ca'a mábøgaambä. Mee'xxieemy hajxy jaduñ nägøxiä mmägapx mhané'emät.

¹⁵ Mniyajcopcø'øwøøjöp hajxy. Coo pøn ñägädieeyø'øwøøjät, cab yaghawiimbídät. Jaduhñä mjoot hajxy hoy miänaajä mbädá'agät coo mayhajt hajxy mduñhájät hoy ñä'a pønä, møødä mábøjpädøjc-hajxy, møødä cu'ughajxy nägøxiä.

¹⁶ Hoy ñä'a mänaajä hajxy mxoondá'agät.

¹⁷ Tehngajnä Dios hajxy mba'yá'axät.

¹⁸ Mnämä'awäbä Dios hajxy “Dioscujú'uyöp”, hoy hajxy nej cu mja jat cu mja habet. Chojiä Dios jioot jaduñ coo hajxy jaduñ ngudiúunämät, je'eguiøxp coo ja'a miädia'agy hajxy nmábójcäm ja'a Wiindsón Jesucristocøxpä.

¹⁹ Cabä Dioshespíritu hajxy mänaa mhadúgät.

²⁰ Cab hajxy mbéxät pønjataiä Diosmädia'agy najtscapxøøby.

²¹ Pero cøxäbä mädia'agy hajxy mmädoomach mädyii hoy mädyii mäbaad. Je'eds hajxy mguhbøgäp hamuumdu'joot.

²² Møødä haxøøgjootä haxøøgwiinmahñdy hajxy mgøxy najtshixø'øwät.

²³ Ja'a Dios ja'a hoyhajtä weenhajt hajxy xmióoyyäm. Ween hajxy xquiøxy yajnáhwa'ačh xquiøxy yajcuhwa'ačh. Ween hajxy xyaghity hawa'adstuum, møødä mjuøhñdyhajxy, møødä mni'xä mgopc-hajxy, høxtä coonä ja'a Wiindsón Jesucristo yaa quiädaactägätsät hädaa yaabä naaxwiin.

²⁴ Ja'a Dios hajxy tøø xwyiimbíiwäm. Jaaya'ay hajxy tsipcøxp xyajnáhwa'ads xya-jcuhwa'adsáanäm neby hajxy tøø xyajwiinwaanøøyyäm. Tøyhajt jaduñ. Hix, cabä Dios mänaa yhøhnda'agy.

²⁵ Mägu'ughajpädøjc, huuc Diospa'ya'ax hajxy tehngajnä ja'a højtscøxpä.

²⁶ Huuc näma'aw ja'a mábøjpädøjc hajxy jaduñ nägøxiä coo højts hamuumdu'joot ndsocy nba'häyoy.

²⁷ Naxiä mábøjpädøjc hädaa nocy hajxy mdehm yajwiingapxø'øwät nägøxiä. Ja'a Jesucristo jaduñ hanehmb.

²⁸ Ween mijtsä Wiindsón Jesucristo ja'a hoyhajtä weenhajt møj may xmiø'oy. Amén.

2 Tesalonicenses

¹ Chaa hõjts hädaa nocy nhädiuunmuga'añ, hõöch Pablo, mөөдä Silvano, mөөдä Timoteo. Mijts hädaa nyajnäjaayööby, pönjaty jim hamugööby Dioswiingudsähgööbiä Tesalónica. Ja'a Dios hajxy nDeedyháltäm, mөөдä Jesucristo hajxy nWiindsõnháltäm.

² Ween mijtsä Dios ja'a tsooctä mayhajt xtiuunä, ween mijtsä hoyhajtä weenhajt xmio'oy.

³ Mägu'ughajpädøjc, ja'a mijtscøxpä hõjtsä Dios hoy miänaajä nnäma'ay "Dioscujú'uyäp." Hawiinmats jaduñ. Hix, tehngajnä Diosmädia'agy hajxy mjaac mäböcy, mөөд hajxy tehngajnä mjaac niçhogyii hamiñ haxøpy.

⁴ Hoy miajatiä hõjts nwädity maa ja'a Diostøjcän, jaduñ hõjts nmädia'agy ja'a mi-jtscøxpä coo ja'a Diosmädia'agy hajxy hoy mjaanç tehñ miäböcy, mөөд coo hajxy hoy mjaanç tehñ miee'xtucy, hoy hajxy hanaxiä mja tsaachpøcy ja'a Dioscøxpä.

⁵ Coo hajxy jaduñ mmee'xtucy, paadiä Dios hajxy jim xpiäda'aga'añ hawa'adstuum coo hänajty miähane'ema'añ. Xyhijxpä Dios hajxy coo hajxy je'e myajcudsaaçhpøgø'ø. Hoy jaduñ coo hajxy jim xpiäda'agät.

⁶ Pönjaty mijts jaduñ xhaaçhtiuumb, yaghawiimbidaambiä Dios jaduñ. Jaduñä Dios jioot chocy.

⁷ Coo ja'a Wiindsõñ Jesucristo yaa miänajtägatsa'añ hädaa yaabä naaxwiin, jim choona'añ tsajpootyp. Ja'a mioonsä miöödmänacaamby, ja'a hajxy mäjaamöödpä. Hajájjäbä Jesucristo quiäda'aga'añ. Mänitä Dios hajxy nägøxiä xyajpoo'xäänäm, mөөд hõjts mөөд mijts nägøxiä. Cab hajxy jaduñ xyajtsaaçhtiuunäänä.

⁸ Coo ja'a Jesucristo hänajty yaa tøø quiäda'agy, mänitä jäya'ayhajxy quiumädowa'añ pönjatiä Dios hänajty tøø quia'a möjpäda'aguiäbä, pönjatiä miädia'agy hänajty tøø quia'a mäböjcäbä ja'a Wiindsõñ Jesucristocøxpä.

⁹ Cøjxta'axiøø hajxy jiiby chaachpøga'añ haxøøgtuum. Cab hajxy jim mänaa yajtägø'øwa'añii Dioswiinduum, maa ja'a Dios möj jaanç yhäña'ayän, maa möcmäjaa miöödän.

¹⁰ Coo ja'a Jesucristo hänajty yaa tøø quiäda'agy, mänitä jäya'ayhajxy jiaanç tehñ yagjuø'øwa'añ, ja'a Diosmädia'agy hajxy hänajty tøø miäböquiäbä, ja'a hajxy hänajty tøø nähwa'açh tøø quiuhwá'açhäbä. Mänitä Jesucristo hajxy wyiingudsähgø'øwa'añ. Jim mijts hänajty mbahidaambä je'eguiøxp coo ja'a Diosmädia'agy hajxy hänajty tøø mmäböjpä neby hõjts mijts tøø nyajnähixø'øyän.

¹¹ Ja'a mijtscøxpä hõjtsä Dios hoy miänaajä nba'ya'axy coo ja'a miädia'agy hajxy hoy mgudiúunät, ween hajxy jaduñ xquiumay. Paady hajxy tøø xyajnähdiij coo hajxy mnähwa'ads mguhwá'adsät. Ween hajxy xpiuhbety ja'a miäjaahaam coo ja'a miädia'agy hajxy hoy mmäböjcät, jaduñä hojioot hajxy mmöödhädät.

¹² Coo ja'a hoybä weenbä hajxy jaduñ mgudiúnät, jaduñä cu'ugä Wiindsõñ Jesucristo hajxy wyiingudsähgø'øwät, mөөд jaduñ mijtsä cu'ug xwyiingudsähgøøbiät. Ja'a nDiosháltäm mөөдä Wiindsõñ Jesucristo, jaaya'ay mijtsä tsooctä mayhajt xtiúunäp.

2

¹⁻² Mägu'ughajpädøjc, chámhöch nmädia'aga'añ coo ja'a Wiindsõñ Jesucristo yaa quiädaactägatsa'añ hädaa yaabä naaxwiin, mөөд coo hajxy xmiøjya'axäänäm coo hajxy jim nhamugøøyyämät maa je'ejän. Hoorä, coo hajxy mmädoyhädät cooc tyijy tøø yhabaatnä coo ja'a Jesucristo quiädaactägatsaannä, cab hajxy mdsoj mäbögät. Cab hajxy mjootmayhädät. Cab hajxy mdsähgø'øwät. Hix, jaduñä häna'c-hajxy näje'e tøø yhöñda'agy cooc tyijy ja'a Dios jaduñ tøø miäna'añ, mөөд cooc tyijy hõjts jaduñ tøø

nmäna'añ, capxyhaam, nocyhaam. Pero cab jaduñ ñä'ä tøyä. Paady højts mijts cham nmänuu'xta'agy

³ coo hajxy mga'a yajwiinhóonät ni weentiä. Hix, cab jaduñ choj habaada'añ. Jayøjpä jaya'ayä Diosmädia'agy hajxy nämay ñajtshixø'owa'añ. Mänitä haxøøgjäya'ay wyiingähxø'oga'añ, ja'a hänäjty jiiby ca'awaambä haxøøgtuum.

⁴ Mänitä haxøøgjäya'ayä Dios miädsibø'owa'añ møødä jäya'ayhajxy yaa wyiingudsähgøøbiä cøxiä. Jaanç tehñ yajcumayaamb hänäjty jaduñ. Mänitä yhanehmädaact jiiby piäda'aga'añ maa Diostøjcän. Jaduñ hänäjty ñibiäda'aga'añii nebiä Diosän. Yajwiingudsähgø'owaamb hänäjty jaduñ nebiä Diosän.

⁵ Mänájøch jimñ nhitiän maa mijtsän, mänitøch jaduñ nhuuc hawáanäm coo jaduñ jiada'añ. Mjahniejchp hajxy jaduñ, túhmäts.

⁶ Cabä haxøøgjäya'ay jaduñ choj wiingähxø'oga'añ je'eguiøxp coo yhadugyii høxtä coonä Dios yaghabáadät coo jaduñ wyiingähxø'ogät. Mnajuøøby hajxy jaduñ pøn mähadujp.

⁷ Tøø ja'a haxøøgwiinmahñdy tiägøøñä wädijpä. Hamee'ch jaduñ wiädity. Jaanä jaduñ je'e yhadújcäbä. Coo yhabáadät coo quia'a hadújcänät, mänitä mähadujpä jiøwa'adsa'añ.

⁸ Mänitä haxøøgjäya'ay jaduñ jiaanç wiingähxø'oga'añ. Mänitnä Wiindsón Jesucristo yaa quiädaactägatsa'añ mäjaamøød. Mänitä Jesucristo ja'a haxøøgjäya'ay yajcuhdägoyya'añ. Piäxujyhaam jaduñ yagho'oga'añ.

⁹ Coo ja'a haxøøgjäya'ay jaduñ wyiingähxø'oga'añ, ja'a møjcu'ugong puhbedaamb. Møcmäjaa miøødhadaamb. Mänitä hijxtahñd yajcähxø'oga'añ hoy-yagjuøøñä. Jaduñä cu'ug hänäjty wyiinhøøna'añ.

¹⁰ Haxøøgwiinmahñdyhaam hänäjty miäwiinhøøna'añ. Ja'a jäya'ayhajxy hänäjty tu'udägoyyaambä, je'edshajxy jaduñ yajwiinhøønaamb. Paady hajxy hänäjty tiu'udägoyya'añ coo ja'a tøyhajt hajxy hänäjty tøø quia'a tsocy. Paady hajxy hänäjty quia'a nähwa'ads quia'a cuhwa'adsa'añ.

¹¹⁻¹² Pønjetiä tøyhajt jaduñ ca'a tøjpa, ja'a haxøøgpä hajxy wyiinxoondaacypy. Jaduñä Dios miäna'añ coo hajxy ween yajwiinhøøñ, møød coo ja'a høhñda'agymiädia'agy hajxy ween miäböcy, jaduñ hajxy jiiby quiá'awät haxøøgtuum.

¹³ Mägu'ughajpädøjc, xjiaanç tehñ chojpy mijtsä Dios. Ja'a mijtsøxpä højtsä Dios hoy miänaajä nnäma'ay "Dioscujú'uyäp." Hawiinmats jaduñ. Paady højts jaduñ nnäma'ay je'eguiøxp coo ja'a Dios hajxy jecy xyajnähdiij coo hajxy mnähwa'ads mguhwá'adsät. Cahnä hädaa yaabä naaxwiin hänäjty yhawijy tiøø'xta'agy coo hajxy jaduñ xyajnähdiij. Coo ja'a tøyhajt hajxy tøø mmäböcy, paadiä Dios hajxy xyajnähwa'açh xyajcuhwa'açh ja'a yhEspirituhaam.

¹⁴ Coo ja'a Dios hajxy jaduñ xyajnähdiij, paadiä tøyhajt hajxy tøø mmäböcy mänaa højts mijts hoy nyajwiingapxø'øyän. Jaduñ hajxy tøø xyajnähdiijpä coo ja'a Wiindsón Jesucristo hajxy xmiøødhidät cøjxta'axiøø.

¹⁵ Mägu'ughajpädøjc, tøø højts mijtsä cuhdujt madiu'u nyajnähixø'øy capxyhaam møød nocyhaam. Hamuumdu'joot hajxy jaduñ mmäböçgät tehñgajnä. Cab hajxy nnajtshixø'owät.

¹⁶ Xjiaanç tehñ chójcäm ja'a Wiindsón Jesucristo hajxy møødä Diosteedy. Tøø mayhajt hajxy xtiúunäm coo hajxy tøø xyajwiinwaanøøyyäm cooc hajxy hoy miänaajä xmiøødhidäänäm.

¹⁷ Weenä Dios hajxy xpiuhbety coo hajxy hoy mgudiúnät, møød coo hajxy hoy mgápçät.

3

¹ Hoorä, mägu'ughajpädøjc, huuc pa'ya'axä Dios hajxy ja'a højtsøxpä, ween højtsä

mädia'agy ja'a Jesucristocøxpä paquiä nøcxy nyajwa'xy, weenä cu'ughajxy miäbøcy nej mijts tøø mmäbøquiän,

² møød ween højtsä Dios xñäwa'añ maa ja'a haxøøghäna'c-hajxiän, maa ja'a cahwi-indøyhäna'c-hajxiän. Hix, cabä jäya'ayhajxy nägøxiä miäbøcy.

³ Pero tømiaäiacpä Dios. Xpiuhbedaamb hajxy jaduñ. Xñäwa'anaamb hajxy jaduñ maa ja'a haxøøgpän.

⁴ Jaanä jaduñduhmbä, nmäbøjcäp højtsä Dios ja'a miädia'agy ja'a mijtscøxpä. Nnajuøøby højts coo mijtsä cuhdujt mgudiuna'añ, ja'a højts mijts cham nyajwiingapxøøwaambiä.

⁵ Weenä Dios hajxy xjiaac yajwiinjuøøy tiiguiøxpä hajxy jaduñ coo xchójcäm, møød tiiguiøxpä Jesucristo coo miee'xtujcy mänaa yaa yhitiän hädaa yaabä naaxwiin.

⁶ Mägu'ughajpädøjc, tøø højts nmädoyhaty cooc mijts näje'e mwi'i ñuuxho'ogy, møød cooc hajxy näje'e mga'a nä'ägädä tuna'añ. Hoorä, jaduñ højts mijts nmägapxy nhane'emy ja'a Wiindsøn Jesucristocøxpä coo hajxy mbuhwá'adsät pønjaty jaduñ wi'i ñuuxho'p, ja'a cuhdujt hajxy ca'a cudiunaambä, ja'a højts mijts tøø nyajwiingapxøøyabä.

⁷ Mnajuøøby hajxy coo højts hawiinmats xpiahíxät neby højts hoy nwäditiän. Hix, mänaa højts jim nhitiän maa mijtsän, cab højts hänajty jim nnuuxho'ogy.

⁸ Caj pues. Xøømdsuhm højts hänajty nduñ nxajy. Paady højts hänajty jaduñ nguhdujthaty, cab højts hänajty ndsocy coo højts mijts cu xpiuhbejty. Ngujuuby højts hänajty tijaty højts hänajty ngaaby.

⁹ Paady højts hänajty jaduñ nguhdujthaty, jaduñ højts hänajty ndsocy coo højts mijts jaduñ xpiahíxät, hoy højtsä cuhdujt hänajty nja møødä coo højts mijts cu xpiuhbejty.

¹⁰ Mänaa højts jim nhitiän maa mijtsän, jaduñ højts hänajty nmägapxy nhane'emy coo hajxy nägøxiä mdun mxájät. Pøn jaduñ ca'a tunaamb, cabä caayyøøc hajxy mmó'owät.

¹¹ Coo højts jaduñ tøø nmädoyhaty cooc hajxy jaduñ näje'e mwi'i ñuuxho'ogy, møød cooc hajxy näje'e mga'a nä'ägädä tuna'añ, møød cooc hajxy näje'e mwi'i yajtägøøy maa cueendä hajxy mga'a møødän,

¹² pønjaty jaduñ jatcøøby, jaduñ højts nmägapxy nhane'emy ja'a Wiindsøn Jesucristocøxpä coo hajxy jootcujc ween tiuñ xiajy, jaduñä quiaayyøøc hajxy ñiguiudúunäxät.

¹³ Mijts, mägu'ughajpädøjc, cab hajxy mnänuuxøøwät coo ja'a hoybä weenbä hajxy mdúnät.

¹⁴ Pøn jaduñ ca'a cudiunaamb neby højts cham ngujaayän maa hädaa noquiän, myajcopcøøwäp hajxy jaduñ. Cab hajxy mmøødwädiymúnät. Ween jaduñ chähdiuñ.

¹⁵ Pero cab hajxy mmädsiphädät. Jaduñ hajxy mhoj mmägäpxät nebiä huch nebiä puhya'ayän.

¹⁶ Yejpiä Dios ja'a hoyhajtä weenhajt. Ween mijtsä hoyhajtä weenhajt møj may xmio'oy hoy miänaajä. Ween hajxy nägøxiä xmiøødhity.

¹⁷ Høøch Pablo, hamdsoo cøøháamhøch cham njahmiaya'añ. Jadúhñhøch nxøø ngujaay hoy ñä'ä mädyii nocyjiootiä: Pablo.

¹⁸ Ween mijtsä Wiindsøn Jesucristo ja'a tsooctä mayhajt xtiunä nägøxiä. Amén.

1 Timoteo

¹ Pablohájpøch høøch. Ja'a Jesucristøch xquiuguexyhajp. Ja'a Diosteedy møødä Wiindsøn Jesucristo, mänitøch hajxy tøø xyhane'emy cooch jaduhñ ndúnät cuguexy. Ja'a Dios hajxy jaduhñ xyajnáhwaats xyajcuhwáatsám. Ja'a Jesucristo hajxy njøbhíjxám coo hajxy hawa'adstuum xpiäda'agáañäm.

² Timoteo, míichhøch hädaa nocy nyajnájaayøøby. Jadúhñhøch miích njuø'øy nebiä hamdsoo huungpän coo ja'a Diosmädia'agy nmäbójcäm. Tøyhajt jaduhñ. Ja'a Diosteedy møødä Wiindsøn Jesucristo, ween miíchä tsooctä mayhajt hajxy xtiuunä, ween xñäxuuçh, weenä hoyhajtä weenhajt xmio'oy.

³ Hoorä, mänaa højts jim tøø nhíjtäm Efeso, mänitøch nwiinmahñdyhajty cooch jim nnøcxät Macedonia-naaxooty. Mänitøch miích nmänuu'xtaacy coo jim mmähmó'øwät Efeso nidiuhñ, coo jaduhñ jim ween mduñ wiindsøn maa ja'a Diostøjcän. Jadúhñhøch miích chamñ nnämäaguumbä coo jim mjaac túnät. Hix, jii jäya'ayhajxy näje'e, cabä Diosmädia'agy hajxy hoy yajnáhixø'øy neby højts nyajnáhixø'øyyäm. Wiingaty hajxy yajnáhixø'øy. Mhójäp jaduhñ coo hajxy jaduhñ wiing quia'a yajnáhixø'øñät.

⁴ Jaaná jaduhñduhmbä, mhójäp je'ebä pønjatiä nähap hajxy wi'i miädiacp, møød pønjaty yajcopcøøby tijatiä jecyjiäya'ayhajxy hijty xiøhaty. Cab jaduhñ choobaady coo jaduhñmbä capxy coo jaduhñmbä mädia'agy hajxy tehñgajnä yajcapxiø'øy. Jue'e tsoobaatp coo ja'a Diosmädia'agy hajxy nmäbójcäm coo ja'a Dios hajxy xpiädáacäm hawa'adstuum.

⁵ Pero jaduhñä Dios jioot chocy coo hajxy hamuumdu'joot nniçhojc nnibia'häyóowämät hamiñ haxøpy. Pønjaty howyiinmahñdy møød, je'ehajxy jaduhñ hamuumdu'joot niçhojc nibia'häyóowäp, møød pønjaty haxøøgwiinmahñdy ca'a møød, møød pønjatiä Diosmädia'agy hamuumdu'joot mæbøjp.

⁶ Tøø jäya'ayä Diosmädia'agy hajxy ñajtshixø'øñä näje'e. Tøø hajxy jaduhñ tiu'udägoonä. Xiøøbä hajxy yajcapxiø'øy mädyii ca'a tsoobaatp.

⁷ Jaduhñä jioot hajxy jia wi'i piäda'agy coo ja'a jecyquihdujt hajxy yajnáhixø'øwät, ja'a Moisés jecy quiujáhyyäbä. Pero cab hajxy wyiinjuø'øy neby hajxy jia wi'i yajnáhixø'øwa'añ cooc tyijy tiøyyä.

⁸ Coo ja'a jecyquihdujt hajxy jaduhñ hoy nyajtúunämät, mänit jaduhñ tiuungpaady. Tøyhajt jaduhñ, túhmäts.

⁹ Paadiä Dios ja'a jecyquihdujt piädaacy coo ja'a haxøøgjäya'ayhajxy jaduhñ quiumädówät, ca'a jie'eguiøxpä ja'a hojiäya'ayhajxy. Tøyhajt jaduhñ, túhmäts. Jue'eçh jaduhñ nnänøømby ja'a haxøøgjäya'ayhajxy, pønjatiä Diosmädia'agy ca'a mæbøjp, møød pønjatiä Dios ca'a wiingudsähgøøby, møødä cubojpä cugädieebiähajxy, møød pønjatiä haxøøgwiinmahñdy møød, møød pønjatiä Dios mägapxtägooby, møød pønjatiä tiaj tieedy yagho'p, møødä jäya'ay-yagho'pähajxy,

¹⁰ møød pønjatiä wiingto'oxiøjc møødtsänaaby, møød pønjatiä miäya'adiøjc møødmaab, møødä jäya'amiee'tspähajxy, møødä hønndaacpähajxy, møødä mänähøønøøbiähajxy, møød pønjatiä hoguiapxiä homiädia'agy hajxy ca'a cudiumb.

¹¹ Hädaa hoguiapxy hädaa homiädia'agy hädaaduhmbä, jim jaduhñ myiñ cujaay maa ja'a Diosmädia'aguiän coo ja'a Dios hajxy tøø xpiädáacäm hawa'adstuum. Dióshøch jaduhñ tøø xyajnáhdijy coo ja'a miädia'agy nyajwá'xät. Jaançh tehñ jiootcujcä Dios jaduhñ.

¹² Haa ja'a Wiindsøn Jesucristo, je'eçhä mäjaa tøø xmio'oy. Páadyhøch jaduhñ nnäma'ay "Dioscujú'uyäp" cooch tøø xwyiinguexy coochä miädia'agy jaduhñ nyajwá'xät. Xyaghi-jxnájxhøch jaduhñ cooch hánajty hoy nduna'añ,

¹³ hóyhøch hijty haxøøg nja wiingapxpety. Nmädsibøøbiøch hijty. Nhøxpäbøobiøch hijty pønjaty mäbøjp ja'a Jesucristocøxpä. Pero cábøçhä Dios xyajcumädooyy. Xñäxúu'tshøch jaduhñ je'eguiøxp cooçh hänäjty nga'a nnajuø'øynä cooçh hänäjty haxøøg njatcø'øy.

¹⁴ Mänitøçhä Dios ja'a tsooctä mayhajt mõj may xtiuunä. Mänitøch xpiädaacy tu'ugmädia'agy mөөdä Jesucristo. Páadyhøçhä Diosmädia'agy nmäbøjnä. Páadyhøçhä jäya'ay nägøxiä ndsojc nba'häyoonä.

¹⁵ Paadiä Jesucristo yaa yhooyy hädaa yaabä naaxwiin, ja'a cubojpä ja'a cugädieebiähajxy hoy yajnähwa'açh yajcuhwa'açhii. Tehñ tiøyhajt jaduhñ. Tsøc hajxy hamuumdu'joot mäbøjcäm. Høøçh, hanáxiøçhä pojpa cädieey hijty nmөөdä may. Cab ndijy pøn hijty xmiäbaady nébiøçhä pojpa cädieey hijty nmөөdä.

¹⁶ Hóyhøçhä pojpa cädieey hijty may nja mөөdä hanaxiä, mänitøçhä Dios xñäxuu'ch, jaduhñä Jesucristo yajcähxø'cy cooçh hänäjty xjiaançh tehñ miee'xtucy, weenä cubojpä cugädieebiähajxy jaduhñ wyiinjuø'øy coo hajxy hawiinmats miäbøgät ja'a Diosmädia'agy ja'a Jesucristocøxpä, mөөd ween hajxy jaduhñ wyiinjuøøbiä coo hajxy hoy jiugyhada'añ cøjxta'axiøø nebiä Dios jiugyhatiän.

¹⁷ Tsøgä Dios hajxy hoy miänaajä wiingudsähgøøyyäm. Nidiuhñ jaduhñ miähane'emy cøjxta'axiøø. Cab jaduhñ mänaa yho'oga'añ tiägoyya'añ. Cab hajxy jaduhñ mänaa nhíxäm. Tehñ tiøyhajt jaduhñ.

¹⁸⁻¹⁹ Huung Timoteo, chámhøch miích nwiingapx njøjcaxø'øy coo ja'a Diosmädia'agy hamuumdu'joot mmämøjtäná'awät, mөөd coo tehngajnä mmäbøgät, mөөd coo hojioot howyiinmahñdy mjaac panøcxät. Jaduhñ miíchä Dioscugapxyhajxy jecy tøø xyhuuc mädiaacpä coo miích jaduhñ mgudiuna'añ. Najtscapxøøyyä hajxy jaduhñ ja'a Dioshèspiritu. Jii jäya'ayhajxy näje'e, coo ja'a yhojiootä yhowyiinmahñdy hajxy tøø ñajtshixø'øy, paady hajxy tøø tiu'udägoonä. Cabä Diosmädia'agy hajxy miäbøjnä.

²⁰ Jaduhñä Himeneohajxy tøø jiaty mөөdä Alejandro. Tøøçhä mõjcu'ugong hajxy nyajcø'ødägø'øy, weenä Dios hajxy jaduhñ miänuu'xta'agy coo hajxy miämee'xøøjät, mөөd coo hajxy ween wyiinjuø'øy coo jaduhñ yhaxøøgä coo ja'a Dios hajxy ñähojy.

2

¹ Hoorä, chámhøch nyajwiinxiic nyajwiingapxø'øwa'añ nebiatiä Dios hajxy nba'yaaxmüjcämät. Tsøgä Dios hajxy mänuu'xtáacäm ja'a jäya'aguiøxpähajxy nägøxiä mäduhñtia hajxy yaa chána'ay hädaa yaabä naaxwiin. Tsøgä Dios hajxy nämáayyäm "Dioscujú'uyäp."

² Pønjaty hajxy xyhanéhäm, je'eguiøxpä Dios hajxy tsøc mänuu'xtáacäm, mөөdä gobiernähajxy, mөөdä gobernadorhajxy, mөөdä cuduunghajxy. Jaduhñ hajxy hagujc jootcujc nhíjtämät. Jaduhñä cu'ug hajxy xquia'a hadsíjpämät. Jaduhñä Diosmädia'agy hajxy hoy ngudiúunämät. Jaduhñä Dios hajxy hoy nwiingudsähgøøyyämät.

³ Hahixøøby jaduhñ coo ja'a Dios hajxy jaduhñ nmänuu'xtáacämät ja'a gobiernäcøxpähajxy. Jaduhñä Dios hajxy xquiumáayyämät. Jaaya'ay hajxy jaduhñ xyajnähwaats xyajcuhwáatsäm.

⁴ Jaduhñä Dios jioot chocy coo hajxy nägøxiä nnähwaats nguhwáatsämät mäduhñtia hajxy yaa ndsänáayyäm hädaa yaabä naaxwiin, mөөd coo ja'a tøyhajt hajxy nwiinjuøøyyämät ja'a Jesucristocøxpä.

⁵⁻⁶ Hix, tu'uquüä Dios hajxy nDeedyhájtäm. Jaanä jaduhñduhmbä, tu'jäya'ay hajxy jim xñähgapxtúutäm Dioswiinduum. Ja'a Jesucristo je'e. Mänitä Dios miänaañ coo ja'a Jesucristo yaa jiäya'ayhädät hädaa yaabä naaxwiin. Mänitä Jesucristo hamdsoojoot ñiñähdujcä. Mänit hajxy nägøxiä hoy xñähho'túutäm. Jaduhñ nbojpa ngädieey hajxy nägøxiä xyajnähwaats xyajcuhwáatsäm.

⁷ Páadyhøçhä Dios xpiädaacy cooçh xquiuguexyhädät cooçhä mädia'agy jaduhñ nya-jwá'xät coo ja'a Jesucristo hajxy tøø xñähho'túutäm, mөөd cooçhä jäya'ayä Diosmädia'agy

nyajwiingapxó'owät, ja'a hajxy ca'a judíospä, ween hajxy jaduhñ miäböcy, møød weenä tøyhajt hajxy jaduhñ wyiinjuø'oy. Tømiädiáacpøch jaduhñ, cábøch nhøhnda'agy.

⁸ Jaduhñds je'e, jadúhñhøchä njoot chocy coochä nmäya'adiøjcä Dios hajxy pia'yá'axät, hoy ñä'ä majatiä hajxy mhamugø'oy Dioswiingudsähgøøbiä. Hojioot howyiinmahñdymøød hajxy jaduhñ mba'yá'axät, ca'a yhadsip ca'a yhajootma'adä, ca'a yhaxøøgwiinmahñdymøødä.

⁹ Jaaná jaduhñduhmbä, cábøchä njoot chocy coo ja'a to'oxiøjc-hajxy hoçhähdiiuunnä ñibiäda'agøøjät. Cabä quiuhwaay hajxy hanaxiä yajcopcø'owät. Cabä oro hajxy piädá'agät ni perlas. Cabä wit tsowjatypä hajxy miäwädítät.

¹⁰ Jaduhñä jioot hajxy piädá'agät coo ja'a mayhajt hajxy tehngajnä tiúnät, jaduhñ hajxy yajcähxó'ogät coo ja'a Dios hajxy tøyhajt wyiingudsähgø'oy hamuumdu'joot.

¹¹ Hamoñ haducy ja'a to'oxiøjc-hajxy jim yhamädoowhídät maa hajxy naxy mhamugø'oyän. Jaduhñä Diosmädia'agy hajxy hoy yhabøgät. Møød mee'xxieemy hajxy jim yhídät.

¹² Jadúhñhøch nmägapx nhanehmbä coo ja'a to'oxiøjcä Diosmädia'agy hajxy jim quia'a yajnáhixó'owät maa hajxy naxy mhamugø'oyän. Hamoñ haducy hajxy jim ñä'ägä hídät. Cabä to'oxiøjc cuhdujt hajxy miøødä coo ja'a ya'adiøjc hajxy yhoj yá'axät.

¹³ Hix, ja'a Adán, jawyiin je'e yhädiuunnä; høxhaamä Eva jiaac hädiuunnä.

¹⁴ Jaaná jaduhñduhmbä, ja'a Eva jaduhñ wiinhøhñä ja'a møjcu'ugong, ca'a yhAdángä. Jaduhñä Eva quiädiehchohñ.

¹⁵ Paadiä to'oxiøjc-hajxy jiaançh tehñ chaaçhpøcy coo yhuunghajxy myiñ miech. Pero coo ja'a Dios ja'a miädia'agy hajxy tehngajnä miäböjcät, jaduhñä piojpä quiädieey hajxy yajnáhwa'ads yajcuhwa'adsáanäxä. Jaduhñä Dios chojpä coo ja'a to'oxiøjcä mäböjpadøjc hajxy hamuumdu'joot choc pia'häyówät, møød coo hojioot howyiinmahñdy hajxy miøødhádät, møød coo hajxy mee'xxieemy yhídät.

3

¹ Hahixøøby jaduhñ coo ja'a mjoot hajxy mbädá'agät coo hajxy mdúnät wiindsón maa ja'a mäböjpadøjc-hajxiän. Hodiunng jaduhñ. Tehñ tøyhajt jaduhñ.

² Pøñ jaduhñ tuumb wiindsón maa ja'a Diostøjcän, tsipcøxpä howyiinmahñdy miøødhádät. Jagooyyä to'oxiøjc tu'ug yaghídät, ca'a mietsc ca'a tiägøøgä. Cabä vino comjaty yhú'ugät. Cabä haxøøgwiinmahñdy miøødhádät. Hoy wiädítät. Coo pøñ miédsät tøghayohbiä maa ja'a tiøjcän, piu'umió'owäp quioñdymó'owäp jaduhñ. Jiädäp yajnáhixó'ow jaduhñ.

³ Cab yhu'ug cab jiøø'xät. Cab chiptúnät. Mee'xxieemy jaduhñ quiapx miädiá'agät. Cab tii yajtsiptá'agät. Cabä xädø'øñ yhadsógät.

⁴ Pøñ jaduhñ tuumb wiindsón maa ja'a Diostøjcän, tsipcøxpä yhuungä tio'oxy hoy miägapx yhané'emät, weenä yhuunghajxy miädia'agymiäböcy, ween wyiingudsähgø'oyii ja'a yhuung.

⁵ Hix, pøñä yhamdsoo huungä yhamdsoo to'oxy hoy ca'a hane'emaamb, cab hoy miähane'ema'añ maa ja'a Diostøjcän.

⁶ Cab jaduhñ yhahixø'oy coo ja'a naamdägø'øbä tiúnät wiindsón maa ja'a Diostøjcän, coo jaduhñ ñä'ä niguiumayøøjät. Wehñdä jaduhñ quiumädówät nebiä møjcu'ugong quiumädooyyän.

⁷ Pøñ jaduhñ tuumb wiindsón maa ja'a Diostøjcän, tsipcøxpä jaduhñ hoy wiädítät maa jäya'ayhagujcän, ja'a hajxy ca'a Diosmädia'agymiäböjpä. Jaduhñ quia'a nähøjøøjät, jaduhñ quia'a yajtu'udägoyyøøjät ja'a møjcu'ugong.

⁸ Jaaná jaduhñduhmbä, ja'a ya'adiøjc-hajxy jim mäbuhbejpä maa ja'a Diostøjcän, tsipcøxpä hajxy hoy jiäya'ayhádät. Cab hajxy ñä'ä metscapx ñä'ä tägøøgcápxät. Cab hajxy yhu'ug cab hajxy jiøø'xät. Cabä jäya'axiädø'øñ hajxy yhadsógät.

⁹ Tsipcøxpä tøyhajt hajxy miäbögät ja'a Jesucristocøxpä, ja'a hijty cuyu'uchpä. Howyi-inmahñdymøød hajxy jaduhñ miäbögät.

¹⁰ Pønjetiä jioot tsojp coo hajxy miäbuhbédät maa ja'a Diostøjcän, cab hajxy mdsoj pädá'agät. Ween hajxy jayøjp mhuuc hijxmach pø hoy hajxy hānajtj tiuna'añ. Coo hajxy hānajtj tøø mhijxmach coo howyiinmahñdy hajxy jiaanč møødä, mänit hajxy mbädá'agät coo hajxy jaduhñ miäbuhbédät.

¹¹ Jaanä jaduhñä to'oxiøjc-hajxypä, ja'a hajxy jim mähuhbejpä maa ja'a tsajtøjcän. tsipcøxp hajxy hoy jiäya'ayhájpät. Cab hajxy pøn ñähøønó'owät. Cab hajxy yhu'ug cab hajxy jiøø'xät. Hamuumdu'jootä hoybä weenbä hajxy quiudiúnät cøxiä.

¹² Hoorä, ja'a mähuhbejpädøjc-hajxy, ja'a ya'adiøjc-hajxypä, jagooyyä to'oxiøjc hajxy tu'ug yaghídät. Hoy ja'a yhuungä tio'oxy hajxy miägäpax yhané'emät.

¹³ Ja'a mähuhbejpädøjc-hajxy jaduhñ hoy tuumbä, cumayáanäp hajxy jaduhñ ja'a mähøjpädøjc, møød jaduhñä möjjuøhñdy hajxy miøødhádät coo hajxy hānajtj miädia'aga'añ coog hajxy miäböcy ja'a Jesucristocøxpä.

¹⁴⁻¹⁵ Jaduhñhøchä njoot jia tsocy cooch jim mobädajpä nnøcxät maa miichän. Pero cooch jaduhñ jim nga'a nä'a tsoj nøcxät, páadyhøch hädaa nocy nyajnājaayø'øy, jaduhñ mnajuø'owät nebiä mähøjpädøjc-hajxy jim hoy yhidät maa ja'a Diostøjcän. Hoy miänaajä Dios yhity. Hoy miänaajä Dios ja'a mähøjpädøjcä tøyhajt yajñähixø'øy ja'a Jesucristocøxpä. Hamuumdu'joot hajxy jaduhñ ñäwa'añii.

¹⁶ Jaanč tehñ miøj jaanč tehñ jiaanč hädaa mädia'agy jaduhñ ja'a Jesucristocøxpä, coo hajxy hoy xyajñähwaats xyajcuhwáatsäm. Tehñ tiøyhajt jaduhñ. Cuyu'uchä Dios hädaa mädia'agy hijty yaghity. Mänit hajxy jaduhñ tøø xyajwiinjuøyyäm. Hoorä, coo ja'a Dios jaduhñ miänaañ, mänitä yHuung yaa quiejxy hädaa yaabä naaxwiin. Ja'a Jesucristo je'e. Jaduhñ je'e jiäya'ayhajty neby højtshájtäm. Mänitä Dioshespíritu jaduhñ yajcähxø'cy coo ja'a Jesucristo yhity hawa'adstuum. Mänitä Jesucristo yhiixä ja'a Diosmoonsä, ja'a hajxy jim tsohmä tsajpootyp. Mänitä Jesucristo jim ñøcxy tsajpootyp. Mänitä mädia'agy wia'xy ja'a Jesucristocøxpä maa ja'a jäya'ayhajxy chāna'ayän, ja'a ca'a judíoshajxypä. Mänitä jäya'ayhajxy yaa may miäböjcy ja'a Jesucristocøxpä hädaa yaabä naaxwiin.

4

¹⁻² Hoorä, howyiinjuøñä ja'a Dioshespíritu tøø miäna'añ coogä mäwiinhøhmbähajxy piädø'oga'añ. Jaduhñäc hajxy ñibiäda'aga'añii nebiä hoyhāna'cän. Pero yhamdsoo cuhdújtäc hajxy yajtunaamby. Haxøøgcuhdújtäc hajxy miøødhadaamby møødä haxøøgjuøhñdy. Jaduhñägä mäwiinhøhmbähajxy yajtägø'owa'añii ja'a möjcu'u. Jaduhñäc hajxy ñajtsapxø'owáanäxä nébiägä høhnda'agymiädia'agy hajxy yajñähixø'owät. Mänitägä mähøjpädøjcä høhnda'agymiädia'agy hajxy nämay yhamädoowhida'añ. Mänitäc hajxy jaduhñ miäböga'añ. Mänitägä tömiädia'agy ja'a Jesucristocøxpä hajxy ñajtshixø'owa'añ.

³⁻⁴ Jaduhñägä mäwiinhøhmbähajxy hānajtj yhøhnda'aga'añ cooc tyijy yhaxøøgä coo hajxy nbøjcämät, møød cooc tyijy quia'a hähixø'øy coo hajxy cøxiä wiinä njøø'xämät, hoy ja'a Dios cøxiä wiinä tøø jia päda'agy. Hix, tijatiä Dios tøø piäda'agy, haagä hoy je'e. Hähixøøby jaduhñ coo hajxy nguhbøjcämät, pønjetiä tøyhajt mähøjp ja'a Jesucristocøxpä. Coo hajxy jaduhñ nguhbøjcäm, jaduhñä Dios hajxy nnämáayyämät "Dioscujú'uyäp." Y cab jaduhñ yahähixø'øy coo hajxy nwiingápämät.

⁵ Coo ja'a Dios jaduhñ tøø miäna'añ, møød coo ja'a Dios hajxy nba'yáaxäm, jaduhñä Dios cøxiä wiinä quiunuu'xy.

⁶ Naxy miičhä mähøjpädøjc jaduhñ mdehmñ ñajtsapxø'owät nébiøch chamñ mädia'aguiän, jaduhñä Jesucristo hoy mbuhbédät, jaduhñä homiädia'agy hoy mjaac habögät ja'a Jesucristocøxpä, ja'a hajxy nmähøjcämbä. Je'e miich mnä'ägä panøcxyhajpy.

7 Cabä nähapmädia'agy myajcopcø'øwät nebiä teedyhaphajxy wyi'i miädia'aguiän. Höhnda'agymiädia'agy je'e jaduñ. Jimä mjoot mnä'ägä pädá'agät nebiä Diosmädia'agy maas hoy mjaac panøcxät.

8 Tsoobaatp jaduñ siémpräm coo nni'xä ngopc hajxy møc nyaghíjtämät. Pero maas nä'ägädä tsoobaatp coo ja'a Diosmädia'agy hajxy tehngajnä nbanøcxämät. Hix, coo hajxy jaduñ hoy ngudiúunämät, jaduñä Dios hajxy tøø xyajwiinwaanøøyyäm coo hajxy hodium xyaghidáanäm hoy miänaajä, møød jäda'ahaty, møød miimnä mejtsnä. Jaduhñ hajxy xyagjugyhadáanäm cøjxta'axiøø neby je'e jiugyhatiän.

9 Tehñ tiøyhajt hädaa mädia'agy jaduñ. Tsøg hajxy hamuumdu'joot mábøjcäm.

10 Coo ja'a Dios hajxy jaduñ xyaghidáanäm hodium hoy miänaajä, paady hajxy møc nduun nxájjäm. Jujquiä Dios. Coo ja'a miädia'agy hajxy nmábøjcäm coo ja'a Jesucristo ja'a jäya'ay nägøxiä tøø ñähho'tu'udy, paady hajxy xyajnáhwa'ads xyajcuhwa'adsáanäm.

11 Jaduhñä mábøjpädøjc mwiingapx mjøjcaxø'øwät nébiøch naamnä tøø nmädia'aguiän.

12 Tehngajnä hoguiuhdujt myaghídät, jaduñ pøn xquia'a péxät, hoy jomøjt may mga'a ja møødä; møød jaduñä mábøjpädøjc xpiahíxät. Hoy yajxon mgapx mmädiá'agät. Caj mänaa mgapxtägóyyät. Hoy piønä mdsoc mba'häyówät. Hoy ja'a Diosmädia'agy mmábøgät. Mmøødhádäbä howyiinmahñdy.

13 Mäduhñtiøch jim nga'a tsoj nøcxy maa miichän, tehngajnä Diosmädia'agy mgapx mmädiá'agät coo hajxy jim naxy mhamugø'øy maa ja'a Diostøjcän. Jaduhñä mábøjpädøjc myajwiinxiic myajwiingapxø'øwät.

14 Mänaa miichä majjäya'adiøjc jim xquiø'ønähgapiän maa ja'a Diostøjcän, mänit miichä Dioshèspíritu xñägapxy cooc miichä Diosmädia'agy myajwa'xa'añ. Mänit miich häna'c jaduñ xñajtsapxøøyyä. Mänit miichä Dios mäjaa xmiooy coo ja'a miädia'agy jaduñ myajwá'xät. Naxy mdehm jiahmiejtstá'agät coo ja'a mäjaa jaduñ xmiooy. Caj mnajtshixø'øwät.

15 Jaduhñä mjoot mbädá'agät coo ja'a Diosmädia'agy jaduñ hamuumdu'joot myajwá'xät hoy miänaajä. Coo jaduñ mgudiún mguñáxät, jaduñä cu'ug xyhíxät coo jaduñ hoy myajtu'uyo'oy.

16 Niyajcopcø'øwøø nej mwädity, nej myajnáhixø'øy. Tehngajnä jaduñ mgudiún mguñáxät, jaduñ mnähwa'ads mguhwa'adsät näguipxy møødä jäya'ayhajxy hamädoowhijpä.

5

1 Cabä majjäya'adiøjc mhoj myá'axät. Mee'xxieemy mwiingapx mjøjcaxø'øwät nebiä mhamdsoo teediän. Møødä muutsc-häna'c-hajxypä, jaduñ mmägapx mhané'emät nebiä mhamdsoo puhya'ayän.

2 Jaanä jaduñä tsøødaj mmägapx mhanéhmbät nebiä mhamdsoo tajjän. Møødä to'oxiøjc-hajxy muutspä, jaduñ mmägapx mhanéhmbät nebiä mhamdsoo puhdo'oxiän. Caj mmägapxtägóyyät.

3 Jii yaamgto'oxyhajxy näje'e, cab hajxy pøn ñä'ägädä møødä. Tøyhajt hajxy ñidiuhmhaty. Je'eds hajxy mbuhbédäp.

4 Pero ja'a yaamgto'oxyhajxy jaac jimhä, pø jimä yhuunghajxy, pø jimä yhoc-huunghajxy, ween hajxy jaduñ piuhbedyüi nägø'ø nädecypiä ja'a yhamdsoo huunghajxy, ja'a yhamdsoo hoc-huunghajxy. Jaduhñä mábøjpädøjc-hajxy quiumayøøjät ja'a Dios coo tiaj tieedy hajxy jaduñ piuhbejtägätsät. Jaduhñ hajxy yajcähxø'øgät coo ja'a tiaj tieedy hajxy jiaanç wiingudsähgø'øy.

5 Hix, ja'a yaamgto'oxyhajxy tehñ tiøyhajt nidiuhmhajpä, ja'a Dios hajxy yhajodhajpy. Xøømdsuhm hajxy miänuu'xta'agy.

⁶ Pero ja'a yaamgto'oxy ja'a Dios hajxy ca'a hajodhajpä, coo ja'a jioot hajxy chógät coo hajxy xyi'ig xioonda'aga'añ, jaduñä Dios yhixy nebiä ho'ogyiän, hoy hajxy jia jujyñä, hoy hajxy jia tsuxnä.

⁷ Jaduhñä mabøjpädøjc mwiingapx mjøjcapxø'owät coo ja'a homiädia'agy hajxy pedyii ween quiudiuñ, jaduñ hajxy quiumayøøjät ja'a cu'ug.

⁸ Pønhatiä jiuju miägu'ug ca'a hijxp ca'a mähäyoob møødä yhuung møødä tio'oxy, tøø ja'a Diosmädia'agy hajxy ñajtshixøøñä neby hajxy hijty miäbøquiän ja'a Jesucristocøxpä. Maas haxøøg hajxy jiatcø'oy quejee häna'c-hajxy ca'a nä'ägä mabøjpä.

⁹ Mgujähyyäbä yaamgto'oxiä xiøø hajxy pønhati hajxy mbuhbedaamby. Je'e xiøøhajxy pädäp pønhati tægøøghii'x jomøjt tøø yhabéjtäxä, møød pønhatiä ya'adiøjc tu'uquiä tøø miøødtsäna'ay,

¹⁰ møød pønhatiä cu'ughajxy ñänøømby coo ja'a mayhajt hajxy tøø tiúunäxä, møød pønhatiä ñøøxä miajc hoy yajxón tøø yajtso'ogy tøø yajyeegy, møød pønhatiä pu'umiooby coñdymooby ja'a jäya'ayhajxy jim miimb mejtspä maa ja'a tiøjcän, møød pønhatiä mabøjpädøjc cø'øbujp tecypiujp, møød pønhatiä puhbejp ja'a jäya'ayhajxy häyohmbaatpä, møød pønhatiä jioot tøø piäda'agy coo ja'a hoybä weenbä hajxy quiudiün quiuñäxät hoy ñä'ä tiijä. Ja'a yaamgto'oxy hädaa hoguiuhdujt jaduñbä hajxy yajtuumbä, je'eds hajxy mbuhbédäp.

¹¹⁻¹² Pero ja'a yaamgto'oxy tsaanbä muutspähajxy, cabä xiøøhajxy quiujähyyäxät, cab hajxy mbuhbédät. Hoy hajxy tøø jia mäna'añ coogä Jesucristo hajxy hamuumdu'joot miäduna'añ maa ja'a tsajtøjcän, mäniä jioot hajxy näje'e piäda'agy coo hajxy piøjtägatsa'añ coo hajxy yhuuctägatsa'añ. Cabä Jesucristo hajxy jaduñ hoy miädunaañä. Y tu'udägóyyäp hajxy jaduñ.

¹³ Jaanä jaduñä yaamgto'oxy tsaanbä muutspä hajxy näje'e jiajpä, wi'i ñuuxho'p hajxy, tøjc-tøjc hajxy wiädity. Wi'i miädia'agy-yajnajxp hajxy. Ñä'ä yaghadsow ñä'ä yajpøgø'oy hajxy cøxiä tøø jiaty. Cøxiä hajxy ñä'ä pamädia'agy mädyijaty ca'a jagä hawiinmats.

¹⁴ Jaduhñhøchä njoot jia tsocy coo ja'a yaamgto'oxyhajxy piøjtägätsät, ja'a hajxy tsaanbä muutspä, weenä ñøøxä miajc hajxy jaduñ jiaac yajtso'ogy, weenä jioonä tiøjc hajxy hoy yajxón cwieendähaty, jaduñ hajxy quia'a hoj quia'a ya'axøøjät ja'a miädsiphajxy.

¹⁵ Hix, tøø hajxy näje'e tiu'udägoonä. Tøø ja'a møjcu'ugongä miädia'agy hajxy jiojpøgø'oyyänä.

¹⁶ Mijts, puhdo'oxytiøjc, pø jim mijtsä yaamgto'oxy mmøødä maa ja'a mjuju maa ja'a mmägu'ughajxiän, ween hajxy jaduñ mbuhbety, jaduñä mabøjpädøjc-hajxy quia'a taj quia'a máyät neby hajxy jaduñ piuhbédät. Hix, jaduñä mabøjpädøjcä yaamgto'oxy hajxy hoy piuhbédät, ja'a hajxy pøn ca'a jaanç møødpä.

¹⁷ Ja'a majjäya'adiøjc-hajxy, ja'a hajxy jim hoy tuumbä wiindsón maa ja'a Diostøjcän, ween hajxy hoy miäjuyii, møødä Diosmädia'agy hajxy yajñahixøøbiä. Ween hajxy nä'ä tægø'øbä miäjuyii.

¹⁸ Hix, jaduñä Diosmädia'agy miäna'añ: “Maa ja'a weeyä trigo hajxy hñajty mya-jtehndse'ediän, weenä weeyä jaduñ piuhjøø'xy.” Jaanä jaduñ miänaambä: “Weenä cuduumbä cubøjpä miäjuyii.”

¹⁹ Coo ja'a Diostøgootypä wiindsón ñäxø'owø'owøøjät, mäniä mäxøhbä miädia'agy miäbøjcäxät pø jimä capxtøøbä miøødä mejtstägøøg. Pø cab jaduñ miøødä, cabä miädia'agy jaduñ miäbøjcäxät.

²⁰ Ja'a Diostøgootypä wiindsøn hajxy hoy ca'a wädiipä, mhøjäp myá'axäp jaduñ maa ja'a mabøjpädøjc-hajxy nägøxiä yhamugø'oyän, weenä miäwiindsøn hajxy jaduñ chähgø'oy.

²¹ Miičh nwiingapx njøjcapxøøby coo hädaa cuhdujt jaduhmbä tsipcøxp mgudiún mguñáxät. Cabä mmähäna'c nä'ä nägoobä mnä'ä tsaächtiúnät, ni caj nä'ä nägoobä mbuhbédät. Tu'cuhdujtä häna'c mnä'ä híxät, hoy jaduhñ xjia mägu'ughaty, hoy jaduhñ xjia mädsiphaty. Xyhíxäbä Dios jaduhñ møødä Jesucristo, møødä Diosmoonsähajxy jim tsajpootypä, ja'a hajxy wiimbíyyäbä.

²² Coo pøn hänajty tiägø'øwa'añ tuumbä tsajtøjwiindsøn, caj mdsoj cø'ønähgábät. Jayøjp mwiinmahñdyhädät hodiägaamby pø hoy hänajty tiuna'añ, pø caj. Hix, coo jaduhñ ñä'ä tu'udägóyyät, wehñdä miičhä cu'ug xñänómät cooc tyijy miičh tøø mbuhbety. Howyiinmahñdy myaghídäp hoy miänaajä.

²³ Timoteo, naxy miičh mjootpädø'øgyii. Hahixøøby coo vino weeñtiä mhú'ugät. Cabä nøøyyähajtiä mhúucnät.

²⁴ Jii jäya'ayhajxy näje'e, coo hajxy mänaa quiädieey, paquiä jaduhñ wyiingähxø'øgy, cahnä hajxy hänajty miøjya'axyii haguyc. Pero jii wiinghäna'c-hajxy, cabä piojpa quiädieeyhajxy choj wiingähxø'øgy, høxtä coonä hajxy hänajty tøø miøjya'axyii haguyc.

²⁵ Jaanä jaduhñduhmbä, jii jäya'ayhajxy näje'ebä, paquiä jaduhñ wyiingähxø'øgy coo hojioot hajxy jiaanč tehñ miøødä. Hoy jaduhñ quia'a ja tsoj wiingähxø'øgy, tsipcøxp cujegy wyiingähxø'øga'añ.

6

¹ Mijts mäbøjpädøjc, nämay hajxy mhity cudoogø'øy. Naxiä mwiindsøn hajxy mdehm wyiingudsähgø'øwät. Naxy hajxy jaduhñ mdehm miädia'agymiäbøgät. Hix, coo hajxy jaduhñ hoy mga'a cudiún mga'a cuñáxät, wehñdä mwiindsøn ja'a Dios haxøøg ñänómät møødä Diosmädia'agy.

² Jaanä jaduhñduhmbä, pønjetiä wyiindsønä Diosmädia'agy mäbøjp, cabä mwiindsøn hajxy mbéxät. Pero hamuumdu'joot hajxy mwiingudsähgø'øwät. Maas hoy hajxy jaduhñ mmädia'agymiäbøgät je'eguiøxp coo ja'a Diosmädia'agy miäbøjpä, møød coo hajxy mmøødničogyii. Naxiä mäbøjpädøjc hädaa cuhdujt jaduhmbä mdehm wyiingapx mdehm jiojcapxø'øwät.

³ Jii häna'c-hajxy näje'e, wiing hajxy yajnähihø'øy. Cabä hoguiapxiä homiädia'agy hajxy wyiinjuø'øwa'añ neby hajxy nyajnähihø'øyyäm ja'a Wiindsøn Jesucristocøxpä coo ja'a hoybä weenbä hajxy jaduhñ nbáatäm.

⁴ Ja'a häna'c-hajxy jaduhñ wiing yajnähihø'øbiä, jaanč tehñ ñiguiumáayyap hajxy jaduhñ cooc tyijy hajxy jiaanč tehñ jiaty, cooc tyijy hajxy jiaanč tehñ ñajuø'øy. Pero cab hajxy tii ñä'ägädä jaty, cab hajxy tii ñä'ägädä najuø'øy. Hanaxiä mädia'agy hajxy yajtsip yajma'adø'øy, ja'a ca'a tsoobaatpä. Coo hajxy jaduhñ jiatcø'øy, paady hajxy cøxiä wiinä yajcapxiø'øy, paady hajxy miänähøøñø'øy, paady hajxy haxøøgjaty ñiñäma'ayii.

⁵ Coo hajxy jaduhñ jiaanč tehñ chiptsocy, paady hajxy jiaanč tehñ ñibiamädsibø'øyii. Jaanč tehñ yhaxøøgä wyiinmahñdyhajxy. Tøø ja'a tøyhajt hajxy ñajtshixøøñä. Wi'i yajmäjuyaamb hajxy, paady hajxy ñibiäda'agyii cooc tyijy ja'a Diosmädia'agy hajxy miäbøcy, cooc tyijy hajxy yajnähihø'øy. Naxiä häna'c jaduhmbä mdehm piuhwá'adsät.

⁶ Coo ja'a Diosmädia'agy hajxy hoy nmäbøjcämät, jaduhñä hoyhajtä weenhajt hajxy møj may nbáatämät, jaduhñ hajxy jootcuyc nhíjtämät.

⁷ Haa ca'a, coo hajxy yaa nmiin ngáhwäm hädaa yaabä naaxwiin, cab hajxy tii nmämiin nmägáhwäm. Nähwa'ads hajxy nmaaxhuunghájtäm. Jaanä jaduhñduhmbä, coo hajxy nho'c ndägóoyäm, mänit hajxy cøjx nhøxhó'cäm tijaty hajxy yaa nmøødhájtäm hädaa yaabä naaxwiin. Cab hajxy tii hoy nmädsoonáañäm. Tehñ tiøyhajt jaduhñ.

⁸ Hoorä, coo wit tucxy hajxy nmøødhájtäm, coo cay hu'ugy hajxy nmøødhájtäm, paady hajxy jootcuyc tsøc híjtäm.

⁹ Pero jii häna'c-hajxy näje'e, jaduhñ hajxy wyi'i miäna'añ coo hajxy miäyøøj'øwa'añ. Paadiä haxøøgwinnmahñdy hajxy pianøcxa'añ. Jaduhñ hajxy haxøøgtuum nõcxy quia'awa'añ. Je'e hajxy yhøxtaaby mädyii jaduhñ ca'a howyiinmahñdy. Je'e hajxy jaduhñ quiumädowáañpäp.

¹⁰ Jiiyyä haxøøgpä ca'a hoybä ñä'ägädä tsohñda'agy coo jäya'ayhajxy wyi'i xiädø'øñhadsocy, møød coo hajxy wyi'i wyiinduc-haty. Paadiä Diosmädia'agy hajxy näje'e tøø ñajtshixø'øy. Paady hajxy jiaanç tehñ jiootmayhajnä.

¹¹ Pero miich, coo miichä Dios xquiuguexyhaty, cabä haxøøgpä ca'a hoybä mädyii mgudiún mguñáxät. Ja'a hoybä weenbä jaduhñ mgudiúnäp. Ja'a Dios mwiingudsähgø'øwäp. Mmábøjcabä miädia'agy. Mmädsoc mba'häyówäp. Mmee'xtúgäp hoy mja tsaächpøcy. Mee'xxieemy mhäna'c-hádät.

¹² Hahixøøby coo ja'a Diosmädia'agy hamuumdu'joot mmábøgät, jaduhñä Dios xyagjuyhádät cøjxta'axiøø neby je'e jiugyhatiän. Mänit miichä Dios jaduhñ xyajñähdiij coo jaduhñ mjugyhádät cøjxta'axiøø mänaa miich nnägäpxiän cu'ugwiinduum coo ja'a Diosmädia'agy tøø mmäbøcy.

¹³⁻¹⁴ Chaads miich nwiingapx njøjcapxø'øy coo ja'a Dioscuhtujt tehñgajnä mjaac cudiún mjaac cuñáxät, møød coo mga'a yajtägätsät, jaduhñä Dioscuhtujt quia'a nänømøøjät haxøøg, høxtä coonä yhabáadät coo ja'a Wiindsøn Jesucristo yaa quiädaactägatsa'añ hädaa yaabä naaxwiin. Ja'a Dios hajxy jaduhñ xyhíjxäm møødä Jesucristo. Ja'a Diósädsä jugyhajt mooby hoy piønä hoy tyiijä. Haa ja'a Jesucristo, coo hñajty jim tøø yajmechii maa ja'a Poncio Pilato wyiinduumän, mänit ñägäpxy coogä Dios tøyhajt yHuunghadyii.

¹⁵ Ja'a Dios jaduhñ yaghabaadaamb mänaa ja'a Jesucristo yaa quiädaactägatsa'añ hädaa yaabä naaxwiin. Jaanç tehñ jiootcuja Dios. Nidiuhñ tiuñ Wiindsøn. Nidiuhñ miähane'emy. Ni pøn jaduhñ quia'a mäbaady. Nägøxiä gobiernähajxy yhane'emyii møødä reyhajxy.

¹⁶ Hoy miänaajä Dios yhity. Jim maa ja'a Dios yhitiän, jaanç tehñ miøc jim yhajajy. Paady hajxy jim hoy nga'a wiingumedsøøyyäm. Tsøc hajxy hoy miänaajä Wiindsøñhajtäm.

¹⁷ Pønjaty mäyøø hädaa yaabä naaxwiin, jaduhñ miich mwiingapx mjøjcapxø'øwät coo hajxy quia'a niguiumayøøjät, møød coo ja'a Dios hajxy yhajodhádät. Møj jaançhä Dios. Cøxiä wiinä hajxy xmióoyyäm, jaduhñ hajxy jootcuja nhíjtäm. Pero cabä mäyøøjäya'ayä xädø'øñ hajxy yhadsögät. Hix cøjxp tägooby ja'a hajxy miämäyøøhajpiä.

¹⁸ Jaduhñä mäyøødøjc mwiingapx mjøjcapxø'øwät coo hojioot hajxy jiaanç tehñ miøødhádät. Weenä häyoobädøjc hajxy piuhbety. Cab hajxy wyiinduc-hádät.

¹⁹ Coo hajxy jaduhñ yaa yhojiäya'ayhádät hädaa yaabä naaxwiin, mänitä hoyhajtä weenhajt hajxy møj may piáadät Dioswiinduum. Y jaduhñ hajxy cøjxta'axiøø yagjugyhádøøjät nebiä Dios jiugyhatiän.

²⁰⁻²¹ Timoteo, coo miichä Dios tøø xyajñähdiij coo ja'a miädia'agy myajwá'xät, paady hamuumdu'joot mgudiúnät, paady jaduhñ mnäwá'anät. Hix, tøø jäya'ayä Diosmädia'agy hajxy näje'e ñajtshixø'øy. Wiingmädia'agy hajxy tøø piadu'ubøcy cooc tyiij miaas yajxonä. Pero cabä mädia'agy jaduhñbä tiøyyä. Cab jaduhñ choobaady. Nä'ä nägoobä yhøhñda'agy ja'a Dioscøxpä. Cabä høhñda'agymiädia'agy jaduhñbä mmøjpädá'agät.

Ween miichä Dios ja'a tsooctä mayhajt xtiunä. Amén.

2 Timoteo

¹ Høøch hädaa nocy nhädiuumby, høøch Pablohajpä. Ja'a Jesucristøch jaduhñ xquiuguexyhajp. Ja'a Dios jaduhñ mänaamb cooch jaduhñ xquiuguexyhädät. Coö ja'a Jesucristo hajxy xmiøødhájtäm tu'ugjoot tu'ugwiinmahñdy, paadiä Dios hajxy tøø xyajwiinwaanøøyyäm coö hajxy cøjxta'axiøø xyagjugyhadäänäm neby je'e jiugyhatiän.

² Miiçh Timoteo, miichhøch hädaa nocy nyajnäjaayøøby. Jadúhñhøch miiçh ndsocy nébiøch nhamdsoo huungän. Ween miiçhä Diosteedy mayhajt xtiuunä møødä Wiindsón Jesucristo. Ween xñäxuuch. Weenä hoyhajtä weenhajt xmiø'oy.

³ Hojiot howyiinmahñdymøødhøchä Dios nwiingudsähgø'oy nébiøchä nhap nébiøchä ndeedyhajxy jecy wyiingudsähgøøyyän. Hoy ñaaghøoc-høchä Dios nba'ya'axy, mänitøch miiçh njahmiejtsta'agy. Mänitøchä Dios jaduhñ nnäma'ay “Dioscujú'uyäp” ja'a miiçhcøxpä.

⁴ Nja wi'i yhiixtägatsáambiøch miiçh, jadúhñhøch nxoonndaacpøgät. Xøømdsúhñhøch miiçh njahmiejtsta'agy. Njahmiejchpøch jaduhñ coö miiçh hánajty mjaançh tehñ jioot-mayhaty mänaa hajxy jim nniwiá'xäm.

⁵ Jadúhñhøch njahmiejtspä coö miiçhä Diosmädia'agy hamuumdu'joot mmäbøcy. Ja'a mdajhoc Loida møødä mdaj Eunice, jaaya'ayä Diosmädia'agy hajxy jayøjp mäbøjtsohñ. Tøyhajt jaduhñ coö miiçh jaduhñ mbamäbøjpä.

⁶ Mänäajøch miiçh jim ngø'ønähgapiän, mänit miiçhä Dios mayhajt xtiuunä. Jaduhñ miiçh mäjaa xmiøoy coö ja'a tiuung mdúunät. Cham nnäma'ay coö mga'a najt-shixø'øwät ja'a mayhajt ja'a Dios mänit xtiúunäbä, pero ween hamuumdu'joot mjaac yajtuñ.

⁷ Hix, jaduhñä Dios hajxy xyajmädsójcäm coö hajxy nga'a tsähgøøyyämät. Jaduhñ hajxy xyajmädsójcämbä coö hajxy ndúunämät ja'a miäjaahaam, møød coö hajxy hamiñ haxøpy nniçhojc nnibia'häyóowämät, møød coö hojiot howyiinmahñdy hajxy nya-jtúunämät.

⁸ Jaduhñds je'e, cab mdsähdiúnät ja'a Dioscøxpä coö ja'a miädia'agy hánajty mya-jwa'xä. Ni jaduhñ mga'a tsähdiúumbät ja'a høøchcøxpä, hóyhøch yaa nja tsumyçhänä'ay. Páadyhøch yaa ndsumyçhänä'ay coöchä Dios ja'a miädia'agy nyajwá'xäbä. Cab mdsähgø'øwät coö mdsaaçhpøgät ja'a Diosmädia'agyquiøxpä nébiøch ndsaaçhpøquiän høøch. Hix, xpiuhbédäbä Dios jaduhñ ja'a miäjaahaam.

⁹ Ja'a Dios hajxy tøø xyajnähwats tøø xyajcuhwáatsäm. Jaaya'ay hajxy tøø xpiädáacäm coö ja'a miädia'agy hajxy hoy ngudiúunämät. Paadiä Dios hajxy jaduhñ xyajnähwats xyajcuhwáatsäm coö hajxy xchójcäm, møød coö mayhajt hajxy jecy xtiúunäm ja'a Jesucristocøxpä; ca'a jie'eguiøxpä cooc tyijy hajxy hoy nguhdujthájtäm. Cahnä hädaa yaabä naaxwiin hánajty yhawijy tiøø'xta'agy, tøøyyämä Dios ja'a mayhajt hajxy hánajty jaduhñ xtiúunäm.

¹⁰ Coö ja'a Jesucristo hajxy yaa hoy tøø xyajnähwats tøø xyajcuhwáatsäm, jaduhñä Dios ja'a mayhajt yajwiingähxø'nä, ja'a hajxy jecy xtiúunämbä. Coö ja'a Jesucristo hajxy yaa hoy tøø xñähho'túutäm, jaduhñ quiähxø'øgy coö hajxy cøjxta'axiøø xyagjugyhadäänäm neby je'e jiugyhatiän. Jaduhñ jii by myiñ cujaay maa ja'a Diosmädia'aguiän.

¹¹ Páadyhøchä Jesucristo jaduhñ xquiuguexyhaty coöchä Diosmädia'agy jaduhñ nya-jwá'xät coö jaaya'ay hajxy jaduhñ tøø xyajnähwats tøø xyajcuhwáatsäm.

¹² Cooch jaduhñ nyajwa'xy, páadyhøch jaduhñ ndsaaçhpøcy. Pero cábøch ndsähdiuñ. Hix, coöchä Dios ja'a miädia'agy jaduhñ nmäbøjcä cooch jaduhñ xyajnähwá'adsa'añ,

páadyhøchä tøyhajt nmøødä coo jadhun hoy cwieendähada'añ pønjätyhøch tøø xya-jcø'ødägø'øy. Paady jadhun cwieendähada'añ coo ja'a Jesucristo yaa quiädaactägatsa'añ hädaa yaabä naaxwiin.

¹³ Jaac panøcx ja'a hoguiuhdujt, ja'ačh miich tøø nyajnäihixø'øyäbä. Coo ja'a Jesucristo hajxy nmøødhjätäm tu'ugjoot tu'ugwiinmahñdy, paadiä miädia'agy hamuumdu'joot mmäbøjcät, paadiä jäya'ay hamuumdu'joot mdsoc mba'häyówät, ja'a miich myajnäihixøøbiä.

¹⁴ Hamuumdu'jootä tøyhajt myajwá'xät, ja'a Dios tøø xyajcø'ødägø'øyäbä. Caj myajtägätsät. Coo ja'a Dioshespíritu hajxy nmøødhjätäm, paady miich jadhun xpiuhbeda'añ.

¹⁵ Tøø miichäda'a mmädoyhaty coočhä mabøjpädøjc nämay tøø xpiuhwaatsnä, ja'a hajxy jim tsohm̄bä Asia-naaxooty, näguipxy møødä Figelo møødä Hermógenes.

¹⁶⁻¹⁸ Pero cábøchä Onesíforo mabøcy tøø xmiädsähdiuñ, hóyhøch yaa nja tsumyčhäna'ay. Weenä Dios ja'a Onesíforo ja'a yhuungä tio'oxy ñäxuu'tsä. Coo miejch Roma, mänitøch nägø'ø nädecypiä xyhøxtaayy. Y coočh yaa xpiaaty, mänitøch mayhooc xpiuhbejty. Y hamuumdu'joot hajxy jim xpiuhbéjtäm Efeso, túhmäts. Coo yhabáadät coo ja'a Dios hajxy hánajty xyajtøyhajtyegáanäm, weenä Dios ja'a Onesíforo mänit ñäxuučh.

2

¹ Huung Timoteo, weenä Jesucristo xpiuhbety, jadhun mga'a tsähgø'owät mänaa. Coo ja'a Jesucristo hajxy jadhun nmøødhjätäm tu'ugjoot tu'ugwiinmahñdy, paadiä mayhajt hajxy jadhun xtiúunäm.

² Mänájøch miichä Diosmädia'agy nyajwiingapxø'øyän, nämayyä jäya'ayhajxy hánajty miämadoona'ay. Jadhun miich wiinghana'c mnajtscapxøødiägätsät, ja'a hajxy hoy cudiuumbä, ween wiinghäna'c hajxy jiaac tehñ ñajtsapxøødiägätsägumbä.

³ Ja'a Jesucristocøxpä mmee'xtúgät coo hánajty mdsaačhpøcy, nebiä soldadohajxy miee'xtuquiän.

⁴ Hix, ja'a soldadohajxiä, jadhunä jioot hajxy piäda'agy coo hajxy ween quiumayii ja'a wyiindsøn̄hajxy. Cab jadhun yhähixø'øy coo wiingtuung hajxy yhøxtá'awät.

⁵ Jaanä jadhunduhm̄bä, ja'a häyø'pädøjc-hajxiä, coo hajxy jadhun hoy yhäyø'ogät nebiä cuhdujt myiñän, mänit hajxy hawiinmats quiuhäyø'ogät. Pero coo hajxy quia'a häyø'ogät, cab hajxy tii piáadät.

⁶ Jaanä jadhunduhm̄bä, ja'a yuubä pujxpähajxy hoy cuduumbä, je'edshajxy jadhun jawyiin mäjúuyyap.

⁷ Yajcopcø'ow hoy nébiøch chamñ nmäna'añ, weenä Dios jadhun xquiøxy yajwiinjuø'øy.

⁸ Ja'a Jesucristo, ja'a David jecy yhaphajt yhoc-hajt. Coo ja'a Jesucristo hánajty tøø yho'ogy, mänit jiuypjøjtägajch. Ja'a Jesucristocøxpøch nnä'ägädä yajwiingapxø'øyhaty.

⁹ Coočhä Jesucristocøxpä jadhun nyajnäihixø'øy, páadyhøch yaa ndsaačhpøcy. Páadyhøch yaa ndsumyčhäna'ay nebiä cahwiindøybän. Pero cabä Diosmädia'agy jadhun mänaa yhadugyii. Wiinduhmyhagajpt jadhun wia'xy.

¹⁰ Coo jadhun hoy miaajä wia'xy, páadyhøch yaa hoy ñejpiä nmee'xtucy, weenä jäya'ayhajxy jadhun ñähwaats quiuhwaatspä, ja'a Dios jadhun tøø yajnähdjiiäbä coo ja'a Jesucristo hajxy miøødhidät tu'ugjoot tu'ugwiinmahñdy, møød ween hajxy yagjugyhadyii cøjxta'axiøø nebiä Dios jiugyhatiän.

¹¹ Hix, coo hajxy nniñähdújcämät coo hajxy nhó'cämät nebiä Jesucristo yho'quiän, mänit hajxy jadhun njugyhajtämät cøjxta'axiøø nebiä Jesucristo jiugyhatiän. Møød jadhun hajxy jim nhidáanäm maa je'e yhitiän. Tehñ tiøyhajt jadhun.

¹² Jaanä jadhunduhm̄bä, coo hajxy nmee'xtújcämät, mänitä Jesucristo hajxy jim xmiøødhanéhmämät. Pero coo hajxy nniijögápxämät cooc tyijy hajxy nga'a hixyhajtäm, cab hajxy jim xyajtägøøyyämät maa je'e yhitiän.

¹³ Hoy hajxy nja hõhndaacäm, cabä Jesucristo mänaa yhõhnda'agy. Hoy miänaajä tiõmiädia'agyhaty.

¹⁴ Myagjahmiejtstá'agäbä mabõjpadõjc jaduhñ nébiõch naamnä tõõ ngujaayän. Hoorä, jaduhñ myajwiingapxõ'õwät coo ja'a capxiä mädia'agy hajxy quia'a yajtsibõ'õwät, ja'a ca'a tsoobaatpä. Jaduhñä Dios hajxy xyhanéhäm. Cab jaduhñ tiuungpaady coo hajxy jaduhñ yajtsibõ'õy. Ja'a jäya'ayhajxy jaduhñ hamädoowhijpä, cabä hoguiapxiä homiädia'agy hajxy jaduhñ hoy yhabõga'añ.

¹⁵ Hamuumdu'jootä tøyhajt myajnahixõ'õwät ja'a Jesucristocõxpä, jaduhñä Dios xquiumáyät, jaduhñ mga'a tsähdiúnät.

¹⁶ Cabä capxiä mädia'agy myajcapxiõ'õwät, ja'a ca'a tsoobaatpä. Ja'a jäya'ayhajxy jaduhñ tehngajnä yajcapxiõõbiä, tehngajnä hajxy jaduhñ nõcxy tiu'udägoyya'añ.

¹⁷ Y maas nämayyä jäya'ayhajxy jaduhñ tiu'udägoyya'añ coo ja'a capxiä mädia'agy hajxy jaduhñ miädõwät, ja'a jaduhñ ca'a tsoobaatpä. Tõõ ja'a Himeneo jaduhñ tiu'udägooñä mõõdä Fileto.

¹⁸ Tõõ ja'a tøyhajt hajxy ñajtshixõõñä. Jaduhñ hajxy yhõhnda'agy cooc tyijy hajxy nga'a jujypijõjtägatsáañäm. Ja'a mabõjpadõjc-hajxy näje'e, coo hajxy jaduhñ wyiinhõõñii, cabä Diosmädia'agy hajxy jaduhñ hoy miäbõgaannä.

¹⁹ Pero tõõ ja'a Dios hajxy xpiädaacäm coo ja'a miädia'agy hajxy tehngajnä nbanõcxämät. Jaduhñä Dios tõõ miäna'añ cooc ñajuõ'õy põnä miädia'agy hamuumdu'joot mabõjcäp. Jaduhñ tõõ miänaambä coo ja'a haxõõgcuhdujt hajxy ween ñajtshixõ'õy põnjaty niñänõõmäp coogä Diosmädia'agy hajxy miäbõcy.

²⁰ Maa ja'a mäyõõjaya'ay tiõjcän, madiu'u txy jiihy. Jiibiä orotexy, mõõdä platatexy, mõõdä quepychechtiexy, mõõdä pochtiexy. Tsoobaatpä orotexy mõõdä platatexy. Cabä quepychechtiexy jiaty tsoobaady mõõdä pochtiexy.

²¹ Jaanä jaduhñduhmbä, põnjatiä haxõõgwiinmahñdy najtshixõõby, hoy ja'a Diosmädia'agy hajxy jaduhñ pianõcxät. Hoy hajxy jaduhñ quiudiúnät waambaty hajxy yhane'emyii ja'a Wiindsõñ Jesucristo. Jaduhñ hajxy quiumayõõjät.

²² Pero miich, mnajtshixõ'õwäbä haxõõgwiinmahñdy nebiä muutsc-häna'c-hajxy naxy yhadsoquiän. Ja'a mabõjpadõjcä Dios hajxy hamuumdu'joot pa'yaaxpä, howyiinmahñdy hajxy miõõd. Miäbõjpiä Diosmädia'agy hajxy. Hamiñ haxõpy hajxy ñiichocy ñibia'häyoyii. Cab hajxy chiptsocy. Jaduhñ miich hamuumdu'joot mbahixät.

²³ Caj myajtägõ'õwät maa häna'cä capxiä mädia'agy hajxy nä'ä nägoobä yajcapxiõ'õyän, ja'a ca'a tsoobaatpä, ja'a ca'a tuungpaatpä. Ja'a capxiä mädia'agy jaduhmbä, ja'a tsipä pleetä yhõjx tiocy je'eduhñ, túhmäts.

²⁴ Põnjaty yaa moonsähajtäp ja'a Dios hädaa yaabä naaxwiin, cab hajxy tii yajtsiptá'agät. Hojioot hajxy miõõdhádäp hoy nä'ä põngõxpä. Hoy yajxõñ hajxy yajnahixõ'õwät. Mee'xtügäp hajxy jaduhñ. Cab hajxy jiootmä'adät.

²⁵ Mee'xxieemiä miädsip hajxy yhoj miägäpxät. Wehñdä Dios jaduhñ miäná'anät coo ja'a miädsipä yhaxõõgcuhdujt hajxy ñajtshixõ'õwät, weenä tøyhajt hajxy jaduhñ wyiinjuõ'õy.

²⁶ Ween hajxy jaduhñ wyiinmahñmech, hoy hajxy hänajty tõõ jia wiinhõõñii ja'a mõjcu'ugong. Paadiä mõjcu'ugong jaduhñ jia wi'i miäwiinhõõna'añ; ja wi'i miähane'emaamb jaduhñ.

3

¹ Pero huuc wiinjuõ'õw miich hädaa. Coo hänajty yhabaada'añ coo ja'a Jesucristo yaa quiädaactägatsa'añ hädaa yaabä naaxwiin, mänitä tsõ'ty häyohn jiada'añii yhabeta'añii.

² Haxõõgjatiä jäya'ayhajxy hänajty jiatcõ'õwa'añ. Jootmõj hajxy hänajty ñibiäda'aga'añii. Jiaançh tehñ yhadsoogaambiä xädõ'õñ hajxy. Niguiumayáañäp hajxy hänajty. Yajcumayaamb hajxy hänajty. Capxtägoyyaamb hajxy hänajty. Cabä tiaj tieedy hajxy hänajty

wyiingudsähgø'øwa'añ. Cab hajxy hānajtj tii yhojiäwø'øwa'añ. Cabä Diosmädia'agy hajxy hānajtj miäbøga'añ.

³ Cabä yhuungä tio'oxy hajxy hānajtj choga'añ. Cab hajxy hānajtj pøn miee'xa'añ. Mänähøøno'øwaamb hajxy hānajtj. Cabä howyiinmahñdy hajxy hānajtj miøødhada'añ. Mähäyoowhixaamb hajxy hānajtj. Cabä hoybä weenbä hajxy hānajtj choga'añ.

⁴ Tiogaambiä miägu'ughajpä hajxy hānajtj. Cab hajxy hānajtj hodiägaamby wyiinhahñdyhada'añ tii hajxy hānajtj tiunaamby. Yhøxta'awaamby hajxy hānajtj neby hajxy xioondá'agät. Cabä Dios hajxy hānajtj wyiingudsähgø'øwa'añ.

⁵ Jaduhñ hajxy hānajtj ñibiäda'aga'añii nebiä häna'cä Diosmädia'agy mäbøjpän, pero cab hajxy hānajtj tøyhajt miäbøga'añ.

Pønajatj jaduhñ haxøøg jatcøøby, naxj jaduhñ mdehñ piuhwá'adsät.

⁶ Jii cahwiindøyhäna'c-hajxy näje'e, jaanç tehñ yhöñdaacp hajxy. Naxiä to'oxiøjc hajxy wyiinhøøñ, ja'a hajxy tii ca'a jajp ca'a najuøøbiä. Ja'a to'oxiøjc-hajxy jaduhñbä, cabä howyiinmahñdy hajxy ñä'ägädä møødä. Hamdsoojoot hajxy jaduhñ yajwiinhøøna'añ.

⁷ Hoy ñä'ä mädyii mädia'aguiä hajxy jaduhñ jia wi'i yhabøga'añ, pero cabä tøyhajt hajxy ñä'ägädä wiinjuø'øwa'añ.

⁸ Ja'a häna'c-hajxy jaduhñ höñdaacpä, haxøøgä wyiinhahñdy hajxy. Cabä Diosmädia'agy hajxy miäbøga'añ. Jaduhñä tøyhajt hajxy miädsibø'øy nebiä Janes ja'a Moisés hajxy jecy miädsibøøyyän møødä Jambres.

⁹ Cabä Janeshajxy jecy miäjädaacy. Paady hajxy jaduhñ quia'a mäjädaacy coo howyiinhahñdy hajxy hānajtj quia'a møødä. Ni häna'c-hajxy jaduhñ quia'a mäjäda'agaambä, ja'a hajxy jäda'ahaty höñdaacpä.

¹⁰ Hoorä, tøøch miich xyhixy coöchä tøyhajt nyajnahixø'øy, coöch hoy njäya'ayhaty. Howyiinhahñdyhöch nmøød. Nmäbøjpiöchä Diosmädia'agy hamuumdu'joot. Mee'xxiéemyhöchä jäya'ay nmägapxy. Hoy piønøch ndsocy nmee'xy. Cábøchä Diosmädia'agy mänaa nnänuuxø'øy.

¹¹ Jaanä jaduhñhöch miich tøø xyhijxpä coöch hoy miänaajä nmee'xtucy, hoy ñéjpiöch hānajtj nja tsaächpøcy, nébiøch jim tøø njaty tøø nhabetiän Antioquia, møød jim Iconio, møød jim Listra. Madiú'ujøch jim ndsaaçhpøcy. Pero cábøchä Dios mänaa xñajtshixø'øy. Hoy miänájøch jaduhñ xcwieendähaty.

¹² Haaga jaduhñä jäya'ayhajxy chaächpøgaambä pønjetiä jioot pädaacp maa ja'a Jesucriston coo hajxy jaduhñ hoy jiäya'ayhädät.

¹³ Pero ja'a cahwiindøybähajxy møødä höñdaacpähajxy, maas haxøøg hajxy tehngajnä jiatcø'øwa'añ. Mäwiinhøønaamb hajxy møød hajxy yajwiinhøønaambä.

¹⁴ Pero miich, naxiä Diosmädia'agy tehngajnä mjaac tehñ pianøcxät, ja'a miich hamuumdu'joot tøø mmäbøquiäbä. Haa ca'a, høøch miich jaduhñ tøø nyajnahixø'øy, møødä mdaj møødä mdajhoc. Paady miich hoy tøø mhabøcy.

¹⁵ Chuucnä miichä Diosmädia'agy mdägøøyy capxtaacpä. Jiibiä tøyhajt hajxy nbáatäm neby hajxy hoy nnähwaats nguhwáatsämät. Coo hajxy jaduhñ nmäbøjcäm ja'a Jesucristocøxpä, jaduhñ hajxy nnähwaats nguhwáatsäm.

¹⁶ Ja'a Diosmädia'aguiä, cøxiä Dios jaduhñ yagjahyyä. Jaanç tehñ tiuungpaatpä Diosmädia'agy jaduhñ. Hahixøøby jaduhñ coo ja'a jäya'ay hajxy nyajnahixøøyyämät. Jaduhñ hajxy njoj nmägápämät. Jaduhñ hajxy nyajwiinxiic nyajwiingapxøøyyämät coo ja'a tøyhajt hajxy pianøcxät, møød coo hajxy hoy jiäya'ayhädät.

¹⁷ Pønjetiä Dios tøø yajnahdijy coo ja'a miädia'agy yajwá'xäxät, ween hajxy ca'xy pedyii yhabøcy, jaduhñ hajxy hoy yajtuungpáadät hoy ñä'ä maajä.

4

¹ Coo ja'a Jesucristo yaa quiädaactägatsa'añ hädaa yaabä naaxwiin, mänit tiägø'øwa'añ mähanehmbä. Mänitä jäya'ayhajxy nägøxiä yajtøyhajtjyega'añii, møød hajxy hānajtj ju-

jcypia, mөөд hajxy hanafty төө yho'oguiäbä. Ja'a Dioscөxpä mөөдä Jesucristocөxpä, jaduhnhөch miich nmägäpxy nhane'emy

² coo ja'a Diosmädia'agy hoy nä'ä mänaajä myajwá'xät, mөөд coo ja'a cu'ug myajmábögät, mөөд coo mhoj mmägäpxät, mөөд coo myajwiingapxö'öwät coo hajxy jaduhñ miábögät. Mee'xxieemiä Diosmädia'agy myajnähixö'öwät tehngajnä.

³⁻⁴ Hix, habáatnäp jaduhñ coo ja'a cu'ugä Diosmädia'agy hajxy quia'a tsogaanä. Cabä төyhajt hajxy jaduhñ miädowaanä. Hoy nä'ä mädyii mädia'aguiä hajxy hanafty wyl'i miädowa'añ, nägoo hanafty quia'a төyyä. Mayyä yajnähixö'öbiädöjc hajxy jaduhñ yhөxta'awa'añ, ween hajxy hanafty jaduhñ yajnähixö'öyii nebiatia jioothajxy hanafty chocy.

⁵ Pero miich, tehngajnä howyiinmahñdy mmөөdhädät. Mmee'xtügäp jaduhñ coo hanafty mdsaaçpöcy. Myajwá'xäbä Diosmädia'agy. Hamuumdu'joot mgudiünät waambatiä Dios төө xyhane'emy.

⁶ Hөөч, ja weenjaty quia'a habaady cooch hana'c xyagho'oga'añ ja'a Jesucristocөxpä. Nähjөjp tu'ujөjphөch hädaajän.

⁷ Tөөчhä haxөөgpä njөjtäna'ay. Tөөч nmäjäda'agy. Tөөч hamuumdu'joot ngudiün waambátyhөchä Dios төө xyhane'emy.

⁸ Chámhөch njөbhixy coochä Wiindsón Jesucristo jim xpiäda'aga'añ hawa'adstuum. Mänitөch jim xpiäda'aga'añ coo ja'a jäya'ayhajxy hanafty nägөxiä yajtөyhajtyega'añii. Hoguiuhdujthaamä Jesucristo hajxy jaduhñ xyajtөyhajtyegáanäm. Cábөch nidiuhñ jim xpiäda'aga'añ hawa'adstuum. Pөnjaty jaduhñ jөbhixp hamuumdu'joot coo ja'a Jesucristo yaa quiädaactägatsa'añ hädaa yaabä naaxwiin, nägөxiä hajxy jim piäda'agáanäbä hawa'adstuum.

⁹ Huuc min yaa maach hөөчhän. Mhadö'ödsäp jaduhñ.

¹⁰ Hix, төөчhä hana'c xpiuhwa'açh nämay. Haa ja'a Demas, төө je'e ñөcxy Tesalónica. Paady yaa төө choon coo chana'awa'añ yhäyowa'añ. Haa ja'a Crescente, төө je'e ñөcxy Galacia. Haa ja'a Tito, төө je'e ñөcxy Dalmacia.

¹¹ Jagóoyyөчhä Lucas yaa xjiaac mөөdhity. Tunä mayhajt, нөcxä Marcos wowө'өг. Yaa mwoominät. Hóyhөch yaa xpiuhbédät.

¹² Haa ja'a Tíquico, jimhөch төө nguexy Efeso.

¹³ Coo miich yaa mmínät, mhuuc túnäbä mayhajt. Hөөчhä nnähgämëm tu'uwijsäc. Jimhөch төө nnähgue'egy Troas maa ja'a Carpo tiөjcän. Mөөdhөchhä nnocy xpiөcmiinät mөөдä animalhac-hädiünäbä.

¹⁴ Haa ja'a Alejandro, ja'a pujxthädiuumbä, төөч cөxypänejpy xñähөөnө'өy. Ja'a Dios jaduhñ yaghawiimbídäp.

¹⁵ Cahwiindөy ja'a Alejandro jaduhñ. Mniyajcopcө'öwөjөp. Mөj may ja'a Alejandro xmiädsiphajtäm coo ja'a Diosmädia'agy hajxy naxy nyajwá'xäm.

¹⁶ Mänájөch jayөbajt nyajnäxө'öwө'өyän, cábөch pөñ mänit xñähgapxtuuty. Nägөxiөчhä hana'c xpiuhwaach. Pero cab jaduhñ ñejpiä. Weenä Dios jaduhñ miee'xy.

¹⁷ Mäjähñdiuumhөch hanafty. Mänitөчhä Dios xñäwaañ. Mänitөчhä mäjaa xmiooyy, jaduhnhөчhä jäya'ayä Diosmädia'agy hoy nyajwiingapxөoyy, ja'a hajxy ca'a judiöspä, ween hajxy jaduhñ nägөxiä miäbөcy.

¹⁸ Xcwieendähadäambөчhä Dios maa ja'a haxөөg ca'a hoybän. Xyajnähwa'ads xyajcuhwa'adsäambөch jaduhñ. Jaduhnhөch jim xyajnөcxa'añ tsajpootyp maa je'e yhane'emiän. Tsөгä Dios hajxy hoy miänaajä wiingudsähgөoyyäm. Amén.

¹⁹ Huuc yajpoo'x ja'a Prisca ja'a hөөчcөxpä, mөөдä Aquila, mөөдä Onesíforo yhuungä tio'oxy.

²⁰ Haa ja'a Erasto, jim je'e miähmөoyy Corinto. Haa ja'a Trófimo, jimhөch nnähgueecy Mileto. Pөjcäp hanafty je'e.

²¹ Habáatnäp jaduñ coo tøøhc yhida'añ. Naxy mdehm myínät. Mhadó'ødsäp jaduñ. Nägøxiä miichä mábøjpädøjc yaa xyajpoo'xy møødä Eubulo, møødä Pudente, møødä Lino, møødä Claudia.

²² Ween miichä Wiindsøñ Jesucristo xmiøødhity. Weenä hoyhajtä weenhajtä xmio'oy. Amén.

Tito

¹ Pablohájpøch høøch. Ja'a Dióshøch xmioonsähajp. Ja'a Jesucristøch xquiuguexyhajp. Jadúhñhøch tøø xwyiinguexy coochä jäya'ayä Diosmädia'agy nyajwiinhixó'øwät, pønhatiä Dios tøø wyiimbiy, ween hajxy jaduhñ miäbøcy, weenä tøyhajt hajxy jaduhñ miøødhaty, jaduhñä Dios hajxy hoy wyiingudsähgø'øwät.

² Jéquiänä Dios hajxy xyajwiinwaanøøyyäm coo hajxy xyagjugyhadäänäm cøjxta'axiøø neby je'e jiugyhatiän. Cabä Dios mänaa yhöñnda'agy, jaduhñä tøyhajt hajxy nmøødhajtäm coo hajxy jaduhñ xyagjugyhadäänäm.

³ Coo yhabaaty, mäniä Dios hajxy jaduhñ xyhawäänäm coo hajxy jaduhñ xyagjugyhadäänäm. Tøøchä Dios jaduhñ xyhane'emy coochä miädia'agy jaduhñ nyajwá'xät. Xtiehm wyiinguéjxhøch jaduhñ. Ja'a Dios hajxy xyajnáhwaats xyajcuhwáatsäm.

⁴ Tito, miíchhøch hädaa nocy nyajnájaayøøby. Tehm tiøyhájthøch miích njuø'øy nébiøch nhamdsoo huungän. Tu'cuhdujt højtsä Diosmädia'agy nmäbøjcam. Ja'a Diosteedy møødä Wiindsøn Jesucristo, ween miíchä mayhajt hajxy xtiuunä, ween miíchä hoyhajtä weenhajt hajxy xmio'oy. Ja'a Jesucristo hajxy xyajnáhwaats xyajcuhwáatsäm.

⁵ Mänájøch jim nwiimbitiän Creta, páadyhøch miích jim nyajmähmøøyy coo mjaac yaghoyø'øwät tijaty højts hänajty nga'a yajpéjtäpnä. Jadúhñhøch miích nhane'emy coo wiindsøn mbädá'agät maa tsajtøjcän wiinduhmyhagajpt.

⁶ Je'e mbädá'agäp pøn hoy jäya'ayhajp, pøn to'oxiøjc tu'ug yaghijp, pøn yhuung mäbøjpä Diosmädia'agy, pøn yhuung hoy wädijp, pøn yhuung mädia'agymiäbøjp.

⁷ Ja'a jäya'ayhajxy jaduhñ tunaambä wiindsøn, ja'a Dios hajxy moonsähadäänäp. Howyiinmahñdy hajxy yaghídäp. Cab hajxy jiootmøjhädät. Cab hajxy yhawa'andá'agät. Cab hajxy yhu'ug cab hajxy jiøø'xät. Cab hajxy chiptsógät. Cabä jäya'axiädø'øñ hajxy yhadsógät.

⁸ Yajtøjtägø'øwäp hajxy pønjaty mejtsp maa tiøjc-hajxiän; piu'umió'owäp quioñdymó'owäp hajxy jaduhñ. Chógäp ja'a hoybä hajxy. Cab hajxy choj jootmä'adät. Hoy hajxy jiäya'ayhadät. Hoy ja'a Diosmädia'agy hajxy quiudiünät. Cabä haxøøgwinnmahñdy hajxy yajtúnät.

⁹ Cabä tømiaädia'agy hajxy ñajtshixó'øwät, ja'a hajxy tøø yajnáhixø'øylijäbä, jaduhñä mäbøjpädøjca hoguiuhdujt hajxy yajwiingapxó'øwät. Jaduhñ hajxy yajcähxø'øgät coo häna'c-hajxy yhöñnda'agy, ja'a wiingmädia'agy hajxy yajnáhixøøbiä.

¹⁰ Nämayyä höñndaacpähajxy wiädity. Cabä Diosmädia'agy hajxy quiudiuna'añ. Nä'ä nägoodä hajxy jaduhñ ñä'ä capxy ñä'ä mädia'agy. Jaduhñä häna'c-hajxy nämay jiatcøøbiä, ja'a hajxy jaduhñ mänaambä coo ja'a mäbøjpädøjca-hajxy tsipcøxp yajcircunci-darhadät.

¹¹ Tsipcøxp myaghamónät pønjaty jaduhñ wiing yajnáhixøøby. Cabä cuhdujt hajxy miøødä coo hajxy jaduhñ wiing yajnáhixø'øwät. Yajmäjuyaamb hajxy, paady hajxy jaduhñ wiing yajnáhixø'øy. Höchähdiuunnä hajxy jaduhñ jiatcø'øy. Haa ja'a mäbøjpädøjca wiingmädia'agy hajxy jaduhñ yajnáhixøøyyäbä, naxy hajxy jaduhñ yajtu'udägoyyii, ja'a hajxy tu'jøøn tu'tøjcpä.

¹² Jaduhñä Cretabäjäya'ay tu'ug tøø yhuuc mänaambä coogä miägunaaxhajxy jiaanç tehñ yhöñnda'agy, møød coog hajxy hanaxiä quiahwiindøyyä, møød coog hajxy jiaanç tehñ quiaxä, møød coog hajxy jiaanç tehñ ñuuxho'ogy. Jaaya'ay jaduhñ tøø miäná'añäbä, profeta hijty tiuumby.

¹³ Tehñ tiøyhajt jaduhñ coo ja'a Cretabä-jäya'ayhajxy jaduhñ haxøøg jiäya'ayhaty. Paady miích møc-haamby mhoj mmägäpxät, weenä Diosmädia'agy hajxy jaduhñ hoy miäbøcy.

14 Cabä hõhnda'agymiädia'agy hajxy miõjpadá'agät, ja'a judíoshajxy naxy yajnáhixõõbiä. Mõöd weenä mädia'agy hajxy quia'a cudiuñ nebiä häna'c-hajxy jia hane'emiän, ja'a tõyhajt hajxy ca'a tsojpä.

15 Ja'a häna'cä howyiinmahñdy hajxy mõõdpä, cumáayyäbä Dios hajxy jaduñ, hoy hajxy quia'a ja cudiuñ nebiä häna'c hõhndaacpähajxy jia hane'emiän. Pero ja'a häna'cä Diosmädia'agy hajxy ca'a mäbõjpä, caba Dios hajxy quiumayii je'eguiõxpä coo haxõõgwiinmahñdy hajxy jiaanč tehñ miõõdä. Cab hajxy tii hoy ñänõmy.

16 Jaduñ hajxy jia mäna'añ cooc tyijy ja'a Dios hajxy yhixyhaty, pero coo hajxy haxõõgaty wyl'i jiatcõ'õy, jaduñ hajxy yajcähxõ'õgy coo hajxy tõyhajt quia'a hixiä. Cabä Diosmädia'agy hajxy quiudiuna'añ. Cabä hodiunõg hajxy ñä'ägädä jada'añ. Paady hajxy xiõõghadyii ja'a Dios.

2

1 Pero miich, ja'a hoguiuhdujt myajnáhixõ'õwäp, jaduñä mäbõjpadõjcä Diosmädia'agy hajxy hoy quiudiünät.

2 Jaduñä majjäya'adiõjc myajwiinxiic myajwiingapxõ'õwät coo hajxy quia'a hu'ug quia'a jõõ'xät. Cab hajxy nä'a nägoodä ñä'a xi'ig ñä'a hanähátät. Hoy hajxy jiäya'ayhádät. Hamuumdu'jootä Diosmädia'agy hajxy miäbõgät. Hoy ja'a miäjõõn miädõjc hajxy choc pia'häyõwät. Miece'xtügäp hajxy coo hajxy hänäjty chaachpõcy.

3 Jaduñä tajhoctõjc myajwiinxiic myajwiingapxõ'õbiät coo howyiinmahñdy hajxy miõõdhádät, jaduñ hajxy hoy quiuhdujthádät. Cab hajxy põñ ñähõõnõ'õwät. Cab hajxy yhu'ug cab hajxy jiõõ'xät. Ja'a hoybä weenbä hajxy yajnáhixõ'õwäp.

4 Jaduñä tajhoctõjcä miädsaan miädo'oxy muutspä hajxy yajwiinxiic yajwiingapxõ'õwät coo ja'a yhuung coo ja'a ña'ay hajxy chõgät,

5 mõöd coo hajxy hoy jiäya'ayhádät. Ja'a howyiinmahñdy hajxy miõõdhádäp. Hoy yajxonä jiõõn tiõjc hajxy cwieendähádät. Miõõdhádäbä hojioot hajxy. Wyiingudsähgõ'õwäbä ñihyhap hajxy. Coo hajxy jaduñ hoy quiuhdujthádät, jaduñä cu'ugä Diosmädia'agy hajxy wyiingudsähgõ'õwät.

6 Jaanä jaduñduhmbä, jaduñä muutsc-häna'ctõjc myajwiinxiic myajwiingapxõ'õwät coo howyiinmahñdy hajxy miõõdhádät.

7 Jaanä jaduñ miichpä, tehngajnä hoy mwädítät, weenä mäbõjpadõjc jaduñ xpiahixy. Howyiinmahñdymõöd myajnáhixõ'õwät. Caj nä'a nägoodä mnä'a xi'ig mnä'a hanähátät.

8 Ja'a hoguiapxy ja'a homiädia'agy jaduñ myajnáhixõ'õwäp, jaduñ põñ xquia'a jõcäpõ'õwät. Jaduñä nmädsiphájtämhajxy chähdiünät, cab hajxy jaduñ hoy xñänõõmämät haxõõg.

9 Hoorä, ja'a häna'c-hajxy hijpä cudoogõ'õyä, jaduñ myajwiinxiic myajwiingapxõ'õwät coo ja'a wyiindsõñä miädia'agy hajxy pedyii quiudiunõ quiuñájxät, hoy hajxy nä'a waambaty yhane'emyii. Cab hajxy yhadsoowiimbídät.

10 Cab hajxy miéedsät. Hamuumdu'jootä wyiindsõñä miädia'agy hajxy yajtúunät, ween hajxy jaduñ quiumayii, wehñdä wyiindsõñä Dios miädia'agy hajxy jaduñ xmiäbõjcät. Ja'a Dios hajxy xyajnáhwaats xyajcuhwáatsäm.

11 Hix, tõõ ja'a Dios jaduñ yajcähxõ'õgy coo ja'a mayhajt tõõ tiuñ, coo hajxy nägõxiä xyajnáhwaats xyajcuhwáatsäm, mäduhñtiä hajxy yaa nhíjtäm hädaa yaabä naaxwiin.

12 Jaduñä Dios hajxy xyhanéhmäm coo ja'a haxõõgwiinmahñdy hajxy nnajtshixõõyyämät mõödä hadsojtwiinmahñdy, mõöd coo ja'a howyiinmahñdy hajxy nyaghíjtämät mõödä hoguiuhdujt, mõöd coo ja'a Dios hajxy hamuumdu'joot nwiingudsähgõõyyämät, jaduñ hajxy hoy nwädíjtämät hädaa yaabä naaxwiin,

13 je'eguiõxp coo ja'a Jesucristo hajxy jaduñ njõbhíjxäm coo yaa quiädaactägatsa'añ neby hajxy tõõ xyajwiinwaanõõyyäm. Xi'ig xõñ hajxy jaduñ njõbhíjxäm. NDioshíjtäm

ja'a Jesucristo hajxy jaduhñ. Møj jaançh je'e. Je'e hajxy xyajnahwaats xyajcuhwáatsäm. Yajxon̄ jiaançh tehñ quiäda'aga'añ.

¹⁴ Paady hajxy hoy xñähho'túutäm, jaduhñä haxøøg ca'a hoybä hajxy xquiøxy yajnahwaats xquiøxy yajcuhwáatsäm. Jaduhñ hajxy xquiü'ughájtäm, weenä hoybä weenbä hajxy jaduhñ hamuumdu'joot ndúunäm.

¹⁵ Jaduhñdsä mabøjpädøjc myajwiinxiic myajwiingapxø'owät coo hajxy jaduhñ miäbøgät. Mmøød miichä cuhdujt jaduhñ coo mhoj coo mmägápxät pøn ca'a mabøgaamb, jaduhñ mga'a yajpéxät.

3

¹ Jaduhñä mabøjpädøjc myagjahmiejtstá'agät coo ja'a gobiernahajxy wyiingudsähgø'owøøjt møødä cuduunghajxy, møød coo ja'a miädia'agyhajxy quiüdiüunäxät. Cabä mabøjpädøjc-hajxy ñuuxhó'ogät. Tiünäp ja'a cu'ugtuunghajxy.

² Cab hajxy pøn ñähøønó'owät. Cab hajxy chiptsógät. Mee'xxieemy hajxy jiäya'ayhädät. Hoy piønä hajxy wyiingudsähgø'owät.

³ Hix, hijty, cabä Diosmädia'agy hajxy hijty nwiinjuóoyyäm. Cab hajxy hijty ngudiüunäm. Tu'udägóoyyäm hajxy hijty. Hanaxiä haxøøg ca'a hoybä hajxy hijty nhadsójcäm. Haxøøg hajxy hijty njäya'ayhájäm. Hadsojtwiinmahñdy hajxy hijty nyaghájtäm. Xxiøøghájtäm ja'a cu'ug hajxy hijty. Hamiñ haxøpy hajxy hijty nnimiähán nnimiägø'owhájtäm.

⁴⁻⁵ Pero mänitä Dios yajwiingähxø'cy coo hajxy xñäxúu'tsäm, møød coo hojiot jiaançh tehñ miøødä. Mänit hajxy xyajnahwaats xyajcuhwáatsäm coo hajxy jaduhñ xñäxúu'tsäm, ca'a jie'eguiøxpä cooc tyijy hajxy hoy tøø ngudiüunäm. Jaduhñ hajxy xyajnahwaats xyajcuhwáatsäm coo hawiinjemyjioot coo hawiinjemywyiinmahñdy hajxy xmióoyyäm, møød coo ja'a Dioshespíritu hajxy xyageem xyajtägájtäm.

⁶ Coo ja'a Jesucristo hajxy hoy xñähho'túutäm, jaduhñä Dios ja'a yhEspíritu hajxy møj may xmióoyyäm.

⁷ Paadiä Dios ja'a yhEspíritu hajxy xmióoyyäm, jaduhñ hajxy xpiädáacäm hawa'adstuum. Møjjä mayhajt hajxy jaduhñ xtiüunäm. Møød jaduhñ hajxy xyagjugyhadáanäm cøjxta'axiøø nebiä Dios jjugyhatiän. Jaduhñ hajxy tøø xyajwiinwaanøøoyyäm. Paady hajxy jaduhñ njøbhíxäm.

⁸ Tehñ tiøyhajt jaduhñ. Naxy miichä mabøjpädøjc jaduhñ mdehm miägäp mdehm yhané'emät coo hajxy hamuumdu'joot hoy quiuhdujthädät, ja'a Diosmädia'agy hajxy tøø miäbøquiäbä. Tehngajnä hoybä weenbä hajxy tiünät. Tsoobaatp jaduhñ. Jaduhñ hajxy ñiyaghoyø'owøøjt.

⁹ Pero caj myajtägø'owät maa ja'a hønnda'agymiädia'agy hajxy naxy yajcapxiø'oyän, maa ja'a jecyquiuhdujt hajxy naxy yajtsipta'aguiän, maa ja'a jecyjiäya'ay xiøø hajxy naxy yajtøøw yajtøø'xän. Cab jaduhñbä capxy mädia'agy jaduhñ ñä'ägädä tuunghapady.

¹⁰ Jii häna'c-hajxy näje'e maa ja'a tsajtøjcän, wiingjaty hajxy yajnahixø'øy. Y coo ja'a mabøjpädøjc-hajxy jaduhñ näje'e miäbøcy, tu'udägooby hajxy jaduhñ. Cabä jiamioød hajxy hoy miøødhijnä tu'ugmädia'agy. Pønjaty jaduhñ wiingjaty yajnahixøøby, mhóöp jaduhñ tähooc metsc-hooc, ween hajxy yhuuc hamoñ. Y pø cab hajxy jaduhñ yhamona'añ, mänit mga'a mämøjø'owät mga'a mämayø'owät.

¹¹ Pønjaty jaduhñ jatcøøby, cabä howyiinmahñdy hajxy miøødä. Haxøøgä wyiinmahñdyhajxy jaduhñ. Paady hajxy haxøøgtuum piäda'aga'añii.

¹² Jímhøchä Artemas nguexa'añ maa miichän. Coo ja'a Artemas jaduhñ quia'a yajnábaadó'owät coo jim ñøcxät, mänitøchä Tíquico mabøcy jim nguéxät. Coo jim miédsät, mänitøch miich jim nøcxy xpiaady Nicópolis. Jímhøch nhida'añ høxtä coo tøøchpä ñäxät. Mhuuc hadø'ødsäp jaduhñ.

¹³ Jimä Apoloshajxiäda'a wiädity Creta møøä Zenas, ja'a cuhdujtyajnähixøøbiä. Coö hajxy hänajty tiu'ubøga'añ, mänit miičh cøxiä wiinä mmó'owät tijaty hajxy hänajty yajmaajiadaamby.

¹⁴ Jaduhñä njamiøødhájtäm myajwiinxiic myajwiingapxø'øwät coö ja'a hoyba weenba hajxy tehngajnä tiúnät, ween hajxy jaduhñ piuhbety pøñ hänajty yajmaajiajp. Cab hajxy ñä'ä nuuxhó'ogät.

¹⁵ Ja'a njamiøødhøch hajxy yaa xmiøødhijpä, xyhaagä yajpoo'xp miičh jaduhñ. Huuc tunä mayhajt, huuc yajpoo'x ja'a høøchcøxpä pøñjaty højts jim xchojp xpia'häyoob ja'a Diosmädia'agyquiøxpä. Ween mijtsä Dios ja'a hoyhajtä weenhajt xmiø'oy nägøxiä. Amén.

Filemón

¹ Høøch hädaa nocy njahby, høøch Pablohajpä. Tsumyčhänäabiøch cham je'eguiøxpä coochä Jesucristo miädia'agy nyajwa'xä. Haa ja'a hermano Timoteo, tu'ugwiinmähñdyhøch xmiøødhity cooch hädaa nocy njaay.

² Miičh Filemón, miičh hädaa nocy nyajnäguexaamby. Hoy hajxy nničhojc nnibia'häyóowäm coo hajxy nduunmújcäm ja'a Jesucristocøxpä. Nyajpoo'xyp højts ja'a hermana Apiahajpä. Jaduhñ je'e njuø'øy nebiä hamdsoo puhdo'oxypän. Njaanä yajpoo'xyp højts ja'a hermano Arquipohajpä. Quipxy højts je'e xmiøødtuumbä maa højts ja'a Diosmädia'agy nyajwa'xiän. Nägøxiä højtsä jäya'ay nyajpoo'xy ja'a hajxy jim mejtspä maa miičhä mdøjcän, ja'a Diosmädia'agy hajxy mäbøjpä.

³ Ween mijtsä Dios ja'a hoyhajtä weenhajt hajxy xmio'oy møødä Jesucristo. Ja'a Dios hajxy nDeedyhajtäm. Ja'a Jesucristo hajxy nWiindsønähajtäm.

⁴ Naaghóc-høchä Dios nba'ya'axy, ngapxpáatypøch miičhä mxøø, Filemón. Nnämäabiøchä Dios: “Dioscujú'uyäp”, coo miičh hoy mjaanč tehñ tiuñ.

⁵ Tøøch nmädoyhaty coo miičhä Jesucristo miädia'agy hamuumdu'joot tøø mmäbøjcä. Jaduhñhøch tøø nmädoyhajpä coo miičhä jäya'ay mjaanč tehñ chocy mjaanč tehñ pia'häyoy, ja'a Diosmädia'agy hajxy mäbøjpä.

⁶ Coo miičhä Diosmädia'agy hamuumdu'joot tøø mmäbøcy, paady miičhä hojiot mjaanč tehñ miøødä, weenä jäya'ayhajxy jaduhñ jiaac tehñ wyiinjuø'øy nebiatiä Jesucristo ja'a mayhajt tiuñ ja'a højtscøxphajtäm.

⁷ Mägu'ughajpä, jaanč tehñ jiootcújc-høch jaduhñ nnijiäwø'øyii coo miičhä jäya'ay tøø mjootcapxmøcpøcy, ja'a Diosmädia'agy hajxy mäbøjpä. Paady miičh jaduhñ tøø mjootcapxmøcpøcy coo miičh mjaanč tehñ chocy mjaanč tehñ pia'häyoy.

⁸⁻¹⁰ Høøch Pablo, tøøch nmäjaanä. Chámhøch jaduhnajtä ndsumyčhänä'ay ja'a Jesucristo miädia'agyquiøxpä. Huuc møødhatä hojiot ja'a høøchcøxpä. Miičh nmänuu'xtaacy py coo miičhä mayhajt cu mduuñ ja'a Onésimocøxpä. Coo miičhä hojiot mjaanč tehñ miøødä, páadyhøch miičh jaduhñ nmänuu'xta'agy, hóyhøchä Jesucristo cuhdujt tøø xjia mo'oy cooch miičh nhané'emät. Jaduhñhøch ja'a Onésimo njuø'øy nébiøch nhamdsoo huungpän, je'eguiøxpä cooch je'e ja'a Diosmädia'agy jaduhñ tøø nyajmäbøcy yaa maäch yaa ndsumyčhänä'ayän.

¹¹ Cahnä ja'a Onésimo hänajty jim piäyø'ogyñä maa miičhän, cab miičh mmädia'agy hänajty xquiudiuunä. Cab hänajty tiuna'añ. Pero coo yaa tøø miech maäch høøchän, jaanč tehñ yhóyhøch yaa xmiøødtuñ. Jaanč tehñ yhoy miičh xmiøødtunaambä.

¹² Nguejxtägatsáambiøch jim maa miičhän, hóyhøch yaa nja tsocy hamuumdu'joot.

¹³ Jaduhñhøch nja mänaañ cooch cu xmiøødmähmøøyy yaa maäch yaa ndsumyčhänä'ayän. Cu xpiuhbéjtyhøch jaduhñ maa miičhcøxpän. Ja'a Diosmädia'agyquiøxpøch cham ndsumyčhänä'ay.

¹⁴ Páadyhøch ja'a Onésimo jim nguejxtägatsa'añ maa miičhän, cábøch nnajuø'øy pø mmäna'anaamb miičh jaduhñ coo yaa cu miähmøøyy. Pø mdunaambiä mayhajt jaduhñ, ween hamdsoojoot mdúnät; ca'a yhadsipä, ca'a yhajootma'adä; ca'a tii mnajtshäyowø'øy.

¹⁵ Wehñdä Dios jaduhñ tøø miäna'añ coo jim piäyø'ögät maa miičhän, coo yaa yhidät paquiä maäch høøchän. Hix, tøø ja'a Diosmädia'agy yaa miäbøcy. Y coo jim ñøcxtägätsät maa miičhän, cab jaduhñ mänaa xpiuhwa'adsaannä.

¹⁶ Moonsä miičh Onésimo hijty mwa'añ. Pero coo jim ñøcxtägätsät maa miičhän, jaduhñ miičh mjuø'øwa'añ neby hamdsoo huch neby hamdsoo puhya'aybän. Jaduhñ miičh mdsogaambä nébiøch høøch ndsoquiän. Maas hanaxiä miičh mdsoga'añ. Hix,

maas hoy miich mmädia'agy xquiudiunáanänä. Xímnäts mijts jaduñ tu'ugymädia'agy mhidaanä ja'a Jesucristocøxpä.

¹⁷ Tøyhajt højts nnijiootpáatäm. Tunxä mayhajt jaduñ. Tsøc Onésimo jaduñ mmødnijiootpáatäm neby højts nnijiootpáatäm.

¹⁸ Pø tøø miich xñägädieeyø'oy hoy ñejpiä, pø xmiänuu'xyhajt miich jaduñ, høøchä ngüeentä jaduñ.

¹⁹ Høøch nyajñähwa'adsaamby mäduhñtiä xmiänuu'xiä. Tøyhajt jaduñ. Hamdsoo cø'øháamhøch hádaa nocy jaduñ njaay; jaduñ miich tøyhajt mmøødhádät cooch nga'a høhnda'agy. Y jim miich cueentä mmøødäbä maa høøchcøxpän. Hix, høøch miich jaduñ tøø nyajmäbøcy ja'a Diosmädia'agy.

²⁰ Mägu'ughajpä, coo ja'a Onésimo jaduñ mmøødnijiootpaadøød, jaduñ miich myajcähxø'øga'än cooch miich tøyhajt xjiaanç tsoy. Tunxä mayhajt jaduñ. Hix, näguipxy højts ja'a Jesucristo jaduñ nmøødhíjtäm tu'ugmädia'agy.

²¹ Hamdsoo cø'øháamhøch cham njaay. Nnajuøøbiøch jaduñ cooch miich ja'a nmädia'agy xquiudiunaañä nébiøch cham tøø nnäma'ayän. Njaanä najuøøbiøch jaduñmäbä coo miich hojioot mjaanç tehñ miøødhada'än ja'a Onésimocøxpä.

²² Chámhøch mayhajt tu'ug nmäyujwa'anáangombä. Høøch maadaact hahixøødiáacäc. Pa'ya'ax ja'a Dios hajxy cooch ween xyajpädsømy pujxtøgooty. Mäníthøch jim nnócxät maa mijtsän.

²³ Xyajpoo'xp mijts ja'a hermano Epafrashajpä. Yaaçh jaduñ xmiøødtsumyçhäna'ay ja'a Jesucristo miädia'agyquiøxpä.

²⁴ Xyhaagä nää yajpoo'xp mijts ja'a hermano Marcoshajxy, møødä hermano Aristarco, møødä hermano Demas, møødä hermano Lucas. Xyhaagä nää møødtúumbøch hajxy yaa ja'a Diosmädia'agyquiøxpä.

²⁵ Weenä Jesucristo hoyhajt weenhajt hajxy xmio'oy coo jaaya'ay hajxy jaduñ mmøødhity tu'ugjoot tu'ugjuøhñdy. Amén.

Hebreos

¹ Jecy ja'a Dios quiuguexy quiejxy maa højts nhaphájtäm maa højts ndeedyhájtäm. Diosmädia'agy-yajwa'xpä hajxy quiejxä. Mayhooc hajxy quiejxä. Madiu'u hajxy miädiaacy.

² Tøø ja'a Dios ja'a yHuung hajxy yaa xyajnäguéjxäm hädaa yaabä naaxwiin. Cahnä jiegeø'oy coo yaa tøø yhoy. Je'e ja'a Diosmädia'agy hajxy tøø xjiaac hawáañäm. Jequiän je'eduhñ wyiinguejxä coo ja'a xøøwiin naaxwiin yhädiúnät cøxiä møødá xøø, møødá po'o, møødá madsa'a. Mänit yajnähdiijä coo yhané'emät.

³ Jaduhñä Dios yHuung miøjjä jiaančhä nebiä Diosän. Tu'ugjoot tu'ugwiinmahñdy hajxy yhity. Jim hajxy yhané'emy cøxp chaads hädaa yaabä naaxwiin. Tøø højts hoy xñähho'túutäm. Tøø ja'a nbojpä ngädieeyhajxy xyajnähwáatsäm. Mänit jim ñøcxtägajch tsajpootyp maa ja'a Diosän. Jim je'eduhñ yhanehmbä jada'anäbaadyñä.

⁴ Ja'a Dios yHuung, maas møj ja'a cuhdujt miøødá quejee ja'a Dios mioonsä ja'a tsajpootypahajxy miøødá, je'eguiøxpä coo je'e Dyios yHuungä.

⁵ Cabä Dios ja'a mioonsä mänaa ñäma'ay:
Míichhøch jada'a ndehñ yHuunghadaamby.
Ni mädyii mioonsä quia'a nänømy:
Yø'øjøch jaduhñ xTieedyhadaamb;
nHuunghadáambiøch yø'øduhñ.

⁶ Coo ja'a Dios ja'a yHuung yaa quiejxy hädaa yaabä naaxwiin, mänitä Dios miänaañ:
Wéenhøch nHuung xwyiingudsähgøøyyä ja'a nmóonsøçhhajxy, ja'a hajxy jim tsajpootypä.

⁷ Paquiä Dios ja'a miädia'agy quiudiúunäxä ja'a mioonsähajxy, nebiä pojtägoy wiäditiän, nebiä padooy wiäditiän.

⁸ Pero ja'a yHuung, je'eduhñ ñämaayy:
MDioshajp miich, homiänaajä miich mhane'emy;
homiänaajä miičhä tøyhajt myega'añ.

⁹ Mdsojpy miich ja'a tøyhajtpä;
cabä haxøøgpä mdsocy.
Maas jootcújc-høch miič nyaghity quejee ja'a nmóonsøçhhajxy, ja'a hajxy jim tsajpootypä.

¹⁰ Jaduhñä Dios jiaac mänaambä:
Miič jecy mhädiuun ja'a naaxwiimbä møødá tsajpootypä.

¹¹⁻¹² Cuhdägoyyaambä naaxwiimbä møødá tsajpootypä;
tägatsaamb jaduhñ; jaduhñ jiada'añ néjjiämä wit coo tiujnä;
caj tiuunpaaadaañnä. Pero miič, cøjxta'axiøø miič mhida'añ;
caj miič mjugyhajt mänaa quiøxa'añ.

¹³ Cabä Dios ja'a mioonsä mänaa ñäma'ay:
Yaač miič xmiøødhané'emät. Caj miič mmädsip myajmäjäda'aga'añ.

¹⁴ Ja'a Dios ja'a mioonsähajxy ja'a tsajpootypä, jaduhñ mäwínäts hajxy je'e nebiä pojjan. Cab hajxy quiähxø'øgy. Dios jaduhñ quejxp coo hajxy piuhbédät pønjata Dios piäda'agaamby hawa'adstuum.

2

¹ Tsipcøxpä Diosmädia'agy hajxy nyajcopcøøyyämät, ja'a hajxy tøø nmädóowämbä; jaduhñ hajxy nga'a tu'udägóoyyämät.

² Haa ja'a Diosmoonsähajxiä, ja'a tsajpootypä, jéquiänä Diosmädia'agy hajxy yaa yajcädaacy hädaa yaabä naaxwiin. Tøyhajt ja'a Diosmädia'agy jaduhñ; pønjaty ca'a cudiuumb, haxøøgtuum hajxy miähmø'owa'añ.

³ Møjcuhdujtmøødä Jesucristo. Hamdsoo hajxy je'e hoy xyhawaañäm neby hajxy nnähwáatsämät. Haa ja'a hajxy jayøbajt mädóowäbä, tøjjajt ja'a mädia'agy jaduhñ maa hajxy je'ejän. Mänit højts jaduhñ xyhawaañdägátsäm. Coö ja'a mädia'agy hajxy nga'a yajtuunämät, cab hajxy jaduhñ nnähwáatsämät.

⁴ Madiu'u ja'a Dios ja'a hijxtahñd tøø yajcähxø'øgy, ja'a hoy-yagjuøøñäjatypä; jaduhñ hajxy nmäbøjcamät coö ja'a miädia'agy tiøyhajtä. Tøø ja'a yhEspiritu hajxy xyajnäguéjxäm coö hajxy jaduhñ xpiuhbedáañäm mädyijaty tuunğ hajxy xmióoyyäm. Jaduhñä jioot chocy.

⁵ Haa ja'a Dios mioonsähajxiä, ja'a tsajpootypä, cabä Dios jaduhñ tøø miäna'añ coö hajxy yhané'emät mänaa ja'a naaxwiimbä hänajty wyiimbida'añän.

⁶ Jiiby jaduhñ myiñ cujaay maa ja'a Diosmädia'aguiän:

Dios, tiiguiøxpä ja'a jäya'ay coö mjahmiejtsta'agy, coö mbuhbety.

⁷⁻⁸ Maas møc ja'a mmoonsä cuhdajt hijty tøø mmo'oy quejee ja'a jäya'ayhajxy.

Pero mänitä jäya'ay møjcuhdajt mmooyy coö cøxiä yhané'emät tijaty miich tøø mbäda'agy.

Jaduhñä Dios ja'a jäya'ay piäda'aga'añ møj jaançh, coö jaduhñ ween wyiingudsähgø'øyii. Coö ja'a Dios jaduhñ hamdsoo miänaañ, jaduhñä tøyhajt hajxy nmøødhájtäm coö ja'a møjcuhdajt hajxy tøø xmióoyyäm coö hajxy cøxiä nhanéhmämät. Pero cajnä quiähxø'øgyñä coö hajxy cøxiä nhane'emáañäm.

⁹ Jaduhñä Jesucristo, mänaa yaa yhitiän hädaa yaabä naaxwiin, cabä cuhdajt hijty jiaty møødä nebiä Dios mioonsähajxy miøødän, ja'a hajxy tsajpootypä. Mänitä Dios miänaañ coö ja'a Jesucristo hajxy xñähho'túutämät nägøxiä, je'eguiøxpä coö ja'a Dios hajxy xchójcäm. Coö ja'a Jesucristo yho'cy, paadiä møj jaançh piädaacä, paadiä møjcuhdajt miooyyä coö yhané'emät.

¹⁰ Paadiä Dios cøxiä wiinä piädaacy, weenä jäya'ayä Dios hajxy jaduhñ wyiin-gudsähgø'øgy. Choppiä jioot jaduhñ coö ja'a yhuunghajxy jim yhidät nägøxiä maa je'ejän, pønjata miädia'agy mäbøjcäp. Y jaduhñä Dios miänaañ coö ja'a Jesucristo quiumädówät ja'a højtscøxpä. Jiaançh cudiuun je'eduhñ coö hajxy xñähho'túutäm.

¹¹ Ja'a Jesucristo hajxy jaduhñ xyajnähwáatsäm. Quipxiä Dios hajxy nDeedyhájtäm møødä Jesucristo. Paadiä Jesucristo hajxy xquia'a mädsähdiuunäm. Hix, hamdsoo miänaañ coö hajxy tu'ugpuhya'ay xmiøødhájtäm.

¹² Jaduhñ jiiby myiñ cujaay maa ja'a Diosmädia'aguiän:

Nmøødmädia'agáambiøch nbuhya'ayhajxy ja'a miiçhcøxpä.

Nguyhøwáambiøch miich jim tsajtøgooty, jim cu'ughagujc.

¹³ Jaduhñ jiiby myiimbä:

Ni mänájøçhä Dios xquia'a wiinhøøñ, páadyhøch nga'a tsähgø'øgy.

Jaduhñ wiingtuum myiingumbä:

Chaaçh nhity møødhøch nhuunghajxy;

Diøshøch jaduhñ xmióoyy.

¹⁴ Pøn jaduhñ tu'que'ex, tu'ugjoot tu'ugnø'ty hajxy jaduhñ. Jaduhñä Jesucristo hajxy tøø xmiøødhájtäm tu'ugjoot tu'ugnø'ty mänaa yaa yhitiän hädaa yaabä naaxwiin. Paady hajxy jaduhñ xmiøødhájtäm, jaduhñ hajxy hänajty xñähho'tu'udáañäm. Jaduhñä møjcu'ugong hoy quia'a mäjädaacnä. Coö cu miäjädaacy, jaayá'ayädsä mäjaa häxøpy møød coö hajxy cu xyajtu'udägóoyyäm.

¹⁵ Coö ja'a Jesucristo miädia'agy hajxy nmäbøjcamät, cabä nho'og hajxy jaduhñ ndsähgøøyyänät. Pøn jaduhñ ca'a mäbøjp, je'eds ja'a yho'og tsähgøøby mädu'ñtiä jia juyhaty.

16 Coo ja'a Jesucristo yaa yhooyy hädaa yaabä naaxwiin, ja'a Abraham yhap yhoc-hajxy yajnäguejxä, neby hajxy jaduñ piuhbedójtät. Ca'a Dyiosmoonsähajxiä yajnäguejxä, ja'a tsajpootypä. Tøyhajt jaduñ.

17 Y paadiä Jesucristo yaa hoy jiäya'ayhaty neby højtshájtäm; jaduñ hajxy hoy xñähgapxtúutäm maa ja'a Diosän; jaduñä nbojpa ngädieey hajxy hoy xñähho'túutäm. Hojiot ja'a Jesucristo miøødhajpy. Pedyii jaduñ quiudiuuñ.

18 Hoyyä Jesucristo jia tsaachpøjcy, cabä møjcu'ugongä miädia'agy yajtuunäxä. Y coo ja'a møjcu'ugong hajxy hänajty xjia wi'i yajtu'udägoyyáanäm, xpiuhbéjtäm ja'a Jesucristo hajxy jaduñ je'eguiøxpä coo ja'a møjcu'ugong miädia'agy quia'a mábøjcäxä ja'a Jesucristäm.

3

1 Hermanodøjc, tøø ja'a Jesucristo ja'a nbojpa ngädieey hajxy xyajnáhwáatsäm. Tøø ja'a Dios hajxy xyajnáhdíjjäm coo ja'a miädia'agy hajxy nmábøjcämät. Tsøgä Jesucristo hajxy jahmiéjtsäm; høxtahmds højts ja'a Dios yaa xyajnáguéjxäm. Jaduñ hajxy njahmiéjtsämät coo hajxy jim xñähgapxtúutäm maa ja'a Dioswiinduumän.

2 Haa ja'a Moisésä, pedyii je'e jecy quiudiuuñ maa ja'a Dios ja'a tiøjcän. (Je'eduhñ nñänømby ja'a judíoshajxy.) Jaaná jaduñä Jesucristo pedyii quiudiuumbä coo wyiinguejxä coo højts jaduñ xñähgapxtúutämät.

3 Maas hoy jaduñ coo ja'a Jesucristo hajxy nwiingudsähgøøyyämät quejee ja'a Moisés. Høxtahmdsä tøjcojpa, je'eds jaduñ wiingudsähgøøyyäp; cabä tøjc jaduñ wyiingudsähgøøyii.

4 Cabä tøjc hamdsoo quiojy; häna'c jaduñ cojpa. Pero ja'a Dios, cøxiä je'eduhñ piädaacy tijaty yaa hijp hädaa yaabä naaxwiin møødä jim tsajpootyp.

5-6 Ja'a Moisés, jayøjpa tøyhajt jaduñ miädiaactsohñ mädyii ja'a Dios hänajty cujegy quiapxtøwaamby. Pedyii ja'a Moisés quiudiuuñ maa ja'a Dios ja'a quiu'ugän. Pero cabä møjcuhdujt miooyyä nebiä Jesucristo miøødän. Hix, ja'a Jesucristo, ja'a Dios yhamdsoo Uung je'e. Y pedyii jim quiudiuuñ maa ja'a Dios ja'a quiu'ugän. Pero ja'a Moisés, jaduñ je'e yhijty nebiä moonsän. Coo hajxy hamuumdu'joot nmábøjcämät, coo ja'a Jesucristo hajxy jootcuyc njøbhíxämät coo hänajty miejtstägatsa'añ, mänitä Dios hajxy nägøxiä xquiu'ugnábøjcämät.

7 Jaduñ jiiby myiñ cujaay maa ja'a Diosmädia'aguiän:

Cooch nmädia'agy hajxy jäda'anäbaady xmiädóowät,

8-9 hamuumdu'joot hajxy jaduñ myajtúnät.

Haa ja'a jecyjiäya'ayhajxiä, ja'a mijts mhap mdeedyhajxiä, cábøch nmädia'agy hajxy jecy xyajtuunä, hóyhøch hijxtahnd may nja yajcähxø'cy, mänáajøch hajxy jecy nyajwäditian pactuum juxychägui'xjomøjt.

Cooch nmädia'agy hajxy xquia'a mábøjcä, páadyhøch hajxy nyajcumädooyy.

10-11 Xyagjootmadiägøøyyhøch hajxy je'e. Mänitøch nmänaañ:

“Tøø hajxy jaduñ mdu'udägooñä. Cábøch nmädia'agy hajxy xyhabøgaanä.

Tøyhajt jaduñ, cábøch mijts jim nyajmedsaanä maach mijts hijty nyajpoo'xa'añän.”

Jaduñä Dioshøpíritu miänaañ maa ja'a Diosmädia'aguiän.

12 Hermanodøjc, mnigwieendähadøøjap hajxy nebiä Diosmädia'agy hajxy mga'a natshixø'owät; jaduñ hajxy mga'a tu'udägóyyät. Jujcy ja'a Dios; ca'a jiaduñä nebiä jäya'ayhajxy yaabä Dyioshajpiän.

13 Pero mäduhñtiä hajxy mjugyhaty, mniguiapxmøcpøgøøjap hajxy jabom-jabom, neby hajxy jaduñ mga'a tu'udägóyyät.

14 Coo hajxy tehngajnä nmábøjcämät, neby hajxy tøø nmábøjtsóhñäm, mänitä Jesucristo hajxy jim xmiødhájtämät tsajpootyp.

15 Jaduñ jiiby myiñ cujaay maa ja'a Diosmädia'aguiän:

Coo ja'a Diosmädia'agy hajxy mmädówät jäda'anäbaady, hamuumdu'joot hajxy mya-jtúnät.

Ja'a jecyjiäya'ayhajxy, cabä Diosmädia'agy hajxy jecy miäbøjcy.

¹⁶ Jimä Moisés ja'a jäya'ay hoy wioobädsømy Egiptonaaxooty; je'eds hajxy jecy ca'a mäbøjc ja'a Diosmädia'agy, hoy hajxy hänajty tøø jia mädooy.

¹⁷ Je'eds hajxy hoy tiu'udägoonä. Jim hajxy hoy quiøxy ho'nä pactuum. Je'edsä Dios hoyhoy ñäjootmayhajt juxychägui'xjomøjt.

¹⁸⁻¹⁹ Je'edsä Dios jaduhñ ñämaayy coo quia'a yajmedsaanä maa hijty jaduhñ ya-jpoo'xa'añän, je'eguiøxpä coo hajxy hänajty quia'a mäbøcy.

4

¹ Tsøg hajxy nigwieendähjätäm; jaduhñ hajxy nga'a tu'udägóoyyämät. Coo hajxy ndu'udägóoyyämät, cabä Dios hajxy jiiby xyajtägøoyyämät maa hajxy xyajpoo'xáanäm. Tøø hajxy hijty xyajwiinwaanøoyyäm coo hajxy jiiby xyajtägø'øwáanäm.

² Tøø ja'a Diosmädia'agy hajxy nmädóowäm nebiä jecyjiäya'ayhajxy jia mädooyän. Xiøøbä hajxy jaduhñ jia nä'ä mädooyy, cab hajxy ñä'ä mäbøjcy.

³ Højts, tøø højts nmäbøjcäm, paadiä Dios hajxy jim xyajtägø'øwáanäm maa hajxy xyajpoo'xáanäm. Jimä Dios jaduhñ ñänøømy:

Cooch hajxy nnäjootmayhajty, páadyhøch hajxy nnämaayy:

“Tøyhajt jaduhñ, cábøch mijts jim nyajmedsaanä maaçh mijts hijty nyajpoo'xa'añän.”

Coo ja'a Dios ja'a naaxwiimbä yhädiuumbädøoyy, mänit jaduhñ pioo'xnä.

⁴ Jiiby jaduhñ myiñ cujaay maa ja'a Diosmädia'aguiän:

Mänitä Dios hoy pioo'xnä ja'a miäjuxtuxøøbä, coo ja'a naaxwiimbä hänajty tøø yhädiuumbädøonä.

⁵ Wiingtuumä Dios miánaangombä:

Cábøch hajxy nyajmedsaanä maa ja'a poo'xtaactän.

⁶ Ja'a jecyjiäya'ayhajxy, ja'a Diosmädia'agy hajxy jayøbajt ja mädoowäbä, cab hajxy ñä'ä yajtuuñ. Paady hajxy jim quia'a mejch maa ja'a poo'xtaactän. Pero näje'ejatiä jäya'ayhajxy miedsa'añ maa ja'a poo'xtaactän.

⁷ Cujequiä Dios ja'a David yajmänaañ:

Coo ja'a Diosmädia'agy hajxy mmädówät jäda'anäbaady, hamuumdu'joot hajxy mmäbøgät.

Je'eduhñ ñänøømby coo hajxy jäda'anäbaady jim ndägøoyyämät maa ja'a poo'xtaactän.

⁸ Coo ja'a Josué ja'a judíoshajxy jecy wioomejch maa ja'a Palestinanaaxootiän, cabä poo'xtaact hajxy ñä'ä paaty. Paadiä Dios jaduhñ miána'añ coo højts jäda'anäbaady ndägøoyyämät maa ja'a poo'xtaactän.

⁹ Jimnä ja'a poo'xtaact yhityñä maa ja'a Dios ja'a quiu'ughajxy tiägø'øwa'añän.

¹⁰ Pøn jim tægøøby maa ja'a Dios ja'a pioo'xtaactän, jim jaduhñ pioo'xaanä nebiä Dios pioo'xnän mänaa ja'a naaxwiimbä hänajty tøø yhädiuumbädø'øyän.

¹¹ Tsøgä Diosmädia'agy hajxy hamuumdu'joot mäbøjcäm; jaduhñ hajxy hoy ndägøoyyämät maa ja'a Dios ja'a pioo'xtaactän. Cabä Diosmädia'agy hajxy nnajtshixøoyyämät nebiä jecyjiäya'ay hajxy jiatcøoyyän. Cab hajxy miäbøjcy, paady hajxy jim quia'a tægøoyy maa ja'a poo'xtaactän.

¹² Ja'a Diosmädia'agy, tuumnä je'eduhñ. Mäjaamøødnä je'eduhñ. Ja'a Dios hajxy xyajcähxø'cäm ja'a miädia'agyhaam pø nmøødhjätäm ja'a howyiinmahñdy hajxy, pø caj.

¹³ Caj tii hayu'uçh hamee'ch mnä'ägädä túnät. Tsipcøxpä Dios ja'a nwiinmahñdyhjäjtäm hajxy nägøxiä xyhixyhjäjtäm neby hajxy njäya'ayhjäjtäm pø hoy, pø ca'a hoy. Pø cab hajxy hoy njäya'ayhjäjtäm, mänitä Dios hajxy haxøøgtuum xpiäda'agáanäm.

14 Ja'a Jesucristo, ja'a Dioshuung, tøø jim quiody Dioswiinduum. Jim højts xñähgapxtúutäm. Paady, tsögä Diosmädia'agy hajxy hamuumdu'joot panócxäm. Cabä wiinghäna'c hajxy pøn xñähgapxtúutäm jim Dioswiinduum.

15 Najuøøbiä Jesucristo neby hajxy yaa ndsaačhpójcäm hädaa yaabä naaxwiin. Hix, tøø je'e yaa jiäya'ayhaty neby højts yaa njäya'ayhátäm. Tøø jia yajtägoyya'añii ja'a mõjcu'ugóngäm, neby højts xjia wi'i yajtägoyyaañämbä. Pero cabä Jesucristo mänaa tiu'udägoy.

16 Tsögä Dios hajxy pa'yáaxäm hamuumdu'joot. Xchójcäm Dios hajxy. Miøødhajpiä hojioot je'eduhñ maa højtshátäm. Xpiuhbéjtäm hajxy jaduhñ coo højts tii nyajmaa-jiájtämät.

5

1 Ja'a teedywiindsøn hajxy, ja'a hajxy jim tuumbä maa ja'a judíos chajtøjc-hajxiän, jaduhñ hajxy piäda'agyii coo ja'a cu'ug hajxy ñähgapxtú'udät maa ja'a Diosän, møød coo hajxy cøxiä quiuyoxó'øwät, møød coo animal hajxy yóxät, weenä cu'ug ja'a piojpa quiädieey hajxy jaduhñ ñähwa'ačh quiuhwa'ačh,

2-3 møød weenä yhamdsoo pojpa yhamdsoo cädieey ñähwaatsnä. Hix, jäya'ayhajp ja'a teedyhajxy neby højtshátäm. Jimä piojpa quiädieeyhajxy je'ebä. Paady hajxy mee'xxieemy miägapxy yhane'emy pønjaty ca'a najuøøby, pønjaty tu'udägooby.

4 Cabä teedyhajxy hamdsoo nibiäda'agyii. Dios hajxy jaduhñ pädaacp nebiä Aarón jecy piädaacän.

5 Ni ja'a Jesucristo hamdsoo quia'a nibiädaacä nebiä teedywiindsønän. Ja'a Dios jaduhñ pädaac. Jaduhñä Dios ja'a Jesucristo ñämaayy:

Míichhøch jäda'a ndehm yHuunghadaamby.

6 Wiingtuumä Dios jaduhñ miänaañ:

Cøjxta'axiøø miich mduna'añ teedy nebiä Melquisedec jecy tiuunän.

7 Ja'a Jesucristo, mänaa yaa yhitiän hädaa yaabä naaxwiin, mäniä Dios møc pia'yaaxy. Jøøby hänajty. Miänuu'xtaac ja'a Dios coo piuhbedójtät mänaa hänajty yho'oga'añän. Wyiingudsähgøøbiä Dios hänajty je'e, paadiä miädia'agy miädóowäxä.

8 Hoyyä Jesucristo jia Dioshuungä, quiudiuunä Tieedy miädia'agy coo chaachpógät.

9 Coo miee'xtujcy mänaa chaachpøquiän, xyajñähwáatsäm ja'a nbojpa ngädieeyhátäm hajxy jaduhñ pønjatiä miädia'agy mabójcäp. Cøjxta'axiøø hajxy hodium xyaghidáañäm.

10 Mäniä Dios ja'a Jesucristo piädaacy teedywiindsøn nebiä Melquisedec jecy tiuunän.

11 Madiu'u mijts hädaaduhmbä nja wi'i yajmøødmädia'aga'añ tsipjaty, pero caj mijts mwiinjuø'øwa'añ.

12-13 Tøø jiegeøñä mänaa ja'a Diosmädia'agy hajxy mmäbøjtsooñän. Hahixøøby hijty jaduhñ coo wiinghäna'c hajxy myajñähixøøñät. Pero jaduhñ mijts tøø mjaty nebiä naamdägø'øybän. Caj mijts ja'a Diosmädia'agy ja'a tsipjatypä mjada'añ. Je'enä hajxy mhabøcyñä ja'a cajpä chipjatiä. Cahnä hoguiuhdujt hajxy mhabøcyñä.

14 Coo ja'a Diosmädia'agy hajxy hamuumdu'joot mgudiúnät, mäniä tsipjatypä hajxy jaduhñ mwiinjuø'øwät; y coo ja'a hoguiuhdujt hajxy tehngajñä mbanócxät, mäniä hajxy mnajuø'øwät mädyii hänajty hoguiuhdujt, mädyii hänajty haxøøgcuhdujt.

6

1 Tøø mijts ja'a mädia'agy mayhooc mmädoy ja'a Jesucristocøxpä, ja'a cajpä chipjatiä. Tøø hajxy mmädoy coo ja'a mhaxøøgcuhdujt hajxy mnajtshixø'øwät, coo ja'a Diosmädia'agy hajxy hamuumdu'joot mmäbógät.

2 Mnajuøøby hajxy tii hajxy coo tøø mnäbety, tii hajxy coo tøø mgø'øniñähgabyii. Jaduhñ hajxy tøø mmädoy coo ja'a ho'ogyjiäya'ayhajxy jiuypioğa'añ, coo ja'a Dios ja'a haxøøgiäya'ayhajxy yajtsaačhpøğa'añ cøjxta'axiøø, coo ja'a naaxwiimbä wyiimbida'añ.

³ Pero tsögä Diosmädia'agy hajxy pedyii jaac habójcäm, pø chojpiä Dios jioot jaduhñ.

⁴⁻⁶ Pønä Diosmädia'agy najtshixøby, hoyyä Diosmädia'agy tøø jia wiinjuøøñä coo ja'a Jesucristo hajxy tøø xñähho'túutäm, hoyyä piojpä quiädieey tøø jia yajnahwaatsäxä ja'a Jesucristäm, hoy tøø jia puhbedyijäm ja'a Dioshespíritu, hoy jia najuø'øy coo ja'a Dios ja'a miäjaa quiexa'añ, coo ja'a Diosmädia'agy hajxy jaduhñ ñajtshixø'øwät, cab hajxy hoy miäbøgaannä. Jaduhñ hajxy yajcähxø'øgy coo ja'a Dioshuung hajxy yagho'tägach, coo hajxy ñäxi'igy hijxwiinduum.

⁷ Pønä Diosmädia'agy hoy cudiumb, quiumaabiä Dios jaduhñ. Jaduhñ mäwínäts hajxy je'e nebiä hoñaaxän. Coo tiu'uy, mänit hotyijä jaduhñ tiøømbety, tijaty tøø piäda'agyii, y quiunuu'xypä Dios jaduhñ.

⁸ Pøn hoy ca'a cudiumb, haxøøgtuum jaduhñ ñä'ä nøcxø'øwaambä. Jaduhñ mäwínäts je'e nebiä naax ca'a hoybän, maa haagä hapytiøømbetiän. Ño'py hajxy jaduhñ.

⁹ Hermanodøjc, hoy mijts naamnä weenjaty tøø nja hadsähgø'øy, nnajuøøbiøch jaduhñ coo mijts ja'a Dios jaanç tehñ yhoy xpiuhbeda'añ, je'eguiøxpä coo ja'a mbojpä mgädieey hajxy xyajnahwaatsä.

¹⁰ Jaanç tehñ yhojiäya'ay ja'a Dios jaduhñ. Jiahmiejchp jaduhñ coo mijts hoy mgudiuñ, coo mijtsä hermanodøjc tehñgajnä mbuhbety, je'eguiøxpä coo mijtsä Dios mjahmiech.

¹¹ Jaduhñhöch njoot chocy coo hajxy hoy mgudiúnät mäduhñtiä hajxy yaa mjogyhaty hädaa yaabä naaxwiin. Mänit hajxy jim mnøcxät tsajpootyp nebiä Dios hajxy tøø xñäma'ayän.

¹² Cab hajxy mnänuuxø'øwät. Jaduhñ hajxy mgudiúnät nebiä jäya'ayhajxy jecy quiudiuñän, ja'a hajxy jim tøøbä ñøcxäbä tsajpootyp. Ja'a Dios jaduhñ yajwiinwaanøøyy coo hajxy jim ñøcxät, je'eguiøxpä coo ja'a Diosmädia'agy hajxy hänäjty hoy miäböcy tehñgajnä.

¹³⁻¹⁴ Jéquiänä Dios ja'a Abraham yajwiinwaanøøyy: “Tøyhájthøch miich nbuhbeda'añ. Nyajpu'uwáambiøch nyaghi'igáambiøch miich.” Hamdsoo cuhdujtcøxpä Dios jaduhñ miänaañ. Hix, caj pøn møjcuhtdujt miøødä nebiä Dios miøødän.

¹⁵ Yajtøjiajtä Dios jaduhñ nebiä Abraham yajwiinwaanøøyyän, je'eguiøxpä coo Abraham hänäjty tehñgajnä miäböcy.

¹⁶ Ja'a Dioscøxpä jäya'ayhajxy hamuumdu'joot jaduhñ waambaty miäna'añ; y coo hajxy jaduhñ miäna'añ hamuumdu'joot, cab jaduhñ pøn waamb miänaannä. Tødiägøøby jaduhñ.

¹⁷ Paadiä Dios jaduhñ miänaañ: “Tøyhájthøch tøø nyajwiinwaanø'øy cooch nbuhbeda'añ”, neby hajxy jaduhñ ñajuø'øwät coo hajxy tøyhajt piuhbeda'añii, coo ja'a Dios ja'a wyiinmahñdy ni mänaa quia'a yajtägatsa'añ. Hamdsoo ja'a Dios jaduhñ miänaañ.

¹⁸ Jaduhñdsä tøyhajt hajxy nmøødhájtäm coo ja'a Dios ni mänaa quia'a høhnda'agy. Jaduhñdsä tøyhajt hajxy hoy nmøødhájtäm coo hajxy homiänaajä xpiuhbedaanäm coo ja'a miädia'agy hajxy nmäbójcämät.

¹⁹⁻²⁰ Jimä Jesucristo hajxy xñähgapxtúutäm tsajpootyp. Je'e jim tuumb teedywiindsøn nebiä Melquisedec jecy tiuuñän. Cøjxta'axiøø ja'a Jesucristo jim tiuna'añ tsajpootyp. Jaduhñä tøyhajt hajxy hoy nmøødhájtämät coo hajxy jim homiänaajä xyaghidäänäm.

7

¹⁻² Coo ja'a Abraham ja'a reyhajxy hänäjty hoy tøø yagho'ogy, mänaa hajxy hoy chip-tuñän, mänitä Melquisedec hoy miøødnijijcubaadø'øyii. Mänitä Melquisedec miänaañ cooc ja'a Dios ja'a Abraham hänäjty piuhbeda'añ. Mäduhñtiä ja'a Abraham hänäjty tøø piaady maa hänäjty hoy tøø chiptuñän, majc-hit jaduhñ piädaacy tu'cuhdujtjaty. Mänitä Melquisedec piuhmooyy ja'a tu'hitpä. Mejtstu'u ja'a Melquisedec hänäjty tiuñ. Tøø ja'a

Dios tsajpootypä hänajty piäda'agy coo tiúnät teedy. Y gobiernä hänajty jim tiuumby maa ja'a cajpt xiøhatiän Salem. Jaduhñ miädia'agytiägø'øy coo hajxy jootcuyc yhity. Jaduhñdsä Melquisedec xiøø miädia'agytiägøøbiä coo hoy guobiernähaty.

³ Cab jaduhñ pøn ñä'ägädä najuø'øy pønä Melquisedec tiajhajt tieedyhajt, pøn yhaphajt tieedyhajt. Cab jaduhñ pøn ñajuø'øy mänaa myiñ mänaa quiahy, mänaa yho'cy mänaa tiägooyy. Coo je'e tiuñ teedywiindsøn cøjxta'axiøø, jaduhñ mäwíinäts je'e tiuñ nebiä Jesucristo tiuñän, ja'a Dios yHuung.

⁴ Cähxø'p jaduhñ coo ja'a Melquisedec møjcuhtujt hänajty jiaanč tehñ miøødä, je'eguiøxpä coo piuhmooyy ja'a tu'hitpä, mäduhñtiä ja'a Abraham hänajty tøø piaady maa hänajty hoy tøø chiptuñän. Y ja'a Abrahamä, mijts mhap mijts mdeedy je'eduhñ.

⁵ Y ja'a Leví yhap yhoc-hajxiä, ja'a hajxy tuumbä teediä, jaduhñ jim myiñ maa ja'a jecyquiuhdujtän coo hajxy piuhmo'owøøjät ja'a tu'hitpä maa ja'a majc-hitcøxpän. Ja'a miägunaaxhajxy jaduhñ yégäp, hoyyä Abraham hajxy quipxy jia møødhaphaty jia møødteedyhaty.

⁶ Pero ja'a Melquisedec, cabä Abraham hänajty jiujuhyaty miägu'ughaty. Hawiing hänajty tiuñ teedy. Pero puhmooyyä je'e ja'a tu'hitpä. Ja'a Abraham jaduhñ yejc, ja'a Dios hänajty tøøbä yajwiinwaanø'øyäbä coo hänajty yajpu'uwa'añ yaghi'iga'añ. Mänitä Melquisedec ja'a Abraham ñämaayy coo ja'a Abraham hänajty piuhbeda'añijäm ja'a Diósäm.

⁷ Y tøyhajt jaduhñ coo ja'a Melquisedec møjcuhtujt hänajty jiaanč tehñ miøødä. Cabä Abraham quiuhdujt hänajty miøjjä nebiä Melquisedec quiuhdujtän. Hix, ja'a Melquisedec jaduhñ mänaañ coo ja'a Dios ja'a Abraham piuhbédät.

⁸ Haa ja'a hajxy yaa tuumbä teedy jäda'anäbaadyñä, ho'p hajxy, hoyyä tu'hitpä hajxy jia puhmo'oyii ja'a majc-hitcøxpä. Haa ja'a Melquisedecä, jaanä puhmooyyä je'ebä, pero cabä Diosmädia'agy miäna'añ coo tøø yho'ogy.

⁹⁻¹⁰ Hoyyä Levíhajxy hijty jia tuñ teedy, cabä quiuhdujthajxy hänajty miäbaady nebiä Melquisedec quiuhdujtän, je'eguiøxpä coo ja'a Abraham ja'a Melquisedec ja'a tu'hitpä hänajty tøø piuhmo'oy. Ja'a Abraham, je'edsä Levíhajxy hänajty yhaphajpy tieedyhajpy.

¹¹ Pero ja'a teedyhajxy, ni mänaa hajxy xquia'a yajnähwáatsämät. Paadiä Dios ja'a Cristo quiejxy coo je'e tiúnät teedy nebiä Melquisedec jecy tiuuñän. Cabä tiuñ nebiä Aarónhajxy tiuuñän.

¹² Coo ja'a Dios miänaañ coo ja'a Leví yhap yhoc-hajxy quia'a túunnät teedy, mänitä jecyquiuhdujt yajtägajtspä.

¹³ Coo ja'a Dios ja'a Jesucristo yaa quiejxy, yajtägajts ja'a jecyquiuhdujt jaduhñ, je'eguiøxpä coo ja'a Jesús tiuuñ teedy, hoyyä Leví quia'a ja haphaty quia'a ja teedyhaty.

¹⁴ Hix, ja'a Judá je'e yhaphajt tieedyhajt. Y cabä Moisés waamb miänaañ coo ja'a Judá yhap yhoc-hajxy tiúnät teedy.

¹⁵ Y coo ja'a Jesucristo teedy tiuñ nebiä Melquisedec jecy tiuuñän, cähxø'p jaduhñ coo ja'a Dios ja'a jecyquiuhdujt tøø yajtägajtsnä.

¹⁶ Paadiä Jesús piädaacä teedy coo cøjxta'axiøø jiugyhada'añ. Cab jaduhñ yhity nebiä yaabä teedyhajxiän.

¹⁷ Jaduhñä Dios ja'a Jesús ñämaayy:

Cøjxta'axiøø miich mduna'añ teedy nebiä Melquisedec jecy tiuuñän.

¹⁸⁻¹⁹ Coo ja'a Moisés ja'a jecyquiuhdujt hajxy xquia'a yajnähwáatsäm, paadiä Dios jaduhñ miänaañ coo quia'a túunnät. Mänitä Dios ja'a Jesucristo yaa quiejxy coo hajxy hoy xyajnähwáatsämät. Mänitä Jesucristo hajxy jim xwioonøcxáañäm maa ja'a Dioswi-induumän.

²⁰⁻²¹ Coo ja'a Dios ja'a Jesús piädaacy teedy, mänit miänaañ coo ja'a miädia'agy jiaanč tehñ tiøyhajtä. Jaduhñds jim myiñ cujaay maa ja'a Diosmädia'agiän:

Ja'a Dios mänaaŋ coo ja'a miädia'agy jiaančh tehŋ tiøyhajtä; cábägä wyiinmahñdy mänaa yajtägatsa'añ:

“Cøjxta'axiøø miich mduna'añ teedy nebiä Melquisedec jecy tiuuñän”, nõmã Dios ja'a Jesús ñämaayy.

Pero coo ja'a wiingteedy piädaacä, cabä Dios waamb miänaañ.

²² Coo ja'a Jesucristo cøjxta'axiøø yhida'añ, jaduhñä tøyhajt hajxy nmøødhájtäm coo hajxy maas hoy xyajñähwa'adsaannäm quejee ja'a Moisés ja'a jiecycuiuhdujt. Cab hajxy je'e xyajñähwáatsäm.

²³ Ja'a teedyhajxy hädaa yaabä naaxwiimbä, coo hajxy yho'ogy, mänit hajxy ñiguiuwichii. Paady hajxy may tøø tiuunnä.

²⁴ Pero cabä Jesucristo mänaa yho'ogaannä. Cøjxta'axiøø jaduhñ tiuna'añ teedy. Cabä wiinghäna'c ja'a tuung jaduhñ yajmämähmø'owa'añ.

²⁵ Cøjxta'axiøø ja'a Jesucristo yhida'añ. Hoy jiaančh yajñähwa'adsaannä pønã jioot tsojp coo ñähgapxtu'udóøjät ja'a Jesucristäm maa ja'a Dioswiinduumän homiänaajä.

²⁶ Coo ja'a Jesucristo jaduhñ tiuñ teedywiindsøn, jaančh tehŋ yhoy hajxy jaduhñ xñähgapxtúutäm. Ni mänaa wiinghäna'c hajxy jaduhñ xquia'a ñähgapxtúutäm nebiä Jesúsän. Cabä Jesús tii pojpä tii cádieey ñä'ägädä møødä. Ni pønã jaduhñ quia'a mäbaady nebiä Jesúsän. Nhaagä møødhájtäm pojpä cádieey hajxy. Jimã Jesucristo yhijnä tsajpootyp; mõjcuhdujt jim miøød.

²⁷ Haa ja'a teedywiindsøn hajxy hädaa yaabä naaxwiimbä, jabom-jabomã animal hajxy yoxy. Jaduhñäc tyijy ja'a piojpä quiädieey hajxy ñähwa'ads quiuhwá'adsät, møødä cu'ug piojpä quiädieeyhajxy. Jayøjp hajxy yoxy ja'a yhamdsoo pojpä yhamdsoo cádieeguiøxpä. Mänit hajxy jiaac yoxy ja'a cu'ug piojpä quiädieeguiøxpä. Pero cabä Jesucristo animal mänaa yoxy. Hix, tähooc jaduhñ ñiñähdujcä coo yho'cy.

²⁸ Ja'a jecycuiuhdujt jaduhñ mänaamb coo ja'a jäya'ayhajxy tiúnät teedywiindsøn, hoyyã pojpä cádieey hajxy jia møødä. Mänitã Dios cujecy miänaañ coo ja'a Jesucristo tiúnät teedywiindsøn. Ja'a tøyhajtä Dios jaduhñ yejc coo jaduhñ miänaañ. Ni mänaa ja'a Jesús pojpä cádieey quia'a møødä.

8

¹ Hoorä, jaduhñhøch tøø nmädia'agy coo ja'a Jesucristo hajxy jim xñähgapxtúutäm tsajpootyp. Jim jaduhñ tiuñ teedywiindsøn. Hahooyhaamby jim yhäña'ay maa ja'a Diosän.

² Jim tiuñ tsajpootyp maa ja'a tsajtøjc hoybän, ja'a Dios yhädiuunäbä. Ca'a jiäya'ayä je'e hädiuun.

³ Haa ja'a hajxy yaa tuumbä teedywiindsøn hädaa yaabä naaxwiinã, jaduhñ hajxy piäda'agyii coo animal hajxy yóxät, coo hajxy cøxiã wiinã quiuyoxø'owät. Jaduhñäc tyijy ja'a piojpä quiädieey hajxy ñähwa'ads quiuhwá'adsät. Y coo ja'a Jesucristo jim teedywiindsøn tiuñ tsajpootyp, paady jaduhñ ñiñähdujcä.

⁴ Coo häxøpy yaa yhity hädaa yaabä naaxwiin, cab häxøpy tiuñ teedywiindsøn. Haa ja'a hajxy yaa tuumbä teediä, je'eds hajxy cuyoxøøby nebiä jecycuiuhdujt yhane'emiän.

⁵ Haa ja'a tsajtøjc yaabä maa hajxy tiuñänã, cab jaduhñ miäbaady nebiä tsajtøjc jim tsajpootypän. Coo ja'a Moisés ja'a wittsajtøjc hãnajty quioja'añ, mänitã Dios ja'a Moisés ñämaayy: “Tsipcøxpä wittsajtøjc jaduhñ mgójät nébiøch jim nyaghijxiän tunguhduum coo mnähguipxtú'udät.”

⁶ Tøø ja'a Dios ja'a hawiinjemybiä yajcuhducy coo hajxy jim xyaghidäänäm tsajpootyp cøjxta'axiøø. Haa hädaa hawiinjemybiä ja'a Dios yajcuhdujcäbä, maas hoy je'eduhñ quejee ja'a Moisés jecy yéjcäbä. Paadiä Jesucristo maas hoy tiuñ teedywiindsøn quejee ja'a teedyhajxy, ja'a hajxy hädaa yaabä naaxwiimbä. Ja'a Moisés jecy yéjcäbä, cab hajxy jaduhñ xjiaty puhbéjtäm nebiä hawiinjemybiän, ja'a jäda'ahatypän.

⁷ Coo hajxy häxøpy xpiuhbéjtäm ja'a Moisés jecy jia yéjcäbä, cabä Dios ja'a hawiinjemybiä häxøpy tøø ñä'ä yajcuhdücy.

⁸ Cabä Dios ja'a jecyjiäya'ayhajxy quiumaayy je'eguiøxpä coo hajxy hoy quia'a cudiuuñ. Jaduhñ jim myiñ cujaay maa ja'a Diosmädia'aguiän:

Ja'a Dios jaduñ mänaamb:

Abaadaamb jaduñ coochä jäya'ayhajxy nmøødyajcuhduga'añ ja'a hawiinjemybiä, ja'a hajxy jim tsänaabiä judíos-naaxooty møød Judábä-naaxooty.

⁹ Maas hóyhøch jaduñ nmøødyajcuhduga'añ quejéjèch ja'a yhap ja'a tieedyhajxy nmøødyajcuhdujcän mänájøch hajxy jim hoy nwoobädsømiän Egiptonaaxooty.

Cab hajxy hoy ñä'ä cudiuuñ nébiøch nja yajcuhdujquiän.

Páadyhøch hajxy jaduhyä nnä'ä nähgueecnä, nømä Dios miänaañ.

¹⁰ Coo jaduñ yhabáadät, mänítøchä jäya'ayhajxy nmøødyajcuhduga'añ ja'a hawiinjemybiä, ja'a hajxy jim tsänaabiä judíos-naaxooty, nømä Dios miänaañ.

Nyajnäxø'øwäämbiøch nmädia'agy hajxy hoy, neby hajxy hamuumdu'joot jaduñ wyiinjuó'øwät.

Mänítøch hajxy jaanç tehñ yhoy xwyiingudsähgø'øwa'añ.

Høøch hajxy ngu'ughadáannäp.

¹¹ Nägøxiøchä nmädia'agy hajxy xmiäbøgaanä ñämaj ñäbetiä.

Haagä mäbøgaamb hajxy jaduñ.

¹² Nyajnäxwa'adsääñbøch ja'a piojpä quiädieey hajxy. Cábøchä piojpä quiädieeyhajxy mänaa njahmiedsääñänä.

¹³ Coo ja'a Dios miäna'añ coo ja'a hawiinjemybiä tøø yajcuhdücy, jaduñ miänaambä coo ja'a jecypä quia'a tsoobaatnä, coo quia'a tunaannä.

9

¹ Jaduhñä jecyquiuhdujt myiimbä mädyii ja'a jäya'ayhajxy quiudiúnäp maa ja'a cha-jtøjc-hajxiän.

²⁻³ Jaduhñsä wittsajtøjc hajxy jecy yhädiuuñ. Coo ja'a wit hajxy yaghadøødiujcy, metscä cuarto jaduñ hoy miähmø'øy. Tu'nax hoy møj miähmø'øy; ja'a cujpä muutsc hoy miähmø'øy. Ja'a cuarto møjpä, je'eduhñ xøhajt “cunuu'xytiøjc”; jiibiä ceratoyøhñdy hajxy yaghijty møødä meexä maa ja'a cunuu'xychajcaagy hajxy hänajty yujcoñän. Ja'a cuarto muutspä, je'eduhñ xøhajt “cunuu'xytiøjc maa ja'a Dios yhäña'ayän.”

⁴ Ja'a orohaltar jiiby hijt maa ja'a poom hajxy hänajty jioquiän, møødä cuhdujtcajä; oronähwopy hänajty je'e. Jiiby cajäjooty ja'a orotu'ts yhiyty maa ja'a maná hajxy hänajty yaghitiän. Ja'a maná, je'edsä tsajcaagy hänajty xiøhaty ja'a Dios jecy quiéjxäbä. Jiibiä Aarón ja'a quiuhdajt yhiypä ja'a jecy wäämäbä. Jiibiä tsaa yhiypä maa ja'a Dios ja'a cuhdujt jecy yuugjahyyän.

⁵ Cajänähgøxpä querubín yhädiuunnaxyhajxy yhiyty “maa ja'a Dios yhäña'ayän.” Jimä quieecthajxy quiäjøjna'ay “maa ja'a Dios pojpä cädieey miee'xiän.” Cábøch ngapxtøwa'añ nebiaty hädaaduhmbä hijty tiuñ.

⁶ Coo ja'a wittsajtøjc hajxy hänajty tøø quiojnä, mänitä teedyhajxy jiiby tiägøøchøhñnä maa ja'a møjcunuu'xytiøjcän. Jiiby hajxy jabom-jabom tiuunnä.

⁷ Pero jiiby maa ja'a muutscunuu'xytiøjcän maa ja'a Dios hänajty yhäña'ayän, jagooyyä teedywiindsøn hijty jiiby tiägø'øy. Tähooquiä hajxy hijty jiiby tiägø'øy ja'a tu'ugjomøjtpä. Coo hajxy hänajty jiiby tiägø'øwa'añ, jayøjpä animal hajxy hijty yagho'ogy. Mänitä animalnø'ty hajxy hijty jiiby nøcxy quiuyoxø'øy muutscunuu'xytiøgooty, ja'a piojpä quiädieeguiøxpähajxy, møødä cu'ugä piojpä quiädieeguiøxpähajxy.

⁸ Jaduhñä Dioshèpíritu hajxy xyajwiinjuøøyyäm coo hajxy hoy nga'a tägøøyyämät maa ja'a Dioswiinduumän mäduhñtiä ja'a jecyquiuhdujt hajxy yajtuññä.

⁹ Jaduhñ hajxy jäda'anäbaadyñä nhíjtäm. Je'enä animal hajxy yoxy; je'enä hajxy cõxiä wiinä quiuyoxø'oy. Paady hajxy jaduhñ quiuhdujthatyñä, jaduhñäc tyijy ja'a Dios jiaanç tehñ quiumay. Cab hajxy jaduhñ ñähwa'açh quiuhwa'açh, hoy hajxy jaduhñ jia cuhdujthatyñä.

¹⁰ Jagooyyã ja'a quiuhdujthajxy yhane'emy tijaty hajxy quiáyäp yhú'ugäp, neby hajxy ñibiuj ñijie'edsøjät, neby hajxy yaa jäya'ayhädät hädaa yaabä naaxwiin. Pero yø'ø cuhdujt jaduhñbä, cab jaduhñ tiuunñä. Tøø ja'a Dios ja'a hawiinjemybiä yajcuhdujnä, mädyii jaduhñ tunaamb.

¹¹ Mänitã Jesucristo hajxy hoy xjiaanç tehñ yajñähwáatsäm. Jaaya'ay jaduhñ túunnäp teedywiindsøn jim tsajpootyp maa ja'a tsajtøjc jaanç tehñ yhojbän. Ca'a jäya'ayã hajxy hädiuun hädaa yaabä naaxwiimbä.

¹² Tøø ja'a Jesucristo jim tiägø'oy maa ja'a Dioswiinduumän ja'a tähooctagø'oyyã. Hamdsoo hänajty tøø ñiñähdugyii coo højts hänajty xñähho'tu'udáanäm. Cabä tii nø'ty quiuyoxøøyy maa ja'a yaabä tsajtøjcän nebiã yaabä teedyhajxy quiuhdujthatiän coo chivo hajxy yoxy, coo waj hajxy yoxy. Coo ja'a Jesucristo hajxy tøø xñähho'túutäm, paady hajxy jim nhidáanäm Dioswiinduum cøjxta'axiøø.

¹³ Jaduhñä jäya'ayhajxy quiuhdujthaty, coo hajxy yho'ogø'oy, mänitã chivonø'ty wajnø'ty hajxy yajniñähxänicxyii. Mänitã wajcujiaam hajxy yajniñähwøjyii, ja'a hajxy hänajty tøø ñäno'ogø'oyäbä maa ja'a altarän. Jaduhñ hajxy ñiyajñähwa'açhii.

¹⁴ Hoorä, ja'a chivonø'ty, ja'a wajnø'ty, cabä pojpä cädieey mänaa yajñähwa'açh. Ja'a Jesucristo hajxy jaduhñ xyajñähwáatsäm mänaa hajxy xñähho'túutäm. Cabä Jesucristo tii pojpä cädieey miøødä. Cab jaduhñ mänaa yho'ogaannä. Hamdsoo jim ñiñähdujçä maa ja'a Dioswiinduumän. Jaduhñä nhaxøøgcuhdujt hajxy xyajñähwáatsäm, nebiã Diosmädia'agy hajxy jaduhñ maas hoy nmäbøjçämät.

¹⁵ Coo ja'a Dios ja'a hawiinjemybiä tøø yajcuhducy, paadiã Jesucristo hajxy xñähho'túutäm, pønjetiã Dios jaduhñ wyiimbiiw. Xyajñähwáatsäm ja'a nbojpä ngädieey hajxy nebiaty hajxy tøø njäya'ayhájttäm maa ja'a jecypiã yhiytiän. Y jim hajxy xya-jnøcxáanäm tsajpootyp nebiã Dios hajxy xyajwiinwaanøøyyäm.

¹⁶⁻¹⁷ Homiädyii testamentänoquiã, cahnä tiuunçpaadyñä, jugyhajpnä jaaya'ay jaduhñ. Coonä yhó'ogät, mänitnä ja'a nocy tiuunçpaada'añ.

¹⁸ Paadiã Dios jaduhñ miänaañ coo animal hajxy yóxät, mänaa ja'a jayøbhajtpä yajcuhduquiän.

¹⁹ Coo ja'a Moisés ja'a cu'ugä jecyquiuhdujt hänajty tøø quiøxy mo'oy, mänitã wajhuung yojxy møødä chivohuung. Mänitã ñø'ty hoy ñøødemøøyyä. Mänitã tsaptsmeegpøjt hoy piäda'agy nø'ñøøjooty møødä hisopohaa'x. Mänitã cu'ug ja'a nø'ñøø yajñähxänicxy møødä jecyquiuhdujttsaa.

²⁰ Mänitã Moisés miänaañ: “Haa hädaa nø'tiä, hijxtahnd hädaaduhñ coo mijtsä Dios xmiøødyajcuhdujcy.”

²¹ Mänitã Moisés ja'a wittsajtøjc ja'a nø'ñøø hoy yajñähxänicxpä møød tijaty hajxy jii by yajtuumb by mänaa ja'a Dios hajxy hänajty wyiingudsähgø'oyän.

²² Jaduhñä jecyquiuhdujt hijty yhane'emy cooc cõxiä ñähwa'açhii nø'tyhaam. Coogä animal hajxy quia'a yóxät, cábägä piojpä quiädieey hajxy ñä'a nähwá'adsät.

²³ Haa ja'a wittsajtøjc hädaa yaabä naaxwiimbä, møød tijaty jii by hijp tsajtøgootiã, animalnø'tyhaamä Moisés yajñähwaach. Pero højtshájttäm, ni mänaa ja'a animalnø'ty hajxy xquia'a yajñähwáatsämät. Paadiã Jesucristo hajxy hoy xñähho'túutäm, jaduhñ hajxy nnähwáatsäm.

²⁴ Tøø ja'a Jesucristo jim tiägø'oy maa ja'a Dioswiinduumän. Jim hajxy xñähgapxtúutäm. Ca'a yhädaa yaabä tsajtøgootiã tiägøøyy. Haa ja'a tsajtøjc yaabä, cab jaduhñ tiehñ miäbaady nebiã tsajtøjc jim tsajpootypän.

25-26 Haa ja'a teedywiindsón hādaa yaabā naaxwiimbä, jomøjt-jomøjt jii by tiägø'øy maa ja'a muutscunuu'xytiøjcän. Jiibiä animalnø'ty nøcxy quiuyoxø'øy. Pero ja'a Jesucristo, tähooquiä yho'cy. Cabä Dios jaduhñ miänaañ coo mayhooc yhó'ogät. Cooyhabaaty, mäniä Jesucristo hajxy hoy xñähho'túutäm ja'a nboj pä ngädieeyhajtäm.

27 Ja'a Dios hajxy xquiunú'xäm xpiädáacäm coo højts tähooquiä nho'ogáañäm. Mäniä Dios hajxy xyajtøyhajtyegáañäm.

28 Jaanä tähooquiä ja'a Jesucristo hajxy xñähho'túutämbä ja'a nboj pä ngädieeyhajtäm. Tähoooyajnáhwa'achä hajxy xyajnáhwaats xyajcuhwáatsäm. Coo jadähooc quiädaactägatsa'añ, mäniä hajxy jim xyajnácxáañänä maa ja'a Dioswiinduumän, pøn jaty hánajty jaduhñ jii jøbhixp.

10

1 Haa ja'a jecyquihdujt, hijxtahnd hánajty jaduhñ hijp coo ja'a Jesucristo hajxy hánajty xñähho'tu'udáañäm. Nebiä jecyquihdujt hánajty yhane'emiän, jomøjt-jomøjtä animal hajxy jia yoxy. Pero ni pøn hánajty quia'a nähwa'aäch quia'a cuhwa'aäch, pøn jaty hánajty ja wi'i tiägø'øwäämbäp maa ja'a Dioswiinduumän.

2 Coo hajxy häxøpy tøø jiaanç nähwa'aäch tøø jiaanç cuhwa'aäch ja'a pioj pä quiädieey hajxy, cabä animal hajxy häxøpy yojxnä. Tähooquiä hajxy jaduhñ cu yojxy, mäniä jaduhñ cu yhooyøyy. Hamdsoo hajxy cu ñajuøøyy coo poj pä cädieey hajxy quia'a móødänä.

3 Pero coo animal hajxy hánajty jaduhñ yoxyñä jomøjt-jomøjt, ñajuøøby hajxy hánajty jaduhñ coo poj pä cädieey hajxy miøødä.

4 Hix, ni mänaa ja'a wajnø'ty ja'a chivonø'ty ja'a poj pä cädieey quia'a yajnáhwa'aäch quia'a yajcuhwa'aäch.

5 Paadiä Cristo ja'a Dios ñämaayy, mänaa hánajty jaduhñ yaa tøø quiäda'aguiän hādaa yaabā naaxwiin:

Caj miich mjoot jaduhñ chocy coo ja'a animal hajxy tehngajnä yóxät.

Páadyhøch miich yaa xquiejxy hādaa yaabā naaxwiin cooch yaa njäya'ayhädät, nébiøchä jäya'ayhajxy jaduhñ yaa nnähho'tú'udät.

6 Caj miich mjoot jaduhñ chocy coo animal hajxy yóxät, coo hajxy ñó'ogät.

Paadiä animal hajxy yoxy, nähwaatspä pioj pä quiädieeyhajxy jaduhñ.

7 Mäniøch nmänaañ:

“Dios, páadyhøch jaduhñ yaa tøø ngäda'agy nébiøch jaduhñ yaa ngudiúnät nébiøch miich xñämaayyän,

neby jaduhñ jim myiñän cujaay maa miich mmädia'aguiän ja'a høøchcøxpä”,

nømä Cristo ja'a Dios ñämaayy.

8 Jayøj pä Cristo miäna'añ cooc ja'a Dios jioot quia'a tsocy coo animal hajxy quia'a yóxät ni quia'a nó'ogät. Ja'a pioj pä quiädieey hajxy jaduhñ yajnáhwáatsäp yajcuhwáatsäp. Hoyyä jecyquihdujt jia hane'emy coo hajxy tehngajnä yóxät, cabä Dios jaduhñ quiumay.

9 Jaduhñ miänáangombä: “Teedy, páadyhøch yaa tøø ngäda'agy nébiøch jaduhñ yaa ngudiúnät nébiøch miich xñämaayyän.” Jaduhñ miädia'agytiägø'øy coo ja'a Cristo hánajty jaduhñ yhane'ema'añ coo animal hajxy quia'a yójxnät, nebiä Tieedy miädia'agy jaduhñ quiudiúunät.

10 Hoyyä Jesucristo ja'a Tieedy miädia'agy jiaanç cudiuunä coo højts jaduhñ tähooquiä xñähho'túutäm; paadiä Dios hajxy xyajnáhwaats xyajcuhwáatsäm.

11 Jaduhñä jecyquihdujt hijty yhane'emy coo ja'a teediä animal hajxy jabom-jabom wyi'i yóxät. Hoy hajxy jaduhñ jia cudiuun, cab hajxy jaduhñ ñä'ägädä nähwaach ñä'ägädä cuhwaach.

12 Coo ja'a Jesucristo ja'a nboj pä ngädieey hajxy hánajty tøø xñähho'túutäm tähooquiä, mäniä hoy yhäñaaguiäda'agy maa ja'a Dios yhahooyhaampiän.

13 Jim jaduhñ yhahixy coo ja'a miädsiphajxy quia'a mäjäda'aga'añ.

14 Tähooquiä hajxy tøø xñähho'túutäm. Jaduhñä nbojpa ngädieey hajxy xyajñähwaats xyajcuhwáatsänä.

15 Jaduhñä tøyhajt hajxy nmøødhájtäm coo tiøyyä, je'eguiøxpä coo ja'a Dioshespíritu jaduhñ miänaambä maa jaduhñ cujaay myiñän:

16 Coo jaduhñ yhabáadät, mänitøch hajxy nmøødyajcuhduga'añ, nømä Dios miäna'añ: Nyajñähixø'øwáambiøch nmädia'agy hajxy hoy, neby hajxy jaduhñ hamuumdu'joot wyiinjuó'øwät.

17 Mänit miänáangombä:

Cábøchä piojpa quiädieeyhajxy mänaa njahmiedsáanänä.

18 Jaduhñds je'e, tøø ja'a Jesucristo ja'a nbojpa ngädieey hajxy xyajñähwaats xyajcuhwáatsänä tähooquiä. Hoyyä animal hajxy jia yoxyñä, cab jaduhñ choobaatnä.

19-20 Hermanodøjc, maa ja'a jecyquihdujt myiñän, cabä cuhdujt pøn miøødä coo jiiby tiägó'øwät maa ja'a muutscunuu'xytiøgootiän. Pero coo ja'a Jesucristo hajxy tøø xñähho'túutäm, paady hajxy jim hoy ndägø'øwáanänä maa ja'a Dioswiinduumän. Tøø hajxy xyajñähwaats tøø hajxy xyajcuhwáatsäm ja'a nbojpa ngädieeyhájtäm.

21 Je'eds hajxy jim xñähgapxtúutäm Dioswiinduum.

22 Entonces, tsøg hajxy jim tägóøyyäm Dioswiinduum. Tsøgä miädia'agy hajxy hamuumdu'joot mábøjcäm coo ja'a cuhdujt hajxy nmøødhájtäm coo hajxy jim ndägóøyyämät, je'eguiøxpä coo ja'a Jesucristo hajxy tøø xñähho'túutäm. Jaduhñä nbojpa ngädieey hajxy tøø xyajñähwaats tøø xyajcuhwáatsäm.

23 Tsøgä Diosmädia'agy hajxy tehngajnä mábøjcäm. Cab hajxy nnajtshixøøyyämät. Nmøødhájtäm ja'a tøyhajt hajxy jaduhñ coo ja'a Dios hajxy xmio'owáanäm nebiaty hajxy tøø xyajwiinwaanøøyyäm coo hajxy cøxiä wiinä xmio'owáanäm.

24 Tsøg hajxy niguiapxwíjjäm neby hajxy maas hoy nniçhojc nnibia'häyóowämät hamiñ haxøpy, neby ja'a Diosmädia'agy hajxy jaduhñ maas hoy ngudiúunämät.

25 Jaduhñ hajxy nyajñajuøøyyäm coo miäwiingoonnä coo ja'a Jesucristo yaa quiädaactägatsa'añ. Paady, tsøg hajxy nijiootcapxmøcpøjcäm. Tehngajnä hajxy nhamugøøyyämät ja'a Dioscøxpä. Näje'e hajxy, cab hajxy jaduhñ ñä'ägädä mejtsnä. Cabä quiuhdujthajxy jaduhñ yhoyyä.

26 Coo hajxy tehngajnä haxøøg nwädíjtämät, hoyyä tøyhajt hajxy tøø nja wiinjuøøyyäm, cabä nbojpa ngädieey hajxy jaduhñ ñä'ägädä nähwáatsämät.

27 Haxøøgtuumä Dios hajxy jaduhñ xpiädáacämät maa ja'a jøøn tioyyän, maa ja'a Dios miädsiphajxy yhitiän. Hoçhähgøøñä jaduhñ jiiby.

28 Pøn jaduhñ ca'a cudiuumb nebiä Moisés ja'a jecyquihdujt yhane'emiän, pø tøø testigohajxy jaduhñ yhixy mejtstägøøgä, tsipcøxp jaduhñ yagho'oga'añii.

29 Maas hanaxiä hajxy jaduhñ quiümädowaannä pønjaty ja'a Dioshespíritu jaduhñ haxøøg nänøømb, ja'a mayhajt tuumbä, pønjatiä Dioshuung jaduhñ xøøghajp, pønjatiä ñø'ty jaduhñ häyoowhíxäp, hoy hajxy je'eduhñ tøø xjia nähho'túutäm, hoy hajxy je'eduhñ tøø xjia yajñähwaats tøø xjia yajcuhwáatsäm.

30 Tøyhajtä Dios jaduhñ miänaañ: “Høøch jaduhñ nyaghawiimbidaamby.” Chaadsä Diosmädia'agy miänáangumbä: “Dios quiu'ug jaduhñ yajcumädowaambä.”

31 Hoçhähgøøñä jaduhñ coo ja'a Dios hajxy xyajcumädóowämät; je'eduhñ jugyhajp cøjxta'axiøø.

32 Naxy hajxy mdehm jiahmiédsät nebiä Jesucristo miädia'agy hajxy mmädoodsohnän. Hamuumdu'joot hajxy mbadu'ubøjcy, hoy hajxy hänajty mja tsaächpøcy hoyhoy.

33 Näje'e hajxy myaghäyoowhijxy cu'ughagujc. Y mjootcapxmøcpøjpy hajxy hänajty pønjaty hänajty jaduhñ häyoowhíxäp.

34 Y mnäxuu'chp hajxy hänajty pønjaty hänajty tsumyçhänäaby. Mxoondaacp hajxy hänajty, hoy hajxy cøxiä wiinä xjia pøjcä. Mnajuøøby hajxy hänajty coo hajxy jim mhida'añ tsajpootpy cøjxta'axiøø.

³⁵ Entonces, cab hajxy tii mdájät mmáyät; tehngajnä hajxy mmäbógät coo ja'a Dios hajxy xyhixyñä. Mjahmiédsäp hajxy jaduhñ coo hajxy nõcxy jim mhidaañnä tsajpootyp.

³⁶ Naxy hajxy mdehm miee'xtúgät, nebiä Diosmädia'agy hajxy jaduhñ hoy mgudiúnät. Jaduhñ hajxy mbáadät tijaty ja'a Dios hajxy tøø xyajwiinwaanøøyyäm coo hajxy xmio'owáañäm.

³⁷ Jaduhñä Diosmädia'agy miäna'añ:

Mobädajpä je'e quiäda'aga'añ pønä Dios jaduhñ quiexaamby.

³⁸ Pønä Diosmädia'agy hoy cudiumb, miäbøjpy je'eduhñ tehngajnä.

Pero coo ñajtshixø'owät, cabä Dios quiumayaañnä.

³⁹ Pero højtshájtäm, cab hajxy mänaa nnajtshixø'owáañäm. Tehngajnä hajxy nmäbójcäm. Paadiä Dios hajxy xyhuuc yajnähwa'adsáañämbä. Cab hajxy xyajcumädowáañäm.

11

¹ Coo hajxy nmäbójcäm, mänitä tøyhajt hajxy nmøødhájtäm coo hajxy nbaadáañäm mädyiijaty hajxy njøbhíxäm, hoy je'eduhñ quia'a ja cähxø'øgyñä.

² Ja'a jecyjiäya'ayhajxy, coo hajxy miäbøjcy, paadiä Dios quiumaayy.

³ Coo hajxy nmäbójcäm, jaduhñ hajxy nyajnajuoøyyäm coo ja'a Dios ja'a naaxwiin yajwa'añguiojy ja'a miädia'agyhaam, møødä madsa'a, møødä po'o, møødä xøø.

⁴ Coo ja'a Abel jecy miäbøjcy, paadiä Dios quiumaayy. Hix, hoyyä Abel quiudiuuñ coo animal yojxy ja'a Dioscøxpä. Ja'a Caín, caj quiumaayyä je'eguiøxpä coo hñajty quia'a mäbøcy. Hix, cabä animal yojxy. Hoy jaduhñ coo ja'a Abel hajxy nbahíxämät, hoy jecy jia yagho'cä. Hix, miäbøjc ja'a Abel.

⁵ Coo ja'a Enoc jecy miäbøjcy, paadiä Dios quiumaayy. Cabä Enoc ñä'a ho'cy. Jaduhyyä Dios yajnøcxy tsajpootyp. Jaduhñ jim myiñ cujaay maa ja'a Diosmädia'aguiän.

⁶ Coo hajxy nga'a mäbójcämät, cabä Dios hajxy xquiümáayyämät. Tsipcøxp hajxy nmäbójcämät coo ja'a Dios tiømiädia'agy. Y jaduhñ hajxy nmäbójcämät coo ja'a Dios piuhbeda'añ pønä Dios wiingudsähgø'øwaamb.

⁷ Coo ja'a Dios ja'a Noé jecy ñämaayy coo ja'a nõøgomdägoy ja'a naaxwiin hñajty quiøxy wiinyeegø'owa'añ, mänitä Noé ja'a Dios miädia'agy jaduhñ quiudiuunä, hoyyä nõøgomdägoy hñajty quia'a ja cähxø'øgyñä. Mänitä barco cruundä yhädiuun. Jiibiä Noéhajxy choocy møødä yhuung møødä tio'oxy. Coo ja'a Noé jaduhñ miäbøjcy, paadiä Dios jiaanč tehñ quiumaayy. Pero ja'a wiinghäna'c-hajxy, cab hajxy miäbøjcy. Paady hajxy øjx quiuhdägoy.

⁸ Coo ja'a Dios ja'a Abraham jecy ñämaayy coo jim chóonät ñäaxooty, coo jäguemnaax ñøcxät maa ja'a Dios ja'a Abraham yajnähdijjiän coo chänaadiaacpógät, miäbøjc ja'a Abraham jaduhñ. Mänit jim jiaanč tsohñnä ñäaxooty. Nä'a nägoobä ñä'a tu'ubøjnä. Cab hñajty ñajuø'øy maa ñøcxät.

⁹ Coo ja'a Abrahamhajxy jim miehch maa ja'a Dios hñajty tøø yajnähdijjiän, cab hajxy tiehm chänaadiaacpøjcy, je'eguiøxpä coo hñajty jiäya'añäaxootiä. Wittøgooty hajxy hñajty chäna'ay. Pero miäbøjpiä Abrahamhajxy hñajty coo ja'a naax hajxy hñajty mio'owa'añii, neby hajxy hñajty tøø yajwiinwaanø'øyiijän ja'a Diósäm. Jaduhñä Abraham yhuung Isaac ñämaayyäbä møødä yhoc-huung Jacob.

¹⁰ Hix, ñajuøøbiä Abrahamhajxy hñajty coo hajxy hñajty jim ñøcxa'añ tsajpootyp Dioswiinduum. Cab hajxy hñajty tiajy miay coo ja'a naax hajxy quia'a tsoj mooyyä.

¹¹ Jaanä jaduhñä Sara jecy miäbøjpä. Tøø hñajty miäjaanä mänaa ja'a Dios hoy piuhbetiän coo maaxhuung piáadät. Y jaanč huungpaat ja'a Sara jaduhñ je'eguiøxpä coo miäbøjcy nebiä Dios hñajty tøø yajwiinwaanø'øyän.

¹² Y ja'a Abrahamä, hoy hñajty tøø jia mäjaanä, møjjøøyy mayøøyy je'eduhñ. Tøø ja'a yhap yhoc-hajxy jaduhñ jiaanč tehñ miayøøñä. Cab hajxy jaduhñ hoy yajmächowa'añ. Jaduhñ hajxy miayyä nebiä madsa'ajän, nebiä tsabiu'ujän.

13 Coo ja'a Abrahamhajxy yho'cy, cahnä hajxy hänajty quiøxy paadyñä mädyijatiä Dios hänajty tøø yajwiinwaanø'øy. Pero miäbøjc hajxy jaduhñ. Ñajuøøby hajxy hänajty coo hajxy hänajty jim ñøcxa'añ tsajpootyp. Paady hajxy xioonndaacy. Ñajuøøby hajxy hänajty coo hajxy hänajty nä'ä nägoobä wiädityñä.

14 Pønjaty jaduhñ wädijp, cahnä tsänaadiaact hajxy piaadyñä.

15 Coo ja'a jioothajxy cu chojcy, cu wyiimbijty hajxy, cu ñøcxtägajch hajxy je'e maa hajxy hänajty tøø yhuuc tsohmñän.

16 Pero jimä jioot hajxy hänajty hamuumdu'joot tøø piäda'agy tsajpootyp maa ja'a chänaadiaacthajxy hänajty tøø yhähixø'øyyäxän. Ja'a Dios jaduhñ hähixø'øyy. Cabä Dios miädsähdiuuñ ja'a Abrahamhajxy.

17-18 Coo ja'a Dios ja'a Abraham yhanehmy coo yhuung yóxät, ja'a Isaac-hajpä, miäbøgaambiä Abraham hänajty je'eduhñ, hoy ja'a yhuung hänajty jia tu'uquiä, hoyyä Dios hänajty tøø jia mäna'añ: “Møjø'øwaamb mayø'øwaamb miüch mhuung ja'a Isaac-hajpä.” Ñä'ä joodhijx ja'a Dios ja'a Abraham jaduhñ pø jiaanç cudiunaamby hänajty jaduhñ.

19 Miäbøjpiä Abraham hänajty coo ja'a yhuung hänajty yagjujypiøgáañäxä ja'a Diósäm. Mänitä Dios miänängombä coo ja'a yhuung quia'a yaghó'ogät. Jaduhñ mäwínäts ja'a Isaac hoy jiaty nebiä jadähooc tøø jiuypioquiäbän.

20 Coo ja'a Isaac miäbøjcy, paadiä Jacob ñämaayy møødä Esau coo ja'a hoybä ja'a weenbä hajxy piaada'añ.

21 Coo ja'a Jacob miäbøjcy, paadiä yhoc-huunghajxy ñämaayy coo ja'a hoybä weenbä hajxy piaada'añ. Ja'a José yhuunghajxy je'e. Mänitä Jacob ja'a Dios wyiingudsähgøøyy. Cuhdajtcøxp hänajty ñiguiuhdijyii. Ho'ogáannäp hänajty je'eduhñ.

22 Coo ja'a José miäbøjcy, ñajuøøyy jaduhñ coo yhap yhoc-hajxy hänajty jim cujecy choona'añ Egiptonaaxooty. Paady jaduhñ yhanehmy coo ja'a piajc miänøcxäxät. Ho'ogáannäp hänajty je'ebä.

23 Coo ja'a Moisés myiñguiahy jaanç tehñ yajxón, yu'uüch hajxy yaghijty tågøøgpø'o. Hix, tøø ja'a gobiernä hänajty hoy yhane'emy coo ja'a pigäna'c-huunghajxy quiøxy yagho'ogøøjät ja'a ya'ayhäna'cpä. Ja'a Moisés tiaj tieedy, cabä gobiernä hajxy hänajty chähgø'øy. Miäbøjpiä Diosmädia'agy hajxy hänajty.

24 Coo ja'a Moisés miøjøøñä, miäbøjc je'ebä. Cabä gobiernä hänajty tieedy-haphadaañä, ja'a hänajty jim tuumbä Egiptonaaxooty.

25 Hamdsoo jaduhñ miänaañ coo ween yhäyoowhixyii møødä Dios quiu'ughajxy näguipxy. Cab hänajty jim miähmø'øwaanä maa ja'a haxøøgcuhdujt hajxy wyl'i tiuñän. Cab hajxy hänajty ñajuø'øy coo hajxy hänajty jecy quia'a xoonda'agaannä.

26 Cabä Moisés ja'a jioot jim piädaacnä maa ja'a xädø'øñän jim Egiptonaaxooty. Maas jootcujc hänajty ñijiäwøøyyänä coo yhäyoowhixø'øjät ja'a jäya'aguiøxpä, ja'a Dios hänajty quixaambiä. Ñajuøøby hänajty jaduhñ coo ja'a hoybä weenbä mio'owa'añijäm ja'a Diósäm.

27 Coo ja'a Moisés miäbøjcy, paady jim chohnä Egiptonaaxooty. Hoyyä gobiernä hänajty jia jootma'ady, cabä Moisés ñä'ägädä tsähgøøyy. Tähooctu'ubøquiä ja'a Moisés tiu'ubøjnä. Ja'a Diosmädia'agy hänajty miäbøjpy, hoyyä Dios mänaa quia'a ja hixyii.

28 Coo ja'a Moisés miäbøjcy, paadiä pascuaxøø yagijtä. Jaduhñ yhanehmy coo ja'a tøghagø'øw nø'ty hajxy yajwiinxänicxø'øwät, nebiä judíos quiobhuunghajxy quia'a yaghó'cäxät, ja'a ya'ayhäna'cpä. Ja'a Dios ja'a mioonsä tsajpootypä tu'ug quejx coo ja'a quiobhuunghajxy yaghó'cäxät, ja'a ya'ayhäna'cpä, pønjetiä nø'ty hänajty tøø quia'a yajwiinxänicxø'øy ja'a tøghagø'øw.

29 Coo judiøshajxy jaduhñ miäbøjcy, mäniä Dios ja'a Tsaptsmejy cujc yaghawaach maa hajxy jaduhñ ñaxø'øwät tø'ødstuum. Mänitä Egiptobä-jäya'ayhajxy hoy jia panaxaambä. Mänitä Dios ja'a nøø hoy yajtu'ugmújcombä. Cøjxä Egiptobä-jäya'ayhajxy ñøøho'ogø'øy.

³⁰⁻³¹ Coo ja'a judíoshajxy miábøjcy, paadiä cajpt hajxy juxtujc-hooc jiuhyohwiädipty ja'a xøhajtä Jericó. Mänitä tsaamuuch piuumnä. Je'e hänajty curaahajt wäditä maa ja'a cajptän. Cøjxä jäya'ayhajxy jiiby yho'nä, ja'a hajxy hänajty ca'a mäbøjpä. Coo ja'a quixy Rahab miábøjcy, hoy hänajty jia tuñ maa ja'a burdelän, paady jaduhñ quia'a ho'cy, je'eguiøxpä coo ja'a judíos hänajty tøø yu'u'ch, ja'a hajxy hänajty wädiptä hixøøbiä woodsøøbiä.

³² Coo cu ñäbaadøøyy, cu nmädiáacyhöch ja'a Gedeón, ja'a Barac, ja'a Sansón, ja'a Jefté, ja'a David, ja'a Samuel, møødä Dios ja'a quiuguexyhajxy.

³³ Coo hajxy miábøjcy, paadiä miädsip ja'a ñaax hajxy hoy miämähmøøyyänä; paady hajxy hoy guobiernähajty; paadiä Dios hajxy xpiuhbéjtäm nebiaty hajxy hänajty tøø xyajwiinwaanøøyyäm; paady hajxy quia'a leontsu'tsä;

³⁴ paady hajxy quia'a tooyy møjjøønhajjooty; paady hajxy quia'a cuhbujxä. Ja'a häna'c-hajxy ca'a møcpä, mänitä mäjaa hajxy piaaty mänaa hajxy hänajty chiptuna'añän. Cabä miädsip hajxy yajmäjädaacy, hoyyä miädsiphajxy hänajty jia nämayyä. Ñä'ägä yajpâyø'c hajxy je'e.

³⁵ Jii ja'a to'oxiøjc-hajxy hänajty näje'e ja'a yhuung ja'a ya'ay jiuypjøjcy.

Näje'e ja'a Diosmädia'agy hajxy yajcudsaächtiunøøyyä. Coo ja'a Diosmädia'agy hajxy hänajty quia'a nä'ägädä najtshixø'øwa'añ, mänit hajxy yaghó'cänä. Tøø hajxy hänajty ñajuø'øy coo hajxy jiuypjøga'añ, coo hajxy jim ñøcxa'añ tsajpootyp.

³⁶ Näje'e hajxy wyiinwohñä wiobho'cä. Høxtä yajcudsumøøyyä hajxy näje'e cø'øxoch.

³⁷⁻³⁸ Näje'e hajxy quiuhga'tsä, näje'e hajxy jiøø'wa'xä, näje'e hajxy quiuhbujxä. Jim hajxy hänajty näje'e wiädity pactuum, wiinwa'adstuum, tunjooty. Jim hajxy hänajty näje'e chäna'ay tsaajutjooty. Cabä howyit hajxy hänajty miøødä. Meeghac chivohac hajxy hänajty wyithajpy. Jaguiay hajxy hänajty yhity. Xøøghajtäp hajxy hänajty, häyoowhíjxäp hajxy hänajty. Paady hajxy hänajty jaduhñ jiaty yhabety coo ja'a Diosmädia'agy hajxy hänajty miábøcy. Jaanç tehñ quiümáayyap hajxy hänajty ja'a Diósäm. Cabä Dios jaduhñ quiümay pøn ca'a mäbøjp.

³⁹ Hoy hajxy jia cumaayyä, cab hajxy miooyyä mädyijatiä Dios hänajty tøø yajwiinwaanø'øy.

⁴⁰ Jäguemiä Dios wyiinmahñdyhajty coo ja'a hoyhajt ja'a weenhajt hajxy xmio'owáañäm. Paadiä jecyjiäya'ayhajxy quia'a tsoj mooyyä, näguipxiä Dios hajxy jaduhñ xmio'owáañäm møødä jecyjiäya'ayhajxy.

12

¹ Tsøgä jecyjiäya'ay hajxy jaduhñ pahíjxäm nebiä Diosmädia'agy hajxy miábøjquiän. Tsøgä haxøøgcuhdujt hajxy najtshixøøyyäm. Tsøgä nhamdsoo cuhdujt hajxy høxhíjxäm. Je'eduhñ wiingtuum xjia wi'i wioonøcxáañäm. Tsøg hajxy tehñgajnä cudiúunäm nebiä Dios hajxy xyhanéhmäm.

² Tsøgä Jesucristo hajxy hamuumdu'joot pahíjxäm. Jaaya'ay hajxy xyajnahixøøyyäm coo ja'a Diosmädia'agy hajxy hoy nmäbøjcämät. Höchähdiuunnä ja'a Jesús mähdijc jaduhñ yho'cy cruzcøxp. Pero ñajuøøby hänajty je'eduhñ coo hänajty jim nøcxy xioonnda'aga'añ tsajpootyp. Jim jaduhñ yhäñañä maa Dios yhahooyhaampiän.

³ Tsøgä Jesucristo hajxy jahmiejtstáacäm coo jiaanç tehñ chaaçhpøjcy. Ja'a cahwi-indøyhäna'c-hajxy jaduhñ jatcøøyy. Miee'xtujc ja'a Jesucristo jaduhñ. Tsøg hajxy jaduhñ pahíjxäm; jaduhñ hajxy nga'a jootmayhajtämät.

⁴ Hoyyä haxøøgpä hajxy xjia mädsiphajtäm, cahnä hajxy jaduhñ xyaghó'cäm.

⁵ Ja'a Dios hajxy jaduhñ xjiootcapxmøcpøjcam maa ja'a miädia'agy cujaay myiñän: Huang, ca'a mjootma'ady, hoyyä Dios tøø xjia yajcumädoy. Hoy xjia hoy, ca'a mjootmayhaty.

⁶ Miägaxyp yhanehmñbiä Dios pønajaty chojpy;

yajcumädooby pønjaty yhuunghajpy.

⁷ Coo ja'a Dios hajxy xyajcumädówät, mmee'xtúgäp hajxy jaduhñ. Hopiønnä yhuung yajcumädoy.

⁸ Yajcumädoobiä Dios ja'a yhuunghajxy nägøxiä; y pø caj mijts jaduhñ xyajcumädoy, cähxø'p jaduhñ coo ja'a Dios hajxy tøyhajt xquia'a huunghaty.

⁹⁻¹⁰ Ja'a hajxy ndeedyháltämbä hädaa yaabä naaxwiimbä, nwiingudsähgøøyyäm hajxy jaduhñ, hoy hajxy hijty xyajcumädóowäm mänaa hajxy tøø nmuutsc-háltäm. Paady hajxy hijty xyajcumädóowäm coo hajxy hijty nga'a mädia'agymiäbøjcäm. Hoorä, tsögä nDeedyháltäm hajxy mädia'agymiäbøjcäm, ja'a jim tsajpootypä. Mänit hajxy jim xyagháltämät. Paadiä Dios hajxy xyajcumädóowäm, nebiä miädia'agy hajxy jaduhñ maas hoy nmäbøjcämät, nebiä hawa'adstuum hajxy jaduhñ hoy nhíjtänät nebiä Dios yhitiän.

¹¹ Tøyhajt hajxy ndsaaçhpøjcäm mänaa ja'a Dios hajxy xyajcumädóowäm. Nbáatäm ja'a tsaachpä hajxy jaduhñ. Pøn jaduhñ mäbøgaamb hamuumdu'joot, cab jaduhñ waamb miäná'anät, hoy hánajty jia tsaachpøcy. Maas hoy jiäya'ayhadaannä. Maas jootcuyc yhidaannä.

¹² Naxy hajxy mdehmñ ñijiootcapxmøcpøgøøjät neby hajxy jaduhñ hoy myo'oy mnáxät.

¹³ Mhøxtá'awäp ja'a hodi'u hajxy, nebiä hermanodøjc hajxy jaduhñ hoy xpiawädítät, neby hajxy jaduhñ quipxy xquia'a padu'udägóyyät.

¹⁴ Naxy hajxy hoy mdehmñ yhidät tu'ugmädia'agy nägøxiä. Hoy hajxy mjäya'ayhädät. Pøn hoy ca'a wädijp, cab jim ñøcxa'añ Dioswiinduum.

¹⁵ Tehngajnä hajxy mnigwieendähadóøjät, neby hajxy jaduhñ mga'a tu'udägóyyät. Coo pøn jaduhñ tiu'udägóyyät, je'e jioot ca'a tsojp coo piuhbedøøjät ja'a Diósäm. Cab hajxy mnimiäjootma'adóøjät. Coo hajxy haagä jaduhñ mjatcø'owät, pues nägøxiä hajxy jaduhñ mmá'adät.

¹⁶ Cab hajxy mhaxøøgwädítät. Cabä Diosmädia'agy hajxy myaghäyø'ogät. Jaduhñä Esau jecy jiatcøøyy, coo hánajty yäho'ogyii; yajwiingubøjc ja'a ñädeedy ja'a cay. Paadiä ñädeedy hánajty miøødä, coo hánajty quiobhuungä. Mo'owáanäp hánajty jaduhñ cøxiä mäduhñtiä ja'a tieedy hánajty miädsäna'ay.

¹⁷ Y coo ja'a Esau jioot hánajty chocy coo cøxiä mio'owøøjät ja'a tiédiäm, cab tii ñä'ä mooyyä, hoy jia jøøyy. Hamdsoo jaduhñ quia'a niyaghoyøøyyä.

¹⁸⁻²² Ja'a Moisés hajxy, jequiän hoçhähgøøñäbä hajxy jim yhiixy miädooyy maa ja'a tunän ja'a xøhjäpä Sinaí. Ja'a pojtäxa'a hajxy yhiix møødä jøøn jim maa hánajty jiaanç tehñ wyiingoodsän. Mänit hajxy miädooyy nebiä jäya'ay xiu'uxiän. Mänit hajxy miädooyy coo ja'a Dios quiapxy. Hoçhähgøøñä ja'a Dios quiapxy. Jaduhñä Dios yhanehmy coo hajxy hotyijatiä quiuhgá'adsät tijaty jim mejtsp maa ja'a tunän, hoy jia animalä. Pero cab hajxy miee'xtujnä. Mänitä Dios hajxy miänuu'xtaacy coo quia'a cápxnät. Moisés paady je'e chähgøøñä. "Jaanç tehñ chähgøøbiøch, paady ndsäyuy", nõmä Moisés miänaañ. Pero jim tsajpootyp jim Dioswiinduum, cab jim yhoçhähgøøñän. Siön jim xiøhaty maa ja'a Dios yhäña'ayän. Jaduhñ jim xiøhjäpä, ja'a Jerusalén tsajpootypä. Tøø ja'a Dios cuhdujt hajxy xmio'oy coo hajxy mwiingudsähgø'owät. Milhaamä Diosmoonsähajxy jim xioonda'agy Dioswiinduum.

²³ Jimä Dioshuung yhaañämähajxy tiu'ugmucy ja'a xiøøhajxy tøøbä yajcujaayíjábä. Ja'a Diósäm hajxy yajnähwaats yajcuhwaatsä. Nägøxiä ja'a Dios hajxy jim xwyiinmahñdyhixáañäm.

²⁴ Jimä Jesucristo hajxy xñähgapxtúutäm nebiä Dios hajxy tøø xmiøødyajcuhdújcäm hawiinjemy. Coo ja'a Abel jecy yagho'cä, mänitä Dios yaghawiimbijty. Pero coo ja'a Jesucristo hajxy tøø xñähho'túutäm, xyajnähwaats xyajcuhwáatsäm ja'a Dios ja'a nbojpä ngädieey hajxy.

²⁵ Coo ja'a jecyjiäya'ay ja'a Diosmädia'agy hajxy yaa quia'a mäbøjcy hädaa yaabä naaxwiin, mänit hajxy yajcumädoowä. Hoorä, coo ja'a Dios hajxy xyhamdsoo hanéhmäm

jim tsajpootyp, maas hanaxiä hajxy jaduhñ njájtämät coo ja'a miädia'agy hajxy nga'a mábójcämät. Entonces, tsög hajxy hamuumdu'joot mábójcäm.

²⁶ Coo ja'a Dios jecy quiapxy, mäniä naaxwiin yajtsäyuyuy. Jaduhñ tøø miänaañnä coo cøxiä yajtsäyuyyaannä jadähooc møødä naaxwiin møødä tsajtcøxp.

²⁷ Jaduhñ miädia'agytiägø'øy coo ja'a Dios yajcuhdägoyya'añ tijaty tøø yhädiuñ møødä naaxwiin møødä tsajtcøxp. Pero mädyiijaty jim tsajpootyp, caj yajcuhdägoyya'añ.

²⁸ Tsögä Dios hajxy nämáayyäm Dioscujú'uyäp je'eguiøxpä coo hajxy jim xyaghidáañäm tsajpootyp cøjxta'axiøø. Hamuumdu'joot ja'a Dios hajxy nwiingudsähgøøyyämät. Jaduhñ ja'a Dios hajxy xquiumáayyämät.

²⁹ Yajcuhdägoobiä Dios je'e tijaty jaduhñ quia'a cumaaby.

13

¹ Tsög hajxy hamuumdu'joot niçhojc nibia'häyóowäm nebiä tu'ugpuhya'aybän.

² Coo pøñ miédsät maa ja'a mdøjcän, hamuumdu'jootä mjøøn mdøjc hajxy mmó'owät. Näje'e hajxy tøø tiøjmo'oy ja'a Diosmoonsä tsajpootyp-tsohm̄bä. Cab hajxy hñajty ñajuø'oy pø Dios mioonsähajxy je'e.

³ Mbuhbédäp hajxy ja'a jäya'ayhajxy hijpä tsumy, møød hajxy häyoowhíxäbä. Hix, quipxy ja'a Diosmädia'agy hajxy mmøødmäbøcy.

⁴ Ja'a Dios jaduhñ mänaañ coo jäya'ayhajxy ñimiøødtsäna'awóøjät ya'adio'oxy. Cab jaduhñ yhooyä coo ja'a mmägu'ughajpä tio'oxiøjc jaduhñ mnä'ä wi'i yhäyoowhíxät, coo ja'a Dios jaduhñ xñä'ä yajcumädówät.

⁵ Cabä xädø'øñ hajxy mwi'i piøcjuó'owät. Jootcujcä xädø'øñ hajxy mmähídät, mäduhñtiä hajxy mmøødä. Tøø ja'a Dios jaduhñ miäna'añ cooc hajxy ni mänaa xquia'a nähgue'egáañäm.

⁶ Paady hajxy hamuumdu'joot nmänáañämät:

Ja'a Dióshøch jaduhñ xpiuhbejp.

Cábøch jaduhñ pøñ ndsähgø'øy, hoñéjpiøch hajxy cu xjia tun.

⁷ Mbahíxäp jäya'ay hajxy, ja'a Diosmädia'agy hajxy tøø xyajnähixø'øyäbä. Hamuumdu'joot ja'a Diosmädia'agy hajxy miäbøjcy. Hoy hajxy jiaançh tehñ jjäya'ayhajty.

⁸ Cabä Jesucristo ja'a quiuhdujt mänaa yajtägach.

⁹ Cabä wiingmädia'agy hajxy mbadu'ubógät. Coo ja'a Dios hajxy xchójcäm, maas hoy jaduhñ coo ja'a miädia'agy hajxy nmábójcämät. Näje'e hajxy ñajtsapxø'øy cooc tyijy yhamajtsä, cábc tii mdsú'udsät mgáyät. Pero yø'ø cuhdujt jaduhmbä, caj yø'ø xpiuhbédät.

¹⁰ Tøø ja'a Jesucristo hajxy xñähho'túutäm, paadiä miädia'agy hajxy jaduhñ nbanócxäm. Pero pøñä jecyquiuhdujt panøcxnä, cabä cuhdujt hajxy miøødä coo ja'a Jesucristo hajxy pianócxät.

¹¹ Jegyhajty ja'a teedywiindsón animalnø'ty hajxy hijty quiuyoxø'øy maa ja'a muutscunuu'xytiøjcän, nebiä piojpä quiädieey hajxy jaduhñ ñähwa'ads quiuhwá'adsät. Mäniä animalho'ogy hajxy hijty nøcxy ño'ogy cajtpa'a.

¹² Jaanä jimä Jesús hoy yho'pä cajtpa'a. Jaduhñ hajxy xyajnähwaats xyajcuhwáatsäm ja'a nbojpä ngädieeyhájtäm.

¹³ Tsögä jecyquiuhdujt hajxy najtshixøøyyäm. Tsögä Jesucristo miädia'agy hajxy hamuumdu'joot panócxäm, hoyyä cu'ug hajxy xjia xøøghájtäm.

¹⁴ Haa hädaa yaabä naaxwiinä, caj jiega'añ. Pero jim njoot hajxy nbädáacäm tsajpootyp.

¹⁵ Tsögä Dios hajxy tehngajnä wiingudsähgøøyyäm ja'a Jesucristocøxpä. Tsög hajxy tehngajnä mänáañäm coo ja'a Dios miøjjä jiaançhä.

¹⁶ Naxy hajxy hoy mdehm̄ jiäya'ayhádät. Mbuhmó'owäp ja'a wiinghäna'c hajxy tijaty hajxy mmøød. Jaduhñä Dios hajxy xjiaançh tehñ quiumáyät.

¹⁷ Mmábójcäp ja'a copc-hajpä miädia'agy hajxy. Xcwieendähajp hajxy jaduhñ neby hajxy mga'a tu'udägóyyät. Najuøøby hajxy coo hajxy wyiinmahñdyhixa'añíjäm ja'a Diósäm. Naxy hajxy mdehm̄ miábógät nebiä mgopc-hajpähajxy jaduhñ yhídät jootcujc. Coo hajxy mga'a mábógät, cab hajxy hñajty jaduhñ tøø mniyaghoyø'øyii.

¹⁸ Mdúnäbä mayhajt hajxy, pa'ya'axä Dios hajxy ja'a høøchcøxpä. Hóyhøch nwädity. Chójpiøçhä njoot cooçh homiänaajä hoy nwädítät.

¹⁹ Chójpiøçhä njoot jaduhñ cooçh jim̄ jadähooc nnøcxtägátsät maa mijtsän. Mänuu'xta'agä Dios hajxy cooçh jim̄ ween xyajñøcxy.

²⁰ Jootcujcä Dios hajxy xjiaançh tehñ yaghíjtäm. Jaayá'ayädsä Jesucristo yagjujyipiøjtägajts, ja'a nWiindsønñhájäm. Jaayá'ayäts hajxy xmiøødyajcuhdújcäm ja'a hawiinjemyguiuhdujt mänaa ja'a Jesucristo hajxy xñähho'túutäm. Cabä jemyguiuhdujt mänaa tiägatsaannä. Homiänaajä ja'a Jesucristo hajxy xñä'ägä cueendähájäm.

²¹ Weenä Dios hajxy xpiuhbety, nebiä miädia'agy hajxy jaduhñ hoy myajtúunät, ja'a Jesucristocøxpä. Jaduhñä Dios hajxy xquiumáyät. Cøjxta'axiøø tsøg hajxy jaduhñ mänáañäm coo ja'a Jesucristo miøjjä jiaançhä.

²² Hermanodøjc, cab hajxy mdsippadá'agät. Cábøch mijts madiu'u tøø nmägapxy tøø nhane'emy.

²³ Tøø ja'a hermano Timoteo yhawa'adspädsøømnä maa ja'a pujxtøjcän. Coo yaa paquiä miédsät, mänítøch jim̄ nmødhádät maa mijtsän.

²⁴ Yajpoo'x ja'a copc-hajpähajxy ja'a høøchcøxpä møødä hermanohajxy nägøxiä. Ja'a hermanodøjc-hajxy yaabä Italianaaxooty, xyajpoo'xp mijts jaduhñ.

²⁵ Weenä Dios hajxy jaduhñ xjiaac mo'oy ja'a hoyhajt ja'a weenhajt. Amén.

Santiago

¹ Høøch xøhajp Santiago. Ja'a Diostúunghøch nduumby. Ja'a Jesucristo, je'ečh nmäduumby. Hermanodøjc, mijtshajxy nyajpoo'xyp, mijts jäguemnaaxtsohm̄bä.

²⁻³ Coo hajxy mänaa mhäyohmbáadät, cab hajxy mmáná'anät cooc tyijy ja'a Dios hajxy xquia'a hijxnä. Tehngajnä ja'a miädia'agy hajxy mmábøjcät coo hajxy xyhixy. Y coo hajxy mjaac häyohmbáadät, maas hoy hajxy mmábøgät. Tøyhajt je'eduhñ, paady hajxy mjootcugø'øwät.

⁴ Coo hajxy maas hoy mmábøgät, pedyii ja'a Diosmädia'agy hajxy jaduhñ mgudiúnät.

⁵ Coo pøn quia'a najuø'øwät nebiä wyiinmahñdyhádät, weenä Dios miänuu'xta'agy, mänitä wiinmahñdy mio'owøøjät. Coo ja'a Dios hajxy tii nmäyujwáañämät, mänit hajxy cøxiä xmióoyyämät, y cab hajxy waamb xñámáayyämät.

⁶ Ween hajxy hamuumdu'joot nmänuu'xtáacäm. Cab hajxy nmánáañämät coo hajxy xquia'a mo'owáañäm. Pøn tu'joot ca'a mábøjp, cabä jiäwøhñdy tu'hityä yaghity. Jaduhñ mäwíinäts je'e nebiä mejjiän coo ja'a poj yagja'tsyo'oy.

⁷⁻⁸ Hix, mejtstu'u ja'a wiinmahñdy miøødä. Cabä tu'hityä yhity. Cab hoy wiädity. Cab tii wiinmahñdy mio'owøøjät ja'a Diósäm je'eguiøxpä coo wiinmahñdy mejtstu'u miøødä.

⁹ Mädyii hermano häyoob, coo piuhbedøøjät ja'a Diósäm, jootcugø'øwäp je'eduhñ.

¹⁰⁻¹¹ Mädyii hermano mäyøø, coo ja'a mäyøøhadyiibä quia'a hajoodhájnät, nä'ägä jootcugø'øwäp je'ebä. Hix, jaduhñ mäwíinäts ja'a mäyøøjäya'ayhajxy nebiä pøjjiän. Hoy ja'a pøjy jioob'øy; pero coo quiujyxioøjø'øy, mänit ñii'xnä. Mänit ñähgahnä. Jaduhñsä mäyøøjäya'ayhajxy quiuhdägoyyaambä. Yhøxho'ogaamby hajxy tijaty hajxy miämäyøøhajpy.

¹² Jootcujc hajxy yhity pønjaty mee'xtujp, pønjaty ja'a møjcu'ugongä miädia'agy ca'a mábøjcäp. Pønjaty ja'a Dios jahmiejtsp, cøjxta'axioø hajxy yagjugyhada'añii nebiä Dios jiugyhatian, nebiä Dios hajxy tøø xyajwiinwaañøøyyäm.

¹³ Coo ja'a mjoothajxy chógät coo hajxy haxøøg mjatcø'øwät, cab hajxy mmáná'anät cooc tyijy ja'a Dios hajxy xyagjatcø'øwa'añ. Hix, cabä Dios mänaaxøø haxøøg jiatcø'øy. Y caj mänaa miäna'añ coo hajxy haxøøg njatcøøyyämät.

¹⁴ Ja'a mhamdsoo copc xyajtägóyyäp.

¹⁵ Hix, ja'a mhamdsoo copcooty ja'a pojpä cädieey piädsømy. Y coo pønä pojpä cädieey tehngajnä tiúnät, jii by yhäda'aga'añ haxøøgtuum.

¹⁶ Hermanodøjc, ca'a hajxy myajwiinhøøñ.

¹⁷ Ja'a hoybä ja'a mäbaadpä, Dios hajxy pedyii xmióoyyäm, ja'a tsajpootypä. Je'eduhñ cunuu'x ja'a jajpä ja'a tsämaambä. Cabä Dios wyiinmahñdy mänaa tiägach.

¹⁸ Hamdsoojoot ja'a Dios hajxy xpiädáacäm hodium je'eguiøxpä coo ja'a miädia'agy hajxy mmábøjcäm, ja'a tøyhajtpä. Paady hajxy jaduhñ xquiumáayyäm.

¹⁹ Hermanodøjc, homiänaajä ja'a Diosmädia'agy hajxy mmädowá'anät; pero hodiägaamby hajxy mdaj mmáyät coo hajxy hänäjty mgapxa'añ mmädia'aga'añ. Y cab hajxy mjootmä'adät.

²⁰ Coo hajxy njootmä'tämät, cabä Diosmädia'agy hajxy nyajtuungpáatänä.

²¹ Cøxy najtshixø'øw ja'a mhaxøøgcuhdujt hajxy, neby hajxy madiu'u haxøøg mjatcø'øyän. Mee'xxieemy ja'a Diosmädia'agy hajxy mmábøgät, ja'a hajxy tøø mmädóyyäbä. Y coo hajxy mjaanč mábøgät hamuumdu'joot, mänit hajxy jaduhñ mnähwá'adsät.

²² Mgøxy cudíunäp ja'a Diosmädia'agy hajxy jaduhñ. Coo hajxy mnähmädoonáxät, cab hajxy jaduhñ mnä'ä yajtuungpäady, hoy hajxy mja mäna'añ cooc tyijy hajxy myajtuungpäady.

²³ Pøñä Diosmädia'agy nähmädoonajxp, cab hoy quiudiuñ. Jaduhñ mäwínäts je'e nebiä jäya'ay ñiyhahijxnaxyijän hijxtjooty.

²⁴ Paquiä jaduhñ ñiyhahijxnaxyii. Pero coo wyiimbijnä, cab jiahmiejtsnä nebiä wyiin jiøjp quiähxø'øgy.

²⁵ Pøñä Diosmädia'agy tehngajnä jahmiejtsp, pøñ hoy cudiumb, jootcuje jaduhñ yhida'añ. Hix, hodium piäda'aga'añii je'eguiøxpä coo ja'a Diosmädia'agy miäbøcy.

²⁶ Pøñjaty mänaamb cooc tyijy Dios hajxy wyiingudsähgø'øy, y nä'ä nägoodä hajxy ñä'ä capxtägoy, xiøøbä hajxy ñä'ä mäna'añ cooc tyijy Dios hajxy wyiingudsähgø'øy.

²⁷ Coo ja'a yaamghuung hajxy mbuhbédät møødä yaamgto'oxy, coo hajxy hänajty tii yajmaajiaty, y coo hajxy haxøøg mga'a wädität, mänit hajxy myajcähxø'øgät coo Dios hajxy mjaanč wiingudsähgø'øy.

2

¹ Hermanodøjc, paadiä Jesucristo miädia'agy hajxy nmäbøjcäm coo jim yhity tsajpootyp maa ja'a jajpä tsämaambä miøødän. Jaaya'ay hajxy nWiindsønähjätäm. Cabä yhahixø'øy coo pøñ mxøøghädät.

²⁻⁴ Tsøg hajxy mädiäcäm, coo jäya'ayhajxy nämetsc miédsät maa ja'a mdsajtøjc-hajxiän, tu'ug mäyøøbä, tu'ug häyoobä, tu'guhdujt hajxy nämetsc mwiingudsähgø'øwät, hoyyä mäyøøbä orocø'øjädshñdy hänajty jia møødä, hoyyä howyit hodiucxy hänajty jia møødä. Cabä häyoobä hajxy mxøøghädät, hoyyä howyit hodiucxy hänajty quia'a ja møødä. Hoorä, coodsä häyoobä hajxy mnämä'awät: "Jii miich huuc täna'aw", o coo hajxy mnämä'awät: "Jii miich mhäña'awa'añ naaxwiin", y tøø ja'a mäyøøbä hoyhänabiejt hajxy hänajty mmo'oy, myajcähxø'py hajxy jaduhñ coo ja'a mguhdujthajxy quia'a hoyyä. Cähxø'p jaduhñ coo ja'a häyoobä hajxy tøø mga'a näxuuč.

⁵ Hermanodøjc, huuc mäadow hädaa mädia'agy hajxy. Pøñjaty häyoob hädaa yaabä naaxwiin, Dios tøø yajnähdiy coo ja'a Diosmädia'agy hajxy miäbøgät hamuumdu'joot, coo hajxy jim ñöcxät cøxp tsajpootyp. Jim hajxy ñöcxa'añ nägøxiä. Pøñjatiä Dios tøø jiahmiech tøø pia'häyoy, Dios jaduhñ tøø yajwiinwaanø'øy coo hajxy jim ñöcxät.

⁶ Pero mijts, mxøøghajpy hajxy ja'a häyoobädøjc. Hoorä, ja'a mäyøødøjc-hajxy, xchaačhtiumb mijts jaduhñ. Pawich pajäduty mijts xyajnøcxy hagujc.

⁷ Ja'a Jesucristo miädia'agy hajxy mbanöcxäp, y je'e ja'a mäyøødøjc-hajxy wyiinwohmby.

⁸ Dios mänaamb coo ja'a mmäjøøn coo ja'a mmädøjc mdsógät mba'häyówät nebiä mni'x nebiä mgopc mdsoquiän. Ja'a Diosmädia'agy jaduhñ miimb. Bueno, pø mjaanč cudíuunäp ja'a Dios miädia'agy jaduhñ, hoy jaduhñ.

⁹ Pero coo ja'a häyoobädøjc hajxy mxøøghädät, haxøøg hajxy jaduhñ mjäya'ayhaty. Ja'a Diosmädia'agy jaduhñ mänaamb cooc yhaxøøgä.

¹⁰ Pøñä ley hoy tøø jia yajtuñ, pø weentiä tøø tiu'udägoy, jaanč tehñ miøj tøø quiuyo'oyø'øy.

¹¹ Dios jaduhñ mänaan, coo ja'a mhamdsoo to'oxiøjc hänajty jyimän, cabä wiingto'oxiøjc mmøødhidät. Jaanä jaduhñ miänaambä coo mga'a jäya'ay-yaghó'ogät. Tsøg hajxy mänáanäm, pø tøø mjäya'ay-yagho'ogy, tøø ja'a ley jaduhñ mga'a yajtuñ, hoy wiingto'oxiøjc mga'a ja møødhity.

¹² Hoy hajxy ngapx nmädiäcämät, hoy hajxy njäya'ayhájätämät nebiä Jesucristo hajxy xyhanéhmäm maa ja'a miädia'agy myiñän cujaay. Hix, xyhixáanäm jaaya'ay njoot ngopc-hajtämhajxy pø hoy hajxy njaanč jäya'ayhájätäm. Xpiuhbedáanämäp hajxy neby hajxy maas hoy njäya'ayhájätämät.

¹³ Pøñjatiä jäya'ay näxuu'tsp, je'e hajxy päda'agáanäp hodium. Cab hajxy yajcumädowa'añii. Pøñjatiä jäya'ay ca'a näxuu'tsp, je'eds hajxy yajcumädowáanäp. Cab hajxy näxuu'tstägatsa'añii.

14 Hermanodøjc, näje'e jäya'ayhajxy miäna'añ cooc tyijy hajxy miäbøcy hamuumdu'joot, y cab hajxy hoy wiädity, nébiäc tyijjiäda'aduhñ yhuuc nä'ä nähwá'adsät.

15-16 Cooc mijts hermano nä'ä nägoobä mnämä'awät: “Nøcx hajxy jootcuje wädit; pägø'øw jocxwit hajxy; hoy hajxy mgay mhú'ugät”, y cab hajxy hänajty tii tøø mmo'oy, hoy hajxy hänajty tii quia'a ja møødä, ni wit ni tucxy, ni cay ni hu'ugy, caj mijts mguhdujt hänajty yhooyä.

17 Cooc pøn miäná'anät cooc tyijy hoy wyi'i pianøcxy, pero cabä quiuhdujt ñä'ä hóyyäbä, xiøøbä jaduhñ ñä'ä mäna'añ cooc tyijy hoy pianøcxy.

18 Pero cooc pøn miäná'anät: “Miič mahñdy hoy mbanøcxyp; høøčh, hóyhøch nguhdujt”, høøčh hijxtahñd yaghíxäc pø hoy mjaančh panøcxy, hoy mga'a ja yajcähxø'øgy pø hoy mguhdujt. Høøčh, coočh nguhdujt yhooyä, nyajcähxø'piøch jaduhñ coočh hoy njaančh panøcxy.

19 Miičh mänaamb cooc Dios tiu'ugä; hoy hit jaduhñ cooc jaduhñ mmäná'anät. Pero jaduhñdsä møjcu'uhajxy miänaambä y chähgøøby hajxy je'e.

20 Nej, caj miičh mnä'ägädä wiinjuø'øwa'añä, xiøøbä mja nä'ä mäna'añ cooc mmäbøcy, pø cabä mguhdujt ñä'ä hoyyä.

21-22 Abraham højts hijty nhaphájtäm ndeedyhájtäm. Mänitä Dios ja'a Abraham ñämaayy cooc ja'a yhuung yóxät, ja'a Isaac-hajpä. Paadiaduhñ ñämaayy cooc ja'a yhuung yóxät, nebiä Dios jaduhñ wyiingudsähgø'øwät. Jiaančh cudiuñaambiä Abraham hänajty jaduhñ. Cooc jiaančh ja cudiuñaañ, paady hodiium piädáacänä. Cähxø'p jaduhñ cooc ja'a Diosmädia'agy hänajty jiaančh mäbøcy.

23 Tøjiajtä Diosmädia'agy jaduhñ nebiä myiñän cujaay: “Coo ja'a Abraham ja'a Dios ja'a miädia'agy miäbøjcä, paadiä hodiium piädáacänä.” Y Abraham, hamdsoo Dios miänaañ cooc Abraham hänajty miägu'ughadyii.

24 Jaduhñdsä je'e, paadiä Dios hajxy hodiium xpiädáacäm cooc hajxy hoguiuhdujt nyajtúunäm, cooc hajxy hoy nmäbøjcäm.

25 Jaduhñä quixy Rahab yhuuc jajpä. Mänitä jäya'ayhajxy miejtstaacy maa ja'a Rahab tiøjcän. Hixøøby woodsøøbiä hajxy hänajty wiädity. Mänitä Rahab miäbuhbejty. Mänitä tu'u hajxy wiingpä yajnahixøøyyä. Paadiä Rahab piädáacänä hodiium, hoyyä howyiinmahñdy hänajty tøø quia'a ja møødhaty.

26 Entonces, cooc hajxy nmänáañämät cooc tyijy hajxy hoy nmäbøjcäm, pero cabä nguhdujthajxy yhoyhájtäm, xiøøbä hajxy nnä'ä mänáañäm cooc hajxy hoy nmäbøjcäm. Cab jaduhñ choobaady cooc hajxy nä'ä nägoobä nmänáañämät cooc tyijy hajxy hoy nmäbøjcäm; høxtáhmäts ja'a ni'x ja'a copc cooc yho'nä, cab je'e choobaatnä.

3

1 Hermanodøjc, ca'a hajxy mwi'i ñiwyiindsønñbäda'agyii. Hix, pønjaty hoy ca'a yajnahixøøby, cab hajxy quiumaya'añii ja'a Diósäm.

2 Madiu'u hajxy ngapxtägóoyyäm nägøxiä. Pøn ca'a capxtägooby, ca'xiä Diosmädia'agy jiaančh tehñ quiudiuñ. Ni nej quia'a jatcø'øy.

3 Paadiä cuaay freno hajxy nbädáacäm cooc hajxy ween miädia'agymiäbøcy neby hajxy jaduhñ hoy yó'oyät.

4 Jaanä jaduhñduhmbä, ja'a barcotimón, chuucpä hajxy yajmäyohby, hoy ja'a barco jia hamøjjä, hoy møc jia pabojoy.

5-6 Y yø'ø haaw, hoy jia muutscä, jaduhyyä jäya'ay ñä'ä jaančh tehñ miägapxtägoobiä møj may. Jaduhñ mäwíinäts yø'ø haaw nebiä jøønän. Cooc ja'a yuuc tiyø'øgy, tu'lii'ty ja'a padoy chohñda'agy. Yø'ø haaw, jiaančh tehñ miøødä haxøøgpä yø'ø. Paquiä xyajtu'udägóoyyät. Y ja'a møjcu'ugong, je'eds hajxy xwyi'i yajcapxtägóoyyäm.

7 Hoñä'ä mädyii animalä hajxy hoy nyajmaaxøøyyämät, caa, muuxy, tsahñdy, møødä mejjiooty-tsánaabiä.

⁸ Pero yø'ø haaw, cab hoy miaaxø'øwa'añ. Haagä haxøøgpä jaduhñ miøød. Je'eduhñ xyajtägóoyyäm maa ja'a Dioscøxpän.

⁹⁻¹⁰ Jue'e yø'ø haaw, mejtstu'u myiñ. Je'e hajxy nyajtúunäm coo ja'a Diosteedy hajxy ngapxpátäm. Jaaná je'e hajxy nyajtúunäm coo ja'a jáya'ay hajxy nnähójjäm, ja'a Dios yajmágunuu'xøøyyäbä ja'a yhEspíritu. Hermanodøjc, caj yhooyä coo hajxy mejtstu'u njäya'ayhájtämät.

¹¹ Hix, maa tu'ugpä nøøgopcän, cabä nøø wiingä tægach xiee'xy. Tu'tu'uyyä ñä'ägädä xee'xy.

¹² Jaaná jaduhñduhmbä, tu'tu'uyyä piids tiøømhaty; cabä aceituna miädøømhadø'øy maa ja'a piidsän. Ni ja'a piids quia'a mäðøømhadø'øy maa ja'a tsaatypän. Y cabä hoñøø jim mbáadät maa ja'a taamdsnøøgopcän.

¹³ Pøñ wiinmahñmech maa mijtsän, ween hoy jiäya'ayhaty neby jaduhñ yajcähxø'øgät coo hoguiuhdujt miøødä, coo mee'xxieemy jiäya'ayhaty.

¹⁴ Jii häna'c-hajxy näje'e miäna'añ coo hodiung hajxy mio'owø'øjät, coo wiinghäna'c quia'a mo'owø'øjät, je'eguiøxpä cooc tyijy hajxy jiaanč tehñ jiaty hoyhoy. Caj mniguiumayø'øjät cooc tyijy mjaanč tehñ jiaty. Hix, caj tiøyyä coo mjaanč jaty.

¹⁵ Yø'ø wiinmahñdy jaduhmbä, caj yø'ø jim chooñ maa ja'a Diosän. Hädaa yaabä naaxwiin hajxy yajcojy. Ja'a møjcu'ugongä wyiinmahñdy jaduhñ.

¹⁶ Ja'a häna'c-hajxy ca'a niyajmädsójcäbä coo wiinghäna'c hodiung piáadät, cab hajxy hoy ñimiøødhidyii. Nijihøj nibiahójjäp hajxy jaduhñ. Madiu'u hajxy haxøøg jiäya'ayhaty.

¹⁷ Pero jimä howyiinmahñdy chooñ maa ja'a Diosän. Coo hajxy je'e mmøødhádät, hoy hajxy jaduhñ mjäya'ayhádät. Cab hajxy mdsiptsäná'awät, cab hajxy mma'adtsäná'awät. Mee'xxieemy hajxy mhídät. Cabä mhamdsoo wiinmahñdy hajxy mwi'i yajtúnät. Mmøødhádäp ja'a hojiot hajxy møødä jáya'ay. Cabä mwiinmahñdy hajxy mejtstu'u myajtúnät. Cab hajxy mhøhñdá'agät.

¹⁸ Pønjaty ca'a tsiptsojp, jaanč tehñ yhoy hajxy jiäya'ayhaty, møød ja'a hajxy nägøxiä capxcuhgädaacpä.

4

¹ Jim mijts ja'a mdsip myajtsohnda'agy maa ja'a mhaxøøgwiiinmahñdyhajxiän coo hajxy naxy mnimiädsibø'øyii.

² Coo hajxy tii mja hadsoga'añ, je'eds hajxy myajniguiuyagho'ogóøyyäp, je'eds hajxy myajniguiumädsiphadóøyyäp. Paady hajxy mga'a paady mädyii hajxy mja tsojpy coo ja'a Dios hajxy mga'a mäyujwa'añ.

³ Y coo hajxy tii mja yujwa'añ, cab hajxy mbaady, je'eguiøxpä coo ja'a mguhdujthajxy quia'a hoyyä. Hix, näjoot hajxy mwi'i yhadúñ mwi'i yhanäma'awø'øy mädyii hajxy mja yujwaamby.

⁴ Caj mijts Diosmädia'agy hoy mgudiuñ. Nej, cab hajxy mnajuø'øyä coo jaduhñ quia'a hoyyä coo ja'a mjoot ja'a mjuøhñdy hajxy yaa mbädá'agät hädaa yaabä naaxwiin. Coo hajxy jaduhñ mbädá'agät hädaa yaabä naaxwiin, Dios hajxy jaduhñ mmädsiphájñäp.

⁵ Nej, tøgä xiøøbä ja'a Diosmädia'agy ñä'a mäna'añä: "Tøø ja'a Dios ja'a yhEspíritu piäda'agy maa højtscøxpän. Xjiaanč tehñ chojc xjiaanč tehñ pia'häyóowäm hajxy jaduhñ."

⁶ Jaanč tehñ yhooyä Dios hajxy xpiuhbéjtäm neby hajxy jaduhñ hoy nmäjädáacämät. Jaduhñä Dios miädia'agy myiimbä: "Miädsiphajpiä Dios pøñ ja wi'i yajcumayaamb. Pero pøñ ca'a yajcumayaamb, piuhbejpiä Dios je'e."

⁷ Mäbøc ja'a Diosmädia'agy hajxy tehngajnä. Høxhixä ja'a møjcu'ugongä miädia'agy hajxy; mänit hajxy jaduhñ xñähguéecnät.

⁸ Hamuumdu'jootä Diosmädia'agy hajxy mbanócxät; mänitä Dios hajxy xpiuhbejtägátsät. Pønjatiä haxøøgcuhdujt møød, mhøxhixäp ja'a mguhdujt hajxy jaduhñ. Pønjaty

mánaamb coo mejtstu'u pianøcxa'añ, møødä Dios, møødä hädaa yaabä naaxwiin, mnajt-shixøññäp ja'a mhaxøøgwiinmahñdy hajxy.

⁹ Mjootmayhädäp hajxy jaduhñ je'eguiøxpä coo haxøøgcuhdujt hajxy mmøødä. Cab hajxy mxoondáacnät.

¹⁰ Mba'yá'axäp ja'a Dios hajxy hamuumdu'joot. Mnägápxäp hajxy nebiaty hajxy tøø mhaxøøgwädity. Mänitä Dios hajxy xyajmähmø'øwät hodiium.

¹¹ Hermanodøjc, ca'a hajxy mniñähojyii hamiñ haxøpy. Pøn wiinghermano nähojp, jaduhñ miäbaatnä nebiä Diosmädia'agy ñähojjiän. Cabä Diosmädia'agy hoy ñä'ä cudiuñ.

¹² Tu'ugä Dios hajxy xyhanéhäm. Je'e hajxy xyhíxäm pø hoy ja'a miädia'agy hajxy ngudiúuñäm. Jaayá'ayäts cuhdujtmøød pø xpiädáacäm hajxy hodiium, pø xpiädáacäm hajxy haxøøgtuum. Pero miich, caj miichä cuhdujt mmøødä coo wiinghermano mnähójt.

¹³ Huuc mädown hajxy, näje'e hajxy jaduhñ miäna'añ: "Jäda'a o jaboom højts nnøcxa'añ wiinghagajpt. Jim højts tu'jumøjt nniyhajada'añii. May højts xädø'øñ jim nbaada'añ."

¹⁴ Ni quia'a najuø'øy hajxy tii jaboom jadäänäp. Ja'a jugyhajt, paquiä quiøxy. Jaduhñ miäbaady nebiä nämä'ajän coo paquiä tiägoy.

¹⁵ Jaduhñ hajxy mmäná'anät: "Pø mänaambä Dios jaduhñ, mänit hajxy njaac jugyhajtämät. Coö ja'a Dios jaduhñ miäná'anät, hotyijä hajxy njajtämät. Coö quia'a mäná'anät, cab hajxy tii nnä'ägädä jájtämät."

¹⁶ Pero mijts, tehngajnä mijts mwi'i ñiguiumayii. Haxøøg jaduhñ coo hajxy jaduhñ mjatcø'øwät.

¹⁷ Pøn najuøøby neby hoy quiuhdujthädät, y cab hoy ñä'ä cuhdujthaty, haxøøg jaduhñ jiatcø'øy.

5

¹ Ween yø'ø mäyøødøjc-hajxy yhuuc yajcopcø'øy. Jø'øwaamb hajxy, tsaächya'axaamb hajxy, je'eguiøxpä coo ja'a tsaächpä hajxy piaada'añ.

²⁻³ Yø'ø hajxy cøxiä miämäyøøhajpiä, caj yø'ø choobaadaannä, hoy howyit hodiucxy hajxy jia møødä. Cøxaamb jaduhñ tiägoyya'añ. Coö hajxy miäyøøjä, cähxø'p hajxy coö ja'a häyoobädøjc hajxy quia'a näxuuçh. Quiuhäyowø'øwaamb hajxy jaduhñ. Xiøøbä hajxy tøø ñä'ä yajmayø'øy maa hajxy miäyøøhatiän. Hix, mobädajpä naaxwiimbä wyiimbida'añ.

⁴ Cabä mioonsä hajxy ca'xy tøø yhuuc mäjuuñä. Paady hajxy jim ñäxø'øwø'øyyänä maa ja'a Diosän jim tsajpootyp. Miädoobiä Dios ca'xy.

⁵ Hoy yajxon hajxy tøø jiaançh tehñ chäna'ay hädaa yaabä naaxwiin. Tøø ja'a miäyøøhadyiibä hajxy jia yajmayø'øy. Pero mobädajpä hajxy quiuhäyowø'øwa'añ.

⁶ Tøø ja'a hojiäya'abiä hajxy chaächtiuñ. Tøø hajxy yagho'ogy. Cabä hojiäya'ayhajxy ñä'ä niñawaanä.

⁷⁻⁸ Hermanodøjc, mmee'xtúgäp hajxy jaduhñ høxtä Jesucristo cädaactägätsäp. Mobädajpä quiädaactägätsa'añ. Cab hajxy tii mdaj mmáyät. Jaduhñ hajxy mmee'xtúgät nebiä jäya'ayhajxy miee'xtuquiän coö quia'a tsoj tu'uy.

⁹ Hermanodøjc, cab hajxy mniñähojøøjtät coö Jesucristo hajxy xyajcumädöwät. Mobädajpä quiäda'aga'añ.

¹⁰ Mjahmiédsäp hajxy nebiä jäya'ayhajxy jecy chaächpøjquiän, ja'a Diosmädia'agy hajxy jecy yajwá'xäbä. Mee'xtujc hajxy je'e jecy.

¹¹ Pøn mee'xtujp, hoy jia tsaächpøcy, jootcujc hajxy yhity, nebiä Job jecy miee'xtujquiän mänaa chaächpøquiän. Tøyhajt jaduhñ. Y ñäxuu'tstägajts ja'a Dios ja'a Job. Hix, hojiot ja'a Dios jiaançh tehñ miøød.

¹² Hoy hädaa mädia'agy hajxy mmädówät. Cabä Dios hajxy nä'ä nägoobä mgapxpáadät. Coö hajxy jaduñ nä'ä nägoobä mgapxpáadät, mgapxtägóyyäp hajxy jaduñ, y xya-jcumädówäp ja'a Dios hajxy. Pø mmøødä tøyhajt hajxy, jaduhyä hajxy mmäná'anät coö tiøyhajtä. Pø caj, jaduhyä hajxy mmäná'anät coö quia'a tøyhajtä.

¹³ Pønjaty tsaächpøjp, weenä Dios hajxy pia'ya'axy. Pønjaty jootcujc, weenä Dioshöy hajxy yhöy ya'axy.

¹⁴ Pønjaty pøjcäp, ween hajxy ñäma'ay ja'a tuuñgmøødpä maa ja'a tsajtøjcän coö oración hajxy tiuunäxät, coö aceite hajxy yajñahjaaxøøjät ja'a Dioscøxpä.

¹⁵ Pø jaanç mæbøjp hajxy, ja'a hajxy oración tuumbä, mänitä Dios ja'a pa'amjäya'ay ja'a pia'am yajñahwáatsät, møødä piojpä møødä quiädieey.

¹⁶ Myajniñägapxøøjäp ja'a mbojpä mgädieeyhajxy hamiñ häxøpy. Mniñähgapxtu'udøøjäp hajxy hamiñ häxøpy nebiä mba'am hajxy jaduñ xñähwá'adsät. Jaanç tehñ tiuunpaatp jaduñ coö ja'a hojiäya'ay hamuumdu'joot yhoracióntúnät.

¹⁷ Høxtahmäsä Elías, ja'a Diosmädia'agy jecy yajwá'xäbä. Jaduñ je'e jiäya'ayhajty neby højtshájtämän. Coö ja'a Elías ja'a Dios miänuu'xtaacy coö quia'a yajtú'uwät, tægøøgjumøjt ja cupc quia'a tuuyy hädaa yaabä naaxwiin.

¹⁸ Mänitä Elías ja'a Dios jadähooc miänuu'xtaactägajch coö yajtú'uwät. Mänit jadähooc tiägøøyy tuubä. Mänitä jäya'ay piäda'agyhajxy yhöyøyyäxä.

¹⁹⁻²⁰ Hermanodøjc, coö pøn ja'a tøyhajt jiojyohdiú'udät maa mijtsän, tu'udägóyyäp hajxy jaduñ. Pero coö hajxy mjootcapxmøcpøgät, mänitä wyiinmahñdyhajxy miédsät. Cøxaambä piojpä quiädieey hajxy jaduñ ñähwa'adsa'añ, y hodium hajxy jaduñ miähmø'owa'añ. Tøyhajt jaduñ.

1 Pedro

¹ Høøch xøhajp Pedro. Jesucristøch xquiuguexyhajp. Mijts hädaa nocy nyajnäjaayøøby pønhatiä Diosmädia'agy mäbøjp. Xii yaa hajxy wiingtuumjaty mhadsäna'ay jim maa naax jaduhñ xiøhatiän Ponto, møød jim Galacia, møød jim Capadocia, møød jim Asia, møød jim Bitinia.

² Jequiän mijtsä Diosteedy xwyiimbiiyy. Tøø Dios hänajty ñajuø'øy coo mijtsä miädia'agy hänajty mmäbøgaanä. Ja'a yhEspirituhaamä Dios hajxy tøø xyaghodiägø'øy, weenä mädia'agy hajxy jaduhñ mmäbøgät ja'a Jesucristocøxpä. Jaaya'ay hajxy tøø xyajnhwáatsäm mänaa hajxy xñähho'túutäm. Weenä Dios ja'a hoyhajtä weenhajt hajxy xmio'oy møj may.

³ Tsögä Dios hajxy wiingudsähgøøyyäm. Jaaya'ayä Jesucristo Tieedyhajpy. Højtsä Jesucristo nWiindsønähajtäm. Hojiootä Dios jiaanç tehñ miøød ja'a højtscøxphajtäm, paady hajxy homiänaajä xyagjugyhadäänäm neby je'e jiugyhatiän. Coo Dios ja'a Jesucristo yagjuypiøjtägajch coo hänajty tøø yho'ogy, jaduhñä tøyhajt hajxy nmøødhajtäm coo Dios hajxy jaduhñ xjiaanç yagjugyhadäänäm homiänaajä

⁴ jim tsajpootyp. Jimä hoyhajtä weenhajt hajxy møj may xmio'owäänäm, neby jaduhñ jecy miänaañän cooc hajxy hänajty xmio'owäänäm. Tijaty hajxy yaa nyagjugyhajtäm hädaa yaabä naaxwiin, tsipcøxp jaduhñ quiøxa'añ, tsipcøxp jaduhñ quiuhdägoyya'añ. Pero mädyijatiä Dios hajxy jim xmio'owäänäm tsajpootyp, cab jaduhñ mänaa quiøxa'añ, cab jaduhñ mänaa mia'ada'añ, cab jaduhñ mänaa quiuhdägoyya'añ. Homiänaajä yajxón yhida'añ.

⁵ Coo mijtsä Dios miädia'agy jaduhñ mmäbøjcä, paadiä Dios hajxy xcwieendähada'añ ja'a miøcmäjaahaam. Cab hajxy jaduhñ mänaa mguhdägoyya'añ. Coo ja'a Dios yHuung yaa quiädaactägatsa'añ hädaa yaabä naaxwiin, ja'a Jesucristohajpä, mänit hajxy jim xya-jnøcxäänäm tsajpootyp Dioswiinduum. Jimä Dios hajxy homiänaajä xyagjugyhadäänäm neby je'e jiugyhatiän.

⁶ Paady mijts jootcuje mhity, hoy hajxy jäda'ahaty madiu'u mja tsaächpøcy. Pero cab hajxy jecy mdsaaçhpøga'añ.

⁷ Høxtahmðsä oro, jøønhaamä jäya'ayä oro hajxy yhiixmach pø hoyhoro jaduhñ. Jaanä jaduhñ mijtsä Dios xyhiixmajtspä pø hamuumdu'jootä miädia'agy hajxy mmäbøjcä, hoy hajxy mja jaanç tehñ chaaçhpøcy. Jaanç tehñ choobaatp jaduhñ coo hajxy jaduhñ mmäbøgät tehngajnä. Cabä oro jaduhñ jiaty tsoobaady neby jaduhñ choobaadiän nej mijts homiänaajä mmäbøquiän. Hix, tsipcøxpä oro jaduhñ quiuhdägoyya'añ. Y coo Jesucristo yaa quiädaactägatsa'añ, mänit mijts xquiumaya'añ je'eguiøxpä coo hajxy hänajty tøø mmäbøcy, hoy hajxy hänajty tøø mja jaanç tehñ chaaçhpøcy.

⁸⁻⁹ Hoyyä Jesucristo hajxy tøø mga'a jagä hixy, mdsojpy mba'häyooby hajxy jaduhñ, y mmäbøjcäbä miädia'agy hajxy jaduhñ. Hoy hajxy tøø mga'a jagä hixy, coo hajxy jaduhñ mmäbøcy, paady hajxy jaduhñ tøø xyajnhwa'açh. Coo hajxy jaduhñ tøø xyajnhwa'açh, paady hajxy jaduhñ mjaanç tehñ xioonda'agy nägø'ø nädecypiä.

¹⁰ Ja'a jäya'ayä Diosmädia'agy hajxy jecy yajwá'xäbä, jia wi'i yajtøøby jia wi'i yajtø'xyp hajxy hänajty neby hajxy piäda'agøøjtät hawa'adstuum. Cab hajxy hänajty ñajuø'øy neby hajxy jaduhñ jim piäda'agøøjtät. Pero ñägäpax hajxy jaduhñ coo mijtsä Dios hänajty xpiäda'aga'añ hawa'adstuum, je'eguiøxpä coo hojioot miøødä.

¹¹ Yajtøøby hajxy hänajty pøn mijts hänajty min xpiäda'aga'añ hawa'adstuum. Jaduhñ hajxy hänajty yajtøøbä mänaa hänajty myina'añ. Ja'a Dios jaduhñ hawaanä ja'a yhEspirituhaam cooc tul'jäya'ay hänajty yaa min chaaçhpøga'añ. Y cooc hänajty tøø yho'nä, mänitac hänajty jiuypjøjtägatsa'añ. Mänitac hänajty jim ñøcxtägatsa'añ tsajpootyp maa Dioswiinduumän. Pero ja'a jecyjiäya'ayhajxy, cab hajxy hänajty jaduhñ ñajuø'øy pønä

Dios hánajty tøø ñänømy ja'a yhEspírituhaam. Ñä'ä cujahy hajxy jaduhñ nebiaty hajxy jaduhñ ñajtsapxøøyyä.

¹² Mänit hajxy jecy yhawáañäxä coogä Dios jaaya'ay hánajty quia'a tsoj quexa'añ, ja'a mijts hánajty xpiáda'agaambä hawa'adstuum. Cujéquiägä Dios hánajty quiexa'añ. Hoorä, tøø quiejxnä. Jaduhñ tøø yajtøjiajnä coo ja'a yajnáhwaatspä tøø quiejxnä. Y tøø mijts jaduhñ mjaančh mädoxyhaty coo ja'a yajnáhwaatspä yaa tøø yhoy. Ja'a Jesucristøch jaduhñ nnänøømby coo hajxy hoy xñähho'túutäm. Y jaaya'ay mijts xyajmädoxyhájtäbä, ja'a Dios ja'a yhEspírituhaam hajxy jaduhñ ñajtsapxøøyyä nebiatiä Diosmädia'agy hajxy yajwá'xät. Tsajpootypä Dios ja'a yhEspíritu yajtsohndaacy coo jaduhñ yaa quiejxy hädaa yaabä naaxwiin. Haa ja'a Dios ja'a mioonsähajxiä, ja'a hajxy jaduhñ jim hijpä tsajpootypä, jiaančh tehñ yagjuøøby hajxy jaduhñ coo Dios ja'a yHuung jaduhñ yaa quiejxy hädaa yaabä naaxwiin, coo højts hoy xñähho'túutäm.

¹³ Y coo Jesucristo jaduhñ yaa jadähooc quiädaactägatsa'añ, mänit hajxy jaduhñ jim xyajnøcxáañäm tsajpootyp maa Dioswiinduumän, pønjetiä Diosmädia'agy hánajty tøø miäböcy. Mänitä hoyhajtä weenhajtä hajxy jim ca'xy xmio'owáañäm. Coo Dios jaduhñ tøø miäna'añ coogä yHuung yaa quiädaactägatsa'añ, jaduhñä tøyhajt hajxy nmøødhájtäm coo jaduhñ tiøjiada'añ. Tsøcxä njoot hajxy pädáacäm maa hoyhajtän, maa weenhajtän, mädyii Dios hajxy hánajty xmio'owáañäm. Tsøcxä hajxy hoy wädíjtäm. Tsøc hajxy jahmiejtstáacäm coo Jesucristo yaa quiädaactägatsa'añ.

¹⁴ Coo Dios hajxy xyhuunghájtäm, paadiä miädia'agy hajxy tsøc mábøjcäm. Cabä haxøøgwiinmahñdy hajxy jadähooc mbadu'ubøjcumbät, neby hajxy hijty mjatcø'øyän coo Dioscapxiä Diosmädia'agy hajxy hijty mga'a mädoxyhatyñä.

¹⁵ Ca'a haxøøgjoot ca'a haxøøgwiinmahñdy hajxy myaghity. Hix, cabä Dios haxøøgjoot haxøøgwiinmahñdy ñä'ägädä møødä. Jaaya'ay hajxy jaduhñ xyajnáhdíjjäm coo hajxy xquiu'ughadáañäm. Paadiä hojiot hajxy tsøc yaghíjtäm nebiä Dios hojiot miøødän.

¹⁶ Jaduhñ jim myiñ cujaay maa Diosmädia'aguiän: “Høøch, cábøchä haxøøgjoot cábøchä haxøøgwiinmahñdy nnä'ägädä møødä. Høøch hajxy pahijx padúuñäc”, nømä Dios jecy miänaañ.

¹⁷ Ja'a Dios hajxy nwiingudsähgøøyyäm. NDeedyhájtäm hajxy jaduhñ. Paady hajxy hoy tsøc jäya'ayhájtäm mäduhñtiä hajxy yaa ndsänaayy nhäyóowäm hädaa yaabä naaxwiin. Hix, nnajuøøyyäm hajxy jaduhñ coo Dios hajxy xyajcumädoxwáañäm nebiaty hajxy hánajty yaa haxøøg tøø njatcøøyyäm hädaa yaabä naaxwiin, hoy hajxy hánajty näje'e tøø nja mäyøødsänäayyäm.

¹⁸⁻¹⁹ Ja'a nhaphájtäm ja'a ndeedyhájtämhajxy ja'a jegyhajtypä, coo yhamdsoo cuhdujt hajxy hijty hoy quiudiuñ, jaduhñäc tyijy hajxy ñähwa'adsa'añ. Y jaduhñ mijts tøø mbahabøjpä. Pero cab jaduhñbä cuhdujt choobaady. Coo Jesucristo hajxy hoy xñähho'túutäm, ja'a ñø'tyhaam hajxy xpiädáacäm hawa'adstuum. Ni tii hajxy jaduhñ xquia'a pädáacäm hawa'adstuum, ni xädø'øñ. Hix, paquiä xädø'øñ quiøxy. Jagooyyä Jesucristo hajxy xpiädáacäm hawa'adstuum ja'a ñø'tyhaam. Hix, cabä Jesucristo ni tii poj ni tii cádieey quia'a møødä. Paady hajxy je'e hoy xpiädáacäm hawa'adstuum. Coo Jesucristo ja'a poj ja'a cádieey häxøpy miøødhaty, cab hajxy häxøpy tøø xpiädáacäm hawa'adstuum.

²⁰ Jéquiänä Dios ja'a yHuung jaduhñ yajnáhdijy cooc hánajty yaa quiexa'añ hädaa yaabä naaxwiin, cáhnäc hädaa naaxwiimbä hánajty yhawijy tiøø'xta'agy. Pero cabä Dios ja'a yHuung choj quejxy. Cujecy jaduhñ quiejxy mänaabä højts hánajty yaa njugyhájtämbä. Højts hoy xñähho'túutäm.

²¹ Coo Jesucristo hánajty tøø yho'ogy, mänitä Dios yagjuypiojtägajch. Mänit jim jadähooc yajnøcxy maa wyiinduumän. Jim jäda'ahaty wyiingudsähgøøyyii. Y coo Dios ja'a yHuung jaduhñ yagjuypiojtägajch, paadiä miädia'agy hajxy tsøc mábøjcäm coog hajxy xyagjugyhadáañämbä homiänaajä neby je'e jiugyhatiän.

²² Tøyyä Dios miädia'agy. Y coo mijtsä miädia'agy hoy mgudiuunä, paadiä mjootä mjuøhñdyhajxy nähwa'ads yhity. Naxy hajxy jaduhñ mdehmñ ñiçhoc mdehmñ ñimiee'xøøjät hamuumdu'joot. Jaduhñ hajxy mnijiäwø'øwøøjät nebiä tu'que'expän nebiä tu'mägu'ugpän.

²³ Tøø haxøøgjoot tøø haxøøgwiinmahñdy hajxy nnajtshixøøyyäm. Homiänaajä Dios hajxy xyagjugyhadäänäm neby je'e jiugyhatiän. Jaduhñä hojiootä howyiinmahñdy hajxy xmióoyäm hawiinjemy, je'eguiøxpä coo miädia'agy hajxy nmäbøjcäm. Cabä miädia'agy mänaa quiuhdägoyya'añ. Jaaya'ay hajxy jaduhñ xyagjugyhadäänäm homiänaajä neby je'e jiugyhatiän, ca'a piønä hädaa yaabä naaxwiimbä, ni ja'a ndajhajtäm ni ja'a ndeedyhajtäm. Haa ja'a hädaa yaabä naaxwiimbä jugyhajtä, tsipcøxp jaduhñ quiøxa'añ.

²⁴ Jaduhñ jim myiñ cujaay maa Diosmädia'aguiän:

Høxtahmsä pøjy, hoy jaduhñ jia yajxonä, tsipcøxp je'e ñä'ägä tø'øch.

Jaduhñ mäwiin højtshajtäm, hoy hajxy møj jaanç nja niijiäwøøyyäm, tsipcøxp hajxy nnä'ägä ho'og nnä'ägä tägoyyäänäm.

²⁵ Pero ja'a Diosmädia'agy, cab jaduhñ mänaa quiøxy tiägoy.

Ja'a Diosmädia'agy jaduhñ mänaamb coogä Jesucristo hajxy hoy xñähho'túutäm. Tøø mijtsä jäya'ay jaduhñ xyajmädoxyhaty, ja'a Diosmädia'agy hajxy jecy yajwá'xäbä.

2

¹ Coo Dios hajxy homiänaajä xyagjugyhadäänäm neby je'e jiugyhatiän, jaduhñä hojiootä howyiinmahñdy hajxy tøø xmióoyäm hawiinjemy. Paadiä haxøøgjootä haxøøgwiinmahñdy hajxy tsøc najtshixøøyyäm cøxiä. Cab hajxy mnä'ägä høhndá'agät ni weeñtiä. Hamuumdu'joot hajxy jaduhñ tøy mjaanç hojiäya'ayhädät. Jii jäya'ayhajxy näje'e, cabä Diosmädia'agy hajxy hoy quiudiuñ, hoy hajxy jia nidijyii nebiä hojiäya'ayän. Ca'a hajxy jaduhñ mbahixy. Ca'a hajxy pøn cøxiä wiinä myajcuxøøghadø'øy. Cab hajxy mniñähøøn mniñähøjøøjät.

²⁻³ Tøyhajt jaduhñ coo Jesucristo mayhajt møj may tøø tiuñ maa mijtsøøxpän. Mna-juøøby hajxy jaduhñ, túhmäts. Hahixøøbyxiä jaduhñ coo miädia'agy hajxy tehngajnä mbanøcxät. Høxtahmsä maaxhuunghajxy, coo hajxy hänajty chi'idsa'añ, mänitä tsi'tsc hajxy ñäjø'øy. Jaduhñ mäwiin mijtspä, mba'yá'axäp ja'a Dios hajxy coo quiapxiä miädia'agy hajxy ween tehngajnä xjiaac yaghabøcy. Jaduhñ hajxy ca'xy pedyii hoy myajtúnät. Y cab hajxy jaduhñ mänaa mdu'udägóyyät.

⁴ Tehngajnä Jesucristo wyiinmahñdy hajxy jaac tehñ piahijxä jaac tehñ piaduunä. Ja'a Dios jaduhñ jecy wiinmaayy coo højts hänajty jaduhñ xyhuunghadäänäm ja'a Jesucristocøxpä. Ja'a Jesucristo, ja'a Dios yHuang je'e, paadiä cuhdujt jaduhñ miøødä coo hajxy nwiingudsähgøøyyämät. Pero cabä jäya'ayä Jesucristo hajxy näje'e jiojpoøgø'øy. Cab hajxy wyiingudsähgø'øy. Xiøøghajpy hajxy jaduhñ.

⁵⁻⁶ Jaduhñ jim myiimbä cujaay maa Diosmädia'aguiän:

Jim maa cajpt jaduhñ xiøhatiän Siön, jimhøchä ndsajtøjc tu'ug ngojy.

Tú'ughøchä tsaa nwiimbiiyy coo jim piäda'agøøjät maa tøjteecän.

Jaanç tehñ tiuungpaatp yø'ø tsaa jaduhñ.

Ja'a Dios ja'a Jesucristo jaduhñ yajmäbaat nebiä tsaa ja'a jaanç tehñ tiuungpaatpän, coo jaduhñ yaa quiejxy hädaa yaabä naaxwiin, coo hajxy hoy xyajnähwáatsäm. Jaduhñä Dios miänäänngumbä cooc tsipcøxp yajtøjiada'añ coo hajxy jim yajnøcxa'añii tsajpootyp maa Dioswiinduumän, pønjaty jaduhñ mäbøjp coo Jesucristo hajxy xyajnähwáatsäm, ca'a wyiinghäna'cä. Coo Jesucristo hajxy tøø xjiaanç yajnähwáatsäm, jaduhñä Dios hajxy tøø xyajnähdíjjäm coo Jesucristo hajxy nmøødhíjtämät tu'ugmädia'agy. Tehngajnä Diosmädia'agy hajxy tsøc hoy jaac tehñ quiudiuunäm. Tsøgä Dios hajxy hoy jaac tehñ wyiingudsähgøøyyäm. Jaduhñä Dios hajxy xquiumáayyämät.

⁷ Coo mijts jaduhñ mmäbøcy coo Jesucristo hajxy hoy xyajñähwáatsäm, paadiä Jesucristo hajxy mdsocy, paady hajxy mwiingudsähgø'øy. Hoorä, jaduhñ jim myíingumbä cujaay maa Diosmädia'aguiän:

Jii tsaä tu'ug, cabä tøjmuu'tspädøjc-hajxy hijty hoy yhixy; cab hajxy hijty yajtuna'añ.

Pero ja'a cudøjc, yajxon yø'ø tsaä yhixy, paady jim yajpädaacä maa tøjteecän.

⁸ Jaduhñ wiingtuum myíingumbä:

Jii tsaä tu'ug, coo pøn quiuhnepy, cädaab hajxy jaduhñ.

Ja'a Jesucristo jaduhñ yajmäbaatä neby yø'ø tsaajän.

⁹ Højtsä Dios tøø xyajñähdíjäm coo miädia'agy hajxy nmäbøjcämät, coo hajxy xquiu'ughájtämät. Xyhuunghájtäm hajxy jaduhñ coo hajxy ween hoy njäya'ayhájtämät neby je'e hoy jäya'ayhatiän. Tøø cuhdujt hajxy xmiøoyyäm coo hajxy nDeedyhájtämät nebiä Jesucristo ja'a Dios Tieedyhatiän. Tøø Dios hajxy xyajpädsøømäm haxøøgtuum. Hodium hajxy hoy xpiädaactägájsäm. Jaduhñä miädia'agy hajxy nyajwá'xämät coo møjmayhajt tøø tiuñ maa højtscøxphájtäm.

¹⁰ Coo mijts hijty mga'a mäbøcy, paadiä Dios hajxy hijty xquia'a cu'ughaty. Cabä Dios hajxy hijty xñäxuuch. Pero coo hajxy jaduhñ mmäbøjnä, paadiä Dios hajxy jaduhñ xñäxuu'tsnä. Paady hajxy xquiu'ughajnä.

¹¹ Mägu'ughajpädøjc, hoy hajxy yaa nja híjtäm hädaa yaabä naaxwiin, cabä njoot hajxy yaa tøø nbädäacäm maa hädaa yaabä naaxwiimbän. Jimä njoot hajxy tøø nbädäacäm maa Dioswiinduumän. Tsøcxä haxøøgwiiinmahñdy hajxy høxhíjxäm, jaduhñä Dios miädia'agy hajxy hoy ngudiúuñämät.

¹² Hoy hajxy mja hity maa jäya'ayä Diosmädia'agy hajxy quia'a mäbøquiän, hoy hajxy mwädítät. Hoy hajxy jaduhñ mjäya'ayhádat, hoyyä jäya'ay hajxy cu xjia nähøøno'øw. Coo Dios yaa quiädá'agät tøyhajtyajyejpä, mänit mijtsä jäya'ay hänäjty xyhixa'añ coo mijtsä Dios miädia'agy hänäjty hoy tøø mjaanç cudiuunä, ja'a Diosmädia'agy hajxy hänäjty tøø quia'a mäbøquiäbä. Mänitä Dios hajxy wyiingudsähgø'øwa'añ.

¹³ Mwiingudsähgøøyyäbä tuuñgmøødpä miädia'agy hajxy. Cabä pøn jaduhñ waamb xñänómät. Hix, mbanøcxypä Diosmädia'agy hajxy jaduhñ. Y coo ja'a tuuñgmøødpä miädia'agy hajxy mga'a wiingudsähgøøyyät, mäna'anaambä jäya'ayhajxy jaduhñ coogä mädia'agy quia'a hoyyä, ja'a mijts jaduhñ mbanøcxypä. Mwiingudsähgøøyyäbä gobiernä miädia'agy hajxypä. Jaaya'ay møjtuuñg jaduhñ nä'ägä møød.

¹⁴ Mwiingudsähgøøyyäbä gobiernä mioonsä miädia'agy hajxypä, ja'a hajxy jaduhñ møjtuuñgmøødpä. Pønjaty jaduhñ cädiehby, je'e hajxy jaduhñ yajcumädooby. Pønjaty hoy jäya'ayhajp, je'e hajxy jaduhñ quiumaaby.

¹⁵ Jaduhñä Dios chocy coo hajxy hoy mjäya'ayhádat. Jii jäya'ayhajxy näje'e, cabä Diosmädia'agy hajxy ñä'ägädä wiinjuø'øwa'añ. Jaanç tehñ quiuhxex hajxy jaduhñ. Hoy hajxy jaduhñ quia'a jagä wiinjuø'øwa'añ, nøm hajxy wyl'i miäna'añ cooc tyijy ja'a Diosmädia'agy quia'a hoyyä. Hoorä, coo mijts tøyhajt mhojiäya'ayhádat, caj mijtsä jäya'ay hoy xñähøøno'øwät, ja'a Diosmädia'agy hajxy ca'a wiinjuø'øwaambä.

¹⁶ Näje'ejä jäya'ayhajxy miäna'añ cooc tyijy cuhdujt hajxy miøødä coo hajxy hoñejpiä jiatcø'øwät, je'eguiøxpä coogä Jesucristo hajxy tøø yajñähwa'açhii. Pero cab jaduhñ tiøyyä. Cab jaduhñ hoyyä coo hoñejpiä njatcøøyyämät. Pero tsøgä Dios miädia'agy hajxy cudiúuñäm nebiaty hajxy xyhanéhñäm.

¹⁷ Mwiingudsähgø'øwäbä jäya'ay hajxy nägøxiä. Mniçhoc mnimiee'xøøjap hajxy pønjataä Diosmädia'agy mäbøjp. Mwiingudsähgø'øwäbä Dios hajxy, jaduhñä gobiernä hajxy mwiingudsähgøøbiät.

¹⁸ Mijtshajxy moonsähajpä, mmäbøjcäbä mwiindsønä miädia'agy hajxy. Mwiingudsähgø'øwäp hajxy jaduhñ, hoy hänäjty yhojiäya'ayä quia'a hojiäya'ayä.

¹⁹ Coo mwiindsón hajxy xchaačhtiúnät nä'ä nägoobä, hoy hajxy hänajty tøø mga'a jagä cädieey, mmee'xtúgäp hajxy jaduhñ. Mnajuøøby hajxy jaduhñ coo Dios hajxy jaduhñ xquiumáyät.

²⁰ Pero pø tøø hajxy hänajty mjaančh cädieey, hahixøøby jaduhñ coo hajxy mgumádówät. Y cabä Dios hajxy jaduhñ xquiumáyät, hoy hajxy cu mja mee'xtuc. Pero pø cab hajxy hänajty tøø mgädieey, coo mwiindsón hajxy nä'ä nägoobä xyajcumádówät, y coo jaduhñ mmee'xtúgät, mänitä Dios hajxy jaduhñ xquiumáyät.

²¹ Jaduhñä Dios hajxy tøø xyajnáhdíjjäm coo häna'c hajxy nä'ä nägoobä xchaačhtiúunämät nebiä Jesucristo chaačhtiúunän. Hix, højts jaaya'ay xñähho'túutäm. Y miee'xtujc jaduhñ. Jaduhñä Dios chocy coo Jesucristo hajxy nbahíjxämät neby je'le miee'xtujquiän.

²² Cabä Jesucristo mänaa ñä'ägä cädieey. Ni mänaa quia'a hønnda'agy.

²³ Coo haxøøg jia nämaayyá, cab haxøøg yhadsoodägajch. Coo chaačhtiúunä, cab jaduhñ waamb miänaañ coo hänajty yaghawiimbijtagatsañ. Ja'a Dios quiø'øjooty je'e ñibiädaacä. Hix, ñajuøøbiä Jesucristo hänajty jaduhñ coo jäya'ayhajxy hänajty nägøxiä yajtoyhajtyega'añii ja'a Diósäm. Jaduhñä Dios hajxy xyhíjxäm neby hajxy njäya'ayhájtäm.

²⁴ Coo Jesucristo hajxy hoy xñähho'túutäm cruzcøxp, jaduhñä nbojpä ngädieey hajxy xyajnáhwáatsäm. Tsøcxä ja'a haxøøgwiinmahñdy hajxy najtshixøøyyäm. Tsøc hajxy jahmiejtstáacäm coo Jesucristo hajxy nmøødhíjtäm tu'ugmädia'agy mänaa yho'oguiän, mänaa jiuypiojtägachän. Paady hajxy njugyhadáañäm homiänaajä nebiä Dios jiuigyhatiän. Coo hajxy jaduhñ ngudiúunämät nebiä Dios hajxy xyhanéhäm, mänitä Dios hajxy jaduhñ xquiumayáañäm.

²⁵ Jaduhñ mäwiin hajxy hijty njäya'ayhájtäm nebiä meeghajxy tiägowiäditiän jäguemduum. Cabä mädia'agy hajxy hijty nmäbójcäm ja'a Jesucristocøxpä. Pero tøø hajxy nmäbójcänä. Y xcwieendähájtämä Jesucristo hajxy jaduhñ.

3

¹⁻² Mijts to'oxiojtøjc, mwiingudsähgø'øwäbä mnihyhap hajxy. Coo mnihyhapä miädia'agy hajxy hoy mgudiúunät, y coo Jesucristo hajxy mwiingudsähgø'øwät, wehñdä mnihyhapä Diosmädia'agy hajxy miäbógät, pø cahnä hajxy hänajty miäbøcyñä, hoy hajxy hänajty waamb mga'a jagä näma'ay coo hajxy ween miäbøcy.

³⁻⁴ Je'e ja'a Dios jaduhñ quiumaaby coo hojioot hajxy mmøødhádät, coo mnihyhap hajxy mee'xxieemy mmägápxät. Je'eds jaduhñ tsoobaatp coo Diosmädia'agy hajxy jaduhñ mgudiúnät hamuumdu'joot. Y cab hajxy jaduhñ mänaa mdu'udägóyyät. Cab hajxy myajcumáyät pø jii howyit hodiucy hajxy hänajty mmøødá, pø jii oronaamdsøm, pø jii orotaatstøy hajxy hänajty mmøødá, pø hoyyá mguhwaay hajxy howyit hoguiuhx-otshaam hänajty mgu'udy. Cabä Dios yø'øduhmbä jiaty møjpäda'agy, ni jaduhñ quia'a jega'añ.

⁵ Ja'a to'oxiojca Diosmädia'agy hajxy hijty jegyhajty panøcxpä, wyiingudsähgøøbiä ñihyhap hajxy hijty. Mee'xxieemy hajxy hijty. Miäbøjpiä Diosmädia'agy hajxy hijty coo hajxy hänajty cwieendähada'añii ja'a Diósäm.

⁶ Jaduhñä Sara ja'a ñihyhap jecy wyiingudsähgøøyy, ja'a Abrahamhajpä. Mee'xxieemy hänajty miägapy. Quiumaayy ja'a Dios ja'a Sara jaduhñ. Y mijts to'oxiojtøjc, jaduhñ mijtsä Dios xquiumáabiät coo mijtsä Sara wyiinmahñdy mbahijx mbadúunät. Hoy hajxy mwädítät ja'a Dioscøxpä. Y cabä mhaa mjoot hajxy myagjadät cooc tyijy ja'a mnihyhap hajxy hänajty mmägapxtägoy.

⁷ Jaanä jaduhñ mijts nmägapx nhanehmbä, mijts ya'adiøjtøjc. Mdsoc mmée'xäbä mdo'oxiojca hajxy. Mmøødhádäbä hojioot hajxy jaduhñ. Hix, cabä to'oxiojca miäjaahajxy miäbaady nebiä ya'adiøjca-hajxy miøcän. Paady hajxy mgüendähádät. Hix, xmiooby mijtsä Dios ja'a hoyhajtä weenhajt näguipxy møødá mdo'oxiojca. Hix, näguipxiä Dios

hajxy xyajnáhwa'ačh møødä mdo'oxiøjc-hajxy. Tiuumbiä Dios mayhajt jaduhñ. Pero coo mdo'oxiøjc hajxy mga'a tsoc mga'a méé'xät, xiøøbä Dios hajxy jaduhñ mnä'ä pa'yáaxnät.

⁸ Mägu'ughajpädøjc, jaduhñ hajxy homiänaajä mnä'ägä ničoc mnä'ägä nimiee'xøjät nebiä tu'ugmägu'ug nebiä tu'ugpuhya'ayän. Mniñäxuudsøjöp hajxy jaduhñ hamiñ haxøpy. Mee'xxieemy hajxy mnimiøødcapx mnimiøødmädia'agøjät. Jaduhñ hajxy mhídät tu'ugmädia'agy nägøxiä. Jaduhñ hajxy hoy mdsänä'awät nägøxiä.

⁹ Coo mijts pøn cøxypänejiä xtiúnät, cab hajxy myaghawiimbijtagätsät. Y coo hajxy pøn xwyiinwóonät, cab hajxy mhadsoowiimbídät. Mmānuu'xtá'agäbä Dios hajxy jaduhñ coo ween piuhbedyii ja'a tøø xwyiinwóoñäbä. Jaduhñ mijtsä Dios tøø xyajnáhdij coo Dios ja'a hoyhajtä weenhajt hajxy xmió'owät.

¹⁰ Pø mdsojpiä mhoyhäyow ja'a mhochäna'a hajxy, cab hajxy mänaa mhøhñdá'agät.

Cab hajxy mänaa mgapxtägóyyät.

¹¹ Mnajtshixø'øwäbä mhaxøøgwiinmahñdy hajxy.

Hoy hajxy mjäya'ayhädät. Cab hajxy mnimiädsip mnimiäma'adøjät ni mänaa.

¹² Hix, cwieendähajpiä Dios pøn jatiä miädia'agy mabøjcap.

Y coo Dios hajxy miānuu'xta'agy, mänit hajxy piuhbedyii.

Pero ja'a häna'c-hajxy haxøøg wädijpä, cab hajxy ñäxuuchii ja'a Diósäm, nømä Diosmädia'agy miäna'añ.

¹³ Hoorä, coo hajxy hamuumdu'joot mhojiäya'ayhädät, cab hajxy jaduhñ pøn cøxypänejiä xtiúnät.

¹⁴ Jii jäya'ayhajxy näje'e, mijts xjia wi'i chaächtiunaamb, hoy mijts mja hojiäya'ayhaty. Pero ca'a hajxy mdsähgø'øy; ca'a hajxy tii mdajy mmay. Ja'a Dios hajxy jaduhñ xcwieendähadaamb.

¹⁵ Hamuumdu'jootä Jesucristo hajxy mwiingudsähgø'øwät. Hix, jaaya'ay hajxy nWiindsønähjtäm. Y coo hajxy pøn xmiäyajtøwät tiiguiøxpä Diosmädia'agy hajxy hānajt coo mmäbøcy, cab hajxy mdsähgø'øwät; mnägäpxäp hajxy jaduhñ tiiguiøxpä hajxy coo mmäbøcy. Mee'xxieemy hajxy jaduhñ mhadsówät, ca'a yhajootma'adä.

¹⁶ Nägüentä hajxy tehngajnä mwädítät, coo hajxy jaduhñ mnä'ä cädieeyät. Jaduhñä tøyhajt hajxy mmøødhädät coo hajxy hānajt hoy mwädity. Hoy hajxy mwädítät, hoyyä jäya'ay hajxy xjia nähojy xjia näya'axy coo Jesucristo miädia'agy hajxy hoy myajtuunä. Coo hajxy jaduhñ hoy mjaančh wädítät, mänitä häna'c-hajxy jaduhñ chähdiuna'añ coo mijts hānajt jaduhñ tøø xñänømy.

¹⁷ Hoy jaduhñ coo hajxy hoy mwädítät, hoy hajxy hānajt mja tsaächpøcy. Hix, ja'a Dios hajxy hānajt tøø xyajnáhdij coo hajxy tähoocjaty mdsaaächpøgät, hoy hajxy hānajt mja howiädity. Pero coo hajxy hānajt haxøøg mjatcø'øy, cab jaduhñ yhooyä; mgumädówäp hajxy jaduhñ.

¹⁸ Hoyyä Jesucristo mänaa quia'a jagä cädieey, tsaächpøjc je'ebä. Coo hajxy hoy xñähho'túutäm, jaduhñä nbojpä ngädieey hajxy xyajnáhwaatsäm. Y jaduhñ hajxy jim xyajnøcxáañäm Dioswiinduum. Tähoosquä hajxy xñähho'túutäm. Ja'a ñi'xä quiopc-hajtiä jaduhñ ho'c. Pero ja'a jiootä yhEspíritu, cab jaduhñ ñä'ä ho'cy; jujyñä hānajt jaduhñ yhity.

¹⁹ Ja'a jiäwøhñdyhaamä Jesucristo yhooyy maa ho'ogyjiäya'ayhajxy hānajt tsumy yhitiän. Jimä hawiinjemybiä mädia'agy hajxy hoy yajwiingapxø'øyii coogä Dios ja'a Jesucristo hānajt tøø quiexy mäyajnähwaatspä.

²⁰ Paady hajxy hānajt tsumy yhity je'eguiøxpä coo Diosmädia'agy hajxy jecy quia'a mabøjcy mänaa Dios jia nägapxiän coo nøøgomdägoy hānajt tiägø'øwa'añ, mänaa Noé ja'a biarco hānajt yhädiuñän. Cabä Dios mänitä yajtagøøyy tuubä. Jia hahijx jejcy pø mabøgáañäxäbä miädia'agy hānajt. Coo jaduhñ yhijxy coo hajxy hānajt nämay quia'a mabøga'añ, mänitäts yajtagøøñä tuubä. Mänitä nøøgomdägoy tiägøøñä. Jagooyyä Dios yhijxy coo Noéhajxyhajtä hānajt miäbøga'añ, ja'a hajxy hānajt näductújiäbä. Jagooyyä

Noéhajxy jaduhñ miäbøjcy. Je'eds hajxy jaduhñ jii by tsooc barcojooty, ja'a hajxy hñajty tøø yhädiúñäbä.

²¹ Nebiä Noéhajxy jecy chooquiän jii by barcojooty mänaabä nõøgomdägoy jaduhñ tiägø'øyän, jaduhñ mäwíinäts je'e miäbaady néjjiäm coo hajxy nnäbéjtäm nõøjooty, coo Jesucristo hajxy xyajñähwáatsäm mänaa jiuypiojtägachän. Paady hajxy jaduhñ nnäbéjtäm nõøjooty, hijxtahñd jaduhñ coo hajxy nnähwáatsäm. Ja'a ngorazonghajxy jaduhñ wáatsäm, ca'a ja'a nni'xä ngopc-hájtäm. Coo hajxy jaduhñ nnäbéjtäm, jaduhñä Dios hajxy hamuumdu'joot nhawáañäm coo Jesucristo miädia'agy hajxy nnä'ägädä panøcxáañäm.

²² Coo Jesucristo hñajty tøø jiuypiojtägach, mänit jim ñøcxy tsajpootyp. Jim yhäñaañä maa Dios quiø'ø hahooyhaampiän. Je'e jaduhñ ñänøømby coo cuhdujt jim miøødä møj jaançh. Hix, wiingudsähgøøyyäbä Jesucristo jim. Ja'a Dios mioonsähajxy, ja'a hajxy jim hijpä tsajpootyp, je'eds hajxy jaduhñ mäwiingudsähgøøby, møødä cuhdujtmøødpähajxy. Høxtä møjcu'ubaadyhajxy yhane'emyii ja'a Jesucristäm.

4

¹ Coo Jesucristo chaächpøjcy, miee'xtujc ja'a tsaächpä jaduhñ. Jaanä jaduhñ mijtspä, coo Jesucristo hajxy mmøødhity tu'ugmädia'agy, paady hajxy jaduhñ mmee'xtújpät, coo hajxy hñajty pøñ xyajtsaächpøcy. Coo hajxy jaduhñ mjaançh tsaächpøjpät nebiä Jesucristo chaächpøjquiän, jaduhñ hajxy myajcähxø'øgät coo mhaxøøgwiinmahñdy hajxy tøø mhøxhijxnä.

² Coo mhaxøøgwiinmahñdy hajxy jaduhñ mjaançh høxhixät, hoy hajxy jaduhñ mjäya'ayhada'añ mäduhñtiä hajxy yaa mjaac hida'añ hädaa yaabä naaxwiin. Jaduhñä Dios hajxy xquiumáyät.

³ Jue'e mijts hijty, haxøøg hajxy hijty mjatcø'øy nebiä häna'c-hajxy jiatcø'øyän, ja'a Diosmädia'agy hajxy ca'a mäbøjpä. Cab jaduhñ yhahixø'øy coo hajxy jaduhñ mjatcøøñät. Hanaxiä hajxy hijty haxøøg mjatcø'øy. Hanaxiä jocnøø hajxy hijty mjaançh tehñ yhu'ugy mjaançh tehñ jiøø'xy coo xøødsuu hijty maa jiadyii. Tsähdiuhñdägoy hajxy hijty mjatcø'øy, ya'adiøjc møødä to'oxiøjc. Jäya'ayhadsejtsnaxy hajxy hijty naxy mwiingudsähgøøby møødä jäya'ayhabetjtsnaxy.

⁴ Y ja'a jäya'ayä Diosmädia'agy hajxy ca'a mäbøjpä, ja'a mijts hijty naxy mmägu'ughajpiä, yagjuøøby hajxy jaduhñ coo mijtsä mhaxøøgwiinmahñdy mga'a yaghanajxnä neby hajxy hijty myaghanaxiän. Paadiä mmägu'ughajpä hajxy jäda'ahaty xñähojnä.

⁵ Pero coo Dios jaduhñ yajnähdíjät coo hñajty tøø yhabaatnä, mänit hajxy hñajty tiøyhajtyega'añ maa Dioswiinduumän. Mänitä hajxy yajcumädowa'añii ja'a Diósäm, hoy hajxy hñajty jia jujyquiä, hoy hajxy hñajty tøø jia ho'ogy.

⁶ Hix, jaduhñä Dios jioot chocy coo ho'ogyjiäya'ayä miädia'agy hajxy ween miäbøjcäxä, paadiä Dios ja'a yHuung Jesucristo jim quiejxy maa ho'ogyjiäya'ayhajxy hñajty tsumy yhiitiän. Jimä Jesucristo ja'a Diosmädia'agy hoy yajnähixø'øy coogä Jesucristo miäyajnähwa'açh. Jaduhñägä ho'ogyjiäya'ayä jiäwøhñdyhajxy homiänaajä jiu gyhädät nebiä Dios jiu gyhatiän, hoyyä ñi'xä quiopc-hajxy hñajty tøø jia ho'ogy.

⁷ Habáatnäp jaduhñ coo naaxwiimbä wyiimbidaañnä. Paady hajxy tehñgajnä mniya-jcopcø'øwøøjät nebiä mjoot hajxy yaa mga'a pädá'agät maa hädaa yaabä naaxwiimbän. Jaduhñä Dios hajxy hoy mba'yá'axät hamuumdu'joot.

⁸ Je'e jaduhñ nä'ägä tsoobaatp coo hajxy hamiñ haxøpy mniçhoc mnimiee'xøøjät. Hix, coo hajxy hamiñ haxøpy nniçhóçmät, mänit hajxy hoy nnimiämée'xämät. Jaduhñ hajxy hoy ndsänáayämät.

9 Coo pøn jim quiuyo'oy quiunaxó'owät maa mjøøn maa ndøjc-hajxiän, hamuumdu'joot hajxy myajtøjtägø'owät. Myajcay myaghú'ugäp hajxy jaduhñ hahoy haween.

10 Cøjwiinduumä Dios wiinmahñdy hajxy xmióoyyäm coo tuung hajxy wiingjaty nmøødhájtäm. Jaduhñä jäya'ayhajxy nägøxiä piuhbedøjtät, ja'a hajxy hñajty tøø miäbøquiäbä ja'a Jesucristocøxpä. Jaduhñ hajxy mnibihbedøjtät nebiatiä Dios tuung hajxy cøjwiinduum tøø xmió'oyän.

11 Pønjaty tøø tiuungmo'oyii coo Diosmädia'agy hajxy yajwá'xät, hoy hajxy quiapx miädiá'agät nebiä Dios quiapxy miädia'aguiän. Pønjaty tøø tiuungmo'oyii coo hajxy miäbuhbedät, ween hajxy jaduhñ hamuumdu'joot miäbuhbety. Ja'a Dios jaduhñ puhbedäp. Coo hajxy hñajty tijaty mduna'añ, hoy hajxy mdúnät; jaduhñä jäya'ayhajxy miäbøgät coo Dios miøjjä jiaančhä. Wyiingudsähgø'øwaambiä Dios hajxy jaduhñ je'eguiøxpä coo Jesucristo hajxy hoy xyajnáhwáatsäm. Cøjxta'axiøø ja'a Dios wyiingudsähgø'øwa'añii. Cøjxta'axiøø møjcuhdut miøødhada'añ. Amén.

12 Mägu'ughajpádøjc, cab hajxy myagjuó'owät coo tsaächpä hajxy naxy xpiaady møc-haampiä. Hix, tsipcøxpä tsaächpä hajxy xñä'ägä paada'añ.

13 Jaduhñ quiähxó'ogät pø hamuumdu'jootä Diosmädia'agy hajxy mjaančh mábøcy ja'a Jesucristocøxpä, pø caj. Hix, maas hanaxiä Jesucristo chaačhpøjcy mänaa hajxy hoy xñähho'túutäm. Hix, coo Jesucristo hajxy jaduhñ mmøødhity tu'ugmädia'agy, paady hajxy jaduhñ tsipcøxp mbadsaačhpøjpät. Y coo Jesucristo hñajty yaa quiädaactägatsa'añ hädaa yaabä naaxwiin, mänit hajxy hñajty mjaančh tehñ xioonda'aga'añ. Paady hajxy jäda'ahaty mxoondaacnät, hoyyä tsaächpä hajxy jaduhñ xjia paady. Pero cabä tsaächpä hajxy jaduhñ myagjuó'owät.

14 Coo hajxy pøn xñähójät ja'a Jesucristocøxpä, cab hajxy myagjuó'owät. Pero mxoonda'agäp hajxy jaduhñ. Hix, jaduhñä Dios ja'a yhEspirituhaam hajxy xpiuhbedät møødá wyiinmahñdyhaam. Coo mijtsä jäya'ay xyhíxät coo hajxy mmee'xtucy coo hajxy hñajty mdsaačhpøcy, mäniä Dios hajxy wyiingudsähgø'øwa'añ.

15 Hahixøøby jaduhñ coo hajxy mdsaačhpøgät, pø tøø hajxy hñajty mmäjäya'ay-yagho'ogy, pø tøø hajxy hñajty mmämeečh, pø tøø hajxy hñajty myajtägø'oy maa cueendä hajxy hñajty mga'a møødän. Cab jaduhñ yhooyä coo hajxy jaduhñ mjatcø'owät.

16 Pero je'e mábøcypiä caj chähdiuhñdmøødá coo hajxy mdsaačhpøgät je'eguiøxpä coo Jesucristo hajxy hñajty mwiingudsähgø'oy. Jootcujc hajxy jaduhñ mhídät. Mnämä'awäbä Dios hajxy "Dioscujú'uyäp" ja'a Jesucristocøxpä.

17 Tøø yhabaatnä coo Dios hajxy xyajtøyhajtyegáañäm. Coo Diosmädia'agy hajxy nmäbøjcäm, paady hajxy jayøjp xyajtøyhajtyegáañäm, paady hajxy jayøjp xyajtsaačhpøjcäm. Pero ja'a hñana'cä Diosmädia'agy hajxy ca'a mábøjpä, coo hajxy hñajty tiøyhajtyega'añ, maas hanaxiä hajxy hñajty chaačhpøga'añ.

18 Siémpämä hojiäya'ayhajxy chaačhpøga'añ. Maas hanaxiä ca'awiindøyhäna'c-hajxy chaačhpøga'añ, ja'a Dios hajxy ca'a wiingudsähgøøbiä.

19 Coo hajxy hñajty pøn xyajtsaačhpøcy nä'ä nägoobä, cab hajxy mmøjpädá'agät. Tehngajnä hajxy hoy mjaac jäya'ayhädät. Hix, ja'a Dios hajxy hñajty tøø xyajmädsocy coo hajxy mdsaačhpøgät.

5

1 Mijts majjäya'adiøjc-hajxy, ja'a hajxy jim tuumbä tsajtøgooty, mijts cham nmägäpñ nhane'emaamby. Nmøødhøchä cuhdut jaduhñ cooçh mijts jaduhñ nmägäpñ nhané'emät, je'eguiøxpä cooçh tøø nmäjaabä, møød cooçh jim nduumbä tsajtøgooty. Nhijxhó'c-høchä Jesucristo jim cruzcøxp. Y coo Jesucristo yaa quiädaactägätsät hädaa

yaabä naaxwiin, näguipxy hajxy hänajty jim xyajnøcxáañäm tsajpootyp, høøch møød mijts. Jimä hoyhajtä weenhajt hajxy xmio'owáañäm pedyii.

² Mijts majjäya'adiøjc, hoyyá Diosmädia'agy hajxy myajnähxø'øwät hamuumdu'joot, ca'a yhadsip ca'a yhajootma'adä. Hamuumdu'jootä cu'ug hajxy mmägäp mhané'emät. Hix, ja'a Dios hajxy tøø xpiäda'agy coo cu'ug hajxy jaduhñ myajnähxø'øwät, møød coo hajxy mmägäp mhané'emät. Cab hajxy xädø'øñguiøxpä myajnähxø'øwät.

³ Cab hajxy møc møc mhané'emät. Mee'xxieemy hajxy myajnähxø'øwät. Hoyyá Diosmädia'agy hajxy myajtúnät; jaduhñä cu'ug hajxy xpiahix xpiadúnät.

⁴ Y coo Jesucristo yaa quiädaactägätsät, ja'a hajxy nWiindsønähjtämbä, mänit hajxy xquiumaya'añ pø tøø hajxy hänajty hoy myajnähxø'øy. Mänit hajxy hänajty jim xyajnøcxa'añ tsajpootyp. Cøjxta'axiøø hajxy hänajty jim mhida'añ.

⁵ Møød mijts muutsc-häna'c, jaduhñ mijtspä, mwiingudsähgø'øwäbä majjäya'ay hajxy. Coo hajxy waamb xmiägäp xyhané'emät, mgudiúnäp hajxy jaduhñ. Hahoy haween hajxy mnibiuhbedøøjät hamiñ haxøpy, hoy miøjjä hoy miuutscä. Hix, coo hajxy jootmøj mnibiäda'agøøjät, xyajcumädówäbä Dios hajxy jaduhñ. Pønjaty capxp mädiaacp mee'xxieemy, je'edsä Dios piuhbejpy. Móoyyäbä hoyhajtä weenhajt hajxy jaduhñ.

⁶ Coo Dios hajxy jaduhñ mänaa xyajtsaächpøgät, cab hajxy mmøjpädä'agät. Jim hajxy mnibiäda'agøøjät maa Dios quiø'øba'c tiēcypia'cän. Møcmäjaa Dios jiaanç tehñ miøød. Hix, cujequiä Dios ja'a tsaächpä hajxy xyajnähwä'adsät. Mänit hajxy jootcuyc xjiaanç tehñ yaghida'añ.

⁷ Coo hajxy hänajty tii mnädajy mnämay, mmänuu'xtä'agäbä Dios hajxy jaduhñ coo hajxy ween xyaghoyøøyyä. Hix, homiänaajä Dios hajxy xcwieendähaty.

⁸ Mniyajcopcø'øwøøjöp hajxy; jaduhñä Jesucristo miädia'agy hajxy hoy mbanøcxät tehñgajnä. Jaduhñä møjcu'ugongä wyiinmahñdy quia'a mäjädä'agät. Hix, ja'a møjcu'ugong, homiänaajä hajxy jaduhñ xmiädsiphajtäm. Xjia wi'i yajtu'udägoyyáañäm hajxy jaduhñ.

⁹ Cabä møjcu'ugongä miädia'agy hajxy mmäbøjcät. Hamuumdu'jootä Diosmädia'agy hajxy myajtúnät tehñgajnä. Hix, pønjatiä Diosmädia'agy mäbøjp wiinduhmyhagajpt, jaduhñ hajxy chaächpøjpä nej mijts mdsaaächpøquiän.

¹⁰ Cab hajxy jejcy mdsaaächpøga'añ. Coo Dios ja'a tsaächpä hajxy hänajty tøø xyajnähwä'açh, mänitä Dios hajxy hamuumdu'joot xyajmäbøgaannä ja'a Jesucristo miädia'agy. Ca'xy pedyii Dios ja'a wyiinmahñdy hajxy xyajnähxø'øwa'añ. Ja'a Diósäts hajxy jaduhñ xcwieendähajtäm, hoy hajxy nej cu nja jajt cu nja habéjtäm. Tiuumbiä Dios mayhajt jaduhñ maa højtscøxphajtäm. Jaaya'ay hajxy jaduhñ tøø xyajnähdíjjäm coo Jesucristo hajxy jim xyajnøcxáañäm tsajpootyp. Cøjxta'axiøø hajxy jim nhidáañäm. Hix, cøxiä Dios ja'a hoyhajtä weenhajt hajxy jaduhñ xmióoyyäm.

¹¹ Cøjxta'axiøø ja'a Dios hajxy tsøc wiingudsähgøøyyäm. Cøjxta'axiøø ja'a Dios møjcuhdajt miøødhada'añ. Tøyhajt jaduhñ.

¹² Ja'a mägu'ughajpä Silvano hädaa nocy jahby. Høøch nnajtscapxøøyyäp. Cab hädaa nocy jiaty yoñä. Hoyyá Silvano Diosmädia'agy jiaanç tehñ yajtuñ. Tøyhajtthøch cham tøø ngapxy tøø nmädia'agy nebiä Dios tøyhajt wyiinmayyän. Tøø Dios møjmayhajt tiuñ maa højtscøxphajtäm. Tøø hajxy jaduhñ xyajmädsøjcäm coo hajxy jim xmiøødhíjtämät tsajpootyp.

¹³ Ja'a jäya'ayhajxy yaa tsänaabiä Babilonia, ja'a Diosmädia'agy hajxy mäbøjpä ja'a Jesucristocøxpä, xyajpoo'xp mijts jaduhñ. Nej mijtsä Dios xyajnähdíjjän coo miädia'agy hajxy mmäbøjcät, jaanä jaduhñä jäya'ayhajxy yaabä yajnähdíjjäbä coo hajxy miäbøjpät. Jaduhñ mijtsä mmägu'ughajpä Marcos xyajpoo'xpä. Nébiøchä nhamdsoo húungänä Marcos njuø'øy.

¹⁴ Coo hajxy hänajty mhamugø'øý Dioswiingudsähgøøbiä, hamiñ haxøpy hajxy mniya-jpoo'xøjät. Jahun hajxy myajcähxø'øgät coo hajxy tøyhajt mniçhocy mnibia'häyoyii hamuumdu'joot.

Pønjatiä Diosmädia'agy panøcxp ja'a Jesucristocøxpä, weenä hoyhajtä weenhajt hajxy mio'oyii ja'a Diósäm. Amén.

2 Pedro

¹ Høøch xøhajp Simón Pedro. Høøch hädaa nocy njahby. Ja'a Jesucristøch nmøødtuumby. Jaayá'ayhøch tøø xwiinguexy coochä miädia'agy nyajwá'xät. Tøø mijtsä Jesucristo xyajnähdijy coo hajxy hoy mmäbøgät jaduhñ mäwiin neby højts xyajnähdijjän. Tu'cuhdujt hajxy jaduhñ xquiumáayyäm nägøxiä je'eguiøxpä coo hajxy tu'cuhdujt nmäbøjcäm coo tiøyyä. Jaduhñ yajnajuø'øy coo Jesucristo yhojiäya'ayä. Jaaya'ay hajxy nDioshájtäm. Tøø hajxy xpiädáacäm hawa'adstuum.

² Ween mijtsä Dios ja'a hoyhajtä weenhajt xmio'oy møj may coo ja'a tøyhajt hajxy mmøødä ja'a Dioscøxpä møødä Jesucristocøxpä, ja'a hajxy nWiindsønähjtämbä.

³ Coo ja'a tøyhajt hajxy nmøødhajtäm ja'a Jesucristocøxpä, paadiä Dios hajxy madiu'u xpiuhbéjtäm ja'a miäjaahaam, jaduhñ hajxy hoy njäya'ayhäjtämät. Mänitä Dios hajxy jaduhñ xquiumáayyämät. Jaanä miäjaahaamä Dios hajxy xyagjugyhadäänäm homiänaajä neby je'e jiugyhatiän. Coo Jesucristo miøjjä jiaančhä, coo jiaanč tehñ yhojiäya'ayä, paady hajxy tøø xyajnähdijjäm coo hajxy hoy njäya'ayhäjtämbät.

⁴ Coo Jesucristo jaduhñ miøjjä jiaančhä, paadiä mayhajt møj may tiuna'añ maa højtscøxphajtäm. Jaduhñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphajtäm. Homiänaajä hajxy xyagjugyhadäänäm neby je'e jiugyhatiän. Y tøø hojiootä howyiinmahñdy hajxy xmióoyyäm hawiinjemybiä. Jaduhñ hajxy hoy nmøødhajtämät tu'ugmädia'agy. Jaduhñä haxøøgpä hajxy yaa hoy njøjyohdiütämät hädaa yaabä naaxwiin. Ja'a häna'c-hajxy yaa ca'a mabøjpä, hadsojwiinmahñdy hajxy miøød. Coo yhaxøøgwiinmahñdy hajxy jaduhñ quia'a najtshixø'øwa'añ, paady hajxy jii by quia'awa'añ haxøøgtuum.

⁵⁻⁷ Paadiä Diosmädia'agy hajxy tsøc mabøjcäm. Tsøc hajxy hojiäya'ayhäjtäm hamuumdu'joot. Tsøc hajxy jaac habøjcäm ja'a Dioscøxpä. Tsøc hajxy hjtäm najuø'øyhaamby. Tsøc hajxy mee'xtújcäm. Tsøgä Dios hajxy wiingudsähgøøyyäm. Tsøc hajxy ničhøjcäm nebiä tu'ugpuhya'ayän, neby højtsä Jesucristo xchøjcäm. Tsøgä jäya'ay hajxy nägøxiä tsojc méé'xäm, hoy hajxy näje'e quia'a jagä mabøcy.

⁸ Coo hajxy jaduhñ hamuumdu'joot ngudiüünämät nébiøch naamnä tøø nmädia'agy, mänit hajxy nhoyøøyyämät. Mänitä Jesucristo tiuung hoy ndüünämät. Nmøødhajtämä tøyhajt hajxy jaduhñ ja'a Jesucristocøxpä.

⁹ Hix, pønjaty jaduhñ ca'a cudiumb nébiøch naamnä tøø nmädia'agy, jaduhñ mäwíinäts hajxy je'e nebiä wiinds nebiä xoodspän je'eguiøxpä coo hajxy tøø jiahdiägoy coo piojpä quiädieey hajxy tøø ñähwa'ačhii neby hajxy hijty jegyhajty jiäya'ayhatiän. Jaduhñ hajxy tøø jiahdiägoobiä coo Dios jioot chocy coo hajxy hoy jiäya'ayhädät. Paady hajxy jaduhñ jia yajnähwaatsä.

¹⁰ Hoorä, mägu'ughajpädøjc, tsøc hajxy hamuumdu'joot cudiiünäm nébiøch naamnä tøø nmädia'agy. Jaduhñ yajnajuø'øwa'añ coo Dios hajxy tøø xyajnähdijjäm coo hajxy xquiu'ughadäänäm. Coo hajxy jaduhñ ngudiüünämät, cab hajxy jaduhñ mänaa ndu'udägøoyyämät.

¹¹ Jaduhñ hajxy hoy yajxón nnøcxämät Jesucristo wyiinduum maa cøjxta'axiøø yhane'emiän. Jaaya'ay hajxy nWiindsønähjtäm. Tøø hajxy jaduhñ xyajnähwáatsäm.

¹² Homiänáajäts mijts jaduhñ nyagjahmiejtsta'aga'añ nébiøch naamnä tøø nmädia'aguiän. Tøyhajtøch jaduhñ tøø nmädia'agy. Hoy hajxy jaduhñ mjaty. Cab hajxy mdsoj jahdiägoyya'añ.

¹³ Hawiinmats jaduhñ cooch mijts jaduhñ nyagjahmiejtstá'agät tehngajnä, mädúhñtiøch njaac jugyhaty.

14 Hamdsóojøchä Jesucristo xñämaayy cóogøch mobädajpä nho'ogaannä, ja'a hajxy nWiindsønñájtämbä.

15 Pero cooçh hñajty tøø nho'ogy, hoy hajxy jaduhñ mjaac capxtá'agät nébiøch cham nmädia'aguiän. Jaduhñ hajxy hoy mjahmiejtstä'agät.

16 Tøø højts mijts nyajwiingapxø'øyy coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduhñ nmädiaacy. Cab højts hamdsoo nyajcojy. Diosmädia'agy hädaa jaduhñ. Ca'a ñä'ä cueentä nebiä jäya'ay cueentä hajxy yajcojjiän. Hamdsoo højtsä Jesucristo nhijxy coo møcmäjaa miøødä, coo je'e Dyiosä.

17-18 Mänaa højtsä Jesucristo hñajty jim nmøødän maa tunän, mänitä Diosteedy jim quiuhgapxnajxy tsajpootyp: “Høøch nhamdsoo Huang yø'ø. Njaanç tehñ chójpiøch yø'ø. Jaanç tehñ jiootcújc-høch nnijwiø'øyyii maaçh nHuungcøxpän”, nømä Jesucristo ñänøømä. Njaanç mädoow højts jaduhñ. Møcmäjaahaamä Dios jaduhñ quiapxy. Jaanç tehñ yajxonä Jesucristo piädaacä ja'a Tiéediäm, nebiä hajajpä. Paady højts yø'ø tun nyajxøøbejty: “Ja'a tun maa Dios ñägapxiän coogä Jesucristo yHuunghaty.”

19 Tøyhajt jaduhñ jiaanç jajty nébiøch cham nmädia'aguiän. Hamdsoo højts nhijxy nmädooyy. Hahixøøby jaduhñ coo højts mijts nmädia'agy xmiäbøjcät. Maas hahixøøby jaduhñ coo Diosmädia'agy hajxy mmäbøjpat, ja'a jäya'ayhajxy jecy quiujáhyyäbä. Jaduhñ mäwíinädsä Diosmädia'agy miäbaady nebiä jøøn tioyyän hagoonstuum. Hix, xyajwiin-juøøyyäm hajxy jaduhñ tijaty hajxy hoy hamdsoo nga'a wiinjuø'øwáanäm. Hahixøøby jaduhñ coo hajxy homiänaajä nyajcopcøøyyämät. Coo Jesucristo yaa quiädaactägätsät hädaa yaabä naaxwiin, mänit hajxy cøxiä xyajwiinmädiaagø'øwáanäm. Jaduhñ hajxy hoy nwiinjuø'øwáanäm cøxiä.

20-21 Huuc wiinjuø'øw hajxy jaduhñ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhñ quiujahy tijaty hñajty jadäänäp tunäänäp. Ja'a Dios je'e najtscapxøøyy ja'a yHespírituhaam waamb hajxy quiujáayät.

2

1 Jii jäya'ayhajxy hijty näje'e jegyhajty miäna'añ cooc tyijy Dios hajxy hñajty ñajtscapxøøyyäbä. Pero høhñdaacp hajxy hñajty jaduhñ. Ja'a Dioscu'ug hajxy hñajty jia wi'i wyiinhøønaamby. Jaanä jaduhñä høhñdaacpähajxy jii by wiäditaambä maa mgajpthajxiän. Cabä cu'ug ñajuø'øwa'añ pø wiinhøhñäp hajxy hñajty jaduhñ. Høxtä mäna'anaamby høhñdaacpähajxy jaduhñ cooc tyijy ja'a Jesucristo hajxy tøø xquia'a nähho'túutäm. Paquiä hajxy yajcumädowa'añii. Pønjetiä høhñda'agymiädia'agy mäbøgaamb, tu'udägoyyaamb hajxy jaduhñ. Ja'a häna'c-hajxy jaduhñ høhñdaacpä, niyhamigähadäänäp hajxy jaduhñ.

2 Pahixäänäp hajxy jaduhñ nämay. Ja'a häna'c-hajxy mäbahixaamb, ja'a tyijy ja'a Diosmädia'agy hajxy mäbøjpat. Coo hajxy jaduhñ hoy quia'a hida'añ, ni häna'c-hajxy høhñdaacpä, ni häna'c-hajxy mäbahixpä, paadiä cu'ugä tøyhajt hajxy quia'a tsoga'añ ja'a Jesucristocøxpä.

3 Ja'a høhñdaacpähajxy, xädø'øñ hajxy piøcjuø'øwaamby. Høhñda'agymiädia'agyhaamby mijts xyajnähixø'øwa'añ; jaduhñä xädø'øñ hajxy xjia wi'i piøgaanä. Jéquiänä Dios tiägøøyy mänaandaacpä coogä häna'c-hajxy quiümädowa'añ, ja'a høhñda'agymiädia'agy hajxy yajnähixøøbiä. Jaduhñä Dios jecy miänaandaacpä cooc hajxy quiuhdägoyya'añ.

4 Hix, yajcumädoobiä Dios je'e pønjaty ca'a mäbøgaamb. Coo mioonsähajxy näje'e jim jecy quia'a mäbøjcy tsajpootyp, paady hajxy jecy quiümädooyy. Haxøøgtuum hajxy hoy quiuhjuijpnaxyii maa jiaanç tehñ quiøøcän, maa yhagoonstuumän. Jim hajxy yhida'añ høxtä coonä yhabaadät coo Dios jaduhñ miäná'anät nebiaty hajxy jii jiaac tsaächtiuna'añii.

⁵ Jaanä jaduhnä Dios ja'a jecyjiäya'ay yajcumädoobä, ja'a hajxy jecy tøø quia'a mäbøquiäbä. Mänitä Dios nøøgomdägoy quiejxy. Jayooyyä Noéhajxy choocy møødä yhuung møødä tio'oxy ja'a näductujcpä. Jaduhnä Noé ja'a cu'ug hānajtj tøø jia ya-jwiingapxø'oy coogä yhaxøøgcuhdujt hajxy ñajtshixø'owät, coogä Dios hajxy wyiin-gudsähgø'owät.

⁶ Jaanä jaduhnä jecyjiäya'ayhajxy jiajpä, ja'a hajxy hijty jim tsānaabiä maa cajpt hijty jaduhn xiøhatiän Sodoma møødä Gomorra. Cabä Dios hajxy hijty ñä'ägä wiin-gudsähgø'oy. Paady hajxy jøønhaam yajcuhdägooyyä. Cøjxä haxøøghāna'c-hajxy yho'ogy. Haagä cujiaam hajxy jiajnä møødä quiajpthajxy. Hijxtahnd ja'a Dios jaduhn piādaac coo haxøøgjäya'ayhajxy nägøxiä yajcumädowa'añii.

⁷⁻⁸ Mānaa Dios ja'a jecyquiajpt jaduhn yajcuhdägoyyän, jagooyyä tu'jäya'ay yajtsoocä, ja'a hānajtj xøhājpä Lot. Paadiä Lot yajtsoocä, je'eguiøxpä coo hānajtj hoy jiaja'ayhaty. Mänitä Dios ja'a Lot yhawaanä coogä quiajpt hānajtj quiuhdägoyyā. Paadiä Lot jim chohñ. Jaanč tehñ jiootmayhājpä Lot hānajtj jaduhn coo cu'ughajxy hānajtj haxøøg jiatcø'oy jabom-jabom hijxwiinduum.

⁹ Nebiä Dios ja'a Lot jecy yajtsooquiän, jaanä jaduhnä Dios ja'a quiu'ug ya-jtso'ogaambä coo hajxy hānajtj chaačhpøcy. Tøyhajt jaduhn. Jaanä jaduhn tiøyhājtäbä coo Dios yajcopcø'oy nebiatiä haxøøgjäya'ayhajxy jiatcø'oyän. Jēquiänä Dios jaduhn miānaañ cooc hajxy quiumädowa'añ. Coo jaduhn yhabādät, mänitä Dios miāna'ana'añ nebiaty hajxy jii chaačhtiuna'añii.

¹⁰ Nägø'ø nädequiä Dios yajcumädowa'añ pøn yajnähixøøby høhnda'agymiädia'agyhaam, pønä Diosmäjaa xøøghājp. Jaanč tehñ chähdiuhndägoy hajxy ñibiäda'agyii, ja'a høhnda'agymiädia'agy hajxy mäwädijpä. Jootmøj hajxy jaduhn ñibiäda'agyii. Cab hajxy pøn wyiingudsähgø'oy. Haa jaaya'ayhajxy møjtuungmøødpä maa Diosmädia'agy myiñänä, wiingapxpéjtāp hajxy je'ebä.

¹¹ Haa ja'a Diosmoonsähajxy jim hijpä tsajpootypä, maas møcmäjaa hajxy miøødä quejee ja'a høhnda'agymiädia'agy hajxy mäwädijpä. Pero cabä Diosmoonsä ja'a møjtuungmøødpä hajxy wyiingapxpety maa Dioswiinduumän; ni cab hajxy ñähojy.

¹² Jaduhnä høhndaacpähajxy ñibiäda'agyii nebiä yuughanimalän coo hajxy tii quia'a wi-injuø'owa'añ ja'a Dioscøxpä. Hix, cabä yuughanimalhajxy tii wyiinjuø'oy ja'a Dioscøxpä. Mädyiijatiä høhndaacpähajxy quia'a wiinjuøøby, je'e hajxy ñäxiicypy. Paquiä hajxy yajcuhdägoyyāñii nebiä animalhajxy paquiä quiuhdägoyyän coo hajxy yagho'ogyii.

¹³ Tsaächtiunāanäbä høhndaacpähajxy jaduhn je'eguiøxpä coo hajxy hānajtj tøø miädsaačhtiuñ. Xoondaacp hajxy jaduhn coo hajxy cøxypänejpä jiatcø'oy xøømbaady. Høxtä jiiby hajxy yajtägø'oy maa mijts naxy mgaamiuquiän ja'a Jesucristocøxpä. Ja'a Jesucristo miädiä'aguiäc tyijy hajxy pianøcxäp. Pero haxøøgjaty hajxy wyi'i jiatcø'oy mijts mwiinduum maa hajxy hānajtj mgaamiuquiän. Høxtä jiiybipiaady hajxy je'e yhøhndaacpä.

¹⁴ Homiädyyii to'oxiøjcä hajxy jaduhn yhixy, yhadsojpy hajxy jaduhn. Homiānaajä hajxy jaduhn haxøøg jiatcø'owa'añ. Wyiinhøhmby hajxy pønjetiä Diosmädia'agy hoy ca'a habøjpnä. Hadsojwiinmahñdy hajxy ñä'ägä yajtuumby. Tsipcøxp hajxy jaduhn ñä'ägä cumädowa'añ.

¹⁵ Tøø tødiu'u hajxy jiojwa'ačh. Tøø hajxy jaduhn tiu'udägoy. Ja'a Balaam hajxy jaduhn piahijxyp, ja'a Beor yhuung. Jeguiajtiä Balaam hānajtj quiudiuna'añ ja'a quia'awiindøguiøxpä møødä xädø'øñguiøxpä.

¹⁶ Mänitä Balaam wyiinhojnaxjä tiic jaduhn coo jiatcø'owa'añ. Ja'a møjc burra jaduhn mähoj. Jaduhn quiapxy nebiä jäya'ayän. Mänitä Balaam ñajuøøñä coo jaduhn quia'a hoyyä. Jaduhnä burra miädia'agy miäbøjcäxä.

¹⁷ Yø'ø hāna'cä høhnda'agymiädia'agy hajxy mäwädijpä, jaduhn mäwiin hajxy miäbaady nebiä nøøjut tøø tiø'øčpän. Jaduhn mäwiin hajxy miäbaatpä nebiä joc piojwäditypän coo

hänajty quia'a nä'ägä tu'uy. Hix, cabä tøyhajt hajxy ñä'a yajnahixø'øy. Cøjxta'axiøø hajxy jiiby yhida'añ maa haxøøgtuumän. Ja'a Dios jaduhñ mänaañ cooc hajxy jiiby yhida'añ.

18 Yoñ hajxy jia mädia'agy. Ja wi'i yajcumayaamb hajxy jaduhñ. Pero cabä miädia'agy hajxy choobaady. Ja'a hõhnda'agymiädia'agyhaam hajxy wyiinhøøñ pønjatiä Diosmädia'agy naamdägø'øy habøjp. Jøjcapxøøyyäp hajxy jaduhmbä, ween hajxy haxøøg jiatcøøguiumbä neby hajxy hijty jiatcøøyän.

19 Jaduhñä hõhndaacpähajxy yajnahixø'øy cooc tyijy quia'a nejpiä coo haxøøg mjäya'ayhädät. Hix, jaduhñ hajxy yajnahixøøbiä cooc tyijy ja'a Dios hajxy xquia'a hanéhmanä coo jecymiädia'agy hajxy ngudiúunämät, jaduhñ jia mänaambä cooc hajxy hoy njäya'ayhätämät. Jaduhñ hajxy yhõhndaacpä cooc tyijy hajxy jaduhyyä nnähwáatsäm. Ni je'e hajxy tøø quia'a nähwa'açh je'eguiøxpä coo yhaxøøgwiinmahñdy hajxy tøø quia'a najtshixø'øy. Paady hajxy nøcxy quiuhdägoyyaanä. Jaanä jaduhñ højtshätämbä, coo nhaxøøgwiinmahñdy hajxy nga'a najtshixøøyyämät, jaduhñ højts nøcxy nguhdägoyyaanämbä.

20 Coo Jesucristo hajxy njøjprøgøøyyäm, ja'a hajxy nWiindsønähätämbä, paadiä nhaxøøgwiinmahñdy hajxy xyajnahwáatsäm, neby hajxy yaa nmøødhätäm hädaa yaabä naaxwiin. Pero, coo Jesucristo miädia'agy mjahdiägøoyyät, y coo mhaxøøgwiinmahñdy jadähooc mbadu'ubøgät, maas haxøøg jadähooc mjada'añ.

21 Hix, pønjatiä Diosmädia'agy jaduhñ jahdiägooby, maas hoy haxøpy coo hajxy cu quia'a mæbøjcy. Hix, coo hajxy jaduhñ yhøxhixät, maas hanaxiä hajxy jaduhñ quiumädoxa'añ.

22 Jaduhñ hajxy jiädät nebiä hädaa mädia'agy miäna'añän: "Ja'a huc-hajxy, coo hajxy yhøøch, ja'a yhamdsoo høøch hajxy ñäwiimbijpy, nøcxy hajxy jadähooc jiøø'xø'øgy. Jaanä jaduhñä hädsømhajxy jiatcøøbiä, naamnä hajxy hänajty tøø chi'iy, mänit hajxy jadähooc nøcxy yajtsnä tiøø'pnä mo'ondsooty." Tøyhajt jaduhñ.

3

1-2 Mägu'ughajpædøjc, miämetsc-hoocpä mijts cham nnäjaayø'øy. Jaduhñ mijts cham miämetsc-hoocpä nmägapxy nhane'emy coo mädia'agy hajxy mjahmiejtstä'agät, ja'a Diosquexypähajxy jecy quiujähyyäbä. Jaduhñä howyiinmahñdy hajxy mmøødhädät. Huuc jahmiets hajxy jaduhmbä nebiatiä Jesucristo hajxy xmiägapx xyhanéhman. Jaaya'ay hajxy tøø xñähho'túutäm, paady hajxy nWiindsønähätäm. Ja'a Jesucristo quiugapxyhajxy, je'e mijts tøø xyhawaanä nebiatiä Jesucristo hajxy tøø xmiägapxy tøø xyhane'emy.

3 Naxy hädaa mädia'agy hajxy mdehm wyiinjuø'owät nébiøch cham nmädia'aguiän. Coo naaxwiimbä hänajty wyiimbida'añ, mänitä jäya'ayhajxy quiähxø'øga'añ coo Dios hajxy ñänøma'añ. Haxøøg hajxy jiatcøøwa'añ nebiatiä yhamdsoo joot hajxy hänajty chocy, neby hajxy hänajty ñä'ägä cuhdujthatiän. Xñäxi'igaamb mijts jaduhñ.

4 Jaduhñ hajxy miäna'ana'añ: "Cab jaduhñ tiehm tiøjiada'añ coo Jesucristo wyiimbijtägatsa'añ neby jaduhñ tøø yhuuc mänaambä. Hix, caj tii mänaa tiägach. Je'enä cøxiä wiinä jaduhñ yhityñä mänaa naaxwiimbä jecy yhawijy tiøø'xta'aguiän, mänaa jecyjiäya'ayhajxy yho'oguiän", nom hajxy yhõhnda'aga'añ.

5 Pero tøyhajt jaduhñ coo naaxwiimbä jiaançh tägach. Pero ja'a hõhndaacpähajxy, cabä tøyhajt hajxy wyiinjuø'owa'añ. Hix, haagä nøø hijty jegyhajty. Mänitä Dios ja'a tsajt jecy yhädiuun møødä naaxwiin. Jiibiä naaxwiimbä yajcojy nøøjooty. Mänit hoy piäda'agy nøøhagujc.

6 Mänitä Dios nøøgomdägoy cujecy quiejxy. Mänitä naaxwiimbä quiuhdägoyy. Cøjxä jäya'ayhajxy yho'ogy.

⁷ Ja'a tsajt møød hädaa yaabä naaxwiin, tøø Dios jaduhñ yajñähdiijy coo quiøxy toya'añ. Mänitac jaduhñ tioya'añ coo Dios ja'a jäya'ay yajcuhdägoyya'añ, ja'a Diosmädia'agy hajxy ca'a mäbøjpä.

⁸ Mägu'ughajpädøjc, tsøc hajxy jahmiéjtsäm coo Dios tu'xøø jaduhñ ñänømy jadu'miljomøjtpä; y jadu'miljomøjtpä, tu'xøøyyä jaduhñ ñänømy.

⁹ Näje'e jäya'ayhajxy miäna'añ cooc tyijy ja'a Jesucristo quia'a tsoj yajtøjiada'añ coo yaa quiädaactägatsa'añ, coo haxøøgjäya'ayhajxy yajcumädowa'añii. Pero cab jaduhñ tiøyyä neby hajxy jaduhñ jia wi'i yhöhnda'agy. Hix, mee'xtujpä Jesucristo ja'a mijtscøxpä. Cabä jioot chocy coo pøn quiuhdägöyyät. Jaduhñä jioot jia tsoy coo haxøøgcuhdujt hajxy nnajtshixøöyyämät.

¹⁰ Jaguiapxy yhabaada'añ coo Jesucristo yaa quiädaactägatsa'añ, coo haxøøgjäya'ayhajxy yajcumädowa'añii. Cabä pøn jaduhñ ñajuø'øy mänaa jaduhñ jiaanç habaada'añ. Mänitä tsajt quiuhdägoyya'añ. Jaduhñ yajmädowa'añ nebiä hänee møc ya'axiän. Cøxaambä xøø tioya'añ, møødä po'o, møødä madsa'a, møødä naaxwiimbä, møødä tijaty yaa hijp hädaa yaabä naaxwiin.

¹¹ Coø cøxiä wiinä jaduhñ quiuhdägoyya'añ, paady hajxy tsøc hoy jäya'ayhajtäm. Tsøcxä Dios hajxy hoy wiingudsähgøöyyäm. Tsøcxä Diosmädia'agy hajxy hoy cudiúunäm.

¹² Tsøc hajxy jøbhíxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødä xøø, møødä po'o, møødä madsa'a, møødä naaxwiimbä. Tsøgä jäya'ayä Diosmädia'agy hajxy yajmøødmädiäacäm nämay, ween hajxy miäbøcy; jaduhñä Dios paquiä yaghabáadät.

¹³ Tøø Dios jaduhñ miäna'añ coogä hawiinjemyçhajt yhädiuna'añ, møødä hawiinjemyñaaxwiin. Jimä njoot hajxy nbädäacäm coo Dios hajxy jim xyajñøcxäänäm. Cabä haxøøgpä jaduhñ jim mänaa tiägø'øwa'añ maa ja'a hawiinjemybiä tsajtän, ni jim maa hawiinjemybiä naaxwiimbän.

¹⁴ Mägu'ughajpädøjc, tøyhajt jaduhñ coo Dios hajxy jim xpiäda'agáanäm, paadiä haxøøgpä hajxy tsøc najtshixøöyyäm hamuumdu'joot; jaduhñä Jesucristo hajxy xpiäatämät coo pojpä cädieey hajxy hñajty nga'a møødhajtäm, coo yaa quiädaactägätsät. Tsøc hajxy jootcujc nimioødhíjtäm nebiä tu'ugpuhya'ay nebiä tu'ugpuhdo'oxypän. Jaduhñä Dios hajxy hoy xyhíxämät coo hajxy hñajty hoy ndúunäm.

¹⁵ Mjahmiédsäp hädaa mädia'agy hajxy jaduhñ. Paadiä Jesucristo jaduhñ miee'xtucy, weenä jäya'ayhajxy may miäbøcy, ween hajxy jaduhñ may ñähwa'açh. Ja'a mägu'ughajpä Pablo, jaduhñ mijs tøø xñäjaayøøbiä. Ja'a Dios ja'a tøyhajt najtscapxøöyyä. Ja'a tsipjatypä ja'a Dios ja'a Pablo yajwiinjuøöyy. Jaduhñhøçhä Pablo njuø'øy nébiøçhä nhamdsoo puhya'ayän.

¹⁶ Naaghooc mijsä Pablo xñäjaayø'øy, jaduhñ ñä'ägä mädia'agyhaty nébiøch cham njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajñähixøöyyä. Cab hajxy jaduhñ yajñähixø'øy nebiä Pablo jia mänaañän. Wiingatiä Diosmädia'agy hajxy yajñähixø'øy. Cabä tøyhajtpä hajxy miäbøga'añ. Paady hajxy quiuhdägoyya'añ.

¹⁷ Mägu'ughajpädøjc, mnä'ägä najuøøby hajxy jaduhñ coo höhndaacpähajxy jii wiädita'añ. Cabä tøyhajt hajxy chocy. Haxøøg hajxy jiaanç tehñ jiäya'ayhaty. Mnigwieendähadøøjap hajxy; jaduhñä tøyhajt hajxy mga'a najtshixø'øwät. Cab hajxy myajwiinhøønät coo hajxy jaduhñ mnä'ä tu'udägöyyät.

¹⁸ Jaac habøcxä hajxy jaduhñ ja'a Jesucristocøxpä, ja'a hajxy nWiindsønähajtämbä. Jaaya'ay hajxy xñähho'túutäm. Tehngajnä miädia'agy hajxy mmäbøjcät; jaduhñä mayhajt møj may tiúnät ja'a mijtscøxpä. Tsøc hajxy homiänaajä capxpáatäm møj jaanç. Tsøc hajxy tehngajnä wiingudsähgøöyyäm. Amén.

1 Juan

1-3 Jue'e hõjts mijts nyajnäjaayøøby, ja'a Jesucristo. Dioshuung je'e. Jíyyäm je'e hånajty møødä Dios mänaa hädaa yaabä naaxwiin yhawijy tiøø'xta'aguiän. Jaayá'ayäts hajxy xyhawaanäm nebiä Dios wyiinmay. Jaayá'ayäts hajxy tøø xñähho'túutäm neby hajxy jaduhñ njugyhájtämät nebiä Dios jjugyhatiän cøjxta'axiøø. Tøø hõjts nhamdsoo hixy; tøø hõjts nhamdsoo mädooy. Tøø hõjts nnähdoñ cø'øhaam. Tøyhajt jaduhñ. Paady hõjts mijts jaduhñ nhawáanäm neby hajxy jaduhñ nhíjtämät tu'ugmädia'agy, neby hõjts ja'a Dios xmiøødhitiän tu'ugmädia'agy møødä yHuung.

⁴ Paady jaduhñ nhawáanäm neby hajxy jaduhñ jootcuyc nhíjtämät tehngajnä.

⁵ Hoyyä Dios ja'a wyiinmahñdy; cabä pojpa cädieey ñä'ägädä møødä. Jaduhñ hõjts ja'a Jesucristo tøø xyhawaanä, y jaduhñ mijts nhawaandägájtsäm.

⁶⁻⁹ Coö hajxy hoy nwädíjtämät nebiä Dios yhitiän, tu'ugmädia'agy hajxy jaduhñ nhíjtämät, je'eguiøxpä coö ja'a Jesucristo hajxy tøø xñähho'túutäm ja'a nbojpa ngädieeyhájtäm cøxiä. Xyajnähwáatsäm hajxy jaduhñ coö ja'a nbojpa ngädieey hajxy nnägápxämät. Tøyhajt jaduhñ. Cabä Dios yhøhnda'agy. Howyiinmahñdy je'eduhñ miøød. Pero coö hajxy nwädíjtämät haxøøgtuum, cabä Dios hajxy nmøødhíjtämät tu'ugmädia'agy. Høhndaacäm hajxy jaduhñ y cabä tøyhajt hajxy nnä'ägädä møødhájtäm.

Jaanä jaduhñduhmä, coö hajxy nnä'a mänáanämät cooc tyijy pojpa cädieey hajxy nga'a møødhájtäm, niwyiinhøhnäm hajxy jaduhñ,

¹⁰ y cabä Dios miädia'agy hajxy nmøødhájtäm, ja'a tøyhajt. Coö hajxy jaduhñ nmänáanämät, jaduhñ yajmadowa'añ cooc tyijy ja'a Dios yhøhnda'agy. Hix, je'e jaduhñ mänaamb coö pojpa cädieey hajxy nmøødhájtäm.

2

¹ Mägu'ughajpädøjc, cáboch njoot chocy coö hajxy haxøøg mjatcø'øwät. Páadyhøch mijts hädaa nocy nyajnäjaayø'øy. Coö pøñ jaduhñ jiatcø'øwät, nähgapxtu'udøøjöp je'e Jesucristäm jim maa Diosän. Cabä Jesucristo pojpa cädieey mänaa miøødä.

² Tøø ja'a nbojpa ngädieey hajxy xñähho'túutäm nägøxiä hädaa yaabä naaxwiin.

³ Coö hajxy ngudiúunämät nebiä Dios hajxy xyhanéhäm, mänitä tøyhajt hajxy nmøødhájtämät coö je'e hajxy nhixyhájtäm.

⁴ Pøñ jaduhñ nä'a mänaamb: "Nhixyhájpjøch je'e", hoy quia'a ja cudiuñ, høhndaacp je'eduhñ. Hix, ja'a Diosmädia'agy je'eduhñ quia'a tsojpy. Tøyhajt je'e.

⁵ Pero pøñ jaduhñ cudiuumb, cähxø'p jaduhñ coö ja'a Dios jiaanç tehñ jiahmiech. Jaduhñ hajxy nyajnajuøøyyämät coö hajxy nmøødhíjtäm tu'ugmädia'agy.

⁶ Pøñ jaduhñ mänaamb coö ja'a Dios miøødhity tu'ugmädia'agy, tsipcøxp wiädítät nebiä Jesucristo hijty wiäditiän.

⁷ Hädaa mädiä'agyhøch chamñ nyajnähixøøbiä, tøø hajxy hijty mmädoy mänaa hajxy mmäbøjtsooñän.

⁸ Pero hädaa mädia'agy jaduhñ, jaduhñ mäwínäts hädaa nebiä hawiinjemybiän. Hix, jaduhñ hajxy mniçocy mnibia'häyoyii nebiä Jesucristo hajxy xchøjcäm. Tøyhajt jaduhñ. Coö ja'a Jesucristo yaa tøø yhoy hädaa yaabä naaxwiin, mänitä homiädia'agy hajxy xyajwiinjuøøyyänä. Cab hajxy jaduhñ nwädíjtänä hagoodstuum.

⁹⁻¹¹ Pøñ ja'a y'hermano tsojp pa'häyoob, hoyyä Diosmädia'agy jaduhñ quiudiuñ. Coö hajxy jaduhñ ngudiúunämät, cab hajxy ngädiéhyämät. Pero pøñ ja'a yhermano mähanhajp, hoy jia mäna'añ cooc tyijy quiudiuñ ja'a Diosmädia'agy, je'enä wiädity hagoodstuum. Jaduhñ wiädity nebiä wiindspän. Cab jaduhñ ñä'ägä niyaghoyø'øyii.

12-14 Hermanodøjc, mǐjtshøch hädaa nocy nyajnäjaayøøby. Mhixyhajpiä Dios hajxy, ja'a nDeedyhǎjtäm. Jaaya'ay ja'a nbojpa ngädieey hajxy tøø xyajnähwáatsäm je'eguiøxpä coo ja'a Jesucristo hajxy tøø xñähho'túutäm. Mijts majjäya'adiøjc, mhixyhajpiä Jesucristo hajxy jaduhñ. Jiyyäm jaaya'ay hñajty mänaa hädaa yaabä naaxwiin yhawijy tiøø'xta'aguiän. Y mijts muutsc-häna'c-hajxy, xmioobiä Dios ja'a mäjaa hajxy coo ja'a Diosmädia'agy hajxy tehngajnä mbanøcxy. Cabä møjcu'ugong hajxy tøø myajmäjäda'agy.

15 Cabä mjoot hajxy mbädá'agät hädaa yaabä naaxwiin. Coo pøn jaduhñ piädá'agät, cabä Dios hoy jiahmiédsät, ja'a nDeedyhǎjtäm.

16 Ja'a møjcu'ugong jaduhñ mänaamb coo hajxy cøxiä wiinä nhadsójcämät hädaa yaabä naaxwiin, ja'a haxøøgpä. Jaanä jaduhñ miänaambä coo hajxy nyajcumáyyämät. Pero cabä Dios jaduhñ miäna'añ.

17 Cuhdägoyyaamb hädaa yaabä naaxwiin møødä haxøøgpä yaabä. Pero pøn cudiumb nebiä Dios miäna'añän, cab jaduhñ mänaa quiuhdägoyya'añ. Jim yhida'añ maa ja'a Diosän cøjxta'axiøø.

18 Hoorä, habáatnäp jaduhñ coo ja'a naaxwiimbä wyiimbida'añ. Tøø hajxy mmädoyhaty coo ja'a Cristo miädsip quiähxø'øga'añ. Y tøø ja'a miädsiphajxy may quiähxø'øgy. Jaduhñ hajxy nyajnajuøøyyäm coo yhabaatnä.

19 Xmiøødhǎjtäm ja'a Cristo miädsiphajxy hijty. Pero coo hajxy tøø xpuihwáatsäm, cähxø'p jaduhñ coo hajxy hijty tehñ tøyhajt xquia'a møødhǎjtäm hamuumdu'joot. Coo hajxy häxøpy hijty xmiøødhǎjtäm, cab hajxy häxøpy tøø xpuihwáatsäm.

20-21 Pero mijts, ja'a Jesucristo hajxy tøø xyajnäguexy ja'a Dios yhEspíritu. Mmøødhajpiä tøyhajt hajxy jaduhñ cøxiä. Paady mijts hädaa nocy nyajnäjaayøøy. Y mnajuøøby hajxy coo ja'a tøyhajt hajxy quia'a møødä, ja'a häna'c hønndaacpähajxy.

22 Je'eduhñ ñänøømby, pøn jaduhñ mänaamb cooc tyijy ja'a Jesús tøø quia'a quexyii ja'a Diósäm. Ja'a Cristo miädsip je'e, pøn jaduhñ ca'a capxpaatp ja'a Dios møødä yHuung.

23 Pønä Dios yHuung jaduhñ capxpáatäp, miøødhijpiä Dios je'e. Pero pønä yHuung jaduhñ ca'a capxpáatäp, cabä Dios jaduhñ miøødhity.

24 Mgudiúnäp ja'a Diosmädia'agy hajxy tehngajnä neby hajxy mbanøcxtsohñän. Coo hajxy jaduhñ mgudiúnät, mänitä Dios hajxy tehngajnä mmøødhídät tu'ugmädia'agy møødä yHuung.

25 Y cøjxta'axiøø hajxy xyagjugyhadáañäm neby je'e jiugyhatiän neby hajxy tøø xya-jwiinwaanøøyyäm.

26 Naxy hajxy mdehm wyiinjuø'øwät coo mijts ja'a Cristo miädsiphajxy xjia wi'i wyiinhøøna'añ.

27 Mijts, cabä yajnähixøøbiä hajxy myajmaajiaty. Mmøødhajpiä DioshEspíritu hajxy. Xyajnähixøøbiä tøyhajt hajxy cøxiä. Cab yhøhnda'agy. Mmøødhídäp hajxy jaduhñ tu'ugmädia'agy neby hajxy tøø xyajnähixøøyän.

28 Hoorä, tu'ugmädia'aguiä Jesucristo hajxy mmøødhijnät neby hajxy jaduhñ mga'a tsähdiúnät coo quiädaactägátsät.

29 Mnajuøøby hajxy coo ja'a Jesucristo pojpa cädieey quia'a møødä. Jaduhñ hajxy mnajuøøbiät coo ja'a Dios yhuunghaty pønjaty hoy wädijp.

3

1 Xjiaançh tehñ chójcäm ja'a Dios hajxy. Hamuumdu'joot hajxy xyhuunghǎjtäm. Tøyhajt jaduhñ. Pero cabä jäya'ay hajxy xñajuøøyyäm coo ja'a Dios hajxy xyhuunghǎjtäm. Hix, cabä Dios hajxy yhixyhaty.

2 Hoorä, tøø ja'a Dios hajxy xyhuunghǎjtäm. Cahnä yajnajuø'øy neby hajxy xyaghidáañäm. Pero coo ja'a Jesucristo quiädaactägátsät, nnajuøøyyäm hajxy coo hajxy jaduhñ nhidáañäm neby je'ejän. Nhixáañäm hajxy jaduhñ neby jaduhñ yhitiän.

3 Pøn hamuumdu'joot mäbøjp, hoy jaduhñ wiädity nebiä Jesucristo hoy yhitiän.

⁴ Pøñ haxøøg jatcøøby, cabä Diosmädia'agy quiudiuñ. Je'e jaduñ xøhajt ja'a haxøøgpä coo ja'a Dios miädia'agy mga'a cudiuñät.

⁵ Paadiä Jesucristo yaa tøø yhoy hädaa yaabä naaxwiin nebiä nbojpä ngädieey hajxy xyajnahwáatsämät. Pero cab jaaya'ay pojpä cädieey ñä'ägädä møødä. Tøyhajt jaduñ.

⁶ Pøñä Jesucristo tu'ugmädia'agy møødhijp, cab jaduñ haxøøg jiatcø'øy. Pøñ jaduñ jatcøøby, cabä Jesucristo miädia'agy ñä'ägädä mäbøjcä.

⁷ Mägu'ughajpädøjc, cab hajxy myajwiinhøønät. Pøñ hoy wädijp, cabä pojpä cädieey ñä'ägä møødä, nebiä Jesucristo quia'a møødän.

⁸ Pøñ hoy ca'a wädijp, pianøcxäp je'e ja'a møjcu'ugongä miädia'agy. Homiänaajä ja'a møjcu'ugong haxøøg jiatcø'øy. Mänit jiatcøøchøhñ mänaa hädaa yaabä naaxwiin yhawijy tiøø'xta'aguiän. Paadiä Dios yHuung yaa tøø yhoy, nebiä møjcu'ugong jaduñ quia'a mäjädá'agät.

⁹ Pøñä Dios tehñ tiøyhajt Teedyhajt, cabä jioot chocy coo jaduñ jiatcø'øwät, je'eguiøxpä coo je'e miøødhidyíjäm ja'a Diósäm. Coö je'e Dyios yhuungä, paady haxøøg quia'a jatcø'øy.

¹⁰ Jaduñ myajnajuó'øwät pøñ Dioshuung. Entonces, pøñ hoy ca'a wädijp, pøñä miägu'ughajpä ca'a tsojp ca'a pa'häyoob, ca'a Dyios je'e yhuungä. Pero pianøcxäp ja'a møjcu'ugongä miädia'agy je'e.

¹¹ Mänaa ja'a Diosmädia'agy hajxy mmäbøjtsooñän, jaduñ hänajty miäna'añ coo hajxy nniçhojc nnibia'häyóowämät. Høxtä jäda'anäbaadyñä jaduñ miäna'aññä. Cab jaduñ mänaa tiägach.

¹² Cab hajxy njatcøøyyämät nebiä Caín jecy jiatcøøyyän coo yhamdsoo puhya'ay yagho'cy. Paady jaduñ yagho'cy coo howyiinmahñdy hänajty quia'a møødä, nebiä piuhya'ay howyiinmahñdy hänajty miøødän. Hix, pianøcxäp ja'a møjcu'ugongä miädia'agy hänajty je'e.

¹³ Entonces, hermanodøjc, cab hajxy myagjuó'øwät coo häna'c hajxy xmiähanhajtäm.

¹⁴ Højtshajtäm, cøjxta'axiøø hajxy jim nhidáanäm tsajpootyp. Cab hajxy mänaa jiiby nhäda'agø'øwáanäm haxøøgtuum. Nmøødhajtäm ja'a tøyhajt hajxy jaduñ je'eguiøxpä coo hajxy hamiñ haxøpy nniçhojc nnibia'häyóowäm. Pøñä miägu'ughajpä ca'a tsojp ca'a pa'häyoob, je'eds jiiby häda'agø'øwaamb haxøøgtuum.

¹⁵ Pøñä miägu'ughajpä mähanhajt, jaduñä wyiinmahñdy je'e nebiä jäya'ay-yagho'pan. Y cabä jäya'ay-yagho'pähajxy cøjxta'axiøø jiugyhada'añ nebiä Dios jiugyhatiän. Tøyhajt jaduñ.

¹⁶ Coö ja'a Jesucristo hajxy tøø xñähho'túutäm, jaduñä tøyhajt hajxy nmøødhajtäm coo ja'a Dios hajxy xjiaanç tehñ chójcäm. Hawiinmats hit jaduñ coo hajxy hamiñ haxøpy nniñähho'túutämät.

¹⁷ Coö ja'a mäyøøjäya'ay ja'a häyoobä quia'a näxúudsät, cab jaduñ quiudiuñ nebiä Dios hajxy xyhanéhmäm coo hajxy hamiñ haxøpy nniçhojc nnibia'häyóowämät.

¹⁸ Mägu'ughajpädøjc, tsøgxä hajxy hamuumdu'joot niñäxúu'tsä. Jaduñ hajxy nyajcähxø'cämät coo hajxy hamuumdu'joot nniçhojc nnibia'häyóowäm. Coö hajxy nga'a niñäxúu'tsä, cab jaduñ tiuna'añ coo hajxy nja mänáanämät cooc tyijy hajxy nniçhojc nnibia'häyóowäm.

¹⁹ Hermanodøjc, coö hajxy hamuumdu'joot nniçhojc nnibia'häyóowämät, jaduñä tøyhajt hajxy nmøødhajtäm coo ja'a Dios hajxy xyhuunghajtäm.

²⁰ Y coö ja'a njoothajxy hamdsoo miänáanämät cooc tyijy hajxy hoy nga'a jäya'ayhajtäm, tsipcøxp ja'a Diosmädia'agy hajxy nmäbøjcämät. Cabä nhamdsoo wiinmahñdyhajxy nyajcopcøøyyämät. Hix, xjiødhíxäm ja'a Dios hajxy. Cøxiä hajxy xñajuóøyyäm.

²¹ Y coö ja'a njoothajxy waamb quia'a mänáanämät, jaduñä tøyhajt hajxy nmøødhajtäm coo ja'a Dios hajxy xyhuunghajtäm.

²² Xmióoyyäm ja'a Dios hajxy tijaty hajxy nmäyujwáañäm, je'eguiøxpä coo hajxy ngudiúunäm nebiaty hajxy xyhanéhäm. Paady hajxy xquiumáayyäm.

²³ Jaduhnä Dios hajxy xyhanéhäm coo ja'a yHuung Jesucristo miädia'agy hajxy nmäbójcämät, coo hajxy hamiñ haxøpy nniçhojc nnibia'häyóowämät, nebiä Jesucristo hajxy hamdsoo tøø xyajwiingapxóoyyäm.

²⁴ Pønä Dios miädia'agy cudiúunäp, tu'ugmädia'aguiä Dios jaduñ miøødhity. Y jaduñä tøyhajt hajxy nmøødhájtäm coo ja'a Dios hajxy tu'ugmädia'agy xmiøødhájtäm, je'eguiøxpä coo ja'a yhEspíritu hajxy tøø xyajnäguéjxäm. Ja'a yhEspirituhaam hajxy xyhawáañäm coo hajxy tu'ugmädia'agy xmiøødhájtäm.

4

¹ Hermanodøjc, nämayyä høhndaacpähajxy jii wiädity. Cabä tøyhajt pä hajxy ñä'ägädä yecy. Entonces, cabä hoñä'ä mädyii mädia'aguiä hajxy mmäbógät nä'ä nägoobä. Pero jawyiin hajxy mhuuc mädia'agyhíxät pø Diosmädia'agy jiaançh møød.

² Jaduhnä tøyhajt hajxy mmøødhádät pø Diosmädia'agy jiaançh møød. Pø mänaamb jaduñ cooc ja'a Dios yHuung Jesucristo tøø jiaançh jäya'ayhaty hädaa yaabä naaxwiin, pues Diosmädia'agy jaduñ jiaançh møød.

³ Pero pø cab jaduñ miäna'añä, cabä Diosmädia'agy miøødä. Ja'a Jesucristo miädsip miädia'agy jaduñ. Tøø hajxy mmädoyhaty coo ja'a miädsip yaa quiähxø'øga'añ hädaa yaabä naaxwiin. Bueno, yaadsä miädia'agy jaduñ wiädijnä hädaa yaabä naaxwiin.

⁴ Pero mijts, ja'a Dios hajxy xyhuunghajp. Tøø hajxy mga'a yajmäjäda'agy ja'a häna'c yø'øduhmbä høhnda'agymiädia'agy yajwädijpä. Hix, maas mäjaamøødä Dios quejee ja'a møjcu'ugong miøødä, ja'a yaa hanehmbä hädaa yaabä naaxwiin.

⁵ Yø'ø høhndaacpähajxy jaduñmbä, ja'a møjcu'ugong miädia'agy hajxy quiudiúunäp; paadiä møjcu'ugongä miädia'agy hajxy miädiaacä. Y paadiä miädia'agyhajxy yaa yaj-copcóoyyaxä hädaa yaabä naaxwiin.

⁶ Pero højts, ja'a Dios hajxy xyhuunghájtäm. Y cab pøn nmädia'agyhajxy xyaj-copcø'øwáañäm. Jagooyyä hajxy yajcopcø'øwa'añ pønä Diosmädia'agy mäbøjp. Jaduhnä tøyhajt hajxy nmøødhájtäm pøn tøyhajt Dioshuung. Pønä nmädia'agyhajxy xyaj-copcóoyyäm, Dioshuung je'e. Pøn jaduñ xquia'a mädoowäm, ja'a møjcu'ugongä miädia'agy jaduñ quiudiúunäp.

⁷ Hermanodøjc, tsøg hajxy tehngajnä niçhojc nibia'häyóowäm hamiñ haxøpy, je'eguiøxpä coo ja'a Dios hajxy xchójcäm.

⁸ Pero pøn xquia'a tsojc xquia'a pa'häyóowäm, cabä Diosmädia'agy miäbøcy. Xchójcäm ja'a Dios hajxy jaduñ. Jaduhnä miäna'añ coo hajxy nniçhojc nnibia'häyóowämät.

⁹⁻¹⁰ Coo ja'a Dios hajxy xchójcäm, paadiä Dios ja'a yHuung Jesucristo hajxy yaa tøø xyajnäguéjxäm hädaa yaabä naaxwiin, neby hajxy jaduñ xñähho'túutämät ja'a nboj pä ngädieyhájtäm, neby hajxy jim nhíjtämät tsajpootyp cøjxta'axiøø. Ca'a jie'eguiøxpä coo ja'a Dios hajxy njahmiéjtsäm.

¹¹ Coo ja'a Dios hajxy xjiaançh tehñ chójcäm, paady hajxy hamiñ haxøpy nniçhojc nnibia'häyóowämät.

¹² Tøyhajt jaduñ, cabä Dios mänaa yhixyii. Pero cab jaduñ ñejpiä. Hoyyä Dios hajxy mänaa nga'a híxäm, coo hajxy hamiñ haxøpy nniçhojc nnibia'häyóowämät, jaduñä tøyhajt hajxy nmøødhájtäm coo ja'a Dios hajxy homiänaajä xcwieendähájtäm. Y coo ja'a Dios hajxy xchójcäm, maas hoy hajxy nniçhojc nnibia'häyóowäm.

¹³ Bueno, coo ja'a Dios ja'a yhEspíritu hajxy tøø xmióoyyäm, jaduñä tøyhajt hajxy nmøødhájtäm coo hajxy nmøødhájtäm tu'ugmädia'agy.

¹⁴ Y hamdsoo ja'a Jesucristo hajxy tøø nhíjxäm mänaa ja'a Dios yaa tøø quiexiän, mänaa hajxy tøø xñähho'túutäm. Tøyhajt jaduñ.

15 Pøñ jaduñ mänaamb cooc ja'a Jesucristo Dyioshuungä, tu'ugmädia'agy ja'a Dios jaduñ miøødhity.

16 Jaduñä tøyhajt hajxy nmøødhájtäm coo ja'a Dios hajxy xchójcäm. Nmäbójcäm hajxy jaduñ. Xchójcäm ja'a Dios hajxy jaduñ, paadiä Dios tu'ugmädia'agy miøødhity pøn homiänaajä jahmiejtsp ja'a Dios.

17 Coo ja'a Jesucristo hajxy xchójcäm, maas hoy hajxy nniçhojc nnibia'häyóowämät hädaa yaabä naaxwiin. Y coo hajxy jaduñ nniçhojc nnibia'häyóowämät, cab hajxy jaduñ ndsähgøøyyämät mänaa ja'a Jesucristo min chaaçhtiuna'añän ja'a hajxy ca'a mäbøjpä.

18 Pønä Dios hamuumdu'joot ca'a jahmiejtsp, tsähgøøby je'eduhñ je'eguiøxpä coo yajcumädowa'añii. Pero coo ja'a Dios hajxy hamuumdu'joot njahmiéjtsämät, cab hajxy jaduñ nnä'ägä tsähgøøyyämät. Hix, pøn jaduñ tsähgøøby, cähxø'p jaduñ coo ja'a Dios hamuumdu'joot quia'a jahmiech.

19 Jayøjpä Dios hajxy xchójcäm, paady hajxy jaduñ njahmiejtstägájtsäm.

20 Pøn jaduñ nä'a mänaamb: "Njahmiéjchpøçhä Dios", hoyä miägu'ughajpä jia mähanhaty, høhndaacp je'eduhñ. Pø cabä yhamdsoo mägu'ughajpä ñä'a tsocy ñä'a pa'häyoy, cabä Dios hoy jiahmiédsät. Haa ca'a, yhiixypä miägu'ughajpä homiänaajä, pero cabä Dios mänaa yhiixy.

21 Hamdsoo ja'a Dios hajxy xyhanéhäm coo ja'a nmägu'ughajpä hajxy ndsojc nba'häyóowämät, jaduñ mäwínäts nebiä Dios hajxy njahmiéjtsäm.

5

1 Pøn jaduñ mäbøjp coo ja'a Jesucristo Dyiosquexiä, miäbøjpiä Diosmädia'agy je'e. Y pønä Dios jaduñ jahmiejtsp, chojpy pia'häyooby je'e pønatiä Diosmädia'agy mäbøjp.

2 Coo ja'a Dios nDeedyhájtäm hajxy njahmiéjtsäm, coo ja'a miädia'agy hajxy ngudiúunäm, jaduñä tøyhajt hajxy nmøødhájtäm coo hajxy nniçhojc nnibia'häyóowäm, je'eguiøxpä coo ja'a Dios hajxy xyhuunghájtäm.

3 Coo ja'a Dios hajxy njahmiéjtsäm, je'eduhñ ñänøømby coo ja'a miädia'agy hajxy ngudiúunäm. Y cabä Dios tsipjaty yhane'emy.

4-5 Coo ja'a Dios hajxy xyhuunghájtäm, coo ja'a miädia'agy hajxy nmäbójcäm, paadiä møjcu'ugong hajxy jaduñ nga'a yajmäjädáacäm, je'eguiøxpä coo hajxy nmäbójcäm coo ja'a Jesucristo Dyioshuungä.

6 Tøyhajt jaduñ coo ja'a Jesucristo ñäbejty. Jaanä tøyhajt jaduñmä coo yho'cy cruzcøxp.

7 Jaduñä Dioshespíritu miäna'añ cooc ja'a Jesucristo Dyioshuungä, y cabä Diosh-espíritu mänaa yhøhnda'agy.

8 Coo ja'a Jesucristo jaduñ ñäbejty, coo yho'cy cruzcøxp, y coo ja'a Dioshespíritu jaduñ miäna'añ, jaduñä tøyhajt hajxy nmøødhájtäm coo ja'a Jesucristo Dyiosquexiä.

9 Maas tsoobaatpä Dios ja'a miädia'agy quejee ja'a jäya'ay ja'a miädia'agyhajxy. Y jaduñä Dios miäna'añ cooc ja'a Jesucristo yHuunghaty.

10 Pønä Jesucristo miädia'agy mäbójcäp, miøødä tøyhajt jaduñ coo ja'a Jesucristo Dyioshuungä. Hix, ja'a Dios jaduñ hawáañäp. Pero pønä Dios ja'a miädia'agy ca'a mäbójcäp, jaduñ je'e miäna'añ cooc tyijy ja'a Dios yhøhnda'agy. Hix, cabä Dios ja'a miädia'agy miäbójcäxä coo ja'a Jesucristo yHuunghaty.

11 Paadiä Dios hajxy tøø xpiädáacäm hawa'adstuum coo ja'a Jesucristo hajxy tøø xñähho'túutäm. Paady hajxy jaduñ njugyhadaañäm nebiä Dios jiugyhatiän cøjxta'axiøø. Tøyhajt jaduñ. Ja'a Dios jaduñ mänaamb.

12 Pønä Dioshuung ja'a miädia'agy mäbójcäp, hodiium je'eduhñ yhity. Cøjxta'axiøø jiugyhada'añ nebiä Dios jiugyhatiän. Pero pøn jaduñ ca'a mäbøjp, cab jaduñ jiugyhada'añ nebiä Dios jiugyhatiän.

¹³ Mijts, mmäbójcäp ja'a Dioshuungä miädia'agy hajxy. Mijtshech hädaa nocy nya-jnäjaayøøby nebiä tøyhajt hajxy jaduhñ mmøødhát coo hajxy hodium mhity, coo hajxy mjugyhada'añ nebiä Dios jjugyhatiän cøjxta'axiøø.

¹⁴ Coo ja'a Dios hajxy tu'ugmädia'agy nmøødhítämät, jaduhñä tøyhajt hajxy nmøødhítäm coo hajxy xmiädóowämät coo hajxy tijaty nmäyujwáanämät.

¹⁵ Paadiä tøyhajt hajxy jaduhñ nmøødhítäm coo hajxy xmio'owáanäm.

¹⁶⁻¹⁷ Ja'a häna'c-hajxy haxøøgwädijpä, haagä haxøøgtuum hajxy ñøcxø'øwa'añ. Y pø miøødä mmägu'ughajpä pojpä cádieey, mmänuu'xtá'agäp ja'a Dios coo ween ya-jnähwa'açhii. Pero coo ja'a mmägu'ughajpä ja'a Diosmädia'agy tehngajnä quia'a mäbógät cøjxta'axiøø, haxøøgtuum jaduhñ ñä'ägä hídät; y cabä piojpä quiädieey mänaa ñähwáatsnät. Y cabä Dios mmänuu'xtá'agät coo ja'a mmägu'ughajpä yajnähwa'adsóøjät, je'eguiøxpä coo ja'a yhamdsoo wiinmahñdy jaduhñ yajtuñ.

¹⁸ Pønä Dios Teedyhajp, cab jaduhñ mänaa yhaxøøghäna'c-haty. Cueendähajtäp je'eduhñ ja'a Jesucristäm, ja'a Dioshuung. Cabä Jesucristo ja'a møjcu'ugong jaduhñ mänaa yajmäjäda'agy. Tøyhajt jaduhñ.

¹⁹ Jaduhñä tøyhajt hajxy nmøødhítäm coo ja'a Dios hajxy xyhuunghítäm. Pero pønä Dios ca'a Teedyhajp, tøø quia'a yajmäjäda'agyijäm ja'a møjcu'ugóngäm.

²⁰ Jaanä nmøødhítäm ja'a tøyhajt hajxy jaduhñbä coo ja'a Jesucristo ja'a Dioshuung hajxy hoy tøø xyajnähixøøyyäm ja'a Diosmädia'agy, coo hajxy jaduhñ nmäbójcämät coo ja'a Dios tiu'ugä. Y tu'ugmädia'aguiä Dios hajxy nmøødhítäm møødä yHuung Jesucristo. Hodium hajxy tøø xpiädáacäm. Cøjxta'axiøø hajxy njugyhadaänäm nebiä Dios jjugyhatiän.

²¹ Mägu'ughajpädøjc, cab hajxy tii mwiingudsähgø'øwät, ni quepycheck, ni naaxpoch, ni tii. Jagoo ja'a Dios hajxy mwiingudsähgø'øwät, ja'a jim hijpä tsajpootyp. Amén.

2 Juan

¹ Juánhøch nxøhaty. Høøch hädaa nocy nhädiuumby møød hajxy nägøxiä ja'a tøyhajtmøødpä. Míjtshøch hädaa nocy nyajnájaayøøby pønhatiä Dios tøø wyiimbiy, pønhatiä Diosmädia'agy mäbøjp. Tøyhájthøch mijts ndsocy nba'häyoy,

² je'eguiøxpä coo ja'a tøyhajt hajxy nmøødhájtäm. Cøjxta'axiøø hajxy jaduhñ nmøødhadäänäm.

³ Weenä Dios nDeedyhájtäm hoyhajt weenhajt hajxy xmióoyyäm møødá yHuung Jesucristo. Nmøødhájtäm ja'a tøyhajt hajxy jaduhñ. Hamiñ haxøpy hajxy jaduhñ nniçhojc nnibia'häyóowäm.

⁴ Jootcújc-høch nnijiäwø'øyii coo ja'a tøyhajt hajxy näje'e mjaançh panøcxy nebiä Dios hajxy tøø xyhanéhäm.

⁵⁻⁶ Hoorä, hermanodøjc, tsøg hajxy niçhojc nibia'häyóowäm nebiä Dios hajxy tøø xyhanéhäm. Coo hajxy jaduhñ ngudiúunämät, cähxø'p jaduhñ coo ja'a Dios ja'a miädia'agy hajxy njaançh mäbøjcäm.

⁷ Nämayyä høhndaacpähajxy yaa wiädity hädaa yaabä naaxwiin. Cab hajxy jaduhñ miäna'añ cooc tyijy ja'a Jesucristo hoy tøø jiäya'ayhaty hädaa yaabä naaxwiin. Ja'a mõjcu'ugongä wyiinmahñdy hajxy miøødhájtäp; ja'a Jesucristo miädsip je'e.

⁸ Mnigwieendähadøøjöp hajxy. Cabä høhndaacpä miädia'agy hajxy mmäbøjcät coo ja'a tøyhajt hajxy mnä'ä najtshixø'owät, nébiøch mijts tøø nyajnáhixø'øyän. Coo ja'a høhndaacpä miädia'agy hajxy jaduhñ mga'a mäbøjcät, xpiädá'agöp ja'a Dios hajxy hodi-uum. Cøjxta'axiøø hajxy jim mhídät tsajpootyp.

⁹ Pønä Jesucristo miädia'agy najtshixøøyyöp, cabä Dios tu'ugmädia'agy miøødhity. Pero pøn jaduhñ ca'a najtshixøøby, tu'ugmädia'agy ja'a Dios miøødhity møødá yHuung Jesucristo.

¹⁰ Homiädyii yajnáhixøøbiä hajxy myajtøjtägø'owät coo jim miédsät maa ja'a mjøøn maa ja'a mdøjc-hajxiän. Pero coo miäná'anät cooc tyijy ja'a Jesucristo miädia'agy quia'a tøyyä, cab hajxy myajtøjtägø'owät, ni mga'a yajpó'xät hajxy,

¹¹ coo ja'a cu'ug jaduhñ ñä'ä mäná'anät cooc tyijy myiich mjamiøød je'eduhñä, cooc tyijy miich jaduhñ mbayajnáhixøøbiä.

¹² Madiú'ujøch mijts nja hawaanäänäm, pero cábøch njaayaannä. Ja wi'i chójpiøch njoot jaduhñ coøch jim nnøcxät maa mijtsän. Mänit hajxy haawhaam nmädiáacämät; jaduhñ hajxy maas jootcujc nhíjtämät.

¹³ Xyajpoo'xp mijts ja'a hermanodøjc-hajxy yaabä. Tøø hajxy je'e wyiimbíiwäbä ja'a Diósäm. Amén.

3 Juan

¹ Juánhøch nxøhaty. Mägu'ughajpä Gayo, míichhøch hädaa nocy nyajnájaayøøby. Tøyhájthøch miích ndsocy nba'häyoy.

² Ween miíchä Dios hoyhajt weenhajt xmio'oy. Nnajuóøbiøch jaduhñ coo miích hoy mwädity.

³ Tøøchä hermanohajxy hoy näje'e xyhawaanä coo miíchä Diosmädia'agy hamuumdu'joot mbanøcxy. Páadyhøch jootcujc nnijiäwø'øyii.

⁴ Cooch nmädoyhaty cooch njamiøødä Diosmädia'agy hajxy hamuumdu'joot pianøcxy, jaanç tehñ xioonäacpøch jaduhñ.

⁵ Hoy miíchä Diosmädia'agy mgudiuñ coo ja'a hermanohajxy mbuhbety, ja'a hajxy jäguemgajpt-tsohmä.

⁶ Tøø hajxy nägapxy maa ja'a tsajtøjcän coo miích hajxy mjaanç tehñ chocy mjaanç tehñ pia'häyoy. Y coo hajxy hänajty jiaac tu'ubøgaanä, mmó'owäp hajxy tijaty hajxy hänajty yajmaajiajpy.

⁷ Hix, ja'a Jesucristocøxpä hajxy wiädity. Ja'a Diosmädia'agy hajxy yajwa'xyp. Y cab hajxy tii miäyujwa'añ ja'a Diosmädia'agy hajxy ca'a panøcxpä.

⁸ Paady jaduhñ yhahixø'øy coo ja'a hermano hajxy nbuhbéjtämät; jaduhñ hajxy hoy nmøødtúunämät maa ja'a Diostuung jaduhñ myiñän.

⁹ Tøøchä hermano nocy hajxy tu'ug nja yajnäjaayø'øy, pero cábøchä Diótreres nmädia'agy xquiudiunaanä, je'eguiøxpä coo ja'a yhamdsoo mädia'agy jaduhñ yaj-tuna'añ maa ja'a hermanohajxiän.

¹⁰ Haxøøgjátyhøch naxy xñänømy. Y maas haxøøg jaduhñ jiatcø'øy coo ja'a hermano cuhdujt hajxy quia'a mo'oy coo hajxy jiøjpøgø'øwät ja'a Diosmädia'agy hajxy yajwa'xpä. Y coo pøñ hänajty jiøjpøgø'øwa'añ, mänitä Diótreres miäna'añ coo yajpädsøømänät maa ja'a tsajtøjcän. Cooch jimñ nnøcxät maa mijtsän, mänitøch ngøxy nägäpxät nebiaty jiatcø'øy.

¹¹ Miích mägu'ughajpä, cab jaduhñ mänaa mbajatcø'øwät. Pøñ jaduhñ jiatcøøby, cabä Diosmädia'agy miäbøcy. Pero pøñ hoy wädijp homiänaajä, miäbøjpiä Diosmädia'agy je'e. Jaduhñ miích mbahíxät.

¹² Pero ja'a Demetrio, cab jaduhñ jiatcø'øy nebiä Diótreres jiatcø'øyän. Tøyhajtä Demetrio ja'a Diosmädia'agy pianøcxy hamuumdu'joot. Cumáayyäp jaduhñ nägøxiä, y ngumäabiøch høøchpä. Mnajuøøby miích jaduhñ coochä tøyhajt nmøødä.

¹³ Madiú'ujøch miích nja hawaanäänäm. Pero cábøch njaayaannä.

¹⁴ Chójpøch njoot jaduhñ cooch jimñ nnøcxät maa miíchän. Mänit haawhaam nmädiäacämät.

¹⁵ Ween miích jootcujc mmähmø'øy. Xyajpoo'xp miích ja'a mmägu'ughajpähajxy yaabä. Tunä mayhajt, yajpó'xäc højts nmägu'ughajpähajxy jimä nägøxiä.

Judas

¹ Høøch xøhajt Judas. Ja'a Jesucristøch ja'a tiuung ndúunäp. Høøch nbuhya'ay je'e ja'a Jacobo. Míjtshøch hädaa nocy nyajnäjaayøøby. Tøø højts ja'a Diosteedy xyajnähdíjjäm coo ja'a miädia'agy nmäbøjcämät. Xchøjcäm hajxy jaduhñ. Tu'ugmädia'agy hajxy xyaghíjtäm møødä Jesucristo.

² Ween mijts ja'a Dios hoyhajt weenhajt xmio'oy tehngajnä. Tsøg hajxy jahmiéjtsäm coo ja'a Dios hajxy xchøjcäm tehngajnä.

³ Mägu'ughajpädøjc, jadúhñhøch mijts hijty nyajnäjaayø'øwa'añ coo ja'a Jesucristo hajxy tøø xñähho'túutäm. Pero maas hawiinmats jaduhñ cooch mijts nmänuu'xtá'agät coo ja'a Diosmädia'agy hajxy tehngajnä mbanøcxät, nebiä Dios hajxy tähoocmo'oyyá tøø xmióoyyäm. Cab hajxy myajwiinhøønät.

⁴ Hix, ja'a häna'c høhñdaacpähajxy, hamee'ch hajxy näje'e tøø yajtägø'øwø'øy. Ja'a Diosmädia'agy jecy mänaañ cooc ja'a høhñdaacpähajxy quiumädowa'añ. Jaduhñ hajxy yhøhñda'agy, cábac jaduhñ tyijy ñejpiä coo mhaxøøgwädítät, hoyyá Dios ja'a mbojpa mgädieey tøø xjia yajnähwaatsä. Cabä Jesucristo hajxy quiapxpaatnä, ja'a nWiindsønähájtämbä. Tu'uquiä Jesucristo hajxy nWiindsønähájtäm.

⁵ Mnajuøøby hajxy jaduhñ, hoy ja'a Dios ja'a judíos jim jia woobädsøømy Egipton-aaxooty, mänit yajcuhdägoonä pønjaty hänäjty ca'a mäbøjp. Mjahmiédsäp hajxy jaduhñ cøxiä.

⁶ Haa ja'a Diosmoonsähajxiä, coo hajxy jim näje'e chohñ tsajpootyp maa ja'a Dios hänäjty tøø piäda'aguiän, paady hajxy jiiby quiejxä tsumyçhänäabiä hagoonstuum ja'a Diósäm, høxtä coo yhabáadät coo hajxy hänäjty yajcumädowa'añíjjäm ja'a Diósäm.

⁷ Høxtáhmäts ja'a jecyjiäya'ayhajxy jiajty, ja'a hajxy hijty jim jegyhajty tsänaabiä maa ja'a cajpt hijty xiøhatiän Sodoma møødä Gomorra, møødä jimhä ja'a cajpt mäwiingonhä. Coo hajxy jiaançh tehñ yhaxøøg jiäya'ayhajty, paady hajxy jøønhaam yajcumädoowä ja'a Diósäm. Hix, høxtä ya'adiøjcpaady hajxy hijty yhaxøøgjatcø'øy. Hijxtahnd ja'a Dios hajxy jaduhñ xmióoyyäm.

⁸ Jaduhñä høhñdaacpähajxy jiatcøøbiä. Cabä tøyhajt hajxy miøødä. Haxøøg hajxy wiädity. Cabä Diosmädia'agy hajxy miäbøcy. Haxøøgä Diosmoonsä hajxy ñänømy, ja'a hajxy tsajpootypä.

⁹ Ja'a Diosmoonsä møjhajpä, ja'a xøhajpä Miguel, cabä møjcu'ugong haxøøg ñämaayy mänaa ja'a dijunto Moisés hajxy hänäjty yajtsipta'aguiän. Jagooyyá ñämaayy: "Ja'a Dios xyhójäp."

¹⁰ Pero yø'ø høhñdaacpähajxy, hotyjatiä hajxy haxøøg ñänømy, hoy hajxy tii quia'a ja najuø'øy. Nä'ä nägoobä hajxy jaduhñ jiatcø'øy nebiä animalhajxiän. Paady hajxy quiumädowaannä.

¹¹ Haxøøg hajxy jiada'añ yhabeta'añ, je'eguiøxpä coo ja'a Caín hajxy piahixy piaduñ. Jaduhñä Balaam hajxy piahixpä. Tu'udägooyy ja'a Balaam jecy je'eguiøxpä coo xädø'øñ hänäjty jiaançh tehñ piøcjuø'øy. Yajcumädowáañäp hajxy je'eguiøxpä coo ja'a Dios miädia'agy hajxy quia'a cudiunaanä nebiä Coré jecy quia'a cudiuunän. Yhamdsoo cuhdujt hajxy jia wi'i yaghidaamby.

¹² Jaançh tehñ yhoçhähdiuunnä ja'a høhñdaacpähajxy jiatcø'øy maa mijts ja'a cay ja'a hu'ug myagjadyiijän. Nä'ä pahuuc nä'ä pajøø'xpä hajxy jim miech. Jaançh tehñ jiootmøj hajxy ñibiäda'agyii. Cab hajxy pøn ñä'ägädä wiingudsähgø'øy. Cabä Diosmädia'agy hajxy hoy yajnähixø'øy.

¹³ Jaançh tehñ chähdiuhndägoy hajxy jaduhñ. Coo hajxy tøø tiu'udägoonä, paady hajxy yaghidáañänä cøjxta'axiøø hagoonstuum.

¹⁴ Haa ja'a Enocä, ja'a Adán ja'a yhap yhoc je'e ja'a miäjuxtujcpä. Jecy ja'a Dios ja'a Enoc yajmädiaacy ja'a häna'c hōhndaacpācōxpä. “Huuc mādow, milhaamä Dios ja'a mioonsä miōdcäda'aga'añ.

¹⁵ Cōxáañäm ja'a Dios hajxy xquiōxy yajtōyahjtyegáañäm. Mänit yajcumādowa'añ pōnjaty haxōøg jäya'ayhajp, ja'a Diosmädia'agy hajxy ca'a mǎbōjpä, ja'a Dios hajxy haxōøg nǎnōōmbä.”

¹⁶ Yō'ō hōhndaacpāhajxy, jaanč tehṃ wyiinhec hajxy jaduhṃ. Cab hajxy tii quiumay. Ja'a haxōōgpä hajxy jiaanč tehṃ yhadsojpy. Jaanč tehṃ ñiguiumáayyāp hajxy jaduhṃ. Nǎ'ä mānaamb hajxy jaduhṃ cooc tyijy ja'a jäya'ay hajxy jiaanč tehṃ wyiingudsāhgō'ōy. Paady hajxy jaduhṃ miāna'añ, coo hajxy yajcumaya'añ.

¹⁷ Mǎgu'ughajpādōjc, mjahmiejchp hajxiāda'a coo ja'a nWiindsōñhǎjtām Jesucristo quiuguexyhajxy jāguemiä miānaañ:

¹⁸ “Coo hǎnajty yhabaadaañnä coo ja'a naaxwiimbä hǎnajty wyiimbida'añ, mǎnitä jäya'ay ja'a Diosmädia'agy hajxy näje'e wyiinwoona'añ. Ja'a haxōōgpä hajxy hǎnajty jiaanč tehṃ yhadsoagaamby.”

¹⁹ Jaanč tehṃ chipyajpādō'ōgaamb hajxy maa ja'a hermanodōjc-hajxiän coo ja'a hermanodōjc hajxy tu'ugmädia'agy quia'a híjnät. Haxōōg hajxy jiaanč tehṃ wiädity. Cabä Dioshēpīritu hajxy ñǎ'ägädä mōōdä.

²⁰ Pero mijts mǎgu'ughajpādōjc, tehngajnä ja'a Diosmädia'agy hajxy maas hoy mjaac panōcxät nebiä Dios hajxy tōō xmióoyyām. Mba'yá'axāp ja'a Dios hajxy ja'a yh-Espīritucōxpä.

²¹ Hoyyā Diosmädia'agy hajxy mjaanč tehṃ yajtúnät; mǎnitä Dios ja'a mbojpä mgädieey hajxy xyajnáhwa'ads xyajcuhwá'adsät. Xchójcām hajxy jaduhṃ, paady hajxy xyajnáhwa'ads xyajcuhwa'adsáañäm. Jimä mjoot hajxy mbädáacnät tsajpootyp coo ja'a Jesucristo hajxy jim xyajnōcxáañäm. Jim hajxy xyaghidáañäm cōjxta'axiōō. Hojioot jiaanč tehṃ miōōdhajpy mōōdä hōjtscōxpä.

²² Mjootcapxmōcpōgāp hajxy pōnjaty hamuumdu'joot ca'a mǎbōjp.

²³ Naxiä jäya'ay Diosmädia'agy hajxy mdehm yajmǎbōgät; jaduhṃ hajxy quia'a cá'awät haxōōgtuum. Mnǎxúudsāp hajxy pōnjaty hǎnajty haxōōg wādijp. Pero nägueentä hajxy mmōōdmädiá'agät, neby hajxy jaduhṃ mga'a pahadāgoōñáxät.

²⁴⁻²⁵ Tu'ugä Dios jaduhṃ. Jaaya'ay hajxy xyajnáhwáatsām ja'a Jesucristocōxpä ja'a nWiindsōñhǎjtām. Je'eds mǎjaamōōd neby hajxy jaduhṃ xcwieendähǎjtāmät. Jaduhṃ hajxy nga'a tu'udägóoyyāmät. Wa'ads hajxy jim xyajmedsáañäm tsajpootyp. Mänit hajxy jim nxoōnda'agáañäm. Tsōg hajxy mǎnáañäm cōjxta'axiōō coo ja'a Dios miōjǎ jiaančhǎ. Homiānaajä ja'a cuhdujt jiaanč tehṃ miōōdä. Amén.

Apocalipsis

¹ Hädaa mädia'agy, yu'učh hijty jaduñ yhity. Mänitä Dios ja'a Jesucristo ñajtsapxøøyyä coo ja'a Jesucristo ja'a mioonsähajxy yhawaandägájsät tijaty hánajty mobädajp jadáanáp tunáanáp. Mänitä Jesucristo ja'a quiuguexy jim quiejxtägajch maa ja'a Juangán. Hoy ja'a Juan jaduñ yhawaandägájsäxä.

² Jaduñä Juan yajwiinhijxä. Yyejc ja'a Juan ja'a tøyhajt jaduñ mäduññtiä wyiinhijxy, coo ja'a Diosmädia'agy tiøyyä nebiä Jesucristo hánajty tøø ñägapxiän.

³ Jootcujc hajxy yhity pønjaty hädaa nocy capxp, pønjaty jaduñ mädoob, pønjaty jaduñ hoy cudiuumb nej myiñän cujaay. Hix, mobädajp jaduñ jiada'añii tiuna'añii.

⁴ Høøch Juan hädaa nocy nhädiuumby. Mijts hädaa nocy nyajnäjaayøøby pønjatiä Diosmädia'agy panøcxp jim Asianaaxooty maa ja'a juxtujcpä cajptootypän. Weenä Dios ja'a hoyhajt ja'a weenhajt hajxy xmio'oy. Homiänaajä ja'a Dios ñä'ägädä hity. Y ja'a juxtujcpä juøhñdy jim hijpä Dioswiinduum, jaduñ ja'a hoyhajt ja'a weenhajt hajxy xmioobiä.

⁵ Y ja'a Jesucristo, jaduñ ja'a hoyhajt ja'a weenhajt hajxy xmioobiä. Yejpiä Jesucristo ja'a tøyhajt jaduñ. Jaayá'ayäts jayøjp jujypiøjc. Jaayá'ayäts rey nägøxiä hanehmb. Xhójcäm hajxy jaduñ. Tøø hajxy xñähho'túutäm. Tøø hajxy xyajnahwaats xyajcuhwáatsäm ja'a nbojpa ngädieyhájtäm.

⁶ Jaduñ hajxy tøø xpiädáacäm nebiä reyän, nebiä nähgapxtuutpän; jaduñ ja'a Dios hajxy hoy nmädúunämät. Tsøg hajxy jaduñ cøjxta'axiøø møj jaanč pádáacäm. Amén.

⁷ Huuc mädown hajxy; mobädajp ja'a Jesucristo miänaca'añ jocjooty. Nägøxiä jäya'ayhajxy yhixa'añ, møød hajxy je'e tøøbä miäyaghó'oguiäbä. Coo hajxy jaduñ yhixa'añ, mänitä jäya'ayhajxy nägøxiä jiø'øwa'añ xiuudsa'añ wiinduhmyhagajpt. Tøyhajt jaduñ.

⁸ “Høøch cøxiä nyajtsohndaac. Y høøch cøxiä nyajmayáangombä”, nømä Dios miänaañ. Jaduñ miädia'agytiägø'øy coo ja'a Dios homiänaajä ñä'ägä hity. Ja'a Dios møjcuñdujt cøxiä møød.

⁹ Høøch Juan, haguípxyhøch mijts ja'a Diosmädia'agy nmøødpanøcxy; haguípxyhøch mijts tøø nmøødtsaächpøcy. Tøø ja'a Jesucristo mäjaa hajxy xmióoyyäm neby hajxy jaduñ nmee'xtújcämät. Coochä Diosmädia'agy-yajwa'xyiibä nga'a najtshixø'øwa'añ, møødä Jesucristo miädia'agy, páadyhøch häna'c yaa mädsibø'øbä tøø xquiexy maa xiøhatiän Patmos. Nebiä tsúmybiänøch jaduñ yaa nhity.

¹⁰ Mänítøchä Dioshèspiritu xñägädaacy. Näxøø hánajty jaduñ. Mänítøch nmädooyy møc quiapxy njøøxcø'ømáambiøch. Jadúñhøch nmädooyy nebiä xuuxtän.

¹¹ Mänítøch je'e xñämaayy:

—Høøch cøxiä nyajtsohndaac; høøch cøxiä nyajmayaamby. Tijaty miičh mwiinhix-aamby, jaduñ mgujáayät librojooty. Mänit jim mguéxät maa ja'a hermanodøjc-hajxiän jim Asianaaxooty, maa ja'a juxtujcpä cajptootypän. Jaduñä juxtujcpä cajpt xiøhaty: Efeso, Esmirna, Pérgamo, Tiatira, Sardis, Filadelfia, Laodicea.

¹² Mänítøch nwa'wiimbijty. Je'ečh hánajty nhixaamby pønñhøch hánajty xmiägapxp. Mänítøchä ceratoyøhñdy juxtujc nhijxy, haagä orohädiuñ.

¹³ Jimä Jesucristo hánajty tiäna'ay maa ja'a ceratoyøhñdy ñähmøjcän. Yoñä wyit hánajty miøødä. Orowøønhaam hánajty quiaačhwøøñä.

¹⁴ Jaanč tehñ pioobä quiuhwaay hánajty. Jaduñä wyiin hánajty quiähxø'øgy nebiä jøønhaayän.

¹⁵ Jaduñä tiecy hánajty yhaambä chämaambä, néjjiämä hobiujxt coo mbó'odät. Jaanč tehñ miøc hánajty quiapxy, nebiä mejy jiäditiän.

16 Juxtujcä madsa'a hänajty quiø'ogonhaty maa ja'a yhaaoguiø'øjän. Yhaawjootiä pejyhespada hänajty miøødä, mejtsnaḡä jiojpa. Jaduhnä wyiin jiojpa hänajty quiähxø'øgy nebiä xøø møc yhañän.

17 Cooch jaduhn nhijxy, mänitøch nwiingugädawøøyy nebiä ho'ogypiän. Mänitøch xquiø'nähgajpy ja'a yhaaoguiø'øhaam. Mänitøch xñämaayy:

—Ca'a mdsähgø'øy. Høøch ja'a jayøbajtpä, høøch ja'a jaac høxhaambä.

18 Jújcyhøch hänajty, tøøch hijty nho'ogy. Mänitøch njujypiøjcombä. Cábøch mänaa nho'ogaannä. Høøchä cuhdujt jaduhn nmøød maa ja'a ho'ogyiibä myinø'yän, maa ja'a ho'pähajxy ñähgäda'aguiän.

19 Mgujáayäp jaduhn nebiaty mwiinhixa'añ, tijaty jájtäp túunäp jäda'ahaty, møød tijaty jadäänäp tunäänäp.

20 Jaduhn miädia'agytiägø'øy ja'a tøøbä mhíxiäbä. Ja'a juxtujcpä madsa'ajä, ja'a näjuxtujcpä Diosquexyhajxy je'e, ja'a Dios jim quiejxypä maa ja'a hermanodøjc-hajxiän, maa ja'a cajpt juxtujcpän. Y ja'a juxtujcpä orotoyøhñdiä, ja'a hermanodøjc-hajxy je'eduhñ, ja'a hajxy jim Diosmädia'agy panøcxpä maa ja'a cajpt juxtujcpän.

2

1 'Jaduhnä Diosquexy myajnäjaayø'øwät, ja'a tøø quiexyíijäbä maa ja'a hermanodøjc-hajxiän jim Efeso: “Ja'a Jesucristo, ja'a juxtujcpä madsa'a quionhijpiä, jim je'e tiäna'ay maa ja'a ceratoyøhñdy ñähmøjcän; je'eds jaduhn mänaamb:

2-3 Nnajuøøbiøch jaduhn coo hajxy hoy mgudiun, coo hajxy møj mmee'xtucy, coo hajxy tøø mdsaaçhpøcy ja'a høøchcøxpä, coo ja'a ca'awiindøybä hajxy mga'a mee'xy. Tøø hajxy mmädia'agyhixy ja'a häna'c-hajxy jaduhn mänaambä cooc tyijy hajxy tøø quiexyii ja'a Diósäm. Tøø hajxy mnajuø'øy coo hajxy yhøhnda'agy. Hoy hajxy mmee'xtucy.

4 Je'eçh nga'a hojwiøøby coo hajxy mga'a nijiootpaatänä neby hajxy jecy mhøxtägøøyyän.

5 Tii hajxy hoy coo mga'a nijiootpaatänä. Naxy hajxy mdehm ñijiootpaadøøjät neby hajxy myajtsohñdaaquiän. Pø caj, nøcxáambøchä mceratoyøhñdyhajxy nbøgäänäm. Cähxø'p jaduhn coochä nmädia'agy hajxy jaduhn xquia'a panøcxänä.

6 Je'eds hoy coo ja'a nicolaíta miädia'agy hajxy mga'a mee'xä nébiøch jaduhn nga'a mee'xiän.

7 Hamädoowhit hajxy nebiä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'eçhä cuhdujt hajxy nmo'owaamby coo hajxy jim ñøcxät maa ja'a Dioswiinduumän. Jimä tøømdsa'am hajxy jioø'xa'añ ja'a jugyhajtyejpä.”

8 'Jaduhnä Diosquexy myajnäjaayø'øwät ja'a tøø quiexyíijäbä maa ja'a hermanodøjc-hajxiän jim Esmirna. “Ja'a Jesucristo, ja'a jayøbajtpä je'e møødä høxhaambä. Tøø hijty yho'ogy; tøø jadähooc jiujypiøjtägach. Je'eds jaduhn mänaamb:

9 Nnajuøøbiøch jaduhn coo hajxy mjaançh tehñ chaaçhpøcy, coo hajxy mjaançh tehñ yhäyoy. (Høøch mijts ja'a hoyhajt ja'a weenhajt nmooby.) Nnajuøøbiøch jaduhn coo mijtsä judíoshajxy haxøøg xñänømy. Jue'e hajxy jaduhn, ja'a møjcu'ugongä miädia'agy hajxy miäbøjcäp. Ja'a hóybäc tyijy hajxy je'eduhñ wyi'i miäbøjpy; cab jaduhn ñä'ä tøyäbä.

10 Cab hajxy mdsähgø'øwät hoy hajxy nej cu mja jat cu mja habet. Myajtsumaamb hajxy näje'e ja'a møjcu'ugongcøxpä. Xñä'ä hijxmdsaamb hajxy jaduhn pø tøyhajt hajxy jaduhn mjaançh mäbøcy. Majcxøøyyä hajxy mdsaaçhpøga'añ. Coochä nmädia'agy hajxy hamuumdu'joot xquiudiúunät, hoy hajxy cu mja ho'og, høøch mijts ja'a cuhdujt nmo'owaamby coo hajxy jim mnøcxät Dioswiinduum.

11 Hamädoowhit hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, cab hajxy ñä'ägädä tsaächtiuna'añii ja'a Diósäm; cab hajxy piäda'aga'añii møjcu'uhaam.”

12 'Jaduhñä Diosquexy myajnäjaayó'owät ja'a jim tøø quiexyíijäbä maa ja'a hermanodøjc-hajxiän jim Pérgamo: "Ja'a Jesucristo yhaawjooty ja'a pejyhespada miøødä, mejt-snaxä jløjpä. Je'eds jaduhñ mänaamb:

13 Nnajuøbiøch cooçh mijts nmädia'agy hoy xquiudiuunä homiänaajä, hoyyä Satanás jim jia gobiernähaty maa mijts mhitiän, hoyyä Antipas jim tøø jia yagho'ogyii. Paady yagho'cä cooçh nmädia'agy hijty xyajwa'xä. Ni wéeñtiøch nmädia'agy hajxy xquia'a høxhixä.

14 Je'eçh mæbøcy nga'a hojwiøøby coo häna'c wiingmädia'agy hajxy näje'ejaty yajñähixø'øy nebiä Balaam jecy yajñähixøøyyän. Je'edsä Balaam jøjcaxøøyy coo ja'a judiøshajxy ñäma'awøøjät cooc tyijy jaduhñ yhooyä coo hajxy ñiyhamigähamäadowøøjät, coo hajxy quia'y yhú'ugät tijaty hajxy tøø yoxy maa ja'a quepychechwiinduumän.

15 Jii häna'c-hajxy näje'ebä, cabä nicolaíta miädia'agy hajxy ñajtshixø'owaanä. Cábøch mæbøjnäbä ja'a mädia'agy jaduhñmä nmeexy.

16 Weenä mädia'agy jaduhñmä hajxy ñajtshixø'øy. Pø caj, nøcxáambøch nmädsibø'owa'añ pønjaty jim haxøøg yajñähixøøby maa mijtsän. Hädaa pejyhespada yaaby nmøødpøch nhaawjooty, hädäajøch nmädsiptunaamby.

17 Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän. Pønjaty mäjädaacp, je'eçh nyajcayaamby ja'a maná jim yu'uçhpä. Møødøçhä poobtsaa nmo'owa'añ. Jimä jemxyiøø yuugjaayä poobtsaanähgøxp. Ni pøn jaduhñ quia'a høxcapy quia'a najuø'øy. Jagooyyä yhøxcapy ja'a tøøbä mio'oyíijäbä."

18 'Jaduhñä Diosquexy myajnäjaayó'owät ja'a jim tøø quiexyíijäbä maa ja'a hermanodøjc-hajxiän jim Tiatira; "Ja'a Jesucristo, jaduhñä wyiin quiahxø'øgy nebiä jøønhaayän. Jaançh tehñ yhaamb jaançh tehñ chämaambä tiicy néjjiämä hobiujxt coo mbó'odät. Jaayá'ayäts jaduhñ mänaamb:

19 Nnajuøbiøch jaduhñ coo hajxy hoy mniçhogyii, coo hajxy hoy mmæbøcy, coo hajxy hoy mgudiuñ, coo hajxy møj mjaançh tehñ miee'xtucy. Jaduhñhøch nnajuøbiä coo hajxy jabom-jabom maas hojiaty mgudiuñ.

20 Je'eçh mæbøcy hoy nga'a mänijwiøøyyäp coo ja'a to'oxiøjc jii tu'ug maa mijtsän ja'a xøhjäpä Jezabel. Ja'a Dioscøxpäc tyijy miädia'agy. Pero xjiøjcaxøøyyäbøch nmoonsähajxy. Jaduhñ yhøhndaacpä cooc tyijy yhooyä coo hajxy ñiyhamigähamäadowøøjät, coo hajxy quia'y yhú'ugät tijaty hajxy tøø yoxy maa ja'a quepychechwiinduumän.

21 Tøøçhä Jezabel mayhooc nja näma'ay coo ja'a mädia'agy jaduhñmä ñajtshixø'owaanä. Pero cab jaduhñ ñä'ägädä najtshixø'owa'añ.

22 Nyajpa'ambedáambiøch je'eduhñ møødä yhamigohajxy, pø cabä yhaxøøgcuhdujt hajxy ñajtshixø'owa'añ. Hoyhóyhøch hajxy nyajtsaaçhpøga'añ.

23 Ngøxy pøgáanäbøçhä yhuungä jiugyhajthajxy. Jaduhñä hermanodøjc-hajxy nägøxiä ñajuø'owa'añ maa ja'a juxtujcpä cajptän cooçhä wyiinmahñdy hajxy nna-juøøyyä. Coo hajxy hoy mguhdujthädät, nmo'owáambiøçhä hoyhajt ja'a weenhajt hajxy jaduhñ. Pø cabä, nyajtsaaçhpøgáambiøch hajxy jaduhñ.

24 Pønjaty jim jaac hijp Tiatira, ja'a haxøøgmädia'agy hajxy ca'a panøcxpä, ja'a Satanás miädia'agy hajxy ca'a panøcxäbä, cábøch hajxy waamb nhanehmñä. (Tøyhajtäc tyijy ja'a Satanás miädia'agy jaduhñ.)

25 Jagóoyyøch hajxy njaac näma'ay coo hajxy hoy mgudiúnät neby hajxy naxy mnä'ägädä cuhdujthatiän, høxtä cóonøch yaa ngädaactägátsät.

26 Pønjaty mäjädaacp, pønjátyhøçhä nmädia'agy hoy xyajtúunäp homiänaajä, je'eçhä cuhdujt hajxy nmo'owaamby coo hajxy guobiernähädät wiinduhmyhagajpt,

27 nébiøch nDeedy xquiuhdujtmooyyän. Møcä cuhdujt hajxy miøødhada'añ. Coo ja'a miädia'agy hajxy quia'a mæbøjcäxät, mänit hajxy chaächtiuna'añii, ja'a hajxy ca'a mæbøjpä. Jaduhñ hajxy chaächtiuna'añii néjjiämä tu'ts mwojpú'uwät varillaam.

²⁸ Nmo'owáambiöchä jaxiøøm hajxypä.

²⁹ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän."

3

¹ 'Jaduhnä Diosquexy myajnäjaayø'øwät ja'a jim tøø quiexyíjábä maa ja'a hermanodøjc-hajxiän jim Sardis: "Ja'a Jesucristo, je'edsä Dioshespíritu møødhajp ja'a juxtujcpä, møødä madsa'a juxtujcpä. Je'eds jaduhñ mänaamb: Nnajuøöbiöch coöch nmädia'agy hajxy xquia'a yajtuunä, hoy häna'c-hajxy jia mäna'añ cooc tyijy mijts hoy mgudiunñ.

² Naxiä mwiinmahñdy hajxy mdehmñ yajmédsät. Cabä Diosmädia'agy hajxy hoy mjaty cudiuñ. Je'eçh jaduhñ nja tsojpy coo hajxy pedyii mgudiúnät, coo hajxy jaduhñ mga'a nä'ägä tu'udägóyyät.

³ Mjahmiédsäp ja'a homiädia'agy hajxy jaduhñ, ja'a hajxy hijty tøø mhabøquiäbä. Je'eds hajxy myajtúnäp tehngajnä. Najtshixøøñä ja'a mhamdsoo wiinmahñdy hajxy jaduhñ. Pø cabä, jaguiápxyhøch mijts nyajcumädówät. Cab hajxy hänäjty mnajuø'øy mänájøch mijts nyajcumädowa'añ.

⁴ Jim häna'c näje'e maa mijtsän jim Sardis, cab hajxy nej jiatcø'øy. Coö hajxy hoy wiädity, páadyhøch hajxy xmiøødwädita'añ poobwitmøød.

⁵ Pønjaty mäjädaacp, poobwit hajxy miøødhadaamby. Cábøchä xiøøhajxy nbo'odaanä maa hajxy myiñän cujaay librojooty. Jim hajxy ñøcxa'añ maaçh nDeediän, maa ja'a Diosmoonsän. Mänítøch hajxy jim ngapxpaada'añ, pønjatiä xiøø hänäjty miimb cujaay librojooty.

⁶ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän."

⁷ 'Jaduhnä Diosquexy myajnäjaayø'øwät ja'a jim tøø quiexyíjábä maa ja'a hermanodøjc-hajxiän jim Filadelfia: "Ja'a Jesucristo, cabä tii pojpa tii cädieey miøødä. Ja'a tøyhájätäs jaduhñ ñä'ägä møød. Miøødhájtabä rey David yhawaatst je'eduhñ. Coö hänäjty tii tøø yaghawa'açh, ni pøn jaduhñ quia'a hagø'øwät. Y coö hänäjty tii tøø yhawägüiçh, ni pøn jaduhñ quia'a yaghawá'adsät.

⁸ Jaayá'ayäts jaduhñ mänaamb: Nnajuøöbiöch coöch nmädia'agy hajxy hoy xyajtuunä, hoyyä møcmäjaa hajxy jaduhñtiäbaady mga'a ja møødä. Jaduhñhøch nnajuøöbiä coöch mijtsä nxøø xquiapxpáatäbä. Páadyhøch mijts jaduhñ nguhdujtmø'oy coö hajxy jim mnøcxät Dioswiinduum.

⁹ Pønjatiä møjcu'ugong ja'a miädia'agy jaduhñ mäbøjcäp, ja'a judíoshajxy, jaduhñ hajxy miänaambä cooc tyijy ja'a Diosmädia'agy hajxy hoy pianøcxpä. Cab jaduhñ ñä'ä tóyyäbä. Nä'ä høhndaacp hajxy jaduhñ. Nyajmedsáambiöch hajxy maa mijts mwiinduumän. Mänítøch hajxy jim nyagjiicäda'aga'añ, neby hajxy jaduhñ ñajuø'øwät coöch mijts jaduhñ ndsocy.

¹⁰ Tøøch nmädia'agy hajxy xyajtuunä coö hajxy mmee'xtúgät. Páadyhøch mijts ngüeendähada'añ mänaa ja'a tsø'ty ja'a häyohn hänäjty ñaxa'añän wiinduhmyñaaçwiin. Mänitä jäya'ayhajxy nägøxiä chaaçhpøga'añ.

¹¹ Mobädájpoçh jilby nhäda'aga'añ. Tehngajnä hajxy jaduhñ hoy mgudiúnät. Jaduhñä cuhdujt hajxy ni pøn xquia'a pøjcät coö hajxy jim mnøcxät maa ja'a Dioswiinduumän.

¹² Pønjaty mäjädaacp, cøjxta'axiøø hajxy jim yhida'añ Dioswiinduum. Ni mänaa hajxy jim quia'a tsoonaanä. Ja'a nDéedyhøchä xiøø, jímhøch nyuugjaayaanä maa ja'a wyi-innähgopcøxphajxiän, møødä Dioscajptä xiøø, møød høøch njemyxiøø. Ja'a Dioscajptä, ja'a Jerusalén jemýbiä je'e. Jim je'e choona'añ tsajpootyp maa ja'a Diosän.

¹³ Mhamädoowhídäp hajxy waambä Dioshespíritu ñäma'ay ja'a hermanodøjc-hajxy maa ja'a juxtujcpä cajptän."

14 'Jaduhñä Diosquexy myajnäjaayó'owät ja'a jim tøø quiexyíijäbä maa ja'a hermanodøjc-hajxiän jim Laodicea: "Ja'a Jesucristo, tøyhajtyejp je'e. Ni mänaa quia'a hõhnda'agy. Je'e cõxiä yajtsohndaac mäduhñtiä Dios yhädiuuñ.

15 Jaayá'ayäts jaduñ mänaamb: Nnajuøbiøch jaduñ cooçh nmädia'agy hajxy hamuumdu'joot xquia'a panøcxä, hoy hajxy mja mäna'añ cooc tyijy hajxy mmäbøcy. Maas hoy coo hajxy cu mnä'ägä mänaañ coo hajxy mga'a mäbøcy.

16 Entonces, coo hajxy hamuumdu'joot mga'a mäbøcy, páadyhøch mijts jaduñ nxøøghada'añ.

17 Jaduñ hajxy mmäna'añ cooc tyijy hajxy tii mga'a nä'ägädä yajmaajiaty, cooc tyijy hajxy hoy mjaançh tehñ wiädity. Pero cab hajxy jaduñ mnajuø'oy coo hajxy tijaty mga'a møødä. Jaduñ mäwíinäts hajxy mhity nebiä häyoobän, nebiä wiindspän, nebiä nähwa'ads hõxwa'adspän.

18 Nhuuc yajmädoogyhøch mijts oro hoybä, møødä poobwit, møødä wiindsooy. Jaduñ hajxy hoy mhixät. Cooçh mijts xmiänuu'xtá'agät, mänitøçhä mbojpa mgädieey hajxy nyajnähwáatsämät. Jaduñ hajxy hoy jim mnøcxät Dioswiinduum; cab hajxy jaduñ mnä'ägädä tsähdiúnät.

19 Ndsójpøch mijts, pero pø cábøch nmädia'agy hajxy xquiudiunaanä, mänit hajxy nyajcumädoowa'añ. Nmägapxaamby nhane'emaamby hajxy jaduñ. Entonces, naxiä mhaxøøgcuhdujt hajxy mdehñ ñajtshixó'owät. Hix, coo hajxy jaduñ mnä'ä cumädówät. Hamuumdu'jootä nmädia'agy hajxy xquiudiúnät.

20 Huuc hamädoowhit hajxy, nja wi'i miänuu'xtáacypiøçhä jäya'ayhajxy jaduñ cooçh hajxy xjiøjppøgó'owät. Mänitøçhä piojpa quiädieey hajxy nyajnähwáatsät. Mänitøch hajxy jaduñ nmøødhijnät tu'ugmädia'agy.

21 Pønjaty mäjädaacp, nmo'owáambiøçhä cuhdujt hajxy jaduñ cooçh hajxy xmiøødgobiernähädät. Jaduhñhøch tøø nmäjädaacpä; páadyhøch nDeedy jaduñ nmøødgobiernähajpä.

22 Mhamädoowhídäp hajxy waambä Dioshespíritu ja'a hermanodøjc ñäma'ay maa ja'a juxtujcpä tsajtøjçän."

4

1 Mänitøçhä tsajpootyp nwiinhijxy coo yhawa'adsä. Mänitøch jaaya'ay xmiägápxcombä, ja'a jayøbájthøch hänajty tøøbä xyhuuc mägapxpän. Jaduhñä yo't yajmädooy nebiä xuuxtän. Mänitøch xñämaayy:

—Huuc pet yam; nhuuc yaghixyhøch miich tii jaduñ jadáañäp.

2 Mänitøçhä Dioshespíritu xñägädaacy. Mänitøçhä Dios nwiinhijxy; jim hänajty yhäña'ay tsajpootyp.

3 Haamb tsämaambä Dios hänajty nebiä tsaahoybän, nebiä jaspen, nebiä cornalinan. Yajxonä hi'inçh hänajty quiähxø'øgy maa ja'a Dios hänajty yhäña'ayän. Nebiä esmeraldatsaajän hänajty yhañ chämamy.

4 Jimhøçhä majjäya'ay nhijxy nähii'xmädaaxc. Wäditiä ja'a Dios hajxy hänajty jiuhäñäawiädity. Poobwitmøød hajxy hänajty. Oro hajxy hänajty quiuhjenhajpy.

5 Jimä wädsuc hänajty piädsømy maa ja'a Dios hänajty yhäña'ayän. Jädijpä hänee hänajty jim. Juxtujcä jøøn hänajty jim tiøy Dioswiinduum. Dioshespíritu je'eduhñ ja'a juxtujcpä.

6 Haa jim ja'a Dioswiinduumä, jaduñä mejy hänajty jim quiähxø'øgy nebiä hijxt jaançh tehñ tiø'xypän.

Mädaaxcä animal ja'a Dios hajxy hänajty jim jiuhäñäawiädity. Cõxiä ñi'x quiopc-hajxy hänajty wyiinmøødä, jayøjp jiøøxcø'ømhaambiajpy.

7 Tu'ug hänajty quiähxø'øgy nebiä leóngän; tu'ug nebiä wajjän; tu'ug nebiä jäya'ayän; tu'ug nebiä jayøøbiä wiistän.

⁸ Haagä queectmøød hajxy hānajtj tädujctjaty. Cøxiä ja'a wiin hajxy hānajtj miøødä møød nähgøxp møød joodooty. Xøømdsuhm hajxy hānajtj wyi'i miāna'añ: Jaanč tehṃ wia'adsä Dios; je'e hajxy nWiindsøn hājätäm. Cøxiä mäjaa miøødä; homiānaajä ñä'ägädä hity cøjxta'axiøø.

⁹ Jaanč hijpä Dios cøjxta'axiøø. Naaghoocä animal ja'a Dios hajxy wyiingudsähgø'øy,

¹⁰ mänitä majjäya'ay ja'a Dios hajxy hānajtj wyiinjjicäda'agy, ja'a nähii'xmädaaxpä. Mänitä Dios hajxy hānajtj jiaanč tehṃ wyiingudsähgø'øy. Mänit hajxy hānajtj wyi'i ñiguiuhjeendu'udyii. Mänitä quiuhjēn hajxy hānajtj jim ñajtsconø'øy Dioswiinduum. Mänit hajxy hānajtj miāna'añ:

¹¹ Dios, hōjts miič nWiindsøn hajpy.

Hahixøøby jaduhṃ coo hōjts miič nwiingudsähgø'øwät, coo hōjts nmäná'anät coo miič ja'a mäjaa mmøødä, coo miič mmøjjä mjaančhä.

Cøxiä wiinä miič mjaanč tehṃ quiunuu'xy mjaanč tehṃ piäda'agy.

5

¹ Mänitøchä Dios nhijxy coo nocy hānajtj quiø'øbøc-haty haxädsach, ja'a quiø'ø hahooy-haampiä. Mejtsnaxä nocy hānajtj jiaayä. Juxtujc-hit hānajtj yhahoochä.

² Mänitøchä Diosmoonsä tu'ug nhijxy, ja'a mäjaa jaanč tehṃ miøødpä. Mänit je'e miānaañ:

—Pøṃ cuhdujt møød coo yø'ø nocy yhahoo'tstú'udät.

³ Ni pøṃ cuhdujt hānajtj quia'a møødä coo ja'a nocy hajxy yhahoo'tstú'udät, coo hajxy yhéebät, ni ja'a jimä tsajpootypä, ni ja'a hädaa yaabä naaxwiimbä, ni ja'a jiiipiä mōjcu'uhaambä.

⁴ Mänitøch njaanč tehṃ jioøyy, coo pøṃ cuhdujt hānajtj quia'a møødä coo ja'a nocy hajxy yhéebät, coo hajxy quiápxät.

⁵ Mänitøchä majjäya'ay tu'ug xñämaayy:

—Ca'a mjøøñä. Ja'a Jesucristo, je'eds mäjädaac. Je'e cuhdujtmøød coo yø'ø nocy yha-hoo'tstú'udät. Ja'a David ja'a yhap yhoc je'e, ja'a jecy jim gobiernähajtäbä Judánaaxooty. Paadiä Jesucristo xiøhaty ja'a León de Judá.

⁶ Mänitøchä Meeghuung tu'ug nhijxy. Jim hānajtj tiāna'ay Dioswiinduum, maa ja'a animal nämädaaxpä, maa ja'a majjäya'ay nähii'xmädaaxpä. Cähxø'p hānajtj coo hānajtj tøø yagho'ogyii. Juxtujcä quiaa'pt hānajtj; juxtujcä wyiin hānajtjypä. Haa ja'a wyiin juxtujcpä, ja'a Dioshespírituhajxy hānajtj je'eduhṃ ja'a juxtujcpä. Jim hajxy hānajtj wiädity wiinduhmyhagajpt.

⁷ Mänitä Meeghuungä nocy hoy piøjtsoy. Ja'a Dios jaduhṃ yejc; yhahooguiø'øhaamby hānajtj tøø quiø'øbøc-haty.

⁸ Mänitä Meeghuung wyiinjjicädaacä. Ja'a nämädaaxpä animalhajxy mäwiinjjicädaac møødä nähii'xmädaaxpä majjäya'ayhajxy. Cødu'ugä harpa hajxy hānajtj miøødä. Jimä poom hajxy hānajtj miøødä orojøønebøhñdioty. Haa ja'a poom jaduhmbä, ja'a Diospa'yaaxøøc je'eduhṃ. Ja'a Diosmädia'agy hajxy mæbøjpä, je'edsä Dios hajxy hānajtj pa'yaaxp.

⁹ Mänitä jemyhøy hajxy yhøøyy:

Miich cuhdujtmøød coo yø'ø nocy mhahoo'tstú'udät.

Miich hōjts xñähho'tuut. Paady hōjts cuhdujt nmøødä coo hōjts yaa nhidät Dioswiin-duum.

Wiinduhmyhagajpt hōjts ndsooñ. Cøjhayuuc hōjts ngapxy.

¹⁰ Miich hōjts cuhdujt xmiooyy coo hōjts jim ngobiernähädät naaxwiin.

Diostuung hōjts ndunaamby nebiä teediän.

¹¹ Mänitøchä Diosmoonsä nhijxy jaanč tehṃ miay. Ja'a Dios hajxy hānajtj ji-uhdānaawiädijpy møødä animalhajxy møødä majjäya'ayhajxy.

12 Mänitä Diosmoonsähajxy mœc jiaanč tehñ yaaxy:
 Yø'ø Meeghuung, yø'ø tøø yagho'ogyii.
 Yø'øds cuhdujtmøød coo jiaanč tehñ wyiingudsähgø'øwøøjat.
 Hahixøøby jaduhñ coo højts nmänáañämät coo cøxiä wiinä miøødä, møødä mäjaa, møød
 coo quiuhwijiä, møød coo miøjja jiaančhä.

13 Mänit hajxy miänaañ nägøxiä mädyijaty ja'a Dios tøø quiunuu'xy, ja'a jimä tsajpootypä, møødä hädaa yaabä naaxwiimbä, møødä jiiipiä møjcu'uhaambä, møødä jiiipiä mejjiootypä:
 Tsögä Dios hajxy wiingudsähgøøyyäm møødä Meeghuung.
 Cøjxta'axiøø hajxy yhida'añ møj jaanč. Møjmäjaa hajxy miøød.

14 Mänitä nämädaaxpä animalhajxy miänaañ:
 —Tsøc.
 Mänitä nähii'xmädaaxpä majjäya'ay ja'a Dios hajxy wyiinjiicädaacy. Wyiingudsähgøøyy hajxy jaduhñ.

6

1 Mänitøchä Meeghuung nhijxy coo ja'a nocy tu'hit yhahoo'tstuuty ja'a hänäjty jux-tujc-hithahoočpä. Mänitä animal tu'ug miänaañ:
 —Miñ huug hix.

Coo ja'a animal jaduhñ miänaañ, jaduhñ yajmädooyy nebiä hänee jiäditiän.

2 Mänitøchä craa tu'ug nhijxy coo tøpxt hänäjty tu'ug miøødä. Poobcuaañähgøxp hänäjty yhäña'ay. Mänitä cuhjén miooyy. Mänit tiu'ubøjcy tsiptuumbä. Mäjäda'agaamb hänäjty jaduhñ.

3 Mänitä Meeghuung ja'a nocy yhahoo'tstuuty ja'a miämetsc-hithahoočpä. Mänitä miämetspä animal miänaañ:
 —Miñ huug hix.

4 Mänitøchä craa tu'ug nhíxcombä. Tsaptscuaañähgøxp hänäjty yhäñaabiä. Mänitä cuhdujt miooyy coo ja'a jäya'ayhajxy nøcxy yajnimiädsibø'oyii hädaa yaabä naaxwiin, coo ja'a jäya'ayhajxy nøcxy yajniyagho'ogyii. Mänitä yoñhespada tu'ug miooyy.

5 Mänitä Meeghuung ja'a nocy yhahoo'tstúutcombä ja'a miädägøøghithahoočpä. Mänitä miädägøøgpä animal miänaañ:
 —Miñ huug hix.

Mänitøchä craa tu'ug nhíxcombä coo ja'a quipxt hänäjty tu'ug miøødä. Jiñgwiaañähgøxp hänäjty yhäñaabiä.

6 Mänitøchä mädia'agy nmädooyy maa ja'a mädaaxpä animalhajxy hänäjtiän:
 —Møjyuu jaduhñ jadaañäp. Ja'a trigo tu'kílobä, mägooxmil chowhada'añ. Y ja'a cebada tægøøgkílobä, jaduhñ chowhadaambä mägooxmil. Pero cap yø'ø hoñ myaghäyówät ni yø'ø vino.

7 Mänitä Meeghuung ja'a nocy yhahoo'tstúutcombä ja'a miämädaaxc-hithahoočpä. Mänitä miämädaaxpä animal miänaañ:
 —Miñ huug hix.

8 Mänitøchä craa tu'ug njaac híxcombä, ja'a hänäjty xøhajpä ja'a mäyagho'pä. Cuaañähgøxp hänäjty yhäña'ay ja'a poob-lómnäbä. Høxhaamä møjcu'uhaambä hänäjty piamiñ. Mänitä cuhdujt hajxy miooyy hädaa yaabä naaxwiin coo jäya'ay hajxy yagho'ogät tu'mädaaxc-hitpä. Hadsip hajxy hänäjty miäyagho'oga'añ, yuuhaam, pa'amhaam, caahaam.

9 Mänitä Meeghuung ja'a nocy yhahoo'tstúutcombä ja'a miämägooxc-hithahoočpä. Mänitøchä háañämähajxy jiiby nhijxy altarpa'c, ja'a hajxy hänäjty tøø yagho'ogyíjábä ja'a Diosmädia'agyquiøxpä. Paady hajxy yagho'cä coo hajxy hänäjty hoy tøø jiaanč tehñ quiudiuñ.

10 Mänit hajxy mœc yaaxy:

—Dios, miich hõjts nWiindsõnhajpy. Miichä tøyhajt mmøød. Mänaa hõjts nnø'ty xyaghawiimbjätät jiiby naaxwiin.

¹¹ Mänitä poobwit hajxy cødu'ug miooyä. Mänit hajxy ñämaayä coo hajxy ween jiaac poo'xy hõxtä coonä hänajty pedyii tøø yagho'ogyii ja'a hermano ja'a Jesucristo hajxy mäduumbä.

¹² Mänitä Meeghuung ja'a nocy yhahoo'tstúutcombä ja'a miädädujc-hithahooçhpä. Mänitä hujx møc ñajxy. Mänitä xøø jyiñøøyy nebiä jiñwitän. Mänitä po'o quiähxø'cy nebiä nø'tiän.

¹³ Mänitä madsa'a tsajtcøxpä quiahy naaxwiin jaançh tehñ miay; jaduñ quiahy nebiä piidstøøm piojca'ayän.

¹⁴ Mänitä tsajt yhadägooyøøñä nebiä nocy yhaxädsachän. Mänitä tun cøxiä wiingtuum ñä'a yajnøcxä møødä naax hänajty hijpä mejyquijc.

¹⁵ Mänitä jäya'ayhajxy nägøxiä jiiby ñiguiuyu'tsä tsaajutjooty, møødä jimhä tsaadun-jootypä, møødä reyhajxy, møødä jäya'ayhajxy mõjhajpä, møødä mäyøøjäya'ayhajxy, møødä soldadowiindsõnhajxy, møødä jäya'ayhajxy ja'a mõjcuhtujtmøødpä, møødä nä'a pajäya'ayhajxy.

¹⁶ Mänitä tsaadún hajxy ñämaayy:

—Hõjts nähgabhéjtäc. Jaduñ hõjtsä Dios xquia'a híxät ja'a jim häñaabiä tsajpootyp. Jaduñ hõjtsä Meeghuung xquia'a yajtsaaçhpøgät.

¹⁷ Tøø yhabaatnä coo hõjts hajxy xyajtsaaçhpøgaannä nägøxiä. Cab hõjts hoy nmeexuga'añ.

7

¹ Mänitøchä Diosmoonsä mädaaxc nhijxy coo hajxy hänajty jim tiäna'ay hanidiuhmjaty mäduñjatiä naaxteec. Mädaaxnaç hajxy hänajty tiäna'ay. Yhadujiä poj hajxy hänajty, jaduñ quia'a pójnät naaxwiin ni mejywyiing ni quepyquiøxp.

² Mänitøchä Diosmoonsä tu'ug jadähoc nhíxcombä coo hänajty piedø'oy xøøbädsømypiä, coo ja'a Diossello hänajty miøødä. Mänit hajxy møc miøjyaaxä, ja'a nämädaaxpä, ja'a hajxy hänajty tøø quihdujtmø'oyíjábä coo hajxy quiädiéeyät, coo hajxy cøxypänejiä jiatcø'owät hädaa yaabä naaxwiin møødä jim mejjiooty. Mänit hajxy ñämaayä:

³ —Cab hajxy mgädiéeyät jim naaxwiin ni jim mejjiooty, ni yø'ø quepychaa hajxy nej mga'a túnät, hõxtä coonä hõjtsä jäya'ayhajxy hänajty tøø nseñapäda'agy wyi-innähgocøxp, ja'a hajxy Diosmäduumbä.

⁴ Mänitøchä mäçhohnd nmädooy coo ja'a Israel yhap yhoc hajxy hänajty yajseñapäda'aga'añ nämägo'x-cujuxychägui'xmädaaxmilpä. Nämajmetscjaty hajxy hänajty yajseñapäda'aga'añ.

⁵ Nämajmejtšmil hajxy hänajty yajseñapäda'aga'añ ja'a Judá yhap yhoc-hajxy, møødä Rubén yhap yhoc-hajxy, møødä Gad yhap yhoc-hajxy,

⁶ møødä Aser yhap yhoc-hajxy, møødä Neftalí yhap yhoc-hajxy, møødä Manasés yhap yhoc-hajxy,

⁷ møødä Simeón yhap yhoc-hajxy, møødä Leví yhap yhoc-hajxy, møødä Isacar yhap yhoc-hajxy,

⁸ møødä Zabulón yhap yhoc-hajxy, møødä José yhap yhoc-hajxy, møødä Benjamín yhap yhoc-hajxy.

⁹ Mänitøchä majiäya'ay nhijxy. Wiinduhmyhagajpt hajxy hänajty chooñ. Cøjhayuucjaty hajxy hänajty miädia'agy. Ja'a Dios hajxy hänajty jim jiuhdänaawiädijpy maa ja'a Meeghuungwiinduumän. Jaançh tehñ miay hajxy hänajty jaduñ; cab hajxy hänajty hoy yajmäçhowa'añ. Poobwitmøød hajxy hänajty. Møødä xi'iwhaay hajxy hänajty quiø'øgaphaty.

¹⁰ Mänit hajxy nägøxiä yaaxy møc:

Xyajnäwaats hõjtsä Dios møødä Meeghuung. Gobiernähajpä Dios jaduhñ.

¹¹ Nägøxiä ja'a Diosmoonsä ja'a Dios hajxy hänajty jiuhdänaawiädity. Møødä majjäya'adiøjc-hajxy hänajty jiuhdänaawiädijtäbä møødä animalhajxy ja'a nämädaaxpä. Mänitä Dios hajxy wyiinjjicädaacy; wyiingudsähgøøyy hajxy jaduhñ.

¹² Mänit hajxy miänaañ:

Tsögä Dios hajxy jaančh tehñ wyiingudsähgøøyyäm cøjxta'axiøø.

Tsög hajxy mänáanäm coo miøjjä jiaančhä, coo quiuhwijjiä, coo miäjaamøødä.

Tsög hajxy nämáayyäm: “Dioscujú'uyäp.”

¹³ Mänitøchä majjäya'ay tu'ug xmiäyajtøøyy:

—Pønäda'a yø'øduhñ poobwitmøød. Maa hajxiäda'a chooñ.

¹⁴ Mänitøch nhadsooy:

—Wiindsøn, cábøch nnajuø'øy. Miichäda'a mnajuøøby.

Mänitøch xñämaay:

—Yø'ø jäya'ayhajxy, tøø hajxy jiaančh tehñ chaachpøcy. Tøø hajxy ñähho'tu'udyii ja'a Meeghúungäm. Jaduhñ hajxy tøø yajnähwäatsäbä.

¹⁵ Paady hajxy jim tiäna'ay Dioswiinduum. Xøømdsuhmä Diostuung hajxy jim tiuñ. Cueendähájtäp hajxy ja'a Diósäm.

¹⁶ Cabä yuu hajxy mänaa yagjuø'øwaañnä, ni cab hajxy tiødsø'øwáañänä. Cab hajxy xiøno'ogáañänä, ni cab hajxy yhanho'ogáañänä.

¹⁷ Ja'a Meeghuung, jim yhity maa ja'a Dios yhäña'ayän. Je'e hajxy cweendähadaamb yajxón. Cab hajxy jiø'øwaañnä xiuudsaañnä je'eguiøxpä coo hajxy yajxoonda'aga'añii ja'a Diósäm.

8

¹ Mänitä Meeghuung ja'a nocy yhahoo'tstúutcombä ja'a miäjuxtujc-hithahoočpä. Mänit jim yhamooñ tsajpootyp cupc-hora.

² Mänitä Diosmoonsä juxtujc nhijxy coo ja'a Dios hajxy hänajty jim wyiindäna'ay. Mänitä xuuxt hajxy miooyyä cødu'ug.

³⁻⁴ Mänitä Diosmoonsä wiingpä miejtspä. Jimä orjøønebøhñdy hänajty miøødä. Mänit hoy tiänaaxiøpy maa ja'a orohaltar mäwiingonän, jim mädøyyä maa ja'a Dios hänajty yhäña'ayän. Mänitä poom may miooyyä coo jim jiógät ja'a orohaltarnähgøxp. Coo'pä ja'a poomjoc hänajty jim maa ja'a Diosän. Jimä Dios hajxy hänajty pia'ya'axy, ja'a Diosmädia'agy hajxy hänajty mabøjpä.

⁵ Mänitä Diosmoonsä ja'a jøønebøhñdy quionø'cy. Mänitä jøømbajc hoy quiuwobø'øy, ja'a hänajty jim hijpä maa ja'a altarän. Mänit quiuhga'tsnajxy naaxwiin. Mänit wiädsujcy møødä hänee yaaxy. Mänitä hujx ñajxy.

⁶ Haa ja'a näjuxtujcpä Diosmoonsähajxiä, ja'a xuuxtmøødpä cødu'ugä, mänit hajxy ñiyhahixøøyyänä coo hajxy hänajty xiu'uxa'añ.

⁷ Mänit tu'ug xiuuxy. Mänitä caandøtstuu quiahy hädaa yaabä naaxwiin møødä jøøn møødä nø'ty. Mänitä naaxwiin tiooyy ja'a hänajty miädägøøghitpä cøxiä, møødä quepychaa møødä hujtshaay.

⁸ Mänitä Diosmoonsä ja'a miämetspä xiuuxy. Mänitädsä tun crúundäbä hoy quia'ay mejjioty. Tooby hänajty je'e.

⁹ Mänitä miädøøgpä mejy ñø'tiøøyy. Cøxy ho'c ja'a animalhajxy jaduhñ. Cøjxä barco qyiñ.

¹⁰ Mänitä Diosmoonsä miädägøøgpä xiuuxy. Mänitä madsa'a crúundäbä quiahy jim tsajpootyp. Tooby hänajty je'ebä. Mänit hoy quia'ay maa ja'a miädägøøghitpä møjnøøjän, maa ja'a miädägøøghitpä nøøgocän.

11 Jaduhnä madsa'a hänajty xiøhaty Tahm. Mänitä nøø miädägøøghitpä tiahmøøbiä. Mänitä jäya'ayhajxy may yho'cy.

12 Mänitä Diosmoonsä miämädaaxpä xiuuxy. Mänitä xøø tu'nax yho'cy maa hänajty yhawijtstuquiän ja'a miädägøøghitpä. Jaduhnä po'o jiajpa møødä madsa'a. Mädaaxc-hora ja'a xøø hänajty quia'a hañ xøøm; mädaaxc-hora ja'a po'o hänajty quia'a hañ coods.

13 Mänitøchä wiistä tu'ug nhijxjäyøøyy tsajtcøxp. Mänit møc yaaxy:

—Coo ja'a Diosmoonsähajxy jiaac xú'uxät ja'a jaac tægøøgpä, mänitä jäya'ayhajxy jiaanç tehñ chaaçhpøga'añ, ja'a hajxy jiiby tsänaabiä naaxwiin.

9

1 Mänitä Diosmoonsä miämägøøxpä xiuuxy. Mänitøchä madsa'a tu'ug nhijxcahy, naaxwiin hoy quia'ay. Mänitä madsa'a hawaatst miooyy coo ja'a jut jaduhn yhawägüii'tstü'udät ja'a jaanç tehñ quiøøcpä.

2 Mänitä jut yhawägüii'tstuuty. Mänitä jøønjoc qui'ixc piädsøømy. Mänit cøxp chajpejty. Mänitä xøø cøjx wyiindägøøy. Mänitä tsajt cøjx jiaty jøønjocjooty.

3 Mänitä mamiu'u jocjooty piädsøømy. Mänit hajxy yaa tiägøøyy jäyøøbiä hädaa yaabä naaxwiin. Mänitä mu'u tøjpt hajxy miooyy nebiä caa'ptiøjptän.

4 Mänit hajxy yhanehmä coo hujtsaay hajxy quia'a jøø'xät ni quepychaa. Je'e hajxy tiøbäp pønjetiä Diosseñä hänajty ca'a møød wyiinnähgøpcøxp.

5 Coo pøn jaduhn tiøbøøjät, jaduhnä mu'udøjpt jäwø'øwa'añ nebiä caa'ptiøjpt jäwø'øyän. Mägøøxpø'o ja'a mu'uhajxy hänajty miädøba'añ. Pero cabä cuhdujt hajxy miooyy coo jäya'ay hajxy yaghó'ogät.

6 Ja wi'i yho'ogaambä jäya'ayhajxy hänajty, pero cab hajxy jaduhn ñä'a ho'oga'añ.

7 Jaduhn mäwíinädsä mu'uhajxy hänajty quiähxø'øgy nebiä tsiptuumbä cuaayän. Jim hajxy hänajty miøødä quiuhduum nebiä orocuhjenbän. Jaduhnä wyiin jiojphajxy hänajty quiähxø'øgy nebiä ya'adiøjcän.

8 Jaduhnä cuhwaay hajxy hänajty miøødä nebiä to'oxiøjcuhwaayän. Jaduhnä tiu'tsthajxy hänajty quiähxø'øgy nebiä leóntu'tstän.

9 Nähbujxt cuhbujxt hajxy hänajty nebiä hacxpøjtän. Coo hajxy hänajty jäyøy, jaduhn hajxy hänajty jädity nebiä tsiptuumbä cuaaguiarretän.

10 Jaduhnä tøjpt hajxy hänajty miøødä nebiä caa'ptiøjptän. Jaduhnä cuhdujt hajxy hänajty miøødä coo jäya'ay hajxy tiøbät mägøøxpø'o.

11 Haa ja'a mu'u wyiindsøn'hajxiä, jutjooty hänajty chäna'ay, ja'a jaanç tehñ quiøøcpä. Jegyhajty hijty je'e tiuñ Diosmoonsä; tøø yhøxquëjxänä. Abadón hänajty xiøhaty hebreohayuuc-haamby. Apolión hänajty xiøhaty griegohayuuc-haamby. Jaduhn miädia'agytiägø'øy, ja'a mäyajcuhdägoobiä.

12 Jaduhnä tsø'ty tu'ug jiajtä. Metscä tsø'ty hänajty quia'a pedyiinä.

13 Mänitä Diosmoonsä miädädujcpä xiuuxy. Mänitøchä mädia'agy nmädooyy coo jäya'ay jim quiapxy maa ja'a orohaltarän, jim Dioswiinduum. Hamädaaxteecä orohaltar hänajty.

14 Mänitä Diosmoonsä miädädujcpä ñämaayy, ja'a hänajty tøøbä xiu'uxiä:

—Nøcx ja'a Diosmoonsähajxy mädaaxpä mäguejø'øw, ja'a jim cuxochpä maa ja'a Eufratesmøjnøjän.

15 Mänit hajxy hoy miäguejø'øy. Mänit hajxy wyiinguejxä coo jäya'ay hajxy yaghó'ogät tu'ug tægøøgpuxy. Jäguemiä hajxy hänajty tøø yajnähdiyyii coo hajxy miäyaghó'ogät. Coo ja'a miädädujcpä Diosmoonsä jaduhn xiuuxy, habaat jaduhn coo hajxy jiatcø'øwät.

16 Mänitøch nmädooyy coo mejtsmägo'xmillón soldado hajxy hänajty miøødä; haagä cuaayhäñaaby hajxy hänajty jaduhn.

17 Haagä caaçhpujxtä soldadohajxy hänajty. Jaduhnä pujxt color hänajty miøødä, møødä tsaptspä, møødä hucypiä, møødä pu'tspä. Jaduhnä cuaay quiopc-hajxy hänajty

nebiä leóncopcän. Tägøøgtu'u hänajty jii by piädsømy yhaawjooty, møødä jøøn, møødä joc, møødä azufre.

¹⁸ Jaduhñä jäya'ayhajxy yagho'cä ja'a tu'ug tägøøgpuxypä, jøønhaam, joc-haam, azufre-haam.

¹⁹ Jimä cuaay mäjaa hajxy hänajty miøødä maa yhaawhajxiän møød jii by maa tiu'tsthajxiän. Jaduhñä tiu'tsthajxy hänajty quiähxø'øgy nebiä tsahñdycopcmøødpän. Ja'a tiu'tsthaama jäya'ay hajxy hänajty yajtsu'učh.

²⁰ Pero ja'a jäya'ayhajxy ja'a mähmøøyyäbä, cabä haxøøgcuhdujt hajxy ñajtshixøøyy. Møjcu'ugong hajxy hänajty jiaanč tehñ wyiingudsähgøøñäp, møødä oronähwopy, møødä platanähwopy, møødä hobiujxtnähwopy, møødä tsaahädiuñ, møødä quepychech. Cab yø'øduhmbä ñä'ä hixy, ni quia'a mädoy, ni quia'a yo'oy.

²¹ Wi'i jäya'ay-yagho'pnä ja'a jäya'ayhajxy hänajty. Wi'i miäbädaacnä hajxy hänajty haxøøgwinnmahñdyhaam. Wiingä tägächä to'oxiøjc hajxy miøødtsäna'ayñä. Møød hajxy hänajty wyi'i mieečhñä.

10

¹ Mänitøchä Diosmoonsä tu'ug nhijxy jaanč tehñ miäjaamøød. Jim hänajty miänacy tsajpootyp. Jocjooty hänajty miänacy. Jimä hi'inč hänajty miøødä quiuhduum. Jaduhñä wyiin jii by hänajty jiajy nebiä xøøjän. Jaduhñä tiocy hänajty quiähxø'pä nebiä toobiän.

² Jimä nocyhuung hänajty quiø'øbøc-haty ja'a haxädsajtstu'udypä. Mänitä yhahoodiecy piädaacy mejywyiing. Mänitä yhanajtytiocy piädaacy tø'ødstuum.

³ Mänit møc yaaxy nebiä leóngän. Mänitä hänee ja'a juxtujcpä yaaxwiimbijty. Capx hajxy jaduhñ.

⁴ Mänitøch nja tägø'øwaañ cujahbiä waambä häneehajxy quiapxy. Mänitøchä jäya'ay tu'ug xñämaayy jim tsajpootyp:

—Cab jaduhñ mgujäyät nebiä häneehajxy quiapxiän. Ni pøñ jaduhñ mga'a yajmøødmädiä'agät.

⁵ Haa ja'a Diosmoonsä hänajty jim tänaabiä mejywyiing møød jim tø'ødstuum, mänit yhaoguiø'ø chajxajy.

⁶ Mänit miänaañ:

—Cøjxta'axiøø ja'a Dios ñä'ägädä hity. Cøxiä quiunuu'xy møødä tsajt, møødä naaxwiin, møødä mejy, hotyehñ miädyijatiä. Ja'a Dios jaduhñ mänaamb cooc tøø yhabaatnä.

⁷ Coø yhabaadät coø ja'a miäjuxtujcpä Diosmoonsä xiu'uxa'añ, tøø ja'a Dios hänajty yajtøjiaty nebiä quiuguexyhajxy hänajty jecy tøø yhawaanän. Cabä wiinghäna'c yhawaanä; ja'a quiuguexiähajtiä yhawaanä.

⁸ Mänitøchä jäya'ay jim tu'ug xñämáaguimbä tsajpootyp:

—Nøcx ja'a nocyhuung pøjtsow ja'a haxädsajtstu'udypä, ja'a Diosmoonsä quiø'øbøc-hajpiä.

⁹ Mänitøchä Diosmoonsä ja'a nocyhuung hoy nmäyujwa'añ cooch xmió'owät. Mänitøch xñämaayy:

—Pøc; pu'uy. Pa'ag mhaawjooty mjuø'øwa'añ nebiä møjtsiinnøøjän. Pero coø jii by quiäda'aga'añ maa mjøø'xytiøjcän, mänit mjuø'øwa'añ coø tiahmä.

¹⁰ Mänitøchä nocyhuung hoy njaanč pøjtsow. Mänitøch njaanč puhy. Pá'aghøch jaduhñ njaanč juøøyy nhaawjooty nebiä møjtsiinnøøjän. Pero coø jii by jiaanč cädaacy maač njøø'xytiøjcän, mänitøch njaanč juøøyy coø tiahmä.

¹¹ Mänitøch hajxy xñämaayy:

—Tsipecøxp mnägapxtägätsät nebiä jäya'ayhajxy jiada'añ yhabeta'añän, ja'a hajxy jim tsänaabiä wiinduhmyñäaxwiin, ja'a hajxy wiinduhmyhayuuc mädiacpä, møødä gobiernähajxy.

11

- ¹ Mänítøchä paxyquipxt hajxy xmiooyy. Mänítøch hajxy xñämaayy:
—Nøcx ja'a Diostøjc quipx møødä altar. Mächow ja'a jäya'ayhajxy, nänaagä Dios hajxy wyiingudsähgø'øy.
- ² Pero cab jaduhñ jim mguípxät Diostøghaguuy. Ja'a jäguembä-jäya'ay ja'a cuhdujt hajxy tøø mio'oyii coo hajxy jim guiobiernähädät maa ja'a Dioscajptän juxychägui'xmejtspo'o.
- ³ Nguexáambiøchä nguguexy metscä coo hajxy jim miädiá'agät ja'a høøchcøxpä juxychägui'xmejtspo'o. Jiñwitmøød hajxy wiädita'añ.
- ⁴ Haa ja'a Diosquexyhajxy nämetspä, ja'a olivoquepy hajxy je'e ja'a metspä, møødä ceratoyøhñdy metspä, ja'a jim tänaabiä Dioswiinduum. Ja'a Dios ja'a naaxwiin cunuu'x.
- ⁵ Coo ja'a Dioscuguexyhajxy hänajty cøxypänejpiä jia tuna'añii, mänitä jøøn hajxy yhøxpäxujja'añ yhaawjooty. Cøxy toyaambä miädsiphajxy hänajty jaduhñ. Jaduhñ hajxy yho'oga'añ.
- ⁶ Cuhdujtmøødä Dioscuguexyhajxy hänajty coo hajxy quia'a yajtú'uwät, naagxøø hajxy hänajty miädia'aga'añ ja'a Dioscøxpä. Jaduhñä cuhdujt hajxy hänajty miøødäbä coo nøø hajxy wia'añdiúnät, yajnø'tycójät. Jaduhñä cuhdujt hajxy hänajty miøødäbä coo ja'a jäya'ay hajxy yajpa'ambédät hädaa yaabä naaxwiin, coo häyohn hajxy yagjadøøjät, naaghocä jioothajxy hänajty chocy.
- ⁷ Coo hajxy hänajty tøø miädiaacpädøøñä, mänitä animal jii by tu'ug piädsøma'añ maa ja'a jut jaanç tehñ quiøøcpän. Mänitä Dioscuguexyhajxy yagho'oga'añii.
- ⁸⁻⁹ Tägøøgxøø ja nähgupc hajxy jim wyijtsna'awa'añ møjcajptooty maa ja'a Jesús jecy miøjpahbejtän cruzcøxp. Haa ja'a cajptjäya'ayhajxiä, haxøögä cuhdujt hajxy hänajty miøødä nebiä jecyjiäya'ay ja'a cuhdujt hajxy hijty miøødän, ja'a hajxy hijty jim jegyhaity tsänaabiä Sodoma møødä Egipto. Cabä cuhdujt hajxy ñä'ägä yega'añ coo ja'a ho'ogyjiäya'ayhajxy jim yajnaaxtägø'øwøøjät. Minaamb hajxy yheeba'añii. Wiinduhmyhagajpt hajxy choona'añ. Cøjhayuuc hajxy miädia'aga'añ.
- ¹⁰ Jaanç tehñ xioonä'agaambä jäya'ayhajxy hänajty coo ja'a Dioscuguexyhajxy hänajty tøø yho'ogy. Paady hajxy hänajty jootcujc ñijiäwøøyyänä, cab hajxy hänajty yhadsibáañänä. Paady hajxy hänajty hotyijjä ñä'a nimio'owa'añii hamiñ haxøpy.
- ¹¹ Coo tägøøgxøø ja nähgupc hänajty tøø yhabety, mänitä Dios ja'a quiuguexyhajxy hänajty yagjujypiøga'añ jadähooc. Pønjaty hänajty hixaamb, mänit hajxy hänajty chähgøøbiøga'añ.
- ¹² Mänitä Dioscuguexyhajxy miädowa'añ coo hajxy hänajty møc miøjya'axyii jim tsajpootyp:
—Pet hajxy yam cøxp.
Mänit hajxy jocjooty ñøcxa'añ tsajpootyp. Hixáañäp hajxy ja'a miädsípäm.
- ¹³ Mänitiä hujx jaanç tehñ miøc ñaxa'añ. Mänitä tøjc may piuma'añ ja'a miämajc-hitpä jim cajptooty. Juxtujcmilä jäya'ayhajxy yho'oga'añ. Ja'a hajxy hänajty tøø jiaac mähmø'øyäbä, jaanç tehñ chähgø'øwaamb hajxy jaduhñ. Mänitä Dios tsajpootypä hajxy wyiingudsähgø'øwa'añ.
- ¹⁴ Jaduhñ ja'a tsø'ty ñajxy ja'a miämetsc-hoocpä. Paquiä yhabaadäängombä coo ja'a miädägøøgpä ñaxäängombä.
- ¹⁵ Mänitä miäjuxtujcpä Diosmoonsä xiuuxy. Mänit hajxy jim møc yaaxy tsajpootyp:
Ja'a Jesucristo hajxy nWiindsøñhájätäm.
Tøø je'e miøjtägø'øy wiinduhmyñaaxwiin.
Cøjxta'axiøø guiobiernähadaañä.
- ¹⁶ Jimä nähii'xmädaaxpä majjäya'ay ja'a Dios hajxy hänajty jiuhhäñaawiädity. Mänitä Dios hajxy hoy wyiinjjicäda'agy. Wyiingudsähgøøyy hajxy jaduhñ.
- ¹⁷ Mänit hajxy miänaañ:
Dios, højts miich nWiindsøñhajpy.

Cøxiä miich mäjaa mmøødä. Cøjxta'axiøø miich mhity.

Dioscujú'uyäp coo miich tøø mmøjtägøøñä, coo tøø mdägøøñä gobiernähajpä.

¹⁸ Tøø ja'a jäya'ayhajxy nägøxiä jia jootma'ady. Pero tøø yhabaady coo miich myajcumädowaannä.

Tøø yhabaady coo miichä ho'ogyjiäya'ayhajxy myajtøyhajtyegaannä, coo myajcuhdägoyyaannä pønjatiä jäya'ayhajxy yaa yajtu'udägooby hädaa yaabä naaxwiin. Jaduhñ tøø yhabaatpä coo miichä hoyhajt ja'a weenhajt hajxy mmo'owa'añ pønjaty miich tøø xquiapxpaady, møød pønjatiä mmädia'agy hamuumdu'joot tøø xyajtuunä,

møød pønjaty miich tøø xwyiingudsähgø'øy, hoyyä møjtuung hajxy tøø quia'a ja møødhaty.

¹⁹ Mänitä Diostøjc jim yhawaach tsajpootyp. Mänitä caja jii by quiähxø'cy tøgooty møødä contrato, ja'a Dios jecy yajcuhdújcäbä. Mänit tiägøøyy wädsujpä. Mänitä hänee møc jiädijty; møødä hujx møc ñajxy. Mänitä caandøtstuu may quiahy.

12

¹ Mänitä hijxtahñd jim quiähxø'cy tsajtcøxp jaanč tehñ hoy-yagjuøøñä. Jimä to'oxiøjc hänajty tu'ug yhajajy nebiä xøøjän. Jimä po'o hänajty yajtehm̄bety. Majmetscä madsa'a hänajty quiuhjenhaty.

² Tøø hänajty tiehm̄ yhabaatnä coo yhuungpaada'añ. Paady hänajty wyi'i ya'axy.

³ Mänitä hijxtahñd wiingpä wyiingähxø'combä. Tu'ugä dragón hänajty cruundä. Tsapsä ñi'x hänajty. Juxtujcä quiopc hänajty haagä cuhjenmøød. Majcä quiaa'pt hänajty.

⁴ Tiu'tsthaamä madsa'a tu'ug tägøøgpuxypä yajcahy naaxwiin ja'a tsajtcøxpä. Mänitä dragón hoy wyiindänaaxiøpy ja'a to'oxiøjc ja'a hänajty huungpaadaambä. Nägooyyä yhuung hänajty myina'añ, mänit hänajty chu'udsa'añ.

⁵ Mänitä ya'ayhäna'c myiiñ. Je'e hänajty tunaamb gobiernä wiinduhmyñnaaxwiin. Møc hänajty jaduhñ jiaanč tehñ yhane'ema'añ. Mänit jim yajnøcxä Dioswiinduum.

⁶ Mänitä to'oxiøjc piäyø'cy. Pactuum ñøcxy. Jimä Dios hänajty tøø yajnähdiij coo jim yajcayóøjät mil cumejtsmägo'x cudägøøghii'xxøø.

⁷ Mänitä tsip jim piädø'nä tsajpootyp. Ja'a Miguel hänajty tuumb Diosmoonsäwiindsøn. Je'e ja'a Diosmoonsähajxy miøødpädø'c. Ja'a dragón ja'a mioonsähajxy møødpädø'pä. Mänit hajxy ñiñamejtsä.

⁸ Cabä dragónhajxy ñä'a mäjädaacy. Mänit hajxy quia'a cuhdujtmóoyänä coo hajxy jim jiaag hídät tsajpootyp.

⁹ Mänitä dragónhajxy jim yhøxquéjxänä; yaa hajxy miänajnä hädaa yaabä naaxwiin. Haa ja'a dragónhajpä, ja'a møjcu'ugong je'e, ja'a jecychahñdy je'e. Jaduhñ je'e xiøhajpä Satanás. Je'e hajxy yaa xwiinhøhñäm hädaa yaabä naaxwiin.

¹⁰ Mänitä jäya'ay jim møc yaaxy tsajpootyp.

—Tøø ja'a Dios miäjäda'agy. Gobiernä je'e tiunaamby møødä Jesucristo. Tøø ja'a møjcu'ugong yhøxquéjxänä. Xøømdsuhñ højts nmägu'ughajpähajxy hijty jim yajnähdsømyii Dioswiinduum.

¹¹ Paady højts nmägu'ughajpähajxy tøø miäjäda'agy, coo ja'a Meeghuung hajxy tøø xñähho'túutäm, møød coo ja'a Dios hajxy quiaapxpaady. Hoy hajxy hänajty jia ho'oga'añ, cab hajxy hänajty chähgø'øy. Hamdsoo hajxy jaduhñ ñiñähdujcä coo hajxy yhø'ogät.

¹² Mxoondá'agäp hajxy, pønjaty jim tsänaaby tsajpootyp. Pero pønjaty jii by tsänaaby naaxwiin, haxøøg hajxy mäbøcy mjada'añ mhabetä'añ, je'eguiøxpä coo ja'a møjcu'ugong hajxy jii by tøø xñägäda'agy. Hawa'anda'agaambä møjcu'ugong jaduhñ. Ñajuøøby jaduhñ coo cuhdujt jecy quia'a møødhada'añ coo cøxypänejiä jiatcø'øwät.

¹³ Coo ja'a dragón yhiixy coo hänajty tøø quiäda'agy naaxwiin, mänitä to'oxiøjc tiägøøyy päboobiä, ja'a hänajty tøø yhuungpädiäbä.

14 Mänitā to'oxiøjc wiistäqueect metsc miooyä møjyaty, neby jaduhñ jäyøy ñócxät pactuum maa hānajtŷ yajcaya'añiijān tægøøgjomøjtä cupc. Jäguemä dragón miähmó'øwät.

15 Mänitā dragón nøø com̄ yhøxpäxujŷ nebiä to'oxiøjc jaduhñ ñøøgomdsømøøjtät.

16 Mänitā nøøgom̄ cøjx yhuugø'øŷ naaxootŷ. Puhbejtä ja'a to'oxiøjc jaduhñ.

17 Mänitā dragón ja'a to'oxiøjc jiaanč tehñ ñähawa'andaacy. Mänitā dragón tiägøøŷŷ tsiptuumbä møødä to'oxiøjc yhuunghajxy, ja'a hajxy hānajtŷ yaa tsānaabiä hädaa yaabä naaxwiin, ja'a Diosmädia'agy hajxy hānajtŷ mäßøjpä, ja'a Jesucristo hajxy hānajtŷ capx-paatpä.

13

1 Jímhøch hānajtŷ ndāna'ay mejypia'a. Mänitøchä animal cruundä nhijxpädsøømy mejjiootŷ. Juxtujcä quiopc hānajtŷ haagä xøømøød. Haa ja'a xøø jaduhñbä, haagä haxøøgiatiä Dios hajxy ñānømy. Majcä quiaa'pt hānajtŷ haagä cuhjenmøød.

2 Jaduhñä ñi'x hānajtŷ nebiä cuxiøøbøjtän. Jaduhñä tiecy hānajtŷ nebiä osotequiän. Jaduhñä yhaaw hānajtŷ nebiä leónhaawän. Mänitā animal møjcuħdujt miooyä møødä møcmäjaa. Ja'a dragón jaduhñ yejc; yhamdsoo je'e jaduhñ.

3 Tu'ugä animal quiopc hānajtŷ quiähxø'øgy nebiä cuhbuxypän. Tøø hānajtŷ chóoccombä. Mänitā jäya'ayhajxy nägøxiä jiaanč tehñ yagjuøøŷŷ. Mänitā animal hajxy tiägøøŷŷ pawädiipä.

4 Mänitā dragón hajxy wyiingudsähgøøŷŷ, je'eguiøxpä coo ja'a animal møjcuħdujt hānajtŷ tøø mio'oy. Jaanä ja'a animal hajxy wyiingudsähgøøbiä. Jaduhñ hajxy hānajtŷ miāna'añ:

—Ni pøn̄ mäjaa jaduhñ quia'a møødä nej yø'ø animal mäjaa miøødän. Ni pøn̄ jaduhñ quia'a mäjädä'agät coo yø'ø animal hajxy ñä'ä mädsibó'øwät.

5 Mänitā animal cuħdujt miooyä coo ja'a Dios haxøøg ñānømät. Jaduhñ quiuhdujtmóoyyabä coo yhané'emät juxychägui'xmejtspo'o.

6 Jaanč jatcøøŷŷ jaduhñ. Haxøøgä Dios jiaanč nānøømy, møødä Dios tiøjc, møød hajxy jim̄ hijpä tsajpootyp.

7 Jaduhñ quiuhdujtmóoyyabä coo miädsibó'øwät ja'a Dioshuunghajxy, coo ja'a Dioshuunghajxy quia'a yajmäjäda'agøøjtät. Mänit quiuhdujtmóoyyabä coo ja'a jäya'ayhajxy yhané'emät nägøxiä, ja'a hajxy yaa tsānaabiä wiinduhmyñāaxwiin.

8 Je'eds hajxy jaduhñ animalwiingudsähgøøŷŷ, pøn̄jatiä xiøø hānajtŷ jim̄ ca'a miim̄b cujaay nocyquiøxp, ja'a Meeghuung miøødpä, ja'a højts xñähho'túutämbä. Pøn̄jaty cøjxta'axiøø jugyhadaamb̄ nebiä Dios jjugyhatiän, je'edsä xiøøhajxy jim̄ miim̄b cujaay nocyquiøxp. Tøøŷŷämä xiøøhajxy hānajtŷ quiujähyyäxä coo ja'a naaxwiimbä yhawijŷ tiøø'xtaacy.

9 Naxy hajxy hädaa mhuuc tehñ wyiinjuó'øwät.

10 Pøn̄jaty mädsuumb, yajtsuumdägatsaamb hajxy je'ebä. Pøn̄jaty mäyagho'p espada-haam, jaanä jaduhñ hajxy yagho'tägatsāanäbä espada-haam. Hix, pøn̄jaty jaduhñ Dioshuung, tsipcøxp hajxy miee'xtügät; tsipcøxp hajxy miäbøgät.

11 Mänitøchä animal wiingpä nhijxnaaxwiimbädsøømy. Jaanä cruundä je'ebä. Metscä quiaa'pt hānajtŷ je'e nebiä meeghuungcaa'ptän. Wiing hānajtŷ quiapxy miädia'agy nebiä dragóngän.

12 Jaduhñdsä møjcuħdujt hānajtŷ miøødäbä nebiä jayøbajtpä møjhanimalän. Quipxy hajxy hānajtŷ yhane'emy nämetscä. Mänitā miämetspä møjhanimal yhanehmy coo ja'a jayøbajtpä wyiingudsähgø'øwøøjtät, ja'a hānajtŷ cuhbuxypä tøø chó'oguiäbä.

13 Haa ja'a møjhanimal miämetspä, madiu'u hijxtahñd yajcähxø'cy haagä hoy-yagjuøøñäjatŷ. Hijxwiinduumä jøøn̄ yajcahy naaxwiin.

14 Coo ja'a jaya'ayä hijxtahñd hajxy yhijxy, yaghijxmañøøŷŷä hajxy jaduhñ. Mänit hajxy ñāmaayyä coo ja'a animal hajxy yhahädiuunñaxät, ja'a hānajtŷ tøø quiuhbuxyijäbä.

¹⁵ Mänitä miämetspä animal quiuhdujtmooyyä coo ja'a animal yhahädiuunnaxy yagju-ypiogät, yajcapxó'ogät. Jaduhñ je'e quiuhdujtmóoyyabä coo yajyagho'ogóojät pønjatiä animalhahädiuunnaxy ca'a wiingudsähgø'øwaamb.

¹⁶ Mänitä tsaangu'ughajxy nägøxiä yajseñapädaacy maa yhahooguiø'øhajxiän, o maa wyiinnähgopcøxphajxiän, miøjjä miuutscä, miäyøø quia'a mäyøøjä.

¹⁷ Pøn hänajty ca'a señamøød, pønä animal xiøø hänajty ca'a møødhájtäp, o ja'a ñúmero, cabä cuhdujt hajxy hänajty mio'oyii coo hajxy jiúyät, coo hajxy tióogät.

¹⁸ Pøn cuhwijy, pøn wiinjuøøby, ween yhuuc najuø'øy nebiä animal ñúmero miädia'agytiägø'øy. Jaduhñ je'e nebiä jäya'ay ñúmeron. Jue'e ñúmero jaduhñ, tädujmägo'x cudägøøghii'xtädujc.

14

¹ Mänitøchä Meeghuung nhijxy coo jim tiäna'ay Sióntunnähgøxp. Jimä jäya'ayhajxy hänajty piadänaabiä nämägo'x cujuxychägui'xmädaaxc mil. Yhaagä møød hajxy hänajty cujaay wyiinnähgopcøxphajxy ja'a Meeghuung xiøø møødä Tieedy xiøø.

² Mänitøch jim nmädooyy tsajpootyp nebiä møjnøø may jäditiän, nebiä hänee møc ya'axiän. Jaduhñ hänajty yajmädoobä nebiä harpa may miäna'añän.

³ Ja'a nämägo'x cujuxychägui'xmädaaxc milpä jäya'ay, ja'a hajxy hänajty tøø yajnähwä'achíjábä hädaa yaabä naaxwiin, jemyhøy hajxy hänajty jim yhøøby Dioswiinduum. Haa ja'a nämädaaxpä animalhajxiä, jim hajxy hänajty piahäña'ay møødä majjäya'adiøjc-hajxy. Cabä wiinghäna'c-hajxy jiada'añ ja'a jemyhøy jaduhmbä.

⁴ Haa ja'a nämägo'x cujuxychägui'xmädaaxc milpä jäya'ayhajxiä, cabä wiingto'oxiøjc hajxy hänajty tøø miøødtsäna'ay. Jaanç tehñ yhoy hajxy hänajty jiäya'ayhaty. Majatiä Meeghuung hänajty ñøcxø'øy, pianøcxyp hajxy hänajty jaduhñ. Jayøbajt hajxy yajnähdijä coo hajxy yajnähwä'adsøøjät, coo hajxy yhuunghadøøjät ja'a Diósäm møødä Meeghúungäm.

⁵ Ni mänaa hajxy quia'a høhnda'agy. Cab hajxy tii poj tii cädieey miøødä jim Dioswiinduum.

⁶ Mänitøchä Diosmoonsä wiingpä nhijxy; jim hänajty jiäyøøwiädity tsajtcøxp. Ja'a Diosmädia'agy hänajty yegaamby ja'a ni mänaa ca'a tægajtpä. Nägøxiä ja'a jäya'ayhajxy hänajty mio'owa'añii, ja'a hajxy yaa tsänaabiä wiinduhmyhagajpt, hoy hajxy wiinghayu-ucjaty jia møødä.

⁷ Mänitä Diosmoonsä møc miänaañ:

—Wiingudsähgø'øw ja'a Dios hajxy. Näma'aw hajxy jaduhñ coo miøjjä jiaançhä. Tøø yhabaady coo ja'a Dios jäya'ay yajtøyhajtyega'añ. Je'eds cøjx yhädiuñ tsajpootyp møødä naaxwiin, møødä mejy, møødä nøøgopc.

⁸ Mänitä Diosmoonsä tu'ug jiaac mänaañ:

—Tøø ja'a møjcajpt Babilonia quiuhdägoy, je'eguiøxpä coo ja'a quiuhdujt jiaanç tehñ yhaxøögä. Tøø ja'a jäya'ayhajxy nägøxiä piajatcø'øy ja'a Babilonia quiuhdujt.

⁹ Mänitä miädägøøgpä Diosmoonsä møc miänaañ:

—Pønä animal wiingudsähgøøby møødä yhahädiuunnaxy, pøn yajseñapädaacp wyiinnähgopcøxp o quiø'øgøxp,

¹⁰ hoyhoyyä Dios jiaanç tehñ yajcumädowa'añ. Jøønjooty, azufrejooty hajxy chaachpøga'añ Diosmoonsäwiinduum møødä Meeghuungwiinduum.

¹¹ Cøjxta'axiøø hajxy chaachpøga'añ xøømdsuhñ, pønjatiä animal wiingudsähgøøby møødä yhahädiuunnaxy, pønjatiä seña jim møødhájtäp.

¹² Pønjatiä Diosmädia'agy mæbøjp møødä Jesucristo miädia'agy, ween hajxy tehngajnä miee'xtucy.

¹³ Mänitøchä jäya'ay jim tsajpootyp xñämaayy:

—Cujaay jaduñ: “Pønjatiä Diosmädia'agy mäbøjp, coo hajxy yhö'ogät, jootcuje hajxy yhida'añ.” Tøyhajt jaduñ. Poo'xáannäp hajxy jaduñ. Jiahmiedsaambiä Dios jaduñ coo ja'a Diosmädia'agy hajxy hoy tøø yajtuñ. Nømä Dioshespíritu miäna'añ.

¹⁴ Mänitøchä jäya'ay tu'ug nyuughijxy. Poobjocøxp hänäjty yhäña'ay. Orocuhjén hänäjty quihjenhajpy. Arroztujt hänäjty quiø'ogaphajpy jaanč tehñ jøjp.

¹⁵ Mänitä Diosmoonsä tu'ug piädsøømy maa ja'a Diostsajtøjcän. Mänitä jäya'ay miøjyaaxä møc, ja'a hänäjty häñaabiä jocøxp:

—Tøø yhabaady coo ja'a päda'agy myajpädø'ogät jiiby naaxwiin. Tøø ja'a tiøømiäjay. Nøcx yajpädø'og.

¹⁶ Mänitä päda'agy hoy jiaanč yajpädø'ogy arroztujthaam hädaa yaabä naaxwiin. Jaduñ miädia'agytägø'øy coo ja'a jäya'ayhajxy yajcumädowa'añii, ja'a hajxy haxøøgcuhdujtmøødpä.

¹⁷ Mänitä Diosmoonsä wiingpä piädsøømgombä maa ja'a Diostsajtøjcän. Jimä arroztujt hänäjty quiø'ogaphajpä jaanč tehñ jøjp.

¹⁸ Mänitä wiing Diosmoonsä piädsøømøyy maa ja'a altarän. Je'e cuhdujtmøød maa ja'a jøøngøxpän. Mänitä Diosmoonsä møc miøjyaaxä ja'a arroztujt cabhijpä:

—Tøø ja'a tsaatyp jiiby cha'amy naaxwiin; nøcx yajpädø'og arroztujthaam.

¹⁹ Mänitä tsaatyp hoy jiaanč yajpädø'ogy arroztujthaam hädaa yaabä naaxwiin. Mänit hoy piäda'agy maa ñähhädiunø'øyän maa hajxy tiehñdse'ediän. Jaduñ mäwiinädsä Dios yajtsaačhpøga'añ ja'a hajxy tøø quia'a mäbøquiäbä.

²⁰ Cajtpa'a ja'a tsaatyp hajxy hoy tiehñdse'edy. Comä nø'ty piädsøømy maa ñähhädiunø'øyän. Møjwiinä nø'tymejy quiojy tägøøgmägo'x kilómetro. Coo'pä nø'ty hänäjty maa ja'a cuaay frenon.

15

¹ Mänitøchä wiinghijxtahñd jim nhijxy tsajpootyp jaanč tehñ yhamøj, hoy-yagjuøøñä. Juxtujc-høchä Diosmoonsä nhijxy haagä häyohnmøød. Je'eduhñ ñänøømby coo ja'a Dios juxtujc-hooquiä jiaac yajtsaačhpøga'añ ja'a hajxy yaa ca'a mäbøjpä hädaa yaabä naaxwiin.

² Mänitøchä hijxt nhijxy. Jim hänäjty hamøj quioonna'ay. Nebiä mejjiän hänäjty quiähxø'øgy. Jaduñ hänäjty quiähxø'pä nebiä toobiän. Jimä jäya'ayä hijxt hajxy hänäjty wyiindäna'ay, ja'a animal hajxy hänäjty tøø quia'a yajmäjädá'aguiäbä møødä seña, møødä xiøø, møødä ñúmero. Jimä harpa hajxy hänäjty miøødäbä. Ja'a Dios jaduñ yejc.

³ Jaduñ hajxy hänäjty yhöy nebiä Moisés jecy yhöøyyän. Je'e ja'a Dios jecy mäduun. Jaduñ hajxy hänäjty yhöøbä nebiä Meeghuung yhöyyän:

Wiindsøn Dios, cøxiä miich cuhdujt mjaanč tehñ miøødä. Møj jaanč miich mjaanč tehñ tiuñ.

Jaanč tehñ yhöy miich mguhdujt jaduñ. Miich mhanehmby wiinduhmyhagajpt.

⁴ Caj miich tii pojpä tii cädieey mmøødä. Nägøxiä miichä jäya'ayhajxy xwyiingudsähgø'øy. Nägøxiä hajxy miäna'añ coc mmøjjä coc mjaančä. Minaamb miich jäya'ayhajxy nägøxiä xwyiingudsähgø'øwa'añ,

ja'a hajxy wiinduhmyhagajtpä, je'eguiøxpä coo hajxy tøø yhixy tøø miädoy coo miich mguhdujt jiaanč tehñ yhöyyä.

⁵ Mänitøchä Diostsajtøjc nhijxhawaach jim tsajpootyp maa ja'a Dios yhäña'ayän.

⁶ Mänitä Diosmoonsähajxy jiiby piädsøømy, ja'a häyohnmøødpähajxy ja'a näjuxtujcpä. Poobwit hajxy hänäjty miøød jaanč tehñ wia'ads. Jimä orowøøn hajxy hänäjty miøødä chi'tsnähgøxp.

⁷ Mänitä orotsim hajxy cødu'ugjaty miooyyä. Tu'ugä animal jaduñ yejcy ja'a nämädaaxpähajxy hänäjty jim häñaabiä Dioswiinduum. Hujtsjatiä orotsim hänäjty.

Je'eduhñ ñänøømby coo ja'a Dios ja'a jäya'ayhajxy jiaanč tehñ yajcumädowa'añ, ja'a hajxy ca'a mäbøjpä. Cøjxta'axiøø ja'a Dios ñä'ägädä hity.

⁸ Jiiby Diostsajtøgooty, haagä joc jiiby pu'xwädijp. Jimä joc choon maa ja'a Dios möj jaanč yhitiän. Caj pøn jiiby hoy ñä'ägädä tägø'øwa'añ tsajtøgooty høxtä coonä ja'a Dios hänajty juxtujc-hooc tøø yajtsaačhpøcy ja'a jäya'ayhajxy ca'a mäbøjpä.

16

¹ Mänitøch nmädooyy coo jäya'ay møc quiapxy Diostsajtøgooty. Mänitä Diosmoonsä näjuxtujcpä ñämaayyä:

—Nøcx hajxy cuhmänactem jiiby naaxwiin ja'a orotsimjootypä. Je'eduhñ ñänøømby coo ja'a Dios jiaanč tehñ yajcumädowa'añ ja'a hajxy ca'a mäbøjpä.

² Mänitä Diosmoonsä tu'ug hoy quihmänactemy hädaa yaabä naaxwiin ja'a yhorotsimjootypä. Pønjetiä animalseñä hänajty møød ja'a hamøjpä, pønjetiä yhädiuunxay hänajty wiingudsähgøøyyäp, nägøxiä haxøøgpu'uds hajxy piaatä ja'a jaanč tehñ pi-ahmbä.

³ Mänitä Diosmoonsä miämetspä hoy quudemø'øy mejjiooty ja'a yhorotsimjootypä. Mänitä mejyñøø jiajty nebiä ho'ogyjiäya'añø'tiän. Cøjx yho'ogy mädyiijaty jiiby tsänaaby mejjiooty.

⁴ Mänitä miädägøøgpä hoy möjnøøjooty quudemø'øy ja'a yhorotsimjootypä møød jim nøøgopcjooty. Mänitä nøø jiajty nebiä nø'tiän.

⁵⁻⁶ Mänitä Diosmoonsä ja'a nøøgüendähajpä miänaañ:

—Wiindsøn Dios, caj miich tii pojpä tii cädieey mmøødä. Cøjxta'axiøø miich mhity. Hoy jaduhñ coo miichä jäya'ayhajxy tøø myajtsaačhpøcy, coo nø'ty hajxy tøø myaghu'ugy, je'eguiøxpä coo miich mgu'ug xyajpuhho'cä møødä miich mmädia'agy hajxy tøø xya-jwá'xäbä.

⁷ Mänitä tu'jäya'ay miänaañ maa ja'a altarän:

—Tøyhajt jaduhñ. Wiindsøn Dios, hoy jaduhñ coo miichä jäya'ayhajxy tøø myajtsaačhpøcy. Miich cuhdujt cøxiä mmøød.

⁸ Mänitä Diosmoonsä ja'a miämädaaxpä ja'a xøø yajwiingutemøøyy ja'a yhorotsimjootypä. Mänitä xøø quihdujtmooyy coo ja'a jäya'ay ñó'ogät.

⁹ Hoyhoyyä jäya'ayhajxy cøxiä tiooyy. Pero cabä yhäxøøgcuhdujt hajxy hänajty jia najtshixø'øwa'añ. Haxøøgiatiä Dios hajxy ñänøømy ja'a jim tsajpootypä. Cabä Dios hajxy piädaacy möj jaanč, hoyyä Dios cuhdujt jia møødä maa ja'a häyohngøxpän.

¹⁰ Mänitä Diosmoonsä miämägooxpä quudemøøyy maa ja'a animal hänajty yhäña'ayän, ja'a yhorotsimjootypä. Mänit cøjx wyiingoodsø'øy majatiä animal hänajty yhane'emiän. Mänitä jäya'ay tiots hajxy yajtsu'udsøøyy je'eguiøxpä coo hajxy hänajty jiaanč tehñ chaačhpøcy.

¹¹ Paadiä Dios hajxy haxøøgiaty ñänøømy. Cabä yhäxøøgcuhdujt hajxy hänajty jia najtshixø'øwa'añ.

¹² Mänitä Diosmoonsä ja'a miädädujcpä jiiby quudemøøyy Eufratesmöjnøøjooty, ja'a yhorotsimjootypä. Mänitä nøø tiøøch. Jaduhñä reyhajxy hänajty hoy ñaxø'øwa'añ, ja'a hajxy hänajty jim tshönda'agaambä maa ja'a xøø piädsømiän.

¹³ Mänitøchä haxøøgjuøhñdy tägøøg nhixpädsøømy. Jiiby hajxy piädsømøøyy maa ja'a dragón yhaawjootiän, møød maa ja'a animal yhaawjootiän, møød maa ja'a miämetspä animal yhaawjootiän, ja'a möjcu'ugongä miädia'agy hänajty yajwá'xäbä. Jaduhñä haxøøgjuøhñdy hajxy hänajty quiähxø'øgy nebiä yocchän.

¹⁴ Hix, möjcu'uhajxy je'e. Hoy-yagjuøøñäaty hajxy hänajty yajcähxø'øgy. Mänitä reyhajxy hoy nägøxiä wioyii, ja'a hajxy hädaa yaabä naaxwiimbä, coo hajxy nøcxy chiptuna'añ møødä Dioscøxpä, mänaa ja'a Dios yajnähdijjiän coo chiptuna'añ. Mäjaamøødä Dios jaduhñ.

¹⁵ Jaaya'ay jaduñ mānaamb: “Cab jaduñ pøn ñä'ägädä najuø'øy mänájoch hānajtý ngäda'aga'añ. Jootcujc je'e pønä Diosmädia'agy hānajtý hamuumdu'joot mǎbøjp. Jaduñ mǎwíinǎts hānajtý yhida'añ nebiǎ jujcypíän. Cabǎ hānajtý chāhdiunaannǎ.”

¹⁶ Mānitǎ reyhajxy yhamugøøyy maa xiøhatiän Armagedón ja'a hebreo-hayuuc-haamby.

¹⁷ Mānitǎ Diosmoonsǎ ja'a miǎjuxtujcpǎ cøxp quiuhdeemnajxy ja'a yhorotsimjootypǎ. Tu'ugǎ jāya'ay møc quiapxy maa ja'a Dios yhäñaadiaactän jim tsajpootyp:

—Tøø jaduñ miaañǎ.

¹⁸ Mānit wiǎdsujcy møødǎ hānee yaaxy. Mānitǎ hujx møc ñajxy. Cabǎ hujx jaduñ mānaaxøø ñaxy neby jaduñ tøø ñaxiän.

¹⁹ Mānitǎ møjcajpt ñiwia'xǎ. Tägøøghit jaduñ hoy miähmøøñǎ. Mānitǎ tøjc cøjx piумы wiinduhmyhagajpt. Mānitǎ Dios jāya'ayhajxy chaächtiuuñ hoyhoy, ja'a hajxy hānajtý jim tsǎnaabiǎ Babilonia-cajptooty.

²⁰ Mānitǎ tun cøjx yhadägoyyø'øy møødǎ naax ja'a hānajtý jim hijpǎ mejyquiujc.

²¹ Mānitǎ jāya'ayhajxy quiuhga'awøøyyǎ caandøøtstuu hamøjjaty. Juxychägüi'x kilo hānajtý näje'e jiemchǎ. Coø hajxy jiaanč tehñ chaächpøjcy, paadiǎ Dios hajxy haxøøgjaty ñāmaayy.

17

¹ Mānitøchǎ Diosmoonsǎ tu'ug xñāmejch, ja'a hajxy hānajtý näjuxtujcpǎ, ja'a orotsim hajxy hānajtý miøødǎbǎ. Mānitøch xñāmaayy:

—Jam nyajñähixø'øy coø ja'a cuhhiñdo'oxiøjc ja'a møjcpǎ yajtsaačhpøga'añii, ja'a jim häñaabiǎ mejywyiing.

² Tøø ja'a rey ja'a to'oxiøjc hajxy yaa miøødtsǎna'ay hädaa yaabǎ naaxwiin. Ja'a to'oxiøjcxpǎ ja'a jāya'ayhajxy nägøxiǎ yaa yhaxøøgwädity hädaa yaabǎ naaxwiin.

³ Mānitøchǎ Dioshespíritu xyajwiinhijxy. Mānitøchǎ Diosmoonsǎ jim xyajnoxcy maa pøn quia'a tsǎna'ayän. Mānitøchǎ to'oxiøjc tu'ug nhijxy. Animalnähgøxp hānajtý yhäña'ay. Tsaptsǎ animal ñi'x. Jimǎ mädia'agy hānajtý miøødǎ cujaay ja'a ñi'xcøxp. Haxøøgjatiǎ Dios hānajtý ñānømy. Juxtujcǎ quiopc hānajtý je'e y majcǎ quiaa'pt.

⁴ Ja hucy ja tsaptsǎ to'oxiøjc wyit hānajtý je'e. Oro hānajtý ñāandsømhajpy møødǎ hočhaa møød perlas. Orotsim hānajtý quiø'ogø'øwhajpy. Madiu'u haxøøgpǎ hānajtý jiiiby yhity orotsimjooty.

⁵ Jim hānajtý miøødǎ wyiinnähgopcxp cujaay: “Ja'a møjcajpt Babilonia hädaa. Ja'a cuhhiñdo'oxiøjc tiajhajxy hädaa. Ja'a haxøøgpǎ yhøjxǎ tiecy hädaaduhñ ja'a hädaa yaabǎ naaxwiimbǎ.” Cab jaduñ yhowyiinjuøøñǎjǎ.

⁶ Mānitøch nnajuøøyy coø ja'a to'oxiøjc hānajtý miu'ugyii. Ja'a Dioshuung ñø'tyhajxy hānajtý tøø yhúucǎxǎ møød hajxy tøø yagho'ogyíjǎbǎ je'egüiøxpǎ coø ja'a Jesucristo miǎdia'agy hajxy miäbøjcǎ. Coøch jaduñ nhijxy, njaanč tehñ yagjuøøyyhøch jaduñ.

⁷ Mānitøchǎ Diosmoonsǎ xñāmaayy:

—Tii jaduñ coø mwi'i yagjuø'øy. Nhawaanáanǎbøch miich ja'a to'oxiøjcxpǎ møødǎ animalcøxpǎ, ja'a to'oxiøjc yaghäñaabiejpiǎ, ja'a juxtujcpǎ quiopc, ja'a majcpǎ quiaa'pt.

⁸ Yøø animal tøø mwiinhíxiǎbǎ, jugyhajp hijty yøøduhñ. Hoy tøø jia cuhdägoy, jutpǎdsømaamb jadāhooc. Mānit noxcy yho'ogaannǎ. Pønjatiǎ xiøø jim ca'a miimb cujaay librojooty, coø ja'a animal hajxy yhíxǎt coø tøø jiuutpǎdsømy, mānit hajxy hoyhoy yagjuø'øwa'añ. Pero pønjatiǎ xiøø jim miimb cujaay librojooty, je'eds hajxy cøjxta'axiøø jugyhadaamb nebiǎ Dios jiuugyhatiän, je'egüiøxpǎ coø ja'a xiøøhajxy jim quiujáhyyǎxǎ mānaa ja'a naaxwiimbǎ yhawijy tiøø'xta'agüiän.

⁹ Pøn jaduñ wiinjuøøby, ween hädaaduhñ hoy yhuuc wiinjuø'øy: Yøø quiopc juxtujcpǎ, jaduñ mǎwíinǎts hajxy yøø nebiǎ juxtujcpǎ tunän. Jimǎ to'oxiøjc yhäña'ay.

10 Jaanä jaduñduhmbä, jaduñ mäwínäts hajxy yø'ø nebiä juxtujcpä reyän. Nämägooxc hajxy jaduñ tøø quiuhdägoonä. Tu'ug jada'ahaty guobiernähajnä. Jatu'ug, cahnä je'e tiägø'øyñä. Coö hänajty tøø tiägøøñä, cab jaduñ jiega'añ.

11 Haa ja'a animal tøø quiuhdägóyyäbä, tu'ugä näjuxtujcpä rey jaduñ. Miämetsc-hoocpä jaduñ tøø piädsóømgombä. Mänit nøcxy yho'ogaannä.

12 'Haa ja'a majcpä quiaa'pt tøø mwiinhíxiäbä, nämajcä reyhajxy jaduñmbä. Cahnä hajxy tiägø'øy gobiernähajpä. Jaduñnä mõjcuñdujt hajxy mio'owa'añii tu'hora quipxy mõøä animal.

13 Tu'ugmädia'aguiä reyhajxy yhity ja'a nämajcpä. Mänitä animal cuñdujt hajxy mio'owa'añ mõøä mäjaa.

14 Mänit hajxy tiägø'owa'añ tsiptuumbä maa ja'a Meeghuungcøxpän. Mäjäda'agaambä Meeghuung jaduñ. Hix, je'e ja'a mõjcuñdujt nä'ägä mõød. Pønjaty je'e jiamioødhajpy, Dioshuunghajxy je'eduhñ. Pedyii hajxy miäbøcy.

15 Mänitøchä Diosmoonsä xñämáaguiombä:

—Yø'ø mejy tøø mwiinhíxiäbä maa ja'a to'oxiøjc hijty yhäña'ayän, jaduñ mäwínäts yø'ø nebiä wiinduhmyhagajpt-tsohmñbän. Madiu'u hayuuc hajxy quiapxy.

16 Y yø'ø animal quiaa'pt tøø mwiinhíxiäbä ja'a majcpä, mänitä to'oxiøjc hajxy miähanhada'añ. Nähwa'ads høxwa'ads hajxy jaduñ ñähgue'egaannä. Chu'udsaañby hajxy jaduñ; mänit hajxy ño'oga'añ.

17 Ja'a Dios jaduñ tøø wyiinmahñdymo'oy coö hajxy jaduñ quiudiúnät nebiä Dios tøø yajñähdijjiän, coö hajxy tu'ugmädia'agy yhidät, coö ja'a animal hajxy quiuhdujtmó'owät, høxtä coonä hänajty tøø yhabaady nebiä Dios yajñähdijjiän.

18 Haa yø'ø to'oxiøjc tøø mwiinhíxiäbä, jaduñ mäwínäts yø'ø nebiä mõjcajptän maa ja'a reyhajxy nägøxiä xiøønaxiän.

18

1 Mänitøchä Diosmoonsä tu'ug njaag hijxy coö hänajty miänacy tsajpootyp. Mayyä cuñdujt hänajty miøøä. Haamb tsämaamb hänajty jaduñ. Hajaj jaduñ hädaa yaabä naaxwiin.

2 Mänit mõc yaaxy:

—Tøø ja'a mõjcajpt Babilonia quiøxy pumy. Jimä mõjcu'uhajxy chänaañä, mõøä haxøøgjuøhñdy madiu'ubä, mõøä haxøøghanimalhajxy jäyøøbiä.

3 Tøø ja'a jäya'ayhajxy nägøxiä quiøxy pahijxpä nebiä Babilonia haxøøgcuhdujt miøødän. Tøø ja'a reyhajxy miøødtsäna'ay. Tøø ja'a hajuubiädøjc-hajxy miäyøøjøøñä je'eguiøxpä coö ja'a Babilonia hijty cøxiä wiinä yaghøxhäyoy.

4 Mänitøchä jäya'ay nmädooy coö hänajty jim quiapxy tsajpootyp:

—Pønjátyhøch nhuunghajpy, mdsóonäp hajxy jim maa yø'ø cajptän, neby hajxy jaduñ mga'a pajatcø'øwät, neby hajxy jaduñ mga'a padsaaçhpøgät.

5 Haa ja'a jäya'ayhajxy jim tsänaabiä Babilonia, tøø hajxy mõj may jiaanç tehñ quiädieey. Hoyhoyyä Dios jiaanç tehñ yajtsaaçhpøga'añ.

6 Jaduñnä Babiloniatsohmñbä hajxy mduundägätsät nebiä wiinghäna'c hajxy tøø tiuñän. Mejtsjäduhñtiä hajxy myajtsaaçhpøgät.

7 Tøø hajxy hanaxiä jiaanç tehñ ñiguiumayii. Cøxiä wiinä hajxy tøø jiaanç tehñ yaghøxhäyoy. Paady hajxy mjaanç tehñ yajtsaaçhpøgät. Jaduñ quiopcooty jia wi'i miäna'añ: “Jaduhñhøch chaa nhäña'ay nebiä mõjcuñdujtmøødpän. Nä'a jájtäbøchä nnihyhap jim. Cábøch jaduñ mänaa nnä'ägä jootmayhada'añ.”

8 Coö jaduñ miäna'añ, paquiä chaaçhpøga'añ. Piaadaambiä yuu mõøä häyohn mõøä ho'og tägoy. Toyáannäp je'eduhñ. Ja'a Dios jaduñ mänaañ coö jaduñ chaaçhtiunøøjät. Jaayá'ayäts mõjcuñdujtmøød.

⁹ Haa ja'a reyhajxy, ja'a to'oxiøjc hajxy hānajtj tøø miøødtsānā'ayābā, coo hajxy jaduhñ yhixāt coo hānajtj tiooñā, mānit hajxy ñājø'øw ñāxuudsā'añ.

¹⁰ Tsāhgø'ø-tsāhgø'ø hajxy hānajtj jāguem tiāna'awa'añ. Mānit hajxy miāna'ana'añ:

—Miič Babiloniacajpt, may miič cuhdujt hijty mjaanč tehñ miøødā. Pero paquiā mjaanč tehñ quiuhdāgooyy.

¹¹ Mānitā hajuubiädøjc-hajxy ñājø'øw ñāxuudsāambā, je'eguiøxpā coo ja'a tioogyhajxy quia'a nā'āgādā juyāāñā.

¹² Madiu'u toogy hajxy hānajtj miøødā: oro, møødā plata, møødā hočhaa, møødā perlas, møødā howyit, møødā linowit, møødā sedawit, ja hucy ja tsapts. Jaduhñā quepy hajxy hānajtj madiu'u miøødābā ja'a pa'agxuu'pā, ja'a tsowjatypā, møødā tijatiā elefantetøødshadeēñdiuc-hādiūñābā, møødā hobiujxt, møødā pujxt, møødā mārmołtsaa.

¹³ Jaduhñā canela hajxy hānajtj miøødābā, møødā jøø'xychooy ja'a jaanč tehñ pia'agxuu'pā, møødā poom, møødā mirra, møødā perfume, møødā vino, møødā hon, møødā harina hoybā, møødā trigo, møødā jāyujc, møødā waj, møødā meeg, møødā cuaay, møødā carreta, møødā moonsādøjc jamiājuyyābā.

¹⁴ Mānitā hajuubiädøjc-hajxy miāna'ana'añ:

—Tøø miič xquiøxy pøjcā tijaty miič mhadsojpy møødā mmāyøøhadyíjābā.

¹⁵ Ñājø'øw ñāxuudsāambiā hajuubiädøjc-hajxy, ja'a hajxy hānajtj tøø miāyøøj'ø'yābā maa yø'ø cajptān. Tsāhgø'ø-tsāhgø'ø hajxy hānajtj tiāna'ay jāguem.

¹⁶ Mānit hajxy miāna'ana'añ:

—Tøø yø'ø møjcajpt jiaanč tehñ chaačhpøcy. Jaduhñ hijty je'e nebiā to'oxiøjc howyitmøødpān ja hucy ja tsapts, møødā oromøødpā, møødā hočhaamøødpā, møødā perlasmøødpā.

¹⁷ Paquiā ja'a miāyøøhadyíjābā tøø quiøxy pøjcāxā.

Haa ja'a jāya'ayhajxy hānajtj wādijpā barcojooty, jāguem hajxy hānajtj tiāna'awaambā, møødā wyiindsøñhajxy, møød hajxy nā'ā wādijpā.

¹⁸ Coo hajxy yhijxy coo ja'a cajpt hānajtj tiooñā, mānit hajxy yaaxy:

—Cab mādyii cajpt ñā'āgādā mābaady nej yø'ø møjcajpt hijtiān.

¹⁹ Mānit hajxy tiägøøyy jøøbiā xuu'tspā. Mānit hajxy yāaxcombā:

—Tøø yø'ø møjcajpt jiaanč tehñ chaačhpøcy. Haa ja'a cubarcohajxiā, tøø hajxy jia māyøøjøñā coo yø'ø cajpt hijty jiaanč tehñ miāyøøjā. Paquiā tøø quiuhdāgooñā.

²⁰ Pøñjaty jim tsānaaby tsajpootyp, ween hajxy nāgøxiā mxoonda'agy, møødā Diosquexy møødā Dioshuung, je'eguiøxpā coo ja'a Dios yø'ø cajpt tøø yajcumādoy.

²¹ Jaanč tehñ miøcā Diosmoonsā tu'ug. Mānitā cruundātsaa yajpādø'cy. Mānit miejyquia'adsøøyy. Mānit miānaañ:

—Jaduhñdsā Babiloniacajpt jiadaambā yhabetaambā. Cab jaduhñ mānaa ñā'āgādā cāhxø'øgaañā.

²² Cab jaduhñ jim pøñ xiu'uxaannā. Caj pøñ jim tiunaannā. Cab hajxy jim jioødsaañā.

²³ Ni jøøn jim quia'a toyaannā. Cab hajxy jim piøgaañā yhu'ugaannā. Paadiā Babiloniacajpt jaduhñ jiada'añ yhabeta'añ je'eguiøxpā coo ja'a cu'ug jiaanč tehñ miāyøøjā. Tøø ja'a jāya'ayhajxy nāgøxiā piahixy ja'a Babilonia yhaxøøgcuhdujt.

²⁴ Haa ja'a Diosquexy møødā Dioshuunghajxiā, ja'a hajxy yaghó'cābā, jimā ñø'tyhajxy tøø miāhmø'øy maa yø'ø cajptootiān. Hix, cu'ug jaduhñ jatcøøyy.

19

¹ Mānitøch nmādooyy majiāya'ay hānajtj jim ya'axy tsajpootyp: Møj jaančā Dios jaduhñ. Jaaya'ay hajxy xyajwaats xyajtséjcam. Tsøg hajxy wiingudsāhgøøyyām coo møcmājaa miøødā.

² Hoyyä Dios quiudiuñ coo ja'a cuhindo'oxiøjc hoy piäda'agy haducytium, je'eguiøxpä coo ja'a yhaxøøgcuhdujt piahíxäxä ja'a jäya'ayhajxy nägøxiä, y coo tøø yagho'ogy ja'a Diosquexypä møødä Dioshuung.

Coo ja'a Dios ja'a ca'awiindøybä yajcumädowa'añ, yejpiä tøyhajt jaduhñ; cab nä'ä nägoobä yajcumädoy.

³ Mänitä majiäya'ayhajxy miänáangombä:

Møj jaančhä Dios. Cøjxta'axiøø yø'ø cuhindo'oxiøjc yhatoy yhapøgø'øwa'añ.

⁴ Mänitä majiäya'ay ja'a Dios hajxy wyiinijcädaacy, ja'a hajxy nähii'xmädaaxpä møødä animalhajxy ja'a nämädaaxpä. Mänit hajxy miänaañ:

—Tøyhajt jaduhñ, mõj jaančhä Dios.

⁵ Mänitä jäya'ay jim tu'ug quiapxy maa ja'a Dios hänajty yhäña'ayän:

Näma'aw ja'a Dios hajxy coo miøjjä coo jiaančhä, pønjaty Diosquexy, pønjatiä Dios wiingudsähgøøby, miøjjä miuutscä.

⁶ Mänitøch nmädooy coo majiäya'ay hänajty quiapxy. Jaduhñ yajmädooy nebiä mejy møc yahøøchän, nebiä hänee møc ya'axiän:

Møj jaančhä Dios jaduhñ. Tøø tiägøøñä gobiernähajpä.

Jimä mõjcuhdujt miøødä.

⁷ Tsøg hajxy jootcugøøyyäm, tsøg hajxy xoonäacäm. Tsøgä Dios hajxy mõj jaanč pädäacäm.

Tøø yhabaatnä coo ja'a Meeghuung piøgaanä. Tøø ja'a jaxie'eb ñiyhahixøøyyänä.

⁸ Howyit jaduhñ jaanč tehñ yajpøgø'øwáanäp, wa'adspä, haambä tsämaambä, nømä majiäya'ayhajxy miänaañ. Haa ja'a howyitä, je'eduhñ ñänøømby coo ja'a Dioshuung hajxy hänajty hoy tøø wiädity hädaa yaabä naaxwiin.

⁹ Mänitøchä Diosmoonsä xñämaayy:

—Cujaay jaduhñ: “Jootcujc hajxy yhity pønjaty tøø yajwoy tøø yajwich maa ja'a Meeghuung piøga'añän.”

Mänitøch xñämáaguimbä:

—Tøyhajtä Diosmädia'agy jaduhñ.

¹⁰ Mänitøchä Diosmoonsä nja wiinijcädaacy. Nja wiingudsähgø'øwáanhøch jaduhñ. Mänitøch xñämaayy:

—Ca'ačh xwyiingudsähgø'øy. Høøchä Dios xmioonsähajp nej mijts xmioonsähajpän, coo mijtsä Jesucristo miädia'agy hoy myajtuunä. Ja'a Dios mäbøcy mwiingudsähgø'øwäp.

Tøyhajtä Jesucristo miädia'agy. Tu'ugmädia'agy hajxy yhity, pønjatiä Jesucristo miädia'agy yajwá'xäp, pønjatiä Jesucristo capxpaatp.

¹¹ Mänitøch tsajpootyp nhijxy coo tøø yhawa'ačh. Mänitøchä jäya'ay tu'ug nhijxy coo ja'a ca'awiindøybä hoy yajcumädowa'añ, coo hoy chiptuna'añ. Paady xiøhaty ja'a hoguiudiuumbä, ja'a tøyhajtyejpä. Poobcuaañähgøxp hänajty yhäña'ay.

¹² Jaduhñä wyiin hänajty quiähxø'øgy nebiä jøøn tioyyän. Mayyä cuhjén hänajty miøødä cuhdum. Jimä xøø hänajty miøødä cujaay. Ni pøn hänajty quia'a najuø'øy tii xøø je'e. Je'eduhñ nidiuhñ najuøøby.

¹³ Nø'tiä wyit hänajty tøø yaghucy. Ja'a Diosmädia'agy hänajty xiøhaty.

¹⁴ Jaanč tehñ miäjiäya'ay hänajty panøcxp haagä poobcuaañähgøxp. Poobwit hoybä hajxy hänajty miøød, jaanč tehñ pioob jaanč tehñ wia'ads.

¹⁵ Jim yø'øya'ay espada jaanč tehñ jløjp hänajty miøødä yhaawjooty. Je'e ja'a jäya'ay hänajty yajpuxaamby. Jaanč tehñ miøc guiobiernähada'añ. Hoyhoyyä jäya'ay chaächtiuna'añ nebiä Dios ja'a jäya'ay yajcumädooyän.

¹⁶ Jimä xiøø hänajty miøødä cujaay wyitcøxp møødä piuuguiøxp: “Hädaa mõjcuhdujtmøød; ni pøn mõjcuhdujt jaduhñ quia'a møødä.”

¹⁷ Mänitøchä Diosmoonsä tu'ug nhijxy coo hänajty jim tiäna'ay maa ja'a xøøjän. Mänit jaanč tehñ miøc yaaxy. Ja'a luudhajxy mõjyaaxä, ja'a hajxy cøxp jäyøøwiädijpä:

—Min hajxy tsu'uds. Ja'a Dios hajxy jaduhñ xmi'o'owaamb.

¹⁸ Jäya'ay hajxy nägøxiä mdsu'udsamby, miøjjä miuutscä, hopiønä, møødä rediøjc-hajxy, møød hajxy tuumbä soldadowiindsøn, møød hajxy møcmäjaamøødpä, møødä cuaay, møød hajxy cuaayhäñabiä.

¹⁹ Mänitøchä animal nhijxy. Møødä reyhajxy hänajty jim choonä møødä quiu'ughajxy. Tsiptunaamb hajxy hänajty jaduhñ møødä jaaya'aguiøxpä ja'a cuaañähgøxp wädijpä møødä quiu'ug.

²⁰ Mänitä animal miajtsä møødä craa ja'a jaančh tehñ jiäya'awyiinhøhmbä. Tøø ja'a craa hänajty yajcähxø'ogy hoy-yagjuøøñäjaty maa ja'a animal wyiinduumän. Jaduhñä craa hänajty tøø wyiinhøøñ pønjaty yø'ø animal seña hänajty møødhajtäp, pønjaty yø'ø animal yhädiuunxay hänajty tøø wyiingudsähgøøyyä. Mänit hajxy nämetsc jioønjuipøøyyä maa azufre hänajty tioyyän.

²¹ Mänitä quiu'ughajxy yaghó'cäxä. Jaaya'ay jaduhñ mäyagho'c, ja'a hänajty cuaayhäñabiä. Espadahaam miäyagho'cy, ja'a jaančh tehñ jiojpä, ja'a hänajty jim miøødpä yhaawjooty. Mänitä ho'ogyjiäya'ayhajxy chu'tsä. Ja'a luudhajxy jaduhñ mädsu'ts jaančh tehñ quiu'uxiä.

20

¹ Mänitøchä Diosmoonsä tu'ug nhijxy. Jim tsajpootyp hänajty miänacy. Jimä juthawaatst hänajty quiø'øgonhaty, ja'a hänajty jaančh tehñ quiøøcpä. Jimä cadena hänajty quiø'øwitshajpä.

² Mänitä møjcu'ugong miajtsä, ja'a xøhajpä Satanás. Ja'a dragón je'e møødä jecy-chahñdy. Mänit quiø'øxojtsä tiecyxiojtsä cadenaahaam.

³ Mänit quiujuipøøyyä jutjooty. Mänit yhawäguiit'sä. Mänitä Diosmoonsä yhäho'ch maa ja'a juthaawän. Mil jomøjtä møjcu'ugong hänajty jiiby yhida'añ, nebiä jäya'ay jaduhñ quia'a wiinhøhñät. Coø hänajty mil jomøjt tøø yhabejnä, mänit yhøxmadsa'añii. Pero cab hänajty jecy yajwädita'añii coø hänajty tøø yhøxmachii.

⁴ Mänitøch nhijxy coø cu'ughajxy hänajty yhäña'ay. Haagä møjcuhdujtmøød hajxy hänajty coø hajxy nägøxiä yajtøyhajtyégät. Mänitøchä jäya'ayä yhäñämähajxy nhijxä, pønjaty hänajty tøø yo'puxyii. Paady hajxy yo'puxjä coø hajxy hänajty tøø Dyiosmädia'agy-yajwa'xy coø ja'a Jesucristo Dyioshuungä. Cabä animal hajxy hänajty tøø wyiingudsähgø'øy, ni ja'a yhädiuunxay. Ni cab hajxy hänajty tøø piädäacäxä ja'a animal seña, ni wyiinnähgøpcøxp ni quiø'øgøxp. Mänitøch nhijxy coø hajxy jiuypiojñä. Mänitä Jesucristo hajxy miøødtägøøyy gobiernähajpä. Mil jomøjt hajxy hänajty tiuna'añ.

⁵⁻⁶ Jayøjp hajxy jiuypiojtsøhñ. Jootcujc hajxy yhity. Nebiä teediän ja'a Dios hajxy miøødtuñ. Cab hajxy chaächtiuna'añii. Coø mil jomøjt hänajty tøø yhabety, mänitä jäya'ay yhäñämähajxy jiaac jiuypiojgaambä nägøxiä, ja'a hajxy hänajty hoy tøø quia'a wäditiäbä. Mänit hajxy yajcumädowa'añii.

⁷ Coø mil jomøjt hänajty tøø yhabejnä, mänitä Satanás yhøxmadsa'añii.

⁸ Mänit tiägø'øwa'añ jäya'awyiinhøhmbä wiinduhmyhagajpt. Yajwiinhøønaambä Gog møødä Magog. Mänit hajxy yhamugø'øwa'añ møødä quiu'ughajxy coø hajxy hänajty chiptuna'añ. Jaančh tehñ miay hajxy hänajty jaduhñ.

⁹ Wiinduhmyhagajpt hajxy choona'añ. Mänitä Dioshuunghajxy jiuhbic jiuhgøð'øwa'añii. Mänitä Dios jøøn yajca'awa'añ. Cøxy toyaambä Magoghajxy jaduhñ.

¹⁰ Mänitä møjcu'ugong jioønjuipøøyyä maa ja'a azufre hänajty tioyyän, maa ja'a animalhajxy hänajty tøø jioønjuipø'øyijän, møødä craa hänajty tøø jiäya'awyiinhøøñbä. Cøjxta'axiøø hajxy jiiby chaächpøga'añ xøømdsuhñ.

¹¹ Mänitøchä Dios nhijxy coø hänajty yhäña'ay. Poobä yhäñaabiejt hänajty cruundä. Mänitä naaxwiimbä yhadägøøyy maa ja'a Dioswiinduumän møød tsajtcøxp.

¹² Mänitøchä hääñämähajxy nhijxy miøjjä miuutscä. Jim hajxy hänajty tiäna'ay Dioswiinduum. Mänitä Dios ja'a libro yaghawaach møødä libro wiingpä. Jiibiä xiøøhajxy hänajty myiñ cujaay ja'a hajxy jugyhadaambä cøjxta'axiøø nebiä Dios jjugyhatiän. Mänitä Dios ja'a libro quiapxy pø hoyyä hääñämähajxy hänajty tøø jäya'ayhaty, pø caj.

¹³ Mänitä hääñämähajxy jiiby piädsøømy mejjiooty, ja'a hajxy hänajty jiiby tøø yho'oguiäbä. Jaduhñ hajxy jiiby piädsøømbä naaxpa'c. Ja'a hajxy hänajty hoy tøø jäya'ayhätibä, hawa'adstuum hajxy hoy miähmøøñä. Ja'a hajxy hänajty hoy tøø quia'a jäya'ayhätibä, haducytium hajxy hoy miähmø'øy.

¹⁴⁻¹⁵ Mänitä møjcu'ugong jøønjooty piädaacä. Mänitä hääñämähajxy jøønjooty quiujuipøøyyä, pønjatai xiøø hänajty ca'a miimb cujaay librojooty. Cab hajxy cøjxta'axiøø jugyhada'añ nebiä Dios jjugyhatiän.

21

¹ Mänitøchä tsajpootyp jemybiä nhijxy møødä naaxwiin jemybiä. Tøø ja'a tuctsajpootyp hänajty tiägoonä møødä tucnaaxwiimbä. Møødä mejy hänajty tøø tiägoobiä.

² Mänitøchä Dioscajpt nhijxy, ja'a Jerusalén jemybiä. Jim hänajty miänacy tsajpootyp. Jim hänajty tøø choon maa ja'a Diosän. Yajxonñ hänajty quiahxø'øgy nebiä jaxie'eb ñiyhahixø'øyijän coo hänajty piøga'añ.

³ Mänitä jäya'ay møc jiaanč tehñ quiapxy jim tsajpootyp:

—Huug hix, jimä Dios tøø chänaadiaacpøcy maa ja'a jäya'ayhajxiän. Quiu'ughadaambiä Dios ja'a jäya'ayhajxy. Wiingudsähgø'øwáañap ja'a Dios jaduhñ.

⁴ Jaduhñä Dios miäna'ana'añ coo ja'a jäya'ayhajxy quia'a jøøñät. Cab hajxy pia'ambedaannä, yho'ogaañnä. Cab hajxy jio'øwaañnä xiuudsaañnä. Tøø yø'øduhmbä hänajty quiøxy cuhdägoonä.

⁵ Mänitä Dios miänaañ:

—Tøøch cøxiä wiinä nhädiuundägach.

Mänit miänaañgombä:

—Cujaay jaduhñ. Tøyhájthøch nmädia'agy jaduhñ. Cábøch nhøhnda'agy.

⁶ Mänitøch xñämaayy:

—Tøø jaduhñ miaañä. Høøch nyajtsohndaac; jaanä høøch nyajmaabiä. Pønä jioot hamuumdu'joot tøø piäda'agy coo jjugyhada'añ cøjxta'axiøø nébiøch njugyhatiän, nguhdujtmó'owäbøch jaduhñ coo jaduhñ jjugyhádät.

⁷ Pøn mäjädaacp, je'e jugyhadaamb cøjxta'axiøø nébiøch njugyhatiän. Høøch cøjxta'axiøø xTieedyhadaamb. Nhuunghadáambiøch jaduhñ.

⁸ Haa ja'a hajxy jaduhñ ca'a mäjädaacpä, jøønjooty hajxy nøcxy quia'awa'añ maa ja'a azufre tioyyän. Jiiby hajxy cøjxta'axiøø chaačhpøga'añ, møød hajxy ca'a mabøjpä, møød hajxy ca'awiindøybä, møød hajxy jäya'ay-yagho'pä, møød hajxy amigähamädoobä, møød hajxy mäwijts mäbäxujpä, møød hajxy quepychechwiingudsähgøøbiä, møød hajxy høhndaacpä.

⁹ Mänitøchä Diosmoonsä tu'ug nhijxy, ja'a hajxy näjuxtujcpä, ja'a orotsim hajxy miøødpä cødu'ug. Jimä tsø'ty häyohn hänajty miøødä ja'a juxtujcpä orotsim. Mänitøch xñämaayy:

—Jamä jaxie'eb nyajnahixø'øgy ja'a Meeghuung tio'oxiøjc-hadaambiä.

¹⁰ Nwiinhijxypøch hänajty; ja'a Dioshëpíritøch hänajty xyajwiinhijxp. Mänitøchä Diosmoonsä xwiioonøcxy maa ja'a cøxptunguhduumän. Mänitøchä Dioscajpt xyajnahixøøyy. Jerusalén xiøhaty. Jim hänajty miänacy tsajpootyp maa ja'a Diosän.

¹¹ Jaanč tehñ yhaamb jaanč tehñ chämaambä cajpt hänajty nebiä Diosän. Jaduhñ hänajty yhaambä chämaambä nebiä høchaa jaanč tehñ chowbän, nebiä jaspetsaajän. Jaduhñ hänajty tiø'xiä nebiä hijxtän.

12 Piquiä ja'a cajpt quiuraa hänajty yhamuu'dsø'øguiä. Jaanč tehñ quiøxp hänajty yhamuu'dsø'øguiä. Majmetscä curaahaaw hänajty miøødä. Majmetscä Diosmoonsähajxy hänajty jim yhadäna'ay. Cødu'ugjaty hajxy hänajty yhadäna'ay maa ja'a curaa-haawän. Tu'ugjatiä curaahaaw hänajty miøødä cujaay nebiatiä judíoshajxy xiøhaty ja'a nämajmetscjatypä.

13 Tägøøgä curaahaaw hänajty xøøbädsøømypiä; tägøøg hänajty tsuxpojpejpä; tägøøg hänajty jøømbojmanajpä; tägøøg hänajty xøøguhnajxpä.

14 Majmetscä tsaä hänajty jii by maa hänajty miuu'dsø'tsooñän. Jim tsaagøxp hänajty quiujaayä nebiatiä Meeghuungä quiuguexyhajxy hänajty xiøhaty, ja'a nämajmetspä.

15 Haa ja'a Diosmóonsøch hänajty xmiøødmädiaacpä, jimä oropaxyquipxt hänajty miøødä. Je'e ja'a cajpt hänajty yajquipxaamby møødä curaahaaw møødä yhamuu'dsø'øgy.

16 Haa ja'a cajpt, hamädaaxteec hänajty je'e. Jaduhñtiä yoñä nebiä yhoocän. Mänitä Diosmoonsä ja'a cajpt qyipy ja'a oropaxyquipxthaam. Mejtsmil cumejtsmägo'x kilómetro hänajty yoñä; jaduhñ hänajty quiøxpä; jaanä jaduhñ yhooc hänajtypä.

17 Haa ja'a yhamuu'dsø'øguiä, tägøøghii'x cumädaaxc metro hänajty quiøxpä.

18 Haagä jaspetsaahädiuñ ja'a hamuu'dsø'øgy hänajty. Haagä oro ja'a cajpt hänajty. Jaduhñ hänajty quiähxø'øgy nebiä hijxt jaanč tehñ tiø'xypän.

19 Haa ja'a majmetspä tsaä hänajty jii by hijpä maa ja'a yhamuu'dsø'øgy miuu'dsø'tsooñän, haagä hočhaa hänajty miøød. Haa ja'a jayøjpä tsaajä, jaspe hänajty miøød; ja'a miämetspä, zafiro hänajty miøød; ja'a miädägøøgpä, ágata hänajty miøød; ja'a miämädaaxpä, esmeralda hänajty miøød;

20 ja'a miämägooxpä, ónice hänajty miøød; ja'a miädädujcpä, cornalina hänajty miøød; ja'a miäjuxtujcpä, crisólito hänajty miøød; ja'a miäductujcpä, berilo hänajty miøød; ja'a miädaaxtujcpä, topacio hänajty miøød; ja'a miämajcpä, crisoprasa hänajty miøød; ja'a miämajtu'ugpä, jacinto hänajty miøød; ja'a miämajmetspä, amatista hänajty miøød.

21 Ja'a majmetspä curaahagø'øw, haagä perlahädiuñ hänajty cødu'ugjaty. Haa ja'a mõjtu'u, orohädiuñ je'e. Jaduhñ hänajty quiähxø'øgy nebiä hijxt tiø'xiän.

22 Cábøch tsajtøjc jim nnä'ägädä hijxy maa yø'ø cajptän, je'eguiøxpä coo ja'a Dios jim chäna'ay møødä Meeghuung. Møjcuhtuä Dios miøød.

23 Haamb tsämaambä Dios jim yhity møødä Meeghuung. Paadiä xøø jim quia'a hañ ni ja'a po'o.

24 Coo ja'a Dioshajxy jim yhañ chämamy, paadiä jäya'ayhajxy jii by wiädita'añ, ja'a hajxy hänajty tøø ñähwá'achäbä. Møødä reyhajxy jii by wiäditaambä. Yajmedsaamby hajxy mädyijaty hoy yajxón.

25 Cabä curaahaaw mänaa yhaduga'añ. Cab jaduhñ mänaa wyiingoodsø'øwa'añ maa yø'ø cajptän.

26 Medsaambä jäya'ayhajxy jim Dioswiingudsähgøøbiä.

27 Cabä haxøøgpä jii by mänaa tiägø'øwa'añ cajptooty, ni ja'a jäya'ayhajxy ca'awiindøybä ni ja'a høhndaacpä. Jagooyyä jäya'ayhajxy jii by tiägø'øwa'añ pønjetiä xiøø jii by miimb cujaay librojooty ja'a Meeghuung miøødpä. Jaaya'ayädshajxy cøjxta'axiøø jugyhadaamb nebiä Dios jii gyhatiän.

22

1 Mänitøchä Diosmoonsä mõjnøø tu'ug xyajnähiøøyy jaanč tehñ tiø'xy nebiä hijxtän. Jim hänajty piädsømmø'øy maa ja'a Dios ja'a Meeghuung hänajty miøødhäñ'ayän. Ja'a mõjnøø jaduhmbä, yejpiä jugyhajt jaduhñ.

2 Møjtu'ugujcä mõjnøø hänajty piäyø'øgy. Mejtsnøøba'a ja'a quepychaa hänajty tu'ug tiäna'ay, ja'a jugyhajtyejpä. Majmetshoocä quepychaa hänajty tiøømbety tu'jomøjtpä.

Wiindu'ugäpo'ojaty hänajty tiøømhaty. Ja'a yhaayhaamä jäya'ayhajxy ñähwa'açh wiinduhmyhagajpt.

³ Cabä haxøøgpä jim̄ yajpaada'añ. Hix̄, jim̄ä Dioshajxy yhäña'awa'añ møødä Meeghuung. Jim̄ä mióonsäm wyiingudsähgø'øwa'añijäm.

⁴ Jaduhñä wyiin̄ jiojphajxy yhixáanäxä. Haa ja'a Dios xiøøhajxiä, jim̄ cujaay miøødhadaanäxä maa ja'a mioonsä wyiinnähgopcøxpän.

⁵ Cab jaduhñ mänaaxøø wyiingoodsø'øwaanä. Cabä xøø jim̄ yhanaannä, ni jøøn jim̄ quia'a hajajaannä. Ja'a Dios jim̄ hajajaamb cudøø'xaamb. Haa ja'a hajxy jim̄ tsänaabiä, cøjxta'axiøø hajxy jim̄ guiobiernähada'añ.

⁶ Mänitøchä Diosmoonsä xñämaayy:

—Tehm̄ tiøyhajt hädaa mädia'agy jaduhñ. Haa ja'a Diosä, quiejx ja'a quiuguexy jaduhñ coo ja'a mioonsä nøcxy yhawáanäxä coo miäbodhaty tijaty jadaañäp tunáañäp. Ja'a Dios jaduhñ najtscapxøøyy —nømhøchä Diosmoonsä xñämaayy.

⁷ —Mobädájpøch jiiiby nhäda'aga'añ —nømä Dios miänaañ.

Jootcuyc yhity pønhatiä Diosmädia'agy hoy cudiumb nej yaa myiñän cujaay hädaa librojooty.

⁸ Høøch jaduhñ tøø nhixy tøø nmädoy, høøch Juanhajpä. Cooch nwiinhijxpädøøyy, mänitøchä Diosmoonsä nwiinjicädaacy, ja'açh hänajty tøø xyajwiinhixiäbä; nja wiingudsähgø'øwáanhøch jaduhñ.

⁹ Mänitøch je'e xñämaayy:

—Ca'açh xwyiingudsähgø'øy. Høøchä Dios xmioonsähajp nej mijts jaduhñ xmioonsähajpän coo ja'a Diosmädia'agy hajxy myajwa'xy. Pønhatiä hoy cudiumb nej yaa myiñän cujaay hädaa librojooty, moonsähájtäp hajxy je'ebä ja'a Diósäm. Ja'a Dios mäbøcy hajxy mwiingudsähgø'øwäp.

¹⁰ Mänitøch xñämáaguimbä:

—Tøø miäbodhaty coo ja'a Diosmädia'agy tiøjiada'añ nej yaa myiñän cujaay hädaa librojooty. Paady, cabä Diosmädia'agy yu'uèch myaghídät. Nax̄y mdehm̄ yajwá'xät.

¹¹ Weenä ca'awiindøyhäna'c-hajxy jiaac jatcø'øy haxøøg. Weenä hoyhäna'c-hajxy jiaac cudiuñ hoy nebiä Dios yhane'emiän. Dioshuung hajxy je'eduhñ —nømhøchä Diosmoonsä xñämaayy.

¹² —Tøyhajt jaduhñ. Mobädájpøch jiiiby nhäda'aga'añ. Nøcxáambøchä jäya'ayhajxy nbäda'aga'añ hodiium, ja'a hajxy hoy tøø quiudiñäbä. Haa ja'a jäya'ayhajxy tøø quia'a cudiuñäbä, haxøøgtúumhøch hajxy nøcxy nbäda'aga'añ.

¹³ Høøch cøxiä nyajtsohndaac. Høøch jadähooc cøxiä nyajmayáangombä —nømä Dios miänaañ.

¹⁴ Jootcuyc hajxy yhity pønhatiä nähwaatp. Je'edshajxy jiiiby tägø'øwaamb Dioscajptooty. Je'edsä cuhdujt hajxy mo'owáañäp coo ja'a tøømdsa'am hajxy jioø'xät ja'a jugyhajtyejpä.

¹⁵ Pero cabä ca'awiindøyhäna'c-hajxy jiiiby tiägø'øwa'añ, ni ja'a mäwijtspä ni ja'a mäbäxujpähajxy, ni ja'a amigähamädoobähajxy, ni ja'a jäya'ay-yagho'pähajxy, ni ja'a quepy-chechwiingudsähgøøbiähajxy, ni ja'a høhndaacpähajxy.

¹⁶ —Høøch Jesucristo, tøøchä nguguexy nguexy coo ja'a hermanohajxy cøxiä yhawáanäxät. Høøchä rey David nhaphajpy nhoc-hajpy. Y xyhaphajp xyhoc-hájpøch je'ebä. Høøch, jaxiøømhájpøch høøch —nømä Jesucristo miänaañ.

¹⁷ Jaduhñä Dioshespíritu miänaambä:

—Min̄ —jaduhñä Meeghuung tio'oxiøjc miänaambä.

Pøn̄ jaduhñ mädoob, ween jaduhñ miänáambät:

—Min̄.

Pønä jioot pädaacp hamuumdu'joot coo cøjxta'axiøø jiugyhada'añ nebiä Dios jiugyhatiän, yagjyghadaañäp jaduhñ nebiä jiugyhatiän. Cab jaduhñ yagjuya'añii.

¹⁸ Pønjatiä Diosmädia'agy hamädoowhijp nej yaa myiñän cujaay hädaa librojooty, nnämäabiøch jaduhñ coo ja'a mhamdsoo mädia'agy hajxy mga'a yajmäjaayø'øwät. Coo hajxy jaduhñ mjatcø'øwät, mänitä Dios hajxy xjiaanč tehñ yajtsaachpøgät nej yaa jaduhñ myiñän cujaay hädaa librojooty.

¹⁹ Y coo hajxy näje'ejaty mbuhgónät, cabä Dios hajxy xyagjugyhádät cøjxta'axiøø neby je'e jiugyhatiän, nej yaa myiñän cujaay hädaa librojooty. Cab hajxy jiiby xyajtägø'øwät Dioscajptooty.

²⁰ Jaaya'ay jaduhñ mädiaacpä, je'eduhñ mänaamb:

—Tøyhajt jaduhñ. Mobädájpøch jiiby nhäda'aga'añ —nømä Dios miänaañ.

Amén. Min paquiä Jesucristo. Miičh højts nWiindsøñhajpy.

²¹ Ween mijtsä Jesucristo ja'a hoyhajt ja'a weenhajt nägøxiä xmio'oy. Amén.